


Tuhun cha sañahá ra
Jesucristo chi yo



New Testament in Mixtec, Jamiltepec (MX:mxt:Mixtec,
Jamiltepec)

**Tuhun cha sañahá ra Jesucristo chi yo
New Testament in Mixtec, Jamiltepec (MX:mxt:Mixtec,
Jamiltepec)**

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

© 1983, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
7411d349-0f34-5963-987e-74457a7bad38

Contents

San Mateo	1
San Marcos	42
San Lucas	68
San Juan	113
Hechos	144
Romanos	183
1 Corintios	200
2 Corintios	216
Gálatas	227
Efesios	233
Filipenses	239
Colosenses	243
1 Tesalonicenses	247
2 Tesalonicenses	251
1 Timoteo	253
2 Timoteo	258
Tito	261
Filemón	263
Hebreos	264
Santiago	277
1 Pedro	282
2 Pedro	287
1 Juan	290
2 Juan	294
3 Juan	295
Judas	296
Apocalipsis	298

Tuhun Nyoo Cha Tyaa San Mateo

*Ñáyivi vachi ra Jesucristo tata
(Lc. 3.23-38)*

¹ Ican ihya cuví sivi ñáyivi vachi ra Jesucristo tata. Tata ra David ta tata ra Abraham cuví chi ra.

² Sehe ra Abraham cuví chi ra Isaac, sutu ra Jacob. Ta sehe ra Jacob cuví chi ra Judá ta yañi ra. ³ Ta sehe ra Judá chihin cu Tamar cuví chi ra Fares ta ra Zara. Ta sehe ra Fares cuví chi ra Esrom sutu ra Aram. ⁴ Ta sehe ra Aram cuví chi ra Aminadab sutu ra Naasón. Ta sehe ra Naasón cuví chi ra Salmón. ⁵ Ta sehe ra Salmón chihin cu Rahab cuví chi ra Booz. Ta sehe ra Booz chihin cu Rut cuví chi ra Obed, sutu ra Isai. ⁶ Ta sehe ra Isai cuví chi rey David. Ta sehe rey David chihin ñaha cha cuví ñasihi ra Urías cuví chi ra Salomón.

⁷ Ta sehe ra Salomón cuví chi ra Roboam sutu ra Abías. Ta sehe ra Abías cuví chi ra Aza. ⁸ Sehe ra Aza cuví chi ra Josafat, sutu ra Joram. Ta sehe ra Joram cuví chi ra Uzías. ⁹ Sehe ra Uzías cuví chi ra Jotam, sutu ra Acaz. Ta sehe ra Acaz cuví chi ra Ezequías. ¹⁰ Sehe ra Ezequías cuví chi ra Manasés, sutu ra Amón. Sehe ra Amón cuví chi ra Josías. ¹¹ Sehe ra Josías cuví chi ra Jeconías ta yañi ra. Cacacu ra quivi catijn ra ñuu Babilonia chi ñu Israel, cuahan coyo ñu cua sacuvi ñu tyiño nuu ñu.

¹² Cha yaha cuan, ta chicoo sehe ra Jeconías, ta ican cuví ra Salatiel sutu ra Zorobabel. ¹³ Ta sehe ra Zorobabel ican cuví chi ra Abiud sutu ra Eliaquim. Ta sehe ra Eliaquim cuví chi ra Azor. ¹⁴ Ta sehe ra Azor cuví chi ra Sadoc sutu ra Aquim. Ta sehe ra Aquim cuví chi ra Eliud. ¹⁵ Ta sehe ra Eliud cuví chi ra Eleazar sutu ra Matán. Ta sehe ra Matán cuví chi ra Jacob. ¹⁶ Ta ra Jacob cuví sutu ra José yii cu María. Ican ña cuví sihi ra Jesús ra cuví Cristo, o cuñi chi catiyí, ra cha saquichi Nyoo vatyi cuvi ra rey cuenda yo.

¹⁷ Ra Abraham chicoo uchi cumi tahan tata ra nyacua nya cacu ra David. Ta ra David chicoo uchi cumi tahan tata ra nyacua nya quivi tijn ñu Babilonia chi ñu Israel. Ta nyacua nya quivi cuan chicoo uchi cumi ca tahan tata ñu nyacua nya quivi cacu ra Cristo.

*Nu cacu ra Jesucristo
(Lc. 2.1-7)*

¹⁸ Tyehé caa cacu ra Jesucristo: Cha yaha cundaa tyiño cha cutandaha cu María, sihi ra Jesús, chihin ra José. Ta cha ni cumañi ca coo ñu chihin tahan ñu, chicohon sehe ña, soco cha cuenda maa Tatyí Ii Nyoo. ¹⁹ Ta ra José ra cua cuví yii ña, cuví ra noo ra

vaha. Ta ña cuñi ra cuhva ra ticahan nuu chi ña, yucuan chaha tyaa ra cuhva cha sandoo xehe ra chi ña. ²⁰ Ta cha ni ri ca cha chicá xiñi ra tyicuan caa, tuví noo ángel Sutu Mañi yo nuu ra nu quixí ra. Ta nyehe ra ñumahna ta catyí ángel cuan chi ra tyehé caa:

—Yoho José, tata ra David cuvún. Ma caca iñun quehun chi cu María cuví ña ñasihun, vatyi sehe ña cha cua cacu, cuenda Tatyí Ii Nyoo cuví. ²¹ Ta cha yaha cacu cha lee cuan, cusacunañun chi cue: Jesús. Tyicuan caa cunañi ra vatyi cusacacu ra chi ñáyivi chihin cuatyí ñu.

²² Tandihí ihya cuví tacuhva nachino cava tuhun cha cahán Sutu Mañi yo chihin yuhu ra cacuvi profeta ra ta cha naha, ra cachahá cuenda tuhun cahán ra.

²³ Ta catyí ra tyehé caa:

Ñaha tyivaa cha ta coo ca rayii chi, cuohon sehe ña.

Ta coo noo sehe ña. Ta cunañi cue: Emanuel.

Ta sivi cuan cuñi chi catyí: “Nyoo nyaá ra chihin yo.” Catyí ángel cuan chi ra José chichi ñumahna.

²⁴ Cuhva cha nducachí iñi ra José, sacuvi ra tari cuhva catyí ángel cuan chi ra. Ta quehen ra chi cu María vatyi cuví ña ñasihi ra. ²⁵ Soco ña chiyo ra chihin ña cha numi ri. Nyacua nya cha yaha cacu sehe ña. Ta sacunañi ra chi cue: Jesús.

2

Nu cuahan coyo ra chiñi tuñi cua nyehe ra nu cacu ra Jesús

¹ Cacú ra Jesús noo ñuu cha nañi Belén. Ta ñuu cuan nyaá chi nu cuví Judea. Ta rey Judea cuan nañi ra Herodes. Tyicuan ta chaq coyo suhva ra nya ñuu Jerusalén. Quichí coyo ra ityi nu caña ñanyii. Ta ra cachiñi tuñi xaan cacuvi ra. ² Ta candaca tuhun ra chi ñáyivi tyehé caa:

—¿Nya nyaá ra cuví rey cuenda ñu Israel? Vatyi ityi nu caña ñanyii nyehe ndi tiño cha chahá cuenda tyi cacu ra ityi ihya. Ta vachi ndi vachi sacahnu ndi chi ra —cacatyí ra.

³ Ta quivi cha hito rey Herodes tuhun cuan cutyofno cuñi ra. Ta tyicuan caa tucu tandihí ñáyivi ñuu Jerusalén cuan. ⁴ Tyicuan ta cana ra Herodes chi tandihí ra cacuvi nuu chi tata sutu ta ra casacuahá ley vehe ñuhu. Ta ndaca tuhun ra chi ra, nya maa maa tahan chi cacu ra Cristo. ⁵ Ta canacahan ra cuan ta cacatyí ra tyehé caa:

—Ñuu Belén ityi Judea, yucuan tahan chi cacu ra vatyi tyehé caa catyaa ra profeta Nyoo nu tutu ta cha naha:

⁶ Ta yoho ñuu Belén ityi Judá, vasi ñuu luhlu ri cuvún cha nuu ñuu nahnu ca iyó ityi Judá nu nyaún.

Soco cahnú ca cucuvun vatyi Belén chiña cucacu minoo ra cunyaca ñaha.

Ta cusaha cumi ra chi ñu Israel ñáyivi cuende.

Tyicuan caa catyí nu tutu Nyoo, —cacatyí ra cuan chi ra Herodes.

⁷ Tyicuan ta caná xehe ra Herodes chi ra chiñi tuñi cuan, ta ndaca tuhun ra chi ra ñáá cuhva ta ñáá quivi caña tiño cuan.

⁸ Tyicuan ta tachí ra chi ra nya ñuu Belén, ta catyí ra chi ra:

—Cuahan ndo, ta nducu tuhun vaha ndo tuhun cha lee cuan. Ta tatu nañihi ndo chi cue, ta quichi catyí ndo chii, tacuhva vatyi cuhun tucu yuhu cusacahni chi cue —catyí ra Herodes chi ra.

⁹ Cha yaha cachiñi ra chiñi tuñi cuan cha catyí ra Herodes, caquehen ra ityi ta cuahan coyo ra. Ta tiño cha canyehé ra ityi nu caña ñanyii cuan, cuahan ti ityi nuu ra. Ta chicutiñi ti maa maa siqui nu catuvi cha lee cuan.

¹⁰ Ta cuhva cha canyehé ra chiñi tuñi cuan tyi chicutiñi tiño cuan, si xaan cacuñi ra. ¹¹ Ta caquihvi ra chichi vehe nu catuvi cha lee cuan. Ta cananyehé ra chi cue chihin cu María sihi cue. Ta chicutiñi chiti ra vatyi sacahnu ra chi cue. Tyicuan ta canuñá ra yuhu caja cha canyisó ra. Ta catava ra regalo cha cuvi xuhun cuaan, ta cutu vixi chahán, ta ndutya vixi chahán cha nañi mirra. Ta cachaha ra chi cue. ¹² Yaha cuan ta catahan ra ñumahna ta cutuñi iñi ra vatyi ña tahán chi canayaha ra ityi nu nyaá ra Herodes, yucuan chaha siin ca ityi cuanuhu coyo ra.

Nu chinq xehe ra José ta cu María chihin cha lee nya Egipto

¹³ Cha yaha cuahan coyo ra chiñi tuñi cuan, tyicuan ta noo ángel Sutu Mañi yo tuví nuu ra José chichi ñumahna. Ta catyí ra chi ra:

—Ndicuti, quehen chi ra lee ihya, ta chi sihi ra, ta cuhun ndo nya Egipto. Ta yucuan cunyaa ndo nyacua nya sacote chi ndo. Vatyi ra Herodes cunanducu ra chi cha lee ihya vatyi cahni ra chi cue.

¹⁴ Tyicuan ta ndicuti ra José cha cuaa cuan. Ta quehen ra chi cha lee cuan ta chi sihi cue. Ta cuahan ñu nya Egipto. ¹⁵ Ta yucuan chinyaa ñu nyacua nya cha chihí ra Herodes. Tyehe caa cuví tacuhva na chino cava tuhun cahán Nyoo cha tyaa ra profeta ta cha naha. Tyehe caa catyí ra: “Nya ñuu Egipto cané chi Sehi”, catyí ra.

Nu tachí ra Herodes na cahni ra chi ra cuatyaa

¹⁶ Cha tuví iñi ra Herodes vatyi ra cachiñi tuñi cuan sandaví ñaha ra chi ra, nduxaan vavaha ra. Ta tachí ra tyiño na cacahni ra chi ra cuatyaa cha iyó ñuu Belén cuan ta ndaha ñuu ñandihí, ra cuatyaa cha ni

cacu nyacua nya cha uvi cuiya. Tyicuan caa sacuví ra vatyi nandichí xiñi ra vatyi tyicuan tahan cuiya ra Jesús tari cuhva catyí ra chiñi tuñi cuan chi ra. ¹⁷ Tyicuan caa chinq cava tuhun cahán Nyoo cha tyaa ra Jeremías profeta Nyoo ta cha naha, ta catyí ra tyehe caa:

¹⁸ Tyacú noo ndusu ñuu Ramá, cha chacú chaa ñáyivi, ta iyo tahan ñu.

Ta ican cuví ñáyivi tata cu Raquel, ñáyivi Israel, chacú chaa ñu cha cuenda sehe ñu.

Soco ña cuñi ñu cha naquehen ndahvi ñu chi ñu cha cuenda cha cachiñi sehe ñu, catyí chi nuu tutu Nyoo.

¹⁹ Soco cha yaha cha chihí ra Herodes, tyicuan ta tuví tucu noo ángel cha tachí Sutu Mañi yo nuu ra José nu quixí ra ñuu Egipto. Ta catyí ra chi ra:

²⁰ —Ndicuti ta quehen chi cha lee chiña, ta chi sihi cue. Ta cuanuhu ndo nya ñuu Israel, vatyi cha chihí ra nducu cahni chi cue.

²¹ Tyicuan ta ndicuti ra José, ta quehen ra chi cha lee cuan ta chi sihi cue. Ta cuanuhu coyo ñu nya Israel. ²² Soco quivi chito ra José vatyi ra Arquelao cuvo ra rey tyiño nuu sutu ra, ra Herodes, nya Judea, nayuhvi ra ta ña cuñi ra cuhun ra yucuan. Ta vatyi sacoto Nyoo chi ra chichi ñumahna, yucuan chaha cuanuhu ñu nya Galilea. ²³ Cha chaá ñu yucuan, cuahan ñu nya ñuu Nazaret, cua coo ñu. Ta yucuan chiyo ñu. Tyehe caa cuví tacuhva chino cava tuhun cha cahán Nyoo, cha catyaa ra profeta ta cha naha. Vatyi catyí ra tyi ra Jesús ra ñuu Nazaret cucunañi ra.

3

Ra Juan ra sacondutyá chi ñáyivi cahán ra tuhun Nyoo chihin ñu

(Mt. 1.1-8; Lc. 3.1-9, 15-17; Jn. 1.19-28)

¹ Quivi cuan ra Juan ra sacondutyá chi ñáyivi cuahan ra noo chiqui ndii ityi Judea. Ta quichaha cahan ra tuhun Nyoo chihin ñu. ² Ta catyí ra:

—Ndu uvi iñi ndo cuatyí ndo vatyi cha yatyin nyaá Nyoo ra cua cunyaca ñaha añima yo.

³ Ican tuhun ra Juan ihya cuví cha tyaa ra Isaías ra cuví profeta Nyoo ta cha naha. Tyehe caa tyaa ra:

Chiñi yo cha caná chaa noo ra noo nu chiqui ndii ta catyí ra:

“Tari sanduvahá ndo noo ityi, tyicuan caa sanduvaha ndo añima ndo, vatyi cu quichi Sutu Mañi yo.

Ñuñá ndo noo ityi ndoo chi ra naquihvi ra añima ndo.”

⁴ Ta ra Juan ñihno ra sahna chinq chihin ixi camellu. Ta sincho ra, ñii cuví. Ta maa

maa ri pinchi chachí ra ta tyañuñu cuhu chihí ra. ⁵ Ñáyivi ñuu Jerusalén ta tandihí ñu ñuu cha nyicú Judea, ta ñu ca iyó yatyin ri ityi yuvi cahnu Jordán cuan, quichi coyo ñu, quichí tyasoho ñu tuhun cahán ra. ⁶ Ta cha yaha nahma ñu cuatyí ñu, ra Juan sacondutya ra chi ñu yuvi cahnu Jordán cuan.

⁷ Soco ra Juan nyehe ra vatyi cuaha xaan ra fariseo, ra quichahá xaan ley vehe ñuhu, ta cuaha xaan ra saduceo, caquichí coyo ra vatyi condutya ra. Ta catyí ra chi ra:

—¡Nyoho, tari noo tata coo xaan cuví ndo! ¿Yóo cha sacoto chi ndo vatyi chihin cha condutya ri ndo ta ma tachi tuñi ca Nyoo chi ndo? Ña ndicha. ⁸ Cqo ndo noo cha quetuví vaha tyi ndicha cha ndu uvi iñi ndo cuatyí ndo. ⁹ Ta ma cuyaa ndo catyí ndo vatyi tata ra Abraham vachi ndo. Vatyi nyacua nya chihin yuu ihya ta cuví savaha Nyoo ñáyivi tata ra Abraham. ¹⁰ Tari yutun cha ña chahá chiti, tyicuan caa cuví ndo. Vatyi ña sacuví ndo tari cuhva cuñi Nyoo. Ta yutun cha ña chahá chiti, cahnya ñáyivi chí tun. Ta cahmi ñu chí tun. Tyicuan caa tucu nyoho, cuhun ndo nu cayú ñuhu. ¹¹ Cha ndicha vatyi yuhu sacondutyé chí ñáyivi chihin ndutya, tari noo seña vatyi cha ndu uvi iñi ñu cuatyí ñu. Soco cha yaha sacondutya yuhu chihin ndutya, vachi inga ra cusacondutya chí ñáyivi chihin Tatyí Ii Nyoo ta chihin ñuhú ihñi. Iyó ca tunyee iñi chí maa ra ta ñima ca yuhu. Ta ni cha cuise ndichan ra ta ña nañe, vatyi cahnu xaan ca ra cuví ra. ¹² Tari noo ra cha cua naquehen vaha trigo ta natyihí vaha ra chichi yaca ta mihin cahmi ra, tyicuan caa cuví maa Sutu Mañi yo chihin yo. Tatu chinó iñi yo chí ra cunaquehen vaha ra chí yo. Ta cunyicu yo chihin ra. Soco tatu ña chinó iñi yo chí ra cutyihí ra chí yo anyaya nu cayu ñuhú cha ma ndahva ca maa —catyí ra Juan.

Nu condutya ra Jesús
(Mr. 1.9-11; Lc. 3.21-22)

¹³ Tyicuan ta quita ra Jesús Galilea ta chaa ra yuvi cahnu Jordán nu ñohó ra Juan, vatyi cuñi ra cha sacondutya ra Juan chí ra. ¹⁴ Cha xihna ri ña cuñi ra Juan sacondutya ra chí ra, ta quichaha catyí ra chí ra Jesús tyehe caa:

—Yoho cuñún cha sacondutye chuun, soco ña tahán chí cha sacondutya yuhu chuun. Maun tahán chí sacondutyon chí —catyí ra.

¹⁵ Soco ra Jesús catyí ra chí ra:

—Cha vityin, na cuví chí cuhva catyí yuhu chuun. Vatyi cuñi chí cha sacuvi yo tandihí cha cuñi Nyoo —catyí ra chí ra Juan. Tyicuan ta ndoo ra Juan vaha.

¹⁶ Cha yaha ri condutya ra Jesús ta quita ra chichi ndutya. Ta nuña ri andivi, ta ra Jesús nyehe ra yoso caa vachi noó Tatyí Ii

Nyoo, tari noo paloma, ta chaá chí siqui ra. ¹⁷ Tyicuan ta tyacu noo ndusu ityi andivi, ta catyí chí tyehe caa:

—Ican ra ihya cuví Sehi, ra cuñi xain chí. Ta sii xaan cuñi chihin ra —catyí ndusu cuan.

4

Nu nducú nyehe cuihna chí ra Jesús
(Mr. 1.12-13; Lc. 4.1-13)

¹ Tyicuan ta Tatyí Ii Nyoo chinyaca chí ra Jesús noo chiqui ndii, tacuhva nducu nyehe cuihna chí ra.

² Ña chachí ra uvi xico quivi ta uvi xico ñuu. Ta yaha cuan ta chaá soco chí ra. ³ Tyicuan ta tuhva cuihna chí ra, vatyi cuñi ra nducu nyehe ra chí ra. Ta catyí ra chí ra:

—Tatu ndicha cha Sehe Nyoo cuví chuun, sañanduvi pan yuu ihya —catyí cuihna chí ra Jesús.

⁴ Soco ra Jesús nacahan ra ta catyí ra:

—Tuhun Nyoo catyí chí tyehe caa: “Ñima chihin cha cachi ri ñáyivi ta conyito ñu. Conyito tucu añima ñu chihin tuhun cahán Nyoo” —catyí ra Jesús chí cuihna cuan.

⁵ Tyicuan ta chinyaca cuihna cuan chí ra Jesús nya ñuu Jerusalén. Ta sandaa cuan chí ra xiñi vehe ñuhu cahnu cuan. ⁶ Ta catyí cuan chí ra:

—Tatu ndicha cha Sehe Nyoo cuvún, sañdupehla nyacua nya nu sucun ihya ta nyacua nya nu ñuhú. Vatyi nyaá nu catyí chí nu tutu Nyoo tyehe caa: “Nyoo cusaquichi ra ángel, quichi saha cuenda chuun. Cunaquehen ra chuun chihin ndaha ra ta ma cuhva ra cha taxin chahun chihin yuu” —catyí cuihna cuan chí ra.

⁷ Ta nacahan ra Jesús ta catyí ra:

—Soco catyí tucu chí nu tutu Nyoo tyehe caa: “Ma nducu nyehun chí Sutu Mañi yo Nyoo” —catyí ra Jesús chí cuihna.

⁸ Tyicuan ta chinyaca tucu cuihna cuan chí ra noo yucu sucun. Ta sañaha cuan tandihí cha cahnu cuví nu nyacá ñaha rey ta ra cuví tyiño chí ñáyivi iyó siqui ñuhu ñáyivi. ⁹ Ta catyí cuihna cuan chí ra tyehe caa:

—Yuhu cuhve tandihí maa ihya chuun, tatu yoho ta cuiñi chitun nui ta sacahnun chí —catyí cuan chí ra.

¹⁰ Tyicuan ta nacahan ra Jesús ta catyí ra chí cuihna cuan:

—Canyaha chuun nui, yoho cuihna. Vatyi tuhun cahán Nyoo nyaá chí nu tutu ta catyí chí tyehe caa: “Noo ri chí maa Nyoo saçahnu yo. Ta iin ri chí maa ra quichaha yo.”

¹¹ Tyicuan ta cuahan cuihna cuan, ta ndoo ra Jesús, ta chaá coyo ángel ta tyinyee ra chí ra.

Nu quichaha saha tyiño ra Jesús ñuu cha nyicú ityi Galilea

(Mr. 1.14-15; Lc. 4.14-15)

¹² Quivi cha chito ra Jesús vatyí ra Juan ñohó ra vehe caa, cuahan ra nya Galilea. ¹³ Soco ña ndoo ra ñuu Nazaret, nu chahnu ra. Cuahan ra cua coo ra nya ñuu Capernaum, noo ñuu cha nyaá yatyin ri yuhu miñi, cha nyaá yatyin ñuhú cuenda ra Zabulón chihin ñuhú ra Neftalí. ¹⁴ Tyehe caa cuví tacuhva chino cava tuhun cha tyaá ra Isaías nu tutu Nyoo ta cha naha. Catyí chí tyehe caa:

¹⁵ Ñuhú ra Zabulón ta ñuhú ra Neftalí cha nyaá yuhu miñi inga chiyo yuvi cahnu Jordán, cha cuví Galilea nu iyó ñu ñima ñu Israel cuví.

¹⁶ Chinyicu añima ñu nu ñaa iñi vatyí chinyaca ñaha ra ña vaha chí ñu chihin tuhun chihí, soco sandundichín ñuhú Sutu Mañi yo añima ñu nu nyicú ñu, catyí ra Isaías.

¹⁷ Nyacua nya quivi cuan, ta quichaha cahan ra Jesús tuhun Nyoo chihin ñáyivi, ta catyí ra chí ñu:

—Ndu uvi iñi ndo cuatyí ndo vatyí yatyin ri nyaá Nyoo ra cua cunyaca ñaha añima ndo —catyí ra Jesús chí ñáyivi.

Nu cana ra Jesús chí cumi tahan ra catiín tiyaca

(Mr. 1.16-20; Lc. 5.1-11)

¹⁸ Ra Jesús chicá noo ra yuhu miñi cha nañi Tyañuhu Galilea cuan. Ta nanyehé ra chí uvi tahan ra chihin yañi ra, ra Simón cha nañi tucu Pedro, ta ra Andrés. Ra catiín tiyaca cacuví ra. Ta cacañi ra yuhva ra nu ndutyi. ¹⁹ Tyicuan ta quichaha catyí ra Jesús chí ninduvi ra tyehe caa:

—Cunyicon ndo chii. Ta yuhu cusacuví vatyí tari ñihí ndo tiyaca, tyicuan caa cuñihí ndo anima ñáyivi (ta cutava ndo chí ñu nu quiñi caa na quiñi ñu cuenda Nyoo) —catyí ra Jesús chí ra.

²⁰ Caa kuhva ri cuan casandoq ra yuhva ra ta cuahan coyo ra chihin ra Jesús.

²¹ Chiin ri ca chicá ra Jesús ityi nuu ca ta nanyehé ra chí uvi ca ra chihin yañi ra, ra Jacobo ta ra Juan. Sehe ra Zebedeo cacuví chí ra. Canyicú ra chichi noo canoa chihin sutu ra canaquicú ra yuhva ra. Ta cana ra Jesús chí ra. ²² Ta caa kuhva ri cuan casandoq ra canoa cuan ta chí sutu ra, ta cuahan coyo ra chihin ra.

Nu sañahá ra Jesús chí cuaha ñáyivi

(Lc. 6.17-19)

²³ Cuahan ra Jesús chicá noo ra tandihí ñuu cha nyicú Galilea sañahá ra chichi vehe ñuhu tahan tahan ñuu. Cahán ra tuhun vaha yoso caa nyacá ñaha Nyoo añima yo. Ta sanduvahá ra chí ñu cuhví chihin tandihí ri

nuu cuehe cha iyó chí ñu. ²⁴ Cachitó tandihí ñáyivi ñuu cha nyicú Siria tuhun ra Jesús. Ta quichí nyaca ñu tandihí ñu cuhví chí ra: tandihí ñu siin siin cuehe tahán. Ta suhva ñu yihí tatyí ña vaha chí ñu. Ta yihí ñu, yihí cuehe chihí tañi chí ñu. Ta yihí ñu ña cuví nacanda ñu. Ta ra Jesús sanduvahá ra chí tandihí ñu. ²⁵ Cuaha xaan ñáyivi nyicón chí ra Jesús: ñáyivi iyó ñuu cha nyicú Galilea, ñáyivi iyó ndi uchi ñuu Decápolis, ñáyivi iyó ñuu cha nyicú Judea, ta ñáyivi iyó inga chiyo yuvi cahnu Jordán ñandihí.

5

Nu cahán ra Jesús nuu ñáyivi nu chiqui
(Lc. 6.20-23)

¹ Cuhva cha nyehé ra Jesús tyi cuaha xaan ñáyivi, ndaa ra noo nuu yucu. Ta chícunyaá ra yucuan. Tyicuan ta ñu nyicón chí ra chícunyicu ñu nicachico nu nyaá ra. ² Tyicuan ta quichaha sañaha ra Jesús chí ñu tyehe caa:

³ —Tandihí ri ñu cha chitó vatyí chiñuhú Nyoo chí ñu, sii xaan cucuví chí ñu, vatyí tahán chí vatyí cunyaca ñaha Nyoo añima ñu.

⁴ Ta tandihí ri ñu nducuihya iñi vityin cha catyí cuatyí ñu, sii xaan cucuví chí ñu. Vatyí cusanaa Nyoo cha cuihya iñi ñu.

⁵ Tandihí ri ñu cha ña cahnu sahá chí, sii xaan cucuví chí ñu, vatyí cuquehen cuenda ñu ñuhu ñayivi cha catyí Nyoo tyi kuhva ra chí ñu.

⁶ Ta tandihí ri ñu cuñi xaan sacuví kuhva catyí Nyoo, sii xaan cucuví chí ñu, vatyí Nyoo cutyinyee ra chí ñu tacuhva cuví sacuví ñu.

⁷ Ta tandihí ri ñu cha iyó tucahnu iñi chí, sii xaan cucuví chí ñu, vatyí Nyoo, cucoo ticahnu iñi chí ra chihin ñu.

⁸ Ta tandihí maa ñu ndundii añima saha Nyoo, sii xaan cucuví chí ñu, vatyí ñu cuan, cunyehe ñu chí Nyoo.

⁹ Ta ñu nducú kuhva cha coo taxi ri ñáyivi chihin Nyoo sii xaan cucuví chí ñu, vatyí Nyoo, cucatyí ra tyi sehe ra cuví chí ñu.

¹⁰ Ta tandihí ñu cha tasi cuñi nyehé ñáyivi chí ñu cha catyí cha sacuví ñu tari kuhva catyí Nyoo, sii xaan cuví chí ñu, vatyí nyacá ñaha Nyoo añima ñu.

¹¹ Na cusii cuñi ndo tatu cahán ña vaha ñáyivi siqui ndo. Ta sanyehé ñu tindoho chí ndo. Ta tavá ñu cuaha cuendu siqui ndo cha catyí yuhu. ¹² Na cusii cuñi ndo vatyí tatu tyehe caa sacuví ñu chihin ndo, sii xaan cucuví chí ndo, vatyí cahnu xaan ta tyaqui xaan cha cutahan chí chi ndo, nachaa ndo andivi. Vatyí suri tyicuan caa chinyacuví tucu ñu cha ña vaha chihin ra cacuví profeta cuenda Nyoo ta cha naha.

Tatu sandihí yo cha chinó iñi yo chí Nyoo
cuví yo tari ñi cha ndihí cha uhva
(Mr. 9.50; Lc. 14.34-35)

¹³ 'Nyoho cha chinó iñi ndo chii, tari ñii vaha cuví ndo. Soco tatu ñii, ta ndihi cha uhva, ma sacu uhva ca chi cha cachi yo. Ña vaha ca ñii cuan. Tyicuan ta sacuita yo. Ta cuañi ñáyivi siqui chí.

Tatu vaha quichahá yo tuhun cahán Nyoo, cuví yo tari ñuhú cha sandundichín nu cuahan ñáyivi nu ñaa iñi

¹⁴ 'Nyoho cuví ndo tari ñuhú cha sandundichín nu cuahan ñáyivi. Noo ñuu cha nyaá xiñi noo yucu, ma cuvi quihí xehe. Tyicuan caa tahán chi cuví ndo. ¹⁵ Ta yori yo cha tyaa yo noo ñuhú tima, ta tixehe yo chichi noo caja. Soco tyiso yo noo nu sucun vatyi sandichín chi chichi vehe tatu cua quihvi ñáyivi, soco ndichín. ¹⁶ Ta tyicuan caa tahán chi sandundichín tucu nyoho chihin ñuhú Nyoo cha iyó aña ndo nu cuahan ñáyivi. Tyicuan ta nanyehe ñu cha vaha cha nyacuví ndo, ta sacahnu ñu chí Sutu yo Nyoo ra nyaá andívi.

Sañahá ra Jesús vatyi niñi xaan sacuvi yo ta sañaha yo tandihi tuhun cha tachí Nyoo chí yo

¹⁷ 'Ma cuñi ndo vatyi yuhu vachi sanai ley cha tachí Nyoo chí ra Moisés vatyi tyaa ra. Ta ni ri ña vachi sanai tuhun cha tyaa ra cacuví profeta cuenda Nyoo ta cha naha. Yuhu ña vachi vatyi sanai yucuan. Soco vachi quichahi tandihi cha catyí tuhun cuan, ta sañahí ñáá cha cuñi chí catyí. ¹⁸ Cha ndicha catyí chí ndo vatyi cha ni ri ca cha iyó ca andívi chihin ñuhu ñáyivi ma naa ni chíin cha tyaa ra Moisés ta ra cacuví profeta Nyoo ta cha naha, nyacua nya yaha cuví tandihi tari cuhva nyaá cha cayaá ra. ¹⁹ Yucuan chaha, tatu ña quichahá ñáyivi tuhun cha tachí Nyoo chí ñu, vasí noo tuhun luhlu ri cuví, ta tatu chasi ñu nu quichaha inga ñáyivi, luhlu xaan cucuvi ñu nu nyacá ñaha Nyoo. Soco ñu cha quichahá tandihi, ta sañahá tucu ñu chí inga ñáyivi. Ican ñu cuan cahnu xaan cucuvi ñu nu nyacá ñaha Nyoo. ²⁰ Vatyi cuñi chí cha quichahá vaha ca ndo chí Nyoo ican saha ra sacuahá cuenda ley vehe ñuhu, ta ra cacuví fariseo. Yucuan ta cuví quihvi ndo nu nyacá ñaha Nyoo.

Nu sañahá ra Jesús chí yo vatyi ma cuxaan yo chí ñáyivi

²¹ 'Nyoho cha cuaha chaha chiñi ndo tuhun cha catyí Nyoo chí ñu chiyo ta cha naha. Catyí ra: "Ma cahñi ndo chí ñáyivi, vatyi tatu cahñi ndo ñáyivi, tahán chí cutuñi chí ndo." ²² Soco yuhu, catyí chí ndo, vatyi vasí cha cuxaan ri ndo chí noo ñáyivi, o vasí cha cahán uhvi ri ndo chí ñáyivi, o vasí cha cahán nyaa ri ndo chí ñáyivi, tahán chí cutuñi chí ndo. Ta siin ri saha cuenda ndo chí ndo coto cuhun ndo anyaya chihin cuatyí cuan.

²³ 'Ta yucuan chaha quivi cuahun vehe ñuhu, ta nyisón cha cucuhvon chí Nyoo, ta tatu cha nanyaun cha cua cuhvon ta nichon iñun vatyi ña vaha iyó noo yañun chuhun. ²⁴ Sandoo cha cua cuhvon chí Nyoo yucuan. Ta cuhun vatyi na coo vahun chihin yañun. Tyicuan ta ndichun nya vehe ñuhu, ta cuhva cuendon cha cua cuhvon chí Nyoo.

Sañahá ra Jesús vatyi cacan yo ticahnu iñi cuatyí yo coto cuhun yo anyaya (Lc. 12.57-59)

²⁵ 'Tatu yóo ra chicán cuatyí chahun, ta cuahan ra chuhun nya nuu ra cuví tyiño, ñandacan ticahnu iñi chí ra ityi cuahun, coto cuhva cuenda ra chuun chí ra cuví tyiño. Ta ra cuví tyiño cua cuhva cuenda ra chuun chí policía. Ta policía cuan cutyihí ra chuun vehe caa. ²⁶ Soco catyí chuun vatyi ma cuví quiton vehe caa cuan nyacua nya tyiyahvun tandihi cha tahán chí tyiyahvun.

Sañahá ra Jesús vatyi ni cha ndichi xiñi yo cha coo nonga ñusihí, o nonga rayi chí yo, ta ña vaha

²⁷ 'Nyoho chiñi ndo tuhun vatyi catyí Nyoo ta cha naha vatyi nyoho cha iyó ñasihí ndo, ma coo inga ñusihí chí ndo. ²⁸ Soco yuhu catyí chí ndo, vatyi nya nyoho cha nyehé ndo chí noo ñusihí ta quihvi iñi ndo chí ñu, catyí chí ndo vatyi chihin yucuan ri ta cha chicoo cuatyí ndo.

²⁹⁻³⁰ 'Vatyi tatu chíti nuu chiyo vahun sanacavá chuun nu cuatyí, vaha taxin ca tava ta sacuiton cañi. Vatyi vaha ca quihvun nu nyacá ñaha Nyoo chihin noo chíti nuun, ta ñima ca chihin cha ninduvi chíti nuun ta cuhun nu cayu ñuhú chichi anyaya. O tatu ndahun sanacavá chuun nu cuatyí, vaha taxin ca cahnya ta sacuiton cañi. Vatyi vaha ca cha quihvun nu nyacá ñaha Nyoo chihin cha luu ndahun, ta ñima ca cha naniun ta cuhun nu cayu ñuhú chichi anyaya.

Nu sañahá ra Jesús siqui ra sandoo ñasihí (Mt. 19.9; Mr. 10.11-12; Lc. 16.18)

³¹ 'Ta suri catyí tucu Nyoo chí ñáyivi chiyo ta cha naha vatyi yóo ra sandoo ñasihí, cuñi chí cuhva ra noo tutu cuenda cha sandoo ra chí ña. ³² Soco catyí yuhu chí ndo, ñahri ityi iyó chí noo ra cha sandoo ra chí ñasihí ra tatu ña natuví ña chihin inga rayi. Vatyi tatu sandoo ra chí ña, ta ñima cha catyí cuatyí cuan, chicoo cuatyí ra nuu Nyoo. Ta siin ri sacoo ra cuatyí ña vatyi tatu quehen ña inga ra, chicoo cuatyí ña nuu Nyoo. Ta chicoo tucu cuatyí ra cha quehen chí ña cuan.

Ma catyí yo "chito vaha maa Nyoo" tacuhva chino iñi ñáyivi vatyi ndicha cha cahányo

³³ 'Ta chiñi tucu ndo, vatyi catyí tucu Nyoo chí ñu chiyo ta cha naha tyehé caa: "Tatu

tyanaha ndo Nyoo tyi cusacuvi ndo noo cha cusacuvi ndo, tahan chi cha sacuvi ndo.”

³⁴Soco yuhu catyí chi ndo vatyi ma tyanaha ndo Nyoo tacuhva chino iñi ñáyivi vatyi ndicha cha cahán ndo. Ta ma tyanaha ndo ni tuhun andívi, vatyi yucuan nu nyaá maa Nyoo cuví. ³⁵Ta ni ri tuhun ñuhu ñáyivi ihya ma tyanaha ndo, vatyi yucuan cuví nu chañi Nyoo. Ta ni ri tuhun ñuu Jerusalén, ta ma tyanaha ndo, vatyi yucuan cuví ñuu Nyoo ra cuví Rey cha cahnu ca. ³⁶Ta ni ri tuhun xiñi ndo, ta ma tyanaha ndo, vatyi ma cuví sanducuichin ndo ni noo ixi xiñi ndo. Ta ni ma cuví sanduotoon tucu ndo. ³⁷“Ican” catyí ndo, tatu ican. Soco tatu ñima, “ñima”, catyí ndo. Ta ma tyanaha ndo Nyoo vatyi ra ña vaha tyiyuhú chi ndo cuví cuan.

Nu sañahá ra Jesús vatyi tatu sacuvi ñáyivi cha ña vaha chihin yo, na sacuvi yo cha vaha chihin ñu

(Lc. 6.29-30)

³⁸“Ta chiñi tucu ndo cha catyí tuhun cha tyaa ra Moisés ta cha naha: “Vatyi tatu noo ñáyivi cañi ñu nuu ndo, ta tahvi noo noho ndo, o tiví noo chiti nuu ndo, o nya chi ndo sañicuehe ñu, tahan chi vatyi sañicuehe tucu ñáyivi chi maa ñu, tari cuhva cha sañicuehe ñu chi ndo.” ³⁹Soco yuhu catyí chi ndo, vatyi ma nasacuvi ndo cha ña vaha cha nyacuví ñu tasi iñi chi ndo. Vatyi tatu yóo cha cañi ñin chiyo xitin ndo, ma nduxaan ndo chi ñu. Soco cuhva tucu ndo inga chiyo xitin ndo na cañi ñu. ⁴⁰O tatu chicán ñu cuatyí chaha ndo, ta cuñi ñu ñnyaa ñu noo camisa ndo, ma cuxaan ndo chi ñu. Soco cuhva ndihi ndo chaqueta ndo chi ñu. ⁴¹O tatu yóo cha catyí chi ndo na cuiso ndo cha chii ñu noo kilómetro, cuiso ndo uvi kilómetro. ⁴²Tatu yóo ñu chicán tumañi iñi chi ndo, cuhva ndo chi ñu. Ma catyí ndo cha ma saha ndo tumañi iñi cuan.

Na cuñi yo chi ñu xaan iñi chi yo

(Lc. 6.27-28, 32-36)

⁴³“Ta chiñi tucu ndo tuhun cha catyí ñu chiyo ta cha naha vatyi cuñi ndo chi ra tahan ndo. Ta chi ra xaan iñi chi ndo quihí tisihí iñi ndo chi ra. ⁴⁴Soco yuhu catyí chi ndo, cuñi ndo chi ñáyivi xaan iñi chi ndo. Ta sacuvi ndo cha vaha chihin ñáyivi cahan chi ndo, ta chi ñu ña cuñi nyehe chi ndo. Ta çacan tahvi ndo chaha ñu quiñi nyacuvi chihin ndo ta sanyehé ñndoho chi ndo. ⁴⁵Ta tyicuan caa sacuvi ndo tacuhva coto ñáyivi vatyi cuví ndo sehe Sutu yo ra nyaá andívi. Vatyi maa ra sacañá ra ñanyii, ta sacoon ra savi siqui tyiño sahá ñáyivi vaha ta ñáyivi ña vaha ñandíhi. ⁴⁶Tatu nyoho ta cuñi ndo chi ñáyivi cha vaha iyó chihin ndo ta ña cuñi nyehe ndo chi ñáyivi xaan iñi chi ndo, ñahri cha vaha cuñihi ndo. Vatyi suri tyicuan caa nyacuví tucu ra catavá xuhun cuenda

gobiernu ñuu Roma. Ta quiñi ca iyó ra cuan cuñi maa ndo. ⁴⁷O tatu chahá ndo nocumi chi ra tahan ri ndo, ñahri cha vaha xaan nyacuví ndo. Vatyi suri tyicuan caa sacuví tucu ñáyivi ña ñohó nuu Nyoo. ⁴⁸Tari Sutu yo cha nyaá andívi maa maa ri cha vaha sacuví ra, tyicuan caa nyoho maa maa ri cha vaha sacuví ndo.

6

Nu sañahá ra Jesús yoso caa sacuvi yo tumañi iñi

¹Saha ndo cuenda ta ma cuyaa ndo ñáa tumañi iñi sacuvi ndo chi ñáyivi. Vatyi tatu cuyaa ndo nuu ñáyivi, ñahri cuñihi ndo nuu Sutu yo ra nyaá andívi. ²Cuhva cha sahá ndo tumañi iñi, ma sacoto ndo chi inga ñáyivi vatyi sahá ndo tumañi iñi. Ma sacuvi ndo tari sacuví ra sahá tyi vaha ta chicá noo ra nuyahvi ta chichi vehe ñuhu. Sahá ra tumañi iñi tacuhva na catyí ñáyivi vatyi vaha xaan ñáyivi cuví ra. Soco yucuan ri ñihí ra cuan ta ñahri ca cuñihi ra nuu Nyoo. ³Soco nya quivi sahá ndo tumañi iñi chi ñu ndahvi, ma sacoto ndo ni chi ra tahan cahunu ndo. ⁴Xehe ri sacuvi ndo, tacuhva cha ma coto ñáyivi. Tyicuan ta Sutu yo Nyoo nyehe ra cha sacuvi ndo tyicuan caa. Ta cuaha ca cha vaha cucuhva ra chi ndo.

Nu sañahá ra Jesús yoso caa cahan yo chihin Sutu yo Nyoo

(Lc. 11.2-4)

⁵“Ta cuhva cha chicán tahvi ndo chi Nyoo, ma cacan tahvi ndo tari cuhva sacuvi ñu savahá chii. Vatyi ñu cuan tahan iñi ñu cacan tahvi ñu chi Nyoo nu tuvi ñáyivi, tacuhva catyí ñáyivi vatyi vaha xaan ñáyivi cuví ñu, vaha xaan chinó iñi ñu chi Nyoo. Soco catyí chi ndo cha ndicha vatyi ñahri ca cuñihi ñu nuu Nyoo. Vatyi ñima cha ndicha sacuví ñu. ⁶Soco nyoho ñáa quivi cacan tahvi ndo chi Nyoo, ma cacan tahvi ndo tacuhva nyehe ri ñáyivi chi ndo. Soco quihvi ndo chichi vehe ndo ta naçasi ndo yuvehe ta çacan tahvi ndo chihin tandíhi añima ndo. Ta noo tuhun ri maa Nyoo Sutu yo nyehe ra cha sacuvi ndo tyicuan caa vatyi nuu maa ra chicán tahvi ndo, ta ñima nuu ñáyivi. Ta cuaha ca cha vaha cucuhva ra chi ndo.

⁷Cuhva cha cahán ndo chihin Nyoo ñima susuri tuhun cha ñima ri tuhun çahan ndo. Vatyi tyicuan caa sacuví ñu cha ñahri tuhun Nyoo caá añima. Cuñi maa ñu vatyi tyicuan caa ta cuñi Nyoo cha cahán ñu. Vatyi cuaha xaan chaha cahán ñu susuri maa tuhun cuan. ⁸Ma sacuvi ndo tyicuan caa. Vatyi Nyoo cha chitó ra ñáa cha chiñuhú chi ndo, cha ni ri ca cha cumañi ca cacan ndo chi ra. ⁹Yucuan chaha nyoho, tatu cua cacan tahvi ndo chi Nyoo, tyehe caa catyí ndo:

Sutu Mañi yuhu, yoho cha nyaún andívi.
Sacahnú xaan ndi chuun.

¹⁰ Na quichi quívi cha nyaca ñahun ihya síqui ñuhu ñáyívi, tari nyacá ñahun andívi.

Na sacuvi ñáyívi ihya síqui ñuhu ñáyívi tandíhi cuhva cuñi maun, tari cuhva cuví gloria.

¹¹ Cuhva cha cachi ndi tacuhva cha yaha ndi noo noo quívi.

¹² Saha tacuhva iñi chi ndi ñáá ndíhi cha ña vaha nyacuví ndi, tari maa ndi sahá ndi ticahnu iñi chi ñu sataśi iñi chi ndi.

¹³ Ma cuhvon cha nducu nyehe ra ña vaha chí ndi, tacuhva ma sacuvi ndi cuatyí nuun. Soco maun cuví ra sacacú chi ndi ndaha ra ña vaha.

Vatyí maun cuví ra nyacá ñaha tandíhi. Ta maun cuaha xaan ca tunyee iñi iyó chuun. Ta tahán chi vatyí sacahnu tandíhi ñáyívi chuun tyicuan ri maa. Ta na cuví chi tyicuan caa.

Tyicuan caa cuhva tahán chi cacan tahvi ndo chi Nyoo.

¹⁴ Vatyí tatu nyoho ta sahá ndo ticahnu iñi chi ñu nyacuví cha ña vaha chíhin ndo, tyicuan caa ta Sutu yo ra nyaá andívi, cusaha ra ticahnu iñi chi maa ndo. ¹⁵ Vatyí tatu ma saha ndo ticahnu iñi chi ñu nyacuví cha ña vaha chíhin ndo, tyicuan caa tucu Sutu yo, ma saha ra ticahnu iñi cuatyí maa ndo —catyí ra Jesús.

Ñáá quívi ña chachí yo ta nanducú yo chi Nyoo, ma sacoto yo chi inga ñáyívi

¹⁶ Ta catyí tucu ra Jesús chi ñu chicá noo chíhin ra:

—Quívi cha ña chachí ndo ta nanducú ndo chí Nyoo, ma cuihya nyehe ndo, tari ñu savahá chí. Vatyí cuñi ñu cha coto ñáyívi vatyí ña chachí ñu ta nanducú ñu chí Nyoo. Soco catyí chí ndo vatyí yucuan ri ñíhi ñu. Ñahri ca cuñíhi ñu nuu Nyoo. ¹⁷ Soco tatu nya quívi ña chachí ndo ta nanducú ndo chí Nyoo, ñacatya ndo nuu ndo. Ta ñacuaca ndo cuca xiñi ndo, ¹⁸ tacuhva vatyí ma tuví iñi ñáyívi vatyí ña chachí ndo ta nanducú ndo chí Nyoo. Tyicuan ta noo tuhun maa Nyoo nyehe ra cha sacuví ndo cha xehe ri cuan. Ta cuaha ca cha vaha cua cuhva ra chí ndo chíhin nuu ñáyívi.

Nu sañahá ra Jesus vatyí ma sacaya yo cha iyó síqui ñuhu ñáyívi
(Lc. 12.33-34)

¹⁹ Ma sacaya ndo cha tyayíi ihya ñáyívi. Vatyí coto tiví cha tyayíi cuan. O cuví tucu quívi ra suhu, ta suhu ra tandíhi cha tyayíi ndo. ²⁰ Vaha taxin ca sacaya ndo cha vaha chí ndo nu nyaá Nyoo gloria. Vatyí nuu Nyoo ña ndíhi cha vaha cuan. Vatyí ni ri ra suhu, ni quiti, yori cha satívi iyó yucuan.

²¹ Ta catyí chí ndo vatyí nu nyaá cha tyayíi ndo, yucuan cuví nu nyaá xiñi ndo. Ta yucuan cunyaa añima ndo.

Tari sandichín chiti nuu yo chi yo tacuhva nyehe yo nu cuahan yo, tyicuan caa tucu sandundichín tuhun Nyoo añima yo
(Lc. 11.34-36)

²² Chiti nuu ndo noo cha sandundichín ityí cuahan ndo cuví. Ta tyicuan caa tucu añima ndo, tatu iyó cha ndichín Nyoo, vaha ñáyívi cuví ndo. ²³ Soco tatu ña vaha chíti nuu ndo, ña ndichín nyehe ndo nu cuahan ndo. Tandíhi ri ta ñaa iñi. Ta tyicuan caa tucu tatu ñahri cha ndichín Nyoo nyaá añima ndo, tari noo ra cuaa cuví ndo. Ña cuví nyehe ndo ityí vaha cha cuahan nu nyaá Nyoo.

Sañahá ra Jesús vatyí ma cuví quichaha yo chí Nyoo tatu cuñi xaan ca yo cha tyayíi
(Lc. 16.13)

²⁴ Noo musu ma cuví coo uvi chitoho ra. Vatyí musu cuan cuñi ca ra chí noo ra ta ñima ca chí inga ra. Ta quichahá ra chí noo ra, ta chí inga ra ma quichaha ra. Ta tyicuan caa tucu nyoho, ma cuví cuñi ndo chí Nyoo, ta suri cuhva cuan cuñi ndo cha tyayíi.

Sañahá ra Jesús vatyí ma caca xaan iñi yo ñáá ndíhi cha chíñuhú chí yo
(Lc. 12.22-31)

²⁵ Yucuan chaha catyí chí ndo vatyí ma caca xaan iñi ndo yoso caa ñíhi ndo cha cachi ndo ta cha coho ndo. Ni ma caca iñi ndo ñáá cha cuihno ndo. Vatyí yahvi ca nyaá añima ndo ta coño ñuhu ndo nuu Nyoo, ican saha cha cachi ndo ta cha cuihno ndo. Vatyí maa ra chahá ra ñáyívi coo ndo. Ta ña yíi cuhva ra inga cha chíñuhú chí ndo ñandíhi. ²⁶ Saha ndo cuenda chí saa. Ña savahá ti itu. Ta ña sahá tyíño ti. Ni ri ña naquehén vaha ti tyíño sahá ti chíchi yaca. Soco Sutu yo Nyoo chahá ra cha cachi ti. ¿Atu ña yahvi ca nyaá nyoho nuu Nyoo ta ñima ca saa cuan? ²⁷ Ni ri maa chicá xaan xiñi ndo ma cuví sandusucun ndo ni chíin ca chí ndo.

²⁸ Ta tatu ni chíin cuan ña cuví chí ndo, ¿ñáá tuhun cha chicá xaan xiñi ndo tuhun sahna ndo? Saha ndo cuenda yoso caa iyó tu ita nu chíqui. Vatyí ña taví tun. Ta ni ña conó tun isa. ²⁹ Soco catyí chí ndo vatyí ni rey Salomón cha tyayíi xaan cuví ra, soco ña cuví cuihno ra cha tyaquí, tari cha sacuihnó Nyoo chí tu ita cuan. ³⁰ Ta tu ita cuan tyaquí xaan ñíhno tun suhva ri quívi ta yaha cuan ta cuna ityí tun ta cucayu tun chíchi horno. Ta nyoho, vaha ca cusacuihno Nyoo chí ndo. Soco chíin xaan chinó iñi ndo chí ra. ³¹ Yucuan chaha ma caca xaan xiñi ndo ta catyí ndo: “¿Ñáá cha cachi ndi, o ñáá cha coho ndi, o ñáá

cha cuihno ndi?" ³² Vatyí ñáyivi cha ñahri tuhun Nyoo caá añima, chicá xaan xiñi ñu tuhun ihya. Soco nyoho ma caca iñi ndo tuhun cuan vatyí iyó noo Sutu ndo, ra nyaá andivi. Ta chitó ra ñáá ndihi cha chiñuhu chi ndo. ³³ Yucuan chaha, cunyaa xiñi ndo maa maa ri maa tuhun maa Nyoo. Ta ndücu ndo cuhva cunyaca ñaha ra añima ndo. Ta sacuvi ndo tari cuhva cuñi maa ra. Ta tyicuan caa ñihi ndo tandihi cuii maa cha chiñuhu chi ndo. ³⁴ Tandihí quivi ta iyó tindoho chi ndo. Ma caca xiñi ndo tuhun tindoho cha vachi. Vatyí Nyoo nyaá ra chihin ndo.

7

*Ma cahan yo cha caá inga ñáyivi
(Lc. 6.37-38, 41-42)*

¹ Ma cahan ndo cha caá inga ñáyivi. Tyicuan caa ta ma tiin Nyoo cuenda cha caá ndo. ² Vatyí tari cuhva cahán ndo cha caá inga ñu, tyicuan caa cuhva cutachi tuñi Nyoo chi ndo. ³ ¿Yoso caa cha cuví nyehun cuatyí luhlu ra yañun ta ña cuví nyehún cuatyí cahnu cha iyó chi maun? ⁴ Tatu chiti nuu maun yihí noo vitu cahnu, ¿yoso caa cuví catyun chi ra yañun: "Nyaca, na tave mihin lee cha yihí chiti nuun?" ⁵ Yoho cha savahún chuun, tava xihna vitu cahnu cha yihí chiti nuu maun, tyicuan ta cuví nyehe vahun mihin lee cha cutavon chiti nuu ra yañun.

⁶ Ma sañihi ndo cahan ndo tuhun Nyoo chihin ñu ña cuñi coto, vatyí coto cañi ñu chi ndo. Tari ina cha tiin vavaha chi ndo, tyicuan caa cuví ñu. Ta tari quini cha chaca chaha ti cha yahvi nyaá, tyicuan caa cahán ña vaha ñu siqui tuhun Nyoo.

*Ma cundihñi yo cacan yo chi Nyoo, tyicuan ta cuhva ra chi yo
(Lc. 11.9-13; 6.31)*

⁷ Caçan ndo cha chiñuhu chi ndo chi Nyoo. Ta cuhva ra chi ndo. Nanducu ndo, ta nañihi ndo. Sacachan ndo yuvehe, ta nuña. ⁸ Vatyí tandihí ndo cha chicán ndo, ñihi ndo. Tatu nanducú ndo, nañihi ndo. Ta tatu sacachán ndo yuvehe, cunuña yuvehe.

⁹ Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chaha ndo noo yuu chi sehe ndo, tatu chicán ndotyín pan chi ndo. ¹⁰ Ta ña tuhvá ndo chaha ndo noo coo chi sehe ndo tatu chicán ndotyín noo tiyaca chi ndo. ¹¹ Nyoho cha quiñi iyó ndo soco chitó ndo yoso caa cuhva ndo cha vaha chi sehe ndo. Ta vihí ca Sutu yo, ra nyaá andivi. Cuaha ca cha vaha cuhva ra chi ndo tatu cacan ndo chi ra.

¹² Tari cuñi maa ndo cha cunyacuvi ñáyivi cha vaha chihin ndo, tyicuan caa cunyacuvi tucu maa ndo cha vaha chihin ñu. Vatyí tyicuan caa catyí tuhun cha tachí

Nyoo, cha tyaa ra Moisés ta ra cacuvi profeta Nyoo ta cha naha.

*Tihin yuvehe ta cuiñi ityi cha cuahan nu nyaá Nyoo
(Lc. 13.24)*

¹³ Ndücu ndo cuhva quihvi ndo yuvehe tihin. Vatyí quehen yuvehe, ta quehen ityi cha cuahan nya nu cunaa ñáyivi anyaya. Ta cuaha xaan ñu cuahan ityi cuan. ¹⁴ Soco tihin yuvehe ta cuiñi ityi cha cuahan ñáyivi cha ma naa ca maa nu cucoo ñáyivi vaha. Soco suhva ri ñáyivi nañihí ityi cuan.

Chihin cha sacuvi ri ñáyivi, ta nicohón nuu yo chi ñu tatu ñu vaha o ñu ña vaha cuví ñu

(Lc. 6.43-44)

¹⁵ Saha ndo cuenda chi ra cuendu. Vatyí cacatyí ra vatyí cuenda Nyoo cahán ra. Soco ña ndicha. Vatyí vachi coyo ra tari noo mbee nu nyicú ndo. Sahá ra tyi ra vaha cacuvi ra. Soco tari noo ñaña xaan cacuvi ra. ¹⁶ Nyoho cuví nicohón nuu ndo chi ra chihin cha nyacuví ra. Tari noo yutun ña vaha, tyicuan caa cacuvi ra. Vatyí noo tuñiyaca ma cuhva tun mango, ta ni ri noo iñu nduhva ma cuví cuhva chi tichaha ndivi. ¹⁷ Ta tyicuan caa tucu tandihí yutun vaha. Chahá tun chiti vaha. Ta tandihí yutun ña vaha, chahá tun chiti ña vaha. ¹⁸ Ta yutun vaha, ma cuví cuhva tun chiti ña vaha. Ta ni ri yutun ña vaha ma cuví cuhva tun chiti vaha. ¹⁹ Ta tandihí yutun cha ña chahá chiti vaha, cahnya yo chi tun. Ta cahmi yo chi tun. ²⁰ Ta tyicuan caa, chihin cha nyacuví ñáyivi cuví nicohón nuu ndo chi ñu tatu ñu vaha cuví ñu, o ñu ña vaha cuví ñu.

*Nu catyí ra Jesús vatyí ña tandihí ñáyivi quihvi ñu nu nyacá ñaha Nyoo
(Lc. 13.25-27)*

²¹ Ma tandihí ñu cha catyí chii: "Sutu Mañi yuhu, Sutu Mañi yuhu", cuquihvi ñu nu nyacá ñaha Nyoo gloria. Ñu sacuví tandihí cha catyí maa Nyoo Suti, ican ñu cuan cuquihvi nu nyacá ñaha ra. ²² Quiví cha cucutiñi chi ñáyivi, cuaha xaan ñu cucatyí ñu chii tyehe caa: "Sutu Mañi yuhu. Yuhu cahñ tuhun maun chihin ñáyivi. Ta chihin sivun tave tatyí ña vaha cha yihí añima ñáyivi. Ta cuaha xaan milagru savahí chihin sivun", cucatyí ñu chii.

²³ Tyicuan ta yuhu cucatyí chi ñu: "Ña ñohó nui chi nyoho. Canyaha ndo nu nyaí. Vatyí nyoho sacuvi ndo maa maa ri cha ña vaha."

*Nu sañahá ra Jesús yoso caa cucuvi chi ñu quichahá ta ñu ña quichahá tuhun cahán ra
(Lc. 6.47-49; Mr. 1.22)*

²⁴ Thya catyí chi ndo, yóo cha chiñi tuhun cahán ta sacuvi tari cuhva catyí; cuví ra tari noo ra chiñi tuñi cha savahá ra vehe ra siqui

cava. ²⁵ Ta quichahaḡ coon savi. Ta cama xaan yuvi ndutya yahaḡ. Ta ñiḡi xaan caḡ tatyí. Soco ña cuví sanduva chi vehe cuan. Vatyí ñiḡi nanyaá siqui cava cuan. ²⁶ Soco yóo cha chiñí tuhun cahín, ta ña sacuví ra tari cuhva catyí; cuví ra tari noo ra tondo, cha savahaḡ ra vehe ra nu ñiti. ²⁷ Ta chaḡ savi. Ta cama xaan yuvi ndutya yahaḡ. Ta ñiḡi xaan caḡ tatyí. Ta vehe cuan tañi tyehe ri nduvaḡ —catyí ra Jesús chi ñu.

²⁸ Cuhva cha ndiḡi cahan ra Jesús chihin ñáyivi, iyo xaan cuñiḡ ñu tuhun cha sañahá ra. ²⁹ Vatyí sañahá ra tari noo ra cha nyacá ñaha. Ta ña sañahá ra tari ra sacuahá cuenda ley vehe ñuhu.

8

Nu sanduvahá ra Jesús chi noo ra cuhvi cha tyahyú coño

(Mr. 1.40-45; Lc. 5.12-16)

¹ Cuhva cha noḡ ra Jesús yucu cuan, cuaha ñáyivi nyicón chi ra. ² Ta chaḡ noo ra cha tyahyú coño, ta chicuiñiḡ chiti ra nuu ra, ta catyí ra chi ra:

—Sutu Mañi yuhu, tatu yoho ta cuñún, cuví sanduvahun chi —catyí ra chi ra.

³ Tyicuan ta sanacaḡ ra Jesús ndaha ra ta tiñ ra chi ra, ta catyí ra:

—Cuñi sanduvahi chuun. Ta na nduvahun vityin ri —catyí ra.

Ta caa cuhva ri cuan ta nduvahaḡ nu tyahyú cuan. ⁴ Tyicuan ta quichaha catyí ra Jesús chi ra:

—Nyehe, yori chihin cahun tuhun. Soco cuahan, ta sañahun chuun chi tata sutu, ta cuhva cuendon ofrenda cha catyí ra Moisés nu ley chahnu vatyí tacuhva coto ñu vatyí cha nduvahun.

Nu sanduvahá ra Jesús chi musu noo ra capitán

(Lc. 7.1-10)

⁵ Cuhva cha chaḡ ra Jesús Capernaum, noo capitán, ra ñuu Roma, chaḡ ra nu nyaá ra Jesús ta chacu ndahvi ra nuu ra, ⁶ ta catyí ra:

—Sutu Mañi yuhu, musi catuví ra nu cama. Cuhví ra. Ña cuví nducuita ra vatyí ñiḡi xaan tahán ra.

⁷ Ta catyí ra Jesús chi ra:

—Cuhun mai ta cusanduvahi chi ra —catyí ra chi ra.

⁸ Nacahan capitán cuan ta catyí ra:

—Sutu Mañi yuhu, ña nañé cha cahun vehi; soco tacuhva catyí run, ta musi nduvaha ra. ⁹ Vatyí suri iyó ra nyacá ñaha chi mai. Ta iyó sindaro nyacá ñaha tucu mai. Ta tatu cha tave tyiño chi noo ra, cahun ra. Ta tatu cane chi inga ra, quichi ra. Ta tatu cha tave tyiño chi musi, sacuví ra.

¹⁰ Ta cha chiñiḡ ra Jesús cha cahan ra, iyo xaan cuñiḡ ra. Ta catyí ra chi ñu nyicón chi ra:

—Cha ndicha catyí chi ndo, vatyí ñuu cha nyicó nicahnu Israel, ta nañihi que ni noo ñáyivi cha chinó xaan iñi ñu tari chinó iñi ra ihya. ¹¹ Ta catyí chi ndo vatyí cuaha ñu inga ñuu cuquichi coyo ityi nu caña ñanyii, ta ityi nu quee ñanyii, ta cunyicu ñu cachí ñu chihin ra Abraham ta ra Isaac ta ra Jacob nya andívi. ¹² Ta ñu Israel cha tahán chi cahun andívi, yihí ñu, ma cahun ñu, vatyí cahun ñu nu ñaa iñi ityi chata. Ta yucuan cucuacu chaa ñu ta cacahñi noho ñu —catyí ra Jesús chi ñu.

¹³ Tyicuan ta quichaha catyí ra chi capitán cuan tyehe caa:

—Cuahan, ta na cuví chi tari cuhva catyun vatyí chinó xaan iñun chi —catyí ra.

Ta suri cuhva cuan nduvahaḡ musu ra.

Nu sanduvahá ra Jesús chi maha tyiso ra Pedro

(Mr. 1.29-31; Lc. 4.38-39)

¹⁴ Ta cha yahaḡ cuan, chaḡ ra Jesús vehe ra Pedro. Ta nanyehé ra chi maha tyiso ra Pedro, catuvi ña nu chito chihin cahñi. ¹⁵ Ta tiñ ra ndaha ña, ta quitaḡ cahñi cuan chi ña. Ta ndicuita ña, ta quichahaḡ tyiñuhu ña chi ra.

Nu sanduvahá ra Jesús cuaha ñu cuhvi

(Mr. 1.32-34; Lc. 4.40-41)

¹⁶ Ta cuhva cha cuaa cuan, quichí nyaca ñu cuaha xaan ñáyivi yihí tatyí ña vaha chi chi ra Jesús. Ta chihin noo ri tuhun cahan ra, tava ñehe ra chi tatyí ña vaha cuan, ta sanduvahaḡ ra chi tandihí ñu cuhvi. ¹⁷ Tyicuan caa cuví tacuhva vatyí na chino cava tari cuhva catyí ra profeta Isaías, quivi catyí ra tyehe caa: “Maa ra quehen ra cuehe cha yihí chi yo, ta tinyaa ra cha uhvi chi yo.”

¿Yoso chiquihí chiyo tatu cuñiyo cunyicon yo chi ra Jesús?

(Lc. 9.57-62)

¹⁸ Tyicuan ta nyehe ra Jesús vatyí nicachico nu nyaá ra nyicó ñáyivi. Ta catyí ra chi ñu vatyí cuyaha ra inga chiyo miñi.

¹⁹ Tyicuan ta chaḡ noo ra sacuhva ley vehe ñuhu ta catyí ra chi ra:

—Maestro, cuñi cunyiquen chuun tandihí ri ityi nu cahun —catyí ra.

²⁰ Ta ra Jesús catyí ra chi ra:

—Ñaña, iyó vehe ti, ta saa cha chicó nu tatyí, iyó taca ti. Soco yuhu Rayii cha quichí nya gloria, ñahri vehi ta ni ri nu cava xiñi ta ñahri —catyí ra.

²¹ Inga tucu ra chicá noo chihin ra catyí ra chi ra:

—Tata, cuhva na cahun xihne cutyihi chi suti chichi ñuhú, tyicuan ta quichi ta cunyiquen chuun —catyí ra.

²² Ta catyí ra Jesús chi ra:

—Ñaha yoho vatyi cunyicon chii. Saña chi ñu ña ñohó nuu chi Nyoo, na tyihí maa ñu chi tahan ñu chichi ñuhú —catyí ra.

Nu sacutaxín ra Jesús tatyí xaan
(Mr. 4.35-41; Lc. 8.22-25)

²³ Tyicuan ta quihví ra chichi canoa, ta ra cachicá noo chihin ra, cuahan coyo ra chihin ra. ²⁴ Ta chaq noo tatyí ñihi xaan nu miñi cuan, ta nyacua chasí ndutya cuan canoa ra soco maa ra Jesús quixí ra. ²⁵ Ta ra cachicá noo chihin ra sandoyó ra chi ra, ta cacatyí ra:

—¡Sutu Mañi yuhu, sacacu chi yo, vatyi cuñí cunaa yo!

²⁶ Ta catyí ra Jesús chi ra:

—¿Ñáá tuhun cha yuhví xaan ndo? ¡Ny-oho chiin xaan chinó iñi ndo chii!

Tyicuan ta nacandá ra ta sacutaxín ra tatyí nu miñi cuan, ta tandihí cutaxín. ²⁷ Ta iyo xaan cacuñí ra cuan ta cacatyí ra:

—¿Yóó ra cuví ra ihya? Vatyi nyacua nya tatyí ta nyacua nya ndutya ta quichahá chi ra —catyí ra.

Nu nduvahá uvi ra ñuu Gadara ra cayihí tatyí ña vaha chí

(Mr. 5.1-20; Lc. 8.26-39)

²⁸ Tyicuan ta chaq coyo ra inga chiyo miñi cha nyaá ñuhú cha nañí Gadara. Ta chaq coyo uvi tahan ra yihí tatyí ña vaha chí. Ta nu ñaña caquitá coyo ra cuan. Xaan vavaha ra, ta yori maa cuví yaha ityi cuan. ²⁹ Ta canachaá ra, ta cacatyí ra:

—¿Ñáá cha cuñún chihin ndi, yoho Jesús Sehe Nyoo? ¿Atu vachun vachí sanyehun tindoho chí ndi cha ni cumañi ca chaa quiví? —cacatyí ra cuan.

³⁰ Ta tatyín ri cuan nyicú cuaha quini cachachí ti. ³¹ Ta catyí tatyí ña vaha cuan chí ra Jesús:

—Tatu cuatava ñehun chí ndi, cuhva cha quihví ndi chichi quini cuan —cacatyí tatyí ña vaha cuan.

³² —Vaha. Quihví ndo —catyí ra Jesús.

Ta caquitá coyo tatyí ña vaha cuan, ta quihví coyo chichi tandihí quini canyicú cuan. Ta tandihí quini cuan cachino tí ta canacoyo ti noo xahva yuhu miñi cuan, ta chihí ti chihin ndutya cuan.

³³ Tyicuan ta ra casaha cumi chí ti cuan, cachinó vavaha ra cuahan coyo ra chichi ñuu, ta canacatyí ra tandihí cha cuví chí ra cayihí tatyí ña vaha cuan chí. ³⁴ Ta tandihí ñáyivi ñuu, chahán ñu chinyehé ñu chí ra Jesús, ta chacu ndahví ñu nuu ra na quita ra yucuan.

9

Nu sanduvahá ra Jesús chí noo ra cuhví cha ña cuví nacanda

(Mr. 2.1-12; Lc. 5.17-26)

¹ Tyicuan ta quihví ra Jesús chichi canoa ta yaha sava ra inga chiyo miñi, ta nachaa ra nya ñuu nu iyó ra. ² Nu nyaá ra yucuan chinyacá ñáyivi chí noo ra cuhví cha ña cuví nacanda catuvi ra nu chito. Ta cha nyehé ra Jesús vatyi chinó xaan iñi ñu chí ra, quichaha catyí ra chí ra cuhví cuan:

—Sanñi iñun, suti vatyi cha chicoo ticahnu iñi cuatyun —catyí ra chí ra.

³ Tyicuan ta quichahá chica xiñi suhva ra sacuahá ley vehe ñuhu cha nyicú yucuan tyehé caa: “Ra ihya chicoo cuatyí ra nu Nyoo chihin tuhun cahán ra”, cachicá xiñi ra.

⁴ Soco ra Jesús chitó ri ra ñáá cha cachicá xiñi ra, ta catyí ra chí ra:

—¿Ñáá tuhun cha ña vaha maa chicá xiñi ndo? ⁵ Vatyi ¿nya cha yí ca catyí yo: atu yí ca catyí yo “Cuatyun cha yaha ndachi”, o yí ca catyí yo: “Ndícuita ta cacon”? ⁶ Vaha. Cuasñahi chí ndo vatyi yuhu Rayí cha quichi nya gloria, iyó ityi chí siqui ñuhu ñáyivi ihya vatyi sahí ticahnu iñi cuatyí —catyí ra Jesús.

Tyicuan ta catyí ra chí ra cuhví cuan:

—Ndícuita, naquehen chiton ta cuanuho nya vehun —catyí ra.

⁷ Tyicuan ta ndicuitá ra cuhví cuan ta cuanuho ra nya vehe ra. ⁸ Cuhva cha nyehé ñáyivi tuhun ihya, canayuhví ñu. Ta casacahnú ñu chí Nyoo vatyi chahá ra tunyee iñi cuan chí ñáyivi.

Nu caná ra Jesús chí ra Mateo

(Mr. 2.13-17; Lc. 5.27-32)

⁹ Quitá ra Jesús yucuan, ta nanyehé ra chí noo ra cha nañí Mateo, nyaá ra quehen ra xuhun cha tyiyahví ñu Israel chí gobiernu ñuu Roma. Ta catyí ra chí ra:

—Coho chihin.

Tyicuan ta ndicuitá ra Mateo ta tyinyicon ra chí ra.

¹⁰ Tyicuan ta cuví chí noo chaha ra Jesús nyaá ra nya vehe ra Mateo, chachí ra. Ta cachaa coyo cuaha ra catavá xuhun cuenda gobiernu ñuu Roma ta inga ca ra ca iyó cuatyí. Ta cachicunycú tucu ra yucuan nu mesa in ri chihin ra Jesús ta ra cachicá noo chihin ra. ¹¹ Soco cha canyehé ra fariseo cha tyicuan caa, candaca tuhun ra chí ra cachicá noo chihin ra Jesús, ta cacatyí ra:

—¿Ñáá tuhun cha vatyi ra sacuahá chí nyoho chachí ra chihin ra catavá xuhun cuenda ra nyacá ñaha nya Roma ta chihin ra ca iyó cuatyí? —cacatyí ra.

¹² Chiñi ra Jesús cha cahán ra, ta catyí ra chí ra:

—Ña chiñuhú doctor chí ñu iyó vaha, ñu ña cuhví, soco chí ñu cuhví chiñuhú ra.

¹³ Cuahan ndo ta cütuhva ndo cha cuñí chí catyí nu tutu Nyoo, nu catyí ra tyehé caa: “Yuhu cuñí vatyi cundahví cuñí ndo chí

ñáyiví, ta ñima ca cha cahñi ndo quiti ta cuhva cuenda ndo chii.” Ña vachi na cane chí ñu vaha, soco chí ñu iyó cuatyí, tacuhva na nasama ñu cuhva iyó ñu.

Nu catyí ra Jesús vatyi cha ni ri ca cha nyaá ca ra chihin ra cachicá noo chihin ra ña tahán chi cha saha ra ayunar

(Mr. 2.18-20; Lc. 5.33-35)

¹⁴ Tyicuan ta ra canyicón chí ra Juan, ra sacondutya chí ñáyiví, catuhvā ra chí ra Jesús ta candacā tuhun ra chí ra ta cacatyí ra:

—¿Ñáá tuhun cha nyuhu ta ra cacuvi fariseo, cuaha xaan chaha savaha ndi ayuno, ña chachí ndi ta nanducú ndi chí Nyoo? ¿Ta ra cachicá noo chihin yoho ñima tyicuan caa sacuvi ra? —cacatyí ra nyicón chí ra Juan.

¹⁵ Ta nacahan ra Jesús ta catyí ra:

—¿Atu cuví cunyaá cuihya ñu nyicú vico cha ni ri ca cha nyaá ra cua tandaha chihin ñu? Soco vachí quiví vatyi cucuachiyo ra nu nyicú ñu, tyicuan ndicha ta cusavaha ñu ayuno.

Nu sañahá ra Jesús vatyi ña chachí tahan tuhun chahnu cha iyó ñu chihin tuhun chaa cha sañahá ra chí ñu

(Mr. 2.21-22; Lc. 5.36-39)

¹⁶ Yori naquicú noo vestido chahnu chihin noo sahma chaa vatyi coto cundiyo nu naquicū ñu chihin cha chaa cuan, ta cahnya chí cha chahnu cuan, ta nu tahnya cuan nducahnu ca. ¹⁷ Ta ni ña tyihí yo vinu chaa chichí ñi chahnu vatyi tatu sacuvi yo tyicuan caa, tahnya ñi cuan, ta tari cunaa vinu, ta cunaa ñi cuan. Yucuan chaha cuñí chí tyihí yo vinu chaa chichí ñi chaa, ta tyicuan ta ninduvi ta cusaha cuenda chí chí tahan chí.

Sehe ra Jairo, ta ñaha cha tñn sahna ra Jesús

(Mr. 5.21-43; Lc. 8.40-56)

¹⁸ Cha ni ri ca cha catyí ra Jesús tuhun ihya, chaá noo ra cuví nuu chí ñu Judea ta chícuiñ chiti ra nuu ra Jesús, ta catyí ra:

—Ni chihí sehi, soco tatu yoho quichun ta tyison ndahun siqui ña, cunandoto ña —catyí ra chí ra Jesús.

¹⁹ Ndicuitā ra Jesús ta cuahan ra iin ri chihin ra ta ra cachicá noo chihin ra ñandihí.

²⁰ Tyicuan ta noo ñaha, cuhví ña chihin cha chati ñiñi ña. Ta cha uchi uvi cuiya cuhví ña. Ta tuhvā ña chí ra Jesús ityi chata ra, ta tñn ña yuhu sahna ra, ²¹ vatyi tyehe caa chicá xiñi ña: “Ma chihin cha tñn ri sahna ra ta nduvahi”, chicá xiñi ña.

²² Soco ra Jesús nanyocavā ra nanyehe ra chí ña, ta catyí ra chí ña:

—Nduní iñun sihi, cha nduvahun vatyi chinó iñun —catyí ra.

Ta caa cuhva ri cuan ta nduvahā ña.

²³ Yaha cuan ta chaá ra Jesús vehe ra cuví nuu cuan, ta nyehe ra vatyi ra música cany-atú tuhva ra cha cuhun coyo ra nu quihvi cue chichí ñuhú. Ta ñáyiví cha nyicú cuan chacú chaa ñu. ²⁴ Ta catyí ra chí ñu:

—Quita ndo ihya. Ñaha tyivaa ihya, ña chihí ña, soco quixí ña —catyí ra.

Ta chacú cuehe ri ñáyiví nyehe ñu chí ra. ²⁵ Soco ra Jesús tavā ra chí ñu ityi chata vehe, tyicuan ta quihvi ra ta tñn ra ndaha ñaha tyivaa cuan, ta maa ña ndicuitā ña. ²⁶ Ta tandihí ityi cuan chityā tuhun cha cuví yucuan.

Nu sanduvahā ra Jesús chi uvi ra cuaa

²⁷ Cuhva cha quita ra Jesús yucuan, uvi tahan ra cuaa canyicón chí ra suri caná chaa ra ta cacatyí ra:

—iCundahvi cuñi chí ndi, yoho ra vachi tata ra David! —cacatyí ra.

²⁸ Ta cuhva cha quihvi ra Jesús chichí vehe, ra cuaa cuan, catuhvā ra chí ra, ta maa ra Jesús quichaha ndaca tuhun ra chí ra:

—¿Atu chinó iñi nyoho vatyi cuví sanduvahi chí ndo? —catyí ra.

Ta canacahan ra ta catyí ra:

—Ay, chinó iñi ndi chuun, Sutu Mañi yuhu —cacatyí ra.

²⁹ Tyicuan ta tñn ra Jesús chiti nuu ra ta catyí ra chí ra:

—Na cuví maa yoso cuhva chinó iñi ndo —catyí ra.

³⁰ Ta canduvahā chiti nuu ra. Ta catyí vaha ra Jesús chí ra tyehe caa:

—Ndūcu ndo cuhva cha yori coto.

³¹ Soco quita coyo cuiri ra ta quichaha canacatyí ra cha sacuví ra Jesús chihin ra chí ñáyiví tandihí ityi yucuan.

Nu sanduvahā ra Jesús chi noo ra ñihí

³² Cha ni ri ca cha caquita coyo ra cucuaa cuan, suhva ñáyiví quichí nyaca ñu chí noo ra ñihí cha yihí noo tatyí ña vaha chí nu nyaá ra Jesús. ³³ Ta caa cuhva ri cha tavā ñehe ra Jesús tatyí ña vaha cuan, quichahā cuví cahan ra cuan. Ta iyo xaan cuñí ñáyiví, ta catyí ñu:

—Ni noo chaha ta cuví ca cha tyehe caa Israel Ihya —catyí ñu.

³⁴ Soco ra cacuvi fariseo, cacatyí ra:

—Ra ihya tavā ñehe ra tatyí ña vaha chihin tunyee iñi chí cuhna ra cuví nuu —catyí ra.

Nu catyí ra Jesús vatyi ña cuaha maa ñu sahā tyiño cuenda Nyoo iyó

³⁵ Ra Jesús chahan ra tandihí ñuu sañahá ra chí ñáyiví chichí vehe ñuhu tahan tahan ñuu. Cahán ra tuhun Nyoo yoso caa nyacá ñaha Nyoo añima ñáyiví. Ta sanduvahā ra tandihí nuu cuehe cha yihí ñu. ³⁶ Ta cha nanyehé ra chí ñáyiví, cundahvi cuñí ra nyehé ra chí ñu, vatyi nyehé ñu tindoho

ta cuihya cuñí ñu, tari mbee quiti cha yori sahan cumi chi. ³⁷ Tyicuan ta catyí ra chi ra cachicá noo chihin ra tyehe caa:

—Cha ndicha, cuaha tyiño iyó, soco ra sahá tyiño, ña cuaha ra. ³⁸ Yucuan chaha, caçan ndo chi chitoho tyiño yucuan, na tachi ra chi ra saha tyiño na sataca ra tyiño cuan.

10

Nu cachí ra Jesús chi ndi uchi uvi ra caca tyiño ra

(Mr. 3.13-19; Lc. 6.12-16)

¹ Tyicuan ta caña ra Jesús chi ndi uchi uvi ra chicá noo chihin ra ta chaha ra ityi chi ra vatyi tava ñehe ra chi tatyí ña vaha cha yihí añima ñáyivi, ta sanduvaha ra ndihi nuu cuehe ta cha uhvi ñandihí.

² Ican ihya cuví sivi ndi uchi uvi ra chicá tyiño ra: xihna ca, ra Simón, cha nañi tucu Pedro, ta yañi ra, ra Andrés, ra Jacobo ta yañi ra, ra Juan, sehe ra Zebedeo cacuví chi ra; ³ ta ra Felipe, ra Bartolomé, ra Tomás, ta ra Mateo ra tava xuhun cuenda gobiernu ñuu Roma, ra Jacobo sehe ra Alfeo, ra Lebeo cha nañi tucu Tadeo, ⁴ ta ra Simón cha yihí cuenda ityi ra cacuñi cuhun cuatyí siqui gobiernu ñuu Roma cha nyacá ñaha chi ñu, ta ra Judas Iscariote, ra cha naxico tuhun chi ra Jesús.

Nu tachi ra Jesús chi ra cachicá noo chihin ra, na cucahan ra tuhun Nyoo

(Mr. 6.7-13; Lc. 9.1-6)

⁵ Ta tyehe caa tachi ra Jesús chi uchi uvi tahan ra cuan, ta catyí ra:

—Ma cuhun ndo nu iyó ñu cha ñima ñu Israel cuví, ta ni ma quihvi ndo ñuu cha nyicú Samaria. ⁶ Cuçhan ndo, soco nu nyicú mbee cha cuanaa cha cuví ñu ñuu Israel. ⁷ Cuçhan ndo cuacahan ndo tuhun vatyi cha chaçá cha cunyaca ñaha Nyoo añima ñáyivi. ⁸ Sanduvaha ndo chi ñu cuhvi ñu tyahyú coño, ta ñu yihí inga cuehe chii. Sanandoto ndo ndiyi, tava ñehe ndo chi tatyí ña vaha cha yihí chi ñu. Nyoho, naquehén cuenda ndo tunyee iñi ihya chihin cha ñahri yahvi, ta cotyiño ndo soco ma quehen ndo yahvi.

⁹ Ma cuiso ndo ni noo xuhun, ni xuhun cuan ni xuhun cuichin, ni xuhun cuaha. ¹⁰ Ma cuiso ndo ni yono cha cuenda cha caca ityi ndo. Noo ri camisa cha ñihó ndo cuhun chihin ndo. Ta ma cuiso ndo inga ityi ndichan, ni yutun ma tuvi ndo, vatyi ra sahá tyiño, iyó ityi chi ra cha coo yahvi ra.

¹¹ Cuhva cha cha ndo noo ñuu, nducu ndo noo ñáyivi cachi iyó, ta ndo ndo vehe ñu nyacua nya quita ndo ñuu cuan. ¹² Cuhva cha cua quihvi ndo noo vehe, cuhva ndo nocumi chi ñáyivi iyó vehe cuan. Ta catyi ndo chi ñu: Na coo cha taxi Nyoo añima ndo, catyi ndo chi ñu. ¹³ Ta tatu ñu ñuu cuan ta

nacotó ñu tyi chiñuhú cha taxi ri cuan chi ñu, cundoo cuan chihin ñu. Soco tatu ña nacotó ñu vatyi chiñuhú cuan chi ñu, ma ndoo cuan chihin ñu. ¹⁴ Ta tatu ña cuñí ñu quehen cuenda ñu chi ndo, ta ni ña cuñí ñu cuiñi ñu tuhun cahán ndo, tyicuan ta quita ndo vehe yucuan, o ñuu yucuan, ta naquisi ndo ñiyaca chaha ndo. ¹⁵ Cha ndicha catyí chi ndo vatyi quivi cutuñi chi ñáyivi, ñihi ca cutachi tuñi Nyoo chi ñu cuan, ta ñima ca ñáyivi ñuu Sodoma ta ñuu Gomorra.

Nu sañahá chi ñáa ndihi tindoho cunyehe ñu chicá tyiño Nyoo

¹⁶ ¡Nyehe ndo! Yuhu tachi chi ndo, tari mbee mahñu lobo. Quiyi saha ndo chi ndo, tari coo, soco masu saha ndo chi ndo tari paloma. ¹⁷ Saha ndo cuenda chi ndo vatyi ñáyivi cucuhva cuenda ñu chi ndo chi ra cuví tyiño, ta chichi vehe ñuhu cucañi ñu chi ndo. ¹⁸ Ta cha cuenda yuhu, nyacua cunyaca ñu chi ndo nuu gobiernu ta nuu rey. Ta tyicuan caa ta cuví cahan ndo tuhun nuu ra ta nuu ñu cha ñima ñu Israel cuví. ¹⁹ Soco tatu nacuhva cuenda ñu chi ndo chi ra cuví tyiño, ma caca xiñi ndo yoso caa cucahan ndo, vatyi tatu cha cuhva cha cahan ndo, Nyoo cucuhva ra tuhun cha cucahan ndo. ²⁰ Vatyi ñima maa ndo cucahan, soco maa Tatyí Ii Sutu yo Nyoo cusacahan chi ndo.

²¹ Rayii cunaxico tuhun ra suri chi yañi ra tacuhva na cacahñi ra chi ra. Ta yihí ra cunaxico tuhun ra chi sehe ra. Ta yihí ñáyivi cunanuhu ñu siqui sutu ñu ta sihi ñu, ta cusacuví ñu, na cuví ñu. ²² Tandihí ñáyivi, cucutasi cuñi nyehe ñu chi ndo cha catyi yuhu. Soco tatu ña ndu uvi iñi ndo chino iñi ndo chii, tyicuan ta cucacu añima ndo. ²³ Tatu chica nyicon ñu chi ndo noo ñuu, cono ri ndo inga ñuu. Vatyi cha ndicha catyi chi ndo ni cha ta ndihi ca cahan ndo tuhun Nyoo tandihí ñuu nu nyicu ñáyivi Israel ta yuhu Rayii cha quichi nya gloria cuquichi inga chaha.

²⁴ Ni noo ra cutuhvá, ña cahnu ca ra cuví ra ican saha ra sacuaha chi ra. Ta ni noo musu, ña cahnu ca cuví ra ican saha chitoho ra. ²⁵ Ra cutuhva, cuñi chi ndoo ra vaha cha chaa ra cuví ra tari ra sacuaha chi ra, ta musu tari chitoho ra. Tatu yuhu ra cuví chitoho vehe, catyí ñu chii vatyi Beelzebú, cuihna ra cuví nuu, cuví, suri tyicuan caa cucatyi tucu ñu chi ñáyivi cuende.

Yóo chi tahán chi cuyuhvi yo
(Lc. 12.2-7)

²⁶ Yucuan chaha ma yuhvi ndo chi ñáyivi, vatyi ni noo tuhun xehe ta cuñun, tyi ma natuvi. Ta ni ñahri cha ñohó xehe, ta cuñun tyi ma coto tandihí ñáyivi. ²⁷ Tandihí cha catyí chi ndo nu ñaa iñi, catyi nyoho nu ndichin. Ta tandihí cha catyí chi ndo nu xehe, çana chaa ndo nya xiñi vehe, na coto

tandihí ñáyivi. ²⁸ Ma yuhvi ndo chí ñu chahñí coño ñuhu yo, vatyí ma cuví cahñí ñu añima yo. Soco yuhvi ndo chí ra cuví sanaa coño ñuhu yo ta añima yo chichi anyaya ñandihí.

²⁹ ¿Atu ñima chihin noo xuhun luhlu ri, sata yo uvi tahan saa? Ican. Soco ni noo ti ña canacava ti nu ñuhú tatu ña catyí maa Nyoo Sutu yo. ³⁰ Vatyí nyacua nya ixí xiñi nyoho ta chitó Nyoo yoso tahan nyaá. ³¹ Ma yuhvi ndo. Nyoho, yahvi ca nyaá ndo ta ñima ca ticuítí saa.

Ma yuhvi yo cahan yo tuhun ra Jesucristo nuu ñáyivi

(Lc. 12.8-9)

³² Tandihí ñu cha cahán vaha tuhun nuu ñáyivi, yuhu tucu cucahan vahi cuenda ñu nuu Suti ra nyaá andívi. ³³ Soco ñu cahán nuu cahan tuhun, yuhu tucu ma cahin tuhun ñu nuu Suti ra nyaá andívi.

Cha cuenda ra Jesús cusñin ñáyivi

(Lc. 12.51-53; 14.26-27)

³⁴ Ma cuñi ndo vatyí yuhu vachi cuhve cha taxi ri coo ndo siquí ñuhu ñáyivi ihya. Ña vachi cuhve cha taxi ri, soco cha cañi tahan ñáyivi. ³⁵ Vatyí sasiñ chí ndo. Vatyí noo ra cuhun ra siquí sutu ra. Ta noo ña cuhun ña siquí sihi ña. Ta ñu cuví chono cucañi tahan ñu chihin tyiso ñu. ³⁶ Ta tyicuan caa suri ñáyivi chí ndo cucuvi ñu ñu xaan iñi chí ndo.

³⁷ Ñu cha cuñí ca chí sutu o chí sihi ican saha chí yuhu, ña tahán chí cuví ñu ñu cuende. Ta ñu cuñí ca chí sehe, ican saha chí yuhu, ña tahán chí cuví ñu ñu cuende. ³⁸ Ta ñu cha ña cuñí nyehe tindoho ta cunicon ñu chíi, ña tahán chí cuví ñu ñu cuende. ³⁹ Vatyí ñu ña cuñí nyehe tindoho cha cuenda yuhu, cunyehe ñu tindoho anyaya, soco ñu nyehe tindoho ta chahá ñáyivi cha catyí yuhu, cucacu añima ñu.

Yahvi cha tahán chí chí yo

(Mr. 9.41)

⁴⁰ Ñu quehén cuenda chí ndo, chí yuhu quehén cuenda chí, ta ñu quehén cuenda chí yuhu, quehén cuenda ñu chí ra cha tachí chíi. ⁴¹ Ñu quehén cuenda noo ra profeta Nyoo cha cuenda vatyí cuenda Nyoo cahán ra, cuñihi ñu suri tahan yahvi cha cuñihi profeta cuan. Ta ñu quehén cuenda chí noo ra vaha cha cuenda tyi ra vaha cuví ra, suri tahán yahvi cha cuñihi ra vaha cuan cuñihi ñu. ⁴² Ta savahri ñu cha cuhva vasí noo vasu ndutya vichin coho ñu nyihí ihya cha cuenda cha nyicón ñu chíi, cuñihi ñu cha cucuhva Nyoo chí ñu —catyí ra Jesús.

11

Ra cha tachí ra Juan nu nyaá ra Jesús

(Lc. 7.18-35)

¹ Ndihi chaha ra Jesús tuhun chí uchi uvi ra chicá noo chihin ra, tyicuan ta quita ra yucuan, vatyí cucahan ra tuhun Nyoo chihin ñáyivi cha iyó ñuu cha nyicó ityí cuan.

² Ta ra Juan nu ñohó ra vehe caa, ñihí ra tuhun cha sacuví ra Cristo. Tyicuan ta tachí ra chí uvi ra nyicón chí ra, cundaca tuhun ra noo tuhun chí ra Jesús. Ta cachaá coyo ra nu nyaá ra ³ ta cacatyí ra chí ra:

—¿Atu yoho cuvún ra Cristo cha tahán chí quichi sacacu chí ndi, o cuñí chí cha cuatu ndi chí inga ra? —cacatyí ra chí ra.

⁴ Nacahan ra Jesús ta catyí ra:

—Cuahan ndo ta catyí ndo chí ra Juan cha nyehé ndo, ta cha chíí ndo. ⁵ Nacatyí ndo chí ra yoso caa nanyehé ñu cuaa, yoso caa nacacá ñu coxo, ta ñu tyahyu coño yoso caa nduvahá ñu, ta yoso caa nacuíñi ñu soho, ta ñu ndiyí nandoto ñu, ta chihin ñu ndahví cahán ndi tuhun Nyoo yoso caa sacacu ra añima ñu.

⁶ Siñ xaan cuñí ñu ña chicá uvi iñi nyicón chíi.

⁷ Cuhva cha cuahan coyo ra, ra Jesús quichaha cahan ra tuhun ra Juan chihin ñáyivi, ta tachí ra:

—¿Ñáá cha chahan nyoho chinyehe ndo chiquí ndi cuan? ¿Atu chinyehe ndo noo ndoo cha naquisí tatyí? ¿Ñáá cha nyehe ndo? ⁸ ¿Atu nyehe ndo noo ra vaha ñihmó? Ñima. Nyoho chitó ndo vatyí ra ñihmó vaha, nyaá ra vehe rey. ⁹ Tu tyicuan caa, ¿ñáá cha chahan ndo chí nyehe ndo? ¿Atu noo ra cuví profeta? Ican. Soco noo ra cha cahnu ca cuví ican saha noo profeta cuenda Nyoo. ¹⁰ Vatyí ican ra Juan ihya, cuví cha cahán tuhun nu tutu Nyoo tyehé caa:

Yuhu cuví Nyoo ta tachí chí noo ra cahan tuhun ityí nuu nu cuhun.

Vatyí cucahan ra tuhun chihin ñáyivi nanasama ñu cuhva iyo ñu ta cuatu tuhva ñu quiví quichun.

¹¹ Cha ndicha catyí chí ndo, vatyí chichi cha tandihí ñáyivi, ni noo chaha ta coo ca noo ra cahnu ca cuví ican saha ra Juan ra sacondutyá chí ñáyivi. Soco ra cha nyacá ñaha Nyoo añima, vasí cuví ra noo ra luhlu ca, soco cahnu ca ra ta ñima ca ra Juan. ¹² Nyacua nya quiví cha chaá ra Juan ta nya vityin, cuaha ñu ndachan sahá chíi nducú sativí ñu tuhun Nyoo, ña cuñí ñu cha cunyacá ñaha Nyoo añima ñáyivi. ¹³ Ra Moisés cahan ra tuhun yoso caa nyacá ñaha Nyoo añima ñáyivi, ta tyicuan caa tucu tandihí ra profeta nyacua nya quiví quichí ra Juan. ¹⁴ Ta tatu cuñí nyoho chino iñi ndo tuhun cahín, catyí chí ndo vatyí profeta Elías cha tahan chí quichi, ra Juan cuví ra. ¹⁵ Yóó ñu cha cutuñi iñi, na tyasoho ñu tuhun cahín.

¹⁶ ¿Yóó chihin sandu inuu ri chí ñáyivi cha iyó tyembu ihya? Tari ra cuatyaa

cuví ñu, vatyí chicunyaa ndotyin nuyahví nyasiquí ndotyin, ta canachaa ndotyin chí ra tahan ndotyin, ta catyí ndotyin tyehe caa: ¹⁷ “Tiví ndi flauta, soco ña chita chaha ndo. Chita ndi yaa cuihya soco ña chacu ndo.” Tyicuan caa tucu nyoho, ni noo cuhva ña tahan íni ndo. ¹⁸ Vatyí quichí ra Juan, cha ña chachí ra ta ña chihí ra, ta nyoho catyí ndo vatyí noo tatyí ña vaha yihí chí ra. ¹⁹ Yahá cuan ta quichí tucu yuhu Rayíi cha quichi nya gloria. Ta yuhu chachí ta chihí tandihí, ta catyí ndo tyi ra cuahyí ra tuhvá chihí cuví. Ta ña tahan íni ndo cha cutahín chihin ra iyó cuatyí ta ra tavá xuhun. Soco vasí ni noo ndi ña naquehén cuenda ndo tuhun cahán ndi, soco Nyoo chahá ra cha chiñi tuñi ra chí ñu naquehén tuhun cahín ta tuhun cahan ra Juan, ta maa ñu cusañaha chí ndo vatyí vaha cha chiñi tuñi Nyoo —catyí ra Jesús.

Uvi ñuu nu ña tyasohó ñáyivi tuhun Nyoo (Lc. 10.13-15)

²⁰ Tyicuan ta quichaha cahan ra Jesús chí ñu ñuu nu sacuví ra cuaha milagru, vatyí ñáyivi cuan ña canasama maa ñu cuhva iyó ñu, ta catyí ra:

²¹ —¡Ndahví nyoho, ñu ñuu Corazin! ¡Ndahví nyoho ñu ñuu Betsaida! Vatyí nyehé ndo nyatu cahnu ta ña nasama ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu ñahri nyatu cahnu nyehé ñu. Soco tyehe ta nyehé ñu nyatu cahnu quivi cuan tari cha nyehé nyoho vityin, tañi tyehe ri ndihvi noo ñu sahma tucuihya íni ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi íni ñu cuatyí ñu cuví cuan. ²² Soco catyí chí ndo vatyí quivi cutuñi chí nyoho nuu Nyoo, cahnu ca cha uhví cunyehe ndo ta ñima ca ñáyivi Tiro ta Sidón. ²³ Ta nyoho ñu ñuu Capernaum, cuñí maa ndo tyí cundaa ndo nya andívi, soco cunoo ndo nya nu nyicú ñu ndiyi. Vatyí tyehe ta cuví milagru ñuu Sodoma cuan, tahan cha cuví ñuu ndo, ñuu cuan coo ca nyacua nya vityin. ²⁴ Soco catyí chí ndo vatyí quivi cutuñi chí nyoho, yaha ca cunyehe ndo tindoho, ta ñima ca ñu ityí ñuu Sodoma cuan.

Cuhva ndo chí ndo chí, ta cuhve cha nyitatu ndo, catyí ra Jesucristo (Lc. 10.21-22)

²⁵ Tyembu cuan catyí ra Jesús chí Nyoo tyehe caa:

—Sutu Mañi yuhu, Nyoo, ra nyacá ñaha andívi ta ñuhu ñáyivi. Sacahní chuun vatyí sañahún tuhun maun chí ñu ñahri maa chitó. Ta tixehún tuhun maun chí ñu cha sahá tuhun tyi chitó xaan ta ñu chiñi tuñi ñandihí. ²⁶ Ndicha Sutu Mañi yuhu, vatyí tyicuan caa cuñí maun.

²⁷ Tyicuan ta catyí tucu ra:

—Suti nacuhva cuenda ra tandihí chí. Yori maa ñohó nuu noo cha ndicha chí, soco noo tuhun ri maa Suti ñohó nuu ra chí. Ta yori ñohó nuu noo cha ndicha chí Suti, soco noo tuhun ri mai, cha cuví Sehe ra chí, ñohó nui chí ra. Ta ñáyivi cha cuñí mai cha cohon nuu chí ra, ican ñu cuan cua cohon nuu chí ra. ²⁸ Tandihí nyoho cha chitatu ndo cha sahá tyiño ndo, ta chihin carga cha nyisó ndo, quichi ndo nu nyaí, ta yuhu cuhve cha nyitatu ndo. ²⁹ Cuhva ndo cha cunyaca ñahi chí ndo ta cutuhva ndo cuhva iyó yuhu. Vatyí yuhu masu íni ta cama íni. Tyicuan caa ta ñihi ndo nu nyitatu añima ndo. ³⁰ Ña yíi cha cuhva ndo chí ndo cha cunyaca ñahi. Ta carga cha chahí chí ndo, ñahma.

12

Nu tohón ra cachicá noo chihin ra Jesús yoco trigu quivi nyitatu ñáyivi (Mr. 2.23-28; Lc. 6.1-5)

¹ Noo quivi nyitatu ñáyivi, yahá ra Jesús mahñu nu iyó cha tachí ñu. Ta chaá soco chí ra cachicá noo chihin ra. Ta quichaha catohon ra yoco trigu cuan ta quichaha cachachi ra chí yoco cuan. ² Cuhva cha cananyehé ra fariseo cha tyicuan caa, catyí ra chí ra Jesús:

—Nyehe, ra cachicá noo chuhun sacuví ra noo cha ña tahan chí sacuví yo quivi nyitatu yo —catyí ra chí ra.

³ Soco maa ra Jesús catyí ra chí ra:

—¿Atu ta sacuaa ca nyoho cha sacuví ra David chihin ra tahan ra quivi cha chisoco ra? ⁴ Quíhví ra chichi vehe Nyoo. Ta quehen ra pan ii cha cha yahá catuví nuu Nyoo. Ta chachí ra ta ña tahan chí cachi ra, ni maa ra ni ra ndihí chihin ra, vatyí maa ri maa tata sutu tahan chí cachi pan cuan. ⁵ ¿O ta sacuaa ca ndo nu ley cha chahá Nyoo chí ra Moisés nu catyí chí vatyí ra cacuví sutu, ña canyitatu ra quivi nyitatu yo, soco sahá tyiño ra chichi vehe ñuhu? Yucuan nyehé yo vatyí ñima cuatyí cuví cuan. ⁶ Ta catyí chí ndo, vatyí ihya nyaá yuhu cha cuví noo ra cahnu ca ican saha vehe ñuhu. ⁷ Nyoho, ta cutuñi ca íni ndo nu catyí chí tyehe caa nu tuhun Nyoo: “Cha cuñi yuhu, cha cundahví cuñi ndo nyehe ndo chí tahan ndo, ta ñima ca cha cahñi ndo quiti ta cuhva cuenda ndo chí.” Tyehe ta cutuñi íni ndo tuhun ihya, ma tyaa ndo cuatyí síqui ñáyivi cha ñahri sacuví. ⁸ Yuhu cuví Rayíi cha quichí nya gloria. Ta iyó ityí chí vatyí catyí chí noo noo ndo ñáa cha sacuví ndo quivi nyitatu yo —catyí ra Jesús.

Nu nduvahá ra cha ityí ndaha (Mr. 3.1-6; Lc. 6.6-11)

⁹ Tyicuan ta quita ra Jesús yucuan, ta cuahan ra vehe ñuhu. ¹⁰ Ta yucuan ñohó noo ra ityí inchiyo ndaha. Ta nyicú tucu suhva

ra nducu cuhva yoso caa ta catyaa ra cuatyí siqui ra Jesús. Yucuan chaha candacá tuhun ra chi ra ta catyí ra:

—¿Atu cuví sanduvaha yo chí noo ñu cuhví quivi nyitatu yo? —cacatyí ra chi ra Jesús.

¹¹ Ta nacahan ra Jesús ta catyí ra:

—¿Nya noo nyoho, tatu canacava noo mbee sana ndo chichi noo yavi quivi nyitatu yo, atu ma cuhun ndo ta tava ndo chí tí?

¹² Ta ¿atu ña yahvi ca nyaá noo ñáyivi ta ñima ca noo mbee? Yucuan chaha vatyi tahán chí sacuvi yo cha vaha quivi nyitatu yo —catyí ra.

¹³ Tyicuan ta catyí ra chi ra cha ityi ndaha cuan:

—Sanacaa ndahun —catyí ra.

Ta cuhva cha sanacaq ra, nduvaha ri ndaha ra tari inga chiyo cuan. ¹⁴ Tyicuan ta caquitá coyo ra fariseo cuandatumuhan tahan ra yoso caa cacahñi ra chí ra Jesús.

Noo profeta, ra chahá cuenda tuhun cahán Nyoo, cahan ra tuhun ra Jesús cha ni tumañi ca cacu ra

¹⁵ Cha chitó ra Jesús tuhun tyi canducú ra chí ra, quitá ra yucuan ta cuaha ñáyivi chinyicon chí ra. Ta maa ra sanduvaha ra chí tandihí ñu cuhví. ¹⁶ Ta catyí ra chí ñu tyi ma cahan ñu tuhun vatyi ican ra sanduvaha chí ñu. ¹⁷ Tyicuan caa cuví tacuhva nachino cava tuhun cha tyaa ra Isaías ra cuví profeta Nyoo ta cha naha. Tyehe caa tyaa ra:

¹⁸ Ican ra ihya cuví ra sacuvi tyiño nui, ra cha nacachí vahi.

Cuñi xain chí ra, ta sii cuñi chihin ra. Cusacuti chí ra chihin Tatyí Ii cha iyó chii. Ta cusacoto ra chí ñáyivi cha ñima ñu Israel cuví yoso caa sacuvahi chí ñu nui.

¹⁹ Ta ma xaan cahan ra ta ni ma cana chaa ra, ta ni yori cuñi ndusu ra ityi cahnu.

²⁰ Ta ni noo ndoo yacua, ta ma cahnu ndihí ra.

Ta ni ma ndahva ndihí ra mecha cha caña ñuhma.

Nyacua nya cha sanicoo vaha ra chí ñáyivi chihin ra ta cunyaca ñaha vaha ra añima ñu.

²¹ Ta tandihí ñáyivi, ta chí ra cuquihí iñi ñu.

Nu catyí ñáyivi vatyi ra Jesús, tunyee iñi ra ña vaha iyó chí ra

(*Mr. 3.20-30; Lc. 11.14-23; 12.10*)

²² Tyicuan ta nu nyaá ra Jesús chinyaca ñu chí noo ra yihí tatyí ña vaha chí, cuaa ra ta ñihí ra. Ta ra Jesús sanduvaha ra chí ra. Ta cuví nacahan ra, ta cuví nanyehe ra. ²³ Iyo xaan cuñi tandihí ñáyivi, ta catyí ñu:

—¿Vasi ra vachi tata rey David cuví chí ra ihya? —catyí ñu.

²⁴ Soco cuhva cha cachiñi ra fariseo tuhun cuan, cacatyí ra:

—Chihin fuerza ra Beelzebú, ra cuví nuu chí cuihna, tavá ra ihya tatyí ña vaha —catyí ra.

²⁵ Soco ra Jesús chitó ra cha cachicá xiñi ra, yucuan chaha catyí ra chí ra:

—Tatu noo gobiernu ta cacuñin ra, cuaha ri ityi nanduví ra, cucañi tahan ra chihin tahan ra, ta cundihí tuhun cha canyacá ñaha ra. O tatu noo ñuu o tandihí ñáyivi noo vehe cacuñin ñu chihin tahan ñu, cutivi nu nyicú ñu. ²⁶ Ta tyicuan caa tucu, tatu cuihna ta tava ra suri ra tahan maa ra, cuñi chí catyí vatyi ña iñ ri cacuvi ra, ta cundihí fuerza cha iyó chí ra. ²⁷ Ta nyoho catyí ndo vatyi yuhu tavé tatyí ña vaha chihin fuerza ra Beelzebú. Tu tyicuan caa, ra nyicú chihin maa ndo, ¿yóó cha chaha fuerza vatyi tavá ra tatyí ña vaha? Maa ra na sacoto ra chí ndo cha ndicha, vatyi nyoho tondo ri chicá xiñi ndo. ²⁸ Yucuan chaha catyí chí ndo, vatyi yuhu tave tatyí ña vaha chihin fuerza Tatyí Ii Nyoo. Ta cuñi chí catyí vatyi ndicha cuñi Nyoo ra nyacá ñaha añima ñáyivi cha chaq ra nu canyicú ndo.

²⁹ Chichi vehe noo ra ñihí xaan, tari cuihna, ma cuví quihvi noo ra ta quehen ra tandihí cha chí ra, soco tatu cuñi xiñna ra chí ra tyicuan caa ta cuví tinyaa ra tandihí cha chí ra.

³⁰ Ñáyivi cha ña nyaá tumañi iñi chii, ñáyivi xaan iñi chii cuví ñu. Ta tatu ña tyinyee ndo chii cha cahán ndo tuhun nuu ñáyivi, cuñi chí catyí vatyi ña chahá ndo cha coto ñáyivi tuhun cahín.

³¹ Yucuan chaha catyí chí ndo vatyi Nyoo sahá ra ticahnu iñi cuatyí ñáyivi, ta ñáá cha ña vaha cahán ñu ñandihí, soco cha cahan ña vaha ñu siqui Tatyí Ii Nyoo, yucuan ndicha, ma coo ticahnu iñi cha cuenda ñu. ³² Ta yóó ri ñu cha cahán ña vaha siqui yuhu Rayi cha quichí nya gloria, coo ticahnu iñi chí ñu cha cuenda cuan. Soco ñu cahán ña vaha siqui Tatyí Ii Nyoo, ma coo maa ticahnu iñi chí ñu cha cuenda cuatyí cuan, niri ihya ñáyivi, ta niri inga ñáyivi ñandihí.

Chihin cha sacuvi ri ñáyivi ta nichon nuuriyo chí ñu tatu ñu vaha o ñu ña vaha cuví ñu

(*Lc. 6.43-45*)

³³ Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. Nichón nuu ri yo tatu yutun vaha cuví tun chihin chiti cha chahá tun. ³⁴ Nyoho, ñu quiñi iyó, tari tata coo xaan cuví ndo! ¿Yoso caa cuví quitá tuhun vaha yuhu ndo, ta ñáyivi quiñi caa añima cuví ndo? Vatyi cha quitá chichi añima yo ican cuan cahán yo. ³⁵ Noo ra vaha cahán ra tuhun vaha vatyi ñohó cha vaha añima ra. Ta ra quiñi iyó, maa maa ri tuhun quiñi caa cahán ra, vatyi cha quiñi caa ñohó añima ra. ³⁶ Ta

yuhu catyí chi ndo vatyi quívi cutuñi chi tandihí ñáyivi, cucuhva ñu cuenda tandihí tuhun cha ña saha ñu cuenda ta cahan ñu. ³⁷ Vatyi yoso cuhva cahún, yucuan cuhva cucutuñi chuun, tatu iyó o ñahri cuatyun.

Ñu quiñi iyó cuñí ñu nyehe ñu seña milagru

(Mr. 8.12; Lc. 11.29-32)

³⁸ Tyicuan ta suhva ra fariseo ta ra sacuahá ley vehe ñuhu cacatyí ra chí ra Jesús tyehé caa:

—Maestro, cuñí ndi vatyi sacuvun noo seña milagru vatyi nyehe ndi.

³⁹ Ta nacahan ra Jesús ta catyí ra:

—Ñu quiñi iyó ta ñu nyicón inga nyoo cuñí ñu nyehe ñu seña milagru. Soco ma nyehe ca ñu inga seña, noo ri seña ra Jonás ra profeta Nyoo, yucuan ri cunyehe ñu. ⁴⁰ Vatyi tari ñohó ra Jonás chichi tiyaca cahnu cuan uñi quívi ta uñi ñuu, tyicuan caa cucohon yuhu Rayi cha quichí nya gloria chichi ñuhú uñi quívi ta uñi ñuu. ⁴¹ Ta quívi cucutuñi chí tandihí ñáyivi, cundicuita ñu chiyó ñuu Ninive ta cha naha ta cacatyí ñu na tachi tuñi Nyoo chí nyoho ñáyivi cha iyó vityin, ta cacatyí ñu vatyi cucunaa ndo, vatyi maa ñu cha cuví ñu ñuu Ninive, canasama ñu cuhva iyó ñu quívi cahan ra Jonás tuhun Nyoo chihin ñu. Ta ihya nyaá ra cahnu ca cuví ta ñima ca ra Jonás. ⁴² Vatyi tyicuan caa tucu ñaha cha cuví reina ityi Sur, cundicuita ña quívi cucutuñi chí ñáyivi ta cacatyí ña vatyi cucunaa nyoho ñu iyó vityin, vatyi maa ña, vasi cañi ñuu ña soco quichí ña, quichí tyasoho ña tuhun cha chiñi tuñi ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón.

Yoso caa ndichi tucu tatyí ña vaha inga chaha añima ñáyivi tatu naa iñi ñu chí Nyoo
(Lc. 11.24-26)

⁴³ Tatu noo tatyí ña vaha quita chí añima noo rayi, chicá noo chí noo nu ityi, nanducú chí noo nu nyitatu chí, soco ña nañihí chí nu nyitatu chí. Tyicuan ta ndichí xiñi chí: ⁴⁴ “Cunuhu tiqui nya vehi nu quité.” Yucuan ta nachaa chí añima ra nu quita chí. Ta nanyehé chí vatyi ndi xaan, ta yori nyaá. ⁴⁵ Tyicuan ta cuanaquehen chí ucha ca tahan tatyí ña vaha, cha yaha ca cuhva ican saha maa chí. Tyicuan ta quihvi tandihí tatyí ña vaha cuan añima ra cuan. Yucuan chaha, quiñi ca cunícoo ra ta ñima ca cuhva chiyó maa ra. Ta tyicuan caa cucuvi chí ñáyivi quiñi iyó ihya —catyí ra Jesús.

Tari yañi ra Jesús ta tari sihi ra cuví chí ñáyivi sacuví cuhva catyí Nyoo
(Mr. 3.31-35; Lc. 8.19-21)

⁴⁶ Ni cahán ca ra Jesús chihin ñáyivi, ta chaá sihi ra ta yañi ra, ta ndo ñu chata vehe, ta cuñí ñu cahan ñu chihin ra. ⁴⁷ Tyicuan ta

sacoto noo ñáyivi nyaá cuan chí ra Jesús, ta catyí ñu:

—Sihun ta yañun nyicú ñu chata vehe. Ta cuñí ñu cahan ñu chuhun.

⁴⁸ Tyicuan ta nacahan ra Jesús ta catyí ra chí ñu:

—¿Yóo cha cuví sihi ta yañi? —catyí ra.

⁴⁹ Tyicuan ta sañaha ndaha ra chí ra cachicá noo chihin ra, ta catyí ra:

—Ican ra ihya cuví sihi ta yañi. ⁵⁰ Vatyi tandihí ñáyivi cha sacuvi cuhva cuñí Suti ra nyaá andivi, ican ñu cuan cuví yañi, ta cuhve, ta sihi —catyí ra Jesús.

13

Tari noo ra chicá noo tachí, tyicuan caa cuví ra cahán tuhun Nyoo chihin ñáyivi

(Mr. 4.1-9; Lc. 8.4-8)

¹ Quívi cuan quita ra Jesús vehe ra ta chicunyaá ra yuhu miñi. ² Ta chaha cha cuaha ñáyivi natacá nu nyaá ra, quihvi ra chichi noo canoa ta chicunyaá ra. Ta tandihí ñáyivi ndo ñu nyicú ñu nu ñiti cuan. ³ Tyicuan ta cuaha ri cha quichaha sañaha ra chí ñu chihin noo cuhva ta catyí ra:

—Noo chaha quita noo ra, tachí ra chíti trigu. ⁴ Ta nu cuahan ra quita ra chíti cuan, canacoyo suhva chíti cuan yuhu ityi. Ta quichí coyo saa ta cachachí ti. ⁵ Ta suhva ca canacoyo ticu yuu, nu ña cuaha ñuhú yihí. Ta yucuan caña chíti cuan cha numi ri vatyi ña cuaha ñuhú yihí chaha. ⁶ Soco cuhva cha caña ñanyii in na ityi ri tun, vatyi ña cono yihí yoho tun. ⁷ Suhva ca chíti canacoyo ticu iñu. Ta chahnu iñu cuan. Ta chasi chí nuu tun. Yucuan chaha ña chiyó chíti tun. ⁸ Soco suhva ca canacoyo nu ñuhú vaha. Ta quívi cachahnu tun, vaha xaan cachaha tun chíti, vatyi yihí tun noo cientu chíti chaha tun cha noo ri maa tun. Ta inga tun uñi xico, ta inga tun oco uchi chíti chaha tun. ⁹ Tatu cutuñi iñi ndo, tyasoho ndo!

Nu sacoto ra Jesús ñaa tuhun cha chihin cuhva ri cahan ra ta ña cahán cachí ra

(Mr. 4.10-12; Lc. 8.9-10)

¹⁰ Tyicuan ta tuhva ra cachicá noo chihin ra Jesús, ta candaca tuhun ra chí ra, ta catyí ra:

—¿Ñaa tuhun cha chihin cuhva ri cahán chihin ñáyivi, ta ña cahán cachun chihin ñu? —cacatyí ra.

¹¹ Ta nacahan ra Jesús ta catyí ra:

—Chí nyoho sacoto Nyoo tuhun xehe, yoso caa nyacá ñaha ra, soco chí maa ñu ña chahá ra cha coto ñu. ¹² Vatyi ñáyivi cutuñi iñi tuhun cahán ta sacuvi ñu, cuaha ca cucutuñi iñi ñu. Ta ñáyivi cha chiin ri cutuñi iñi, ta ña cuñí ñu sacuvi ñu, cutinyaa ndihí cha cutuñi iñi ñu. ¹³ Yucuan chaha vatyi chihin cuhva ri cahán chihin ñu, tacuhva

nyehe ñu ta cuví chî tari cha ña ndichin nyehé ñu. Ta cuiñî ñu soco ma cutuñî iñî ñu, tari cha ña chiñî ñu cuví cuan. ¹⁴ Ta tyicuan caa ta chinó cava tuhun cha cahan ra Isaiás ra profeta Nyoo ta cha naha, ta catyí ra: Cha ndicha vatyi nyoho cuiñî ndo tuhun, soco ma cutuñî iñî ndo.

Ta cunyehe ndo cha sacuví, ta ma cutuñî iñî ndo.

¹⁵ Vatyi cha ndundava añima ñáyivi ihya, ta ña cachi vaha chiñî ñu.

Ta tahán nuu ñu,

Tacuhva cha ma nyehé ñu chihin chiti nuu ñu.

Ta ma cuiñî ñu chihin soho ñu.

Ta ni ma cutuñî iñî ñu chihin añima ñu.

Ta ni ma nanducu ñu chií, tacuhva sandu-vahi chî ñu.

¹⁶ "Soco sîi xaan cuví chî nyoho, vatyi nyehé ndo chihin chiti nuu ndo, ta chiñî ndo chihin soho ndo. ¹⁷ Cha ndicha catyí chî ndo, vatyi cuaha ra cacuví profeta Nyoo ta cuaha ñáyivi vaha, cacuñî ñu nyehé ñu cha nyehé nyoho cha sacuví, soco ña nyehé ñu. Cuiñî ñu cuiñî ñu tandihî tuhun cha chiñî nyoho vityin, soco ña chiñî ñu.

Nu catyí ra Jesús ñáá cha cuiñî chî catyí cuhva cha cahán ra

(Mr. 4.13-20; Lc. 8.11-15)

¹⁸ "Tyasoho ndo ñáá cha cuiñî chî catyí noo cuhva cha catyí chî ndo tuhun ra cha tachí chiti trigu cuan: ¹⁹ Ñáyivi cha chiñî tuhun yoso caa cuiñî Nyoo cunyaca ñaha ra añima ñu, ta ña cutuñî iñî ñu, tari nu canacoyo chiti yuhu ityi, tyicuan caa cuví ñu. Vatyi quichî cuilhna ta tava ra tuhun Nyoo cha caa añima ñu. ²⁰ Ta tari nu canacoyo chiti ticu yuu cuan, tyicuan caa cuví tucu ñáyivi cha chiñî tuhun Nyoo, ta sîi xaan cuví chî ñu naquehen cuenda ñu noo ri cuhva. ²¹ Vatyi nu cañá chiti ticu yuu cuan, chiin ri ñuhú yihí chaha. Yucuan chaha cañá soco ña cuví tyihí yoho chî. Ta tyicuan caa ñu cuan. Suhva ri quivi chinó iñî ñu. Soco quivi cha quichaha nyehé ñu tindoho, ta sataí iñî ñáyivi chî ñu cha cuenda tuhun Nyoo ta sandihî ri ñu tuhun cha chinó iñî ñu. ²² Ta tari nu canacoyo chiti chichi iñu cuan, tyicuan caa cuví tucu inga ñu cha chiñî tuhun Nyoo. Chiñî ñu, soco ña cuiñî ñu sacuví ñu tari cuhva chiñî ñu. Vatyi nyaá xaan ca xiñî ñu tuhun tindoho ñáyivi ican saha tuhun Nyoo. Ta nyiyo ca iñî ñu cha tyayii. Ta tandihî tuhun cuan sayanga chî chî ñu, ta ña chahá nanducu vaha ñu chî Nyoo. ²³ Soco tari nu canacava chiti nu ñuhu vaha, tyicuan caa cuví ñu chiñî tuhun Nyoo, ta cutuñî iñî ñu, ta sacuví ñu tandihî tuhun cahán ra. Yihí ñu cuví ñu tari yutun cha chaha noo cientu chiti, ta inga ñu tari yutun

cha chaha uñi xico, o tari yutun cha chahá oco uchi chiti noo noo tun.

Nu catyí ra Jesús yoso caa cuahan tuhun trigu ta cuhu ña vaha

²⁴ Ta chahá tucu ra Jesús inga cuhva ihya chî ñu; ta catyí ra:

—Cha nyacá ñaha Nyoo añima ñáyivi cuví chî tari noo ra cha tachí chiti trigu nu noo ñuhú. ²⁵ Soco cuhva cha caquixí tandihî ra casahá tyiño cuan, quihvi noo ra xaan iñî chî ra, ta tachí ra chiti cuhu ña vaha, ta cuahan ra. ²⁶ Ta quivi cañá chiti trigu cuan, ta cañá yoco chî, ta yucuan na tuvi tucu cuhu ña vaha cuan. ²⁷ Tyicuan ta ra cacuví musu, cachahan ra chicatyi ra chî chitoho ra: "Tata, tatu maa maa ri maa chiti trigu tachun, ¿nya quita cuhu ña vaha cuan?" cacatyí ra. ²⁸ Ta nacahan ra cuan ta catyí ra: "Iyó noo ra xaan iñî chî yu tachí." Tyicuan ta musu cuan, catyí ra chî chitoho ra: "¿Atu cuiñî cha cuhun ndi ta tohon ndi cuhu ña vaha cuan?" ²⁹ Soco chitoho ra catyí ra: "Ma tohon ndo, coto cuhva cha tohon ndo cuhu ña vaha cuan, ta coyo ndihî trigu cuan. ³⁰ Sañá ndo, na cuahnu maa chî iin ri chihin trigu cuan, tyicuan ta quivi cunicoñehi tyiño sahí, cutachi chî ra casaha tyiño cutohon xihna ca ra cuhu ña vaha cuan ta cuhñi ra cuenda sucun, vatyi cahmí ra. Ta yaha cuan ta canaquehen vaha ra cha vaha cuan chichi yaque."

Nu catyí ra Jesús vatyi tari chiti mostaza cuví cha nyacá ñaha Nyoo añima yo

(Mr. 4.30-32; Lc. 13.18-19)

³¹ Tyicuan ta catyí tucu ra Jesús inga cuhva ihya chî ñu:

—Cha nyacá ñaha Nyoo añima ñáyivi cuví chî tari noo chiti yutun cha nañí mostaza cha tachí noo ra nu ñuhú ra. ³² Vatyi ican chiti cuan cuví cha luhlu ca ican saha tandihî ca chiti. Soco quivi chahnu tun cuví tun noo yutun cahnu vavaha. Ta quichî coyo saa, ta casavahá ti taca ti nuu tun —catyí ra Jesús.

Nu catyí ra Jesús vatyi tari yuchan iya cuví cha nyacá ñaha Nyoo añima ñáyivi

(Lc. 13.20-21)

³³ Ta catyí tucu ra Jesús inga cuhva ihya:

—Cha nyacá ñaha Nyoo añima ñáyivi cuví chî tari yuchan iya cha nasacá noo ñaha chihin uñi cuhva yutyi pan. Vatyi tari ndaa tandihî pan cuan chihin yuchan iya cuan, tyicuan caa cuahan nducuhaha ca ñu nyacá ñaha Nyoo añima —catyí ra.

Yoso caa chotyíño ra Jesús noo cuhva cha cahán ra

(Mr. 4.33-34)

³⁴ Tandihî tuhun ihya cahan ra Jesús chihin ñáyivi chihin cuhva ri. Ta tandihî tuhun cha catyí ra chî ñu soco maa maa ri chihin

noo cuhva ri. ³⁵ Tyehe caa sacuvj ra tacuhva chino cava tuhun cha cahán ra profeta ta cha naha ta tyaá ra tyehe caa: Chihin cuhva ri cucahin chihin ñáyivi. Cucatyí chí ñu tuhun cha ñohó xehe nyata savahá Nyoo ñuhu ñáyivi.

Nu catyí ra Jesús ñáá cha cuñi chí catyí tuhun cuhu ña vaha cha cañá mahñu chiti trigu cuan

³⁶ Tycuan ta sacunuhu ra Jesús chí ñáyivi, ta ndihvi ra chichi vehe. Ta catuhva ra cacticá noo chihin ra chí ra, ta catyí ra chí ra:

—Nacatyí chí ndi ñáá cha cuñi chí catyí tuhun cha cañá cuhu ña vaha cuan nu ñuhu cuan.

³⁷ Tycuan ta quichaha catyí ra Jesús chí ra:

—Ra cha tachj chiti trigu cuan ican cuví yuhu Rayi cha quichj nya gloria. ³⁸ Ta ñuhú cuan, ican cuví añima ñáyivi iyó síqui ñuhu ñáyivi. Ta chiti trigu cuan ican cuñi chí catyí ñáyivi cha nyicón chí Nyoo, ta chiti cuhu ña vaha cuan cuñi chí catyí ñáyivi cha nyacuví cuhva cuñi ra ña vaha.

³⁹ Ra cha tachj cuhu ña vaha cuan, ican cuví cuñna ra xaan iñi chí Nyoo. Ta quivi cunacoñehe ra tyiño saha ra, ican cuví quivi cucunaa ñuhu ñáyivi. Ta ra cha cunacoñehe chiti cuan, ican cuví ra cacuví ángel. ⁴⁰ Tari nasataca ra cuhu ña vaha cuan vatyi cayu chí, tycuan caa cucuví quivi naa ñáyivi. ⁴¹ Yuhu Rayi cha quichi nya gloria cutachí chí ángel cunasataca ra chí ñu sacoo cuatyí inga ñu, ta ñu cha sacuví cha ña vaha. ⁴² Ta cutyihí ra chí ñu chichí horno nu cayú ñuhu. Ta cucuacu ñu ta cusacahñi ñu noho ñu. ⁴³ Ta ñu cha sacuví cuhva cuñi Nyoo cutuvi ñu nuu Nyoo Sutu yo. Ta tari cha ndichin ñanyii, tycuan caa cucuví ñu. Tatu cutuñi iñi ndo, tyasoho ndo tuhun cahín.

Noo xuhun cuaan cha ñohó xehe

⁴⁴ Cha nyacá ñaha Nyoo añima ñáyivi cuví chí tari noo xuhun cuaan ñohó xehe chichí ñuhú. Ta noo ra nañihj xuhun cuaan cuan, soco natyihj xehe tucu ra inga chaha ta sii xaan cuñi ra cuanuho ra ta xico ra tandihí cha iyó chí ra, ta satá ra ñuhu nu ñohó xehe xuhun cuaan cuan.

Noo cuhva cha cahan ra Jesús cuenda noo perla cha yahvi xaan nyaá

⁴⁵ Ta cha nyacá ñaha Nyoo añima ñáyivi, cuví tucu chí tari noo ra satá ta naxicó perla finu. ⁴⁶ Ta cuhva cha ñihj ra noo cha yahvi vavaha nyaá, ta xico ra ndi maa cha cumj ra, ta satá ra perla vaha cuan.

Nu sañahá ra Jesús noo cuhva cuenda tarraya

⁴⁷ Ta suri cuví tucu cha nyacá ñaha Nyoo añima ñáyivi tari tarraya cha cañi ra nu

tyañuhu, ta ñihí ra ndihí nuu tiyaca chihin. ⁴⁸ Ta cuhva cha chítu tarraya cuan chihin tiyaca, catava ra ityi nu ñiti, ta yucuan canacachj ra chí ti, canaquehen vaha ra chí quití vaha chichí noo tica, ta sacuitá ra chí quití ña vaha cuan. ⁴⁹ Ta tycuan caa cucuví quivi naa ñáyivi, ququichi coyo ángel, quichi tava siin ra chí ñu vaha ta ñu ña vaha. ⁵⁰ Ta cutyihí ra chí ñu ña vaha cuan chichí anyaya nu cayú ñuhu, nu cucuacu ñu ta cusacahñi ñu noho ñu.

Nu sañahá chí vatyi vaha tuhun chahnu ta tuhun chaa Nyoo

⁵¹ Tycuan ta ra Jesús ndaca tuhun ra chí ra cacticá noo chihin ra, ta catyí ra:

—¿Atu cutuñi iñi ndo tandihí tuhun ihya?

Ta nacahan ra ta cacatyí ra:

—Ay, Sutu Mañi yuhu. Cutuñi iñi ndi.

⁵² Tycuan ta catyí ra Jesús chí ra:

—Tatu noo ra sacuahá cuenda ley vehe ñuhu, ta cutuhva ra tuhun yoso caa nyacá naha Nyoo añima ñáyivi, cumí ra cha vaha tuhun chahnu Nyoo, ta cumí tucu ra tuhun chaa cha sañahí. Ta cuví ra tari noo ra cuví nuu, ra chitó ta sañahá ra tuhun chahnu ta tuhun chaa cha sañahí —catyí ra Jesús.

Nu ñohó ra Jesús Nazaret ñuu nu chahnu ra

(Mr. 6.1-6; Lc. 4.16-30)

⁵³ Ndhí cahan ra Jesús cuhva ihya ta cahan ra. ⁵⁴ Ta nachaa ra ñuu ra. Ta yucuan quichaha sañaha ra chichí vehe ñuhu ñuu cuan. Ta iyo cuñi ñáyivi ta catyí ñu:

—¿Nya maa maa cutuhva ra ihya cha chiñi tuñi xaan ra? ¿Ta yoso caa cuví sacuví ra milagru? ⁵⁵ Vatyi sehe ra satyá vitu cuan cuví chí ra. Ta cu María cuví sihi ra. Ta yañi ra cuví chí ra Jacobo, ta ra José, ta ra Simón ta ra Judas. ⁵⁶ Ta cuhva ra ñandihí, iyó ñu ityi nu iyó yo. Tu tycuan caa, ¿nya maa maa cutuhva ra tandihí tuhun ihya? —catyí ñu.

⁵⁷ Ta yucuan chaha ña cuñi ñu quichaha ñu chí ra. Soco ra Jesús catyí ra chí ñu:

—Tandihí ñáyivi tandihí ri ityi sahá ñu ñáyivi chí ra profeta. Soco ña quichahá ñu chí ra tatu ra ñuu ñu, o ra vehe ñu cuví chí ra —catyí ra.

⁵⁸ Ta ña cuaha milagru sacuví ra yucuan cha cuenda vatyi ña chinó iñi ñu chí ra.

14

Nu catyí chí yoso caa chihj ra Juan ra sacondutyá

(Mr. 6.14-29; Lc. 9.7-9)

¹ Quivi cuan ra Herodes, ra cuví gobiernu ñicahnu nu cuví Galilea, ñihj ra tuhun ra Jesús. ² Ta catyí ra chí ra nyicú chihin ra:

—Ican ra cuan cuví ra Juan ra sacondutyá chí ñáyivi, ra cha chihj ta vityin nandoto ra. Yucuan chaha iyó tynyee iñi chí ra cha sacuví ra milagru.

³⁻⁴ Tyicuan caa catyĵ ra vatyĵ suri maa ra tyihĵ tyiño ta catiĵn ra chi ra Juan. Ta chahñĵ ra chi ra chihin cadena, ta tyihĵ ra chi ra vehe caa. Tyicuan caa sacuvĵ ra tyĵ xaan cuñĵ ra tyĵ catyĵ ra Juan tyĵ ña vaha cha nyaá ra chihin cu Herodías cha cuvĵ ña ñasihĵ yañĵ ra ra Felipe.

⁵ Ta yucuan chaha, ra Herodes, cuñĵ ra cahñĵ ra chi ra Juan, soco yuhvĵ ra chi ñáyivĵ, vatyĵ tandihĵ ñu chinó iñĵ ñu tyĵ ra Juan cuenda Nyoo cahán ra. ⁶ Soco noo quivĵ cha vico ra Herodes, ta quichahá chita chaha sehe cu Herodías nu nyicú ñu vico cuan. Ta tahan xaan iñĵ ra Herodes. ⁷ Ta tyaá ra cuhva vatyĵ cuhva ra ñáá ri cha cacán ñaha tyivaa cuan, ta ma nacahnu ra tuhun cahan ra. ⁸ Tyicuan ta tyiyuhvĵ sihi ña chi ña, na catyĵ ña chi ra Herodes tyehe caa:

—Cuhva xiñĵ ra Juan ra sacondutya ñáyivĵ chii nu noo coho —catyĵ ña.

⁹ Cha chihñĵ rey Herodes tuhun cahan ña, nducuihya cuñĵ ra. Soco cha cuenda cha tyaá ra cuhva vatyĵ cuhva ra ñáá ri cha cacán ña nuu ñu canyicú vico cuan ta ma cuvĵ nacahnu ra, yucuan chaha tachĵ ra nacuhva ra xiñĵ ra Juan chi ña. ¹⁰ Ta tachĵ ra tyiño na cutahnya sucun ra Juan nu ñohó ra vehe caa. ¹¹ Tyicuan ta caquichĵ nyaca ra xiñĵ ra, yihĵ noo nu coho. Ta cachahá ra chi ñaha tyivaa cuan. Ta maa ña nacuhvĵ cuenda ña chi sihi ña.

¹² Tyicuan ta chaá coyo ra canyicon chi ra Juan ta canaqueheñ ra coño ñuhu ra, ta catyhĵ ra chichĵ ñuhu. Ta yaha cuan ta chahan coyo ra chisacoto ra chi ra Jesús.

Nu chahá ra Jesús cha cachi ohon mil rayiĵ

(Mr. 6.30-44; Lc. 9.10-17; Jn. 6.1-14)

¹³ Cha chito ra Jesús tuhun ihya, quehen ra noo canoa, ta cuahan noo tuhun ri maa ra noo nu taxi ri iyó. Soco chito ri ñáyivĵ, ta quitá coyo ñu ñuu ñu, ta cuahan coyo ñu chata ra ityĵ nu ñuhú. ¹⁴ Cha quitá ra Jesús chichĵ canoa cuan, nanyehé ra cuaaha xaan ñáyivĵ. Ta cundahvĵ xaan cuñĵ ra nyehé ra chi ñu. Ta sanduvahá ra chi ñu cuhvĵ cha chaá chihin ñu. ¹⁵ Ta vatyĵ cha cua cuaá, ra cachicá noo chihin ra Jesús chaa coyo ra, ta catyĵ ra chi ra:

—Cha iñĵ xaan, ta yori ñáyivĵ iyó yatyin ri ihya. Yucuan cuenda ñatachi chi ñáyivĵ ihya na cunuhu coyo ñu nya ñuu cusata ñu cha cachi ñu —catyĵ ra chi ra Jesús.

¹⁶ Ta ra Jesús catyĵ ra:

—Ña tahan chi cuhun ñu. Cuhva maa ndo cha cachi ñu.

¹⁷ Ta nacahan ra ta cacatyĵ ra:

—Noo tuhun ohon tahan sin pan ta uvi tahan sin tiyaca cumí ndi.

¹⁸ Ta catyĵ ra Jesús:

—Nyaca ndo chii.

¹⁹ Tyicuan ta tachĵ ra tyiño na cunyicu ñáyivĵ nu cuhu cuan. Yaha cuan ta quehen ra ohon tahan pan cuan, ta ni nduvi tiyaca cuan. Ta nanyehé ndaa ra andivĵ, ta nacuhvĵ ra tyahvi nyoo chi Nyoo ta tahvĵ ra pan cuan. Ta chahá ra chi ra cachicá noo chihin ra, na casacha ra chi ñáyivĵ cuan. ²⁰ Ta tandihĵ ñu cachachĵ ñu ta ndaha iñĵ ñu. Yaha cuan ta canasatacá ra yiquin cha ndog. Ta quitá uchi uvi tahan tica. ²¹ Ta cha tandihĵ ñu cachachĵ cuan, quitá ta cha ohon mil cha maa ri maa rayiĵ. Ta ña quihvĵ cuenda ñasihĵ ni ra cuatyaa.

Nu chicá ra Jesús nu ndutya

(Mr. 6.45-52; Jn. 6.16-21)

²² Ta cha yaha tuhun cuan ta catyĵ ra Jesús chi ra cachicá noo chihin ra, na quihvĵ coyo ra chichĵ canoa, vatyĵ cayaha sava ra miñĵ cuan ta cuhun coyo ra inga chiyo. Ta niri ca cha cuahan coyo ra cuan, ra Jesús ndoo ra natachi ra chi ñáyivĵ na cuhun coyo ñu. ²³ Cha yaha cha natachĵ ra chi ñu cuan, ta ndaa ra yucu cuan cua cacán tahvi noo tuhun ri maa ra chi Nyoo. Ta yucuan ñohó ra ta cuaa ndihĵ. ²⁴ Ta cha ni ri ca cha chicán tahvi ra cha cuahan vavaha canoa cuan nya mahñu miñĵ. Ta ndutya miñĵ cuan cañĵ chi chi canoa cuan cha cuenda vatyĵ ñihĵ xaan caá tatyĵ nu cuahan coyo ra. ²⁵ Ta cuhva cha ñaa ca cuan cua tuhva ra Jesús nu cuahan coyo ra chihin canoa cuan suri chicá ra nu ndutya. ²⁶ Ta cuhva cha cananyehé ra chi ra, chicá ra nu ndutya cuan, canayuhvĵ xaan ra. Ta cacana chaa vavaha ra, ta catyĵ ra:

—iNoo cha sayuhvĵ cuvĵ!

²⁷ Soco nacahan ra Jesús chihin ra, ta catyĵ ra:

—iSanĵi ndo iñĵ ndo, yuhu cuvĵ, ma yuhvi ndo! —catyĵ ra.

²⁸ Tyicuan ta nacahan ra Pedro ta catyĵ ra:

—Sutu Mañĵ yuhu, tatu icon cuvún, catyĵ na quichi yuhu nu ndutya chihĵ nyacua nya nu vachun.

²⁹ Ta ra Jesús catyĵ ra chi ra:

—Ñaha.

Tyicuan ta noo ra Pedro nu canoa cuan, ta quichahá chica ra nu ndutya vatyĵ cuhun ra nu vachi ra Jesús. ³⁰ Soco cuhva cha tuvĵ iñĵ ra tyĵ ñihĵ xaan fuerza tatyĵ cuan, nayuhvĵ ra ta quichaha nducu nyee ra, ta quichaha cana chaa ra ta catyĵ ra:

—iSagacu chii, Sutu Mañĵ yuhu!

³¹ Ta caa cuhva ri cuan, ta tiĵn ra Jesús ndaha ra, ta catyĵ ra chi ra:

—iChiin xaan chinó iñun chii! ¿Ñáá tuhun cha nacaca uvi iñun? —catyĵ ra Jesús chi ra.

³² Ta cuhva cha ndaa coyo ra nu canoa cuan, cutaxin ri tatyĵ cuan. ³³ Tyicuan ta ra cañohó chichĵ canoa cuan cachicuiñĵ chiti ra nuu ra Jesús, ta cacatyĵ ra chi ra:

—Ndicha ndicha cuii vatyi Sehe Nyoo cuví chuun —cacatýi ra.

Nu sanduvahá ra Jesús chi ñu cuhví ñuu cha nyicú nicacahnú Genesaret
(Mr. 6.53-56)

³⁴ Cha cayahá sava ra miñi cuan, cachahá coyo ra nu cuví Genesaret. ³⁵ Ta cuhva cha canicohon nuu ñáyivi iyó yucuan chi ra Jesús, sacoto ñu chi tandihí ñáyivi ityi cuan. Ta quichí nyaca ñu tandihí ñu cuhví nu nyaá ra. ³⁶ Ta chacú ndahvi ñu nuu ra, na cuhva ra tiin ñu vasi chiin sahma ra. Ta tandihí ñu tiin sahma ra, nduvahá ñu.

15

Nu sañahá chi ñáa cha sativí chi ñáyivi
(Mr. 7.1-23)

¹ Tyicuan ta suhva ra cacuví fariseo ta ra casacuaha ley vehe ñuhu quitá coyo ra Jerusalén. Ta chaá coyo ra nu nyaá ra Jesús ta candacá tuhun ra chi ra, ta catýi ra:

² —¿Ñáa tuhun cha ña sacuví ra cachicá noo chuhun costumbre cha sañahá ra cacuví mandoñi ñuu yo? Vatyi ña canacatyá ra ndaha ra tari cuhva cha tahán chi, tatu cuacachi ra xita —cacatýi ra.

³ Soco ndacá tuhun ra Jesús chi ra, ta catýi ra:

—¿Ñáa tuhun cha ña quichahá tucu nyoho tuhun cahán Nyoo ta ñihi xaan ca quichaha ndo costumbre maa ndo? ⁴ Vatyi Nyoo catýi ra: “Saha ndo ñáyivi chi sutu ndo ta chi sihi ndo. Ta tandihí ñu cha cahán ña vaha chi sutu o chi sihi, na cuví ñu”, catýi Nyoo. ⁵ Soco nyoho catýi ndo tyi noo ñáyivi cuví catýi ñu chi sutu ñu o chi sihi ñu tyehe caa: “Ma cuví tyinyei chuun cuatyi tandihí cha iyó chii cha yahá chahá cuende chi Nyoo.” ⁶ Ta tatu cha catýi ndo tyicuan caa, ña cuñí ca chi cha tyinyee ca ndo chi sutu ndo o chi sihi ndo, catýi ndo. Ta tyicuan caa sacuachiyó xiin ndo tuhun cha catýi Nyoo tyi sacuví ndo, vatyi cuñí ndo sacuví maa ndo cuhva costumbre maa ndo. ⁷ Nyoho cha sahá ndo tyi vaha ndo! Ndicha vaha tuhun cha tyaá ra Isaías, na profeta Nyoo ta cha naha nu catýi Nyoo tuhun ndo tyehe caa:

⁸ Ñáyivi ihya, chihin yuhu ri ñu catýi ñu tyi cuñí ñu chii.

Soco ñima chihin tandihí aña ñu, tyi siin nu nyaá xiñi ñu.

⁹ Ta ñahri maa tuhun cha sacahnú ñu chii. Vatyi cha sañahá ñu maa maa ri cuhva sañahá ñáyivi ri cuví, tyehe caa tyaá ra Isaías tuhun ndo, catýi ra Jesús.

¹⁰ Tyicuan ta caná ra chi ñáyivi ta catýi ra chi ñu:

—Tyasoho ndo, ta cutuñi iñi ndo tuhun cahín. ¹¹ Vatyi cha quihví yuhu ñáyivi, ñima

cuan sativí chi ñu nuu Nyoo. Soco cha quitá yuhu ñu, ican cuan sativí chi ñu.

¹² Tyicuan ta catuhvá ra cachicá noo chihin ra Jesús ta candacá tuhun ra chi ra, ta catýi ra:

—¿Atu chitón vatyi ra fariseo quiñi xaan cuñí ra cha cachiñi ra tuhun cahín?

¹³ Soco maa ra Jesús nacahan ra:

—Tandihí yutun cha ña tachí Suti, ra nyaá andívi, cucoyo tun nya yoho tun. ¹⁴ Saña ndo chi ra vatyi ra cuaa cacuví ra, ta casañahá ra ityi chi inga ra cuaa. Ta tatu noo ra cuaa ta sañahá ra ityi chi inga ra cuaa, ni nduvi ra cuncanacoyo ra chichi noo yavi.

¹⁵ Tyicuan ta quichaha catýi ra Pedro chi ra Jesús:

—Nacatyi chi ndi ñáa cha cuñí chi catýi cuhva cha cahún cuan.

¹⁶ Tyicuan ta ra Jesús catýi ra chi ra:

—¿Atu ni nyoho ta ña cutuñi iñi ndo?

¹⁷ ¿Atu ña cutuñi iñi ndo vatyi cha quihví ityi yuhu yo, chichi yo cuahan? Yahá cuan ta quita tucu. ¹⁸ Soco tuhun cha quitá yuhu yo, chichi aña yo quitá, ta ican cuan cuví cha sativí chi ñáyivi nuu Nyoo. ¹⁹ Vatyi nya chichi aña ñu quitá cha quiñi caá chicá xiñi ñu. Ta cuñun, cha chahñi ñu chi ñáyivi, cha quichi cuví iñi ñu coo ñu chihin inga ñu cha ñima ñasihí ñu cuví. Ta tandihí ca cha quiñi caa cha sacuví ñu chihin coño ñuhu ñu. O yihí ñu cha suhu ñu cha chii ñáyivi. O sandaví ñaha ñu. O cahán ndasi ñu. ²⁰ Ican cuan cuví cha sativí chi ñáyivi. Soco cha ma sacuví ñu costumbre cha nacatyá xaan ñu ndaha ñu cha ni cumañi ca cachi ñu, ña sativí cuan chi ñu —catýi ra Jesús.

Nu nachinq iñi noo ñaha inga ñuu chi ra Jesús

(Mr. 7.24-30)

²¹ Quitá ra Jesús ñuu cuan ta cuahan ra ityi ñuu Tiro ta ñuu Sidón. ²² Ta noo ñaha ñuu Canaan iyó ña ityi cuan, suri caná chaa ña vachi ña nu vachi ra Jesús, ta catýi ña:

—Sutu Mañi yuhu, ra vachi tata rey David cuvún. Cundahvi cuñi nyehun chii, vatyi sehi yihí noo tatyi ña vaha chi ña, ta nyehé xaan ña tindoho —catýi ña.

²³ Soco ra Jesús ña nacahan ra nu cahán ña. Tyicuan ta tuhva ra cachicá noo chihin ra chi ra ta cachacú ndahvi ra nuu ra ta catýi ra chi ra:

—Catýi chi ña na cunuhu ña vatyi caná chaa xaan ña vachi ña chata yo.

²⁴ Tyicuan ta catýi ra Jesús chi ra:

—Nyoo noo ri nu tachí ra chii, cuenda mbee cha cuanaa. Ta mbee cuan ican cuví ñu ñuu Israel.

²⁵ Soco ñaha cuan tuhvá ña ta chicuñiñi chiti ña nuu ra ta catýi ña chi ra:

—Sutu Mañi yuhu, ¡tyinyee chii!

²⁶ Ta ra Jesús catyí ra chi ña:

—Ña vaha cha tinyaa yo pan yuhu sehe yo ta cuhva yo cachi ina —catyí ra chi ña.

²⁷ Soco maa ña ña quichahá ña ta catyí ña chi ra:

—Ndicha, Sutu Mañi yuhu. Soco nyacua nya ina ta chachí ti yiquin cha canaco yo nu mesa chitoho ti —catyí ña.

²⁸ Tyicuan ta catyí ra Jesús chi ña:

—Sihí jñana cha chinó xaan iñun chii! Cua sacuvi tari cuhva cuñún.

Ta caa cuhva ri cuan ta nduvahá sehe ña.

Nu sanduvahá ra Jesús cuaha ñu cuhví

²⁹ Quitá ra Jesús yucuan ta yahá ra yuhu miñi Galilea, ta ndaa ra noo yucu ta chicunyya ra yucuan. ³⁰ Ta cuaha ñáyivi chaá coyo nu nyaá ra ta quichi nyaca ñu cuaha ñu cuhví: ñu coxo, ñu caaa, ñu luu, ñu ñihi. Ta cuaha ca ñu cuhví quichi nyaca ñu nu nyaá ra. Ta chacun ñu chi ñu nuu ra, ta maa ra sanduvahá ra chi ñu. ³¹ Ta iyo cuñi ñáyivi nyehé ñu yoso caa nacahan ñu ñihi ta yoso caa nduvahá ñu luu, ta yoso caa nacacá ñu coxo, ta yoso caa nanyehé ñu caaa. Ta quichaha casacahnu ñu chi ra cuví Nyoo cuenda ñu, ñu Israel.

Nu chahá ra Jesús cha cachi cumi mil rayii

(Mr. 8.1-10)

³² Tyicuan ta caná ra Jesús chi ra cachicá noo chihin ra, ta catyí ra chi ra:

—Ndahvi xaan cuñi nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu nyisó ñu. Ta ña cuñi natachi chi ñu nya vehe ñu vatyí ta cachi ca ñu, coto coñaa ñu ityi cunuhu ñu —catyí ra Jesús.

³³ Tyicuan ta ra cachicá noo chihin ra cacatyí ra chi ra:

—Soco ¿nya cuquehen yo cha cachi ñáyivi cuaha ihya, nu yori maa ñáyivi iyó ihya?

³⁴ Tyicuan ta ra Jesús ndacá tuhun ra chi ra:

—¿Yoso tahan pan cumi ndo?

Ta maa ra catyí ra:

—Ucha tahan pan, ta uvi tahan tiyaca nyihi ri.

³⁵ Tyicuan ta tachí ra na cunyicu ñáyivi cuan nu ñuhú. ³⁶ Tyicuan ta quehen ra ndi ucha pan cuan ta tiyaca cuan, ta nacuhvá ra tyahvi nyoo chi Nyoo. Tyicuan ta tahví ra ta chahá ra chi ra cachicá noo chihin ra, ta maa ra cachicá noo chihin ra canasachá ra chi ñáyivi. ³⁷ Tandíhi ñu chachi ñu, ta chitú chichi ñu. Ta yahá cuan casacutu ra ucha tica chihin yiquin cha ndoo cuan. ³⁸ Cumi mil rayii cachachí, ta ña quihví cuenda ñusihi ni ri ra cuatyaa. ³⁹ Yahá cuan ta sacunuhu ra chi ñáyivi, ta quihví ra na canoa, ta cuahan ra ityí nu cuví Magdala.

16

Ra fariseo ta ra saduceo cachicán ra chi ra Jesús na sacuvi ra noo milagru
(Mr. 8.11-13; Lc. 12.54-56)

¹ Tyicuan ta ra fariseo ta ra saduceo chahan coyo ra nu nyaá ra Jesús. Vatyí cacuñi ra nducu nyehe ra chi ra yucuan chaha chicán ra na sacuvi ra noo milagru chihin tunyee iñi Nyoo. ² Soco nacahan ra Jesús ta catyí ra chi ra:

—Cha cha iñi cuhva cha caaa quee ñanyii, tuhvá ndo catyí ndo: “Vaha xaan cucuvi quivi tyaan, vatyí tyaqui xaan cuaha andivi.” ³ Ta cha ñaha ri catyí ndo: “Vityin ña tyaqui maa cucuvi quivi vatyí cuaha ta iñi ñaa xaan andivi”, catyí ndo. Nyoho vaha xaan chitó ndo ¿yoso caa nacotó ndo tuhun vico andivi soco ña cuví nacoto ndo yoso caa cuahan tuhun cha sañahá Nyoo chi ndo vityin? ⁴ Ñáyivi iyó vityin, quiñi iyó ñu ta ña chinó iñi ñu chi Nyoo. Cuñi ñu nyehe ñu noo cha iyo. Soco ma cuhve nyehe ñu vatyí cha yahá sañahá Nyoo cha iyó cha sacuvi ra chihin ra Jonás —catyí ra Jesús chi ra, ta sandoq ra chi ra, ta cuahan ra.

Tuhun cahán ra fariseo cuví chi tari yuchan iya

(Mr. 8.14-21)

⁵ Cuhva cha cayahá ra cachicá noo chihin ra Jesús inga chiyo miñi cuan, canaa iñi ra cacuiso ra pan. ⁶ Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra saduceo —catyí ra Jesús chi ra.

⁷ Tyicuan ta quichahá candatuhun ra chihin ra tahan ra ta catyí ra:

—Cha cuenda vatyí ñahri pan nyisó yo vachi, yucuan chaha catyí ra tyicuan caa chi yo —catyí ra.

⁸ Ta tuvj iñi ra Jesús tuhun candatuhún ra, ta catyí ra chi ra:

—Nyoho, chihin xaan chinó iñi ndo chii.

¿Ñáa tuhun cha catyí ndo vatyí ñahri pan nyisó ndo? ⁹ ¿Atu ta cutuñi ca iñi ndo? ¿Atu ña nichón iñi ndo quivi sacachi chi ndi ohon mil rayii chihin ohon tahan ri pan? Ta ¿yoso tahan tica sacutu ndo chihin yiquin cuan? ¹⁰ ¿Atu ña nichón iñi ndo quivi sacachi chi cumi mil ca ra chihin ucha tahan pan? Ta ¿yoso tahan tica sacutu ndo chihin yiquin cuan? ¹¹ ¿Yoso caa cha ña tuvj iñi nyoho vatyí ñima tuhun pan cahín, cuhva cha catyí vatyí na saha ndo cuenda chi ndo chihin yuchan iya ra fariseo ta ra saduceo? —catyí ra Jesús chi ra.

¹² Tyicuan ta cacutuñi iñi ra vatyí ñima tuhun yuchan iya pan cuan cahán ra, soco na casaha ra cuenda chi ra chihin tuhun cha casañahá ra fariseo ta ra saduceo.

Nu catyí cachi ra Pedro vatyí ra Jesús cuví Cristo ra cha quitá nu nyaá Nyoo
(Mr. 8.27-30; Lc. 9.18-21)

¹³ Cuhva cha chaq̄ ra Jesús ityí ñuu Ce-sarea Filipino, ndacá tuhun ra chí ra cachicá noo chihin ra ta catyí ra:

—¿Ñáá catyí ñáyiví? ¿Yóó ra cuví Rayíí cha quichi nya gloria? —catyí ra.

¹⁴ Ta canacahan ra ta catyí ra:

—Yihí ñu catyí ñu tyi ra Juan ra sacondutya chi ñáyiví cuvún. Ta inga ñu catyí ñu tyi ra Elías, ta yihí tucu ñu catyí ñu tyi ra Jeremías, o inga ra cuví profeta Nyoo ta cha naha.

¹⁵ Tyicuan ta catyí ra chí ra:

—Ta cha cuenda chí nyoho, ¿Yóó ra cuví yuhu?

¹⁶ Tyicuan ta nacahan ra Simón Pedro:

—Yoho cuvún ra Cristo, Sehe Nyoo nyitó —catyí ra.

¹⁷ Ta nacahan ra Jesús ta catyí ra:

—Sii xaan cuví chí yoho, Simón sehe ra Jonás, vatyí ni noo rayíí ña sañahá ra chuun tuhun ihya, soco maa Suti ra nyaá andiví sañahá chuun. ¹⁸ Ta yuhu catyí chuun tyi yoho cuvún ra Pedro. Ta siqui cava ihya, savahí vehe ñuhi. Ta ma cuví chasaha tuhun chí chí chí. ¹⁹ Yuhu cuhve ndaha ticu andiví nu nyacá ñaha Nyoo chuun. Ta cha cuhñun ihya siqui ñuhu ñáyiví, cha nuhñi sahá maa Nyoo nya andiví. Ta tandihi cha ndachun ihya siqui ñuhu ñáyiví, cha ndachi maa Nyoo nya andiví.

²⁰ Tyicuan ta catyí ra Jesús chí ra cachicá noo chihin ra tyi yori chihin cacahan ra tuhun vatyí ican ra cuví Cristo cha quitá nu nyaá Nyoo.

Nu sacotó ra Jesús tyi cucúvi ra

(Mr. 8.31—9.1; Lc. 9.22-27)

²¹ Nya ndaha quiví cuan quichahá catyí ra Jesús chí ra cachicá noo chihin ra, vatyí cuñí chí cha cuhun ra ñuu Jerusalén. Ta ra cacuví mandoñi, ta ra cacuví nuu chí tata sutu, ta ra sacuaaha ley vehe ñuhu, cucasanyehe xaan ra tindoho chí ra. Ta catyí tucu ra vatyí cucahñi ra chí ra soco nu cu uñi quiví ta cunandoto ra. ²² Tyicuan ta quehen ra Pedro chí ra ta quitá sin ra chihin ra ta quichahá catyí ra chí ra Jesús vatyí ña vaha cha cahán ra ta catyí ra:

—Ña cuñí Nyoo ta cuví chuun tyehe caa, Sutu Mañi yuhu.

²³ Soco nanyocavá ra Jesús, ta quichahá catyí ra chí ra Pedro:

—¡Canyaha chuun nuí, cuihna! Vatyí cha cahún tyiña caa nducá sanacavon chí. Vatyí ña chicá xiñun cuhva chicá xiñi Nyoo. Soco cuhva chicá xiñi ñáyiví chicá xiñun —catyí ra.

²⁴ Tyicuan ta ra Jesús catyí ra chí ra cachicá noo chihin ra:

—Tatu nya nyoho cuñí ndo cunyicon ndo chí, cuñí chí sañaa ndo iñi ndo tuhun maa ndo. Ta ma ndu uvi iñi ndo cha nyicón ndo chí, vasinyehe ndo tindoho cha cuende vatyí yucuan cuví cruzi cha tahán chí cuiso ndo. ²⁵ Vatyí nya nyoho ña cuñí ndo nyehe ndo tindoho cha cuenda yuhu, cucúvi ndo ta cuhun ndo anyaya. Soco nya ndo cuhva ndo ñáyiví ndo cha cuende, cucacu añima ndo. ²⁶ Vatyí ñáá ri tuhun cha saha ganaa ndo tandihi cha tyayíí cha iyó siqui ñuhu ñáyiví tatu cunaa añima ndo. Vatyí ñahri chihin cutiyahví ndo ta cacu añima ndo. ²⁷ Vatyí yuhu Rayíí cha quichí nya gloria, cuquichí tiqui soco chihin cha cahnu cuví Suti, ta cuquichí coyo ángel chihin. Tyicuan ta cutiyahví chí noo noo ndo yoso cuhva sacuví ndo. ²⁸ Cha ndicha catyí chí ndo, vatyí yihí nyoho cha nyicú ndo ihya cha ma cúvi ñaha ndo nyacua nya nyehe ndo chí yuhu Rayíí cha quichí nya gloria, cunyehe ndo yoso caa vachi cunyaca ñahi chí ndo —catyí ra Jesús.

17

Nu sañahá Nyoo yoso caa ra Jesús noo cha ndicha nu nyacá ñaha ra
(Mr. 9.2-13; Lc. 9.28-36)

¹ Iñu quiví cha yaha, ta quehen ra Jesús chí ra Pedro ta ra Jacobo, ta ra Juan yañi ra Jacobo. Ta cuahan coyo ra noo yucu sucun xaan chihin ra. ² Ta yucuan nasama cuhva caa ra Jesús nuu ra ndihi chihin ra. Ta xiño vavaha nanduví nuu ra tari ñanyii. Ta sahma ra cuichin xaan nanduví tari maa ñuhú cuichin. ³ Tyicuan ta cananyehé ra chí ra Moisés ta ra Elías, candatuhún ra chihin ra. ⁴ Ta quichahá catyí ra Pedro chí ra Jesús: —Sutu Mañi yuhu, vaha xaan cha nyicú ndi ihya. Tatu cuñun na savaha ndi uñi tahan vehe. Noo chuun, noo chí ra Moisés, ta nonga chí ra Elías —catyí ra Pedro chí ra Jesús.

⁵ Cha ni ri ca cha cahán ra Pedro, quichí ri noo vico cha xiño vavaha siqui ra. Ta sahvi cuan chí ra. Ta chíchi vico cuan quitá noo ndusu cha catyí chí tyehe caa:

—Ican ra ihya cuví Sehi, ta cuñí xain chí ra. Ta sii xaan cuñí chihin ra. Tyasoho ndo tuhun cahán ra —catyí ndusu cuan.

⁶ Cha cachihí ra cachicá noo chihin ra Jesús tuhun cuan, cachicavá ra nya ñuhu, ta cayuhví xaan ra. ⁷ Tyicuan ta tuhvá ra Jesús nu cayucú ra, ta tijn ra chí ra, ta catyí ra:

—Ndícuíta ndo. Ma yuhvi ndo.

⁸ Ta cuhva cha cananyehé ra, noo tuhun ri ca ra Jesús nanyaá, ta uvi ca ra cuan, yori ca ra.

⁹ Ta cuhva cha vachi coyo ra yucu cuan, catyí ra Jesús chí ra:

—Yori chihin cahan ndo tuhun cha nyehe ndo ihya. Cahan ndo tuhun soco nya yaha cúvi ta nandoto yuhu Rayii cha quichí nya gloria —catyí ra.

¹⁰ Tyicuan ta candacá tuhun ra cachicá noo chihin ra chi ra,

—¿Ñáá tuhun cha catyí ra casacuahá ley vehe ñuhu vatyí xihna ca ra Elías tahán chi quichí?

¹¹ Ta nacahan ra Jesús ta catyí ra:

—Cha ndicha vatyí xihna ca ra Elías quichí ta cusanduvaha ra tandihí. ¹² Soco yuhu catyí chi ndo vatyí cha yaha quichí ra Elías, soco ña nicohon nuu ñáyivi chi ra, ta casacuví ñu chihin ra tandihí cuhva cuñi maa ñu. Ta tyicuan caa tucu yuhu Rayii cha quichí nya gloria, cusanyehe ñu tindoho chíi —catyí ra.

¹³ Tyicuan ta cacutuñi ñi ra vatyí tuhun ra Juan ra sacondutya cahán ra Jesús.

Nu sanduvaha ra Jesús chi noo ra tyivaa cha yihí noo tatyí ña vaha chi
(Mr. 9.14-29; Lc. 9.37-43)

¹⁴ Cuhva cha cachaá coyo ra nu nyicú ñáyivi, tuhva noo ra ta chicutiñi chíti ra nuu ra Jesús, ta catyí ra chi ra:

¹⁵ —Tata, cundahvi cuñi nyehun chi sehi, vatyí yihí noo cuehe chihí tañi chi ra, ta cuaha xaan tindoho nyehé ra chihin cuehe cuan. Ta cuaha xaan chaha nduvá ra nu ñuhu ta cayu ra, ta nduvá ra nu ndutya ñandihí. ¹⁶ Ta quichí nyaque chi ra chi ra cachicá noo chuhun, soco ña cuví sanduvaha ra chi ra —catyí ra.

¹⁷ Ta nacahan ra Jesús ta catyí ra:

—¡Nyoho, ñu ña chinó ñi cuví ndo! ¡Ta nicaa ni quiñi iyó ndo! ¿Yoso tahan ca quiñi cunyai chihin ndo ta cunyei tisihi ndo nyacua nya cutuhva ndo ta chino ñi ndo chíi? Nyaca ndo chi ra tyivaa chiña tyehe —catyí ra.

¹⁸ Tyicuan ta tavá ñehe ra Jesús chi tatyí ña vaha cuan, ta quita cuan chi ra tyivaa cuan. Ta caa cuhva ri cuan ta nduvaha ra.

¹⁹ Cha yaha cuan ta ndacá tuhun siin ra chicá noo chihin ra Jesús chi ra ta catyí ra:

—¿Ñáá tuhun cha ña cuví tava nyuhu chi tatyí ña vaha cuan?

²⁰ Ta ra Jesús nacahan ra ta catyí ra:

—Cha cuenda cha chiin xaan chinó ñi ndo chíi. Cha ndicha catyí chi ndo vatyí tyehe ta chinó ñi ndo chíi, tari cuhva cha cahnu noo chíti mostaza, cuví catyí ndo chi yucu ihya na canyaha chi ta cuhun chi inga ityi, ta yucu ihya cuhun chi inga ityi. Ta ñahri cha ma cuví sacuvi ndo tatu ndicha cha chinó ñi ndo chíi. ²¹ Soco tahan tatyí ña vaha cuan, quita chi chihin cha ma cachi yo ta cacan tahvi yo —catyí ra Jesús chi ra.

Inga tucu chaha cahán ra Jesús tuhun yoso caa cucahñi ñáyivi chi ra
(Mr. 9.30-32; Lc. 9.43-45)

²² Cha ni ri ca cha ñin ri cachicá noo ra ityi Galilea cuan, ra Jesús catyí ra chi ra cachicá noo chihin ra:

—Yuhu Rayii cha quichí nya gloria, cucuhva cuenda ñu chíi chichi ndaha ra xaan ñi chíi. Ta cucahñi ra chíi. ²³ Soco nu cu uñi quivi ta cunandote —catyí ra.

Ta canducuihya xaan ñi ra cachicá noo chihin ra cha cachiñi ra tuhun cuan.

Nu catyiyahví ra cuenda vehe ñuhu cahnu

²⁴ Cuhva cha chaá ra Jesús ta ra cachicá noo chihin ra ñuu Capernaum, ra catavá xuhun cuenda vehe ñuhu cuan, chahan coyo ra chinyehe ra nu nyaá ra Pedro ta candacá tuhun ra chi ra:

—¿Atu ña tyiyahví ra sacuaha chi nyoho xuhun cha tahán chi cuenda vehe ñuhu cahnu? —cacatyí ra chi ra Pedro.

²⁵ Ta nacahan ra Pedro ta catyí ra:

—Tyiyahví ra.

Cuhva cha quihví ra Pedro chichi vehe nu ca iyó ra, xihna ca ra Jesús nacahan ra ta catyí ra:

—¿Yoso caa catyí tucu yoho vityin Simón? Ra cuví tyiño siqui ñuhu ñáyivi ihya, ¿yóó chi caquehen ra yahvi? ¿Atu chi ñu ñuu maa ra o chí ñu inga ñuu?

²⁶ Nacahan ra Pedro ta catyí ra:

—Chí ñu inga ñuu.

Ta catyí ra Jesús chi ra:

—Tu tyicuan caa, ñu ñuu maa ra ña tahán chi tyiyahvi ñu. ²⁷ Soco tacuhva vatyí ma cuhva yo tisihi chí ni noo ra, cuahan miñi cuan, ta tyihun anzuelo, ta tiyaca cha tavon cha xihna ri, chichi yuhu ti cunañihun noo xuhun. Ta ñihi tyiyahvun cha cuenda ta cha cuenda maun. Quehun ta cutyiyahvun —catyí ra Jesús chi ra Pedro.

18

Nu sañahá ra Jesús yóo ra cha cahnu ca cucuvi nu nyacá ñaha Nyoo
(Mr. 9.33-37; Lc. 9.46-48)

¹ Quivi cuan catuhvá ra cachicá noo chihin ra Jesús chi ra, ta candacá tuhun ra chí ra:

—¿Nya ndi cahnu ca cuví nu nyacá ñaha Nyoo?

² Tyicuan ta ra Jesús caná ra chí noo ra cuehe luhlu, ta chinanyaa ra chí cue mahñu ra. ³ Ta catyí ra:

—Cha ndicha catyí chí ndo, vatyí tatu nyoho ta ma nasama ndo cuhva iyó ndo, ta tatu ma cuví ndo tari ra cuatyaa, ma cuví quihví ndo nu nyacá ñaha Nyoo. Vatyí ra cuatyaa chahá ndotyin cunyaca ñaha sutu ndotyin chí ndotyin, ta tyicuan caa cuhva ndo chí ndo cunyaca ñaha Nyoo chí ndo. ⁴ Ta

tyicuan caa ra cahnu ca cuví nuu Nyoo, ican cuví ñu ña cahnu sahá chi, ta cuví ñu tari ra cuehe luhlu ihya. ⁵ Ta ñáyiví cha natáin cuenda chihin sivi chi noo ra ña cahnu sahá chi, tari ra cuehe luhlu ihya, chi yuhu natáin cuenda ñu.

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha (Mt. 5.29-30; Mr. 9.42-48; Lc. 17.1-2)

⁶ Tatu yóo ñu sanacavá nu cuatyí chi noo ra nacinóo iñi chii ta cuví ra tari minoo ra luhlu, vaha taxin ca, cuhñi ñu noo yuu vee sucun ñu ta tuchi ñu chi ñu nu cono tyañuhu.

⁷ Ñana cha ña vaha cha cuenda ñáyiví iyó siqui ñuhu ñayiví, vatyi iyó tuhun cha sacoo ñu cuatyí tahan ñu! Ta tyicuan ri coo tuhun cuan, soco ñdahvi ñu ndahvi cha sanacava nu cuatyí chi inga ñu!

⁸ Yucuan chaha tatu ndahun o tatu chahun sanacava chuun nu cuatyí, vaha taxin ca cahnya ta sacuiton cañi. Vatyi vaha ca quihvun nu coun chihin Nyoo chihin cha luu ndahun o luu chahun, ta ñima ca cha naniun ta tuchi Nyoo chuun nu cayú ñuhú cha ma ndahva ca maa. ⁹ Ta tatu noo chiti nuun sanacavá chuun nu cuatyí, vaha taxin ca tava ta sacuiton cañi. Vatyi vaha ca quihvun nu coun chihin Nyoo chihin noo chiti nuun, ta ñima ca chihin cha ninduvi chiti nuun ta tuchi Nyoo chuun nu cayú ñuhú chichi anyaya.

Nu sañahá ra Jesús tyi tari noo mbee cha cuanaa, tyicuan caa cuví yo (Lc. 15.3-7)

¹⁰ Ma tava xiin ndo chi ni noo ra cha cuví tari noo ra luhlu, vatyi catyí chi ndo tyi ángel cha sahá cuenda chi ra, tyicuan ri sacuvi ra tyiño nuu Suti, ra nyaá andiví. ¹¹ Vatyi yuhu Rayii cha quichí nya gloria, vachi sacaqui chi ñáyiví cha cuanaa chihin cuatyí ñu.

¹² ¿Yoso caa catyi nyoho? Tatu noo ra cumí ra noo cientu mbee, ta cuanaa noo ti, ¿atu ma sandoo ra ndi cumi xico chahun cumi tahan ca ti cuan yucu cuan, ta kuhun ra cunanducu ra chi quiti cha cuanaa cuan? Yuhu catyí tyi sandoo ra ta kuhun ra. ¹³ Ta tatu nañihi ra chi ti, cha ndicha vatyi cusii ca cuñí ra chihin quiti cuan, ta ñima ca chihin cumi xico chahun cumi ca quiti cha ña chidnaq cuan. ¹⁴ Ta tyicuan caa tucu, Sutu ndo ra nyaá andiví ña cuñí ra cha cunaa ni noo ñu cuví tari noo ra luhlu.

Yoso caa tahan chi saha yo ticahnu iñi chi tahan yo (Lc. 17.3)

¹⁵ Tatu ra yañun ta sacuvi ra cha ña vaha chahun, cahan chihin noo tuhun ri maa ra ta catyun chi ra tyi ña vaha cuhva sacuvi ra. Ta tatu quichaha ra tuhun cahún, cha saha ganaun chi ra cuví cuan. ¹⁶ Soco tatu ña

quichahá ra chuun, tyicuan ta cañon chi uvi o uñi ra, tacuhva tandihi cha cahun cucuvi ra testigu. ¹⁷ Tatu ña quichahá ra ni chi ra cha chahan coyo chuhun cuan, tyicuan ta cahan chihin ra chihin nuu ñáyiví nyicú vehe ñuhu. Ta tatu ña quichaha ra chi ñu vehe ñuhu, tyicuan ta cuví saha ndo tuhun tyi tari noo ra ña chinóo iñi chi Nyoo cuví ra, o tari ra catavá xuhun cuenda gobiernu ñuu Roma.

¹⁸ Cha ndicha catyí chi ndo, vatyi tandihi cha cuhñi ndo ihya siqui ñuhu ñayiví, ta cha nuhñi saha maa Nyoo nya andiví. Ta tandihi cha ndachi ndo ihya siqui ñuhu ñayiví, cha ndachi maa Nyoo nya andiví.

¹⁹ Ta suri catyí tiquí chi ndo, vatyi tatu uvi nyoho ihya siqui ñuhu ñayiví, ndu ñin ri ndo ta cacan tahvi ndo cuenda ñáá noo cha cuñí ndo cacan ndo, Suti, ra nyaá andiví cuhva ra chi ndo. ²⁰ Vatyi nu nyicú uvi o uñi ñu sacahnú chii, yucuan cunyai mahñu ñu —catyí ra Jesús.

²¹ Tyicuan ta chahan ra Pedro chindaca tuhun ra chi ra Jesús ta catyí ra:

—Sutu Mañi yuhu, tatu ra tahan ta sacuvi ra ñáá noo cha ña vaha chihin, ¿yoso tahan chaha tahan chi sahi ticahnu iñi chi ra? ¿Atu ucha tahan chaha?

²² Ta nacahan ra Jesús ta catyí ra:

—Catyí chuun vatyi ñima ucha tahan ri chaha, soco tandihi ri chaha.

Nu cahán ra Jesús noo cuhva cuenda noo ra cha ña cuñí saha ticahnu iñi

²³ Yucuan chaha cha nyacá ñaha Nyoo añima ñáyiví cuví chi tari noo rey cha nacana chi tandihi musu vatyi cuanyehe ra yoso yosó yica ñu chi ra. ²⁴ Ta cuhva cha quichahá natava ra cuenda, ta quichí nyaca ñu chi noo musu cha cuaha millón pesu yosó yica chi ra. ²⁵ Ta musu cuan ñahri maa chihin tyiyahvi ra chi chitoho ra, ta chitoho ra catyí ra: “Cuaxico ndo chi ra ñin cuenda ri chihin ñasihi ra, ta chihin sehe ra ta tandihi cha iyó chi ra tacuhva vatyi chihin xuhun cuan cunatyiyahvi ra cha yosó yica ra chii.”

²⁶ Tyicuan ta musu cuan chicuiñí chiti ra nuu chitoho ra, ta chacu ndahvi ra nuu ra, ta catyí ra: “Tata, cuatu noo chiin chii, ta tyiyahvi mai tandihi chuun”, catyí ra. ²⁷ Ta cundahvi cuñi chitoho ra chi ra, ta saha ra ticahnu iñi chi ra, ta sanaq ra tandihi cha yoso yica ra, ta sañá ra chi ra. ²⁸ Soco cuhva cha quita musu cuan, nañihí ra chi noo ra tahan ra cha cuví musu tari maa ra. Ta ra cuan yosó yica ra chiin ri chi ra. Ta tin ra chi ra cuan, ta quichahá quitu ra sucun ra, ta catyí ra chi ra: “Tyiyahvi cha yosó yicon chii.” ²⁹ Tyicuan ta chicuiñí chiti ra cuan nuu ra, ta chacu ndahvi ra nuu ra ta catyí ra: “Cuatu noo chiin chii, ta tyiyahvi mai tandihi chuun”, catyí ra. ³⁰ Soco maa

ra ña cuñi ra, ta chahan ra ta tyihí ra chi ra vehe caa nyacua nya cha tyiyahví ra cha yoso yica ra chi ra. ³¹ Cha canyehe inga ca musu cha sacuví ra, uhvi xaan cacuví chi ra, ta chahan coyo ra chinacatyí ra chi chitoho ra cha sacuví ra cuan. ³² Tyicuan ta chitoho ra cuan tachí ra tyiño na quichi ra ta catyí ra chi ra: “Musu ña vaha cuvún. Yuhu sahí ticahnu iñi tandihí cha yosó yicon chíi, vatyí chacu ndahvun nui. ³³ Tyicuan caa tucu cuñi chí cundahví cuñun chí ra tahun cuan tari cundahví cuñi nyehi chuun”, catyí ra chi ra. ³⁴ Ta cuxaḡn xaan chitoho ra, ta tachí ra tyiño na tachi tuñi ñu chí ra, nyacua nya cha tyiyahví ra tandihí cha yosó yica ra.

³⁵ Ta nu ndihí cahan ra Jesús, ta catyí ra tyehe caa:

—Tyicuan caa tucu cusacuví Suti, ra nyaá andiví, chihin ndo tatu ma saha ndo ticahnu iñi chihin cha tandihí añima ndo chí tahan ndo.

19

Nu sañahá ra Jesús tyi ña vaha sandoo ñáyiví chí ñasihí ñu o yíi ñu
(Mr. 10.1-12; Lc. 16.18)

¹ Cha yahá cha catyí ra Jesús tuhun ihya, ta quita ra Galilea cuan, ta cuahan ra ityí Judea cha nyaá inga chiyo yuvi cahnu Jordán, ityí nu caña ñanyii. ² Cuaha ñáyiví chinyicon chí ra, ta yucuan sanduvahá ra chí ñu cuhví.

³ Tyicuan ta suhva ra fariseo catuhvá ra chí ra Jesús, vatyí cacuñi ra nducu ra cuhva tyaa ra cuatyí siqui ra. Ta candacá tuhun ra chí ra ta catyí ra:

—¿Atu vaha cha sandoo rayíi chí ñasihí ra cha cuenda ñáá ri tisihi luhlu chahá ña chí ra?

⁴ Ta nacahan ra ta catyí ra:

—¿Atu ta sacuaaha ca nyoho nu tutu Nyoo nu catyí chí vatyí ra cha savahá chí ndo nya quiví xihna ri, savahá ra rayíi ta ñaha sihi? ⁵ Ta catyí tucu chí tyehe caa: “Tahán chí sandoo rayíi chí sutu ra ta chí sihi ra, ta ndu in ri ra chihin ñasihí ra. Ta chichi cha ninduví ñu, cucuví ñu tari cha noo ri ñáyiví.” ⁶ Yucuan chaha, ñima ca uvi tahan cuví ñu, soco cha nanduví ñu noo ri ñáyiví. Yucuan chaha, cha sandu in ri Nyoo ña tahán chí cha sasihí ñáyiví—catyí ra.

⁷ Tyicuan ta candacá tuhun ra chí ra Jesús ta cacatyí ra:

—¿Ñáá tuhun cha tyaa ra Moisés vatyí cuví cahnya noo rayíi tutu chihin ñasihí ra ta sandoo ra chí ña?

⁸ Ta ra Jesús catyí ra chí ra:

—Cha cuenda cha ndavá añima ndo, yucuan chaha, chahá ra Moisés cha sandoo ra ñasihí ra. Soco quiví xihna ri ñima tyicuan caa cuví. ⁹ Yuhu catyí chí ndo tyehe caa:

Ra cha sandoo ñasihí, ta ñima cha cuenda cha natuví ña chihin inga ra, ta tandahá ra chihin inga ñu, chicoḡ cuatyí ra nuu Nyoo. Ta ra cha tandaha chihin noo ñaha sihi cha sandoo yíi chí, suri chicoḡ tucu cuatyí ra cuan—catyí ra.

¹⁰ Tyicuan ta ra cachicá noo chihin ra, cacatyí ra chí ra:

—Tatu tyicuan caa tahán chí coo rayíi chí chihin ñasihí ra, vaha taxin ca ma tandaha yo.

¹¹ Ta ra Jesús catyí ra chí ra:

—Soco ña tandihí ñáyiví cuví cutuñi iñi ñu tuhun ihya. Soco ñu cha chahá Nyoo cha cutuñi iñi, ican ñu cha cutuñi iñi. ¹² Cha ña tandaha ñáyiví, cuaha ri cuenda cuví. Yihí ñu ña quichi cuví iñi ñu tandaha ñu vatyí in caa maa ñu cacu ñu. Ta inga ñu ña quichi cuví iñi ñu tandaha ñu vatyí cha yaha tava ñáyiví ñii ñu. Ta yihí ñu ña tandahá ñu cha cuenda cha cuñi ñu sacuví ñu tyiño nuu Nyoo, na nducuaaha añima cha nyacá ñaha Nyoo. Tandihí ñu cuví sacuví tyehe caa, na sacuví ñu—catyí ra Jesús.

Nu nasocó ra Jesús chí ra cuatyaa
(Mr. 10.13-16; Lc. 18.15-17)

¹³ Tyicuan ta quichí nyaca ñu suhva ra cuatyaa chí ra Jesús tacuhva na tyiso ra ndaha ra siqui ndotyin, ta cacan tahvi ra chaha ndotyin. Soco ra cachicá noo chihin ra quichahá cacahan ra chí ñu quichí nyaca chí ndotyin. ¹⁴ Soco ra Jesús catyí ra:

—Saña ndo chí ra cuatyaa, na quichi maa ndotyin nu nyaí. Ta ma casi ndo. Vatyí ñu nyacá ñaha Nyoo añima, cuví ñu tari ra cuatyaa ihya—catyí ra.

¹⁵ Tyicuan ta tyiso ra ndaha ra siqui ndotyin. Yahá cuan ta cuahan ra.

Nu cahán noo ra tyivaa tyayíi chihin ra Jesús

(Mr. 10.17-31; Lc. 18.18-30)

¹⁶ Noo ra tyivaa chahán ra chindacá tuhun ra chí ra Jesús ta catyí ra:

—Maestro vaha xaun. ¿Ñáá cha vaha tahán chí sacuví ta ñihí ñáyiví cha ma naa ca maa coi?

¹⁷ Ta ra Jesús catyí ra chí ra:

—¿Ñáá tuhun cha catyun tyi vaha yuhu? Noo ri ra vaha iyó ta ican ra cuan cuví Nyoo. [Ta cha catyun tyi vahí, nacotón tyi Nyoo cuví.] Soco tatu cuñun quihvun ñáyiví cha ma naa ca maa, sacuvun tandihí tuhun cha tachí Nyoo tyi sacuví yo—catyí ra chí ra.

¹⁸ Ta ra tyivaa cuan catyí ra:

—¿Nya cha cuví cuan?

Ta ra Jesús catyí ra chí ra:

—Ma cahñun chí ñáyiví. Ma coo inga ñusihí chuun. Ma suhun cha chíi ñáyiví. Ma cahun cuendu siqui ñu. ¹⁹ Saha ñáyiví chí sutun ta chí sihun. Ta cuñun chí ñáyiví, tari cha cuñun chí maun.

²⁰ Ta ra tyivaa cuan, catyí ra chi ra:
—Tandíhi tuhun ihya ta quichahí nyata luhli ta nya vityin. ¿Ñáá ca cha cumañi chii?
²¹ Ta ra Jesús catyí ra chi ra:
—Tatu cuñún cuvun noo ra cuiti nuu Nyoo, cuahan ta xicon cha iyó chuun, ta cuhvon chi ñu ndahvi, ta cunyicon chii. Tyicuan ta coo cha tyayii chuun nya gloria —catyí ra.

²² Soco cuhva cha chiñi ra tyivaa cuan cha cahan ra Jesús tyehe caa, cuihya xaan cuanuhu ra vatyí tyayii xaan ra.

²³ Tyicuan ta ra Jesús catyí chi ra cachicá noo chihin ra:

—Cha ndicha catyí chi ndo vatyí yii xaan cuhva ra tyayii cha cunyaca ñaha Nyoo añima ra. ²⁴ Catyí chi ndo inga chaha, vatyí numi ca yaha noo camellu xiyu noo yiqui ticu, ta ñima ca noo ra tyayii ta cuhva ra chi ra cha cunyaca ñaha Nyoo —catyí ra Jesús.

²⁵ Cha cachihñi ra cachicá noo chihin ra tuhun ihya, iyo xaan cacuñi ra, ta quichaha candaca tuhun ra chi ra tahan ra, ta cacatyí ra:

—Tu tyicuan caa, ¿yóó cha cuví cacu vii?

²⁶ Tyicuan ta nanyehé ra Jesús nu nyicú ra ta catyí ra:

—Ñáyivi ma cuví sacuvi ñu tyehe caa, soco Nyoo cuví sacuvi ra tandíhi.

²⁷ Tyicuan ta quichaha catyí ra Pedro chi ra:

—Sutu Mañi yuhu, nyuhu tandíhi maa cha iyó chi ndi sandoo ndi ta nyicón ndi chuun. ¿Ñáá cha cuñihi ndi? —catyí ra chi ra.

²⁸ Ta nacahan ra Jesús ta catyí ra:

—Cha ndicha catyí chi ndo, vatyí quivi cha cunduchaa tandíhi, yucuan quivi yuhu Rayii cha quichi nya gloria cucunyai ta cunyaca ñahi, ta nyoho cha nyicón ndo chii, cunyaa tucu nyoho nu uchi uvi tahan tyayu tyaqui. Ta cunyaca ñaha ndo chi ndi uchi uvi tahan ityi ñáyivi Israel. ²⁹ Ta tandíhi ndo cha sandoo ndo vehe ndo, o yañi ndo, o cuhva ndo, o sutu ndo, o sihi ndo, o ñasihi ndo o sehe ndo, o ñuhú ndo cha catyí yuhu, cunañihi ndo noo cientu ca chaha siqui cuan, ta cunañihi tucu ndo ñáyivi cha ma naa ca maa coo ndo. ³⁰ Cuaha xaan ñu cuahan ityi nuu vityin, ican ñu cuan, cuhun nya nu ndíhi. Ta cuaha xaan ñu cuahan nu ndíhi vityin, ican ñu cuhan ñu ityi nuu.

20

Nu sañahá ra Jesús noo cuhva cuenda ra casahá tyiño

¹ Cha nyacá ñaha Nyoo añima ñáyivi, cuví chi tari noo chitoho chacu yoho tichaha ndívi. Ta chitoho chacu cuan ñaha cuiñi quitá ra cuanducu ra cuaha ri musu cusaha tyiño nu tyiño saha ra. ² Ta sandaa ra tyiño

chihin musu cuan vatyí cutyiyahvi ra yahvi cha tahán chi chi ra cha noo quivi, ta tachí ra chi ra cusaha tyiño ra nu iyó tyiño sahá ra. ³ Yahá cuan ta quitá tucu ra cuhva cha caa ñin cha ñaha ri. Ta nanyehé ra chi suhva ca ra canyicú ri maa nuyahvi cuan. ⁴ Ta catyí ra chi ra: “Cuahan tucu nyoho cua saha tyiño ndo nu iyó tyiño sahá, ta tyiyahvi mai yahvi cha tahán chi chi ndo.” Tyicuan ta cuahan coyo tucu ra cuan. ⁵ Tyicuan ta chitoho chacu cuan quitá tucu ra inga chaha cuhva cha ora. Yucuan ta quitá tucu ra cuhva cha caa uñi cha cha iñi. ⁶ Ta yahá cuan ta quitá tucu ra cuhva cha caa ohon cha cha iñi ta nanyehé ra canyicú ri maa suhva ca ra nuyahvi cuan. Ta catyí ra chi ra: “¿Ñáá tuhun cha canyicú ri maa nyoho ndiyaca ihya, ta ña sahá tyiño ndo?” ⁷ Ta canacahan ra cuan ta catyí ra: “Yori maa cahan chihin ndi cha cusaha tyiño ndi.” Tyicuan ta catyí ra chi ra: “Cuahan tucu nyoho cua saha tyiño ndo nu iyó tyiño sahá. Ta tyiyahvi mai chi ndo yoso cuhva cha tahán chi chi ndo”, catyí ra. ⁸ Ta cuhva cha cuaa cuan, chitoho tyiño cuan catyí ra chi ra cuví nuu chi musu cuan: “Na canon chi musu, ta tyiyahvun chi ra. Quichaha tyiyahvun chi ra cha caquihvi nu ndíhi, ta nu ndíhi ta tyiyahvun chi ra cha caquihvi cha xihna ri”, catyí ra. ⁹ Tyicuan ta chaá coyo ra cha caquihvi cuhva cha caa ohon cha cha iñi cuan. Ta tahan tahan ra quehen ra yahvi nanii noo quivi. ¹⁰ Yahá cuan, ta cuhva cha tahán chi chi ra cha caquihvi coyo cha xihna ri cuan, cacuñi maa ra vatyí cuaha ca cutyiyahvi ra chi ra. Soco suri ñin ri yahvi noo quivi caquehen ra. ¹¹ Ta cuhva cha caquehen ra, quichaha cacahan ra chi chitoho tyiyahvi chuun. ¹² Ta catyí ra: “Ra cha cachaa coyo nu ndíhi ihya, noo tuhun hora casaha tyiño ra. Ta ñin ri cuhva tyiyahvun chi ra chihin nyuhu cha saha tyiño ndi nu cahñi ndiyaca”, cacatyí ra. ¹³ Soco nacahan chitoho tyiño cuan, ta catyí ra chi noo ra cuan: “Amigo, ñahri cha ña vaha sacuvi chuhun. ¿Atu ñima yahvi cha noo quivi catyí vatyí tyiyahvi chuun? ¹⁴ Quehen yahvun, ta cuanuhu. ¿Atu ñahri ityi iyó chii cha tyiyahvi chi ra cha quihvi nu ndíhi ñin ri cuhva cha tyiyahvi chi yoho? ¹⁵ ¿Atu ñahri ityi iyó chii cha sacuvi cha cuñi mai chihin xuhin? ¿Atu quiñi cuñún tyi vaha ñáyivi cuví chihin inga ra cuan?” catyí ra. ¹⁶ Ta tyicuan caa ñu quihvi nu ndíhi, cuhan ñu ityi nuu. Ta ñu cuahan ityi nuu, nya nu ndíhi chuhun ñu. Vatyí cuaha xaan ñu nacaná Nyoo chi. Soco chiin xaan ri ñu nacachí ra.

Inga chaha sacotó ra Jesús yoso caa cuc-

ahñi ñáyivi chi ra
(Mr. 10.32-34; Lc. 18.31-34)

¹⁷ Cuhva cha cuñi cahun ra Jesús nya Jerusalén, cana siin ra chi ndi uchi uvi ra cachicá noo chihin ra ta catyí ra chi ra:

¹⁸ —Ta cha nyehe maa ndo vatyi cuahan yo Jerusalén vityin. Ta yucuan cucuhva cuenda ñu chi yuhu Rayi cha quichi nya gloria chi ra cacuvi nuu chi tata sutu, ta chi ra casacua ha ley vehe ñuhu, ta cucatyí ra tyi tahán chi cúvi. ¹⁹ Ta cucuhva cuenda ra chii chi ra ñuu Roma, ta cucuacu nyaa ra chii, ta cucañi ra chii, ta cucahñi ra chii nu cruzi. Soco nu cu uñi quivi cunandote —catyí ra Jesús chi ra.

Nu chicán sihi ra Jacobo ta ra Juan noo tumañi iñi chi ra Jesús

(Mr. 10.35-45)

²⁰ Tyicuan ta sihi ra Jacobo ta ra Juan sehe ra Zebedeo tuhva ña nu nyaá ra Jesús chihin ninduvi sehe ña. Ta chicuiñi chiti ña nuu ra vatyi cacan ña noo tumañi iñi chi ra. ²¹ Ta quichaha ndaca tuhun ra Jesús chi ña:

—¿Ñáa cha cuñún?

Ta catyí ña:

—Quivi cha cunyaun nu nyacá ñahun nya andivi, cuhva cha cunyaa ninduvi sehi xiun. Na cunyaa noo ra chiyo vahun, ta inga ra cunyaa ra chiyo satyun.

²² Soco nacahan ra Jesús ta catyí ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha canyehe yuhu? ¿Atu cuví cahun ndo tuhun chihí tari cuhva cahun yuhu? —catyí ra.

Ta canacahan ra ta catyí ra:

—Cuví chi ndi.

²³ Ta catyí ra Jesús chi ra:

—Cha ndicha vatyi cunyehe ndo tindoho, ta cahun ndo tuhun chihí tari cahun yuhu tuhun chihí. Soco tuhun cha cunyaa ndo chiyo vahi ta chiyo satyin, ñima yuhu tahán chi cuhva chi ndo, soco maa Suti cucatyí ra yóo cha cuñihi nyatu cuan —catyí ra Jesús chi ra.

²⁴ Ta cha cachiñi uchi ca ra cachicá noo chihin ra Jesús tuhun cuan cacuxa gn ra chihin ninduvi ra cuan. ²⁵ Soco cana ra Jesús chi ra ta catyí ra chi ra:

—Cha chitó maa ndo, vatyi ra nyacá ñaha chi ñáyivi iyó siqui ñuhu ñáyivi ihya, ñihi xaan nyacá ñaha ra chi ñu tari nyaca ñaha ra musu ra. ²⁶ Soco ñima tyicuan caa tahán chi sacuvi nyoho. Vatyi ra cha cuñi cucahnu ca nu Nyoo, cuñi chi cuví ra musu tandihí ca ndo. ²⁷ Ta nya nyoho cha cuñi ndo cuví ndo nuu, cuñi chi cuví ndo musu tandihí ca ñu. ²⁸ Tari yuhu Rayi cha quichi nya gloria, ña vachi vatyi sacuvi ndo tyiño nu, soco vachi sacuvi tyiño nuu ndo, ta cuhve ñáyivi. Vatyi chihin cuan ta cuví sacaqui cuaha ñáyivi.

Nu sanduvahá ra Jesús chi uvi ra cuaa
(Mr. 10.46-52; Lc. 18.35-43)

²⁹ Cuhva cha cua quitá coyo ra ñuu Jericó, cuaha xaan ñáyivi cuahan chihin ra Jesús.

³⁰ Ta yuhu ityi cuan canyicú uvi tahan ra cuaa. Ta cuhva cha cachiñi ra vatyi cua yaha ra Jesús, quichaha canachaa ra. Ta catyí ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi! —catyí ra.

³¹ Ta ñáyivi quichaha cahan ñu chi ra na cacasi ra yuhu ra. Soco maa ra ñihi ca cacana chaa ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi!

³² Tyicuan ta chicuiñi ra Jesús ta cana ra chi ninduvi tahan ra cuaa cuan, ta ndaca tuhun ra chi ra:

—¿Ñáa cha cuñi ndo cha sacuvi chihin ndo?

³³ Ta canacahan ra ta catyí ra:

—Sutu Mañi yuhu, cuñi ndi nyehe ndi.

³⁴ Tyicuan ta cundahvi cuñi ra Jesús nyehe ra chi ra, ta tñin ra chiti nuu ra. Ta caa cuhva ri cuan cananyehé ra, ta cananyicon ra chi ra Jesús.

21

Nu quihvi ra Jesús Jerusalén

(Mr. 11.1-11; Lc. 19.28-40; Jn. 12.12-19)

¹ Cuhva cha cua chaá coyo ra ñuu Jerusalén, ta cachaá ra ñuu Betfagé, yatyin ri nu cuví yucu yutun Olivo. Tyicuan ta tachí ra Jesús tyiño chi uvi ra chicá noo chihin ra.

² Ta catyí ra chi ra:

—Cuahan ndo ñuu cha nyaá ityi nuu ihya. Ta yucuan cunañihi ndo noo burru sihi, nuhñi ti. Ta nyacá ti noo burru luhlu. Ndachi ndo chi ti, ta quichi nyaca ndo chi ti chii. ³ Ta tatu yóo cha catyí ñáa cha catyí chi ndo, çatyí ndo chi ñu: “Vatyi chiñuhú ti chi maa ra nyacá ñaha, soco numi ri quichi nanyaca ndi chi ti”, çatyí ndo chi ñu —catyí ra.

⁴ Tyehe caa cuví tacuhva na chino cava tuhun cha catyí ra profeta nu tyaa ra tyehe caa:

⁵ Çatyí ndo chi ñu ñuu Sión:

“Nyehe ndo, vachi rey maa ndo nu nyaá ndo.

Ndahvi ri vachi ra yosó ra noo burru luhlu, sehe noo quití cha tuhvá nyisó carga”, catyí ra profeta.

⁶ Tyicuan ta cuahan coyo ra cachicá noo chihin ra, ta casacuví ra tari cuhva catyí ra Jesús chi ra. ⁷ Caquichí nyaca ra chi ti chihin sihi ti. Ta catyiso ra sahna ra siqui ti, ta ndaá ra Jesús chi ti. ⁸ Ta cuaha xaan ñáyivi candiça ñu sahna ñu ityi nu cuahan ra, ta inga ñu catohon ñu numa yutun ta cachacun ñu ityi. ⁹ Ta ñáyivi cha cuahan ityi

nuu ta ityi chata, quichahā cana chaa ñu ta catyí ñu:

—¡Cahnu xaan cuví ra vachi tata rey David! ¡Cahnu xaan cuví ra vachi cuenda Sutu yo Nyoo! ¡Ta sacahnú xaan yo chi Nyoo nu nyaá ra ityi andivi! —catyí ñu.

¹⁰ Cuhva cha chaā ra Jesús ñuu Jerusalén cuan, tandihí maa ñáyivi ñuu naquiquí, ta cuaha xaan ñu candacá tuhun ñu chí tahan ñu, ta catyí ñu:

—¿Yóo ra cuví ra ihya?

¹¹ Ta ñáyivi catyí ñu:

—Ra Jesús, ra chahá cuenda tuhun cahan Nyoo, ra ñuu Nazaret nu cuví Galilea cuví ra —catyí ñu.

Nu tavá ñehe ra Jesús chi ra caxicó chichi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹² Yahā cuan ta quihví ra Jesús chichi vehe ñuhu cahnu Nyoo. Ta tavá ñehe ra chí tandihí ra casatá ta ra caxicó yucuan. Ta sanduvā ra mesa ra canasamá xuhun chí ñáyivi yucuan. Ta sanduvā ra tyayu ra caxicó paloma. ¹³ Ta catyí ra:

—Nu tutu Nyoo catyí chí tyehe caa: “Vehi, vehe nu chicán tahví ñáyivi chíi cuví, ta tyicuan caa cucunañi chí. Soco nyoho cha nasahā ndo vehe nu nyicú ra suhu” —catyí ra.

¹⁴ Chichi vehe ñuhu cuan catuhvā suhva ra cuaa ta ra coxo chí ra Jesús. Ta maa ra sanduvahā ra chí ra. ¹⁵ Soco canyehe ra cacuví nuu chí tata sutu ta ra casacuahā ley vehe ñuhu cuan vatyi savahā ra Jesús milagru, ta canachahā ra cuatyaa chichi vehe ñuhu, ta catyí ndotyin:

—¡Cahnu xaan cuví ra vachi tata rey David! —catyí ndotyin.

Tyicuan ta cacuxaān tata sutu ta inga ra cuan cha canyehe ra ta cha cachiñí ra. ¹⁶ Ta cacatýi ra chí ra Jesús tyehe caa:

—¿Atu chihñún cha cahán ndotyin?

Ta nacahan ra Jesús ta catyí ra:

—Chihñí. Soco ¿atu ta sacuahā ca ndo nu tutu Nyoo nu catyí chí tyehe caa?

Sutu Mañi yuhu, sacuvun vatyi ra cuatyaa nyihí cata ndotyin.

Ta ra cuatyaa lee cha chaxín sacahnú ndotyin chuun, catyí chí, —catyí ra Jesús.

¹⁷ Tyicuan ta sandoo ra chí ra, ta quita ra ñuu cuan ta cuahan ra ñuu Betania. Ta yucuan ndoo ra cha cuaa cuan.

Nu tyanahá ra Jesús chi tu higo vatyi ñahri higo ñi nuu tun

(Mr. 11.12-14, 20-26)

¹⁸ Tuvi inga quivi. Ta cha ñaha ri, cua ndichí ra Jesús nya Jerusalén, ta chaā soco chí ra. ¹⁹ Ta nanyehe ra noo tu higo yatyin ri yuhu ityi cuan. Ta tuhvā ra nu nanyaá tun, soco ñahri maa nañihí ra nuu tun. Maa maa

ri maa numa ri ñi nuu tun. Tyicuan ta catyí ra chí tun tyehe caa:

—¡Ni nonga chaha ma cuhva con chiti!

Ta caa cuhva ri cuan ta na ityi tun. ²⁰ Ta cha nyehe ra cachicá noo chihin ra cha sacuví ra, iyo cacuñí ra, ta ndacā tuhun ra chí ra ta catyí ra:

—¿Ñáá tuhun cha numi xaan na ityi tu higo cuan?

²¹ Ta nacahan ra Jesús ta catyí ra:

—Cha ndicha catyí chí ndo, vatyi tatu chinó ñi ndo ta ma nacaca uvi ñi ndo, ñima ihya ri cha sacuví chí tu higo ihya cuví sacuví ndo, soco cuví catyí ndo chí yucu ihya tyehe caa: “Canyaha chuun ihya ta cuahan nya chichi tyañuhu.” Ta tyicuan caa cucuví. ²² Ta tandihí cha cacan ndo nu chicán tahvi ndo, tatu chinó ñi ndo tyi cucuhva Nyoo, cuñihí ndo —catyí ra Jesús.

Nu sañahá chí yóo ra chahā tyiño chí ra Jesús

(Mr. 11.27-33; Lc. 20.1-8)

²³ Yahā cuan ta quihví ra Jesús chichi vehe ñuhu cahnu, ta cha ni ri ca cha sañahá ra yucuan, tuhvā ra cacuví nuu chí tata sutu chí ra, ta ra cacuví mandoñi ñu ñuu Israel, ta candacā tuhun ra chí ra:

—¿Yóo cha tyaā tyiño vatyi sacuvun tyehe caa, ta yóo cha chahā tyiño cuan chuun?

²⁴⁻²⁵ Ta nacahan ra Jesús ta catyí ra:

—Yuhu tucu cua ndaca tuhun noo tuhun chí ndo. ¿Yóo cha tachí chí ra Juan vatyi sacondutya ra chí ñáyivi? ¿Atu Nyoo tachí chí ra, o ñáyivi? Tatu catyí ndo chíi, cucatyi tucu yuhu chí ndo yóo cha tyaā tyiño ihya chíi —catyí ra Jesús chí ra.

Tyicuan ta quichahā cacuvi yuhu ra chihin ra tahan ra, ta cacatýi ra:

—Tatu catyí yo tyi Nyoo tachí chí ra, cucatýi ra chí yo: “Tu tyicuan caa, ¿ñáá tuhun ña chinó ñi ndo chí ra?” ²⁶ Ta tatu catyí yo tyi ñáyivi, ñáyivi cuví nacanda ñu siqui yo, vatyi tandihí ñu chinó ñi ñu tyi ra Juan, cuenda Nyoo cahan ra —catyí ra chí ra tahan ra.

²⁷ Tyicuan ta quichahā cacatýi ra chí ra Jesús tyehe caa:

—Ña chitó ndi.

Tyicuan ta ra Jesús catyí ra chí ra:

—Ni yuhu, ta ma catyí chí ndo yóo cha tyaā tyiño ihya chíi.

Nu cahan ra Jesús noo cuhva cuenda uvi tahan sehe noo ra

²⁸ Ra Jesús catyí ra chí ra:

—¿Yoso caa catyí ndo cuenda tuhun cha cua catyí ihya? Noo ra, iyó uvi tahan sehe ra. Ta catyí ra chí noo sehe ra: “Cuahan cua saha tyiño nu iyó tyiño sahí.” ²⁹ Ta nacahan sehe ra ta catyí ra: “¡Ma cuhin!” Soco yahā cuan ta nasamā cuhva chicá xihí ra ta chahan ra chisaha tyiño ra. ³⁰ Yahā

cuan ta sutu ra chahan ra nu nyaá inga sehe ra. Ta catyí tucu ra chi ra na cuhun ra cusaha tyiño ra. Soco ra yucuan numi ri quehen ra tuhun, ta catyí ra: “Vaha, Tata, cuhin.” Soco ña chahan ra. ³¹ Chichi cha ninduvi tahan ra, ¿nya ra sacuví ra cha catyí sutu ra? —catyí ra Jesús.

Ta nacahan ra ta cacatyí ra:

—Ra cha cahān ra chihin cha xihna ri.

Ta catyí ra Jesús chi ra:

—Cha ndicha catyí chi ndo, vatyi xihna ca ra catavá xuhun cuenda gobiernu, ta ñu cata iñi cuquihvi ñu nu nyacá ñaha Nyoo, ican saha nyoho. ³² Vatyi ra Juan ra sacundutya quichí ra, quichi sañaha ra chi ndo yoso caa tahán chi coo ndo, soco nyoho ña chingo iñi ndo chi ra, soco ra catavá xuhun ta ñu cata iñi cachingo iñi ñu chi ra. Ta nyoho vasi nyehe ndo ihya, soco ña nasama ndo cuhva iyó ndo, tacuhva chino iñi ndo chi ra.

Nu catyí ra Jesús vatyi ra cacahñi chi ra cuví ra tari ra sahá tyiño ña vaha (Mr. 12.1-12; Lc. 20.9-19)

³³ Tyasoho ndo inga cuhva ihya: Chiyo noo chitoho noo ñuhú, ta tachí ra yoho tichaha ndivi, ta tyihí ra noo chachu. Ta savaha ra noo nu cuhñi ra tichaha ndivi cuan ta tava ra ndutya chi. Ta savaha tucu ra noo vehe sucun tacuhva vatyi cuví saha ra cuenda tandihí.

Yaha cuan ta chaha noo ra ñuhú cuan chi suhva ra casahá tyiño, ta cuahan ra inga ñuu. ³⁴ Ta cha chah quivi cha iyó tichaha ndivi cuan, tachí ra chi suhva musu, na cucacan ra chi ra casahá tyiño cuan, na cuhva ra suhva tichaha ndivi cha tahán chi chi ra. ³⁵ Soco ra casaha tyiño cuan, catiñ ra chi musu cuan, ta cacahñi ra chi noo ra. Ta chi inga ra cacahñi ra, ta catuchi ra yuu chi inga ra. ³⁶ Tyicuan ta cha inga chaha, cuaha ca musu tachí chitoho chachu cuan ta ñima ca cha xihna ri. Soco tari casacuví ra chi ra cha xihna ri, sacuví tucu ra chi ra ihya.

³⁷ Nu ndihí tachí ra chi maa maa sehe ra, vatyi cuñi maa ra vatyi cusaha ra ñáyivi chi sehe ra. ³⁸ Soco cuhva cha cananyehe ra casahá tyiño cuan chi sehe ra, catyí ra chi ra tahan ra tyehe caa: “Ican ra ihya cundoo chihin tandihí ihya. Na cahñi yo chi ra tacuhva ndoo maa yo chihin”, cacatyí ra. ³⁹ Tyicuan ta catiñ ra chi ra, ta catava ra chi ra ityi chata chachu, ta cacahñi ra chi ra —catyí ra Jesús.

⁴⁰ Tyicuan ta ndaca tuhun ra Jesús chi ñu: —Quivi quichi chitoho ñuhú cuan, ¿ñáa cha cusacuví ra chihin ra casahá tyiño quiñi iyó cuan?

⁴¹ Ta nacahan ra ta cacatyí ra:

—Ma cuatu ra, soco cahñi ra chi ra caquiñi iyó cuan. Ta cuhva ra ñuhú cuan chi inga ra casahá tyiño. Ta quivi coo tichaha

ndivi, cunacuhva cuenda ra chi chitoho chachu cuan cha tahán chi chi ra.

⁴² Tyicuan ta quichaha catyí ra Jesús chi ñu:

—¿Atu ta sacuaha ca nyoho nu tutu Nyoo nu catyí chi tyehe caa?

Yuu cha ña cuñi ra casavahá vehe cotyiño ra,

ican cuan cuví yuu cha ñiñi ca.

Ican ihya cuví cha sacuví Sutu yo Nyoo.

Ta tyaqui xaan tuhun cuan cha cuenda chi yo, catyí chi.

⁴³ Yucuan chaha catyí chi ndo vatyi ma cuhva ca Nyoo cuhun ndo nu nyacá ñaha ra, ta cucuhva ra chi ñu cha ndicha nyacá ñaha ra añima. Vatyi maa ñu cunacuhva cuenda ñu cha vaha cha tahán chi chi ra. ⁴⁴ Ta cha cuenda yuu cuan, yóo ñu cha nduva siqui chí, yiquin maa cucuvi ñu. Ta tatu yuu cuan ta canacava siqui yóo ñu, cutaxin nyihí maa ñu —catyí ra Jesús.

⁴⁵ Cuhva cha catuvi iñi ra cacuví nuu chi tata sutu cuan ta ra fariseo vatyi cuenda ra cahān ra Jesús cuhva ihya, ⁴⁶ cacuñi ra catiñ ra chi ra, soco cayuhvi ra chi ñáyivi vatyi ñáyivi, chitó ñu vatyi ra Jesús cuenda Nyoo cahān ra.

22

Nu chahá ra Jesús noo cuhva cuenda vico tandaha

(Lc. 14.15-24)

¹ Quichaha cahān tucu ra Jesús chihin ñu inga chaha chihin cuhva, ta catyí ra:

² —Cha nyacá ñaha Nyoo añima ñáyivi cuví chi tari noo rey cha savaha noo vico cha cuenda cha cua tandaha sehe ra. ³ Ta tachí ra chi musu ra na cuhun ra cucana ra chi ñu cha nacatyí tuhun ra, soco ñu cuan, ña cacuñi ñu quichi coyo ñu. ⁴ Tachí ra inga chaha chi inga musu, ta catyí ra chi ra tyehe caa: “Catyi ndo chi ñu cha nacatyí tuhun, vatyi cha yaha chahñi sindiqui sane, ta inga quití cha xahan ñandihí, ta cha nyaá vaha nyayu, ta tandihí cha nyatú tuhva. Na quichi ñu vico tandaha”, catyí ra. ⁵ Soco ñu nacatyí tuhun ra, ña caquichaha ñu chi ra. Noo ñu chahan coyo ñu nu iyó chachu ñu, inga ñu chahan ñu nu tyiño sahá ñu. ⁶ Ta inga ñu tiñ ñu chi musu rey cuan ta cañi vavaha ñu chi ra nyacua chahñi ñu chi ra. ⁷ Tyicuan ta rey cuan cuxaān vavaha ra, ta tachí ra chi sindaro ra, cucahñi ra chi ra cacahñi cuan, ta cahmi ra ñuu ra. ⁸ Tyicuan ta quichaha catyí ra chi musu ra: “Tandihí ta cha iyó vaha cha cuenda vico tandaha, soco ñu nacatyí tuhun cuan, ña tahán chi cha quichi coyo ñu. ⁹ Cuahan ndo tandihí calle ta nacatyí tuhun ndo chi tandihí ri ñu cha nañihí ndo na quichi coyo ñu vico tandaha”, catyí rey cuan. ¹⁰ Musu cuan cuahan coyo ra tandihí calle, ta casandu iñ ri ra chi tandihí

ñu canañihí ra: ñu quiñi iyó, ta ñu vaha. Ta tyicuan caa chitu chichi vehe ra chihin ñáyivi.

¹¹ Tyicuan ta quihví rey cuan cua nyehe ra chi ñáyivi cha canacatyí tuhun musu cuan. Ta nanyehé ra chi noo ra ñohó yucuan, soco ñahri sahma vico tandaha ñihnó ra. ¹² Ta catyí rey chi ra: “Amigo, ¿yoso caa cha quihvun ihya ta ñahri sahma vico tandaha ñihnón?” Soco ra cuan ña na cahan maa ra. ¹³ Tyicuan ta catyí rey cuan chi ra catyihí mesa cuan: “Cuhñi ndo chaha ra ta ndaha ra, ta tuchi ndo chi ra nu ñaa iñi ityi chata vehe, ta yucuan cucuacu ra, ta cusacahñi ra noho ra”, catyí ra. ¹⁴ Vatyí cuaha xaan ñu nacana Nyoo chii, soco chiin xaan ñu nacachi ra —catyí ra Jesús.

Nu candacá tuhun ra cuenda xuhun cha tavá gobiernu

(Mr. 12.13-17; Lc. 20.20-26)

¹⁵ Tyicuan ta catyihí tahan ra fariseo tuhun chihin tahan ra vatyí cusacahan ra chi ra Jesús noo cuhva cha ña tahán chi, vatyí tyicuan caa ta coo cuatyí catyaa ra siqui ra. ¹⁶ Ta tachí ra chi suhva ra cuenda ra, ñin ri chihin suhva ra cuenda ra Herodes. Ta cacatyí ra chi ra Jesús tyehé caa:

—Maestro, chitó ndi vatyí cha ndicha cahún. Ta chihin cha ndicha sañahún ityi Nyoo. Ta ña quichahún cha cahán ñáyivi, vatyí ña tiín cuendon cuhva caá ri ñu. ¹⁷ Catyí chi ndi yoso caa chicá xiñun: ¿Atu vaha cha tyiyahví yo cha chicán gobiernu ñuu Roma chi yo, o ma tyiyahví yo?

¹⁸ Soco tuví iñi ra Jesús vatyí ña vaha cuhva chacicá xiñi ra, ta catyí ra chi ra:

—Nyoho sahá ndo tyi vaha ndo, soco ña ndicha ndo. ¿Ñáá tuhun cha nducu nyehe ndo chii? ¹⁹ Sañaha ndo xuhun cha tuhva ndo tyiyahví ndo chi gobiernu —catyí ra.

Ta caquichí nyaca ra noo xuhun cha nañí denariu chi ra. ²⁰ Ta cuhva cha nanyehé ra Jesús, ta quichahá ndaca tuhun ra chi ra:

—¿Yóó chi nuu ta yóó chi sivi nyaá ihya?

²¹ Ta nacahan ra ta cacatyí ra:

—Chi ra nyacá ñaha.

Tyicuan ta catyí ra Jesús chi ra:

—Cuhva ndo chi ra nyaca ñaha cha tahán chi chí ra, ta cuhva tucu ndo chi Nyoo cha tahán chi chí Nyoo —catyí ra.

²² Cuhva cha cachihí ra cha cahan ra Jesús, iyo xaan cacuñi ra. Ta cuahan coyo ra.

Nu canducy tuhun ra saduceo siqui tuhun cha nandotó ndiyi

(Mr. 12.18-27; Lc. 20.27-40)

²³ Suri quivi cuan suhva ra saduceo chahan coyo ra nu nyaá ra Jesús. Ta ra saduceo cuan ña cachino iñi ra cha cunandoto ndiyi: quivi cu naa ñáyivi. Yucuan chaha candacá tuhun ra chi ra Jesús, ta catyí ra:

²⁴ —Maestro, ra Moisés catyí ra vatyí tatu noo ra tandaha ta chihí ra ta ña chiyó sehe ra, tahán chi cha tandaha yañi ra chihin ñaha chihí yí cuan. Tyicuan ta coo sehe ra chihin ña cha cuenda yañi ra cha chihí.

²⁵ Vaha. Vityin tyehé caa cuví chi noo ra chiyó ucha tahan ra chihin yañi ra. Ra cha xihna ri tandaha ra. Yaha cuan ta chihí ra. Soco vatyí ña chiyó sehe ra, ndoo ñasihí ra chi yañi cu uvi ra. ²⁶ Ta suri tyicuan caa cuví chi yañi ra ra cu uvi. Ta yaha cuan, ta ra cu uñi quehen ra chi ña, ta suri chihí tucu ra. Ta tyicuan caa cuví chi ndi ucha ra. ²⁷ Ta cha yaha cuan nu ndihí tuhun chihí ndihí maa ña cuan. ²⁸ Ta cha tyicuan caa, quivi cunandoto ñu, chichi cha ucha ra chihin yañi ra, ¿nya ra cucuvi ñasihí chi ñaha cuan? ¿Vatyí tandihí ra tandaha ra chihin ña? —cacatyí ra.

²⁹ Nacahan ra Jesús ta catyí ra:

—Nyoho, cahán tondo ri maa ndo, cha cuenda vatyí ña chitó ndo cha nyaá nu tutu Nyoo, ni tunyee iñi Nyoo, ta ña chitó ndo.

³⁰ Vatyí quivi cunandoto ndiyi, ni ma tandaha ñu, ta ni ma cuhva ñu sehe ñu tandaha, vatyí tari ángel Nyoo ra nyaá andivi cucuvi ñu. ³¹ Soco tuhun cha nandotó ñu ndiyi, ¿atu ta sacuha ca ndo tuhun cha catyí maa Nyoo chi ndo? Catyí ra tyehé caa:

³² “Yuhu cuví Nyoo cuenda ra Abraham, ta ra Isaac ta ra Jacob.”

Ihya nyehé yo vatyí canyito añima ra cuan, vasi cha naha chihí ra vatyí Nyoo ñima Nyoo cuenda ñu ndiyi cuví ra, soco Nyoo cuenda ñu nyitó cuví ra —catyí ra.

³³ Iyo cuñi ñáyivi cha chihí ñu tuhun sañahá ra Jesús.

Ley cha niñi ca cha chahá Nyoo

(Mr. 12.28-34)

³⁴ Cha cachitó ra fariseo vatyí ra Jesús chasi ra yuhu ra saduceo, candu ñin ri ra.

³⁵ Ta noo ra cha cuví ra sacuahá ley vehe ñuhu, cuñi ra nducu nyehe ra chi ra Jesús. Ta quichaha ndaca tuhun ra chi ra, ta catyí ra:

³⁶ —Maestro, ¿nya mandamiento cha nyaá nu ley cuví cha niñi ca?

³⁷ Ta catyí ra Jesús chi ra:

—“Cuñun chi Sutu Mañi yo Nyoo chihin cha niñi iñun ta chihin cha tandihí añimon, ta chihin cha tandihí cha chihí tuñi xiñun.”

³⁸ Ican ihya mandamiento cha niñi ca, ta cha xihna ri ñandihí. ³⁹ Ta cha cu uvi cha yatyin ri tyicuan caa, ta catyí chi: “Cuñun chi ñáyivi tuhun tari cuñun chi maun.” ⁴⁰ Ican uvi tahan mandamiento ihya cuví cha nyisó chi ley cha chahá Nyoo chi ra Moisés ta tandihí tuhun cha casañahá ra profeta Nyoo ta cha naha.

Ra Cristo quichí ra tata ra David, ta suri cuví ra Sehe Nyoo

(Mr. 12.35-37; Lc. 20.41-44)

41 Cha ni ri ca cha canyicú ñn ri ca ra fariseo, 42 ra Jesús ndaca tuhun ra chi ra, ta catyí ra:

—¿Yoso caa chicá xiñi nyoho cuenda ra cuví Cristo? ¿Yóó chi tata vachi ra cuñi maa ndo?

Ta canacahan ra ta catyí ra:

—Tata ra David cuví chi ra.

43 Tyicuan ta ra Jesús catyí ra chi ra:

—¿Ta yoso caa cha vatyi ra David cuan, maa Tatyí li Nyoo chotyíño chi ra? ta catyí ra vatyi ra cuví Cristo, ra nyacá ñaha chi ra cuví ra, vatyi catyí ra tyehe caa:

44 Cahān Suti Nyoo chihin Suti ra Cristo, ta catyí ra chi ra:

“Cunya chiyó vahí nyacua nya quívi cuhve chi ra xaan iñi chuun vatyi cuaca chahun siqui ra” tyaā ra David.

45 ¿Yoso caa cha ra vachi tata ra David cuví chi ra Cristo, tatu suri maa ra David catyí ra vatyi ra Cristo Sutu ra cuví chi ra? —catyí ra Jesús.

46 Ta yori maa cuví nacahan ni noo tuhun. Ta nya ndaha quívi cuan, yori ca maa cañā iñi candaca tuhun ñáá ca cha candaca tuhun chi ra.

23

Nu cahān ra Jesús chi ra sacuahá ley vehe ñuhu ta ra fariseo

(Mr. 12.38-40; Lc. 11.37-54; 20.45-47)

1 Tyicuan ta ra Jesús catyí ra chi ñáyivi, ta chi ra cacticá noo chihin ra tyehe caa:

2 —Ra sacuahá ley ta ra fariseo nyicú ra tyiño cha sañahá ra ley cha tyaā ra Moisés.

3 Ta cha tyicuan caa, quíchaha ndo cha cahān ra ta sacuvi ndo tandihí cha cacatyí ra chí ndo. Soco ma quehen ndo cuhva iyó ra, vatyi maa ra, siñ cha sañaha ra, ta siñ cha sacuvi ra. 4 Vatyi yori ndoyo carga cha tyaā ra siqui ñáyivi. Ta saniñi ra chi ñu na cuišo ñu, ta maa ra ni chíin nundaha ra ña nañi chata carga cuan. 5 Tandihí cha casacuví ra, cha cuñi ra na nyehe ñáyivi. Vatyi tahān iñi ra catyaa ra tuhun Nyoo tyaan ra ta soco ra chihin letra nahnu. Ta tahān iñi ra cacuihno ra sahma chihin adorno nañi. 6 Ta nu vaha ca, cuñi ra cunyicu ra vico, ta cachi ra. Ta nu vaha ca cuñi ra cunyicu ra chichi vehe ñuhu. 7 Ta nu chicá noo ra cacuñi ra vatyi cuhva ñáyivi nocumi chi ra chihin cha sahá xaan ñu ñáyivi chí ra. Ta cuñi tucu ra cha catyí ñu chí ra vatyi chito xaan ra. 8 Soco nyoho, ma cuhva ndo ityi cha catyí ñáyivi vatyi chitó xaan ndo. Vatyi tandihí nyoho, yañi ndo cuví. Ta noo ri ra chitó iyó, ta ican ra cuví Cristo. 9 Ta ma catyí ndo Sutu ndo chí ninoo ra ñuhu ñáyivi ihyā, vatyi iyó noo Sutu ndo, ta nyaá ra andívi. 10 Ta ma catyí ndo vatyi ra cuví nuu cuví ndo, vatyi noo ri maa ra Cristo cuví nuu. 11 Ra cha sacuví tyiño nuu tandihí ca ra, ican ra cuan cuví ra

cahnu ca nu nyicú ndo. 12 Vatyi ra cahnu sahá chíi, cunocuee ra. Ta ra ña cahnu sahá chíi cucucahnu ra.

13 ¡Ndahvi nyoho ra sacuahá ley vehe ñuhu, ta ra fariseo! ¡Ndahvi nyoho cha sahá ndo tyi vaha ndo! Vatyi chasí ndo yuvehe nu nyacá ñaha Nyoo, tacuhva ma cuví quihvi ñáyivi. Ta ni ri maa ndo ña quihví ndo ta ni ña chahá ndo cha quihvi ñáyivi, ñu cuñi quihvi.

14 ¡Ndahvi nyoho ra sacuahá ley ta ra fariseo, nyoho cha sahá ndo tyi vahá ndo! Vatyi tinyaa ndo vehe ñu chihí yíi, tyi ña cuví tyiyahvi ñu ñáá xuhun tavá ndo siqui ñu. Ta yahā cuan, ta naha chicán tahvi ndo nu tuvi vatyi sahá ndo tyi vaha ndo. Ta cuenda cha sacuví ndo tyehe caa, cahnu ca tindoho cunyehe ndo.

15 ¡Ndahvi nyoho ra sacuahá ley vehe ñuhu, ta ra fariseo. ¡Sahá ndo tyi vaha ndo, soco ña ndicha ndo! Vatyi nducú xaan ndo cuhva na cunyicon ñáyivi chí ndo. Ta tatu cha nandihvi ñu cuenda ndo, quíni caa nicoo ñu saha ndo, ta ñima ca maa ndo. Ta cha tyicuan caa nyacuví ndo, ñihi ca sacuhún ndo chí ñu anyaya cha nuu maa ndo.

16 ¡Ndahvi nyoho ra ndahvi! Vatyi cuñi ndo saquehen ityi ndo chí ñáyivi, ¡soco cuaa ndo! Vatyi catyí ndo tatu noo ñu catyí ñu cha cusacuví ñu noo cha cusacuví ñu, ta tyanaha ñu chihin sívi vehe ñuhu, yucuan ña niñi cha sacuvi ñu. Soco tatu xuhun cuaan cha iyó vehe ñuhu cuan tyanaha ñu, yucuan ndicha, niñi cuñi chí cha sacuvi ñu, catyí ndo. 17 ¡Tondo xaan ndo ta cuaa ndo! ¿Nya cha niñi ca? ¿Atu niñi ca xuhun cuaan cuan, o vehe ñuhu cha sacu ii chí xuhun cuaan cuan? 18 Ta suri catyí tucu ndo: “Tatu yihí ñu catyí ñu cha cusacuví ñu cha cusacuví ñu, ta tyanaha ñu cuenda arta cha yoso cha chahá cuenda ñu chí Nyoo, ña niñi cha sacuvi ñu. Soco tatu tyanaha ñu cuenda ofrenda cha yoso siqui arta cuan, yucuan ndicha niñi cuñi chí sacuvi ñu, catyí ndo.”

19 ¡Tondo xaan ndo ta cuaa ndo! ¿Nya cha niñi ca? ¿Atu niñi ca ofrenda o arta cuan cha sacu ii chí ofrenda cuan? 20 Vatyi ñu tyanahá cuenda arta cuan, ñima cuenda ri cuan tyanaha ñu, soco cha cuenda tandihí cha yosó nuu ñandihí. 21 Ta ñu tyanahá cuenda vehe ñuhu cahnu, ñima cuenda vehe ñuhu ri cuan, soco cuenda Nyoo tyanahá ñu ñandihí, vatyi iyó ra yucuan. 22 Ta tyicuan caa tucu ñu tyanahá cuenda andívi, tyanahá tucu ñu cuenda tyayu Nyoo ta suri cha cuenda maa Nyoo ñandihí, tyi maa ra cuví ra nyaá nyacá ñaha yucuan.

23 ¡Ndahvi nyoho ra sacuahá ley vehe ñuhu ta ra fariseo! sahá ndo tyi vaha ndo vatyi chahá ndo diesmo chí Nyoo cha cuví menta,

ta añii, ta comino. Soco ña quichahá ndo tuhun cha ñiñi ca cha nyaá nu ley cha tahán chi sacuvi yo. Ta cuñun, cha sacuvi yo cha vaha chihin tandihí ñáyivi, cha cundahvi cuñi yo chi ñu, cha chinó iñi yo chi Nyoo ta ma sandoo yo chi ra. Ican ihya cuñi chi sacuvi ndo, ta ma sandihí ndo cha cuhva ndo diesmo cuan ñandihí. ²⁴ Nyoho cuñi ndo casaquehen ityi ndo chi ñáyivi, soco cuaa ndo. Vatyí sacuita ndo noo tiyucun luhlu, soco coco ndo noo camellu. Cuatyí luhlu ri nyehe ndo ta ña sahá ndo cuenda cuatyí cahnú cuví cuan.

²⁵ ¡Ndahvi nyoho ra sacuahá ley vehe ñuhu ta ra fariseo, ra casaha tyi vaha! Vatyí ityi chata ri vasu ta ityi chata ri coho sanduvii ndo, soco ityi chichi ña sanduvii ndo. Vatyí chichi añima ndo tyitu ñohó cha quiñi caa. Chicá xifi ndo cha ñiñi ndo nu cusuhu ndo, ta ña cuví chasaha ndo cha quiñi caa cha quichi cuví xaan iñi ndo. ²⁶ ¡Ra fariseo cuaa cuví ndo! Sanduvii xihna ndo ityi chichi vasu ta coho, tyicuan ta cuvii tucu ityi chata.

²⁷ ¡Ndahvi nyoho ra sacuahá ley vehe ñuhu ta ra fariseo, ra casavaha chii! Vatyí cuví ndo tari noo ñaña ndiyi cha nacahyu, vatyí ityi chata chi tyaqui xaan, soco ityi chichi tyitu ñohó yiqui ndiyi, ta tandihí nuu cha quiñi caa. ²⁸ Tyicuan caa cuví nyoho. Vatyí ityi chata tari maa tyi vaha xaan ndo nuu ñáyivi, soco ityi chichi, tyitú ñohó cha cuendu ndo, ta cha quiñi caa.

²⁹ ¡Ndahvi nyoho ra sacuahá ley vehe ñuhu, ta nyoho ra fariseo! Sahá ndo tyi vaha ndo ta ña ndicha. Nyoho samá ndo ñaña ra profeta Nyoo ra chiyo ta cha naha. Ta nyoho nacahyu ndo ñaña ñáyivi vaha ñu chiyo ta cha naha. ³⁰ Ta yucuañ ta catyi ndo! “Tyehe ta chiyo ndi quivi chiyo ñáyivi chahnu ndi, ma tyinyee ndi chi ra chahñi chi ra profeta Nyoo”, catyi ndo. ³¹ ¡Ma chihin yucuan ri! Suri maa ndo nacoñó ndo vatyí vachi ndo tata ñu cachahñi chi profeta Nyoo. ³² ¡Vaha vityin, chaha chi cuhva savaha ndihí ndo cha quiñi caa cha quichaha savaha sutu chahnu ndo!

³³ ¡Nyoho ñu quiñi iyó, ñu vachi tata cool! ¿Yoso caa cucacu nyoho tacuhva ma chuhun ndo anyaya? Ma cuví. ³⁴ Yucuan chaha cutachi chí ra profeta Nyoo nu nyicú ndo, cutachi tiqui chí ra chiñi tuñi, ta ra sacuahá nu nyicú ndo. Soco nyoho cucahñi ndo chí ra ta cutyaa ndo chí suhva ra nu cruzi. Ta chí inga ra cucañi ndo chí ra chichi vehe ñuhu. Ta cacanyicon ndo chí ra tahan tahan ñuu. ³⁵ Yucuan chaha, siqui ndo cucunyaa cuatyí cha cuenda cha cachihí tandihí ra vaha cha cachahñi ñu nyacua nya ra Abel ta nyacua nya ra Zacarías sehe ra Berequías ra cha chahñi ndo chichi vehe ñuhu yatyin nu nyaá arta cha yosó cha chahá cuenda yo chí Nyoo. ³⁶ Cha ndicha catyi chí ndo, vatyí

tandihí cuatyí ihya cucoso siqui ñáyivi cha iyó vityin —catyi ra Jesús chí ra.

Nunducuihya iñi ra Jesús nyehe ra chí ñuu Jerusalén ta chacu ra
(Lc. 13.34-35)

³⁷ ¡Jerusalén, Jerusalén! ¡Ndahvi nyoho ñu iyó ñuu chiña! Vatyí chahñi ndo chí ra profeta Nyoo. Ta tuchi ndo yuu chí tandihí ra cha saquichi Nyoo nu nyicú ndo. Cuaha xaan chaha cuñi saha cuende chí ndo, tari noo ndivi cha sahá cuenda ti chí sehe ti, ta naquehén ndahvi ti chí ti chichi ndichin ti, soco ña cuñi ndo. ³⁸ Nyehe ndo vityin, vatyí cha sandoo ndahvi chí ndo. ³⁹ Vatyí catyi chí ndo, vatyí ma nyehe ca ndo chii nyacua nya chaa chí quivi cuatyí ndo tyehe caa: “Cahnú xaan ra cuví ra vachi chihin tunyee iñi sivi Sutu yo Nyoo”, cucatyí ndo —catyi ra Jesús.

24

Nu catyi ra Jesús vatyí cutani vehe ñuhu cahnú
(Mr. 13.1-2; Lc. 21.5-6)

¹ Quitá ra Jesús chichi vehe ñuhu cahnú cuan, ta cha cuñi chuhun ra, ta catuhva ra cachicá noo chihin ra chí ra, ta quichaha casañaha ra vehe ñuhu cuan chí ra. ² Soco nacahan ra Jesús ta catyi ra:

—¿Atu nyehé ndo tandihí ihya? Cha ndicha catyi chí ndo, vatyí ihya ni noo yuu ta ma ndoo coso nyitahan. Tandihí ta cutani —catyi ra.

Nu catyi ra Jesús ñáá ndihí seña cucuvi cha ni cumañi ca naa ñáyivi
(Mr. 13.3-23; Lc. 21.7-24; 17.22-24)

³ Tyicuan ta cuahan coyo ra yucu yutun Olivo. Ta cuhva cha nyaá ra Jesús yucuan, ra cachicá noo chihin ra quichi coyo ra ta catyi xehe ra chí ra tyehe caa:

—Cuñi ndi cha catyun chí ndi, ama cucuvi tuhun cuan. ¿Ñáa seña cucuvi cha cuquichun inga chaha ta cha cunaa ñáyivi?

⁴ Tyicuan ta nacahan ra Jesús:

—Saha ndo cuenda chí ndo coto yóo cha sandahvi ñaha chí ndo. ⁵ Vatyí cuaha xaan ra cuquichi, ta cotyiño ra sivi, ta cucatyí ra tyehe caa: “Yuhu cuví Cristo ra cha saquichi Nyoo.” Ta cuaha ñu cusandavi ñaha ra. ⁶ Nyoho cuñi ndo tuhun tyi iyó cuatyí ta cañi tahan ñáyivi ityi cuan ityi ihya. Soco ma nayuhvi ndo, vatyí tyicuan caa tahan maa chí cuví. Soco ta chaa ca quivi cunaa ñáyivi. ⁷ Vatyí ñáyivi noo ñuu cahnú, cucañi tahan ñu chihin ñáyivi inga ñuu cahnú. Ta cucoo cuatyí noo ñuu chihin inga ñuu. Ta cucoo soco, ta cucoo cuehe, ta cha taan nahnu cuaha ri ityi. ⁸ Tandihí ihya ta nu cua quichaha ñáyivi nyehe ñu tindoho cuví.

⁹ Tyicuan ta cucuhva cuenda ñu chi nyoho vatyí sanyehe ra tindoho chí ndo. Ta cacahñi ra chí ndo. Ta tandihí ñu iyó siqui ñuhu ñáyiví cutasi cuñi nyehe ñu chí ndo cha cuenda yuhu. ¹⁰ Quívi cuan cuaha xaan ñu cusandihí ñu cha chino iñi ñu chí, ta cutasi cuñi ñu nyehe ñu chí tahan ñu. Ta cunaxico tuhun ñu chí tahan ñu. ¹¹ Cuaha xaan ra cuendu cunatuvi, ta cucatyí ra vatyí cuenda Nyoo cacahan ra. Ta cuaha xaan ñáyiví cucasandaví ñaha ra. ¹² Ta cuaha xaan cha quiñi caa cucoo. Yucuan chaha cuaha xaan ñu cusandihí ñu cha cuñi ñu chí tahan ñu. ¹³ Soco ñu cha ña ndu uvi iñi chino iñi chí nyacua nya nu ndihí, cucacu añima ñu. ¹⁴ Ta cucutyá nicahnu ñáyiví tuhun vaha cha nyacá ñaha Nyoo añima ndo, tacuhva coto tandihí ñáyiví iyó siqui ñuhu ñáyiví, tyicuan ta cunaa ñáyiví.

¹⁵ Tandihí nyoho cha sacuahá ndo ihya, na cutuñi iñi ndo tuhun ihya: Ra Daniel, ra profeta Nyoo ta cha naha, tyaqá ra tuhun noo cha sacuquiñi caa, noo cha sativí. Ta quívi nyehe ndo vatyí chaa ihya Nu Ií, ¹⁶ tyicuan ta ñu ñohó Judea, cuñi chí cono ñu ityí yucu. ¹⁷ Ta ñu yosó xiñi vehe, noo ñu, soco ma quihví ñu chívehe ñu tava ñu cha iyó chívehe cuan. ¹⁸ Ta ñu ñohó nu chíqui, ni ma cunuhu ca ñu cunaquehen ñu ni sahna ñu. ¹⁹ ¡Ndahví ñusihi cha cañohó sehe quívi cuan! O tatu iyó sehe ñu cha chaxín, ¡ndahví ñu cuan! ²⁰ Caçan ndo chí Nyoo tacuhva cha ma tahan chí caca cono ndo quívi vichin, ni quívi nyitatu yo. ²¹ Vatyí cuaha xaan tindoho cucoo quívi cuan, noo tindoho cha ta coo ca maa nyata ching ñuhu ñáyiví, ta ni ma coo ca cha yaha tuhun cuan. ²² Soco tatu Nyoo, ta ma sanducuiti ra quívi cuan, yori maa cacu. Soco cusanducuiti ra cha cuenda cha cuñi ra chí ñu nacachí maa ra.

²³ Ta tatu yóo cha catyí chí nyoho: “Nyehe ndo, ma ra Cristo ihya” o “Nyehe ndo ma ra nyaá yucuan”, ma chino iñi ndo. ²⁴ Vatyí cuquichi coyo ra casandaví ñaha ta cucatyí ra vatyí ra Cristo cacuví ra. Ta cucatyí ra vatyí ra profeta Nyoo cacuví ra. Ta cusavaha ra seña ta milagru nahnu tacuhva casandaví ñaha ra. Nyacua nya ñu cha nacachí maa Nyoo ta cusandaví ñaha ra tatu cuví chí ra. ²⁵ Saha ndo cuenda vatyí cha yaha catyí chí nyoho cha ni cumañi ca cuví. ²⁶ Yucuan chaha tatu catyí ñu chí ndo tyehe caa: “Nyehe ndo, ma ra Cristo nyaá nu chíqui ndí cuan”, catyí ñu chí ndo, ma cuhun ndo. O tatu catyí ñu chí ndo: “Nyehe ndo, ma ra nyaá chíqui cuarta ihya”, ma chino iñi ndo. ²⁷ Vatyí tari noo cha quihví tacha cha nyehé yo cuxiño nya nu caña ñanyii ta nya nu quee ñanyii, tyicuan caa cucuví quívi quichi yuhu Rayíi cha quichi nya gloria. ²⁸ Nu caá coño chíhí, yucuan

cuchaa coyo chíi.

Yoso caa cuquichi ra Cristo inga chaha (Mr. 13.24-37; Lc. 21.25-33; 17.26-30, 34-36)

²⁹ Ta cha yahá ri cha nyehé ñu tindoho, ta cunduñaa ñanyii, ta yoo ma sacundichin ca chí. Ta tiño cuacanaco yo tí andiví, ta nyacua nya cha iyó andiví cunacanda. ³⁰ Tyicuan ta cuquetuvi noo seña ityí andiví nu vachí yuhu Rayíi cha quichí nya gloria. Cuquichi nu vico ityí andiví chíhin tunyee iñi cahnu ta chíhin cha cahnu cuví Nyoo. Ta tandihí ñáyiví iyó siqui ñuhu ñáyiví, cucuacu chaa xaan ñu cha nanyehe ñu chí. ³¹ Ta cutachí ángel cuende tacuhva vatyí chíhin cha ñihí tiví ra cutu ra ta cusandu iñi ri ra chí ñu nacachí maa Nyoo chí, cuquita ñu nicacahnu nu ñuhu ñáyiví, nyacua nya nu ndihí ñuhu ñáyiví ta nyacua nya nu ndihí andiví.

³² Çutuñi iñi ndo noo cuhva yutun cha nañi hígo: Tatu cha yutya soco tun, ta caña ndaha tun, nyoho cha chító ndo vatyí cha vachí vico savi. ³³ Ta suri tyicuan caa, tatu cha nyehé ndo tandihí maa cha cucuví ihya, coyo ndo vatyí cha cuyatín quichi. Cha nyañai yuvehe cuví chí cuan. ³⁴ Cha ndicha catyí chí ndo vatyí tandihí tuhun ihya, cucuví cha ni ri ca cha iyó ñáyiví. ³⁵ Andiví ta ñuhu ñáyiví cundihí chí, soco tuhun cahán yuhu, ma ndihí chí. Ta cuchia cava tandihí tuhun cahin chíhin ndo ihya.

³⁶ Soco quívi ta cuhva cha cucuví cuan, yori chító, ni ángel andiví ta ña chító ra. Ni yuhu Rayíi cha quichí nya gloria ta ña chíté. Noo tuhun ri maa Nyoo Suti chító ra.

³⁷ Tari cuví quívi chíyo ra Noé, tyicuan caa cucuví quívi quichi tucu yuhu Rayíi cha quichi nya gloria. ³⁸ Quívi ta ni cumañi ca coon savi xaan, ñáyiví cuan, chachí ñu, ta chíhí ñu, tandahá ñu, ta chahá ñu chí sehe ñu tandaha nyacua nya quívi quihví ra Noé chíhí barcu cuan. ³⁹ Ta sana iñi ñu ta chaqá savi ta tyañi tandihí ñu. Ta tyicuan caa cucuví tucu quívi quichi tucu yuhu Rayíi cha quichí nya gloria. ⁴⁰ Quívi cuan, tu uvi ra ñohó ra nu chíqui. Noo ra cunaquehin, ta noo ra ndoo ra. ⁴¹ Tu uvi ñusihi nyicó ñu molinu. Noo ña cunaquehin, ta noo ña ndoo ña. ⁴² Cuatu tuhva vaha ndo vatyí ña chító ndo ñáa cuhva cuquichi ra nyacá ñaha chí ndo. ⁴³ Soco coyo ndo tuhun ihya vatyí tatu noo chitoho vehe ta chító ra ñáa cuhva cuquihví ra suhu chívehe ra, cutatu tuhva vaha ra ta ma cuhva ra cha quihví ra suhu cuan. ⁴⁴ Yucuan chaha nyoho, cuatu tuhva ndo. Vatyí sana ri iñi ndo, ta cuquichi yuhu Rayíi cha quichi nya gloria.

Ñu cha nyatú tuhva na ndichí ra Cristo, ican ñu cuví musu vaha ra (Lc. 12.41-48)

⁴⁵ 'Noo musu cha tyasohó tuhun cahán chitoho, ta tyicuan ri sacuvi ra tyiño tyaa ra chi ra, yucuan cuví noo musu vaha. Ta sahá cuenda ra vehe chitoho ra. Ta chahá ra cha cachi inga musu cha vahri cuhva. ⁴⁶ Ta sii xaan cuví chi musu cuan tatu cuhva cha sahá tyiño ra ta nachaa chitoho ra. Vatyí quichahá ra tandihí cha tahán chi sacuvi ra. ⁴⁷ Ta cha ndicha catyí chi ndo, vatyí chitoho ra cunatyaa ra tandihí cha cumí ra ndaha ra, vatyí vaha quichahá ra chihin tyiño sahá ra. ⁴⁸ Soco tatu noo musu quiñi iyó ta chicá xiñi ra vatyí naha cuahan chitoho ra, ⁴⁹ ta quichaha nyacuvi ra cha ña vaha chihin inga musu cuan, ta quichaha chachi ra ta chihí ra ndixi chihin ra chiñi, ⁵⁰ tyicuan ta sana iñi ra ta ndichi chitoho ra quivi cha ña nyatú ra chi ra. ⁵¹ Tyicuan ta chitoho ra ñihi xaan cutachi tuñi ra chi ra chihin ñáyivi quiñi iyó cha savaha chii soco ña ndicha. Tyicuan ta cucuacu ra ta cusacahñi ra noho ra.

25

Nu chahá ra Jesús noo cuhva cuenda uchi tahan ñu tyivaa

¹ 'Cha nyacá ñaha Nyoo añima ñáyivi cuví chi tari uchi tahan ñu tyivaa cha quehen ñu lámpara cha yihí acetye ta cuahan coyo ñu noo vico tandaha cua quehen cuenda ñu chi ra cha cua tandaha. ² Ohon tahan ñu, tondo xaan ñohó iñi ñu, ta ohon tahan ñu cachi xaan ñohó iñi ñu. ³ Ñu cha tondo ñohó iñi cuan, canyisó ñu lámpara ñu soco ña quehen ñu suhva ca acetye vatyí natyihí ñu chichi lámpara ñu tatu ndihi. ⁴ Soco ñu cachi ñohó iñi cuan, canyisó siin ñu yutyí acetye chihin lámpara ñu. ⁵ Ta vatyí cucuee ca chaa ra cha cua tandaha cuan, catyín ñumahna chi tandihí ñu, ta caquixí ñu. ⁶ Tyicuan ta ñáá cuhva ñuu, ta chihí ñu noo ndusu cha catyí tyehe caa: "¡Cha vachi ra cha cua tandaha! ¡Qujta ndo, quehen cuenda ndo chi ra!" catyí ndusu cuan. ⁷ Tandihí ñu tyivaa cuan canducuitá coyo ñu ta quichaha casanduvaha ñu lámpara ñu. ⁸ Tyicuan ta quichaha catyí ohon ñu tondo ñohó iñi cuan chi inga ohon ñu cuan: "Cuhva ndo suhva acetye ndo chi ndi, vatyí cuñí ndahva lámpara ndi", catyí ñu. ⁹ Soco ñu tyivaa cha cachi ñohó iñi cuan nacahan ñu tyehe caa: "Ma cuhva ndi vatyí coto ma ñihi, ni cha cuenda maa ndi ta ni cha cuenda maa ndo. Cuahan taxi ndo nya nu quiyahví chi, ta sata ndo cha cuenda ndo." ¹⁰ Soco cha ni ri ca cha cuahan coyo ndi ohon ñu cha tondo ñohó iñi cuan, cua sata ñu acetye, ta chaq ra cha cua tandahá cuan. Ta ñu tyivaa cha nyatú tuhva cuan, quihví coyo ñu chihin ra chichi vehe nu cuacoo vico tandaha cuan. Ta nicunyasí ri yuvehe. ¹¹ Yahá cuan ta cachaq coyo tucu

ñu chisatá acetye cuan, ta catyí ñu: "¡Tata! ¡Tata! ¡Ñuñá yuvehe naquihví ndi!" ¹² Soco maa ra nacahan ra, ta catyí ra: "Cha ndicha vatyí ña ñohó nui chi nyoho."

¹³ Tyicuan ta quichaha catyí ra Jesús:

—Cuatu tuhva ri nyoho, vatyí ña chitó ndo nya quivi ta ñáá cuhva cuquichi yuhu Rayi cha quichi Nya gloria.

Noo cuhva cuenda xuhun (Lc. 19.11-27)

¹⁴ 'Cha nyacá ñaha Nyoo añima ñáyivi cuví chi tari noo ra cha cha nyaá cha cua quita cuhun inga ñuu. Ta caná ra chi musu ra, ta chahá cuenda ra xuhun chi ra.

¹⁵ 'Chi noo ra chahá ra ta cha ohon mil xuhun, ta chi inga ra chahá ra ta cha uvi mil, ta chi inga ra tari noo mil. Chahá ra chi noo noo ra yoso cuhva cha cuví saha tyiño ra chihin. Tyicuan ta cuahan ra. ¹⁶ Musu cha quehen cuenda ohon mil xuhun cuan, saha ra lucha chihin xuhun cuan, ta saha ganaa ra nonga ohon ca mil chihin xuhun cuan. ¹⁷ Ta suri tyicuan caa tucu ra cha quehen cuenda uvi mil cuan, saha ganaa ra uvi ca mil chihin xuhun cuan. ¹⁸ Soco ra cha quehen cuenda noo ri mil cuan, chahan ra ta chatyá ra noo yavi chichi ñuhú ta tixehe ra xuhun chitoho ra.

¹⁹ 'Cuaha quivi yahá ta nachaa chitoho musu cuan. Ta quichaha natava ra cuenda chihin noo noo ra. ²⁰ Xihna ca ra cha quehen cuenda ohon mil xuhun cuan chaq, ta nacuhvá cuenda ra ohon ca mil siqui cuan, ta catyí ra: "Tata, ohon mil chahún chii, ma inga ohon mil ihya cha saha ganai." ²¹ Ta chitoho ra catyí ra chi ra: "Vaha. Noo musu vaha xaan cuvún. Ta sacuvún tandihí cha catyí. Ta vasi chiin ri xuhun chahí chuun soco vaha xaan chotyíñon chi chi. Vityin cuaha ca cucuhva cuende chuun. Quihví nu vaha ihya, ta cusí cuñun chihin." ²² Yahá cuan ta chaq tucu musu cha quehen cuenda uvi mil xuhun cuan, ta catyí ra: "Tata, uvi mil chahún chii, ma uvi ca mil ihya cha saha ganai siqui." ²³ Ta catyí chitoho ra chi ra: "Vaha. Noo musu vaha xaan cuvún, ta sacuvún cha catyí. Vasi chiin ri xuhun chahí chuun soco vaha xaan chotyíñon chi chi. Vityin cuaha ca cucuhva cuende chuun. Quihví nu vaha ihya, ta cusí cuñun chihin", catyí ra. ²⁴ Soco cuhva cha chaq musu cha quehen cuenda noo mil ri xuhun cuan, catyí ra chi chitoho ra: "Tata, yuhu chité vatyí cuvún noo ra xaan ta cuñún naquehún xuhun noo nu ña sahá tyiñon, ta cuñun naquehun cosecha noo nu ña tachún.

²⁵ Yucuan chaha nayuhví ta chahún ta tyihí xehi xuhun chichi ñuhú. Soco ma xuhun ihya cha chahún chii", catyí ra. ²⁶ Tyicuan ta nacahan chitoho ra, ta catyí ra chi ra: "Musu quiñi iyó ta musu suchan cuví yoho.

Tatu chitón vatyí cuñí naquehín nu ña saha tyiñe, ta quehín cosecha noo nu ña tachí, ²⁷ ¿ñáá tuhun ña chityihun xuhin banco? Ta cha ndichi ta, cunaquehín xuhun cuan chihin xuhun siqui cha saha ganaa chí”, catyí ra. ²⁸ Tyicuan ta quichaha catyí ra chí ñu nyicú cuan: “Tĩnyaa ndo noo mil xuhun cha nyisó ra, ta cuhva ndo chí ra cha nyisó uchi mil. ²⁹ Vatyí ñu iyó chii, cuhva que chí ñu, ta coo cuaha chí ñu, nyacua ndoo ca. Soco ñu ñahri chii, nyacua nya cha chiiin cha cumi ñu, cutinyaa ndihí chí ñu. ³⁰ Ta musu cha ña chiñuhú ihya, tuchi ndo chí ra nu ñaa iñi ityí chata, ta yucuan cuacu chaa ra, ta cusacahñi ra noho ra chihin cha nyehe ra tindoho.”

Nu catyí ra Jesús vatyí cucutuñi chí tandihí ñáyivi

³¹ Quívi cuquichi yuhu Rayíi cha quichí nya gloria, cuquichi chihin cuaha ángel cuende, ta cucunyai tyayu tyaqui ta cunyaca ñahi. ³² Ñáyivi tandihí ri ñuu cundu in ri ñu nuí. Ta cusasiñ chí noo noo ñu, tari ra sahá cumi mbee tavá siñ ra chí mbee ta tava siñ ra ndixihyu. ³³ Ta cucuatyái chí mbee cuan chiyo vahi, ta chí ndixihyu cuan, chiyo satyín. ³⁴ Tyicuan ta yuhu cha cuví Rey cucatyí chí ñu nyicú chiyo vahi: “Ñaha nyoho vatyí nyoho ñáyivi cha nasocó Suti cuví ndo. Quehen cuenda ndo nu cuacunyaa ndo nu nyacá ñaha Nyoo, vatyí cha cuenda maa ndo chinó ihya nyata quívi savahá Nyoo ñuhu ñáyivi. ³⁵ Vatyí quívi chisoque, ta nyoho chahá ndo cha cachi. Quívi cu ityí ndutya ta chahá ndo cohi. Ta quívi chicá noi tari ra inga ñuu ta nyoho chahá ndo vehe coi. ³⁶ Quívi cumañi sahme, ta nyoho chahá ndo sahme. Quívi cuhví ta nyoho chahán ndo chinyehé ndo chii. Ta quívi ñohí vehe caa, ta quíchi nyehe ndo nu ñohí.” ³⁷ Ta ñu cha vaha cuan cundaca tuhun ñu chii, ta catyí ñu: “Sutu Mañi yuhu, ¿ama nyehe ndi chisocon, ta chahá ndi cha cachun? ¿Ama nyehe ndi ityun ndutya ta chahá ndi cohun? ³⁸ ¿Ama nyehe ndi chuun chicá noun tari ra inga ñuu ta chahá ndi vehe coun? ¿Ama cumañi sahmon, ta chahá ndi chuun? ³⁹ ¿Ama nyehe ndi cuhvún, o ñohún vehe caa, ta chahán ndi chinyehé ndi chuun?” cucatyí ñu. ⁴⁰ Ta yuhu cha cuví Rey cucatyí chí ñu: “Cha ndicha catyí chí ndo, vatyí tandihí tumañi iñi sacuví ndo chihin ra ndahvi, ra yañi ihya, chí yuhu sacuví ndo tumañi iñi cuan.” Tyicuan caa cucatyí yuhu chí ñu. ⁴¹ Tyicuan ta yuhu cha cuví Rey cucatyí tiqui chí ñu nyicú chiyo satyín tyehe caa: “Canyaha ndo nui, nyoho ñu tahán chí cuhún anyaya. Cuahan ndo nu ñuhú cha ma ndahva ca maa. Vatyí yucuan cuví nu ching cha cuenda cuihna ta cha cuenda tatyí ña vaha cuenda ra. ⁴² Vatyí chisoque, ta nyoho

ñá chahá ndo cha cachi. Cu ityí ndutya, ta ña chahá ndo ndutya cohi. ⁴³ Chicá noi tari chicá noo ra inga ñuu, ta ña chahá ndo nu coi. Cumañi sahme ta ña chahá ndo sahma cuihne. Cuhví ta ñohí vehe caa, soco ña chahán ndo chinyehé ndo chí nu ñohí”, cucatyí chí ñu. ⁴⁴ Tyicuan ta cucatyí ñu chí tyehe caa: “Sutu Mañi yuhu, ¿ama nyehe ndi chisocon, o ityun ndutya, o chicán noun tari ra inga ñuu, o ñahri sahmon, o cuhvún, o ñohún vehe caa, ta ña tyinyee ndi chuun?” cucatyí ñu. ⁴⁵ Ta yuhu cha cuví Rey cucatyí chí ñu tyehe caa: “Cha ndicha catyí chí ndo vatyí tandihí maa cha ña sacuví ndo chí ñáyivi ndahvi ihya, suri ña sacuví tucu ndo chí yuhu cuví cuan”, cucatyí yuhu chí ñu. ⁴⁶ Tyicuan ta ñu cuan cuhun coyo ñu nu cayú ñuhú cha ma ndahva ca maa. Ta ñáyivi vaha cuan cuhun ñu cucoo ñu noo ñáyivi cha ma naa ca maa.

26

Nu canducú ra cuhva yoso caa catiín ra chí ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva cha ndihí catyí ra Jesús tuhun ihya, ta quichahá catyí ra chí ra cachicá noo chihin ra tyehe caa:

²—Nyoho chitó ndo vatyí uvi ca quívi ta sanducahnu yo vico pascua. Ta yuhu Rayíi cha quichí nya gloria cucuhva cuenda ñu chívi vatyí tyaa ñu chívi nu cruzi —catyí ra.

³ Quívi cuan ra cacuví nuu chí tata sutu, ta ra casacuahá ley vehe ñuhu, ta ra cacuví mandoñi ñu Israel, candu in ri ra nuquehe vehe tyiño ra Caifás, ra cuví nuu chí tata sutu. ⁴ Yucuan casandaa ra tyiño yoso caa ta sandavi ñaha ra chí ra Jesús ta catiín ra chí ra ta cacahñi ra chí ra. ⁵ Soco cacatyí ra:

—Ma cahñi yo chí ra cha ni ri ca cha chichi vico, tacuhva cha ma naquiqui xaan ñáyivi —catyí ra.

Nu chosó noo ñaha sihi ndutya vixi chahan xiñi ra Jesús

(Mr. 14.3-9; Jn. 12.1-8)

⁶ Ra Jesús ñohó ra ñuu Betania, vehe ra Simón, cha catyí ñu Ra Tyahyu Coño chí, sívi saca ra cuví cuan. ⁷ Ta tuhva noo ñaha nu nyaá ra Jesús, nyisó ña noo yutyí tyitú yihí ndutya vixi chahan. Ta yahvi xaan nyaá ndutya cuan. Ta ra Jesús nyaá ra yuhu mesa ta choso ña ndutya cuan xiñi ra. ⁸ Cuhva cha cananyehé ra chicá noo chihin ra cacuxaan ra ta quichahá catyí ra:

—¿Ñáá tuhun cha satívi ña ndutya vixi chahan cuan? ⁹ Vaha ca tyehe ta xico ña, ta ñihi ña cuaha xuhun chihin ta tyinyee ña chí ñu ndahvi chihin xuhun cuan —catyí ra.

¹⁰ Tyicuan ta chíñi ra Jesús, ta catyí ra chí ra:

—¿Ñáá tuhun cha sayangá ndo chi ñaha ihya? Vatyí cha sacuví ña chihin, noo cha vaha cuví. ¹¹Vatyí ñu ndahvi tyicuan ri cun-
yaa ñu chihin ndo, soco yuhu, ñima tyicuan
ri cua cunyai chihin ndo. ¹²Choso ña ndutya
vixi chahan síqui coño ñuhi, vatyí sandu-
vaha ña cuenda cha cohin chichi ñuhú.
¹³Cha ndicha catyí chi ndo, vatyí tandihí
ri nu cahan ñu tuhun Nyoo nicahnu ñayiví,
cunacatyí tucu ñu cha sacuví ñaha ihya,
tacuhva nichohon iñi ñáyiví chi ña —catyí ra
Jesús.

*Nu naxico tuhun ra Judas Iscariote chi ra
Jesús*

(Mr. 14.10-11; Lc. 22.3-6)

¹⁴Tyicuan ta noo ra chicá noo chihin ra
Jesús, ra cha nañi Judas Iscariote, chahan
ra chichahan ra chihin ra cacuví nuu chi tata
sutu. ¹⁵Ta catyí ra chi ra:

—¿Yoso cuhva ndo chii tatu cuhva cuende
chi ra Jesús chi ndo?

Tyicuan ta ra cacuví nuu cuan cacatyí ra
vatyí oco uchi tahan xuhun cuichin. ¹⁶Ta
nya cuhva cuan ta quichaha nducu ra Judas
ñáá noo cuhva cuví nacuhva cuenda ra chi
ra Jesús chi ra cacuví nuu chi tata sutu cuan.

*Nu cuxiñi ra Jesús chihin ra cachicá noo
chihin ra*

(Mr. 14.12-25; Lc. 22.7-23; Jn. 13.21-30; 1
Co. 11.23-26)

¹⁷Quivi xihna ri cha quichaha vico ta
chachí ñu pan cha ñahri yuchan iya yihí
chihin, ra cachicá noo chihin ra Jesús tuhva
ra chi ra ta quichaha candaca tuhun ra chi
ra:

—¿Nya cuñun cha sanduvaha ndi cha
cuxiñun cuenda vico pascua ihya?

¹⁸Ta catyí ra Jesús chi ra:

—Cuahan ndo chichi ñuu ta cha ndo
vehe noo ra cuan. Ta catyí ndo chi ra:
“Ra Sacuaha catyí ra vatyí cha cuyatyn cua
cúvi ra, ta vehun cusanducahnu ndi vico
pascua”, catyí ndo chi ra —catyí ra Jesús.

¹⁹Tyicuan ta casacuví ra tari cuhva catyí
ra Jesús chi ra. Yaha cuan ta casanduvaha
ra cha cacuxiñi ra cha vico pascua cuan.

²⁰Cuhva cha cuaa, chicunyaá ra Jesús nu
mesa chihin ndi uchi uvi ra chicá noo chihin
ra. ²¹Ta cha ní ri ca cha cachachí ra, catyí ra
Jesús chi ra:

—Cha ndicha catyí chi ndo vatyí noo ny-
oho cucuhva cuenda ndo chii chi ra xaan iñi
chii.

²²Ta canducuihya xaan iñi ra, ta
quichaha candaca tuhun ñn ñn ra chi ra
ta cacatyí ra:

—Sutu Mañi yuhu, ¿atu yuhu cuví?

²³Ta nacahan ra Jesús ta catyí ra:

—Ra cha chachí ñn ri coho chihin, ican
ra cuan cua na cuhva cuenda chii. ²⁴Yuhu
Rayi cha quichí nya gloria, cuahin ityi cha

catyí nu tutu tuhun Nyoo. Soco ndahvi ra
ndahvi cha cunacuhva cuenda chii. Quitá
vihi ca cuenda chi ra, tyehe ta ña cacu taxin
ra —catyí ra Jesús.

²⁵Tyicuan ta nacahan ra Judas, ra cha cua
cuhva cuenda chi ra, ta catyí ra:

—Maestro, ¿atu yuhu cuví?

Ta nacahan ra Jesús, ta catyí ra:

—Ican yoho cuvún.

²⁶Cha ní ri ca cha cachachí ra, ra Jesús
quehen ra pan ta nacuhva ra tyahvi nyoo
chi Nyoo, ta cha yaha tahvi sava ra, ta chaha
ra chi ra cachicá noo chihin ra, ta catyí ra:

—Cachi ndo. Ican ihya cuví coñe.

²⁷Yaha cuan ta quehen tucu ra copa, ta
nacuhva ra tyahvi nyoo chi Nyoo, ta sayaha
ra chi tandihí ra ta catyí ra:

—Coho tandihí ndo ihya. ²⁸Vatyí ican
ihya cuví ñiñi. Ta chihin ñiñi natyihí tahan
Nyoo tuhun chaa chihin ndo, vatyí cucatí
ñiñi cha catyí cha vaha chi cuaha ñu, vatyí
chihin ñiñi coo ticahnu iñi cuatyí ñu. ²⁹Soco
catyí chi ndo, vatyí ma coho que tahan vinu
tichaha ndivi ihya, nyacua nya cha cohi
vinu chaa chihin ndo nya nu nyacá ñaha Suti
andivi —catyí ra.

*Nu catyí ra Jesús vatyí cucatyí ra Pedro
vatyí ña ñohó nuu ra chi ra*

(Mr. 14.26-31; Lc. 22.31-34; Jn. 13.36-38)

³⁰Cha yaha cha cachitá ra yaa chi Nyoo,
ta cuahan coyo ra yucu yutun Olivo cuan.
³¹Tyicuan ta quichaha catyí ra Jesús chi ra:

—Tandihí nyoho ta cucaca uvi iñi ndo cha
nyicón ndo chii vityin cha cuaa. Vatyí nu
tutu Nyoo catyí chi tyehe caa: “Cucahñi chi
ra sahá cumi mbee, ta mbee cuquiti cuatyí
ti”, catyí chi. ³²Soco cha yaha nandote,
xihna que cuhin Galilea, ican saha nyoho.

³³Tyicuan ta nacahan ra Pedro ta catyí ra:

—Vasí tandihí ra ndu uvi iñi ra cha nyicón
ra chuun, soco yuhu ma ndu uvi iñi.

³⁴Tyicuan ta quichaha catyí ra Jesús chi
ra:

—Cha ndicha catyí chuun vatyí suri maa
cha cuaa ihya, cha ní cumañi ca cuacu loho,
yoho cucatyn uñi chaha vatyí ña ñohó
nuun chii —catyí ra.

³⁵Ta ra Pedro catyí ra:

—Vasí cúvi chuhun, soco ma catyí cha ña
ñohó nú chuun —catyí ra.

Ta suri tyicuan caa catyí tandihí ra chicá
noo chihin ra.

*Nu chicán tahvi ra Jesús chi Nyoo nu cuví
Getsemaní*

(Mr. 14.32-42; Lc. 22.39-46)

³⁶Tyicuan ta chaá ra Jesús chihin ra
cachicá noo chihin ra noo nu nañi Getse-
maní, ta catyí ra chi ra:

—Cunyicu ndo ihya, cha ní ri ca cha
cuahin yucuan, cua cacan tahvi.

³⁷ Ta quehen ra chi ra Pedro ta chi ni nduvi sehe ra Zebedeo, cuahan coyo chihin ra. Ta quichaha nducuihya cuñi ra, ta tyoño xaan cuñi ra. ³⁸ Tyicuan ta catyí ra chi ra:

—Cahnu xaan tucuihya iñi nyaá añime. Nyacua cuñi chi cahñi chi chii. Ndoño ndo ihya ri ta conyito ndo chihin —catyí ra.

³⁹ Tyicuan ta cuahan ra Jesús chihin ca ityi nuu ca ta chicutiñi chiti ra ta chacun ra nuu ra nu ñuhú, ta chican tahvi ra chi Nyoo ta catyí ra:

—Sutu Mañi yuhu, tu yoho ta cuñun, cuhva cha ma nyehi tindoho ihya. Soco ma cuvi tari cuhva cha cuñi mai, soco tari cuhva cuñi maun na cuvi —catyí ra.

⁴⁰ Tyicuan ta nachaa ra nu nyicú ra cachicá noo chihin ra, ta nyehe ra vatyí caquixí ra. Ta catyí ra chi ra Pedro tyehé caa:

—¿Atu ni minoo hora ña cuvi conyito ndo chihin? ⁴¹ Conyito ndo, ta cacun tahvi ndo tacuhva cha ma cuvi chasaha cuñna chi ndo. Cha ndicha vatyí añima ndo, cuñi xaan chi nanducu chi Nyoo, soco coño ñuhu ndo vita cuñi chi —catyí ra Jesús chi ra.

⁴² Nu cu uvi chaha chahan ra, ta chican tahvi ra tyehé caa:

—Sutu Mañi yuhu, tatu ma cuvi cha ma nyehi tindoho ihya, tu tyicuan caa, na cuvi maa cuhva cuñun —catyí ra.

⁴³ Tyicuan ta nachaa ra inga chaha ta caquixí tucu ra cachicá noo chihin ra, vatyí nicunyasi maa chiti nuu ra chihin cha cacuñi ra cusu ra. ⁴⁴ Tyicuan ta sandoq ra chi ra, ta cuahan ra cha cu uñi chaha cua cacun tahvi ra. Ta catyí ra suri maa tuhun cha yahá chahan ra cha chican tahvi ra chi Nyoo.

⁴⁵ Tyicuan ta nachaa ra nu canyicu ra cachicá noo chihin ra, ta catyí ra chi ra:

—Vityin ndicha, cusu ndo ta nyitatu ndo. Vatyí cha chaq cuhva cha cua nacuhva cuenda ra chii chi ra quiñi iyó, ta Rayi cha quichí nya gloria cuvi. ⁴⁶ Ndicuita ndo, ta cohó ndo. Vatyí cha vachi ra cha cunacuhva cuenda chii —catyí ra Jesús.

Nu catiñ ra xaan iñi chi ra Jesús cuahan ra vehe caa

(Mr. 14.43-50; Lc. 22.47-53; Jn. 18.2-11)

⁴⁷ Ni cahán ca ra Jesús tuhun ihya, ta chaq ra Judas, ta ra Judas cuvi noo ra chicá noo chihin ra Jesús. Ta cuaha ra vachi coyo chihin ra, canyisó ra mityi ta yutun. Ra cuvi nuu chi tata sutu, ta ra cacuví mandoñi ñu Israel, ican tachí chi ra. ⁴⁸ Ra Judas, ra cha chahá cuenda chi ra Jesús, cha yahá chahá ra noo seña chi ra cuan, tacuhva coto ra yóo chi tñin ra. Ta catyí ra:

—Ra cha cutyayuhi chi, ican ra cuan cuvi. Tñin ndo chi ra.

⁴⁹ Tyicuan ta tuhvá ra chi ra Jesús ta catyí ra:

—Nocumi chuun, Maestro.

Ta tyayuhú ra chi ra.

⁵⁰ Tyicuan ta nacahan ra Jesús ta catyí ra chi ra:

—Amigo, sacuvi ñáá tyiño vachun.

Tyicuan ta catuhvá ra ta catiñ ra chi ra Jesús.

⁵¹ Tyicuan ta noo ra ndihi chihin ra Jesús, tavá ra mityi ra ta chahnyá ra soho noo musu ra cuvi nuu chi tata sutu cuan. ⁵² Ta catyí ra Jesús chi ra:

—Natyihí mityun chichi vena. Vatyí tandihí ñu cacañi tahan chihin mityi, suri chihin mityi cúvi ñu. ⁵³ ¿Atu ña chitón vatyí tatu yuhu ta cuñi, cuvi caquen chi Suti, ta maa ra cutachi ra vityin vityin yaha ca uñi xico uchi mil ángel, ta sacacu ra chii? ⁵⁴ Soco tatu tyicuan caa, ¿yoso caa chino cava cuhva nyaá nu tutu Nyoo? Vatyí catyí chi tyi tahan maa chi cuvi chi yuhu tyehé caa —catyí ra.

⁵⁵ Ta catyí tucu ra Jesús chi ñáyivi:

—¿Atu vachi coyo nyoho vachi tñin ndo chii chihin cha xaan ta chihin yutun? Tari cha noo ra suhu cuvi yuhu sahá ndo. Ndiqivi chinyaj sañahi nu nyicú ndo chichi vehe ñuhu cahnu, soco ña tñin ndo chii cha cuhin vehe caa. ⁵⁶ Vatyí tandihí cha cuvi chii vityin, ta chicunyaq nu tutu Nyoo, cha catyaa ra profeta Nyoo ta cha naha.

Tyicuan ta ndii ra cachicá noo chihin ra, cachingo ra. Noo tuhun ca maa ra Jesús casandoq ra.

Nu cutuñi chi ra Jesús nuu ra cacuví tyiño cuenda ñu Israel

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ta ra cha catiñ chi ra Jesús cuan, chinyaca ra chi ra nuu ra Caifás, ra cuvi nuu chi tata sutu. Suri yucuan canyicú ñin ri ra sacuahe ley vehe ñuhu ta ra cacuví mandoñi. ⁵⁸ Soco ra Pedro cuahan ra chata ra, nya sava ri nya nuquehe vehe ra cuvi nuu chi tata sutu cuan. Ta quihvi ra ta ndoq ra nyaá ra chihin policía cuan, vatyí nyehe ra yoso caa quita tuhun cuan.

⁵⁹ Ra cacuví nuu chi tata sutu, ta ra cacuví mandoñi, ta tandihí ra cuvi tyiño, canducu ra noo cuatyí catyaa ra siqui ra Jesús, vasi ña ndicha, tacuhva vatyí chihin cuatyí cuan ta cuvi cahñi ra chi ra. ⁶⁰ Soco ña cañihí maa ra cuatyí ra, vasi cuaha ñáyivi chahan ñu chicutyí ñu cuendu siqui ra. Soco nu ndihi tuhun, chaq coyo uvi ca testigu cuendu.

⁶¹ Ta cacatyí ra:

—Ra ihya, catyí ra vatyí cuvi satani ra vehe ñuhu cahnu Nyoo, ta chichi cha uñi quivi cunacananyaa ra inga chaha, na —catyí ra.

⁶² Tyicuan ta ra cuví nuu chi tata sutu cuan, ndicuita ra, ta catyí ra chí ra Jesús:

—¿Atu ña nacahun nu cahan ra ihya?
¿Ñáá cha cuví cha cacatyí ra ihya sicun?

⁶³ Soco ra Jesús taxi ri nanyaá ra. Tyicuan ta quichaha catyí ra cuví nuu chi tata sutu cuan chí ra:

—Chihin sívi Nyoo nyitó, catyí chuun vatyi catyun cha ndicha vaha. ¿Atu ra Cristo Sehe Nyoo nyitó cuví chuun? —catyí ra.

⁶⁴ Ta catyí ra Jesús chí ra:

—Ican cuví, tari cuhva catyí maun. Ta suri catyí chí ndo, vatyi cunyehe ndo chí yuhu Rayí cha quichí nya gloria, cunyai chiyo vaha Nyoo ra iyó tandihí tunyee íñi chíi, ta cunyehe ndo nu quichi tiqui nu vico ityi andivi —catyí ra.

⁶⁵ Tyicuan ta ra cuví nuu chi tata sutu cuan chahnya ra sahma ra tari noo seña tyi cuñí maa ra tyi ña vaha cha cahan ra Jesús, ta catyí ra:

—Ra ihya chicoo cuatyí ra nuu Nyoo chihin tuhun cahan ra. ¡Nyehe ndo vityin! Ña niñi cha tava yo cha ndaa. Nyoho cha chiñi ndo tuhun ña vaha cahan ra. ⁶⁶ ¿Ñáá catyí ndo vityin?

Ta canacahan ra ta cacatyí ra:

—Iyó cuatyí ra, ta cuñí chí cha cúvi ra.

⁶⁷ Tyicuan ta catyicusí ra nuu ra ta cacañi ra chí ra. Inga ra cacatu ra nuu ra chihin chíqui ra. ⁶⁸ Ta cacatyí ra chí ra:

—Yoho, cha sahún Cristo chuun. ¡Nacoto yóo cha cañi chuun!

Nu catyí ra Pedro vatyi ña ñohó nuu ra chí ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Cha niri ca cha nyaá ca ra Pedro nuquehe ityi chata cuan, ta noo ñaha cha cuví musu tata sutu cuan, tuhva ña nu nyaá ra ta catyí ña chí ra:

—Yoho tucu chicá noun chihin ra Jesús, ra Galilea cuan.

⁷⁰ Ta ra Pedro catyí ra vatyi ña ñohó nuu ra chí ra nuu tandihí ñu nyicú cuan, ta catyí ra:

—Ña chité ñáá tuhun cahun.

⁷¹ Tyicuan ta cuahan ra Pedro ityi yuvehe, ta nyehe inga ña chí ra, ta catyí ña chí ra nyicú cuan:

—Suri chicá noo tucu ra ihya chihin ra Jesús, ra ñuu Nazaret cuan —catyí ña.

⁷² Ta inga chaha tucu tixehe ra Pedro cha ñohó nuu ra chí ra ta catyí ra:

—Cha ndicha vaha tyi ña ñohó nui chí ra cuan.

⁷³ Suhva ri ca cuhva cuan, ta ra canyicú cuan catuhva ra nu nyaá ra Pedro ta cacatyí ra chí ra:

—Ra tahan ra cuan cuví chí yoho, ndicha. Vatyi quetuvi nyacua nya cuhva cahun.

⁷⁴ Tyicuan ta iyo xaan tyanaha ra ta catyí ra:

—Chitó vaha Nyoo tyi ña ñohó nui chí ra cuan, ta nacahñi Nyoo chíi tatu ña ndicha cha cahn —catyí ra.

Ta suri cuhva cuan nacua cuu cha noo loho. ⁷⁵ Tyicuan ta nichon ñi ra Pedro tuhun cha catyí ra Jesús chí ra: “Cha ni cumañi ca cuacu loho, yoho cha yaha catyun uñi chaha vatyi ña ñohó nuun chíi.” Tyicuan ta quita ra Pedro yucuan, ta chacu vavaha ra cha cuihya ñi ra cha sacuvi ra tyicuan caa.

27

Nu cachahá cuenda ra chí ra Jesús chí ra Pilato

(Mr. 15.1; Lc. 23.1-2; Jn. 18.28-32)

¹ Cuhva cha cundichin, tandihí ra cacuví nuu chí tata sutu ta ra cacuví mandoñi ñuu cuan, catyihí tahan ra tuhun vatyi cacahñi ra chí ra Jesús. ² Ta nuñi ra. Ta cahan coyo ra chicuhva cuenda ra chí ra chí ra Poncio Pilato, ra cuví gobiernu cuenda ñuu Roma cha nyacá ñaha ñuu Israel cuan.

Nu chihí ra Judas

³ Cha nyehe ra Judas, ra cha naxico tuhun chí ra Jesús, vatyi cuacúvi ra, ta ndu uví ñi ra cha sacuvi ra, ta nacuhva ra ndi oco uchi xuhun cuichin cuan chí ra cacuví nuu chí tata sutu cuan, ta chí ra cacuví mandoñi ñuu cuan. ⁴ Ta catyí ra:

—Chicoo cuatyí yuhu, vatyi chaha cuende chí noo ra ñahri cuatyí na cúvi ra.

Soco maa ra canacahan ra ta cacatyí ra:

—Ta yucuan ¿ñáá cuenda nyuhu? ¡Nyehe maa yoho!

⁵ Tyicuan ta tuchí ra Judas xuhun cuan chichi vehe ñuhu cahn, ta cahan ra ta chicuhñi ra yoho sucun ra ta suri maa ra chitacaq ra chí ra. Ta chíhí ra.

⁶ Ra cacuví nuu chí tata sutu cuan canaquehen ra xuhun cuan ta cacatyí ra:

—Ma cuví tyihí yo xuhun ihya chichi caya ofrenda vatyi yahvi cha chahñi ñu noo ñáyivi cuví.

⁷ Tyicuan ta catyihí tahan ra tuhun, ta chihin xuhun cuan casata ra noo ñuhú cha nañi Ñuhú Ra Savahá Quisi. Vatyi coo nu cuchi ra chí ñu inga ñuu tu chíhí ñu. ⁸ Yucuan chaha nañi ñuhú cuan nyacua nya vityin Ñuhú Sata Ñu Chihin Xuhun Yahvi Cha Chihí Náyivi. ⁹ Ta tyicuan caa chingo cava cha tyaa ra Jeremías profeta Nyoo ta cha naha. Catyí chí tyehé caa: “Quehen ra ndi oco uchi xuhun cuichin, yahvi cha tyaa ñu Israel chí ra. ¹⁰ Ta chihin cuan, casata ra Ñuhú Ra Savahá Quisi, tari cuhva catyí Sutu Mañi yo chíi”, catyí chí.

Nu nyehę ra Pilato vatyi ñahri maa cuatyí ra Jesús

(Mr. 15.2-5; Lc. 23.3-5; Jn. 18.33-38)

¹¹ Cachinyacá ra chi ra Jesús nuu gobiernu, ta ra cuan ndacá tuhun ra chi ra, ta catyí ra:

—¿Atu ican yoho cuví rey cuenda ñu Israel?

Ta ra Jesús catyí ra chi ra:

—Ican, yuhu cuví. Ndicha cha cahún.

¹² Ta cuhva cha catyaa ra cacuví nuu chi tata sutu cuan ta mandoñi cuatyí siqui ra, ra Jesús ña nacahan maa ra. ¹³ Tyicuan ta quichahá catyí ra Pilato chi ra:

—¿Atu ña chiñun tandihi cha cacahán ra sicun?

¹⁴ Soco ra Jesús ña nacahan ra. Ta nyacua iyó cuñi gobiernu cuan vatyi ña nacahan ra. Ta ña chitó ra ñáá cunyacuví ra.

Nu cutuñi chi ra Jesús ta cacatyí ñu vatyi cucúvi ra

(Mr. 15.6-20; Lc. 23.13-25; Jn. 18.38—19.16)

¹⁵ Soco cha vico pascua cuan, iyó noo tuhun chi ñu vatyi tuhva ra gobiernu saña ra noo ra ñohó vehe caa, nya ra cachi maa ñáyivi. ¹⁶ Ta quivi cuan ñohó noo ra cha nañi Barrabás vehe caa. Ta chitó tandihi ñáyivi tuhun ra. ¹⁷ Ta cuhva cha canyicú ñn ri ñu, ra Pilato ndacá tuhun ra chi ñu, ta catyí ra:

—¿Yóó chi cuñi nyoho cha sañe? ¿Atu chi ra Barrabás o chi ra Jesús, ra nañi Cristo? —catyí ra.

¹⁸ Vatyi chitó ra vatyi cha cuenda cha tasi cuñi nyehę ñu chi ra Jesús, yucuan cuenda chahá cuenda ñu chi ra.

¹⁹ Cha ni ri ca cha nyaá ra Pilato nu tyayu ra, nu cuví ra tyiño, tachí ñasihí ra noo tyiño chi ra ta catyí ña: “Ma tyihun chuun chihin ra vaha chiña. Vatyi cuñi tahin noo ñumahna cha cuenda ra. Ta quiñi xaan tahin chihin”, catyí ña.

²⁰ Soco ra cacuví nuu chi sutu ta mandoñi ñuu cuan, cacuñihí ra catyiyuhu ra chi ñáyivi na cacan ñu cha saña ra Pilato chi ra Barrabás, ta na cuví ra Jesús. ²¹ Ta gobiernu cuan cahán ra chihin ñu inga chaha, ta catyí ra:

—Chichi cha ninduvi ra, ¿nya ra cuñi ndo cha sañe?

Ta maa ñu nacahan ñu, ta catyí ñu:

—Chi ra Barrabás.

²² Ta ra Pilato ndacá tuhun ra chi ñu, ta catyí ra:

—¿Ta ñáá cha cusacuví chihin ra Jesús cha nañi Cristo ihya?

Tandihí ñu nacahan ñu ta catyí ñu:

—¡Na cuví ra nu cruzi!

²³ Tyicuan ta quichahá catyí ra Pilato chi ñu:

—Soco ¿ñáá cha ña vaha sacuví ra?

Soco maa ñu nacana chaa tucu ñu inga chaha ta catyí ñu:

—¡Cahñi chi ra nu cruzi!

²⁴ Cuhva cha nyehę ra Pilato vatyi ñahri maa cha cuví sacuví ra, vatyi quiñi xaan cacuví ñu, chican ra ndutya, ta nacatya ra ndaha ra chihin nuu ñáyivi cuan, ta catyí ra:

—Yuhu ñahri cuatyí cha cua cuví ra ñahri cuatyí ihya. Na ndoo siqui maa ndo.

²⁵ Ta tandihí ñáyivi canacahan ñu, ta catyí ñu:

—Na ndoo chi siqui maa ndi ta siqui sehe ndi.

²⁶ Tyicuan ta ra Pilato saña ra chi ra Barrabás, ta tachí ra na ndoho ra Jesús, ta nacuhva cuenda ra chi ra na cuví ra nu cruzi.

²⁷ Tyicuan ta sindaro cuenda gobiernu cuan chinyaca ra chi ra Jesús nya vehe tyiño, ta casandu ñn ri ra chi tandihí sindaro cuan nicachico. ²⁸ Tyicuan ta catava ra sahma ra ta casacuihno ra noo sahma cuaha chí ra. ²⁹ Ta catyihí ra noo corona cha chinq chihin iñu xiñi ra. Ta chahá ra noo yutun na quindaha ra chihin chiyo vaha ra. Tyicuan ta cachicuiñi chíti ra nuu ra, ta cachacu nyaa ra chi ra ta catyí ra:

—¡Nocumi chuun, yoho Rey cuenda ñu Israel!

³⁰ Ta catyicu sii ra chi ra ñandihí. Ta quehen ra yutun cuan ta cañi ra xiñi ra.

³¹ Cha yahá cha cachacu nyaa ra chi ra ta catava ra sahma cuaha cuan chi ra ta sandihvi noo tucu ra sahma maa ra chi ra. Tyicuan ta quehen ra chi ra cua cahñi ra chi ra nu cruzi.

Nu catyaa ra chi ra Jesús nu cruzi

(Mr. 15.21-32; Lc. 23.26-43; Jn. 19.17-27)

³² Cuhva cha caquita coyo ra yucuan, catahan ra chi noo ra ñuu Cirene, nañi ra Simón. Ta casaniñi ra chi ra na cuiso ra cruzi ra Jesús.

³³ Ta cacaha coyo ra noo nu nañi Gólgota, ta cuñi chi catyí Nu Cuví Yiqui Xiñi Ndiyí.

³⁴ Ta yucuan cachahá ra vinu nasacá chihin cava uva coho ra Jesús. Soco cha yahá cha chihí ra chiin, ña cuñi ca ra coho. ³⁵ Ta cha yahá cha catyaa ra chi ra nu cruzi, tyicuan ta sindaro cuan caquehen ra sahma ra ta chahan ra noo sihva chihin. Ta nya ra saha ganaa, ñihí ra sahma cuan. Ta tyicuan caa chinq cava tuhun cha tyaa noo profeta Nyoo ta cha naha nu catyí chi tyehe caa: “Casachá ra sahme chihin cha chahan ra sihva”, catyí chí. ³⁶ Tyicuan ta cachicunyiçu ra yucuan vatyi saha cuenda ra chi ra. ³⁷ Ta ityi xiñi ra catyaa ra noo letra cha catyí ñáá tuhun cua cahñi ra chi ra. Ta catyí chí tyehe caa: “Ican ra ihya cuví ra Jesús, rey cuenda ñu ñuu Israel.”

³⁸ Tacoyó tucu uvi ra suhu chihin ra nu uvi ca cruzi cuan. Noo ra chiyo vaha ra, ta inga ra chiyo satyin ra. ³⁹ Ta ñu yahá coyo cuan, cacahán ñu chi ra, ta quisí xiñi ñu, ⁴⁰ ta catyí ñu chi ra:

—¡Yoho cha catyun tyi cusanduvon vehe ñuhu cahnu, ta chichi cha uñi quivi ta nacananyaa tucun! ¡Sacacu chuun vityin! ¡Tatu Sehe Nyoo cuví chuun, ngo nu cruzi chiña! —catyí ñu chi ra.

⁴¹ Ta suri tyicuan caa cachacú nyaa tucu ra cacuví nuu chi tata sutu chi ra, ta ra sacuahá ley vehe ñuhu, ta mandofiñu ñuu ñandihí. Ta cacatyí ra chí tahan ra tyehe caa:

⁴² —Sacacú ra chí inga ñu, soco ña cuví sacacu ra chí maa ra. Tatu Rey cuenda ñu Israel cuví ra, na noo ra nu cruzi cuan, tacuhva chino iñi yo chí ra. ⁴³ Itá iñi ra chí Nyoo, vityin na sacacu Nyoo chí ra, tatu ndicha cuñí ra chí ra. Vatyí catyí ra chí yo vatyí Sehe Nyoo cuví chí ra.

⁴⁴ Ta nyacua nya ra suhu cha tacaá nu cruzi xiin ra ta cacahan ra chí ra ñandihí.

Nu chihí ra Jesús

(Mr. 15.33-41; Lc. 23.44-49; Jn. 19.28-30)

⁴⁵ Tyicuan ta tandihí siqui ñuhu ñayivi nduñaa iñi, nyacua nya ora ta nyacua nya ca uñi cha cha iñi. ⁴⁶ Ta suri cuhva cuan, cana chaa ra Jesús chihin cha chaa ndusu ra. Ta catyí ra tyehe caa:

—Elí, Elí, ¿lama sabactani? —ta cuñí chí catyí: Nyoo Suti, Nyoo Suti, ¿ñáá tuhun cha sandó ñihnon noo tuhun mai?

⁴⁷ Suhva ra canyicú cuan, cachiñi ra cha cahán ra, ta cacatyí ra:

—Chí ra Elías, ra profeta Nyoo ta cha naha, ican cana chaa ra.

⁴⁸ Ta caa cuhva ri cuan, cuahan vavaha noo ra cua quehen ra noo xixan, ta satyí ra chihin vinu iya, ta tyaá ra noo nu yutun, ta satuhva ra yuhu ra Jesús tacuhva na coho ra. ⁴⁹ Soco inga ra cacatyí ra:

—Saña chí ra. Na nyehe yo tatu quichi sacacu ra Elías chí ra.

⁵⁰ Inga tucu chaha cana chaa ñihi ra Jesús, tyicuan ta chihí ra. ⁵¹ Ta caa cuhva ri cuan ndatá sava sahna cha tacaá chichi vehe ñuhu cahnu cuan, nyacua nya siqui ta nyacua nya yuvi ndatá. Ta taan. Ta ndatá yuu. ⁵² Ta nuñá yuhu ñaña. Ta nyacua canandoto cuaha ñu chinó iñi chí Nyoo, ñu cachiñi. ⁵³ Ta cha yaha nandoto ra Jesús caquitá coyo ñu nu ñaña ta quihvi coyo ñu chichi ñuu Jerusalén, ta cuaha ñayivi nyehe chí ñu. ⁵⁴ Tyicuan ta capitán ta sindaro cha casahá cumi chí ra Jesús, cayuhvi xaan ra cuhva cha taan. Ta cha canyehé ra inga ca cha cuví, ta cacatyí ra:

—Ndicha ndicha cuii, vatyí Sehe Nyoo cuví chí ra ihya.

⁵⁵ Cuaha ñusihí cha chinyicon chí ra Jesús nya Galilea ta tyinyee ñu chí ra, nyicú ñu canyehé ñu nya sava ri yucuan. ⁵⁶ Ta ican suhva ñu ihya cuví cu María ñaha Magdala, ta cu María sihi ra Jacobo ta ra José, ta sihi sehe ra Zebedeo.

Nu cua cuchí ra chí ra Jesús

(Mr. 15.42-47; Lc. 23.50-56; Jn. 19.38-42)

⁵⁷ Cuhva cha cua cuaa, quichi noo ra tyayii cha nañí José. Ra ñuu Arimatea. Ta suri chinó iñi ra chí ra Jesús. ⁵⁸ Ta chahan ra chinyehé ra nu nyaá ra Pilato, ta chican ra coño ñuhu ra Jesús. Tyicuan ta tyihí ra Pilato tyiño na cuhva ra coño ñuhu ra chí ra. ⁵⁹ Tyicuan ta quehen ra José coño ñuhu ra, tyihí ra chichi noo sinduhu ndii. ⁶⁰ Ta tyihí ra chí ra chichi noo ñaña nicaa chaa cha cuví noo yavi yuu cha tyihí ra tyiño cachatya ra. Ta cha yaha chaa nacasi ra yuhu ñaña cuan chihin noo yuu cahnu, ta cuahan ra. ⁶¹ Soco cu María ñaha Magdala, ta inga cu María, ndoo ñu nyicú ñu yuhu ñaña cuan.

Nu casahá cumi sindaro ñaña ra Jesús

⁶² Ta cha inga quivi, quivi nyitatu ñu cuví, ta ra cacuví nuu chí tata sutu, ta ra fariseo chahan coyo ra chinyehé ra nu nyaá ra Pilato. ⁶³ Ta catyí ra chí ra:

—Tata, nichón iñi ndi vatyí ra cuendu cuan, catyí ra ta nyitó ca ra vatyí cha yaha cha uñi quivi cunandoto ra. ⁶⁴ Yucuan chaha tyihí tyiño na casaha cumi vaha ra ñaña cuan, nya yaha cha uñi quivi, coto quichi coyo ra cachica noo chihin ra cha cha cuaa, ta casuhu ra coño ñuhu ra. Yaha cuan ta cucatyí ra chí ñayivi vatyí cha nandoto ra. Ta cha tyicuan caa nu ndihí tuhun ihya, yaha ca cuhva cucuví —catyí ra.

⁶⁵ Ta ra Pilato catyí ra chí ra:

—Ma suhva sindaro chiña. Cuahan ndo, ta saha cumi vaha ndo ñaña cuan, yoso cuhva cha vaha cuví saha cumi ndo —catyí ra.

⁶⁶ Tyicuan ta cuahan coyo ra, ta casaha cumi vaha ra ñaña cuan, ta cattyaa ra noo sellu chata yuu cha chasí cuan. Ta casando ra chí sindaro sahá cumi yucuan.

28

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

¹ Cha yaha quivi cha nyitatu ñu, cuhva cha vachi cundichin, nu quichaha vitya cuví. Ta cu María ñaha Magdala cuan, ta inga cu María chahan coyo ñu nu ñaña. ² Ta quichi minoo cha taan vatyí quichí ángel Sutu Mañi yo noo ra nya ityi andivi, ta chaá ra nu ñaña cuan. Ta sacanyaha ra yuu cha nyasi yuhu cuan, ta chicunya ra siqui. ³ Ta xiño vavaha ra, tari cha quihvi tacha. Ta sahna ra cuichin vavaha. ⁴ Cuhva cha cananyehé

sindaro cuan chi ra, canayuhví vavaha ra nyacua nihí ra, ta nyacua coñaa ra chíhin cha yuhví ra. ⁵ Tyicuan ta quichaha catyi ángel cuan chí ñushi cuan:

—Ma yuhví ndo. Yuhu chité vatyi chi ra Jesús cha chíhí nu cruzi nanducó ndo. ⁶ Yori ca ra ñohó ihya, vatyi cha nandotó ra, tari catyi ra. Ñaha ndo ta nyehe ndo nu catuvi ra. ⁷ Ta cuhun ndo numi ri, ta catyi ndo chi ra cachicá noo chíhin ra vatyi cha nandotó ra, ta cha cuahan ra Galilea, nyatú ra chi ra yucuan. Ican ihya cuví cha nyaa catyi chi ndo —catyi ángel cuan chí ñu.

⁸ Tyicuan ta numi ri quitá coyo ñu nu ñaña cuan. Suhva ri yuhví ñu, ta suhva ri sii vavaha cuñi ñu. Ta chinq vavaha ñu cua catyi ñu chí ra cachicá noo chíhin ra Jesús. ⁹ Ta cuhva cuan tuví ra Jesús nuu ñu ta chaha ra nocumi chí ñu. Tyicuan ta catuhva ñu chí ra ta chicuñi chíti ñu nuu ra ta casacahnu ñu chí ra, ta suri numi ñu chaha ra. ¹⁰ Ta catyi ra chí ñu:

—Ma yuhví ndo. Cuahan ndo cua sacoto ndo chí yañi vatyi na cuhun coyo ra Galilea, ta nyicuan cuñihi tahan ndi —catyi ra chí ñu.

Tuhun cha canacatyí sindaro

¹¹ Cha ni ri ca cha cuahan coyo ñu cuan, suhva sindaro cha casaha cumi yucuan, cuahan coyo ra nya ñuu, cua nacatyí ra cha cuví cuan chí ra cacuví nuu chí sutu. ¹² Tyicuan ta ra cacuví nuu cuan chahan coyo ra chicahan ra chíhin ra mandoñi ñuu vatyi catyihí tahan ra tuhun yoso caa casacuví ra. Tyicuan ta cuaha xuhun cachaha ra chí sindaro cuan. ¹³ Ta cacatyí ra chí ra:

—Nyoho, catyi ndo vatyi cha cha cuaa cha ni ri ca cha quixí ndo, chahan coyo ra cachicá noo chíhin ra Jesús ta chिकासuhu ra coño ñuhu ra. ¹⁴ Ta tatu chito gobiernu tuhun ihya, cua nyehe maa ndi yoso caa catyi ndi chí ra, ta nyoho ma caca iñi ndo. Ñahri cucuvi chí ndo.

¹⁵ Tyicuan ta caquehen sindaro cuan xuhun, ta cuahan coyo ra cua casacuví ra cha cacatyí ra chí ra. Ta nya vityin ta tyicuan caa catyi ñáyivi ñuu Israel.

Nu tyaq ra Jesús tyiño chí ra cachicá tyiño ra

(Mr. 16.14-18; Lc. 24.36-49; Jn. 20.19-23)

¹⁶ Ta tyicuan caa, ndi uchi iin ra cachicá noo chíhin ra, cuahan coyo ra nya Galilea nya yucu nu catyi maa ra Jesús chí ra vatyi cuhun coyo ra. ¹⁷ Ta cuhva cha cananyehe ra chí ra Jesús, casacahnú ra chí ra soco suhva ra chica uvi iñi ra. ¹⁸ Tyicuan ta tuhva ra Jesús chí ra ta catyi ra chí ra:

—Nyoo chaha ra cha cunyaca ñaha yuhu tandihí andivi ta siqui ñuhu ñayivi. ¹⁹ Yucuan chaha, cuahan ndo tandihí nu nyicú ñáyivi,

tandihí ri ñuu, ta catyi ndo chí ñu na nanyicon ñu chí. Ta sacondutya ndo chí ñu chíhin sivi Sutu yo Nyoo ta chíhin sivi yuhu Sehe Nyoo, ta chíhin sivi Tatyí Ii Nyoo. ²⁰ Ta sañaha ndo chí ñu na naquichaha ñu tandihí cha catyi yuhu tyi sacuvi ñu. Ta coto ndo vatyi yuhu cunyai chíhin ndo tandihí quivi nyacua nya naa ñayivi —catyi ra Jesucristo chí ra cachicá tyiño ra.

Tuhun Nyoo Cha Tyaa San Marcos

Nu sacondutyá ra Juan chi ñáyivi ta cahán ra tuhun Nyoo chihin ñu

(Mt. 3.1-12; Lc. 3.1-9, 15-17; Jn. 1.19-28)

¹ Tyehe caa quichaha tuhun vaha ra Jesusristo Sehe Nyoo. ² Ra Isaías profeta Nyoo tyaa ra tuhun ra Cristo ta tuhun ra Juan. Tyehe caa catyí Nyoo chi ra Cristo:

Cumañi ca cahun siqui ñuhu ñáyivi ta cutachi chi noo ra cusacoto chi ñáyivi vatyi nyaá cahun nu nyicú ñu, catyí Nyoo chi ra Cristo.

³ Chihí yo ndusu noo ra cha canachaá nu chiqui ndii,

ta catyí ra: “Tari sanduvahá ndo noo ityi, tyicuan caa sanduvaha ndo aña ndo vatyi cua quichi Sutu Mañi yo.

Nuña ndo noo ityi ndoo chi ra na quihvi ra aña ndo.”

Tyicuan caa tyaa ra profeta Isaías nu tutu Nyoo ta cha naha.

⁴ Ta tyicuan caa quichí ra Juan sacondutyá ra chi ñáyivi nu chiqui ndii cuan. Ta catyí ra chi ñu na ndu uvi ñi ñu cuatyí ñu, ta na condutyá ñu tari noo seña tyi nasama ñu cuhva iyó ñu, ta tyicuan caa ta Nyoo cusaha ra ticahnu ñi cuatyí ñu. ⁵ Ta tandihí ñáyivi ityi Judea quichí coyo ñu tyasoho ñu tuhun cahán ra, ta ñu ñuu Jerusalén ñandihí. Ta cha yaha nahma ñu cuatyí ñu, sacondutyá ra Juan chi ñu yuvi cahnu Jordán.

⁶ Ta sahma cha ñihno ra Juan cuan chihin ixi camellu chingo chi. Ta ñi cuví sinchu ra. Ta pinchi tuhvá ra chachí. Ta tyañuñu cuhu tuhvá ra chihí. ⁷ Ta cahán ra tuhun Nyoo ta catyí ra:

—Cha yaha yuhu ta vachi noo ra iyó xaan ca tunyee ñi chi ican saha yuhu. Ta ña nañé ni cha ndachi ñi xityin ndichan ra.

⁸ Yuhu sacondutyé chi ndo chihin ndutya. Soco maa ra cusacondutyá ra chi ndo chihin Tatyí li Nyoo —catyí ra Juan.

Nu condutyá ra Jesús

(Mt. 3.13-17; Lc. 3.21-22)

⁹ Quivi cuan quita ra Jesús ñuu Nazaret, cha nyaá ityi Galilea, ta cuahan ra nya yuvi cahnu Jordán. Ta yucuan sacondutyá ra Juan chi ra. ¹⁰ Ta cha yaha condutyá ra Jesús, ta cuhva cha cua quita ra chichi ndutya, ta nanyehé ra andivi cuahan nuña. Ta nyehé ra Tatyí li Nyoo tari noo paloma, vachi noó siqui ra. ¹¹ Ta tyacú noo ndusu ityi andivi ta catyí ndusu cuan tyehe caa:

—Yoho cuvún Sehi ta cuñi xain chuun. Ta sii xaan cuñi chuhun —catyí ndusu cuan.

Nu nducú nyehe ra ña vaha chi ra Jesús

(Mt. 4.1-11; Lc. 4.1-13)

¹² Yaha cuan ta sacuhun Tatyí li Nyoo chi ra Jesús noo nu chiqui ndii. ¹³ Ta yucuan chinyaá ra uvi xico quivi nu chiqui ndii cuan, nu yori ñáyivi iyó, maa ri quiti iyó. Ta nducú nyehe cuhna chi ra. Ta yaha cuan ta chaá coyo ángel ta catyiñuhu ra chi ra.

Nu quichaha saha tyiño ra Jesús ityi Galilea

(Mt. 4.12-17; Lc. 4.14-15)

¹⁴ Cha yaha catyihí ñu chi ra Juan vehe caa, ta ra Jesús cuanuhu ra Galilea ta cahán ra tuhun vaha Nyoo chihin ñáyivi. ¹⁵ Ta catyí ra:

—Cha chaá cuhva cha cua cunyaca ñaha Nyoo aña ndo. Yatyin ri nyaá ra chihin ndo. Ndú uvi ñi ndo cuatyí ndo, ta chingo ñi ndo tuhun Nyoo cha sacacu aña ndo —catyí ra Jesús.

Nu cana ra Jesús chi cumi tahan ra catiñ tiyaca

(Mt. 4.18-22; Lc. 5.1-11)

¹⁶ Chicá noo ra Jesús yuhu miñi cha nañi Tyañuhu Galilea. Ta nanyehé ra chi ra Simón ta chi yañi ra, ra Andrés, cacañi ra yuhva ra nu ndutya, vatyi ra catiñ tiyaca cacuvi ra. ¹⁷ Ta catyí ra Jesús chi ra:

—Cunyicon ndo chii, ta yuhu cusacuvi vatyi tari ñi ndo tiyaca, tyicuan caa cuñi ndo aña ñáyivi, tava ndo chi ñu nu quiñi caa, na quihvi ñu cuenda Nyoo —catyí ra Jesús chi ra Simón ta chi ra Andrés cuan.

¹⁸ Caa cuhva ri cuan casandoq ra yuhva ra, ta cuahan coyo ra chihin ra.

¹⁹ Yaha cuan ta chiin ri ca chicá ra Jesús, ta nanyehé ra chi ra Jacobo, sehe ra Zebedeo, ta chi yañi ra, ra Juan. Cañohó ra chichi noo canoa canaquicú ra yuhva ra. ²⁰ Cana ra Jesús chi ra. Ta ninduvi tahan ra casandoq ra sutu ra, ra Zebedeo, chichi canoa chihin ra catyinyeé chi ra. Ta cuahan coyo ra chihin ra Jesús.

Nu nduvaha noo ra yihí tatyí ña vaha aña

(Lc. 4.31-37)

²¹ Ta chaá coyo ra ñuu Capernaum. Ta cuví chi noo quivi nyitatu ñáyivi, ta quihvi ra Jesús chichi vehe ñuhu, ta quichaha sañaha ra tuhun Nyoo chi ñáyivi. ²² Ta iyo cuñi ñu tuhun cahán ra, vatyi sañahá ra tari noo ra iyó vaha ityi chii cha cahán. Ña cahán ra cuhva cahán ra casacuahá cuenda ley vehe ñuhu. ²³ Chichi vehe ñuhu cuan ñohó noo ra yihí tatyí ña vaha aña. Ta cana chaa ra ta catyí ra:

²⁴ —¿Ñáá tuhun cha tyihún chuun chihin ndi, yoho Jesús ra ñuu Nazaret? ¿Atu vachun vatyi sanaun chi ndi? Yuhu ñohó nui chuun, ta chité vatyi Sehe li Nyoo cuví

chuun —catyí ra yihí tatyí ña vaha cuan chi ra Jesús.

²⁵ Nacahan ra Jesús ta catyí ra chi tatyí ña vaha cuan:

—¡Taxi ri! ¡Saña chi ra ndahvi chiña! —catyí ra.

²⁶ Ta tatyí ña vaha cuan, chihí tañi ra cuhví cuan saha chí, ta iyo canachaa tatyí cuan quita chí ra. ²⁷ Tandihí ñáyivi yuhvi xaan ñu cuví, ta candaca tuhun ñu chi tahan ñu, ta catyí ñu:

—¿Ñáa cha cuví ihya? ¿Ñana vaha tuhun chaa sañahá ra ihya? ¡Vatyí iyo vaha tun-yeé iñi chi ra, nyacua nya tatyí ña vaha, ta quichahá chi ra! —catyí ñu.

²⁸ Ta numi ri cachito ñáyivi tandihí ñuu cha iyó Galilea cuan tuhun ra Jesús.

Nu sanduvaha ra Jesús chi maha tyiso ra Simón Pedro

(Mt. 8.14-15; Lc. 4.38-39)

²⁹ Cuhva cha quita coyo ra chichi vehe ñuhu, ta cuahan ra Jesús vehe ra Simón ta ra Andrés. Ta cuahan tucu ra Jacobo ta ra Juan chihin ra. ³⁰ Ta maha tyiso ra Simón catuvi ña nu chito, cuhví ña chihin cahñi. Ta catyí ñu chi ra Jesús tyi cuhvi ña. ³¹ Tyicuan ta tuhva ra Jesús, ta tijn ra ndaha ña. Ta nacoñehe ra chi ña. Ta caa cuhva ri cuan, tinyaa cahñi chí ña. Ta quichaha tyiñuhu ña chí ra.

Nu sanduvaha ra Jesús chi cuaha ñu cuhvi

(Mt. 8.16-17; Lc. 4.40-41)

³² Cuhva cha quee ñanyii ta cha cua cuaa, quichí nyaca ñu tandihí ñu cuhvi ta ñu yihí tatyí ña vaha nu nyaá ra Jesús. ³³ Ta tandihí ñáyivi ñuu cuan candu ñn ri ñu yuvehe cuan. ³⁴ Ta cuaha ñu cuhvi cha siin siin cuehe sanduvaha ra. Ta tava ñehe ra chí cuaha tatyí ña vaha, soco ña chaha ra cha cahan tatyí cuan, vatyí chito cuan yóo ra cuví ra.

Nu cahán ra Jesús tuhun Nyoo ityi Galilea

(Lc. 4.42-44)

³⁵ Ta cha inga quivi cuhva cha ni ñaa ca, ndicuita ra Jesús, ta cuahan ra ityi chata ñuu. Cuahan ra noo nu yori sayanga chi ra cua cacan tahvi ra chí Nyoo. ³⁶ Ta ra Simón ta ra tahan ra cuahan coyo ra cua nanducu ra chí ra. ³⁷ Ta cuhva cha canañihí ra chí ra cacatyí ra chí ra:

—Tandihí ñáyivi nanducú ñu chuun —catyí ra chí ra Jesús.

³⁸ Soco maa ra catyí ra chí ra:

—Coho ndo inga ñuu cha nyicú yatyin ri ihya, vatyí cahan tiqui tuhun Nyoo yucuan, vatyí yucuan tyiño vachi —catyí ra Jesús chí ra.

³⁹ Yucuan chaha chica noo ra Jesús tandihí ri ñuu cha iyó Galilea, cahán ra tuhun Nyoo chichi vehe ñuhu tahan tahan

ñuu. Ta tava ñehe ra tatyí ña vaha cha yihí añima ñáyivi.

Nu sanduvaha ra Jesús chi noo ra cha tyahyu coño

(Mt. 8.1-4; Lc. 5.12-16)

⁴⁰ Noo chaha tuhva noo ra cuhvi cha tyahyu coño nu nyaá ra Jesús. Ta chicutiñi chiti ra nuu ra, ta catyí ra chí ra:

—Tatu cuñún, cuví sanduvahun chii —catyí ra.

⁴¹ Ta cundahvi cuñi ra Jesús nyehé ra chí ra, ta tyiso ra ndaha ra siqui ra, ta catyí ra:

—Cuñi sanduvahi chuun. Ta na nduvahun vityin ri —catyí ra chí ra.

⁴² Caa cuhva ri cha catyí ra tyehe caa, tinyaa cuehe cuan chí ra, ta nduvaha ra.

⁴³ Tyicuan ta catyí ra Jesús vatyí cha cuví cuhan ra, soco catyí xaan ra chí ra na sacuvi ra tyehe caa:

⁴⁴ —Nyehe. Yori chihin cahun tuhun. Soco cuahan nu nyaá tata sutu. Ta sañahun chuun chí ra, ta cuhvon cha tahán chí cuhvon na ndundiun nu Nyoo tari cuhva catyí nu ley cha tyaa ra Moisés, vatyí tacuhva coto tandihí ñáyivi tyi cha nduvahun chihin cuehe cuan —catyí ra Jesús chí ra.

⁴⁵ Soco ra cuan chahan ra, ta quichaha nacatyí ra chí tandihí ñáyivi. Yucuan chaha ña cuví ca quihvi ndichin ra Jesús chichi ni noo ñuu. Ta ityi chata ri ñuu chica noo ra nu yori ñáyivi iyó, soco tandihí ri ityi quita coyo ñu, quichí nyehe ñu chí ra.

2

Nu sanduvaha ra Jesús chi noo ra cuhvi cha ña cuví nacanda

(Mt. 9.1-8; Lc. 5.17-26)

¹ Suhva quivi yaha ta quihvi ra Jesús inga chaha chichi ñuu Capernaum. Ta cachito ñáyivi tyi nyaá ra vehe. ² Ta numi ri candu ñn ri cuaha ñáyivi. Ta nyacua ña chitahan ñu, ni yuvehe. Ta maa ra Jesús cahan ra tuhun Nyoo chihin ñu. ³ Tyicuan ta cumi tahan ra canyisó chí noo ra cuhvi cha ña cuví nacanda, caquichí nyaca ra chí ra nu nyaá ra Jesús. ⁴ Soco ña cuví caquihvi ra nya nu nyaá ra Jesús cha cuenda vatyí tuvi xaan ñáyivi. Tyicuan ta canda ra ityi xini vehe. Ta sacuachiyó ra suhva tyiyo. Ta sanoq ra chí ra cuhvi cuan chihin chito. ⁵ Nyehe ra Jesús vatyí cachinó xaan iñi ra cuan. Ta catyí ra chí ra cuhvi cuan:

—Cha ndachí cuatyun, suti —catyí ra Jesús chí ra.

⁶ Soco suhva ra sacuahá cuenda ley vehe ñuhu nyicú ra cuan, ta cacticá xini ra tyehe caa: ⁷ “¿Ñáa tuhun cha caña iñi ra ihya cahan ra tyehe caa? Chicoq cuatyí ra nuu Nyoo chihin tuhun cahan ra vatyí yori cuví sandachi cuatyí, noo tuhun ri maa Nyoo

cuví sandachi ra cuatyí”, cachicá xiñi ra. ⁸ Soco ra Jesús chitó ra cha cachicá xiñi ra. Ta catyí ra chi ra:

—¿Ñáá tuhun cha chicá xiñi nyoho tyicuan caa? ⁹ ¿Ñáá cha yí ca, cha catyí yo chi ra cuhví ihya vatyí cuatyí ra cha yahá ndachi, o cha catyí yo chí ra vatyí nducuita ra ta naquehen ra chito ra ta caca ra? ¹⁰ Vaha, vityin chihin cha sanduvahi chi ra ihya, cusañahi chi ndo vatyí yuhu ra cuví Rayíi cha quichí nya gloria, iyó ityi chíi cha sandachi cuatyí ñáyivi —catyí ra Jesús chi ra.

Tyicuan ta quichaha catyí ra chi ra cuhví cuan:

¹¹ —Catyí chi yoho, ndicuita, naquehen chiton, ta cuanuhu nya vehun —catyí ra Jesús chi ra.

¹² Ta ra cuhví cuan ndicuita ra. Naquehen ra chito ra, ta cuanuhu ra. Ta tandíhi ñu nyehe ñu, ta iyo cuñi ñu, ta sacahnú ñu chí Nyoo, ta catyí ñu:

—Ni noo chaha ta nyehe ca yo cha tyehe caa —catyí ñu.

Nu canq ra Jesús chi ra Leví
(Mt. 9.9-13; Lc. 5.27-32)

¹³ Yahá cuan ta cuahan tucu ra Jesús inga chaha yuhu miñi cuan. Ta cuhva cha natacá ñáyivi nu nyaá ra, quichaha cahan ra nuu ñu. ¹⁴ Tyicuan ta cuahan ra ta nu yahá ra nanyehé ra chí ra Leví sehe ra Alfeo, nyaá ra nu sahá tyiño ra, tavá ra xuhun cuenda gobiernu ñuu Roma. Ta catyí ra Jesús chi ra: —Cqho chihin.

Tyicuan ta nducuita ra Leví, ta cuahan ra chihin ra.

¹⁵ Yahá cuan ta tahan chí nyaá ra Jesús chihin ra cachicá noo chihin ra cachachí ra nu mesa vehe ra Leví. Ta nyicú tucu cuaha ra catavá xuhun chihin inga ñáyivi iyó cuatyí. Vatyí cuaha xaan ñu nyicón chí ra. ¹⁶ Soco ra casacuahá cuenda ley vehe ñuhu, ta ra cacuví fariseo, ra cha quichahá xaan ley vehe ñuhu, cha canyehé ra vatyí chachí ra Jesús chihin ra catavá xuhun, ta ñu iyó cuatyí, ta cacatyi ra chí ra cachicá noo chihin ra Jesús:

—¿Yoso caa cha ra sacuaaha chí nyoho chachí ra ta chíhi ra chihin ra catavá xuhun ta ñu iyó cuatyí?

¹⁷ Chiñi ra Jesús cha cacahan ra ta catyí ra: —Ña chiñuhú doctor chí ñu ña cuhví, soco chiñuhú ra chí ñu cuhví. Vachi yuhu soco ñima cha cuenda cha vaha chí ñu vaha, soco cha cuenda cha vaha chí ñu iyó cuatyí —catyí ra Jesús chí ra.

Nu sañahá ra Jesús vatyí nya cha yaha canyaha ra chí ñu nyicón chí ra, tyicuan ta cutahan chí savaha ñu ayuno
(Mt. 9.14-15; Lc. 5.33-35)

¹⁸ Noo chaha, ra canyicón chí ra Juan ta ra canyicón chí ra fariseo, ña chachí ra ta nanducú ra chí Nyoo. Ta suhva ñáyivi quichí coyo ñu nu nyaá ra Jesús, ta ndaca tuhun ñu chí ra, ta catyí ñu chí ra:

—¿Ñáá tuhun cha ra canyicón chí ra Juan ta ra canyicón chí ra fariseo tuhvá ra savaha ra ayuno, ta ra cachicá noo chuhun ña tuhvá ra? —catyí ñu.

¹⁹ Ta nacahan ra Jesús ta catyí ra:

—Noo vico tandaha, ¿atu cuví cha ma cachi ra ñohó vico cha ní ri ca cha nyaá ra cha cua tandaha cuan chihin ra? Tatu nyaá ca ra cua tandaha cuan chihin ra, ma cuví cha ma cachi ra. ²⁰ Soco vachi chí quivi cha cutinyaa ra chí ra tandaha cuan nu nyicú ra tahan ra. Yucuan ndicha quivi coo cuhva cha ma cachi ra ta nanducu ra chí Nyoo —catyí ra Jesús chí ñu.

Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra
(Mt. 9.16-17; Lc. 5.36-39)

²¹ Catyí ra Jesús:

—Yori naquico noo sahma chahnu chihin noo sahma chaa, vatyí cha chaa cuan nandiyi ta cahnya chí sahma chahnu, ta nu tahnya cuan cunducahnu ca. ²² Ta ní ri ña tuhvá yo tyihi yo vinu chaa chichi ñii chahnu, vatyí vinu chaa chahnyá chí ñii, ta chati vinu, ta tiví ñii. Yucuan chaha cuñi chí cha tyihi yo vinu chaa chichi ñii chaa —catyí ra Jesús.

Nu catohon ra cachicá noo chihin ra Jesús yoco trigo quivi nyitatu ñáyivi
(Mt. 12.1-8; Lc. 6.1-5)

²³ Noo quivi cha tuhvá ñáyivi nyitatu, cuahan ra Jesús chicá ra mahñu nu iyó cha tachí ñáyivi. Ta ra cachicá noo chihin ra quichaha catohon ra yoco trigo cuan cuhva cha yahá coyo ra. ²⁴ Tyicuan ta quichaha cacatyi ra fariseo chí ra Jesús:

—iNyehe xihna! ¿Ñáá tuhun cha sacuví ra cachicá noo chuhun tyiño cha ña tahan chí sacuví yo quivi nyitatu yo? —cacatyi ra.

²⁵ Soco maa ra Jesús catyí ra chí ra:

—¿Atu ní noo chaha ta sacuaaha ca nyoho cha sacuví ra David chihin ra tahan ra noo quivi cha cachisoco vavaha ra? ²⁶ Quivi cha cuví ra Abiatar tyiño cha cuví ra nuu chí tata sutu, quihví ra David chichi vehe Nyoo. Ta chachí ra pan ii, cha tahan chí cachi maa ri maa ra cuví sutu. Ta chahá tucu ra cachi ra ndíhi chihin ra —catyí ra Jesús.

²⁷ Ta catyí tucu ra Jesús chí ra:

—Chicoo quivi nyitatu yo, cuenda cha vaha chí ñáyivi, soco ñáyivi ña chicoo ñu cha cuenda cha vaha chí quivi nyitatu yo. ²⁸ Yucuan chaha yuhu Rayíi cha quichí nya gloria, iyó ityi chíi cha catyí chí noo noo ndo

ñáá cha sacuvi ndo quívi nyitatu yo —catyí ra Jesús.

3

Nu nduvaha noo ra na ityi inchiyo ndaha (Mt. 12.9-14; Lc. 6.6-11)

¹ Quihví ra Jesús inga chaha chichi noo vehe ñuhu. Ta yucuan nyaá noo ra na ityi inchiyo ndaha. ² Ta cañañi ra fariseo chi ra Jesús nyehé ra tatu sanduvaha ra chi ra quívi nyitatu ñu, vatyí tacuhva coo cuatyí tyaa ra síqui ra. ³ Tyicuan ta ra Jesús catyí ra chi ra na ityi ndaha cuan:

—Ndjcuíta ta cujnanyaa mahñu ihya.

⁴ Yahá cuan ta ndacá tuhun ra chi inga ñu cha tayucú cuan, ta catyí ra:

—¿Ñáá cha tahán chi sacuvi yo quívi nyitatu yo? ¿Atu sacuví yo cha vaha o cha ña vaha? ¿Atu tahán chi sanduvaha yo ñáyivi o cha cahñi yo? —catyí ra Jesús.

Tyicuan ta taxi taxi maa candoo ñu cuan.

⁵ Tyicuan ta xaan nanyehe ra Jesús chi ñu, ta cuihya cuñi ra vatyí ña cuñi ñu cutuñi iñi ñu. Ta catyí ra chi ra cuan:

—Sgnacaa ndahun.

Ta sanacaa ra, ta nduvaha ndaha ra.

⁶ Tyicuan ta quita coyo ra fariseo, ta quichaha catyihí tahan ra tuhun chihin ra cuenda ra Herodes, yoso caa cacahñi ra chi ra Jesús.

Nu nyicú cuaha ñáyivi yuhu miñi

⁷ Soco ra Jesús cuahan ra chihin ra cachicá noo chihin ra yuhu miñi, ta cuaha ñáyivi ityi Galilea canyicón chi ra. ⁸ Ta cha chitó ñáyivi tuhun nahnu cha sacuví ra, cuaha xaan ñu quichí coyo ñu ñuu Jerusalén ta inga ñuu cha iyó ityi Judea, ta ñuu cha iyó Idumea, ta inga chiyu yuvi cahnu Jordán, ta ñuu Tiro ta ñuu Sidón ñandihí, vatyí cuñí ñu nyehe ñu chi ra. ⁹ Yucuan chaha catyí ra Jesús chi ra cachicá noo chihin ra na casanduvaha ra noo canoa, tacuhva vatyí tatu ndutihin xaan chihin ñáyivi, cuví quihví ra chichi canoa cuan. ¹⁰ Vatyí cuaha xaan ñu cha yaha sanduvaha ra, ta yucuan chaha tandihí ñu cuhví cuahan ñu nu nyaá ra vatyí cuñí ñu tñn ñu chi ra tacuhva nduvaha ñu. ¹¹ Ta ñu yihí tatyí ña vaha añima, chicuñi chiti ri ñu nuu ra, ta canachaa tatyí ña vaha cuan, ta catyí chi tyehe caa:

—¡Yoho cuvún Sehe Nyoo!

¹² Soco ra Jesús chasí ra yuhu tatyí cuan vatyí ma catyí ca chi yóo ra cuví ra.

Nu nacachí ra Jesús chi uchi uvi apóstol vatyí cacaca ra tyiño ra

(Mt. 10.1-4; Lc. 6.12-16)

¹³ Yahá cuan ta ndaa ra Jesús noo yucu ta cana ra chi ra cuñí maa ra nacachí ra. Ta quichí coyo ra nu nyaá ra. ¹⁴ Ta tyiso ra chí uchi uvi tahan ra vatyí cundihí ra chihin

ra, ta vatyí tyatyíño ra chí ra na cucuhan ra tuhun Nyoo. ¹⁵ Ta chaha ra ityi chí ra vatyí sanduvaha ra chí ñu cuhví, ta tava ñehe ra chí tatyí ña vaha. ¹⁶ Ta ican ra ihya cacuví ndi uchi uvi tahan ra: ra Simón cha sacunañi ra Jesús Pedro chí; ¹⁷ ra Jacobo ta yañi ra ra Juan, sehe ra Zebedeo. Ta Boanerges sacunañi ra chí ninduvi tahan ra ta cuñí chí catyí: ra ñihi cahán tari cahán savi, ¹⁸ ra Andrés, ra Felipe, ra Bartolomé, ra Mateo, ra Tomás, ra Jacobo sehe ra Alfeo, ra Tadeo, ta inga ra Simón cha yihí cuenda ityi ra cuñí cuhun cuatyí síqui gobiernu ñuu Roma cha nyacá ñaha chí ñu, ¹⁹ ta ra Judas Iscariote, ra cha naxico tuhun chí ra Jesús.

Nu tyaa ñáyivi cuatyí síqui ra Jesús, ta catyí ñu vatyí tunyee iñi cuihna iyó chí ra (Mt. 12.22-32; Lc. 11.14-23; 12.10)

Yahá cuan ta quihví ra Jesús noo vehe chihin ra cachicá noo chihin ra. ²⁰ Ta inga chaha nataca cuaha ñáyivi, ta nyacua ni ña cuví ca cachí ra. ²¹ Cha cachitó ñáyivi chí ra Jesús vatyí nyaá ra yucuan, quichí coyo ñu vatyí cunuhun ra chihin ñu, vatyí catyí ñáyivi chí ñu tyi nduloco ra.

²² Ta suhva ra casacuahá cuenda ley vehe ñuhu Jerusalén cha quichí coyo suri tyicuan caa cacatyi ra:

—Ra ihya, ra Beelzebú ra cuví nuu chí cuihna yihí chí ra. Ta chihin tunyee iñi cuihna tava ñehe ra tatyí ña vaha —cacatyi ra.

²³ Tyicuan ta cana ra Jesús chí ra, ta catyí ra chí ra:

—¿Yoso caa, atu tavá ñehe cuihna suri chí ra tahan maa ra? Ma sacuvi cuihna tyicuan caa. ²⁴ Tatu noo gobiernu cacusiin ra, ta cacafi tahan ra chihin tahan ra, gobiernu cuan ña naha cuacunyaca ñaha ra. ²⁵ O tatu ñáyivi noo vehe, ña in ri cuví ñu chihin tahan ñu ta cañi tahan ñu, cutivi nu nyicú ñu. ²⁶ Ta tatu cuihna cacusiin ra ta canducuita ra síqui tahan ra, ¿yoso caa cucuvi chí ra? Cundihí tuhun ra.

²⁷ Yori cuví quihví chichi vehe noo ra ñihi tari cuihna ta tinyaa ra cha chí ra, tatu ma cuhñi xihna ra chí ra. Yucuan ndicha ta cuví tinyaa yo cha chí ra.

²⁸ Cha ndicha catyí chí ndo vatyí cuví coo ticahnu iñi tandihí nuu cuatyí ñáyivi, ta tandihí cha quiñi caa cha cahán ñu. ²⁹ Soco ñu cahán ña vaha síqui Tatyí Íi Nyoo, ma cuví maa coo ticahnu iñi cuenda cuan, soco tyicuan ri maa coo cuatyí ñu —catyí ra Jesús.

³⁰ Tyicuan caa catyí ra Jesús chí ra casacuahá cuenda ley vehe ñuhu, vatyí maa ra cacatyi ra vatyí ñohó noo tatyí ña vaha chí ra.

Yóo ñu cuví sihi ra Jesús ta yañi ra (Mt. 12.46-50; Lc. 8.19-21)

³¹ Tyicuan ta chaq coyo sihi ra Jesús ta yañi ra, soco ndoq ñu ityi chata vehe, ta tachj ñu cucana chi ra. ³² Ta ra nyicú nicachico nu nyaá ra Jesús cacatyí ra chi ra:

—Sihun ta yañun ta cuhvon nyicú ñu ityi chata vehe, ta nanducú ñu chuun —catyí ra chi ra.

³³ Soco maa ra catyí ra:

—¿Yóó ñu cuví sihi ta yañi? —catyí ra.

³⁴ Tyicuan ta nanyehé ra chi ñu nyicú nicachico, ta catyí ra:

—Ican ñu ihya cuví sihi ta yañi. ³⁵ Vatyí savahri ñu sacuví cuhva cuñi Nyoo, ican ñu cuan cuví yañi, ta cuhve, ta sihi —catyí ra Jesús.

4

Tari noo ra chicá noo tachí, tyicuan caa cuví ra cahán tuhun Nyoo

(Mt. 13.1-9; Lc. 8.4-8)

¹ Inga chaha quichaha sañaha ra Jesús yuhu miñi, ta ndu ñn ri cuaha ñáyivi nu nyaá ra. Yucuan chaha quihvi ra chichi noo canoa cha tacaá nu ndutya yuhu miñi cuan. Ta chicunyaá ra, ta tandihí ñáyivi ndoo ñu nu ñiti. ² Tyicuan ta cuaha cha sañaha ra chi ñu chihin cuhva ri. Ta nu sañahá ra chi ñu, ta catyí ra chi ñu:

³ —Tyasoho ndo tuhun ihya. Mínoo ra quitá ra vehe ra, cuahan ra nu iyó tyiño sahá ra. Ta quichaha quití ra chiti trigu nu ñuhú ra. ⁴ Ta ityi cuahan ra quití ra, suhva chiti cuan canacoyo yuhu ityi, ta quichí coyo saa ta cachachí ti. ⁵ Suhva ca chiti canacoyo ticu yuu nu ña cuaha ñuhú yihí. Ta chiti cuan numi ri cañá, vatyí ña cono xaan yihí ñuhú cuan. ⁶ Soco cuhva cha cañá ñanyii, na ityi chi vatyí ña cono yihí yoho chi. ⁷ Ta suhva ca chiti canacoyo chichi tu iñu. Ta chahnú tu iñu cuan, ta chasí tun nuu trigo cuan. Yucuan chaha ña chiyo chiti tun. ⁸ Soco suhva chiti cha canacoyo nu ñuhú vaha. Ta cañá ta chahnú. Ta vaha chahá tun chiti. Suhva tun chahá tun oco uchi chiti cha noo noo tun. Inga tun chaha tun uñi xico chiti. Ta inga tun chahá ciento chiti —catyí ra Jesús chi ñu.

⁹ Ta catyí tucu ra chi ñu:

—Tatu cutuñi iñi ndo, tyasoho ndo tuhun cahín.

Nu sacotó ra Jesús ñáá cuenda sañahá ra chihin cuhva ri chi ñáyivi

(Mt. 13.10-17; Lc. 8.9-10)

¹⁰ Yahá cuan ta ndoq maa ri maa ra Jesús chihin ñu nyicón chi ra ta ndi uchi uvi tahan ra chicá noo chihin ra. Ta candacá tuhun ñu chi ra ñáá cha cuñi chi catyí tuhun cuan.

¹¹ Ta catyí ra chi ñu:

—Chi nyoho sacotó Nyoo tuhun xehe yoso caa nyacá ñaha ra añima ñáyivi. Soco chi ñu

cha ña chinó iñi chi ra, maa maa ri chihin cuhva ri sañahí chi ñu. ¹² Vatyí tatu nyehé ñu soco cuví chi tari cha ña nyehé ñu, ta tatu chiñi ñu soco ma cutuñi iñi ñu. Tacuhva cha ma nasama ñu cuhva iyó ñu ta ni ma coo ticahnu iñi cuatyí ñu —catyí ra Jesús chi ñu.

Nu chahá ra Jesús cuenda yoso caa cuahan tuhun ra tachí chiti cuan

(Mt. 13.18-23; Lc. 8.11-15)

¹³ Ta catyí tucu ra chi ñu:

—¿Atu ña cutuñi iñi nyoho tuhun ihya? Tatu tyicuan caa ña cutuñi iñi ndo, ¿yoso caa cuví cutuñi ini ndo tandihí inga tuhun sañahí chi ndo? ¹⁴ Ra cha tachí chiti trigu cuan cuví ra tari noo ra cahán tuhun Nyoo.

¹⁵ Yihí ñáyivi cuví ñu tari nu canacoyo chiti yuhu ityi: chiñi ñu tuhun Nyoo, soco cha yahá chiñi ñu, quichi cuhna ta tinyaa ra tuhun Nyoo cha tachí ra añima ñu. ¹⁶ Inga ñáyivi cuví ñu tari nu canacoyo chiti ticu yuu: chiñi ñu tuhun Nyoo ta si cuñi ñu natin cuenda ñu noo ri cuhva. ¹⁷ Vatyí nu cañá chiti ticu yuu cuan, chiin ri ñuhú yihí chaha, yucuan chaha cañá soco ña cuví tyihi yoho vaha chi. Ta tyicuan caa ñu cuan, suhva ri quivi chino iñi ñu. Soco quivi vachi tindoho siqui ñu, o satasi iñi ñáyivi chi ñu cha cuenda tuhun Nyoo, sandihí ri ñu tuhun cha chinó iñi ñu. ¹⁸ Ta inga ñu cuví ñu tari nu canacoyo chiti chichi tu iñu. Soco quivi vachi tindoho cha iyó siqui ñuhu ñáyivi ihya. Cha tyayii sandaví ñaha chi ñu, ta cuñi ñu tandihí ri nuu cha iyó. Tandihí ihya quihvi xiñi ñu ta ña nyaá ca xiñi ñu tuhun Nyoo, ta ña chahá chi sacuví ñu cha vaha cha cuenda cuan. ²⁰ Soco yihí ñu cha chiñi ñu tuhun Nyoo ta naquehén cuenda ñu, ta vaha sacuví ñu, tari nu canacoyo chiti nu ñuhú vaha cuví ñu. Yihí ñu cuví ñu tari yutun cha cañá ta chahá tun oco uchi tahan chiti tahan tahan tun. Ta inga ñu cuví ñu tari yutun cha chahá uñi xico. Ta inga ñu tari yutun cha chahá ciento.

Ma tyihi xehe yo ñuhú cha sandundichin Nyoo añima yo coto tinyaa ra

(Lc. 8.16-18)

²¹ Ta catyí tucu ra chi ñu:

—¿Atu quichi nyaca yo noo tima vatyí cananyaa yo chichi noo cajón o xiu chito? Ñima. Tima cuan cuñi chi tyiso yo noo nu sucun vatyí na sacundichin chi chichi vehe.

²² Ta tyicuan caa tucu, ñahri cha ñohó xehe, ta cuñun, tyi ma natuvi. Ta ñahri noo tuhun xehe, ta cuñun, tyi ma coto yo. ²³ Nyoho cha cutuñi iñi ndo, tyasoho ndo tuhun cahín —catyí ra Jesús chi ñu.

²⁴ Catyí tucu ra tyehe caa:

—Tyasoho vaha ndo tuhun cahín. Yoso cuhva sacuví ndo chi ñáyivi, yucuan cuhva

sacuvi Nyoo chihin ndo. Ta cuaha ca cu-cuhva ra chi ndo tatu tyasohó ndo cha cahán ra. ²⁵ Vatyí ñu tyasohó cha cahán, cuaha ca cuhva Nyoo chí ñu. Soco ñu ña tyasohó, cutinyaa ndihí ra cha chiin cha cha yaha chahá ra chí ñu.

Nu sañahá ra Jesús cuhva chahnu noo chiti yutun

²⁶ Catyí tucu ra Jesús tyehe caa:

—Cha nyacá ñaha Nyoo añima ñáyivi cuví chí tari noo ra tachí noo chiti chichi ñuhú. ²⁷ Ta cuahan ra cua cusu ra. Yaha cuan ta ndicuita ra. Ta cuaha quívi yaha. Ta caña chiti cuan, ta chahnú yutun. Soco maa ra ña chitó ra yoso caa chahnú tun. ²⁸ Cha cuenda vatyí maa ñuhú cuan sacuvahá chí tun tyicuan ri caa. Xihna ca quita xityin tun, ta yaha cuan yoco tun, yaha cuan ta quita chiti nu yoco cuan. ²⁹ Ta tatu cha chityí chiti cuan, cutohon ra vatyí cha chaá quívi cha coyo —catyí ra Jesús.

Nu sañahá ra Jesús vatyí tari chahnu noo chiti mostaza, tyicuan caa nducuaha nu nyacá ñaha Nyoo

(Mt. 13.31-32; Lc. 13.18-19)

³⁰ Ta catyí tucu ra Jesús:

—¿Ñáá chihin sanandiqui tahin cha nyacá ñaha Nyoo añima yo? ¿Ñáá chihin sandu inuu ri yo? ³¹ Cuví chí tari noo chiti mostaza cha tachí yo nu ñuhú. Ican chiti cuan, lee ca cha nuu tandihí chiti iyó siqui ñuhu ñáyivi. ³² Soco tatu tachí yo, cañá ta cuahnu. Ta cahnu vavaha cuví tun. Ta nahnu soco tun, ta nyacua nya saa cha chicó nu tatyí cuví nyitatu ti nu vati tun.

Yoso caa sañahá ra Jesús chihin cuhva ri chi ñáyivi

(Mt. 13.34-35)

³³ Tyehe caa sañahá ra Jesús chí ñu, chihin cuaha cuhva, nyacua nya nu cuví cutuñi ñi ñu. ³⁴ Ñahri maa cha catyí ra chí ñu tatu ñima chihin noo cuhva. Soco chí ra cachicá noo chihin ra, nacatyi vaha ra chí ra.

Nu sacutaxín ra Jesús tatyí ta miñi

(Mt. 8.23-27; Lc. 8.22-25)

³⁵ Suri maa quívi cuan, cuhva cha cuaa, catyi ra chí ra cachicá noo chihin ra:

—Coho ndo inga chiyo miñi cuan.

³⁶ Tyicuan ta casandoq ra chí ñáyivi. Ta cuahan ra Jesús chihin ra chichi canoa cha catuvi cuan. Ta cuahan tucu inga canoa chihin ra. ³⁷ Ta quichaha caa noo tatyí ñihi xaan, ta quichaha quihvi ndutya chichi canoa cuan, ta quichaha chitu. ³⁸ Ta ra Jesús quixí ra siqui noo cabecera cha nyaá inchiyo xiin canoa cuan. Ta casandoqo ra chí ra, ta cacatyi ra:

—¡Maestro! ¿atu ñahri cuendon cha cuñi nyee yo?

³⁹ Tyicuan ta ndicuitá ra Jesús ta cahan ra chí tatyí cuan na cutaxin. Ta catyí ra chí ndutya miñi cuan tyehe caa:

—¡Taxi ri! ¡Taxi cunyaun! —catyí ra.

Ta tatyí cuan cutaxin, ta taxi taxi cuví. ⁴⁰ Tyicuan ta catyí ra Jesús chí ra cachicá noo chihin ra:

—¿Ñáá tuhun cha yuhví xaan ndo? ¿Atu ta chino ca ñi ndo? —catyí ra chí ra.

⁴¹ Soco maa ra cayuhvi xaan ra cha cuví cuan. Ta cacatyi ra chí ra tahan ra:

—¿Yóó ra cuví ra ihya, vatyí nyacua nya tatyí ta miñi quichahá chí ra? —catyí ra.

5

Nu nduvahá ra yihí tatyí ña vaha chii ñuu Gadara

(Mt. 8.28-34; Lc. 8.26-39)

¹ Chaá coyo ra yuhu miñi, inga chiyo nu nyaá ñuu Gadara. ² Ta quita ri ra Jesús chichi canoa, ta quita noo ra nu ñaña cuan ta chaá ra nu nanyaá ra Jesús. Ta yihí noo tatyí ña vaha añima ra. ³ Ta nu ñaña cuan iyó maa ra cuan. Ta yori maa cuví chasaha chí ra, ni ri chihin cadena. ⁴ Cuaha xaan chaha chahñi ñu chaha ra ta ndaha ra chihin cadena, soco chahnya ra. Yiquin maa sacuvi ra. Ta yori maa cuví chasaha chí ra. ⁵ Ñicahñu ta cha cuaa chicá noo ra canacháa ra nya nu yucu ta nya nu ñaña. Ta sañicuehé ra suri chí maa ra chihin yuu. ⁶ Soco cañi ca nanyehé ra chí ra Jesús, ta chino vavaha ra chaa ra. Ta chicuñi chiti ra nuu ra. ⁷ Ta caná chaa ra ta catyí ra:

—¿Ñáá tuhun cha tyihún chuun chihin yuhu, yoho Jesús, Sehe Nyoo ra cuví nuu? Chacú ndahvi nuun chihin sivi Nyoo, ma sanyehun tindoho chii.

⁸ Catyí tatyí cuan tyehe caa vatyí ra Jesús cha catyí ra chí ra:

—¡Saña chí ra chiña, yoho tatyí ña vaha! —catyí ra.

⁹ Ta ra Jesús ndaca tuhun ra chí ra, ta catyí ra:

—¿Ñáá nañún?

Ta nacahan tatyí ña vaha cuan:

—Legión nañi, vatyí cuaha xaan ndi —catyí chí chí ra Jesús.

¹⁰ Ta chacu ndahvi tatyí ña vaha cuan nuu ra Jesús tacuhva cha ma tachi ra chí chí nu cañi. ¹¹ Ta yatyin ri yucu cuan nyicú cuaha xaan quini cachachi ti. ¹² Yucuan chaha catyí tatyí ña vaha cuan chí ra Jesús tyehe caa:

—Tachi chí ndi na quihvi ndi quini cuan —catyí tatyí cuan.

¹³ Tyicuan ta chahá ra Jesús, ta tatyí cuan quita coyo chí ra cuan, ta quihvi chí quini cuan. Ta cha uvi mil quini nyicú cuan, cachino ti, ta canacoqo ti chichi noo xahva

yuhu miñi cuan, ta cachihĩ ti chichi ndutya cuan.

¹⁴ Tyicuan ta ra sahá cumi quini cuan, chingo xaan ra chihin cha yuhví ra, ta chinacatyí ra chi ñáyivi ñuu cuan ta ñu ñohó nu chiqui. Ta quichĩ coyo ñáyivi, quichĩ nyehe ñu ñáá cha cuvĩ. ¹⁵ Cuhva cha chaq coyo ñu nu nyaá ra Jesús, nanyehẽ ñu chi ra cha yihĩ tatyí ña vaha cuan chi. Ta vityin nyaá ra ñihno ra sahma, ta cachi vaha iyó xiñi ra. Ta yuhví xaan ñu cuvĩ. ¹⁶ Ta ñu cha nyehe cha cuvĩ chi ra cuan ta chi quini cuan, canacatyí ñu chi tandihĩ ca ñu. ¹⁷ Tyicuan ta quichaha chacu ndahvi ñu nuu ra Jesús, na quita ra ñuu ñu.

¹⁸ Ta cuhva cha cua quihvi ra Jesús chichi canoa, ra cha yihĩ tatyí ña vaha cuan chi chacu ndahvi ra nuu ra Jesús na cuhva ra cuhun ra chihin ra. ¹⁹ Soco ra Jesús ña chaha ra cuhun ra, ta catyí ra chi ra:

—Cuanuhu nya vehun, nu nyaá ñáyivi chuun, ta nacatyun chi ñu tandihĩ cha sacuvĩ Sutu yo Nyoo chuun, ta yoso caa cundahvi cuñi ra nyehe ra chuun. ²⁰ Ta ra cuan cuahan ra ta quichaha nacatyí ra chi ñáyivi tandihĩ ñuu Decápolis tandihĩ cha sacuvĩ ra Jesús chihin ra. Ta tandihĩ ñu, iyo cuñi ñu.

Nu nduvaha sehe ra Jairo ta ñaha sihi cha tiñ sahma ra Jesús

(Mt. 9.18-26; Lc. 8.40-56)

²¹ Ta cuhva cha nachaa ra Jesús chihin canoa nya inga chiyo miñi cuan, chaq coyo cuaha ñáyivi nu nyaá ra. Ta ndoo ra yuhu miñi cuan. ²² Tyicuan ta chaq noo ra cuvĩ nuu vehe ñuhu. Nañi ra Jairo. Ta cuhva cha nanyehẽ ra chi ra Jesús, chicuñi chiti ra nuu ra. ²³ Ta chacu ndahvi ra nuu ra ta catyí ra:

—Cha cuñi cúvi sehi. Coho chihin ta tyjoun ndahun siqui ña na nduvaha ña ta ma cuvĩ ña.

²⁴ Tyicuan ta cuahan ra Jesús chihin ra, soco cuaha ñáyivi nyicón chi ra, ta nyacua nañi tahan ri ca maa ñu. ²⁵ Ta mahñu ñáyivi cuan ñohó noo ñaha cha cuhvi. Cha quita uchi uvi cuiya ndoho ña cuehe cha chati niñi ña. ²⁶ Ta cuaha tindocho nyehe ña cha cuaha xaan doctor nyehe chi ña. Ta cha sanaq ña tandihĩ maa cha iyó chi ña, soco ñahri maa tyinyeẽ chi chi ña. Soco ñihĩ ndihĩ ca nanduvi. ²⁷ Cuhva cha chitó ña tuhun milagru cha sacuvĩ ra Jesús, tuhva ña ityi chata ra ta tiñ ña sahma ra. ²⁸ Vatyí chicá xiñi ña: “Ma chihin cha tiñ ri sahma ra, ta nduvahi”, chicá xiñi ña. ²⁹ Ta caa cuhva ri cha tiñ ña sahma ra ta cha chati niñi ña cutaxin. Ta tuvĩ iñi coño ñuhu ña tyi cha nduvaha ña chihin cuehe cuan. ³⁰ Tyicuan ta tuvĩ iñi ra Jesús vatyí nduvaha noo ñáyivi chihin suhva tunyee iñi cha quita chi ra. Tyicuan ta

nanyehẽ ra ityi chata ra ta quichaha ndaca tuhun ra:

—¿Yóo cha tiñ sahme? —catyí ra.

³¹ Tyicuan ta ra cachicá noo chihin ra quichaha catyí ra chi ra:

—Cha nyehun vatyí ñáyivi tyandahá chuun tyi tihin xaan. ¿Yoso caa cha ndaca tuhun: “Yóo cha tiñ chii”? —cacatyí ra chi ra.

³² Soco ra Jesús nyehe ra ityi cuan ityi ihya, vatyí cuñi ra nyehe ra yóo cha tiñ chi ra. ³³ Tyicuan ta ñaha cuan nihi ña chihin cha yuhví ña vatyí chitó ña ñáá cha cuvĩ chi ña. Ta chahan ña chicuñi chiti ña nuu ra. Ta nacatyí ña tandihĩ cha ndicha chi ra. ³⁴ Ta catyí ra Jesús chi ña:

—Cha nduvahun, Sihi, vatyí chinó iñun. Cuahan, ta ma caca xiñun, vatyí cha nduvahun chihin cuehe cha ndohun —catyí ra Jesús chi ña.

³⁵ Ni cahan ca ra Jesús ta chaq coyo ñu vehe ra cuvĩ nuu cuan, ta catyí ñu chi ra cha cuvĩ sutu cha luhlu cuan:

—Sehun, cha chihĩ ña. Náá ri ca tuhun cha sayangon chi Ra Sacuaha chiña —catyí ñu.

³⁶ Soco ra Jesús ña quichaha ra cha cahan ñu, ta catyí ra chi ra cuvĩ nuu vehe ñuhu cuan:

—Ma yuhvun. Chino iñun —catyí ra chi ra.

³⁷ Ta ña chaha ra yóo ca cha cuhun chihin ra, notuhun ri ra Pedro ta ra Jacobo ta ra Juan, yañi ra Jacobo. ³⁸ Ta cuhva cha cachaa coyo ra vehe ra cuvĩ nuu vehe ñuhu, nyehe ra cha chacu cha ñáyivi ta caná chaa ñu. ³⁹ Quihvi ra ta catyí ra chi ñu:

—¿Náá tuhun cha iyo xaan cuvĩ ndo, ta chacu ndo tyiña caa? Cuehe luhlu ihya, ña chihĩ cue, quixi cue —catyí ra chi ñu.

⁴⁰ Soco chacu cuehe ri ñu nyehe ñu chi ra. Tyicuan ta ra Jesús tava ra chi tandihĩ ñu, ta quehen ra chi sutu cue ta sihi cue ta chi ra cha chaq coyo chihin ra, ta quihvi coyo ra nu catuví cue. ⁴¹ Ta tiñ ra ndaha cue, ta catyí ra chi cue:

—Talita cumi —ta cuñi chi catyí cuan: Catyí chuun, yoho cuehe luhlu, ¡ndicuita!

⁴² Ta caa cuhva ri cua ndicuita cuehe luhlu cuan. Iyó uchi uvi cuiya cue. Ta cuvĩ nacaca cue. Ta ñáyivi iyó xaan cuñi ñu.

⁴³ Soco ra Jesús ñihĩ chaha ra tuhun chi ñu, tyi ma cahan maa ñu tuhun, ta catyí ra chi ñu na cuhva ñu cha cachi cue.

6

Nu ñoho ra Jesús ñuu Nazaret

(Mt. 13.53-58; Lc. 4.16-30)

¹ Tyicuan caa cuvĩ ta quita ra Jesús yucuan, ta cuanuhu ra nya ñuu ra. Ta ra cachicá noo chihin ra cuahan coyo ra chihin ra. ² Ta chaq quivi nyitatu ñáyivi, ta

quichahā sañaha ra chichi vehe ñuhu. Ta cuaha ñáyivi chifñi tuhun cahán ra, ta iyo cuñí ñu, ta catyí ñu:

—¿Nya cutuhvā ra ihya tandihi tuhun ihya? ¿Yóo cha chahā cha chiñi tuñi ihya chi ra? ¿Yoso caa cha cuví sacuví ra milagru nahnu xaan ihya? ³ ¿Atu ñima ra satyá vitu cuan cuví ra? Sehe cu María cuví chi ra. Ta yañi ra Jacobo, ta ra José, ta ra Judas, ta ra Simón, ta cuhva ra iyó tucu ñu chihin yo ihya —catyí ñu.

Ta quiñi cuñí ñu nyehe ñu chi ra. ⁴ Soco catyí ra Jesús chi ñu:

—Tandihí ñu inga ñuu sahá ñu ñáyivi chi noo ra profeta Nyoo, soco ñu ñuu ra ña quichahá ñu chi ra, ni ñu vehe ra, ni ñáyivi chi ra —catyí ra Jesús.

⁵ Ta ña cuví sacuví ra ni noo milagru yucuan, soco tyisq ra ndaha ra siqui suhva ri ñu cuhví, ta sanduvahā ra chi ñu. ⁶ Ta iyo cuñí ra vatyi ñu ñuu ra ña chinó iñi ñu chi ra. Ta chahān ra tandihí ñuu nyihí cha nyicú yatyin ri cuan, ta sañahā ra.

Nu tyatyíño ra Jesús chi ra cachicá noo chihin ra nu cucahan ra tuhun Nyoo

(Mt. 10.5-15; Lc. 9.1-6)

⁷ Yahā cuan ta canā ra chi ndi uchi uvi ra chicá noo chihin ra, ta quichahā tachi ra chi uvi uvi ra. Ta chahā ra ityi chi ra vatyi tava ñehe ra chi tatyí ña vaha yihí añima ñáyivi. ⁸ Ta catyí ra chi ra vatyi ñahri maa cha cacuiso ra ityi. Ni yono, ni cha cachi ra, ni xuhun. Ñahri maa cuquindaha ra, noo ri yutun tuvi ra cuiso ra. ⁹ Ndicahan ri quihí chaha ra. Ta noo ri sahma cuhno ra, ñima uvi tahan. ¹⁰ Ta catyí ra chi ra:

—Cuhva cha chaa ndo noo ñuu ta quihvi ndo noo vehe, ndqo ndo yucuan ri nyacua nya cha quita ndo ñuu cuan. ¹¹ Ta tatu ñáyivi iyó noo ñuu, ña cuñí ñu tiin cuenda ñu chi ndo, ta ña cuñí ñu tyasoho ñu tuhun cahan ndo, qujta ndo yucuan ta naquisi ndo ñiyaca chaha ndo tari noo seña vatyi ña vaha sacuví ñu. Cha ndicha catyí chi ndo, vatyi quiví cucutuñi chi ñáyivi iyó siqui ñuhu ñáyivi, ñu cha ma cuñi tiin cuenda tuhun cahan ndo, cuaha ca tindoho cunyehe ñu, ta ñima ca ñu ñuu Sodoma ta ñuu Gomorra —catyí ra Jesús chi ra.

¹² Tyicuan ta quitā coyo ra ta chichahān ra tuhun Nyoo chihin ñáyivi na ndu uvi iñi ñu cuatyí ñu, ta na nanducu ñu chi Nyoo. ¹³ Ta catavā ñehe ra cuaha tatyí ña vaha añima ñáyivi. Ta cahyū ra acetye chi cuaha ñu cuhví ta casanduvahā ra chi ñu.

Nu catyí chi yoso caa chihí ra Juan ra sacondutyá chi ñáyivi

(Mt. 14.1-12; Lc. 9.7-9)

¹⁴ Chitq rey Herodes tuhun ra Jesús vatyi tandihí ñáyivi cahán ñu tuhun cha sacuví ra, ta chicá xiñi ra tyehe caa:

—Ra Juan ra sacondutyá chi ñáyivi cuví ra cuan. Nandotq ra cha yahā chihí ra, yucuan chaha iyó tunyee iñi chi ra —chicá iñi ra.

¹⁵ Inga ñu catyí ñu:

—Ra Elías profeta Nyoo ta cha naha cuví ra ihya —catyí ñu.

Ta inga ñu catyí ñu:

—Inga profeta Nyoo cuví ra, tari ra profeta Nyoo ra chiyó ta cha naha.

¹⁶ Cuhva cha chihñi ra Herodes tuhun ihya, catyí ra:

—Ican ra cuan cuví ra Juan cha tyihí tyiño tahnya sucun, ta vityin nandotq ra —catyí ra Herodes.

¹⁷ Tyicuan caa catyí ra Herodes vatyi cha catyí cu Herodías, ta tyihí ra chi ra Juan vehe caa ta chahñi ra chi ra chihin cadena. Cu Herodías cuan, ñasihi ra Felipe, yañi ra Herodes, cuví chi ña. Soco ra Herodes quehen ra chi ña vatyi cuví ña ñasihi ra. ¹⁸ Ta ra Juan catyí ra chi ra Herodes vatyi ña vaha cha cunyaa ra chihin ñasihi yañi ra.

¹⁹ Yucuan chaha cu Herodías tasi xaan cuñí ña nyehe ña chi ra Juan, ta cuñí ña cahñi ña chi ra, soco ña cuví. ²⁰ Vatyi ra Herodes chitq ra vatyi ra Juan cuví ra noo ra vaha, ra ii, ta yuhví ra chi ra. Yucuan chaha sahá cuenda vaha ra chi ra, ña chahā ra cha sacuví ña cha cuñí maa ña chihin ra. Ta vasi ña cuaha cutuñi iñi ra Herodes cha cahán ra Juan soco vaha cuñí ra chihñi ra cha cahán ra. ²¹ Soco cu Herodías ñihí ña noo cuhva nu ndihí ra Herodes cuiya, vatyi sacog ra noo vico cha cuenda ra cacuví tyiño, ta comandante cuenda sindaro, ta ra nahnu ca ityi Galilea cuan. ²²⁻²³ Ta quihvi sehe cu Herodías vico cuan, ta quichaha chitq chaha ña. Ta tahān xaan iñi ra Herodes ta ra cha nyicú cuxiñi chihin ra. Ta tyaa ra cuhva vatyi cuhva ra ñáa cha caan ña chi ra. Ta catyí ra chi ña:

—Çacan ñáa cha cuñún chii, ta cuhve chuun —catyí ra chi ña.

Ta catyí ra vatyi cuhva ra ñáa ri cha cacan ña, vasi sava ñuhv ñuu nu nyacá ñaha ra. ²⁴ Quitā ña ta catyí ña chi sihi ña:

—¿Ñáa cha caquen chi ra? —catyí ña.

Ta catyí sihi ña:

—Çacan xiñi ra Juan ra sacondutyá —catyí ña chi sehe ña.

²⁵ Ta numi ri ndihvi ñaha tyivaa cuan nu nyaá rey Herodes, ta catyí ña chi ra:

—Cuñi vatyi cahnyon xiñi ra Juan ra sacondutyá ta tyihun nuu noo coho ta cuhvon chii vityin vityin —catyí ña chi ra.

²⁶ Tyicuan ta nducuihyā xaan iñi rey cuan. Soco cha tyaa ra cuhva vatyi cuhva ra chi ña, ta siin ri cachihñi ra canyicú chihin ra, ta ña cuñí ra nacahnu ra cha catyí ra chi ña. ²⁷ Numi ri tachí rey cuan tyiño chi noo sindaro na quichi nyaca ra xiñi ra Juan. ²⁸ Chahān sindaro cuan chichi vehe

caa cuan, ta chahnyā ra xiñi ra Juan. Ta quichj nyaca ra, yihí nu noo coho. Tyicuan ta chahā ra chi ñaha tyivaa cuan, ta maa ña nacuhvā ña chi sihi ña.

²⁹ Cha chito ra canyicōn chi ra Juan, chahān coyo ra chinaquehēn ra coño ñuhu ra, ta cachityihj ra chichi ñuhū.

Nu chahā ra Jesús cha cachi ohon mil rayi

(Mt. 14.13-21; Lc. 9.10-17; Jn. 6.1-14)

³⁰ Yahā cuan ta ndu iñ ri ra cha tyatyihō ra Jesús chi chihin ra, ta canacatyj ra tandihj cha casacuvj ra, ta cha casañahā ra nu chahān ra chicahan ra tuhun Nyoo. ³¹ Ta catyj ra Jesús chi ra:

—Ñāha ndo, na nyitatu yo chiin noo nu taxi ri iyó —catyj ra chi ra.

Tyicuan caa catyj ra vatyj cuaha ñáyivj cuahan ta vachi ñu, ta nyacua ña cacuyatyj ra cha cacachi ra. ³² Tyicuan ta maa ri maa ra Jesús ta ra cachicá noo chihin ra cuahan coyo ra chihin noo canoa noo nu yori maa ñáyivj nyicú, minoo nu taxi ri. ³³ Soco cuaha ñu nyehe nu quitā ra. Ta canicohon nuu ñu chi ra. Ta cuahan coyo vavaha ñu chihin chaha ñu, quitā ñu tandihj ñuu ta xihna ca maa ñu chaā coyo. ³⁴ Cuhva cha chaā ra Jesús, quitā ra chichi canoa ta nanyehe ra tyj cuaha xaan ñu nyicú yucuan. Ta cundahvi cuñi ra nyehé ra chí ñu, vatyj nyicú ñu tari mbee cha yori ra sahá cumi chí ti. Ta quichahā sañaha ra cuaha tuhun chí ñu. ³⁵ Cha cua iñi xaan, ta ra cachicá noo chihin ra catuhvā ra ta catyj ra chí ra:

—Cha iñi xaan, ta yucu taxin cuví ihya.

³⁶ Catyj chí ñu, na cuhun ñu ñuu cha nyicú yatyñ ihya, ta sata ñu pan, vatyj ñahri cha cachi ñu iyó ihya —cacatyj ra chí ra.

³⁷ Soco nacahān ra Jesús, ta catyj ra:

—Cuhva maa ndo cha cachi ñu.

Canacahān ra ta catyj ra:

—Vasi saha tyiño ndi iñu yoo, soco ma caña xuhun cha cusata ndi pan cachi tandihj ñu ihya.

³⁸ Ta catyj ra Jesús chi ra:

—¿Yoso tahan pan nyisó ndo? Cuahan ndo cua nyehe ndo.

Ta cuhva cha cachito ra yoso tahan, cacatyj ra chí ra:

—Ohon tahan pan ta uvi tiyaca.

³⁹ Tyicuan ta catyj ra na cunyicú noo noo ticuñi ñu nu cuhu cuii cuan. ⁴⁰ Ta chicunyicú ñu cuenda ciento ta cuenda uvi xico uchi ñu. ⁴¹ Tyicuan ta quehēn ra Jesús ndi ohon tahan pan cuan ta ninduvi tiyaca cuan. Ta nanyehe ndaa ra andivj, ta nacuhvā ra tyahvi nyoo chí Nyoo, ta tahvj ra pan cuan, ta chahā ra chí ra cachicá noo chihin ra na casacha ra. Tyicuan ta casachā ra chí ñáyivj cuan. Yaha cuan ta casachā tucu ra ninduvi tiyaca cuan chí ñu. ⁴² Tandihj ñu cachachj

ta ndaha iñi ñu. ⁴³ Ta nyacua ndoo ca ta casacutj ra uchi uvi tica chihin yiquin pan ta tiyaca. ⁴⁴ Ta ohon mil rayi cachachj pan cuan.

Nu chicá ra Jesús nu miñi
(Mt. 14.22-27; Jn. 6.16-21)

⁴⁵ Tyicuan ta catyj ra Jesús chí ra cachicá noo chihin ra na quihvi coyo ra chichi canoa vatyj cuhun coyo ra ityi nuu nya inga chiyo miñi cuan ñuu Betsaida. Vatyj maa ra Jesús cunasacha xihna ra ñáyivj, tyicuan ta cuhun ra catyj ra. ⁴⁶ Ta cha yaha cuahan coyo ra, ra Jesús cuahan ra nu yucu, cua cacan tahvi ra. ⁴⁷ Ta cuhva cha cuaa, canoa nu ñohó ra cachicá noo chihin ra cha cuahan nya mahñu miñi cuan, ta ndoo noo tuhun ri maa ra. ⁴⁸ Ta nyehe ra vatyj ña cacuvj vaha casacaca ra canoa cuan vatyj ñuhi xaan tatyj. Ta cha ñaa ca cuan tuhvā ra Jesús chicá ra nu ndutya cuan. Ta sahá ri ra cha cua yaha ra nu canoa cuan. ⁴⁹ Soco cananyehe ra chí ra, chicá ra nu ndutya. Ta cacufj maa ra vatyj noo cha sayuhvi cuví, ta cacana chaa ra. ⁵⁰ Vatyj tandihj ra canyehe ra chí ra ta cayuhvj ra. Soco maa ra cahān ra chihin ra ta catyj ra:

—¡Sanyee ndo iñi ndo! ¡Yuhu cuví! ¡Ma yuhvi ndo! —catyj ra.

⁵¹ Quihvi ra chichi canoa nu canyicú ra, ta cutaxin tatyj cuan. Ta iyo xaan cacufñi ra ⁵² cha cuenda vatyj ta cutuñi ca iñi ra milagru cha sacuvj ra chihin pan, vatyj ni ndava ca añima ra.

Nu sanduvahā ra Jesús chí ñu cuhvi ñuu Genesaret
(Mt. 14.34-36)

⁵³ Cayahā sava ra miñi cuan ta cachā coyo ra ñuu Genesaret, ta cachahñj ra canoa cuan yuhu ndutya ri cuan. ⁵⁴ Ta cha quitā coyo ri ra chichi canoa cuan, nicohon nuu ri ñáyivj chí ra Jesús. ⁵⁵ Ta cachino vavaha ñu nicañu ityi cuan sacotó ñu vatyj chaā ra. Ta quichj coyo ñu tandihj ri ñuu, quichj nyaca ñu chí ñu cuhvi chihin chito nya nu nyaá ra Jesús. ⁵⁶ Ta tandihj ri ityi nu quihvi ra chichi ñuu luhlu o chichi ñuu nahnu, o chichi cuhu, chacun ñu chí ñu cuhvi yuhu ityi. Ta chacu ndahvi ñu nuu ra na cuhva ra cha tññ ñu vasi chiin yuhu sahma ra. Ta tandihj ri ñu tññ chí ra, nduvahā ñu.

7

Nu sañahā ra Jesús ñáá cha sativí chí ñáyivj
(Mt. 15.1-20)

¹ Yahā cuan ta ra fariseo ta suhva ra sacuahá cuenda ley vehe ñuhu quichj coyo ra nya ñuu Jerusalén, ta catuhvā ra chí ra Jesús. ² Ta canyehe ra vatyj yihí ra cachicá noo chihin ra Jesús cachachj ra ta

ña nacatya ra ndaha ra tari cuhva cha tahán chi cha costumbre. Yucuan chaha cacahan nyaa ra chi ra. ³ Vatyí ra fariseo ta tandihí ñu Israel cuan nyicón ca ñu costumbre sutu chahnu ñu, vatyí ma cachi ra tatu ma ndoo ndaha ra cuaha chaha tari cuhva costumbre iyó chi ñu. ⁴ Ta tatu nachaa coyo ñu cha chahan ñu nuyahví, ma cachi ñu tatu ma sacuví ñu cuhva cuan cha canacatya xaan ñu ndaha ñu. Ta iyó cuaha ca costumbre cha canyicón ñu. Iyó noo cuhva cha tahán chi nacatya ñu vasu, jarra, ta tandihí ndaha tyiño caa cha iyó chi ñu ta cama ñu ñandihí. ⁵ Tyicuan ta ra fariseo ta ra sacuahá cuenda ley cuan candaca tuhun ra chi ra Jesús, ta catyí ra:

—¿Ñáá tuhun ña sacuví ra nyicón chuun cuhva costumbre sutu chahnu yo? Vatyí ña nacatya ra ndaha ra tari cuhva tahán chi tatu cuacachi ra xita —catyí ra chi ra.

⁶ Ta nacahan ra Jesús, ta catyí ra:

—Ndicha cha cahan ra Isaías tuhun ndo vatyí sahá ndo tyí vaha ndo ta ña ndicha ndo. Catyí ra tyehe caa:

Ñáyivi ihya, chihin yuhu ri ñu catyí ñu tyi cuñí ñu chii.

Soco ñima chihin cha tandihí añima ñu, tyi siin nu nyaá xiñi ñu.

⁷ Ñahri maa tuhun cha sacahnú ñu chii, vatyí cha sañahá ñu chi tahan ñu, maa maa ri maa cuhva sañahá ñáyivi ri cuví, tyaa ra Isaías tuhun ndo.

⁸ Vatyí nyoho sandoó ndo cuhva catyí Nyoo, ta nanyicón ndo cuhva costumbre ñáyivi ri, tuhun cha nacatya xaan ndo ndaha tyiño ndo, ta cuaha cha tyicuan caa sacuví ndo.

⁹ Nyoho sanducaxiñ ndo tuhun cha catyí Nyoo tyí sacuví ndo, tacuhva vatyí cuví sacuví ndo costumbre cha iyó ndo. ¹⁰ Soco ra Moisés catyí ra nu ley cha tyaa ra: “Saha ndo ñáyivi chi sutu ndo ta chi sihi ndo.” Ta catyí tucu ra: “Tandihí ñu cha cahan ña vaha chi sutu o chi sihi ñu, tahan chi cuví ñu.” catyí ra Moisés nu ley Nyoo. ¹¹ Soco nyoho catyí ndo tyi noo ñáyivi cuví catyí ñu chi sutu ñu o chi sihi ñu tyi ma cuví tyinyee ñu chi ñu vatyí tandihí cha iyó chi ñu Corbán cuví. (Cuñí chi catyí: “Cha chahí chi Nyoo cuví.”) ¹² Ta tatu catyí ñu tyicuan caa, ña cuñí ca chi cha tyinyee ñu chi sutu ñu o chi sihi ñu catyí ndo. ¹³ Ta tyicuan caa sacuahiyó ndo tuhun cha catyí Nyoo tyí sacuví ndo, vatyí cuñí ndo sacuví ri maa ndo tuhun cha iyó ndo. Ta cuaha ca cha inuu ri caa sacuví ndo —catyí ra Jesús.

¹⁴ Tyicuan ta cana tucu ra Jesús chi ñáyivi ta catyí ra chi ñu:

¹⁵ —Tyasoho vaha tandihí ndo tuhun cahín, ta natyihí tuñi iñi ndo. Cha quihví yuhu ñáyivi ta chachí ñu, ña cuví sativí chi chi ñu. Soco cha quitá añima ñu, ican cuan

sativí chi ñu. ¹⁶ Nyoho cha cutuñí iñi ndo, tyasoho ndo tuhun cahín —catyí ra Jesús chi ñu.

¹⁷ Tyicuan ta sandoo ra Jesús chi ñáyivi cuan, ta quihví ra chichi vehe. Ta ra cacticá noo chihin ra candaca tuhun ra chi ra ñáá cha cuñí chi catyí tuhun cuan. ¹⁸ Ta catyí ra Jesús chi ra:

—Tu tyicuan caa, ni nyoho, ña cutuñí iñi ndo. ¿Atu ña cutuñí iñi ndo vatyí cha quihví chichi yuhu yo ña sativí chi chi yo? ¹⁹ Vatyí ñima añima yo quihví chi, soco chichi yo. Ta yaha cuan ta quita chi chichi coño ñuhu yo —catyí ra Jesús.

Chihin cuan cuñí ra catyí ra vatyí tandihí nyayu ta vaha cachi yo. ²⁰ Ta catyí tucu ra:

—Cha quitá añima ñáyivi, ican cuan sativí chi ñu. ²¹ Vatyí añima ñu quitá cha ña vaha chicá xiñi ñu, ta sacuví ñu cha ña vaha. Yihí ñu iyó ñu chihin rayi o chihin ñusihi ta ñima ñasihi ra cuví, ta ñima yí ñu cuví. Yihí ñu casuhú ñu. Yihí ñu cachahñi ñu. ²² Yihí ra iyó ñasihi ra ta chicá noo ra chihin inga ñu. Yihí ñu quichi cuví iñi ñu cha chii inga ñáyivi. Yihí ñu sacuví ñu cha quini caa. Yihí ñu sandaví ñaha ñu. Yihí ñu iyó viciu chi ñu. Yihí ñu nyiyo iñi ñu. Yihí ñu ñi ñu cuendu. Yihí ñu cahnú sahá ñu chi ñu. Yihí ñu ña chaa cha chihí tuñi xiñi ñu. ²³ Tandihí tuhun ña vaha ihya, quitá chi ityi chichi añima ñáyivi, ta sativí chi chi ñu —catyí ra chi ra.

Noo ñaha inga ñuu cha chino iñi chi ra Jesús

(Mt. 15.21-28)

²⁴ Yaha cuan ta quita ra Jesús yucuan, ta cuahan ra ityi ñuu Tiro ta Sidón. Quihví ra chichi noo vehe ta ña cuñí ra cha coto ni noo ñáyivi, soco ña cuví tixehe nuu ra. ²⁵ Ta sihi noo ñaha tyivaa cha yihí noo tatyí ña vaha añima, numi ri chitó ña tuhun ra Jesús. Ta chaa ña ta chicuiñi chiti ña nuu ra. ²⁶ Ñaha cuan, ñaha inga ñuu cuví ña, ñaha ñuu Sirofenicia cuví ña. Quichí ña ta chacú ndahvi ña nuu ra Jesús na tava ra tatyí ña vaha cha yihí añima sehe ña. ²⁷ Soco catyí ra Jesús chi ña:

—Saña, ñacachi xihna ca ñu Israel ñu cuví sehe Nyoo, vatyí ña vaha cha tinyaa yo pan chi sehe yo ta cuhva yo cachi ina —catyí ra Jesús chi ña.

²⁸ Ta nacahan ña ta catyí ña:

—Ndicha, Tata, soco ina cuan chachí tucu ti yiquin cha canacoyo xiu mesa cuan —catyí ña chi ra.

²⁹ Tyicuan ta catyí ra Jesús chi ña:

—Vaha nacahun. Ta cha cuenda cuan cuví cuhun, vatyí tatyí ña vaha cha yaha quitá chi añima sehung —catyí ra chi ña.

³⁰ Ta cuhva cha nachaḡ ña vehe ña, catuvi sehe ña nu chito, ta tatyí ña vaha cuan cha yahaḡ quitḡ chi cue.

Nu sanduvahaḡ ra Jesús chi noo ra soho ta ñihi

³¹ Ta quitḡ tucu ra Jesús ñuu Tiro, ta yahaḡ ra ñuu Sidón, ta cuahan ra ityi ñuu cha canañi Decápolis, ta nachaḡ ra miñi Galilea.

³² Nu nyaá ra Jesús yucuan, quichḡ nyaca ñu chi noo ra soho ta ña cuví vaha cahán ra. Ta chacu ndahvi ñu nuu ra Jesús na tyiso ra ndaha ra siqui ra. ³³ Tavaḡ sḡn ra Jesús chi ra ḡn chiyo xiin, nu yori ñáyivi, ta tyihḡ ra nundaha ra chichi soho ra, ta tyaaḡ sḡi ra nu yaa ra. ³⁴ Yucuan ta nanyeheḡ ndaa ra andivi. Ta naxitḡ ra tatyí ra, ta catyí ra:

—¡Efata! —ta cuñi chi catyí: ¡Nuñá! —catyí ra.

³⁵ Ta chihin cuan nuñḡ soho ra soho cuan, ta nduvahaḡ yaa ra, ta nacahan vaha ra. ³⁶ Ta catyí ra Jesús chi ñu tyi yori chihin cahan ñu tuhun, soco tatu catyí ra chi ñu tyicuan caa, ñihi ca canacatyí ñu. ³⁷ Ta iyo cuñi ñu ta catyí ñu:

—Tandihi ta vaha sacuvi ra. Nyacua cuví nacuiñi ñáyivi soho sahá ra ta cuví tucu nacahan ñáyivi ñihḡ ñandihi.

8

Nu chahaḡ ra Jesús cha cachi cumi mil ñáyivi

(Mt. 15.32-39)

¹ Quivi cuan natakaḡ tucu cuaha xaan ñáyivi. Ta ñahri maa cha cachi ñu iyó. Tyicuan ta canḡ ra Jesús chi ra cachicá noo chihin ra, ta catyí ra:

² —Cundahvi cuñi nyehi chi ñáyivi ihya, vatyi cha uñi quivi nyicú ñu ihya chihin, ta ñahri maa cha cachi ñu iyó. ³ Tatu natachi chi ñu nya vehe ñu cucachi ñu, coto coñaa ñu ityi, vatyi yihí ñu cañi quichḡ coyo ñu —catyí ra Jesús chi ra.

⁴ Ta nacahan ra cachicá noo chihin ra, ta catyí ra chi ra:

—¿Soco yoso caa cuhva yo cha cachi ñu ihya, ta yori maa ñáyivi iyó ta xico ñu chi yo?

⁵ Ta ndacaḡ tuhun ra Jesús chi ra, ta catyí ra:

—¿Yoso tahan pan nyisó ndo?

Ta cacatyí ra:

—Ucha tahan.

⁶ Ta catyí ra na cunyicu ñáyivi cuan nu ñuhú. Ta quehen ra ucha pan cuan, ta nacuhvaḡ ra tyahvi nyoo chi Nyoo. Yahaḡ cuan ta tahvi sava ra pan cuan, ta chahaḡ ra chi ra cachicá noo chihin ra, na casacha ra chi ñáyivi cuan. ⁷ Ta canyisó tucu ra suhva tiyaca nyihí. Ta nacuhvaḡ tucu ra Jesús tyahvi nyoo chi Nyoo, ta chahaḡ ra chi ra na casacha ra. ⁸ Tandihí ñu cachachḡ ñu, ta cachitu chichi ñu. Ta casacutu ra ucha

tahan tica chihin yiquin cha ndoo ca. ⁹ Ta cha cumi mil tahan ñu cachachḡ. Yahaḡ cuan ta catyí ra Jesús chi ñu na cunuho coyo ñu. ¹⁰ Ta quihvi ra chichi noo canoa chihin ra cachicá noo chihin ra. Ta cuahan coyo ra ityi Dalmanuta.

Nu cacatyí ra fariseo chi ra Jesús na sacuvi ra noo milagru

(Mt. 16.1-4; Lc. 12.54-56)

¹¹ Tyicuan ta cachaḡ coyo ra fariseo, ta quichaha cuví yuhu ra chihin ra Jesus. Ta cacatyí ra chi ra na sacuvi ra noo milagru tatu ndicha cha Nyoo tachḡ chi ra. Tyicuan caa catyí ra vatyi cuñi ra nducu nyehe ra chi ra. ¹² Ta ra Jesús uhvi uhvi naxitḡ ra tatyí ra, ta catyí ra:

—¿Ñáá tuhun cha chicán ñáyivi iyó vityin milagru? Cha ndicha catyí chi ndo vatyi ma sacuvi ni noo milagru nyehe ndo —catyí ra chi ra.

¹³ Tyicuan ta sandoḡ ra chi ra, ta nandihvi ra chichi canoa ta cuahan ra inga chiyo miñi.

Cuhva iyó ra fariseo tari yuchan iya cuví, catyí ra Jesús

(Mt. 16.5-12)

¹⁴ Naa iñi ra cachicá noo chihin ra Jesús cacuiso ra cha cacachi ra. Ta noo pan ri ñohó chihin ra chichi canoa cuan. ¹⁵ Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra Herodes —catyí ra chi ra.

¹⁶ Ta ra cachicá noo chihin ra quichaha cacatyí ra chi ra tahan ra:

—Cha cuenda vatyi ñahri pan nyisó yo, yucuan cuenda cahḡn ra tuhun cuan —catyí ra chi ra tahan ra.

¹⁷ Tuví iñi ra Jesús cha ndatuhún ra, ta catyí ra chi ra:

—¿Ñáá tuhun cha catyí ndo tyi ñahri pan nyisó ndo? ¿Atu ta cutuñi ca iñi nyoho? ¿Atu ta coto ca ndo? ¿Atu ni ndava xaan añima ndo? ¹⁸ Nyaá chiti nuu ndo, ¿atu ña nyehé ndo? Nyaá soho ndo. ¿Atu ña chiñi ndo? ¿Atu ña nicohon iñi ndo? ¹⁹ quivi cha sachḡ ohon tahan pan cuan chi ndi ohon mil rayii? ¿Yoso tahan tica yiquin naquehen ndo? —catyí ra Jesús, ndacaḡ tuhun ra chi ra cachicá noo chihin ra.

Ta maa ra cacatyí ra:

—Uchi uvi.

²⁰ Ta catyí tucu ra Jesús chi ra:

—Ta quivi sachḡ ucha tahan pan chi cumi mil ñu, ¿yoso tahan tica tyitu nacoñehḡ ndo?

Ta cacatyí ra:

—Ucha tahan.

²¹ Tyicuan ta catyí ra Jesús chi ra:

—¿Atu ta cutuñi ca iñi ndo? —catyí ra chi ra cachicá noo chihin ra.

Nu sanduvahā ra Jesús chi noo ra cuaa ñuu Betsaida

²² Yaha cuan ta chaā ra Jesús chihin ra cachicá noo chihin ra nya ñuu Betsaida. Ta quichī nyaca ñu chi noo ra cuaa. Ta cachacu ndahvi ñu nuu ra na tīn ra chi ra. ²³ Tyicuan ta tīn ra ndaha ra cuaa cuan, ta cuahan ra chihin ra ityi chata ñuu. Ta tyaā sī ra chiti nuu ra, ta tyisq ra ndaha ra siqui ra, ta ndaca tuhun ra chi ra tatu cuvī nyehe ra chiin. ²⁴ Ra cuaa cuan nanyehe ra ta catyī ra:

—Nyehi in cahnu ri maa chi ñáyivi. Cuhva caa yutun caa ñu cahvi iñi, soco chicá ñu —catyī ra.

²⁵ Tyicuan ta tīn tucu ra Jesús chiti nuu ra inga chaha, ta maa ra nanyehe vaha ra ta nduvahā ra. Nanyehe cachi vaha ra tandihi. ²⁶ Tyicuan ta natachi ra Jesús chi ra ta catyī ra chi ra:

—Ma quihvun chichi ñuu ta ni yori chihin cahun tuhun.

Nu catyī ra Pedro vatyi ra Jesús cuvī Cristo

(Mt. 16.13-20; Lc. 9.18-21)

²⁷ Yaha cuan ta chahan ra Jesús chihin ra cachicá noo chihin ra ñuu cha ca iyó Cesarea Filipu. Ta ityi cuahan ra, ta ndaca tuhun ra chi ra cachicá noo chihin ra, ta catyī ra:

—¿Ñáá catyī ñáyivi? ¿Yóó ra cuvī yuhu? —catyī ra chi ra.

²⁸ Ta canacahan ra ta catyī ra:

—Yihí ñu catyī ñu tyi ra Juan ra sacondutyá chi ñáyivi cuvún. Inga ñu catyī ñu tyi ra Elías cuvún. Ta inga ñu catyī ñu tyi inga ra profeta Nyoo cuvún —cacatyī ra chi ra.

²⁹ Tyicuan ta ndaca tuhun ra chi ra, ta catyī ra:

—¿Ta nyoho, yóó ra cuvī yuhu, cuñi tucu nyoho?

Ra Pedro catyī ra chi ra:

—Yoho cuvī Cristo.

³⁰ Soco catyī ra Jesús chi tandihi ra tyi yori chihin cacahan ra tuhun cuan.

Nu cahan ra Jesus tuhun tyi cucuvi ra

(Mt. 16.21-28; Lc. 9.22-27)

³¹ Tyicuan ta quichahā sañaha ra vatyi Rayi cha quichī nya gloria cunyehe ra cuaha xaan tindoho. Ta ra mandoñi ta ra cacuvi nuu chi tata sutu ta ra casacuahá cuenda ley vehe ñuhu ma cuñi ra natiin cuenda ra chi ra. Catyī ra Jesús chi ra vatyi cucañi ñu chi ra soco chichi cha cu uñi quivi cunandoto ra. ³² Catyī cachi ra chi ra tuhun ihya. Tyicuan ta tavā siin ra Pedro chi ra ta quichaha catyī ra tyi ña vaha cha cahan ra cha tyicuan caa. ³³ Soco ra Jesús nanyocavā ra, ta nanyehe ra chi inga ra cachicá noo chihin ra. Ta quichaha cahan ra chi ra Pedro ta catyī ra:

—¡Cuāchiyo chuun nui, cuihna! Vatyi yoho ña chicá xiñun tari cuhva chicá xiñi

Nyoo, soco tari chicá xiñi ñáyivi, chicá xiñun —catyī ra Jesús chi ra Pedro.

³⁴ Tyicuan ta canā ra Jesús chi ñáyivi ta chi ra cachicá noo chihin ra ta catyī ra chi ñu:

—Tatu nya ndo cuñi ndo cunyicon ndo chii, cuñi chi cahnya ndo iñi ndo tuhun maa ndo. Ta ma ndu uvi iñi ndo cha yihí ndo cuende vasi nyehe ndo tindoho cha cuende. Vatyi yucuan cuvī cruzi cha tahán chi cuiso ndo. ³⁵ Vatyi nya ndo ña cuñi ndo cuvī ndo cha cuende, suri cha cúvi maa ndo cuvī, ta cuhun ndihí ndo anyaya. Soco nya ndo cuhva ndo ñáyivi ndo cha cuende ta cha cuenda tuhun Nyoo, cucuca añima ndo. ³⁶ Tatu sacunaa ndo añima ndo anyaya, ¿ñáá ri tuhun cha saha ganaa ndo tandihi cha tyayii cha iyó siqui ñuhu ñáyivi? ³⁷ Vatyi tatu sacunaa ndo añima ndo, ñahri maa cha iyó cha cuvī cuhva ndo ta sacacu ndo añima ndo. ³⁸ Tatu nya noo ndo cucahan nuu ndo nyehe ndo chii, ta cucahan nuu ndo tuhun cahún nuu ñáyivi cha iyó cuatyī ta ña quichahá tuhun Nyoo, yuhu Rayi cha quichī nya gloria cucahan tucu nuu mai nyehi chi ndo quivi quichi tiqi chihin ángel cuenda Nyoo. Vatyi cuquichi chihin cha tyaqui maa Suti.

9

¹ Cha ndicha catyī chi ndo, vatyi yihí ndo cha nyicú ndo ihya, ma cúvi ñaha ndo nyacua nya nyehe ndo yoso caa nyacá ñaha Nyoo. Vatyi cuquichi chihin tunyee iñi ra —catyī ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra

(Mt. 17.1-13; Lc. 9.28-36)

² Iñu quivi yaha ta cuahan ra Jesús noo yucu sucun. Ta ra Pedro, ra Jacobo, ta ra Juan ri cuahan coyo chihin ra. Ta yucuan nasamā cuhva caa nuu ra Jesús. ³ Nduxiño xaan sahma ra ta cuichin xaan nanduvj. Yori maa siqui ñuhu ñáyivi ihya cuvī nacatya ta nducuichin tyicuan caa. ⁴ Ta cananyehe ra tyi nanyaá ra Elías ta ra Moisés, candatuhún ra chihin ra Jesús. ⁵ Tyicuan ta ra Pedro catyī ra chi ra Jesús:

—Maestro, ¡vaha xaan cha nyicú ndi ihya! Na savaha ndi uñi tahan tyahva: noo cha cuenda maun, ta noo cha cuenda ra Moisés, ta nonga cha cuenda ra Elías —catyī ra Pedro, ⁶ vatyi ña chitó ra ñáá tuhun cahán ra. Vatyi maa ra ta inga ra cayuhvi ra.

⁷ Tyicuan ta noo xica noo vico siqui ra ta sahvī chi ra. Ta chichi vico cuan tyacu noo ndusu cha catyī:

—Ican ihya cuvī Sehi, ta cuñi xain chi ra. Tyāsoho ndo tuhun cahan ra —catyī ndusu cuan.

⁸ Ta cuhva cha cananyehe ra, yori ca ra tayucú chihin ra, noo ri ca maa ra Jesús.

⁹ Cuhva cha cuano coyo ra yucu cuan, catyí ra Jesús chí ra tyi ma cacahan ra tuhun cha canyehę ra yucuan, soco nya yaha cha nandoto Rayii cha quichi nya gloria, tyicuan ta cuvi cahan ra tuhun. ¹⁰ Yucuan chaha ña cacahan maa ra tuhun, vasi cacatyí ra chí tahan ra ñana vaha tuhun cuví cha cunandoto ra. ¹¹ Tyicuan ta quichahę candaca tuhun ra chí ra Jesús:

—¿Ñáá tuhun cha catyí ra casacuahá cuenda ley vehe ñuhu vatyí cuquichi xihna ca ra Elías?

¹² Ta nacahan ra, ta catyí ra:

—Cha ndicha vatyí xihna ca ra Elías nyaá quichi ta sanduvaha ra tandihi. ¿Ta yoso caa catyí tuhun Nyoo cuenda Rayii cha quichi nya gloria? Catyí chí tyi cunyehe ra tindoho, ta ma cuñi nyehe ñáyivi chí ra. ¹³ Soco yuhu catyí chí ndo tyi cha yaha quichi ra Elías. Ta sacuví maa ñáyivi cha cuñi ñu chihin ra, tari cuhva catyí nu tutu Nyoo cha cucuvi chí ra —catyí ra Jesús chí ra.

Nu sanduvahę ra Jesús chí noo ra tyivaa cha yihí noo tatyí ña vaha chí

(Mt. 17.14-21; Lc. 9.37-43)

¹⁴ Yaha cuan ta nachaę coyo ra nu nyicú inga ra cachicá noo chihin ra Jesús. Ta canyehę ra tyi cuaha ñáyivi tayucú nicachico. Ta nyicú tucu ra sacuahá cuenda ley yucuan, ta cacuví yuhu ra chihin ra. ¹⁵ Tyicuan ta cha nanyehę ñu chí ra Jesús, tandihi ñu iyo cuñi ñu, ta cachino ñu chicuhva ñu nocumi chí ra. ¹⁶ Tyicuan ta ndaca tuhun ra Jesús chí ra cacuví yuhu cuan ta catyí ra:

—¿Ñáá cuenda cuví yuhu xaan ndo? —catyí ra chí ra.

¹⁷ Ta noo ra nanyaá chichi cha cuaha ñáyivi yucuan, nacahan ra ta catyí ra:

—Maestro, ihya vachi nyaque chí sehi. Yihí noo tatyí ña vaha chí cue ta sacuíhi chí cue. ¹⁸ Vatyí tandihi ri nu tiiñ tatyí cuan chí cue, sanduva chí cue nu ñuhú, ta yucuan quita tiñi yuhu cue ta cahñi noho cue. Ta ndundava cue. Cha catyí chí ra cachicá noo chuhun na tava ra tatyí ña vaha cuan, soco ña cacuví chí ra —catyí ra cuan chí ra Jesús.

¹⁹ Nacahan ra Jesús ta catyí ra:

—¿Nyoho ñu ña chinó iñi cuví ndo! ¿Yoso tahan ca quivi cunyai chihin ndo ta cunyei tisihi ndo nyacua nya cha cutuhva ndo ta chino iñi ndo chii?

Ta catyí ra chí ra cuan:

—Nyaca chí ra luhlu chiña tyehe —catyí ra.

²⁰ Quichi nyaca ra chí ra luhlu cuan. Ta cuhva cha nanyehę tatyí cuan chí ra Jesús, quehen tatyí cuan chí cue. Ta nduvę cue nu ñuhú, sacañuhú cue chí cue, ta quita tiñi yuhu cue. ²¹ Tyicuan ta ndaca tuhun ra Jesús chí sutu cue:

—¿Ama quichaha cuvi chí ra tyehe caa? —catyí ra chí ra.

Ta nacahan sutu cue, ta catyí ra:

—Nyata luhlu ra. ²² Ta cuaha chaha tyihí tatyí ña vaha ihya chí cue nu cayú ñuhú, o nu ndutya. Cuñi chí cahñi chí chí cue. Soco tatu cuví chuun, cundahvi cuñi nyehun chí ndi, ta tyinyeun chí ndi —catyí sutu cue chí ra Jesús.

²³ Ta catyí ra Jesús chí ra:

—Tatu chinó iñun, tandihi ta cuví cha cuenda ñu chino iñi —catyí ra Jesús.

²⁴ Tyicuan ta sutu cue canachaę ra ta catyí ra:

—¿Chinó iñi! ¡Tyinyee chii na chino ca iñi! —catyí ra chí ra Jesús.

²⁵ Cuhva cha nyehe ra Jesús tyi cuaha ñáyivi candu iin ri, ta tava ñehe ra chí tatyí ña vaha cuan, ta catyí ra:

—Yoho tatyí ña vaha cha sañihí ta sasohó chí cue ihya, catyí chuun, na quiton. Saña chí ra luhlu ihya, ta ma ndihvi con chí ra —catyí ra Jesús chí tatyí ña vaha cuan.

²⁶ Ta tatyí cuan quíni xaan canachaę ta na quisi chí chí cue inga chaha ta quita. Ta sandoę tatyí cuan chí cue tari noo ndiyi. Ta cuaha ñu tatyí vatyí cha chihí cue. ²⁷ Soco tiiñ ra Jesús ndaha cue, ta nacoñehę ra chí cue, ta nicuinanyaę cue.

²⁸ Tyicuan ta quihvi ra Jesús noo vehe, ta ra cachicá noo chihin ra candaca tuhun ra chí ra ta catyí ra:

—¿Ñáá tuhun ña cuví tava ndi chí tatyí ña vaha cuan?

²⁹ Ta catyí ra Jesús:

—Cha cuenda vatyí tahan tatyí ña vaha ihya, quita, soco chihin cha ma cachi yo ta cacan tahvi yo chí Nyoo —catyí ra chí ra.

Nu cahán ra Jesús tuhun inga chaha vatyí cucúvi ra

(Mt. 17.22-23; Lc. 9.43-45)

³⁰ Quivi cha quita coyo ra yucuan, yaha coyo ra ityi Galilea. Ta ña cuñi ra Jesús cha coto ñáyivi. ³¹ Vatyí sañahá ra chí ra cachicá noo chihin ra. Ta catyí ra chí ra vatyí Rayii cha quichi nya gloria cunacuhva cuenda ñu chí ra ndaha ñáyivi. Ta cucahñi ñu chí ra, soco cha cu uñi quivi cunandoto ra. ³² Soco ña cacutuñi iñi ra tuhun cahán ra chihin ra. Ta cayuhvi ra candaca tuhun ra chí ra.

¿Yóo ra cahnu ca?

(Mt. 18.1-5; Lc. 9.46-48)

³³ Tyicuan ta cachaę coyo ra ñuu Capernaum. Ta cuhva cha nyicú ra nya vehe, ra Jesús ndaca tuhun ra chí ra ta catyí ra:

—¿Ñáá tuhun cuví xaan yuhu nyoho ityi vachi yo? —catyí ra ndaca tuhun ra.

³⁴ Taxi taxi cacuví ra, vatyí ityi vachi coyo ra, ta cacuví yuhu ra nya ra cuví ra ra cahnu ca. ³⁵ Tyicuan ta chicunyaę ra Jesús ta cana

ra chi ndi uchi uvi ra chicá noo chihin ra, ta catyí ra chi ra:

—¿Nya ndo cuñí ndo cuvi ndo nuu, cuñí chí cha cuví ndo ra nu ndíhi cha nuu tandíhi ra, ta sacuví ndo tyiño nuu tandíhi ra? —catyí ra Jesús chi ra.

³⁶ Tyicuan ta quehen ra chi noo ra cuehe luhlu ta chinanyaá ra chi cue mahñu ra. Ta tyihí sucun ndaha ra chi cue, ta catyí ra:

³⁷ —Ñáyivi cha natíin cuenda chi noo ra cuehe luhlu chihin sívi, chi yuhu natíin cuenda ñu. Ta ñu natíin cuenda chíi, ñima chi yuhu ri natíin cuenda ñu, soco chí ra cha tachí chíi ñandíhi.

Tatu ña cuahan ñáyivi siquiyo, tumañi iñi chi yo cuahan ñu

(Mt. 10.42; Lc. 9.49-50)

³⁸ Tyicuan ta catyí ra Juan chi ra Jesús:

—Maestro, nyehe ndi chi noo ra cuan ta chihin sívun tavá ñehe ra chi tatyí ña vaha. Soco vatyi ñima chihin yo chicá noo ra, catyí ndi chí ra tyi ma sacuví ca ra —catyí ra Juan chí ra Jesús.

³⁹ Soco catyí ra Jesús chi ra:

—Ma casi ndo. Vatyi ni noo ra cha casacuví milagru chihin sívi ta yaha cuan ta caña iñi ra cahan ña vaha ra siqui. ⁴⁰ Vatyi ñu cha ña cuahan siqui yo, tumañi iñi chí yo cuahan ñu. ⁴¹ Tatu cuhva noo ñu, vasi noo vasu ndutya coho ndo chihin sívi, cha cuenda vatyi ñu cuenda yuhu ra Cristo cuví ndo, cha ndícha vatyi cuñíhi ñu cha cuacuhva Nyoo chí ñu.

Yica xaan cha sanacava yo chí noo yañi yo nu cuatyí

(Mt. 18.6-9; Lc. 17.1-2)

⁴² Tatu yóó ñu sanacava nu cuatyí chi noo ñu chinó iñi chíi, vaha taxin ca cuñí ñáyivi noo yuu sucun ñu ta tuchi ñu chí ñu cuan nu tyañuhu. ⁴³ Tatu ndahun sanacavá chuun nu cuatyí, vaha taxin ca çahnya. Vatyi vaha ca cha quihvun nu coun chihin Nyoo chihin cha luu ndahun ta ñima ca chihin cha ninduvi ndahun ta cuhun anyaya nu cayú ñuhú cha ma ndahva ca maa. ⁴⁴ Ta yucuan ña chíhi tindacu chachí chí ñu, ta ñuhú ña ndahva maa ni noo chaha. ⁴⁵ Ta tatu chahun ta sanacavá chuun nu cuatyí, vaha taxin ca çahnya. Vatyi vaha ca cuhun nu coun chihin Nyoo chihin cha luu chahun ta ñima ca chihin cha ninduvi chahun ta tuchi Nyoo chuun anyaya. Vatyi yucuan ma ndahva ca maa ñuhú. ⁴⁶ Ta ña chíhi tindacu chachí chí ñu, ta ñuhú ni noo chaha ña ndahva. ⁴⁷ Ta tatu noo chíti nuu sanacavá chuun nu cuatyí, vaha taxin ca çava. Vatyi vaha ca cha quihvun nu nyacá ñaha Nyoo chihin noo chíti nuu ta ñima ca chihin ninduvi chíti nuun ta tuchi Nyoo chuun anyaya. ⁴⁸ Vatyi yucuan ña chíhi

tindacu chachí chí ñu, ta ni noo chaha ña ndahva ñuhú.

⁴⁹ Soco tandíhi ñu nyicon chíi, tari cha cayú ñu chihin ñuhú tatu nyehe ñu tindoho cha cuende, vatyi chihin cuan cua sanduvaha Nyoo chí ñu, tari nduvaha nyayu chihin ñi. ⁵⁰ Ñi vaha xaan. Soco tatu ndíhi cha uhva, ¿yoso caa cuví cotyiño yo inga chaha? Tyicuan caa tucu nyoho, ma sandíhi ndo cha coo tuhun Nyoo añima ndo cha cuví tari ñi vaha. Tyicuan caa ta coo taxi ri ndo chihin tahan ndo.

10

Nu sañahá ra Jesús tyi ña vaha sandoo rayi chí ñasíhi ra

(Mt. 19.1-12; Lc. 16.18)

¹ Quitá ra Jesús Capernaum ta cuahan ra ityi Judea nya inga chíyo yutya Jordán. Yucuan candú in ri ñáyivi inga chaha nu nyaá ra, ta quichahá sañaha tucu ra chí ñu tari tuhvá maa ra. ² Tyicuan ta suhva ra fariseo catuhvá ra nu nyaá ra Jesús, vatyi nducu ra cuhva tyaa ra cuatyí siqui ra. Ta candaca tuhun ra chí ra tatu vaha cha sandoo noo rayi chí ñasíhi ra. ³ Tyicuan ta nacahan ra Jesús ta catyí ra:

—¿Ñáá cha catyí ra Moisés tyi sacuví ndo?

⁴ Ta canacahan ra ta cacatyí ra:

—Ra Moisés chahá ra cha cuví cahnya noo ra tutu cha tandaha ra tyicuan ta cuví sandoo ra chí ñasíhi ra —catyí ra chí ra.

⁵ Tyicuan ta catyí ra Jesús chí ra:

—Catyí ra Moisés cha sacuví ndo tyicuan caa soco cha cuenda cha ndava añima ndo.

⁶ Soco quivi xihna ri, quivi savahá Nyoo tandíhi maa, savahá ra rayi ta ñaha síhi.

⁷ “Yucuan cuenda sandoó rayi chí sutu ra ta chí síhi ra vatyi ndu in ri ra chihin ñasíhi ra. ⁸ Ta chíhi cha ninduvi tahan ñu cucuvi ñu tari cha noo ri ñáyivi.” Yucuan chaha ñima ca uvi tahan cuví ñu, soco cha nanduvi ñu noo ri ñáyivi. ⁹ Yucuan chaha, ña tahn chí cha sasín ñáyivi cha sandú in ri Nyoo —catyí ra Jesús chí ra.

¹⁰ Yaha cuan ta nachaa coyo ra nya vehe, ta quichahá ndaca tuhun ra cachicá noo chihin ra inga chaha siqui tuhun cuan. ¹¹ Ta catyí ra Jesús chí ra:

—Ra cha sandoó ñasíhi ta tandaha ra chihin inga ñu, chicoó cuatyí ra vatyi ña vaha sacuví ra chihin ñasíhi ra, ñaha cha xihna ri cuan. ¹² Ta tyicuan caa tucu ñusíhi. Tatu sandoó ñu chí yí ñu ta tandaha ñu chihin inga ra suri chicoó tucu cuatyí ñu —catyí ra Jesús.

Nu nasoco ra Jesús chí ra cuatyaa

(Mt. 19.13-15; Lc. 18.15-17)

¹³ Tyicuan ta quichí nyaca ñu suhva ra cuatyaa chí ra Jesús tacuhva natyiso ra ndaha ra siqui ndotyin. Soco ra cachicá noo chihin

ra ña chahá ca ra cha quichi nyaca ñu chi ndotyin. ¹⁴ Soco cuhva cha nanyehę ra Jesús, cuxaan ra. Ta catyí ra chi ra:

—Saña ndo. Na quichi nyaca ñu chi ra cuatya nu nyaí. Ta ma casi ndo. Vatyí ñu nyacá ñaha Nyoo aña, cuví ñu chinó iñi chi Nyoo tari chinó iñi ra cuatya ihya. ¹⁵ Cha ndicha catyí chi ndo vatyí tatu ma nacuhva cuenda ndo chi ndo chi Nyoo tari noo ra cuatya chihin sutu ndotyin, ma cuví quihvi ndo nu nyacá ñaha Nyoo —catyí ra Jesús chi ra.

¹⁶ Ta quehen ra chi noo noo ndotyin ta tyihí sucun ndaha ra. Ta tyiso ra ndaha ra siqui ndotyin, ta chicān tahvi ra chaha ndotyin.

Nu ndatuhún minoo ra tyivaa tyayii chihin ra Jesús

(Mt. 19.16-30; Lc. 18.18-30)

¹⁷ Yaha cuan ta cuahan ra Jesús. Ta chingo vavaha noo ra cuan chata ra ta chicuñi chiti ra nuu ra, ta ndacā tuhun ra chi ra, ta catyí ra:

—Maestro, ra vaha cuvún. ¿Yoso caa sacuvi ta ñihi ñayivi cha ma naa ca maa coi? —catyí ra chi ra Jesús.

¹⁸ Ta catyí ra Jesús chi ra:

—¿Yoso caa chitón tyi vahi? Noo ri ra vaha iyó, ta ican ra cuan cuví Nyoo. (Ta cha catyún tyi vahi, nacotón tyi Nyoo cuví.) ¹⁹ Yoho cha chitón cha catyí Nyoo cha sacuvi yo: “Ma coun chihin inga ñusihi tatu ñima ñasihun cuví. Ma cahñun. Ma suhun. Ma cahun cuendu siqui ni noo ñu. Ma sandavi ñahun. Sahun ñayivi chi sutun ta chi sihun” —catyí ra Jesús chi ra.

²⁰ Ta nacahan ra cuan ta catyí ra:

—Maestro, tandihi ihya cha sacuvi nyata luhli —catyí ra.

²¹ Tyicuan ta cusii cuñí ra Jesús nanyehę ra chi ra. Ta catyí ra chi ra:

—Cumañi noo ri ca cha cumañi chuun. Cuahan ta xcon tandihi cha iyó chuun ta cuhvon chí ñu ndahvi. Tyicuan ta coo cha tyayiu nya andivi. Yaha cuan ta quichun cunyicon chii vasi nyehún tindoho —catyí ra Jesús chi ra.

²² Soco cha chihí ra tuhun cahan ra Jesús tyehe caa, nducuihyá iñi ra, ta cuihya xaan cuanuhu ra vatyí tyayii xaan ra.

²³ Tyicuan ta nanyehę ra Jesús nicachico chata ra, ta catyí ra chi ra cachicá noo chihin ra:

—iÑana cha yí ta cuvi nacuhva cuenda ñu tyayii chí ñu na cunyaca ñaha Nyoo chí ñu! —catyí ra chi ra.

²⁴ Iyo cacuñi ra cachicá noo chihin ra tuhun cahan ra. Soco catyí ra Jesús chí ra inga chaha:

—Sehi, ñu cha tyaa xaan xiñi cha tyayii, iyii xaan quihvi ñu nu nyacá ñaha Nyoo!

²⁵ Tañi tyehe yaha noo camellu xiu noo yiqui ticu, ta ñima ca cha cuhva noo ñu tyayii cunyacá ñaha Nyoo chí ñu —catyí ra Jesús.

²⁶ Cha cachihí ra tuhun ihya, iyo xaan cacuñi ra, ta candacā tuhun ra chí ra tahan ra, ta catyí ra:

—Tu tyicuan caa, ¿yóó cha cuví cacu aña? —catyí ra.

²⁷ Nanyehę ra Jesús chí ra ta catyí ra chí ra:

—Ñayivi ña cuví sacuvi ñu ihya. Soco Nyoo cuví chí ra. Vatyí cha cuenda Nyoo ñahri cha yí sacuvi ra.

²⁸ Tyicuan ta catyí ra Pedro chí ra:

—Sutu Mañi yuhu, nyuhu sandoo ndi tandihi cha iyó chí ndi, ta vityin nyicón ndi chuun.

²⁹ Nacahan ra Jesús ta catyí ra:

—Cha ndicha catyí chí ndo vatyí tandihi ñu sandoo vehe, o yañi, o cuhva, o sutu, o sihi, o ñasihi, o sehe, o ñuhú, cha cuenda yuhu ta cha cuenda cha sacoto ñu chí ñayivi tyi cuñí Nyoo sacacu ra chí ñu, ³⁰ cuañihi ñu ciento chaha siqui cha sandoo ñu ihya ñuhu ñayivi. Cuañihi ñu vehe ta yañi ñu, ta cuhva ñu, ta sihi ñu, ta sehe ñu, ta ñuhú, vasi sanyehę ñayivi tindoho chí ñu. Soco inga ñayivi cha vachi, cuñihi ñu ñayivi cha ma naa ca maa. ³¹ Soco cuaha xaan ñu cha cuvi nuu vityin, ñu nu ndihi cucuvi ñu. Ta cuaha xaan ñu cuví ñu nu ndihi vityin, ican ñu cucuvi nuu —catyí ra Jesús.

Nu cahán ra Jesús inga chaha tyi cucuvi ra
(Mt. 20.17-19; Lc. 18.31-34)

³² Cuahan coyo ra ndaa ra ityi cuahan ñuu Jerusalén, ta ra Jesús cuahan ra ityi nuu ñu nyicón chí ra. Ta maa ñu iyo cuñí ñu ta chihin cha yuhvi ñu cuahan coyo ñu chata ra. Tyicuan ta cana siin ra chí ndi uchi uvi ra cachicá noo chihin ra. Ta quichahā catyí ra cha cucuvi chí ra. ³³ Ta catyí ra:

—Tari cuhva nyehé ndo vityin, cua ndaa yo ityi cuahan ñuu Jerusalén nu cucuhva cuenda ñu chí yuhu Rayii cha quichi nya gloria chí ra cuví nuu chí tata sutu, ta chí ra sacuahá cuenda ley vehe ñuhu. Ta cucatyí ra tyi cucuvi ta cucuhva cuenda ra chii chí ra inga ñuu. ³⁴ Ta cucuacu nyaa ra chii, cucañi ra chii, cutyicu sii ra chii. Ta cucahñi ra chii. Soco cha cu uñi quivi cunandote cha yaha cúvi —catyí ra Jesús.

Nu cachicān ra Jacobo ta ra Juan noo tumañi iñi chí ra Jesús

(Mt. 20.20-28)

³⁵ Tyicuan ta ra Jacobo ta ra Juan, ra cacuvi sehe ra Zebedeo, catuhva ra nu nyaá ra Jesús, ta catyí ra chí ra:

—Maestro, cuñi ndi cha sahun noo tumañi iñi chí ndi —catyí ra.

³⁶ Ta ndacā tuhun ra Jesús chí ra:

—¿Ñáá cha cuñí ndo cha sacuvi cha cuenda ndo?

³⁷ Ta canacahan ra ta catyí ra:

—Cuhva cha cunyaa ndi chuhun nu nyacá ñahun, noo ndi chiyo vahun, ta inga ndi chiyo satyun —catyí ra chi ra Jesús.

³⁸ Tyicuan ta catyí ra Jesús chi ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cuanyehe yuhu? ¿Atu cuví cuhun ndo tuhun chihí tari cuhun yuhu? —catyí ra chi ra.

³⁹ Ta canacahan ra:

—Cuví chi ndi.

Ta ra Jesús catyí ra:

—Cha ndicha vatyí cunyehe ndo tindoho ta cuhun ndo tuhun chihí tari cuhun yuhu.

⁴⁰ Soco tuhun cha cunyaa ndo chiyo vahí ta chiyo satyín, ñima yuhu tahán chi cuhve chí ndo, soco maa Nyoo cucatyí yóo cha cuñihí nyatu cuan —catyí ra Jesús chí ra.

⁴¹ Cha cachiñí uchi ca tahan ra chicá noo chihin ra Jesús tuhun cuan, cacuxaan ra chihin ra Jacobo ta ra Juan. ⁴² Soco cana ra Jesús chí ra ta catyí ra chí ra:

—Chitó nyoho vatyí ra canyacá ñaha chí ñáyiví siquí ñuhu ñáyiví, ñihí xaan yosó ra siquí ñu. ⁴³ Soco ñima tyicuan caa tahán chí sacuvi nyoho. Vatyí ra cuñí cucahnú ca, cuñí chí cuví ra musu tandihí ca ndo. ⁴⁴ Ta nya nyoho cha cuñí ndo cuví ndo nuu, cuñí chí cuví ndo musu tandihí ca ñu. ⁴⁵ Vatyí ní ri yuhu Rayí cha quichí nya gloria ta ña vachí vatyí sacuvi ñáyiví tyiño nuí. Soco vachí vatyí sacuvi tyiño nuu ndo. Ta vachí vatyí cuhve ñáyiví tari noo cha cutiyahví ta cusacaquí cuaha ñáyiví —catyí ra Jesús.

Nu sanduvahá ra Jesús chí ra Bartimeo ra cha cuaa

(Mt. 20.29-34; Lc. 18.35-43)

⁴⁶ Tyicuan ta cachahá coyo ra ñuu Jericó. Ta cua yaha ri ra ñuu cuan. Ta cuhva cha quitá ra Jesús ñuu cuan cuaha xaan ñáyiví cuahan chata ra, ñn ri chihin ra cachicá noo chihin ra. Ta yucuan nyaá noo ra cuaa cha nañí Bartimeo. Sehe ra Timeo cuví chí ra. Nyaá ra cuan yatyín ri yuhu ityí cuan, chicán ra caridaa. ⁴⁷ Ta cha chiñí ra cuaa cuan tyí cua yaha ra Jesús ra ñuu Nazaret, quichahá cana chaa ra, ta catyí ra:

—¡Yoho Jesús, ra vachí tata ra David, cundahví cuñí chii! —catyí ra canachaá ra.

⁴⁸ Cuaha ñu chasí yuhu ra na cutaxín ra, soco maa ra ñihí ca cana chaa ra ta catyí ra:

—¡Yoho ra vachí tata ra David, cundahví cuñí chii! —catyí ra.

⁴⁹ Tyicuan ta chicuñí ra Jesús ta catyí ra:

—Cana ndo chí ra.

Ta cacana ra chí ra cuaa cuan ta catyí ra chí ra:

—Sañí iñun. Ndúcuíta, vatyí caná ra chuun —cacatyí ra chí ra.

⁵⁰ Tyicuan ta tuchí ñihno ra sahna ndichí ra. Ta ndava ra noo ta tuhva ra nuu nyaá ra Jesús. ⁵¹ Tyicuan ta quichahá ndacá tuhun ra Jesús chí ra:

—¿Ñáá cha cuñún cha sacuvi chuhun?

Ta nacahan ra cuaa cuan ta catyí ra:

—Maestro, cuñí cha sanduvahun chíti nuí —catyí ra.

⁵² Ta catyí ra Jesús chí ra:

—Cuahan. Cha nduvahun vatyí chinó iñun chíi.

Ta caa cuhva ri cuan cuví nanyehe ra cuaa cuan. Ta cuahan ra chata ra Jesús ityí cuahan ra.

11

Nu quihví ra Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

¹ Cachahá coyo ra yatyín ri ñuu Jerusalén, nu nyaá ñuu Betfagé ta ñuu Betania. Ta yucu yutun Olivo nyaá ityí nuu chíi ca. Tyicuan ta catyí ra Jesús chí uvi ra chicá noo chihin ra:

² —Cuahan ndo chichí ñuu cha nyaá ityí nuu chíi. Ta nu cua chaa ndo cunañihí ndo noo burru chaa nuñí ti, quití ta quihí ca tyayu cuví ti. Ndachí ndo chí ti, ta quichí nyaca ndo chí ti. ³ Ta tatu yóo cha ndaca tuhun ñáá tuhun sacuví ndo tyicuan caa, çatyí ndo chí ñu vatyí chiñuhú ti chí ra nyacá ñaha, ta numi ri cunanyaca ndo chí ti, çatyí ndo chí ñu —catyí ra Jesús chí ra.

⁴ Tyicuan ta cuahan coyo ra, ta canañihí ra burru cuan nuñí ti ityí cahnú yatyín ri noo yuvehe, ta candachí ra chí ti. ⁵ Ta suhva ra canyicú cuan catyí ra chí ra:

—¿Ñáá cha nyacuví ndo? ¿Ñáá tuhun cha ndachí ndo burru chíi? —catyí ra chí ra.

⁶ Tyicuan ta canacahan ra tari cuhva cha catyí ra Jesús chí ra. Ta cachahá ra cuhun coyo ra. ⁷ Tyicuan ta caquehen ra burru cuan ta chinyacá ra chí ra Jesús. Ta catyiso ra sahna ra siquí ti, ta ndaa ra Jesús chí ti. ⁸ Ta cuaha ñu ndica ñu sahna ñu ityí cuahan ra, ta inga ñu chahnú ñu soco numa ta cachacun ñu.

⁹ Tyicuan ta ñu cha cuahan ityí nuu ra ta ñu cha cuahan ityí chata, quichahá cana chaa ñu ta catyí ñu:

—¡Cahnú xaan cuví Nyoo! ¡Na sacahnú yo chí ra vachí cuenda Sutu yo Nyoo! ¹⁰ ¡Sacahnú yo chí ra vachí nyacá ñaha tari chinyacá ñaha sutu chahnú yo ra David! ¡Cahnú xaan ca cuví ra nyaá andiví! —catyí ñu.

¹¹ Tyicuan ta quihví ra Jesús chichí ñuu Jerusalén, ta cuahan ra vehe ñuhu cahnú. Ta cha yahá nanyehe ra ityí cuan ityí ihya, ndacá chata ra ñuu Betania chihin ndi uchi uvi ra chicá noo chihin ra vatyí cha íñi.

Nu soco ra Jesús chi yutun higo cha ñahri chiti iñi nuu tun

(Mt. 21.18-19)

¹² Cha inga quivi quita coyo ra ñuu Betania cuan, ta cha ni ri ca cha cuahan ra chicá ityi ra chaq noo soco chi ra Jesús. ¹³ Ta nyasava ri nanyehę ra noo tu higo cha nyaá numa. Ta chahan ra chinyehę ra tatu iñi chiti nuu tun, soco maa maa ri numa ri iñi, vatyi ta chaa ca quivi quita chiti tun. ¹⁴ Tyicuan ta cahan ra Jesús chihin tun, ta catyi ra chi tun tyehę caa:

—Ma coo ca chiti cachi ñáyivi nuun —catyi ra chi tun.

Ta ra cacticá noo chihin ra cachiñi ra cha cahan ra.

Nu tavq ñehę ra Jesús chi ra caxico chichi vehe ñuhu cahnu

(Mt. 21.12-17; Lc. 19.45-48; Jn. 2.13-22)

¹⁵ Yahę cuan ta nachaq coyo ra Jerusalén. Ta quihvi tucu ra Jesús chichi vehe ñuhu cahnu. Ta quichahę tava ñehę ra chi ra caxico ta ra casatá yucuan. Sanduva ra mesa ñu canasamá xuhun chi ñáyivi. Ta suri tyicuan caa sacuvi ra chihin tyayu ra caxico paloma. ¹⁶ Ta ña chahę ca ra ca cuiso ñu ñáa cha cuiso ñu ityi chichi vehe ñuhu cuan. ¹⁷ Ta quichaha sañahę ra chi ñu, ta catyi ra:

—Nu tutu Nyoo catyi chi: “Vehi, vehe nu chicán tahvi tandihı ñáyivi iyó siqui ñuhu ñáyivi cuvi”, catyi Nyoo. ¡Soco nyoho nasahá ndo vehe nu nyicu ra suhu! —catyi ra Jesús.

¹⁸ Ta ra cacuvi nuu chi tata sutu ta ra casacuahá cuenda ley vehe ñuhu cachiñi ra cha cahan ra, ta quichahę canducu ra cuhva cha cacahni ra chi ra vatyı cayuhvi ra chi ra tyi cha tandihı ñáyivi iyo cuñi ñu cha sañahá ra. ¹⁹ Soco cuhva cha cua cuaa ra Jesús quita ri ra ñuu cuan chihin ra cacticá noo chihin ra.

Nu na ityi tu higo cha soco ra Jesús

(Mt. 21.20-22)

²⁰ Cha ñaha ri cha inga quivi cuan, nayahę coyo ra nu nanyaá tu higo cuan. Ta cananyehę ra vatyı na ityi nyacua nya yoho tun. ²¹ Tyicuan ta nichoñon iñi ra Pedro vatyı soco ra Jesús chi tun ta catyi ra chi ra Jesús:

—Maestro, nyehę tu higo cha socon, cha na ityi tun —catyi ra.

²² Nacahan ra Jesús, ta catyi ra:

—Chino iñi ndo chi Nyoo. ²³ Vatyı cha ndicha catyi chi ndo vatyı nya nyoho catyi ndo chi yucu ihya, “Na canyaha ta cuhun nu tyañuhu”, ta tatu ña chicá uvi iñi ndo, ta chinó iñi ndo, tuhun cahan ndo cua cuvi. ²⁴ Yucuan chaha catyi chi ndo vatyı tandihı cha chicán tahvi ndo, ta tatu chinó iñi ndo tyi cha naquehęn ndo, tyicuan caa cucuvi. ²⁵ Ta tatu chicán tahvi ndo chi Nyoo ta cuxaán ndo chi inga ñu, saha ndo ticahnu iñi chi ñu, tacuhva vatyı Sutu ndo, ra nyaá

andıvi, saha tucu maa ra ticahnu iñi cuatyı ndo. ²⁶ Soco tatu ña sahá ndo ticahnu iñi chi ñu, ni ri Sutu ndo, ra nyaá andıvi, ma saha ra ticahnu iñi cuatyı maa ndo.

Yóo cha chahę ityi chi ra Jesús vatyı sacuvi ra cha sacuvi ra

(Mt. 21.23-27; Lc. 20.1-8)

²⁷ Tyicuan ta nachaq coyo ra Jerusalén. Ta cha niri ca cha chicá noo ra Jesús chichi vehe ñuhu cahnu cuan, catuhva ra cacuvi nuu chi tata sutu, ta ra sacuahá cuenda ley, ta ra cacuvi mandoñi nu nyaá ra. ²⁸ Ta candaca tuhun ra chi ra.

—¿Yóo cha tyaq tyiño chuun vatyı sacuvun tyehę caa? ¿Yóo cha chahę ityi chuun vatyı sacuvun? —catyi ra.

²⁹⁻³⁰ Ta nacahan ra Jesús, ta catyi ra:

—Cua ndaca tuhun tucu yuhu noo tuhun chi ndo. ¿Yóo cha tachı chi ra Juan vatyı sacondutya ra chi ñáyivi? ¿Atu Nyoo tachı chi ra, o ñáyivi? Tatu catyi ndo chii, tyicuan ta cua catyi tucu yuhu chi ndo yóo cha tyatyıño ihya chii —catyi ra Jesús chi ra.

³¹ Tyicuan ta quichaha cacuvi yuhu maa ra chihin tahan ra ta cacatyı ra:

—Tatu catyi yo tyi Nyoo tachı chi ra Juan, cacatyı ra chi yo: “Tu tyicuan caa, ¿ñáa tuhun ña chino iñi ndo chi ra?” ³² ¿Ta yoso caa catyi yo tyi ñáyivi tachı chi ra? Ma cuvi —cacatyı ra, vatyı cayuhvi ra chi ñáyivi, vatyı tandihı ñu cachiñi iñi ñu vatyı cha ndicha cuenda Nyoo cahan ra Juan.

³³ Tyicuan ta quichaha cacatyı ra chi ra Jesús:

—Ña chitó ndi.

Tyicuan ta ra Jesús catyi ra chi ra:

—Ni yuhu ma catyi chi ndo yóo cha tyaq tyiño chii tyi sacuvi cha sacuvi —catyi ra Jesús chi ra.

12

Nu chahę ra Jesús noo cuhva yoso caa cucahni ñu chi ra

(Mt. 21.33-46; Lc. 20.9-19)

¹ Tyicuan ta chihin cuhva ihya quichaha cahan ra Jesús chihin ra, ta catyi ra chi ra:

—Chiyo noo ra cha tachı ra yoho tichaha ndıvi. Ta chası ra chaha. Ta savahę ra noo nu cuhni ra tichaha ndıvi. Ta savahę ra noo vehe sucun tacuhva vatyı cuvi saha ra cuenda tandihı.

‘Yahę cuan ta chahę noo ra ñuhú cuan chi suhva ra casahá tyiño. Ta cuahan ra inga ñuu. ² Ta cha cha quivi iyó chiti yoho cuan, chitoho ñuhú cuan tachı ra noo musu nu nyicu ra casahá tyiño cuan vatyı cacun ra suhva chiti cha tahán chi chi ra. ³ Soco catiın ra chi ra. Ta cacañi ra chi ra. Ta canatachı ra chi ra chihin nu ndaha nu ndii ra. ⁴ Tyicuan ta chitoho ñuhú cuan tachı ra chi inga musu, soco chi ra ihya catuchı ra

yuu chi ra, catahvj ra xiñi ra, ta cacahan uhvi ra chi ra. ⁵ Ta inga tucu musu tachi chitoho ñuhú cuan. Ta chi ra cuan cachahñj ra. Yahá cuan ta tachi ra cuaha ca ra. Soco cacañj ra chi suhva ra. Ta chi suhva ca ra cachahñj ra. ⁶ Ta ndoo noo ri ca ra cha cuví tachi chitoho ñuhú cuan. Ican cuví sehe ra cha cuñi xaan ra. Ta nu ndihi tachi ra chi sehe ra vatyi cuñi maa ra chicá xiñi ra: “Cucasaha ra ñáyivi chi sehi”, cuñi ra chicá xiñi ra. ⁷ Soco nu chaq sehe ra, ra casahá tyiño cuan catyi ra chi tahan ra: “Ican ra ihya cundoó chihin tandihi ihya. Na cahñi yo chi ra, ta ndoo maa yo chihin”, catyi ra. ⁸ Ta tyicuan caa catiñ ra chi ra ta cachahñj ra chi ra. Tyicuan ta cachtuchj ra coño ñuhu ra ityi chata chacu cuan —tyicuan caa cuhva cahan ra Jesús chihin ra cuan.

⁹ Tyicuan ta ndacá tuhun ra Jesús chi ra ta catyi ra:

—¿Ñáá cha cusacuvi ra cuví chitoho ñuhú cuan? Cuquichi ra ta cucahñi ra chi ra casahá tyiño cuan. Ta cuhva ra ñuhú cuan chi inga ra. ¹⁰ ¿Atu ta sacuahá ca nyoho nu tutu Nyoo nu catyi chi tyehe caa? Yuu cha ña cacañj ra casavaha vehe cotyiño ra,

ican cuan cuví yuu cha niñi ca.

¹¹ Ican ihya cuví cha sacuvj Sutu yo Nyoo.

Ta tyaquí xaan tuhun cha cuenda chi yo, catyi chi nu tutu Nyoo —catyi ra Jesús chi ra cacuví nuu chi tata sutu cuan.

¹² Tyicuan ta canducu ra cuhva cha tyihi ra chi ra Jesús vehe caa vatyi cachtó ra vatyi cahan ra cuhva ihya soco cha cuenda maa ra. Soco vatyi cayuhví ra chi ñáyivi, casandoq ra chi ra, ta cuahan coyo ra.

Nu ndacá tuhun ra chi ra Jesús cha cuenda xuhun cha tavá gobiernu ñuu Roma
(Mt. 22.15-22; Lc. 20.20-26)

¹³ Tyicuan ta catachj ra suhva ra cuenda ra Herodes ta suhva ra fariseo nu nyaá ra Jesús vatyi casacahan ra chi ra ta coo cuatyí catyaa ra siqui ra. ¹⁴ Chaq coyo ra ihya ta quichaha catyi ra chi ra Jesús:

—Maestro, chitó ndi vatyi cahún cha ndicha, ta ña quichahún cha cahán ñáyivi, ta ña natiñ cuendon cuhva caa ri ñu. Ta ndicha sañahún ityi Nyoo. Yucuan chaha cuñi ndi coto ndi, ¿atu vaha cha tyiyahvi yo cha chicán gobiernu ñuu Roma chi yo, o ña vaha? ¿Atu tahán chi cha tyiyahvi yo, o ña tahán chi? —cacatyí ra chi ra Jesús.

¹⁵ Soco ra Jesús chitó ra vatyi ñima cha vaha chicá xiñi ra, ta catyi ra chi ra:

—¿Ñáá tuhun cha cuñi ndo sandavi ñaha ndo chii? Nyaca ndo noo xuhun chii, na nyehi —catyi ra.

¹⁶ Caquichj nyaca ra chi ra. Ta cuhva cha nanyehé ra ta ndacá tuhun ra chi ra, ta catyi ra:

—¿Yóó chi nuu ihya, ta yóó chi sivi nyaá ihya? —catyi ra chi ra.

Ta canacahan ra ta cacatyí ra:

—Chi gobiernu.

¹⁷ Tyicuan ta catyi ra Jesús chi ra:

—Cuhva ndo chi gobiernu cha tahán chi chi ra. Ta cuhva tucu ndo chi Nyoo cha tahán chi Nyoo —catyi ra Jesús chi ra.

Ta iyo cacuñi ra tuhun cha nacahan ra.

Nu canducu tuhun ra saduceo siqui tuhun cha nandotó ndiyi

(Mt. 22.23-33; Lc. 20.27-40)

¹⁸ Tyicuan ta cuahan coyo suhva ra saduceo nu nyaá ra Jesús. Ican ra saduceo ihya catyi ra vatyi ña nandotó ndiyi. Yucuan chaha cacahan ra tyehe caa ta catyi ra chi ra Jesús:

¹⁹ —Maestro, tyaq ra Moisés tuhun yoso caa tahán chi sacuvi yo tatu noo rayii ta chihj ra ta ndoo ñasihi ra soco ña chicoq sehe ra chihin ña. Catyi ra vatyi tahán chi tandaha yañi ra chihin ñaha cha chihj yii cuan, tacuhva vatyi coo sehe ña cha cuenda ndi yañi ra. ²⁰ Noo chaha chiyó ucha tahan ra chihin yañi ra. Ra cha xihna ri tandaha ra chihin noo ña, ta yori sehe ra chicoq. ²¹ Ta ra cu uvi tandaha ra chihin ñaha cha ndoq cuan. Ta suri chihj ra. Ta suri yori sehe ra chicoq. Ta tyicuan caa tucu cuví chihin ra cu uñi cuan. ²² Ta tyicuan caa ndi ucha tahan ra tandaha chihin ña. Ta ni noo ra ña cachiyo sehe ra chihin ña. Ta nu ndihi tuhun, chihj ndihi maa ña. ²³ Ta vityin, quivi cunandoto ñáyivi, ¿nya ra cucuvi yii ña? Vatyi ndi ucha tahan ra cuan chiyó chihin ña —cacatyí ra chi ra Jesús.

²⁴ Tyicuan ta nacahan ra Jesús ta catyi ra chi ra:

—Nyoho cahán tondo ri maa ndo, vatyi ña chitó ndo cha nyaá nu tutu tuhun Nyoo. Ta ni ña chitó ndo yoso caa tunyee iñi Nyoo. ²⁵ Vatyi quivi cunandoto ndiyi, ni ma tandaha ñu ta ni ma cuhva ñu sehe ñu tandaha, vatyi tari ángel cha nyaá andivi tyicuan caa cucuvi ñu. ²⁶ Ta tuhun cha nandotó ndiyi cuan, ¿atu ta sacuahá ca ndo nu libru ra Moisés yoso caa cahan Nyoo chihin ra nu cayú taca iñu cuan? Ta tyehe caa catyi ra chi ra: “Yuhu cuví Nyoo cuenda ra Abraham, ta cuenda ra Isaac, ta cuenda ra Jacob”, catyi Nyoo chi ra Moisés. ²⁷ Ta cha catyi Nyoo tyicuan caa cuñi chi catyi vatyi vasi cha naha cachihj ra, soco canyitó añima ra vatyi Nyoo ñima Nyoo cuenda ñu ndiyi cuví ra, soco Nyoo cuenda ñu nyitó cuví ra. Yucuan chaha catyi vatyi nyoho cahán tondo ri ndo —catyi ra Jesús chi ra.

²⁴ Tyicuan ta nacahan ra Jesús ta catyi ra chi ra:

—Nyoho cahán tondo ri maa ndo, vatyi ña chitó ndo cha nyaá nu tutu tuhun Nyoo. Ta ni ña chitó ndo yoso caa tunyee iñi Nyoo. ²⁵ Vatyi quivi cunandoto ndiyi, ni ma tandaha ñu ta ni ma cuhva ñu sehe ñu tandaha, vatyi tari ángel cha nyaá andivi tyicuan caa cucuvi ñu. ²⁶ Ta tuhun cha nandotó ndiyi cuan, ¿atu ta sacuahá ca ndo nu libru ra Moisés yoso caa cahan Nyoo chihin ra nu cayú taca iñu cuan? Ta tyehe caa catyi ra chi ra: “Yuhu cuví Nyoo cuenda ra Abraham, ta cuenda ra Isaac, ta cuenda ra Jacob”, catyi Nyoo chi ra Moisés. ²⁷ Ta cha catyi Nyoo tyicuan caa cuñi chi catyi vatyi vasi cha naha cachihj ra, soco canyitó añima ra vatyi Nyoo ñima Nyoo cuenda ñu ndiyi cuví ra, soco Nyoo cuenda ñu nyitó cuví ra. Yucuan chaha catyi vatyi nyoho cahán tondo ri ndo —catyi ra Jesús chi ra.

Ley cha niñi ca cha chahaq Nyoo

(Mt. 22.34-40)

²⁸ Chaq tucu noo ra sacuahá cuenda ley vehe ñuhu cuan, ta chihj ra cacuví yuhu ra.

Ta vatyi chító ra vatyi ra Jesús vaha nacahan ra nu cacahan ra yucuan, ta ndaca tuhun ra chi ra ta catyí ra:

—Chichi cha tandihi ley, ¿nya cha niñi ca sacuvi yo? —catyí ra.

²⁹ Ta nacahan ra Jesús ta catyí ra:

—Cha xihna ca sacuvi yo cha nuu tandihi, ican cuví ihya: “Cuñi ndo ñu Israel. Sutu yo Nyoo, noo ri maa ra iyó. ³⁰ Cuñun chi Sutu yo Nyoo chihin cha niñi ñun ta chihin cha tandihi añimon, ta chihin cha tandihi cha chihí tuñi xiñun, ta chihin cha tandihi tunyee ñun.” Ican ihya cuví cha xihna ca cha tahan chi sacuvi yo. ³¹ Ta cha cu uvi catyí chi: “Cuñun chi tahun tari cuñun chi maun.” Ñahri ca tuhun cha niñi ca ican saha nduvi tahan ihya —catyí ra Jesús.

³² Tyicuan ta ra sacuahá cuenda ley cuan catyí ra chi ra:

—Vaha xaan nacahun, Maestro. Ndicha cha catyún vatyi noo ri Nyoo iyó, ta yori ca Nyoo iyó, noo tuhun ri maa ra. ³³ Ta cha cuñi yo chi Nyoo chihin cha niñi ñi yo ta chihin cha tandihi cha chihí tuñi xiñi yo, ta chihin cha tandihi añima yo, ta chihin cha tandihi fuerza yo, ta cuñi yo chi tahan yo tari cha cuñi yo chi maa yo, vale ca cuan ta ñima ca tandihi quiti cha chahá yo chi Nyoo cha chahñi yo ta chahmí yo —catyí ra sacuahá cuenda ley cuan chi ra Jesús.

³⁴ Nyehe ra Jesús vatyi vaha nacahan ra chihin cha cachi xiñi ra. Ta catyí ra chi ra:

—Chiin ri ca cuñi chi ta ñihun cuhva yoso caa nacuhvon añimon chi Nyoo na cunyaca ñaha ra —catyí ra Jesús chi ra.

Ta ni noo ca ñu ña cañá ca ñi ñu candaca tuhun ñu ñáá cha ndaca tuhun ñu chi ra Jesús.

¿Yóó chi tata vachi ra Cristo?

(Mt. 22.41-46; Lc. 20.41-44)

³⁵ Sañahá ra Jesús chichi vehe ñuhu cahnu, ta catyí ra:

—¿Yoso caa cha cacatyí ra sacuahá cuenda ley vehe ñuhu vatyi ra Cristo vachi ra tata ra David? ³⁶ Vatyi suri maa ra David chotyíño Tatyí Ii chi ra ta catyí ra:

Cahan Suti Nyoo chihin Suti ra Cristo, ta catyí ra:

“Cunyaa chiyo vahi nyacua nya cuhve chi ra xaan ñi chuu vatyi cuaca chahun siqui ra”, catyí Nyoo chihin yuhu ra David ta cha naha.

³⁷ ¿Yoso caa cha ra vachi tata ra David cuví chi ra Cristo, ta suri maa ra David catyí ra vatyi ra Cristo cuví Sutu ra? —catyí ra Jesús.

Ta cuaha xaan ñayivi nyicú yucuan sii xaan cacuñi ñu chihí ñu tuhun cahan ra.

Nu catyí ra Jesús vatyi iyó cuatyí ra casacuahá cuenda ley vehe ñuhu

(Mt. 23.1-36; Lc. 11.37-54; 20.45-47)

³⁸ Nu sañahá ra Jesús ta catyí ra tyehe caa:

—Saha ndo cuenda chi ndo chihin ra casacuahá cuenda ley vehe ñuhu, vatyi tahan ñi ra cacuihno ra sahna ñañi ta chicá noo ra nyuahvi tacuhva saha ndo ñáyivi chi ra, ta cuhva ndo nocumi chi ra. ³⁹ Maa ra cananducú ra nu vaha ca cunyicu ra chichi vehe ñuhu. Ta nu vaha ca cacuñi ra cachi ra nyayu nu iyó vico. ⁴⁰ Ta ican ra catinyaá vehe ñu chihí yí, vatyi ña cuví tyiyahvi ñu ñáá xuhun tava ra siqui ñu. Ta cuñi ra sacuvaha ra chi ra nuu ñáyivi. Yucuan chaha naha chicán tahvi ra nu tuvi. Maa ra cuví cha cutachi tuñi ca Nyoo chii —catyí ra Jesús.

Noo cha chahá noo ñaha chihí yí

(Lc. 21.1-4)

⁴¹ Noo chaha nyaá ra Jesús chichi vehe ñuhu cahnu yatyin ri nu nyaá chatun nu cumí ñu xuhun cha chahá ñáyivi chi Nyoo. Ta nyehe ra yoso caa tyihí ñáyivi xuhun yucuan. Ta cuaha ñu tyayí chahá ñu cuaha xaan xuhun. ⁴² Tyicuan ta chaá tucu noo ñaha ndahvi chihí yí, ta tyihí ña uvi tahan xuhun cuatyí cha chaha xaan nyaá. ⁴³ Tyicuan ta caná ra Jesús chi ra cachicá noo chihin ra, ta catyí ra chi ra:

—Cha ndicha catyí chi ndo vatyi ñaha ndahvi chihí yí ihya, cuaha ca chahá ña ta ñima ca inga ñu catyihí xuhun chihá. ⁴⁴ Vatyi tandihi ñu cachahá ñu cha ndoo ri ca chi ñu. Soco maa ña chihin cha ndahvi ña chahá ña tandihi cha cumí ña —catyí ra Jesús.

13

Nu catyí ra Jesús vatyi cutani vehe ñuhu cahnu

(Mt. 24.1-2; Lc. 21.5-6)

¹ Cuhva cha cua quita ra Jesús chichi vehe ñuhu cahnu cuan, noo ra chicá noo chihin ra catyí ra chi ra:

—¡Maestro, nyehe ñana cha tyaqui yuu yihí vehe ihya! ¡Ñana cha nahnu vehe ihya! —catyí ra chi ra Jesús.

² Soco nacahan ra Jesús, ta catyí ra chi ra:

—¿Atu nyehún vehe nahnu ihya? Soco catyí chuu vatyi ma ndoo ni noo yuu coso siqui tahan, vatyi tandihi cutani —catyí ra Jesús.

Seña cha cucuvi cha ni cumañi ca naa ñayivi

(Mt. 24.3-28; Lc. 21.7-24; 17.22-24)

³ Tyicuan ta cuahan coyo ra nya yucu yutun Olivo cha nyaá inga chiyo xahva ityi nuu vehe ñuhu cahnu. Ta cuhva cha nyaá ra Jesús yucuan, ra Pedro, ra Jacobo, ra Juan, ta ra Andrés candaca tuhun xehe ra chi ra:

⁴ —Cuñi ndi cha catyun chi ndi ama cucuvi tandihi tuhun cha cahun tuhun. ¿Ñáa seña cucuvi tatu cha cua cuví? —cacatyí ra.

⁵ Nacahan ra Jesús ta catyí ra:

—Saha ndo cuenda chi ndo tacuhva yori sandavi ñaha chi ndo. ⁶ Vatyí cuaha xaan ra cuquichi coyo ra, ta cucotyíño ra sivi ta cucatyí ra: “Yuhu cuví ra Cristo.” Ta cusandavi ñaha ra chi cuaha xaan ñáyívi.

⁷ Soco tatu chiñí ndo tuhun tyi iyó cuatyí ta cañi tahan ñáyívi, ma nayuhvi ndo. Vatyí tyicuan caa tahán chi cucuvi, soco ta chaa ca quívi cunaa ñáyívi. ⁸ Vatyí noo ñuu cucañi tahan chi chihin inga ñuu, ta ñáyívi cuenda noo gobiernu cucañi tahan ñu chihin ñáyívi cuenda inga gobiernu. Ta cucoo cha taan nahu cuaha ri ityi. Ta cucoo tama. Ta cunaquiqui ñáyívi. Ta tyehe cha cua quichaha cha nyehe ñáyívi tindoho. ⁹ Soco saha ndo cuenda chi ndo. Vatyí cucuhva cuenda ñu chi ndo chi ra cacuví tyiño. Ta cucañi ñu chi ndo chichi vehe ñuhu. Cucuhva cuenda ñu chi ndo nuu gobernador ta nuu rey cha cuenda yuhu. Ta tyicuan caa cuví cahan ndo tuhun nuu ra. ¹⁰ Vatyí cha ni cumañi ca naa ñáyívi, cuñí chi cucutya tuhun Nyoo yoso caa sacacú ra añima ñáyívi tandihi ñuu. ¹¹ Ta cuhva cha cunyaca ñu chi ndo nuu ra cacuví tyiño, ma caca xiñi ndo ñáá tuhun cucahan ndo, ni ma ndichi xiñi ndo. Çahan ndo cha catyí Nyoo chi ndo cha cahan ndo cuhva cuan. Vatyí ñima nyoho cucahan, soco maa Tatyí li Nyoo. ¹² Yihí ra cunacuhva cuenda ra nyacua nya chi yañi maa maa ra. Ta sacuví ra na cacahñi ñu chi ra. Ta yihí ñáyívi cunacuhva cuenda ñu chi sehe ñu. Ta yihí ñu cunaquiqui ñu siquí sutu ñu ta sihi ñu. Ta cunacuhva cuenda ñu chi ñu na cahñi ra chi ñu. ¹³ Tandihí ñáyívi cutasi cuñi nyehe ñu chi ndo cha cuenda yuhu. Soco tatu cunyeet iñi ndo nyacua nya nu ndihí, cucacu ndo.

¹⁴ Ra Daniel, ra profeta Nyoo ta cha naha, tyaq ra yoso caa cuahan tuhun noo cha cusacaquíñi nu ii xaan. Ta cusativí chi tandihí. Tatu nyehé ndo nanyaá yucuan nu ña tahán chi cuinanyaa, (nyoho cha sacuahá ndo ihya na cutuñi iñi ndo) cuñí chi cha cono tandihí ñu iyó Judea nya ityi yucu. ¹⁵ Ta ñu ñohó xiñi vehe quívi cuan, noo ñu, soco ma quihvi ñu chichi vehe ñu tava ñu ñáá cha tava ñu. ¹⁶ Ta ñu ñohó nu chiquí, ma cunuhu ñu nya vehe ñu cha cunaquehen ñu sahma ñu. ¹⁷ ¡Ndahví ñusihi cha cañohó sehe quívi cuan! ¡Ndahví tucu cuví ñusihi cha chaxín sehe quívi cuan! ¹⁸ Çacan ndo chi Nyoo tacuhva cha ma tahan chi caca cono ndo quívi vichín. ¹⁹ Vatyí quívi tindoho cucuvi. Ta ni noo chaha ta cuví ca tyicuan caa nyata quívi chinó ñuhu ñáyívi nyacua nya vityin. Ta ni ma coo ca tindoho tahán ihya nu cuahan ca chi. ²⁰ Tyehe ta ma sanducuiti Sutu Mañi yo tyembu cuan, yori maa cucacu. Soco cusanducuiti ra cha cuenda cha cuñí ra chi ñu cuenda ra, ñu cha nacachí maa ra.

²¹ Tatu yóo cha catyí chi ndo: “Nyehe ndo, ma ra Cristo ihya” o “Nyehe, ma ra nyaá yucuan”, ma chino iñi ndo. ²² Vatyí cuquichi ra casandavi ñaha, cucatyí ra tyi ra Cristo cuví ra. Ta yihí ra cucatyí ra vatyí profeta Nyoo cacuví ra. Ta cucasavaha ra seña, milagru, vatyí canducú ra cuhva sandavi ñaha ra nyacua nya chi ñu cha nacachí maa Nyoo tatu cuví chi ra. ²³ Soco saha vaha ndo cuenda vatyí yuhu cha sacote chi ndo cha ni cumañi ca cuví tyicuan caa —catyí ra Jesús.

Nu sacote ra Jesús yoso caa cuquichi tucu ra inga chaha

(Mt. 24.29-35, 42-44; Lc. 21.25-36)

²⁴ Ta catyí tucu ra Jesús tyehe caa:

—Soco quívi cha yaha tindoho, cunduñaan ñanyii. Ma cundichín ca yoo. ²⁵ Tiñoo cunacoyo andiví. Ta nyacua nya tandihí cha iyó andiví ta cunacanda. ²⁶ Tyicuan ta cunyehe ndo chi yuhu Rayíi cha quichí nya gloria inga chaha, vachi nu vico chihin cha ndicha ñuhu Nyoo, ta chihin cha cahnú cuví ra. ²⁷ Tyicuan ta cutachí chi ángel ta cusandu in ri chí ñu nacachí nicahnú siquí ñuhu ñáyívi, nyacua nya nu ndihí ñuhu ñáyívi ta nyacua nya nu ndihí andiví.

²⁸ Çutuñi iñi ndo cuhva tu higo ihya: Tatu nduyutya soco tun ta caña numa tun cha chitó ndo vatyí cha cuñí chaa quívi coo chiti, cha vachi vico savi. ²⁹ Ta suri tyicuan caa tatu cha nyehe ndo tuhun ihya, coto ndo tyi cha nyañaa yatyin quívi quichi tiquí. Cha nyañai yuvehe cuví cuan. ³⁰ Cha ndicha catyí chí ndo vatyí tandihí ihya cucuví cha ni ri ca cha iyó ñáyívi. ³¹ Tyicuan ta cunaa andiví ta ñuhu ñáyívi cha iyó cha vityin. Soco tuhun cahín tyicuan ri cucuvi tari cuhva catyí.

³² Soco yori chitó ñáá quívi ta ñáá cuhva cucuví tandihí ihya, ni ángel Nyoo, ni yuhu Sehe Nyoo. Noo tuhun ri maa Nyoo Suti cuví ra chitó.

³³ Yucuan chaha conyito vaha ndo, ta saha ndo cuenda ta çacan tahvi ndo, vatyí ña chitó ndo ñáá quívi cuchaa cuhva. ³⁴ Tari noo ra cha cua cahun nu cañi. Ta cha ni cumañi ca cahun ra, chahá cuenda ra vehe ra chí musu ra. Ta chahá ra tyiño chí noo noo ra. Ta tachí ra chí ra sahá cumi yuvehe cuan na saha ra cuenda. ³⁵ Yucuan chaha nyoho conyito ndo vatyí ña chitó ndo ñáá cuhva cuquichi ra cha cuví tari chitoho vehe cuan, an cha ni cua cuaa, an ñuu, an cuhva cha chacú chaa loho, an cha ñaha ri. ³⁶ Conyito ndo coto sana iñi ndo ta quichi ra, ta nañihí ra chí ndo quixí ndo. ³⁷ Cha catyí chí nyoho, catyí tiquí chí tandihí ñáyívi ñandihí. Na conyito ñu.

14

Nu canducy ra cuhva catiın ra chi ra Jesús
(Mt. 26.1-5; Lc. 22.1-2; Jn. 11.45-53)

¹ Uvi ca quivi cumañi ta cua tahan chi vico cha nañi pascua ta vico cha tuhva ñu chachi ñu pan cha ñahri yuchan iya yihí. Ta ra cacuvi nuu chi tata sutu ta ra casacuahá cuenda ley vehe ñuhu canducy ra cuhva catiın xehe ra chi ra Jesús ta cacahñi ra chi ra. ² Soco cacatyí ra chi ra tahan ra:

—Ma tiın yo chi ra cha chichi vico vityin coto naquiqui ñáyivi —cacatyí ra.

Nu choso noo ñaha sihi ndutya vixi chahán chi ra Jesús

(Mt. 26.6-13; Jn. 12.1-8)

³ Ñohó ra Jesús ñuu Betania vehe ra Simón, cha catyí ñu: “Simón ra cha tyahyu coño.” Ta cha ni ri ca cha nyaá ra mesa, chaq noo ñaha sihi ndaha ña noo yutyi cha chinq chihin noo yuu cha nañi alabastro. Tyitu yihí chihin ndutya vixi chahán cha nañi nardo. Ta yahvi vavaha nyaá. Ta tahvi ña yutyi cuan ta choso ña ndutya vixi chahán cuan xiñi ra Jesús. ⁴ Soco suhva ra canyicú yucuan cacuxaan ra ta cacatyí ra chi tahan ra:

—¿Ñáá tuhun sativi ña ndutya vixi chahán cuan? ⁵ Tyehe ta quiyahvi cuan, cuenda mil cuñihi yo chihin chi, ta tyinyee chi chi ñu ndahvi —catyí ra.

Ta chahan ra chi ña.

⁶ Soco ra Jesús catyí ra:

—¡Saña ndo chi ña! ¿Ñáá tuhun cha sayangá ndo chi ña? Cha choso ña chii tyehe caa, cha vaha cuví. ⁷ Vatyí ñu ndahvi tyicuan ri cua cunyaa ñu chihin ndo, ta cuví sacuvi maa ndo cha vaha chihin ñu ñáá ri quivi cuñi ndo. Soco yuhu ñima tyicuan ri cua cunyai chihin ndo. ⁸ Ñaha sihi ihya sacuvi ña yoso cuhva cha cuví chi ña. Choso ña ndutya vixi chahán coño ñuhi, cha ni cumañi ca cucuvi ta quihvi chichi ñuhu. ⁹ Cha ndicha catyí chi ndo, vatyí tandihí ri nicahnu ñuhu ñayivi nu cahan ñu tuhun Nyoo, cunacatyí tucu ñu tuhun cha sacuvi ñaha ihya, tacuhva nicohon iñi ñáyivi tuhun ña —catyí ra Jesús.

Nu nacuhva cuenda ra Judas chi ra Jesús chi ra xaan iñi chi ra

(Mt. 26.14-16; Lc. 22.3-6)

¹⁰ Yahá cuan ta ra Judas Iscariote, noo ra chichi cha uchi uvi tahan ra cachicá noo chihin ra Jesús, chahan ra chindatuhun ra chihin ra cacuvi nuu chi tata sutu, vatyí casandaa ra noo tyiño ra nacuhva cuenda ra chi ra Jesús chichi ndaha ra. ¹¹ Cuhva cha cachiñi ra ihya, cusí xaan cacuñi ra, ta catyí ra vatyí cuhva ra xuhun chi ra. Tyicuan ta quichahá nducu ra Judas cuhva nacuhva cuenda ra chi ra Jesús.

Nu cuxiñi ra Jesús chihin ra cachicá noo chihin ra

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Cuví chi quivi quichaha vico cha chachi ñu pan cha ñahri yuchan iya yihí. Yucuan quivi cha vico pascua tuhva ñu chahñi ñu mbee luhlu cha chahá ñu chi Nyoo. Ta ra cachicá noo chihin ra Jesús candaca tuhun ra chi ra, ta cacatyí ra:

—¿Nya maa maa cuñun cha sanduvaha ndi cha cuxiñun cha vico ihya?

¹³ Tyicuan ta tachí ra chi uvi tahan ra ta catyí ra chi ra:

—Cuahan ndo chichi ñuu, ta yucuan cunañihi ndo chi noo ra cha nyisó noo quivi ndutya. Cuahan ndo chata ra. ¹⁴ Ta nu quihvi ra, catyí ndo chi ra cuví chitoho vehe yucuan tyehe caa: “Ra Sacuaha cuñi ra coto ra nya nyaá cuarta: noo cusanducahnu ra vico chihin ra cachicá noo chihin ra”, catyí ndo chi ra. ¹⁵ Ta maa ra cusañaha ra noo cuarto cahnú nu piso sucun chi ndo. Cha yahá nduvii, ta yucuan cusanduvaha ndo cha cuxiñi yo —catyí ra Jesús chi ra.

¹⁶ Cuahan coyo ra. Ta chaq coyo ra chichi ñuu. Canañihi ra tari cuhva catyí ra Jesús chi ra, ta casanduvahá ra cha cuxiñi ra cha vico pascua cuan. ¹⁷ Ta cha cuaa cuan chaq ra Jesús chihin ndi uchi uvi ra chicá noo chihin ra. ¹⁸ Ta cuhva cha canyicú ra nu mesa cachachí ra, ra Jesús catyí ra:

—Cha ndicha catyí chi ndo vatyí noo nyoho cha chachi ndo chihin cunaxico tuhun ndo chii.

¹⁹ Tyicuan ta canducuihya iñi ra ta quichaha candaca tuhun tahan tahan ri ra chi ra, ta cacatyí ra:

—¿Atu yuhu?

²⁰ Ta nacahan ra Jesús ta catyí ra:

—Noo ra chichi cha uchi uvi ndo. Ra cha satyí pan iın ri nu coho chihin, ican ra cuan cuví. ²¹ Vatyí yuhu Rayí cha quichí nya gloria cucuvi chii tari cuhva catyí nu tutu tuhun Nyoo. Soco jndahvi ra ndahvi ra naxicó tuhun chii! Vaha taxin ca cha cuenda ra, tyehe ta ña cacu ra —catyí ra Jesús.

²² Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo. Ta tahvi ra ta chahá ra chi tandihí ca ra, ta catyí ra:

—Quehen ndo. Ican ihya cuví coño —catyí ra chi ra.

²³ Yahá cuan ta quehen ra vaso vinu. Ta cha yahá cha nacuhva ra tyahvi nyoo chi Nyoo, chahá ra chi ra. Ta tandihí ra cachiñi ra cha ñohó chichi vaso cuan. ²⁴ Ta catyí ra chi ra:

—Vinu cha yihí chichi vasu ihya tari niñi cuví. Ta chihin niñi tyihí tahan Nyoo tuhun

chaa chihin ndo vatyí cucatí cha cuenda cha vaha chí cuaha ñáyivi. ²⁵ Cha ndicha catyí chí ndo vatyí ma coho que vinu nyacua nya quivi nachai nu nyacá ñaha Nyoo ta cohi vinu chaa —catyí ra Jesús chí ra.

Nu catyí ra Jesús tyi cucatyí ra Pedro tyi ña ñohó nuu ra chí ra

(Mt. 26.30-35; Lc. 22.31-34; Jn. 13.36-38)

²⁶ Cha yaha cha cachitá ra yaa, ta caquita ra cuahan coyo ra nya yucu yutun Olivo. ²⁷ Tyicuan ta catyí ra chí tandihi ra:

—Tandihí nyoho cusandoo notuhun maa ndo chí vityin cha cuaa. Vatyí catyí chí nu tutu tuhun Nyoo tyehe caa: “Cucahñi chí ra sahá cumi mbee, ta mbee cacacono ti ityi cuan ityi ihya”, catyí chí. ²⁸ Soco cha yaha cha nandote, xihna que cuhun ityi Galilea ican saha nyoho —catyí ra Jesús chí ra.

²⁹ Tyicuan ta quichaha catyí ra Pedro chí ra:

—Vasi tandihí ra sandoo ra chuun, soco yuhu ma sandoi chuun —catyí ra chí ra Jesús.

³⁰ Soco ra Jesús catyí ra chí ra:

—Cha ndicha catyí chuun, vatyí suri maa cha cuaa ihya, cha ni cumañi ca cuacu loho uvi chaha, yoho cucatyun tyi ña ñohó nuun chí uñi chaha —catyí ra Jesús chí ra Pedro.

³¹ Soco saniñi ra Pedro ta catyí ra:

—Vasi cúvi chuhun, soco ma tixehi cha ñohó nuí chuun —catyí ra Pedro.

Ta tandihí ra cacatyí ra tyicuan caa.

Nu chicán tahvi ra Jesús nu cuví Getsemani

(Mt. 26.36-46; Lc. 22.39-46)

³² Tyicuan ta cachaḡ coyo ra noo nu nañi Getsemaní. Ta ra Jesús catyí ra chí ra cachicá noo chihin ra:

—Cunyicu ndo ihya ni ri cuhin cucacan tahvi —catyí ra Jesús.

³³ Ta quehen ra chí ra Pedro, ta ra Jacobo ta ra Juan cuahan chihin ra. Ta quichaha chica xaan iñi ra ta cutyoño cuñi ra. ³⁴ Ta catyí ra chí ra:

—Tuví iñi añime noo tucuihya iñi, ta cuñi cahñi chí chí. Ndoḡ nyoho ihya, ta conyito ndo —catyí ra.

³⁵ Tyicuan ta cuahan ra chiin ca ityi nuu ca. Ta chicuiñi chí ra nu ñuhú. Ta chicán ra chí Nyoo tatu cuví cha ma nyehe ra tindoho cha cua cuví chí ra cuhva cuan, catyí ra chicán tahvi ra.

³⁶ Ta nu chicán tahvi ra, ta catyí ra:

—Sutu Mañi yuhu, cha cuenda yoho ñahri cha ma cuví chuun. Tu yoho ta cuñun na canyaha tindoho ihya chí. Soco ma cuví tari cuhva cha cuñi mai, soco cuhva cha cuñi maun na cuví —catyí ra Jesús chicán tahvi ra.

³⁷ Yaha cuan ta nachaḡ ra nu nyicú ra. Ta nyehe ra tyi caquixí ra. Ta catyí ra chí ra Pedro:

—Yoho Simón, ¿atu quixún? ¿Atu ña cuví conyiton ni noo hora? ³⁸ Conyito ndo ta caçan tahvi ndo tacuhva cha ma sanacava ra ña vaha chí ndo nu cuatyí. Cha ndicha, cuñi añima ndo sacuví ndo cha vaha, soco coño ñuhu ndo vita xaan cuñi chí —catyí ra Jesús chí ra.

³⁹ Tyicuan ta cuahan ra inga chaha. Ta chicán tahvi ra suri maa cha chicán ra cha xihna ri. ⁴⁰ Tyicuan ta nachaḡ tucu ra inga chaha, nyehe ra tyi caquixí ra. Vatyí nicunyasi maa chí nuu ra chihin cha cacuñi xaan ra cusu ra. Ta ña cachitó ra ñáá cha nacahan ra chihin ra Jesús. ⁴¹ Ta chahan ra cha cu uñi chaha, ta nachaḡ ra, ta catyí ra:

—Vityin ndicha cusu ndo, nyitatu ndo. Cha iyó vaha ri vityin, cha chaḡ cuhva cha cucuhva cuenda ra chí yuhu Rayi cha quichi nya gloria ndaha ra ca iyó cuatyí. ⁴² Ndçuita ndo, coho ndo. Cha vachi ra naxicó tuhun chí —catyí ra Jesús chí ra.

Nu catiñ ra chí ra Jesús

(Mt. 26.47-56; Lc. 22.47-53; Jn. 18.2-11)

⁴³ Ni cahán ca ra Jesús ta chaḡ ri ra Judas, noo ra chichi cha uchi uvi tahan ra chicá noo chihin ra. Ta cuaha sindaro ta policia vachi coyo chihin ra canyisó ra mityi ta yutun. Vachi coyo ra cuenda ra cacuví nuu chí tata sutu, ta ra casacuaha cuenda ley vehe ñuhu, ta cuenda ra mandoñi. ⁴⁴ Cha ni cumañi ca cachaa coyo ra, ra Judas, ra cha naxicó tuhun chí ra, chahaḡ ra noo seña chí ra ta catyí ra:

—Ra cha tyayuhi, ican ra cuan cuví. Tñin vaha ndo chí ra na cuhun ra chihin ndo.

⁴⁵ Ta cuhva cha chaḡ ra tuhva ra nu nyaá ra Jesús ta catyí ra chí ra:

—Maestro.

Ta tyayuhḡ ra xitin ra. ⁴⁶ Tyicuan ta catiñ ra chí ra Jesús ta cuahan ra vehe caa.

⁴⁷ Soco noo ra cha nyaá yucuan tavaḡ ra mityi ra ta chahnya ra soho musu ra cuví nuu chí tata sutu. ⁴⁸ Tyicuan ta ra Jesús catyí ra chí ra cachaḡ coyo cuan:

—¿Atu vachi tñin ndo chí chihin mityi ta chihin yutun, tari cha vatyí cuví yuhu noo ra suhu? ⁴⁹ Ndi quivi chinyaḡ chihin ndo sañahí chichi vehe ñuhu cahnu cuan. Ta ni noo chaha ña tñin ndo chí. Soco cuví chí tyehe caa vityin, tacuhva chino cava tari cuhva catyí nu tutu tuhun Nyoo —catyí ra Jesús chí ra.

⁵⁰ Tyicuan ta tandihí ra cachicá noo chihin ra, cachinoḡ ra ta casandoḡ noo tuhun maa ra chí ra Jesús. ⁵¹ Soco noo ri ca ra tyivaa nyicón ra chí ra, ndichí ra noo sinduhu ta catiñ tucu ra chí ra. ⁵² Soco sandooḡ ra

sinduhu cuan ta cuahan vavaha ra vityiaa vityi cañi ra.

Nu cutuñi chi ra Jesús nuu ra cuví tyiño
(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tyicuan ta cachinyaca ra chi ra Jesús nuu ra cuví nuu chi tata sutu, ta candu ñri ri tandihi ra chihin ra cacuví mandoñi, ta ra casacuahá cuenda ley vehe ñuhu. ⁵⁴ Ta ra Pedro cuahan ra chata ra nya sava ri, nyacua nya nuquehe vehe ra cuví nuu chi tata sutu cuan. Ta ndoo ra nyaá ra chihin policia sanasaá ra chi ra yatyn yunuhu.

⁵⁵ Ra cacuví nuu chi tata sutu, ta tandihi ra cuví tyiño canducu ra ñáá noo cuatyí tyaa ra siqui ra Jesús, tacuhva cuví cacahñi ra chi ra soco ña cañihí maa ra. ⁵⁶ Vasi cuaha ñáyivi cahān ñu cuendu siqui ra, soco ña nacachí tahan tuhun cahān ñu. ⁵⁷ Yihí ñu candicuitā ñu ta catyaa ri maa ñu cuendu siqui ra, ta cacatyí ñu:

⁵⁸ —Nyuhu chiñi ndi cha cahān ra vatyi cusatani ra vehe ñuhu cahnu cha savaha ñáyivi. Ta chichi cha uñi quivi cunacananyaa ra inga vehe ñuhu cha ñima ñáyivi savaha, na —catyí ñu.

⁵⁹ Soco ni tyicuan caa ña nacachí tahan cha catyí ñu. ⁶⁰ Tyicuan ta ra cuví nuu chi tata sutu ndicuitā ra mahñu nu nyicu tandihi ra yucuan, ta quichahā ndaca tuhun ra chi ra Jesús, ta catyí ra:

—¿Atu ña nacahan maun? ¿Ñáá cha cuví ihya cha cacahán ra sicun? —catyí ra chi ra.

⁶¹ Soco ra Jesús taxi ri nanyaa ra, ta ña nacahān maa ra. Ta ra cuví nuu chi tata sutu cuan ndaca tuhun ra chi ra inga chaha, ta catyí ra:

—¿Atu yoho cuvún Cristo, Sehe Nyoo ra cha iyó cha vaha chi?

⁶² Ra Jesús catyí ra chi ra:

—Ican, yuhu cuví. Ta nyoho cunyehe ndo chi yuhu Rayi cha quichí nya gloria, cucunyaí chiyo vaha Nyoo ra cha iyó tandihi tunyee ñi chi. Ta cunyehe ndo chii quivi quichi nu vico andivi —catyí ra chi ra.

⁶³ Tyicuan ta ra cuví nuu chi tata sutu cuan, chahnya ra sahna ra tari noo seña vatyi ña tahán ñi ra, ta catyí ra:

—¿Ñáá ca cha ndaa cuñi yo? ⁶⁴ Nyoho cha chiñi ndo vatyi chicoo cuatyí ra nuu Nyoo chihin tuhun cahān ra. ¿Yoso caa cuñi nyoho? —catyí ra.

Ta tandihi ra cacatyí ra vatyi tahán chi cuví ra.

⁶⁵ Tyicuan ta suhva ra quichahā tyicu si ra chi ra. Ta chasi ra nuu ra, ta cañi ra chi ra chihin chiqui ra ta cacatyí ra chi ra:

—¿Nacoto yóo cha cañi chuun! —cacatyí ra chi ra.

Ta policia cacatu ra nuu ra.

Nu catyí ra Pedro vatyi ña ñohó nuu ra chi ra Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ra Pedro nyaá ra ityi yuvi nuquehe. Tyicuan ta chaq noo ñaha sahá tyiño chihin ra cuví nuu chi tata sutu cuan. ⁶⁷ Ta cuhva cha nanyehé ña chi ra Pedro vatyi sanasaá ra chi ra yunuhu cuan, ndoo ña nyehé vavaha ña chi ra, ta catyí ña chi ra:

—Yoho ñandihí, chica noun chihin ra Jesús ra ñuu Nazaret cuan —catyí ña chi ra.

⁶⁸ Soco ra Pedro tixehé ra, ta catyí ra:

—Ña ñohó nui chi ra, ña chité ñáá tuhun cahún —catyí ra chi ra.

Tyicuan ta quita ra ityi yuvehe. Tyicuan ta chacu noo loho. ⁶⁹ Tyicuan ta ñaha cha nyaá tyiño yoo cuan, nanyehé tucu ña chi ra inga chaha ta quichahā catyí ña chi ra canyicú yucuan:

—Noo ra tahan ra cuan cuví ra ihya —catyí ña.

⁷⁰ Soco tixehé ra inga chaha. Ta yaha suhva ri ca cuhva ta ra canyicú yucuan cacatyí tucu ra inga chaha chi ra Pedro:

—Cha ndicha vatyi noo ra yucuan cuví yoho, vatyi ra Galilea cuvún, vatyi tari cahān ñu, cahún —catyí ra chi ra.

⁷¹ Tyicuan ta iyo xaan tyanaha ra Pedro, ta catyí ra:

—¿Chitó vaha Nyoo tyi ña ñohó nui chi ra cha cahán nyoho tuhun! ¿Na cahñi Nyoo chii tatu ña ndicha cha cahán! —catyí ra.

⁷² Ta caa cuhva ri cuan chacu ri loho cha cu uvi chaha. Tyicuan ta nicohon ñi ra Pedro tuhun cha cahān ra Jesús chihin ra: “Cha ni cumañi ca cuacu loho uvi chaha, yoho cucatyn vatyi ña ñohó nuun chi yuhu uñi tahan chaha.” Nicohon ñi ra Pedro ta quichaha chacu chaa ra.

15

Nu nanyaa ra Jesús nuu ra Pilato

(Mt. 27.1-2, 11-14; Lc. 23.1-5; Jn. 18.28-38)

¹ Cuhva cha cundichin candu ñri ri ra cacuví nuu chi tata sutu chihin ra cacuví mandoñi ta chihin ra casacuahá cuenda ley vehe ñuhu ta tandihi ra cuví tyiño ñu Israel. Ta ra Jesús nuhñi ra, chinacuhva cuenda ra chi ra chi ra Pilato. ² Ta ndaca tuhun ra Pilato chi ra, ta catyí ra:

—¿Atu rey cuenda ñu Israel cuví yoho?

Ta nacahān ra Jesús ta catyí ra:

—Ican, yuhu cuví. Ndicha cha cahún.

³ Ta ra cacuví nuu chi tata sutu cuaha xaan cha catyaa ra siqui ra. ⁴ Tyicuan ta quichahā ndaca tuhun tucu ra Pilato inga chaha chi ra, ta catyí ra:

—¿Atu ña nacahan maun? Nyehé yoso cha cuaha cha tyaa ra sicun.

⁵ Soco ra Jesús ña nacahan maa ra. Yucuan chaha ña chitó ra Pilato ñáá cha caca xiñi ra.

Nu cutuñi chi ra Jesús vatyí cucúvi ra
(Mt. 27.15-31; Lc. 23.13-25; Jn. 18.38—19.16)

⁶ Ta vico cuan tuhvá ra Pilato saña ra chi noo ra ñohó vehe caa, noo ra cha cacán maa ñáyivi. ⁷ Ta ñohó noo ra nañi Barrabás vehe caa cuan, iin ri chihin inga ra cha cachahñi chi ñáyivi noo nu naquiqui ñáyivi siqui gobiernu. ⁸ Ta quichí coyo ñáyivi quichaha chican ñu chi ra Pilato na saña ra chi noo ra tari tuhvá maa ra. ⁹ Ta nacahan ra Pilato, ta catyí ra:

—¿Atu cuñi nyoho cha sañe chi Rey cuenda ñu Israel?

¹⁰ Tyicuan caa catyí ra vatyí tuví iñi ra vatyí ra cacuví nuu chi tata sutu cuan tasi cuñi ra chi ra Jesús tyi cuaha ñáyivi nyicón chi ra, yucuan chaha nacuhva cuenda ra chi ra. ¹¹ Soco ra cacuví nuu chi tata sutu cuan catyiyuhú ra chi ñáyivi na catyí ñu na saña ra chi ra Barrabás. ¹² Tyicuan ta ndacá tuhun ra Pilato chi ñu, ta catyí ra:

—¿Ta ñáá cha cuñi ndo sacuví chihin ra cha catyí nyoho Rey cuenda ñu Israel chi? —catyí ra chi ñu.

¹³ Tyicuan ta nacanchaa ñu, ta catyí ñu:
—¡Na cúvi ra nu cruzi! —catyí ñu, canachaá ñu.

¹⁴ Ta catyí ra Pilato chi ñu:
—Soco ¿ñáá cha ña vaha sacuví ra? —catyí ra.

Soco canachaá ca ñu ta catyí ñu:
—¡Na cúvi ra nu cruzi! —catyí ñu.

¹⁵ Tyicuan ta vatyí cuñi ra Pilato cuvaha ra nuu ñu, saña ra chi ra Barrabás. Tyicuan ta tyihí ra tyiño na ndoho ra Jesús, ta cha yaha cuan chaha cuenda ra chi ra vatyí cúvi ra nu cruzi.

¹⁶ Tyicuan ta chinyaca sindaro chi ra nuquehe vehe tyiño cuan. Ta casandu iin ri ra tandihí sindaro. ¹⁷ Ta casacuihno ra noo sahma tyacu nyaa chi ra. Ta caquicu ra noo corona chihin iñu. Ta catyihí ra xiñi ra. ¹⁸ Yahá cuan ta quichaha cacana cháa ra siqui ra chacú nyaa ra chi ra, ta catyí ra:

—¡Nocumi chuun, yoho Rey cuenda ñu Israel! —catyí ra.

¹⁹ Ta cacañi ra xiñi ra chihin noo yutun, ta tyicú sii ra chi ra. Ta cachicuñi chiti ra casaha ra tyi sacahnu ra chi ra. ²⁰ Cha yahá cha chacú nyaa ra chi ra tyicuan caa, tinyaa ra sahma nyaa cuan chi ra, ta sandihví noo ra sahma maa ra chi ra. Yahá cuan ta cuahan ra chihin ra vatyí cuatyaa ra chi ra nu cruzi.

Nu cuacúvi ra Jesús nu cruzi
(Mt. 27.32-44; Lc. 23.26-43; Jn. 19.17-27)

²¹ Yahá noo ra ñuu Cirene, nañi ra Simón. Sutu ra Alejandro ta ra Rufo cuví chi ra. Ni cua nachaa ra cha chahan ra nu chiqui. Ta cuhva cha cua yaha ra ityi cuan, casañiñi sindaro chi ra na cuiiso ra cruzi ra Jesús.

²² Ta cachinyaca ra chi ra Jesús noo nu nañi Gólgota. Ta cuñi chi catyí: Nu Cuví Yiqui Xiñi Ndiyi. ²³ Ta cachaha ra vinu nasaca chihin noo tatan cha nañi mirra coho ra. Soco ra Jesús ña chihí ra. ²⁴ Cha yahá catyaa sindaro chi ra nu cruzi, cachahan ra sihva chihin sahma ra ta nya ra saha ganaa caquehen ra sahma ra.

²⁵ Caa iin cha ñaha ri catyaa ra chi ra nu cruzi. ²⁶ Ta letra cha catyaa ra xiñi cruzi cuan, catyí chi ñáá cuatyí ra. Ta catyí chi tyehe caa: “Ican ra ihya cuví Rey cuenda ñu ñuu Israel.” ²⁷ Ta chinanyaa ra uvi ca cruzi nu chitacaá ra uvi tahan ra suhu, noo ra chiyo vaha ra, ta inga ra chiyo satyin ra. ²⁸ Ta tyicuan caa quitaá chi tari cuhva catyí nu tutu tuhun Nyoo tyehe caa: “Sahá ñu tuhun tyi cuví ra noo ra quiñi iyó.” ²⁹ Ta ñu yahá coyo chacú nyaa ñu chi ra. Ta quisí xiñi ñu, ta catyí ñu chi ra:

—¡Jaan! ¡Yoho cha catyün tyi cusatanun vehe ñuhu cahnu, ta chichí cha uñi quivi cunacoñehun inga chaha! ³⁰ ¡Sacacu maun chuun ta noo nu cruzi chiña! —catyí ñu.

³¹ Ta tyicuan caa tucu ra cacuví nuu chi tata sutu ta ra casacuahá cuenda ley vehe ñuhu, cachacú nyaa ra chi ra, ta catyí ra chi tahan ra:

—¡Chi inga ñu sacacu ra, soco ña cuví sacacu ra chí maa ra! ³² Na noo ra nu cruzi vityin, na nyehe yo ta chino iñi yo tyi Cristo Rey cuenda ñu Israel cuví ra —catyí ra.

Ta nyacua nya ra tacaá inga cruzi inchiyo inchiyo xiin ra ta cacahán ra chi ra.

Nu chihí ra Jesús
(Mt. 27.45-56; Lc. 23.44-49; Jn. 19.28-30)

³³ Cuhva cha cua cu hora, tandihí ñuhu ñáyivi nduñaa, nyacua nya caa uñi cha cha iñi. ³⁴ Ta suri cuhva cuan canachaá ra Jesús chihin tandihí fuerza ra, ta catyí ra:

—Eloi, Eloi, ¿lama sabactani? —ta cuñi chi catyí: Nyoo Suti, Nyoo Suti, ¿ñáá tuhun sandoq noo tuhun maun chii? —catyí ra.

³⁵ Suhva ra tayucu yucuan cachiñi ra ta catyí ra:

—¡Xihna! Caná chaa ra chi ra profeta Elías —catyí ra.

³⁶ Tyicuan ta chinq noo ra yucuan chiquehen ra noo tari caa xixan ta satyijí ra chihin vinu iya. Ta tyaa ra noo nu yutun ta satuhvá ra yuhu ra na coho ra, ta catyí ra:

—Cuatu ndo. Na nyehe yo tatu quichi ra Elías sanoo ra chi ra —catyí ra cuan.

³⁷ Tyicuan ta ñihi xaan canachaá ra Jesús, ta chihí ra. ³⁸ Ta sahma cha tacaá chichí vehe ñuhu cahnu ndatá sava maa chí, nya

siqui ta nyacua nya ityi yuvi. ³⁹ Ta noo capitán cuenda sindaro Roma nanyaá ra yatyin nuu ra Jesús cuan. Cha nyehe ra yoso caa cana chaa ra, ta yoso caa chihí ra, ta catyí ra:

—Cha ndicha ndicha cuii vatyi Sehe Nyoo cuví chi ra ihya —catyí ra.

⁴⁰ Ta nya sava ri tayucú tucu suhva ñusihí canyehé ñu. Ta mahñu ñu cuan nanyaá cu María ñaha Magdala, ta cu María sihi ra José ta ra Jacobo ra tyivaa ca. Ta nanyaá tucu cu Salomé. ⁴¹ Ican ñusihí ihya cachinyicon chi ra Jesús, ta tyinyeé ñu chi ra quívi chica noo ra ityi Galilea. Ta siin ri nyicú cuaha ca ñu cha chaq coyo chihin ra Jerusalén cuan.

Nu chicuchi ñu chi ra Jesús

(Mt. 27.57-61; Lc. 23.50-56; Jn. 19.38-42)

⁴² Cuví chi quívi cha sanduvaha ñu cha cachi ñu vatyi inga quívi tuhvá ñu nyitatu. ⁴³ Ta cha cuaa cuan chaq ra José ra ñuu Arimatea. Noo ra cuví tyiño. Nyatú tucu maa ra nu cunyaca ñaha Nyoo. Ta ndachan cuñí ra ta quihví ra nu nyaá ra Pilato, ta chican ra coño ñuhu ra Jesús chi ra. ⁴⁴ Iyo cuñí ra Pilato cha nacotó ra vatyi cha chihí ra Jesús. Ta cana ra chi capitán vatyi ndaca tuhun ra tatu cha yahá chihí ra. ⁴⁵ Ta cha catyí capitán vatyi cha yahá chihí ra, ra Pilato chaha ra coño ñuhu ra chi ra José. ⁴⁶ Tyicuan ta sata ra José noo sinduhu cha chinqo chihin sahma finu cha nañi lino, ta sanoq ra coño ñuhu ra. Ta siqui noo ra chihin sinduhu cuan. Yahá cuan ta chityihí ra chí ra noo chichi ñaña cha cachatyá ra chichi noo yuu. Ta chasi ra yuhu ñaña cuan chihin noo yuu cahnu. ⁴⁷ Ta cu María ñaha Magdala cuan ta cu María sihi ra José, chaq coyo ñu nyehe ñu nu tyihí ra chi ra.

16

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

¹ Yahá quívi nyitatu ñu. Tyicuan ta cu María ñaha Magdala ta cu María sihi ra Jacobo, ta cu Salomé sata ñu ndutya vixi chahan ta cuahan coyo ñu cua tyihí ñu coño ñuhu ra Jesús. ² Ta timingu cuví, quívi quichaha vitya, ñaha cuii ri cuhva cha vachi cundichin cuhva cha ni cua caña ñanyii, chaq coyo ñu nu ñaña. ³ Ta catyí ñu chí tahan ñu:

—¿Yóo cha cusacanyaha yuu yuhu ñaña cuan? —catyí ñu chí tahan ñu.

⁴ Soco cuhva cha nanyehé ñu, yuu cahnu cha nyasi yuhu ñaña cuan cha cuachiyó chi nya sava. ⁵ Quihví coyo ñu chichi ñaña yucuan. Ta nanyehé ñu chí noo ángel tari caa noo ra tyivaa, nyaá ra chiyo vaha. Ta ñihnó ra sahma cañi ta cuichin. Ta canayuhví ñu. ⁶ Soco catyí ra chí ñu:

—Ma yuhvi ndo. Nyoho nanducú ndo chí ra Jesús ra ñuu Nazaret, ra cha chihí nu cruzi. Soco cha nandoto ra. Ña ñohó ca ra ihya. Nyehe ndo nu chacun ra chí ra. ⁷ Cuahan ndo cua sacoto noo chí ra Pedro ta chí inga ra cachica noo chihin ra. Catyí ndo chí ra vatyi na cuhun coyo ra ityi Galilea vatyi yucuan nyatú ra Jesús chí ra, tari cuhva catyí ra chí ra. Vatyi ra Jesús cha cuahan ra ityi nuu —tyicuan caa catyí ángel cuan chí ñu.

⁸ Tyicuan ta cuahan coyo vavaha ñu, vatyi suri canihí ñu cha cuenda cha yuhví ñu. Ta yori maa chihin cahán ñu tuhun cha cuenda cha yuhví ñu.

Nu tuví ra Jesús nuu cu María ñaha Magdala

(Jn. 20.11-18)

⁹ Cuví chi timingu quívi quichaha vitya cha nandoto ra Jesús. Yahá cuan ta xihna ca nuu cu María ñaha Magdala tuví ra. Maa ña cuví ñaha cha tavá ñehe ra ucha tahan tatyí ña vaha. ¹⁰ Ta chahan ña chisacoto ña chí ra cachica noo chihin ra, vatyi canyicú cuihya ra ta cachacú chaa ra. ¹¹ Soco cuhva cha cachihí ra vatyi iyó ra Jesús ta vatyi nyehe ña chí ra, ña cachinqo ñi ra.

Nu tuví ra Jesús nuu uvi tahan ra chica noo chihin ra

(Lc. 24.13-35)

¹² Cha yahá cuan, ra Jesús tuví ra nuu uvi tahan ra cha cuahan coyo chica ityi ityi nu chiqui. Soco siin caa cuhva caá ra cananyehe ra chí ra. ¹³ Ta cuanuhu coyo ra ta sacoto ra chí tandihí ca ra. Soco suri ña cachinqo ñi ra cha cacahan ra cuan.

Tuhun cha chaha ra Jesús chí ra cha tyatyíño ra chí

(Mt. 28.16-20; Lc. 24.36-49; Jn. 20.19-23)

¹⁴ Ta cuee ca ta tuví ra Jesús nuu ndi uchi siin ra cha cachica noo chihin ra, cha ni ri ca cha canyicú ra nu mesa. Ta chahan ra chí ra cha cuenda cha ña cachinó ñi ra, ta cha cuenda cha candava aña ra vatyi ña cachinqo ñi ra tuhun chahan ñu nyehe tyi nandoto ra. ¹⁵ Ta catyí ra chí ra:

—Cuahan ndo nicacahnu ñuhu ñayiví, ta chahan ndo chihin tandihí ñáyiví, ta catyí ndo chí ñu yoso caa sacacú Nyoo aña ñu. ¹⁶ Ta ñu cha chinó ñi ta condutya ñu, cucacu aña ñu. Soco ñu cha ña chinó ñi cundoo cuatyí ñu siqui ñu ta cunaa ñu. ¹⁷ Ta tandihí seña ihya cusacuví ñu cha chinó ñi chii: Chihin sívi cutava ñehe ñu tatyí ña vaha. Cucahan ñu inga sahan cha ña chitó ñu. ¹⁸ Cutiin ñu coo, ta tatu coho ñu cha yihí venenu, ma saha cuehe chí ñu. Ta siin ri cutyiso ñu ndaha ñu siqui ñu cuhví, ta cunduvaha ñu.

*Nu nandaq xica ra Jesús andivi
(Lc. 24.50-53)*

¹⁹ Nu ndihi cahān Sutu Mañi yo Jesús chihin ra, ta nandaq xica ra andivi, ta chicunyaq ra chiyo vaha Nyoo. ²⁰ Tyicuan ta ra cachicā noo chihin ra quitā ra ta chahān coyo ra chichahān ra tuhun Nyoo yoso caa sacacú ra añima yo tandihi ri ityi. Suri maa Sutu Mañi yo tyinyeē chi ra vatyi chahā ra cha sacuvi ra cuaha milagru. Ta tyicuan caa nyehé ñáyivi tyi ndicha tuhun cacahán ra.

Tuhun Nyoo Cha Tyaa San Lucas

Nu sacuhun ra Lucas noo tuhun chi ra Teófilo

¹⁻³ Cha chitón yoho Tata Teófilo, vatyí cha cuaha ñáyiví nducú ñu cuhva ta tyaa ñu nuu tutu tuhun cha cuví nu nyicú ndí. Tyaa ñu tari maa cuhva nacatyí ñáyiví chí yo, ñáyiví cha nyehe ta cahán tuhun ra Jesús nya quiví xihna ri. Ta vityin tahán tucu chí chí yuhu tyí sacote tuhun ra chuun. Vatyí cha yahá sacuahí ta nyehe vahi tandihí nya nu quichahá. Ta vityin ñañi ñañi ri cuatyai tuhun ra. ⁴ Vatyí coto vahun tyí ndicha cha sacoto ñáyiví chuun.

Nu sacoto noo ángel chi ra Zacarías ama cucacu ra Juan ra sacondutyá chí ñáyiví

⁵ Quiví cha cuví ra Herodes rey nicahnu Judea, chiyó noo tata sutu, chinañi ra Zacarías. Ta yihí ra cuenda ityí tata sutu cha chinañi Abías. Ta ñasihí ra chinañi ña Elisabet. Ta vachi ñu tata ra Aarón, ra chiyó ta cha naha. ⁶ Ta ñahri maa cuatyí ñu iyó nuu Nyoo. Vatyí vaha xaan quichahá ñu tuhun cahán Nyoo. Ta yori maa cuví tyaa cuatyí siqui ñu. ⁷ Soco yori maa sehe ñu chicoo. Vatyí cu Elisabet, ña cuví coo sehe ña. Ta siin ri ninduvi tahan ñu chahnu xaan ñu.

⁸ Ta noo quiví tahan chí ityí cuenda ra Zacarías cha sacuvi ra tyiño nuu Nyoo. ⁹ Tari cuhva costumbre maa tata sutu, nyehe ra nya ra tahan chí nyatu chí. Ta tahan chí nyatu chí ra Zacarías cha quihví ra chíhí vehe ñuhu, vatyí cahmi ra cutu. ¹⁰ Cha ní ri ca cha ñohó ra chahmí ra cutu cuan, cuaha xaan ñáyiví chicán tahví ñu ityí chata vehe. ¹¹ Yucuan ta tuví noo ángel cuenda Nyoo nuu ra Zacarías. Ta chicuinyaa ta chiyó vaha arta nu chahmí ra cutu. ¹² Ta cha nanyehé ra Zacarías chí ángel cuan, iyo xaan cuñí ra. Ta yuhví xaan ra. ¹³ Soco ángel cuan catyí ra chí ra:

—Zacarías, ma yuhvun. Vatyí Nyoo chiñí ra tuhun cahún. Ta ñasihun cu Elisabet cucoo noo sehe ña. Ta Juan cusacunañun chí cue. ¹⁴ Si xaan cucuvi chuun. Ta cuaha xaan ñu, cusí cuñi quiví cacu cue. ¹⁵ Vatyí sehun, cahnu xaan ra cucuvi ra nuu Nyoo. Ma coho ra vinu ta ní ndixí. Ta ñihí xaan cuquihí Tatyí Ii Nyoo chí ra nyata cumañi cacu ra ta tandihí tyembu cha coo ra. ¹⁶ Ta cuaha xaan ñáyiví Israel cunyicon chí Sutu yo Nyoo cha cuenda ra. ¹⁷ Ta cucoo tunyee ñi Nyoo chí ra. Ta cuquihí xaan Tatyí Ii Nyoo chí ra. Vatyí cucuvi ra tari ra Elías, ra cuví profeta Nyoo ta cha naha. Ta cusanicoo vaha ra chí ñáyiví chíhín sehe ñu. Ta cusañaha ra chí ñáyiví quíni iyó na quichaha

ñu tuhun cahán Nyoo. Tyicuan caa cusanduvaha ra chí ñáyiví ta cuatu tuhva ñu chí Nyoo —catyí ángel chí ra Zacarías.

¹⁸ Ta ndaca tuhun ra Zacarías chí ángel, ta catyí ra:

—¿Yoso caa ta cote noo cha ndicha vaha? Vatyí yuhu cha chahnu xain. Ta ñasihí cha chahnu xaan ña ñandihí —catyí ra.

¹⁹ Ta ángel cuan quichahá catyí ra:

—Yuhu Gabriel nañí. Ta chiqué tyiño Nyoo. Maa ra tachí chí vatyí cahín nuun ta sacote tuhun vaha ihya chuun. ²⁰ Ta vityin nduñihun. Vatyí ña chinó ñun tuhun cahín. Ta ma cuví cahun nyacua nya chino cava tuhun cahín chuhun —catyí ángel cuan chí ra.

²¹ Ta ñáyiví cha nyatú chí ra Zacarías ityí chata vehe, iyo xaan cuñí ñu ñáá tuhun cha cucuee xaan ra chíhí vehe ñuhu. ²² Soco cuhva cha quitá ra Zacarías, ña cuví maa cahán ra chíhín ñu. Tyicuan ta tuví ñi ñu vatyí iyó cha nyehe ra chíhí vehe ñuhu cuan. Ta quichahá cahán ra chíhín ñu chíhín seña ri. Vatyí ña cuví cahán ra.

²³ Ta quiví cha ndihí tyiño saha ra Zacarías vehe ñuhu cuan, ta cuanuhu ra nya vehe ra.

²⁴ Ta cha yahá tuhun cuan chicoñon sehe ñasihí ra, cu Elisabet. Ta ña quitá maa ña chata vehe cha ní ri ca cha ohon yoo. Ta chicá xiñi ña: ²⁵ “Tyehe caa sacuví Sutu Mañi yuhu chíhín, tacuhva ma cahán cuehe ca ñáyiví chíi”, chicá xiñi ña.

Nu sacoto noo ángel chi cu María vatyí cucacu ra Jesús

²⁶ Nu cu ñu yoo cha ñohó sehe cu Elisabet, tachí Nyoo chí ángel Gabriel ñu Nazaret ityí Galilea. ²⁷ Vatyí cucahan ra chíhín noo ñaha tyivaa cha nañí María. Ta cha nyaña cha tandaha ña chíhín noo ra nañí José. Ta ra José cuan vachi ra tata rey David. ²⁸ Ta tuví ángel cuan nu nyaá ña. Ta quichahá catyí ra chí ña:

—Nocumi chuun, María. Ñihun tumañi ñi nuu Nyoo. Vatyí maa ra nyaá chuhun. Ta chí yoho nasocó xaan ca Nyoo nuu tandihí ca ñasihí —catyí ángel cuan chí ña.

²⁹ Ta cuhva cha chíñi ña cha cahán ra, iyo xaan cuñí ña tuhun cahán ra. Ta ndichí xiñi ña: “¿Ñáá tuhun cha chahá ra ihya nocumi chí yo tyicuan caa?” ndichí xiñi ña.

³⁰ Ta catyí ángel cuan:

—Ma yuhvun, María, vatyí ñihún tumañi ñi nuu Nyoo. ³¹ Vatyí cuacohon noo sehun. Ta sacunañun Jesús chí ra. ³² Cahnu xaan ra cucuvi ra. Ta cunañi ra Sehe Nyoo ra cuví nuu. Ta Nyoo Sutu Mañi yo cusacuvi ra rey chí ra. Tari cuví ra David, ra vachi ra tata. ³³ Vatyí cunyaca ñaha ra chí ñáyiví Israel tandihí maa tyembu. Ta ma ndihí maa cha cunyaca ñaha ra —catyí ángel cuan chí ña.

³⁴ Yucuan ta ndacā tuhun cu María chi ángel, ta catyí ña:

—¿Yoso caa cuahan tuhun ihya? Vatyí yuhu, ta coo ca yíi.

³⁵ Ta nacahan ángel ta catyí ra:

—Maa Tatyí Ii Nyoo cuquichi sicun. Ta tunyee iñi Nyoo cahnu cuquichi tari noo vico ta casi chi sicun. Yucuan chaha ra ii cha cucacu cunañi ra Sehe Nyoo. ³⁶ Tyicuan caa tucu cu Elisabet ñáyivi chuun. Cucacu noo sehe ña vasi cha chahnu ña. Ñaha cha catyí ñáyivi vatyí ña cuví maa coo sehe. Soco vatyin cha ñohó sehe ña. Cha iñu yoo ñohó. ³⁷ Vatyí Nyoo ñahri cha ma cuví sacuvi ra —catyí ángel chi ña.

³⁸ Ta quichaha catyí cu María:

—Yuhu cuví musu Sutu yo Nyoo. Na sacuvi maa ra yoso cuhva catyún —catyí ña.

Yucuan ta cuahan ángel cuan.

Cuahan cu María cuanyehe ña chi cu Elisabet

³⁹ Cuví noo quívi cuan, numi xaan cuahan cu María noo ñuu ityi Judea nu maa ri maa yucu cuví. ⁴⁰ Ta quihvi ña chichi vehe ra Zacarías. Ta chahā ña nocumi chi cu Elisabet. ⁴¹ Cuhva cha chiñi cu Elisabet tuhun cahan cu María, natyoño cha lee cha ñohó chichi ña. Ta chitu ña chihin Tatyí Ii Nyoo. ⁴² Ta chaa nacahan ña, ta catyí ña:

—Nyoo sahá ra tumañi iñi chuun cha nuu tandihi ñusihí. Ta nasocó ra chi sehun. ⁴³ ¿Ta yóo ñaha cuví yuhu? Vatyí quichi sihi Sutu Mañi yo quichí nyehe ña nu nyai. ⁴⁴ Cuhva cha chiñi tuhun cahan, ta natyoño sehi cha ñohó chichi. Vatyí sii xaan cuví chi ra. ⁴⁵ Ta sii xaan cuñí añimon vatyí chinó iñun cha cuacuvi tuhun cahan Nyoo chuhun —catyí cu Elisabet.

⁴⁶ Ta quichahā catyí cu María:

—Sacahní chi Nyoo chihin tandihi añime.

⁴⁷ Ta sii xaan cuví chii vatyí sacacú Nyoo añime.

⁴⁸ Vatyí cuví yuhu noo ñaha ndahvi ta Nyoo tiin cuenda ra chii. Ta vityin tandihi quívi cucatyí ñáyivi chii vatyí cahnu xaan tumañi iñi ñihí.

⁴⁹ Vatyí Nyoo, cahnu xaan cuví ra. Ta cahnu cha sacuvi ra chihin. Ta ii xaan sivi ra.

⁵⁰ Ta tyicuan ri ndahvi cuñí ra chi tandihi ñáyivi cha sahá ñáyivi chi ra.

⁵¹ Cahnu xaan cha sacuvi ra chihin tunyee iñi iyó chi ra.

Sanaá ra cuhva chicá xiñi ñu cahnu sahá chí.

⁵² Sanocueé ra chi ñu sacahnú chii. Ta ra cha ña cahnu sahá chii, sacucahnú ra chi ra.

⁵³ Chahá Nyoo cha vaha chi ñu cuñí coto cha vaha,

ñu chító vatyí chiñuhú Nyoo chí. Soco ñu tyayíi cha cuñí maa tyi ñahri chiñuhu chí, chihin nundaha nu ndíi ñu, sacuhún ra chí ñu.

⁵⁴ Tyinyeé ra chí ñáyivi Israel cha cuví musu ra.

Ta ña naá iñi ra chí ñu. Nyehé ndahvi ra chí ñu.

⁵⁵ Tari cuhva catyí Nyoo chí ra Abraham, sutu yo, ta chí sehe ra, tyicuan caa sacuvi Nyoo tyicuan ri maa —catyí cu María.

⁵⁶ Ta cu María ndoq ña chihin cu Elisabet uñi yoo. Ta cha yahā uñi yoo cuan ta cuanuhú ña nya vehe ña.

Quívi cacú ra Juan, ra cha sacondutyq

⁵⁷ Ta chahā quívi cha cuacacu cha lee sehe cu Elisabet. Cacú cue ta rayíi cuví cue. ⁵⁸ Ta cha chiñi ñáyivi cha nyicú vatyin yuvehe ña ta ñáyivi chí ña cha tyicuan caa, sii xaan cuví chí ñu. Ta sii xaan cuñí tucu maa ña. Vatyí vaha xaan cha sacuvi Nyoo chihin ña. ⁵⁹ Ta nu cu uña quívi cha cacú cue, chahan ñu chihin cue vehe ñuhu. Vatyí cuhva cuenda ñu chí cue chí Nyoo. Ta sahā ñu circuncidar chí cue tari cuhva iyó maa ñu. Chahnyā ñu chihin ñi cue nu cuví cue rayíi. Ta cuñí ñu sacunañi ñu Zacarías chí cue tari sutu cue.

⁶⁰ Soco sihi cue catyí ña:

—Ma cuví. Juan, cunañi cue.

⁶¹ Ta quichaha catyí ñu:

—¿Ñáá tuhun sacunañún Juan chí cue? Yori ñáyivi chí ndo cha nañi tyicuan caa —catyí ñu.

⁶² Ta quichaha ndaca tuhun ñu chihin seña ri chí sutu cue. Vatyí coto ñu ñáá sivi cuñí ra cha cunañi cue. ⁶³ Ta chican sutu cue noo vitu, ta nuu vitu cuan tyaā ra tyehe caa: “Juan cuví sivi cue”, tyaā ra.

Ta tandihi maa ñu cuan iyó xaan cuñí ñu tuhun cuan. ⁶⁴ Ta nacahan ra Zacarías caa cuhva ri cuan. Ta quichahā sacahnu ra chí Nyoo. ⁶⁵ Tandihí maa ñu iyó vatyin ri yuvehe ñu, yuhvi xaan ñu tuhun ihya. Ta tandihí maa ñáyivi cha iyó yucu ityi Judea cuan nacatyí ñu chí tahan ñu tuhun ihya. ⁶⁶ Ta tandihí maa ñáyivi cha chító tuhun cuan, ndichí xiñi ñu, ta ndacā tuhun ñu chí tahan ñu:

—¿Yóo ra cuví cha lee cuan? —catyí ñu.

Vatyí ndicha, Nyoo nasoco xaan ra chí cue.

Nu sacahnú ra Zacarías chí Nyoo

⁶⁷ Sutu cue, ra Zacarías, tyitú ra chihin Tatyí Ii Nyoo. Tyicuan ta quichahā cahan ra tuhun cha chahá Nyoo chí ra, ta catyí ra:

⁶⁸ —Cahnu xaan ra cuví Sutu Mañi yo Nyoo cuenda yo ñu Israel.

Vatyí quichí ra nu nyicú yo, cha cuví yo ñáyivi chí ra.

Ta sacacú ra chí yo.

69 Ta chahā ra noo ra cahnu chi yo, cha cusacacu chi yo.
Tata ra David ra cha sacuvj tyiño nuu Nyoo vachi ra.
70 Tyicuan caa cundahvi cuñi nyehé ra cha naha.
71 Vatyí tyicuan caa cusacacu ra chi yo ndaha ra xaan iñi chi yo, ra cha tasi cuñi nyehé chi yo.
72 Tyicuan caa cundahvi cuñi nyehé ra chi ñáyivi chi yo ta cha naha.
Ta ma sanaa ra iñi ra tuhun cahān ra.
73 Ican ihya tuhun cahān Nyoo chihin ra Abraham sutu yo.
74 Catyí ra vatyí cusacacu ra chi yo ndaha ra xaan iñi chi yo.
Vatyí ma yuhvi ca yo sacahnu yo chi ra.
75 Ta maa ra sanducachi ra iyó yo nuu ra.
Ta vaha coo yo nuu ra tandihí quívi cha cuacoo yo ñáyivi—catyí ra Zacarías.
76 Ta catyí ra Zacarías chi cha lee cuan tyehe caa:
—Ta yoho sehi, profeta Nyoo cahnu cucatyí ñáyivi chuun.
Vatyí cuhun ityí nuu Sutu Mañi yo. ta cucahun tuhun ra chihin ñáyivi vatyí cha cuñi quichí ra.
77 Ta cusacoton chi ñáyivi vatyí cunasaha Nyoo tucahnu iñi cuatyí ñu.
Ta tyicuan caa ta cacu añima ñu.
78 Vatyí Sutu yo Nyoo cuñi ra chi yo. Ta cundahvi cuñi ra chi yo.
Ta saquichí ra noo ra tyinyeé chi yo. Tari noo ñuhū ñanyii cucuví ra.
79 Vatyí chihin cha sañahá ra chi yo sacundichín ra na nyicú yo nu ñaa iñi cha catyí cuatyí yo.
Ta cusañaha ra chi yo yoso caa quihvi yo ityí vaha—catyí ra Zacarías.
80 Ta cha luhlu cuan cuahan chahnu ra. Nyee cuñi ra chihin Tatyí li Nyoo. Ta chicoo ra noo chiquí ndii nyacua nya quívi cha chicohon nuu ñáyivi Israel chi ra.

2

Quívi cacū ra Jesús (Mt. 1.18-25)

1 Ta quívi cuan iyó noo ra nyacá ñaha, nañi ra Augusto. Tachí ra tyiño natyaa ra sivi tandihí ñáyivi nicahnu ñuhu ñáyivi. 2 Ta quívi cuan ra Cirenio cuví ra ra nyacá ñaha tandihí ñuu ityí Siria. 3 Ta tahán chi cuhun tandihí ñáyivi nya ñuu ñu. Vatyí cuhva ñu sivi ñu yucuan. 4 Yucuan chaha quitā ra José ñuu Nazaret ityí Galilea. Ta chahan ra ityí Judea ñuu Belén nu cacū ra David. Yucuan chahan ra vatyí tata ra David vachi ra. 5 Ta chahan ra chi cuhva ra sivi ra chihin cu María. Ta cha cuñi tandaha ña chihin ra. Ta ñohó sehe ña. 6 Ta chiquitahan chaa quívi cha cacu sehe ña cha ni ri ca cha ñohó

ñu Belén cuan. 7 Ta yucuan cacū sehe nuu ña. Ta natyihí ña chi cue chichi sahma. Ta nandacūn ña chi cue chichi noo nu chachí quívi. Vatyí cuaha xaan ñáyivi chaq coyo ñuu cuan. Ta ña nuña ca ni minoo vehe nu cunyaa ñu.

Nu cahán ángel chihin ra sahá cumi mbee

8 Vatyí ñuu Belén cuan nyicú suhva ra casahá cumi mbee sana ra cha cha cuaa cuan. 9 Ta sana iñi ra ta tuví noo ángel Nyoo. Ta cha ndichin Nyoo Sutu Mañi yo ndundichin nicachico ri nu canyicú ra. Ta nayuhví xaan ra. 10 Ta quichaha cahán ángel cuan, ta catyí ra tyehe caa:

—Ma yuhvi ndo. Vatyí cuacatyí mai noo tuhun chí ndo. Noo tuhun cha sii xaan cuacuví chí tandihí ñáyivi. 11 Vatyí vityin cacū ra sacacú añima ndo ñuu ra David. Noo ra cuví Cristo, ra cuví Sutu Mañi yo. 12 Ta ihya cuví seña chahi chí ndo, cunyehe ndo chí cha lee cuan, siqui noo cue sahma. Catuví cue chichi noo nu chachí quívi—catyí ángel chí ra casahá cumi mbee cuan.

13 Ta caa cuhva ri cuan chaq coyo cuaha xaan ca ángel casacahnú ra chí Nyoo, ta cacatyí ra:

14 Sacahnu yo chí Nyoo nu nyaá ra gloria. Ta ñáyivi iyó siqui ñuhu ñáyivi cha ñihi tumañi iñi ra, na coo taxi añima ñu, catyí ángel cuan.

15 Yucuan ta cuanuhū coyo ángel cuan gloria. Tyicuan ta ra casahá cumi mbee quichahaq catyí ra chí ra tahan ra:

—Coho ndo Belén. Cunyehe yo ñáá cha cuví. Vatyí maa Sutu yo Nyoo sacotó chi yo.

16 Tyicuan ta numi xaan cuahan coyo ra Belén. Ta nañihí ra chí cue chihin cu María ta ra José. Ta catuví cue noo nu chachí quívi. 17 Ta yahā cha canyehe ra chí cue, ta canacatyí ra chí ñu ñáá ndihi tuhun cahān ángel chihin ra cuenda cha lee cuan. 18 Ta tandihí ñu chihí tuhun cahān ra, iyo xaan cuñi ñu. 19 Soco cu María ta cuhva chicá ri xihí ña tuhun cuan. 20 Ta ra sahá cumi chí mbee cuan cuanuhū coyo ra. Ta casacahnú ra chí Nyoo cha cuenda cha cachiñí ra ta canyehe ra. Vatyí chinó cava tandihí cha catyí ángel chí ra.

Nu cuacuhva cuenda ñu chí ra Jesús chí Nyoo vehe ñuhu cahnu

21 Ta nu cu uña quívi, sahá ñu circuncidar chí cue, tari cuhva tuhva maa ñu. Ta sacunañi ñu chí cue, Jesús. Suri maa sivi cha catyí ángel chí cu María quívi cha cumañi ca cohon sehe ña.

22 Ta cha yahā quívi cha tahan chí vatyí ndundi ñu nuu Nyoo, tari cuhva catyí maa ley Nyoo cha tyaa ra Moisés, tyicuan ta cuahan ñu Jerusalén. Vatyí cuacuhva cuenda ñu chí cue chí Nyoo. 23 Sacuvj ñu tyicuan caa vatyí iin caa maa catyí ley tyehe caa:

“Tandihí rayíi cha cuví sehe nuu ñu, cucuhva cuenda ñu chí Nyoo”, catyí ley cuan. ²⁴ Ta chahan ñu chichuhva cuenda ñu uvi tahan quiti tari cuhva catyí maa ley Sutu yo Nyoo nu catyí chí tyehe caa: “Cuhva ndo uvi tahan cucu o uvi tahan ndicuiya”, catyí ley cuan.

²⁵ Ta quívi cuan iyó noo ra ñuu Jerusalén cha nañi Simeón. Ta cuví ra noo ra vaha, ra sacahnú chí Nyoo. Ta nyatú tuhva ra nya quívi cusacacu Nyoo chí ñáyivi Israel. Ta yihí ra Tatyi Ii Nyoo. ²⁶ Ta sacoto Tatyi Ii Nyoo chí ra vatyi ma cúvi ra cha ní ri ca cha ta nyehe ca ra chí ra sacacú chí ñu Israel, ra cuví Cristo, ra cha cusaquichi Sutu yo Nyoo. ²⁷ Ta ra cuan chahan ra vehe ñuhu cuhva catyí maa Tatyi Ii Nyoo chí ra. Cuhva cuan chahan tucu sutu ta síhi cha lee cuan chinyaca ñu chí cue vehe ñuhu cahnu, vatyi sacuvi ñu tari cuhva catyí maa ley. ²⁸ Ta quehen ra Simeón chí ra Jesús. Ta tyihí sucun ndaha ra chí ra. Ta quichaha sacahnu ra chí Nyoo. Ta catyí ra:

²⁹ —Sutu Mañi yuhu. Na cúvi mai vityin chíhin cha vaha.

Vatyi cha sacuvun cha catyun chí yuhu cha cuví sehun.

³⁰ Vatyi cha nyehi chíhin nui chí ra cusacacu chí ndi.

³¹ Vatyi sañahun chí ra nuu tandihí ñáyivi.

³² Cha catyí ra ta cucahnu ñáyivi Israel nuu inga ñáyivi.

Ta ican ra cuví ra cha sacundichin añima tandihí inga ñáyivi cha ñima ñu Israel cuví. Vatyi cusacuvi ra na cutuñi ñi ñu tuhun Nyoo —catyí ra Simeón.

³³ Ta ra José chíhin síhi ra Jesús, iyo xaan cuñi ñu cha cahán ra Simeón tuhun cha lee cuan. ³⁴ Yucuan ta chicán tahvi ra Simeón chí Nyoo chaha ñu. Ta catyí ra chí cu María síhi ra Jesús:

—Nyehe chí cha lee ihya. Vatyi cuaha xaan ñáyivi cuchino ñi ñu chí ra quívi coto ñu tuhun ra, ta cucacu añima ñu. Soco cuaha ñu ma chino ñi ñu chí ra, ta cunaa ñu. Ta cucahan ñu chí ra. ³⁵ Ta cha tyicuan caa cusanatuví ra cha caa añima noo noo ñáyivi. Soco cha cuenda yoho, María. tari cha uhvi cha yahá sava noo tyicaa añima ñáyivi, tyicuan caa cha uhvi cunyhún cha catyí cha lee ihya —catyí ra Simeón.

³⁶ Ta yucuan ñohó tucu noo ñaha cha cuví profeta Nyoo. Ta cha chahnu xaan ña. Nañi ña Ana. Ta sehe ra Fanuel noo ra vachi tata ra Aser cuví chí ña. Luhlu xaan ña ta tandaha ña, ta ucha ri cuiya chiyo ña chíhin yí ña ta chíhi ri ra. ³⁷ Ta cha cumi xico cumi cuiya chíhi yí ña. Ta vehe ñuhu cahnu ña quitá ña, vatyi ndiyaca ta ñiyaca chicán tahvi ña chí Nyoo. Ta iyó cuhva cha ña chachí ña cha ní ri ca cha chicán tahvi ña. ³⁸ Ta

cuhva cha ñohó ra José ta cu María chíhin cha lee, chañ ña nu canyicú ñu. Ta nacuhva ña tyahvi nyoo chí Nyoo. Ta quichaha cahan ña tuhun ra Jesús chíhin tandihí ñáyivi cha nyatú tuhva cha quita ñuu Jerusalén chíhi ndaha ra ñuu Roma.

Nu cuanuhu ñu nya Nazaret

³⁹ Cha yahá cha sacuvi ñu tandihí maa yoso caa catyí ley Sutu yo Nyoo, ta cuanuhu ñu nya Galilea nya ñuu ñu nu nañi Nazaret.

⁴⁰ Ta ra Jesús cuahan chahnu ca ra. Ta cuahan ndunye ca ra ta cuahan chicoo ca cha chíhi tuñi Nyoo. Vatyi nasoco Nyoo chí ra.

Nu ñohó ra Jesús chíhi vehe ñuhu

⁴¹ Ra José chíhin síhi ra Jesús ndihí cuiya ri tuhva ñu chahan nya Jerusalén cha vico pas-cua. ⁴² Ta quívi ndihí ra Jesús uchi uvi cuiya, chahan tandihí ñu Jerusalén tari tuhva maa ñu chahan cha vico. ⁴³ Ta quívi ndihí vico ta cuandichí ñu, ta ra Jesús ndoo ra Jerusalén. Ta ña saha ñu cuenda. ⁴⁴ Cuñi maa ñu vatyi cuandichí ra mahñu nu tuvi ñáyivi cuan. Yucuan chaha ñahri chicá ñi ñu chicá ityi ñu noo quívi. Tyicuan ta nanducu ñu chí ra chíhi nu tuvi ñáyivi cuan, ⁴⁵ ta ña nañihí ñu chí ra. Tyicuan ta cuanuhu chata ñu cuananducu ñu chí ra nya Jerusalén.

⁴⁶ Cha yahá cha uñi quívi ta nañihí ñu chí ra chíhi vehe ñuhu cahnu cuan. Nyaá ra chíhin ra sacuahá cuenda ley vehe ñuhu. Ta tyasohó ra cuan tuhun cahán ra. Ta ndacá tuhun ra tuhun chí ra. ⁴⁷ Ta tandihí ñu chíhi tuhun cahán ra, iyo xaan cuñi ñu chíhin cha chíhi tuñi ra, ta chíhin tuhun cha nacahán ra. ⁴⁸ Cuhva cha nanyehé sutu ra ta síhi ra chí ra, iyo xaan cuñi ñu. Ta síhi ra catyí ña chí ra:

—Sehe luhlí. ¿Ñáá tuhun cha sacuvun chí ndi tyehe caa? Sutun ta yuhu chicá xaan ñi ndi ta nanducu xaan ndi chuun —catyí ña.

⁴⁹ Tyicuan ta catyí ra Jesús:

—¿Ñáá tuhun cha nanducu ndo chíhi? ¿Atu ña chíto ndo vatyi ñiñi cuñi chí cha cahin tuhun Suti chíhin ñáyivi? —catyí ra.

⁵⁰ Soco ña cutuñi ñi ñu tuhun chahan ra.

⁵¹ Tyicuan ta cuanuhu ra chíhin ñu nya Nazaret. Ta quichahá ra tuhun cahán ñu. Ta síhi ra naquehen vaha ña tandihí tuhun ihya chíhi añima ña. ⁵² Yucuan cuví nu cuacuahnu ca ra Jesús. Ta cuahan chaa ca cha chíhi tuñi xiñi ra. Ta sii xaan cuví chí Nyoo chíhin ra ta ñáyivi ñandihí.

3

Ra Juan, ra sacondutya, cahán ra tuhun Nyoo nuu ñáyivi

(Mt. 3.1-12; Mr. 1.1-8; Jn. 1.19-28)

¹ Nu ndihí chahun cuiya cha cuví ra Tiberio rey cahnu ñuu Roma, ta ityi Judea

nyacá ñaha ra Poncio Pilato. Ta ra Herodes nyacá ñaha ra Galilea. Ta yañi ra, ra Felipe nyacá ñaha ra Iturea chihin Traconite. Ta ra Lisanas nyacá ñaha ra Abilinia quivi cuan. ² Ta ra Anás chihin ra Caifás, ican ra cuví ra ra cacuví nuu chi tandihí tata sutu. Ta quivi cuan cahán Nyoo chihin ra Juan sehe ra Zacarías noo nu chiqui ndii. ³ Ta ra Juan chicá noo ra tandihí ñuu cha nyaá yatyin ri nu nyaá noo yuvi cahnu cha nañi Jordán cahán ra tuhun Nyoo chihin ñáyivi. Ta catyí ra chi ñu na ndu uvi iñi ñu cuatyí ñu ta na condutya ñu. Tyicuan caa ta Nyoo saha ra tucahnu iñi chi ñu, catyí ra. ⁴ Tyehe caa cuví tari cuhva catyí nu libru cha tyaq̄ ra Isaías profeta Nyoo ta cha naha. Ta catyí ra:

Chifíi yo cha caná chaa noo ra noo nu chiqui ndii, ta catyí ra:

“Tari sanduvahá ndo noo ityi, tyicuan caa sanduvaha ndo añima ndo vatyí cuaquichi Sutu Mañi yo.

Nuña ndo noo ityi ndoo chi ra na quihvi ra añima ndo.

⁵ Tari cha sanandutú ndo noo ticoho, ta tari sandundaá ndo noo yucu cahnu, ta tari sandundoó ndo cha yacua, ta tari sanduvií ndo nu quiñi caa, tyicuan caa ñasama ndo cuhva iyó ndo.

⁶ Tyicuan caa ta tandihí ñáyivi ta nyehe ñu vatyí Nyoo chaha ra cha cacú añima ñu.”

⁷ Ta tyicuan caa cahán ra Juan chihin ñáyivi. Yucuan ta cuhva cha chiñi ñu tuhun cahán ra, ta catyí ñu chi ra vatyí na sacondutya ra chi ñu. Yucuan ta quichaha catyí ra chi ñu:

—iNyoho tari noo tata coo xaan cuví ndo! ¿Yóo cha sañaha chi ndo vatyí chihin cha condutya ri ndo ta ma tachi tuñi ca Nyoo chi ndo? ⁸ Ñasama ndo cuhva iyó ndo, na nyehe ñáyivi vatyí cha ndu uvi iñi ndo cuatyí ndo. Ta ma catyí ndo vatyí tata ra Abraham vachi ndo. Vatyí nyacua nya noo yuu ihya, Nyoo cuví sananduvi ra noo ñáyivi chi ra Abraham. ⁹ Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñi Nyoo. Ta yutun cha ña chaha chiti, cahnya ñáyivi chi tun. Ta cahmi ñu chi tun. Tyicuan caa tucu nyoho cha cuñi cuiri cahun ndo nu cayu ñuhu —catyí ra Juan.

¹⁰ Yucuan ta quichaha ndaca tuhun ñáyivi chi ra:

—¿Yoso caa sacuvi ndi, cuñi yoho? —catyí ñu.

¹¹ Ta nacahan ra Juan, ta catyí ra:

—Yóo ra cha iyó uvi tahan camisa, tahán chi cuhva ra noo chi ra cha ñahri chi. Ta yóo ñu cha iyó cha cachi, tahán chi cuhva ñu cha cachi ñu ñahri chi —catyí ra.

¹² Ta chaq̄ coyo tucu suhva ra catavá xuhun cuenda gobiernu Roma, ta cuñi ra

condutya ra. Ta candac̄ tuhun ra chi ra Juan:

—Maestro, ¿yoso caa sacuvi tucu nyuhu? —catyí ra.

¹³ Ta catyí ra Juan chi ra:

—Tari cuhva catyí ley tava ndo xuhun. Ta ma tava ndo cuaha ca.

¹⁴ Yucuan ta quichaha candac̄ tuhun tucu suhva sindaro chi ra, ta catyí ra:

—Ta nyuhu tucu, ¿yoso caa sacuvi ndi? —catyí ra.

Ta nacahan ra Juan ta catyí ra:

—Ma tinyaa ca ndo cha chii ñáyivi. Ta ma tyanaha ndo chi ñu. Ma tyaa ndo cuatyí siqui ñu tatu ñahri cuatyí ñu. Ta ndoo ndo vaha yoso cuhva yahvi ndo —catyí ra Juan.

¹⁵ Iyo cuñi ñáyivi tuhun cahán ra Juan. Ta cuñi ñu tyi ican ra cuví Cristo, ra cha sacacú chi yo. ¹⁶ Soco ra Juan catyí ra chi tandihí ñu:

—Cha ndicha vatyí sacondutyé chi ndo chihin ndutya. Soco cha yaha yuhu cuhin cuquichi inga ra cusaccondutya chi ndo chihin Tatyí Ií Nyoo ta chihin ñuhu. Iyó ca tunyee iñi chi maa ra, ta ñima ca yuhu. Vatyí ña nañé cha cuví musu ra ta ñiri cha ndachi ñi xityin ndichan ra. ¹⁷ Tari noo ra cha cunaquehen vaha niñi, ta natyihí vaha ra chichi yaca. Ta cahmi ra mihin. Tyicuan caa cuví maa Sutu Mañi yo chihin yo. Tatu chinó iñi yo chi ra, cunaquehen vaha ra chi yo, ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhu cha ma ndahva ca maa —catyí ra Juan.

¹⁸ Ta tyehe caa cahán ra Juan chihin ñu. Ta cuaha xaan ca tuhun cahan ra nuu ñu tyi cuaquichi Sehe Nyoo ta cua sacacu ra chi yo. ¹⁹ Ta cahán ra Juan chi ra Herodes cha cuenda tandihí cuii cha ña vaha nyacuví ra. Vatyí naquehen ra chi cu Herodias, ñasihí ra Felipe yañi ra. Ta cuaha ca cha ña vaha nyacuví ra. ²⁰ Soco ra Herodes tahán chi cha tyasohó ra tuhun ihya soco ña cuñi ra. Nu ndihí tuhun tyihí ndihí ra chi ra Juan vehe caa.

Quivi cua condutya ra Jesucristo (Mt. 3.13-17; Mr. 1.9-11)

²¹ Cumañi ca cha cohon ra Juan vehe caa sacondutya ra chi tandihí ñáyivi. Ta sacondutya tucu ra chi ra Jesús. Ta cha ñi ri ca cha chicán tahvi ra Jesús chi Nyoo ta nuña andivi. ²² Ta nyehe ra Tatyí Ií Nyoo quichí siqui ra tari noo paloma. Ta tyacu noo ndusu andivi cha catyí tyehe caa:

—Yoho cuvñi Sehi cha cuñi. Ta si xaan cuñi chuhun —catyí ndusu cuan.

Ñáyivi vachi ra Jesucristo tata (Mt. 1.1-17)

²³ Oco uchí cuiya ra Jesús ta quichaha saha tyiño ra tyiño Nyoo. Ta tandihí ñáyivi cuñi maa ñu vatyí sehe ra José cuví chi ra.

Ta ra José, sehe ra Elí cuví chi ra. ²⁴ Ta ra Elí, sehe ra Matat cuví chi ra. Ta ra Matat, sehe ra Leví cuví chi ra. Ta ra Leví, sehe ra Melquí cuví chi ra. Ta ra Melquí, sehe ra Jana cuví chi ra. Ta ra Jana, sehe ra José cuví chi ra. ²⁵ Ta ra José, sehe ra Matatías cuví chi ra. Ta ra Matatías, sehe ra Amós cuví chi ra. Ta ra Amós sehe ra Nahum cuví chi ra. Ta ra Nahum, sehe ra Esli cuví chi ra. Ta ra Esli, sehe ra Nagai cuví chi ra. ²⁶ Ta ra Nagai, sehe ra Maat cuví chi ra. Ta ra Maat, sehe ra Matatías cuví chi ra. Ta ra Matatías sehe ra Semei cuví chi ra. Ta ra Semei, sehe ra José cuví chi ra. Ta ra José, sehe ra Judá cuví chi ra. ²⁷ Ta ra Judá, sehe ra Joana cuví chi ra. Ta ra Joana sehe ra Resa cuví chi ra. Ta ra Resa, sehe ra Zorobabel cuví chi ra. Ta ra Zorobabel, sehe ra Salatiel cuví chi ra. Ta ra Salatiel, sehe ra Neri cuví chi ra. ²⁸ Ta ra Neri, sehe ra Melquí cuví chi ra. Ta ra Melquí, sehe ra Adi cuví chi ra. Ta ra Adi, sehe ra Cosam cuví chi ra. Ta ra Cosam, sehe ra Elmodam cuví chi ra. Ta ra Elmodam, sehe ra Er cuví chi ra. ²⁹ Ta ra Er, sehe ra Josué, cuví chi ra. Ta ra Josué, sehe ra Eliezer cuví chi ra. Ta ra Eliezer, sehe ra Jorim cuví chi ra. Ta ra Jorim, sehe ra Matat cuví chi ra. ³⁰ Ta ra Matat, sehe ra Leví cuví chi ra. Ta ra Leví, sehe ra Simeón cuví chi ra. Ta ra Simeón, sehe ra Judá cuví chi ra. Ta ra Judá, sehe ra José cuví chi ra. Ta ra José sehe ra Jonán cuví chi ra. Ta ra Jonán, sehe ra Eliaquim cuví chi ra. ³¹ Ta ra Eliaquim, sehe ra Melea, cuví chi ra. Ta ra Melea, sehe ra Mainán cuví chi ra. Ta ra Mainán, sehe ra Matata cuví chi ra. Ta ra Matata, sehe ra Natán cuví chi ra. ³² Ta ra Natán, sehe ra David, cuví chi ra. Ta ra David, sehe ra Isaí cuví chi ra. Ta ra Isaí, sehe ra Obed cuví chi ra. Ta ra Obed, sehe ra Booz cuví chi ra. Ta ra Booz, sehe ra Salmón cuví chi ra. Ta ra Salmón, sehe ra Naasón cuví chi ra. ³³ Ta ra Naasón, sehe ra Aminadab cuví chi ra. Ta ra Aminadab, sehe ra Aram cuví chi ra. Ta ra Aram, sehe ra Esrom cuví chi ra. Ta ra Esrom, sehe ra Fares cuví chi ra. Ta ra Fares, sehe ra Judá cuví chi ra. ³⁴ Ta ra Judá, sehe ra Jacob cuví chi ra. Ta ra Jacob, sehe ra Isaac cuví chi ra. Ta ra Isaac, sehe ra Abraham cuví chi ra. Ta ra Abraham sehe ra Taré cuví chi ra. Ta ra Taré, sehe ra Nacor cuví chi ra. ³⁵ Ta ra Nacor, sehe ra Serug cuví chi ra. Ta ra Serug, sehe ra Ragau cuví chi ra. Ta ra Ragau, sehe ra Peleg cuví chi ra. Ta ra Peleg, sehe ra Heber cuví chi ra. Ta ra Heber, sehe ra Sala cuví chi ra. ³⁶ Ta ra Sala, sehe ra Cainán cuví chi ra. Ta ra Cainán, sehe ra Arfaxad cuví chi ra. Ta ra Arfaxad, sehe ra Sem cuví chi ra. Ta ra Sem, sehe ra Noé cuví chi ra. Ta ra Noé, sehe ra Lamec cuví chi ra. ³⁷ Ta ra Lamec, sehe ra Matusalén cuví chi ra. Ta ra Matusalén sehe

ra Enoc cuví chi ra. Ta ra Enoc, sehe ra Jared cuví chi ra. Ta ra Jared, sehe ra Mahalaleel cuví chi ra. Ta ra Mahalaleel, sehe ra Cainán cuví chi ra. ³⁸ Ta ra Cainán, sehe ra Enós cuví chi ra. Ta ra Enós, sehe ra Set cuví chi ra. Ta ra Set, sehe ra Adán cuví chi ra. Ta ra Adán, sehe Nyoo cuví chi ra.

4

Nu nducú nyehe cuihna chi ra Jesús

(Mt. 4.1-11; Mr. 1.12-13)

¹ Ta chitú ra Jesús chihin Tatyí li Nyoo cha yahá condutya ra. Yucuan ta quitá ra nu cuví yuvi cahnu Jordán ta cuanuhu ra. Ta Tatyí li Nyoo chinyaca chi ra noo nu chiqui ndii. ² Yucuan chinyaa ra uvi xico quivi. Ta nducú nyehe cuihna chi ra. Ña chachí maa ra quivi cuan. Yahá cuan ta quichaha chisoco ra. ³ Yucuan ta quichaha catyí cuihna chi ra:

—Tatu ndicha cha Sehe Nyoo cuví chuun, catyí chi yuu cha catuví ihya, na nanduvi pan.

⁴ Ta ra Jesús nacahan ra, ta catyí ra:

—Catyí tuhun Nyoo tyi ñima chihin cha cachi ri ñáyivi ta conyito ñu. Soco conyitó tucu añima ñu chihin tandihi tuhun cahán Nyoo —catyí ra Jesús chi cuihna.

⁵ Yucuan ta quehen cuihna chi ra Jesús. Ta cuahan ra chihin ra noo nu sucun ca. Ta numi ri sañaha ra tandihi nu nyacá ñaha ñáyivi siqui ñuhu ñayivi. ⁶ Ta cuihna catyí ra chí ra Jesús:

—Ndaha yuhu nyaá tandihi ñayivi ihya. Vatyí chaha Nyoo cha cunyaca ñahi tandihi ihya siqui ñuhu ñayivi. Ta cuví cuhve yóo chí cuñí mai cuhve. ⁷ Cuhve tandihi ñayivi cuan chuun tatu yoho ta cuiñí chitun nui, ta sacahnun chii —catyí cuihna cuan chi ra Jesús.

⁸ Soco ra Jesús catyí ra chi cuihna:

—Canyaha chuun nui, cuihna. Vatyí nyaá tuhun cahán Nyoo ta catyí chi tyehe caa: “Noo ri chi maa Nyoo sacahnu yo. Ta ñin ri chí maa ra quichaha yo.”

⁹ Yahá cuan ta quehen tucu cuihna cuan chi ra Jesús. Ta chinyaca ra chi ra nya ñuu Jerusalén. Ta sandaa ra chi ra xiñi vehe ñuhu cahnu. Ta quichaha catyí ra chí ra Jesús:

—Tatu ndicha cha Sehe Nyoo cuví chuun, sgndupehla nyacua nya nu ñuhú. ¹⁰ Vatyí nyaá nu catyí chi nu tutu Nyoo tyehe caa: Nyoo cusaquichi ra ángel, quichi saha cuenda chuun.

¹¹ Cunaquehen ra chuun chihin ndaha ra. Ta ma cuhva ra cha taxin chahun chihin yuu —catyí ra chí ra.

¹² Tyicuan ta nacahan ra Jesús, ta catyí ra:

—Soco catyí tucu nu tutu Nyoo tyehe caa: “Ma nducu nyehun chí Sutu Mañi yo Nyoo”, —catyí ra.

¹³ Ta cuihna ña cuvĭ sandahvi ñaha ra chi ra Jesús. Ta cuahan ra suhva quivi.

Nu quichaha ra Jesús cahan ra tuhun Nyoo chihin ñáyivi

(Mt. 4.12-17; Mr. 1.14-15)

¹⁴ Cha yahá tuhun cuan, ta nachaa ra ityi Galilea. Ta tyitú ra yihí chihin tunyee iñi Tatyí li Nyoo. Ta cahán ñáyivi tuhun ra tandihí ri ityi. ¹⁵ Ta sañahá ra chí ñáyivi nu cuvĭ vehe ñuhu tandihí ri ñuu. Ta tandihí ñu sacahnú ñu chi ra.

Nu nyaá ra Jesús Nazaret ñuu nu chahnú ra

(Mt. 13.53-58; Mr. 6.1-6)

¹⁶ Tyicuan ta nachaa ra Jesús nya Nazaret, ñuu nu chahnú ra. Ta noo quivi nyitatu ñáyivi, ta quihvi ra chichi vehe ñuhu, tari tuhva maa ra. Ta chicunanyaá ra vatyi cua sacuahá ra tuhun Nyoo. ¹⁷ Ta chaha ñu noo libru Nyoo chí ra cha tyaá ra Isaías ra profeta Nyoo ta cha naha. Ta cuhva cha nuñá ra, nañihí ra noo nu catyí tyehe caa. Ta quichaha sacuahá ra:

¹⁸ Nyaá Tatyí li Nyoo chihin vatyi maa ra tachĭ chii.

Vatyi nacachĭ ra chii vatyi sañahi tuhun vaha ra chí tandihí ñáyivi ndahvi.

Tachĭ ra chii vatyi sanduvahi chí ñu uhvi añima.

Tachĭ ra chii vatyi sacote tuhun ra chí ñu nyaá ndaha ra ña vaha, vatyi cusacacu Nyoo chí ñu.

Tachĭ ra chii vatyi sanyehi chí ñáyivi cuaa. Ta sacote chí ñu nyehe tindoho vatyi cucacu ñu.

¹⁹ Ta sacote chí ñu vatyi cha chaá quivi cha chaha Nyoo tumañi iñi chí ñu.

²⁰ Ndhí sacuahá ra ta nacasi ra nu libru cuan. Ta nacuhva ra chí noo ra cha nyaá vehe ñuhu cuan. Ta chicunyaá ra. Yucuan ta tandihí ñáyivi cha nyicú cuan ndoo ñu nyehe ñu chí ra. ²¹ Yucuan ta quichaha catyí ra chí ñu:

—Vityin quivi ihya chinó cava tuhun cha nyaá nu libru cha sacuahĭ nuu ndo —catyí ra Jesús chí ñu.

²² Tandihí ñu, vaha cahán ñu tuhun ra Jesús. Ta iyo cuñi ñu tuhun cha cahán ra vatyi vaha xaan cha cahán ra. Ta quichaha ndaca tuhun ñu chí tahan ñu:

—¿Atu ñima ra ihya cuvĭ sehe ra José?

²³ Ta quichaha catyí ra Jesús chí ñu:

—Chifé cha nacacá iñi ndo. Vatyi tyehe caa cua catyí ndo chii: “Tatu ra sanduvahá cuvún, sanduvaha xihna ca chí maun. Tandihí cha chiñi ndi cha sacuvún ñuu Capernaum. Sacuvi tucu ñuu maun vityin.”

²⁴ Ta catyí tucu ra Jesús:

—Cha ndicha vatyi ni noo ra profeta Nyoo, ta ña quichaha ñáyivi ñuu ra chí ra. ²⁵ Ta cha ndicha catyí chí ndo vatyi cuaha

xaan ñu chíhĭ yĭ chíyo Israel ihya cuiya cha chica noo ra Elías. Ta cuiya cuan ña coon savi uñi cuiya sisava. Ta cuaha xaan tama chíyo. ²⁶ Soco ña tachĭ Nyoo chí ra Elías vatyi tyinyee ra chí ni noo ñu chíhĭ yĭ Israel cuan. Soco tachĭ Nyoo chí ra nu nyaá noo ñaha chíhĭ yĭ ñuu Sarepta cha nyaá vatyin ñuu Sidón.

²⁷ Ta tyicuan caa tucu cuaha ra yihí cuehe cha tyahyu coño chí chíyo Israel quivi chica noo ra Eliseo, profeta Nyoo. Soco ña nduvaha ni noo ra Israel cuiya cuan. Minoo ri ra Naamán ra ñuu Siria nduvaha —catyí ra Jesús.

²⁸ Ta cha chíhĭ ñáyivi nyicú vehe ñuhu cuan tuhun cuan, cuxaan xaan tandihí cuii ñu. ²⁹ Ta nducuita ñu. Ta tññ ñu chí ra Jesús. Tava ñu chí ra xiñi noo yucu nya yuhu ñuu, vatyi tuchi ñu chí ra yucuan. ³⁰ Soco ra Jesús yahá ri ra mahñu ñu ta cuahan ra.

Noo ra cha yihí tatyí ña vaha chí

(Mr. 1.21-28)

³¹ Ta cuahan ra Jesús Capernaum cha nyaá Galilea quivi nyitatu ñáyivi. Ta quichaha sañaha ra chí ñáyivi. ³² Ta iyo cuñi ñu tuhun cahán ra. Vatyi ñihi cahán ra tari noo ra iyó vaha ityi chí cha cahán.

³³ Ta chichi vehe ñuhu cuan nyaá noo ra cha yihí tatyí ña vaha chí. Ta quichaha canachaa ra, ta catyí ra:

³⁴ —Saña chí ndi, yoho Jesús ra ñuu Nazaret. ¿Ñáá tuhun cha tyihun chuun chihin ndi? ¿Atu vachi sanaun chí ndi? Yuhu, ñohó nu chuun. Ta chité vatyi Sehe Nyoo cuvĭ chuun —catyí tatyí ña vaha cuan sacahan chí chí ra cuan.

³⁵ Ta cahan ra Jesús chihin tatyí ña vaha cuan, ta catyí ra:

—Taxi ri. Saña chí ra ndahvi chiña —catyí ra.

Tyicuan ta tatyí ña vaha cuan sanduva chí ra cuan nu ñuhú. Ta quita tatyí cuan chí ra ta cuahan. Ta ñahri ca sacuvi chí chí ra ndahvi cuan. ³⁶ Tandihí ñáyivi nayuhvi ñu. Ta quichaha catyí ñu chí tahan ñu:

—¿Ñáá túhun cuvĭ ihya? Ra Jesús ihya chihin cha iyó ityi chí ra ta chihin tunyee iñi ta tachĭ ra chí tatyí ña vaha cuan na quita. Ta quichaha chí nu cahán ra —catyí ñu.

³⁷ Ta tandihí ri ityi cahán ñáyivi tuhun ra Jesús.

Nu sanduvaha ra Jesús chí maha tyiso ra Simón Pedro

(Mt. 8.14-15; Mr. 1.29-31)

³⁸ Ta quita ra Jesús chichi vehe ñuhu cuan. Ta chaá ra vehe ra Simón. Ta tyiso ra Simón cuhvĭ ña chihin cahñi. Ta quichaha cahán ñu chihin ra Jesús cha cuenda ña. ³⁹ Ta nanyehe noo ra nu catuvi ña. Ta quichaha catyí ra chí cahñi cuan vatyi na quita. Ta caa

cuhva ri cuan ta quita cahñi cuan chi ña. Ta nducuita ri ña. Ta quichaha tyiñuhu ña chi ra.

Cuaha xaan ñu cuhvi sanduvahā ra Jesús (Mt. 8.16-17; Mr. 1.32-34)

⁴⁰ Ta cuhva cha quee ñanyii, tandihi maa ñu cha cumí chi ñu cuhvi tandihi nuu cuehe, chinyaca ñu chi ra Jesús. Ta tyiso ra ndaha ra siqui noo noo ñu. Ta tyicuan caa ta sanduvahā ra chi ñu. ⁴¹ Ta chichi cha tandihi ñu yihí ñu cha yihí tatyí ña vaha chi, ta quita chi. Ta suri cana chaa chi cuahan coyo chi, ta catyí chi:

—Yoho Sehe Nyoo cuví chuun —catyí chi.

Soco ña chahā ca ra Jesús cha cahan chi. Vatyí chitó chi vatyí ra Cristo, ra cha saquichí Nyoo cuví ra.

Nu cahán ra Jesús tuhun Nyoo nuu tandihi cuii ñáyivi ñuu cha iyó Galilea (Mr. 1.35-39)

⁴² Cundichin cuan ta quita ra Jesús ñuu cuan. Ta cuahan ra noo nu taxi ri iyó. Soco ñáyivi nanducu ñu chi ra. Ta chaā ñu nya nu ñohó ra. Ta ña cuñí ñu cha cuhun ra. ⁴³ Soco catyí ra Jesús chi ñu:

—Cumañi sacote chi ñáyivi inga ñuu tuhun vaha yoso caa nyacá ñaha Nyoo añima ñu. Vatyí yucuan chaha vachi siqui ñuhu ñáyivi.

⁴⁴ Ta tyicuan caa chicá noo ra Jesús cahán ra tuhun Nyoo vehe ñuhu ityí Galilea.

3

Nu chahā ra Jesús noo nyatu cha ñihi ra cuaha xaan tiyaca

(Mt. 4.18-22; Mr. 1.16-20)

¹ Noo quivi nyaá ra Jesús yuhu miñi nu cuví Genesaret. Ta chaā coyo cuaha xaan ñáyivi, vatyí cuñí ñu cuiñi ñu tuhun Nyoo. Ta tihin xaan ñohó ra Jesús mahñu ñu. ² Ta nanyehé ra uvi tahan canoa vatyin ri yuhu miñi cuan. Yori ñohó chichi. Vatyí cha quita coyo ra catin tiyaca cuan. Ta cha quichaha canacatyā ra yuhva ra. ³ Yucuan ta quihvi ra Jesús chichi noo canoa cuan. Ta canoa cuan chi ra Simón cuví. Ta catyí ra chi ra vatyí na tyandaha ra suhva ca cuhun nya mahñu ca cuan. Tyicuan ta chiconyaā ra Jesús chichi canoa cuan. Ta quichaha sañaha ra chi ñáyivi. ⁴ Cuhva cha ndihí cahan ra, catyí ra chi ra Simón:

—Saguhun canoa nya nu cama ca ndutyā cuan. Ta tuchí ndo yuhva vatyí tin ndo tiyaca —catyí ra Jesús chi ra.

⁵ Ta nacahan ra Simón ta catyí ra:

—Maestro, cha saha tyiño xaan ndi ñiyaca maa ta ni noo tiyaca ña ñihí ndi. Soco tatu maun catyí, cuatuchi tucu ndi yuhva —catyí ra Simón.

⁶ Cuhva cha cacañi ra yuhva cuan, cuaha xaan tiyaca ñihí ra. Ta nyacua tahnya yuhva ra chihin cha vee ti. ⁷ Tyicuan ta cachahā ra seña chi ra tahan ra, ra cha canyicú chichi inga canoa cuan, na quichi coyo ra ta tyinyee ra chi ra. Yucuan ta chaā coyo ra cuan. Ta casacutu ra ninduvi canoa cuan chihin tiyaca. Ta nyacua cuñi nyee canoa cuan cha tyitu yihí tiyaca. ⁸ Cha nanyehé ra Simón Pedro cha tyicuan caa, ta chicutiñi chiti ra nuu ra Jesús. Ta catyí ra chi ra:

—Cuachiyo chuun nui, Sutu Mañi yuhu, vatyí yuhu ra iyó cuatyí cuví —catyí ra.

⁹ Vatyí ra Simón iyo xaan cuñi ra chihin tandihi ra canyicu chihin ra. Vatyí cuaha xaan tiyaca catin ra. ¹⁰ Tyicuan caa tucu ra tahan ra Simón: ra Jacobo chihin ra Juan, sehe ra Zebedeo, iyo xaan cacuñi ra. Ta catyí ra Jesús chi ra Simón:

—Ma iyo xaan cuñun. Vatyí vityin ta nu cuahan ca chi quivi, ma tin con tiyaca. Soco cunducun ñáyivi, tavon chi ñu nu quiñi caa na quihvi ñu cuenda Nyoo —catyí ra Jesús chi ra Simón.

¹¹ Yucuan ta casacunuhu ra canoa nya ñuhu ityí. Ta casandoō ra tandihi cha iyó chi ra nyacua nya tiyaca cha tin ra. Ta cuahan ra chihin ra Jesús.

Nu sanduvahā ra Jesús chi noo ra tyahyu coño

(Mt. 8.1-4; Mr. 1.40-45)

¹² Noo quivi ñohó ra Jesús noo ñuu nu iyo noo ra cuhvi. Ta tyahyu xaan coño ra. Ta cha nanyehé ra chi ra Jesús, ta chicutiñi chiti ra nuu ra. Ta nacañinoo ra xiñi ra nya nu ñuhu. Ta chacu ndahvi ra nuu ra, ta catyí ra:

—Sutu Mañi yuhu, tu yoho ta cuñun, cuví sanduvahun chii —catyí ra.

¹³ Tyicuan ta tyiso ra Jesús ndaha ra siqui ra. Ta catyí ra:

—Cuñi sanduvahi chuun. Ta na nduvahun vityin ri —catyí ra Jesús chi ra.

Ta caa cuhva ri cuan ta nduvahā ra cuan. ¹⁴ Tyicuan ta catyí ra Jesús chi ra:

—Ma nacatyun chi ñáyivi. Noo ri catyí chuun, cuhan nu nyaá tata sutu. Ta sañahun chuun chi ra. Ta cuhva cuendon cha tahan chi cuhvon tari cuhva catyí nu ley ra Moisés tacuhva coto ñáyivi vatyí nduvahun —catyí ra Jesús chi ra.

¹⁵ Vasi ña cuñi ra cha coto ñáyivi, soco cuaha ca ñáyivi ñihi ñu tuhun ra. Ta cuaha xaan ñáyivi ndu in ri ñu, vatyí cuñí ñu cuiñi ñu tuhun cahán ra. Ta cuñi xaan ñu nduvaha ñu. ¹⁶ Soco ra Jesús, canyaha canyaha ri ra nu iyó ñáyivi. Ta cuahan ra noo nu yori ñáyivi iyó. Ta yucuan chican tahvi ra chi Nyoo.

Nu sanduvahā ra Jesús chi noo ra cuhvi cha ña cuví nacanda (Mt. 9.1-8; Mr. 2.1-12)

17 Noo quiví sañahá ra Jesús chi ñáyivi. Ta chiconyicú suhva ra fariseo, ra quichahá xaan ley vehe ñuhu cha tyaq ra Moisés ta cha naha. Ta nyicú tucu suhva ra sacuahá cuenda ley vehe ñuhu cuan. Quichí coyo ra ñuu cha iyó Galilea, ta ñuu Jerusalén, ta tandihí ca ñuu cha iyó Judea. Ta iyó xaan tunyee iñi Nyoo chi ra Jesús, tacuhva vatyi sanduvaha ra chi ñu cuhví. 18 Yucuan ta chaq coyo ra canyisó chihin noo chito chi noo ra ña cuví nacanda. Ta cuñí ra quihví ra chichi vehe ta cacun ra chi ra nuu ra Jesús. 19 Soco ña cuví quihví ra vatyi tuvi xaan ñáyivi. Tyicuan ta candaq ra ityi xiñi vehe. Ta sacuachiyó ra suhva tyiyo. Tyicuan ta sanoq ra chi ra cuhví cuan maa maa nuu ra Jesús mahñu nu tuvi ñáyivi cuan. 20 Yucuan cuví nu nyehe ra Jesús vatyi cachinó xaan iñi ra chi ra. Ta quichaha catyí ra chi ra cuan:

—Xaa, cha chicoq ticahnu iñi tandihí cu-atyun —catyí ra Jesús.

21 Tyicuan ta ra casacuahá cuenda ley vehe ñuhu chihin ra fariseo quichaha nacuaan iñi ra: “¿Yóó ra cuví ra ihya? Vatyi cuñí maa ra vatyi cuví saha ra ticahnu iñi cuatyí yo. Noo ri maa Nyoo cuví saha ra ticahnu iñi cuatyí yo”, ndichí xiñi ra.

22 Soco ra Jesús chitó ra tuhun chicá xiñi ra. Ta quichaha catyí ra chi ra:

—¿Ñáá tuhun chicá xiñi ndo tyehe caa? 23-24 ¿Ñáá cha yñi ca catyí yo? ¿Atu yñi ca catyí yo: “Cuatyun cha yaha ndachí”, o yñi ca catyí yo chi noo ñáyivi: “Ndícuíta ta caçon”? Soco vityin cua sañahi chí ndo vatyi iyó ityi chíi cha sahi ticahnu iñi cuatyí. Vatyi yuhu Rayñi cha quichi nya gloria cuví. Ta vityin cua sanduvahi chí ra ña cuví caca ihya —catyí ra Jesús.

Tyicuan ta quichaha catyí ra chi ra cha catuví cuan:

—Catyí chuun, ndícuíta. Naquehen chiton ta cuanuhu nya vehun.

25 Ta caa cuhva ri cuan nducuitá ra cha cuhví cuan, ta naquehen ra chito ra. Ta cuanuhu ra vehe ra, suri sacahnú ra chi Nyoo. 26 Tandihí ñáyivi iyo xaan cuñí ñu. Ta yuhví xaan ñu. Ta sacahnú ñu chi Nyoo, ta catyí ñu:

—Vityin ndicha nyehé yo minoo tuhun cha iyo caa —catyí ñu.

Nu canq ra Jesús chi ra Leví
(Mt. 9.9-13; Mr. 2.13-17)

27 Yaha cuan ta quita ra Jesús vehe cuan. Ta nanyehé ra chí noo ra cha tavá xuhun cuenda gobiernu ñuu Roma. Ta nañí ra Leví. Ta nyaá ra nu tyiyahví ñáyivi. Ta catyí ra Jesús chi ra:

—Coho chihin —catyí ra.

28 Tyicuan ta nducuitá ra Leví. Ta sandoo ra tandihí cha iyó chi ra. Ta cuahan ra chata ra Jesús.

29 Tyicuan ta savaha ra Leví noo vico cahnu vehe ra cuenda ra Jesús. Ta cuaha vavaha ra catavá xuhun cuenda gobiernu ñuu Roma canyicú ra mesa. Ta canyicú tucu inga ñáyivi. 30 Soco ra fariseo chihin ra sacuahá ley vehe ñuhu quichaha cahan nyaa ra chí ra cachicá noo chihin ra Jesús ta catyí ra:

—¿Ñáá tuhun chachí ndo ta chihí ndo chihin ra catavá xuhun ta chihin ra cahnu cuatyí? —catyí ra.

31 Ta ra Jesús nacahan ra, ta catyí ra:

—Ña chiñuhú doctor chi ra iyó vaha. Chi ra cuhví, yucuan ra chiñuhú doctor chí. 32 Yuhu ña vachi tyinyei chí ñu vaha sahá chí, soco vachi tyinyei chí ñu chitó vatyi iyó cuatyí, vatyi tacuhva nasama ñu cuhva iyó ñu —catyí ra Jesús chí ra.

Nu sañahá ra Jesús vatyi cha yaha canyaha ra chí ñu nyicón chí ra, cusavaha ñu ayuno

(Mt. 9.14-15; Mr. 2.18-20)

33 Tyicuan ta quichaha candaca tuhun ra chí ra Jesús, ta catyí ra:

—Ra canyicón chí ra Juan savahá ra ayuno, ña cachachí ra ta nanducú ra chí Nyoo, ta tyicuan caa tucu ra fariseo. Soco ra cachicá noo chihin yoho, ndi quiví maa chachí ra ta chíhi ra. ¿Ñáá tuhun? —catyí ra.

34 Ta nacahan ra Jesús, ta catyí ra:

—¿Atu cuví cha ma cuhva ndo cachi ñu canyicu vico tandaha tatu nyaá ra cha cua tandaha chihin ñu? Ma cuví. Vatyi sñi cuñí ñu, ta cuñí ñu cachi ñu. 35 Soco cuhaa quiví cuachiyo ra tandaha cuan nu nyicú ñu. Yucuan ndicha quiví, ta cusaha ñu ayunar.

Nu sañahá ra Jesús vatyi ña nacachi tahan tuhun chahnu cha iyó ñáyivi chihin tuhun chaa cha sañahá ra

(Mt. 9.16-17; Mr. 2.21-22)

36 Tyicuan ta cahan ra Jesús noo cuhva chihin ñu, ta catyí ra:

—Yori cahnya noo sahma chaa, ta chihin cuan naquicu ñu noo sahma chahnu. Vatyi tatu sacuví ñu tyicuan caa, cundiyyi sahma chaa cuan. Ta sñin ri ma cuhva chí chihin sahma chahnu cuan. 37 Ta tyicuan caa tucu ma cuví tyihí ñáyivi vinu chaa chichí ññi chahnu. Vatyi cutahnya ññi cuan chihin vinu chaa cuan. Ta tiví vinu cuan ta tiví ññi chahnu cuan ñandihí. 38 Yucuan chaha tahán chí tyihí yo vinu chaa chichí ññi chaa. Vatyi tyicuan ta ninduvi ta saha cuenda chí tahan. 39 Ta yori ñu chíhi vinu chahnu, ta cuñí ñu coho ñu cha chaa. Vatyi catyí ñu, vaha ca vinu chahnu. Cuñí ca ñu vinu

chahnu cuan vatyi ican cuan cuví costum-bre cha iyó maa ñu.

6

Tohon ra cachicá noo chihin ra Jesús yoco trigu quívi nyitatu ñáyivi
(Mt. 12.1-8; Mr. 2.23-28)

¹ Noo quívi cha nyitatu ñáyivi, yahá ra Jesús mahñu cha tachí ñu. Ta ra cachicá noo chihin ra catohón ra yoco trigu. Ta casacoyó ra chihin ndaha ra. Ta cachachí ra chíti cuan. ² Tyicuan ta catyí suhva ra fariseo chi ra:

—¿Ñáá tuhun cha sacuví ndo noo tyiño cha ña tahán chi sacuví yo quívi nyitatu yo?

³ Ta nacahan ra Jesús, ta catyí ra:

—¿Atu ta sacuaaha ca ndo cha sacuví ra David chihin ra tahan ra quívi cha chisoco ra? ⁴ Quihvi ra chichi vehe Nyoo. Ta quehen ra pan cha chacun ñáyivi nuu Nyoo. Ta chachí ra. Ta chaha ra chi ra candihí chihin ra. Ta maa ri maa tata sutu tahán chi cachi pan cuan —catyí ra Jesús.

⁵ Yucuan ta catyí tucu ra Jesús:

—Yuhu cuví Rayíi cha quichí nya gloria. Ta iyó ityi chíi vatyi catyí chi noo noo ndo ñáá cha sacuví ndo quívi nyitatu yo —catyí ra.

Nu sanduvahá ra Jesús chi noo ra cha ityi ndaha

(Mt. 12.9-14; Mr. 3.1-6)

⁶ Inga quívi cha nyitatu ñáyivi, quihvi ra Jesús chichi vehe ñuhu. Ta quichaha sañaha ra chí ñáyivi. Ta yucuan nanyehe ra chi noo ra cha na ityi chiyo ndaha vaha. ⁷ Ta ra casacuaaha cuenda ley chihin ra fariseo, canducú nyehe ra chi ra Jesús, tatu sanduvaha ra chí ra cuhví cuan quívi nyitatu ñu. Tyicuan caa ta cuví tyaa ra cuatyí siqui ra. ⁸ Soco ra Jesús chító ra tuhun chicá xiñi ra. Ta catyí ra chí ra cha ityi ndaha cuan:

—Nducuita. Ta cuinanyaun mahñu ihya.

Tyicuan ta ra cha ityi ndaha cuan nducuitá ra. Ta chicunanyaá ra mahñu. ⁹ Tyicuan ta catyí ra Jesús chí ra canyicú cuan:

—Cua nducu tuhun noo tuhun chí ndo. ¿Yoso caa cuhva tahán chí cha sacuví yo quívi nyitatu yo? ¿Atu tahán chí vatyi sacuví yo cha vaha, o cha ña vaha? ¿Atu tahán chí vatyi sacacu yo chí ñáyivi, o cha cahñi ndihi yo chí ñu?

¹⁰ Tyicuan ta ra Jesús nanyehe ra chí noo noo ra canyicú cuan. Ta quichaha catyí ra chí ra cuhví cuan:

—Sanacaa ndahun.

Tyicuan ta ra cuhví cuan sanacaa ra ndaha ra. Ta nduvahá ndaha ra. ¹¹ Soco suhva ra canyicú cuan, cuxaan xaan ra. Ta quichahá candaca tuhun ra chí ra tahan ra:

—¿Yoso caa sacuví yo tacuhva cha ma cuví ca cahan ra Jesús nuu ñáyivi? —catyí ra.

Nacachí ra Jesús ndi uchi uvi tahan ra tyi caca ra tyiño ra

(Mt. 10.1-4; Mr. 3.13-19)

¹² Quívi cuan ndaa ra Jesús noo yucu. Ta ñiyaca maa chicán tahvi ra chí Nyoo. ¹³ Cuhva cha cundichin, cana ra chí tandihí ri ñu nyicón chí ra. Ta nacachí ra uchi uvi tahan ri ra. Ta sacunañi ra chí ra, apóstol ra, ta cuñi chí catyí, ra caca tyiño nuu ra.

¹⁴ Ta ihya nyaá sivi ndi uchi uvi tahan ra: Ra Simón ra cha sacunañi ra Cristo Pedro chí, ta yañi ra, ra Andrés, ta ra Jacobo, ra Juan, ra Felipe, ra Bartolomé, ¹⁵ ra Mateo, ra Tomás, ra Jacobo sehe ra Alfeo, ta ra Simón ra yihí cuenda ityi ra cacuñi cuhun cuatyí siqui gobiernu ñuu Roma cha nyacá ñaha chí ñu. ¹⁶ Ta ra Judas, yañi ra Jacobo, ta ra Judas Iscariote, ra cha naxico tuhun chí ra Jesús.

Nu sañahá ra Jesús chí cuaha xaan ñáyivi
(Mt. 4.23-25)

¹⁷ Noo ra Jesús yucu cuan chihin ndi uchi uvi tahan ra. Ta chicutayucu ra nu ndaa cuan chihin ñu nyicón chí ra. Ta cuaha ri ityi quita coyo ñáyivi. Quita coyo ñu ñuu Jerusalén ta tandihí ca ñuu cha iyó Judea, ta ñuu Tiro chihin ñuu Sidón cha nyicú yuhu tyañuhu. Ta chaá ñáyivi cuan vatyi cuñi ñu tuhun cahan ra Jesús. Ta tandihí ñu cuhví cuñi ñu vatyi sanduvaha ra chí ñu.

¹⁸ Ta tandihí ñu cha yihí tatyí ña vaha chí, nduvahá ñu sahá ra. ¹⁹ Ta tandihí ñu cuñi ñu tñin ñu chí ra. Vatyi nduvaha ñu chihin tunyee iñi Nyoo, vasi tacuhva tñin ri ñu chí ra.

Ñu ñihí tumañi iñi, ta ñu ña ñihí tumañi iñi
(Mt. 5.1-12)

²⁰ Tyicuan ta nanyehe ra Jesús chí ra cachicá noo chihin ra. Ta quichahá catyí ra chí ra:

—Tandihí nyoho cha ndahvi ndo, sii xaan cuví chí ndo, vatyi tahán chí cha cunyaca ñaha Nyoo añima ndo.

²¹ Tandihí nyoho cha chisocó ndo vityin, sii xaan cuví chí ndo. Vatyi coo quívi cha ma nyehe ca ndo socio. Tandihí nyoho cha chacú chaa ndo cha cuihya iñi ndo, sii xaan cuví chí ndo vatyi coo quívi ta ñahri ca tucuihya iñi coo chí ndo. Ta cuacu ndo chihin cha sii cuñi ndo.

²² Sii xaan cucuvi chí ndo, quívi cha tasi cuñi ñáyivi nyehé ñu chí ndo, quívi tavá ñehe ñu chí ndo nu nyaá ñu, quívi cahan ñu chí ndo, quívi catyí ñu vatyi ñáyivi ña vaha cuví ndo vatyi chinó iñi ndo chí yuhu Rayíi cha quichí nya gloria. ²³ Sii xaan cucuvi chí ndo quívi nyehe ndo tindoho cuan vatyi tyicuan caa tucu sacuví ñáyivi ta cha naha. Cahan vavaha ñu chí ra cacuvi profeta Nyoo. Caña

ndava ndo chihin cha sii cuñi ndo. Vatyí cahnú xaan cha cucuhva Nyoo chi ndo gloria.

²⁴ "Soco ndahví nyoho, ñu tyayii. Vatyí vityin sii xaan cuñi ndo chihin tandihí cha tyayii ndo. Soco coo quívi maa ma ri tundoho cunyehe ndo. Vatyí ñahri cuñihi ndo nuu Nyoo.

²⁵ "Ta ndahví nyoho cha cuñi maa ndo vatyí ñahri cumañi chi ndo cha vityin, vatyí coo quívi cunyehe ndo soco. Nyoho cha sii cuñi ndo cha vityin, ndahví nyoho vatyí coo quívi cunyehe ndo tucuihya iñi. Ta cuacu chaa ndo. ²⁶ Ta ndahví nyoho vatyí vaha cahán ñáyivi siqui ndo. Vatyí tyicuan caa tucu ñáyivi ta cha naha, vaha xaan cahán ñu siqui ra cha cahán cha ña ndicha.

Cuñi ndo chi ñu xaan iñi chi ndo
(Mt. 5.38-48; 7.12)

²⁷ "Tandihí nyoho cha chíni ndo tuhun cahín, catyí chi ndo tyehe caa: Cuñi ndo chí ñu xaan iñi chí ndo. Sacuvi ndo cha vaha chihin ñu cha tasi cuñi nyehe chí ndo. ²⁸ Cahán ndo cha vaha chihin ñu cha cahán ña vaha siqui ndo. Čacan tahvi ndo chaha ñu cahán chí ndo. ²⁹ Tatu yóo cha cañi inchiyo nuu ndo, cuhva tucu ndo inga chiyo nacañi maa ñu. Tatu yóo cha tinyaa chaqueta ñihno ndo, cuhva ndihi ndo camiseta ndo. ³⁰ Cuhva ndo ñáa ndihi cha chicán ñu chí ndo. Tatu tinyaa ñu ñáa cha iyó chí ndo, ma ndacan ndo chí ñu. ³¹ Tari cuhva cuñi ndo cha sacuvi ñáyivi cha vaha chihin ndo, tyicuan caa sacuvi ndo cha vaha chihin ñu.

³² "Tatu cuñi ndo chí maa ri maa ñu cha cuñi chí ndo, ñahri cha vaha xaan sacuvi ndo. Vatyí tyicuan caa nyacuví tucu ñu quiñi iyó, cuñi ñu chí ñáyivi ñohó nuu ri ñu. ³³ O tatu sacuvi ndo cha vaha chihin ñu cha sacuvi cha vaha chihin ndo, ñahri cha vaha xaan nyacuví ndo. Vatyí tyicuan caa nyacuví tucu ñu quiñi iyó. ³⁴ O tatu sacuvi ndo tumañi iñi chí noo ñáyivi, ta yihí iñi ndo vatyí cusacuví tucu ñu cuan tumañi iñi chí ndo, ñahri cha vaha nyacuví ndo. Vatyí tyicuan caa nyacuví tucu ñu quiñi iyó. Tatu ñáa noo tumañi iñi sacuvi ñu chí tahan ñu, nyatú ñu cha nacuhva tucu ñu cuan tumañi iñi chí ñu. ³⁵ Soco nyoho, cuñi ndo chí ñu xaan iñi chí ndo. Ta sacuvi ndo cha vaha chí ñu. Ta cuhva noo ndo chí ñu. Soco ma cuatu ndo ñáa tumañi iñi cunacuhva ñu chí ndo. Tyicuan ta cahnú xaan cha cuñihi ndo nuu Nyoo ta cucuvi ndo sehe vaha Nyoo cahnú. Vatyí Nyoo vaha ñáyivi cuví ra chihin ñu cha ña nacuhva tyahví nyoo chí ra ta chihin ñu quiñi iyó. ³⁶ Vaha ñáyivi cuví ndo chihin ñáyivi, tari maa Nyoo Sutu yo, vaha ñáyivi cuví ra chihin ndo.

Ma cahan yo cha caa inga tahan yo
(Mt. 7.1-5)

³⁷ "Ma cahan ndo cha caá tahan ndo, tyicuan ta Nyoo ma tñin cuenda ra cha caá maa ndo. Ma soco ndo chí ñáyivi cha cuhnú ñu anyaya, tyicuan ta ma sacuhnú Nyoo chí ndo anyaya. Saha ndo tucahnú iñi chí ñáyivi. Ta Nyoo cusaha ra tucahnú iñi chí maa ndo. ³⁸ Cuhva ndo cha chíñuhú chí ñáyivi. Ta tyicuan caa cuhva tucu maa Nyoo cha chíñuhú chí maa ndo. Noo ñáyivi vaha, tatu xicó ñu ñáa cha xicó ñu chí ndo, tyitu maa chahá ñu chí ndo, tyicuan caa tucu cuhva Nyoo chí ndo. Vatyí tari cuhva cuhva ndo chí ñáyivi, tyicuan caa cuhva cuhva Nyoo chí ndo —catyí ra Jesús.

³⁹ Ta chahá ra Jesús cuhva ihya chí ñu, ta catyí ra:

—Noo ra cuaa ña cuví sañaha ra ityi chí nonga ra cuaa. Vatyí ninduvi ra ña nyehé ra ityi cuahan ra. Ta cuví canacoyo ra chichi noo xahva. Tyicuan caa tucu noo ra ña chitó ityi Nyoo, vasi cuñi ra, soco ma cuví sañaha ra ityi Nyoo chí nonga ra. ⁴⁰ Ni noo ra cuatyaa sicuela ma cuví coto ra cha chitó ra cha sañaha chí ra. Vatyí nicaa ni quichaha sacuahá ra. Coto ra soco nya ndihi sacuahá ra.

⁴¹ "¿Yoso caa tyi nyehún cuatyí luhlu cha cuví tari mihin lee ri cha yihí chiti nuu tahun, ta ña sahnú cuenda cuatyí cahnú cha iyó chuun cha cuví tari vitu cahnú cha yihí nuu maun? ⁴² Tatu chiti nuu maun yihí noo vitu cahnú, yoso caa cuví catyun chí ra yañun: "Nyaca, natave mihin lee cha yihí chiti nuun." ¡Yoho cha savahún chuun! Tava xihna vitu cahnú cha yihí chiti nuun. Tyicuan ta cuví nyehe vahun mihin lee cha cutavon chiti nuu yañun.

Chihin cha sacuvi ñáyivi ta nicohon nuu ri yo chí ñu tatu ñu vaha, o ñu ña vaha cuví ñu
(Mt. 7.17-20; 12.34-35)

⁴³ "Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. ⁴⁴ Tandihí yutun nicohon nuu yo chí tun chihin chiti ri tun. Vatyí tuñiyaca, ma cuhva tun mangu. Ta ni ri noo iñu nduhva ma cuhva tun tichaha ndivi. ⁴⁵ Ta tyicuan caa tandihí ñáyivi vaha, tuhun vaha cahán ñu. Vatyí yihí cha vaha añima ñu. Soco ñáyivi ña vaha, maa maa ri maa tuhun ña vaha cahán ñu. Vatyí yihí cha caquiñi añima ñu. Chihin yuhu ñu cahán ñu tandihí cha quiñi caa cha quitá añima ñu.

Cacu añima ñu quichahá tuhun cahán ra Jesús, ta ñu ña quichahá tuhun cahán ra, ma cacu ñu

(Mt. 7.24-27)

⁴⁶ "¿Ñáa tuhun cha catyí ndo chí, "Sutu Mañi yuhu, Sutu Mañi yuhu", tatu ña sacuvi ndo tari cuhva cha catyí chí ndo? ⁴⁷ Ihya cua catyí chí ndo yóo chí ndacu nyoho cha

vachi ndo nu nyaí, ta tyasohó ndo cha cahín, ta sacuví ndo cha catyí. ⁴⁸ Tari noo ra chitó vaha savaha vehe cuví ndo. Vatyí xihna ca chatyá ra cono vavaha ta tahan ra yuu. Ta siquí yuu cuan savahá ra vehe ra. Ta quívi coon xaan savi, ta cama xaan ndutya yahá, ta ña nduva vehe cuan vatyí siquí yuu nanyaá chí. ⁴⁹ Soco ñu cha chiñí tuhun cahín ta ña sacuví ñu tari cuhva catyí, cuví ñu tari minoo ra ña chitó savaha vehe. Vatyí ña chatyá ra nu quihi chaha vehe ra. Ta ñima nu yuu savaha ra vehe ra. Ta chaa quiívi cha coon savi. Cama xaan ndutya yaha. Ta chatya chí chaha vehe ra vatyí ñuhu ri cuví. Ta nduva vehe ra vatyí ña cunye. (Ta tyicuan caa cuví ñáyivi, tatu sacuví ñu tari cuhva catyí, tyicuan ta cacu ñu. Soco tatu ma sacuví ñu, ma cacu ñu) —catyí ra Jesús.

7

Nu sanduvahá ra Jesús noo musu capitán sindaro
(Mt. 8.5-13)

¹ Cuhva cha ndihí cahan ra Jesús chihin ñáyivi, ta cuanuhu tucu ra inga chaha nya Capernaum. ² Ta yucuan iyó noo capitán cha nyacá ñaha noo cientu sindaro cuatyí. Ta iyó noo musu ra cha cuñí vavaha ra. Ta cuhví ra. Ta cha cuñí cuví ra. ³ Quiívi cha chitó capitán cuan tuhun ra Jesús, tachí ra chí suhva ra cacuvi mandoñi ñuu Israel na cucahan ra chihin ra Jesús, vatyí na quichi ra vatyí sanduvaha ra chí musu ra. ⁴⁻⁵ Tyicuan ta chaá coyo ra mandoñi cuan nu nyaá ra Jesús. Ta quichaha catyí ra chí ra:

—Iyó noo capitán cuenda ñuu Roma. Ta vaha xaan ñáyivi cuví ra chihin yo cha cuví yo ñáyivi Israel. Nyacua savahá ra noo vehe ñuhu yo. Ta tahán chí vatyí tyinyeun chí ra. Vatyí cuhví xaan noo musu ra. Ta cuñí ra vatyí sanduvahun chí ra.

⁶ Tyicuan ta cuahan ra Jesús chihin ra. Soco cuhva cha cumañi ca chaa ra nya vehe capitán cuan, capitán cuan tachí ra chí suhva ra tahan ra. Ta quichaha catyí ra chí ra Jesús:

—Tata, catyí capitán vatyí ma sayangon chuun cha cuhun nya vehe ra na. Vatyí ña naña ra cha cuhun, na. ⁷ Yucuan chaha ña caña iñi ra quichi ra nu nyaún. ¿Atu ma sahan noo tumañi iñi chí ra vatyí noo tuhun cahan run ihya ri, ta nduvaha ri musu ra, na? ⁸ Vatyí maa ra capitán cuví ra. Ta nyacá ñaha rey chí ra. Ta maa ra nyacá ñaha ra chí ra cuatyí ca cha nuu ra. Tatu tava ra tyiño chí noo ra cuatyí cuan, na cuhun ra. Cuhun ra. O tatu catyí ra chí nonga ra na quichi ra, quichi ra. O tatu tachi ra chí inga ra na sacuví ra tyiño, sacuví ra. Ta tyicuan caa tucu yoho, tatu catyun na nduvaha musu ra,

tyicuan ta nduvaha ra na —catyí ra tahan capitán cuan chí ra Jesús.

⁹ Cha chiñí ra Jesús cha catyí ra cuan ta iyo xaan cuñí ra. Ta nanyehé ra chí ñáyivi cha nyicú chihin ra, ta catyí ra:

—Ndicha ndicha cuii vatyí chinó xaan iñi capitán cuan. Ta nañihi que chí ni noo ra Israel cha chinó xaan iñi tari ra cuan —catyí ra.

¹⁰ Yucuan ta cuanuhu ra tahan capitán cuan. Ta cha nachaa coyo ra nya vehe, ta nanyehé ra vatyí cha nduvahá musu cuan.

Nu sanandotó ra Jesús chi sehe noo ñaha ndahvi chihí yí

¹¹ Cha yahá tuhun cuan ta cuahan ra Jesús noo ñuu cha nañí Naín. Ta cuahan tucu ra cacticá noo chihin ra, ta cuaha xaan ñáyivi ñandihí. ¹² Tyicuan ta cuhva cha cua chaa ra yatíin ñuu cuan, nanyehé ra cuaha ñáyivi quitá coyo ñuu cuan. Ta canyísó ñu noo ndiyí, cuacuchi ñu sehe noo ñaha ndahvi cha chihí yí. Ta noo tuhun ri maa ra iyó chí ña, ta chihí ra. ¹³ Ta cha nanyehé ra Jesús chí ña, ta cundahvi cuñi nyehe ra chí ña. Ta quichaha catyí ra chí ña:

—Ma cuacun.

¹⁴ Tyicuan ta tuhva ra ta tiñ ra chatun cha yihí ndiyí cuan. Tyicuan ta ra canyísó chí ndiyí cuan chicuitayucu ra. Ta catyí ra Jesús chí ndiyí cuan:

—Ndícuita, ra cuehe —catyí ra.

¹⁵ Tyicuan ta ndícuita ndiyí cuan. Ta nicunyaa ra. Tyicuan ta quichaha cahan ra. Ta ra Jesús nacuhva cuenda ra chí ra chí síhi ra. ¹⁶ Cha nanyehé ñu cha tyicuan caa ta yuhvi xaan ñu cuví. Ta quichaha sacahnu ñu chí Nyoo. Ta catyí ñu:

—Cahnu xaan ra profeta Nyoo tuví nu nyicú yo ihya.

Ta catyí tucu ñu:

—Maa Nyoo, ican vachi nu nyicú yo, vachi tyinyee ra chí yo —catyí ñu.

¹⁷ Ta tandihí maa ñáyivi nicahnu ityí Judea, chitó ñu cha sacuví ra Jesús.

Nu tachí ra Juan uvi tahan ra chicá noo chihin ra nu nyaá ra Jesús

(Mt. 11.2-19)

¹⁸ Ta ra cacticá noo chihin ra Juan nacatyí ra tuhun cha sacuví ra Jesús. Tyicuan ta caná ra Juan chí uvi tahan ra. ¹⁹ Ta tachí ra chí ra nu nyaá ra Jesús, vatyí cundaca tuhun ra chí ra tatu ican ra cuví Cristo ra cha cusaquichi Nyoo. Vatyí tatu ñima ra, tyí cuatu ra inga ra. ²⁰ Tyicuan ta ra cha tachí ra Juan, cuahan coyo ra. Ta chaá ra nu nyaá ra Jesús. Ta quichaha catyí ra:

—Ra Juan, ra sacondutyá, tachí ra chí ndi vatyí ndaca tuhun ndi chuun tatu icon cuví Cristo ra cha cusaquichi Nyoo. Vatyí tatu ñimon, cuatu ndi chí inga ra —catyí ra.

²¹ Ta cuhva cha canyicú ra tachí ra Juan cuan, ra Jesús sanduvahá ra cuaha xaan ñu cuhví, ta cuaha xaan ñu yihí tatyí ña vaha chí. Ta sananyehé ra chí ñu cuaa. ²² Tyicuan ta catyí ra Jesús chí ra tachí ra Juan:

—Cuahan ndo. Ta ñacatyí ndo chí ra Juan tandihí cha nyehé ndo, ta tandihí cha chíñi ndo. Ta çatyí ndo chí ra yoso caa nanyehé ra cuaa, yoso caa nacacá ra coxo, yoso caa nduvahá ra tyahyu coño, yoso caa nacuiñi ra soho, yoso caa nandotó ndiyi, yoso caa cahín tuhun Nyoo chihin ñu ndahvi yoso caa sacacú ra añima ñu. Ta çatyí tuco ndo chí ra vatyí ²³ sii xaan cuví chí ñu ña chícá uvi iñi nyicón chii —catyí ra Jesús chí ra.

²⁴ Cuhva cha cuahan coyo ra cha tachí ra Juan, ta quichaha cahan ra Jesús tuhun ra Juan chihin ñáyivi. Ta catyí ra:

—¿Ñáá cha chahan ndo chinyehé ndo quívi chahan ndo chiqui ndi cuan? ¿Atu chahan ndo chinyehé ndo noo ndoo cha naquisí tatyí? ²⁵ ¿O noo ra cha ñihno sahma vaha chinyehé ndo vaha? Ñima. Vatyí chitó ndo vatyí ra ñihno sahma vaha iyó vaha ra ñáyivi ta iyó ra vehe rey. ²⁶ ¿Atu ña chinyehé ndo chí noo profeta Nyoo? Ican. Ta cahnu ca ra cuví ra ican saha noo profeta. ²⁷ Ican tuhun ra Juan nyaá nuu tutu cha tyaa ra Isaiás ta cha naha. Ta catyí Nyoo tuhun ra tyehe caa:

Yuhu tachí chí noo ra cahan tuhin ityi nuu nu cuahun.

Vatyí cucahan ra tuhun chihin ñáyivi na nasama ñu cuhva iyó ñu, ta cuatu tuhva ñu quívi quichun.

²⁸ Ta catyí chí ndo vatyí chichi cha tandihí ra cha cacú, yori profeta cha cahnu ca ican saha ra Juan. Soco ra cha nyacá ñaha Nyoo añima, vasi cuví ra noo ra luhlu ca socio cahnu ca ra ican saha ra Juan ra sacondutyá —catyí ra Jesús.

²⁹ Cha chíñi ñu tuhun ihya, tandihí ñáyivi ta ra catavá xuhun cuenda gobiernu ñuu Roma cha sacondutyá ra Juan nacoto ñu vatyí cuhva sacuví Nyoo vaha xaan. ³⁰ Soco tandihí ra fariseo chihin ra sacuahá cuenda ley vehe ñuhu, maa ra cuví ra ña cuñi cha sacondutyá ra Juan chí ra, vatyí ña cuñi ra quehen ra cha chahá Nyoo. ³¹ Ta catyí ra Jesús:

—¿Ñáá chihin sandu inuu ri chí nyoho, ñu iyó quívi ihya? ¿Yóó cha tari caa caá ndo? ³² Tari ra cuatyaa cuví nyoho. Vatyí ra cuatyaa nyasiqú ndotyín nuyahvi. Ta caná chaa ndotyín chí tahan ndotyín, ta catyí ndotyín: “Tiví ndi tyoo ta ña chitá chaha ndo. Ta chitá ndi yaa cuihya, socio ña chacu ndo.” Ta tyicuan caa ni noo cuhva ña tahán iñi ndo. ³³ Vatyí ra Juan ra sacondutyá, quichí ra ta ña chachí vaha ra. Ta ña chíñi ra vinu. Ta nyoho catyí ndo vatyí tatyí ña

vaha yihí chí ra. ³⁴ Ta quichí tuco yuhu Rayii cha quichí nya gloria. Ta chachí ta chíñi. Ta nyoho catyí ndo vatyí ra cuahyi cuví ta cuví noo ra tuhvá chíñi. Ta ña tahán iñi ndo cha cutahín chihin ra iyó cuatyí, ta chihin ra tavá xuhun. Soco vasi ni noo ndi ña quehen cuenda ndo, ³⁵ socio catyí chí ndo vatyí cha chíñi tuñi Nyoo, chahá ra chí ñu naquehen tuhun cahín ta tuhun cahán ra Juan. Ta maa ñu cusañaha ñu chí ndo vatyí vaha cha chíñi tuñi Nyoo —catyí ra Jesús.

Nu nyaá ra Jesús vehe ra Simón ra cuví fariseo

³⁶ Noo ra fariseo cha nañi Simón nacatyí tuhun ra chí ra Jesús noo vico vehe ra. Ta chaa ra Jesús vehe ra, ta chicunya ra mesa.

³⁷ Tyicuan ta noo ñaha cata iñi ñuu cuan chitó ña vatyí nyaá ra Jesús yucuan. Ta chaa ña chihin noo yutyí alabastro tyitu yihí ndutya vixi chahán. ³⁸ Ta chicunya ña yatyín ri chaha ra. Ta quichaha chacu chaa ña vatyí ndu uvi iñi ña cuatyí ña. Ta quitá ndutya nuu ña. Ta chihin ndutya nuu ña nacatyá ña chaha ra. Yaha cuan ta sana ityi ña chaha ra chihin ixí xiñi ña. Ta tyayuhu ña chaha ra. Tyicuan ta choso ña ndutya vixi chahán cuan siqui chaha ra. ³⁹ Cuhva cha nyehé ra fariseo cuan cha tyicuan caa, ndichí xiñi ra: “Tatu ndicha ndicha cha Nyoo saquichí chí ra ihya, coto ra yóó ñaha tñin chaha ra, vatyí ñaha cuan, ñaha iyó cuatyí cuví ña.”

⁴⁰ Tyicuan ta ra Jesús catyí ra chí ra fariseo cuan:

—Yoho Simón, iyó noo tuhun cua catyí chuun —catyí ra chí ra.

Tyicuan ta nacahan ra Simón:

—Vaha, çatyí chii, Maestro —catyí ra.

⁴¹ Ta quichaha catyí ra Jesús tyehe caa:

—Uvi tahan ra yosoyicá ra xuhun chí noo ra cha tuhva chahá noo. Ta noo ra cuan yosiyicá ra ohon cientu denario. Ta nonga ra yosiyicá ra uvi xico uchi ri denario (tari ohon cientu ri pesu). ⁴² Ta ninduvi tahan ra ña cuví tyiyahvi ra. Ta ra tuhvá chahá noo cuan, sahá ra ticahnu iñi chí ninduvi tahan ra. Ta vityín çatyí chii, yoho Simón ¿nya ra cua cuñi ca chí ra cha chahá noo cuan? —catyí ra Jesús.

⁴³ Tyicuan ta nacahan ra Simón, ta catyí ra:

—Ra cha cuaha ca sahá ra tucahnu iñi chí —catyí ra.

Tyicuan ta catyí ra Jesús:

—Ndicha cha cahún.

⁴⁴ Tyicuan ta nanyehé ra Jesús chí ñaha síhi cuan, ta catyí ra chí ra Simón:

—¿Nyhén chí ñaha ihya? Yuhu quihvi chichí vehun. Ta ña chahun ndutya cha ndoo चाहि tari cuhva costumbre cha iyó chí yo. Ta ñaha ihya nacatyá ña चाहि chihin

ndutya nuu ña. Ta yaha cuan, ta sana ityi ña chihin ixi xiñi ña. ⁴⁵ Yoho ña tyayuhun ndahi, tari costumbre cha iyó chi yo, soco maa ña nyacua nya cuhva cha quihvi ihya ta ña sandihi ña cha tyayuhú ña chahi. ⁴⁶ Ta yoho ña tyihun aceteye xiñi, soco ñaha ihya tyihí ña ndutya vixi chahán chahi. ⁴⁷ Ta catyi chuun, yoho Simón, vasi cahnu xaan cuatyí ña, soco sahí ticahnu iñi chi ña. Yu-cuan chaha cuñi xaan ña chii. Ta ñu sahí tucahnu iñi chihin ri cuatyí, chihin ri cuñi ñu chii —catyi ra Jesús.

⁴⁸ Tyicuan ta quichaha catyi ra Jesús chi ña:

—Cuatyun cha yaha sandachi. Vatyí cha saha Nyoo ticahnu iñi chuun —catyi ra chi ña.

⁴⁹ Tyicuan ta ra nyicú chihin ra quichaha ndichí xiñi ra: “¿Yóo ra cuví ra ihya? Vatyí sahá ra tucahnu iñi cuatyí ñáyivi.”

⁵⁰ Tyicuan ta quichaha catyi ra Jesús chi ñaha sihi cuan:

—Cuahan vityin, cha cacun vatyí chinó iñun chii. Cuahan chihin cha vaha —catyi ra chi ña.

8

Ñusihí cha tyinyeé chi ra Jesús

¹ Cha yaha tuhun cuan, ta cuahan ra Jesús chicá noo ra noo noo ñuu cahnu ta noo noo ñuu luhlu. Ta cuhan noo ra nuu ñáyivi. Ta sacoto ra chi ñu tuhun vaha yoso cuhva cuñi Nyoo cunyaca ñaha ra chi ñu. Ta ndi uchi uvi tahan apóstol, ra cha tyatyíño ra chi, cuahan coyo ra chihin ra. ² Ta cuahan coyo tucu suhva ñusihí cha sanduvaha ra, ñu cuhví ta ñu yihí tatyí ña vaha chí. Ta chihin ñu cuahan cu María noo ñaha ñuu Magdala, cha yihí ucha tahan tatyí ña vaha chí ta nduvaha ña. ³ Ta cuahan tucu cu Juana ñasihí ra Chuza ra cuví tyiño cuenda ra Herodes, ta cu Susana chihin cuaha xaan ca ñu cha tyinyeé chi ra chihin ñáá cha iyó chí ñu.

Nu sañahá ra Jesús vatyí tari noo ra chicá noo tachí, tyicuan caa cuví ra cahán tuhun Nyoo

(Mt. 13.1-9; Mr. 4.1-9)

⁴ Ta cuaha xaan ñáyivi quitá noo noo ñuu, vatyí cua nyehe ñu nu cahan ra Jesús tuhun Nyoo. Ta tuví xaan ñu nyicú ñu, ta quichaha catyi ra chí ñu chihin noo cuhva:

⁵ —Quitá noo ra vehe ra. Ta cuahan ra nu iyó tyiño sahá ra, vatyí cua quití ra chíti trigu nu ñuhú ra. Ta cuhva cha quití ra canacoyo suhva chíti cuan yuhu ityi. Ta chañi ñáyivi siquí. Ta quichí saa ta chachí ti. ⁶ Ta suhva ca chíti cuan canacoyo ticu yuu. Cañá chíti cuan. Soco na ityi ri vatyí chihin xaan ñuhu yihí chaha. Ta siin ri ña cachin. ⁷ Ta suhva ca chíti canacoyo chichí chíti iñu, soco quivi

cañá tun ñn ri, tu iñu cuan chahñi chí tun. ⁸ Soco suhva ca chíti canacoyo nu ñuhú vaha ta quivi chahnu tun, vaha xaan chahá tun chíti. Vatyí noo ri chíti cuan, cientu chíti quitá chihin —catyi ra Jesús.

Ta cha yaha catyi ra tuhun cuan. Ta quichaha cana chaa ra vatyí na cuiñi ñáyivi, ta catyi ra:

—Tatu cutuñi iñi ndo, tyasoho ndo tuhun cahín —catyi ra.

Nu sacotó ra Jesús ñáá cuenda sañahá ra chihin cuhva ri

(Mt. 13.10-17; Mr. 4.10-12)

⁹ Yaha cuan ta ra cachicá noo chihin ra, ndacá tuhun ra chí ra ñáá cha cuñi chí catyi tuhun cha nacatyí ra chí ñáyivi. ¹⁰ Tyicuan ta quichaha catyi ra:

—Chi nyoho sacotó Nyoo tuhun xehe, yoso caa nyacá ñaha ra. Soco chí tandihí ca ñu cuan, cuhva ri chahí chí ñu. Tacuhva nyehe ñu ta cuví chí tari cha ña ndichin nyehé ñu, ta cuiñi ñu soco ma cutuñi iñi ñu ñáá tuhun cuví.

Nu sacotó ra Jesús ñáá cha cuñi chí catyi tuhun ra tachí cuan

(Mt. 13.18-23; Mr. 4.13-20)

¹¹ Cuhva cha catyi chí ndo, cuñi chí catyi tyehe caa: chíti cuan tari tuhun Nyoo cuví. ¹² Ta tari nu canacoyo chíti trigu cuan yuhu ityi, tyicuan caa cuví noo ñu chíti tuhun Nyoo. Soco quichí cuhna ta tinyaa ra tuhun Nyoo chí ñu tacuhva cha ma chino iñi ñu. Ta ma cacu ñu. ¹³ Ta tari nu canacoyo chíti cuan ticu yuu, tyicuan caa tucu inga ñáyivi cha chíti tuhun Nyoo. Ta siñ xaan cuví chí ñu suhva ri quivi. Soco vatyí ña yihí vaha yoho ñu, suhva ri quivi chingo iñi ñu, soco quivi cha quichaha nyehe ñu tindoho, ta sandihí ri ñu tuhun cha chinó iñi ñu. ¹⁴ Tari nu canacoyo chíti chichí iñu, tyicuan caa cuví tucu inga ñu chíti tuhun Nyoo. Chíti ñu tuhun Nyoo soco ña cuñi ñu sacuvi ñu tari cuhva chíti ñu. Vatyí yihí ñu, nyaá ca xiñi ñu tuhun tindoho ican saha tuhun Nyoo. Ta nonga ñu nyoiyo ca iñi ñu cha tyayí. Ta nonga tucu ñu si ca cuñi ñu chica noo yanga ri ñu. Ta tari cha ña chico chíti nuu ñu cuví cuan. ¹⁵ Soco tari nu canacava chíti nu ñuhú vaha, tyicuan caa cuví noo ñu cha chíti tuhun Nyoo. Ta vaha añima ñu vatyí chinó iñi ñu chihin tandihí añima ñu. Ta vaha tyasohó ñu tuhun Nyoo, ta ña naa maa iñi ñu tuhun ra. Ta sacuvi ñu tandihí tuhun cahán ra.

Ma tyihí xehe yo ñuhú cha sandundichin Nyoo añima yo coto tinyaa ra

(Mr. 4.21-25)

¹⁶ Yori yo cha natyaa yo ñuhú tima ta tixehe yo xiu chito o nonga nu xehe. Natyaa yo ñuhú tima soco cha cananyaa yo noo nu sucun. Ta cuhva quihvi ñáyivi chichí

vehe soco ndichin. ¹⁷ Vatyí ñahri noo cha ñohó xehe, ta cuñún, tyi ma natuvi. Ta ni noo tuhun xehe, ta cuñún, tyi ma quita nu ndichin ta coto yo. ¹⁸ Yucuan chaha tyasoho ndo tuhun cahín. Vatyí tatu quichaha ndo tuhun cahín, cuaha ca cusañahi chi ndo. Soco tatu ma tyasoho ndo, tyicuan ta cutinyaa Nyoo tandihi maa chi ndo nyacua nya cha chiin ri cha cuñí maa ndo tyi cumí ndo.

Tari yañi ra, ta tari sihi ra, tyicuan caa cuví chi ñu quichaha tuhun Nyoo, catyí ra Jesús

(Mt. 12.46-50; Mr. 3. 31-35)

¹⁹ Tyicuan ta chaq sihi ra Jesús chihin yañi ra nu nyaá ra. Soco ña cuví chaa ñu vatyí tuví xaan ñáyivi. ²⁰ Tyicuan ta sacoto ñáyivi canyicú cuan chi ra Jesús, ta catyí ñu:

—Sihun chihin yañun nyicú ñu chata vehe. Ta cuñí ñu cahan ñu chuhun.

²¹ Tyicuan ta nacahan ra Jesús, ta catyí ra:

—Tandihí maa ñáyivi cha chifí ta sacuví tuhun Nyoo cha cahín, ican ñu cuví sihi, ta ican ñu cuví yañi —catyí ra Jesús.

Nu sacutaxin ra Jesús tatyí ñihi vavaha nu miñi

(Mt. 8.23-27; Mr. 4.35-41)

²² Cuví chi noo quívi cuan quihví ra Jesús chichi noo canoa chihin ra cachicá noo chihin ra. Ta quichaha catyí ra chi ra:

—Cqho ndo inga chiyo miñi ihya.

Yucuan ta cuahan coyo ra chihin canoa cuan. ²³ Ta cha ni ri ca cha cuahan ra mahñu miñi cuan, tijn ñumahna chi ra Jesús. Tyicuan ta sana iñi ra ta chaq noo tatyí ñihi vavaha. Ta quichaha tyihí chi ndutya chichi canoa cuan. Ta quichaha cuñí nyee canoa cuan vatyí cama xaan ndutya quihví. ²⁴ Tyicuan ta casandoyo ra chi ra Jesús. Ta quichaha catyí ra:

—¡Maestro! ¡Maestro! Cha cuñí nyee yo chichi ndutya —catyí ra.

Tyicuan ta nducuita ra Jesús. Ta quichaha catyí ra chi tatyí cuan ta chi ndutya cuan, na cutaxin chi. Ta cutaxin ri. ²⁵ Tyicuan ta quichaha catyí ra chi ra cachicá noo chihin ra:

—¿Ñáá tuhun yuhví ndo? ¿Atu ña chinó iñi ndo vatyí yuhu sahá cuende chi ndo? —catyí ra.

Soco ra cuan, yuhví xaan ra. Ta iyo xaan cuñí ra. Ta quichaha ndaca tuhun ra chi ra tahan ra:

—¿Yóó ra cuví ra ihya? Vatyí nyacua nya tatyí ta ndutya ta quichahá tuhun cahán ra.

Nu nduvahaq noo ra yihí tatyí ña vaha ñuu Gadara

(Mt. 8.28-34; Mr. 5.1-20)

²⁶ Tyicuan ta chaq coyo ra ityi Gadara cha nyaá inga chiyo miñi ityi nuu Galilea.

²⁷ Ta quita ra chichi canoa cuan. Ta yucuan chaq noo ra cha quichi noo ñuu ityi cuan chisatahan ra chi ra. Ta yihí tatyí ña vaha chi ra. Ta cha naha xaan ña ñihnó maa ra sahma. Ni ri ña iyó ra vehe ra. Chicá noo ri maa ra nu ñaña calavari cuan. ²⁸⁻²⁹ Ta tuhvá tatyí ña vaha cuan naquiqui chi ra. Ta yucuan chaha चाहिँ ñu ndaha ra ta chaha ra chihin cadena. Soco tatyí ña vaha cuan चाहá fuerza chi ra cha cahnya ra. Ta sacono chi chi ra. Ta chinyacá chi chi ra noo nu yori maa ñáyivi iyó. Ta cuhva cha nyehe ra chi ra Jesús, chicuñí chiti ra nuu ra. Ta quichaha canachaa ra, ta catyí ra:

—¿Ñáá tuhun tyihún chuun chihin yuhu, yoho Jesús, Sehe Nyoo cahnu? Chiquén chuun vatyí ma sanyehun tundoho chii —catyí ra yihí tatyí ña vaha cuan chi ra Jesús.

Ta catyí ra tyehe caa vatyí ra Jesús tachí ra chi tatyí ña vaha cuan, na quita chi ra ndahví cuan. ³⁰ Ta quichaha ndaca tuhun ra Jesús chi tatyí ña vaha cuan, ta catyí ra:

—¿Ñáá nañún?

Ta tatyí ña vaha cuan sacahan chi ra cuan, ta catyí ra:

—Nyuhu nañi ndi, Legión.

Tyicuan caa catyí ra vatyí cuaha xaan tatyí ña vaha yihí chi ra. Cuenda mil tatyí ña vaha cuan yihí chi ra. ³¹ Tyicuan ta tatyí ña vaha cuan catyí chi ra Jesús vatyí ma tuchi ra chi chi nu tindoho nu ma cuví maa quita chi. ³² Ta chican tatyí ña vaha cuan chi ra Jesús nacuhva ra caquihví chi chichi quini cha canyicú yuhu miñi cuan. Tyicuan ta chaha ra Jesús permiso cha caquihví chi chichi quini cuan. ³³ Ta quita tatyí ña vaha cuan chi ra ndahví cuan. Ta caquihví chi chichi quini cuan. Tyicuan ta cachino quini cuan. Ta yatyin cuan nyaá noo xahva yuhu miñi cuan. Yucuan canacoyo ti chichi miñi cuan. Ta cachihí ti chihin ndutya cuan.

³⁴ Tyicuan ta ra casahá cumi chi quini cuan, yuhví xaan ra. Ta cuahan coyo vavaha ra cua nacatyí ra chi ñáyivi nya ñuu. Ta tandihí ri ñáyivi cha nyehe ra, ta nacatyí ra tuhun cuan. ³⁵ Tyicuan ta chaq coyo ñáyivi cua nyehe ñu ñáá cha cuví cuan. Tyicuan ta chaq ñu nu nyaá ra Jesús. Ta nañihí ñu chi ra cha yihí tatyí ña vaha cuan chi. Nyaá ra nuu ra Jesús. Ta ñihnó ra sahma ra. Ta vaha cuñí ra. Ta yuhví xaan ñu cuví. ³⁶ Tyicuan ta tandihí ñu cha nyehe cha cuví cuan, nacatyí ñu chi tandihí ca ñáyivi yoso caa quita tatyí ña vaha chi ra ndahví cuan, ta nduvahaq ra. ³⁷⁻³⁹ Yucuan ta tandihí ñáyivi ityi Gadara cuan quichaha catyí ñu chi ra Jesús na cunuha ra ityi nu quichi ra. Vatyí yuhví xaan ñu chihin cha sacuví ra chihin tatyí ña vaha cuan. Tyicuan ta ra cha quita tatyí ña vaha cuan chi, catyí ra chi ra Jesús,

na cuhva ra cha cuhun ra chihin ra. Soco catyí ra Jesús chi ra:

—Cuñuhu nya vehun. Ta načuhva cuendon chi ñáyivi chuun ñáá cha sacuví Nyoo chuhun —catyí ra.

Yucuan ta ra Jesús nandihví ra chichi canoa cuan. Ta cuanuhu ra chihin ra cachicá noo chihin ra. Tyicuan ta ra ndahví cha nduvaha cuan, cuanuhu ra nya ñuu ra. Ta ityi cuahan ra nacatyí ra chi tandihí ñáyivi ñuu cuan yoso caa sanduvahá ra Jesús chi ra.

Nu nduvahá sehe ra Jairo ta ñaha sihi cha tijn sahma ra Jesús

(Mt. 9.18-26; Mr. 5.21-43)

⁴⁰ Quivi cha nachaa ra Jesús cha chahan ra inga chiyo miñi cuan, cuaha xaan ñáyivi nyatú ñu chi ra. Ta sii xaan cuñi ñu vatyí nachaa ra. ⁴¹ Tyicuan ta chaá noo ra cha nañi Jairo, ra cuví nuu vehe ñuhu, ta chicuiñi chiti ra nuu ra. Ta quichaha chacu ndahví ra nuu ra, na cuhun ra vehe ra. ⁴² Vatyí iyó noo tuhun ri sehe ra, ta iyó uchi uvi cuiya ña. Ta cha cuñi cuví ña chihin cuehe. Ta cuahan ra Jesús vehe ra. Ta cuaha xaan ñáyivi cuahan chihin ra Jesús, ta tihin xaan cuahan ra mahñu ñu. ⁴³ Ta chihin ñáyivi cuan cuahan noo ñaha cuhvi. Cha iyó uchi uvi cuiya ndoho ña noo cuehe niñi. Ta cha ndihí maa xuhun ña sanaa ña, ta ña nduvahá ña. ⁴⁴ Soco chaá ña nu nyaá ra Jesús ityi chata ra. Ta tijn ña sahma ra. Ta caa cuhva ri cuan, ta chicunyasi cha chati niñi ña.

⁴⁵ Tyicuan ta quichaha catyí ra Jesús:

—¿Yóó cha tijn sahme?

Ta tandihí ñu cuahan chihin ñu catyí ra:

—Yori.

Ta catyí ra Pedro ta ra tahan ra chi ra Jesús:

—Maestro, cuaha xaan ñáyivi cuahan chuhun, ta tihin xaan cuahun. Ta suri maa ñu tyandahá ñu chuun. Ta ndacá tuhun con “¿Yóó cha tijn sahme?” —catyí ra.

⁴⁶ Soco ra Jesús catyí ra:

—Chitó mai vatyí iyó noo cha tijn sahme. Vatyí tuvj iñi cuahan suhva tunyee iñi cha iyó chii —catyí ra.

⁴⁷ Tyicuan ta ñaha sihi cuan nyehé ña vatyí cha chitó ra. Ta quichaha nihi ña chihin cha yuhví ña. Ta chicuiñi chiti ña nuu ra. Ta quichaha nacatyí ña chi ra ñáá tuhun cha tijn ña sahma ra, ta yoso caa nduvahá ña caa cuhva ri cuan. Ta chifí tandihí ñáyivi cuan cha nacatyí ña. ⁴⁸ Yucuan ta catyí ra Jesús chi ña:

—Yoho sihi, cha nduvahun vatyí chinó iñun chii. Cuahan chihin cha vaha —catyí ra.

⁴⁹ Ni cahán ca ra Jesús tuhun ihya, ta chaá noo ra quitá vehe ra cuví nuu vehe ñuhu cuan. Ta quichaha catyí ra chi ra Jairo cuan:

—Sehun cha yahá chihí ña. Ma sayanga con chi Ra Sacuaha chiña —catyí ra.

⁵⁰ Soco cha chiñi ra Jesús tuhun cuan. Ta quichaha catyí ra:

—Ma yuhvun. Chino iñun. Ta sehun cua nduvaha ña —catyí ra.

⁵¹ Ta cuhva cha chaá ra Jesús vehe ra Jairo, ña chahá ra quihvi ñáyivi chichi vehe. Maa ri maa ra Pedro ta ra Jacobo ta ra Juan ta maa ra Jairo chihin ñashi ra, quihvi ñu chichi vehe cuan nu catuví cuehe luhlu cha chihí cuan. ⁵² Ta tandihí ñu chacú chaa ñu cha cuenda vatyí chihí cue. Soco ra Jesús catyí ra chi ñu:

—Ma cuacu ca ndo. Vatyí ña chihí cue. Quixí cue —catyí ra.

⁵³ Soco chacú nyaa ñu tuhun cahán ra. Ta ña chinó iñi ñu. Vatyí chitó ñu tyi cha chihí cue. ⁵⁴ Tyicuan ta tijn ra Jesús ndaha cue. Ta ñhi chahan ra ta catyí ra chi cue:

—Ndücüita, cuehe luhlu —catyí ra.

⁵⁵ Tyicuan ta nandotó cue. Ta caa cuhva ri cuan ndicuitá cue. Ta quichaha catyí ra Jesús:

—Cuhva ndo cha cachi cue.

⁵⁶ Ta sutu cue ta sihi cue, iyo xaan cuñi ñu. Soco catyí ra Jesús chi ñu vatyí yori maa chihin cahán ñu tuhun cha cuví cuan.

9

Nu tachí ra Jesús ndi uchi uvi tahan ra cachicá noo chihin ra vatyí cucahan ra tuhun Nyoo

(Mt. 10.5-15; Mr. 6.7-13)

¹ Sandu iñ ri ra Jesús ndi uchi uvi tahan ra cachicá noo chihin ra. Ta chahá ra tunyee iñi chi ra vatyí cuví tava ra tatyí ña vaha, ta cuví sanduvaha ra chi ñu cuhvi.

² Ta tachí ra tyiño chi ra vatyí na sanduvaha ra chi ñu cuhvi, ta cahán ra tuhun Nyoo yoso caa nyacá ñaha ra añima ñáyivi.

³ Ta catyí ra chi tandihí ra cuan:

—Ñahri cha cuisón ndo ityi cuhun ndo, ni yutun ma tuvi ndo. Ni yitín, ta ni ri cha cachi ndo ta ma cuisón ndo. Ta ni ri xuhun ta ma cuisón ndo. Tacuhva ñihno ri ndo cuhun ndo. ⁴ Ta savaha ri vehe cha chaa ndo, cunyaa ndo yucuan nyacua nya cha chaa quivi cha cuhun ndo inga ñuu. ⁵ Ta nu ña cuñi ñu cuiñi ñu tuhun cahán ndo, quita ndo ñuu cuan. Ta ñaquisi ndo ñiyaca chaha ndo. Tyehe caa sacuvi ndo na cuví chi tari minoo seña chi ñu, vatyí ña cuñi ñu tyasoho ñu tuhun Nyoo —catyí ra Jesús chi tandihí ra cuan.

⁶ Tyicuan ta cuahan coyo ra tandihí cuii maa ñuu. Ta cahán ra tuhun vaha Nyoo ta yoso caa cuñi chi ta cacu ñu. Ta sanduvahá ra chi ñu cuhvi.

Nu cuñi ra Herodes coto ra yóo ra chicá noo cahán tuhun Nyoo ta sanduvahá chi ñáyivi

(Mt. 14.1-12; Mr. 6.14-29)

⁷ Ra Herodes ra cuví ra nyacá ñaha nicañnu ityi Galilea, ñihí ra tuhun cha sacuví ra Jesús. Ta ña ñihí vaha ra cuhva yóo ra cuví ra. Vatyí yihí ñu catyí ñu vatyí ra Juan, ican ra nandoto. ⁸ Ta yihí ñu catyí ñu vatyí ra Elías, ican ra nandoto. Ta yihí ñu catyí ñu vatyí inga ra profeta Nyoo ta cha naha, ican nandoto. ⁹ Soco catyí ra Herodes: —Maa mai tyihí tyiño chicahnya sucun ra Juan. ¿Tu tyicuan caa, yóo ra chiñi xain tuhun ihya? —catyí ra.

Ta ra Herodes cuan nducú xaan ra cuhva yoso caa nyehe ra chí ra cha chicá noo cuan.

Nu chahq ra Jesús cha cachi ohon mil rayii

(Mt. 14.13-21; Mr. 6.30-44; Jn. 6.1-14)

¹⁰ Ta cuhva cha nachaq coyo ra chicá tyiño nuu ra Jesús, canacatyí ra chí ra Jesús tandihí cuíi maa cha cuví nu chahan coyo ra. Tyicuan ta tavá sñn ra Jesús chí ra ta cuahan coyo ra yatyin ri noo ñuu cha nañi Betsaida. ¹¹ Soco cuhva cha ñihí ñáyivi tuhun vatyí cuahan ra Jesús nyicuan, ta cuahan coyo vavaha ñu nya nu nyaá ra. Tyicuan ta quichaha cahan ra chihin ñu tuhun yoso caa nyacá ñaha Nyoo añima ñáyivi. Ta sanduvahá ra chí ñu cuhvi.

¹² Ta cuhva cha cua iñi xaan, ndi uchi uvi tahan ra chicá noo chihin ra quichaha catyí ra chí ra:

—Catyí chi ñáyivi ihya na cunuhu ñu cunyatatu ñu, ta na cunducu ñu noo cha cachi ñu noo ñuu cha nyaá yatyin ri cuan. Vatyí ihya ñahri maa cha cachi yo iyó —catyí ra.

¹³ Tyicuan ta quichaha catyí ra Jesús chi ndi uchi uvi tahan ra cuan:

—Cuhva ndo cha cachi ñu —catyí ra.

Tyicuan ta quichaha catyí ra chicá noo chihin ra chí ra tahan ra:

—Ñahri maa cha iyó ihya. Ohon tahan ri pan, ta uvi tahan ri tiyaca iyó. Soco ma ñihí cha cachi tandihí ñáyivi ihya. Ni ri cusata ndi soco ma ñihí —catyí ra.

¹⁴ Vatyí ohon mil rayii nyicú yucuan. (Ta sñn ri nyicú ñushi chihin sehe ñu.) Yucuan ta ra Jesús catyí ra chí ra cachicá noo chihin ra:

—Na cunyicu ñáyivi cha uvi xico uchi tahan ñu noo noo nu cunyicu ñu.

¹⁵ Tyicuan ta chicunyicu tandihí ñu.

¹⁶ Tyicuan ta quehen ra Jesús ohon tahan pan cuan chihin uvi tahan tiyaca cuan. Ta nanyehé ndaa ra andivi, ta nacuhvá ra tyahvi nyoo chi Nyoo. Tyicuan ta tahvi sava ra pan ta tiyaca cuan. Ta chahq ra chí ra cachicá noo chihin ra na casacha ra chí ñáyivi. ¹⁷ Tyicuan ta tandihí ñu chachí

ñu. Ta chitu chichi ñu. Yahq cuan ta ndoo ca yiquin ta sacutu ra uchi uvi tahan tica chihin yiquin cuan.

Nu catyí ra Pedro tyi ra Jesús cuví ra Cristo, ra sacacú chi yo

(Mt. 16.13-19; Mr. 8.27-29)

¹⁸ Noo quivi quita sñn ra Jesús chihin ra cachicá noo chihin ra. Ta quichaha chicán tahvi ra chí Nyoo. Ta nu ndihí chicán tahvi ra, ta quichaha ndaca tuhun ra chí ra chicá noo chihin ra ta catyí ra:

—¿Ñáá catyí ñáyivi, yóo ra cuví yuhu?

¹⁹ Tyicuan ta nacahan ra cachicá noo chihin ra, ta catyí ra:

—Yihí ñu catyí ñu vatyí ra Juan ra sacondutyá chí ñáyivi cuvún. Ta yihí ñu catyí ñu vatyí ra Elías cuvún. Ta yihí ñu catyí ñu vatyí inga ra profeta Nyoo ta cha naha cuvún —catyí ra.

²⁰ Tyicuan ta ndaca tuhun ra Jesús chí tandihí ra, ta catyí ra:

—Ta nyoho, ¿yóo ra cuví yuhu, cuhva cha cuñi nyoho?

Tyicuan ta nacahan ra Pedro, ta catyí ra:

—Yoho cuví ra Cristo ra cha quita nu nyaá Nyoo.

Nu sacoto ra Jesús yoso caa cucahñi ñáyivi chí ra

(Mt. 16.20-28; Mr. 8.30—9.1)

²¹ Ta catyí ra Jesús chí ra cachicá noo chihin ra vatyí yori maa chihin cahan ra tuhun cuan. ²² Tyicuan ta catyí tucu ra chí ra:

—Yuhu Rayii cha quichi nya gloria cuví. Ta tahán chí vatyí cuaha xaan tundoho cunyehe. Ta ra cacuvi mandoñi ta ra cacuvi nuu chí tata sutu chihin ra casacuaa cuenda ley, ma chino iñi ra chí. Ta cucahñi ra chí. Soco nu cu uñi quivi cunandote —catyí ra.

²³ Tyicuan ta quichaha catyí tucu ra chí tandihí ra:

—Tatu nya nyoho cuñi ndo cunyicon ndo chí, cahnya iñi ndo cha cuñi maa ndo sacuvi ndo, tacuhva cuví sacuvi ndo cha cuñi Nyoo. Ma ndu uvi iñi ndo cha yihí ndo cuende vasi ndiquivi nyehe ndo tundoho. Vatyí yucuan cuví cruzi cha tahán chí cuiso ndo. ²⁴ Ta nya ndo ña cuñi ndo nyehe ndo tundoho cha catyí yuhu, cunyehe ndo tundoho anyaya. Soco nya ndo cuhva ndo ñáyivi ndo cha catyí yuhu, cucacu añima ndo. ²⁵ ¿Ñáá cuenda quita chí ndo cha saha ganaa ndo tandihí cha iyó ñáyivi, tatu cahun añima ndo anyaya? ²⁶ Vatyí tatu cahan nuu ndo cha cahán ñáyivi chí ndo cha catyí yuhu, ta cha catyí tuhun cahán, cucahan tucu nuu mai nyehí chí ndo nachaa quivi quichi inga chaha. Vatyí cuquichi chihin cha cahnu cuví, ta cha cahnu cuví Sutu yo Nyoo ta ángel cuenda ra. Vatyí yuhu cuví Rayii cha

quichj nya gloria. ²⁷ Ta catyí chi ndo vatyí yihí ndo cha nyicú ndo ihya vityin, ma cúvi ndo nyacua nya nyehe ndo yoso caa cuví nu nyacá ñaha Nyoo.

Uñi tahan ra cachicá noo chihin ra Jesús nyehé ra yoso caa cuví nu nyacá ñaha Nyoo (Mt. 17.1-8; Mr. 9.2-8)

²⁸ Uña quivi yahá cha catyí ra Jesús tuhun cuan. Ta ndaá ra noo yucu vatyí cua cacán tahvi ra chi Nyoo. Ta cuahan ra Pedro, ra Jacobo ta ra Juan chihin ra. ²⁹ Ta cha ní ri ca cha chicán tahvi ra Jesús, nasama cuhva caá sahma ra ta nuu ra. Tyaqui xaan cuichin nanduvi sahma ra. Ta xiño xaan. ³⁰ Tyicuan ta tuví uvi tahan ra candatuhún chihin ra, ra Moisés ta ra Elías. ³¹ Ta ndichin xaan nu tayucú ra. Ta cacahán ra tuhun yoso caa cunyehe ra Jesús tundohe Jerusalén ta cúvi ra. ³² Ta vasi cuñi xaan ra Pedro chihin ra tahan ra cacusu ra, soco ña quixí ra. Ta nyehé ra cha ndichin xaan cuan nu nanyaá ra Jesús chihin ra cha tayucú chihin ra. ³³ Cuhva cha cuahan coyo ra tayucú chihin ra Jesús cuan, catyí ra Pedro:

—Maestro, vaha xaan cha nyicú ndi ihya. Na savaha ndi uñi tahan vehe, noo chuun, noo chi ra Moisés, ta noo chi ra Elías —catyí ra.

Soco ña chitó ra Pedro tuhun cahán ra. ³⁴ Ta cha ní ri ca cha cahán ra ta quichj noo vico siqui ra. Ta yuhví xaan ra cacuví cha caquihví ra chichi vico cuan. ³⁵ Tyicuan ta chichi vico cuan chiñi ra noo ndusu cha catyí:

—Ícan ra ihya cuví Sehi, ta cuñi xain chi ra. Tyaásoho ndo tuhun cahán ra —catyí ndusu cuan.

³⁶ Ta cha yahá cahán ndusu cuan, nanyehe ra Pedro ta ra ndihi chihin ra vatyí noo ri ca maa ra Jesús nanyaá yucuan. Ta yori maa chihin cacahan ra tuhun cha nyehe ra.

Nu sanduvahá ra Jesús chi noo ra cuehe luhlu cha yihí tatyí ña vaha chii (Mt. 17.14-21; Mr. 9.14-29)

³⁷ Ta cha inga quivi cha noo ra Jesús yucu cuan, cuaha xaan ñáyivi chisatahán chi ra. ³⁸ Tyicuan ta chichi cha cuaha ñáyivi cuan, noo ra cana chaa xaan ra, ta catyí ra:

—Maestro, saha tumañi iñi chii. Nyehe ndahvi chi sehi. Vatyí noo tuhun maa ra iyó chii. ³⁹ Ta yihí ndihi tatyí ña vaha chi ra. Ta sacanachaa chi chi ra. Ta tuchí chi chi ra nyasava. Ta quitá tiñi yuhu ra. Ta quiñi xaan nyacuví chi chihin ra. Ta ña cuñi maa tatyí ña vaha cuan saña chi ra. ⁴⁰ Cha cahin chihin ra cachicá noo chuhun na tava ra tatyí ña vaha cuan, soco ña cuví chi ra —catyí ra.

⁴¹ Tyicuan ta nacahán ra Jesús ta catyí ra:

—Nyoho, ñu ña chinó iñi cuví ndo. Ta ní caa ní quiñi iyó ndo. ¿Yoso ca tahan quivi cunyai chihin ndo ta cunyehe iñi tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi sehun.

⁴² Ta cuhva cha cua tuhva ra cuehe cuan nu nyaá ra Jesús, ta tuchí tatyí ña vaha cuan chi cue nya sava. Soco ra Jesús tavá ra chi tatyí ña vaha cuan. Ta sanduvahá ra chi cue. Tyicuan ta nacuhvá cuenda ra chi cue chi sutu cue. ⁴³ Ta tandihi ñáyivi, iyo xaan cuñi ñu cha cahnu cha sacuví Nyoo chihin ñu.

Inga chaha tucu cahán ra Jesús tuhun yoso caa cucahñi ñáyivi chi ra (Mt. 17.22-23; Mr. 9.30-32)

Cha ní ri ca cha iyo cuñi ñáyivi cha sacuví ra Jesús, ta quichaha catyí ra chi ra cachicá noo chihin ra:

⁴⁴ —Tyaásoho vaha ndo tuhun cahán. Ta ma naa iñi ndo. Vatyí yuhu Rayií cha quichj nya gloria, cucuhva cuenda ñu chii ndaha ra xaan iñi chii —catyí ra Jesús.

⁴⁵ Soco ra cachicá noo chihin ra ña cutuñi iñi ra ñáá tuhun cahán ra. Vatyí Nyoo ña chahá ra cha cacutuñi iñi ra. Ta cayuhví ra ndaca tuhun ra chi ra Jesús ñáá cha cuví cuan.

Nu sañaha ra Jesús yóo ra cha cahnu ca cucuvi nu nyacá ñaha Nyoo (Mt. 18.1-5; Mr. 9.33-37)

⁴⁶ Yucuan ta ra cachicá noo chihin ra quichaha cacuví yuhu ra tuhun nya ra cahnu ca cuví chichi cha uchi uvi tahan ra. ⁴⁷ Tyicuan ta chitó ra Jesús cha chicá xiñi ra, ta quehen ra chi noo ra cuehe luhlu. ⁴⁸ Ta quichaha catyí ra chi tandihi ra cuan:

—Tatu chihin sivi natiín cuenda ndo chi noo ñáyivi ña cahnu sahá chi tari ra cuehe luhlu ihya, chi yuhu natiín cuenda ndo. Ta tatu natiín cuenda ndo chii, chi maa Nyoo cha saquichj chii, natiín cuenda ndo. Vatyí ra cha ñima ri tuhun sahá maa ndo tuhun, ícan ra cuví ra cahnu nuu Nyoo —catyí ra Jesús.

Ñu cha ña cahán chi yo, ícan ñu cuan tyinyee chi yo (Mr. 9.38-40)

⁴⁹ Yucuan ta ra Juan catyí ra chi ra Jesús:

—Maestro, nyehe ndi chi noo ra cuan. Cahán ra sivun ta tavá ra tatyí ña vaha. Soco ña chahá ca ndi. Vatyí ñima chihin yo chicá noo ra —catyí ra.

⁵⁰ Tyicuan ta catyí ra Jesús chi ra:

—Ma casi ndo nu cahán ra. Vatyí yóo ra ña cahán chi yo, tumañi iñi chi yo cuahan ra —catyí ra.

Nu catyí ra Jesús chi ra Juan ta chi ra Jacobo vatyi ña vaha cha chicá xiñi ra

⁵¹ Tuvi iñi ra Jesús vatyi cha nyaña yatyin cha tahán chi cunuhu ra gloria, ta sanduní ra iñi ra. Ta quehen ra ityi ta cuahan ra Jerusalén nu cucuví ra. ⁵² Ta tachí ra tyiño na cahun coyo ra cachicá noo chihin ra ityi nuu ca noo ñuu ityi Samaria. Vatyi canducu ra nu nyitatu ra. ⁵³ Soco ñu Samaria cuan, ña cuñi ñu cha ndoo ra yucuan, vatyi tuví iñi ñu vatyi Jerusalén cuahan coyo ra, ta ñu Samaria ña cuví nyehe ñu chi ñu Jerusalén. ⁵⁴ Cuhva cha chitó ra Jacobo ta ra Juan cha ña chahá ñu Samaria cuan cha ndoo ra yucuan, cuxaan ra. Ta quichaha catyí ra chi ra Jesús:

—Sutu Mañi yuhu, ¿atu cuñun cha sacuvi yo tari sacuví ra Elías? cacan yo chi Nyoo na saquichi ra ñuhú andivi siqui ñáyivi Samaria cuan, vatyi cayu ñu vatyi ña cuñi ñu cha ndoo yo ñuu ñu —catyí ra.

⁵⁵ Tyicuan ta nanyehe ra Jesús chi ra. Ta cahan ra chi ra ta catyí ra:

—Taxi ri ndo. Vatyi ña cutuñi iñi ndo ñáá tyiño vachi yuhu. ⁵⁶ Vatyi yuhu Rayíi cha quichí nya gloria, ña vachi vatyi sanai añima ñáyivi, Soco vachi vatyi sacaqui chi ñu —catyí ra.

Tyicuan ta cuahan coyo ra inga ñuu.

Ñu cha cuñi quihvi cuenda ra Jesús (Mt. 8.19-22)

⁵⁷ Ta cuhva cha cachica ityi ra, quita noo ra, ta catyí ra chi ra Jesús:

—Sutu Mañi yuhu, cuñi cunyiquen chuun. Ta cuhin chuhun tandihí ri ityi cuahun —catyí ra.

⁵⁸ Yucuan ta catyí ra Jesús chi ra:

—¿Atu ndichon? Vatyi yuhu ñahri maa cha iyó chii. Ñaña iyó vehe ti. Ta saa iyó taca ti. Soco yuhu Rayíi cha quichí nya gloria ñahri maa nu cava xiñi iyó —catyí ra chi ra cuan.

⁵⁹ Tyicuan ta catyí ra Jesús chi inga ra:

—Coho chihin.

Tyicuan ta nacahan ra cuan ta catyí ra:

—Tata, cuatu noo chii, na cahun xihne cucuchi chi suti —catyí ra.

⁶⁰ Tyicuan ta ra Jesús nacahan ra ta catyí ra chi ra:

—Sandoo chi ñu ña ñohó nuu chi Nyoo natyihí maa ñu chi tahan ndiyí ñu chichi ñuhu. Soco yoho cuahan cua cahan tuhun Nyoo chihin ñáyivi nacuhva cuenda ñu chi ñu chi Nyoo na cunyaca ñaha ra chi ñu —catyí ra.

⁶¹ Tyicuan ta quichaha catyí inga ra chi ra Jesús:

—Tata, cuñi cunyiquen chuun. Soco cuhva xihna na cuhin cucahin chihin ñu vehi —catyí ra.

⁶² Tyicuan ta ra Jesús catyí ra:

—Tari noo ra tahví ñuhú chihin arado, tatu nanyehe chata ra ña quita vaha yucun nu sahá tyiño ra. Ta tyicuan caa cuví noo ra nyicón chii, tatu yihí iñi ra cha sandoo ra, ña yihí vaha iñi ra cha cuví cunyaca ñaha Nyoo chi ra —catyí ra Jesús chi ra.

10

Nu tachí ra Jesús chi uñi xico uchi tahan ra cucahan tuhun Nyoo chihin ñáyivi

¹ Cha yaha tuhun cuan ta nacachi Sutu Mañi yo Jesús chi inga uñi xico uchi tahan ca ra. Ta tachí ra chi uvi uvi ra noo noo ityi cuahan ra tandihí ñuu ta tandihí ityi nu tahán chi cahun ra Jesús. ² Ta catyí ra chi ra:

—Tari noo itu cahnu vavaha, tyicuan caa nu tyiño sahí. Soco ña cuaha musu. Yucuan chaha çacan ndo chi Nyoo na saquichi ca ra musu. Vatyi tyinyee ra chi ndo cahan ndo tuhun ra chihin ñáyivi. ³ Ta cuahan ndo ta nyehe ndo vatyi cua sacuhin chi ndo tari mbee mahñu lobo. Vatyi lobo tuhvá ti chachi ti chi mbee. Ta tyicuan caa cucufi ñáyivi satais iñi ñu chi ndo. ⁴ Ta ma cuiso ndo ni yono ta ni cha quihí xuhun ndo, ni inga ityi ndichan ndo. Sanumi ndo. Ta ma cohon vaha ndo ityi ndatuhun ndo tuhun cha ñima ri tuhun. ⁵ Cuhva cha quihvi ndo chichi vehe noo ñáyivi, çahan vaha ndo chihin ñu. Ta çatyí ndo, na coo cha vaha añima ñu. ⁶ Ta tyicuan caa tatu iyó ñáyivi vaha vehe cuan, ndoo cha vaha cuan chihin ñu. Soco tatu yori ñu vaha añima, ma ndoo cha vaha chihin ñu. ⁷ Ta ndoo ndo suri maa vehe cuan. Tatu chaha ñu cha cachi ndo, çachi ndo. Tatu chaha ñu cha coho ndo, coho ndo yucuan. Vatyi ra sahá tyiño, iyó ityi chi ra cha cachi ra cha sahá ganaa ra. Ñin ri maa vehe cuan cunyaa ndo nyacua nya cha chaa chi quivi cha cahun ndo inga ñuu. ⁸ Ta nu chaa ndo noo ñuu ta vaha cahan ñu chihin ndo, çachi ndo ta coho ndo tandihí cha cuhva ñu chi ndo. ⁹ Ta sanduvaha ndo chi ñu cuhví ñuu cuan. Ta çatyí ndo chi ñu: “Cha nyaña yatyin Nyoo ra cunyaca ñaha añima ndo.” ¹⁰ Soco tatu chaa ndo noo ñuu ta ña cuñi ñu tyasoho ñu tuhun cahan ndo, quita ndo ityi cahnu. Ta çatyí ndo chi ñu: ¹¹ “Nyacua nya ñiyaca ñuu ndo cha iñi chaha ndi, ta cunaquisí ndi. Vatyi tari noo seña vatyi ndoo cuatyí ndo siqui ndo. Vatyi Nyoo nyaña yatyin ra chi ndo ta ña tyasoho ndo tuhun cahan ra yoso caa cuví ra cunyaca ñaha ra añima ndo.” Tyicuan caa çatyí ndo chi ñu —catyí ra Jesús chi ra nyicón chi ra.

¹² Ta quichaha catyí tucu ra chi ra:

—Quivi tachi tuñi Nyoo chi ñáyivi, yaha ca cuhva cunyehe ñáyivi ñuu cuan tundoho, ta ñima ca ñáyivi chiyó ta cha naha ñuu Sodoma, ñu chihí cha catyí cuatyí ñu —catyí ra Jesús.

Ñáyivi ña tyasohó tuhun cahán ra Jesús cunyehé ñu tundoho

(Mt. 11.20-24)

¹³ Ta catyí ra:

—Ñdahvi nyoho, ñáyivi ñuu Corazín! Ta ñdahvi nyoho, ñáyivi ñuu Betsaida! Vatyí nyehé ndo nyatu cahnu, ta ña nasamá ndo cuhva iyó ndo. Soco ñáyivi ñuu Tiro ta ñuu Sidón cha sanaq Nyoo ta cha naha cha cuenda cuatyí ñu, ñahri nyatu cahnu nyehé ñu. Soco tyehe ta nyehé ñu quívi cuan cha nyehé nyoho vityin, tañi tyehe ri ndihvi noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan. ¹⁴ Yucuan chaha, nyoho ñuu Corazín chihin ñuu Betsaida, ñihi ca cutachi tuñi Nyoo chi ndo ican saha ñáyivi Tiro ta ñáyivi Sidón cuan. ¹⁵ Ta nyoho ñu ñuu Capernaum, cuñi maa ndo vatyí cundaa ndo nyacua nya andívi. Soco cunoo ndo nyacua nya anyaya, vatyí ña quichahá ndo tuhun Nyoo —catyí ra Jesús.

¹⁶ Ta catyí ra chi ndi uñi xico uchi tahan ra cuan:

—Ñáyivi cha tyasohó tuhun cahán nyoho, tuhun cahán yuhu tyasohó ñu cuví cuan. Ta ñu ña quichahá tuhun cahán nyoho, tuhun cahán yuhu ña quichahá ñu cuví cuan. Ta ñu ña quichaha tuhun cahán yuhu, tuhun cahán ra cha saquichí chii, ña quichahá ñu cuví cuan —catyí ra Jesús chi tandihí ra.

Nu nachaq coyo ndi uñi xico uchi tahan ra cha chichahān tuhun Nyoo

¹⁷ Yucuan cuví nu nachaq coyo ndi uñi xico uchi ra cha chichahān tuhun Nyoo chihin ñáyivi. Ta sii xaan cacuví chí ra. Ta cacatyí ra chí ra Jesús:

—Sutu Mañi yuhu, nyacua nya tatyí ña vaha ta quichahá tuhun cahán ndi tatu cahán ndi sivun —catyí ra.

¹⁸ Tyicuan ta catyí ra Jesús chi ra:

—Ay, yuhu nyehí andívi nu canā cava cuihna, ra nañi Satanás. Tari noo tacha, tyicuan caa canā cava ra. ¹⁹ Ta yuhu, चाहि fuerza chí ndo vatyí cuví chasaha ndo chí ra ña vaha cuan. Ta cuví cuaca chaha ndo siquí coo ta tisuhma, ta ñahri cha cuví chí ndo. ²⁰ Soco ma sii xaan cuví chí ndo vatyí cuví tava ñehé ndo tatyí ña vaha cuan. Sii ca cuví chí ndo vatyí nyaá sivi ndo nu libru Nyoo —catyí ra Jesús.

Nu sacahnú ra Jesús chi Nyoo vatyí sii cuñi ra vatyí sañahá Nyoo tuhun vaha chí ñu ndahvi

(Mt. 11.25-27; 13.16-17)

²¹ Cuhva cuan sii xaan cuñi ra Jesús sahá Tatyí Ii Nyoo, ta catyí ra:

—Sacahní chuun, Sutu Mañi yuhu, vatyí nyacá ñahun andívi ta ñuhu ñayivi. Vatyí maun sañahún tuhun maun chí ñu ndahvi

ihya. Ta ña sañahún chí ra chító ta ra cha chíni tuñi. Tyicuan caa Sutu Mañi yuhu vatyí tyicuan caa cuhva cuñún —catyí ra Jesús.

²² Ta catyí ra Jesús chí tandihí ra sacuví tyiño nuu ra:

—Tandihí maa tuhun cuan chahā Suti chii. Yori ñohó nuu chii, noo tuhun ri maa Suti ñohó nuu chii. Ta yori ñohó nuu chí Suti, noo tuhun ri mai ñohó nuu chí ra. Ta chí ñáyivi cuñi mai sacote tuhun ra, chí ñu cuan cucasote —catyí ra.

²³ Tyicuan ta nanyehé ra chí ra cachicá noo chihin ra. Ta catyí ra chí ra:

—Sii xaan cuñi nyoho ta ñáyivi cha iyó vityin vatyí nyehé ndo cha sacuví. ²⁴ Vatyí cuaha xaan rey ta ra profeta Nyoo ta cha naha cuñi ra nyehé ra cha nyehé nyoho vityin. Soco ña nyehé ra. Ta cuñi ra cuñi ra tuhun cha chíni nyoho vityin. Soco ña chíni ra —catyí ra Jesús.

Nu sañahā ra Jesús chí yo vatyí tahán chí tyinyee yo chí ñáyivi savaha ri

²⁵ Tyicuan ta chaq noo ra sacuahá cuenda ley vehe ñuhu. Ta quichaha ndaca tuhun ra chí ra Jesús, Vatyí nducu nyehé ra chí ra. Ta catyí ra:

—Maestro, ¿yoso caa cunyacuví ta cuhin nu coi noo ñayivi cha ma naa ca maa?

²⁶ Tyicuan ta nacahān ra Jesús, ta catyí ra:

—¿Ñáá catyí nu ley? ¿Yoso caa tuhun cha sacuahún?

²⁷ Tyicuan ta nacahān ra sacuahā cuenda ley cuan ta catyí ra:

—Catyí ley, cuñi yo chí Nyoo chihin tandihí añima yo ta chihin cha ni iñi yo, ta chihin tandihí fuerza yo, ta chihin cha tandihí cha chíni tuñi xiñi yo. Ta cuñi yo chí ñáyivi tahan yo tari cha cuñi yo chí maa yo. Tyicuan caa catyí chí —catyí ra cuan.

²⁸ Tyicuan ta catyí ra Jesús chí ra:

—Ndicha cha चाहún. Tyicuan caa sacuvun ta cacu añimon ta coun ñayivi cha ma naa ca maa —catyí ra Jesús.

²⁹ Soco ra sacuahā cuenda ley cuan cuñi ra savaha ra chí ra, ta quichaha catyí tucu ra chí ra Jesús:

—¿Yóó cha cuví ñáyivi tahin? —catyí ra.

³⁰ Tyicuan ta nacahān ra Jesús, ta catyí ra:

—Noo ra quitā ra Jerusalén ta cuahan ra nya ñuu Jericó. Ta tahān ra chí ra suhu. Ta suhu ra tandihí cuíi maa cha nyiso ra, nyacua nya sahma ra. Ta cañi ra chí ra nyacua chacun taxin ra chí ra. Ta sandoq maa ra chí ra yucuan. ³¹ Tyicuan ta yahā noo tata sutu ityi cuan. Soco cuhva cha nanyehé ra chí ra catuví cuan nya sava ri yahā ra. ³² Tyicuan ta yahā tucu nonga ra cha yihí cuenda vehe ñuhu, cha nañi levita. Soco cha nanyehé ra chí ra catuví cuan suri nya sava ri yahā ra. ³³ Tyicuan ta quichí

tucu noo ra Samaria. Ta cua yaha tucu ra suri ityi cuan. Ta nanyehę ra chi ra catuvi yucuan, ta quichi nundahvi cuñi ra nyehe ra chi ra. ³⁴ Ta tuhvą ra nu catuvi ra, ta quichaha saha ra tatan chi ra. Ta tyihj ra aceitye ta vinu nu cahvi chi ra. Ta sahvj ra noo sahma chata ra. Yaha cuan ta sandaa ra chi ra burru sana ra, ta naqueheę ra chi ra, ta cuahan ra chihin ra nu nyaá noo vehe. Ta yucuan saha cuenda ra chi ra. ³⁵ Ta cha inga quivi cha cuñi cuhun ra Samaria cuan. Ta tava ra uvi tahan xuhun. Ta chaha ra chi chitoho vehe cuan. Ta catyí ra chi ra: “Saha cuenda vahun chi ra ihya. Ta cuhvon cha cachi ra. Ta sęton tatan chi ra na nduvaha ri ra. Tatu cuñi ca chi xuhun, tyiyahvj mai chuun nandichi”, catyí ra. Yucuan ta cuahan ra —catyí ra Jesús.

³⁶ Nu ndihj nacatyí ra Jesús tuhun ihya, quichaha ndaca tuhun ra chi ra sacuahua cuan, ta catyí ra:

—Vaha. ¿Chichi cha uñi tahan ra cuan, nya ra cuvi ra tahan ra ndahvi cuan? —catyí ra Jesús.

³⁷ Tyicuan ta quichaha catyí ra sacuahua cuan:

—Ra cha cundahvi cuñi chi ra —catyí ra.

Tyicuan ta quichaha catyí ra Jesús:

—Cuahan ta sacuvi tucu yoho tyicuan caa chihin ñayivi cha iyó tundoho chii —catyí ra.

Nu chinyaq ra Jesús vehe cu Marta chihin cu María

³⁸ Ta queheę ra Jesús ityi cuahan ra. Ta chaq ra noo ñuu. Ta yucuan iyó noo ñaha cha nañi Marta. Ta chaq ra vehe ña. ³⁹ Ta cu Marta iyó noo cuhu ña cha nañi María. Ta cu María chicunyaq ña yatyin ri chaha ra Jesús, vatyí cuiñi ña tuhun cahán ra. ⁴⁰ Soco cu Marta cuaha xaan tyiño nyaá sacuvi ña. Ta chaq ña nu nyaá ra Jesús, ta quichaha catyí ña chi ra:

—Tata. ¿Atu ña chicá xiñi yoho vatyí cuhi sandoó maa ña chii chihin tyiño? Catyí chi ña ta tyinyee ña chii —catyí ña chi ra.

⁴¹ Soco ra Jesús catyí ra chi ña:

—Marta, Marta, chicá xaan xiñun ta cu tyiño xaan cuñun chihin tyiño chiña. ⁴² Soco iyó noo tuhun cha tahán chi caca xiñi yo. Ta cu María ihya nacachj ña tyiño vaha ca sacuvi ña cha tyasohó ña tuhun cahán. Ta yuhu ma cuvi tinyai chi ña —catyí ra Jesús chi cu Marta.

11

Nu sañaha ra Jesús chi ra cachicá noo chihin ra yoso caa cacan tahvi ra chi Nyoo (Mt. 6.9-15; 7.7-11)

¹ Cuví noo chaha cha chicán tahvi ra Jesús. Ta cuhva cha ndihj chican tahvi ra,

ta quichaha catyí noo ra chicá noo chihin ra chi ra:

—Sañaha chi ndi yoso caa cacan tahvi ndi chi Nyoo. Tari sañaha ra Juan chi ra chicá noo chihin ra —catyí ra.

² Tyicuan ta catyí ra Jesús chi ra:

—Cua cuhve cuhva chi ndo yoso caa. Tyehe caa caçan tahvi ndo:

Sutu Mañi yuhu, yoho cha nyaun andivi. Sacahnu xaan ndi chuun.

Na quichi quivi cha nyaca ñahun ihya siqui ñuhu ñayivi.

Na sacuvi ñayivi ihya siqui ñuhu ñayivi tandihj cuhva cuñi maun, tari cuhva cuví gloria.

³ Cuhva cha cachi ndi tacuhva yoso cuhva yaha ndi noo noo quivi.

⁴ Saha tucahnu iñi chi ndi. Tari maa ndi sahá ndi tucahnu iñi chi ñu tasi iñi chi ndi.

Ma cuhvon cha nducu nyehe ra ña vaha chi ndi, soco sacacu chi ndi tacuhva ma sacuvi ndi cuatyí nuun.

Tyicuan caa cacan tahvi ndo —catyí ra Jesús.

⁵ Ta catyí tucu ra ñandihj:

—Saha yo tuhun tyi nyoho iyó noo amigon, ta chaa ra vehun cha ñuu ta catyí ra chuun: “Xaa, saha tumañi iñi chii, cuhva noo uñi tahan pan chii. ⁶ Vatyí noo ra tahin nichaaq ra vehi. Ta cañi xaan quichi ra. Ta ñahri maa cha iyó chii cuhve chi ra.” ⁷ Ta yoho cunacahun ta cатыun chi ra:

“Ma sayangon chii, ndee. Vatyí nyasí yuvehi. Ta niquixi chihin sehi. Ta ña cuvi nducuite ta cuhve cha cuhve chuun cha vityin.” Tyicuan caa cucатыun chi ra. ⁸ Ta catyí yuhu chuun. Vasi ra tahun cuví chi ra,

ma nducuiton ta cuhvon chi ra cha numi ri. Soco tatu ndog ra yucuan, ta ma cundihñi ra cacan ra chuun, sacachan ra yuehvun ta cana chaa ra chuun tacuhva cha ma cuvi cusun, ta cundihñun cha sacachan ra yuehvun, tyicuan ta nducuiton ta cuhvon chi ra, tacuhva cha ma sayanga ca ra chuun.

⁹ Ta tyicuan caa tucu nyoho, caçan ndo chi Nyoo. Ta cuhva ra chi ndo. Nanducu ndo ta ñihi ndo. Sacachan ndo yuvehe ta nuña.

¹⁰ Vatyí tatu chican ndo, ñihi ndo. Tatu nducu ndo, ñihi ndo. Ta tatu sacachan ndo yuvehe, nuña yuvehe.

¹¹ Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chahá noo yuu chi sehe ndo tatu chican ndotyin pan. Ta ña tuhvá ndo chaha ndo noo coo chi sehe ndo, tatu chicán ndotyin tiyaca. ¹² Ta ña tuhvá ndo chaha ndo noo tisuhma chi sehe ndo tatu chicán ndotyin ndivi cachi ndotyin. ¹³ Nyoho cha quiñi iyó ndo, soco chitó ndo yoso caa cuhva ndo cha vaha chi sehe ndo. Ta vihi ca Sutu

Mañi yo cha nyaá andivi, cuaha ca cha vaha cuhva ra chí ndo tatu cacan ndo chi ra. Ta cuhva ra Tatyí li ra cunyaa añima ndo.

Ra xaan iñi chi ra Jesús catyí ra vatyí chihin fuerza cuihna sacuvi ra milagru
(Mt. 12.22-30; Mr. 3.20-27)

¹⁴ Ra Jesús tavá ra tatyí ña vaha cha yihí chi noo ra cha ñihi sahá cuihna. Ta cuhva cha quita tatyí ña vaha cuan chi ra ñihi cuan, nacahan ra. Tyicuan ta ñáyivi, iyo xaan cuñi ñu. ¹⁵ Ta yihí ñu catyí ñu:

—Ra ihya, tavá ra tatyí ña vaha soco chihin fuerza ra Beelzebú ra cuví nuu chi cuihna —catyí ñu.

¹⁶ Ta yihí ñu cuñi ñu nducu nyehe ñu chi ra, ta chican ñu chi ra Jesús na savaha ra noo seña chi ñu chihin tunyee iñi Nyoo. ¹⁷ Soco ra Jesús chitó ra tuhun chicá xiñi ñu. Ta quichaha catyí ra chí ñu:

—Tatu gobiernu ta cacusiin ra, cuaha ri ityi nanduvi ra, cucañi tahan ra chihin tahan ra, ta cundihi tuhun cha cunyaca ñaha ra. Tatu noo vehe ta cacusiin ñu chihin tahan ñu, cutivi nu nyicú ñu. ¹⁸ Ta tyicuan caa tucu cuihna. Tatu tandihi ra cacusiin ra chihin tahan ra cundihi fuerza cha iyó chí ra. Ta ihya catyí chí ndo tyehe caa vatyí nyoho catyí ndo vatyí chihin fuerza ra Beelzebú tavé tatyí ña vaha. ¹⁹ Soco tyehe ta tavé tatyí ña vaha tari cuhva catyí ndo, ndaça tuhun ndo chí ra nyicú chihin ndo yóó chí fuerza tavá maa ra tatyí ña vaha. Maa ra sacoto ra chí ndo cha ndicha vatyí nyoho tondo ri chicá xiñi ndo. ²⁰ Soco catyí chí ndo vatyí yuhu tave tatyí ña vaha chihin fuerza Nyoo. Ta cuñi chí catyí cuan vatyí ndicha cuui Nyoo ra nyacá ñaha añima ñáyivi cha chaq ra nu nyicú ndo.

Nu sañahá ra Jesús vatyí ñihi ca fuerza Nyoo ta ñima ca fuerza cuihna

²¹ Tatu noo ra iyó vavaha fuerza chi ra ta nyisó ra mityi ra, ta sahá cumi ra vehe ra. Ñohó xehe vaha ndaha tyiño ra chichi vehe ra tacuhva cha ma cuvi tinyaa ra suhu. ²² Soco tatu quichi inga ra cha cuaha ca fuerza iyó chí, ta cañi tahan ra chihin ra, ta cuvi chasaha ra chí ra, tyicuan ta tinyaa ra ndaha tyiño ra, ta sachá ra chí ra tahan ra. ²³ Ñáyivi ña sahá tyiño chihin, sativí ñu tyiño sahí. Ta ñu ña tyinyeé chii cha cahán ñu tuhun Nyoo chihin ñáyivi, cuñi chí catyí vatyí ña chahá ñu cha coto ñáyivi tuhun cahán.

Nu sañahá ra Jesús chí yo yoso caa ndichin tucu tatyí ña vaha inga chaha tatu naa iñi yo chí Nyoo

(Mt. 12.43-45)

²⁴ Tatu noo tatyí ña vaha quita chí noo ñáyivi, chicá noo chí noo ñuhu ityi, nanducú chí noo nu nyitatu chí. Soco ña nañihi

maa chí nu nyitatu chí, tyicuan ta ndichi xiñi chí: “Cunuhu tiqui nya vehi nu quite.” ²⁵ Yucuan ta nachaa chí añima nu quita chí. Ta nanyehé chí vatyí ndii xaan ta vii xaan. ²⁶ Tyicuan ta cua naquehen chí ucha ca tahan tatyí ña vaha cha yaha ca cuhva ta ican saha maa chí. Tyicuan ta iin ri quihvi tandihi chí añima ñu cuan. Yucuan chaha yaha ca cuhva nanduvi ñu ican saha cha cuví maa ñu —catyí ra Jesús.

Ñu cha ndicha iyó vaha ñáyivi

²⁷ Cha ni ri ca cha cahán ra Jesús tuhun cuan, ta cana chaa noo ñaha cha ñohó mahñu ñáyivi cuan. Ta quichaha catyí ña:

—Ñana cha sii cuví chí ñaha cha sacacu chuun ñaha cha chaq caxun —catyí ña.

²⁸ Soco ra Jesús catyí ra:

—Sii ca cuñi ñu cha chiñi tuhun cahán Nyoo ta quichahá ñu —catyí ra.

Ñáyivi ña vaha, maa ri maa nyatu cahnu cuñi ñu nyehe ñu

(Mt. 12.38-42; Mr. 8.12)

²⁹ Tyicuan ta chaq coyo ñáyivi nu nyaá ra Jesús. Ta quichaha catyí ra chí ñu:

—Ñáyivi cha iyó vityin quiiñi xaan iyó ñu. Ta nyiyo iñi ñu. Cuñi ñu nyehe ñu seña ta cha iyo. Soco noo ri cunyehe ñu, tahan cha sacuvi Nyoo chihin ra Jonas. ³⁰ Tari ra Jonás cuví ra seña chí ñáyivi ñuu Nínive ta cha naha, tyicuan caa tucu yuhu Rayi cha quichi nya gloria, cuví tari noo seña chí ñáyivi cha iyó vityin. ³¹ Quivi tachi tuñi Nyoo chí ñáyivi cunandoto ñaha cuví reina ityi sur ta cha naha, ta cucatyí ña vatyí cuhun ndo anyaya, vatyí maa ña vasi cañi ñuu ña, soco quichi ña, quichi tyasoho ña tuhun cha chiñi tuñi cahán ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón. ³² Ta quivi cutuñi chí tandihi ñáyivi, cunducuita ñu chiyo ñuu Nínive ta cha naha, ta cucatyí ñu vatyí nyoho ñu cha iyó vityin cuhun ndo anyaya, vatyí maa ñu ñu Nínive, canasama ñu cuhva iyó ñu quivi cahán ra Jonás tuhun Nyoo chihin ñu. Ta vityin yuhu ra cahnu ca cahán chihin ndo ta ñima ca ra Jonás.

Nu sañahá ra Jesús vatyí na saha yo cuenda añima yo coto vaha ñahri cha ndichin Nyoo nyaá

(Mt. 5.15; 6.22-23)

³³ Yori ndo tyaa ndo lámpara ta tyihi xehe ndo, o tyihi ndo chichi noo caja. Vatyí ñuhú cuan tahan chí coso minoo nu sucun. Tacuhva quihvi ñáyivi vehe ndo, soco ndichin. ³⁴ Chiti nuu ndo noo cha sandichin chí ndo cuví. Ta tyicuan caa tucu añima ndo, tatu iyó cha ndichin Nyoo añima ndo, vaha ñáyivi cuví ndo. Tatu ñahri cha ndichin Nyoo nyaá tari noo ra cuaa cuví ndo, ña cuví nyehe ndo ityi vaha cha cuahan nu nyaá

Nyoo. ³⁵ Yucuan chaha sáha ndo cuenda añima ndo. Tatu nyaá cha ndichin Nyoo chihin ndo, o nyaá cha ñaa iñi. ³⁶ Tatu tyitu añima ndo chihin cha ndichin Nyoo ñahri ca maa noo nu ñaa iñi iyó chi ndo, vatyí sandichin chi tandihí ndo. Tari cha nyaá noo lámpara sacatá chi ñuhu chi ndo cuví cuan —catyí ra Jesús.

Cahán ra Jesús chi ra casacuaha cuenda ley vehe ñuhu ta chi ra fariseo, ra caquichaha xaan ley cuan

(Mt. 23.1-36; Mr. 12.38-40; Lc. 20.45-47)

³⁷ Cuhva cha ndihí cahan ra Jesús nuu ñáyivi, noo ra fariseo, ra quichaha xaan ley vehe ñuhu, catyí ra chi ra Jesús, vatyí na cuhun ra cucachi ra nya vehe ra. Ta chaá ra Jesús vehe ra. Ta quihvi ra chicunyya ra mesa.

³⁸ Tyicuan ta ra fariseo cuan iyo cuñí ra vatyí ña nacatyá ra Jesús ndaha ra, tari cuhva costumbre maa ñu cha cumañi cachi ñu. ³⁹ Soco ra Jesús catyí ra chi ra:

—Nyoho, ra cacuví fariseo, tari cha chata ri vaso ta coho sanduvii nyoho. Soco ityi chichi, quiñi caa. Vatyí ña nacatyá ndo. Tyicuan caa nyoho. Vatyí cuñi ñáyivi vatyí vaha ñáyivi cuví ndo. Soco xehe ri suhu ndo ta ña sacuví ndo cha vaha. ⁴⁰ Ndava xaan iñi ndo. ¿Atu ña chitó ndo vatyí ra cha savahá ityi chata vaso, suri maa ra savahá ityi chichi? Vatyí tari vaso cuví ndo. ⁴¹ Tahán chi sahá ndo tumañi iñi chi ñáyivi, ta tyjnyee ndo chi ñu. Sacuví ndo cha vaha chihin ñu, tyicuan ta nduvii tucu ityi chichi ndo.

⁴² ¡Ndahvi nyoho ra fariseo! Vatyí nyoho vasi vaha chaha ndo diesmo chi Nyoo cuenda yucu cha nañi menta ta rudá ta ñáá ndihí ca yucu cha tachí ndo, soco ña quichahá ndo cuhva cha vaha cha cuñi Nyoo sacuví yo, ta cha cuñi yo chi ra. Ta ican ihya cuví cha tahán chi sacuví ndo, soco ma sandihí ndo cha cuhva ndo diesmo ñandihí. ⁴³ ¡Ndahvi nyoho cha cuví ndo fariseo! vatyí cuñi ndo cunyya ndo nu tyayu vaha ca chichi vehe ñuhu. Ta cuñi ndo cha saha ñáyivi ñáyivi chi ndo nuyahvi. ⁴⁴ ¡Ndahvi nyoho ra sacuaha cuenda ley, ta nyoho ra fariseo! Vaha sahá ndo chi ndo, soco cuví ndo tari noo ñaña ndiyi cha ña quetuví. Vatyí yahá ñáyivi siqui soco ña chitó ñu ñáá cha ñohó chichi ñaña cuan. Vatyí ñahri seña catuví nu yihí ndiyi cuan. Cuñi maa ñu vatyí vaha ndo, soco ña chitó ñu vatyí ña vaha añima ndo —catyí ra Jesús.

⁴⁵ Tyicuan ta nacahan noo ra sacuahá cuenda ley vehe ñuhu, ta catyí ra:

—Maestro, cha catyún tyehe caa, nañi tucu chihin chi nyuhu —catyí ra.

⁴⁶ Tyicuan ta quichaha catyí ra Jesús chi ra:

—¡Ndahvi tucu nyoho ra casacuaha cuenda ley vehe ñuhu! Vatyí sanducuaha ca ndo ley cha tachí Nyoo ta cha naha. Ta ña tahán chi. Ta yori ndoyó carga cuan, ta saniñi ndo na sacuví ñu ta ni maa ndo ni chihin ña tyinyee ndo chi ñáyivi. ⁴⁷ ¡Ndahvi nyoho! Vatyí sanduvahá vaha ndo ñaña nu ñohó yiqui ra profeta Nyoo cha cachahñi sutu chahnu ndo ta cha naha. ⁴⁸ Chihin cuan cuñi chi catyí vatyí ndoó ndo vaha cha sacuví sutu chahnu ndo ta cha naha. Vatyí sutu ndo cachahñi ra chi ra profeta Nyoo. Ta nyoho sanduvahá ndo ñaña ra. ⁴⁹ Yucuan chaha catyí Nyoo ta cha naha vatyí cutachi ra suhva ra profeta ta ra caca tyiño ra nu nyicú ndo. Ta cucahñi ndo suhva ra ta inga ra cusacono ndo chi ra. ⁵⁰ Ta ndicha tyicuan caa sacuví ndo. Nyoo cutachi tuñi ra chi ndo cha cuenda tandihí ra profeta ra cachahñi sutu chahnu ndo nyata chinq ñuhu ñáyivi ta nyacua nya vityin. ⁵¹ Nyacua nya niñi ra Abel cha chati cha chahñi ra Caín yañi ra, ta nyacua nya niñi ra Zacarías cha cachahñi ñu chichi vehe ñuhu vatyin nu nya arta. Yucuan chaha catyí Nyoo vatyí cutachi tuñi ra chi ñáyivi cha iyó vityin cha catyí cuatyí ñu chiyó ta cha naha. ⁵² ¡Ndahvi nyoho ra casacuaha cuenda ley vehe ñuhu! Vatyí tari cha tyihí xehe ndo ndaha ticu cuenda yuvehe nu quihvi ñáyivi ityi Nyoo. Ta ni maa ndo ña quihvi ndo nu nyaá Nyoo. Ta ni ri ña chahá ndo cha quihvi inga ñáyivi cha cuñi quihvi —catyí ra Jesús.

⁵³⁻⁵⁴ Ndhí cahan ra Jesús tuhun cuan, ta quita ra. Soco ra casacuaha ley vehe ñuhu chihin ra fariseo, nduxaan xaan ra ta quichaha cuquiñi cuñi ra nyehe ra chi ra Jesús. Ta canducu ra cuhva yoso caa cahan ra Jesús noo tuhun ña vaha, ta tyaa ra cuatyí siqui ra.

12

Nu sañahá ra Jesús vatyí ma cuví tixehe yo cuatyí yo

¹ Cuenda mil ñáyivi ndu ñin ri nyacua nañi tahan ñu, vatyí cuaha xaan ñu. Tyicuan ta ra Jesús catyí xihna ca ra chi ra cacticá noo chihin ra:

—Saha ndo cuenda chi ndo chihin ra fariseo coto sandahvi ñaha ra chi ndo. Vatyí tari ndaa pan chihin yuchan iya, tyicuan caa cuví cuatyí ra tyi sahá ra tyi vaha ra. Soco ma cuví tixehe ra cuatyí ra. ² Vatyí ñahri noo cha ñohó xehe ta cuñún, tyi ma natuvi, ta ñahri cha xehe ta cuñun, vatyí ma coto ñáyivi. ³ Yucuan chaha ñáá ndihí tuhun cha cahán ndo nu xehe, cuquita chi nu ndichin. Ta ñáá ndihí tuhun cha cahan ndo chichi vehe ndo, cucuñi tandihí ñáyivi noo quivi.

¿Yóo chi tahán chi cuyuhvi yo, chi ñáyivi o chi Nyoo?

(Mt. 10.28-31)

⁴ Ta catyí chi ndo cha cuví ndo ra tahin, vatyí ma yuhvi ndo chi ra chahñí coño ñuhu ri. Vatyí yahá tuhun cuan ta ñahri ca cha cuví sacuvi ra. ⁵ Soco cua catyí chi ndo yóo chi tahán chi cuyuhvi ndo. Yuhvi ndo ta quichaha ndo, soco chi maa Nyoo ra cuví tinyaa ñáyivi ndo. Ta yaha cuan ta cuví tyihí ra añima ndo anyaya.

⁶ Saa, ña yahvi nyaá ti. Cuví sata yo ohon tahan ti chihin uvi ri xuhun. Soco vasi nyihí ri ti, Nyoo ña naa iñi ra chi ni noo ti. ⁷ Ta nyoho, yahvi ca nyaá ndo nu Nyoo ta ñima ca cuaha saa ta nyacua nya ixi xiñi ndo ta chitó Nyoo yoso tahan nyaá. Yucuan chaha ma yuhvi ndo.

Mayuhvi yo cahán yo tuhun ra Jesucristo nuu ñáyivi

(Mt. 10.32-33; 12.32; 10.19-20)

⁸ Catyí chi ndo vatyí nya ndo cahán ndo tuhín chihin ñáyivi, tyicuan caa tucu cucuhan tuhun ndo nuu ángel Nyoo gloria. Vatyí yuhu Rayíi cha quichi nya gloria cuví. ⁹ Soco nya nyoho cha cahán nuu ndo cahán ndo tuhín chihin ñáyivi, tyicuan caa tucu yuhu, ma cahin tuhun ndo nuu ángel cuenda Nyoo. ¹⁰ Ta vasi cahán ñáyivi chi yuhu Rayíi cha quichi nya gloria, Nyoo cusaha ra tucanhú iñi chi ñu. Soco yóo cha cahán ña vaha siqui Tatyí Ii Nyoo ma ñihi ñu tucanhú iñi cuenda cuan.

¹¹ Cuhva cha cunyaca ñáyivi chi ndo chichi vehe ñuhu, o nu juez, o nuu ra cuví tyiño, ma caca xiñi ndo ñáá tuhun cunacahan ndo. ¹² Vatyí cuhva cha cua nacahan ndo, yucuan cuhva cuhva maa Tatyí Ii Nyoo ñáá tuhun tahán chi nacahan ndo —catyí ra Jesús.

Nu chahá ra Jesús cuhva vatyí ña tahán chi cunyicon yo cha tyayíi

¹³ Noo ra cha ndihí chihin ñáyivi cuaha cuan, catyí ra chi ra Jesús:

—Maestro, catyí chi yañi vatyí natahvi sava ra cha tyayíi cha sandoo sutu ndi chi ndi —catyí ra.

¹⁴ Tyicuan ta catyí ra Jesús chí ra:

—¿Yóo cha tyiso chi yuhu cha cuví juez ta catyí ndo vatyí tahvi sava yuhu cha chii ndo? —catyí ra.

¹⁵ Tyicuan ta quichaha catyí tucu ra:

—Saha ndo cuenda ta ma nyiyo iñi ndo cha tyayíi. Vatyí ña chiñuhú ri cha coo cuaha ndaha tyiño yo tacuhva coo vaha yo ñáyivi —catyí ra.

¹⁶ Tyicuan ta chahá ra Jesús noo cuhva ihya chí ñu:

—Chiyó noo ra tyayíi. Ta cuaha xaan tyiño sahá ra iyó. ¹⁷ Tyicuan ta ndichí xiñi ra: “¿Yoso caa cusacuvi? Ñahri nu naquehen

vahi tandihí tyiño sahi. ¹⁸ Soco cha chité yoso caa cunyacuvi. Cusatani yaca nyihí nu yihí niñi, vatyí nyihí xaan. Ta cusavahi cha nahnu ca. Ta yucuan cunaquehen vahi tandihí maa niñi cha cuquita nu iyó tyiño sahi. ¹⁹ Tyicuan ta cuaha cuiya ma saha tyiño que. Cunyitati ta cusíi cuñi. Ta cachi vahi. Ta cuchoho vahi”, ndichí xiñi ra. ²⁰ Soco catyí Nyoo chí ra: “Tondo xaan iyón. Vatyí vityin cha cuaa cucúvun. Ta cha cumí vahun ¿yóo chí cua ndoo?” ²¹ Tyicuan caa cuví chí ñáyivi cha sacayá tandihí cha tyayíi soco ñahri maa iyó chí ñu nuu Nyoo —catyí ra Jesús.

Ma caca xaan iñi yo ñáá ndihí cha chiñuhú chí yo

(Mt. 6.25-34)

²² Tyicuan ta quichaha catyí ra Jesús chí ra cacticá noo chihin ra:

—Catyí chí ndo, vatyí ma caca xaan xiñi ndo yoso caa ñihi ndo cha cachi ndo, ta tuhun sahma cuihno ndo. ²³ Vatyí yahvi ca nyaá ñáyivi yo ican saha cha cachi yo. Ta yahvi ca nyaá coño ñuhu yo ican saha cha cuihno yo. ²⁴ Saha ndo cuenda saa vatyí ña sahá tyiño ti. Ta ni ri ña naquehén vaha ti cha cachi ti. Soco chachí ti, vatyí Nyoo chahá ra cha cachi ti. Ta nuu Nyoo yahvi ca nyaá nyoho ta ñima ca saa. ²⁵ Ta vasi chicá xaan xiñi ndo soco ma cuví sandusucun ca ndo ni chiiñ ca chí ndo. ²⁶ Tatu ni chiiñ cuan ña cuví chí ndo, ¿ñáá tuhun cha chicá xaan xiñi ndo tuhun tandihí ca cha chiñuhu chí ndo?

²⁷ Saha ndo cuenda yoso caa iyó tu ita vatyí ña sahá tyiño tun. Soco catyí chí ndo vatyí ni rey Salomón chihin tandihí cha tyayíi ra ta ña tyaqui cha ñihno ra tari cha sacuihno Nyoo chí tu ita cuan. ²⁸ Tatu tyicuan caa sacuihno Nyoo chí tun ita cha iyó nu chiqui vityin, ta tyaan cucayu tun chichi horno, ta nyaca cuví chí nyoho ta ma sacuihno ra. Soco maa ndo ña chinó vaha iñi ndo chí ra. ²⁹ Ma caca xaan xiñi ndo tuhun cha cachi ndo ta cha coho ndo. ³⁰ Vatyí ñáyivi cha ña chinó iñi chí Nyoo chicá xiñi ñu tuhun ihya. Soco nyoho chinó iñi ndo chí Sutu yo Nyoo ta maa ra chitó ra ñáá cha chiñuhú chí ndo. ³¹ Vaha ca cha nanducun ndo yoso caa nacuhva cuenda ndo chí ndo chí Nyoo vatyí cunyaca ñaha ra añima ndo. Ta tyicuan caa ta ñihi ndo tandihí cha chiñuhú chí ndo.

Cha vaha cha iyó gloria

(Mt. 6.19-21)

³² Ma yuhvi nyoho, mbee sane. Vasi ña cuaha ndo soco Sutu yo Nyoo cuñi ra chí ndo. Yucuan chaha cucuhva ra quihvi ndo nu nyacá ñaha ra. ³³ Xico ndo cha iyó chí ndo. Ta cuhva ndo chí ñu ndahvi. Tatu sacuvi ndo tyehé caa, sacayá ndo cha vaha

nuu Nyoo cuví cuan. Vatyí nuu Nyoo ña ndihí cha vaha cuan. Vatyí ní ri ra suhu, ní quiti, yori cha sativí iyó yucuan. ³⁴Vatyí nuu cunyaa cha tyayíí ndo, yucuan cuví nu nyaá xifií ndo. Ta yucuan cucunyaa añima ndo —catyí ra.

Nu sañahá ra Jesús chi yo yoso caa cuatu tuhva yo chi ra quivi quichi ra inga chaha

³⁵Cuatu tuhva vaha ndo quivi quichi inga chaha. ³⁶Ta cuví ndo tari musu cha canyatú tuhva chí chitoho ñáá culhva ndichí ra cha cuahan ra noo vico tandaha. Ta nyatú tuhva ra, vatyí taculhva tañi tyehe ri nuña ra yuvehe culhva cha sacachan chitoho ra cha nachaa ra. ³⁷⁻³⁸Ta caa culhva ri cuan sii xaan cuñí ra nyehe ra chí ra. Vatyí nyatú tuhva ra chí ra nyacua nya nachaa ra, vasi cha cuaa, vasi ñaa ca. Ta cuatyaa ra chí musu cuan yuhu mesa ta cacachi ra. Tyicuan ta sii xaan cucuñí musu cuan. Vatyí tyicuan caa nyacuví chitoho ra chihin ra. ³⁹Ta coto ndo tuhun ihya vatyí tatu noo chitoho noo vehe, ta coto ra ñáá culhva cuquihvi ra suhu vehe ra, saha ra cuenda vehe ra. Ta ma culhva ra quihvi ra suhu cuan chichi vehe ra. Vatyí coto quehen ra tandihí cha iyó chí ra. ⁴⁰Ta tyicuan caa cuví tucu nyoho, cuatu tuhva ri ndo. Vatyí yuhu Rayíí cha quichi nya gloria, sana ri iñi ndo ta cuquichi —catyí ra Jesús.

Musu vaha ta musu ña vaha

(Mt. 24.45-51)

⁴¹Tyicuan ta quichaha ndaca tuhun ra Pedro chí ra Jesús:

—¿Yóó chí cuenda cahun tuhun ihya? ¿Atu cha cuenda maa ri maa ndi, o cha cuenda tandihí ñáyivi?

⁴²Tyicuan ta nacahan ra Jesús, ta catyí ra chí ra:

—Musu cha tyasohó tuhun cahán chitoho, yucuan cuví musu vaha. Vatyí sahá cuenda ra vehe chitoho ra. Ta vaha ri culhva chahá ra cha cachi tandihí ca musu cuan. ⁴³Ta sii xaan cuví chí musu cuan tatu culhva cha sahá tyiño ra, ta nachaa chitoho ra. Vatyí quichaha ra tandihí cha tahán chí sacuví ra. ⁴⁴Ta catyí chí ndo vatyí cha ndicha cuví. Vatyí chitoho ra cunatyaa ra tandihí cuii cha cumí ra ndaha ra. Vatyí vaha quichahá ra chihin tyiño sahá ra. ⁴⁵Soco tatu chicá xifií musu cuan vatyí naha xaan cuahan chitoho ra, ta quichaha nyacuví ra cha ña vaha chihin ñu nyaá tyiño yoo, ta chihin ra canyicú tucu sahá tyiño cuan. Ta ña cuñí ra sahá tyiño ra. Tyiño chachí ta tyiño chihí ndixi iyó ra. ⁴⁶Tyicuan ta sana iñi ra ta ndichí chitoho ra quivi cha ña nyatú ra chí ra noo culhva cha ña chito ra. Tyicuan ta cutachí tuñi chitoho ra chí ra, tari tuhva maa ra chihin musu cha ña quichahá tuhun cahán ra.

⁴⁷Ta noo musu cha chitó yoso caa iyó chitoho ta ña sacuví tari culhva cuñi chitoho ra, cuaha xaan tundoho cunyehe ra. ⁴⁸Soco tatu noo musu cha ña chitó ta sacuví ra cha ña vaha, tachi tuñi chitoho ra chí ra. Soco chiin ri, vatyí ña chitó ra, ta chinyacuví ra. Tatu noo musu ta cuaha cha chaha chitoho ra chí ra, cuaha tahán chí naculhva cuenda ra chí chitoho ra. Ta ra cha cuaha xaan nyaá ndaha, cuaha xaan tahán chí naculhva cuenda ra chí chitoho ra.

Nu catyí ra Jesús vatyí cha catyí ra cucañi tahan ñáyivi chihin tahan ñu

(Mt. 10.34-36)

⁴⁹Tari cha sanatahín ñuhú siqui ñuhu ñáyivi, tyicuan caa cuví tyiño vachi. ¡Ñana cha cuñí cha nacayu catyín ri ñuhú ihya! ⁵⁰Vatyí nyaá yahí noo tundoho cahnu, ta ñana cha nyehí tundoho nyacua nya ndihí tyiño sahí. ⁵¹Cuñí maa ndo vatyí cha vachi culhve cha taxi ri coo ndo siqui ñuhu ñáyivi ihya. Soco yuhu vachi vatyí sasiin chí ndo. ⁵²Vatyí cha vityín ta ityi nuu ca, ohon ñáyivi noo vehe cucusiin ñu. Uñi ñu cañi tahan chihin uvi ñu. Ta uvi ñu cucañi tahan chihin uñi ñu. ⁵³Ta ra cuví sutu, cucañi tahan ra chihin sehe ra. Ta ra cuví sehe cucañi tahan ra chihin sutu ra. Ta ñu cuví sihi cucañi tahan ñu chihin sehe ñu. Ta ñu cuví sehe cucañi tahan ñu chihin sihi ñu. Ta ñu cuví tyiso cucañi tahan ñu chihin chono ñu. Ta ñu cuví chono cucañi tahan ñu chihin tyiso ñu —catyí ra Jesús.

Nu catyí ra Jesús chí ñáyivi vatyí ña nacotó ñu vatyí cha chaq quivi cha quichi Sehe Nyoo

(Mt. 16.1-4; Mr. 8.11-13)

⁵⁴Catyí tucu ra Jesús chí ñáyivi cuaha cha nyicú yucuan:

—Tatu cha nyehe ndo vatyí cha ndihvi vico, catyí ndo vatyí cua coon savi. Ta tyicuan caa cuví. ⁵⁵Tatu cha nyehe ndo vatyí cha caá tatyí ityi tyañuhu, catyí ndo vatyí cha chaa quivi ihñi. Ta tyicuan caa cuví. ⁵⁶Nyoho sahá ndo tyi chitó ndo, ta nacotó ndo tandihí tuhun andivi, ta tandihí tuhun ñuhu ñáyivi. Soco ¿ñáá tuhun cha ña nacotó ndo ñáá tyembu nyaá ndo vityín?

Nducu yo culhva yoso caa coo vaha yo chihin ra chicán cuatyí chaha yo coto culhun yo vehe caa

(Mt. 5.25-26)

⁵⁷¿Ñáá tuhun ña sahá ndo cuenda nya cha vaha ta nya cha ña vaha? ⁵⁸Tatu noo ra chicán cuatyí chahun ta cuahan chihin ra nu nyaá ra cuví tyiño, ityi cuahan nducun culhva ní coo vahun chihin ra cha cumañi ca chaa ndo nu nyaá ra cuví tyiño. Coto naculhva cuenda ra chuun chí juez. Ta juez cuan cunaculhva cuenda ra chuun chí

policía. Ta policia cuan cutyihi ra chuun chichi vehe caa. ⁵⁹ Tatu tyicuan caa cuvi, catyí chuun vatyi ma quiton nyacua nya tyiyahvun tandihi cha tahán chi tyiyahvun —catyí ra Jesús.

13

Cuñi chi cha nasama yo cuhva iyó yo o cunyehe yo tundoho

¹ Tyicuan ta suri quivi cuan canyicu suhva ra. Ta quichaha canacatyí ra chi ra Jesús yoso caa cha nyacuví ra Pilato chihin suhva ra Galilea. Vatyí tyihi ra tyiño na cucahñi sindaro chi ra Galilea cha cachaha ofrenda chi Nyoo vehe ñuhu. Ta nasacá ra niñi ra cuan chihin niñi quiti cha cua cuvi ofrenda cuan. ² Ta nacahan ra Jesús ta catyí ra chi ra:

—¿Atu chicá xiñi nyoho vatyi cahnu xaan ca cuatyí ra Galilea cuan cha nuu tandihi ra ityí ñuu ra. Ta yucuan chaha cachihí ra? ³ Ñima. Vatyí tatu nyoho ta ma nasama ndo cuhva iyó ndo, tyicuan caa tucu cunaa nyoho. ⁴ Ta ndi chahun uñi ra cachihí cha canacava torre Siloé cuan siqui ra. ¿Atu cuaha ca cuatyí ra ta ican saha inga ra cha iyó ñuu Jerusalén cuñi maa ndo? ⁵ Ñima. Vatyí tatu nyoho ta ma nasama ndo cuhva iyó ndo, cunaa tucu nyoho.

Nu catyí ra Jesús noo cuhva yoso caa nyatú Nyoo cha nasama yo cuhva iyó yo

⁶ Tyicuan ta chaha ra Jesús noo cuhva. Ta catyí ra:

—Noo ra iyó yutun cha nañi higo chi ra. Ta nanyaá tun nu ñuhú ra. Ta chahan ra chinyehe ra tatu iñi chiti tun. Ta nanyehe ra vatyi ñahri. ⁷ Ta quichaha catyí ra chi ra sahá cuenda chi tun: “Cha uñi cuiya tyito ri quichi nyehi tatu iyó chiti tun. Ta ñahri maa chiti tun iñi. Na cahnya yo chi tun. Vatyí ¿ñáá ri tuhun sayangá tun nu ñuhú ihya? Vatyí ñahri chiti chahá tun”, catyí ra. ⁸ Soco ra cha sahá cuenda ñuhú cuan quichaha catyí ra: “Tata, ma cahnya yo chi tun vityin. Na cuinanyaa maa tun nonga cuiya ihya. Cusanduvite ñuhú chaha tun ta cutyihi ñuhú tyahyu. ⁹ Vasi tyicuan caa ta cuhva tun chiti. Soco tatu ña chaha tun chiti, tyicuan ta cahnya yo chi tun”, catyí ra.

Quivi nyitatu ñáyivi sanduvaha ra Jesús chi noo ñaha tihí chata

¹⁰ Noo quivi cha nyitatu ñáyivi sañahá ra Jesús chi ñu chichi vehe ñuhu. ¹¹ Ta yucuan nyaá noo ñaha cha yihí tatyí ña vaha chi. Ta cha chahun uñi cuiya cuhvi ña cha ndutihí chata ña. Ta ña cuvi ndundoo ña. ¹² Tyicuan ta nanyehe ra Jesús chi ña. Ta caná ra chi ña. Ta quichaha catyí ra chi ña:

—Cha nduvahun. Ñahri ca cuehe ndohún —catyí ra chi ña.

¹³ Tyicuan ta tyiso ra ndaha ra siqui ña. Ta caa cuhva ri cuan ta ndundoo ña. Tyicuan ta quichaha sacahnu ña chi Nyoo. ¹⁴ Soco ra cuvi nuu vehe ñuhu, cuxaan xaan ra. Vatyí quivi nyitatu ñáyivi sanduvaha ra Jesús chi ña. Ta quichaha catyí ra chi ñáyivi canyicu cuan:

—Iyó iñu tahan quivi tahán chi saha tyiño yo. Yucuan quivi quichi ndo quichi cuvi tatan chi ndo. Ta ma quichi ndo quivi nyitatu yo —catyí ra.

¹⁵ Tyicuan ta ra Jesús quichaha catyí ra chi ra:

—Nyoho cha sahá ndo tyi vaha ndo. ¿Atu ña ndachi tucu nyoho quiti sana ndo vatyi sacoho ndo ndutya chi ti quivi nyitatu yo?

¹⁶ Ta tyicuan caa tucu ñaha ihya, vachi ña tata ra Abraham. Ta cha chahun uñi cuiya nuhñi ña chihin cuehe ihya sahá ra ña vaha. Ta yori ndachi chi ña. ¿Atu ña tahán chi ndachi yo chi ña vasi quivi nyitatu yo? —catyí ra Jesús.

¹⁷ Tyicuan ta cuhva cha catyí ra Jesús tuhun cuan, tandihi maa ra xaan iñi chi ra cahan cuvi nuu ra. Soco tandihi maa ñáyivi cusii cuñi ñu chihin cha cahnu cha sacuví ra Jesús.

Nu catyí ra Jesús vatyi tari noo chiti mostaza cuvi cha nyacá ñaha Nyoo añima yo (Mt. 13.31-32; Mr. 4.30-32)

¹⁸ Tyicuan ta quichaha catyí ra Jesús:

—¿Ñáá chihin sandiqui tahin cha nyacá ñaha Nyoo añima yo? ¿Ñáá chihin sandu inuu ri yo? ¹⁹ Tari noo chiti mostaza, tyicuan caa cuvi. Vatyí noo ra tachí ra noo chiti nu ñuhú, ta chahnú tun. Ta cuvi tun noo yutun cahnu vavaha. Tyicuan ta chaá coyo saa nuu yutun cuan. Ta yucuan savahá ti taca ti.

Nu catyí ra Jesús vatyi tari yuchan iya tyicuan caa cuvi cha nyacá ñaha Nyoo añima yo

(Mt. 13.33)

²⁰ Tyicuan ta quichaha catyí ra Jesús inga chaha:

—¿Ñáá ca chihin sandu inuu ri yo yoso caa nyacá ñaha Nyoo añima yo? ²¹ Cuví chi tari noo yuchan iya cha nasacá noo ñaha sihi chihin uñi cuhva yutyí pan. Vatyí tari ndaa pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo añima —catyí ra.

Yuvehe tihín ta ityí cuiñi cha cuahan nu nyaá Nyoo

(Mt. 7.13-14, 21-23)

²² Ityí cuahan ra Jesús Jerusalén cahan ra tuhun Nyoo chihin ñáyivi tandihi ñuu nu yaha ra. ²³ Ta quichaha ndaca tuhun noo ra chi ra:

—¿Atu ña cuaha maa ñáyivi cucacu añima?
—catyí ra.

Tyicuan ta nacahan ra Jesús, ta catyí ra:
24 —Nanducu ndo cuhva quihvi ndo yu-
vehe tihin. Vatyí yíi xaan quihvi ndo nu
nyacá ñaha Nyoo. Vatyí cuaha xaan ndo cha
cucuñi ndo quihvi ndo yucuan. Ta ma cuví.
25 Vatyí tari chitoho noo vehe tyicuan caa
cuví Nyoo. Ta chitoho vehe cuan cunacasi
ra yuvehe. Tyicuan ta nyoho cha nyicú
ndo ityí chata cusacahan ndo yuvehe, ta
cucatyí ndo: “Nuña yuvehe.” Ta ra cuan
cucatyí ra chi ndo: “Ña chité nya ityí quichi
nyoho.” 26 Tyicuan ta nyoho cucatyí ndo:
“Nyuhu chachí ndi ta chihí ndi chuhun.
Maun sañahun tuhun Nyoo chi ndi ityí nu
nyaá vehe ndi”, cucatyí ndo chi ra cuan.
27 Soco ra cuan cunacahan ra chihin ndo ta
cucatyí ra: “Cha catyí chi ndo vatyí ña chité
nya ityí quichi nyoho. Canyaha ndo nu nyai,
tandihí nyoho ñu nyacuví cha ña vaha”, cu-
catyí ra chi ndo. 28 Yucuan ta cuacu ndo
ta sacahñi noho ndo cha nyehe ndo chi ra
Abraham ta chi ra Isaac ta chi ra Jacob, ta
chi tandihí ra profeta Nyoo cha chiyo ta cha
naha. Vatyí canyicú ra nu nyacá ñaha Nyoo.
Ta nyoho ndoo ndo ityí chata. 29 Ta cuquichi
ñáyivi ityí tyañuhu, ta ityí norte, ta ityí nu
caña ñanyii, ta ityí nu quee ñanyii. Ta cunyicu
ñu cachí ñu chihin Nyoo nu nyacá ñaha ra.
30 Ta yóo ñu cha cuñi cuhun ityí nuu, ican
ñu cuhun nu ndihí. Ta ñu cuahan nu ndihí,
ican ñu cuhun ityí nuu —catyí ra.

*Nu nducuihya ñi ra Jesús nyehé ra chi
ñáyivi ñuu Jerusalén*

(Mt. 23.37-39)

31 Suri maa quívi cuan chaq coyo suhva ra
fariseo. Ta catyí ra chi ra Jesús:

—Quíta ihya vatyí ra Herodes cuñi ra
cahñi ra chuun —catyí ra.

32 Soco ra Jesús quichaha catyí ra chi ra:
—Cuahan ndo ta catyí ndo chi ra ñucuii
quiñi iyó cuan, vatyí nyacua nya nu chaa
maa chi quívi cha ndihí tyiño sahí cha tave
tatyí ña vaha ta cha sanduvahi chí ñu cuhví,
tyicuan ta cundihí tyiño sahí. 33 Soco nya
tahán chí cha ndihí maa tyiño sahí, tyicuan
ta cuhun mai cucuví nya Jerusalén. Vatyí ma
cuví cha cúvi noo ra profeta Nyoo ityí chata
Jerusalén.

34 ¡Ndahvi nyoho ñáyivi Jerusalén! vatyí
chahñi ndo chí ra profeta ra cachahá
cuenda tuhun cahán Nyoo chí ndo. Ta tuchi
ndo yuu chí tandihí ra cha saquichí Nyoo nu
nyicú ndo. Ta yuhu cuaha xaan chaha cuñi
saha cuende chí ndo tari noo ndivi cha sahá
cuenda ti chí sehe ti, ta naquehen vaha ti chí
ti chichí ndichin ti. Soco maa ndo ña cuñi
ndo. 35 Nyehé ndo vityin vatyí cha sandoj
chí ndo. Ta catyí chí ndo vatyí ma nyehe ca
ndo chí nyacua nya chaa chí quívi cuacatyí

ndo vatyí cahnu xaan ra vachi chihin sívi
Nyoo —catyí ra Jesús.

14

*Nu sanduvaha ra Jesús chí noo ra cuhví
cha yihí cuiño chí*

1 Cuví chí noo quívi nyitatú ñáyivi. Ta ra
Jesús cuahan ra cua cachí ra vehe noo ra
cuví nuu chí ra fariseo. Ta suhva ca fariseo
cuan cañañi ra chí ra Jesús tatu ñáá cha
ña vaha cunyacuví ra. 2 Yucuan ta nuu ra
Jesús nyaá noo ra cuhví cha yihí cuiño chí.
3 Tyicuan ta quichaha catyí ra Jesús chí ra
casacuaha ley vehe ñuhu ta chí ra fariseo:

—¿Atu vaha sanduvaha yo chí ñáyivi
cuhví quívi nyitatú yo? —catyí ra.

4 Tyicuan ta tandihí ra cuan, taxi taxi
cacuví ra. Yucuan cuví nu tyiso ra Jesús
ndaha ra siquí ra cuhví cuan. Ta sanduvaha
ra chí ra. Ta natachí ra chí ra na cunuhu ra.
5 Tyicuan ta quichaha catyí ra Jesús chí ra
fariseo:

—Tatu canacava noo burru sana ndo, o
nonga quiti sana ndo chichi noo xahva, ¿atu
ma cutava ndo chí ti tañi tyehe ri, vasí quívi
nyitatú yo cuví? —catyí ra.

6 Tyicuan ta inga chaha tucu taxi cuii ri
nicunyicu ra fariseo. Vatyí ña ñihi ca ra
tuhun nacahan ra.

*Nu sañaha ra Jesús chí yo vatyí ma cahnu
saha yo chí yo*

7 Cha nyehe ra Jesús vatyí tandihí ra
canyicú vico cuan nacachí ra tyayu vaha ca
cunyata ra. Tyicuan ta quichaha chaha ra
tuhun ihya chí ra:

8 —Nya quívi cuhun ndo vico tandaha,
ma nanducu ndo tyayu vaha ca cunyata
ndo. Vatyí coto quichi inga ra cha cahnu
ca cuví ican saha ndo, 9 ta coto quichi ra
cha nacatyí tuhan ta catyí ra chuun: “Cuhva
tyayu chíña. Vatyí cunyata ra ihya.” Tyicuan
ta yoho chihin cha cahán nuun, ta cuhvon.
Yucuan ta cunyaun nu ndihí. 10 Soco catyí
chí ndo, vatyí nya quívi nacatyí tuhun ra chí
ndo, cunyata ndo noo nu ñima ri tuhun. Vatyí
quichi maa ra cha nacatyí tuhun chí ndo ta
catyí ra chí ndo: “Ra tahin, ñaha, cunyaun
nu tyayu vaha tyehe.” Ta tyicuan caa sacu-
cahnu ra chuun nu ñáyivi nyicú yuhu mesa
chuhun. 11 Vatyí yóo ra cha cahnu sahá chí,
cuquehen ra ticahan nuu. Ta yóo ra cha
ndahvi sahá chí, cahnu cucuví ra —catyí ra
Jesús.

12 Tyicuan ta quichaha catyí tucu ra chí ra
nacatyí tuhun chí ra:

—Nya quívi coo vico vehun, ma nacatyí
tuhun chí ra tahun, ni chí yañun, ni ri chí
ñáyivi chuun, niri chí ñu nyicú yuvehun ñu
tyayii. Vatyí ñu cuan cuví nacatyí tuhun
ñu chuun, na coo tucu vico vehe maa ñu.
Tyicuan ta nacahnya ñu cuenda cha chahan

ñu vico vehun. ¹³ Soco cua catyi chuun vatyi nya quivi coo vico vehun, nacatyi tuhun chi ñu ndahvi, chi ñu cuhvi, chi ñu coxo, ta chi ñu cuaa. ¹⁴ Tyicuan ta sii cuví chuun, vatyi ñu cuan ma cuví natyiyahvi ñu chuun. Soco cuñihun yavhun quivi cunandoton chihin ñáyivi vaha.

Nu चाह़ा ra Jesús noo cuhva yoso caa nacatyi tuhun ra chi yo vatyi quihvi yo nu nyacá ñaha Nyoo

(Mt. 22.1-10)

¹⁵ Ta chiñj noo ra cha nyaá yuhu mesa cuan tuhun cahán ra Jesús. Ta quichaha catyi ra chi ra:

—Sii xaan cuví chi ñu cachi nu nyacá ñaha Nyoo —catyi ra.

¹⁶ Tyicuan ta catyi ra Jesús:

—Noo ra cuan savaha ra noo vico cahnu vavaha vehe ra. Ta nacatyi tuhun ra chi cuaha xaan ñáyivi. ¹⁷ Tyicuan ta chaq cuhva cha cuxiñi ñu, ta tachj ra chi musu ra nacana ra chi ñu. Vatyi cha chaq cuhva cha cuxiñi ñu. ¹⁸ Soco tandihí ñu cuan quichaha catyi ñu vatyi ma cuhun ñu. Ta noo ra cuan catyi ra: “Ni saté noo ñuhú. Ta cuñi chí cuhin cunyehe. Ican tuhun chiquén na saha ra tucahnu iñi chii vatyi ma cuhin.” ¹⁹ Tyicuan ta inga tucu ra cuan catyi ra: “Ni sata cuiri ohon tahan yunta quití. Ta cuhin cunyehe tatu vaha ti. Ican tuhun chiquén tumañi iñi chí ra na saha ra tucahnu iñi chii, vatyi ma cuví cuhin.” ²⁰ Tyicuan ta inga tucu ra cuan catyi ra: “Ni ndihí tandahí, ta ma cuví cuhin”, catyi ra. ²¹ Tyicuan ta musu ra cuan cuanuhu ra. Ta nacatyi ra tandihí tuhun cuan chí ra cha tachj chí ra. Cha chiñj ra savaha vico cuan cha tyicuan caa, ta cuxaan xaan ra. Ta catyi ra chí musu ra: “Cuahan tandihí maa ityi. Ta quichi nyacon chí ñu ndahvi, chí ñu cuhvi, ta chí ñu coxó, ta chí ñu cuaa”, catyi ra. ²² Ta cha yahq nachaaq musu cuan ta catyi ra chí ra cha tachj chí ra: “Cha sacuvj tandihí maa cha catyún. Ta nuñá ca chichi vehe”, catyi ra. ²³ Tyicuan ta chitoho ra catyi ra chí ra: “Cuahan cua nducu ca chí ñu tandihí maa ityi. Ta sáníñun chí ñu na quichi coyo ñu, vatyi na cutu chichi vehi. ²⁴ Vatyi catyi chuun vatyi ni minoo ñu cha nacatyi tuhun cha xihna ri, ma cachi ñu chihin” —catyi ra Jesús.

Cuaha xaan tundoho nyehe yo tatu cuenda ra Jesús yihí yo

(Mt. 10.37-38)

²⁵ Cuaha xaan ñáyivi nyicón chí ra Jesús. Tyicuan ta nanyehe ra chí ñu, ta quichaha catyi ra:

²⁶ —Tandihí nyoho cha nyicón ndo chii, tatu cuñi ca ndo chí ñáyivi chí ndo ican saha chí yuhu, ñima cuende yihí ndo. Ta tatu cuñi ca ndo chí maa ndo ican saha chí yuhu, ñima

cuende yihí ndo. ²⁷ Vatyi nya nyoho cha ña cuñi ndo nyehe ndo tundoho cha cunyicon ndo chii, ña tahán chí cuví ndo ñu cuende, vatyi cha nyehe ndo tundoho yucuan cuví cruzi cha tahán chí cuiso ndo. ²⁸ Vatyi tatu nya nyoho cuñi ndo savaha ndo noo vehe cahnu, xihna ca cunyaa ndo ta ndichi xiñi ndo tatu caña xuhun ndo cha cananyaa ndo vehe cuan. ²⁹ Vatyi tatu quichaha sacacu ndo vehe cuan, ta quichaha ña cuví sandihí ndo vatyi ñahri ca xuhun ndo, cuacu nyaa ñáyivi chí ndo. ³⁰ Ta cuacatyí ñu: “Ra cuan quichaha savaha ra vehe ra, ta ni ña cuví sandihí ra”, cucatyí ñu. ³¹ O tatu noo rey cha cuñi cañi tahan chihin inga rey çatu ña chicunyaa xihna ra ta ndichi xiñi ra tatu ñihí uchi mil sindaro cha cuahan chihin ra cua cañi tahan chihin inga rey cha vachi chihin oco mil sindaro cuan? ³² Tatu chitó ra vatyi ma cuví chasaha ra chí inga rey cuan, tyicuan ta cañi ca vachi rey cuan, ta tachj ra chí noo musu ra vatyi cucatyí ra chí rey cuan na ndihí tuhun yucuan ri. ³³ Ta tyicuan caa cuví chí nyoho. Tatu ma cahnya iñi ndo tandihí maa cha cuñi ndo ta cha cumi ndo, ma cuví cunyicon ndo chii.

Nu sañahá ra Jesús vatyi tari ñi cha ndihí cha uhva, tyicuan caa cuví yo tatu ndu uvi iñi yo cha chino iñi yo chí ra

(Mt. 5.13; Mr. 9.50)

³⁴ Vaha ñi vatyi sacu uhva chí cha cachi yo. Soco tatu ndihí cha uhva chí, ña vaha ca chí. ³⁵ Ñahri ca tyiño cuví saha chí. Ta sacuita yo vatyi ña vaha ca. Nya nyoho cha cutuñi iñi ndo, tyasoho ndo tuhun cahán —catyi ra Jesús.

15

Nu sañahá ra Jesús vatyi tari mbee cha cuanaa tyicuan caa cuví yo

(Mt. 18.10-14)

¹ Tandihí ra tavá xuhun cuenda gobiernu ñuu Roma, ta ra iyó cuatyí, tuhva ra nu nyaá ra Jesús, tacuhva cuñi ra tuhun cahán ra. ² Tyicuan ta ra fariseo ta ra casacuaaha ley vehe ñuhu quichaha cacahan nyaa ra, ta cacatyí ra:

—Ra ihya, cahán ra chihin ra iyó cuatyí. Ta chachi ra chihin ra —cacatyí ra.

³ Tyicuan ta ra Jesús cahán ra noo cuhva ihya, ta catyi ra:

⁴ —Ta nya nyoho cha iyó noo cientu mbee sana ndo, tatu cuanaa noo ti, çatu ma sandoo ndo chí tandihí ca ti cuan nu chiqui. Ta cunanducun ndo chí quití cha cuanaa cuan, nyacua nya cha nañihí ndo chí ti? ⁵ Ta cuhva cha nañihí ndo chí ti, ta natyiso soco ndo chí ti. Ta sii vavaha cuví chí ndo. ⁶ Ta cuhva cha nachaa ndo vehe ndo, ta ndu in ri ndo chihin ra tahan ndo ta chihin ñu nyicú yatyin yuvehe ndo, yucuan ta catyi ndo chí

ñu vatyi na cusii cuñi ñu chihin ndo vatyi nañihĩ ndo chi mbee sana ndo cha chinaa. ⁷ Ta ihya catyí chi ndo, vatyi sii xaan ca cuví chi ángel Nyoo andiví cha catyí noo ra cha iyó cuatyí ta nasama cuhva iyó ra, ta ñima ca cha catyí ndi cumi xico chahun cumi tahan ñáyivi cha ñahri cuatyí.

Ñaha sihi cha cuanaa xuhun ta nañihĩ ña

⁸ Ta catyí chi ndo, tatu iyó noo ñaha cha iyó uchi tahan xuhun ña, ta tatu cuanaa noo xuhun ña, tyaa ña noo candil. Ta tihvi ña tandihí cuii maa chichí vehe ña. Ta nanducu ña tandihí cuii nyacua nya cha nañihĩ ña xuhun cuan. ⁹ Ta cuhva cha yahá nañihĩ ña, cuahan ña cua nanducu ña chi ñaha tahan ña, ta ñáyivi cha nyicú yuvehe ña, ta catyí ña chi ñu: “Cusii cuñi ndo chihin vatyi cha nañihĩ xuhin cha chinaa”, catyí ña. ¹⁰ Ta catyí chi ndo vatyi tyicuan caa sii cuví chi ángel Nyoo cha catyí noo ra iyó cuatyí ta ndu uvi iñi ra cuatyí ra —catyí ra Jesús.

Nu sañahá ra Jesús yoso caa cuñi Nyoo chi noo ra ndu uvi iñi cuatyí

¹¹ Tyicuan ta quichaha catyí tucu ra Jesús cuhva ihya:

—Noo ra, chiyo uvi tahan sehe ra. ¹² Ta noo chaha, ra luhlu ca cuan catyí ra chi sutu ra vatyi nacuhva ra cha tahan chi chi ra. Tyicuan ta sutu ra chahá ra chi ninduvi sehe ra. ¹³ Ta ña cuaha ri quivi cuan ta ra luhlu ca cuan xico ra tandihí cuii maa cha chahá sutu ra chi ra. Ta sandu iin ri ra xuhun ra, ta quehen ra ityi ta cuahan ra noo ñuu cañi. Ta yucuan chiyo ra, sanaa ra tandihí maa xuhun ra chihin tusii iñi. Ta quíni xaan chicá noo ra. ¹⁴ Tyicuan ta chaá noo tama ityi nu iyó ra. Ta quichaha chisoco ra vatyi ndihí xuhun ra sanaa ra. ¹⁵ Tyicuan ta chahán ra chicacán ra tyiño chi noo ra ñuu cuan. Ta ra cuan tachí ra chi ra noo nu iyó quini sana ra, vatyi cusaha cuenda ra chi ti. ¹⁶ Ta cuví noo chaha cuan chisoco xaan ra. Ta ñahri maa cha cachi ra iyó, nyacua quichi cuví iñi ra cachi ra cha cachachí quini cuan soco yori maa chaha cha cachi ra. ¹⁷ Tyicuan ta nicohon iñi ra tuhun sutu ra. Ta ndichí xifi ra: “¿Atu chiin cuaha ra casahá tyiño chihin suti? Soco ñahri maa cha cumañi chi ra. Ta yuhu cuñi cúvi soco ihya. ¹⁸ Vityin cunuhin nu nyaá suti. Ta catyí chi ra tyi chicoo cuatyí nuu Nyoo ta nuu maa ra. ¹⁹ Ta ña naña que cha cuví sehe ra chii, ta na saha ra tuhun vatyi noo musu ri ra cuví chii.” Tyicuan caa ndichí xifi ra.

²⁰ Tyicuan ta quehen ra ityi cuanuhu ra nya vehe sutu ra. Cañi ca vachi ra ta nanyehé sutu ra chi ra, ta cundahví cuñi ra nyehe ra chi ra. Ta chinq ra chisatahán ra chi sehe ra. Ta nanumj ra chi ra. ²¹ Tyicuan ta quichaha catyí ra chi sutu ra: “Tata,

chicoo cuatyí nuu Nyoo ta chicoo cuatyí nu maun. Ta yucuan chaha ña naña que cha cuví sehun chii”, catyí ra chi sutu ra. ²² Soco sutu ra tyihi ra tyiño, ta catyí ra chi musu ra: “Tava ndo sahna vaha ca ta saçuihno ndo chi ra. Ta tyihi ndo noo xehe nundaha ra. Ta nyaça ndo zapato quihí chaha ra ñandihí. ²³ Ta siin ri cahñi ndo noo becerru cha xahan ca, vatyi cachi yo chi ti. Vatyi vityin cucoo yo noo vico. ²⁴ Vatyi ra sehi ihya cha chihí ra sahá mai tuhun. Cuñi mai vatyi ma nyehe que chi ra, soco natuvi ra”, catyí sutu ra. Tyicuan ta quichaha chicoo ñu vico. Ta sii xaan cacuñi ñu vatyi natuvi ra cuan.

²⁵ Tyicuan ta inga sehe ra, ra cha chahnu ca, ñohó ra nu chiqui. Ta cuhva cha cuanachaa ra nya vehe ra, ta quichaha chihí ra yaa. Ta chihí ra vatyi sii xaan cachitá chaha ñu. ²⁶ Tyicuan ta cuhva cha cuyatyin ra nya vehe ra ta caná ra chi noo musu ra. Ta ndaca tuhun ra ñáá cha cuví cuan. ²⁷ Tyicuan ta musu ra quichaha catyí ra: “Yañun, ican nachaa. Ta yucuan chaha tachí sutun vatyi na cahñi ra chi noo becerru xahan ca. Vatyi vaha ri nachaa yañun, ta ñahri cha cuví chi ra”, catyí ra. ²⁸ Tyicuan ta cuxaan xaan cuñi ra. Ta ña cuñi ra ndihvi ra chichí vehe. Soco sutu ra chahán ra chichahán ndahvi ra chihin ra, vatyi na ndihvi ra chichí vehe. ²⁹ Tyicuan ta nacahán ra ta catyí ra chi sutu ra: “¿Atu chiin cuiya sahá tyiñe chuhun? Ta tyasohí tuhun cahún. Ta ni noo chaha ta ta nacahnu que nu cahún. Soco ni noo ndixihyu lee ta cuhva con chii vatyi coi vico chihin ra tahin. ³⁰ Soco vityin cha nachaa sehun ihya, ra cha sanaa xuhun chihin ñu cata iñi. Ta vityin chahun noo becerro quití xahan ca chi ra”, catyí ra chi sutu ra. ³¹ Tyicuan ta nacahán sutu ra ta catyí ra chi ra: “Sehi, yoho tyicuan ri nyañun chihin. Ta tandihí cha cumi, chuun cuví. ³² Soco vityin tahán chi sacuvi yo vico ihya. Ta cusii cuñi yo. Vatyi nachaa yañun, ra cha sahá mai tuhun vatyi chihí. Tari quivi nandoto ra cuví ihya. Ta chinaa ra, ta nañihí tucu yo chi ra inga chaha”, catyí ra chi sehe ra —catyí ra Jesús.

16

Nu sañahá ra Jesús chi yo yoso caa saha yo tumañi iñi chihin cha iyó chi yo

¹ Tyicuan ta quichaha catyí ra Jesús chi ra cachicá noo chihin ra:

—Iyó noo ra tyayii vavaha ra. Ta iyó noo ra yindaha tandihí tyiño sahá ra. Ta chahán coyo musu ra canacatyí ra chi ra tyayii cuan, vatyi ra yihí ndaha tyiño cuan, sanaa ra tandihí cha iyó chi ra. ² Tyicuan ta caná ra tyayii cuan chi ra yindaha tyiño cuan, ta catyí ra chi ra: “Cha cuaha xaan

cuatyi चाहून quichi nu nyaí. Nacuhva cuendon tandihí tyiño cha sacuvun chíi. Vatyí ma saha tyiño con chihin”, catyí ra chí ra. ³ Tyicuan ta ra yindaha tyiño cuan ndichi xiñi ra: “¿Yoso caa cunyacuvi vityin? Chitohi ña cuñí ca ra cha sahá tyiñe chihin ra. Ta ñahri fuerza iyó chíi cha saha tyiñe nu ñuhú. Ta cahán nui caye chíi ñuu. ⁴ Soco cha chité yoso caa cunyacuvi vityin, ta vaha coo ñáyivi chihin quívi cha ma coo ca tyiño sahi, ta vaha chai vehe ñu”, ndichi xiñi ra. ⁵ Tyicuan ta cana ra chí noo noo ra yosoyicá chí chitoho ra. Ta quichaha catyí ra chí noo ra cuan: “¿Yoso yosoyicón chí chitohi?” catyí ra. ⁶ Tyicuan ta nacahan ra cuan ta catyí ra: “Yuhu yosoyiqué noo cumi mil litru aceitey.” Tyicuan ta ra yindaha tyiño cuan catyí ra chí ra: “Quehen nonga tutu ihya. Ta natyaa uvi mil ri. Ta sacuiton tutu chahnu cuan”, catyí ra. Tyicuan caa sacuvj ra. Ta cuahan ra. ⁷ Tyicuan ta chaag inga ra. Ta quichaha ndaca tuhun tucu ra chí ra cuan ta catyí ra: “¿Yoso yosoyicá yoho chí chitohi?” Ta nacahan ra cuan ta catyí ra: “Yosoyiqué noo mil arroba trigo”, catyí ra. Tyicuan ta quichaha catyí ra yindaha tyiño cuan: “Quehen inga tutu, ta natyaun uña cientu ri arroba. Ta sacuita tutu chahnu chiña”, catyí ra. ⁸ Tyicuan ta chitó chitoho ra cha ña vaha cha chinyacuvj ra. Ta iyo xaan cuñí ra vatyí yatyi xaan saha ra cuan chí ra —catyí ra Jesús.

Ta quichaha catyí tucu ra chí ra cachicá noo chíi ra:

—Ñáyivi ña vaha añima yatyi xaan ca sahá ñu chí ñu ican saha ñáyivi vaha añima.

⁹ Ta catyí chí ndo, vatyí cotyiño ndo cha tyayii cha iyó siqui ñuhu ñáyivi ihya, ta saha ganaa ndo amigo. Ta quívi cha ndihi cha tyayii cuan, cuñihi ndo nu cunyicu ndo nya nu nyaá Nyoo tyicuan ri maa.

¹⁰ Tatu chitó ndo cotyiño ndo chíi cha iyó chí ndo cha cuenda cha vaha, tyicuan caa coto tucu ndo cotyiño ndo tatu cuaha iyó chí ndo. Soco tatu ña chitó ndo cotyiño ndo chíi cha iyó chí ndo, tyicuan caa ma coto tucu ndo cotyiño ndo tatu cuaha coo chí ndo. ¹¹ Ta catyí chí ndo, tatu ña sahá ndo tumañi iñi chihin cha iyó chí ndo siqui ñuhu ñáyivi ihya, Nyoo ma cuhva ra noo cha tyayii cha ndicha chí ndo. ¹² Tandihí cha iyó chí ndo maa Nyoo chaha noo chí ndo. Soco tatu ña sahá ndo tumañi iñi chihin cuan, ma cuhva ra cha tahán chí chí ndo.

¹³ Noo musu ma cuvi coo uvi tahan chitoho ra. Vatyí musu cuan cuñí ca ra chí noo ra, ta ñima ca chí inga ra. O chí noo ra, vaha quichahá ra tuhun cahán ra, ta chí inga ra, ma quichaha ra cha cahán ra. Ma cuvi cuñi ndo chí Nyoo ta suri cuhva cuan cuñi tucu ndo cha tyayii —catyí ra Jesús.

¹⁴ Tyicuan ta cha chiñi ra fariseo tandihí tuhun cahán ra Jesús. Tyicuan ta quichaha chaco cuehe ra nyehe ra chí ra. Vatyí maa ra fariseo cuan cuñí xaan ra chí xuhun.

¹⁵ Tyicuan ta quichaha catyí ra Jesús chí ra: —Vaha xaan sahá ndo chí ndo nuu ñáyivi. Soco chitó Nyoo vatyí añima ndo ña vaha. Ta tandihí cha catyí ñáyivi vatyí chahnu xaan ihya siqui ñuhu ñáyivi, Nyoo ña cuñí nyehe ra.

Nu sañahá ra Jesús tuhun ley ra Moisés, ta tuhun yoso caa cunyaca ñaha Nyoo añima yo chí yo

¹⁶ Ley cha tachj Nyoo chí ra Moisés vatyí tyaa ra, ta tuhun cha tyaa ra profeta Nyoo ta cha naha, ican chí cuvi cha saquehen ityi chí ñáyivi nyacua nya quívi chaag ra Juan. Ta maa ra Juan quichaha cahan ra tuhun vaha vatyí cha cuñi quichi Nyoo vatyí cunyaca ñaha ra. Ta tandihí ñáyivi cha nducú cuhva yoso caa cunyaca ñaha Nyoo añima ñu, ican ñu quihvi ndaha ra.

¹⁷ Soco catyí chí ndo, vasi cunaa andivi ta ñuhu ñáyivi, soco cha cuvi ley Nyoo cha tyaa ra Moisés, ma naa nyacua nya cha yahag cuvi tandihí.

Sañahá ra Jesús vatyí ña vaha cha sandoo rayii chí ñasihí ra
(Mt. 19.1-12; Mr. 10.1-12)

¹⁸ Tatu noo rayii iyó ñasihí ra, ta sanandoo ra chí ña, ta tandaha ra chihin inga ña, iyó cuatyi ra nuu Nyoo. Ta tatu tandaha noo rayii chihin noo ñaha cha sandoo yii chíi, coo tucu cuatyi ra nuu Nyoo.

Nu sañahá ra Jesús tuhun noo ra tyayii chíi ra Lázaro

¹⁹ Chiyó noo ra tyayii. Ta vaha ñihnó ra. Ta tandihí quívi iyó ra vico ta chachí vaha ra. ²⁰ Ta chiyó tucu noo ra ndahvi cha nañi Lázaro. Ta cuaha xaan ndihyi iñi ra. Ta nyaá ra yuvehe ra tyayii cuan. ²¹ Ta ra ndahvi cuan, cuñí ra cachí ra, vasi cha canacoyo nu mesa ra tyayii cuan. Ta nyacua nya ina ta chaag ti nu nyaá ra, ta yuyaá ti nu cahvi chí ra. ²² Ta noo quívi cuan chíi ra ndahvi cuan. Ta ángel Nyoo quehen ra chí ra ta cua nyaca ra chí ra nya nu nyaá ra Abraham gloria. Tyicuan ta chíi tucu ra tyayii cuan. Ta chicuchj ñu chí ra. ²³ Tyicuan ta ra tyayii cuan nyehé xaan ra tundoho nu ñohó ra anyaya. Ta nanyehé ra nu cañi. Ta nanyehé ra chí ra Abraham chíi ra Lázaro, nyaá ra chíi ra yucuan. ²⁴ Tyicuan ta canachaag ra ta catyí ra: “Tata Abraham, cundahvi cuñi chíi. Tachí chí ra Lázaro na sattyi ra chíi nundaha ra. Ta na satoo ra ñn titi ndutya nu yai. Vatyí nyehé xain tundoho nu cayú ñuhj ihya”, catyí ra. ²⁵ Soco ra Abraham catyí ra chí ra: “Ñicohon iñun vatyí vaha chíyon ñuhu ñáyivi. Ta ra Lázaro, ña vaha chíyó

ra. Vityin vaha iyó ra ihya, ta yoho nyehún tundoho. ²⁶ Ta siin ri, mahñu ihya cono xaan. Ta ma cuvi yaha ra iyó tyehe cahun ra chiña. Ta ma cuvi yaha ra iyó chiña, quichi ra tyehe”, catyí ra Abraham chi ra. ²⁷ Tyicuan ta quichaha catyí ra tyayii cuan: “Tata Abraham, sahun tumañi iñi chii. Ta taçhun chi ra Lázaro nya vehe suti. ²⁸ Vatyí iyó ohon tahan yañi. Ta cuñi vatyí nacatyí ra chi ra yoso caa iyé ihya nu nyehí tundoho, coto quichi coyo tucu ra cuan ihya”, catyí ra. ²⁹ Tyicuan ta quichaha catyí ra Abraham: “Iyó ley cha tyaq ra Moisés. Ta iyó tuhun cha tyaq ra profeta Nyoo ta cha naha. Na quichaha ra tu cuñi ra”, catyí ra Abraham. ³⁰ Tyicuan ta quichaha catyí ra tyayii cuan: “Tata Abraham. Ma quichaha ra. Soco tatu yóo cha nandoto, ta cahun cucahan chihin ra, yucuan ta tyasoho ra ta nasama ra cuhva iyó ra”, catyí ra cuan. ³¹ Soco ra Abraham catyí ra: “Tatu ña cuñi ra quichaha ra tuhun tyaq ra Moisés ta tuhun cha tyaq ra profeta Nyoo ta cha naha, ma chino iñi ra tuhun cahan noo ndiyi tatu nandoto ra ta cahan ra chihin ra.”

17

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha (Mt. 18.6-7, 21-22; Mr. 9.42)

¹ Tyehe caa catyí ra Jesús chi ra cachicá noo chihin ra:

—Tyicuan ri iyó cha quiñi caa cha sativí chi ñáyivi. Soco ndahvi ra ndahvi ra sativí chi ñáyivi. ² Vaha taxin ca cuñi ra noo yuu sucun ra. Ta cutuchi ra chi ra nu tyañuhu. Coto sativí ra chi ñu ni nasama cuhva iyó ihya.

³ Saha ndo cuenda chi ndo. Tatu noo ra tahan ndo ta sacuvi ra noo cha ña vaha chihin ndo. Çatyí ndo chi ra vatyí ña vaha cha sacuvi ra. Tatu nasama ra cuhva iyó ra, saha ndo tucahnu iñi chi ra. ⁴ Ta ni ri maa sacuvi ra cha ña vaha chihin ndo ucha tahan chaha cha noo quívi. Tatu ndi ucha tahan chaha ta catyí ra chi ndo vatyí ndu uvi iñi ra cha sacuvi ra chi ndo, ndi ucha tahan chaha saha ndo tucahnu iñi chi ra.

Nu sañahá ra Jesús chi yo vatyí tatu chinó iñi yo chi ra, cuví sacuvi yo cuaha cha vaha

⁵ Tyicuan ta quichaha catyí ra cachicá tyiño nuu ra Jesús chi ra:

—Çuhva cha chinó ca iñi ndi chuun —catyí ra.

⁶ Tyicuan ta catyí ra Jesús chi ra:

—Tatu chinó iñi ndo chi yuhu vasi chihin ri tari cuhva noo chiti mostaza luhlu, cuví catyí ndo chi yutun sicómoro cha nanyaá ihya nacoyo tun, ta cucuinanyaa tun nu tyañuhu. Ta cucuvi nu cahan ndo —catyí ra Jesús.

Yoso caa tahán chi quichaha yo chi Nyoo

⁷ Ta catyí ra Jesús:

—Tatu noo nyoho ta iyó noo musu ndo. Ta nachaa ra cha chahan ra nu chiqui chi sahatyíño ra, o chi saha cumi ra quiñi sana ndo, çatu catyí ndo chi ra: “Çunyaa ta cahun?” Ña catyí ndo chi ra tyicuan caa. ⁸ Soco tyehe caa catyí ndo chi ra: “Sanduvaha cha cuxiñi. Ta tyihun cha cachi. Cha yaha cha cachi tyicuan ta cachi tucu maun”, catyí ndo chi ra. ⁹ Ni ña tuhvá ndo nacuhva ndo tyahvi nyoo chi ra vatyí sacuví ra ñáá noo tyiño tava ndo chi ra. ¹⁰ Tyicuan caa tucu nyoho chihin Nyoo. Quivi ndihi sacuvi ndo cha catyí Nyoo chi ndo, tahán chi catyí ndo: “Nyuhu chihin ri cha tachun chi ndi, yucuan ri sacuví ndi. Ta ña yaha ca.”

Nu sanduvahá ra Jesús chi uchi tahan ra tyahyu coño

¹¹ Ityi cuahan ra Jesús ityi ñuu Jerusalén yaha ra nu cuví xahñi Samaria chihin Galilea. ¹² Nu chaq ra noo ñuu, quiñi coyo uchi tahan ra cuví chihin cha tyahyu coño ra. Ta chicutayucu ra nyasava ri. ¹³ Ta quichaha cacanchaa ra chi ra Jesús, ta catyí ra:

—Yoho, Maestro Jesús, cundahvi cuñi chi ndi —catyí ra.

¹⁴ Tyicuan ta nanyehe ra Jesús chi ra ta catyí ra chi ra:

—Cuahan ndo. Ta cua sañaha ndo chi ndo chi tata sutu vatyí cha nduvahá ndo.

Tyicuan ta cuahan coyo ra cuan. Ta ityi cuahan coyo ra ta cananyehe ra vatyí nduvahá ra. ¹⁵ Tyicuan ta cuhva cha nanyehe noo ra cuan vatyí nduvahá ra, cuanuhu chata ra nu nyaá ra Jesús. Ta cana chaa ra, ta sacahnu ra chi Nyoo. ¹⁶ Ta chicutiñi chiti ra. Ta nacañi noo ra xiñi ra nya nu ñuhu nuu ra Jesús. Ta nacuhva ra tyahvi nyoo chi ra. Ta ra cuan, ra Samaria cuví ra.

¹⁷ Tyicuan ta catyí ra Jesús chi ra:

—¿Atu ñima uchi tahan ndo nduvahá? ¿Nya nyaá inga iin tahan ca ra?

¹⁸ ¿Ñáá tuhun cha noo tuhun ri maa ra inga ñuu nandichi chata ra ta sacahnu ra chi Nyoo? —catyí ra Jesús.

¹⁹ Tyicuan ta quichaha catyí ra chi ra cuan:

—Nducuíta ta cuahan. Nduvahun vatyí chinó iñun —catyí ra Jesús chi ra.

Yoso caa quichichi Nyoo cunyaca ñaha ra nu iyó yo ihya

(Mt. 24.23-28, 36-41)

²⁰ Candacá tuhun ra fariseo chi ra Jesús, ta catyí ra:

—¿Ama quichi Nyoo cunyaca ñaha ra?

Tyicuan ta ra Jesús quichaha catyí ra:

—Cha cunyaca ñaha Nyoo ihya siqui ñuhu ñáyivi, ñima cha nyehé yo cuví. ²¹ Ma cuví catyí ñáyivi: “Ma ra nyaá ihya, o ma ra nyaá

ityi cuan.” Vatyí Nyoo cha chaḡ ra mahñu ndo, ta nyacá ñaha ra añima ñáyivi cuenda ra —catyí ra chí ra.

²² Yahḡ cuan ta catyí ra chí ra cachicá noo chihin ra:

—Cuchaa chí quívi vatyí cucuñi ndo nyehe ndo chí yuhu Rayii cha quichí nya gloria. Soco ma nyehe ndo chíi. ²³ Cuchaa tucu chí quívi ta cucatyí ñáyivi chí ndo: “Ihya nyaá ra”, o “Yucuan nyaá ra.” Soco ma cahun ndo cunyehe ndo. Ta ma cunyicon ndo chí ra cuan vatyí ñime cuví. ²⁴ Vatyí tandihí ñáyivi cunyehe chí yuhu Rayii cha quichí nya gloria quívi quichi inga chaha. Tari nyehé tandihí ñáyivi nu quihví tacha ñicahnu andívi, tyicuan caa cucuví. ²⁵ Soco cunyehe xihne tundoho. Vatyí ñáyivi cha iyó cha vityin cua cutasi cuñi nyehe ñu chíi. ²⁶ Tari cuví quívi ra Noé, tyicuan caa cucuví quívi quichí yuhu Rayii cha quichí nya gloria inga chaha. ²⁷ Quívi ra Noé, chachí ñu. Chihí ñu. Tandahá ñu. Ta chahá ñu sehe ñu tandaha. Nya quívi quihví ra Noé chichi barcu ra, ta coon savi xaan. Ta tandihí ñu cachihí ñu. ²⁸ Tyicuan caa tucu cuví quívi ra Lot. Chachí ñu. Chihí ñu. Satá ñu. Xicó ñu. Tachí ñu. Ta savahá ñu vehe ñu. ²⁹ Soco quívi cha quita ra Lot ñuu Sodoma cuan, coḡ ñuhu chihin azufre andívi. Ta chíhí tandihí ñáyivi Sodoma. ³⁰ Ta tyicuan caa cucuví quívi cha quichí tucu yuhu Rayii cha quichí nya gloria inga chaha.

³¹ “Ta quívi cuan tatu nyicó ndo nuquehe ndo, ma ndihví ndo chíhí vehe ndo vatyí tava ndo ndaha tyiño ndo. O tatu chicá noo ndo nu chiquí, ma cunuhu ndo nya vehe ndo. ³² Ñicohon iñi ndo ñasihí ra Lot, ñáa cha cuví chí ña. ³³ Tandihí ndo cha cuñi ca ndo cha iyó siqui ñuhu ñáyivi ihya, cucunaa ndo. Ta tandihí ndo cha ña quichaha ndo cha iyó ñáyivi ihya, cucacu ndo.

³⁴ “Ta catyí chí ndo vatyí cha cuaa cuan uvi tahan ra cucava noo nu chito. Noo ri ra cunaquehin. Ta nonga ra cundoo ra. ³⁵ Ta uvi tahan ñusihí iin ri cu nyicó ñu quívi cuan. Noo ri ña, cunaquehin. Ta nonga ña cundoo ña. ³⁶ Ta catyí chí ndo vatyí uvi tahan ra cohon nu chiquí. Noo ra cunaquehin, ta nonga ra cundoo ra —catyí ra Jesús.

³⁷ Cuhva cha chíñi ñu tuhun ihya, quichaha ndaca tuhun ñu chí ra Jesús.

—¿Nya maa maa cucuví ihya Tata? —catyí ñu.

Tyicuan ta nacahan ra Jesús ta catyí ra:

—Nu catuví coño ñuhu chíhí, yucuan cundu iin ri chíi.

18

Nu sañahá ra Jesús vatyí tari chicán noo ñaha chíhí yí chí juez, tyicuan caa tahán chí cacan yo chí Nyoo

¹ Tyicuan ta chahḡ ra Jesús noo cuhva ihya. Vatyí na cacan tahvi ñu tyicuan ri maa, ta ma cundihñi ñu. ² Ta catyí ra:

—Iyó noo ñuu cha nyaá noo juez. Ta juez cuan ña sahá maa ra ñáyivi chí Nyoo. Ta ni ri ña quichaha maa ra chí ñáyivi. ³ Ta suri ñuu cuan iyó tucu noo ñaha ndahvi cha chíhí yí. Ta chahan ña chicahan ña chihin ra, vatyí chicá ña cuatyí chaha noo ra xaan iñi chí ña. ⁴ Ta juez cuan ña quichahḡ maa ra chí ña. Ña sandaḡ maa ra tyiño chicá ña. Ta cha naha xaan chicán ña. Tyicuan ta quichaha ndichi xiñi juez cuan: “Vasi ña yuhví chí Nyoo, ta ñahri cuende chí ñáyivi, ⁵ soco ñaha ihya sayangá xaan ña chíi. Ta yucuan chaha cua sacaquí chí ña. Vatyí coto quichí ca ña, ta sanaquiquí ña tisihi”, ndichi xiñi ra.

⁶ Tyicuan ta catyí ra Jesús:

—Tyicuan caa catyí juez ña vaha cuan. Tu juez cuan cha quiñi iyó ra ta tyinyee ra chí ñaha ndahvi cuan, ⁷ ta nyaca cuví Nyoo, zatu ma tyinyee ra chí ñáyivi cha chicán ndiyaca ta ndiquívi chí ra? ¿Atu cuatu xaan ra cha tyinyee ra chí ñu? ⁸ Catyí chí ndo, vatyí numi ri cutyinyee ra chí ñu. Soco quívi quichí yuhu, Rayii cha quichí nya gloria, inga chaha, chitó Nyoo tatu ñahíhi que chí ñu cha ndicha chinó iñi chíi —catyí ra Jesús.

Noo cuhva cuenda ra tavá xuhun cuenda gobiernu ñuu Roma ta cuenda ra fariseo

⁹ Tyicuan ta chahḡ ra Jesús nonga cuhva cuenda ra savahá chíi, ta ña cuñi nyehe ra chí inga ra. Ta quichaha catyí ra:

¹⁰ —Iyó uvi tahan ra chahan chíhí vehe ñuhu chicaoḡ tahvi ra chí Nyoo. Noo ra cuan ra fariseo cuví ra. Ta inga ra cuan ra tavá xuhun cuenda gobiernu ñuu Roma cuví ra. ¹¹ Ta ra fariseo cuan chicuinyaa ra, ta quichaha cahan ra chihin Nyoo. Ta cahnu saha ra chí ra. Ta catyí ra: “Sutu Mañi yuhu, nacuhve tyahvi nyoo chuun vatyí yuhu ñima tari inga ñáyivi cuví. Vatyí suhu ñu. Quiñi iyó ñu. Iyó ñasihí ra ta iyó inga ñusihí chí ra. Ta ni ri ñima tari ra tavá xuhun cuan cuví. ¹² Vaha ca quichahí tuhun maun ta ñima ca inga ñáyivi. Vatyí uvi chaha cha noo vitya ña chachí. Ta चाहí uchi siqui noo noo cientu cha sahá ganai chuun”, catyí ra. ¹³ Soco ra tavá xuhun cuenda gobiernu Roma cuan cha cañi ri chiin nyaá ra. Ta ña caña iñi ra nanyehé ndaa ra. Ta cañi ra ndaha ra añima ra vatyí ndu uvi iñi ra cuatyí ra. Ta catyí ra: “Sutu Mañi yuhu. Nyehe ndahvi chíi vatyí iyó xaan cuatyí”, catyí ra —catyí ra Jesús.

¹⁴ Ta catyí tucu ra Jesús tyehé caa:

—Catyí chí ndo vatyí Nyoo sahá ra tucanhu iñi chí ra tavá xuhun cuan. Sanaḡ Nyoo cuatyí ra ta cuanuhu ra nya vehe ra. Soco ra fariseo cuan, ñahri tucanhu iñi ñihí ra, vatyí yóo ñáyivi cha savahá xaan chí

nuu Nyoo, cusanocuee Nyoo chi ñu, ta ñu sanocuee chi, Nyoo cusanducahnu ra chi ñu —catyí ra Jesús.

Nu nasocó ra Jesús chi ra cuatyaa
(Mt. 19.13-15; Mr. 10.13-16)

¹⁵ Tyicuan ta quichi nyaca ñáyivi chi ra cuatyaa chi ra Jesús vatyi na tyiso ra ndaha ra xiñi ndotyin. Soco cuhva cha nanyehé ra cachicá noo chihin ra vatyi tyicuan caa, ña chaha ca ra. ¹⁶ Tyicuan ta cana ra Jesús chi ra cachicá noo chihin ra, ta catyí ra chi ra:

—Saña ndo chi ra cuatyaa na quichi maa ndotyin nu nyai. Ta ma casi ndo, vatyi ñu nyacá ñaha Nyoo aña, cuví ñu tari ra cuatyaa ihya. ¹⁷ Ta catyí chi ndo vatyi tatu ña ita iñi ndo chi Nyoo, tari noo ra cuatyaa ita iñi ndotyin chi sutu ndotyin, ma cuví quihvi ndo nu nyacá ñaha Nyoo.

Nu chahá ra Jesús tuhun vatyi yíi xaan nacuhva cuenda noo ra tyayii chi ra chi Nyoo
(Mt. 19.16-30; Mr. 10.17-31)

¹⁸ Tyicuan ta noo ra cha cuví nuu cuenda vehe ñuhu ndacá tuhun ra chi ra Jesús, ta catyí ra:

—Maestro, ra vaha cuvún. ¿Yoso caa cunyacuví ta ñihi ñáyivi cha ma naa ca maa coi? —catyí ra.

¹⁹ Tyicuan ta catyí ra Jesús chi ra:

—¿Ñáa tuhun catyún vatyi ra vaha cuví? Noo ri maa Nyoo cuví ra ra vaha. (Ta cha catyún tyi vahi, nacotón tyi Nyoo cuví.)

²⁰ Yoho chitón tandihi tuhun cha tachí Nyoo tyí sacuvi yo: “Cha ma coo inga ñusihí chuun. Ma cahñun chi ñáyivi. Ma suhun. Ma cahun cuendu siqui ñáyivi. Ta sañun ñáyivi chi sutun ta chí sihun” —catyí ra Jesús.

²¹ Tyicuan ta ra cuan catyí ra:

—Tandihí ihya ta quichahí nyata luhli ta nyacua nua vityin —catyí ra.

²² Nu chihí ra Jesús cha catyí ra cuan, tyicuan ta catyí ra chi ra:

—Soco cumañi sacuvun nonga cha sacuvun. Xico tandihí cha iyó chuun. Ta cuhva chí ñu ndahvi. Ta quichun chate. Tyicuan ta coo cha tyayii chuun nya gloria —catyí ra.

²³ Soco ra cuan nu chihí ra tuhun cuan, nducuihya xaan iñi ra, vatyi tyayii xaan ra. ²⁴ Cha nanyehé ra Jesús vatyi nducuihya iñi ra, ta quichaha catyí ra:

—Yii xaan ta cuví nacuhva cuenda ñu tyayii chí ñu na cunyaca ñaha Nyoo aña ñu.

²⁵ Tañi tyehé yaha noo camello xiu noo yiqui ticu, ta ñima ca cha quihvi noo ñu tyayii nu nyacá ñaha Nyoo —catyí ra.

²⁶ Ta ñu cha cachihí tuhun ihya catyí ñu:

—Tatu tyicuan caa, ¿yóó cha cuví cacu vii? —catyí ñu.

²⁷ Tyicuan ta ra Jesús catyí ra:

—Tandihí cha ña cuví sacuvi rayii, Nyoo cuví sacuvi ra —catyí ra.

²⁸ Tyicuan ta ra Pedro catyí ra:

—Sutu Mañi yuhu, nyuhu tandihí maa cha iyó chí ndi sandoo ndi, ta nyicón ndi chuun —catyí ra.

²⁹ Tyicuan ta catyí ra Jesús chi ra:

—Cha ndicha catyí chí ndo. Vatyi tandihí ndo cha sandoo ndo vehe ndo, o ñasihi ndo, o yañi ndo, o sutu ndo, o sehe ndo cha catyí cha chaha ndo cha cunyaca ñaha Nyoo aña ñu, ³⁰ cuaha xaan cha vaha cunañihí ndo ihya ñáyivi ta cunañihí ndo inga ñáyivi cha ma naa ca maa —catyí ra Jesús.

Inga chaha sacotó ra Jesús yoso caa cucahñi ñáyivi chí ra

(Mt. 20.17-19; Mr. 10.32-34)

³¹ Ta cana siin ra Jesús chí ndi uchi uvi ra cachicá noo chihin ra, ta catyí ra chi ra:

—Vityin cahun yo nya Jerusalén. Vatyi yucuan cuchino cava tandihí tuhun cha tyaa ra profeta Nyoo ta cha naha. Vatyi yuhu Rayii cha quichí nya gloria cuví. ³² Vatyi cucuhva cuenda ra chí chí ra inga ñuu, ra cha ñima ra ñuu Israel cuví. Ta cucuacu nyaa ra chí. Ta cucahan ra chí. Ta cutyicusii ra nuí. ³³ Ta cucañi ra chí, ta cucahñi ra chí, soco nu cu uñi quivi ta cunandote —catyí ra Jesús.

³⁴ Ta ra cachicá noo chihin ra ña cutuñi iñi ra tuhun cuan ni ña cachitó ra ñáa tuhun cahán ra Jesús chihin ra. Vatyi ña chaha Nyoo vatyi cacutuñi iñi ra.

Nu sananyehé ra Jesús chi noo ra cuaa ñuu Jericó

(Mt. 20.29-34; Mr. 10.46-52)

³⁵ Cuhva cha cua chaa ra Jesús ñuu Jericó. Ta yuhu ityi cuan nyaá noo ra cuaa. Ta chicán ra limuxtan. ³⁶ Tyicuan ta chihí ra vatyi cuaha xaan ñáyivi cua yaha. Ta ndaca tuhun ra ñáa cha cuví cuan. ³⁷ Ta ñáyivi nacatyí ñu chí ra vatyi ra Jesús, ra ñuu Nazaret, ican cua yaha cuan. ³⁸ Tyicuan ta quichaha cana chaa ra:

—¡Yoho Jesús, ra vachi tata rey David! ¡Cundahvi cuñi nyehun chí! —catyí ra.

³⁹ Ta ra cha cuahan coyo ityi nuu cuan, quichaha cacatyí ra chí ra, nacasí ra yuhu ra. Soco chaa ca caná chaa ra, ta catyí ra:

—¡Yoho, ra vachi tata ra David! ¡Cundahvi cuñi nyehun chí! —catyí ra.

⁴⁰ Tyicuan ta chicuñi ra Jesús yucuan. Ta tachí ra tyiño na cuquehen chí ra cuaa cuan. Ta cuhva cha chaá ra cuaa cuan nu nanyaá ra Jesús, ta ra Jesús quichaha ndaca tuhun ra chí ra, ta catyí ra:

⁴¹ —¿Ñáa cha cuñun vatyi sacuvi chuun?

Tyicuan ta ra cuaa cuan nacahan ra, ta catyí ra:

—Sutu Mañi yuhu, cuñi nanyehi —catyí ra.

⁴² Tyicuan ta catyí ra Jesús chí ra:

—Nanyehe. Cha nduvaha chiti nuun, vatyí chinó iñun chii—catyí ra.

⁴³ Ta caa cuhva ri cuan, ra cuaa cuan nanyehe ra. Ta cuahan ra chata ra Jesús. Ta sacahnú ra chi Nyoo. Ta tandihi ñáyivi cha nyehe ñu tyicuan caa, sacahnú ñu chi Nyoo.

19

Nu cuahan ra Jesús vehe ra Zaqueo

¹ Yucuan ta quihvi ra Jesús ñuu Jericó cuan. Ta cua yaha ra chichi ñuu cuan. ² Ta yucuan iyó noo ra tyayí vavaha. Nañi ra Zaqueo. Ta ra cuví nuu cuenda ra catava xuhun cuenda gobiernu ñuu Roma cuví ra. ³ Ta cuñi xaan ra cohon nuu ra chi ra Jesús. Ta ña cuví nyehe ra chi ra vatyí cuaha xaan ñáyivi. Ta maa ra tyaha xaan ra. ⁴ Yucuan ta chino vavaha ra cuahan ra ityi nuu, ta ndaa ra nu noo yutun cha nañi sicómoro cha nanyaá yuhu ityi nu cua yaha ra Jesús, tacuhva cuví nyehe ra chi ra. ⁵ Ta cuhva cha yaha ra Jesús nanyehé ndaa ra ityi siqui ta nanyehe ra chi ra Zaqueo. Ta quichaha catyí ra chi ra:

—Zaqueo, sanumi ta noñun nu yutun chiña. Vatyí vityin cuhin vehun —catyí ra chi ra.

⁶ Tyicuan ta numi ri noq ra Zaqueo nuu yutun cuan. Ta sii vavaha cuví chi ra. Ta quehen cuenda ra chi ra Jesús. Ta cuahan ra chihin ra nya vehe ra. ⁷ Ta cha nyehe ñáyivi cha tyicuan caa, ta tandihi ñu quichaha cahán nyaa ñu chi ra Jesús. Ta catyí ñu vatyí ndog ra vehe noo ra iyó cuatyí. ⁸ Nu canyicú ra chichi vehe cuan, ra Zaqueo nicuinanyaa ra. Ta quichaha catyí ra chi ra Jesús:

—Sutu Mañi yuhu, yuhu cua cuhve sava cha iyó chii chi ñu ndahvi. O tatu suhi chí ñáyivi chihin cha sandavi ñahi chí ñu, vityin cunacuhva cuende nya cumi ca tahan chaha chí ñu —catyí ra chi ra.

⁹ Tyicuan ta catyí ra Jesús:

—Vityin cacu añimon, ta ñáyivi chí ra Abraham cuvún. Vatyí nacuhva cuendon chuun chí Nyoo tari nacuhva cuenda ra Abraham chí ra chí Nyoo. ¹⁰ Vatyí yuhu Rayí cha quichí nya gloria vachi nanduqui ta vachi sacaqui chí ñáyivi cha cua naa —catyí ra Jesús.

Nu sañahá ra Jesús na saha tyiño yo chihin cha chahá Nyoo chí yo
(Mt. 25.14-30)

¹¹ Ta cha ni ri ca cha chihí ñáyivi tuhun cahán ra Jesús, quichaha cahan tucu ra inga cuhva ihya. Vatyí cha cuyatyin chaa ra Jerusalén. Ta ñáyivi cuñi maa ñu vatyí cha cua quichaha ra cunyaca ñaha ra yucuan. ¹² Tyicuan ta catyí ra:

—Chiyo noo ra vaha ta cuñi cuhun ra noo ñuu cañi. Vatyí yucuan cunanduvi ra rey tacuhva vatyí ndichi ra ñuu ra, soco cha

cuví ra rey. ¹³ Ta cuhva cha cumañi cuhun ra, cana ra chi uchi tahan musu ra. Ta chaha cuenda ra noo xuhun chi noo noo ra. Ta catyí ra chi ra: “Saha tyiño ndo chihin xuhun chiña nyacua nya ndichi mai”, catyí ra. ¹⁴ Soco suhva ñáyivi ñuu ra, tasi cuñi ñu nyehe ñu chi ra ta ña cuñi ñu cha cuví ra rey chí ñu. Ta tachí ñu chí suhva ra cuhun chata ra, vatyí catyí ra vatyí ña cuñi ñu cha cuví ra rey chí ñu. ¹⁵ Soco ra cuan nduví ra rey. Tyicuan ta nachaa ra nya ñuu ra. Ta quivi cha nachaa ra, cana ra chí musu ra, ra cha sandoq ra xuhun chii. Vatyí coto ra yoso saha ganaa xuhun ra cha ni ri ca cha chahan ra. ¹⁶ Ta chaa noo ra cuan. Ta catyí ra: “Tata, saha ganai uchi ca tahan chaha siqui xuhun cha sandoñ chii”, catyí ra. ¹⁷ Tyicuan ta quichaha catyí rey cuan chí ra: “Vaha xaan. Yoho vaha musu cuvún. Vatyí vaha saha tyiñon chihin chihin xuhun cha chahí chuun. Ta vityin cunyaca ñahun uchi tahan ñuu”, catyí rey cuan chí ra. ¹⁸ Tyicuan ta chaa tucu inga ra cha chaha ra xuhun chii. Ta quichaha catyí ra: “Ma xuhun ihya. Saha ganai ohon tahan ca chaha siqui xuhun cha sandoñ chii”, catyí ra. ¹⁹ Tyicuan ta catyí rey chí ra: “Yoho cunyaca ñahun ohon tahan ñuu”, catyí ra. ²⁰ Tyicuan ta chaa tucu inga ra cuan. Ta quichaha catyí ra: “Ma xuhun ihya cha chahun chii. Yuhu chicumí vahi chichi noo pañitu. ²¹ Vatyí yuhvi xain chuun, vatyí yoho cuvún noo ra xaan. Vatyí naquehun cha ñima chuun cuví. Ta naquehun tyiño saha inga ñáyivi”, catyí ra cuan. ²² Tyicuan ta rey cuan catyí ra chí ra: “Yoho musu ña vaha cuvún. Vityin suri chihin tuhun cha catyun chii, cucatyí tucu yuhu chuun. Tatu chitón vatyí yuhu, xain, ta chitón vatyí naquehin cha ñima chii cuví, ta naquehin cha ña saha tyiño, ²³ ¿ñáá tuhun ña chahun ta chityihun xuhin banco vatyí nachai soco cha nducuaa ca xuhin?” catyí rey cuan. ²⁴ Ta quichaha catyí ra chí ra canyicú cuan: “Tinya ndo xuhun cha chahí chí ra, ta cuhva ndo chí ra cha saha ganaa uchi ca tahan cuan”, catyí ra. ²⁵ Tyicuan ta quichaha catyí ra chí rey cuan: “Tata, soco ra cuan, cha iyó uchi tahan chí ra”, catyí ra. ²⁶ Tyicuan ta rey cuan catyí ra: “Soco catyí yuhu chí ndo. Vatyí ra cha vaha ca sahá tyiño chihin cha chahí chí, cucuhva que chí ra. Ta ra cha chahí chiin ri, ta ña cuñi ra sahá tyiño ra chihin cuan, cutinyaa ndihi chí ra. ²⁷ Ta tandihi ñu xaan iñi chii, ñu ña cuñi vatyí cunyaca ñahi chí ñu, nyaca ndo chí ñu tyehe vatyí cahí ndo chí ñu nuí”, catyí rey cuan —catyí ra Jesús.

Nu cua chaa ra Jesús Jerusalén

(Mt. 21.1-11; Mr. 11.1-11; Jn. 12.12-19)

²⁸ Cha yaha cahan ra Jesús cuhva cuan, ta sañihi ra cuahan ra ityi Jerusalén. ²⁹ Yucuan

ta cua chaa ra ñuu Betfagé chihin ñuu Betania, yatyin ri noo yucu cha nañi Olivo, vatyí maa maa ri maa tun Olivo iyó yucuan. Ta tava ra tyiño chi uvi tahan ra cachicá noo chihin ra. ³⁰ Ta catyí ra chi ra:

—Cuahan ndo ñuu cha nyaá yatyin ri cuan. Ta yucuan cunañihi ndo noo burru luhlu, quití ta coto ca tyayu, nuñhi ti. Ndáchi ndo chi ti. Ta nyaça ndo chi ti tyehe. ³¹ Tatu yóo cha catyí chi ndo: “¿Ñáá tuhun cha ndachi ndo chi ti?” catyí ndo chi ñu: “Vatyí chiñuhú ti chi maa ra nyaca ñaha chi yo.”

³² Tyicuan ta ra cachicá noo chihin ra, cuahan coyo ra. Ta nañihi ra chi ti tari cuhva catyí maa ra Jesús. ³³ Ta cuhva cha candachi ra chi ti, chaç coyo chitoho ti. Ta candaca tuhun ra chi ra:

—¿Ñáá tuhun cha ndachi ndo chi burru chiña? —catyí ra.

³⁴ Tyicuan ta canacahan ra cuan ta cacatyí ra:

—Ndachí ndi chi ti vatyí chiñuhú ti chi maa ra nyacá ñaha —catyí ra.

³⁵ Tyicuan ta quehen ra chi ti. Ta chinyacá ra chi ti nu nyaá ra Jesús. Ta tyisó ra sahma ra siqui ti. Tyicuan ta casandaç ra chi ra Jesús siqui ti. ³⁶ Tyicuan ta cuahan ra Jesús. Ta cuaha vavaha ñáyivi cachacun ñu sahma ñu ityi nu cua yaha ra, yosó ra burru cuan. ³⁷ Tyicuan ta cha cua cuyatyin tandihi ñu chihin ra Jesús nu iñi noo yucu Olivo cuan. Ta quichaha cana chaa tandihi ñu chinó iñi chi ra chihin cha sii cuví chi ñu. Ta sacahnú ñu chi Nyoo vatyí cuaha xaan cha vaha nyehe ñu cha sacuvj ra. ³⁸ Yucuan chaha catyí ñu:

—¡Na sacahnu yo chi Rey ihya vatyí vachi ra chihin sivi Nyoo! ¡Na coo cha taxi ri andivi! ¡Ta na sacahnu yo chi Nyoo! —catyí ñu.

³⁹ Tyicuan ta suhva ra fariseo cha cuahan coyo chihin ñáyivi cuan quichaha cacatyí ra:

—Maestro, sacutaxin chi ñu nyicón chuun —cacatyí ra.

⁴⁰ Nacahan ra Jesús ta catyí ra:

—Tatu ñáyivi ihya ta cu taxin ñu, nyacua nya yuu ta nacana chaa chi, ta sacahnu chi chii —catyí ra Jesús.

⁴¹ Yucuan ta cha cua chaa ra yatyin ri Jerusalén cuan. Ta nanyehe ra Jesús chi ñuu cuan ta quichaha chacu chaa ra vatyí cuihya iñi ra. ⁴² Ta catyí ra:

—Tyehe ta chitó nyoho, ta cutuñi iñi ndo yoso caa cha vaha cha vachi nyaque chi ndo quivi ihya. Soco xehe xaan ñohó cha chiñi tuñi cuan, ta ña nañihí maa ndo. ⁴³ Soco cuhva quivi ña vaha vatyí ra xaan iñi chi ndo cutyihí chacu ra chi ndo. Vatyí tandihi ri ityi cuquichi coyo ra siqui ndo. Ta cucañi tahan ra chihin ndo. ⁴⁴ Ta cucacun ñuhú ra chi ndo ta cucañi ra chi ndo. Ta ni noo yuu

yoso nyitahan ta ma sandoo ra. Tyicuan caa cucuvi vatyí ña cuñi ndo nacoto ndo cha quichí Nyoo quichi sacacu ra chi ndo.

Nu tavá ñehe ra Jesús chi ra caxico chichi vehe ñuhu cahnu

(Mt. 21.12-17; Mr. 11.15-19; Jn. 2.13-22)

⁴⁵ Tyicuan ta ra Jesús quihvi ra chichi nuquehe vehe ñuhu cahnu. Ta quichaha tava ñehe ra tandihi ra caxicó ta casatá yucuan. ⁴⁶ Ta catyí ra chi ra:

—Nu tutu Nyoo catyí chi vatyí vehe Nyoo, nu chicán tahvi yo chi ra cuví. Soco nyoho sananduvj ndo vehe nu nyicú ra suhu —catyí ra.

⁴⁷ Ta tandihi quivi chahán ra Jesús chisañaha ra chi ñáyivi chichi vehe ñuhu cuan. Soco ra cacuvi nuu chi tata sutu, ta ra casacuahá cuenda ley vehe ñuhu, ta ra cacuvi nuu chi ñuu cuan, canducú ra cuhva yoso caa ta cahñi ra chi ra. ⁴⁸ Soco ña ñihí maa ra cuhva yoso caa sacuvi ra. Vatyí tandihi ñáyivi ta vaha tyasohó ñu tuhun cahán ra Jesús.

20

Nu ndaca tuhun ra fariseo chi ra Jesús yóo cha tachí chi ra vatyí cahán ra nuu ñáyivi
(Mt. 21.23-27; Mr. 11.27-33)

¹ Noo quivi cuan cha ni ri ca cha sañahá ra Jesús chi ñáyivi chichi vehe ñuhu cahnu, ta cahán ra tuhun yoso caa sacacú Nyoo chi ñu. Ta chaç coyo ra cuví nuu chi tata sutu chihin ra casacuahá cuenda ley vehe ñuhu, ñin ri chihin ra cacuvi mandoñi. ² Ta cacatyí ra chi ra:

—Catyí chi ndi çyóo cha tyaa tyiño chuun vatyí sacuvun tyehe caa? —catyí ra.

³ Tyicuan ta ra Jesús quichaha catyí ra chi ra:

—Yuhu tucu cua ndaca tuhun noo tuhun chi ndo. ⁴ ¿Yóo cha tachí chi ra Juan vatyí sacondutya ra chi ñáyivi? ⁵ Atu Nyoo tachí chi ra, o ñáyivi?

⁵ Tyicuan ta cacatyí ra cuan chi ra tahan ra:

—Tatu catyí yo vatyí Nyoo tachí chi ra Juan cuan, cacatyí ra chi yo “Ñáá tuhun ña chinó iñi ndo tuhun cahán ra.” ⁶ Ta tatu catyí yo vatyí ñáyivi tachí chi ra, ñáyivi cahñi ñu chi yo chihin yuu. Vatyí tandihi ñu, ta cuñi ñu vatyí Nyoo tachí chi ra —cacatyí ra.

⁷ Tyicuan ta cacatyí ra chi ra Jesús vatyí ña cachitó ra yóo cha tachí chi ra Juan vatyí na sacondutya ra chi ñáyivi. ⁸ Tyicuan ta ra Jesús catyí ra chi ra:

—Ni ri yuhu, ta ma catyí chi ndo yóo cha tachí chii, cha sacuvi tyehe caa.

Nu sañahá ra Jesús vatyi tari ra sahá tyiño ña vaha tyicuan caa cuví ra cha cacahñi chi ra (Mt. 21.33-44; Mr. 12.1-11)

⁹ Tyicuan ta quichaha catyi ra Jesús noo cuhva ihya chi ñáyivi:

—Noo ra tachí ra cuaaha yoho tichaha ndivi nu ñuhú ra. Yahá cuan ta chahá noo ra ñuhú cuan chi suhva ra casaha tyiño. Tyicuan ta naha cuahan ra inga ñuu. ¹⁰ Ta chaá quivi cha iñi chiti cuan. Tyicuan ta tachí ra chi noo musu vatyi cuquehen ra suhva chiti cha tahán chi chi ra. Soco cacañi xaan ra casahá tyiño cuan chi musu cuan. Ta sacunuhu ra chi ra chihin nu ndaha nu ndi ra. ¹¹ Tyicuan ta chitoho yoho tichaha ndivi cuan tachí tucu ra chi inga musu. Suri cacañi xaan ra chi ra. Ta cacahan uhvi ra chi ra. Ta natachí ra chi ra. Soco suri ñahri cachaha ra cuiso ra cunuhu. ¹² Tyicuan ta chitoho cuan tachí tucu ra chi inga ra. Soco suri tyicuan caa chinyacuví tucu ra chihin ra. Ta sañicuehe ra chi ra. Ta tava ñehe ra chi ra yucuan.

¹³ Yahá cuan ta quichaha catyi chitoho ñuhu cuan: “¿Yoso caa cunyacuví vityin? Cua tachí chi sehi, ra cha cuñi vavahi. Ta cha nanyehe ra chi ra, vasi casaha ra ñáyivi chi ra, vatyi sehi cuví chi ra.” ¹⁴ Soco cuhva cha cananyehe ra casahá tyiño cuan chi ra, catyi ra chi ra tahan ra: “Ican ra ihya cundoo chihin ñuhú ihya tatu chihí sutu ra. Soco nacahñi yo chi ra. Vatyi ndoo maa yo chihin ñuhú ihya”, catyi ra. ¹⁵ Tyicuan ta tava ñehe ra chi sehe chitoho ñuhú cuan ityi chata chacu. Ta cacahñi ra chi ra —catyi ra Jesús.

Tyicuan ta catyi ra Jesús chi ñáyivi nyicú cuan:

—¿Ñáá cha cusacuví chitoho ñuhú cuan chi ra cacahñi chi sehe ra cha cuhva cha cuñi nyoho? ¹⁶ Catyi chi ndo vatyi quichi ra ta cahñi ra chi ra casahá tyiño cuan. Ta cuhva ra ñuhú cuan chi inga ra —catyi ra Jesús.

Ta cuhva cha chiñi ñáyivi tuhun cuan, yuhví xaan ñu cuví. Ta quichaha catyi ñu:

—¿Ña cuñi Nyoo ta cuví tyicuan caa! —catyi ñu.

¹⁷ Soco ra Jesús nanyehe ra chi ñu ta catyi ra:

—Tyicuan caa cucuvi. Vatyi nyaá nu tutu Nyoo ta catyi chi tuhun tyehé caa:

Yuu cha ña cuñi ra casavahá vehe cotyiño ra,

Ican cuan cuví yuu cha niñi ca.

¹⁸ Tari tahu nu noo ra cha canacava siqui yuu, tyicuan caa tiví ñu ña cuñi quichaha tuhun cahín. Ta siin ri, tari taxin nyihí noo ra cha canacava yuu siqui, tyicuan caa cunaa ñu ña cuñi quichaha tuhun cahín —catyi ra Jesús.

¹⁹ Ta ra cacuví nuu chi tata sutu ta ra casacuahá cuenda ley vehe ñuhu catuví iñi

ra vatyi tuhun cha catyi ra Jesús, chi maa ra nañi cuan. Ta cuñi ra catiin ra chi ra Jesús vatyi cacahñi ra chi ra. Soco ña cachitó maa ra yoso caa. Vatyi yuhví ra chi ñáyivi.

Tuhun cha tyiyahví ñu xuhun chí gobiernu ñuu Roma

(Mt. 22.15-22; Mr. 12.13-17)

²⁰ Tyicuan ta catachí ra chi suhva ra vatyi cunducu nyehe ra chi ra Jesús. Ta casahá ra tyi ra vaha cacuví ra. Vatyi coto ra ñáá noo tuhun ña vaha cahán ra Jesús tacuhva cuví catiin ra chi ra. Ta cuhva cuenda ra chi ra chí gobernador. ²¹ Yucuan chaha candaca tuhun ra casavaha chí cuan chi ra Jesús:

—Maestro, chitó ndi vatyi vaha tuhun cahún. Ta sañahún cha vaha chi ñáyivi. Ta ñima cuhva iyó ri ñu nyehun soco añima ñu ñandihí. Ta maa ri maa ityi Nyoo sañahún. ²² Catyi chi ndi çatu vaha cha tyiyahví yo cha chicán gobiernu ñuu Roma chí yo, o ña vaha? —catyi ra.

²³ Soco ra Jesús tuví iñi ra vatyi cuñi ra nducu nyehe ra chi ra. Ta catyi ra chí ra:

—¿Ñáá tuhun cuñi ndo nducu nyehe ndo chí? ²⁴ Sañaha ndo noo xuhun chiña chí, na nyehi. ¿Yóó chí nuu ta yóó chí sivi nyaá nu xuhun ihya? —catyi ra.

Tyicuan ta nacahan ra cuan, ta catyi ra:

—Nuu gobiernu, ta sivi ra ñandihí —catyi ra.

²⁵ Tyicuan ta catyi ra Jesús:

—Tu tyicuan caa, cuhva ndo xuhun chiña chí ra cuví gobiernu cuan vatyi chí maa ra tahán chí. Ta cuhva tucu ndo chí Nyoo cha tahán chí chí ra —catyi ra Jesús chí ra.

²⁶ Ta ña cuví maa sandahvi ñaha ra chí ra Jesús chihin tuhun cahán ra nuu ñáyivi. Ta iyo xaan cacuñi ra tuhun cha nacahan ra. Ta taxi ri cuví ra.

Nu cacuñi ra saduceo sandavi ñaha ra chí ra Jesús

(Mt. 22.23-33; Mr. 12.18-27)

²⁷ Cha yahá cuan ta chaá coyo suhva ra saduceo nu nyaá ra Jesús. Maa ra cuví ra casañahá vatyi ña nandotó ndiyi.

²⁸ Tyicuan ta catyi ra chí ra Jesús:

—Maestro, sandoo ra Moisés tuhun ihya vatyi tatu noo ra chíñi ra ta ndoo ñasihi ra, tatu yori sehe ra chíyo chíñi ña, tahán chí cha tandaha yañi ra chíñi ña tacuhva cha ma cunaa tata yañi ra. ²⁹ Soco cuñi ndi coto ndi vatyi chíyo ucha tahan ra chíñi yañi ra. Ta ra cha ñihi ca chicoo ñasihi ra, soco yori sehe ñu chíyo, ta chíñi ra. ³⁰ Tyicuan ta naquehen ra cha cu uví suri maa ña cuan. Ta yori tucu sehe ñu chíyo. Ta chíñi tucu ra cuan. ³¹ Ta suri tyicuan caa cuví chíñi ra cu uñi cuan. Ta suri tyicuan caa cuví chí ndi ucha ra. Ni noo ra ta yori sehe ra chíyo chíñi ña. ³² Ta nu ndihí tuhun chíñi ndihí maa ña. ³³ Ta cuñi ndi coto ndi yóó ra cuví

ñasihi chi ña chichi cha ndi ucha tahan ra cuan nu cunandoto ñu nuu Nyoo —cacatyí ra saduceo cuan.

³⁴ Tyicuan ta nacahan ra Jesús, ta catyí ra: —Ihya ñayivi, rayi ta ñusihi tandaha ñu. ³⁵ Soco ñu cha tahán chi nandoto inga ñayivi nu nyacá ñaha Nyoo, ña tandaha ca ñu ta ni ma cuhva ca ñu sehe ñu tandaha. ³⁶ Ta ñahri tuhun chihí iyó nyicuan. Soco cucuvi ñu tari ángel. Ta cuví ñu sehe Nyoo cha ndicha vaha vatyí nandoto ñu. ³⁷ Cha ndicha cuví vatyí ra Moisés nu sacoto ra tuhun cha cayu taca iñu cuan, yucuan sacoto ra chi yo vatyí ñu chihí nandoto ñu. Vatyí yucuan catyí ra vatyí Sutu Mañi yo Nyoo cuenda ra Abraham, ta Nyoo cuenda ra Isaac, ta Nyoo cuenda ra Jacob, cuví chi ra. ³⁸ Vatyí Nyoo ñima Nyoo cuenda ñáyivi chihí cuví ra. Nyoo cuenda ñu nyitó cuví ra. Vatyí cha cuenda Nyoo tandihí yo ta nyitó añima yo vasi chihí coño ñuhu yo —catyí ra Jesús.

³⁹ Tyicuan ta suhva ra casacuahá cuenda ley vehe ñuhu catyí ra:

—Vaha xaan nacahan Maestro —catyí ra. ⁴⁰ Yucuan ta ña caña ca maa iñi ra candaca tuhun ra ñáa ca tuhun chi ra Jesús.

Cristo vachi ra tata ra David, ta suri cuví tucu ra Sehe Nyoo

(Mt. 22.41-46; Mr. 12.35-37)

⁴¹ Tyicuan ta ndaca tuhun ra Jesús chi ñu: —¿Ñáa tuhun cha catyí ndo vatyí ra Cristo tata ra David vachi ra? ⁴²⁻⁴³ Vatyí suri maa ra David catyí ra nu libru Salmo tyehé caa: Cahán Suti Nyoo chihin Suti ra Cristo, ta catyí ra chi ra:

“Cunyaá chiyó vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

⁴⁴ ¿Yoso caa cha ra vachi tata ra David cuví chi ra Cristo, ta suri maa ra David catyí vatyí Sutu ra cuví chi ra Cristo? —catyí ra Jesús.

Nu catyí ra Jesús vatyí cuaha xaan cuatyí ra casacuahá cuenda ley vehe ñuhu iyó

(Mt. 23.1-36; Mr. 12.38-40; Lc. 11.37-54)

⁴⁵ Tandihí ñáyivi cachiñi ñu tuhun cahán ra Jesús chihin ra cachicá noo chihin ra nu catyí ra tyehé caa:

⁴⁶ —Saha ndo cuenda chi ndo chihin ra casacuahá ley vehe ñuhu. Tahán xaan iñi ra cuihno ra sahna cañi. Ta cuñi ra vatyí saha ndo ñáyivi chi ra nuyahvi ta cuhva ndo nocumi chi ra. Ta nanducú ra tyayu vaha cunyaá ra chichi vehe ñuhu ta nu cuahan ra vico. ⁴⁷ Ta naha chicán tahvi ra chi Nyoo nu tuvi, cha cuñi ra cha catyí ñáyivi tyi vaha ñáyivi cuví ra. Soco suri maa ra tinyaá ra vehe ñu ndahvi cha chihí yí vatyí ña cuví tyiyahvi ñu xuhun cha tavá ra siqui ñu. Yucuan chaha ñihi ca cutachi tuñi Nyoo chi ra —catyí ra Jesús.

21

Noo ofrenda cha chahá noo ñaha sihi cha chihí yí

(Mr. 12.41-44)

¹ Ta nyehe ra Jesús vatyí cuaha xaan ñu tyayí catyihí ra xuhun chichi caja cha nanyaá chichi vehe ñuhu cahnu. ² Ta nyehe tucu ra noo ñaha ndahvi cha chihí yí. Ta tyihí ña uvi tahan ri xuhun cuatyí. ³ Ta catyí ra Jesús:

—Cha ndicha catyí chi ndo vatyí nuu Nyoo cuaha ca tyihí ñaha ndahvi ihya ta ñima ca tandihí ñu tyayí cuan. ⁴ Vatyí cha ndoó ri siqui chi ñu catyihí ñu. Soco ñaha ihya tyihí ña tandihí cha iyó chi ña —catyí ra.

Nu catyí ra Jesús vatyí cucani ñáyivi vehe ñuhu cahnu

(Mt. 24.1-2; Mr. 13.1-2)

⁵ Tyicuan ta suhva ñu ndatuhún ñu tuhun vehe ñuhu cahnu cuan. Ta catyí ñu vatyí tyaqui xaan yuu. Tyaqui xaan tacaá cha chahá ñáyivi. Tyicuan ta quichaha catyí ra Jesús:

⁶ —Coo quivi ta tandihí cha nyehé ndo ihya cutani. Ni noo yuu ta ma coso ca siqui tahan. Vatyí cusanacoyo ra xaan iñi chi ndo.

Ñáa ndihí seña cha cucuvi cha ni cumañi ca naa ñayivi

(Mt. 24.3-28; Mr. 13.3-23)

⁷ Tyicuan ta quichaha candaca tuhun ra chi ra Jesús, ta catyí ra:

—Maestro, ¿ama cucuvi tandihí tuhun cahun ihya? ¿Yoso caa ta coto ndi tatu cha cuyatyin cha naa ñayivi? —cacatyí ra.

⁸ Tyicuan ta catyí ra Jesús:

—Saha vaha ndo cuenda, coto sandavi ñaha ra chi ndo. Vatyí cuaha xaan ra cuquichi, ta cucotyíño ra sivi, ta cucatyí ra: “Yuhu cuví Cristo ra cha saquichí Nyoo chí. Cha cuñi cunaa ñayivi”, cucatyí ra. Soco ma cunyicon ndo chí ra. Ta ma chino iñi ndo chí ra. ⁹ Ta quivi ñihi ndo tuhun tyi iyó cuatyí ta cañi tahan ñáyivi, ma nayuhvi ndo. Vatyí tandihí cuan cutahan chí cuví xihna ca. Soco cumañi ca chaa quivi cha naa ñayivi.

¹⁰ Ta catyí tucu ra:

—Ñáyivi iyó noo ñuu cucañi tahan ñu chihin ñáyivi inga ñuu. Ta cucoo cuatyí. ¹¹ Ta cutaan nahnu. Ta cucoo tama. Ta cucoo cuehe tandihí ri ityi. Ta cunyehe ñáyivi cuaha xaan cha yuhví andivi. Cuaha xaan seña nahnu cha ña tuhvá ñu nyehe cunyehe ñu. ¹² Soco cha cumañi ca cuví ihya, cutasi iñi ñáyivi chí ndo. Ta cucacan ñu cuatyí chaha ndo. Vatyí cucutuñi chí ndo ta cucuhva cuenda ñu chí ndo chí tata sutu. Ta cutyihí ñu chí ndo chichi vehe caa. Ta cunyaca ñu chí ndo nuu rey ta nuu ra cacuví

tyiño cha catyí yuhu. ¹³ Tyicuan ta cuvi cahan ndo tuhin chihin ñu. ¹⁴ Soco saha ndo cuenda ta ma caca xiñi ndo ñáá tuhun cunacahan ndo chihin ra cuví tyiño cuan. ¹⁵ Vatyí yuhu cucuhve tuhun cunacahan ndo. Ta cucuhve cha chifñi tuñi xiñi ndo. Vatyí ni noo ra xaan iñi chi ndo ta ma cuvi chasaha ra chi ndo chihin tuhun cahán ra. ¹⁶ Soco ñáyivi cunacuhva cuenda ñu chi ndo nuu ñu xaan iñi chi ndo. Nyacua nya sutu ndo ta sihi ndo, yañi ndo, tahan ndo, ta ra tahan ndo cunacuhva cuenda ra chi ndo chi ñu xaan iñi chi ndo. Ta yihí nyoho cucahñi ñu chi ndo. ¹⁷ Tandihí ñáyivi ta cutasi cuñi ñu nyehe ñu chi ndo cha catyí yuhu. ¹⁸ Soco ni noo ixi xiñi ndo ta ma cunaa. ¹⁹ Tatu ma ndu uvi iñi ndo chii, cucacu añaíma ndo.

²⁰ Quívi nyehe ndo vatyí nicachico yuhu ñuu Jerusalén ihya nyicú sindaro, coto ndo vatyí cha cuñi chaa quívi cha sanaa ra ñuu ihya. ²¹ Ta ñáyivi cha nyicú ityi Judea, na cono ñu ta na tixehe nuu ñu ityi yucu. Ta ñu nyicú ñuu Jerusalén ihya, na quita ñu. Ta ñu nyicú nu chiqui, ma ndichi ñu ñuu ihya. ²² Vatyí yucuan quívi cutachi tuñi Nyoo chi ñáyivi ñuu ihya. Vatyí cucuhino cava tandihí cuhva catyí maa nu tutu Nyoo. ²³ Ta ndahví ñusihi cha ñohó sehe quívi cuan. Ta ndahví ñu cha iyó cha lee sehe cha ni chaxín ca. Vatyí cuaha xaan tindoho cunyehe ñu ta tandihí ñáyivi. Vatyí cuxaan xaan Nyoo chihin ñáyivi ñuu Jerusalén ihya. ²⁴ Sindaro cucahñi ra chi suhva ñáyivi chihin mityi ra. Ta suhva ñu cutiñ ra chi cunaca ra chi ñu vehe caa inga ñuu. Ta ñáyivi cha ñima ñu Israel cuví, cucuaca chaha ñu Jerusalén nyacua nya quívi cha catyí maa Nyoo.

Yoso caa cuquichi Rayi cha quichi nya gloria inga chaha

(Mt. 24.29-35, 42-44; Mr. 13.24-37)

²⁵ Tyicuan ta cuaha cha iyo cunyehe ñáyivi nu ñanyii, ta nu yoo, ta nu tiño. Ta ihya siqui ñuhu ñáyivi cunayuhvi ñáyivi chihin cha iyo cunacatyin tyañuhu. ²⁶ Ta cucuñaa ñu chihin cha yuhví ñu cha chicá xiñi ñu ñáá ndihí cha cua cuví ihya siqui ñuhu ñáyivi. Vatyí nyacua nya cha iyó andívi cunacanda. ²⁷ Tyicuan ta cunyehe ñu chi yuhu Rayi cha quichi nya gloria vachi chichi noo vico tyaqui chihin tunyee iñi Nyoo, ta chihin cha cahnu cuví ra. ²⁸ Ta cuhva cha quichaha tuhun ihya, sanduní ndo iñi ndo ta cusí cuñi ndo vatyí numi xaan ta cucacu ndo —catyí ra.

²⁹ Tyicuan ta chahá ra Jesús noo cuhva ihya, ta catyí ra:

—Saha ndo cuenda noo yutun cha nañi higuera, o ñáá nonga yutun. ³⁰ Tatu cha cua cuyatyin cha coon savi cha nduyutya numa tun. ³¹ Ta tyicuan caa tucu nyoho, tatu cha nyehe ndo vatyí cha quichaha tandihí

tuhun cha catyí chi ndo, coto ndo vatyí cha cuyatyin quívi cha cunyaca ñaha Nyoo siqui ñuhu ñáyivi ihya.

³² Soco catyí chi ndo vatyí tuhun ihya cucuvi cha ni ri ca cha iyó ñáyivi. ³³ Ta coo quívi cucunaa andívi ta ñuhu ñáyivi, soco tuhun cahán yuhu, tyicuan ri cucuvi tari cuhva catyí.

³⁴ Ta saha ndo cuenda chi ndo coto ndundava añaíma ndo chihin vicio, ta coho xaan ndo ndixi, o caca xaan iñi ndo tuhun tundoho ñáyivi ihya. Ta coto sana iñi ndo ta chaa quívi quichi yuhu ta quichi tundoho siqui ndo. ³⁵ Vatyí tyicuan caa cucuvi chi tandihí ñáyivi iyó siqui ñuhu ñáyivi. Sana iñi ñu ta tari noo cha cua nacasi Nyoo nu ñohó ñu ta ma cuvi quita ñu. ³⁶ Soco nyoho cuatu tuhva ri ndo. Caçan tahvi ndo chi Nyoo tandihí quívi, tacuhva tyinyee ra chi ndo. Ta ma cunaa ndo quívi cuan, tacuhva cuvi chaa vaha ndo nuu yuhu Rayi cha quichi nya gloria —catyí ra Jesús.

³⁷ Ta cha ñucahñu sañahá ra Jesús chi tandihí ñáyivi chichi vehe ñuhu cahnu. Ta cha cha cuaa chahán ra yucu Olivo. ³⁸ Ta tandihí ñáyivi chaq coyo ñu chichi vehe ñuhu cahnu ndihí ñaha ri. Vatyí cuiñi ñu tuhun cahán ra.

22

Nu cuaxico ra Judas Iscariote chira Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

¹ Ta cha nyaña yatyin quívi cha coo vico pascua vico nu tuhva ñu chachi pan cha ñahri yuchan iya yihí chihin. ² Ta ra cacuví nuu chi tata sutu chihin ra casacuahá cuenda ley vehe ñuhu, nducú xaan ra cuhva yoso caa ta cacahñi ra chi ra Jesús. Soco cayuhví ra chi ñáyivi.

³ Tyicuan ta quihví cuihna chi ra Judas cha catyí ñáyivi Iscariote chi. Ta maa ra cuvi noo ra cha uchi uvi tahan ra cha nacachí ra Jesús. ⁴ Ta ra cuan, chahán ra chi cahan ra chihin ra cuví nuu chi tata sutu, ta chihin ra cuví nuu chi ra sahá cuenda vehe ñuhu cahnu. Ta candatuhun tahan ra yoso caa cunacuhva cuenda ra chi ra Jesús. ⁵ Ta ra cuan sii xaan cacuví chi ra. Ta tyaq ra cuhva vatyí cuhva ra xuhun chi ra Judas. ⁶ Ta ra Judas ndoo ra vaha. Ta quichaha nducu ra cuhva yoso caa cuhva cuenda ra chi ra Jesús chi tata sutu cuan, cuhva cha yori ñáyivi nyicú chihin ra.

Nu cuxiñi ra Jesús chihin ra cachicá noo chihin ra

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ta chaq quívi cha cuví vico nu chachi ñu pan cha ñahri yuchan iya yihí. Ta suri quívi cuan tuhvá ñu chahñi ñu noo mbee luhlu

cha vico pascua cuan. Vatyí cachi ñu chi ti.
 8 Ta ra Jesús tachí ra chi ra Pedro chíhin ra Juan, ta catyí ra chi ra:

—Cuñhan ndo cua sanduvaha ndo mbee cha cuxiñi yo—catyí ra.

9 Tyicuan ta quichaha ndaca tuhun ra chi ra:

—¿Nya cuñún cha sanduvaha ndi cha cuxiñi yo?—catyí ra.

10 Tyicuan ta catyí ra Jesús chi ra:

—Cuñhan ndo chichi ñuu. Ta yucuan cunañihi ndo chi noo ra nyisó noo quiyi ndutya. Ta cuñhan ndo chata ra nyacua nya nu quihvi ra chichi vehe. 11 Ta catyí ndo chi chitoho vehe cuan: “Ra Sacuaha, cuñi ra coto ra nya nyaá cuarto nu sanduvaha ra cha cuxiñi ra chíhin ra cachicá noo chíhin ra, vatyí casanducahnu ra vico pascua.” Tyicuan caa catyí ndo chi ra. 12 Tyicuan ta maa ra cuan cusañaha ra cuarto cahnu ityi siqui nu cu uvi piso chi ndo. Ta cha yahá nduvii. Ta yucuan sanduvaha ndo cha cuxiñi yo—catyí ra chi ra.

13 Tyicuan ta cuahan coyo ra. Ta nañihí ra tandihí tari cuhva catyí ra Jesús. Tyicuan ta casanduvahá ra cha cuxiñi ra cha vico pascua cuan.

14 Yucuan ta cha chaá cuhva cha cuxiñi ra Jesús ta tandihí apóstol ra, cachicunycu ra yuhu mesa. 15 Tyicuan ta ra Jesús quichaha catyí ra:

—Cuñi xain cuxiñi in caa ri chíhin ndo cuenda vico pascua ihya cha ni ri ca cha cumañi ca cunyehi tundoho ta cúvi. 16 Vatyí nya ri ca ihya cua cachi ta cucúvi. Yucuan ta cachi tiquí soco nya nu nyacá ñaha Nyoo—catyí ra.

17 Tyicuan ta quehen ra noo vasu vinu. Ta nacuhvá ra tyiyahvi nyoo chi Nyoo, ta sayahá ra chi tandihí ra nyicú chíhin ra. Ta quichaha catyí ra:

—Quehen ndo ihya. Ta cõho ndo suhva suhva. 18 Vatyí catyí chi ndo vatyí ma coho que vinu tichaha ndivi nyacua nya quichi cha nyacá ñaha Nyoo ñayivi ihya—catyí ra.

19 Ta yahá cuan ta quehen ra pan. Ta nacuhvá ra tyahvi nyoo chi Nyoo. Ta tahvi sava ra. Ta chahá ra chi ra cachicá noo chíhin ra. Ta quichaha catyí ra:

—Ican ihya cuví coñe. Vatyí cha catyí ndo ta cua cuhva cuende chíhi ta cúvi. Tyicuan ri nõcõhon iñi ndo chíhi ta cuxiñi ndo tyehe caa—catyí ra.

20 Ta cha yahá cuxiñi ra, tyicuan ta quehen tucu ra vaso vinu tichaha ndivi, ta quichaha catyí ra:

—Chíhin ihya natyihí tahan Nyoo tuhun chaa chíhin ndo vityin. Vatyí vinu cha yihí chichi vaso ihya, tari niñi cuví. Ta cha catyí nyoho ta cucatí niñi. Vatyí cucúvi cha catyí ndo.

21 Soco vityin, ra cha cua nacuhva cuenda chíhi chi ra xaan iñi chíhi, in ri yoso ndaha ra chíhin ndahi nu mesa ihya. 22 Vatyí yuhu Rayíi cha quichi nya gloria cua cuví chíhi tari cuhva cha nyaá maa tyi cuví chíhi. Soco indahvi ra ndahvi, ra cha cunacuhva cuenda chíhi!—catyí ra Jesús.

23 Tyicuan ta ra cachicá noo chíhin ra Jesús quichaha candaca tuhun ra chi tahan ra, nya ra cuví ra cua nacuhva cuenda chíhi ra xaan iñi chíhi ra.

Nu candatuhún ra cachicá noo chíhin ra Jesús yóo ra cahnu ca cuví

24 Yahá cuan ta quichaha candatuhun ra cachicá noo chíhin ra Jesús nya ra cahnu ca cuví. 25 Soco ra Jesús catyí ra:

—Chitó nyoho vatyí ra nyacá ñaha chi ñáyivi iyó siqui ñuhu ñayivi, ñihí xaan yosó ra siqui ñu. Ta cacuñi ra vatyí catyí ñayivi tyi tyinyee ra chí ñu. 26 Soco nyoho ña tahán chí sacuvi ndo tari sacuvi ra cuan. Vatyí tatu cuñi ndo cuví ndo ra cuví nuu, tahán chí sacuvi ndo tyiño nuu ñayivi. Vatyí tatu sacuvi ndo tyiño nuu ñayivi, ican ndo cuví ra cuví nuu. 27 Vatyí ihya siqui ñuhu ñayivi ra cuví nuu cuví ra cha ña sahá tyiño. Ta nyaá ra yuhu mesa ta musu ra sacuvi ra tyiño nuu ra. Soco yuhu ra cuví nuu cuví, ta sacuvi tyiño nuu ndo.

28 Soco nyoho tyicuan ri ndihí ndo chíhin, tandihí chaha cha nyehí tundoho. 29 Yucuan chaha, yuhu चाहí noo nu cunyaca ñaha ndo tari cha chahá Suti chíhi cha cunyaca ñahi. 30 Vatyí cucachi ndo cucoho ndo yuhu mesa chíhin nya nu nyacá ñahi. Ta yucuan cunyaa ndo nu tyayu tyaquí. Ta cunyaca ñaha ndo chi ndi uchi uvi tahan ityi ñayivi vachí tata ra Israel.

Catyí ra Jesús vatyí cua catyí ra Pedro vatyí ña ñohó nuu ra chí ra

(Mt. 26.31-35; Mr. 14.27-31; Jn. 13.36-38)

31 Tyicuan ta catyí ra Jesús chi ra Pedro:

—Nyehé vahun, yoho Simón. Vatyí cuihna, ra nañi Satanás, cha chican ra chí Nyoo na cuhva ra ityi chí ra vatyí quisi ñihno ra chi ndo tari naquisi ñihno yo trigu, tacuhva ndo uvi iñi ndo chí Nyoo. 32 Soco chicán xain chí Nyoo cha catyun, vatyí ma ndihí cha chinó iñun chí ra. Ta quivi ndu uvi iñun cuatyun ta na chino vaha iñun chíhi cutyinyeun chí ra tahan cha ma sandihí ra cha cachino iñi ra chíhi—catyí ra Jesús chí ra Simón.

33 Ta ra Simón catyí ra chí ra:

—Sutu Mañi yuhu, cha iyó vahi vatyí cuhin chuhun vasi vehe caa, vasi tuhun chíhi—catyí ra.

34 Tyicuan ta catyí ra Jesús chi ra:

—Pedro, catyí chuun vatyí vityin cha ni ri ca cha cumañi ca cuacu chaa loho, yoho

cha uñi tahan chaha cucatyun vatyí ña ñohó nuun chii —catyí ra Jesús chi ra.

Nu cha cuñi chaa cuhva cha cunacuhva cuenda ra Judas chi ra Jesús

³⁵ Tyicuan ta ndaca^a tuhun ra Jesús chi ra cachicá noo chihin ra, ta catyí ra:

—Ñicohon iñi ndo quivi cha tachj chi ndo vatyí cucahan noo ndo nuu ñáyivi ta ñahri nyiso ndo, ni ri cha cachi ndo, ni ri huhun, ni ri sahna ndo. ¿Atu chiyo cha cumañi chi ndo quivi cuan? —catyí ra Jesús.

Tyicuan ta canacahan ra, ta catyí ra:

—Ñahri cha cumañi chi ndi.

³⁶ Tyicuan ta quichaha catyí ra Jesús chi ra:

—Soco vityin, tatu iyó cha cachi ndo ta iyó huhun ndo, cuiso ndo. Ta tatu ñahri mityi ndo, xico ndo noo sahna ndo ta sata ndo.

³⁷ Vatyí catyí chi ndo, vatyí tandihí tuhun cha nyaá nu tutu Nyoo cuchino cava vatyí tyehe caa catyí chi: “Sahá ñu tuhun tyi cuví ra noo ra quiñi iyó.” Tyicuan caa catyí tuhun nu tutu Nyoo. Ta tandihí cuan cuchino cava —catyí ra.

³⁸ Tyicuan ta quichaha catyí ra cachicá noo chihin ra:

—Ihya nyaá uvi tahan mityi —catyí ra.

Tyicuan ta catyí ra Jesús:

—Cha iyó vaha ri —catyí ra.

Nu chican tahvi ra Jesús chi Nyoo Getsemani

(Mt. 26.36-46; Mr. 14.32-42)

³⁹ Tyicuan ta quitá ra Jesús vehe cuan. Ta cuahan ra nya yucu Olivo. Tari cuhva tuhva maa ra chahan. Ta ra cachicá noo chihin ra cuahan coyo ra chata ra. ⁴⁰ Ta cuhva cha chaa ra yucuan, quichaha catyí ra chi ra cachicá noo chihin ra:

—Çacan tahvi ndo chi Nyoo tacuhva ma cuví chasaha cuihna chi ndo.

⁴¹ Tyicuan ta cuahan ra Jesús cha cañi ca, tari cuhva cha chaa noo yuu tatu tuchi yo. Yucuan ta chicuñi chiti ra. Ta quichaha cahan ra chihin Nyoo, ⁴² ta catyí ra:

—Sutu Mañi yuhu, tu yoho ta cuñún, cuhva cha ma nyehi tundoho ihya. Soco ma cuví tari cuhva cha cuñi mai. Soco na cuví tari cuhva cha cuñi maun —catyí ra.

⁴³ Tyicuan ta tuví noo ángel, vatyí cuhva ca ra tunyee iñi chi ra. ⁴⁴ Ta cha ni ri ca cha nyehé xaan ra Jesús tundoho vatyí cuihya vavaha iñi ra, ta ñihi ca chicán tahvi ra chi Nyoo. Ta cuaha xaan tyeen ra quitá ta canacoyó nu ñuhú, ta tari caa niñi caa.

⁴⁵ Yucuan ta nducuitá ra cha ndihí cahan ra chihin Nyoo. Ta cuanuhu ra nu canyicu tandihí ra cachicá noo chihin ra. Ta nyehé ra vatyí caquixí ra, cha cuenda vatyí cacuihya xaan iñi ra, ña cacunyeé ra ñumahna ta caquixi ra.

⁴⁶ Tyicuan ta quichaha catyí ra Jesús chi ra:

—¿Ñáá tuhun cha caquixí ndo? Nducuita ndo. Ta çacan tahvi ndo chi Nyoo, tacuhva cha ma cuví chasaha cuihna chi ndo.

Nu chahq cuenda ra Judas chi ra Jesús chi ra xaan iñi chi ra

(Mt. 26.47-56; Mr. 14.43-50; Jn. 18.2-11)

⁴⁷ Ni cahan ca ra Jesús tuhun ihya, ta cuaha xaan ra cachaç coyo. Ta ityi nuu vachi ra Judas, noo ra chicá noo chihin ra Jesús cuví ra. Ta tuhva ra chi ra Jesús vatyí cua tyayuhu ra xitin ra. ⁴⁸ Tyicuan ta catyí ra Jesús chi ra:

—Judas, çatu chihin cha cua tyayuhun chii, nacuhvá cuendon chi yuhu, Rayi cha quichi nya gloria, chi ra xaan iñi chii? —catyí ra Jesús.

⁴⁹ Ta ra canyicu chihin ra Jesús quichaha ndaca tuhun ra chi ra:

—Sutu Mañi yuhu, çatu sañicuehe ndi chi ra chihin mityi? —catyí ra.

⁵⁰ Yucuan ta noo ra, chahnya ra soho chiyo vaha noo ra cha cuví musu ra cuví nuu chi tata sutu.

⁵¹ Soco ra Jesús catyí ra chi ra:

—Saña ndo. Vaha ri —catyí ra.

Tyicuan ta naquehen ra Jesús soho ra cuan. Ta natyaa ra, ta nduvaha. ⁵² Ta ra cacuví nuu chi tata sutu chihin ra cacuví nuu chi ra sahá cuenda vehe ñuhu, chihin ra cacuví mandoñi, ican ra cuví ra quichi coyo vatyí catiñ ra chi ra Jesús. Ta quichaha catyí ra Jesús chi ra:

—¿Atu vachi coyo nyoho siqui chihin cha xaan ta chihin yutun tari cha vatyí minoo ra suhu cuví yuhu sahá ndo? ⁵³ Ndi quivi chinyaí chichi vehe ñuhu cahnú, ¿ñáá tuhun ña cuví tñin ndo chii? Soco vityin chaa cuhva cha ñaa iñi vatyí ra ña vaha nyacá ñaha. Yucuan chaha vachi tñin ndo chii.

Nu catyí ra Pedro vatyí ña ñohó nuu ra chi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tyicuan ta catiñ ra chi ra Jesús. Ta cua nyaca ra chi ra nya vehe ra cuví nuu chi tata sutu. Ta ra Pedro nyasava ri cuahan ra chata ra. ⁵⁵ Ta cha chaç coyo ra vehe ra cuví nuu chi tata sutu cuan, casantahan ra ñuhu nuquehe. Ta chicunycí cutya ra nicachico ri nu cayú ñuhu cuan. Ta chicunyaç tucu ra Pedro mahñu ñáyivi cuan. ⁵⁶ Ta cuhva cha ndundichin cha cayu ñuhu cuan, tyicuan ta noo ñaha cha cuví musu tata sutu cuan nanyehé ña chi ra. Ta quichaha catyí ña:

—Ra ihya chicá noo ra chihin ra cuan —catyí ña.

⁵⁷ Soco ra Pedro catyí ra:

—Yuhu ña ñohó nuí chi ra cuan.

⁵⁸ Tañi ri cuan ta nyehe tucu inga ra chi ra, ta catyí ra:

—Yoho, ra cuenda ra cuan cuvún —catyí ra.

Ta ra Pedro catyí ra:

—Ñima —catyí ra.

⁵⁹ Ta cha yahá noo ora, ta nanyehe tucu inga ra chi ra ta catyí ra chi ra tahan ra:

—Cha ndicha cuií vatyi ícan ra ihya cuví noo ra cha chicá noo chihin ra cuan. Vatyí suri ra Galilea cuví ra —catyí ra.

⁶⁰ Tyicuan ta catyí ra Pedro:

—Ña chité ñáá tuhun cahún —catyí ra.

Ta caa cuhva ri cuan, ni cahán ca ra Pedro tuhun cuan, ta chacu cha ri noo loho.

⁶¹ Tyicuan ta ra Jesús nanyehe ra nuu ra Pedro. Ta ra Pedro nichohñ iñi ra tuhun cha catyí ra Jesús chi ra: “Cuhva cha ni cumañi ca cuacu chaa loho, yoho cha catyun tyi ña ñohó nuun chii uñi tahan chaha.”

⁶² Tyicuan ta quitá ra Pedro ityi chata vehe. Ta chacu vavaha ra cha cuihya iñi ra.

Nu cachacú nyaa ra chi ra Jesús ta cacañi ra chi ra

(Mt. 26.67-68; Mr. 14.65)

⁶³ Tyicuan ta ra casahá cuenda chi ra Jesús, quichaha chacu nyaa ra chi ra. Ta cacañi ra chi ra. ⁶⁴ Cachahñi ra sahma nuu ra, ta quichaha cacatu ra nuu ra. Ta cacatyí ra chi ra:

—Ñacoto yóo cha cañi chuun —cacatyí ra chi ra.

⁶⁵ Ta cuaha vavaha ca cha cacahan ra chi ra.

Nu ndacá tuhun ra chi ra Jesús tatu Sehe Nyoo cuví chi ra

(Mt. 26.59-66; Mr. 14.55-64; Jn. 18.19-24)

⁶⁶ Ta cha cundichin inga quivi cuan. Ta candu ñin ri ra chahnu ñuu cuan chihin ra cuví nuu chi tata sutu, ta ra casacuahá cuenda ley vehe ñuhu. Ta caquehen ra chi ra Jesús. Ta cuahan coyo ra chihin ra nya nu cuví junta cahnu. Ta quichaha candaca tuhun ra chi ra:

⁶⁷ —Catyí chi ndi ¿atu ra Cristo ra cha saquichi Nyoo cuvún? —catyí ra chi ra.

Ta ra Jesús nacahan ra, ta catyí ra:

—Tatu catyí chi ndo vatyi ícan, ma chino iñi ndo. ⁶⁸ O tatu ndaca tuhun ñáá cha ndaca tuhun chi ndo, ma nacahan ndo ni ma saña ndo chii. ⁶⁹ Soco vityin ta ityi nuu ca yuhu Rayi cha quichi nya gloria cucunyai chiyi vaha Nyoo ra cha iyó tandihi tunyee iñi chi —catyí ra.

⁷⁰ Tyicuan ta tandihi ra quichaha ndaca tuhun ra chi ra:

—Tu tyicuan caa, Sehe Nyoo cuví chuun —catyí ra.

Tyicuan ta nacahan ra Jesús ta catyí ra:

—Suri maa ndo catyí tyi ícan cuví.

⁷¹ Tyicuan ta quichaha cacatyí ra cuan chi ra tahan ra:

—Nyehe nuu. Yuhu maa ra quita. Ña niñi ca cha tava yo cha ndaa. Vatyí suri maa yo chiñi —cacatyí ra.

23

Nu nyehe ra Pilato vatyi ñahri cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tyicuan ta tandihi ra nducuitá ra. Ta cua nyaca ra chi ra nya nu nyaá ra Pilato, ra cuví gobernador. ² Tyicuan ta quichaha cacatyí ra chi ra Pilato:

—Ra ihya, sativi ra chi ñáyivi chihin cha cahán ra nuu ñu, ta catyí ra vatyi ña vaha tyiyahvi ndi xuhun chi gobiernu ñuu Roma. Ta siin ri catyí ra vatyi ra Cristo ra cha saquichi Nyoo vatyi cuví ra rey cuví ra —cacatyí ra.

³ Tyicuan ta ra Pilato quichaha ndaca tuhun ra chi ra Jesús, ta catyí ra:

—¿Atu ícan yoho cuví Rey cuenda ñu Israel? —catyí ra.

Ta nacahan ra Jesús, ta catyí ra:

—Ícan, suri maun catyí.

⁴ Tyicuan ta quichaha catyí ra Pilato chi ra cuví nuu chi tata sutu ta chi ñáyivi:

—Ñahri cuatyí ra ihya —catyí ra chi ñu.

⁵ Soco xaan ca nanduví ñu. Ta quichaha cacatyí ñu:

—Cahnu xaan cuatyí ra. Cuaha xaan tisihi chahá ra, vatyi cahán ra nuu ñáyivi. Cha xihna ri quichaha cahán noo ra nuu ñáyivi ityi Galilea. Ta nicañi maa ityi vachí ra cahán ra chihin ñáyivi nyacua nya chaá ra Judea ihya —catyí ñu.

Nu tachí ra Pilato chi ra Jesús nuu ra Herodes

⁶ Cuhva cha chiñi ra Pilato tuhun ihya, quichaha ndaca tuhun ra tatu ra Galilea cuví ra Jesús. ⁷ Ta catyí ñáyivi chi ra vatyi ícan. Tyicuan ta sacuhun ra Pilato chi ra nya nu nyaá ra Herodes. Vatyí ra Herodes cuví ra gobernador nichahnu Galilea. Soco quivi cuan ñohó ra ñuu Jerusalén. ⁸ Ta cuhva cha nanyehe ra Herodes chi ra Jesús, sií xaan cuví chi ra. Vatyí cha naha xaan cuñi ra nyehe ra chi ra. Vatyí ñihí ra tuhun vatyi cuaha xaan milagru sacuví ra. Ta cuñi xaan ra nyehe ra noo milagru cha sacuví ra Jesús. ⁹ Ta cuaha xaan tuhun ndaca tuhun ra chi ra. Soco ra Jesús ña nacahan maa ra. ¹⁰ Ta yucuan canyicú tucu ra cuví nuu chi tata sutu ta ra casacuahá ley vehe ñuhu. Ta catyaa xaan ra cuatyí siqui ra. ¹¹ Tyicuan ta ra Herodes chihin sindaro cuenda ra chacu nyaa ra chi ra. Ta sandihvi noo ra noo sahma yahvi ta tyaqui chi ra, tari cha tuhvá rey ñihno. Tyicuan ta natachí ra Herodes chi

ra inga chaha nuu ra Pilato. ¹²Ta quiví cuan ra Pilato chihin ra Herodes nduvaha iyó ra chihin tahan ra. Vatyí nu quichi chí, ña cuví canyehe ra chí tahan ra.

Nu cutuñí chí ra Jesús vatyí cucúvi ra
(Mt. 27.15-26; Mr. 15.6:15; Jn. 18.39—19.16)

¹³Tyicuan ta ra Pilato sandu ñin ri ra chí ra cuví nuu chí tata sutu, ta chí ra cuví tyiño, ta chí ñáyivi ñandihí. ¹⁴Ta catyí ra chí ñu:

—Nyoho quichí nyaca ndo chí ra ihya chí. Ta catyí ndo vatyí satíví ra chí ñáyivi. Soco yuhu cha sacutuñí chí ra nuu ndo. Ta ñahri cuatyí ra nañihí tari cuhva catyí ndo. ¹⁵Ta ñi ri ra Herodes ña nañihí ra ñi noo cuatyí ra. Yucuan chaha sandichí ra chí ra inga chaha nu nyai. Nyehé ndo vatyí ñahri cha sacuví ra, ñahri cuatyí ra. Ta ña tahán chí cha cúvi ra. ¹⁶Yucuan chaha cua tachí tuñi ri chí ra. Yahá cuan ta sañe chí ra —catyí ra Pilato.

¹⁷Tyicuan caa catyí ra Pilato vatyí cha ñi ri ca cha iyó vico cuan, tahán chí cha saña ra noo ra ñohó vehe caa, tari cuhva cha tuhva maa ra. ¹⁸Soco tandihí ñu ñin ri nacanachaa ñu, ta catyí ñu:

—Cahñi chí ra Jesús. Ta saña chí ra Barrabás —catyí ñu.

¹⁹Ta ra Barrabás cuan ñohó ra vehe caa cha cuenda cha cuñi ra nacanda ra siquí ra cuví tyiño. Ta ñin ri chahñi ra chí ñáyivi. ²⁰Ta ra Pilato cuñi ra saña ra chí ra Jesús. Ta quichaha catyí ra chí ñáyivi cuan inga chaha vatyí cusaña ra chí ra. ²¹Soco ñáyivi chaa ca caná chaa ñu, ta catyí ñu:

—Na cúvi ra nu cruzi.

²²Tyicuan ta cha cu uñi chaha catyí ra Pilato chí ñu:

—Soco ñááa cha ña vaha sacuví ra ihya? Nyehí tyi ña tahán chí cúvi ra. Tacuhva cutachi tuñi ri chí ra, ta sañe chí ra —catyí ra Pilato.

²³Soco ñáyivi caná chaa ca ñu, ta catyí ñu vatyí tyaa ra chí ra nu cruzi. Ta cuví chasaha ñu. Vatyí maa ñu ta ra cacuví nuu chí tata sutu caná chaa ñu. ²⁴Tyicuan ta sacuví ra Pilato tari cuhva catyí ñu. ²⁵Ta tari cuhva catyí ñáyivi, saña ra chí ra Barrabás cha ñohó vehe caa cha cuenda cha cuñi ra nacanda ra siquí ra cuví tyiño ta cha cuenda cha chahñi ra. Ta sacuví ra chí ra Jesús tari cuhva catyí ñu.

Nu cua cunyaa ra Jesús nu cruzi
(Mt. 27.32-44; Mr. 15.21-32; Jn. 19.17-27)

²⁶Yucuan ta quehen sindaro chí ra Jesús. Ta cuahan ra chihin ra. Ta catiñ tucu ra chí noo ra Cirene cha nañi Simón. Ra cuan ñi cua ndichi ra cha chahñ ra nu chiquí. Ta saniñi sindaro chí ra, na cuiiso ra cruzi ra Jesús ta cuahan ra chata ra.

²⁷Ta cuaha xaan ñáyivi cuahan chata ra. Ta cuaha xaan ñusihí chacú chaa ñu cha cuihya iñi ñu cha catyí ra. ²⁸Soco ra Jesús nanyehé ra chí ñu. Ta quichaha catyí ra chí ñu:

—Tandihí nyoho ñusihí ñuu Jerusalén, ma cuacu ndo cha catyí yuhu. Cuacu ndo, soco cha catyí maa ndo ta cha catyí sehe ndo. ²⁹Vatyí cuquichi quiví nu cunyehe xaan ndo tundoho. Ta cuahan ñáyivi chihin tandihí ndo cha cuví ndo ñusihí cha yori sehe ndo iyó. Ta cucatyí ñu chí ndo: “Vaha xaan vatyí yori sehe ndo iyó vatyí cuaha xaan tundoho nyehé yo vityin”, cucatyí ñu chí ndo. ³⁰Vatyí quiví cuan cucuñi ñu vatyí na canacoyo yucu siquí ñu tacuhva sahví chí chí ñu. ³¹Vatyí tatu tyehe caa sacuví ñu chihin yuhu cha ñahri cuatyí. Yahá ca cuhva cunyacuví tucu ñu chihin maa ndo cha iyó cuatyí ndo —catyí ra Jesús.

³²Ta quehen tucu sindaro cuan chí uvi tahan ra quiñi iyó, vatyí cahñi ra chí ra ñin ri chihin ra Jesús. ³³Tyicuan ta cachaa ra noo nu nañi Nu Cuví Yiquí Xiñi Ndiyí. Ta yucuan chicatacaá ra chí ra Jesús nu cruzi. Ta tyicuan caa tucu chinyacuví ra chihin ninduvi tahan ra iyó cuatyí cuan. Noo ra chitacaá ra nuu cruzi chiyo vaha ra Jesús. Ta nonga ra cuan chitacaá ra nuu cruzi chiyo satyin ra. ³⁴Ta cuhva cha tacaá ra Jesús nu cruzi cuan, quichaha catyí ra:

—Sutu Mañi yuhu, saña tucahnu iñi chí ra. Vatyí ña chitó ra ñáa cha nyacuví ra chihin —catyí ra.

Tyicuan ta sindaro cuan chahñ ra noo sihva chihin sahma ra Jesús. Nya ra saha ganaa caquehen ra sahma cuan. ³⁵Ta ñáyivi tayucú ñu nyehé ñu. Ta nyacua nya ra cacuví nuu cuenda vehe ñuhu, ta chacú cuehe ra nyehé ra chí ra Jesús. Ta catyí ra:

—Sacacú ra chí inga ñáyivi. Soco vityin na sacacu tucu ra chí maa ra, tatu ndicha cha Cristo, ra cha saquichi Nyoo, cuví ra —cacatyí ra.

³⁶Ta suri cahán cuehe tucu sindaro chí ra. Ta catuhva ra chí ra. Ta chahá ra vinu iya coho ra. ³⁷Ta quichaha cacatyí ra chí ra:

—Tatu rey cuenda ñáyivi Israel cuvún. Sacacu chuun —cacatyí ra.

³⁸Ta siquí cruzi ityí xiñi ra nyaá noo nu tyaa ra chihin griego, chihin latin, ta chihin hebreo. Tyehe caa quita cahán letra cuan: “Ican ra ihya cuví Rey cuenda ñu ñuu Israel” —catyí nu vitu cuan.

³⁹Ta noo ra quiñi iyó cha tacaá xiin ra Jesús, quichaha cahan ra chihin ra, ta catyí ra:

—Tatu ndicha cha Cristo cuvún, sacacu chuun. Ta sacacu chí ndi ñandihí —catyí ra.

⁴⁰Soco inga ra cuan catyí ra chí ra:
—¿Atu ña yuhvún chí Nyoo? Vatyí nyehún suri tundoho cha nyehé maa ra vityin.

⁴¹ Maa yo nyehé yo tundoho ihya vatyí iyó cuatyí yo. Soco ra ihya ñahri cuatyí ra iyó —catyí ra.

⁴² Tyicuan ta quichaha catyí ra chi ra Jesús:

—Yoho Jesús, ñicohon iñun tuhin quiví cunyaca ñahun —catyí ra.

⁴³ Tyicuan ta ra Jesús catyí ra chi ra:

—Cha ndicha catyí chuun vatyí tañi ri vityin ta cunyaun chihin nya paraíso nu nyaá añima ñu chinó iñi chi Nyoo —catyí ra Jesús chi ra.

Nu chihí ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tyicuan ta ñáá cuhva ora quichaha nduñaa ñayiví, nyacua nya caa uñi cha cha iñi. ⁴⁵ Vatyí nduñaa ñanyii. Ta sahma cha tacaá chichi vehe ñuhu cahnu cuan, tahnya sava.

⁴⁶ Tyicuan ta quichaha cana chaa ra Jesús: —Sutu Mañi yuhu, natyái añime chichi ndahun —catyí ra.

Ta cuhva cha catyí ra tuhun ihya, ta chihí ra.

⁴⁷ Ta ra cuví nuu chi sindaro cuan, nyehé ra tandihí cha cuví cuan. Ta sacahnú ra chi Nyoo, ta catyí ra:

—Ñahri ndicha cuii cuatyí ra iyó —catyí ra.

⁴⁸ Ta tandihí ñáyiví cha canyicú yucuan canyehé ñu cha cuví cuan. Ta cuahan coyo ñu ta suri cacañi ñu ndaha ñu yiquí nyica ñu. Vatyí chitó ñu vatyí ña vaha cha chinyacuví ñu chihin ra Jesús. ⁴⁹ Ta tandihí ñu cha ñohó nuu chi ra Jesús, ta ñusihí cha chinyicon chí ra nya Galilea, canyicú ñu nya sava ri. Ta nyehé ñu tandihí cha cuví yucuan.

Nu cua cuchi ra chi ra Jesús

(Mt. 27.57-61; Mr. 15.42-47; Jn. 19.38-42)

⁵⁰ Ta iyó noo ra vaha, nañi ra José. Ta Arimatea ityi Judea cuví ñuu ra. Ta cuví ra noo ra cuví nuu cuenda Junta Cahnu ñu Israel. ⁵¹ Ta ra José cuan nyatú ra quiví cha cunyaca ñaha Nyoo. Ta ña ndoq ra vaha chihin cha sacuví ra tahan ra, ra cacuví nuu cuenda tata sutu cuan. ⁵² Tyicuan ta cahañ ra chicacan ra coño ñuhu ra Jesús chí ra Pilato. ⁵³ Ta yahá cha sanoq ra José cuan coño ñuhu ra Jesús nu cruzi, ta natyihí ra chichi noo sahma cha cuví lino. Ta cuahan ra cua cuchi ra chí ra chihí noo ñaña chaa cha cuví yavi yuu cha savahá ñu. ⁵⁴ Ta viarni cuví, quiví cha sanduvahá ñáyiví cha cachí ñu cha sabaru inga quiví, quiví nyitatu ñu. Ta cha cuñi cuví sabaru.

⁵⁵ Ta tandihí ñusihí cha quichi chihin ra Jesús nya Galilea, cuahan ñu chata ra. Ta nyehé ñu chichi yavi yuu cuan. Ta nyehé ñu yoso caa chicava coño ñuhu ra. ⁵⁶ Ta

cuanuhu coyo ñu nya vehe ñu. Ta sanduvahá ñu ndutya vixi chahán vatyí cutyihí ñu coño ñuhu ra Jesús coto coo xico. Vatyí tyicuan caa cuví costumbre cuiya cuan. Tyicuan ta nyitatú ñu inga quiví cuan tari cuhva catyí maa tuhun cha tachí Nyoo chi yo.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹ Cundichin timingu quiví nu quichaha vitya. Ta ñaha cuiri cuahan coyo ñusihí cuan nya nu ñaña ra Jesús. Ta nyisó ñu ndutya vixi chahán cha sanduvahá ñu. ² Ta cuhva cha chaq coyo ñu, nanyehé ñu vatyí ña nyasí ca yavi yuu cuan tari cuhva chinyasí maa. ³ Ta quihví ñu chichi, soco ña nañihí ñu coño ñuhu Sutu Mañi yo Jesús. ⁴ Ta yucuan tayucú ñu chihin cha yuhví ñu. Ta ña chitó ñu ñáá cunyacuví ñu. Ta tuví uvi tahan rayii nuu ñu. Ta xiño vavaha sahma cañihno ra. ⁵ Ta chihin cha yuhví ñu, ta chicuñi chiti ñu chihin nuu ñu nya nu ñuhú. Tyicuan ta quichaha cacatyí ra cuan chí ñu:

—¿Ñáá tuhun nanducú ndo chi ra Jesús ihya nu ñohó ndiyi? ⁶ Yori ra ñohó ihya, vatyí cha nandoto ra. Ñicohon iñi ndo tuhun cha cahañ ra chihin ndo quiví chicá noo ra Galilea. ⁷ Catyí ra vatyí tahán chí cucuhva cuenda ñu chí ra ndaha ra iyó cuatyí. Vatyí cuví ra Rayi cha quichi nya gloria. Ta tahán chí cucahñi ra chí ra nu cruzi. Soco nu cu uñi quiví cunandoto ra. Tyicuan caa catyí ra chí ndo —catyí ángel cuan chí ñu.

⁸ Tyicuan ta nicohon iñi ñu tuhun cahañ ra Jesús quiví cuan. ⁹ Ta cuanuhu coyo ñu. Ta nacatyí ñu chí ndi uchi ñn tahan ra apóstol ra Jesús chihin tandihí ca ñáyiví. ¹⁰ Ta ñu sacoto tuhun cuan chí ra cuan cuví ñu cu María, ñaha Magdala, ta cu Juana, ta cu María sihi ra Jacobo, ta suhva ca ñusihí. ¹¹ Soco ra cachicá noo chihin ra Jesús cuñi maa ra vatyí cahán ri maa ñu. Ta ña chinó iñi ra tuhun cahán ñu.

¹² Soco ra Pedro nducuitá ra ta chingo vavaha ra cuahan ra cuanyehe ra nya chichi ñaña ra Jesús tatu ndicha. Ta nanyehé ra chichi yavi yuu cuan tyi sahma ri cayucú inchiyó xiiñ. Tyicuan ta cuanuhu ra nya vehe. Ta iyo cuñi ra vatyí ñahri ca coño ñuhu ra Jesús catuví chichi ñaña cuan.

Noo cha cuví ityi Emaús

(Mr. 16.12-13)

¹³ Suri maa quiví cuan, uvi tahan ra chicá noo chihin ra Jesús cuahan coyo ra nya ñuu cha nañi Emaús, tari noo cha uchi ñn kilómetro cha quita yo Jerusalén. ¹⁴ Ta cuahan coyo ra ta ndatuhún ra tuhun ñáá ndihí cha cuví. ¹⁵ Ta cha ní ri ca cha candatuhún

ra, ta ra Jesús natahan ra chi ra nu cuahan coyo ra. ¹⁶ Soco ni ri maa nyehé ra chi ra Jesús, ña canicohon nuu ra chi ra. Vatyí tari cha iyó noo cha chasi nuu ra tacuhva cha ma canicohon nuu ra chi ra Jesús. ¹⁷ Tyicuan ta quichaha ndacá tuhun ra Jesús chi ra:

—¿Ñáá tuhun ndatuhún xaan ndo? ¿Ñáá tuhun cha cuihya xaan iñi ndo? —catyí ra chi ra.

¹⁸ Ta ra cha ñañí Cleofas, nacahan ra. Ta catyí ra:

—¿Atu ñima nya Jerusalén quichi yoho? ¿Atu ra inga ñuu cuvún? ¿Atu ña chitón cha cuví ñuu cuan? —catyí ra.

¹⁹ Tyicuan ta catyí ra Jesús chi ra:

—¿Ñáá cha cuví?

Ta quichaha canacatyí ra chi ra:

—Tuhun ra Jesús ra ñuu Nazaret. Vatyí cuví ra noo ra profeta Nyoo. Ta chihin tunyee iñi cahnu Nyoo sacuví ra cha vaha nuu Nyoo ta nuu ñáyivi. ²⁰ Soco ra cacuví nuu chi tata sutu ta ra cacuví nuu cuenda vehe ñuhu, nacuhvā cuenda ra chi ra chi sindaro ñuu Roma. Ta cachahñi ra chi ra. Ta chihí ra nu cruzi. ²¹ Ta cha vityin cha iyó uñi quivi cuví tuhun cuan. Ta nyuhu cuñí maa ndi vatyí ican ra cuví ra cusacacu chi ñáyivi Israel. ²² Soco vityin iyo xaan cuñí ndi cha nacatyí suhva ñusihí chi ndi. Vatyí maa ñu, ñaha cuii ri chahan coyo ñu nu ñaña ra. ²³ Ta nacatyí ñu chi ndi vatyí ñahri ca coño ñuhu ra catuví. Ta nacatyí ñu vatyí nyehe ñu uvi tahan ángel. Ta catyí ángel cuan chi ñu vatyí ra Jesús nyitó ra. ²⁴ Yahā cuan ta chahan coyo tucu suhva ra tahan ndi nu ñaña. Ta nyehe ra vatyí cha ndicha cuví tari cuhva catyí ñusihí cuan. Vatyí ñahri ca coño ñuhu ra Jesús catuví —catyí ra chi ra.

²⁵ Tyicuan ta ra Jesús catyí ra chi ra:

—Chiin xaan cutuñí iñi ndo. Ta cuee xaan chinó iñi ndo tuhun tyaā ra profeta Nyoo ta cha naha. ²⁶ ¿Atu ña chitó ndo vatyí tahán chi cha cunyehe xihna ra Cristo tundoho? Yaha cuan ta tahán chi cuñihi ra tyiño cha cunyaca ñaha ra —catyí ra Jesús chi ra.

²⁷ Tyicuan ta quichaha nacuhva ra cuenda yoso caa cuahan tuhun ra nu tutu Nyoo. Ta quichaha cahan ra tuhun cha tyaā ra Moisés ta cha naha. Ta yahā cuan ta cahan ra tuhun tandihí libru cha tyaā ra profeta Nyoo.

²⁸ Ta cuhva cha chaā ra nya ñuu Emaús cuan nu cuahan coyo ra, ta sahá ra Jesús vatyí cañi ca cuahan ra. ²⁹ Tyicuan ta catyí ra chi ra na ndoo ra chihin ra. Ta catyí ra:

—Ndoo chihin ndi vatyí cha cua quee ñanyii —cacatyí ra.

Tyicuan ta cuahan ra Jesús nya vehe ninduvi ra cuan. ³⁰ Ta cuhva cha chicunyaā

ra yuhu mesa chihin ra, quehen ra pan. Ta chahā ra tyahvi nyoo chi Nyoo. Ta chahnu sava ra, ta chahā ra chi ra. ³¹ Ta caa cuhva ri cuan nuña nuu ra canicohon nuu ra chi ra Jesús. Soco ra Jesús cuanaa ri ra. ³² Tyicuan ta quichaha catyí ra chi ra tahan ra:

—Yucuan chaha vaha xaan cuñí añima yo cuhva cha vachi ra chihin yo, ta nacatyí vaha ra yoso caa cuahan tuhun Nyoo cha nyaa nu tutu chi yo, ta nicohon nuu yo chi ra —cacatyí ra.

³³ Ñahri ca cha canyatū ra, ta cuanuhu coyo ra nya Jerusalén. Ta yucuan ñañihí ra chi ndi uchi ñin ra chicá noo chihin ra Jesús, canyicú ra. ³⁴ Tyicuan ta quichaha canacatyí ndi uchi ñin tahan ra chi ra cha nichaa coyo cuan:

—Ndicha vatyí Sutu Mañi yo, nandoto ra. Vatyí ra Simón nyehe ra chi ra —cacatyí ra.

³⁵ Tyicuan ta ra cha ni nachaa coyo cuan canacatyí tucu ra yoso caa ndatuhun ra Jesús chihin ra ityí cuahan ra ñuu Emaús, ta yoso caa canicohon nuu ra chi ra nu chahnu ra pan.

Nu tuvi ra Jesús nu canyicu ra cachica noo chihin ra

(Mt. 28.16-20; Mr. 16.14-18; Jn. 20.19-23)

³⁶ Ni cahán ca ra tuhun cuan ta tuví ra Jesús nu canyicú ra. Ta chahā ra nocumí, ta catyí ra:

—Na coo cha taxi ri añima ndo.

³⁷ Tyicuan ta canayuhví xaan ra. Ta cacuñí maa ra vatyí noo tatyí ri cuví. ³⁸ Tyicuan ta catyí ra Jesús chi ra:

—¿Ñáá tuhun cha nayuhví ndo? ¿Ñáá tuhun cha chicá uvi iñi ndo? ³⁹ Nyehe ndo ndahi. Ta nyehe ndo chahi. Vatyí suri mai cuví. Tñin ndo chii ta coto ndo. Vatyí tatyí, ñahri coño ñuhu. Ta ñahri yiquí tari cha nyehé ndo tyi yihí chi yuhu —catyí ra Jesús.

⁴⁰ Ta cuhva cha catyí ra tuhun ihya, sañahá ra ndaha ra ta chaha ra. ⁴¹ Soco maa ra chaha cha iyo cacuñí ra ta sii cacuñí ra nyacua ña chinó vaha iñi ra. Tyicuan ta catyí ra Jesús chi ra:

—¿Atu iyo cha cachi? —catyí ra.

⁴² Tyicuan ta chahā ra chiin yuhu tiyaca tyihyo chihin tyañuñu chi ra. ⁴³ Ta quehen ra. Ta quichaha chachi ra. ⁴⁴ Ta catyí ra chi ra:

—Tandihí cha cuví chii, ican ihya cuví cha catyí chi ndo quivi cuan. Ta catyí chi ndo vatyí tyicuan caa cucuvi, tari cuhva nyaá tuhun cha tyaā ra Moisés ta ra profeta Nyoo ta cha nyaá nu libru salmo —catyí ra chi ra.

⁴⁵ Tyicuan ta chahā ra Jesús vatyí na cutuñí iñi tandihí ra cuan yoso caa catyí nu tutu Nyoo. ⁴⁶ Tyicuan ta catyí ra Jesús chi ra vatyí tyicuan caa nyaá nu tutu Nyoo vatyí tahán chi cha cúvi ra Cristo. Ta nu cu uñi

quivi nandoto ra. ⁴⁷ Ta tahán chi coto ñáyivi tuhun sivi ra Cristo ñuu Jerusalén, ta yaha cuan ta tandihí ñuu ñicahnu ñuhu ñáyivi. Tacuhva cuvi ndu uvi ñi ñu ta ndachi cuatyí ñu.

⁴⁸ —Ta nyoho cuví ndo cha ndaa tandihí tuhun ihya. ⁴⁹ Ta cusaquichi mai Tatyí Ii Nyoo siqui ndo tari catyí Suti tyi cuhva ra chi ndo. Soco cunyicu ndo Jerusalén ihya. Ta ma quita maa ndo nyacua nya quichi tunyee ñi Tatyí Ii Nyoo cuquihí chi ndo —catyí ra Jesús.

Nu nandaq xica ra Jesús andivi

(Mr. 16.19-20)

⁵⁰ Tyicuan ta ra Jesús cuahan ra chihin tandihí ra cachicá noo chihin ra ityi chata ñuu, nya ñuu Betania. Ta sandaa ra ndaha ra. Ta nasoco ra chi ra. ⁵¹ Ta cha ñi ri ca cha nasocó ra chi ra, nandaq xica ra andivi. ⁵² Tyicuan ta tandihí ra sacahnú xaan ra chi ra. Ta si xaan cacuví chi ra, cuanuhu coyo ra Jerusalén. ⁵³ Ta tyicuan ri chinyicú ra chichi vehe ñuhu cahnu cuan, ta sacahnú xaan ra chi Nyoo.

Tuhun Nyoo Cha Tyaa San Juan

Tuhun Cahán Nyoo nanduví noo rayíi, ta ican cuví ra Cristo

¹ Nyata quiví xihna ri, nyata ni cumañi ca coo tandihí cha iyó, ta cha iyó ra cuví Tuhun Cahán Nyoo. Nyaá ra chihin Nyoo. Ta Nyoo cuví ra. ² Ta chicoo ra chihin Nyoo nyata quiví xihna ri. ³ Ta chihin ra, savaha Nyoo tandihí cuíi maa cha iyó. Ta ñahri savaha Nyoo cha maa ri maa ra. ⁴ Ta chihin ra cuví Tuhun Cahán Nyoo nyaá ñayiví cha maa ca maa. Ta ñayiví cuan, ican cuví cha sacundichín añaima ñáyiví. ⁵ Ta cha ndichin ihya, sacundichín chí nu ñaa iñi. Ta cha ñaa iñi ña cuñihí chí ndahva chi cha ndichin cuan.

⁶ Chiyó noo ra cha tachí Nyoo chí. Ta nañi ra Juan. ⁷ Quichí ra cuví ra noo cha ndaa. Vatyí cahan ra tumañi iñi cuenda ra cuví cha ndichin cuan, tacuhva vatyí chino iñi tandihí ñáyiví chí ra. ⁸ Ra Juan, ñima cha ndichin cuan cuví ra. Noo cha ndaa ri cuví ra cha cuenda cha ndichin cuan. ⁹ Vatyí cha ndichin cha ndicha vaha cuan, ni cuachaa chí siqui ñuhu ñayiví, tacuhva vatyí sacundichín chí añaima tandihí ñáyiví cha iyó siqui ñuhu ñayiví ihya.

¹⁰ Ra cuví Tuhun Cahán Nyoo quichí ra siqui ñuhu ñayiví. Ta ican ra cuví ra Cristo. Ta suri maa ra savaha ra ñuhu ñayiví. Soco ñáyiví iyó siqui ñuhu ñayiví, ña nichon nuu ñu chí ra. ¹¹ Quichí ra ni nyicú ñáyiví cha savaha ra, soco ñáyiví cha savaha ra ña natin cuenda ñu chí ra. ¹² Soco tandihí ñu natin cuenda chí ra, ta chinó iñi ñu chí ra, ican chí ñu cuan, chaha ra ityí vatyí nanduví ñu sehe Nyoo. ¹³ Vatyí nacacú chaa ñu. Soco ñima tari cacú ñu ta lee ñu cuenda coño ñuhu ñu. Ta ni ñima cha cuenda cha quichí cuví iñi noo rayíi coo ra chihin noo ñaha sihi. Ñima cha cuenda cha cuñi ñáyiví coo sehe ñu. Soco maa Nyoo sanacacú chaa chí ñu.

¹⁴ Ta ra cuví Tuhun Cahán Nyoo nanduví ra noo rayíi. Ta chicoo ra chihin yo. Ta nyehe ndi cha cahnu cuví ra. Ta cahnu cuví ra vatyí Sehe mañi Sutu yo Nyoo cuví chí ra. Tyitu yihí ra chihin cha ndicha ta tumañi iñi cha cua cuhva ra chí yo. ¹⁵ Ta ra Juan cuan cahan ra tumañi iñi cuenda ra, ta catyí ra:

—Ican ra ihya cha cahin tuhun quiví cuan, vatyí ra cha vachí ityí chate, cahnu ca ra cuví ra ican saha yuhu. Vatyí nyata tyembu chahnu ta cha iyó maa ra —catyí ra Juan.

¹⁶ Tandihí yo naquehén cuenda yo tumañi iñi cahnu cha chaha ra chí yo, vatyí nasocó xaan ra chí yo. ¹⁷ Ra Moisés chaha cuenda ra

ley Nyoo chí yo. Soco ra Jesucristo cundahví iñi ra chí yo ta saha ra ticahnu iñi cuatyí yo. Ta chaha ra cha ndicha coo chí yo. ¹⁸ Ta yori ca maa nyehé chí Nyoo. Notuhun ri maa Sehe mañi ra cha iyó ñn ri chihin ra. Ican ra cuví ra chaha cha cohon nuu yo chí Sutu ra.

Nu cahán ra Juan, ra sacondutyá, tumañi iñi cuenda ra Jesucristo

(Mt. 3.11-12; Mr. 1.7-8; Lc. 3.15-17)

¹⁹ Ra cacuví nuu chí ñu Israel cha iyó ñuu Jerusalén, catachí ra chí tata sutu ta chí ra cacuví levita nu nyaá ra Juan na ndaca tuhun ra chí ra yóo ra cuví ra. ²⁰ Ta maa ra Juan catyí cachi ra:

—Yuhu ñima ra Cristo cuví.

²¹ Tyicuan ta candacá tuhun ra inga chaha chí ra:

—¿Yóo ra cuví yoho? ¿Atu ra Elías, ra cuví profeta Nyoo ta cha naha cuvún? —catyí ra chí ra.

Ta ra Juan nacahan ra:

—Ñima ra cuan cuví.

Ta sañihí ca ra candacá tuhun ra chí ra, ta catyí ra:

—Tu tyicuan caa, ¿atu icon cuví ra profeta Nyoo cha nyaá cha quichí?

Ta nacahan tucu ra Juan ta catyí ra:

—Ñima.

²² Ta inga tucu chaha candacá tuhun ra chí ra:

—¿Yóo ra cuví yoho? Vatyí cuñi chí cuiso ndi tyiño chí ra cha tachí chí ndi. ¿Yóo ra cuví yoho? —catyí ra chí ra.

²³ Ta ra Juan nacahan ra:

—Yuhu cuví ra cahán ta canachaá noo nu chiquí ndi, ta catyí: “Nuña ndo noo ityí ndoo chichi añaima ndo vatyí cha vachí Sutu Mañi yo.” Tari cuhva cahan ra Isaías profeta Nyoo tuhun ta cha naha —catyí ra Juan chí ra.

²⁴ Ra cha cacahan chihin ra Juan, ra cacuví fariseo tachí chí ra. ²⁵ Ta candacá tuhun tucu ra chí ra:

—Tatu ñima ra Cristo, ni ra Elías, ni ra profeta cuan cuvún, ¿ñaá tuhun cha sacondutyón chí ñáyiví? —cacatyí ra chí ra Juan.

²⁶ Ta ra Juan catyí ra chí ra:

—Yuhu sacondutyé chihin ndutyá. Soco mahñu ndo nanyaá noo ra cha ña ñohó nuu ndo. ²⁷ Ican ra cuví ra vachí chate. Soco cha iyó maa ra ta caquí. Ta ña naña mai ni cha cuví musu ra ta ndachí ñi xityin ndichan ra —catyí ra Juan.

²⁸ Tandihí tuhun ihya cuví noo nu nañi Betábara cha nyaá inga chiyo yuvi cahnu Jordán nu ñohó ra Juan sacondutyá ra.

Ra Jesucristo, Mbee Luhlu sana Nyoo cuví ra

²⁹ Cha inga quiví nanyehe ra Juan chí ra Jesús cuachaa ra nu nyaá ra, ta catyí ra Juan:

—Nyehe ndo, ican ra ihya cuví Mbee Luhlu sana Nyoo vatyi cucuhva ra ñayiví ra tacuhva cahnya ra cuatyi ñáyiví iyó siqui ñuhu ñayiví. ³⁰ Tuhun maa ra cahin quivi cha catyi chi ndo vatyi cha yaha yuhu ta vachi nonga ra cha cahnu ca cuví ta ñuma ca yuhu, vatyi nyata tyembu chahnu ta cha iyó ra. ³¹ Ni yuhu ta ña ñohó nuí chi ra quivi cuan. Soco vachi sacondutyé chihin ndutya tacuhva vatyi ñu ñuu Israel cohon nuu ñu chi ra —catyi ra Juan.

³² Ta catyi tucu ra Juan ñandhi:

—Yuhu nyehi chi Tatyí li Nyoo quichi ityi andivi vachi chi tari noo paloma, ta ndoo chi siqui ra. ³³ Yuhu ta coto que yóo ra cuví ra quivi cuan. Soco Nyoo, ra cha tachí chii na sacondutye chihin ndutya, catyi ra chii: “Quivi nyehun Tatyí li yuhu, vachi noó siqui noo rayi, ican ra cuan cuví ra sacondutyá chihin Tatyí li yuhu”, catyi Nyoo chii. ³⁴ Yuhu cha yaha nyehi chi ra. Ta cuví cha ndaa vatyi ican ra cuví Sehe Nyoo —catyi ra Juan.

Ra cha xihna ca nanyicon chi ra Jesús

³⁵ Cha inga quivi, ra Juan nyaá tucu ra yucuan inga chaha, ta nyicú tucu uvi ra nyicon chi ra. ³⁶ Ta cuhva cha nyehé ra, yahá ra Jesús, ta catyi ra:

—Nyehe ndo, ican ra cuan cuví Mbee Luhlu sana Nyoo —catyi ra Juan.

³⁷ Cha chiñi ninduvi ra nyicon chi ra Juan tuhun cahan ra, ta cananyicon ra chi ra Jesús. ³⁸ Tyicuan ta nanyehé ra Jesús ityi chata ra, ta nyehé ra tyi canyicon ra chi ra, ta catyi ra:

—¿Ñáá cha nducú ndo?

Tyicuan ta canacahan ra ta catyi ra:

—Maestro, ¿nya iyón?

³⁹ Ta ra Jesús catyi ra chi ra:

—Coho ndo chihin. ta nyehe ndo —catyi ra chi ra.

Tyicuan ta cuahan coyo ra chihin ra. Ta canyehé ra nu iyó ra. Ta yucuan cuaa ndihi ra vatyi tari cha caa cumi cha cha ñi cuhva cha chaá ra yucuan.

⁴⁰ Chichi cha ninduvi ra cha chiñi tuhun cahan ra Juan ta nanyicon ra chi ra Jesús, noo ra cuví ra ra Andrés yañi ra Simón Pedro. ⁴¹ Ta ra Andrés numi ri chinanducú ra chi yañi ra, ra Simón, ta catyi ra chi ra:

—Ñañihí ndi chi ra cha cuví Mesías —catyi ra.

Ta tuhun Mesías cuan cuñi chi catyi, ra Cristo, o ra cha nacachi vaha Nyoo, vatyi cuví ra rey chi yo.

⁴² Tyicuan ta ra Andrés chinyaca ra chi ra Simón yañi ra nu nyaá ra Jesús. Ta cuhva cha nyehé ra Jesús chi ra Simón, ta catyi ra chi ra:

—Yoho Simón, sehe ra Jonás cuví chuun. Soco cunañun Cefas. —catyi ra chi ra.

Ta Cefas cuñi chi catyi Pedro chihin sahan griego, ta ninduvi tahan sivi cuan, cuñi chi catyi “yuu”.

Nu caná ra Jesús chi ra Felipe ta chi ra Natanael

⁴³ Cha inga quivi tyaá ra Jesús cuhva cuhun ra ityi Galilea. Tyicuan ta ñañihí ra chi ra Felipe. Ta catyi ra chi ra:

—Cunyicon chii —catyi ra.

⁴⁴ Ra Felipe ihya, ra ñuu Betsaida cuví ra. Ta yucuan iyó tucu ra Andrés ta ra Pedro. ⁴⁵ Tyicuan ta chahan ra Felipe chinanducú ra chi ra Natanael. Ta catyi ra chi ra:

—Nyehe ndi chi ra cha tyaá ra Moisés tuhun nu libru ley, ta suri tuhun ra catyaá tucu ra profeta Nyoo ta cha naha. Jesús nañi ra. Sehe ra José ra ñuu Nazaret cuví chi ra.

⁴⁶ Ta catyi ra Natanael:

—¿Atu cuví quita cha vaha ñuu Nazaret cuan? —catyi ra chi ra Felipe.

Ta nacahan ra Felipe ta catyi ra:

—Ñaha ta nyehun —catyi ra.

⁴⁷ Yahá cuan ta cuachaa ra Natanael nu nyaá ra Jesús. Ta cuhva cha nanyehé ra Jesús tyi vachi ra, ta quichaha catyi ra:

—Ihya vachi noo ra cha ndicha ndicha ra ñuu Israel cuví. Ta ña tuhvá ra sandavi ñaha —catyi ra Jesús tuhun ra Natanael.

⁴⁸ Tyicuan ta ra Natanael ndaca tuhun ra chi ra:

—¿Yoso caa cha ñohó nuun chii?

Ta ra Jesús nacahan ra ta catyi ra:

—Yuhu nyehi chuun nyata ni cumañi ca cana ra Felipe chuun, cuhva cha nyaún chaha tun higo cuan —catyi ra Jesús chi ra.

⁴⁹ Tyicuan ta quichaha catyi ra Natanael:

—Sutu Mañi yuhu, yoho cuvún Sehe Nyoo. Yoho cuvún rey cuenda ndi ñu Israel. ⁵⁰ Ta ra Jesús catyi ra chi ra Natanael:

—¿Atu chinó iñun chii cha cuenda vatyi catyi tyi nyehi chuun chaha tun higo? Soco nahnu ca cha cunyahun ican saha cuan —catyi ra chi ra.

⁵¹ Ta catyi tucu ra Jesús:

—Cha ndicha catyi chi ndo vatyi nyoho cunyehe ndo andivi cuitanuña ta cuaha ángel Nyoo cundaa ra, ta cunoo ra siqui yuhu ra cuví Rayi cha quichi nya gloria —catyi ra Jesús chi ra.

2

Noo vico tandaha iyó ñuu Caná ityi Galilea

¹ Yahá uñi quivi ta chicoo noo vico tandaha ñuu Caná ityi Galilea. Ta sihi ra Jesús ñohó ña yucuan. ² Ta suri canacatyí tuhun ñu chi ra Jesús ta chi ra cacticá noo chihin ra cha cuhun coyo ra vico tandaha cuan. ³ Tyicuan ta cuahan coyo ra. Ta nyicú ñu vico, ta ndihí vinu. Tyicuan ta catyi sihi ra Jesús chi ra:

—Ñahri ca vinu ñu —catyí ña.

⁴ Ta catyí ra Jesús chi ña:

—¿Ñáá cha cuñún cha sacuvi yuhu, Maha? Ta chaa ca cuhva cha sañahi chi ndo yóo ra cuví yuhu —catyí ra chi ña.

⁵ Soco sihi ra catyí ña chi ra cha catyinyeé vico cuan:

—Sacuvi ndo tandihi cha catyí ra chi ndo —catyí ña chi ra.

⁶ Ta tayucú iñu tahan quisi yuu nahnu cha quihí ndutyá cha catuhvá ra Israel chotyíñó nu tuhvá ra canacatyá xaan ra ndaha ra tari cuhva costumbre cha ca iyó maa ra. Ta tahan tahan quisi cuan chitahan tari uvi xico uchi o uñi xico uchi litru ndutyá. ⁷ Tyicuan ta catyí ra Jesús chi ra cha catyinyeé vico cuan:

—Sacutu ndo quisi ihya chihin ndutyá —catyí ra chi ra.

Tyicuan ta sacuvi ra tari cuhva catyí ra.

⁸ Tyicuan ta catyí ra Jesús chi ra:

—Vityin tava ndo suhva ta cunyaca ndo chi ra cuví nuu cuenda vico ihya —catyí ra Jesús chi ra.

Ta tyicuan caa casacuví ra. ⁹ Ra cuví nuu cuenda vico cuan chihí ra ndutyá cha nanduví vinu cuan. Soco ña chitó ra nya quichi. Maa ri maa ra catyinyeé vico cuan cachitó ra, vatyí maa ra catava ndutyá cuan. Tyicuan ta ra cuví nuu cuenda vico cuan cana ra chi ra cha tandaha cuan. ¹⁰ Ta catyí ra chi ra:

—Tandihí ñáyivi, xihna ca vinu vaha tuhvá ñu tava. Yaha cuan ta tatu cha cachihí xaan ñu, tyicuan ta tava ñu vinu pehe ca. Soco yoho chicumí vahun vinu vaha. Ta nya vityin tavon —catyí ra chi ra.

¹¹ Cha sacuvi ra Jesús ñuu Caná ityi Galilea, ican cuan cuví milagru cha xihna ri savaha ra vatyí sañaha ra cha cahnu cuví ra. Ta ra cachicá noo chihin ra cachino iñi ra chi ra vatyí ican ra cuví ra cha tachí Nyoo.

¹² Cha yaha cuan ta cuahan ra ñuu Capernaum. Ta cuahan sihi ra, yañi ra ta ra cachicá noo chihin ra. Ta yucuan chinyicu ñu suhva quivi.

Nu tavá ra Jesús chi ñu caxicó chichi vehe ñuhu cahnu

(Mt. 21.12-13; Mr. 11.15-18; Lc. 19.45-46)

¹³ Cha cuñí chaa quivi vico cha nañí pas-cua cha sanducahnú ñu Israel. Yucuan chaha cuahan ra Jesús ñuu Jerusalén. ¹⁴ Ta chaá ra ñuu cuan, ta quihví ra nuquehe vehe ñuhu cahnu cuan, ta nanyehé ra chi ra caxicó sindiquí, mbee, ta paloma. Ta na nyehé tucu ra chi ñu nyicú nasama xuhun chí ñáyivi. ¹⁵ Ta cha nyehé ra Jesús cha tyicuan caa, savaha ra noo yoho. Ta chí-hin yoho cuan tavá ñehe ra chí tandihí ñu nuquehe vehe ñuhu in ri chihin mbee ta

chihin sindiquí sana ñu. Ta ñu nasamá xuhun cuan, sacuitá ra xuhun ñu nu ñuhu ta sanduva ra mesa ñu. ¹⁶ Ta catyí ra chí ñu xicó paloma cuan:

—¡Tava ndo paloma chiña ihya! ¡Ma nasaha ndo vehe Suti tari noo nuyahví! —catyí ra chí ñu.

¹⁷ Tyicuan ta ra cachicá noo chihin ra, canicohon iñi ra cha catyí nu tutu Nyoo tyehé caa: “Cuiño xain chihin vehun”, catyí chí, nicohon iñi ra.

¹⁸ Tyicuan ta quichaha candaca tuhun ra cacuví nuu chí ñu Israel chí ra:

—¿Ñáá seña cuhvon chí ndi ta sañahun vatyí chahá Nyoo ityi chuun cha sacuvun tyehé caa? —catyí ra chí ra.

¹⁹ Ta nacahan ra Jesús ta catyí ra:

—Satani ndo vehe ñuhu ihya, ta chichi cha uñi quivi, yuhu cusanandai inga chaha —catyí ra chí ra.

²⁰ Tyicuan ta quichaha cacatyí ra cuan chí ra:

—Uvi xico iñu cuiya cañoño ra casavaha ra vehe ñuhu ihya. Ta yoho catyún tyi chichi cha uñi quivi cusanandaun inga chaha —catyí ra chí ra.

²¹ Soco vehe ñuhu cha cahan ra Jesús tuhun, ican cuví coño ñuhu ra. ²² Yucuan chaha ra cachicá noo chihin ra canicohon iñi ra tuhun ihya quivi nandoto ra Jesús. Ta cutuñi iñi ra vatyí tuhun cha nyaá nuu tutu Nyoo cahán chí cuenda ra Jesús. Ta canachino iñi ra tuhun cahan ra Jesús ta tuhun cha nyaá nuu tutu Nyoo.

Ra Jesús chitó ra cha caá añima ñáyivi

²³ Quivi cha ñohó ra Jesús Jerusalén, quivi vico pascua cuan, cuaha xaan ñu nachino iñi ñu chí ra cha cuenda cha cuaha xaan milagru sacuví ra. ²⁴ Soco ra Jesús ña cuní iñi ra nyehé ra chí ñu vatyí chitó ra cha caá añima tandihí ñu. ²⁵ Ña chiñuhú ri cha nacatyí yo chí ra yoso caa ñáyivi, vatyí maa ra chitó ra ñáá cha caá chichi añima ñu.

3

Nu ndatuhún ra Nicodemo chihin ra Jesús

¹ Chiyó noo ra fariseo cha nañí Nicodemo. Ta cuví ra noo ra cuví nuu chí ra ñuu Israel.

² Ra Nicodemo ihya, chahan ra nu nyaá ra Jesús noo cha cuaa. Ta catyí ra chí ra:

—Maestro, chitó ndi vatyí Nyoo tachí chuun quichi sañahun chí ndi. Vatyí yori ñáyivi cuví sacuvi milagru tahan cha sacuvún, tatu yori Nyoo nyaá chihin ñu —catyí ra chí ra Jesús.

³ Tyicuan ta catyí ra Jesús chí ra:

—Cha ndicha catyí chuun vatyí tatu ma nacacu chaa ñáyivi inga chaha, ma cuví nyehé ñu nu nyacá ñaha Nyoo —catyí ra.

⁴ Tyicuan ta ndacá tuhun ra Nicodemo ta catyí ra:

—¿Yoso caa cuví cacu noo rayi inga chaha tatu cha chahnu ra? ¿Atu cuví ndihví ra chichi sihi ra ta nacacu chaa ra inga chaha? —catyí ra.

⁵ Nacahan ra Jesús ta catyí ra:

—Cha ndicha catyí chuun vatyí ñima chihin cha cacu ri ñáyivi chihin coño ñuhu ñu ta cuví quihví ñu nu nyacá ñaha Nyoo. Soco ñiñi tucu cuñi chí cha nacacu ñu chihin Tatyí li Nyoo. ⁶ Vatyí ñáyivi cha cacú chihin coño ñuhu, coño ñuhu ri nyisó ñu. Ta ñu cha nacacú chaa chihin Tatyí li Nyoo, iyó Tatyí li Nyoo añima ñu. ⁷ Ma iyo cuñun cha catyí chuun tuhun ihya vatyí tandihí ñu, cuñi chí nacacu chaa ñu. ⁸ Tari caá tatyí tandihí ri ityi nu cuñi chí ta chihún cayú chí, soco ña chitón nya ityi quichi chí, ni nya ityi cuahan chí; ta tyicuan caa tandihí ñu nacacú chihin Tatyí li Nyoo —catyí ra Jesús chí ra.

⁹ Tyicuan ta ndacá tuhun tucu ra Nicodemo inga chaha chí ra:

—¿Yoso caa cuahan tuhun ihya? —catyí ra chí ra.

¹⁰ Nacahan ra Jesús ta catyí ra:

—Yoho cha cuvún noo ra sacuaña cuenda ñu Israel, tahán chí coton tuhun ihya. ¹¹ Cha ndicha catyí chuun vatyí cahín cha chité ta cuví cha ndaa cha nyehí. Soco nyoho ña chinó iñi ndo cha catyí ñdo. ¹² Tatu ña chinó iñi ndo chí nu cahín tuhun ñáyivi ihya chihin ndo, ¿yoso caa chino iñi ndo tu cahín tuhun andivi chihin ndo?

¹³ Yori chahan andivi chinyehé yoso caa iyó. Noo ri yuhu Rayi cha quichí nya gloria nyehí, vatyí yucuan iyé. ¹⁴ Tari nacatacaá ra Moisés noo coo cha chino chihin caa nu noo chiqui ndi, tyicuan caa cucunatacaá tucu ñu chí yuhu Rayi cha quichi nya gloria, ¹⁵ tacuhva vatyí tandihí ñu cha chinó iñi chí, ma cunaa ñu. Soco coo ñu ñáyivi cha ma naa ca maa.

Nyoo cuñi xaan ra chí ñáyivi

¹⁶ Vatyí Nyoo cuñi xaan ra chí tandihí ñáyivi iyó siquí ñuhu ñáyivi. Yucuan cuenda chahá ra vatyí cuví Sehe mañi ra nu cruzi cha cuenda ñu. Tacuhva vatyí tandihí ñu cha chinó iñi chí Sehe ra, ma cunaa ñu, soco coo ñu noo ñáyivi cha ma naa ca maa. ¹⁷ Nyoo ña tachí ra chí Sehe ra siquí ñuhu ñáyivi vatyí sacunaa ra chí ñáyivi, soco tachí ra chí ra na sacacu ra añima ñu tacuhva ma cuhun ñu anyaya cha catyí cuatyí ñu.

¹⁸ Vatyí ñu chinó iñi chí Sehe Nyoo ma cunaa ñu, soco ñu ña chinó iñi chí ra, cha cuanaa ñu cha cuenda cha ña chinó iñi ñu chí noo ri Sehe mañi Nyoo. ¹⁹ Ñu ña chinó iñi, cha cuanaa ñu. Vatyí quivi quichí ra cuví ñuhu ndichin cha sacundichín siquí ñuhu ñáyivi, ña natijn cuenda ñu chí ra tyi tahañ

ca iñi ñu nu ñaa iñi vatyí nyacuví ñu cha ña vaha. ²⁰ Tandihí ñu cha nyacuví cha ña vaha, ña tahán iñi ñu ñuhu ndichin, vatyí coto quetuvi cha ña vaha cha nyacuví ñu. ²¹ Soco ñu nyacuví cha ndicha, nanyitá ñu nu ndichin tacuhva na cundichin nyehe ñáyivi vatyí sacuví ñu cuhva cuñi Nyoo vatyí nyaá ra chihin ñu —catyí ra Jesús.

Nu cahán ra Juan, ra sacondutyá, tuhun ra Jesús inga chaha

²² Cha yaha tuhun ihya, ra Jesús chihin ra cachicá noo chihin ra cuahan coyo ra nu cuví Judea. Ta candoo ra suhva quivi yucuan, vatyí casacondutyá ra chí ñáyivi. ²³ Tyicuan caa tucu ra Juan cuan ñohó ra sacondutyá ra chí ñáyivi nu cuví Enón yatyin ri nu cuví Salim, vatyí yucuan ñohó cama ndutya. Ta ñáyivi chaá coyo ñu ta condutya ñu. ²⁴ Tuhun ihya cuví ta ni cumañi ca catyihí ra chí ra Juan vehe caa.

²⁵ Tyicuan ta suhva ra nyicón chí ra Juan quichahá cuví yuhu ra chihin noo ra ñuu Israel siquí yoso caa sandundi ñáyivi chí ñu nuu Nyoo. ²⁶ Tyicuan ta cuahan coyo ra nu nyaá ra Juan. Ta catyí ra chí ra:

—Maestro, ra cha ñoho chuhun inga chiyo yuvi cahnu Jordán, ra cha cahun tuhun chihin ndi, vityin sacondutyá ra ta tandihí ñu nanyicón ñu chí ra —catyí ra chí ra.

²⁷ Tyicuan ta ra Juan catyí ra chí ra:

—Ni noo yo ta ñahri cha cuví sacuvi yo, tyehé ta ña chahá Nyoo tunyee iñi ra chí yo. ²⁸ Suri maa ndo chiñi vaha ndo cha cahín vatyí yuhu ñima ra Cristo cuví. Noo ra cha tachí ri Nyoo ityi nuu ra cuví yuhu. ²⁹ Vatyí noo vico tandaha, ra nyaá xiin ñaha tyivaa cuan, ican ra cuan cutandaha chihin ña. Ta ra tahañ ra nyaá ra yatyin ri cuan. Ta cusú cuñi ra chíñi ra tuhun cahán ra cha cuatandaha. Ta tyicuan caa tucu yuhu, sií cuñi vatyí naquehen ñáyivi tuhun cahán ra Jesús ta nyicón ñu chí ra. ³⁰ Maa ra cahnu ca ra cuacuví ra. Ta yuhu cucuee que vatyí tyicuan caa tahán maa chí.

Ra quitá nya gloria ta quichi siquí ñuhu ñáyivi

³¹ Ra cha quichí nya gloria, cahnu ca ra cuví ra cha nuu tandihí ñáyivi. Vatyí ra iyó siquí ñuhu ñáyivi, cuenda ñuhu ñáyivi cuví ra. Ta cahán ra tuhun ñuhu ñáyivi. Soco ra quichí nya gloria, cahnu ca ra cuví ra. ³² Ta cahán ra cha nyehé ra ta cha chíñi ra, soco yori chinó iñi tuhun cahán ra. ³³ Soco tatu nya noo yo chinó iñi yo chí ra, cuví yo noo cha ndaa vatyí Nyoo ndicha cha cahán ra. ³⁴ Vatyí ra cha tachí Nyoo chí, tuhun Nyoo cahán ra vatyí Nyoo ña tyicuhvá ra Tatyí li ra chahá ra chí ra. Chahá ra nani Tatyí li ra chí ra. ³⁵ Nyoo Sutu yo cuñi ra chí Sehe ra. Ta natyaa ra tandihí ndaha ra. ³⁶ Ñu cha chinó iñi chí Sehe Nyoo, iyó ñu noo ñáyivi

chaa cha ma naa ca maa. Soco ñu ña cuñí chino ñi chī ra, ma coo ñu ñayiví cuan. Ta cutachi tuñi Nyoo chi ñu.

4

Nu ndatuhun ra Jesús chihin noo ñaha Samaria

¹ Cachitó ra cuví fariseo vatyí cuaha ca ñáyiví nyicón chí ra Jesús ican saha ra Juan. Ta cuaha ca ñu sacondutyá ra ñandíhi.

² Vasi ñima maa ra Jesús sacondutyá, soco ra cachicá noo chihin ra, ican sacondutyá. ³ Ta quiví chitó ra Jesús vatyí cachito ra tuhun ihya, ta quitá ra Judea cuan ta cuanuhu ra nya Galilea. ⁴ Ta ityí cuanuhu ra, tahan chí yaha ra nu cuví Samaria. ⁵ Yucuan ta chaá ra noo ñuu cha nyaá ityí Samaria cha nañi Sicar yatyin nu nyaá ñuhú ra Jacob nu chahá ra chí ra José sehe ra. ⁶ Ta yucuan nyaá noo yavi ndutya cha catyí ñu tyí chí ra Jacob cuví. Ta vatyí chitatú xaan ra Jesús cha chica ityí ra, ta chicunyaá ra yuhu yavi cuan, ñáá cuhva hora cuví. ⁷⁻⁸ Ta ra cachicá noo chihin ra, yori ra canyicú vatyí cuahan coyo ra chichí ñuu, cuasata ra cha cacachi ra. Tyicuan ta chaá noo ñaha Samaria cuatava ña ndutya chichí yavi cuan. Ta quichaha catyí ra Jesús chi ña:

—Cuhva chiin ndutya cohi —catyí ra chi ña.

⁹ Tyicuan ta ñaha Samaria cuan catyí ña chí ra Jesús:

—Yoho cha cuvún noo ra ñuu Israel, ¿yoso caa cha chicón ndutya cohun chí yuhu cha cuví ñaha Samaria? —catyí ña vatyí ñu Israel ña vaha iyó ñu chihin ñu Samaria.

¹⁰ Tyicuan ta ra Jesús nacahan ra ta catyí ra:

—Tyehe ta chitón cha chahá Nyoo, ta chitón yóo cha chicán ndutya chuun, maun cuacon ndutya chí. Ta yuhu cuhve ndutya nyicatú chuun —catyí ra chí ña.

¹¹ Tyicuan ta catyí ña chí ra:

—Tata, ni ñahri vihi chihin tavon ndutya ihya. Vatyí yavi ihya cono xaan. ¿Nya cuquehun ndutya nyitó cuhvon cohi? ¹² Vatyí sutu chahnu yo, ra Jacob sandoq ra yavi ihya chí yo. Ta suri ihya chihí tucu maa ra ndutya. Ta suri ihya chihí tucu sehe ra ta quití sana ra. ¿Atu cahnu ca ra cuví yoho ican saha ra cuan? —catyí ña chí ra.

¹³ Tyicuan ta nacahan ra Jesús ta catyí ra chí ña:

—Tandíhi ñu chihí ndutya ihya, cu ityí ca ñu ndutya. ¹⁴ Soco ñu chihí ndutya cha chahá yuhu, ma cu ityí ca ñu. Vatyí ndutya cha chahí chí ñu cucaña chí tari noo ndohyo chichí añima ñu tacuhva coo ñu ñayiví cha ma naa ca maa —catyí ra chí ña.

¹⁵ Tyicuan ta quichaha catyí ña chí ra:

—Tata, cuhva ndutya cuan cohi, tacuhva cha ma cu ityí que ndutya, ta ni ma quichi que quichi tave ndutya chichí yavi ihya —catyí ña chí ra.

¹⁶ Tyicuan ta ra Jesús catyí ra chí ña:

—Cuahan cuacana chí yün ta quichun —catyí ra chí ña.

¹⁷ Ta nacahan ña ta catyí ña:

—Yori yí iyó —catyí ña.

Tyicuan ta catyí ra Jesús chí ña:

—Ndicha cha cahun, vatyí yori yün iyó.

¹⁸ Vatyí cha ohon tahan yün chiyó, ta ra nyaá chuhun vityin ñima yün cuví chí ra. Ndicha tuhun cha cahún —catyí ra chí ña.

¹⁹ Cha chihí ña tuhun cahán ra, quichaha catyí ña chí ra:

—Tata, tuví ñi vatyí noo profeta cuenda Nyoo cuvún. ²⁰ Sutu chahnu ndi, ra Samaria, sacahnu ra chí Nyoo yucu ihya. Soco nyoho ñu Israel catyí ndo vatyí Jerusalén yucuan tahaén chí sacahnu yo chí Nyoo —catyí ña chí ra.

²¹ Tyicuan ta ra Jesús nacahan ra ta catyí ra chí ña:

—Chino iñun tuhun cahín chuhun. Vatyí vachi cuhva vatyí cusacahnu ndo chí Sutu yo Nyoo. Soco ña chihuhú ri cha quichi ndo yucu ihya o cuhun ndo nya Jerusalén. ²² Nyoho ñu Samaria, ña chitó ndo yóo chí sacahnú ndo. Soco nyuhu chitó ndi yóo chí sacahnú ndi. Vatyí chitó ndi vatyí cuenda noo ra Israel cuasacacu Nyoo chí ñáyiví. ²³ Soco chaa chí cuhva ta cuhva cuan nyaá yo vityin vatyí ñáyiví cha ndicha sacahnú chí Sutu yo Nyoo, cusacahnu ñu chí ra chihin añima ñu ta cha ndicha. Tari cuhva saquehen ityí Tatyí Ii Nyoo chí ñu. Vatyí Sutu yo Nyoo tyicuan caa cuñí ra cha sacuvi ñu cha sacahnú chí ra. ²⁴ Vatyí Nyoo Tatyí Ii cuví ra. Ta ñu sacahnú chí ra cuñí chí sacahnú ñu chí ra chihin cha ndicha tari cuhva saquehen ityí Tatyí Ii chí ñu —catyí ra chí ña.

²⁵ Ta nacahan ña ta catyí ña chí ra:

—Yuhu chité vatyí cuquichi ra cuví Mesías, ra Cristo, ra cuví rey chí yo. Ta quiví quichi ra, maa ra cunacatyí tandíhi chí yo —catyí ña chí ra.

²⁶ Tyicuan ta nacahan ra Jesús ta catyí ra chí ña:

—Ra cha cahún tuhun cuan, ican ra cahán chuhun —catyí ra chí ña.

²⁷ Tyicuan ta canachaá coyo ra cachicá noo chihin ra ta iyo cacuñí ra cha ndatuhún ra Jesús chihin noo ñaha síhi. Soco ni noo ra ña cañá ñi ra ndaca tuhun ra ñáá cha cuñí ra o ñáá cuenda ndatuhún ra chihin ñaha cuan. ²⁸ Tyicuan ta sandoq ña quiyí ña ta cuanuhu ña chichí ñuu. Ta catyí ña chí ñáyiví ñuu ña:

²⁹—Ñaha ndo cunyehe ndo chi noo ra cha catyí tandihi cha cai. ¿Atu ñiima ra Cristo cuví ra? —catyí ña chi ñu.

³⁰ Tyicuan ta quitã coyo ñu ñuu cuan ta cuahan coyo ñu nu nyaá ra Jesús. ³¹ Ta cha niri ca cha cumañi chaa ñu nu nyaá ra, ra cachicá noo chihin ra, saniñi ra chi ra na cachi ra chiin. Ta cacatyí ra chi ra:

—Maestro, cachi chiin —catyí ra.

³² Soco catyí ra Jesús chi ra:

—Yuhu iyó noo nyayu cuacachi, ta nyoho ña chitó ndo —catyí ra chi ra.

³³ Tyicuan ta ra cachicá noo chihin ra quichaha candaca tuhun ra chi ra tahan ra, ta catyí ra:

—¿O iyó yóo cha quichí nyaca cha cachi ra, vaha? —cacatyí ra.

³⁴ Soco ra Jesús catyí ra chi ra:

—Cha chachí yuhu ican cuví cha sacuví cuhva cuñi ra cha tachí chi ta sacuví tyiño chaha ra chii. ³⁵ Nyoho catyí ndo: “Soco cumañi ca cumi yoo ta naquehen yo cha tachí yo.” Soco yuhu catyí chi ndo vatyí nyehe ndo ta saha ndo cuenda cha cuaha ñáyivi cuñi ñu quichi ñu chihin, cuví ñu tari noo itu cha cuan ta cuñi chi cha cahnu yo niñi. ³⁶ Ra cha naquehén niñi cuan ñihi ra yahvi ra. Ta niñi cha naquehen vaha ra cuví ñu cha ñihi noo ñáyivi cha ma naa ca maa. Ta tyicuan caa cuví tacuhva vatyí ra cha tachí, ta ra cha naquehén niñi cuan iin ri cacusií cuñi ra. ³⁷ Ta iyó noo tuhun ñáyivi cha catyí vatyí siin ñu tachí ta siin ñu naquehén niñi. Ta ndicha tuhun cuan. ³⁸ Yuhu sacuhin chi ndo vatyí cucahnu ndo niñi cha iyó nu ña saha tyiño ndo. Vatyí inga ra saha tyiño. Ta nyoho nyari cucahnu ndo ta naquehen vaha ndo niñi cuan —catyí ra Jesús chi ra.

³⁹ Ta cuaha xaan ñu ñuu Samaria cuan canachinqo iñi ñu chi ra Jesús cha cuenda cha catyí ñaha cuan, vatyí catyí ña: “Catyí ra tandihi cha cai chii”, catyí ña. ⁴⁰ Ta cuhva cha cachaã coyo ñu Samaria nu nyaá ra Jesús, cha cundahví ñu nuu ra nandoo ra chihin ñu. Ta ra Jesús ndoo ra yucuan uvi quívi chihin ñu. ⁴¹ Ta cuaha ca ñu cachineqo iñi ñu cha chiñi ñu tuhun cahán maa ra. ⁴² Tyicuan ta quichaha catyí ñu chi ñaha sihi cuan:

—Vityin chinó iñi ndi, ñiima cha cuenda vatyí catyun chi ndi, socio vatyí chiñi maa ndi chihin soho ndi tuhun cahán ra, ta chitó vaha ndi vatyí ican ra cuví Cristo ra sacacú chi ñáyivi iyó siqui ñu nu ñáyivi ihya —catyí ñu.

Nu sanduvahã ra Jesús chi sehe noo ra cuví tyiño

⁴³ Cha yaha uvi quívi ta quitã ra Jesús ñuu Samaria cuan ta cuahan ra ityi nu cuví Galilea. ⁴⁴ Vatyí suri maa ra Jesús catyí ra vatyí ñáyivi ñuu noo ra cuví profeta, ra

chahá cuenda tuhun cahán Nyoo, ña sahá ñu ñáyivi chi ra. ⁴⁵ Tyicuan ta cuhva cha chaã ra Galilea, ñu iyó yucuan vaha tyiñuhu ñu chi ra, vatyí chahan coyo tucu maa ñu Jerusalén vico cuan, ta nyehe ñu cha vaha cha sacuví ra.

⁴⁶ Tyicuan ta cuanuhu tucu ra Jesús nya ñuu Caná nu cuví Galilea nu sananduví ra vinu chihin ndutya. Ta iyó noo ra cuví tyiño cuenda rey, ta iyó noo sehe ra cha cuhví ñuu Capernaum. ⁴⁷ Quívi cha chito ra cuan vatyí nachaa ra Jesús Galilea cha chahan ra Judea, chahan ra chinyehe ra chi ra, ta chican ra tumañi iñi chi ra na cuhun ra vehe ra ta sanduvaha ra chi sehe ra, vatyí cha cuñi cuii ri cuví sehe ra. ⁴⁸ Tyicuan ta ra Jesús catyí ra chi ra:

—Nyoho ma chino iñi ndo tatu ma nyehe xihna ndo noo milagru —catyí ra chi ra.

⁴⁹ Soco ra cha vaha cuan catyí ra chi ra Jesús:

—Tata, coho chihin cha numi ri vityin cha ta cuví ca sehi —catyí ra chi ra.

⁵⁰ Tyicuan ta ra Jesús catyí ra chi ra:

—Cuanuhu nya vehun. Sehun cha nduvaha ra —catyí ra chi ra.

Tyicuan ta ra cha vaha cuan chinó iñi ra tuhun cahán ra Jesús ta cuanuhu ra. ⁵¹ Ta cuhva cha cuanachaa ra nya vehe ra, quitã coyo musu ra ta cacatyí ra chi ra:

—¡Cha nduvaha sehung!

⁵² Tyicuan ta quichaha ndaca tuhun ra chi ra ñaá cuhva nduvaha ra. Ta cacatyí ra chi ra:

—Icu cuhva ca iin cha yaha hora tinyaa cahñi chi ra —cacatyí ra.

⁵³ Tyicuan ta tuví iñi ra cha vaha cuan, vatyí cuhva cuan catyí ra Jesús chi ra, “Cuanuhu vatyí sehung cha nduvaha ra.” Ta maa ra ta tandihi ñáyivi chi ra nachinqo iñi ñu chi ra Jesús.

⁵⁴ Ican ihya cuví cha cu uvi milagru cha sacuví ra Jesús cha nachaa ra Galilea cha chahan ra Judea.

5

Nu sanduvahã ra Jesús chi noo ra ña cuví caca

¹ Cha yaha tuhun cuan ta ra Jesús cuahan ra Jerusalén inga chaha vatyí ñu ñuu Israel sanducahnu ñu noo vico. ² Ta ñuu cuan iyó noo yuvehe cha nañi Yuvehe Cuenda Mbee. Ta yatyin ri nyaa noo vehe cahnu. Ta chichi vehe cuan ñohó ndutya. Ta cha chihin sahan hebreo nañi chi Betesda. Ta iyó ohon tahan corredor. ³ Ta yucuan cayucu cuaha ñu cuhví: ñu cuaa, ñu coxo, ta ñu ña cuví nacanda. Canyatú ñu ñaá cuhva nacanda ndutya cuan. ⁴ Vatyí ña naha ña naha ri ta noó noo ángel sanacanda ra ndutya cuan. Ta yóo cha quihvi xihna ca cha yaha nacanda

ndutya cuan, nduvaha ñu niri maa ñáá ca cuehe ndoho ñu. ⁵ Ta yucuan catuví noo ra cuhví cha iyó oco chahun uñi cuiya cuhví ra. ⁶ Cuhva cha nanyehe ra Jesús chí ra catuví ra yucuan, tuví ñi ra vatyi cha cañi xaan cuiya caá ra tyicuan caa. Ta ndaca tuhun ra chí ra, ta catyi ra:

—¿Atu cuñún nduvahun?

⁷ Ta ra cuhví cuan nacahan ra ta catyi ra:

—Tata, yori maa tyihi chí chichi tanque tatu cha nacandá ndutya. Vatyi tahan ri cha cuñi quihvi, inga ñu quihvi xihna ca —catyi ra cuhví cuan chí ra Jesús.

⁸ Tyicuan ta catyi ra Jesús chí ra:

—Ndjucita ta naquehen yuvun ta cacon —catyi ra chí ra.

⁹ Ta caa cuhva ri cuan nduvaha ra, naquehen ra yuvi ra, ta nacaca ra. Soco vatyi quivi nyitatu ñu cuví, ¹⁰ ra cacuví nuu chí ñu Israel catyi ra chí ra cha nduvaha cuan:

—Quivi nyitatu yo cuví vityin, ña tahan chí cuison yuvun —catyi ra chí ra.

¹¹ Ta ra cha nduvaha cuan nacahan ra ta catyi ra:

—Ra cha sanduvaha chí, ican ra catyi chí: “Naquehen yuvun ta cacon”, catyi ra chí.

¹² Tyicuan ta quichaha candaca tuhun ra chí ra, ta catyi ra:

—¿Yóo ra cha catyi chuun vatyi naquehen yuvun ta cacon?

¹³ Soco ra cha nduvaha cuan ña chitó ra yóo cha sanduvaha chí ra. Vatyi cuaha xaan ñáyivi yucuan, ta ra Jesús yori ca ra vatyi cha cuahan ra. ¹⁴ Yahá cuan ta nañihí ra Jesús chí ra chichi vehe ñuhu cahnu, ta catyi ra chí ra:

—Nyehe, vityin cha nduvahun, ma sacuví con cuatyí, coto ñáá ca cha cahnu ca cuví chuun —catyi ra chí ra.

¹⁵ Tyicuan ta chahan ra chicatyi ra chí ra Israel cuan vatyi ra Jesús cuví ra cha sanduvaha chí ra. ¹⁶ Ta cha cuenda cha sacuví ra Jesús tyehe caa quivi nyitatu ñu, yucuan chaha cuxaen xaan ra cacuví nuu chí ñu Israel chí ra Jesús. Ta cuñi ra cahñi ra chí ra. ¹⁷ Soco ra Jesús catyi ra chí ra:

—Maa Suti, nya vityin ta sahá tyiño ra. Ta yuhu tucu sahá tyiño —catyi ra.

¹⁸ Ta cha cuenda cha chahan ra tuhun ihya, xaan ca cuñi ra Israel cuan. Ta ñihi ca cuñi ra cahñi ra chí ra vatyi cuñi maa ra vatyi ña sahá ra ñáyivi quivi nyitatu ñu, ta siin rí tyi sahá ra tuhun tyi in ri cuví ra chihin Nyoo vatyi catyi ra tyi sutu ra cuví chí Nyoo.

Sehe Nyoo iyó xaan ityi chí ra cha cunyaca ñaha ra

¹⁹ Tyicuan ta ra Jesús catyi ra chí ra:

—Cha ndicha catyi chí ndo vatyi yuhu, cha cuví Sehe Nyoo, ñahri cha savahí cha

maa ri mai. Soco sacuví cha nyehí sacuví Suti. Tandihí cha sacuví Suti ta sacuví tucu mai. ²⁰ Vatyi cuñi xaan Suti chí, vatyi Sehe ra cuví chí, yucuan chaha sañahá ra tandihí cha sacuví ra chí.

Ta nahnu ca cha cusañaha ra, tacuhva cu iyo cuví ndo. ²¹ Tari sanandotó Nyoo Suti chí ndiyi, ta chahá ra ñáyivi coo ñu, tyicuan caa tucu yuhu cha cuví Sehe ra, chahí ñáyivi chí ñu cuñi mai cuhve. ²² Ta Suti Nyoo ña sandaa ra cuatyí ni noo ñu, soco chí yuhu cha cuví Sehe ra chaha ra ityi na sandai cuatyí ñáyivi.

²³ Tyicuan caa sacuví Suti Nyoo vatyi cuñi ra tyi sacahnu ñáyivi chí Sehe ra tari sacahnú ñu chí maa ra. Ñu ña sacahnú chí yuhu Sehe Nyoo, niri chí Suti ta ña sacahnú ñu. Tyi maa ra tachí ra chí yuhu cha cuví Sehe ra. ²⁴ Ta cha ndicha catyi vatyi ñu tyasohó tuhun cahín ta chinó ñi ñu chí ra cha tachí chí, iyó ñu noo ñáyivi chaa cha ma naa ca maa. Ta ma cuhun ca ñu anyaya cha catyi cuatyí ñu vatyi cha sacacu Nyoo añima ñu ndaha tuhun chí, ta nacuhva ra ñáyivi chaa coo ñu. ²⁵ Ñáyivi tari cha ndiyi cuví ñu soco cha ndicha catyi chí ndo vatyi vachí chí quivi vatyi cuñi ñu ndusu Sehe Nyoo. Ta ñu cha quichahá cha cahán ra, cucoo ñu ñáyivi cha ma naa ca maa. Ta vityin cuví quivi cha cahín tuhun. ²⁶ Vatyi Nyoo Suti iyó ra ñáyivi cha ma naa ca maa. Ta chaha tucu ra ityi chí yuhu cha cuví Sehe ra vatyi cuhve ñáyivi coo ñáyivi. ²⁷ Ta Nyoo chaha ra vatyi sandai cuatyí ñáyivi, vatyi Rayi cha quichi nya gloria cuví yuhu. ²⁸ Ma iyo cuñi ndo tuhun ihya, vatyi cuchia chí quivi vatyi ñu ndiyi chí, ñaña cucuñi ñu ndusu Sehe Nyoo. ²⁹ Ta cuquita coyo ñu chí, ñaña. Ta ñu cha sacuví cha vaha cunandoto ñu vatyi coo ñu noo ñáyivi chaa. Soco ñu ña sacuví cha vaha cunandoto ñu vatyi cuhun ñu anyaya nu cutachi tuñi Nyoo chí ñu.

Nu sañaha chí vatyi ra Jesús iyó ityi chí ra cha cuhva ra ñáyivi chaa coo ñáyivi

³⁰ Yuhu ñima noo tuhun ri mai sacuví ñáá noo cha sacuví. Nyehí cha caá añima ñáyivi yoso cuhva catyi Suti. Ta vaha cuhva nyehí vatyi ña sacuví cuhva cuñi mai, soco cuhva cuñi Suti, ra cha tachí chí. ³¹ Ta tatu suri mai cuví cha ndaa chí mai, ñahri yahvi nyaá cha ndaa cuan. ³² Soco iyó inga ra cuví cha ndaa cuenda yuhu. Ta yuhu chité vatyi cha cahán ra cuende yucuan cuví noo cha ndaa ta cha ndicha. ³³ Nyoho chindaca tuhun ndo chí ra Juan. Ta tuhun cha chahan ra, ndicha vaha. ³⁴ Soco yuhu ña chíñuhú cha cuví rayi cha ndaa cuende. Soco catyi tuhun ihya chí ndo cha cuenda cha vaha chí ndo, tacuhva vatyi chino ñi ndo chí ta cacu añima ndo. ³⁵ Ra Juan cuví ra tari noo lámpara cha cayú ta sacundichín. Ta nyoho tahan ñi ndo cusí ñi ndo nu ndichin ñuhú ra suhva ri quivi.

³⁶ Soco yuhu iyó noo cha ndaa vaha ca cha nuu cha catyí ra Juan. Vatyí tandihí cha sacuví yuhu, maa Suti catyí chíi na sacuvi. Ta ican cuví cha ndaa cha nyehé ndo vatyí ndicha vatyí maa Suti tachí chíi. ³⁷ Ta tyicuan caa tucu Suti, ra cha tachí chíi, cuví ra cha ndaa cuende. Nyoho ta cuiñí ca ndo ndusu ra. Ta ni ta nyehe ca ndo chi ra. ³⁸ Ta tuhun ra cha cahín nuu ndo, ña ndoó chi añima ndo vatyí ña chinó iñi ndo vatyí Nyoo tachí ra chíi. ³⁹ Nyoho chihin cuenda xaan sacuahá ndo nu tutu Nyoo, vatyí cuiñí maa ndo vatyí nuu cuan cuanañihí ndo ñáyiví chaá cha ma naa ca maa. Soco nu tutu Nyoo cuan, tuhun yuhu cahán chi. ⁴⁰ Ta nyoho ña cuiñí ndo quichi ndo nu nyaí tacuhva vatyí cuhve ñáyiví chaa cuan coo ndo.

⁴¹ Yuhu ña nduquí nu cuvahi nuu ñáyiví. ⁴² Vatyí yuhu ñohó nui chí nyoho ta chité vatyí ña cuiñí ndo chí Nyoo. ⁴³ Yuhu vachi cuenda Suti ta nyoho ña naquehén ndo tuhun cahín. Soco tatu inga ra vachi ra cuenda maa ra, chí ra cuan nachino iñi ndo. ⁴⁴ Nyoho ña cuví chino iñi ndo chíi vatyí cuiñí ndo cuvaha ndo nu tahan ndo. Ta ña nducú ndo nu cuvaha ndo nuu Nyoo cha noo tuhun ri maa iyó. ⁴⁵ Ma cuiñí ndo vatyí cutyaa yuhu cuatyí chaha ndo nuu Suti. Ra Moisés cuví ra tyaá cuatyí chaha ndo vatyí ña sacuví ndo ley cha tyaá ra. Ta ley ra cuiñí maa ndo vatyí cunyaca chí chí ndo andiví. ⁴⁶ Vatyí tyehe ta chinó iñi ndo tuhun cahán ra Moisés, chinó tucu iñi ndo tuhun cahán yuhu. Vatyí tuhun yuhu ican tyaá ra. ⁴⁷ Soco tatu ña chinó iñi ndo tuhun cha tyaá ra, ¿yoso caa cuchino iñi ndo tuhun cahán yuhu? —catyí ra Jesús chí ra cacuví nuu chí ñu Israel.

6

Nu chahá ra Jesús cha cachi ohon mil rayíi

(Mt. 14.13-21; Mr. 6.30-44; Lc. 9.10-17)

¹ Cha yahá cuan, ra Jesús cuahan ra inga chiyo miñí cahnu cha nañí Tyañuhu Galilea. Ta surí miñí cuan nañí chí Miñí Tiberias. ² Cuaha xaan ñáyiví cuahan nyicon chí ra cha cuenda vatyí nyehé ñu milagru cha sacuví ra vatyí sanduvahá ra chí ñu cuhví. ³ Tyicuan ta ra Jesús ndaa ra noo yucu ta chicunyaá ra yucuan chihin ra cachicá noo chihin ra. ⁴ Ta cha nyañaa quiví vico cha nañí pascua cha sanducahnú ñu Israel. ⁵ Cha nanyehé ra Jesús vatyí cuaha ñáyiví nyicón chí ra, ta quichahá catyí ra chí ra Felipe:

—¿Yoso caa cusata yo cha cachi tandihí ñáyiví cuaha ihya? —catyí ra chí ra.

⁶ Soco catyí ri maa ra chí ra Felipe cha nducú nyehe ra chí ra ñáá catyí ra, vatyí ra Jesús chitó vaha ra ñáá cha cuasacuví ra.

⁷ Tyicuan ta nacahán ra Felipe ta catyí ra:

—Yahvi cha quehen yo cha sahá tyiño yo ucha tahan yoo ta ma ñilhi sata yo cha cachi ñu chiin chiin —catyí ra Felipe.

⁸ Ta ra Andrés nonga ra nyicón chí ra Jesús, ta yañi ra Simón Pedro cuví chí ra, catyí ra chí ra Jesús:

⁹ —Ihya nyaá noo ra cuehe luhlu nyisó cue ohon tahan pan cebada ta uvi tahan tiyaca. Soco ¿nyata cuví ihya ta cuaha ñáyiví ihya? —catyí ra Andrés.

¹⁰ Tyicuan ta ra Jesús catyí ra chí ra:

—Catyí ndo chí tandihí ñu na cunyicu ñu —catyí ra.

Iyó vavaha cuhu yucuan ta chicunyicu ñu ta cha ohon mil rayíi, ta siin ri ñusihí chihin ra cuatyaa. ¹¹ Tyicuan ta quehen ra Jesús pan cuan ta cha yahá nacuhva ra tyahví nyoo chí Nyoo, chaá ra chí ra cachicá noo chihin ra. Ta ra cachicá noo chihin ra casachá ra chí tandihí ñu canyicú cuan. Suri tyicuan caa sacuví tucu ra chihin tiyaca cuan, chaá ra cachi ñu nyacua nya cha chitu chí ñu. ¹² Ta cuhva cha ndaha iñi ñu, ra Jesús catyí ra chí ra cachicá noo chihin ra:

—Nacõehe ndo yiquín cha ndoo tacuhva vatyí ñahri cha tiví —catyí ra chí ra.

¹³ Canacõehe ra, ta casacutú ra uchi uvi tahan tica chihin yiquín cha ndoo cuan cha cuenda ohon tahan pan cuan. ¹⁴ Tyicuan ta cha yahá nyehe ñáyiví cuan milagru cha savahá ra Jesús, ta catyí ñu:

—Ican ndicha cuií ra ihya cuví profeta, ra chahá cuenda tuhun cahan Nyoo cha nyaá cha quichi siquí ñuhu ñáyiví ihya —catyí ñu.

¹⁵ Soco tuví iñi ra Jesús vatyí cuiñí ñu quehen ñu chí ra chihin fuerza vatyí sacuví ñu rey chí ra. Ta cuahan ri ra nu sucun yucu cuan inga chaha vatyí cunyaa notuhun maa ra.

Nu chicá ra Jesús nu ndutya

(Mt. 14.22-27; Mr. 6.45-52)

¹⁶ Ta cha cuaa, ta noo coyo ra cachicá noo chihin ra Jesús yuhu miñí cuan. ¹⁷ Ta quihví coyo ra chichi canoa ta cuayaha sava ra mahñu miñí cuan vatyí cuchaa ra Capernaum. Cha cuña ta ra Jesús suri cha ta ndichí ca ra. ¹⁸ Tyicuan ta chaá noo tatyí ñihí. Ta iyo ndicuitá ndutya miñí cuan. ¹⁹ Tyicuan ta cha cayahá ra chihin canoa cuan tari noo cha ohon o iñu kilómetro, ta cananyehé ra chí ra Jesús suri chicá ra nu ndutya cuan cuachaa ra nu nyaá canoa cuan, ta canayuhví ra. ²⁰ Soco ra Jesús catyí ra chí ra:

—¡Yuhu cuví, ma yuhvi ndo!

²¹ Tyicuan ta chihin cha casí cuiñí ra caquehen cuenda ra chí ra Jesús chichi canoa. Tyicuan ta tañi ri ta cachaa ra yuhu miñí nu cuahan coyo ra.

Nu nanducú ñáyiví chí ra Jesús

²²Tuvi inga quivi cuan cha ñaha cuiri chitó ñáyivi cha ndoo inga chiyo miñi cuan vatyi ra cachicá noo chihin ra Jesús cuahan coyo ra chihin noo canoa cha iyó cuan. Vatyi noo ri maa iyó. Ta chitó ñu tyi ña cuahan ra Jesús chihin ra. ²³Soco chaq coyo ca canoa cha quitá coyo ñuu Tiberias. Chaq chi yatyin ri ityi nu cachachí ñu pan, yaha cha nacuhvá Sutu Mañi yo tyahvi nyoo chi Nyoo. ²⁴Tyicuan ta cha nanyehé ñu tyi yori ra Jesús yucuan ta ni ra cachicá noo chihin ra, quihvi coyo ñu chichi inga canoa cuan ta cuahan ñu nya Capernaum cuananducú ñu chi ra.

Ra Jesús cuví pan cha chahá ñáyivi chaa cooyo

²⁵Cha chaq coyo ñu inga chiyo miñi cuan, nañihí ñu chí ra Jesús. Ta ndacá tuhun ñu chí ra:

—Maestro, ¿ama chaun ihya? —catyí ñu chí ra.

²⁶Soco ra Jesús catyí ra chí ñu:

—Cha ndicha catyí chi ndo vatyi nyoho nanducú ndo chii soco cha cuenda vatyi chachí ndo nyacua nya cha chítu chí ndo. Soco ñima vatyi nyehé ndo milagru cha sacuví. ²⁷Ma saha tyiño ndo cuenda nyayu cha ndihi, soco saha tyiño ndo cuenda nyayu cha ña ndihí ta chahá chi noo ñáyivi chaa cha ma naa ca maa coo ndo. Ican ihya cuví nyayu cha cucuhve chí ndo vatyi Nyoo Suti tyaa tyiño cuan chí vatyi yuhu cuví Rayi cha quichi nya gloria —catyí ra Jesús.

²⁸Tyicuan ta quichahá ndaca tuhun ñu chí ra ta catyí ñu:

—¿Ñáa cha cuví sacuvi ndi tacuhva sacuvi ndi cuhva cuñi Nyoo? —catyí ñu.

²⁹Tyicuan ta ra Jesús catyí ra chí ñu:

—Cha cuñi Nyoo cha sacuvi ndo ican cuví ihya: Cha chíno iñi ndo chí yuhu, ra cha tachí ra chí —catyí ra Jesús chí ñu.

³⁰Ta candacá tuhun tucu ñu chí ra, ta catyí ñu:

—¿Ñáa seña cuhvon chí ndi tacuhva vatyi nyehé ndi ta chíno iñi ndi chuun? ¿Ñáa cha cuasacuvun? ³¹Sutu chahnu ndi chachí ñu maná chiqui ndi nu yori ñáyivi iyó quivi cuan, tari catyí tuhun Nyoo: “Nyoo chahá ra pan cha quichí ityi andivi cachi ñu” —catyí ñu chí ra Jesús.

³²Ta ra Jesús nacahan ra ta catyí ra:

—Cha ndicha catyí chí ndo. Ñima ra Moisés chahá pan cha quichí ityi andivi cachi ñu, soco Nyoo Suti cuví ra chahá pan cha ndicha vaha cha quichí ityi andivi.

³³Vatyi pan cha chahá Nyoo, ican cuví ra cha noq ityi andivi. Ta ican cuví ra cha chahá noo ñáyivi chaa coo ñu iyó siqui ñuhu ñáyivi —catyí ra Jesús.

³⁴Tyicuan ta quichahá cacatyí ñu chí ra:

—Tata, cuhva pan chiña cachi ndi tyicuan ri maa —catyí ñu.

³⁵Ta nacahan ra Jesús ta catyí ra chí ñu:

—Yuhu cuví pan cha chahá cha conyito añima ndo. Ñu vachi nu nyaí ma cusoco ca añima ñu, ta ñu chino iñi chii ma cu ityi ca maa añima ñu. ³⁶Soco cha yaha catyí chí ndo vatyi nyoho ña chíno iñi ndo vasi cha nyehé ndo chii. ³⁷Tandihí ñáyivi cha chahá Nyoo Suti chii, vachi ñu nu nyaí, ta ñu vachi nu nyaí, naqehén cuende chí ñu.

³⁸Vatyi yuhu quichí ityi andivi soco ñima cha cuenda cha sacuvi cuhva cuñi mai, soco sacuvi cuhva cuñi ra cha tachí chii. ³⁹Ta cuhva cuñi ra cha tachí chii, ican cuví ihya: cha ma sacunai ni noo ñu cha chahá ra chii, tacuhva vatyi sanandote chí ñu nu cuandihí quivi. ⁴⁰Suti, ra cha tachí chii, cuñi ra vatyi tandihí ñáyivi cha nyehé chí yuhu ra cha cuví Sehe Nyoo, ta chino iñi ñu chii, coo ñu noo ñáyivi cha ma naa ca maa. Ta suri yuhu cusananodote chí ñu nu cuandihí quivi —catyí ra Jesús chí ñu.

⁴¹Cha cuenda cha cahan ra Jesús tyehe caa, ñu Israel quichaha cacahan nyaa ñu chí ra vatyi catyí ra: “Yuhu cuví pan cha quichí ityi andivi”, catyí ra. ⁴²Tyicuan ta quichaha catyí ñu:

—¿Atu ñima ra cuví ra Jesús, sehe ra José vii? Yoó ñohó nuu yo chí sutu ra ta chí sihi ra. ¿Yoso caa cha catyí ra vatyi ityi andivi quichí ra? —catyí ñu.

⁴³Tyicuan ta ra Jesús catyí ra chí ñu:

—Sandihí ndo tuhun cha cahan nyaa ndo. ⁴⁴Yori maa ñu quichi nu nyaí tatu ñima Suti, ra cha tachí chii, cana chí ñu. Ta cusananodote chí ñu nu cuandihí quivi. ⁴⁵Nu libru cha catyaa ra profeta Nyoo ta cha naha catyí chí tyehe caa: “Nyoo cusañaha ra chí tandihí ñáyivi.” Yucuan chaha vatyi ñu cha tyasohó tuhun cahan Nyoo Suti ta cutuhvá ñu tuhun cahan ra, ican ñu vachi nu nyaí.

⁴⁶Ñima cha cuenda vatyi nyehé ñu chí Nyoo Suti, vatyi yori nyehé chí ra. Soco noo ri mai nyehé chí ra. Ta iqen cuví ra cha quitá nu nyaá ra. ⁴⁷Cha ndicha catyí chí ndo vatyi ñu chíno iñi chii coo ñu noo ñáyivi chaa cha ma naa ca maa. ⁴⁸Yuhu cuví pan cha chahá cha conyito añima ndo. ⁴⁹Sutu chahnu ndo chachí ñu maná chiqui ndi cuan, soco suri cachihí ñu. ⁵⁰Soco yuhu, tuhun pan cha quichí ityi andivi cachi chihin ndo, vatyi nya ñu cachi pan cuan, ma cuví añima ñu. ⁵¹Suri mai cuví pan nyitó cha quichí ityi andivi. Yoó cha cachi pan ihya coo ñu tyicuan ri maa. Pan cha cuhva yuhu, ican cuví coño ñuhi. Ta cuhve ñáyivi cha cuenda tandihí ñáyivi iyó siqui ñuhu ñáyivi —catyí ra Jesús chí ñu.

⁵²Tyicuan ta ra Israel cuan quichahá candatuhun ra chihin tahan ra ta cacatyí ra:

—¿Yoso caa cuhva ra cha cachi yo coño ñuhu ra?

⁵³ Ta ra Jesús catyí ra:

—Cha ndicha catyí chi ndo, yuhu cuví Rayii cha quichí nya gloria, ta tatu nyoho ta ma cachi ndo coño ñuhi, ta tatu ma coho ndo niñi, ma cuví coo ndo ñayiví chaa. ⁵⁴ Ñu chachí coño ñuhi ta chihí ñu niñi, iyó ñu noo ñayiví chaa cha ma naa ca maa. Ta yuhu cusandote chi ñu nu cuandíhi quivi. ⁵⁵ Vatyí coño ñuhi ican cuví pan cha ndicha vaha cha tahán chi cachi ndo, ta niñi cuví vinu cha ndicha vaha cha tahán chi coho ndo. ⁵⁶ Ñu chachí coño ñuhi ta chihí niñi, ñin ri cuví ñu chihin. Ta mai ñin ri cuví chihin ñu. ⁵⁷ Suti ra tachí chii, Nyoo nyitó cuví ra. Ta yuhu iyé chihin tunyee iñi ra. Ta suri tyicuan caa tucu ñu chachí coño ñuhi, coo ñu chihin tunyee iñi iyó chii. ⁵⁸ Tuhun pan cha quichí ityi andiví cahín. Pan ihya ñima tari maná cha chachí sutu chahnu ndo, vatyí suri chihí ñu. Ñu chachí pan cha cuví coño ñuhi, coo ñu tyicuan ri maa —catyí ra Jesús.

⁵⁹ Ican tuhun ihya sañaha ra Jesús nu ndu ñin ri ñu chichi vehe ñuhu Capernaum.

⁶⁰ Cuaha xaan ñayiví nyicón chi ra Jesús. Ta cuhva cha chihí ñu tuhun ihya catyí ñu:

—Tuhun cha cahán ra ihya, yíi xaan cha natiin cuenda yo. Yori cuví quichaha tuhun cahán ra —catyí ñu.

⁶¹ Tyicuan ta tuví iñi ra Jesús vatyí ña cuñí ñu naquehen ñu tuhun cuan. Ta ndaca tuhun ra chí ñu:

—¿Atu quiñi cuñí ndo cha cahín tuhun ihya? ⁶² Ta ¿yoso caa sacuví ndo tatu nyehe ndo chí yuhu Rayii cha quichi nya gloria nandaa xica tiquí inga chaha ityi nu quite quivi xihna ri? ⁶³ Tatyí li Nyoo ican cuví cha chahá ñayiví chaa. Coño ñuhu, ña tyinyeé chí coo yo ñayiví cuan. Ta tuhun cha cahín chihin ndo, Tatyí li Nyoo cuví ta chahá chí cha conyito añima ndo. ⁶⁴ Soco yihí suhva ndo cha ña chinó iñi ndo chii —tyicuan caa catyí ra Jesús.

Vatyí nya quivi xihna ri ta chitó ra yóo cha ña chinó iñi chí ra ta yóo cha cunaxico tuhun chí ra. ⁶⁵ Ta catyí ra:

—Yucuan chaha catyí chí ndo vatyí yori ñu cuví quichi nu nuyí tatu ñima Nyoo Suti cana chí ñu —catyí ra Jesús.

⁶⁶ Nya ndaha quivi cuan cuaha xaan ñu nyicón chí ra Jesús sandoq ñu chí ra. Ta ña chicá noo ca ñu chihin ra. ⁶⁷ Tyicuan ta ra Jesús ndaca tuhun ra chí ndihí uchi uvi tahan ra chicá noo chihin ra, ta catyí ra:

—¿Atu cuñí tucu nyoho cuhun ndo? —catyí ra chí ra.

⁶⁸ Soco nacahan ra Simón Pedro ta catyí ra:

—Sutu Mañi yuhu, ¿yóo chí cunyicon ndi? Ta noo tuhun yoho cahún tuhun ñayiví cha

ma naa ca maa coo ndi. ⁶⁹ Nyuhu chinó iñi ndi, ta ñoho nuu ndi chuun vatyí yoho cuvún ra cuví Cristo Sehe Nyoo nyitó.

⁷⁰ Ta nacahan ra Jesús ta catyí ra:

—¿Atu ñima yuhu nacachí chí ndi uchi uvi nyoho? Ta noo nyoho cuví cuihna —catyí ra.

⁷¹ Tuhun cha cahán ra Jesús ihya, tuhun ra Judas Iscariote sehe ra Simón cuví. Vatyí ra Judas cuví ra cucuhva cuenda chí ra Jesús chí ra xaan iñi chí ra, vasi noo ra cha uchi uvi cuan cuví ra.

7

Nu ña cachinó iñi yañi ra Jesús chí ra

¹ Cha yahá tuhun ihya, ta ra Jesús chicá noo ra ityi Galilea. Ña cuñí ra cuhun ra Judea vatyí ra cacuví nuu chí ñu Israel cuan cacuñí ra cacahñi ra chí ra. ² Ta cha nyaña quivi vico cha sanducahnu ñu Israel ndi cuiya ri. Ta nañi chí vico Tabernáculo. ³ Yucuan chaha yañi ra Jesús cacatýí ra chí ra:

—Ma ndoun ihya. Cuahan Judea tacuhva vatyí ñu naquehén tuhun cahún cha nyicú yucuan nyehe ñu tyiñó cha sacuvún. ⁴ Vatyí tatu cuñí yo cha cohon nuu ñayiví chí yo, ma xehe ri sacuví yo cha sacuví yo. Ta yoho tatu ndicha cha sacuvún tuhun ihya, sacuví nuu tandihí ñayiví —cacatýí yañi ra chí ra.

⁵ Tyicuan caa cacatýí ra vatyí ni yañi ra ta ña chinó iñi ra chí ra. ⁶ Tyicuan ta ra Jesús catyí ra chí ra:

—Ta chaa ca cuhva cha cuhun yuhu. Soco nyoho savahri quivi cuví cuhun ndo. ⁷ Vatyí ñayiví ña cutasi cuñí ñu nyehé ñu chí ndo, soco chí yuhu tasi cuñí ñu nyehé ñu cha cuenda vatyí cachi ri catyí chí ñu vatyí ña vaha cha nyacuví ñu. ⁸ Cuahan nyoho vico cuan. Yuhu ma cuhin vatyí ta chaa ca cuhva cha tahán chí cuhin —catyí ra.

⁹ Yahá cuan ta ndoq ra nya Galilea.

Nu ñohó ra Jesús vico Tabernáculo

¹⁰ Cha yahá cuahan coyo yañi ra Jesús, cuahan tucu maa ra vico cuan, soco xehe ri.

¹¹ Ta ra cacuví nuu chí ñu Israel cananducú ra chí ra vico cuan, ta cacatýí ra chí ra tahan ra:

—¿Nya nyaá ra cuan? —catyí ra.

¹² Ta ñayiví ñohó vico cuan cacahán ñu tuhun ra. Ta yihí ñu catyí ñu: “Noo ra vaha cuví ra.” Ta inga ñu catyí ñu: “Ña vaha ra, sandaví ñaha ra chí ñayiví”, catyí ñu.

¹³ Soco yori cahán ndichin tuhun ra cha cuenda cha yuhví ñu chí ra cacuví nuu cuan.

¹⁴ Cha cusava iyó vico ta quihví ra Jesús chichi vehe ñuhu cahnu quichaha cahan ra nuu ñayiví. ¹⁵ Ta ra cacuví nuu cuan iyó cacuñí ra ta cacatýí ra chí ra tahan ra:

—¿Yoso caa chitó ra ihya ta ña sacuahá ra? —catyí ra.

¹⁶ Ta nacahan ra Jesús ta catyí ra:

—Tuhun cha sañahí, ñima cha cuenda mai cuví, soco, cuenda ra cha tachí chii cuví. ¹⁷ Tatu yihí nyoho cha cuñí ndo sacuvi ndo cuhva cuñí Nyoo, cha coto ndo vatyí cuenda Nyoo sacote ta ñima cha cuenda mai. ¹⁸ Ra cha cahán cuenda maa, cahán ra na sacahnu ñáyivi chí ra. Soco ra nanducú cha sacahnu ñu chí Nyoo, ra cha tachí chí ra, ican ra cuan cahán cha ndicha. Ta ñahri cha sandaví ñaha ra.

¹⁹ ¿Atu ña ndicha vatyí ra Moisés chaha ley chí ndo? Soco ni noo nyoho ña quichahá ndo ley cuan. ¿Ñáá tuhun cuñí ndo cahñi ndo chí? —catyí ra.

²⁰ Ta nacahan ñáyivi ta catyí ñu chí ra:

—Noo tatyí ña vaha yihí chí yoho. Yori cuñí cahñi chuun —catyí ñu chí ra.

²¹ Ta catyí ra Jesús:

—Cha catyí noo milagru cha sacuvi quivi nyitatu yo, iyo xaan cuñí nyoho. ²² Soco ra Moisés catyí ra chí ndo vatyí sacuvi ndo costumbre circuncisión. Vasi ñima ra quichaha chihin tuhun cuan, soco ñáyivi chí ra itiyi chata, casacuvi tyicuan caa. Yucuan chaha nyoho sacuvi ndo costumbre cuan vasi tahán chí quivi nyitatu yo. ²³ Ta vityin, vaha tatu cha cuenda cha ña cuñí ndo nacahnu ndo ley ra Moisés sacuvi ndo tyicuan caa vasi quivi nyitatu yo tahán chí. Soco tatu tyicuan caa sacuvi ndo, ¿ñáá tuhun cha cuxaan ndo chíi cha cuenda vatyí sanduvahí nani coño ñuhu noo ra cuan quivi nyitatu yo? ²⁴ Ma tyaa ndo cuatyí siqui ñáyivi tatu ña chitó vaha ndo ñáá cha sacuvi ñu. Cuatu ndo nya nyehe vaha ndo, tyicuan ta cucoto ndo yoso caa sacutuñi ndo chihin cha ndaa ta chihin cha ndicha vaha.

Nu cahán ra Jesús tuhun maa ra

²⁵ Tyicuan ta suhva ñu iyó Jerusalén, quichaha ndaca tuhun ñu:

—¿Atu ñima chí ra ihya canducu ra cha cahñi ra? ²⁶ Ta maa ra nanyaá cuan cahán ra nuu ñáyivi. Ta yori maa catyí ñáá cha catyí chí ra. ¿O vasi ca chinó tucu iñi ra cacuvi nuu vatyí ra ihya ra Cristo ra cuví rey cha saquichi Nyoo cuví ra? ²⁷ Soco yoó chitó yo nya quitá ra ihya. Soco quivi quichi ra Cristo yori coto nya itiyi quichi ra cuan —catyí ñu.

²⁸ Chitó ra Jesús tuhun cha ndatuhún ñu ihya cuhva cha sañahá ra chichi vehe ñuhu. Ta ñihi cahán ra ta catyí ra:

—¡An ñohó nuu ndo chíi ta chitó ndo nya itiyi quichi, cuñi maa ndo! Soco yuhu vachí soco ñima cuenda mai. Vachí cuenda ra cha tachí chíi, ra cha cuví cha ndicha. Ta nyoho ña ñohó nuu ndo chí ra. ²⁹ Yuhu ñohó nuí chí ra vatyí cuenda ra vachí, ta maa ra tachí chíi —catyí ra Jesús.

³⁰ Tyicuan ta cuñí ñu tyihi ñu chí ra chichi vehe caa. Soco ni noo ñu ña tijn ñu chí ra cha

cuenda vatyí ta chaa ca quivi cha tahán chí tijn ra chí ra. ³¹ Soco cuaha xaan ñu chinó iñi chí ra. Ta catyí ñu:

—Ican ra ihya cuví Cristo. ¿Atu cuaha ca milagru sacuvi inga ra tatu quichi ra? —catyí ñu.

Nu tachi ra cuví fariseo policia cuquehen chí ra Jesús cohon ra vehe caa

³² Cha chíñi ra fariseo cha cahán ñáyivi tuhun ra Jesús, maa ra ta ra cacuvi nuu chí tata sutu catabí ra chí policia cuenda vehe ñuhu cuan cuquehen ra chí ra tyi cohon ra vehe caa. ³³ Tyicuan ta ra Jesús catyí ra:

—Cunyai chihin ndo suhva ri ca quivi. Yaha cuan ta cunuhi nu nyaá ra cha tachí chíi. ³⁴ Nyoho cunanducu ndo chíi. Soco ma nañihi ndo chíi. Vatyí ma cuví cuhun ndo nu cuacunyai —catyí ra Jesús.

³⁵ Tyicuan ta quichaha candaca tuhun ra cacuvi nuu chí ñu Israel chí ra tahan ra:

—¿Nya cuhun ra ihya cha ma nañihi yo chí ra? ¿O cuhun ra nu nyaá ra Israel cha ca iyó ñuu Grecia vatyí sañaha ra chí ñu iyó yucuan, vaha? ³⁶ ¿Ñáá cha cuñí chí catyí tuhun cahan ra chihin yo? Vatyí catyí ra: “Cuananducu ndo chíi soco ma nañihi ndo chíi. Vatyí ma cuví cuhun ndo nu cucunyai” —tyicuan caa cacuvi yuhun ra tuhun ra.

Ñu chinó iñi chí Nyoo cucohon Tatyí Ii ra añima ñu

³⁷ Quivi nu ndihi chiyo vico, yucuan quivi cha ñihi ca. Ta quivi cuan ndicuitá ra Jesús ta ñihi cahán ra ta catyí ra:

—Tatu nya noo ndo itiyi añima ndo tuhun Nyoo, ñaha ndo ta nachine iñi ndo chíi. ³⁸ Ñu cha chinó iñi chíi, chichi añima ñu cucono tari noo yuvi ndutya cha nyitó, tari cuhva catyí nu tutu Nyoo —catyí ra Jesús.

³⁹ Soco chihin cuan cuñí ra catyí ra vatyí ñu chinó iñi chí ra cunaquehen ñu Tatyí Ii Nyoo, vatyí quivi cuan ta quichi ca Tatyí Ii Nyoo vatyí ra Jesús, ta cunuhi ca ra nya gloria nu cusacahnu Sutu ra chí ra.

Nu cusijn ñáyivi cha ña tahán iñi tuhun cahan ra

⁴⁰ Suhva ñáyivi cha chíñi ñu tuhun ihya, catyí ñu:

—Ndicha vatyí ra ihya profeta Nyoo cha nyaá quichi cuví ra —catyí ñu.

⁴¹ Ta inga ñu catyí ñu:

—Ican ra cuví Cristo —catyí ñu.

Soco inga ñu catyí ñu:

—¿Yoso caa cha ra Galilea cuví ra Cristo?

⁴² Vatyí nu tutu Nyoo catyí chí vatyí ra Cristo cucuvi ra ñáyivi vachí tata rey David ta ra ñuu Belén cucuvi ra tari ra David —catyí ñu.

⁴³ Tyicuan ta ñáyivi cuan canatahví sava ñu cha cuenda ra Jesús. ⁴⁴ Yihí ñu cuñí ñu quehen ñu chí ra cutiyi ñu chí ra chichi vehe caa. Soco yori tijn chí ra.

Ra cacuví nuu vehe ñuhu ña cachinó iñi ra chí ra Jesús

⁴⁵ Tyicuan ta policia vehe ñuhu cahnu cuan, cuanuhu coyo ra nu nyicú ra fariseo ta ra cuví nuu chí tata sutu. Ta candaca tuhun ra chí policia cuan ta cacatyí ra:

—¿Ñáá tuhun ña quehen ndo chí ra?

⁴⁶ Ta policia cuan cacatyí ra:

—¡Ni noo chaha ta ni yori tuhva cahan tari cahan ra cuan! —cacatyí ra.

⁴⁷ Tyicuan ta ra fariseo catyí ra chí policia cuan:

—¿Atu sandaví ñaha ndihi ra chí nyoho ñandihí? ⁴⁸ ¿Nyehe ndo vatyi ni noo ra cuví nuu chí ndi cha cuví ndi fariseo ta ña chinó iñi chí ra cuan? ⁴⁹ Soco maa ri ñáyivi cha ña chitó nyicón chí ra. Soco ña vaha ñu nuu Nyoo —catyí ra.

⁵⁰ Tyicuan ta ra Nicodemo, ra cha cahan nu nyaá ra Jesús cha cha cuaa, cuví ra noo ra fariseo, ta catyí ra chí ra:

⁵¹ —Catyí ley vatyi ma cuví tachi tuñi yo chí noo ra tatu ma cuiñi xihna yo tuhun cahan ra, tacuhva coto yo ñáá cha sacuví ra —catyí ra chí ra.

⁵² Tyicuan ta canacahan ra ta cacatyí ra chí ra:

—¿Atu suri ra Galilea cuví tucu yoho? Sacuaha nu tutu Nyoo ta nyehun, vatyi ni noo ra chahá cuenda tuhun cahan Nyoo ta ña nyaá chí cha quichi ra ityi Galilea —cacatyí ra.

Ñaha sihi cha natuví chihin rayii ta iyó yii ña

⁵³ Tyicuan ta tahan tahan ra cuanuhu coyo ra vehe ra.

8

¹ Soco ra Jesús cuahan ra yucu cha nañi Olivo. ² Ta cha inga quiví cuhva cha vachi cundichin, cuahan tucu ra inga chaha vehe ñuhu cahnu. Ta tandihí ñáyivi tuhva ñu nu nyaá ra. Ta maa ra chicunyaq ra ta quichaha cahan ra nuu ñu. ³ Tyicuan ta ra sacuahá cuenda ley ta ra cuví fariseo chaq coyo ra chihin noo ñaha iyó yii vatyi natiin ra chí ña nu cuatyí ña chihin inga rayii. Ta cuatyaa ra chí ña mahñu ñáyivi nyicú cuan. ⁴ Ta quichaha cacatyí ra chí ra Jesús:

—Maestro, ñaha sihi ihya natiin ndi chí ña nu cuatyí ña chihin inga rayii. ⁵ Ta ley cha tyaa ra Moisés catyí chí vatyi nacahñi yo chihin yuu chí ñusihí cha sacuví tyehe caa. ¿Ta yoho, yoso caa catyun vityin? —catyí ra chí ra.

⁶ Cacatyí ra tuhun ihya chí ra Jesús cha cuenda cha nducú nyehe ra chí ra tacuhva tyaa ra noo cuatyí siqui ra. Tyicuan ta ra Jesús chicunyaq tyayii ra nu ñuhú ta quichaha tyaa ra letra nu ñuhú chihin nundaha ra. ⁷ Soco vatyi candacá tuhun ca ra

chí ra, tyicuan ta nicuinanyaq ra ta catyí ra chí ra:

—Xihna ca nyoho cha ñahri cuatyí ndo quehen ndo yuu ta cañi ndo chí ña —catyí ra chí ra.

⁸ Ta nicunyaq tucu ra ta quichaha sañihí ra tyaa ra letra nu ñuhú. ⁹ Soco maa ra cha cachiñi ra tuhun ihya, tuví iñi ra tyi iyó tucu cuatyí maa ra. Ta quichaha quita coyo tahan tahan ri ra, quichaha xihna ca ra chahnu. Ta cuhva cha ndihi ra quita coyo ta ndog noo tuhun ca maa ra Jesús chihin ñaha sihi cuan mahñu nu nyicu ñáyivi. ¹⁰ Tyicuan ta nicuinanyaq ra Jesús ta nyehe ra tyi cha cuahan coyo ra cuan ta ndog noo tuhun ri ca ñaha. Tyicuan ta catyí ra chí ña:

—¿Nya nyaá ra tyaa cuatyí sicun vityin? ¿Yori ni minoo ca ra cuiñi cahñi chuun? —catyí ra chí ña.

¹¹ Ta nacahan ña ta catyí ña:

—Ni nonga ra, Tata.

Tyicuan ta ra Jesús catyí ra chí ña:

—Ni yuhu ta ma cahñi chuun. Cughan vityin. Ta ma sacuví con cuatyí —catyí ra chí ña.

Ra Jesús cuví cha ndichin cha sandichin añima ñáyivi

¹² Tyicuan ta cahan tucu ra Jesús nuu ñáyivi inga chaha, ta catyí ra chí ñu:

—Yuhu cuví ra cha sandichin añima ñáyivi iyó siqui ñuhu ñáyivi. Yóo cha nyicón chíi, coo ñu noo ñáyivi chaa nu ndichin. Ta ma caca noo maa ñu nu ñaa iñi —catyí ra Jesús chí ñu.

¹³ Tyicuan ta ra cacuví fariseo cacatyí ra chí ra:

—Yoho, cahún tumañi iñi cuenda maun. Ta yucuan ña ndicha —catyí ra chí ra.

¹⁴ Nacahan ra Jesús ta catyí ra:

—Vasí suri maí cahín tumañi iñi cuende, soco ndicha cha cahín vatyi yuhu chité nya ityi quichí ta nya ityi cuahín. Soco nyoho ña chitó ndo nya ityi quichí ni nya ityi cuahín. ¹⁵ Nyoho yatyin xaan cahan ndo cha caa ñáyivi. Soco yuhu, yori chí cahín cha caa. ¹⁶ Soco tatu catyí cha caa ñáyivi, catyí cha ndicha. Vatyi ñima noo ri maí nyehí, soco Suti ra cha tachi chíi, ican ra nyehé chihin. ¹⁷ Nu ley nyoho nyaá vatyi tatu uvi ra chaha cha ndaa, cuiñi chí chinó iñi yo cha ndaa cuan. ¹⁸ Ta vityin vaha, suri maí cuví cha ndaa cuenda maí. Ta Suti, ra cha tachi chíi, cuví inga cha ndaa —catyí ra Jesús chí ra.

¹⁹ Tyicuan ta candaca tuhun ra chí ra:

—¿Nya nyaá sutun?

Ta ra Jesús catyí ra:

—Nyoho ña ñohó nuu ndo chí yuhu. Ta ni chí Suti ña ñohó nuu ndo. Tyehe ta ñohó nuu ndo chíi, cohon nuu ndo chí Suti —catyí ra.

²⁰ Tuhun ihya cahan ra Jesús cha ni ri ca cha sañahá ra chíi vehe ñuhu cahnu, nu

nyaá caja nu tyihí ñáyivi xuhun. Soco yori tyihí chí ra vehe caa, vatyi ta chaa ca quívi cha tahán chí cohon ra.

“Nu cahun yuhu ma cuvi cahun ndo”,
catyi ra Cristo

²¹ Ra Jesús catyi ra chí ra cacuvi fariseo inga chaha:

—Yuhu cuhin, ta nyoho cunanducu ndo chíi, soco cucúvi ndo ta cundoo cuatyí ndo síqui ndo. Nu cuahan yuhu, nyoho ma cuvi cahun ndo —catyi ra Jesús chí ñu.

²² Tyicuan ta ra cacuvi nuu chí ñu Israel cacatyí ra:

—¿Atu cucahñi maa ra chí ra? vatyi catyi ra vatyi ma cuvi cahun yo nu cuahan ra —cacatyí ra.

²³ Tyicuan ta ra Jesús catyi ra:

—Nyoho ra cuenda ityi yuvi ihya cuvi ndo. Soco yuhu ra cuenda ityi síqui cuvi. Nyoho ñu ñuhu ñáyivi ihya cuvi. Soco yuhu ñima ra ñuhu ñáyivi ihya cuvi. ²⁴ Yucuan chaha catyi chí ndo vatyi cucúvi ndo ta cundoo cuatyí ndo síqui ndo. Vatyi tatu ña chinó iñi ndo cha yuhu cuvi ra tinyaá cuatyí ndo, cundoo cuatyí ndo síqui ndo quívi cúvi ndo —catyi ra Jesús chí ra.

²⁵ Tyicuan ta quichaha candacá tuhun ra chí ra, ta catyi ra:

—¿Yóo ra cuvi yoho?

Ta ra Jesús nacahan ra ta catyi ra:

—Cha yaha catyi chí ndo nyata quívi xihna ri. ²⁶ Cuaha xaan ca cha nyaá cha catyi chí ndo, ta cuaha xaan ca nyaá catyi cha caá ndo. Soco tuhun cha catyi yuhu chí ñáyivi iyó síqui ñuhu ñáyivi, tuhun cha chíñi cha cahán ra cha tachí chíi cuvi. Ta maa ra cahán ra cha ndicha —catyi ra.

²⁷ Soco maa ra cacuvi nuu chí ñu Israel ña cutuñi iñi ra vatyi tuhun Nyoo Sutu yo cahán ra chíhin ra. ²⁸ Yucuan chaha catyi ra chí ra:

—Cutyaa ndo chí ra cuvi Rayií cha quichi nya gloria nu cruzi. Tyicuan ta cunacoto ndo vatyi yuhu cuvi, ta cucoto ndo vatyi tyiño sahí ñima cha cuenda mai sacuvi, soco cahín cha sañahá Suti chíi. ²⁹ Vatyi Suti, ra cha tachí chíi, nyaá ra chíhin. Ta ña sandoó ra chíi cha maa ri mai. Vatyi yuhu tyicuan ri sacuvi cuhva cuñi ra —catyi ra Jesús.

³⁰ Cha cahán ra Jesús tuhun ihya, cuaha ra quichaha chino iñi ra chí ra.

Ñu cha cuvi Sehe Nyoo ta ñu cha sacuvi cha quiñi caa

³¹ Tyicuan ta catyi ra Jesús chí ra cacuvi nuu chí ñu Israel cha chinó iñi chí ra:

—Tatu nyoho ta sañihi ca ndo sacuvi ndo cuhva sañahí chí ndo, cuchia ndo cuvi ndo noo ñu yihí cuende. ³² Ta cucoto ndo cha ndicha. Ta chíhin cha ndicha cuan cundoo ndo libre —catyi ra.

³³ Ta canacahán ra ta catyi ra:

—Nyuhu ñáyivi vachi tata ra Abraham cuvi ndi. Ta ni noo chaha ta cuvi ca ndi musu chí ni noo ñáyivi. ¿Yoso caa cha catyi yoho tyi ndoo ndi libre? —catyi ra chí ra.

³⁴ Ta ra Jesús catyi ra:

—Cha ndicha catyi chí ndo vatyi tandihí ñu sacuvi cha quiñi caa, musu cuenda cha quiñi caa cuvi ñu. ³⁵ Noo musu ña nyaá ra vehe chitoho ra tyicuan ri. Soco noo sehe ra cuvi chitoho cuan, nyaá ra tyicuan ri chíhin sutu ra. ³⁶ Yucuan chaha tatu yuhu cha cuvi Sehe Nyoo ta tave chí ndo ndaha ra ña vaha, ndicha cuii cucoo ndo libre. ³⁷ Cha chité vatyi ñáyivi chí ra Abraham cuvi chí ndo. Soco yihí ndo cuñi ndo cahñi ndo chíi, vatyi ña tiín cuenda ndo tuhun cahín. ³⁸ Yuhu cahín cha sañahá Suti chíi. Ta nyoho sacuvi ndo cha catyi sutu ndo chí ndo —catyi ra chí ra.

³⁹ Ta canacahan ra ta catyi ra:

—Sutu ndi cuvi chí ra Abraham —catyi ra. Soco ra Jesús catyi ra chí ra:

—Tyehe ta ndicha cha sehe ra Abraham cuvi chí ndo, sacuvi ndo cha sacuvi ra. ⁴⁰ Soco nyoho, vasi catyi chí ndo cha ndicha cha sañahá Nyoo chíi, nyoho cuñi ndo cahñi ndo chíi. ¡Ra Abraham ña sacuvi ra cha tyicuan caa! ⁴¹ Nyoho tari sacuvi sutu ndo, sacuvi ndo —catyi ra chí ra.

Tyicuan ta nacahan ra ta catyi ra:

—Nyuhu ñima sehe ndahvi ñu cuvi chí ndi. Iyó noo ri sutu ndi ta ican ra cuvi Nyoo —catyi ñu.

⁴² Tyicuan ta ra Jesús catyi ra:

—Tyehe ta ndicha cha Nyoo cuvi sutu ndo, nyoho cuñi ndo chíi. Vatyi yuhu quite nu nyaá ra ta chaj nyehe. Ña vachí cuenda mai, soco Nyoo tachí chíi. ⁴³ ¿Ñáa tuhun cha ña cutuñi iñi ndo tuhun cha catyi chí ndo? Cha cuenda tyi ña cuñi ndo tyasohó ndo tuhun cahín. ⁴⁴ Cuihna ican ra cuvi sutu ndo. Ta sehe ra cuvi chí ndo. Ta cuñi ndo sacuvi ndo cuhva cuñi ra. Ra chahñi ñáyivi cuvi cuihna nyata quiñi xihna ri. Ni noo chaha ña sacuvi ra cha ndicha. Ta ni noo chaha ña cahán ra cha ndicha. Cuhva cha cahán ra cuendu, cahán ra cuhva caá ra, vatyi cuendu ra. Ta sutu ñu cuendu cuvi chí ra. ⁴⁵ Ta yuhu vatyi cahín cha ndicha, ña chinó iñi ndo chíi. ⁴⁶ ¿Nya noo nyoho cuvi catyi ndo vatyi yuhu iyó noo cuatyí? Ni noo ndo. Ta cha tyicuan caa cahín cha ndicha, ¿ñáa tuhun cha ña chinó iñi ndo chíi? ⁴⁷ Ñu cuenda Nyoo tyasohó ñu tuhun cahán Nyoo. Soco vatyi nyoho ñima ñu cuenda Nyoo cuvi ndo, yucuan chaha ña cuñi ndo tyasoho ndo tuhun cahín —catyi ra Jesús.

Ra Cristo, nyata nicumañi coo ra Abraham, ta cha iyó ra

⁴⁸ Tyicuan ta ra cacuvi nuu chí ñu Israel cacatyí ra chí ra:

—¿Atu ña ndicha vatyi yoho ra ñuu Samaria cuvún, ta ñohó noo tatyí ña vaha chuun? —cacatyí ra chi ra.

⁴⁹ Ta nacahan ra Jesús ta catyí ra:

—Ñahri tatyí ña vaha ñohó chi yuhu. Chi Suti sacahní. Ta nyoho cahán ña vaha ndo siqui. ⁵⁰ Yuhu ña nanduquí nu sacahnu ñáyivi chii, soco iyó noo ra nanducú cha sacahnu ñu chii. Ta maa ra cunyehe ra tatu sacahnú ndo chii. ⁵¹ Cha ndicha catyí vatyi ñu quichahá tuhun cahín ma chaa tuhun chihí añima ñu —catyí ra Jesús chi ra.

⁵² Tyicuan ta ra Israel cuan canacahan ra ta catyí ra:

—Vityin chitó vaha ndi vatyi yihí noo tatyí ña vaha chuun. Vatyi ra Abraham ta tandihí ra cuví profeta Nyoo cachihí ra. Ta yoho catyún vatyi ñu quichahá tuhun cahín ma cuví maa ñu. ⁵³ ¿Atu cahnu ca ra cuví yoho ican saha sutu ndi ra Abraham? Maa ra chihí ra ta ra cuví profeta Nyoo ñandihi. ¿Yóó ra cuví yoho cuñí maun? —catyí ra chi ra.

⁵⁴ Ta nacahan ra Jesús ta catyí ra:

—Tatu suri mai sacahní chii, ñahri maa vale cuan. Soco ra sacahnú chii, ican cuví Suti. Ta suri maa ra cuví cha catyí nyoho tyi Nyoo cuenda ndo cuví chi ra. ⁵⁵ Soco nyoho ña ñohó nuu ndo chi ra. Yuhu, ñohó nui chi ra. Ta tatu catyí tyi ña ñohó nui chi ra, cuví noo ra cuendu tari nyoho. Soco yuhu ndicha cha ñohó nui chi ra, ta quichahí tuhun cahán ra. ⁵⁶ Ra Abraham sutu chahnu ndo cusii xaan cuñí ra vatyi cunyehe ra quivi quichi yuhu siqui ñuhu ñáyivi. Ta nyehé ra ta cusii xaan cuñí ra —catyí ra Jesús chi ñu.

⁵⁷ Tyicuan ta ra Israel cuan cacatyí ra chi ra Jesús:

—Ni uvi xico uchi cuiya ta quita con, ta catyún tyi nyehun chi ra Abraham.

⁵⁸ Ta ra Jesús nacahan ra ta catyí ra:

—Cha ndicha catyí chi ndo vatyi nyata ni cumañi coo ra Abraham ta cha iyó yuhu —catyí ra Jesús chi ra.

⁵⁹ Tyicuan ta quehen ra yuu vatyi cañi ra chi ra Jesús. Soco maa ra quihvi xehe ra, ta quita ra chichi vehe ñuhu cuan. Ta yahá ra mahñu ra ta cuahan ra.

9

Nu sanduvahá ra Jesús chi noo ra cha cuaa nyata cacu

¹ Cuhva cha yahá ra Jesús noo nu yahá ra, nyehé ra chi noo ra cha cuaa nyata cacu. ² Ta quichahá ndaca tuhun ra cachicá noo chihin ra Jesús chi ra:

—Maestro, ¿ñáá tuhun cha cacu cuaa ra ihya? ¿Atu cha cuenda cuatyí sihi ra ta sutu ra, o cha cuenda cuatyí maa ra? —cacatyí ra chi ra.

³ Ta ra Jesús nacahan ra ta catyí ra:

—Ñima cuatyí maa ra, ta ni ñima cuatyí sihi ra ta sutu ra. Soco cha cuenda vatyi cuví sañaha Nyoo tunyee iñi ra chihin ra. ⁴ Cha ni ri ca cha ñicahñu, cuñi chi cha sacuvi tyiño ra cha tachí chii. Vatyi vachi cha cuaa cha ma cuví ca saha tyiño yo. ⁵ Cha ni ri ca cha nyaí siqui ñuhu ñáyivi ihya, ñuhu ndichin cuenda ñáyivi iyó siqui ñuhu ñáyivi cuví.

⁶ Cha yahá cha catyí ra Jesús tuhun ihya, ta tyicu sii ra nu ñuhú. Ta savahá ra chiiñ nyahyu chihin sii ra ta tyaa ra chiti nuu ra cuaa cuan. ⁷ Tyicuan ta catyí ra chi ra:

—Cuahan cuanacatyia nuun nya tanque Siloé cuan. —Sivi cuan cuñi chi catyí: “Tachí Chuun.”

Tyicuan caa ta ra cuaa cuan chahan ra chinacatyá ra nuu ra. Ta cuhva cha nachaa ra, cha nyehé ra. ⁸ Tyicuan ta ñu nyicu yatyin yuvehe ra, ta ñu cha nyehé chi ra cha cucuaa ra ta caya ra, catyí ñu:

—¿Atu ñima ra ihya cuví cha tuhva chinyaa chican caridaa? —catyí ñu.

⁹ Yihí ñu catyí ñu:

—Ican ra.

Inga ñu catyí ñu:

—Ñima ra cuví ra, soco ndacú xaan ra chi ra.

Soco maa ra catyí ra:

—Ican yuhu cuví —catyí ra.

¹⁰ Tyicuan ta quichaha candaca tuhun ñu chi ra:

—¿Ta yoso caa cha cuví nyehun vityin? —catyí ñu.

¹¹ Ta catyí ra:

—Ra cha nañí Jesús cuan, ican savahá nyahyu ta tyaa ra chiti nui ta catyí ra chii: “Cuahan nya tanque Siloé ta nacatyon nuun.” Tyicuan ta chahín. Ta cha yahá nacatye nui ta nanyehí —catyí ra chi ñu.

¹² Tyicuan ta quichahá ndaca tuhun ñu chi ra:

—¿Nya nyaá ra cuan vityin?

Ta maa ra catyí ra:

—Ña chité —catyí ra chi ñu.

Nu casanahmá ra cuví fariseo chi ra cha cucuaa ta nanyehé

¹³ Tyicuan ta chinyaca ñu chi ra cha cucuaa cuan nuu ra cuví fariseo. ¹⁴ Vatyi quivi cha savahá ra Jesús nyahyu ta sanduvahá ra chi ra cha cucuaa cuan, quivi nyitatu yo cuví. ¹⁵ Yucuan chaha ra fariseo candaca tuhun tucu ra chi ra yoso caa cha vatyi nanyehé ra. Ta maa ra catyí ra:

—Tyaa ra nyahyu chiti nui, ta nacatye ta vityin ndichin nyehí —catyí ra chi ra.

¹⁶ Tyicuan ta suhva ra fariseo cacatyí ra:

—Ra cha sacuvi tyehe caa ñima ra cuenda Nyoo cuví ra, vatyi ña sahá ra ñáyivi quivi nyitatu yo —cacatyí ra.

Soco inga ra cacatyí ra:

—¿Yoso caa cha cuví sacuvi ra milagru ihya tatu ra iyó cuatyí cuví ra? —catyí ra.

Ta s̄in s̄in cha cacahan ra. Ta cacusiñ ra. ¹⁷ Ta candacā tuhun tucu ra inga chaha chi ra cha cucuaā cuan, ta catyí ra chi ra:

—¿Ta yoho, ñáá catyún cuenda ra cha sanduvahā chiti nuun? —catyí ra.

Ta nacahan ra ta catyí ra:

—Yuhu catyí vatyí noo profeta cuenda Nyoo cuví ra —catyí ra.

¹⁸ Soco ra cacuvi nuu chi ñu Israel ña cuñí ra chino iñi ra cha cucuaā ra cuan ta vityin nyehé ra. Ta nyacua nya cha cacanā ra chi sihi ra ta chi sutu ra cha nduvahā cuan. ¹⁹ Ta candacā tuhun ra chi ñu, ta catyí ra:

—¿Atu ican ra ihya cha cuví sehe ndo cha catyí ndo tyi cuaá ra ta cacu ra? ¿Yoso caa cha cuví nyehe ra vityin? —catyí ra.

²⁰ Ta nacahan sutu ra ta sihi ra ta catyí ñu: —Chitó ndi vatyí ican ra ihya cuví sehe ndi. Ta cuaá ra nyata cacu ra. ²¹ Soco ña chitó ndi ñáá tuhun cha cuví nyehe ra vityin. Ta ni ña chitó ndi yóo cha sanduvahā chiti nuu ra. Ndaça tuhun ndo chi maa ra. Cha iyó cuiya ra. Ta cuví nacatyí maa ra chi ndo —catyí ñu chi ra.

²² Sutu ra sihi ra catyí ñu tyehe caa cha cuenda cha yuhví ñu chi ra cacuvi nuu chi ñu Israel, vatyí cha catyih̄i tahan ra tuhun vatyí cutava ñehe ra chi ñu vehe ñuhu, yóo ri ñu cha catyí vatyí ra Jesús cuví Cristo. ²³ Yucuan chaha catyí ñu: “Cha ñihi ra. Ndaça tuhun ndo chi maa ra.”

²⁴ Tyicuan ta canacanā tucu ra chi ra cha cucuaā cuan inga chaha. Ta cacatyí ra chi ra:

—Chihin nuu Nyoo catyí cha ndicha chi ndi. Vatyí nyuhu chitó ndi tyi rayiñ cuan, ra iyó cuatyí cuví ra —cacatyí ra.

²⁵ Tyicuan ta nacahan ra cha cucuaā cuan ta catyí ra:

—Yuhu ña chité tatu ra iyó cuatyí cuví ra, o ñima. Soco noo ri cha chité vatyí yuhu cucuāj, ta vityin ndichin nyehí —catyí ra.

²⁶ Ta candacā tuhun tucu ra chi ra inga chaha ta catyí ra:

—¿Ñáá cha sacuvi ra chuun? ¿Yoso caa sacuvi ra ta nanyehún? —cacatyí ra chi ra.

²⁷ Ta catyí ra:

—Cha catyí chi ndo, ta ña quichahá ndo chii. ¿Ñáá tuhun cha cuñí ndo cha catyí inga chaha? ¿Atu cuñí tucu nyoho cunyicon ndo chi ra?

²⁸ Tyicuan ta cacahan ra chi ra, ta catyí ra: —Yoho yihún cuenda ra, soco nyuhu cuenda ra Moisés yihí ndi. ²⁹ Nyuhu chitó ndi tyi Nyoo cahān chihin ra Moisés. Soco ra cuan, ña chitó ndi nya quitā ra —cacatyí ra.

³⁰ Tyicuan ta nacahan ra cucuaā cuan ta catyí ra:

—¿Ñana vaha cha cuví ihya! Nyoho ña chitó ndo nya quitā ra, ta chi yuhu sananyehē ra. ³¹ Chitó vaha yo vatyí Nyoo ña tyasohó ra nu chicán ra iyó cuatyí. Soco ra cha sacahnú chi ra ta sacuvi cuhva cuñí ra, tyasohó Nyoo nu chicán ra cuan. ³² Ni noo chaha ta cuiñi ca yo vatyí iyó noo ra sananyehē chi noo ra cuaá nyata cacu. ³³ Tyehe ta ra ihya ta ñima cuenda Nyoo vachí ra, ñahri cha cuví sacuvi ra —catyí ra chi ra.

³⁴ Tyicuan ta cacatyí ra chi ra:

—Yoho ra iyó cuatyí cuvún nyata cacun. ¿Ta cuñún sañahun chi nyuhu? —cacatyí ra. Ta catavā ñehe ra chi ra vehe ñuhu.

Ñu cha ñahri tuhun Nyoo caa añima tari cha cuaa ñu

³⁵ Ra Jesús chitó ra vatyí catavā ñehe ra chi ra cucuaā cuan vehe ñuhu. Ta cuhva cha nañih̄i ra chi ra ta catyí ra chi ra:

—¿Atu chinó iñi yoho chi Rayiñ cha quichi nya gloria? —catyí ra chi ra.

³⁶ Ta nacahan ra ta catyí ra:

—Tata, catyí chii, yóo ra cuví ra vatyí chino iñi chi ra —catyí ra chi ra.

³⁷ Ta ra Jesús catyí ra:

—Cha nyehun chi ra. Ta ican ra ndatuhún chuhun —catyí ra chi ra.

³⁸ Tyicuan ta chicuiñi chiti ra chaha ra Jesús ta catyí ra chi ra:

—Chinó iñi chuun, Sutú Mañi yuhu —catyí ra chi ra Jesús.

³⁹ Ta ra Jesús catyí ra:

—Yuhu vachí vatyí catyí cha caá añima ñáyivi iyó siqui ñuhu ñáyivi ihya. Vatyí ñu cuaa, ñu ña chitó tuhun Nyoo cunanyehē ñu vatyí cucava tuhun Nyoo añima ñu. Ta ñu cuñí maa tyi ndichin nyehē tyi catyí ñu tyi chitó ñu tuhun Nyoo, coto ñu tyi cuaa ñu tyi ña chinó iñi ñu chii —catyí ra Jesús.

⁴⁰ Tyicuan ta suhva ra cuví fariseo cha nyicú yucuan chiiñi ra cha cahān ra Jesús, ta catyí ra chi ra:

—¿Atu cuaa tucu nyuhu ñandihí? —catyí ra.

⁴¹ Tyicuan ta catyí ra Jesús chi ra:

—Tyehe ta cuaa nyoho, nicohón nuu ndo tyi chiiñuh̄i tuhun Nyoo chi ndo, ta ma coo cuatyí ndo. Soco vatyí catyí ndo tyi nyehé ndo ta chitó ndo, yucuan chaha ndoó cuatyí siqui ndo —catyí ra chi ra.

10

Mbee sana Nyoo cuví ñáyivi yihí cuenda ra, ta ñohó nuu ñu chi ra cha tachí Nyoo vatyí sahá cumi ra chi ñu

¹ Cahán ca ra Jesús ta catyí ra:

—Cha ndicha catyí chi ndo, tatu noo ra cuaquihví chichi noo chacu mbee, ta cha nuu cha quihví ra yuhu chacu, quihví ra inga ityí, ra suhu cuví ra. ² Soco ra quihví ityí

yuhu chacu, ra sahá cumi mbee cuan cuví ra. ³ Ra nyaá yuhu chacu cuan nuña ra na quihví ra sahá cumi mbee cuan. Ta mbee cuan nichón soho ti ndusu ra. Noo noo ti ta iyó sivi ti sahá ra, ta cana ra chi ti ta tavá ra chi ti ityi chata chacu. ⁴ Ta cha yahá tava ra chi ti, ta cuahan ra ityi nuu ti ta nyicón ti chi ra, vatyi nichón soho ti ndusu ra. ⁵ Soco tatu ña ñohó soho ti ndusu ra, chinó ti chi ra ta ma cunyicon ti chi ra.

⁶ Tyehe caa tuhun cahán ra Jesús chihin ñu. Soco maa ñu ña cutuñi ñi ñu ñáá tuhun cuñi ra cahán ra cha tyicuan caa.

Ra Jesús cuví ra sahá cumi vaha mbee

⁷ Tyicuan ta catyí ra Jesús inga chaha chi ñu:

—Cha ndicha catyí chi ndo vatyi yuhu cuví tari noo yuhu chacu nu quihví coyo ñáyivi cuende cha cuví ñu tari mbee sane. ⁸ Tandihí ra cha yahá caquichí coyo, ra suhu cacuví ra. Soco mbee ña quichahá ti cha cacahán ra. ⁹ Yuhu cuví yuvehe gloria. Ñu quihví cuende, cacú ñu cha ma cuhun ñu anyaya. Ta cuví ñu tari noo mbee cha quihví ta quitá chichi chacu cuan. Ta ñihí ti cuhu cachi ti.

¹⁰ Noo ra suhu vachí ra, soco vachí suhu ra, vachí cahñi ra, vachí sativi ra. Soco yuhu vachí vatyi coo ndo noo ñayivi chaa cha ma naa ca maa. ¹¹ Yuhu cuví noo ra vaha sahá cumi mbee. Vatyi ra sahá cumi mbee chahá ra ñayivi ra cuenda sana ra. ¹² Soco ra cuví musu, tatu nyehé ra vachí lobo cha cuví noo quití xaan, sandoo maa ra chi mbee sana chitoho ra. Ta chinó ra. Vatyi ñima sana maa ra cuví ti. Tyicuan ta tiñ quití xaan chi mbee cuan. Ta saquicono ti chi ti ityi cuan ityi ihya. ¹³ Musu cuan chino ra cha cuenda vatyi cha cuenda xuhun ri sahá tyiño ra. Ta ñahri cuenda ra chi mbee, tyi ñima sana ra cuví.

¹⁴ Yuhu cuví ra sahá cumi vaha mbee sane. Ta ñohó nui chi ti. Ta maa ti ñohó nuu ti chii, ¹⁵ tari ñohó nuu Suti chii, ta yuhu ñohó nui chi ra. Yuhu chahí ñayivi cuenda mbee sane. ¹⁶ Iyó tucu inga mbee sane cha ñima chichi chacu ihya iyó ti. Cuñi chi cha cuhin cunaquehin chi ti. Ta cuquichaha ti chii. Ta coo noo ri nu quihí tandihí ti. Ta noo ri ra sahá cumi chi ti cucco.

¹⁷ Suti cuñi ra chii vatyi chahí ñayivi cha catyi ñáyivi cuende. Soco yaha cuan, nacuhva tucu ra ñayivi inga chaha. ¹⁸ Yori tinyaa ñayivi, soco cha iyó vaha ñi maí ta chahí. Iyó ityi chii cha cuhve ñayivi ta cúvi, ta iyó tucu ityi chii cha naquehen tiqú inga chaha vatyi cunandote. Ican ihya cuví tyiño cha tyaá Suti chii —catyi ra Jesús.

¹⁹ Cha cachiñi tucu ra cacuví nuu chi ñu Israel tuhun cha cahán ra Jesús ihya, cacusiñ

tucu ra chihin tahan ra inga chaha. ²⁰ Ta cuaha xaan ra catyi ra:

—¿Ñáá tuhun cha quichaha ndo chi ra chiña? Ta yihí noo tatyí ña vaha chi ra, ta loco ra —cacatyí ra.

²¹ Ta inga ra catyi ra:

—Yori ñu ñohó tatyí ña vaha chi cahán tyehe caa. ¿Atu cuví sananyehe noo tatyí ña vaha chi noo ra cuaa? —catyi ra.

Nu ña cuñi ra cacuví nuu chi ñu Israel chi ra Jesús

²² Nya ñuu Jerusalén yoo vichin cuví. Ta sanducahnú ñu noo vico quivi nanduchin cuiya cha suhñi ñu vehe ñuhu cahnu cuan. ²³ Ta ra Jesús chicá noo ra vehe ñuhu cuan ityi corredor ra Salomón. ²⁴ Ta ra cacuví nuu chi ñu Israel cacticuitayucú cutya ra nuu ra. Ta quichahá ndaca tuhun ra chi ra:

—¿Ama catyi cachun chi ndi tatu icon cuví Cristo? ingaña ri catyi cachi chi ndi.

²⁵ Ta ra Jesús catyi ra:

—Cha yahá catyi chi ndo, ta ña chinó ñi ndo chii. Tyiño sacuví nuu Suti ican cuví cha ndaa cuende. ²⁶ Soco nyoho ña chinó ñi ndo chii vatyi ñima mbee sane cuví chi ndo. Tari cuhva catyi chi ndo ndaa ri. ²⁷ Mbee sane nichón soho ti ndusi, ta yuhu ñohó nui chi ti. Ta maa ti nyicón ti chii. ²⁸ Yuhu chahí ñayivi cha ma naa ca maa coo ti. Ta ma cunaa ti. Ta ni yori maa cuví tinyaa chi ti chichi ndahi. ²⁹ Maa Suti chahá chi ti chii. Ta cahnu ca cuví maa ra ican saha tandihí ca. Ta yori cuví tinyaa chi ti chichi ndaha ra. ³⁰ Yuhu ta Suti Nyoo, noo ri cuví ndi —catyi ra Jesús.

³¹ Tyicuan ta ra cacuví nuu chi ñu Israel cuan caquehen tucu ra yuu vatyi tuchi ra chi ra. ³² Ta ra Jesús catyi ra chi ra:

—Cuaha xaan cha vaha sacuví yuhu nuu ndo chihin tunyee ñi Suti. ¿Ta nya cuenda cuan cua tuchi ndo yuu chii? —catyi ra Jesús chi ra.

³³ Ta ra cacuví nuu chi ñu Israel cuan cacatyí ra:

—Ñima cha cuenda noo cha vaha sacuvun cutuchi ndi yuu chuun, soco cha cuenda vatyi yahun nuu Nyoo chihin tuhun cahún. Noo rayi ri cuvún, soco sahún tari Nyoo chuun —cacatyí ra chi ra.

³⁴ Tyicuan ta catyi ra Jesús chi ra:

—Nu tutu tuhun Nyoo nyaá vatyi Nyoo catyi ra: “Nyoho cuví ndo nyoo”, catyi Nyoo.

³⁵ Chitó yo vatyi cha cahán tuhun Nyoo, ma cuví catyi yo tyi ña ndicha. Ta Nyoo sacunañi ra nyoo chi ñu naquehen tuhun cahán ra. ³⁶ Ta tatu maa Nyoo nacachí chi yuhu ta tachí ra chii siqui ñuhu ñayivi ihya ¿yoso caa catyi nyoho vatyi yahá yuhu nuu Nyoo nu catyi tyi Sehe Nyoo cuví chii? ³⁷ Tatu ña sacuví cha sacuví Suti, ma chino ñi ndo chii. ³⁸ Soco tatu sacuví, vasi ma chino ñi

ndo chii, soco chíno iñi ndo tyiño sacuvi. Tyicuan ta cucoto cachi ndo vatyí Nyoo Suti ñin ri cuví ra chihin. Ta yuhu ñin ri cuví chihin Nyoo Suti —catyí ra Jesús.

³⁹ Inga tucu chaha cacuñi ra catyíhi ra chí ra vehe caa, soco ra Jesús cuahan ri ra. ⁴⁰ Tyicuan ta cuanuhü ra ityi nu caña ñanyii inga chiyo yuvi cahnu Jordán cuan nu sacondutyá ra Juan ta xihna ri. ⁴¹ Cuaha ñáyivi chahan chinyehe chí ra, ta catyí ñu:

—Ndicha, vasi ni noo milagru ña sacuvi ra Juan, soco tandihi tuhun cha cahan ra cuenda ra ihya ta ndicha —catyí ñu.

⁴² Ta cuaha xaan ñu cachiño iñi ñu chí ra Jesús ityi cuan.

11

Nu chihí ra Lázaro

¹ Iyó noo ra cuhví cha nañi Lázaro ñuu Betania nu cuví ñuu cu María ta cu Marta cuhu ña. ² Ta cu María, cuhva ra Lázaro cuan ican ña cuví ñaha cha choso ndutya vixi chahán chaha Sutu Mañi yo, ta chihin ixi xiñi ña nacuhva ña. ³ Ta tyicuan caa ninduvi tahan ñu, cu María chihin cuhu ña, tachj ñu tyiño na cucatyí ra chí ra Jesús tyehé caa;

—Sutu Mañi ndi, amigon cuhví ra —catyí ñu, tachj ñu tyiño.

⁴ Ta cha chíñi ra Jesús tuhun ihya ta catyí ra:

—Cuehe cuan ma cahñi chí chí ra. Cuhví ra tyehé caa tacuhva vatyí quivi nduvaha ra cunyehe ñáyivi tyi cahnu xaan ca ra cuví Nyoo ta tyicuan caa tucu Sehe ra —catyí ra Jesús tuhun maa ra.

⁵ Cuñi vavaha ra Jesús chí cu Marta ta chí cuhu ña, ta chí cuhva ña, ra Lázaro. ⁶ Soco cuhva cha catyí ñu chí ra tyi cuhví ra Lázaro, ndoo ra nu ñohó ra uvi ca quivi. ⁷ Tyicuan ta catyí ra chí ra cachicá noo chihin ra:

—Coho ndo inga chaha nya Judea —catyí ra.

⁸ Tyicuan ta ra cachicá noo chihin ra ca-catyí ra chí ra:

—Maestro, ta cunaha ca cha cuñi ra cacuvi nuu chí ñu Israel cahñi ra chuun chihin yuu. Ta vityin, ¿inga chaha cuñún cuhun yucuan? ¿Ñáá tuhun?

⁹ Ta catyí ra Jesús:

—¿Atu ñima uchi uvi hora iyó noo quivi? Vatyí tatu cha ñicahñu chicá noo noo ra, ma nduva ra vatyí ndichin nyehé ra ta sacuvi ra tyiño nuu Nyoo. ¹⁰ Soco tatu cha cha cuaa chicá noo ra, nduva ra vatyí ñahri ñuhü.

¹¹ Tyicuan ta quichaha catyí tucu ra Jesús: —Amigo yo, ra Lázaro quixí ra. Soco cuhin cusandoye chí ra —catyí ra chí ra.

¹² Tyicuan ta catyí tucu ra cachicá noo chihin ra:

—Tata, tatu quixí ra, cuñi chí catyí vatyí cuanduvaha ra —cacatyí ra.

¹³ Soco ra Jesús cuñi ra catyí ra vatyí cha chíhi ra Lázaro. Ta ra cachicá noo chihin ra, cuñi maa ra vatyí cha ndicha quixí ra cuan. ¹⁴ Tyicuan ta catyí cachi ra Jesús chí ra:

—Ra Lázaro cha chíhi ra. ¹⁵ Ta cusii cuñi vatyí yori chinyaa yucuan. Vatyí tyicuan caa vaha ca cha cuenda nyoho, tacuhva chino iñi ndo chii. Coho ndo cunyehe ndo chí ra —catyí ra chí ra.

¹⁶ Tyicuan ta ra Tomás, cha catyí ñu: “ra tinihi cuan”, catyí ra chí inga ra cachicá noo chihin ra Jesús:

—Coho tucu yo vatyí cúvi yo ñin ri chihin ra —catyí ra.

Ra Jesús cuví ra sanandotó chí yo ta chahá ra ñáyivi coo yo

¹⁷ Cha chaq ra Jesús Betania, ñihj ra tuhun vatyí ra Lázaro cha cumi quivi ñohó ra chíhi ñuhü. ¹⁸ Ñuu Betania cuan nyaá chí yatyin ri nu nyaá ñuu Jerusalén, tari noo uvi kilómetro sisava. ¹⁹ Ta cuaha ra cacuvi nuu chí ñu Israel cuahan ra cuanyehe ra nu nyaá cu Marta ta cu María vatyí chíhi cuhva ñu. ²⁰ Ta ñihj cu Marta tuhun vatyí cha cuacha ra Jesús. Ta cuahan ña cuasatahan ña chí ra. Soco cu María ndoo ña vehe. ²¹ Ta cu Marta catyí ña chí ra Jesús:

—Sutu mañi yuhu, tyehé ta nyaun ihya, ma cúvi cuhve. ²² Soco yuhu chité vatyí Nyoo cusacuvi ra tandihi cha cacon chí ra —catyí ña chí ra.

²³ Ta ra Jesús catyí ra chí ña:

—Cuhvon cunandoto ra.

²⁴ Ta cu Marta catyí ña:

—Ndicha, chité vatyí cunandoto ra quivi nandoto ndiyi nu cuandihí quivi —catyí ña.

²⁵ Tyicuan ta catyí ra Jesús chí ña:

—Yuhu cuví ra sanandotó chí ndiyi. Ta chahí cha conyito ñáyivi. Ñu chinó iñi chí, vasi cha chíhi ñu soco coo tucu ñu. ²⁶ Ta tandihi ñu nyitó ca ta chinó iñi ñu chí, ma cúvi maa ñu. ¿Atu chíñó iñun tuhun ihya? —catyí ra chí ña.

²⁷ Ta maa ña catyí ña:

—Chinó iñi, Sutu Mañi yuhu, vatyí yoho cuvún Cristo Sehe Nyoo, ra cha nyaá cha quichi síqui ñuhu ñáyivi ihya —catyí ña.

Nu chacu ra Jesús nu ñaña ra Lázaro

²⁸ Cha yahá cha catyí cu Marta tuhun ihya, ta chahan ña chiquehen ña chí cuhu ña, cu María, ta catyí xehe ña chí ña:

—Cha chaq Ra Sacuaha. Ta tachj ra tyiño nacuhun nu nyaá ra —catyí ña.

²⁹ Ra cha chíñi cu María tuhun ihya, nducuitá ri ña, ta cuahan ña nu nyaá ra Jesús, ³⁰ Ta ra Jesús ta quihvi ca ra chíhi ñuu cuhva cuan, nyaá ra nu nañihj cu Marta chí ra. ³¹ Ta nya vehe cu María, nyicú ra cacuvi nuu chí ñu Israel tyinyeé ra chí ñu. Ta nyehe ra vatyí numi ri quita ña. Ta cuñi maa ra tyi

cuahan ña nu ñaña cuacuacu ña. Ta cuahan coyo ra chata ña.

³² Ta cuhva cha chaq cu María nu nyaá ra Jesús chicuñi chiti ña chaha ra, ta catyí ña:

—Sutu Mañi yuhu, tyehe ta chinyaun ihya, cuhve ma cúvi ra —catyí ña.

³³ Nyehe ra Jesús cha chacú cu María chihin ra Israel cha vachi coyo chihin ña, ta nducuihya xaan cuñi añima ra. ³⁴ Ta ndaca tuhun ra chi ñu:

—¿Nya maa maa tyihí ndo chi ra? —catyí ra.

Ta catyí ñu:

—Tata, coho ta nyehun —catyí ñu chi ra.

³⁵ Ta ra Jesús chacu ra.

³⁶ Tyicuan ta catyí ra Israel cuan:

—Nyehe ndo yoso cha cuñi ra chi ra —catyí ra.

³⁷ Soco suhva ñu catyí ñu:

—Ican ra ihya cha sananyehe chi ra cuaa cuan. ¿Atu ña cúvi sanduvaha tucu ra chi ra Lázaro ihya? —catyí ñu.

Nu sanandoto ra Jesús chi ra Lázaro

³⁸ Nducuihya cuñi ra Jesús inga chaha ta tuhva ra nu ñaña cuan. Noo chichi yuu cúvi. Ta nyasí noo yuu yuhu chi. ³⁹ Ta catyí ra Jesús:

—Sacanyaha ndo yuu chiña —catyí ra.

Ta cu Marta, cuhva ndiyi cuan, catyí ña:

—Soco cha caña xico, Sutu Mañi yuhu, vatyí cha cumi quivi cha chihí ra —catyí ña.

⁴⁰ Soco ra Jesús catyí ra chi ña:

—¿Atu ña cha catyí chuun vatyí tatu chinó iñun, cunyeahun yoso cha cahnu cúvi Nyoo? —catyí ra chi ña.

⁴¹ Tyicuan ta sacanyaha ñu yuu cuan. Ta ra Jesús nanyehe ndaa ra ityi andivi, ta catyí ra:

—Sutu Mañi yuhu, tyahvi nyoo chuun tyi chiñun cha cahín. ⁴² Yuhu chité vatyí tyicuan ri chiñun tuhun cahín. Soco tyehe caa cahín cha cuenda cha vaha chi ñáyivi nyicú ihya, tacuhva nachino iñi ñu tyi yoho tachí chii —catyí ra Jesús chi Nyoo.

⁴³ Cha yahá cha catyí ra tuhun ihya, canachaá ra, ta catyí ra:

—¡Lázaro, quita chiña!

⁴⁴ Ta quita ra cha chihí cuan, nuññi ndaha ra ta nuññi chaha ra chihin sahna. Ta nuññi nuu ra chihin noo sahna. Ta ra Jesús catyí ra chi ñáyivi nyicú yucuan:

—Ndachi ndo chi ra. Ta saña ndo chi ra nacuhun ra —catyí ra Jesús chi ñu.

Nu nducú cahñi ñu chi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Ta cuaha xaan ra cacuví nuu chi ñu Israel cha chahan coyo chihin cu María nachino iñi ñu cha nyehe ñu cha sacuví ra Jesús. ⁴⁶ Soco suhva ra chahan ra chisacoto ra chi ra fariseo cha sacuví ra Jesús. ⁴⁷ Tyicuan ta ra fariseo ta ra cacuví

nuu chi tata sutu sacoo ra noo junta ta cacatví ra:

—¿Ñáá cha sacuví yo? Vatyí cuaha xaan milagru sacuví ra cuan. ⁴⁸ Tatu cuhva yo cha sacuví ca ra tyicuan caa, tandihí ñáyivi cuchino iñi ñu chi ra. Ta ra cacuví tyiño nya ñuu Roma cuquichi ra ta cusatani ra vehe ñuhu yo ta ñuu yo —cacatví ra chi ra tahan ra.

⁴⁹ Soco ra cúvi nuu cahnu ca chi tata sutu cuiya cuan, ra nañi Caifás cahan ra ta catyí ra chi ra:

—Nyoho ñahri maa cha chitó ndo. ⁵⁰ Ni ña cutuñi iñi ndo vatyí vaha ca cha cúvi noo ri rayi cha cuenda tandihí ñáyivi ñuu, ta ñima ca cha cúvi tandihí yo —catyí ra Caifás.

⁵¹ Soco ra Caifás cuan ñima cha cuñi maa ra ta cahan ra, soco vatyí ra cúvi nuu cahnu ca chi tata sutu cuiya cuan cúvi ra, yucuan chaha maa Nyoo sacahan chi ra. Vatyí catyí ra vatyí ra Jesús cucúvi ra cha cuenda tandihí ñáyivi ñuu Israel. ⁵² Ta ñima cha cuenda ri ñu cuan, soco vatyí cusandu iñi ri ra chi tandihí ñu cúvi sehe Nyoo cha iyó inga ñuu ñandihí. ⁵³ Yucuan ta nyacua nya quivi cuan ta ra cacuví nuu chi ñu Israel cuan, nducu ra cuhva yoso caa cahñi ra chi ra Jesús.

⁵⁴ Yucuan chaha tyi ra Jesús ña chicá noo ndichin ca ra nu nyicú ñu Israel. Ta quita ra ityi Judea cuan. Ta cuahan ra noo ñuu cha nañi Efraín cha nyaá yatyin ri ñuhu ityi. Ta yucuan ndoo ra chihin ra cachicá noo chihin ra.

⁵⁵ Ña cuaha ri ca quivi ta chaq vico cuenda ñu Israel, vico cha nañi pascua. Ta cuaha xaan ñáyivi quita ñu ñuu ñu ta cuahan ñu Jerusalén cuasacuví ñu cha tuhva maa ñu sacuví cha sanduñi ñu chi ñu nuu Nyoo cha ni cumañi ca chaa quivi vico cuan. ⁵⁶ Nanducú ñu chi ra Jesús. Ta cuhva cha nyicú ñu chichi vehe ñuhu cahnu cuan ta ndaca tuhun ñu chi tahan ñu, ta catyí ñu:

—¿Yoso caa cuñi nyoho? ¿Atu cuquichi ra vico ihya, o ma quichi ra? —catyí ñu chi tahan ñu.

⁵⁷ Ta ra cacuví fariseo ta ra cacuví nuu chi tata sutu, catyí ra vatyí tatu nya noo ñu chitó ñu nya nyaá ra Jesús, nacatví ñu. Vatyí cutiñ ra chi ra vatyí cohon ra vehe caa.

12

Nu chosó cu María ndutya vixi chahan chaha ra Jesús

(Mt. 26.6-13; Mr. 14.3-9)

¹ Cumañi iñu ca quivi cha cuatahan chi vico pascua, ta chaq ra Jesús ñuu Betania nu iyó ra Lázaro, ra cha sanandoto ra Jesús chi. ² Yucuan savaha ñu cha cuxiñi ra Jesús. Cu Marta tyihí ña coho nu mesa. Ta chicunyaá ra Jesús nu mesa. Ta nyaá tucu ra Lázaro

chihin ra. ³ Tyicuan ta cu María quehen ña ta cha sava litro ndutya vixi chahán cha chinqo chihin maa ri nardo, noo cha yahvi xaan nyaá. Ta cuhvj ña chaha ra Jesús chihin ndutya vixi chahán cuan. Yahá cuan ta sana ityi ña chihin ixi xiñi ña. Tandihí chichí vehe cuan chitú chihin xico ndutya vixi chahán cuan. ⁴ Ta yucuan nyaá tucu ra Judas Iscariote, sehe ra Simón. Cuví ra noo ra chicá noo chihin ra Jesús. Ta suri maa ra cuví ra cha naxico tuhun chí ra Jesús nuu ra xaan iñi chí ra. Ta quichaha catyí ra Judas cuan chí ñu cuan:

⁵ —¿Náá tuhun ña xico ndo ndutya vixi chahán ihya chí ñáyivi, cuhva ñu cuenda mil chí ndo chihin, ta tyinyee ndo chí ñu ndahvi? —catyí ra.

⁶ Soco ra Judas ña catyí ra tuhun ihya cha cuenda cha ndahvi cuñí ra nyehe ra chí ñu ndahvi, soco vatyi ra suhu cuví ra. Ta vatyi ndaha maa ra nyaá yitín xuhun ta tuhvá ra suhu ra cha tyihí ñu chichí yitín cuan. ⁷ Tyicuan ta catyí ra Jesús chí ra:

—Saña chí ña, vatyi ñaha ihya sacuvj ña tyehe caa cha cuenda cha cuquihvi coño ñuhi chichí ñuhu. ⁸ Ñu ndahvi tyicuan ri cu cunyicú ñu chihin ndo, soco yuhu ña tyicuan ri —catyí ra Jesús chí ra Judas cuan.

Nu nducu cahñi ra chí ra Lázaro

⁹ Cuaha xaan ñu Israel ñihí ñu tuhun tyi ra Jesús ñohó ra Betania, ta chahán coyo ñu nyicuan. Ñima cha cuñí ñu nyehe ñu chí ra Jesús ri, soco cuñí tucu ñu nyehe ñu chí ra Lázaro, ra cha sanandoto ra Jesús chí. ¹⁰ Tyicuan ta ra sacuví nuu chí tata sutu catyihí tahan ra tuhun vatyi cucahñi tucu ra chí ra Lázaro ñandihí. ¹¹ Vatyi cha cuenda ra ta cuaha xaan ñu Israel cacusñin ñu chihin ra ta nachino iñi ñu chí ra Jesús.

Nu quihvi ra Jesús ñuu Jerusalén

(Mt. 21.1-11; Mr. 11.1-11; Lc. 19.28-40)

¹² Cuaha xaan ñáyivi cuahan ñu Jerusalén cha vico pascua. Ta cha inga quivi cachitó ñu tyi ra Jesús cuachaa ra. ¹³ Tyicuan ta chahnyá ñu ndaha tunducaha ta cuahan coyo ñu cuasatahan ñu chí ra Jesús. Ta canachaa ñu, ta catyí ñu:

—¡Cahnu xaan ca cuví maa Nyoo! ¡Nasoco xaan Nyoo chí ra vachi ihya chihin tunyee iñi Nyoo! ¡Nasoco xaan Nyoo chí Rey cuenda yo ñu Israel! —cacatyí ñu, canachaa ñu.

¹⁴ Ta ra Jesús ñihí ra noo burru ta chicoşo ra chí ti tarí cuhva catyí maa nu tutu Nyoo tyehe caa:

¹⁵ Ma yuhvi ndo ñáyivi ñuu Sión Nyehe ndo, vachi Rey ndo.

Yosó ra noo burru —catyí chí nu tutu Nyoo.

¹⁶ Quiví cuan ra cachicá noo chihin ra Jesús, ña cacutuñí iñi ra tuhun cuan cha nyaá nu tutu Nyoo. Soco cha yahá cuanuhu ra Jesús gloria, canicohon iñi ra vatyi

tandihí tuhun cuan ta nyaá nu tutu Nyoo tyi tyicuan caa cucuvi chí ra. Ta tyicuan caa cuví chí ra.

¹⁷ Ta ñáyivi cha nyehe quiví cha caná ra Jesús chí ra Lázaro chichí ñaña, quiví sanandoto ra chí ra, nacatyí ñu cha nyehe ñu.

¹⁸ Ta yucuan chaha cuaha xaan ñáyivi chisatahan ñu chí ra Jesús, vatyi chitó ñu milagru cha sacuví ra. ¹⁹ Tyicuan ta ra cuví fariseo cacatyí ra chí ra tahan ra:

—Cha nyehé maa ndo tyi ñahri maa cuví sacuví yo, vatyi tandihí ñáyivi nyicón chí ra —cacatyí ra.

Nu nducú suhva ra ñuu Grecia chí ra Jesús

²⁰ Ñohó tucu suhva ra ñuu Grecia mahñu ñáyivi cha chahán coyo chisacahnu vico ñuu Jerusalén cuan. ²¹ Tyicuan ta catuhva ra ñuu Grecia cuan nu nyaá ra Felipe, ra ñuu Betsaida nu cuví Galilea, ta cachacu ndahvi ra nuu ra ta cacatyí ra:

—Tata, cuñí ndi cahan ndi chihin ra Jesús —cacatyí ra.

²² Ta ra Felipe chahán ra chicatyí ra chí ra Andrés. Ta ñanduvi ra chinacatyí ra chí ra Jesús vatyi ra Grecia cuan cuñí ra cahan ra chihin ra. ²³ Ta nacahán ra Jesús, ta catyí ra:

—Chaş cuhva vityin vatyi yuhu cha cuví Rayií cha quichi nya gloria, cuananuhu tiquí nya gloria, ta cusacahnu Suti chíi.

²⁴ Cha ndicha catyí chí ndo vatyi tatu noo chíti ta ma quihí chichí ñuhú ta ma tyahyu chí, noo ri chíti cucuvi chí tyicuan ri maa. Soco tatu tyahyu chí, nduchaa chí inga chaha ta coo cuaha ca chíti chí. ²⁵ Ñu cuñí xaan ñáyivi iyó ñu, cucunaa ñu. Soco ñu ña cuñí ñáyivi ñuhu ñáyivi ihya, cunañihí ñu noo ñáyivi cha ma naa ca maa cucoo ñu.

²⁶ Tatu yihí ndo cuñí ndo sacuvi ndo tyiño nui, cunyicon ndo chíi. Ta nu cuacunyai, yucuan cucunyaat tucu ñu sacuví tyiño nui. Tatu nya nyoho sacuví ndo tyiño nui, Suti cusacahnu ra chí ndo.

Nu cahán ra Jesús tuhun yoso caa cucúvira

²⁷ Vityin chicá xaan xiñi. Ta çñáá cha cacatyí? ¿Atu catyí chí Suti na sacanyaha ra tñdoho cha nyaá cunyehi vityin? Ma catyí cha tyicuan caa vatyi cha cuenda cuan vachi siqui ñuhu ñáyivi ihya. ²⁸ Vaha ca catyí chí Suti: “Sutu Mañi yuhu, şacahnu sivun” —catyí ra Jesús.

Tyicuan ta cahán noo ndusu ityi andiví ta catyí chí tyehe caa:

—Cha yahá sacahni sivi, ta cusacahni inga chaha —catyí ndusu cuan.

²⁹ Ta ñu nyicú yucuan, chíñi ñu ndusu cuan, ta catyí ñu vatyi savi cahán. Ta inga ñu catyí ñu:

—Noo ángel cahán chihin ra.

³⁰ Tyicuan ta ra Jesús catyí ra chí ñu:

—Ñima cha cuenda cha vaha chi yuhu cahán ndusu cuan soco cha cuenda cha vaha chi maa ndo cuví. ³¹ Vityin cuví cuhva cutachi tuñi Nyoo chi ñáyivi iyó siqui ñuhu ñáyivi. Ta vityin cuhva cutava ñehe Nyoo chi ra nyacá ñaha siqui ñuhu ñáyivi ihya. ³² Ta cuhva cha cutacai nu cruzi, yucuan cuhva cunaxite chi tandihi ñáyivi —catyí ra Jesús.

³³ Cahán ra tyehe caa cha cuñí ra na cu-tuñi ñi ñu tyi tyicuan caa cuhva cucúvi ra. ³⁴ Ta ñáyivi nacahan ñu ta catyí ñu chi ra:

—Tuhvá ndi chiñi ndi sacuahá ra nu libro ley yo vatyi ra cuví Cristo tyicuan ri maa cucoo ra. ¿Yoso caa cha catyí yoho tyi cusandaa ñu chi Rayii quichi nya gloria nu cruzi? ¿Yóo ra cuví Rayii cha quichi nya gloria cha cahún tuhun? —catyí ñu, ndacá tuhun ñu chi ra.

³⁵ Tyicuan ta ra Jesús catyí ra chi ñu:

—Iyó cha ndichin nu nyicu ndo, soco suhva ri ca quivi. Caca ndo ityi nu ndichin cha ni ri ca cha ndichin. Coto sana ri ñi ndo ta nduñaa ñi, vatyi ñu chicá noo nu ñaa ñi ña chitó ñu nya ityi cuahan ñu. ³⁶ Chino ñi ndo chi yuhu ra cuví ñuhu ndichin cuan, cha ni ri ca cha nyaá que chihin ndo. Tyicuan ta cuví ndo ñáyivi iyó nu ndichin.

Cha yahá catyí ra Jesús tuhun ihya tixehe nuu ra chi ñu.

Nu catyí chi ñáa tuhun cha ña cachinó ñi ra cacuvi nuu chi ñu Israel chi ra Jesús

³⁷ Vasi cuaha xaan milagru sacuví ra Jesús nuu ñu soco ña chinó ñi ñu chi ra. ³⁸ Vatyi tahán chi cha cuví tari catyí ra Isaías profeta Nyoo, nu cahán ra tyehe caa:

Sutu Mañi yuhu, yori cuñi chino ñi tuhun cahán ndi.

Yori cutuñi ñi tunyee ñi iyó chuun, Sutu Mañi yuhu, catyí ra Isaías ta cha naha.

³⁹ Ta cha cuenda tuhun ihya cha nyaá nu tutu, yucuan chaha vatyi ña cuví chino ñi ñu vatyi suri tyaa tucu ra Isaías tyehe caa:

⁴⁰ Nyoo sanducuaa ra chi ñu. Ta sandundava ra añima ñu, tacuhva cha ma nyehe ñu chihin chiti nuu ñu,

ta ma cutuñi ñi añima ñu,

ta ni ma nacuhva cuenda ñu chi ñu chi ra tacuhva sanduvaha ra chi ñu.

⁴¹ Ra Isaías catyí ra tyehe caa vatyi nyehe ra nu nyacá ñaha Sutu Mañi yo Jesús ta cahán ra tuhun ra.

⁴² Soco cuaha ñu Israel chinó ñi chi ra Jesús, ta nyacua nya suhva ra cacuví nuu, soco ña saquetuví ra nuu ñáyivi vatyi yuhví ra chi ra cacuví fariseo coto tava ñehe ra chi ra vehe ñuhu. ⁴³ Vatyi cuñí ca ra cuvaha ra nuu ñáyivi ta ñima ca cha cuvaha ra nuu Nyoo.

Tuhun cahán ra Jesús cusacutuñi chi ñáyivi

⁴⁴ Ñihi cahán ra Jesús, ta catyí ra:

—Ñu chinó ñi chii, ñima chi maa ri mai chinó ñi ñu, soco chinó tucu ñi ñu chi ra cha tachí chii. ⁴⁵ Ta ñu nyehé chii, nyehé tucu ñu chi ra cha tachí chii. ⁴⁶ Yuhu cha cuví tari noo cha ndichin vachi ñuhu ñáyivi ihya, vatyi tacuhva vatyi ñu chinó ñi chii ma ndoo ñu nu ñaa ñi. ⁴⁷ Soco tatu yihí ndo chiñi ndo tuhun cahán, ta ña sacuví ndo cha cahán, ñima yuhu tachi tuñi chi ndo. Vatyi ña vachi yuhu ñuhu ñáyivi ihya vatyi tachi tuñi chi ñáyivi. Soco vachi sacaqui añima ñu. ⁴⁸ Ñu ña cuñí naquehen tuhun cahán ta ña cuñí ñu sacuví ñu tari cuhva cuñí, iyó cha cutachi tuñi chi ñu. Tuhun cha cahán, ican cuan cutachi tuñi chi ñu nu cundihi quivi. ⁴⁹ Vatyi ñima cuenda mai cahán. Suti ra cha tachí chii, chaha ra tuhun chii ñáa cha cucahin ta ñáa cha cusañahi. ⁵⁰ Ta chité vatyi tuhun cha chaha ra, chahá chi noo ñáyivi cha ma naa ca maa coo ñáyivi. Yucuan chaha, tuhun cha cahán, cahán soco cuhva catyí maa Suti cha cahán cuví.

13

Nu nacatyá ra Jesús chaha ra cachicá noo chihin ra

¹ Nonga quivi cumañi ta chaa vico pascua chitó ra Jesús vatyi cha chaa cuhva cha cuaquita ra ñuhu ñáyivi ihya ta cunuhu ra nu nyaá Sutu ra. Tyicuan ri cuñí xaan ra chi ñu cuenda ra cha iyó siqui ñuhu ñáyivi ihya. Ta vityin cua sañahá ra chi ñu tyi cuñí xaan ra chi ñu vatyi cacúvi ra cha cuenda ñu.

² Ta cuxiñi ra Jesús chihin ra cachicá noo chihin ra. Ta cha quihvi cuihna añima ra Judas Iscariote sehe ra Simón tyiyuhú ra chi ra, naxico tuhun ra chi ra Jesús ta nacuhva cuenda ra chi ra chi ra xaan ñi chi ra. ³ Soco ra Jesús chitó ra vatyi chaha cuenda Sutu ra tandihi chi ra vatyi cunyaa ndaha ra. Ta chitó ra vatyi nu nyaá Nyoo quita ra ta suri yucuan cunanuhu ra. Ta nyaá ra Jesús cuxiñi ra. ⁴ Tyicuan ta nicuinanyaa ra ta tava ra sahma chata ra, ta chahñi ra noo toalla chichi ra. ⁵ Tyicuan ta tyihí ra ndutya chichi noo caa ta quichaha nacatya ra chaha ra cachicá noo chihin ra. Ta quichaha nacuhva ra chihin toalla cuan.

⁶ Ta cha cuanacatya ra chaha ra Simón Pedro ta catyí ra Simón chi ra:

—Sutu Mañi yuhu, ¿atu yoho cuanacatyon chahi?

⁷ Tyicuan ta catyí ra Jesús:

—Vityin ña cutuñi ñiun cha sacuví. Soco cucutuñi maa ñiun nu cuahan ca chi.

⁸ Soco ra Pedro catyí ra chi ra:

—Ni noo chaha ta ma nacatyon chaha yuhu.

Ta catyí ra Jesús chi ra:

—Tatu ma nacatye chahun, ñima ra cuende cuvún.

⁹ Tyicuan ta catyí ra Pedro chi ra Jesús:

—Tu tyicuan caa, Sutu Mañi yuhu, ñima chaha ri nacatyon, soco ñacatya tucun ndahi ta xiñi ñandihí —catyí ra.

¹⁰ Soco ra Jesús catyí ra chí ra:

—Ñu cha ni chityi, ña cuñi chí cha ndoo tandihí coño ñuhu ñu. Chaha ri ca ñu cuñi chí, vatyí cha ndi maa nani ñu. Nyoho cha ndi ndo, vasi ña tandihí ndo —catyí ra Jesús.

¹¹ Ta catyí ra vatyí ña tandihí ra ndi ra vatyí chitó ra yóo cha cunaxico tuhun chí ra chí ra xaan iñi chí ra.

¹² Ta cha yahá cha nacatya ra Jesús chaha ra cachicá noo chihin ra, ndihvi noo ra sahna ra, ta ñicunyaq tucu ra inga chaha nu mesa ta catyí ra chí ra:

—¿Atu cutuñi iñi nyoho cha sacuví chi ndo? ¹³ Nyoho catyí ndo chii, Maestro ta Sutu mañi yuhu, ta ndicha vatyí ican cuví. ¹⁴ Yuhu cha cuví Ra Sacuaha ta Sutu Mañi ndo, nacatye chaha ndo, tyicuan caa cuñi tucu chí cha nacatya ndo chaha tahan ndo. ¹⁵ Yuhu chahí noo cuhva chí ndo vatyí sacuvi ndo tari cuhva sacuví mai. ¹⁶ Cha ndicha catyí chí ndo vatyí ni noo musu ta ña cahnu ca ra ican saha chitoho ra. Ta ni noo ra cha cuahan tyiño, ña cahnu ca ra ican saha ra cha tachí chí ra. ¹⁷ Tatu cutuñi iñi ndo tuhun ihya, ta sacuví ndo, si xaan cucuví chí ndo.

¹⁸ Ñima cha cuenda tandihí ndo cahín. Yuhu chité yóo chí nacachí mai. Soco cuñi chí cha cucuví tari catyí tuhun Nyoo tyehe caa: “Ra cha chachí pan chihin, ican ra cuan cunaxico tuhun chí chí ra xaan iñi chí”, catyí chí nu tutu Nyoo. ¹⁹ Catyí chí ndo tuhun ihya cha ni cumañi ca chino cava tacuhva vatyí quivi nacuvi tyehe caa, chino iñi ndo tyi iquen cuví ra cha tinyaa cuatyí ndo. ²⁰ Cha ndicha catyí chí ndo vatyí ñu tiín cuenda chí ñu tachí yuhu chí, chí yuhu tiín cuenda ñu cuví cuan. Ta ñu cha tiín cuenda chí yuhu, tiín cuenda tucu ñu chí ra cha tachí chii —catyí ra Jesús.

Nu sacotó ra Jesús vatyí cunaxico tuhun ra Judas chí ra chí ra xaan iñi chí ra

(Mt. 26.20-25; Mr. 14.17-21; Lc. 22.21-23)

²¹ Cha yahá cha catyí ra Jesús tyehe caa, quichahá nducuihya xaan cuñi añima ra, ta catyí cachi ra:

—Cha ndicha catyí chí ndo, vatyí noo nyoho cunaxico tuhun ndo chii nuu ra xaan iñi chí —catyí ra Jesús.

²² Tyicuan ta ra cachicá noo chihin ra, quichahá canyehe ra nuu tahan ra, ta ña cachitó ra yóo chí tuhun cahán ra Jesús. ²³ Noo ra chicá noo chihin ra nyañaá ra chí ra Jesús nu cuxiñi ra. Ta ican ra cuví ra cha

cuñi xaan ra Jesús chí. ²⁴ Ta ra Simón Pedro savahá ra seña chí ra, na ndaca tuhun ra yóo chí tuhun cahán ra. ²⁵ Tyicuan ta nyañaá ra chí ra Jesús, ta ndaca tuhun ra chí ra:

—Sutu Mañi yuhu, ¿yóo ra cuví ra cha cahún tuhun?

²⁶ Ta nacahan ra Jesús ta catyí ra:

—Cuasatyí chii pan, ta ra cha cuhve chí, ican ra cuan cuví ra —catyí ra.

Tyicuan ta quehen ra chii pan ta satyí ra, ta chahá ra chí ra Judas Iscariote, sehe ra Simón. ²⁷ Ta cha quehen ra Judas pan cuan ta quihvi ra ña vaha añima ra. Tyicuan ta ra Jesús catyí ra chí ra:

—Tuhun cha yihí iñun sacuvun, sacuvi cha numi ri —catyí ra Jesús chí ra Judas.

²⁸ Soco ni noo ra canyicú nu mesa cuan, ña cacutuñi iñi ra ñáá tuhun cha catyí ra chí ra tyicuan caa. ²⁹ Soco cha cuenda vatyí ndaha ra Judas nyaá yitin xuhun, yucuan chaha yihí ra cuñi maa ra vatyí cuñi ra Jesús cha cusata ra cha chihuhú chí ra cha cuenda cha vico cuan, o nacuhva ra suhva xuhun cuan chí ñu ndahvi, cacuñi maa ra. ³⁰ Cha yahá chachí ra Judas pan, tyicuan ta quitá ra. Ta cha cuaa cuví cuan.

Ley cha chahá ra Jesús cha cuñi yo chí tahan yo

³¹ Cha yahá cha cuahan ra Judas, ra Jesús catyí ra:

—Vityin cunyehe ñáyivi yoso cha cahnu yuhu cha cuví Rayi chí quichí nya gloria. Ta cuanyehe ñu yoso cha cahnu Nyoo cha cuende. ³² Ta tatu Rayi chí quichí nya gloria sacahnú ra chí Nyoo, tyicuan ta Nyoo cusacahnu ra chí ra. Ta cha cha quivi cuasacahnu ra chí ra. ³³ Sehe luhli, ña naha ca cuacunyai chihin ndo. Nyoho cunanducu ndo chii, soco tari catyí chí ra cacuví nuu chí ñu Israel cuan, catyí chí ndo vityin, vatyí ma cuví cuhan ndo nu cuahin. ³⁴ Chahí noo tuhun chaa chí ndo. Cuñi ndo chí tahan ndo. Tari cuñi yuhu chí ndo, tyicuan caa cuñi chí cha cuñi ndo chí tahan ndo. ³⁵ Tatu cuñi ndo chí tahan ndo, tandihí ñáyivi ta coto ñu vatyí ñu nyicón chii cuví ndo.

Nu catyí ra Jesús vatyí ra Pedro cucatyí ra vatyí ña ñohó nuu ra chí ra

(Mt. 26.31-35; Mr. 14.27-31; Lc. 22.31-34)

³⁶ Ra Simón Pedro ndaca tuhun ra chí ra Jesús ta catyí ra:

—Sutu Mañi yuhu, ¿nya cuhun? —catyí ra.

Ta ra Jesús nacahan ra ta catyí ra:

—Nu cuahan yuhu, vityin ma cuví cunyon chii. Soco nu cuahan ca chí, ta cunyon chii —catyí ra Jesús.

³⁷ Tyicuan ta catyí ra Pedro chí ra:

—Sutu Mañi yuhu, ¿ñáá tuhun ma cuvi cunyiquen chuun vityin? Nyái cha cuhve ñayiví cha cuendon —catyí ra.

³⁸ Ta nacahan ra Jesús ta catyí ra:

—¿Atu ndicha cha cuhvon ñayivun cha cuende? Cha ndicha catyí chuun, vatyí cha ni cumañi ca cuacu chaa loho, yoho cucatyun uñi chaha tyi ña ñohó nuun chii —catyí ra Jesús chi ra Pedro.

14

Ra Jesús cuví ityí cuhun yo ta chaa yo nu nyá Sutu yo Nyoo

¹ Ta catyí ra Jesús:

—Ma caca xaan xiñi ndo. Chino iñi ndo chi Nyoo, ta chino iñi ndo chii. ² Vehe Suti cuaha xaan nuu coo ndo iyó. Tyehe ta ñima tyicuan caa, cha naha catyí yuhu chi ndo. Ta cuhin cusanduvahi noo nu coo ndo. ³ Ta cha yaha cha cuhin ta sanduvahi nu coo ndo, ta cuquichi inga chaha, quichi naquehin chi ndo. Tacuhva cunyaa ndo nu cuacunyai. ⁴ Nyoho chitó ndo nya cuhin, ta chitó ndo ityí.

⁵ Ta catyí ra Tomás chi ra:

—Tata, ña chitó ndi nya cuhun. Ta ¿yoso caa coto ndi ityí? —catyí ra.

⁶ Ta ra Jesús catyí ra:

—Yuhu cuví ityí cha cuahan gloria. Ta yuhu cuví cha ndicha. Ta suri yuhu cuví ra chahá ñayiví coo ndo. Noo tuhun ri cha cuenda yuhu, cuví chaa ndo nu nyaá Suti. ⁷ Ñohó nuu ndo chii, ta cha cuenda cuan ñohó nuu tucu ndo chi Suti. Ta nya vityin ta nu cuahan ca chi, ñohó nuu ndo chi ra, vatyí cha nyehé ndo chi ra —catyí ra Jesús.

⁸ Tyicuan ta catyí ra Felipe chi ra:

—Tata, cuhva cha nyehe ndi chi Sutu yo Nyoo, ta chihin yucuan ri ta ndoo ndi vaha.

⁹ Ta nacahan ra Jesús, ta catyí ra:

—Yoho Felipe, cha naha nyaí chihin ndo, ta ¿yoso caa cha catyún cha ta cohon nuu con chii? Ñu cha nyehé chii, nyehé tucu ñu chi Nyoo Suti. Ta ¿ñáá tuhun catyún chii: “Cuhva cha nyehe ndi chi Sutu yo Nyoo?” ¹⁰ ¿Atu ña chinó iñun tyi ñin ri cuví yuhu chihin Suti Nyoo? Ta maa ra ñin ri cuví ra chihin. Tuhun cha catyí chi ndo, ñima yuhu ri catyí, soco Suti cha nyaá chihin, ican ra sacuví tyiño ra chihin. ¹¹ Chino iñi ndo chii vatyí ñin ri ra cuví chihin Nyoo Suti. Ta Nyoo Suti ñin ri ra cuví ra chihin. O cuví tucu chino iñi ndo chii cha cuenda tyiño Nyoo Suti cha sacuví. ¹² Cha ndicha catyí chi ndo vatyí ñu chinó iñi chii, cusacuví tucu ñu cha sacuví yuhu. Ta cahnu ca cusacuví ñu, vatyí yuhu cuhin nu nyaá Nyoo Suti. ¹³ Ta tandihí cha cacan ndo chihin sivi, yuhu cusacuví tacuhva vatyí sacahnu ñayiví chi Suti Nyoo cha cuenda cha cuví Sehe ra.

¹⁴ Yuhu cusacuví ñáá cha cacan ndo chihin sivi.

Nu catyí ra Jesús vatyí cuhva ra Tatyí Ii ra chi yo

¹⁵ Tatu cuñí ndo chii, quichaha ndo tuhun cahín. ¹⁶⁻¹⁷ Ta cacan tahvi mai chi Nyoo Suti na saquichi ra noo ra naquehen ndahvi chi ndo. Ta ican ra cuan cuví Tatyí Ii Nyoo, ra cha cahán maa ri cha ndicha. Ta cucunyaa ra chihin ndo tyicuan ri maa. Soco ñayiví cha tahán ca iñi cha iyó siqui ñuhu ñayiví ihya ma cuvi naquehen ñu Tatyí Ii Nyoo vatyí ña cuví nyehe ñu chi ra. Ta ni ña caá ra añima ñu. Ta ni ña ñohó nuu ñu chi ra. Soco nyoho ñohó nuu ndo chi ra vatyí nyaá ra chihin ndo ta cuandoo ra chihin ndo. ¹⁸ Ma sandoo maa ri mai chi ndo. Quichi tiqui nu nyaá ndo. ¹⁹ Chiin ri ca, ta ñayiví cuenda ñuhu ñayiví ma nyehe ca ñu chii. Soco nyoho nyehé ndo chii. Vatyí yuhu iyé, yucuan chaha nyoho coo ndo ñandihí. ²⁰ Quivi cuan cucoto ndo tyi yuhu ñin ri cuví chihin Suti. Ta nyoho ñin ri cuví ndo chihin. Ta yuhu ñin ri cuví chihin ndo. ²¹ Ñu cha cumí vaha tuhun cahín, ta sacuví ñu cuhva catyí, ican ñu cuan cuví ñu cha cuñí chii. Ta ñu cha cuñí chii, Suti cucuñi ra chi ñu. Ta cuñí tucu yuhu chi ñu ta cusañahi chi ñu yóo ra cuví yuhu —catyí ra Jesús.

²² Ta catyí ra Judas, ñima ra Judas Iscariote, inga ra.

—Sutu Mañi yuhu, ¿yoso caa cha chi nyuhu cusañahun chuun, ta ñima chi ñu cuenda ñuhu ñayiví?

²³ Nacahan ra Jesús ta catyí ra:

—Ñu cuñí chii, sacuví ñu tuhun cahín. Ta Suti cuñí ra chi ñu. Ta quichi ndi nu nyaá ñu ta coo ndi chihin ñu. ²⁴ Ñu ña cuñí chii, ña sacuví ñu cha catyí. Ta tuhun cahín cha chiñi ndo, ñima tuhun mai cuví, tuhun cahán Suti, ra cha tachí chii cuví.

²⁵ Catyí tandihí tuhun ihya chi ndo cha ni ri ca cha nyaí chihin ndo. ²⁶ Soco nu cuahan ca chi cutachi Suti Tatyí Ii ra tyiño nui. Maa ra cuví ra cutyinyee chi ndo ta cunaquehen ndahvi ra chi ndo ta cusañaha ra tandihí chi ndo. Ta cusanicohon ra iñi ndo tuhun cha yaha cahín chihin ndo.

²⁷ Sandoí noo cha taxi coo añima ndo, tari cha taxi cuñí añime. Ican चाहí chi ndo. Ñima tari cha taxi cha ñihí ndo siqui ñuhu ñayiví ihya. Ma caca xaan iñi ndo ta ma yuhví ndo. ²⁸ Chiñi ndo tuhun cha cahín nu catyí vatyí cuahin ta quichi tiqui nu nyicú ndo. Tatu cuñí ndo chii, cucusi cuñí ndo tyi catyí vatyí cuahin nu nyaá Suti. Vatyí cahnu ca cuví Suti ican saha yuhu. ²⁹ Ta vityin catyí tiqui chi ndo cha ni cumañi ca cuhin, tacuhva quivi cuhin, cunachino iñi ndo chii.

³⁰ Ma cahan cuaha que chihin ndo. Vatyí vachi ra nyacá ñaha siqui ñuhu ñayiví ihya.

Vasi ña nyacá ñaha ra chii. ³¹ Soco cuñí chí nacoto ñáyivi iyó siqui ñuhu ñáyivi vatyí yuhu cuñí chí Nyoo Suti, ta sacuví tyiño tyaa ra chii.

¹ Ndjicuita ndo. Cqho ndo, naquita yo ihya.

15

Tari noo yoho tichaha ndivi cha ndicha vaha cuví ra Jesucristo

¹ Yuhu cuví yoho tichaha ndivi cha ndicha vaha. Ta Suti cuví ra sahá cumi chí yoho cuan. ² Chahnyá ra soco cha ña chahá chiti. Ta soco cha chahá chiti nacahnyá ra nuu chí, ta sanduvií ra, tacuhva nacuhva ca chí cuaha ca chiti. ³ Suti cha sandundií ra chí ndo chihin tuhun cha cahín chihin ndo. ⁴ Sañihi ca ndo cu ñin ri ndo chihin, tari yuhu ñin ri cuví chihin ndo. Tari noo soco yoho cuan ma cuví cuhva chí chiti cha maa ri maa chí tatu ña nyañaá chí chata yoho cahnu, tyicuan caa nyoho, ma cuví sacuví ndo cha vaha tatu ña ñin ri cuví ndo chihin.

⁵ Yuhu cuví yoho cahnu cuan. Ta nyoho cuví ndo soco yoho cuan. Ñu cha nyañaá chii, ta yuhu nyañaá chí ñu, cuaha cha vaha sacuví ñu, vatyí ñahri cha cuví sacuví ndo tatu yori yuhu nyaá chihin ndo. ⁶ Ñu cha ña nyañaá chii, cusacuita Suti chí ñu, tari sacuitá yo soco yoho cha chahnyá yo vatyí ña chahá chiti. Ta na ityi ta nasataca yo, ta cucayu nu ñuhu.

⁷ Tatu nyoho ta tyicuan ri nyañaá ndo chii, ta ña naa iñi ndo tuhun, caçan ndo ñáá cha cuñí ndo, ta yuhu cuhve. ⁸ Tatu cuaha cha vaha sacuví ndo, sacahnú xaan ndo chí Suti. Ta tyicuan caa sañahá ndo tyi cuví ndo noo ñu ndicha cha nyicón chii. ⁹ Yuhu cuñí chí ndo, tari cuñí Suti chii. Ma naa iñi ndo cuhva cuñí chí ndo. ¹⁰ Tatu quichahá ndo tuhun cahín, cucuñi que chí ndo. Tari yuhu quichahí nu cahán Suti, ta cuñí xaan ra chii.

¹¹ Cahín tyehe caa chihin ndo tacuhva na cusii cuñí ndo chihin. Ta cucusii vavaha cuñí ndo. ¹² Tuhun cha catyí chí ndo, ican cuví ihya: na cuñí ndo chí tahan ndo, tari cuñí yuhu chí ndo. ¹³ Tatu yaha xaan cuñí yo chí tahan yo, caña iñi yo cuhva yo nyacua nya ñáyivi yo cha cuenda ñu. ¹⁴ Nyoho cuví ndo amigue, tatu sacuví ndo cha catyí chí ndo. ¹⁵ Ña catyí que vatyí musi cuví chí ndo, vatyí noo musu ña chitó ra ñáá cha sacuví chitoho ra. Amigue, catyí chí ndo vatyí sacote chí ndo tandihí maa cha catyí Suti chii. ¹⁶ Nyoho ña cachí ndo chii. Mai nacachí chí ndo. Ta catyí chí ndo na cahun ndo ta sacuví ndo tyiño nui. Ta tyiño sahá ndo cucuvaha xaan tari cuvaha noo itu. Ta cuaha vavaha niñi cucoo, ta ma tiví maa chí. Ta tyicuan caa ta Suti cuhva ra tandihí cha cacan ndo chihin sivi. ¹⁷ Ican ihya cuví cha catyí chí ndo: Cuñi ndo chí tahan ndo.

Ñáyivi cuenda ñuhu ñáyivi tasi cuñí nyehé ñu chí ra Jesús ta chí ñu nyicón chí ra

¹⁸ Tatu ñu cuenda ñuhu ñáyivi ña cuñí nyehé ñu chí ndo, cqto ndo vatyí xihna ca chí yuhu ña cuñí nyehé ñu. ¹⁹ Tyehe ta cuví ndo ñu cuenda ñuhu ñáyivi, cucuñi ñu chí ndo tari cuñí ñu chí tahan ñu. Soco yuhu nacachí chí ndo mahñu ñu. Ta yucuan chaha tasi cuñí nyehé ñu chí ndo, vatyí ñima ca ñu cuenda ñuhu ñáyivi cuví ndo. ²⁰ Nícohon iñi ndo tuhun cha catyí chí ndo, tyi ni noo musu ta ña cahnu ca ra ican saha chitoho ra. Ta tatu quichahá ñu tuhun cahín chihin ñu, tyicuan caa cuquichaha tucu ñu tuhun sañaha ndo chí ñu. Ta tatu sataší iñi ñu chí, cusataší iñi tucu ñu chí nyoho. ²¹ Tandihí ihya cusacuví ñu chí ndo cha catyí yuhu, vatyí ña ñohó nuu ñu chí ra cha tachí chii.

²² Tyehe ta ña quichí cahin chihin ñu, yucuan ndicha ñahri cuatyí ñu. Soco vityin ñahri siqui tyaa ñu cuenda cuatyí ñu, vatyí cha yahá catyí chí ñu. ²³ Ñu cha tasi cuñí nyehé chii, tasi cuñí nyehé ñu chí Suti ñandihí. ²⁴ Ñahri cuatyí ñu, tyehe ta ña sacuví milagru cha ni nonga ñáyivi ta sacuví ca. Soco cha nyehé ñu tandihí ihya. Ta vasi cha nyehé ñu soco tasi cuñí nyehé ñu chí, ta chí Suti ñandihí. ²⁵ Soco tandihí tuhun ihya cuví chí tyehe caa, vatyí cuñí chí cha chino cava tari cuhva catyí nu tutu ley cha sacuahá ñu nu catyí chí tyehe caa: “Ñahri vihi tuhun, ta cutasi cuñí ñu nyehé ñu chí”, catyí chí.

²⁶ Soco cuquichí Tatyí Ii, ra cha cahán maa ri cha ndicha. Maa ra cuví ra cha naquehen ndahvi chí ndo. Nachai nu nyaá Suti ta cusaquichí ndi chí ra nu nyicú ndo. Ta quivi quichi ra, cucahan ra tumañi iñi cuende. ²⁷ Ta nyoho tucu cucahan ndo tumañi iñi cuende, vatyí nyaá ndo chihin nyata quivi quichahá sahatyiñe.

16

¹ Catyí tuhun ihya chí ndo tacuhva cha ma sandihí ndo cha chinó iñi ndo chí. ² Cutava ñehe ñáyivi chí ndo vehe ñuhu. Ta cuhva chí quivi vatyí ñu cahí chí ndo, cucuñi ñu vatyí tyiño nuu Nyoo sacuví ñu. ³ Tyehe caa cusacuví ñu cha cuenda vatyí ni chíin maa ta cohon nuu ca ñu ni chí Suti ta ni chí mai. ⁴ Catyí tuhun ihya chí ndo tacuhva vatyí quivi chaa chí tari cuhva catyí chí ndo, nicohon iñi ndo vatyí cha yahá catyí chí ndo.

Tyiño sahá Tatyí Ii Nyoo

Ña catyí tuhun ihya chí ndo quivi xihna ri cha cuenda tyi nyaá que chihin ndo. ⁵ Soco vityin cahun vatyí cunyai chihin ra cha tachí chii. Ta ni noo nyoho ña ndacá tuhun ndo chí nya cuhin. ⁶ Soco nducuihya ndihí iñi ndo cha catyí tuhun ihya chí ndo. ⁷ Soco catyí cha ndicha chí ndo: vaha ca cha cuhin

cha cuenda cha vaha chi ndo. Vatyí tatu ma cuhin, ma quichi Tatyí li cha naquehen ndahvi chi ndo. Soco tatu cuhin, cutachi mai chi ra. ⁸ Ta quivi quichi ra cusacoto ra chi ñayiví iyó siquí ñuhu ñayiví vatyí iyó cuatyí ñu. Ta cusañaha ra chi ñu vatyí iyó noo cuhva vaha tahán chi coo ñu. Ta cusacoto ra chi ñu vatyí cutuñi chi ñu nuu Nyoo. ⁹ Cusacoto ra chi ñu tyi iyó cuatyí ñu cha cuenda cha ña chinó iñi ñu chii. ¹⁰ Cusacoto ra chi ñu tyi iyó noo cuhva vaha cha tahán chi coo ñu, vatyí yuhu cuhin nu nyaá Suti ta ma nyehe ca ndo chii. ¹¹ Ta cu coto ñu tyi cusandaa Nyoo cuatyí ñu vatyí cha yaha cundaq cuatyí ra cuví cuihna, ra nyacá ñaha siquí ñuhu ñayiví ihya.

¹² Ta cuaha ca tuhun nyaá catyí chi ndo, soco ma cutuñi iñi ndo vityin. ¹³ Soco quivi quichi Tatyí li cha cahán maa ri cha ndicha, maa ra cusañaha tandihí cha ndicha chi ndo. Vatyí ñima cuenda maa ra cucahan ra, soco cucahan ra tandihí cha chiñi ra. Ta cusacoto ra tuhun ñáá cha cucuvi nu cuahan ca chi. ¹⁴ Cusacahnu ra chii, vatyí cunaquehen ra tuhun ta cusañaha ra chi ndo. ¹⁵ Tandihí cha iyó chi Suti, chi mai cuví ñandihí. Yucuan chaha vatyí Tatyí li cuquehen cuenda ra cha iyó chii, ta cusañaha ra chi nyoho.

Ra cha cachicá noo chíhin ra Jesús cuihya iñi ra, soco nu cuahan ca chi cucusi cuñi ra, catyí ra Jesús

¹⁶ *Ña naha ca ta ma nyehe ca ndo chii, soco yaha cuan ta cunyehe tucu ndo chii, vatyí yuhu cuhin nu nyaá Suti —catyí ra Jesús.

¹⁷ Tyicuan ta suhva ra cachicá noo chíhin ra, candaca tuhun ra chí tahan ra ta catyí ra:

—¿Ñana vaha tuhun cahán ra ihya? Catyí ra chí yo vatyí ña naha ca ta ma nyehe ca yo chí ra, ta yaha cuan ta cunyehe tucu yo chí ra inga chaha vatyí cuhun ra nu nyaá Sutu ra. ¹⁸ ¿Ñáá cha cuñi chí catyí cha ña naha ca cuan? Ña cutuñi iñi yo ñáá túhun cahan ra —catyí ra.

¹⁹ Ra Jesús tuví iñi ra vatyí cacuñi ra candaca tuhun ra chí ra, ta catyí ra:

—Yuhu catyí chi ndo vatyí ña naha ca ta ma nyehe ca ndo chii, soco yaha cuan ta nanyehe tucu ndo chii. ¿Atu ican ihya cuví cha ndacá tuhun ndo chí tahan ndo? ²⁰ Cha ndicha catyí chí ndo vatyí nyoho cucuacu ndo ta cunducuihya iñi ndo, soco ñu cuenda ñuhu ñayiví cusí cuñi ñu. Soco vasi cuihya iñi ndo vityin, tucuihya iñi cha iyó chí ndo cunanduvi chí tusí iñi. ²¹ Cuhva cha cuacuacu sehe noo ñaha síhi nyehé ña cha uhvi. Soco cha yaha cha cacu cha lee cuan, ni tuhun cha uhvi cuan ña nicohon ca iñi ña cha cuenda cha síi cuñi ña vatyí cacú noo cha lee sehe ña. ²² Tyicuan caa tucu nyoho vityin, nducuihyá iñi ndo. Soco cunanyehe

tiqúi chí ndo inga chaha. Tyicuan ta cundusi tucu iñi añima ndo. Ta yori cuví tinyaa tusí iñi cuan chí ndo.

²³ Quivi cuan ñahri ca cha cundaca tuhun ndo chii. Cha ndicha catyí chí ndo vatyí Nyoo Suti cucuhva tandihí cha cacan ndo chí ra chíhin sívi. ²⁴ Nya vityin ta ta ñaha ca cha cacan ndo chíhin sívi yuhu. Çacan ndo ta cuñihi ndo tacuhva na cusí xaan cuñi ndo.

Ra Jesucristo cuví chasaha ra chí cha ña vaha iyó ñayiví

²⁵ *Maa maa ri chíhin cuhva ri sañahí chí ndo. Soco nu cuahan ca chí, ñima ca chíhin cuhva cuasañahi chí ndo, soco cuacatyí cachi chí ndo tuhun Suti. ²⁶ Quivi cuan chíhin sívi cucacan ndo cha cacan ndo chí ra. Ta ña chíñuhú ca cha cucuacu ndahvi nuu Suti cha cuenda ndo. ²⁷ Vatyí maa Nyoo Suti suri cuñi ra chí ndo. Cuñi ra chí ndo vatyí nyoho cuñi ndo chii. Ta nachinó iñi ndo vatyí nu nyaá Nyoo quíte. ²⁸ Nu nyaá Suti quíte vatyí quichi siquí ñuhu ñayiví ihya. Soco vityin cusandoi ñuhu ñayiví ihya vatyí cunuhi nu nyaá ra —catyí ra Jesús.

²⁹ Tyicuan ta ra cachicá noo chíhin ra cacatyí ra:

—Vityin ndicha catyí cachun chí ndi.

³⁰ Vityin nyehe ndi vatyí chitón tandihí maa tuhun, ta ña nyatun cha ndaca tuhun ndi chuun, vatyí cha chitón nyacua nya tandihí cha chicá xiñi ndi. Yucuan chaha chinó iñi ndi vatyí nu nyaá Nyoo quiton —catyí ra chí ra Jesús.

³¹ Ta catyí ra Jesús:

—Ta vityin ¿atu chinó iñi ndo chí? ³² Soco catyí chí ndo vatyí cha vachi chí cuhva ta vityin cuví cuhva vatyí nyoho cuquiti cuatyí ndo síin síin ityi, ta cusandoo ndo notuhun mai. Soco ñima notuhun ri mai nyaá, vatyí nyaá Suti chíhin. ³³ Catyí tuhun ihya chí ndo tacuhva na coo cha taxi ri añima ndo cha cuenda cha ñin ri cuví ndo chíhin. Ñuhu ñayiví ihya cunyehe ndo tindoho, soco sanyee ndo iñi ndo vatyí yuhu cha cuví chasahi chí cha ña vaha cha iyó ñuhu ñayiví ihya.

17

Nu chicán tahvi ra Jesús cuenda ra cachicá noo chíhin ra

¹ Cha yaha cha catyí ra Jesús tuhun ihya, nanyehe ndaa ra ityi andivi ta catyí ra:

—Sutu Mañi yuhu, cha chaq cuhva vityin. Sacahnu chí yuhu cha cuví sehun, tacuhva sacahnu tucu yuhu chuun. ² Vatyí tyaun tyiño chíi siquí tandihí ñayiví, vatyí cuhve ñayiví cha ma naa ca maa chí tandihí ñu chahun chíi. ³ Ta ihya cuví cuhva coo ñu ñayiví cha ma naa ca maa: Cha cohon nuu ñu chuun vatyí noo tuhun ri maun cuví

Nyoo cha ndicha vaha, ta cohon nuu ñu chi yuhu ra Jesucristo ra cha tachun chi.

⁴ 'Cha sacahnj chuun ihya siqui ñuhu ñayivj ta cha sandihj tyiño cha chahun chii. ⁵ Ta vityin, Sutu Mañi yuhu, cua ndichi nu nyaun, ñacuhva cha cahnun cuví maun chii, tari cuhva cha chiyó chii nyata ni cumañi ca chino ñuhu ñayivj.

⁶ 'Tandihj ra cha chahun chii ra cha natava vahun mahñu ñu iyó siqui ñuhu ñayivj ihya sacote chi ra yóo ra cuví yoho. Chi maun cuví chi ra ta chahun chi ra chii. Ta quichahá ra tuhun cahún. ⁷ Vityin cachitó ra vatyi tandihj cha chahun chii, nu nyaún quitá. ⁸ Vatyi catyj chi ra tuhun cha catyun chii, ta maa ra canatiin cuenda ra. Ta tuvj iñi ra vatyi ndicha cha quite nu nyaún, ta chinó iñi ra tyi maun tachj chii.

⁹ 'Yuhu chiquén cha cuenda ra chuun. Ña chiquén cha cuenda ñayivj ña ñohó nuu chuun, soco chiquén cha cuenda ra cha chahun chii, vatyi chi maun cuví chi ra. ¹⁰ Tandihj cha iyó chii, chi maun cuví. Ta tandihj cha chuun, chi mai cuví. Ta tandihj cuan sacahnj chii.

¹¹ 'Yuhu ma ndoo que ñuhu ñayivj ihya, soco maa ra cundoo ra ñuhu ñayivj ihya. Ta yuhu cuhin tyi cunyai chuhun. Sutu Mañi yuhu, saha cumi chihin cha ndicha ñuhu chi ra cha chahun chii, tacuhva na cu in ri ra chihin ra tahan ra, tari yoho chihin yuhu, in ri cuví yo. ¹² Qui vj chinyai ñuhu ñayivj ihya chihin ra, saha cumi chi ra cha chahun chii chihin cha ndicha ñuhun. Ta sahj cuenda chi ra. Ta ni noo ra ña cuanaa soco noo tuhun ri ra cha cha nyaá maa cunaa, ican ra cuan cunaa, tacuhva chino cava tari cuhva catyj nu tutu maun.

¹³ 'Vityin cha vachi nu nyaún, soco cha ni ri ca cha nyaí siqui ñuhu ñayivj ihya, catyj tuhun ihya tacuhva na cusj cuñi ra tari mai. ¹⁴ Yuhu catyj chi ra tuhun cahún, soco ñayivj cuenda ñuhu ñayivj tasi cuñi nyehe ñu chi ra nyicón chi yo, cha cuenda vatyi ñima ra cuenda ñuhu ñayivj cuví ra, tari yuhu, ñima ra cuenda ñuhu ñayivj cuví. ¹⁵ Ña chiquén chuun cha tavon chi ra nyicón chi yo nu ñuhu ñayivj ihya, soco saha cumun chi ra coto ñáá cha saha ra ña vaha chi ra. ¹⁶ Tari yuhu ñima ra cuenda ñuhu ñayivj cuví, tyicuan caa tucu ra ihya, ñima ra cuenda ñuhu ñayivj cuví ra. ¹⁷ Cuhva cha ndicha chi ra nasacuvi ra maa maa ri cuhva cuñi maun. Tuhun cahún, ican cuví cha ndicha. ¹⁸ Tari tachun chi yuhu nu nyicú ñu iyó siqui ñuhu ñayivj, tyicuan caa tachj tucu yuhu chi maa ra nyicón chi yo nu nyicú ñu iyó siqui ñuhu ñayivj. ¹⁹ Ta cha cuenda cha vaha chi ra, sacuvi yuhu maa maa ri cuhva cuñi maun, tacuhva vatyi chihin cha

ndicha, cuví sacuvi tucu maa ra maa maa ri cuhva cuñi maun.

²⁰ 'Soco ñima cha cuenda ri ra ihya chiquén chuun, soco chicán tiqui cha cuenda ñayivj cha cuchino iñi chii chihin tuhun cahán ra ihya nu cuahan ca chi. ²¹ Chiquén chuun na tandihj ñu ta in ri na cuví ñu chihin tahan ñu. Ta noo ri na cuví ñu chihin yo, Sutu Mañi yuhu. Tari yoho nyaún chihin ta yuhu nyaí chuhun, na cu in ri cuví ñu chihin yo, tacuhva vatyi tandihj ñayivj iyó siqui ñuhu ñayivj chino iñi ñu tyi maun tachj chii. ²² Yuhu chahj cha ndicha ñuhu chi ñu nyicón chi yo, suri cha ndicha ñuhu cha chahun chii. Vatyi chihin cuan na in ri cuví ñu tari yoho chihin yuhu noo ri cuví yo. ²³ Yuhu nyaí chihin ñu ta yoho nyaún chihin, tacuhva na cuví yo noo ri chihin ñu. Tyicuan caa ta coto tandihj ñayivj iyó siqui ñuhu ñayivj tyi maun tachj chii, ta cuñi xaun chi ñu nyicón chi yo tari cuñun chi yuhu.

²⁴ 'Sutu Mañi yuhu, maun chahun chi ñu chii. Ta cuñi cha cunyata yu chihin nu cuacunyai, tacuhva nanyehe ñu cha ndicha ñuhu cha chahun chii vatyi cuñun chii nyata ni cumañi ca chino ñuhu ñayivj. ²⁵ Sutu Mañi yuhu, ra vaha cuvún, ta ñu cuenda ñuhu ñayivj ña ñohó nuu ñu chuun, soco yuhu ñohó nuu chuun. Ta ra nyicón chi yo ihya chitó ra tyi maun tachj chii. ²⁶ Cha catyj chi ra yóo ra cuvún, ta cucatyi tiqui inga chaha, tacuhva vatyi tari cuhva cuñun chii, tyicuan caa cuhva cuacuñi tucu maa ra chi ra tahan ra. Ta yuhu cunyai añima ra.

18

Nu cuahan ra Jesús vehe caa

(Mt. 26.47-56; Mr. 14.43-50; Lc. 22.47-53)

¹ Cha yahá cha catyj ra Jesús tuhun ihya, quitá ra ta cuahan ra chihin ra cachicá noo chihin ra inga chiyó yuhu yuvi Cedron. Ta yucuan nyaá noo chacu yutun yucu. Ta yucuan quihvj ra Jesús chihin ra cachicá noo chihin ra. ² Ta ra Judas, ra cha naxicó tuhun chi ra, chitó ra nu cuahan ra Jesús. Vatyi tuhvá ra Jesús chahán ra yucuan chihin ra cha cachicá noo chihin ra. ³ Ta yucuan chaq ra Judas chihin cuaha sindaro ta cuaha policia cuenda vehe ñuhu cha tachj ra cuví nuu chi tata sutu ta ra cuví fariseo. Chaq coyo ra yucuan, canyisó ra mityi, ta canyiso ra lámpara ta ñuhu yiti. ⁴ Ta vatyi ra Jesús cha chitó ra tandihj cha cucuvi chi ra, quitá ra ta ndaca tuhun ra chi ra:

—¿Yóo chi nanducú ndo? —catyj ra.

⁵ Ta cacatyi ra chi ra:

—Chi ra Jesús ra ñuu Nazaret.

Ta catyj ra Jesús:

—Yuhu cuví —catyj ra.

Ta ra Judas, ra cha naxicó tuhun chi ra Jesús nuu ra xaan iñi chi ra, nanyaá ra chihin ra yucuan. ⁶Ta cuhva cha catyí ra Jesús: “Yuhu cuví”, tandihi ra canandacá chata ra ta canduva ra nu ñuhú. ⁷Tyicuan ta inga tucu chaha ndacá tuhun ra Jesús chi ra, ta catyí ra:

—¿Yóó chi nanducú ndo?

Ta cacatyí ra:

—Chi ra Jesús ra ñuu Nazaret.

⁸Ta catyí ra Jesús:

—Cha catyí chi ndo tyi yuhu cuví. Tatu chii nanducú ndo, saña ndo chi ra chica noo chihin ra cunahun coyo ra —catyí ra Jesús chi ra.

⁹Ican tyehe caa catyí ra Jesús tacuhva ra chino cava cha catyí maa ra ta ityi chata ca nu catyí ra: “Ra cha chahá Suti chii, ni noo ra ña cuanaá.” ¹⁰Tyicuan ta ra Simón Pedro nyisó ra noo mityí. Ta tava ra ta chahnya ra soho chiyo vaha noo ra cha nañi Malco. Cuví ra cuan musu ra cuví nuu chi tandihi tata sutu. ¹¹Soco ra Jesús catyí ra chi ra Pedro:

—Natyihí mityun chichi veno. Tatu Nyoo Suti ta cuñi ra cha nyehi tindoho, tahán chi cha nyehi —catyí ra Jesús chi ra.

Nu nanyaq ra Jesús nuu ra cuví nuu chi tata sutu

(Mt. 26.57-58; Mr. 14.53-54; Lc. 22.54)

¹²Tyicuan ta sindaro cuan chihin capitán ra, ta policia cuenda vehe ñuhu, catyín ra chi ra Jesús, ta chahñi ra chi ra vatyí cahun ra vehe caa. ¹³Tyicuan ta chinyacá ra chi ra vehe ra Anás, vatyí ra Anás cuan tyiso ra Caifás cuví chi ra. Ta cuiya cuan cuví ra Caifás ra cuví nuu chi tata sutu. ¹⁴Ican ra Caifás ihya cuví ra cha catyí chi ra cacuví nuu chi ñu Israel vatyí vaha ca cha cuví noo ri rayi cha cuenda tandihi ñáyivi ñuu.

Nu catyí ra Pedro tyi ña ñohó nuu ra chira Jesús

(Mt. 26.69-70; Mr. 14.66-68; Lc. 22.55-57)

¹⁵Ra Simón Pedro ta nonga ra cha chica noo chihin ra Jesús, canyicón ra chi ra Jesús nu cuahan ra nuquehe vehe ra Anás cuan. Ta ra cuví nuu chi tata sutu cuan ñohó nuu ra chi inga ra cuan. Yucuan chaha quihví ra cuan chihin ra Jesús nuquehe ra cuví nuu cuan. ¹⁶Soco ra Pedro ndoq ra yuvehe chata vehe. Yucuan chaha quitá ra cha ñohó nuu chi ra cuví nuu chi tata sutu cuan, ta cahán ra chihin ñaha cha nyaá yuvehe cuan. Ta tyihí ra chi ra Pedro chichi nuquehe cuan. ¹⁷Tyicuan ta ñaha cha nyaá yuvehe cuan ndacá tuhun ña chi ra Pedro, ta catyí ña:

—¿Atu ñima noo ra chicá noo chihin rayi cuan cuvún?

Ta ra Pedro catyí ra:

—Ñime cuví —catyí ra chi ña.

¹⁸Tyicuan ta musu ta policia cha tayucú yucuan, casanatahan ra ñuhu vatyí vichin xaan. Ta tayucú ra casanasaá ra chi ra. Ta ñohó tucu ra Pedro cuan yunuhu cuan, sanasaá ra chi ra.

Nu sanahma ra cuví nuu chi tata sutu chi ra Jesús

(Mt. 26.59-66; Mr. 14.55-64; Lc. 22.66-71)

¹⁹Tyicuan ta ra cuví nuu chi tata sutu quichahá ndaca tuhun ra chi ra Jesús, yóó ra cuví ra cachicá noo chihin ra, ta ñáa cha sañahá ra chi ñáyivi. ²⁰Ta ra Jesús catyí ra chi ra:

—Yuhu chihin nuu tandihi ñáyivi cahín. Ta sañahí chichi vehe ñuhu tahan tahan ñuu ta chichi vehe ñuhu cahnu ñuu ihya nu ndu iñ ri tandihi ñu Israel. Ta ñahri tuhun xehe cahín. ²¹¿Ñáa tuhun cha ndacá tuhun chii? Vaha taxin ca ndaca tuhun chi ñu cha chiñi tuhun cahín, ta maa ñu nacatyí ñu ñáa tuhun cahín chihin ñu. Maa ñu chitó ñu ñáa tuhun cahín —catyí ra Jesús chi ra.

²²Cuhva cha catyí ra Jesús tuhun ihya, noo policia vehe ñuhu cha nanyaá cuan, cañi ra noo nuu ra Jesús ta catyí ra:

—¿Atu tyiña caa nacahún nu cahán ra cuví nuu chi tata sutu? —catyí ra chi ra Jesús.

²³Ta ra Jesús catyí ra:

—Tatu cahín noo tuhun ña vaha, catyí chii nya maa maa ña vaha cahín. Soco tatu cahín tuhun vaha, ¿ñáa tuhun cha cañun chii? —catyí ra Jesús chi ra cuan.

²⁴Yahá cuan ta nuhñi ra Jesús, ta tachí ra Anás chi ra nu nyaá ra Caifás, ra cuví nuu chi tata sutu.

Nu catyí ra Pedro inga chaha vatyí ña ñohó nuu ra chi ra Jesús

(Mt. 26.71-75; Mr. 14.66-72; Lc. 22.58-62)

²⁵Ta ra Pedro nanyaá ca ra yunuhu cuan sanasaá ra chi ra. Ta catyí ñu chi ra:

—¿Atu ñima noo ra chicá noo chihin ra cuan cuví yoho? —catyí ñu chi ra.

Ta ra Pedro tixehe ra, ta catyí ra:

—Ñime.

²⁶Tyicuan ta noo musu ra cuví nuu chi tata sutu, noo ra cha cuví ñáyivi chi ra cha chahnya ra Pedro soho, quichahá ndaca tuhun ra ta catyí ra:

—Ta caa cuiñi tyi nyehi chuun chihin ra chichi chacu cuan —catyí ra chi ra Pedro.

²⁷Ta ra Pedro tixehe ra inga chaha, ta caa cuhva ri cuan ta chacu noo loho.

Nu nanyaá ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸Yahá cuan ta quitá coyo ra chihin ra Jesús vehe ra Caifás ta chinyacá ra chi ra vehe tyiño gobernador. Cha vachi cundichin ta ra Israel ña caquihví ra chichi

vehe tyiño cuan vatyí ñima vehe ñu Israel cuví. Ta vatyí catyí ñu tyi yica cha quihví ñu vehe savahri vatyí coto ma cuví cuxihí ñu quivi vico pascua cuan. ²⁹ Yucuan chaha quitã ra Pilato vatyí cahan ra chihin ra, ta catyí ra:

—¿Ñáá cuatyí tyaá ndo siqui ra ihya? —catyí ra Pilato chí ra ñuu Israel.

³⁰ Ta canacahan ra Israel ta catyí ra: —Tyehe ta ñima noo ra iyó cuatyí cuví ra, ma nacuhva cuenda ndi chí ra chuun —cacatyí ra chí ra Pilato.

³¹ Tyicuan ta ra Pilato catyí ra chí ra: —Quehen maa ndo chí ra, na cutuñi chí ra nuu maa ndo tari cuhva catyí ley maa ndo.

Ta nacahan ra ñuu Israel cuan ta cacatyí ra:

—Soco nyuhu ñu Israel ñahri ityi iyó chí ndi cha cahñi ndi chí ni noo ñáyivi —catyí ra.

³² Tyicuan caa ching cava cha catyí ra Jesús yoso caa cucúvi ra. ³³ Tyicuan ta nandihví tucu ra Pilato chichi vehe tyiño cuan inga chaha. Ta canã ra chí ra Jesús ta ndaca tuhun ra chí ra:

—¿Atu yoho cuvún rey cuenda ñu Israel? —catyí ra chí ra.

³⁴ Ta ra Jesús catyí ra: —¿Atu cha cuenda maun ndaca tuhun, o inga ñu nacatyí ñu tuhin chuun? —catyí ra Jesús chí ra Pilato.

³⁵ Ta catyí ra Pilato: —Ñima ra ñuu Israel cuví yuhu. Suri ra ñuu maun ta ra cuví nuu chí tata sutu ñuu maun cuví ra canacuhva cuenda chuun chii. ¿Ñáá cha sacuvun? —catyí ra chí ra Jesús.

³⁶ Tyicuan ta nacahan ra Jesús ta catyí ra: —Nu nyacá ñahi ñima cuenda ñuhu ñáyivi ihya cuví. Tyehe ta ican, ra nyicón chii cañi tahan ra tacuhva ma cunyi ndaha ra Israel. Soco nu nyacá ñahi, ñima cuenda ihya cuví —catyí ra Jesús chí ra Pilato.

³⁷ Tyicuan ta ra Pilato catyí ra chí ra: —¿Tu tyicuan caa, rey cuvún vii? —catyí ra Pilato chí ra Jesús.

Ta nacahan ra Jesús ta catyí ra: —Rey cuví tari catyun chiña. Yucuan cuenda caquí ta vachí ñuhu ñáyivi ihya, vatyí catyí ñáá cha cuví cha ndicha. Tandihí ñu quichaha cha ndicha, tyasohó ñu tuhun cahín —catyí ra Jesús.

³⁸ Ta ra Pilato catyí ra chí ra: —¿Ta ñáá cha cuví cha ndicha? —catyí ra.

Nu cuacacahñi ra chí ra Jesús

(Mt. 27.15-31; Mr. 15.6-20; Lc. 23.13-25)

Cha yaha cha ndaca tuhun ra tuhun ihya, quitã ra Pilato chichahan ra chihin ra Israel inga chaha ta catyí ra:

—Yuhu ña nañihi mai ni noo cuatyí ra ihya. ³⁹ Soco nyoho iyó noo costumbre chí

ndo cha chican ndo na sañe chí noo ra ñohó vehe caa cha vico pascua ihya. ¿Atu cuñi ndo cha sañe chí ra cha cuví rey cuenda ndo ñu Israel? —catyí ra Pilato chí ra.

⁴⁰ Tyicuan ta tandihí ra quichaha canachaa ra ta catyí ra:

—¡Ma sañon chí ra chiña! ¡Chí ra Barrabás sañon! —catyí ra.

Ta ra Barrabás cuví ra noo ra suhu.

19

¹ Tyicuan ta quehen ra Pilato chí ra Jesús ta tachí ra na cucañi sindaro chí ra. ² Ta sindaro savaha ra noo corona chihin iñu ta catyihí ra xiñi ra Jesús. Ta sacuihño ra chí ra chihin noo sahma tyacu nyaa tari cha tuhvã rey cañihnó. ³ Tyicuan ta catuhvã ra nu nanyaã ra ta chacú nyaa ra chí ra, ta cacatyí ra:

—¡Nocumi chuun yoho Rey cuenda ñu Israel! —cacatyí ra, ta cacatu ra chí ra.

⁴ Tyicuan ta quitã tucu ra Pilato inga chaha ta catyí ra chí ra:

—Nyehé ndo cuatave chí ra ityi nuu ndo tacuhva nanyehe ndo vatyí ni noo cuatyí ra ña nañihi —catyí ra Pilato chí ra.

⁵ Ta quitã ra Jesús yihí corona iñu cuan xiñi ra, ta ñihnó ra sahma tyacu nyaa cuan. Tyicuan ta ra Pilato catyí ra chí ra:

—¡Ma ra ihya! —catyí ra chí ra.

⁶ Cuhva cha cananyehe ra cacuví nuu chí tata sutu ta policia chí ra, quichaha cacana chaa ra ta catyí ra:

—¡Cahñi chí ra nu cruzi! ¡Cahñi chí ra nu cruzi! —cacatyí ra.

Soco ra Pilato catyí ra chí ra: —Quehen maa ndo chí ra ta cahñi maa ndo chí ra nu cruzi. Vatyí yuhu ni noo cuatyí ra ña nañihi.

⁷ Soco nacahan ra Israel cuan ta cacatyí ra:

—Iyó noo ley chí ndi, ta cuhva catyí ley ndi, cuñi chí cha cúvi ra vatyí nasahá ra Sehe Nyoo chí ra —cacatyí ra.

⁸ Cha chiñi ra Pilato tuhun ihya, nayuhví ca ra. ⁹ Ta ndihví tucu ra inga chaha chichi vehe tyiño, ta ndaca tuhun ra chí ra Jesús:

—¿Nya quitã yoho? —catyí ra chí ra.

Soco ra Jesús ñahri cha nacahan ra.

¹⁰ Tyicuan ta ra Pilato catyí ra chí ra:

—¿Ñáá tuhun ña nacahún nu cahán yuhu? ¿Atu ña chitón vatyí ra cuví tyiño cuví ta iyó ityi chíi cha tyai chuun nu cruzi, ta iyó tucu ityi chíi cha sañe chuun? —catyí ra Pilato chí ra Jesús.

¹¹ Ta nacahan ra Jesús ta catyí ra:

—Tyehe ta ña chaha Nyoo tyiño cuan chuun, ñahri ityi iyó chuun cha tachí tuñun chii. Yucuan chaha, ra cha cachaha cuenda chíi chuun, cahnu ca cuatyí ra ican saha yoho —catyí ra Jesús chí ra Pilato.

¹² Nya cuhva cuan ta nducú ra Pilato cuhva saña ra chí ra Jesús, soco ra Israel cacana chaa ra siqui ra, ta catyí ra:

—¡Tatu sañon chí ra, ñima amigo rey cahnu cuví chuun! Vatyí tandihí ri ra cha catyí tyi rey cuví ra, ra xaan íñi chí rey cahnu cuví ra —cacatyí ra.

¹³ Tyicuan ta cha chiñi ra Pilato tuhun ihya, tachi ra na quita ra Jesús ityi chata vehe. Ta chicunyaá ra Pilato nu tyayu ra nu tuhvá ra sandaa cuatyí ñáyivi nu nañi chí Gabata chihin sahan hebreo, ta cuñi chí catyí: “Nu yihí yuu”. ¹⁴ Ta cuví chí noo quivi cha ni cumañi ca vico pascua, ñáa cuhva ora. Tyicuan ta ra Pilato catyí ra chí ra Israel cuan:

—¡Ma rey ndo chiña!

¹⁵ Soco maa ra Israel canachaá ra ta cacatyí ra:

—¡Na cúvi ra! ¡Na cúvi ra! ¡Cahñi chí ra nu cruzi! —cacatyí ra.

Ta ra Pilato catyí ra chí ra:

—¿Atu cahñi nu cruzi chí rey ndo?

Soco ra cacuví nuu chí tata sutu cacatyí ra:

—Yori ca rey iyó. Noo tuhun ri ra César, cha cuví rey cahnu —catyí ra.

¹⁶ Tyicuan ta ra Pilato chaha cuenda ra chí ra Jesús chí ra na cunyaa ra nu cruzi. Ta quehen sindaro chí ra, ta cuahan ra chihin ra.

Nu chihí ra Jesucristo nu cruzi

(Mt. 27.32-44; Mr. 15.21-32; Lc. 23.26-43)

¹⁷ Ta nyisó ra Jesús cruzi ra, cuahan ra noo nu nañi: “Yiqui Xiñi Ndiyí”. Ta chihin sahan hebreo nañi chí Gólgota. ¹⁸ Ta yucuan catyaa ra chí ra nu cruzi chihin clavú. Ta ñin ri chihin ra catyaa ra uvi ca ra. Noo ra tacaá ra noo nu cruzi inchiyo xiin ra ta inga ra inga chiyo xiin ra. Ta ra Jesús tacaá ra mahñu.

¹⁹ Ta ra Pilato tachi ra tyiño na cunyaa letra xiñi cruzi cuan. Ta catyí chí tyehe caa: “Ra Jesús ra ñuu Nazaret, Rey cuenda ñu ñuu Israel.” ²⁰ Ta cuaha ñu Israel sacuañá ñu tuhun cuan, vatyí yatyin ri ñuu ñu cuví nu chinanyaá ra cruzi ra Jesús. Ta letra cuan nyaá chihin sahan hebreo, ta sahan griego, ta sahan latín. ²¹ Yucuan chaha ra cacuví nuu chí tata sutu cacatyí ra chí ra Pilato:

—Ma tyaun: “Rey cuenda ñu ñuu Israel”, vaha ca tyaun: “Ican ra ihya cha catyí vatyí rey cuenda ñu ñuu Israel cuví ra” —cacatyí ra.

²² Soco ra Pilato catyí ra:

—Noo cha yaha tyaj, nandoo maa tyicuan caa —catyí ra chí ra.

²³ Cha yaha cha catyaa sindaro cuan chí ra Jesús nu cruzi, canaquehen ra sahna ra ta cha cumi tahan ra quehen ra noo noo sahna ra. Ta ndoo nonga sahna ra cha ña

quicu ñu. Noo ri savaha ñu nyacua nya siqui ta nya yuvi. ²⁴ Ta sindaro cuan cacatyí ra chí ra tahan ra:

—Ma cahnya yo. Cuhun yo noo sihva, nyehe yo yóo chí tahán chí sahna cuan —cacatyí ra.

Tyicuan caa cuví tari cuhva catyí nu tutu Nyoo nu catyí chí tyehe caa: “Casacha ra sahme ta chahan ra noo sihva chihin chí, nyehe ra yóo ra saha canaa.” Ta ican ihya casacuví sindaro cuan.

²⁵ Ta chaha cruzi ra Jesús nanyaá sihi ra. Ta nanyaá tucu cuhu ña, ta cu María ñasíhi ra Cleofas, ta cu María ñaha Magdala.

²⁶ Ta nanyehé ra Jesús chí sihi ra, nanyaá ña yatyin ri. Ta nanyehé tucu ra chí ra cha chica noo chihin ra, ra cha cuñi xaan ra chí. Ta catyí ra chí sihi ra:

—Ma sehun nanyaá chiña —catyí ra.

²⁷ Tyicuan ta catyí ra chí ra cha cuñi xaan ra chí:

—Ma sihun nanyaá chiña —catyí ra chí ra.

Ta nya quivi cuan ta naquehen cuenda ra chí ña cuanuhu ña vehe ra.

Nu chihí ra Jesús

(Mt. 27.45-56; Mr. 15.33-41; Lc. 23.44-49)

²⁸ Cha yaha tuhun ihya, cha nyehé ra Jesús vatyí cha ndihí tyiño saha ra. Tyicuan ta catyí ra:

—Ityi ndutya —catyí ra.

Ta chihin tuhun cuan nachino cava tuhun cha nyaá nu tutu Nyoo.

²⁹ Ta yucuan nanyaá noo quivi tyitú chihin vinagre. Tyicuan ta casatyí ra chihin noo xixan ndutya iya cuan. Ta tyaá ra noo nu soco yutun cha nañi hisopo, ta catyañaá ra nya yuhu ra. ³⁰ Chihí ra Jesús ndutya cuan ta catyí ra:

—Cha iyó vaha tandihí vityin —catyí ra.

Tyicuan ta nacañi noo ra xiñi ra ta chihí ra.

Nu quiñi lanza yiqui naha ra Jesús

³¹ Noo ri ca quivi cumañi ta cuví quivi cahnu ca vico pascua cuan, ta ra cacuví nuu chí ñu Israel ña cuñi ra cha ndoo coño ñuhu cuan nu cruzi quivi nyitatu ñu, vatyí quivi nyitatu ñu quivi ii cuví. Yucuan chaha chican ra tumañi íñi chí ra Pilato na tachi ra na cuahnu sindaro sihin ra cha catacoyo nu cruzi cuan tacuhva na cacuví ra cha numi ri, ta cañehe ra coño ñuhu ra. ³² Tyicuan ta cuahan coyo sindaro nu tayucú cruzi cuan. Ta chahnu ra sihin noo ra cha tacaá yucuan. Tyicuan ta chahnu tucu ra sihin inga ra cha tacaá xiin ra Jesús.

³³ Soco cuhva cha cuatuhva ra nu tacaá ra Jesús, cananyehé ra vatyí cha chihí ra. Ta yucuan chaha ña cachahnu ca ra sihin ra.

³⁴ Soco suvita ri noo sindaro cuan quiñi ra lanza yiqui naha ra Jesús. Ta quita niñi ta

ndutya. ³⁵ Ra cha nacatýi tuhun ihya, nu ra cha nyehe cuví ra. Ta cha ndicha cahán ra, vatyi maa ra chitó ra vatyi cha ndicha cahán ra, tacuhva nachino tucu iñi nyoho. ³⁶ Vatyi tuhun ihya cuví chi tyehe caa tari cuhva catýi tuhun Nyoo nu catýi chi: “Ni noo yiqui ra ta ma tahnu.” ³⁷ Ta iyó nonga tucu nu catýi chi nu tutu Nyoo tyehe caa: “Cunyehe ñu chi ra cha quihvi ra lanza chi.”

Nu quihvi ra Jesús chichi ñuhú
(Mt. 27.57-61; Mr. 15.42-47; Lc. 23.50-56)

³⁸ Cha yaha tuhun ihya, ra José ra ñuu Arimatea chican ra chi ra Pilato nacuhva ra cha naquehen ra coño ñuhu ra Jesús. Ta ra José cuan cuví ra noo ra yihí cuenda ra Jesús vasi xehe ri cha cuenda cha yuhví ra chi ra cacuví nuu chi ñu Israel. Tyicuan ta chaha ra Pilato permisú chi ra, ta ra José chahan ra chinaquehen ra coño ñuhu cuan. ³⁹ Chahan tucu ra Nicodemo, ra cha chahan chicahan chihin ra Jesús cha cha cuaa. Cha ra chihin ndutya vixi chahan. Ta noo ndutya vixi chahan cha nañi mirra nasaca ñu chihin inga cha nañi áloe. Ta quita chi tari noo oco uchi kilu cha tandihí. ⁴⁰ Yucuan ta ra José ta ra Nicodemo caquehen ra coño ñuhu ra Jesús ta canasiqui noo ra chi ra chihin sahma cuiñi cahyú ra ndutya vixi chahan cuan, tari cuhva noo tuhun cha iyó chi ñu Israel tu cuatyihi ñu noo ndiyi chichi ñuhú. ⁴¹ Yatin nu cachahñi ra chi ra Jesús nu cruzi nyaá noo chacu yutun yucu vixi. Ta chichi chacu cuan nyaá noo ñaña chaa nu ta cohon ca ni noo ndiyi. ⁴² Yucuan tyihí ra coño ñuhu ra Jesús vatyi yatyin ri cuan nyaá ñaña cuan ta vatyi cha cua quichaha quivi nyitatú ñu Israel.

20

Nu nandoto ra Jesús
(Mt. 28.1-10; Mr. 16.1-8; Lc. 24.1-12)

¹ Cha timingu cha ñaa ca, cu María ñaha Magdala cuan chahan ña nu ñaña. Ta nyehe ña tyi ñahri ca yuu nyasi yuhu ñaña cuan. ² Tyicuan ta chinó vavaha ña cuahan ña nu nyaá ra Simón Pedro ta inga ra chica noo chihin ra Jesús, ra cha cuñi xaan ra Jesús chi. Ta catýi ña chi ra:

—Quehen ñayivi coño ñuhu Sutu Mañi yo chichi ñaña, ta ña chitó yo nya chinyaca ñu —catýi cu María chi ra Pedro ta chi inga ra cuan.

³ Tyicuan ta ra Pedro ta inga ra cuan cuahan coyo ra nu ñaña. ⁴ Ninduvi ra ñin ri cuahan coyo ra cachino ra. Soco chino ca inga ra cuan ican saha ra Pedro, ta xihna ca ra chaq nu ñaña. ⁵ Quichaha nyehe ñihñi ra chichi ñaña, ta nyehe ra sahma cuiñi cha yihí coño ñuhu ra Jesús, catuví cuan. Soco ña quihvi ra chichi ñaña. ⁶ Yaha cuan ta chaq

ra Simón Pedro chata ra, ta quihvi ra chichi ñaña cuan. Suri nyehe tucu ra cuan sahma cuan catuví. ⁷ Ta suri nyehe tucu ra vatyi sahma cha siqui noo xiñi ra Jesús, ña ñin ri cayucú chihin inga sahma cuan, soco catuví siñ. ⁸ Tyicuan ta quihvi tucu inga ra chica noo chihin ra Jesús cuan, ra cha chaq cha xihna ri nu ñaña cuan. Ta nyehe ra cha cuví cuan, ta chinqo iñi ra. ⁹ Vatyi cha cuví maa ta cutuñi ca iñi ra cha catýi nu tutu Nyoo, vatyi ra Jesús cuñi chi cha nandoto ra cha yaha chihí ra. ¹⁰ Tyicuan ta ra cachica noo chihin ra Jesús cuanuhu coyo ra nya vehe.

Nu tuví ra Jesús nuu cu María ñaha ñuu Magdala
(Mr. 16.9-11)

¹¹ Soco cu María ndoq ña chata yatyin ri yuhu ñaña, chacú chaa ña. Cha niri ca cha chacú ña, nyehe ñihñi ña chichi ñaña. ¹² Ta nyehe ña uvi tahan ángel ñihno ra sahma cuichin, nyicú ra nu catuví coño ñuhu ra Jesús. Noo ra nyaá ityi nu catuví xiñi ra, ta nonga ra ityi nu catuví chaha ra. ¹³ Ta ángel cuan ndaca tuhun ra chi ña ta catýi ra:

—Maha, ¿ñáá tuhun chacú chaun?

Ta catýi ña:

—Vatyi quehen ñu chi Sutu Mañi yuhu, ta ña chité nya tyihí ñu chi ra —catýi ña chi ángel cuan.

¹⁴ Ni cahán ña tuhun ihya ta nanyocava ña ta nanyehe ña chi ra Jesús yucuan. Soco ña chitó ña cha ra Jesús cuví ra. ¹⁵ Tyicuan ta ra Jesús ndaca tuhun ra chi ña:

—¿Ñáá tuhun chacún? ¿Yóó chi nanducún? —catýi ra chi ña.

Cuñi maa ña vatyi ra sahá cumi chacu cuan cuví ra. Ta catýi ña:

—Tata, tatu yoho quehün chi ra Jesús, catýi chii nya sandoun chi ra, vatyi naquehin chi ra —catýi ña chi ra.

¹⁶ Tyicuan ta catýi ra Jesús chi ña:

—¡María! —catýi ra chi ña.

Maa ña nanyehe ña ta chahan ña chihin ra chihin sahan hebreo, ta catýi ña:

—¡Raboni! —Ta cuñi chi catýi: “Maestro”.

¹⁷ Ta catýi ra Jesús chi ña:

—Ma tiun chii, vatyi ta nandaa que nu nyaá Suti. Soco cuahan ta catyun chi tandihí yañi vatyi cuahin nu nyaá Suti, ta suri Sutu ndo cuví chi ra. Cuahin nu nyaá Nyoí, ta suri Nyoo ndo cuví chi ra —catýi ra Jesús chi ña.

¹⁸ Tyicuan ta chahan cu María ñaha Magdala cuan chisacoto ña chi ra cachica noo chihin ra Jesús vatyi nyehe ña chi ra Jesús ta catýi ra tuhun cuan chi ña.

Nu tuví ra Jesús nuu ra cachica noo chihin ra

(Mt. 28.16-20; Mr. 16.14-18; Lc. 24.36-49)

¹⁹ Suri maa quivi cuan cha quichaha vitya, cha cuacuaa ta candu ñin ri ra cachica

noo chihin ra Jesús. Ta nyasí vaha yuvehe nu nyicú ra cha cuenda cha yuhví ra chi ra cacuví nuu chi ñu Israel. Ta ra Jesús tuví ra ta chicuinyaaḡ ra mahñu. Ta chahaḡ ra nocumi chi ra, ta catyí ra:

—Na coo cha taxi ri añima ndo —catyí ra.

²⁰ Cha yahaḡ cha catyí ra tuhun ihya ta sañahaḡ ra ndaha ra ta yiqui naha ra. Ta maa ra cacusiñ cuñi ra cha nanyehé ra chi Sutu Mañi yo. ²¹ Ta catyí tucu ra Jesús inga chaha chi ra:

—Na coo cha taxi ri añima ndo. Tari tachí Suti tyiño chii, tyicuan caa tachí tyiño chí nyoho —catyí ra chi ra.

²² Tyicuan ta tiví ra siqui ra ta catyí ra chi ra:

—Naquehen ndo Tatyí Ii Nyoo. ²³ Ñu cha sahá ndo tucahnu iñi chí, iyó tucahnu iñi chí ñu. Ta ñu cha ña sahá ndo tucahnu iñi chí, ñahri tucahnu iñi iyó chí ñu —catyí ra Jesús chi ra.

Nu nyehḡ ra Tomás chi Sutu Mañi yo cha yahaḡ nandotoḡ ra

²⁴ Soco ra Tomás, noo ra chichaḡ noo chihin ra Jesús, ra cha catyí ñu: “ra tñihi”, yori ra nyaá chihin ra cuhva cha quichí ra Jesús. ²⁵ Yahaḡ cuan ta canacatyí ra cachicaḡ noo chihin ra Jesús chi ra:

—Nyeheḡ ndi chí Sutu Mañi yo —cacatyí ra chi ra.

Soco ra Tomás catyí ra:

—Tatu ma nyehi ndaha ra nu cahví nu yihí clavu, ta tatu ma tyihi ndahi nu yihí clavu cuan, ta tatu ma tyihi ndahi yiqui naha ra, ma chino iñi —catyí ra Tomás.

²⁶ Uña quivi yahaḡ ta canyicú tucu ra cachicaḡ noo chihin ra Jesús noo vehe. Ta nyaá ra Tomás chihin ra. Tyicuan ta vasi nyasí vaha yuvehe soco quihví ra Jesús ta chicuinyaaḡ ra mahñu ra. Ta chahaḡ ra nocumi ta catyí ra:

—Na coo cha taxi ri añima ndo.

²⁷ Tyicuan ta quichaha catyí ra chi ra Tomás:

—Tyihi nu ndahun nu cahví ndahi. Ta tyihi ndahun yiqui nahi. Ta ma caca uvi iñun, soco chíno iñun —catyí ra Jesús chi ra Tomás.

²⁸ Tyicuan ta nacahan ra Tomás ta catyí ra:

—¡Sutu Mañi yuhu! ¡Nyoo Suti cuví chuun! —catyí ra Tomás.

²⁹ Ta catyí ra Jesús chi ra:

—Yoho Tomás, vityin chíno iñun tyi nyehún chí. Siñ ca cuñi ñu cha ña nyeheḡ ta chíno iñi ñu —catyí ra Jesús chi ra Tomás.

Nu sacoto ra Juan ñaá cuenda chínoḡ libru ihya

³⁰ Ta cuaha ca milagru sacuví ra Jesús nuu ra cachicaḡ noo chihin ra, ta ñahri chicunyaḡ nu libru ihya. ³¹ Soco chicunyaḡ tuhun ihya

vatyí tacuhva chino iñi ndo vatyí ra Jesús cuví Cristo, ra cuví Sehe Nyoo, ta vatyí coo ndo ñayiví cha ma naa ca maa tatu chíno iñi ndo chí ra.

21

Nu tuví ra Jesús nuu ucha tahan ra cachicaḡ noo chihin ra

¹ Cha yahaḡ cuan ta tuví tucu ra Jesús nuu ra cachicaḡ noo chihin ra inga chaha. Tyehe caa tuví ra yuhu miñi Tiberias. ² In ri nyicú ra Simón Pedro ta ra Tomás cha catyí ñu: “ra tñihi” chí, ta ra Natanael, ra ñuu Caná nu cuví Galilea. Nyicú tucu sehe ra Zebedeo ta uvi ca ra cachicaḡ noo chihin ra Jesús. ³ Ta catyí ra Simón Pedro chí ra:

—Cuahin cuatiñ tiyaca —catyí ra.

Ta cacatyí ra chí ra:

—Cuhun tucu nyuhu chuhun —cacatyí ra.

Cuahan coyo ra ta quihví coyo ra chichi noo canoa, soco cha cuaa cuan ni noo tiyaca ña catiñ ra. ⁴ Cha vachi cundichin cuan tuví ra Jesús nu ñiti yuhu miñi cuan. Soco ra cachicaḡ noo chihin ra, ña canicohón nuu ra chí ra. ⁵ Tyicuan ta catyí ra chí ra:

—Yoho ra tahan yo, ¿atu ta ñihi ca ndo tiyaca?

Ta canacahan ra ta catyí ra:

—Ta ñihi ca ndi.

⁶ Tyicuan ta nacahan ra Jesús ta catyí ra:

—Tyihi ndo tarraya chiyo vaha canoa chiña, ta ñihi ndo —catyí ra Jesús chí ra.

Tyicuan caa casacuví ra, ta yaha cuan ta nyacua ña cuví tava ra tarraya cuan nu ndutya chaha cha cuaha tiyaca yihí. ⁷ Ta ra cha cuñi xaan ra Jesús chí catyí ra chí ra Pedro:

—¡Sutu Mañi yo cuví! —catyí ra chí ra Pedro.

Cha chíñi ra Simón Pedro vatyí Sutu Mañi yo cuví, ndihví noo ra sahma ra, vatyí tavá ra cha cuatiñ ra tiyaca, ta quiñi ra cuahan ra chichi ndutya cuan. ⁸ Ta inga ra cachicaḡ noo chihin ra Jesús chaḡ coyo ra nya yuhu miñi cuan chihin canoa, caxitá ra tarraya cuan tyitú yihí tiyaca, vatyí yatyin ri yuhu miñi cuan cañohó ra ta cha noo cientu metru ri. ⁹ Cuhva cha canoó ra nu ñuhú, cananyehḡ ra noo nu caá titi ñuhú. Ta catuví noo tiyaca siqui titi ñuhú cuan, ta pan ñandihí. ¹⁰ Ta ra Jesús catyí ra chí ra:

—Nyaca ndo suhva tiyaca cha ni tñin ndo —catyí ra Jesús chí ra.

¹¹ Ta ra Simón Pedro ndaḡ ra nu canoa ta quichahaḡ xita quiñoho ra tarraya tyitú yihí tiyaca nahnu. Cientu uvi xico uchi uñi tahan ti ñohó. Ta vasi cuaha ti, ña tahnyaḡ tarraya cuan. ¹² Tyicuan ta catyí ra Jesús chí ra:

—Ñaha ndo ta curumusa ndo —catyí ra Jesús chi ra.

Ta ni noo ra cachicā noo chihin ra ña cacaña ñi ra candaca tuhun ra yóo ra cuví ra vatyí cachitó ra vatyí Sutu Mañi yo cuví ra. ¹³ Tyicuan ta tuhva ra Jesús ta quehen ra pan, ta chaha ra chi ra. Ta suri tyicuan caa sacuví ra chihin tiyaca. ¹⁴ Ican ihya cuví chaha cu uñi cha tuví ra Jesús nuu ra cachicā noo chihin ra cha yaha cha nandoto ra.

Nu cahán ra Jesús chihin ra Simón Pedro

¹⁵ Cha yaha cha curumusa ra Jesús, ndaca tuhun ra chi ra Simón Pedro:

—Simón, sehe ra Jonás, ¿atu cuñí con chii ican saha ra ihya?

Ta nacahan ra Pedro ta catyí ra:

—Ay, Sutu Mañi yuhu, maun chitón tyi cuñí chuun —catyí ra Pedro.

Ta catyí ra Jesús chi ra:

—Cuhva cha cachi mbee nyihi sane —catyí ra Jesús chi ra Pedro.

¹⁶ Ta ndaca tuhun ra Jesús chi ra inga chaha:

—Simón sehe ra Jonás, ¿atu cuñún chii? —catyí ra Jesús chi ra.

Ta nacahan ra Pedro ta catyí ra:

—Sutu Mañi yuhu, maun chitón tyi cuñí chuun —catyí ra Pedro chi ra.

Ta catyí ra chi ra:

—Saha cumi mbee sane —catyí ra Jesús chi ra Pedro.

¹⁷ Ta chaha cu uñi ndaca tuhun ra chi ra:

—Simón Pedro, sehe ra Jonás, ¿atu cuñún chii? —catyí ra Jesús chi ra.

Cuhva cha ndaca tuhun ra chi ra cha cu uñi chaha tatu cuñí ra chi ra, ra Pedro nducuihya ñi ra, ta catyí ra chi ra:

—Sutu Mañi yuhu, maun chitón yoso caa añime ta maun chitón tyi cuñí chuun —catyí ra Pedro.

Ta ra Jesús catyí ra chi ra:

—Saha cuenda mbee sane. ¹⁸ Cha ndicha catyí chuun vatyí ta tyivaun ndihví noun sahmon ta chahun nu cuñún. Soco na cuchahnun, cusanacaun ndahun ta inga ra cusandihví noo chuun. Ta cunyaca ra chuun nu ña cuñún cahun —catyí ra Jesús chi ra Pedro.

¹⁹ Cha catyí ra Jesús tuhun ihya cuñí ra catyí ra yoso caa cucúvi ra Pedro ta cusacahnun ra chi Nyoo cha cuenda cuan. Yaha cuan ta catyí ra Jesús chi ra Pedro:

—¡Cunyicon chii! —catyí ra chi ra.

Nu cahán ra Juan tuhun maa ra

²⁰ Tyicuan ta nyocava ra Pedro ta nanyehé ra vatyí nyicón inga ra cha chica noo chihin ra Jesús, ra cha cuñí xaan ra Jesús chi. Suri maa ra chinyaña ra chi ra Jesús cha cuxiñi ra quivi cuan. Ta ndaca tuhun ra ta catyí ra: “Sutu Mañi yuhu, ¿yóo

ra cunaxico tuhun chuun?” catyí ra, ndaca tuhun ra quivi cha ni cumañi cuví ra Jesús. ²¹ Cuhva cha nanyehé ra Pedro chi ra, ndaca tuhun ra chi ra Jesús:

—Sutu Mañi yuhu, ta ra ihya, ¿ñáá cha cucuvi chi ra? —catyí ra chi ra.

²² Nacahan ra Jesús ta catyí ra:

—Tatu cuñí mai cha coo ra nyacua nya ndichi inga chaha, ¿ñáá cha cuenda yoho? Yoho cunyicon chii —catyí ra Jesús chi ra Pedro.

²³ Tyicuan ta chitya tuhun ihya nu canyicú yañi yo vatyí ra cuan, ma cuví ra. Soco ña catyí ra Jesús cha ma cuví ra. Catyí ra: “Tatu cuñí yuhu cha coo ra nyacua nya quichi inga chaha, ¿ñáá cha cuenda yoho?”

²⁴ Yuhu cuví ra yucuan, ra cha cahán ra Jesús tuhun. Ta nyehi tandihi cuñi maa cha cuví ta tyai nu libru ihya. Yuhu chite vatyí tandihi cha tyai, ndicha.

²⁵ Iyó cuaha ca cha sacuví ra Jesús. Tyehe ta chicunyaq tahan tahan tuhun cuan nu libru, cahví ñi tyi nanñi ñuhu ñayivi ma cuthan tandihi libru cuan.

Tyiño Cha Casacuví Ra Apóstol: Ra Cha Tyatyíño Ra Jesucristo Chi

Nu catyí ra Jesús tyi cuaquichi Tatyí Ii Nyoo

¹Yoho Teófilo, yuhu ra Lucas sacuhin tutu chuun quívi cuan. Ta nu sacuhin tutu cha xihna ri cuan, tyaj tandihí cha quichahá sacuvi ra Jesús ta tandihí cha sañahá ra nya quívi xihna ri ²ta nya quívi nandaq xica ra andívi. Ta cha cumañi ca nandaa ra andívi, nacachí ra chi ra apóstol cuenda ra. Ta tyatyíño ra chi ra chihin Tatyí Ii Nyoo tyi cacaca ra tyiño ra. ³Ta maa ra Jesús nyehé ra tindoho ta chíhí ra. Ta cha yahá cuan, nandotó ra ta tuví ra nu canyicú ra apóstol. Ta chíchi cha uvi xico quívi, cuaha xaan chaha tuví ra nu canyicú ra, vatyí na cacoto ra vatyí ndicha cha nyitó ra. Ta cahán ra tuhun yoso caa nyacá ñaha Nyoo chi yo.

⁴Cuhva cha nyaá ca ra chihin ra, ra Jesús catyí ra chi ra:

—Ma quita ndo Jerusalén ihya, nyacua nya naquehen ndo Tatyí Ii cha catyí Suti tyi cuhva ra chí ndo, tari catyí chi ndo quívi cuan. ⁵Chihin ndutya sacondutya ra Juan chí ñáyivi. Soco nyoho ña cuaha ca quívi ta cucondutya ndo chihin Tatyí Ii —catyí ra Jesús.

Nu nandaq xica ra Jesús andívi

⁶Cuhva cha canyicú ra apóstol ñin ri chihin ra Jesús, ta candacaq tuhun ra chí ra:

—Sutu Mañi yuhu, ¿atu vityin ri cusacacun chí ñuu yo Israel ihya ndaha ra ñuu Roma? —catyí ra.

⁷Ta nacahán ra Jesús ta catyí ra:

—Ña tahán chi coto nyoho nya quívi. Noo tuhun ri maa Nyoo Sutu yo cuacatyí ra ama. ⁸Soco cuhva cha quichi Tatyí Ii siquí ndo cunaquehen ndo tunyee ifi, ta cuquíta ndo vatyí cahán ndo tuhín Jerusalén ihya ta tandihí ñuu cha nyicú Judea ta Samaria, ta nicahnu ñuhu ñáyivi.

⁹Ta cha yahá cha catyí ra Jesús tuhun ihya, ta cha ni ri ca cha canyehé ra chí ra, nandaq xica ra andívi, ta quihví ra chíchi noo vico. Ta ña canyehé ca ra chí ra. ¹⁰Ta cuhva cha canyehé ndaa ra andívi, ta tuví uvi tahan ángel yatyin nu canyicú ra. Ñihnó ra sahma cuichín. ¹¹Ta cacatyí ra cuan chí ra:

—Nyoho ra Galilea, ¿ñáá tuhun cha ndoo ndo nyehé ndaa ndo andívi? Suri maa ra Jesús cha nyehé ndo nandaq xica ihya, tyehé caa cuquichi tucu ra inga chaha.

Nu canacachí ra apóstol chi ra Matías vatyí ndívi ra tyiño nuu ra Judas

¹²Tyicuan ta quitaq coyo ra apóstol nu chinyicu ra yucu nu iyó yutun olivo cuan. Ta cuanuhí coyo ra ñuu Jerusalén. Ta yatyin ri nyaá ñuu cuan, tari sava hora ri. Ta sava ri hora cuví caca ñáyivi quívi nyitatú ñu, vatyí tyicuan caa catyí ley cha tyaa ra Moisés. ¹³Cuhva cha nachaq coyo ra Jerusalén cuan, candaq ra nu cu uvi piso noo vehe nu ca iyó ra. Ta tandihí ra cuan, ican ra cuví, ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, ta ra Simón cuenda ra cacuñi naquiqui siquí gobiernu Roma, ta ra Judas yañi ra Jacobo. ¹⁴Ta nyita ri ndu ñin ri ra ta ñin ri cuhva cachicá xiñi ra ta cachicán tahví ra chí Nyoo. Ta nyicú tucu yañi ra Jesús ta cu María sihi ra, ta inga ñusihi ñandihí.

¹⁵Tari noo ciento oco ñáyivi ndu ñin ri ñu quívi cuan. Ta nicuinanyaa ra Pedro. Ta catyí ra chí ñu:

¹⁶—Nyoho yañi, cuñi chí cha cuví tari cuhva catyí nu tutu Nyoo. Vatyí cahán Tatyí Ii chíhin yuhu ra David yoso caa cucuhva cuenda ra Judas chí ra Jesús chí ra xaan ifi chí ra. ¹⁷Ta ra Judas cuví ra noo ra chindihí chíhin yo. Ta ñin ri chíca ra tyiño Sutu Mañi yo chíhin yo. ¹⁸Soco chahán ra, ta satá ra noo ñuhú chíhin xuhun cha ñihí ra cha chahá cuenda ra chí ra Jesús. Yahá cuan ta canacava ra chíhin xiñi ra, ta ndataq chíchi ra ta quitaq tandihí chíti yihví ra. ¹⁹Ta quívi cha cachitó ñu ca iyó Jerusalén ihya cha chíhí ra, casacunañi ñu chí ñuhu cuan Acéldama. Ta cha chíhin sahan maa ñu cuñi chí catyí Nu Catuvi Niñi. ²⁰Vatyí nu libru Salmo catyí chí tuhun ra Judas tyehé caa:

Na ndoo maa ri maa vehe ra.

Ta yori coo chíchi.

Ta catyí tucu chí:

Inga ra cunanduvi tyiño nuu ra.

²¹⁻²²Ta vityin nyicú ra cachicá noo chíhin yo quívi chínyaq Sutu Mañi yo Jesús chíhin yo; nya quívi sacondutya ra Juan chí ra, ta nya quívi nandaq xica ra andívi. Ta vityin cuñi chí cha ndu ñin ri noo ra chíhin yo, vatyí cuví ra cha ndaa cha cuenda cha nandotó ra Cristo —catyí ra Pedro.

²³Tyicuan ta cacanaq ra chí uvi tahan ra, chí ra José cha nañi Barsabás, ta suri nañi tucu ra Justo; ta cacanaq tucu ra chí ra Matías.

²⁴Ta cachicán tahví ra tyehé caa:

—Sutu Mañi yuhu, yoho chitón cha caa añima tandihí ndi. Sañaha chí ndi chíchi cha uvi tahan ra ihya, nya ra cha nacachí maun, ²⁵vatyí sacuvi ra tyiño cha sacunaq ra Judas cha cuenda cuatyí ra, ta cuahan ra nu tahán chí kuhun ra —cacatyí ra, chícán tahví ra.

²⁶Tyicuan ta cachahán ra noo sihva, tacuhva nyehé ra nya ra tahán chí nyatu

cuan chi. Ta tahan chi chi ra Matías. Ta yucuan cuví nu ndu in ri ra chihin ndi uchi in apóstol.

2

Nu chaq Tatyí Ii

¹ Ta in ri nyicú ñáyivi yihí cuenda ra Jesús ta chaq quívi vico Pentecostés cha sanducahnú ñáyivi Israel. Ta in ri cuhva chicá xiñi ñu. ² Ta sana iñi ñu ta nacuíñi ñu noo cha cayu vachi ityi andívi. Tari cha cayu yahá noo tatyí ñihi. Ta iyo cuví tandihí chichí vehe nu canyicú ñu. ³ Tyicuan ta tuví tari yaa ñuhú quítí cuatyí siquí noo noo ñu. ⁴ Ta tandihí ñu chitu ñu chihin Tatyí Ii. Ta quichahá cahan ñu inga sahan yoso cuhva saquehen ityi maa Tatyí Ii chi ñu.

⁵ Ta quívi cuan cuaha xaan ra Israel ra vaha chicá chihin Nyoo canyicú ra ñuu Jerusalén cuan. Cuaha xaan ra ca iyó inga ityi nicahnu siquí ñuhú ñáyivi chaq coyo vatyí casanducahnu ra vico Pentecostés. ⁶ Ta cha cachíñi ra cuan cha iyo xaan cuví nu canyicú ñu, ta cuahan coyo ra ta nataca ra yatyin ri nu nyicú ñu. Ta ña cutuñí iñi ra ñáa cha cuví cuan, vatyí noo noo ra cachíñi ra cahán ñu cuhva sahan cha cacahán maa ra. ⁷ Iyo cuñi ra ta catyí ra chi ra tahan ra:

—¿Atu ñima ñu Galilea cuví tandihí ñu cha cahán ihya? ⁸ ¿Ñáa tuhun cha chíñi yo cahán ñu cuhva sahan noo noo yo? ⁹ Ihya nyicú yo cha cuví yo ñu Partia, ta ñu Media, ta ñu Elam, ta ñu Mesopotamia, ta ñu Judea, ta ñu Capadocia, ta ñu Ponto, ta ñu Asia. ¹⁰ Ta ñu Frigia ta ñu Panfilia, ta ñu Egipto, ta ñu iyó ityi nuu ca Cirene ityi Africa. Ta nyicú tucu ñu ñuu Roma cha iyó ñuu ihya. Ta suhva ñu cuví ñu ñu Israel nya quívi cacú ñu. Ta inga ñu cuví ñu ñáyivi nanduví cuenda ñu Israel ta nyicon ñu ley ra Moisés. ¹¹ Iyó tucu ñáyivi ñuhú Creta ta ñu Arabia. Soco tandihí yo ta chíñi yo cahán ñu chihin sahan cha cahán yo. Ta nacatyí ñu cha cahnu cha sacuví Nyoo —cacatyí ra.

¹² Tandihí ra, iyo xaan cacuñí ra, ta yihí ra ndaca tuhun ra chí tahan ra:

—¿Ñáa cha cuñí chi catyí chi tandihí tuhun ihya? —catyí ra.

¹³ Soco inga ra cahán nyaa ra ta cacatyí ra vatyí cachíñi ñu.

Nu cahán noo ra Pedro nuu ñáyivi

¹⁴ Tyicuan ta nicuinanyaq ra Pedro chihin inga uchi in tahan apóstol. Ta chihin cha chaahá ra ta catyí ra:

—Nyoho yañi, cha cuví ndo ra Israel, ta tandihí nyoho cha iyó ndo Jerusalén ihya. Coto ndo tuhun ihya. Ta cuñi vaha ndo tuhun cha cuacatyí chí ndo. ¹⁵ Vatyí cuñí maa ndo tyi chíñi ndi. Soco ña chíñi ndi, vatyí ña tuhvá ñáyivi chíñi cha cuhva ihya, vatyí ni ca in cha ñaha ri cuví. ¹⁶ Soco ihya

cuví tuhun cha cahán ra Joel, ra cuví profeta Nyoo ta cha naha. Vatyí catyí ra:

¹⁷ Nu cuandihí ca quívi, catyí Nyoo, cusaquichi Tatyí Ii siquí tandihí ñáyivi. Ta cucahan sehe ndo cuende. Ta ra tyivaa ta ñu tyivaa cunyehe ñu cha sañaha Nyoo chí ñu. Ta ra chahnu cunyehe ra ñumahna.

¹⁸ Cusaquichi Tatyí Ii siquí ñu sacuví tyiño nuí. Ta cucahan ñu cuende, catyí Nyoo.

¹⁹ Ta catyí ra vatyí cusañaha ra cha iyo cucuvi ityi andívi. Ta ityi nu ñuhu ñáyivi cusañaha ra seña, seña niñi, seña ñuhu, ta vico ñuhma.

²⁰ Cunduñaa ñanyii. Ta yoo tari caa tyacu niñi cunanduvi. Tyicuan caa cucuvi cha niri ca cha chaá quívi quichi Sutu Mañi yo. Ta cucuvi noo quívi cahnu vatyí cucutuñi chí yo nuu ra.

²¹ Ta tandihí ñu chicán tahvi sivi ra cucacu ñu. Tyicuan caa catyí ra Joel.

²² Cuiñi ndo nyoho ra Israel. Cuiñi ndo tuhun cha cuacatyí ihya. Ra Jesús ra Nazaret cuví ra noo ra cha cachí Nyoo chí vatyí quichi ra nu nyicu yo. Ta chító yo vatyí ndicha vatyí cuaha xaan cha iyo, ta cuaha xaan milagru ta seña sacuví Nyoo nu canyicú yo cha cuenda ra Jesús. Ta nyoho chító vaha ndo tuhun ihya. ²³ Soco quívi quehen cuenda ndo chí ra, sacuví ndo tari cuhva tyaq maa Nyoo cuhva nyata quívi xihna ri. Vatyí chahá cuenda ndo chí ra chí ra quíñi iyó. Ta chitacaq ra chí ra nu cruzi. Ta tyicuan caa chahñi ndo chí ra. ²⁴ Soco Nyoo sanandotó ra chí ra vatyí sacacu ra chí ra ndaha tuhun chihí. Vatyí tuhun chihí ña cuví cunyaca ñaha chí ra. ²⁵ Vatyí ra David cahán ra tuhun ra Cristo ta cha naha, ta catyí ra:

Tyicuan ri nyehí chí Sutu Mañi yo ityi nuí. Maa ra nyaá in chiyo vahi ta ñahri maa cha cuví sayuhví chíi.

²⁶ Yucuan chaha cusii xaan cuñí añime. Ta chíté yaa chihin cha sii cuñí.

Ta siin ri coño ñuhi cunyatitatu chí vatyí chité tyi cunandote.

²⁷ Vatyí yoho Nyoo Suti, ma sandoun añime nu nyicu ñu chihí, ta ni ma cuhvon cha tyahyu coño ñuhi.

Vatyí sehe iun cuví chíi.

²⁸ Sañahún ityi cha cuahán nu coi ñáyivi chaa cha ma naa ca maa. Ta sacutún chíi chihin tусii iñi vatyí nyaún chihin, catyí ra David ta cha naha.

²⁹ Nyoho yañi, chító cachi yo vatyí ra David sutu chahnu yo chihí ra ta quihví ra chichi ñuhu. Ta ñaña ra nyaá ca chí ihya nya vityin. ³⁰ Soco ra David cuví ra noo profeta cuenda Nyoo. Ta chító ra vatyí Nyoo tyaq ra cuhva ta in ri tuhun cahan ra chihin ra vatyí suri tata maa ra ican cuacacu ra Cristo.

Ta ra Cristo, ican ra cunyaca ñaha. ³¹ Ta tyicuan caa ra David tari cha vatyi nyehe ra cha cuacuvi nu cuahan ca chi quivi. Ta cahān ra tuhun cha cunandoto ra Cristo. Ta catyi ra vatyi ma ndoo añima ra nu nyicu ñu chihī. Ta ni ma tyahyu coño ñuhu ra, catyi ra. ³² Ta ra Jesús ihya sanandoto Nyoo chi ra. Ta tuhun ihya tandihi maa ndi cuvī ndi cha ndaa. ³³ Nyoo sacahnú ra chi ra Jesús, ta cuatyaa ra chi ra chiyo vaha ra andivi. Ta ra Jesús naquehen cuenda ra Tatyī li cha catyi Sutu yo Nyoo ta cha naha vatyi cuhva ra chi yo. Ta ican cuvī cha chahá ra chi ndi vityin. Ican cuvī nyehé ndo ta chiñi ndo. ³⁴ Vatyi ñima ra David nandaq ra andivi. Vatyi suri maa ra David cahān ra tuhun ra Jesús, ta catyi ra:

Catyi Suti Nyoo chi Suti ra Cristo: “Cunyaa chiyo vahi

³⁵ cha niri ca cha caquin chi ra xaan iñi chuun chahun”, catyi Nyoo chi ra Cristo chihin yuhu ra David.

³⁶ Nyoho ta tandihi ca ñu Israel, coño vaha ndo vatyi tuhun ra Jesús ican cahān ihya. Chitacaq ndo chi ra nu cruzi. Soco Nyoo cuatyaa ra chi ra tyi cuvī ra Sutu Mañi yo, ra nyaca ñaha chi yo —catyi ra Pedro.

³⁷ Cuhva cha chiñi ñu tuhun cahān ra Pedro ihya, nducuihya iñi ñu. Ta ndaca tuhun ñu chi ra Pedro ta chi tandihi ca ra apóstol, ta catyi ñu:

—Nyoho yañi, ¿yoso caa sacuvī ndi vityin? —catyi ñu chi ra.

³⁸ Yucuan ta catyi ra Pedro chi ñu:

—Noo noo ndo ndu uvi iñi ndo cuatyī ndo ta ñasama ndo cuhva iyó ndo nuu Nyoo. Ta condutya ndo chihin sivi ra Jesucristo. Tacuhva na saha ra tcahnu iñi cuatyī ndo. Tyicuan caa ta cua cuhva Nyoo Tatyī li ra chi ndo. ³⁹ Vatyi cha naha catyi Nyoo vatyi cuhva ra Tatyī li ra chi maa ndo, ta chi sehe ndo, ta chi ñu cha cañi nyaa ñandihī. Vatyi tandihī ñu cha nacana Sutu Mañi yo Nyoo chii cucuhva ra Tatyī li ra chi ñu.

⁴⁰ Chihin tuhun ihya ta chihin inga tuhun, ra Pedro chahá ra tuhun chi ñu ta catyi ra chi ñu:

—Ndūcu ndo cuhva na sacacu Nyoo chi ndo, tacuhva cuvī sandoo ndo cha caa ñáyivi quifni iyó ihya —catyi ra chi ñu.

⁴¹ Tyicuan ta tandihī ñu cha natijn cuenda tuhun cahān ra Pedro condutya ñu. Ta quita tari noo uñi mil ñu, ta ndu ñn ri ñu chihin ñu yihí cuenda ra Jesucristo. ⁴² Ta tyicuan ri ndu ñn ri tandihī ñu, ta chihin cha ñi iñi ñu tyasoho ñu cha sañahá ra apóstol chi ñu. Ta ñn ri cuvī ñu chihin tahan ñu, ta chicān tahvi ñu ta chachí ñu pan ta chihí ñu vinu vatyi nicohón iñi ñu tyí chihī ra Cristo tyiño nuu ñu.

Cuhva iyó ñu yihí cuenda Sutu Mañi yo Jesucristo quivi cuan

⁴³ Ta cuaha milagru ta seña sacuvī Nyoo chihin ndaha ra apóstol. Ta tandihī maa ñáyivi iyo cuñi ñu. ⁴⁴ Tandihī ñu yihí cuenda ra Cristo ñn ri cacuvī ñu chihin cha iyó chi ñu. ⁴⁵ Xicó ñu cha tyayii ñu ta cha iyó chi ñu. Ta sachá ñu xuhun ñu chi tahan ñu yoso cuhva cha chiñuhú chi noo noo ñu.

⁴⁶ Ndiqivi ta ndu ñn ri ñu nya vehe ñuhu cahnu. Ta ndu ñn tucu ri ñu noo noo vehe tahan ñu ta chachí ñu pan ta chihí ñu vinu. Ta ñn ri cachachí ñu chihin cha siñi cuñi añima ñu. Ta chahá ñu cha cachi tahan ñu chihin cha ñi iñi ñu. ⁴⁷ Ta sacahnú ñu chi Nyoo. Ta vaha cahān tandihī ñáyivi siqui ñu. Ta tahan tahan quivi cuahan sanducuahá ca Sutu Mañi yo chi ñu cha cuahān sacacu ra.

3

Nu nduvahaq noo ra coxo

¹ Noo quivi cuahān coyo ra Pedro chihin ra Juan vehe ñuhu cahnu. Cuvī chi cuhva caa uñi cha cha iñi, cuhva cha tuhva ñáyivi Israel cacticān tahvi ñu chi Nyoo. ² Ta ndi quivi maa nyaá noo ra ndahvi, ra coxo nyata cacu, yuvehe ñuhu cahnu cuan. Vatyi chiny-acá ñu chi ra na cacān ra limuxtan chi ñáyivi quihvi yuvehe cuan, ta nañi chi: Yuvehe Tyaqui. ³ Tyicuan ta nanyehē ra coxo cuan chi ra Pedro ta chi ra Juan cha cuaquihvi ra chichi vehe ñuhu cahnu. Ta chican ra noo limuxtan chi ra. ⁴ Ta cananyehē ra Pedro ta ra Juan chi ra. Ta ra Pedro catyi ra chi ra:

—Nyehe chi ndi —catyi ra.

⁵ Tyicuan ta quichahaq nyehe ra coxo cuan chi ra. Cuñi maa ra vatyi iyó cha cucuhva ra chi ra. ⁶ Soco ra Pedro catyi ra chi ra:

—Ñahri maa xuhun cuichin ta xuhun cuaan iyó chii, ta cuhve chuun. Soco nonga cha iyó chii cua cuhve chuun. Chihin sivi ra Jesucristo ra Nazaret, catyi chuun, ndicuita ta cacon —catyi ra Pedro chi ra.

⁷ Tyicuan ta tijn ra Pedro ndaha chiyo vaha ra ta nacoñehē ra chi ra. Ta caa cuhva ri cuan nicoo fuerza chaha ra ta tatu chaha ra. ⁸ Tyicuan ta ra coxo cuan ndavaq ra noo, ta nicuinanyaq ra. Ta quichahaq chica ra. Ta quihvi ra chihin ra chichi vehe ñuhu. Ta chicá ra. Ta cañá ndava ra. Ta sacahnú ra chi Nyoo. ⁹ Tandihī ñáyivi nyehe ñu chicá ra ta sacahnú ra chi Nyoo. ¹⁰ Ta iyo xaan cuñi ñu ta yuhvi ñu cha cuenda cha nduvahaq ra cuan. Vatyi nicohón nuu ñu chi ra. Ta chitó ñu vatyi suri maa ra cuvī cha tuhva chinyaa Yuvehe Tyaqui cuan chican ra limuxtan.

Nu cahān noo ra Pedro tuhun ra Cristo nuu ñáyivi nu cuvī corredor ra Salomón

¹¹ Ra coxo cha nduvahaq cuan, ña sañá maa ra chi ra Pedro ta ra Juan. Ta tandihī

ñáyiví iyo cuñí ñu ta chingó ñu natacá ñu nu nyicú ra, nya nu cuví corredor ra Salomón chichi vehe ñuhu. ¹² Cha nanyehé ra Pedro cha tyicuan caa, catyí ra chi ñáyiví:

—Nyoho ra Israel, ¿ñáá tuhun cha iyo xaan cuñí nyoho? ¿Ñáá tuhun cha nyehé xaan ndo chi nyuhu? Tari cha vatyí chihin tunyee iñi maa ndi, o cha cuenda cha cachi iyó ndi nuu Nyoo, sanduvahá ndi chi rayí ihya, cuñí maa ndo. ¹³ Nyuhu ña cuví sanduvaha ndi chi ñáyiví. Nyoo cuenda sutu chahnu yo, ra Abraham, ra Isaac, ta ra Jacob, ican ra sacahnú xaan ca ra chi Sehe ra, ra Jesús. Ta maa ndo chahá cuenda ndo chi ra chi ra Pilato, ra cuví tyiño. Ta maa ra cuñí ra saña ra chi ra. Soco nyoho ña chahá ndo. ¹⁴ Cha nuu cha cacan ndo cha saña ra chi ra vaha, ra ii cuan, nyoho chican ndo cha saña ra chi noo ra tuhvá chahñi ñáyiví. ¹⁵ Tyicuan caa chahñi ndo chi ra cha chahá ñáyiví chaa coo yo chihin Nyoo. Soco Nyoo sanandoto ra chi ra. Ta ña ndog ra chihin ñu chihí. Ta nyuhu cuví ndi cha ndaa. ¹⁶ Ta suri maa ra Jesús cuví ra chahá fuerza chaha ra coxo ihya. Vatyí chinó iñi ndi tyi iyó tunyee iñi chi ra Jesús. Yucuan chaha ndunyeé chaha ra ihya, ta ñohó nuu vaha ndo chi ra ihya. Ta nduvahá ra vatyí chinó iñi ndi chi ra Jesús. Ta tandihí nyoho cha nyehé maa ndo vityin.

¹⁷ Chité yañi —catyí ra Pedro— vatyí quivi cha chahñi ndo chi ra Jesús, ña chito ndo tyi ña vaha cha nyacuví ndo. Ta tyicuan caa tucu ra cuví nuu chi ndo, ña cachitó ra. ¹⁸ Soco tyehe caa chingó cava tuhun cahán Nyoo chihin yuhu ra profeta cuenda ra ta cha naha, vatyí catyí ra vatyí ra Cristo cunyehe ra tindoho. ¹⁹ Yucuan chaha ndu uvi iñi ndo cuatyí ndo. Ta nacuhva ndo añima ndo chi Nyoo, tacuhva na ndachi cuatyí ndo. Tyicuan ta Sutu Mañi yo sandunyeé ra añima ndo vatyí cohon ra añima ndo. ²⁰ Tyicuan ta cutachi ra chi ra Jesús ra cuví Cristo na quichi ra inga chaha. Vatyí quivi xihna ri tyaá Nyoo cuhva tyi quichi ra cha cuenda ndo. ²¹ Tahán chi cha ndoó ra Jesucristo andiví cha vityin nyacua nya sanduchaa Nyoo tandihí maa. Tari cuhva catyí maa ra chihin yuhu ra profeta cuenda ra ta cha naha. ²² Vatyí tyicuan caa catyí ra Moisés chi sutu chahnu yo: “Cusaquichi Sutu yo Nyoo chi noo ra cahán cuenda ra. Ta suri ñáyiví chi yo cucuvi ra. Ta cuacahan ra tuhun Nyoo chihin ndo tari cahán yuhu. Quichaha ndo tandihí cha catyí ra chi ndo. ²³ Vatyí tandihí ñu cha ma tyasoho tuhun cahán ra, cunaa ñu, vatyí ma cu ñin ri ñu chihin ñáyiví cachi Nyoo chii”, catyí ra Moisés.

²⁴ Ta tyicuan caa tucu tandihí profeta cuenda Nyoo nya quivi ra Samuel ta nyacua nya vityin, casacoto ra tuhun cha cuví vityin. ²⁵ Tandihí promesa cha chahá Nyoo

cha cahán ra profeta tuhun ta cha naha, chi maa ndo cuví. Ta tuhun cha natyihí tahan Nyoo chihin sutu chahnu yo, chihin ra Abraham, suri cha cuenda maa ndo cuví. Vatyí catyí Nyoo chi ra Abraham: “Tandihí ñáyiví cha iyó síqui ñuhu ñáyiví cunasoque chi ñu cha cuenda ñáyiví chuun.” ²⁶ Ta quivi sanandoto Nyoo chi Sehe ra, xihna ca nu nyicú ndo tachí ra chi ra, vatyí nasoco ra chi ndo. Tacuhva vatyí tahan tahan ndo sandoo ndo cha quiñi caa —catyí ra Pedro chi ñu.

4

Nu catijn ra cacuvi nuu vehe ñuhu cahnu chi ra Pedro ta chi ra Juan

¹ Ni cahán ca ra Pedro ta ra Juan chihin ñáyiví, ta chaá coyo tata sutu cuenda ñu Israel chihin ra cuví nuu chi ra sahá cumi vehe ñuhu, ta chihin ra cuví saduceo. ² Cacuxaan xaan ra vatyí ra Pedro ta ra Juan sañahá ra chi ñáyiví ta catyí ra vatyí ndicha cha nandotó ñu chihí, vatyí ra Jesús nandotó ra. ³ Tyicuan ta catijn ra chi ra. Ta catyihí ra chi ra vehe caa. Ta candog ra nyacua nya inga quivi vatyí cha iñi xaan cuhva cuan. ⁴ Soco cuaha ñu cha chiñi tuhun cahán ra Pedro nachinó iñi ñu. Ta candu ñin ri ñu chihin ñu yihí cuenda ra Jesús. Ta cha tandihí ñu vasi quita ohon mil ñu cha maa ri maa rayí ri.

⁵ Tuví inga quivi ta candu ñin ri ra cacuvi tyiño chi ñu Israel, ra chahnu, ta ra casacuaaha cuenda ley cha tyaá ra Moisés, nya Jerusalén cuan. ⁶ Ta ñohó tucu ra Anás ra cuví nuu chi tata sutu. Ta ra Caifás, ta ra Juan, ta ra Alejandro. Ta nyicú tucu tandihí ñáyiví chi ra cacuvi nuu chi tata sutu. ⁷ Tyicuan ta catachi ra tyiño chiquehen chi ra Pedro ta chi ra Juan. Ta chitayucú ra chi ra mahñu. Ta candacá tuhun ra chi ra:

—¿Yóó cha chahá ityí chi ndo vatyí sanduvahá ndo chi ra cuan? ¿Yóó chi cha cuenda nyacuví ndo tyehe caa? —cacatyí ra chi ra.

⁸ Ta ra Pedro tyitu ra yihí Tatyí Ii Nyoo. Ta catyí ra chi ra:

—Nyoho ra nyacá ñaha Israel ñuu yo ihya. Ta nyoho ra chahnu. ⁹ Vityin ndacá tuhun ndo chi ndi tuhun vaha cha cuví chi noo ra coxo ihya, vatyí cuñí ndo coto ndo yoso caa nduvahá ra. ¹⁰ Yucuan chaha cunacatyí ndi chi ndo tacuhva nacoto tandihí ñáyiví Israel. Vatyí ra ihya nanyaá ra nuu tandihí ndo. Vatyí nduvahá ra chihin tunyee iñi ra Jesucristo ra ñuu Nazaret, ra cha chahá cuenda ndo vatyí cuví ra nu cruzi. Soco Nyoo sanandoto ra chi ra. ¹¹ Ta suri ra Jesús ihya cuví yuu cha chiñuhú ca cha ña cuñí ra savahá vehe cotyíño ra, tari cuhva catyí nuu tutu Nyoo. Ta ican ndo cuví tari ra savahá vehe ta ña cuñí ndo yuu cha chiñuhu ca cuan. ¹² Vatyí yori inga ra cuví sacacú chi

yo. Vatyí noo tuhun ri maa ra chaha Nyoo vatyí sacacu ra chi yo. —catyí ra Pedro chi ñu.

¹³ Tyicuan ta cachiñi ra cacuvi tyiño cuan vatyí ñi xaan iñi ra Pedro ta ra Juan cacahán ra. Ta ñima ra cañoño vaha sicuela cacuvi ra. Ta iyo xaan cuñi ra. Tyicuan ta nicohon nuu ra chi ra vatyí ican ra cuví ra cha cachica noo chihin ra Jesús. ¹⁴ Ta siin ri, ra cha nduvaha cuan, nanyaá ra chihin ra yucuan. Yucuan chaha ña cuví cahan ña vaha ra cacuvi tyiño cuan siqui ra Pedro ta ra Juan. ¹⁵ Tyicuan ta catyí ra chi ra naquita coyo ninduñi ra chata vehe. Ta candog maa ra cacuvi tyiño cuan candatuhun tahan ra. ¹⁶ Ta catyí ra:

—¿Yoso caa cunyacuvi yo chihin ra ihya? Vatyí tandihi maa ñu Jerusalén chitó ñu seña cha casacuví ra ihya. Ta ma cuví catyí yo vatyí ña ndicha. ¹⁷ Soco tacuhva cha ma cono tuhun ihya nicahnu chichi ñuu ihya, cutyanaha yo chi ra, tacuhva vatyí ma cahan ca ra tuhun ra Jesús chihin ñáyivi —catyí ra.

¹⁸ Tyicuan ta cacana ra chi ra Pedro ta ra Juan. Ta catyí ra chi ra vatyí ni chihin ca maa ta ma cahan ca ra tuhun ra Jesús. Ta ma sañaha ca ra chi ñáyivi. ¹⁹ Soco ra Pedro ta ra Juan canacahan ra ta catyí ra:

—Ndjichi xiñi nyoho ta nyehe ndo tatu vaha ca cha quichaha ndi chi maa ndo o vaha ca cha quichaha ndi chi Nyoo. ²⁰ Vatyí nyuhu ma cuví cha sandihi ndi cha nacatyí ndi tuhun cha nyehe ndi ta chihñi ndi —catyí ra.

²¹ Tyicuan ta nacatyanaha tucu ra chi ra. Soco saña ra chi ra vatyí ña ñihñi ra kuhva tachi tuñi ra chi ra. Vatyí tandihi ñáyivi sacahnú ñu chi Nyoo cha cuenda cha cuví cuan. ²² Vatyí rayi cha nduvaha cuan, yaha ca uvi xico cuiya ra, ta tyicuan cuiya nyehe ra tindoho ta nduvaha ra saha Nyoo.

Nu chican ñu yihí cuenda ra Cristo tunyee iñi Nyoo

²³ Ta casaña ra chi ra Pedro ta chi ra Juan. Tyicuan ta cuahan coyo ra nu nyicú ra tahan ra. Ta canacatyí ra tandihi cha cacatyí ra chahnu ta ra cacuvi nuu chi tata sutu chi ra. ²⁴ Cuhva cha cachiñi ñu tuhun ihya tandihi ñu ta ñin ri quichaha chican tahvi ñu chi Nyoo. Ta catyí ñu:

—Sutu Mañi yuhu, yoho savahun andivi ta ñuhu ñáyivi. Savahun tyañuhu. Ta tandihi ca cha iyó, maun savaha. ²⁵ Ta yoho chihin Tatyí Iun sacahun chi ra David ta cha naha. Ta catyí ra:

¿Ñáá tuhun cha naquiqui ñáyivi ña ñohó nuu Nyoo? ¿Ñáá tuhun chicá xiñi ñu cha ñima ri tuhun?

²⁶ Rey ta inga cha nyacá ñaha siqui ñuhu ñáyivi ihya candu cuita ra sicun Sutu

Mañi yuhu, ta siqui ra Cristo, catyí ra David.

²⁷ Sutu Mañi yuhu, ndicha vatyí ra Herodes, ta ra Poncio Pilato candu ñin ri ra ñuu Jerusalén ihya chihin ra ñuu Roma ta chihin ra Israel vatyí cahñi ra chi ra Jesús Sehe iun cha cachí vahun. ²⁸ Ta tyicuan caa ta casacuví ra, tari kuhva cha catyí maun ta cha naha tyi cucuvi. ²⁹ Ta vityin, Sutu Mañi yuhu, nyehe cha tyanaha ra chi ndi. Ta kuhva cha cunñi ca iñi ndi tyi tyiño nuu maun sacuvi ndi, Sutu Mañi yuhu. Ta kuhva cha cahan ndi tuhun chihin cha ña yuhví ndi. ³⁰ Ta chihin fuerza maun ta cunduvaha ñu kuhví, ta cunyehe ndi seña ta milagru cha cuenda tunyee iñi ra Jesús Sehe iun —catyí ñu chican tahvi ñu.

³¹ Ta kuhva cha ndihi savaha ñu oración ta taan nu nyicu ñu. Ta tandihi ñu chitu ñu chihin Tatyí Ii ta cahan ñu tuhun Nyoo chihin cha ñi iñi ñu.

Ñahri cha cumañi chi ñu yihí cuenda Nyoo

³² Tandihí ñu cha chinó iñi, ñin ri cuví ñu, ta ñin ri kuhva chicá xiñi ñu. Ni noo ñu ta ña catyí ñu vatyí chi maa ñu cuví cha iyó chi ñu, soco chi tandihí ñu cuví, catyí ñu. Vatyí ñin ri nyicú ñu. ³³ Ta chihin tunyee iñi cahnu, cacahán ra apóstol tuhun cha nandotó Sutu Mañi yo Jesús. Ta Nyoo nasocó xaan ra chi tandihí ra. ³⁴ Ta ni noo ñu ta ñahri cumañi chi ñu vatyí tandihí ñu cha iyó vehe o ñuhú, xicó ñu. Ta quichi nyacá ñu xuhun, ³⁵ ta chahá cuenda ñu chi ra apóstol. Ta maa ra nasachá ra chi noo noo ñu yoso kuhva cha chiñuhú chi ñu. ³⁶ Tyicuan caa sacuví noo ra cha nañi José. Ra cuan vachi ra tata ra Levi. Ta cacu ra ñuhú Chipre cha nyaá mahñu tyañuhu. Ta ra apóstol sacunañi ra Bernabé chi ra. Ta cuñi chi catyí sivi cuan: Ra Naquehen Ndahvi. ³⁷ Ta ra Bernabé cuan xicó ra ñuhú ra. Ta chaha ra xuhun cuan chi ra apóstol.

5

Cuatyí ra Ananías ta cu Safira

¹ Soco noo ra cha nañi Ananías chihin cu Safira ñasihí ra, xicó ñu noo ñuhú. ² Soco tixehe ñu suhva xuhun. Tyicuan ta chinyaca ra Ananías suhva xuhun chi ra apóstol. Ta catyí ra vatyí tandihí xuhun cha quiyahví ñuhú cuví cuan. ³ Tyicuan ta catyí ra Pedro chi ra:

—Yoho Ananías, ¿ñáá tuhun cha chahun cha quihvi ra ña vaha añimon, vatyí cuñún sandavi ñahun chi Tatyí Ii, ta catyún vatyí tandihí xuhun cha quiyahví ñuhu cuví ihya ta ndoún chihin suhva? ⁴ Chuun cuví ñuhú, ta chuun cuví xuhun cha ñihun cuenda ñuhú cuan. ¿Ñáá tuhun cha cuñún sandavi ñahun chi Nyoo ta catyún tyi tandihí xuhun chahun? Ñima chi nyuhu sandavi ñahun, chi

Nyoo sandaví ñahun —catyi ra Pedro chi ra Ananías.

⁵ Cha chihñi ra Ananías tuhun cha cahān ra Pedro, nduva ra ta chihñi ra. Ta quichi noo cha yuhvi cuñi ñáyivi cha chito ñu tuhun ihya. ⁶ Tyicuan ta quichí coyo suhva ra tyivaa ta tyihñi ra coño ñuhu ra chichi noo sahma. Ta chahān ra chityihñi ra chi ra chichi ñuhú. ⁷ Yahā noo uñi hora ta chaā ñasihi ra Ananías ta quihvi ña nu nyicú ra apóstol. Soco ña chito ña cha cuvī cuan. ⁸ Ta quichahā ndaca tuhun ra Pedro chi ña ta catyi ra:

—¿Atu tyehe cuvī yahvi cha quiyahvi ñuhú ndo? —catyi ra.

Ta nacahān ña ta catyi ña:

—Ay, tyehe cuvī yahvi chí —catyi ña chí ra.

⁹ Tyicuan ta catyi ra Pedro chí ña:

—¿Ñáá tuhun cha ñoho naha ndo tuhun ta sandaví ñaha ndo chí Tatyí Ii Sutu Mañi yo Nyoo? Cha cuandichi coyo ra cha chahān chityihñi chí yūn chichi ñuhú. Ta vityin cuhun tucu ra cutyihñi ra chí yoho —catyi ra Pedro chí ña.

¹⁰ Caa cuhva ri cuan ta nduva ña chaha ra Pedro, ta chihñi ña. Ta caquihvi coyo ra tyivaa cuan, ta nyehe ra vatyi chihñi ña. Ta canacoñehē ra chí ña ta chityihñi ra chí ña xiin yí ña. ¹¹ Ta tandihñi ñáyivi yihí cuenda ra Cristo, ta tandihñi ca ñu chito tuhun cuan, canayuhvi xaan ñu.

Cuaha milagru ta seña sacuvi ra apóstol

¹² Cuaha seña ta milagru sacuvi ra apóstol sahá Nyoo nu nyicú ñáyivi. Ta tandihñi ñu yihí cuenda ra Cristo ndu ñn ri ñu nu cuvī corredor ra Salomón. ¹³ Ta ni nonga ñu cha inga cuenda ta ña cañá iñi ñu cutahan ñu chihin ñu yihí cuenda ra Cristo. Soco vaha cahán ñáyivi siqui ñu. ¹⁴ Ta cuaha xaan ñáyivi nachinó iñi chí Sutu Mañi yo Jesús, tari rayi ta ñusihi. ¹⁵ Ta nyacua tavá ñu chí ñu cuhvi ityi cahnu, chacún ñu chí ñu nu chito. Vatyi tatu yaha ra Pedro soco vasi xiñahñu ra yaha siqui ñu, ta nduvaha ñu. ¹⁶ Tyicuan tucu ñu iyó yatyin ri Jerusalén cuan, quichí nyaca ñu chí ñu cuhvi ta ñu cha yihí tatyí ña vaha chí. Ta nduvahā tandihñi ñu.

Nu nyehé ra Pedro ta ra Juan tindoho

¹⁷ Tyicuan ta ra cuvī nuu chí tata sutu, ta ra cayihí cuenda ra cuvī saduceo, quihñi cuñi ra nyehe ra chí ra apóstol cha cuenda cha vaha cha cacacuví ra chihin tunyee iñi chahá Nyoo chí ra. ¹⁸ Tyicuan ta catiñ ra chí ra apóstol. Ta catyihñi ra chí ra vehe caa. ¹⁹ Soco cha cuaa cuan quichí noo ángel cha tachi Sutu Mañi yo, ta nuñā ra yuvehe caa cuan. Ta tavā ra chí ra. Ta catyi ra chí ra:

²⁰ —Cuahān ndo ta cuñanyaa ndo chichi vehe ñuhu cahnu. Ta ñacatyí ndo chí ñáyivi yoso caa cuvī coo ñu ñáyivi chaa cha iyó ndo —catyi ángel cuan chí ra.

²¹ Cha cachiñi ra tuhun cahān ángel cuan, ta cuahan coyo ra. Ta ñaha cuii ri quihvi coyo ra chichi vehe ñuhu cahnu. Ta quichahā sañaha ra chí ñáyivi. Ta cha ni ri ca cha sañahá ra apóstol cuan, ndu ñn ri ra cuvī nuu chí tata sutu ta ra ndihñi chihin ra. Ta canā ra chí ra cacuví tyiño cuenda ñáyivi Israel vatyi coo ra junta. Tyicuan ta tachñi ra ra cuquehen chí ra apóstol nu cañohó ra vehe caa cuan. ²² Soco cuhva cha chaā coyo policia chichi vehe caa cuan, ña nañihñi ra chí ra apóstol. Ta cuanuhu coyo ra cuanacatyí ra chí ra cuvī nuu chí tata sutu. ²³ Ta cacatyí ra chí ra:

—Nyasi yuvehe caa cuan ta chaā ndi. Ta sindaro, tayucú ra yuvehe casahá cumi ra. Soco cuhva cha nuñā ndi, ña nañihñi ndi chí ni noo ra chichi vehe caa cuan —catyi ra chí ra.

²⁴ Cuhva cha cachiñi tata sutu chihin ra cuvī nuu chí ra, ta ra cuvī nuu chí ra casaha cuenda vehe ñuhu tuhun ihya, iyo xaan cuñi ra. Ta candatuhun tahan ra yoso caa sacuvi ra ta cundiñi tuhun cuan. ²⁵ Tyicuan ta chaā noo ra ta catyi ra:

—Ra cha tyihñi ndo vehe caa cuan, nyicú ra chichi vehe ñuhu sañahá ra chí ñáyivi —catyi ra.

²⁶ Tyicuan ta ra cuvī nuu chí ra casahá cuenda vehe ñuhu, chahān ra chihin policia, ta chiquehen ra chí ra chihin cha vii ri ta ña cañi ra chí ra, vatyi yuhvi ra chí ñáyivi coto tuchi ñu yuu chí ra. ²⁷ Chinyaca ra chí ra nuu ra cacuví tyiño vehe ñuhu cahnu. Ta ra cuvī nuu chí tata sutu catyi ra chí ra:

²⁸ —Nyuhu catyi cachi ndi chí ndo vatyi ma cahan ca ndo tuhun ra Jesús. Soco nyoho ña tyasohó maa ndo. Cha ndihñi maa chichi ñuu Jerusalén sacotó ndo tuhun ra. Ta cuñi ndo natyaa ndo siqui ndi vatyi nyuhu chahñi ndi chí ra cuan —catyi ra cuvī nuu chí tata sutu chí ra apóstol.

²⁹ Tyicuan ta nacahān ra Pedro ta inga ra apóstol, ta catyi ra:

—Nyaá siqui ndi cha quichaha xihna ca ndi chí Nyoo ta ñiima ca chí rayi. ³⁰ Nyoo cuenda sutu chahnu yo ican sanandotó chí ra Jesús, ra cha chitacaā ndo nu cruzi ta chahñi ndo chí ra. ³¹ Ta ra Jesús ican ra cuvī ra cha sacahnū xaan Nyoo chí, ta cuatyaa ra chí ra chiyo vaha ra, vatyi cunyaca ñaha ra tandihñi. Ta noo tuhun ri maa ra cuvī ra sacacú chí yo. Vatyi tyicuan caa chahá ra cuhva chí yo cha cuvī yo ñu Israel na ndu uvi iñi yo cuatyí yo tacuhva saha ra ticahnu iñi cuatyí yo. ³² Ta nyuhu cuvī ndi cha ndaa cuenda ihya. Ta tyicuan caa tucu Tatyí Ii cha

chaha Nyoo cunyaa añima ñu quichahá chi ra —catyi ra Pedro chi ra.

³³ Ta cha cachiñi ra cha catyi ra Pedro, nduxaan xaan ra. Ta cuñi ra cahñi ra chi ra. ³⁴ Soco mahñu ra cacuvi tyiño cuan ñohó noo ra cuví fariseo cha nañi Gamaliel. Ta cuví ra ra sacuahá cuenda ley ra Moisés. Ta ñáyivi sahá xaan ñu ñáyivi chi ra. Ta ra Gamaliel cuan, nicuinanyaa ra. Ta tachj ra naquita coyo ra apóstol cuan noo cuhva ri. Tyicuan ta quita coyo ra. ³⁵ Ta quichahá catyi ra Gamaliel cuan chi inga ra cacuvi tyiño:

—Nyoho ra nyacá ñaha ñu Israel, saha ndo cuenda chi ndo chihin cha cua cunyacuvi ndo chihin ra chiña. ³⁶ Njicohon iñi ndo vatyi cha iyó suhva quivi ndicuita noo ra cha nañi Teudas. Ta catyi ra vatyi cuví ra noo ra vaha. Ta tari cha cumi cientu rayi chinyicon chi ra. Soco yahá cuan chahñi ñáyivi chi ra. Ta tandihi ra chinyicon chi ra nacutya cuaty ra. Ta ndihi tuhun. ³⁷ Yahá cuan ta nu cuahan ca chi, quivi nacahvi ra gobiernu chi ñáyivi, ta ndicuita ra Judas ra ityi Galilea cuan. Ta cuaha ñu chinyicon chi ra. Soco suri chahñi ñáyivi chi ra. Ta tandihi ñu cha chinyicon chi ra chitya cuaty ñu. ³⁸ Yucuan chaha saña ndo chi ra chiña. Ta ma tyihi ndo chi ndo chihin ra vatyi tatu tuhun ñáyivi ri cuví cha chicá noo ra, cundihi tuhun. ³⁹ Soco tatu ndicha tyi tuhun Nyoo cuví, ma cuví chi nyoho sativi ndo. Saha ndo cuenda chi ndo coto vaha chihin Nyoo cañi tahan ndo —catyi ra Gamaliel chi ra.

⁴⁰ Tandihí ra ndog ra vaha. Tyicuan ta cana ra chi ra apóstol. Cacañi policia chi ra. Ta chasj ra nu cahan ca ra tuhun ra Jesús. Tyicuan ta saña ra chi ra. ⁴¹ Ta quita coyo ra apóstol nuu ra cuví tyiño. Ta sii xaan cacuñi ra vatyi chaha Nyoo cuhva vatyi nyehé ra tindoho cha cuenda ra Jesús. ⁴² Ta ña casandihí ra cha cacahán ra. Ta ndiquivi ri sañahá ra tuhun ra Jesucristo vehe ñuhu ta vehe ñáyivi ñandihí.

6

Nu nacachí ñu yihí cuenda ra Jesús ucha tahan ra vatyi saha cuenda ra ñáa cha chiñuhu chi ñu

¹ Ta nu cuahan ca chi quivi cuaha xaan nanduví ñáyivi cha yihí cuenda ra Cristo. Tyicuan ta ñu cha cahán sahan griego quichahá cahan ñu siqui ñu cha cahán sahan hebreo cuan. Vatyi catyi ñu tyi ña tyiñuhí vaha ra cha cahán sahan hebreo chi ñu chihí yñi cuenda ñu, cuhva cha sachá ra cha cacachi ñu ndiquivi ri. ² Tyicuan ta ndi uchi uvi tahan apóstol sandu ñin ri ra chi tandihí ñu yihí cuenda ra Cristo. Ta cacatyí ra chi ñu:

—Ña vaha cha sandihí ndi cha cahan ndi tuhun Nyoo ta sachá ndi cha cachi ndo. ³ Yucuan chaha yañi, nanducu ndo ucha tahan ra nu canyicú ndo ihya, ra vaha iyó chihin Nyoo, ra chiñi tuñi, ra tyitú yihí chihin Tatyí Ii. Ta cuhva yo tyiño ihya chi ra. ⁴ Ta nyuhu sañihí ndi cacan tahvi ca ndi. Ta cuasañaha ca ndi tuhun Nyoo —catyi ra apóstol.

⁵ Tandihí ñu ndoo ñu vaha. Ta nacachj ñu chi ra Esteban. Vatyi chinó xaan iñi ra chi Nyoo. Ta tyitu ra chihin Tatyí Ii. Ta nacachj tucu ra chi ra Felipe, ta chi ra Prócoro, ta chi ra Nicanor, ta chi ra Timón, ta chi ra Parmenas, ta chi ra Nicolás cha cuví ra noo ra ñuu Antioquía, ta nanduvj ra noo ra Israel. ⁶ Tyicuan ta quichj nyaca ra chi ra nu nyicu ra apóstol. Tyicuan ta catyiso ra ndaha ra xiñi noo noo ra ta cachican tahvi ra chi Nyoo cha cuenda ra.

⁷ Ta cuahan chitya ca tuhun Nyoo. Ta nducuahá ca ñu yihí cuenda ra Cristo ñuu Jerusalén. Ta na chingó iñi tucu cuaha tata sutu cuenda ñu Israel ñandihí.

Nu catyihí ra chi ra Esteban vehe caa

⁸ Ra Esteban cuví ra noo ra cha tyitú chihin tunyee iñi Nyoo. Ta vaha xaan ñáyivi cuví ra vatyi tyitu añima ra chihin cha vaha Nyoo. Ta cuaha xaan milagru ta seña sacuví ra nu nyicú ñáyivi. ⁹ Tyicuan ta suhva ra vehe ñuhu ñuu Israel cha nañi Vehe Ñuhu Cuenda Ñáyivi Ndo Libre, candu ñin ri ra chihin ra ñuu Cirene, ta ra ñuu Alejandría, ta ra ityi Cilicia, ta ra ityi Asia. Ta quichahá cuví yuhu ra chihin ra Esteban. ¹⁰ Soco ña cacuvi chasaha ra chi ra, vatyi ra Esteban cahán ra chihin cha chiñi tuñi cha chaha Tatyí Ii chi ra. ¹¹ Tyicuan ta catyiyahvi ra cuan chi suhva ra vatyi canducu ra cuendu chaha ra Esteban ta catyi ra cuendu cuan vatyi ra Esteban cahán ña vaha ra siqui ra Moisés, ta siqui Nyoo. ¹² Yucuan chaha tandihí ñáyivi cuan naquiqui ñu. Tyicuan ta ra chahnu ta ra sacuahá cuenda ley ra Moisés, catin ra chi ra Esteban. Ta chahan ra chinyaca ra chi ra nu ndu ñin ri ra cuví tyiño cuenda vehe ñuhu ñu Israel. ¹³ Ta canducu ra chi ra cahan cuendu chaha ra. Ta maa ra catyi ra tyehé caa:

—Ra Esteban ihya, ña sandihí ra cha cahan cuehe ra siqui vehe ñuhu yo ta siqui ley ra Moisés. ¹⁴ Ta chiñj ndi cahan ra vatyi ra Jesús ra Nazaret cuan cusatani ra vehe ñuhu cahnu ihya. Ta cunasama ra costumbre cha sandoq ra Moisés chi yo na —catyi ra cuendu cuan siqui ra Esteban.

¹⁵ Tyicuan ta ra cacuví tyiño ta ra canyicú yucuan canyehé ra chi ra Esteban vatyi tari maa nuu ángel tyicuan caa nuu ra cuhva cuan.

7

Nu cahán ra Esteban tuhun Nyoo chíhin ñáyivi nducú cahñi chi ra

¹ Tyicuan ta ra cuví nuu chí tata sutu ndaca tuhun ra chí ra Esteban, ta catyí ra:

—¿Atu ndicha cha catyí ra ihya?

² Tyicuan ta nacahan ra Esteban ta catyí ra:

—Nyoho yañi, ta nyoho tata, cuiñi ndo tuhun cahín. Sutú yo Nyoo cha cahnu ca tuví ra nuu sutu chahnu yo, ra Abraham quívi nyaá ra ityi Mesopotamia cha niri ca cha cumañi cucoo ra nya ñuu Harán. ³ Ta catyí ra chí ra: “Sandoo ñuuu, ta chí tandihí ñáyivi chuun. Ta cunuhu inga ñuu cha cusañahi chuun”, catyí Nyoo chí ra Abraham. ⁴ Tyicuan ta ra Abraham quitá ra ñuu Caldea ityi Mesopotamia cuan, ta cuanuhu ra nya ñuu Harán. Ta yucuan cuví nu chíhí sutu ra. Yaha cuan saquichí Nyoo chí ra ñuhú nu iyó yo vityin. ⁵ Soco ñahri ñuhú chahá Nyoo chí ra quívi cuan. Ni noo nu cuinanyaa chaha ra ta ña chahá ra. Soco catyí Nyoo chí ra vatyi cucuhva ra. Ta cutahan chí chí sehe ra chata cha yaha cúvi ra. Tyicuan caa catyí Nyoo chí ra Abraham, vasi ta coo ca sehe ra quívi cuan. ⁶ Ta siin ri catyí Nyoo chí ra vatyi ñáyivi chí ra cucoo ñu inga ñuu. Ta cusacuví ñu tyiño nuu ñáyivi ñuu cuan, ta ma tyiyahví ñu chí ñu. Ta cunyehe ñu tindoho cumi cientu cuiya. ⁷ Soco catyí tucu Nyoo chí ra tyehe caa: “Ñáyivi ñuu cuan cusanyehe ñu tindoho chí ñáyivi chuun. Yucuan cuenda cuatachi tuñi yuhu chí ñu. Ta yaha cuan ta cuquita ñáyivi chuun ñuu cuan ta cuquichi ñu ihya. Ta cusacuví ñu tyiño nuu má ihya”, catyí Nyoo chí ra Abraham.

⁸ Tyicuan caa natyihí tahan Nyoo tuhun chíhin ra. Ta chahá Nyoo noo costumbre cha cuasacuví ñu coto naa iñi ñu. Chahá ra tyi cutahnya chíin ñi xiñi ndivi cha lee sehe ñu, o cha sahá ñu circuncidar chí sehe ñu cuví cuan. Ta cha yaha uña quívi cha cacú ra Isaac sehe ra Abraham, tyicuan caa chinyacuví ra chíhin ra. Ta suri tyicuan caa sacuví tucu ra Isaac chíhin ra Jacob sehe ra. Ta ra Jacob tucu chíhin uchi uvi tahan sehe ra, tyaa ra noo seña cuan chí noo noo sehe ra. Ta ícan ra cuan cacuví sutu chahnu yo.

⁹ Ta ícan uchi iñ tahan ra sehe ra Jacobo ihya catasi cuñi ra nyehe ra chí ra José yañi ra cha cuenda vatyi vaha ca ra nuu sutu ra. Yucuan chaha caxico ra chí ra na cuhun ra Egipto. Soco Nyoo ña sandoo ra chí ra José. ¹⁰ Ta sacacú ra chí ra nu nyehé ra tindoho. Ta chahá ra cha chíñi tuñi ra chí ra. Ta chahá ra cha vaha coo ra nuu ra Faraón, ra cuví rey Egipto. Ta rey cuan chahá ra cha cuví ra José gobiernu Egipto cuan. Ta chinyacá ñaha tucu ra vehe maa rey ñandihí.

¹¹ Tyicuan ta chíyo tama nicahnu ityi Egipto ta ityi Canaán. Ta nyehe xaan ñáyivi tindoho. Ta tandihí sutu chahnu yo cha chicoo tyembu cuan ña cañihí ra cha cachi ra. ¹² Soco quívi chito ra Jacob vatyi iyó trigu nya Egipto, ta tachí ra chí sehe ra na cuquehen ra. Ta chahan coyo ra noo chaha. ¹³ Ta cha cu uvi chaha cha chahan coyo ra, ra José sacoto ra chí ra vatyi yañi ra cuví chí ra. Yucuan quívi chito ra Faraón yóo chí tata vachi ra José. ¹⁴ Tyicuan ta tachí ra José tyiño na quichi sutu ra, ra Jacob, chíhin tandihí ñáyivi chí ra, uñi xico chahun tahan ñu. ¹⁵ Ta tyicuan caa cuví cha cuahan ra Jacob cuacoo ra Egipto cuan. Yaha cuan ta chíhí ra yucuan. Ta chíhí tucu sehe ra, ra cacuví sutu chahnu yo. ¹⁶ Tyicuan ta cha quívi cha chinanyaca ñu yiqui ra Jacob ta yiqui sehe ra nya Siquem. Ta yucuan quihví ra chíhí ñuhú nu sata ra Abraham noo ñañá chí sehe ra Hamor ta cha naha.

¹⁷ Soco cha ni cumañi ca quita ñu Egipto, ñáyivi chí ra Abraham cha iyó Egipto cuan cuaha xaan nanduví ñu. Ta cha nyañaa yatyin quívi cha cuacuhva Nyoo ñuhú chí ñu tari cuhva catyí cachi ra chí ra Abraham. ¹⁸ Tyicuan ta quichahá nyaca ñaha noo rey cha ña ñohó nuu chí ra José. ¹⁹ Rey cuan sandaví ñaha ra chí ñáyivi chí yo cuan. Ta sanyehe xaan ra tindoho chí ñu, ta saniñi ra chí ñu na sanandoo ñu chí sehe ñu cha ni cacu vatyi na cúvi ndotyin. ²⁰ Ta suri quívi cuan cacú ra Moisés. Ta tahan xaan iñi Nyoo chí ra lee cuan. Ta uñi yoo sacuhnú sihi ra chí ra nya vehe ña. ²¹ Yaha cuan ña cuví ca tixehe sihi ra chí ra. Ta sandoo ña chí ra chíhí noo tica yuhu yutya. Tyicuan ta sehe maa rey Egipto cuan nañihí ña chí ra. Ta naquehen ña chí ra. Ta sacuhnú ña chí ra, tari cha sehe ña cuví chí ra. ²² Yucuan chaha cutuhvá ra Moisés tandihí cha chito ñu Egipto. Ta siin ri nyee xaan cuhva cahan ra, ta cuhva sacuví ra ñandihí.

²³ Ta quívi cha cha quívi uvi xico cuiya ra Moisés quichi cuví iñi ra cuhun ra cunyehe ra nu nyicú ñu Israel, ñáyivi chí ra. ²⁴ Tyicuan ta noo quívi nyehe ra nu cañi noo ra Egipto cuan chí noo ra Israel cuan. Tyicuan ta chahñi ra Moisés chí ra Egipto cuan vatyi satañi iñi ra chí ra Israel ra ñuu ra. ²⁵ Cuñi maa ra Moisés cuan vatyi ñáyivi Israel cuan cutuñi iñi ñu tyi Nyoo tachí chí ra vatyi cusacua ra chí ñu. Soco maa ñu ña tuví iñi ñu cha tyicuan caa cucuví. ²⁶ Tyicuan ta cha inga quívi cuan nyehé ra Moisés chí uvi tahan ra Israel cha cacañi tahan ra. Ta ra Moisés, cuñi ra cha ma cacañi tahan ca ra, ta quichaha catyí ra: “Ña vaha cha cacañi tahan nyoho, vatyi suri yañi ndo cuví”, catyí ra chí ra. ²⁷ Tyicuan ta ra cha cañi chí tahan cuan tyandahá ra chí ra Moisés, ta catyí ra chí ra: “¿Yóo cha

tyatyíño chi yoho vatyí cunyaca ñahun ta cuvun juez chí ndí? ²⁸ ¿Atu cuñun cahñun chíi tari chahñun chí ra Egipto cuan icu?” catyí ra chí ra Moisés. ²⁹ Cuhva cha chíñi ra Moisés cha catyí ra, chíng ra. Ta cuahan ra nya ñuu Madián. Yucuan ñihí ra ñasihí ra. Ta yucuan chíyo uvi tahan sehe ra.

³⁰ Yahá uvi xico cuiya. Tyicuan ta noo quiví chicá noo ra Moisés chíqui ndí yatyín noo yucu cha nañí Sinaí. Ta nyehe ra noo taca íñu cha cayú. Tyicuan ta tuví noo ángel chíchi ñuhú cha cayu cuan. ³¹ Iyo xaan cuñí ra Moisés cha nyehe ra yucuan. Ta cuhva cha tuhva yatyín ca ra vatyí tacuhva nyehe vaha ra, chíñi ra noo ndusu Sutu Mañi yo. Ta catyí ra tyehé caa: ³² “Yuhu cuví Nyoo cuenda sutu chahnun, Nyoo cuenda ra Abraham, ta ra Isaac, ta ra Jacob”, catyí Nyoo chí ra. Tyicuan ta ra Moisés quichahá ñihí ra chíhin cha yuhví ra. Ta ña caña íñi ra nanyehe ra. ³³ Ta quichaha catyí tucu Sutu Mañi yo chí ra: “Tava ndichan chahun vatyí ñuhú nu chañun, ñuhú ii cuví. ³⁴ Yuhu nyehí tandihí tindoho cha nyehé ñáyiví cuende ñuu Egipto chíña. Ta chíñi ndusu íñu cha chacú chaa ñu. Yucuan chaha noó xique vityín vatyí sacaqui chí ñu. Ñaha, vatyí cutachi chuun nya Egipto”, catyí Nyoo chí ra Moisés.

³⁵ Quiví cuan ña cuñi ñáyiví Israel chí ra Moisés cha cunyaca ñaha ra chí ñu, ta catyí ñu chí ra: “¿Yóó cha tyatyíño chí yoho vatyí cunyaca ñahun ta cuvun juez chí ndí?”, catyí ñu chí ra. Ta vasi ña cuñi ñu cha cunyaca ñaha ra chí ñu, soco Nyoo tachí chí ra vatyí cuví ra nuu, ta sacacu ra chí ñu. Vatyí tyicuan caa catyí ángel cha tuví nuu ra nu taca íñu cha cayu cuan. ³⁶ Ta ícan ra Moisés cuan tava chí ñáyiví Israel Egipto cuan. Ta cha yaha savahá ra milagru ta seña ñuu cuan, ta sacuví tucu ra nu yahá ñu Tyañuhu Cuaha. Ta nu chicá noo ñu ñuhú ityí chíchi cha uvi xico cuiya sacuví tucu ra ñandihí. ³⁷ Ta suri maa ra Moisés cuan cuví ra cha catyí chí ñu Israel ta cha naha tyehé caa: “Nyoo cutachi ra noo profeta ra tari tachí ra chí mai. Ta cucuvi ra noo ra Israel tari maa ndo. Quichaha ndo chí ra”, catyí ra. ³⁸ Ta suri maa ra Moisés cuan ndihí ra chíhin ñáyiví chahnu yo nu chican noo ñu ñuhú ityí cuan. Ta ícan ra cuví ra cha cahán ángel cuan chíhin nya yucu Sinaí. Ta ícan ra quehen cuenda ra tuhun yoso caa coo ñáyiví ta sañahá ra chí yo.

³⁹ Soco ñáyiví chahnu yo ña quichahá ñu chí ra. Tava xiin ñu chí ra. Ta cacuñi ñu cunuhu coyo ñu nya Egipto. ⁴⁰ Yucuan chaha cuhva cha nyaá ca ra Moisés yucu Sinaí ta cahán ñáyiví chíhin ra Aarón ta catyí ñu: “Savahun suhva nyoo cha chuhun coyo ityí nuu ndí. Vatyí ña chitó ndí ñáá cha cuví chí ra Moisés, ra cha tava chí ndí

Egipto”, catyí ñu. ⁴¹ Tyicuan ta casavahá ñu noo becerru xuhun cuan. Tyicuan ta cachahñi ñu quiti vatyí cuhva cuenda ñu chí xitohyo cuan. Ta sii xaan cuñi ñu cachiyo ñu vico cuenda xitohyo cha casavaha ñu chíhin ndaha ñu. ⁴² Tyicuan ta Nyoo cuachiyo ra chí ñu. Ta sañá ndaha ra chí ñu vatyí cusacahnu ñu chí ñanyii, chí yoo, ta ñáá ndihí tíño cha iyó ityí andívi. Vatyí tyehé caa catyaa ra profeta cuenda Nyoo nu libru ta cha naha: Nyoho ñáyiví Israel, ¿atu chahñi ndo quiti vatyí cuhva cuenda ndo chí yuhu chíchi cha uvi xico cuiya cha chican noo ndo ñuhu ityí? Ñima.

⁴³ Soco sacahnu ndo chí nyoo cha nañí Moloc, ta sacahnu tucu ndo chí nyoo cha nañí Renfán cha caá tari caá tíño andívi.

Suri maa ndo savahá xitohyo cuan, vatyí sacahnu ndo.

Yucuan chaha yuhu cuatave chí ndo ñuu ndo, ta cuasacuhin chí ndo noo nu cañi ityí nuu ca Babilonia, catyí Nyoo chí ñu.

⁴⁴ Nu chicá noo sutu chahnu yo ñuhú ityí cuan, chícumi ra noo vehe ñuhu cha chíng chíhin ñi quiti. Ta chíchi vehe cuan chícumi ra tabla yuu cha nyaá ley Nyoo nuu. Ta ra Moisés tachí ra tyíño na savaha ñu vehe ñuhu cuan ta ityí chata ca tari cuhva sañahá maa Nyoo chí ra. ⁴⁵ Yucuan ta ra Josué nanduví ra nuu chí ñu. Ta quehen ñu vehe ñuhu ta chícoo ñu chíhin nu nyaá yo ihya vityín. Vatyí Nyoo tava ñehe ra chí ñáyiví chíyo ñuhu ihya ta nacuhva cuenda ra chí ñu Israel ñáyiví chí yo. Ta chotyíño ñu vehe ñuhu cuan nyacua nya quiví chíyo rey David. ⁴⁶ Ta rey David ñihí ra tumañi íñi nuu Nyoo. Ta cuñi ra savaha ra noo vehe vaha nu coo Nyoo. Suri Nyoo ihya sacahnu ra Jacob ta cha naha. ⁴⁷ Soco ra Salomón savahá vehe Nyoo. ⁴⁸ Vasi ña iyó Nyoo chíchi vehe ñuhu cha savahá ñáyiví. Tari catyí ra chíhin yuhu ra profeta ta cha naha tyehé caa:

⁴⁹ Andívi cuví tyayu nu nyaí ta nyacá ñahi tandihí. Ta ñuhu ñáyiví, yucuan cuví nu chañi chahi.

¿Atu cuví savaha ndo vehi ta coi chíchi, cuñi maa ndo?

¿Ta nya maa maa cuví nyitati, cuñi maa ndo?

⁵⁰ ¿Atu ña chitó ndo vatyí mai savahi andívi ta ñuhu ñáyiví? catyí Nyoo.

⁵¹ Soco nyoho —catyí ra Esteban— tyicuan ri tuhva ndo sandava ndo íñi ndo. Ta ña cuñi ndo naquehen ndo tuhun cahán Nyoo. Tyicuan ri ña quichahá ndo chí Tatyí Íi. Inuu ri caa ndo chíhin sutu chahnu ndo. ⁵² Sutu chahnu ndo satají íñi ra ta cachahñi ra chí tandihí ra profeta cuenda Nyoo ta cha naha. Ta ícan ra cuan cacatyí vatyí cuquichi

noo ra vaha. Ta cha quichí ra vityin, nyoho ña cuñí nyehe ndo chi ra, ta cachahñi ndo chi ra. ⁵³ Nyoho naquehen cuenda ndo ley Nyoo cha chaha ángel chí ndo, soco ña cuñí ndo sacuvi ndo cuhva catyí ley cuan —catyí ra Esteban.

Nu chihí ra Esteban

⁵⁴ Cuhva cha chihí ra cacuví tyiño vehe ñuhu cahnu tuhun ihya, xaan xaan cuñí ra, nyacua casacahñi noho ra nyehé ra chí ra Esteban. ⁵⁵ Soco ra Esteban tyitú cuíi maa ra chihin Tatyí Ii ta nanyehé ra ityi andivi. Ta nyehé ra cha cahnu cuví Nyoo. Ta suri nyehe ra chí ra Jesús nanyaá ra chiyo vaha Nyoo. ⁵⁶ Tyicuan ta catyí ra Esteban:

—¡Nyehe ndo! Nyeñi tanuña andivi. Ta nyeñi chí ra Jesús, Rayíi cha quichí nya gloria, nanyaá ra chiyo vaha Nyoo —catyí ra Esteban.

⁵⁷ Soco ra cuan cachasi ra soho ra, cha ma cuñi ra tuhun cahán ra Esteban. Tyicuan ta vaa ri cananduvi ra. Ta tandihí ra cuahan coyo ra siqui ra Esteban. ⁵⁸ Tyicuan ta catava ra chí ra yuhu ñuu. Ta ca chahñi ra chí ra chihin yuu. Ta ra cha casacuví cha ña vaha cuan, casandoq ra sahma cha nyaa chata ra vatyi sahacumi noo ra tyivaa cha nañi Saulo. ⁵⁹ Cha niri ca cha cacañi ra yuu chí ra Esteban, quichaha chican tahvi ra Esteban chí Nyoo, vatyi tuvi iñi ra cuacúvi ra. Ta catyí ra tyehe caa:

—Sutu Mañi yuhu Jesús, naquehen añime —catyí ra.

⁶⁰ Yahá cuan, tyicuan ta chicuñi chiti ra, ta chaa canachaa ra ta catyí ra:

—Sutu Mañi yuhu, ma tiin cuendon cuatyí cha sacuví ñu —catyí ra.

Ta cha yahá catyí ra tyehe caa, ta chihí ri ra.

8

Nu chicá nyicon ra Saulo chí ñáyivi yihí cuenda ra Cristo

¹ Ta ra Saulo ña chinó iñi ra chí ra Jesús, ta ndoó ra vaha cha chahñi ra chí ra Esteban.

Ta suri quivi cuan quichaha nducu xaan ñáyivi chí ñu yihí cuenda ra Cristo ñuu Jerusalén cuan vatyi cucahñi ñu chí ñu. Soco ra apóstol ña caquitá ra. Candoo ra nyicú ra Jerusalén. Ta tandihí ca ñu cachino ñu, cuahan coyo ñu cuacoo ñu ityi Samaria, ta ityi Judea. ² Ta suhva ra cha nyicón vaha chí Nyoo Jerusalén cuan, catyihí ra coño ñuhu ra Esteban chichi ñuhú. Ta cachacu xaan ra cha cuenda ra. ³ Cha niri ca cha tyicuan caa, ra Saulo chicá nyicon vavaha ra chí ñáyivi yihí cuenda Cristo. Ta tahan tahan vehe ñu chahan ra. Ta suri quíño ñaa ra chí ñu, ta chahá cuenda ra chí ñu vatyi cohon ñu vehe caa, rayii ta ñusihí.

Nu cacahán ñu tuhun ra Cristo ityi Samaria

⁴ Soco tandihí ñu cha quitá ñuu Jerusalén, cahán ñu tuhun yoso caa sacacú ra Cristo añima ñu tandihí ri maa ityi nu chaq coyo ñu. ⁵ Minoo ra cha nañi Felipe chaq ra noo ñuu ityi Samaria. Ta quichaha cahan ra tuhun ra Cristo chihin ñu. ⁶ Ta tandihí ri ñáyivi ta tyasohó ñu tuhun cha cahán ra. Ta nyehé ñu milagru ta seña cha savahá ra. ⁷ Vatyi cuaha vavaha ñáyivi cha yihí tatyí ña vaha chii nduvaha ñu. Vatyi tatyí ña vaha cha yihí chí ñu, quitá chí ta suri canachaa chí cuahan chí. Ta cuaha vavaha ñáyivi coxo ta ñáyivi cha ña cuví nacanda, nduvaha ñu. ⁸ Yucuan chaha ñáyivi ñuu cuan, sii xaan cacuví chí ñu.

⁹ Soco ñuu Samaria cuan iyó noo ra tasi cha nañi Simón. Ta sandavi ñaha ra chí ñáyivi cuan. Catyí ra vatyi cuví ra noo ra cahnu. ¹⁰ Ndií cuíi maa ñáyivi tyasohó ñu tuhun cahan ra, nya ñu tyayii, ta nya ñu ndahvi. Ta cacatyí ñu:

—Ndicha ndicha cuíi, vatyi tunyee iñi Nyoo nyaá chihin ra ihya —catyí ñu.

¹¹ Quichahá xaan ñu tuhun cahán ra vatyi cha naha xaan sandavi ñaha ra chí ñu chihin tuhun tasi. ¹² Tyicuan ta quichí ra Felipe. Ta sacoto ra chí ñu yoso caa nyacá ñaha Nyoo añima ñáyivi. Ta yoso cuhva cha cahnu cuví ra Jesucristo. Ta yucuan ta chino iñi ñu chí ra Cristo, rayii ta ñusihí. Ta condutyá ñu. ¹³ Nyacua nya ra Simón cuan, ta nachino iñi ra chí ra Cristo, ta condutyá ra. Ta quichaha chica noo ra chihin ra Felipe. Ta iyo xaan cuñi ra nyehe ra milagru, ta seña cha sacuví ra Felipe cuan.

¹⁴ Tyicuan ta ra apóstol cha canyicú ñuu Jerusalén cuan ñihí ra tuhun cha canachinó iñi ñáyivi ityi Samaria cuan tuhun Nyoo. Ta catachí ra chí ra Pedro ta chí ra Juan. ¹⁵ Cuhva cha chaq coyo ra yucuan, ta chican tahvi ra chaha ñu quihvi cuenda ra Cristo vatyi tacuhva tyi naquehen ñu Tatyí Ii. ¹⁶ Vatyi ñu cuan, ta naquehen ca ñu Tatyí Ii. Tacuhva condutyá ri ñu chihin sivi Sutu Mañi yo Jesús. ¹⁷ Tyicuan ta ra Pedro ta ra Juan catiyó ra ndaha ra siqui ñu, ta naquehen ñu Tatyí Ii. ¹⁸ Ta ra Simón cuan nyehe ra cuhva cha catiyó ra apóstol ndaha ra siqui ñu cuan, ta naquehen ñu Tatyí Ii. ¹⁹ Ta quichaha catyí ra tyehe caa:

—Yoso xuhun cuñí ndo ta cuhva ndo tunyee iñi chiña chii, vatyi tacuhva cuví tyise ndahí siqui ñáyivi, ta naquehen tucu ñu cuan Tatyí Ii —catyí ra Simón cuan chí ra apóstol.

²⁰ Tyicuan ta nacahan ra Pedro ta catyí ra:

—Na cunaun iin ri chihin xuhun chiña. Vatyi chicá iñun tyi cuví sata yo chihin xuhun nyatu cha chahá maa Nyoo chí yo.

21 Yoho, ña tahán chi tyihun chuun chíhin tuhun ihya. Vatyí añimon ña vaha nuu Nyoo.
 22 Nduv uvi iñun cuhva chicá xiñun chíña, vatyí cahnu cha quiñi caa cuví cuan nuu Nyoo. Ta çacan tahví chi ra na nyehe yo tatu saha ra ticahnu iñi chuun cha cuenda cha caa chichi añimon. 23 Vatyí nyehí tyi chichi añimon tyitú maa yihí cha quiñi caa cha cuví tari cha uva. Ta cha quiñi caa cuan, ña chahá coton cha vaha. —catyí ra Pedro chí ra Simón cuan.

24 Tyicuan ta nacahan ra Simón ta catyí ra: —Çacan tahví maa ndo cha cuende nuu Nyoo, ta cuhva cha ma quichi tandíhi tuhun cha catyún chíña siqui —catyí ra Simón chí ra Pedro.

25 Cha yahá cuan ta ra apóstol nacatyí ra tandíhi cha nyehe ra cha sacuví ra Cristo. Ta cahan ra tuhun Nyoo. Tyicuan ta cuanuhu coyo ra nya Jerusalén. Ta suri sacoto ra tuhun yoso caa sacuví yo ta cacu añima yo tandíhi ñuu ityi Samaria nu yahá ra.

Nu cahan ra Felipe tuhun Nyoo chíhin noo ra Etiopía

26 Cha yahá tuhun cuan tyicuan ta cahan noo ángel Nyoo chíhin ra Felipe, ta catyí ra: —Ndícuíta ta cuhun ityi sur, ityi quita nya Jerusalén ta cuahan nya Gaza —catyí ángel cuan chí ra.

Yucuan cuví ityi cha yahá noo ñuhú ityi.
 27 Tyicuan ta ra Felipe ndícuíta ra ta cuahan ra. Ta ityi cuahan ra ta ñihi tahan ra chíhin noo ra ñuu Etiopía. Ta cuví ra eunuco. Cuví ra noo ra cuví tyiño cahnu ñuu Etiopía, vatyí sahá cuenda ra xuhun cu Candace, ñaha cha cuví reina ñuu Etiopía cuan. Ta chahan ra Etiopía cuan chisacahnú ra chí Nyoo nya Jerusalén. 28 Ta ityi cuanuhú ra nya ñuu ra nyaá ra siqui carru ra. Ta sacuahá ra libru cha tyaá ra Isaías ra profeta cuenda Nyoo ta cha naha. 29 Tyicuan ta Tatyí li catyí chí ra Felipe:

—Sátuhva ca nu cuahan carru cuan.

30 Ta cuhva cha tuhva ra Felipe, chíñi ra vatyí sacuahá ra cuan nu libru cha tyaá ra Isaías. Ta ndaca tuhun ra chí ra:

—¿Atu cutuñi iñun cha sacuahún? —catyí ra.

31 Tyicuan ta nacahan ra cuan ta catyí ra: —¿Yoso caa cutuñi iñi ta yori sañahá chíi? —catyí ra chí ra.

Ta chicān ra chí ra Felipe na ndaa ra ta cunyaa ra chíhin ra.

32 Ta nu cuahan sacuahá ra, catyí chí tyehe caa:

Chahñi ra chí ra tari chahñi ra noo mbee.

Vatyí tari ña chacú mbee tatu cuasatya ra ixi ti, ta tari ña chacú ti tatu chahñi ra chí ti, tyicuan caa cuví ra cuan tyi nyehe ra tindoho ta ñahri maa catyí ra.

33 Sanocuee ñu chí ra ta yori cuñi sacacu chí ra.

¿Yóo ra cuví nacatyí tuhun sehe ra cha cuacoo?

Yori, vatyí chíhi ra.

Catyí chí nu tutu cha sacuahá ra cuan.

34 Tyicuan ta ra cuan quichahā ndaca tuhun ra chí ra Felipe, ta catyí ra:

—Saha tumañi iñi chíi, ta catyún chíin chíi yóo chí tuhun cahan ra profeta ihya. ¿Atu tuhun maa ra, o yóo chí tuhun cahan ra? —catyí ra chí ra Felipe.

35 Tyicuan ta ra Felipe quichahā cahan ra siqui tuhun cha cha yahá sacuahá ra cuan, ta nacatyí ra chí ra vatyí tuhun ra Jesús cahan ra cuan. Ta nacatyí ra vatyí ra Jesús cuví ra cha sacacú chí yo. 36 Tyicuan ta cha cuayaha ra noo nu ñohó ndutya. Ta ra cuan quichahā catyí ra chí ra Felipe:

—Ihya ñohó ndutya. ¿Atu maa cuví conductye vityin? —catyí ra.

37 Tyicuan ta nacahan ra Felipe, ta catyí ra:

—Tatu chinó iñun chíhin cha tandíhi añimon, cuví conductyon —catyí ra chí ra.

Tyicuan ta nacahan ra cuan, ta catyí ra:

—Chinó iñi yuhu vatyí Sehe Nyoo cuví chí ra Jesucristo —catyí ra.

38 Tyicuan ta ra cuan catyí ra chí musu ra na sacucuiñi ra carru cuan. Tyicuan ta canoo nduvi tahan ra. Ta caquiñi ra chí ndutya. Tyicuan ta sacondutya ra Felipe chí ra. 39 Ta cuhva cha caquiñi coyo ra chíhi ndutya cuan, Tatyí li Sutu Mañi yo naquehen chí chí ra Felipe. Ta ra cuan ña nyehe ca ra chí ra. Soco si xaan cuví chí ra, cuanuhu ra. 40 Ta ra Felipe chaá ra ñuu Azoto. Ta cuahan ra tahan tahan ñuu, ta cahan ra tuhun ra Cristo chíhin ñáyivi nyacua nya cha chaá ra ñuu Cesarea.

9

Nu nachinó iñi ra Saulo chí ra Cristo (Hch. 22.6-16; 26.12-18)

1 Cha ni ri ca cha chicá noo ra Felipe cahan ra tuhun ra Cristo chíhin ñáyivi, ra Saulo ña sandíhi ra tuhun cha nducú cahñi ra chí ñu yihí cuenda Sutu Mañi yo. Ta chahan ra nu nyaá ra cuví nuu chí tata sutu, 2 chicacān ra noo tutu chí ra, tacuhva nacuhva ra cuhun ra vehe ñuhu ñuu Damasco, ta tin ra chí ñu cuahan ityi ra Cristo, ta quichi nyaca ra chí ñu vehe caa Jerusalén, rayii o fusihí. 3 Ñihí ra Saulo tutu cuan ta cuahan ra. Ta cuhva cha cuachaa ra ñuu Damasco cuan, sana cuii ri iñi ra, ta quichí noo nduva ñuhú ityi andívi, sacundichin nicachico maa nu cuahan ra. 4 Tyicuan ta ra Saulo nduva ra nu ñuhú. Ta chíñi ra noo ndusu cha catyí tyehe caa:

—Saulo, Saulo, ¿ñáá tuhun cha chicá nyicon chí yuhu? —catyí ndusu cuan chí ra.

⁵ Tyicuan ta nacahan ra Saulo ta ndaca tuhun ra chi ra ta catyí ra:

—¿Yóó yoho Tata? —catyí ra.

Tyicuan ta nacahan ndusu cuan chihin ra, ta catyí:

—Yuhu cuví ra Jesús, ra chicá nyicon chí. Suri chí maun sañicuehún, tari sañicuehé sindiquí quití tahví ñuhu chí tí cha chañí nyaa tí nu noo cha xaan cha saquehen ityí ra chí tí —catyí ra Jesús chí ra.

⁶ Tyicuan ta ra Saulo suri ñihi ra chihin cha yuhví ra. Ta catyí ra:

—Sutu Mañi yuhu, ¿ñáá cha cuñún tyi sacuví? —catyí ra.

Tyicuan ta Sutu Mañi yo catyí ra chí ra tyehe caa:

—Ndícuíta ta quihvun chíchi ñuu Damasco chiña. Ta yucuan cucatyí noo ra chuun ñáá cha cusacuvun —catyí ra Jesús chí ra Saulo.

⁷ Ra cha candihí chihin ra Saulo, yuhví xaan ra cacuví. Ta ña cañihí ra tuhun cahan ra vatyí cachiñí ra ndusu cuan soco yori chí nyehe ra. ⁸ Tyicuan ta ra Saulo ndicuita ra. Soco cuhva cha nuña ra chíti nuu ra, ña cuví ca maa nyehe ra vatyí nducuaa ra. Yucuan chaha, ra tahan ra cayindaha ra ndaha ra ta chinyaca ra chí ra ñuu Damasco cuan. ⁹ Yucuan chinyaa ra uñi tahan quiví. Ta ña cuví nyehe ra. Ta ñiri ña chachí ra, ta ña chíhí ra ndutya.

¹⁰ Ñuu Damasco cuan iyó noo ra chinó ñi chí Nyoo. Ta nañí ra Ananías. Ta nyehe ra noo visión nu catyí Sutu Mañi yo chí ra tyehe caa:

—¡Ananías! —catyí ra chí ra.

Tyicuan ta nacahan ra Ananías, ta catyí ra:

—Ma yuhu ihya, Sutu Mañi yuhu —catyí ra chí ra.

¹¹ Tyicuan ta Sutu Mañi yo catyí ra:

—Ndícuíta, ta cuhun noo ityí cahnu cha nañi Ndo. Ta nanducun vehe noo ra cha nañi Judas. Ta ndaca tuhun sívi noo ra cha nañi Saulo, ra ñuu Tarso. Vatyí chicán tahví ra chí Nyoo. ¹² Ta nyehé ra noo visión, ta nyehé ra chí noo ra nañi Ananías. Ta chaá ra nu nyaá ra, ta tyisó ra ndaha ra siqui ra tacuhva cuví nanyehe ra inga chaha —catyí Sutu Mañi yo chí ra Ananías.

¹³ Tyicuan ta nacahan ra Ananías ta catyí ra:

—Sutu Mañi yuhu, cuaha xaan ñáyivi nacatyí chíi vatyí cuaha xaan cha ña vaha chinyacuví ra Saulo cuan chihin ñu yihí cuendon nya ñuu Jerusalén. ¹⁴ Ta vityin vachí tucu ra ihya vatyí chaha ra cacuví nuu chí tata sutu ityí chí ra cha tyihí ra chí ñáyivi chicán tahví chihin sivun vehe caa —catyí ra Ananías chí Sutu Mañi yo.

¹⁵ Soco Sutu Mañi yo catyí ra chí ra:

—Cuahan vatyí yuhu cha nacachí vahi chí ra Saulo cuan, vatyí cahan ra tuhín chíhin ñáyivi inga ñuu, ta chíhin rey inga ñuu, ta suri cahan tucu ra chíhin ñáyivi Israel ñandihí. ¹⁶ Yuhu cusañahi chí ra yoso caa cha cuaha tndoho cunyehe ra cha cuende —catyí Sutu Mañi yo chí ra Ananías.

¹⁷ Tyicuan ta cuahan ra Ananías vehe nu nyaá ra Saulo. Chaá ra vehe cuan ta quihví ra chíchi vehe. Ta tyisó ra ndaha ra siqui ra Saulo, ta catyí ra chí ra tyehe caa:

—Yañi Saulo, Sutu Mañi yo ra Jesús ra tuví nuun ityí vachun, ican ra tachí chíi vatyí tacuhva cuví nanyehun inga chaha. Ta cusacutu ra chuun chíhin Tatyí lí ra —catyí ra Ananías chí ra Saulo.

¹⁸ Caa cuhva ri cuan ta cana coyo noo cha tari caa soo tiyaca cha yihí chíti nuu ra Saulo. Tyicuan ta cuví nanyehe ra inga chaha. Yahá cuan ta condutya ra. ¹⁹ Yahá cuan ta chachí ra. Ta ndunyeé coño ñuhu ra inga chaha. Ta ndoo ra suhva quiví chíhin ñu yihí cuenda ra Cristo ñuu Damasco cuan.

Nu quichaha cahan ra Saulo tuhun ra Cristo chíhin ñáyivi ñuu Damasco

²⁰ Tyicuan ta numi ri quichaha cahan ra Saulo tuhun ra Cristo chíhin ñáyivi tandihí vehe ñuhu ñu Israel ñuu Damasco cuan. Ta catyí cachi ra vatyí ra Jesús, Sehe Nyoo cuví chí ra. ²¹ Ndií cuií maa ñáyivi cha chíñí tuhun cahán ra, iyo vavaha cuñí ñu. Ta catyí ñu chí tahan ñu:

—¿Atu ñima ra ihya cuví ra cha chica nyicon chí ñu chicán tahví chíhin sívi ra Jesús ityí ñuu Jerusalén cuan? ¿Atu suri ñima ra cuví cha vachí tñin chí ñu ityí tyehe vatyí cucuhva cuenda ra chí ñu chí ra cacuví nuu chí tata sutu? —catyí ñu.

²² Soco ra Saulo ñihi ca cahán ra tuhun ra Cristo chíhin cha ñi ca ñi ra. Ta sañahá ra vatyí ra Jesús cuví ra Cristo, Sehe Nyoo. Nyacua ña cutuñí ñi ra Israel nyicú Damasco cuan nya ityí chino ñi ra.

Nu chinqe xehe ra Saulo chí ra Israel

²³ Cha yahá suhva quiví, ta ra Israel cha ña chinó ñi chí ra Cristo catyihí tahan ra tuhun cha cahñi ra chí ra Saulo. ²⁴ Ta ndiyaca ta ñiyaca canyatú ra chí ra yuvehe cahnu ñuu cuan. Soco ra Saulo cuan numi ri chito ra tuhun cuan. ²⁵ Tyicuan ta ñáyivi cha chinó ñi chí ra Cristo ñuu cuan catyihí ñu chí ra chíchi noo tica cahnu. Ta noo cha cuaa casanoo ñu chí ra ityí ventana noo vehe cha cacú chíhin barda cha nyaá ñacachico yuhu ñuu cuan. Ta tyicuan caa chinqe ra cuahan ra.

Nu ñohó ra Saulo Jerusalén

²⁶ Quiví cha chaá ra Saulo Jerusalén, cuñí ra ndu ñn ri ra chíhin ñu yihí cuenda ra Cristo. Soco tandihí maa ñu cuan ta yuhví

ñu chi ra. Vatyí ña chinó iñi ñu cha yihí ra cuenda ra Jesús. ²⁷ Soco noo ra cha nañí Bernabé, naquehen ra chi ra. Ta chaha cuenda ra chi ra chi ra apóstol. Ta nacatyí ra chi ra yoso caa nyehe ra Saulo chi Sutu Mañi yo ra Cristo ityi ñuu Damasco; ta nacatyí ra yoso caa cahān Sutu Mañi yo chihin ra. Ta yoso caa cahān ra tuhun ra Cristo chihin cha ña yuhvi ra nya ñuu Damasco cuan. ²⁸ Tyicuan ta ndoq ra Saulo Jerusalén chihin ñu yihí cuenda ra Cristo. ²⁹ Ta cahān ra tuhun Sutu Mañi yo chihin cha ña yuhvi ra. Ta ndatuhūn xaan ra tuhun ra Cristo chihin ra Israel cha cahān sahan griego. Soco ra cuan cananducy ra cuhva yoso caa ta cacahñi ra chi ra. ³⁰ Soco cachitó ra hermano cuan vatyí tyicuan caa yihí iñi ra cuan. Yucuan chaha chinyaca ra chi ra Saulo nya ñuu Cesarea. Ta yucuan ta natachí ra chi ra nya Tarso ñuu ra.

³¹ Tyicuan ta ñu yihí cuenda ra Cristo cha nyicu tandihí ityi Judea, ta ityi Galilea, ta ityi Samaria, vii xaan nyicu ñu vatyí ña cuxaan ca ñáyivi chi ñu. Ta ndunyeē ca iñi ñu chihin fuerza Nyoo vatyí quichahā vaha ñu cuhva catyí Nyoo, vatyí yuhvi ñu coto ma sacuvi ñu cuhva cuñi ra. Iyó ñu chihin cha tyinyeē Tatyí li chi ñu. Ta cuaha xaan ñu cuahan nanduvi.

Nu nduvahā ra Eneas

³² Tyicuan caa cuví ta ra Pedro tuhvá ra chica noo ra nyehe ra yoso caa canyicu hermano noo noo ñuu. Ta chahan tucu ra chinyehe ra nu nyicu ñu yihí cuenda ra Jesucristo noo ñuu cha nañí Lida. ³³ Yucuan nañihí ra chi noo ra cuhvi. Nañi ra Eneas. Ta cha uña cuiya catuvi ra ña cuví nacanda ra vatyí ndundava coño ñuhu ra. ³⁴ Soco ra Pedro catyí ra chi ra:

—Yoho Eneas, ra Jesucristo sanduvahā ra chuun. Ndícuita ta ñatuví yuvun —catyí ra chi ra.

Tyicuan ta caa cuhva ri cuan ndicuitā ra Eneas. ³⁵ Ta nyehe tandihí ñáyivi ñuu Lida cuan tyi nduvahā ra. Ta ñáyivi ñuu Sarón ñandihí. Tyicuan ta ñu cuan nachino iñi ñu chi Sutu Mañi yo. Ta sandoq ñu tuhun chahnu cha chingo iñi ñu ta cumañi ca coto ñu tuhun ra Cristo.

Nu nandoto cu Dorcas

³⁶ Quiví cuan chiyo noo ñaha chinó iñi chi ra Cristo ñuu Jope. Ta nañí ña Tabita, soco chihin sahan griego, Dorcas nañí ña. Ta tyicuan ri sacuvi ña cha vaha chihin ñáyivi. Tyinyeē ña chi ñu ndahvi. ³⁷ Ta quiví cuan cu Dorcas quehen noo cuehe chi ña ta chihí ña. Ta cha yahā sacutyí ñu chi ña, chicacun ñu chi ña chichi noo cuarto nu cu uvi piso. ³⁸ Ñuu Jope cuan yatyin ri nyaá chihin ñuu Lida, nu nyaá ra Pedro. Ta ñu cha yihí

cuenda ra Cristo ñuu Jope cuan chitó ñu vatyí nyaá ra Pedro ñuu Lida cuan. Tyicuan ta tachí ñu chi uvi tahan ra na cucatyí ra chi ra Pedro vatyí naquichi ra cha numi ri. Cuahan ra cuan ta catyí ra chi ra Pedro:

—Coho nya Jope. Sañumi ta ma cucueun —catyí ra chi ra.

³⁹ Tyicuan ta ra Pedro ndicuitā ra ta cuahan ra chihin ra. Ta cuhva cha chaa ra, chinyaca ra chi ra nya cuarto nu caa ndiyi cuan. Ta tandihí maa ñu chihí yí catuhva ñu nicachico chata ra. Suri chacú chaa ñu. Ta sañahá ñu sahma cha quicu cu Dorcas ta chinyito ña. ⁴⁰ Tyicuan ta ra Pedro tavā ra chi tandihí ñáyivi cuarto cuan. Tyicuan ta chicuñi chiti ra ta quichaha chican tahvi ra chi Nyoo. Tyicuan ta nanyehe ra chi ñaha chihí cuan catuvi ña. Ta quichahā catyí ra chi ña:

—Hermana Tabita, ndícuita —catyí ra chi ña.

Tyicuan ta nandicā ña chiti nuu ña. Ta cuhva cha nanyehe ña chi ra Pedro, nicunyaā ña. ⁴¹ Tyicuan ta ra Pedro tiñ ra ndaha ña ta sandicuitā ra chi ña. Tyicuan ta canā ra chi ra hermano, ta chi ñu chihí yí. Ta nacuhvā cuenda ra chi ña chi ñu vatyí nandoto ña. ⁴² Yahā cuan ta ndii cuii maa ñu Jope chitó ñu cha nandoto ña cuan. Ta cuaha vavaha ñu nachino iñi chi Sutu Mañi yo. ⁴³ Ta ra Pedro ndoq ra cuaha ri quiví ñuu cuan. Nyaá ra vehe noo ra satyahyu ñii. Nañi ra Simón.

10

Ra Pedro ta ra Cornelio

¹ Ñuu Cesarea iyó noo ra cha nañí Cornelio. Ta cuví ra capitán cuenda noo ciento sindaro. Ta ityi sindaro cuan, Italia nañí. ² Ta ra Cornelio cuan yuhvi ra chi Nyoo ta vaha sacahnú ra chi ra, maa ra ta ñáyivi chi ra ñandihí. Ta siin ri cuaha vavaha xuhun chahá ra chi ñu ndahvi ñu Israel. Ta tyicuan ri chicán tahvi ra chi Nyoo. ³ Ta cuví noo quiví cuan cuhva cha caa uñi cha cha iñi, nyehe ra noo visión. Ta yucuan cuví nu cachi xaan nyehe ra vatyí noo ángel cha tachí Nyoo quihvi nu nyaá ra, ta catyí ra chi ra:

—¡Yoho Cornelio! —catyí ángel cuan chi ra.

⁴ Tyicuan ta nanyehe ra Cornelio chi ángel cuan. Ta yuhvi xaan ra cuví. Ta quichahā ndaca tuhun ra ta catyí ra:

—¿Ñáa cha cuví ihya, Tata? —catyí ra chi ángel cuan.

Tyicuan ta ángel cuan quichaha catyí ra chi ra:

—Nyoo chiñí ra ndii cuii maa cha chicón chi ra. Ta tahán iñi ra vatyí tyinyeē xaun chí ñu ndahvi. ⁵ Ta vityin cuñi chí cha

tachun tyiño nya ñuu Jope na cuquehen chi noo ra cha nañi Simón Pedro. ⁶ Ta maa ra cuan cuacatyí ra chuun ñáá cha tahán chi sacuvun. Ta iyó ra vehe noo ra cha nañi tucu Simón, cuví ra noo ra satyahyú ñi. Ta iyó vehe ra yuhu tyañuhu —catyí ángel cuan chi ra Cornelio, ta cuahan ángel cuan.

⁷ Ta cha yahá cuahan ángel cuan, ra Cornelio caná ra chi uvi tahan musu ra, ta chi noo sindaro cha chinó xaan iñi chi Nyoo. Ta cuví tucu ra noo ra sahá cuenda chi ra Cornelio ñandihí. ⁸ Ndi cuii tuhun cahan ángel cuan chihin ra Cornelio ta nacatyí ra chi nduñi tahan ra cuan. Ta tachí ra chi ra ñuu Jope.

⁹ Tuví inga quiví ta cuahan coyo ra cuan. Ta cuhva cha cuachaa coyo ra yuhu ñuu Jope cuan, ra Pedro ndaa ra xiñi vehe vatyí cuacacan tahví ra chi Nyoo, ta cha cuñi hora cuví cuhva cuan. ¹⁰ Ta chaá noo soco chi ra ta chisocó vavaha ra. Soco cha niri ca cha sanduvahá ñu cha cachi ra, quichahá nyehe ra noo visión. ¹¹ Ta nyehe ra vatyí nicuitacoho andiví. Ta nyehe ra cua noo noo sahma cahnú vavaha ityí andiví. Ta tari quiví nuñi noo noo tutun sahma cuan ta cuahan noo ityí nu ñuhu. ¹² Ta chichi sahma cuan ñohó tandihí maa nuu quiti cha cumi tahan chaha. Ta tandihí nuu coo, ta tandihí nuu saa. ¹³ Tyicuan ta chiñi ra noo ndusu cha catyí chi ra:

—Pedro, ndicuita ta cahñi quiti ihya, ta cachun —catyí ndusu cuan chi ra.

¹⁴ Soco ra Pedro nacahan ra ta catyí ra:

—Ma cachi, Sutu Mañi yuhu. Yuhu ña tuhvé chachi quiti cha catyí ley tyi yica cha cachi ndi —catyí ra Pedro.

¹⁵ Tyicuan ta quichaha catyí tucu ndusu cuan chi ra inga chaha:

—Ma cатыun vatyí yica cha cachun noo cha cha yahá sanduvijí yuhu —catyí ndusu cuan chi ra Pedro.

¹⁶ Uñi tahan chaha sañahá Nyoo visión ihya chi ra. Tyicuan ta sahma cahnú cuan nandaá cuanuhu tucu ityí andiví. ¹⁷ Cha niri ca cha chicá xiñi ra Pedro ñáá cha cuñi chi catyí visión cuan, chaá coyo musu cha tachí ra Cornelio. Ta candaca tuhun ra nya nyaá vehe ra Simón. ¹⁸ Ta cha chaa coyo ra ityí yuvehe candaca tuhun ra tatu yucuan iyó noo ra cha nañi Simón Pedro. ¹⁹ Ta ra Pedro suri cha chicá xiñi ra ñáá cha cuñi chi catyí visión cha nyehe ra. Tyicuan ta Tatyí lí quichahá catyí chi ra:

—Nyehe Pedro, uñi tahan ra nanducú chuun. ²⁰ Ndicuita ta cahun chihin ra, ta ma quihí uvi iñun vatyí mai tachí chi ra ihya —catyí Tatyí lí chi ra.

²¹ Tyicuan ta ra Pedro noo ra nu canyicu ra cha tachí ra Cornelio, ta catyí ra chi ra:

—Yuhu cuví ra nanducú ndo. ¿Ñáá tyiño vachí ndo?

²² Tyicuan ta canacahan musu ra Cornelio ta catyí ra:

—Ra Cornelio, ra cuví capitán chi ndi ican tachí chi ndi. Noo ra vaha xaan ñáyiví cuví. Ta vaha xaan quichahá ra nu cahan Nyoo. Ta tandihí maa ra Israel ityí Judea ihya cacuñi ra chi ra chaha cha cuenda cha vaha ñáyiví cuví ra. Ta noo ángel Nyoo catyí chi ra vatyí na cana ra chuun, vatyí cahun vehe ra vatyí tacuhva cuiñi ra tuhun cha cuacahun —catyí musu ra Cornelio chi ra Pedro.

²³ Tyicuan ta chahá ra Pedro quihví coyo ra chichi vehe. Ta candoq ra chihin ra cha cuaa cuan. Ta cha inga quiví cuan ta cuahan ra Pedro chihin ra. Ta cuahan suhva ra hermano cha iyó Jope cuan ñandihí.

²⁴ Cha inga quiví chaá coyo ra nya Cesarea nu nyatú ra Cornelio chi ra chihin ñáyiví chi ra, ta chihin tandihí ra tahan ra. ²⁵ Cuhva cha chaá ra Pedro vehe ra, ra Cornelio quitá ra ta cahan ra chihin ra. Ta chicuñi chiti ra nuu ra ta quichaha sacahnú ra chi ra. ²⁶ Soco ra Pedro nacoñehé ra chi ra, ta catyí ra chi ra:

—Ndicuita vatyí noo rayi ri cuví yuhu tari yoho, ta ñima Nyoo cuví —catyí ra chi ra.

²⁷ Ta cha niri ca cha cahan ra chihin ra, quihví ra ta nanyehe ra cuaha ñáyiví candu ñin ri. ²⁸ Tyicuan ta catyí ra Pedro chi ñu:

—Nyoho chitó ndo vatyí ley nyuhu cha cuví ndi ñu Israel, ña chahá chi cha cu ñin ri ndi chihin ñáyiví inga ñuu. Ta ni ri chichi vehe ñu ta ma cuví quihví ndi. Soco Nyoo sañahá ra chii, ta catyí ra: “Yoho, ma cатыun chi ni noo ñáyiví tyi ña vaha ñu”, catyí Nyoo chii. ²⁹ Yucuan chaha quiví cha caná ndo chii, numi ri vachi. Ta vityin cuñi cote ñáá cuenda caná ndo chii —catyí ra Pedro chi ra Cornelio.

³⁰ Tyicuan ta nacahan ra Cornelio, ta catyí ra:

—Cha iyó cumi quiví vityin, suri maa cuhva ihya cha nyaí vehi ta ña chachí ta chicán tahví chi Nyoo cha cha iñi. Ta tuví noo ra nuí. Ñihnó ra noo sahma xiño vavaha. ³¹ Ta catyí ra chii: “Yoho Cornelio, Nyoo chiñi ra cha chicán tahvun. Ta nicohón iñi ra cha sacuvún vatyí tyinyeún chi ñu ndahví. ³² Tachi tyiño nya ñuu Jope na quichi ra Simón Pedro. Nyaa ra vehe inga tucu ra cha nañi Simón, noo ra cha satyahyú ñi. Ta vehe ra nyaá yatyin ri yuhu tyañuhu. Ta na quichi ra Simón Pedro ta cahan ra chuhun”, catyí ángel cuan chii. ³³ Tyicuan ta numi ri tachí tyiño vatyí cuquehen chuun. Ta vaha vatyí vachun. Ta vityin tandihí yo nyicú yo nuu Nyoo. Ta cuñi ndi cuiñi ndi tandihí cuii maa cha tachí Sutu Mañi yo chuun vatyí nacatyun chi ndi.

Nu cahán ra Pedro tuhun ra Cristo vehe ra Cornelio

³⁴ Tyicuan ta quichaha cahan ra Pedro ta catyí ra:

—Vityin cutuñi ñiñi vatyí Nyoo cuñi ra chi tandihí ñáyivi. Cuví ri yo ñu Israel, o cuví ri yo ñu inga ñuu. ³⁵ Soco naquehen ra chi yo tatu quichaha yo chí ra, ta sacuví yo cha vaha. ³⁶ Cahán ra chihin nyuhu ñu vachi tata ra Israel, ta sacotó ra vatyí nduvaha coo yo chihin ra cha cuenda ra Jesucristo. Maa ra nyacá ñaha tandihí maa yo. ³⁷ Nyoho chitó vaha ndo tandihí cha cuví ñuu Israel ñui, yoso caa quichaha chí nu cuví Galilea cha yahá cha cahán noo ra Juan nuu ñáyivi, ta sacondutyá ra chí ñu. ³⁸ Chitó ndo yoso caa chahá Nyoo tunyee ñiñi Tatyí Ii ra chí ra Jesús, ra Nazaret. Ta chichá noo ra sacuví ra cha vaha, sanduvahá ra chí tandihí ñu cha nyehé tindoho sahá ra ña vaha. Tyehe caa sacuví ra Jesús vatyí Nyoo nyaá ra chihin ra. ³⁹ Nyuhu cuví ndi cha ndaa tandihí cha sacuví ra Jesús nicahnu Judea ta ñuu Jerusalén. Yahá cuan ta chahñi ñu chí ra nu cruzi. ⁴⁰ Soco sanandotó Nyoo chí ra nu cu uñi quivi. Ta tuví ra nuu ndi. ⁴¹ Ña tuví ra nuu tandihí ñáyivi. Soco tuví ra nuu nyuhu vatyí nacahí ra chí ndi nyata ityi chata ca vatyí cuví ndi cha ndaa cuenda ra. Nyuhu chachí ndi ta chihí ndi chihin ra cha yahá cha nandotó ra. ⁴² Ta tachí ra chí ndi vatyí cahan ndi tuhun ra chihin ñáyivi. Ta cuví ndi cha ndaa vatyí Nyoo cuatyaá ra chí ra Jesús tyi cuví ra juez chí ñu cha nyitó ta ñu cha chihí. ⁴³ Ta tyicuan caa tucu nyata ityi chata ca, cacahan tandihí ra profeta Nyoo tuhun ra Jesús. Ta cacatyí ra vatyí tandihí ñu cha chinó ñiñi chí ra Jesús, cusandachi Nyoo cuatyi ñu cha cuenda maa ra.

Nu naquehén ñu Tatyí Ii ta ñima ñu Israel cuví ñu

⁴⁴ Ni cahán ca ra Pedro ta noq xica ri Tatyí Ii siqui tandihí ñu tyasohó tuhun cahán ra. ⁴⁵ Ta ra Israel cha cayihí cuenda ra Jesús cha chaá coyo chihin ra Pedro iyo xaan cuñi ra vatyí chahá tucu Nyoo Tatyí Ii ra chí ñu cha ñima ñu Israel cuví. ⁴⁶ Chitó ra tyi tyicuan caa cuví vatyí chihí ra cahán ñu inga sahan, ta sacahnú ñu chí Nyoo. ⁴⁷ Tyicuan ta quichaha catyí ra Pedro chí ra cha chaá coyo chihin ra:

—Ma cuví casi yo nu condutya ñáyivi ihya. Vatyí cha naquehen tucu maa ñu Tatyí Ii tari maa yo —catyí ra chí ra.

⁴⁸ Tyicuan ta tachí ra Pedro chí ñu ni ñihí Tatyí Ii na condutya ñu chihin siví ra Jesucristo. Tyicuan ta chacu ndahvi ñu nuu ra Pedro vatyí cuñi ñu cha ndoo ra suhva quivi chihin ñu.

11

Nu nacatyí ra Pedro chí ñu yihí cuenda ra Cristo Jesús nya Jerusalén yoso caa cuahan chitya tuhun ra inga ñuu

¹ Ra apóstol ta inga ra hermano cha nyicú Judea, ñihí ra tuhun vatyí nyacua nya ñu cha ñima ñu Israel cuví ta naquehén ñu tuhun Nyoo. ² Tyicuan ta nachaa ra Pedro Jerusalén. Ta ra cha catyí vatyí cuñi chí cha sacuví yo costumbre circuncisión ta cuhva cuví cacu yo, xaan xaan cuñi ra nyehe ra chí ra Pedro. ³ Ta cacatyí ra chí ra tyehe caa:

—¿Ñáá tuhun cha chahun vehe ñu cha ñima ñu Israel cuví ta chachun chihin ñu? —catyí ra.

⁴ Tyicuan ta ra Pedro nacatyí ra nya nu quichaha tandihí cha cuví chí ra ta catyí ra:

⁵ —Yuhu nyaí ñuu Jope. Ta cuhva cha chican tahvi chí Nyoo ta nyehí noo visión. Ta nyehí tari noo sahma cahnu cha noó ityi andivi. Tari cha nuññi noo noo tutun ta cuhan noo ityi nu ñuhú nu nyaí. ⁶ Ta nanyehé vahi ñáá cha ñohó chichi. Ta nyehí quití cha cumi chaha, quití cuhu, ta coo, ta saa. ⁷ Ta chihí noo ndusu cha catyí chii: “Ndícuíta Pedro. Cahñi quití ihya ta cahun”, catyí ndusu cuan chii. ⁸ Ta nacahin ta catyí tyehe caa: “Sutu Mañi yuhu, ma cuví, vatyí ni noo chaha ta ta cachi que coño quití quíñi caa.” ⁹ Tyicuan ta ndusu andivi nacahan chí chihin inga chaha, ta catyí chí: “Ma catyí yoho vatyí ma cahun noo cha yahá sanduvijí”, catyí ndusu cuan chí. ¹⁰ Uñi chaha cuví tyehe caa. Yahá cuan ta nandaá tandihí chihin sahma cuan ityi andivi. ¹¹ Ta caa cuhva ri cuan chaá coyo uñi tahan ra vehe nu nyaí, quitá ra ñuu Cesarea ta nanducu ra chii. ¹² Ta Tatyí Ii tachí chii na cuhin chihin ra. Ta catyí ra chí tyi ma caca ñiñi cha ñima ñu Israel cuví ñu. Ta chahan coyo tucu iñu tahan ra yañi yo ihya chihin. Ta cha chaá ndi nya Cesarea quihví ndi chichi vehe noo ra. ¹³ Ta nacatyí ra cuan chí ndi yoso caa nyehé ra chí noo ángel chichi vehe ra. Nanyaá ángel cuan ta catyí ra chí ra vatyí na tachí ra musu ra ñuu Jope na cana ra chí noo ra cha nañi Simón Pedro. ¹⁴ Vatyí ican ra cucatyí ra chí ra yoso caa cacu añima ra ta añima tandihí ñáyivi chí ra, catyí ángel cuan chí ra cuan na. ¹⁵ Ta sacuví ra cuan tari cuhva catyí ángel cuan chí ra. Ta cuhva cha chají vehe ra quichaha cahin chihin ñu. Ta quichí ri Tatyí Ii siqui ñu tari quichí siqui yo cha xihna ri. ¹⁶ Tyicuan ta nichohon ñiñi cha catyí Sutu Mañi yo quivi cuan. Ta catyí ra tyehe caa: “Ndicha vatyí ra Juan sacondutyá ra chí ñáyivi chihin ndutya. Soco nyoho cucondutya ndo chihin Tatyí Ii”, catyí ra. ¹⁷ Nyoo chahá tucu ra Tatyí Ii ra chí ñu cuan tari chahá ra chí maa yo quivi chino ñiñi yo chí Sutu Mañi yo Jesucristo. Ta cha

tyicuan caa *zyóó* ra cuvi yuhu vatyi casi cha sacuvi Nyoo? —catyí ra Pedro chí ra.

¹⁸Tyicuan ta cuhva cha cachiñi ra yañi yo ra Jerusalén tuhun cuan ña nacahan ca ra. Ta casacahnü ra chí Nyoo. Ta cacatyí ra:

—Tu tyicuan caa cuví, cuñí chí catyí vatyi Nyoo chahá tucu ra chí ñu cha ñima ñu Israel cuví vatyi ndu uvi iñi tucu maa ñu cuatyí ñu, ta coo ñu ñayiví cha ma naa ca maa —cacatyí ra.

Ñu yihí cuenda ra Cristo ñuu Antioquía

¹⁹Quiví cha cachahñi ra chí ra Esteban, quichaha chica nyicon ra chí inga ñu yihí cuenda ra Cristo. Ta yihí ñu cachino ñu ta cuahan coyo ñu ityi Fenicia. Ta inga ñu nya noo ñuhú cha nyaá mahñu tyañuhu cha nañi Chipre. Ta yihí ñu chaq coyo ñu ñuu Antioquía. Ta suri cahan ñu tuhun ra Cristo soco in ri maa chihin ñu Israel. ²⁰Ta chihin ñu cha cuahan coyo cuan, ndihí suhva ñáyiví ñuhú Chipre. Ta yihí tucu suhva ñu ñuu Cirene. Ta cha chaq coyo ñu ñuu Antioquía, ta quichaha cahan tucu ñu cuan chihin ñu cha ñima ñu Israel cuví. Ta sacoto ñu tuhun Sutu Mañi yo Jesús, ra cha sacacu añima yo. ²¹Ta tunyee iñi Sutu Mañi yo nyaa chihin ñu. Ta yucuan chaha cuaha ñáyiví casandoq ñu tuhun chahnu cha chino iñi ñu. Ta nachino iñi ñu chí Sutu Mañi yo. ²²Tyicuan ta chaq tuhun cuan nya Jerusalén. Ta ñu yihí cuenda Cristo tachí ñu chí ra Bernabé na cahun ra nya Antioquía. ²³Ta cha chaq ra Bernabé Antioquía cuan, nyehé ra yoso caa nasocó Nyoo chí ñu. Ta ndusií xaan cuñí ra. Ta cahán ra nuu ñu na cunyicon ñu chí Sutu Mañi yo chihin cha nií iñi ñu. ²⁴Tyicuan caa sacuví ra Bernabé vatyi cuví ra noo ra vaha. Tiyitú ra chihin Tatyi lí. Ta chinó xaan iñi ra chí Nyoo. Ta tyicuan caa ta cuaha ñáyiví quihví ñu cuenda Sutu Mañi yo. ²⁵Cha yaha cuan ta cuahan ra Bernabé cuananducu ra chí ra Saulo nya ñuu Tarso. Ta cha nañihí ra chí ra, chinyaca ra chí ra nya ñuu Antioquía.

²⁶Ta cachinyicu ra chihin ñu yihí cuenda Nyoo ñuu cuan noo cuiya naní ta sañaha ra tuhun Nyoo chí cuaha ñáyiví. Ta suri ñuu Antioquía cuan cuví nu quichaha catyí ñáyiví: Cristiano chí ñu, o ñu yihí cuenda ra Cristo cuví cuan. ²⁷Ta quiví cuan chaq coyo ra cachahá cuenda tuhun cahán Nyoo, ra cacuví profeta. Quita ra ñuu Jerusalén ta chaq coyo ra Antioquía. ²⁸Ta noo ra cuan nañi ra Agabo chicuinyaaq ra nu nyicú ra yihí cuenda ra Cristo ta cahan ra tuhun cha chaha Tatyi lí chí ra. Ta catyí ra vatyi cuquichí noo tama nicacahnu ñayiví. Ta tyicuan caa cuví quiví chinyaaq ra Claudio cuví ra rey cahnü. ²⁹Tyicuan ta ñu yihí cuenda Cristo nya Antioquía tyihí tahan ñu tuhun vatyi cucuhva

ñu yoso cuhva cundaa iñi maa noo noo ñu, vatyi cutyinyee ñu chí ñu yihí cuenda Cristo cha iyó ityi Judea. ³⁰Tyicuan caa sacuví ñu ta sacuhun ñu xuhun chí ra cuví nuu chí ñu yihí cuenda Cristo nya Jerusalén. Ta ra Bernabé ta ra Saulo chinyaca ra xuhun cuan.

12

Nu chihí ra Jacobo ta nu quihví ra Pedro vehe caa

¹Ta quiví cuan quichahaq chica nyicon rey Herodes chí suhva ñu yihí cuenda ra Cristo. ²Ta tachí ra tyiño vatyi na cahñi ra chí ra Jacobo yañi ra Juan chihin mityi. ³Ta nyehe ra Herodes vatyi tahan xaan iñi ñu Israel cha sacuví ra tyicuan caa, ta tyihí ra tyiño vatyi tin ndihi ra chí ra Pedro. Ta cuví chí noo quiví vico pascua nu tuhva ñu chachi ñu pan cha ñahri yuchan iya yihí chihin. ⁴Cha yahaq cha tñin ra chí ra Pedro, tyihí ra chí ra vehe caa. Ta cumi ityi sindaro sahá cumi chí ra. Ta cumi sindaro cha noo ityi ra ta sahá cuenda ra suhva suhva cuhva chí ra. Ta tyaq ra Herodes cuhva vatyi nayahá vico cuan ta cucuhva cuenda ra chí ra chí ñáyiví. ⁵Ta tyicuan caa ñohó ra Pedro vehe caa. Ta sindaro cuan sahá cumi vaha xaan ra chí ra. Soco cha ni ri ca cha ñohó ra yucuan, ñu yihí cuenda ra Cristo chicán tahvi xaan ñu nyita cuii ri maa cha cuenda ra.

Nu sacacu Nyoo chí ra Pedro vehe caa

⁶Ta tyaá ra Herodes cuhva vatyi cha ñaha ri inga quiví cuan cutava ra chí ra Pedro nuu ñáyiví. Ta suri cha cuaa cuan ra Pedro quixí vavaha ra mahñu uvi sindaro cuan. Ta nuhñí ra chihin uvi cadena. Ta uvi ca sindaro canyicú ra yuvehe casahá cumi ra. ⁷Ta tañi ri ta tuví noo ángel cha tachí Sutu Mañi yo. Ta ndundichin ri chichi vehe caa cuan. Ta ángel cuan tñin ra xiin ra Pedro. Ta sandoyoq ra chí ra. Ta catyí ra chí ra:

—Sanumi. Ndícuita —catyí ángel cuan chí ra.

Tyicuan ta ndachí cadena cha nuhñi ndaha ra Pedro. ⁸Ta ángel cuan catyí ra chí ra:

—Nacuhñi vaha chichun ta natyihí ndichan chahun —catyí ángel cuan.

Tyicuan caa sacuví ra Pedro. Ta catyí ángel chí ra:

—Quehen sahmon ta tyauñ chaton ta quichun chate —catyí ángel cuan chí ra Pedro.

⁹Ta ra Pedro quita ra chata ángel cuan. Soco ña chitó ra tatu cha ndicha o cha ña ndicha cuví cuan, ta cuñi maa ra vatyi visión nyehé ra. ¹⁰Soco cuahan ra chata ángel cuan ta cayahaq ra noo nu sahá cumi sindaro. Tyicuan ta cayahaq ra inga tucu nu casahá cumi sindaro cuan. Yahaq cuan ta chaq coyo ra

yuvehe caa cahnu nu quita ñáyivi ta quihvi ñu chichi ñuu. Ta yuvehe cuan nuña ri maa. Ta quitá coyo ra. Ta cha yaha yaha ra noo ityi cahnu, ta sandoo ángel cuan chi ra. ¹¹ Tyucuan ta nacotó ra Pedro vatyi ndicha ta quichaha catyi ra:

—Ndicha, ñima visión cuvi. Soco maa Sutu Mañi yo tachj ra noo ángel vatyi sacacu ra chii ndaha ra Herodes ta ndaha ra Israel —catyi ra Pedro.

¹² Chicá xiñi ra tuhun ihya ityi cuahan ra. Ta chaq ra vehe cu María sihi ra Juan Marcos. Ta cuaha xaan ñu canyicú cuan chicán tahvi ñu chi Nyoo. ¹³ Ta cuhva cha sacachan ra Pedro yuvehe nuquehe, quita noo ñaha tyivaa cha nañi Rode chinyehe ña yóo cha sacachan cuan. ¹⁴ Soco cuhva cha nichohon soho ña ndusu ra Pedro, ña nuña ña yuvehe. Vatyi sñi xaan cuñi ña, ta chino ña cua nacatyi ña. Ta catyi ña vatyi ra Pedro nanyaá ra yuvehe. ¹⁵ Tyucuan ta quichaha catyi ñu chí ña:

—Loco yoho —catyi ñu chí ña.

Soco ña cuan catyi ña vatyi ndicha cha cahán ña. Soco ñu cuan catyi ñu tyi ñima ra Pedro cuvi ra, soco ángel cuenda ra cuvi, catyi ñu.

¹⁶ Ta ra Pedro sañihí ca ra sacachan ra yuvehe. Ta cuhva cha nuña ñu ta nanyehe ñu chí ra, iyo xaan cuñi ñu ta yuhvi ñu cuvj. ¹⁷ Soco savaha ra seña chihin ndaha ra nacutaxin ñu. Ta nacatyi ra chi ñu yoso caa tava Sutu Mañi yo chí ra vehe caa. Ta catyi ra chí ñu:

—Nacatyi ndo chi ra Jacobo ta chí inga yañi yo —catyi ra.

Ta quita ra ta cuahan ra inga ityi. ¹⁸ Cuhva cha cundichin, iyo cacuvi sindaro cha sahá cumi chichi vehe caa cuan, vatyi ña cachitó ra yoso caa quitá ra Pedro. ¹⁹ Tyucuan ta tachj ra Herodes cunanducu chi ra. Ta vatyi ña nañihj ra chí ra, tyucuan ta tachj ra na cacahñi ra chí ra sahá cumi vehe caa cuan. Yaha cuan ta quitá ra Herodes ityi Judea cuan ta cuahan ra ñuu Cesarea cuaco ra.

Nu chihj ra Herodes

²⁰ Ta ra Herodes cuxaan xaan ra chihin ñáyivi ñuu Tiro ta ñáyivi ñuu Sidón. Soco cuñi ñu cuan nduvaha coo ñu chihin ra vatyi ñuu cha nyacá ñaha ra yucuan quitá cha cachi ñu. Tyucuan ta ndu ñin ri ñu ta cuahan coyo ñu cuacutahan ñu chihin noo ra cha nañi Blando. Ican ra sahá cuenda chí ra Herodes. Ta chicán ñu cha nduvaha coo ra Herodes chihin ñu. ²¹ Tyucuan ta catyi ra Herodes vatyi cuhun ñu nu nyaá ra noo quivi. Ta chaq quivi cuan ta ndihvi noo ra sahma tyiño ra. Ta chicunya ra nu tyayu cahnu ra. Ta chahan noo ra nuu ñu. ²² Tyucuan ta quichaha canachaa ñáyivi, ta catyi ñu:

—Ra cha cahán ihya ñima noo rayñi ri cuvi ra. Nyoo cuvi ra —catyi ñu.

²³ Ta caa cuhva ri cuan noo ángel Sutu Mañi yo chaha ra noo cuehe chí ra Herodes vatyi chaha ra cha catyi ñáyivi tyi Nyoo cuvi ra. Ta quihvi tindacu chí ra, ta chihj ra.

²⁴ Soco tuhun Nyoo cuahan chitya ca. Ta chahan ñu tuhun Nyoo tandihj ri ityi. ²⁵ Quivi cha ndihj tyiño saha ra Bernabé ta ra Saulo nya Jerusalén, cuanuhu coyo ra ñuu Antioquia. Ta cuahan tucu ra Juan Marcos chihin ra.

13

Nu quichaha cachicá ra Saulo ta ra Bernabé tyiño Nyoo

¹ Vehe ñuhu Antioquia cuan iyó ra cacuvi profeta Nyoo. Ta iyó tucu ra cha sañahá tuhun Nyoo chí ñáyivi. Ta sivi ra cuan ican cuvi ihya: Ra Bernabé, ra Simón Toon, ra Lucio ra ñuu Cirene, ra Manaén cha chahnu ñin ri chihin ra Herodes cha cuvi rey ityi Galilea, ta ra Saulo. ² Ta noo quivi nyicú tandihj ra ta casacahnú ra chí Sutu Mañi yo. Ta casahá ra ayunar: ña cachachi ra ta cananducu ra chí Nyoo cuvi cuan. Tyucuan ta catyi Tatyí lí chí ra:

—Tava sñin ndo chí ra Bernabé ta ra Saulo cha cuenda tyiño cha cané chí ra —catyi Tatyí lí chí ra.

³ Tyucuan ta cha ndihj saha ra ayunar, ta catyiso ra ndaha ra siqui ra, ta cachican tahvi ra chí Nyoo cha cuenda ra. Ta cacahan ra chihin ra tahan ra ta cuahan coyo ra.

Nu cahán ra apóstol tuhun Nyoo ñuhu Chipre

⁴ Yaha cuan tachj Tatyí lí chí ra Bernabé ta chí ra Saulo noo ñuu cha nañi Seleucia. Tyucuan ta cuahan coyo ra. Ta yucuan caquihvi ra chichi noo barcu ta cuahan ra nya ñuhú Chipre cha nya mahñu tyañuhu.

⁵ Yucuan ta cachaq coyo ra noo ñuu yuhu tyañuhu cha nañi Salamina. Ta quichaha cahan ra tuhun Nyoo vehe ñuhu ra Israel. Cuahan tucu ra Juan chihin ra vatyi tyinyee ra chí ra. ⁶ Tyucuan ta cuahan coyo ra cahán ra tuhun Nyoo noo noo ñuu cha nya Chipre cuan nyacua nya chaa coyo ra ñuu cha nañi Pafos. Ta yucuan nañihj ra chí noo ra Israel cha nañi Barjesús. Ta chitó ra tuhun tasí. Cuvi ra noo ra cuendu vatyi catyi ra vatyi cuenda Nyoo cahán ra. ⁷ Ta ra tasi cuan nyaá ra chihin gobernador Sergio Paulo. Ta ra Sergio cuvi ra noo ra cachi iñi. Ta cana ra chí ra Bernabé ta chí ra Saulo, vatyi cuñi ra cuiñi ra tuhun Nyoo. ⁸ Ta ra tasi cuan nañi tucu ra Elimas, ta chasí ra nu chino iñi gobernador cuan chí ra Cristo. ⁹ Tyucuan ta ra Saulo cha nañi tucu Pablo, tyitú ra chihin Tatyí lí. Ta nyehe vavaha ra chí ra Elimas cuan. ¹⁰ Ta catyi ra chí ra:

—Yoho ra sandaví ñaha, cuendu xaun. Sehe cuihna cuví chuun. Ta cuñín sativun tandihí cha vaha. Ta tyicuan ri chasún ityi vaha Sutu Mañi yo. ¹¹ Ta vityin Sutu Mañi yo cutachi tuñi ra chuun, vatyí cunducuaun. Ta ma cuví nyehun ñuhú ñanyii suhva quiví —catyí ra Pablo chi ra Elimas.

Tyicuan ta caa cuhva ri cuan ta nducuaa ra. Ta ndoo ra nu ñaa iñi. Ta nducuy ra noo ra tiin ndaha ra vatyí ña ndichin ca nyehé ra. ¹² Cuhva cha nyehé gobernador cuan cha cuví chí ra Elimas, chingo iñi ra chi ra Jesucristo. Vatyí iyo cuñi ra nyehé ra cha sañahá Sutu Mañi yo.

Cuahan ra Pablo ta ra Bernabé nya ñuu Antioquía ityi Pisidia

¹³ Ra Pablo ta ra tahan ra quihví ra chichi noo barcu ñuu Pafos. Ta cuahan coyo ra nya ñuu Perge ityi Panfilia. Soco ra Juan Marcos sandoo ra chi ra ta cuanuhu ra nya Jerusalén. ¹⁴ Yahá cuan ta caquita ra Perge cuan, ta cuahan coyo ra ñuu Antioquía cha nyaá ityi Pisidia. Yucuan quihví coyo ra chichi vehe ñuhu ñu Israel ta cuví chi noo quiví nyitatu ñu. Ta chicunyicú ra. ¹⁵ Tyicuan ta quichahá sacuaaha ñáyiví nu libru ley cha tyaá ra Moisés. Ta sacuaaha tucu ñu libru cha tyaá ra cacuví profeta Nyoo ta cha naha. Yahá cuan ta ra cacuví nuu vehe ñuhu catyí ra chi ra hermano nyicú cuan, vatyí tatu iyó noo tuhun cuñi ra cahan ra chihin ñáyiví, cuví cahan ra. ¹⁶ Tyicuan ta ndicuitá ra Pablo ta sacuví ra noo seña chihin ndaha ra vatyí na cutaxin ñu. Ta catyí ra:

—Cuiñi ndo nyoho ra Israel, ta nyoho cha quichahá ndo chi Nyoo. ¹⁷ Nyoo cuenda yo, ñu Israel, nacachí vaha ra chi sutu chahnu yo. Ta quiví cha iyó ca ñu ityi Egipto sacuví ra noo ñuu cahnu chi ñu. Vasí ñima ñáyiví ñuu cuan cuví ñu, soco sanducuaaha ra chi ñu. Yahá cuan ta tavá ra chi ñu ityi cuan chihin tunyee iñi chí ra. ¹⁸ Ta cunyeé iñi Nyoo tandihí cuhva chiyó ñu nu chicá noo ñu ñuhú ityi chichi cha uvi xico cuiya. ¹⁹ Ta sanaa ra ucha tahan ñuu nahnu cha chiyó nicahnu Canaán, vatyí chahá ra ñuhú cuan chi sutu chahnu yo. ²⁰ Yahá cuan ta sacuví Nyoo vatyí cunyaca ñaha maa maa ri juez chí ñáyiví cuan. Tari noo cumi ciento sisava cuiya chinyaca ñaha juez chí ñu nyacua nya quiví chinyaca ñaha ra profeta Samuel chí ñu. ²¹ Tyicuan ta maa ñu chican ñu noo rey cha cunyaca ñaha chí ñu. Ta Nyoo chahá ra chí ra Saúl sehe ra Cis chí ñu, vatyí cunyaca ñaha ra chí ñu. Ta ra Saúl vachi ra tata ra Benjamín. Ta uvi xico cuiya chinyaca ñaha ra chí ñu. ²² Yahá cuan ta Nyoo tavá ra chí ra Saúl cha cuví ra rey. Ta chahá ra vatyí cuví ra David rey. Ta catyí ra: “Nyehí vatyí ra David sehe ra Isaí cuví ra noo rayii cha

tahán iñi cuhva iyó. Ta cusacuví ra tandihí cha cuñi yuhu”, catyí Nyoo tuhun ra David. ²³ Ta minoo ra vachi tata ra David cuan ican cuví ra Jesús. Ta maa Nyoo tachí chí ra vatyí sacacu ra chi yo ñu Israel, tari catyí ra chi sutu chahnu yo. ²⁴ Ta cumañi ca quichi ra Jesús, ra Juan ra sacondutya chí ñáyiví cahan ra nuu tandihí ñáyiví Israel. Ta catyí ra chí ñu vatyí cuñi chí cha ndu uvi iñi ñu cuatyí ñu, ta condutya ñu. ²⁵ Ta cha cuandihí tyiño saha ra Juan ta catyí ra: “¿Atu cuñi maa ndo vatyí yuhu cuví noo ra cahnu cha saquichí Nyoo? Soco ñima yuhu cuví ra cahnu cuan. Vatyí chata cha yahá yuhu ta vachi nonga ra. Ta ni ndichan nyaá chaha ra ta ña nañé cha ndachi. Vatyí cahnu xaan ra cuvi ra”, catyí ra Juan.

²⁶ ‘Hermano —catyí ra Pablo— nyoho ñu vachi tata ra Abraham, ta nyoho cha quichahá ndo chí Nyoo. Cha cuenda nyoho cuví tuhun ihya tyi sañahá Nyoo chí yo yoso caa cacu añima yo. ²⁷ Ñáyiví ñuu Jerusalén ta ra cuví nuu chí ñu cuan, ña chitó ñu vatyí ra Jesús cuví ra cha sacacú chí yo. Ta ni ña cutuñi iñi ñu tuhun cha catyaa ra profeta Nyoo ta cha naha, vasí sacuaaha vavaha ñu tuhun cuan tandihí quiví cha nyitatu ñu, soco ña cutuñi iñi ñu. Ta quiví chahñi ñu chí ra Jesús chingo cava tari cuhva catyí ra profeta Nyoo cuan. ²⁸ Vatyí vasí ñahri cuatyí ra nañihí ñu, soco chican ñu chí ra Pilato na tyihí ra tyiño cucahñi chí ra. ²⁹ Ta cha yahá sacuví ñu chí ra tari cuhva catyí maa tuhun ra nu libru Nyoo ta chihí ra. Tyicuan ta sanoq ñu chí ra nu cruzi. Ta tyihí ñu chí ra chichi ñuhú. ³⁰ Soco Nyoo sanandotó ra chí ra. ³¹ Ta chichi cha caha quiví tuví ra nuu ra cha quichi coyo chihin ra quiví quita ra ityi Galílea, ta quichi ra Jerusalén. Ta ican ra cuan cacahan tuhun ra chihin ñáyiví vityin. ³² Ta yucuan chaha nyuhu cahan ndi tuhun vaha cha catyí Nyoo chí sutu chahnu yo vatyí cuhva ra chí yo. ³³ Vatyí cha cuenda cha vaha chí maa yo cha cuví yo ñáyiví vachi tata ñu cuan, sacuví maa Nyoo cha catyí ra. Vatyí sanandotó ra chí ra Jesús tari cuhva nyaá nu cu uvi salmo nu catyí Nyoo tyehe caa: “Sehi cuví chuun, ta yuhu chahí ñáyiví coun vityin”, catyí Nyoo. ³⁴ Nyoo tyaá ra cuhva vatyí sanandoto ra chí ra, tachuha cha ma tyahyu coño ñuhu ra. Vatyí catyí nu tutu Nyoo: “Cuhve chí nyoho cha vaha cha catyí chí ra David.” ³⁵ Yucuan chaha catyí tucu nu inga salmo tyehe caa. “Ma cuhvun cha tyahyu coño ñuhu Sehe iun”, catyí chí. ³⁶ Ra David sacuví ra tyiño nuu ñu cha chiyó quiví chiyó ra, yoso cuhva cha catyí Nyoo chí ra tyí sacuví ra. Yahá cuan ta chihí ra ta chicuchí ñu chí ra tari chicuchí ñu chí sutu ra. Ta tyahyu coño ñuhu ra. ³⁷ Soco ra cha sanandotó Nyoo chí, ña tyahyu coño ñuhu ra. ³⁸ Yañi, cuñi chí coto ndo vatyí

cha cuenda cha chihj ra Jesús tyiño nuu yo, Nyoo sahá ra ticahnu iñi cuatyí yo. ³⁹ Ta cha cuenda ra Jesús sahá Nyoo ticahnu iñi chi tandihí ñu cha chinó iñi chí ra, tyí ley ra Moisés ña cuví sacuvaha chí yo nuu Nyoo. ⁴⁰ Saha ndo cuenda coto ndo siqui ndo cha catyaa ra profeta Nyoo nu catyí ra tyehe caa:

⁴¹ Nyehe nyoho, ra chacú nyaa, tahán chi cha iyo cuñi ndo ta cunaa ndo. Vatyí yuhu cuví Nyoo, ta sacuví minoo cha cahnu quivi cha iyó ndo vityin.

Soco ma chino iñi ndo tandihí cha sacuví yuhu vasi nacatyí ñáyivi chí ndo, catyí Nyoo.

⁴² Ndihi cahan ra Pablo ta cuaquita ra chata vehe ñuhu cuan chihin ra tahan ra. Tyicuan ta ñu cha ñima ñu Israel cuví quichaha catyí ñu chí ra, vatyí na cahan tucu ra tuhun ihya chihin ñu inga vitya quivi cha nyitatu ñu. ⁴³ Cuhva cha ndihí ndu iin ri ñu, cuaha xaan ñu Israel ta ñu cha yihí cuenda ñu Israel, cachinyicon ñu chí ra Pablo ta chí ra Bernabé. Ta chaha ra tuhun chí ñu vatyí na cahun ca ñu ityí nuu ca chihin Nyoo. Ta naquehen vaha ñu tumañi iñi cha chahá Nyoo chí ñu. ⁴⁴ Cha inga vitya quivi nyitatu ñu, ndu iin ri ñu. Ta cha yatyin cha tandihí ñáyivi ñuu cuan ndu iin ri ñu vatyí cuiñi ñu tuhun Nyoo. ⁴⁵ Soco cuhva cha canyehe ra Israel, cuxaan ra vatyí nyehe ra vatyí cuaha ñáyivi nyicón chí ra cuan. Ta quichaha cacuví yuhu ra chihin ra Pablo, ta cacahan ra chí ra. ⁴⁶ Soco ña yuhví ra Pablo ta ra Bernabé. Ta quichaha cacatyí ra chí ra:

—Cuñi chí cha cahan xihna ndi tuhun Nyoo chihin nyoho cha cuví ndo ñu Israel. Soco ña cuñi ndo naquehen ndo. Ta cuñi maa ndo vatyí ña naña ndo cha ñihí ndo ñáyivi chaa cha ma naa ca maa. Yucuan chaha cahun ndi cucahan ndi chihin ñu cha ñima ñu Israel cuví. ⁴⁷ Vatyí tyicuan caa tachí Sutu Mañi yo chí ndi ta catyí ra tyehe caa:

Tyaji chuun tari ñuhu chí ñáyivi nicahnu ñuhu ñáyivi.

Tacuhva vatyí cusañahun ityí chí ñu yoso caa cacu añima ñu, catyí Nyoo.

⁴⁸ Cuhva cha cachihí ra cha ñima ra Israel cuví, ndusiñi cuñi ra. Ta quichaha catyí ra vatyí tuhun Nyoo vaha xaan. Ta nachingó iñi tandihí ñu cha nacachí maa Nyoo chí, vatyí coo ñu ñáyivi chaa cha ma naa ca maa. ⁴⁹ Ta tyicuan caa chitya tuhun Nyoo tandihí ityí ñuu cuan. ⁵⁰ Soco ra Israel cacahan ra chihin suhva ñusiñi tyayí cha nyicón ley ra Moisés. Catyí ra chí ñu vatyí ña vaha tuhun cahan ra Pablo. Ta cahan tucu ra chihin ra cuví nuu chí ñuu cuan. Ta yucuan cuví nu quichaha chica nyicon ñu chí ra Pablo ta chí ra Bernabé, nyacua nya cha tava ñehe

ñu chí ra ñuu cuan. ⁵¹ Tyicuan ta canaquisi ra ñiyaca chaha ra tari noo seña vatyí ndoo cuatyí ñáyivi cuan siqui maa ñu. Ta cuahan coyo ra ñuu Iconio. ⁵² Soco ñu yihí cuenda Nyoo ñuu Antioquía cuan sñi xaan cacuví chí ñu. Ta tyitu ñu chihin Tatyí li.

14

Nu ñohó ra Pablo ta ra Bernabé ñuu Iconio

¹ Ñohó ra Pablo ta ra Bernabé ñuu Iconio. Ta caquihví ra chichi vehe ñuhu ñu Israel. Ta vaha xaan cacahan ra tuhun Nyoo chihin ñáyivi. Ta cuaha xaan ñu nachino iñi ñu chí ra Cristo, ñu Israel ta ñu cha ñima ñu Israel cuví ñandihí. ² Soco ra Israel cha ña chinó iñi chí ra Cristo catyiyuhú ra chí ñu cha ñima ñu Israel cuví vatyí caca ña vaha iñi ñu nyehe ñu chí ra yihí cuenda ra Cristo. ³ Yucuan chaha ra Pablo ta ra Bernabé candoo ra yucuan cuaha quivi. Ta chihin cha ñi iñi ra cacahan ra tuhun ra Cristo. Ta chinó xaan iñi ra chí Sutu Mañi yo. Ta Sutu Mañi yo tyinyeé ra chí ra cha cacahan ra tuhun ra yoso caa cuñi ra chí yo. Ta chaha Sutu Mañi yo cha casacuví ra seña ta milagru tacuhva coto ñáyivi tyi ndicha cha cahan ra. ⁴ Soco ñáyivi ñuu, ña iin ri cuví ñu. Yihí ñu cuahan ñu tumañi iñi chí ra Israel. Ta inga tucu ñu cuahan ñu tumañi iñi chí ra apóstol. ⁵ Tyicuan ta ra Israel ta ra cha ñima ra Israel cuví, catyihí tahan ra tuhun chihin ra cuví tyiño, vatyí cahan ña vaha ra siqui ra, ta catuchí ra yuu chí ra. ⁶ Soco ra Pablo ta ra Bernabé ñihí ra tuhun vatyí cusacuví ra tyicuan caa, ta cuahan coyo ra nya ñuu Lистра, ta nya ñuu Derbe ityí Licaonia. Ta cachica noo ra ityí cuan. ⁷ Ta cacahan tucu ra tuhun Nyoo yoso caa sacacu ra añima yo.

Nu cañi ñáyivi yuu chí ra Pablo nya ñuu Lистра

⁸ Nya Lистра iyó noo rayíi cha pehe chaha. Ta nya ndaha cacú ra ta ña cuví caca ra. Vatyí pehe ninduvi chaha ra. ⁹ Ta suri maa ra pehe chaha cuan tyasohó vavaha ra nu cahan ra Pablo. Ta ra Pablo, tuví iñi ra vatyí chinó iñi ra cuan vatyí cuví nduvaha ra. ¹⁰ Tyicuan ta ra Pablo cahan ra chihin cha chaa ndusu ra, ta catyí ra:

—Ñicuinyaa ndoo —catyí ra Pablo chí ra.

Ta ra cuan, noo ri caña ndava ra, ta nicuinyaa ra. Ta quichaha chica ra. ¹¹ Cha nyehé ñáyivi cha sacuví ra Pablo, quichaha cana chaa ñu chihin sahan Licaonia, ta catyí ñu:

—Nyoo cha tari caá rayíi chaa coyo nu nyicú yo —catyí ñu.

¹² Ta catyí ñu tyí ra Bernabé cuví ra noo nyoo cha nañi Júpiter, ta ra Pablo cuví nyoo cha nañi Mercurio, vatyí ican ra cuví ra

cahán. ¹³ Ta iyó noo tata sutu cuenda Júpter cuan, saha cumí ra vehe ñuhu cha nyaá yuhu ñuu ri cuan. Ta quichí nyaca ra toro ta ita vatyi maa ra ta ñáyivi cuñi ñu sacahnu ñu chi ra Pablo ta chi ra Bernabé. Ta cuacahñi ñu toro tyi cuacuhva cuenda ñu chi ra, vatyi cuñi ñu tyi nyoo cacuví ra. ¹⁴ Soco cuhva cha catuví ñi ra apóstol, ra Bernabé ta ra Pablo, cha chicá xiñi ñu, quichahá chahnyá ra sahna ra. Ta casacuví ra tyicuan caa tari noo seña vatyi ña ndoó ra vaha. Ta quihví coyo ra mahñu nu tuvi ñáyivi, ta cacana chaa ra, ¹⁵ ta catyí ra:

—Nyoho tata, ¿ñáá tuhun cha nyacuví ndo tyehe caa? Nyuhun rayii ri cuví ndi tari maa ndo. Ta vachi ndi vatyi catyí ndi chi ndo vatyi na saña ndo cha sacuví ndo tyehe caa. Vatyi ña chiñuhu maa cha tyehe caa. Ta na cunyicon ndo chi Nyoo nyitó. Vatyi ican ra savahá andívi ta ñuhu ñáyivi. Ta savahá ra tyañuhu ta tandihí cha iyó chichi tyañuhu cuan. ¹⁶ Ta tyiembu chahnu ta nya vityin, Nyoo saña ndaha ra chi ñáyivi na sacuví maa ñu yoso cuhva cuñi ñu, ¹⁷ vasi tyicuan ri sañahá ra chi ñu yóo ra cuví ra, chihin cha vaha cha sacuví ra. Maa ra sacoon ra savi nu canyicú yo. Chahá ra cha vaha coo tyiño saha yo quívi tahan chi. Ta chahá ra cachi yo. Ta chahá ra cha cusii cuñi añima yo —catyí ra Pablo chi ñu.

¹⁸ Soco vasi catyí ra tyicuan caa, yii xaan ta chasi ra cha cahñi ñu toro cuan, vatyi cuñi ñu sacahnu ñu chi ra chihin cuan.

¹⁹ Tyicuan ta chaá coyo suhva ra Israel, ra ña chinó ñi chi ra Cristo, ra ñuu Antioquía, ta ra ñuu Iconio. Ta tyiyuhú ra chi ñáyivi, ta catyí ra vatyi na tuchi ñu yuu chi ra Pablo. Ta tyicuan caa sacuví ñu. Ta cuñi maa ñu vatyi cha chihí ra. Ta xita quíñoño ñu chi ra ityi chata ñuu. ²⁰ Soco candu ñn ri ra cayihí cuenda Nyoo nu catuví ra Pablo. Ta ndicuita ri ra. Ta quihví ra inga chaha chichi ñuu. Ta cha inga quívi cuahan ra ñuu cha nañi Derbe ta cuahan ra Bernabé chihin ra.

²¹ Ta chahan tucu ra tuhun Nyoo nya ñuu Derbe yoso caa sacacu Nyoo añima yo. Ta cuaha ñáyivi nacuhvá ñu chi ñu chi Nyoo. Yahá cuan ta cuanuhu coyo ra ityi quichi ra. Ta yahá ra ñuu Litra ta ñuu Iconio inga chaha, ta nachaa ra nya Antioquía. ²² Ta tandihí ñuu cuan sanduní ca ra ñi ñu yihí cuenda Nyoo. Ta catyí ra chi ñu na cuhan ñu ityi nuu ca chihin cha chino ñi ñu Nyoo. Ta catyí tucu ra chi ñu vatyi tatu cuñi yo cha cunyacá ñaha Nyoo chi yo, cuñi chi cha nyehe yo tindoho. ²³ Ta canatysiso ra chi ra ca quíhi ndaha chi ñu yihí cuenda Nyoo noo noo vehe ñuhu. Ta cananducu ra Nyoo chihin cha ña chachí ra xita ta cachican tahvi ra chi Nyoo cha cuenda ra. Yahá cuan ta catyí ra chi ra:

—Chino ñi ndo chi Sutu Mañi yo. Maa ra na cocumi ra chi ndo —catyí ra chi ra.

Nu cuanuhu coyo ra Pablo ta ra Bernabé Antioquía ityi Siria

²⁴ Yahá cuan ta yahá coyo ra Pablo ta ra Bernabé ityi Pisidia, ta chaá coyo ra ityi Panfilia. ²⁵ Cacahan ra tuhun Nyoo ñuu Perge. Yahá cuan ta chahan ra ñuu Atalia. ²⁶ Yucuan quihví coyo ra chichi noo barcu ta cuanuhu coyo ra Antioquía. Yucuan cuví ñuu nu natyaa ñu chi ra ndaha Nyoo tyi cusacuví ra tyiño nuu ra, ta vityin cha nachaa coyo ra. ²⁷ Cuhva cha nachaa coyo ra Antioquía sandu ñn ri ra chi ñu yihí cuenda Nyoo. Ta nacatyi ra chi ñu tandihí cha sacuví Nyoo chihin ra. Ta yoso caa nuña Sutu Mañi yo ityi vatyi chinó tucu ñi ñu cha ñima ñu Israel cuví. ²⁸ Ta naha xaan ndoó ra Pablo ta ra Bernabé chihin ñu yihí cuenda Nyoo ñuu cuan.

15

Nu casandaa ra apóstol tyiño nya Jerusalén

¹ Nyaá ca ra Pablo ta ra Bernabé Antioquía, ta chaá coyo ra quitá coyo ityi Judea. Ta quichahá sañahá ra chi ra yihí cuenda Nyoo. Ta catyí ra vatyi cuñi chi sacuví ra costumbre circuncisión tari cuhva catyí ra Moisés, tyicuan ta cacu ra. ²⁻³ Ta ñihi xaan cahan ra Pablo ta ra Bernabé chihin ra cuan cha cuenda cuan. Tyicuan ta catyiso ñu hermano Antioquía cuan chi ra Pablo ta ra Bernabé chihin suhva ca ra vatyi cuhun coyo ra Jerusalén. Vatyi cusandaa ra tyiño ihya chihin ra apóstol ta ra yihí ndaha ñu nyicu vehe ñuhu ñuu Jerusalén cuan. Tyicuan ta cuahan coyo ra. Ta ityi cuahan ra, yahá ra ityi Fenicia ta Samaria. Ta canacatyí ra chi ñu yihí cuenda Nyoo yoso caa saña ñu cha ñima ñu Israel cuví tuhun chahnu cha chinó ñi ñu. Vatyi nacuhvá cuenda ñu chi ñu chi Nyoo. Ta tandihí ñu hermano cusii xaan cuñi ñu cha chitó ñu tuhun cuan.

⁴ Quívi chaá coyo ra Pablo ta ra Bernabé Jerusalén, cuahan ra nu ndu ñn ri ñu yihí cuenda Nyoo. Ta tandihí ñu chihin ra apóstol, ta ra yihí ndaha chi ñu, chahá ñu lugar chi ra. Ta canacatyí ra tandihí cha sacuví Nyoo chihin ra. ⁵ Soco suhva ra fariseo cha cachinó ñi chi ra Cristo, nicuinanyaá ra ta catyí ra:

—Tandihí ra cha ñima ra Israel cuví ta chinó ñi ra chi ra Jesús, ñiñi cuñi chi cha sacuví ra costumbre circuncisión. Ta cuñi tucu chi cha sacuví ra cuhva catyí ley cha tyaá ra Moisés —catyí ra.

⁶ Tyicuan ta candu ñn ri apóstol ta ra yihí ndaha chi ñu vehe ñuhu vatyi candatuhun

vaha ra tuhun cuan. ⁷ Cha yaha cha cuviyuhu vavaha ra ta ndicuita ra Pedro, ta catyí ra:

—Yañi, chitó ndo vatyi chichi cha tandihi yo cachí Nyoo chi yuhu ra ndahvi quívi cuan, vatyi cahin tuhun yoso caa cacu añima yo chihin ñu cha ñima ñu Israel cuví, vatyi nachino iñi ñu chi Sutu Mañi yo. ⁸ Ta Nyoo, ra chitó añima tandihi ñáyivi, sañaha ra chi yo vatyi cuñí ra chi ñu cuan. Ican tuhun chaha ra Tatyí Ii ra chi ñu, tari chaha ra chi yo. ⁹ Nyoo ña sahá ra tyi vaha ca yoó cha nuu ñu cuan. Soco sanduvi tucu ra añima maa ñu cha cuenda cha chinó iñi ñu chi ra. ¹⁰ Vityin ñacaca xiñi yo cuhva cuñí Nyoo. Vatyi ña vaha cha tyisó yo ley ra Moisés siqui ñu. Vatyi niri maa sutu chahnu yo ta niri maa yo ta ña cuví naquehen vaha yo ley cuan. ¹¹ Ñima tyicuan caa cacú yo. Yoó chitó yo vatyi cacú yo chihin tumañi iñi cha sacuví Sutu Mañi yo Jesús chihin yo. Ta tyicuan caa tucu ñu cuan —catyí ra Pedro chi ra.

¹² Tyicuan ta taxi ri cacuví tandihi ra. Ta tyasohó ra tuhun cahan ra Bernabé ta ra Pablo. Vatyi canacatyí ra seña ta milagru cha sacuví Nyoo nu cacahan ra tuhun Nyoo nu nyicú ñu cha ñima ñu Israel cuví. ¹³ Cuhva cha ndihí cahan ra, quichaha cahan ra Jacobo, ta catyí ra:

—Nyoho yañi, cuiñi ndo tuhun cahin. ¹⁴ Cha nacatyí ra Simón Pedro chi yo yoso caa quichaha chaha Nyoo tumañi iñi chi ñu cha ñima ñu Israel cuví. Vatyi cachí tucu ra chí suhva ñu vatyi cuví ñu noo ñáyivi cuenda ra. ¹⁵ Ta ñn ri nanduvi tuhun ihya chihin tuhun cha cahan ra profeta cuenda Nyoo ta cha naha, tari cuhva nyaa nu tutu Nyoo tyehé caa:

¹⁶ Yaha tandihi tuhun ihya cuquichi tiqui nu nyaá ndo.

Quivi chiyo ra David, vaha sacahnu ñáyivi chii.

Soco yaha cuan sandihi ñu tuhun cha sacahnu ñu chii.

Soco cuquichi tiqui ta tari cha cunacoñehi vehe ñuhu ra David inga chaha.

Vatyi cusacahnu tucu ñáyivi chii.

¹⁷ Tacuhva cuví nanducu tandihi ca ñáyivi chii, tandihi ñu cha ñima ñu Israel cuví cha chicán tahvi chihin sivi.

¹⁸ Tyicuan caa catyí Sutu Mañi yo ta sañaha ra tuhun ihya chí ñáyivi chiyo ta cha naha ta chí ñáyivi cha iyó vityin.

¹⁹ Yucuan chaha catyí yuhu vatyi ña vaha sayanga yo chí ñáyivi cha ñima ñu Israel cuví cha sandoo ñu tuhun cha chiyo ñu ta quihvi ñu cuenda ra Cristo. Ña vaha catyí yo tyi cuñí chi cha quichaha ñu ley chahnu.

²⁰ Vaha ri maa chihin cha sacuhun yo tutu chí ñu. Ta catyí yo chí ñu vatyi ma cachí ñu

coño cha chaha cuenda ñáyivi chí xitohyo. Ta ni noo ñu ta ma coo ri maa ñusihí o rayii chí ñu, tatu ñima ñasihí o yii ñu cuví. Ta ma cachí ñu coño quiti chihí cha cava ñu sucun ta ña chati niñi. Ta ma cachí ñu niñi. ²¹ Vatyi nyata tyambu ta chiyo ra cha sañaha ley ra Moisés vehe ñuhu ñu Israel ta sañaha ra tuhun cuan tahan tahan ñuu. Ta tahan uña quivi quivi nyitatu ñu, sacuaha ra tuhun cha tyaá ra Moisés —catyí ra Jacobo chí ra.

²² Tyicuan ta ra apóstol ta ra cayihí ndaha chí ñu nyicú vehe ñuhu chihin tandihi ñu yihí cuenda Nyoo nacachí ñu chí suhva ra. Ta yaha cuan ta tachí ñu chí ra vatyi cuhan ra Antioquía chihin ra Pablo ta ra Bernabé. Ta ra cha canatyisó ñu ican cuví ra Judas cha nañi Barsabás, ta ra Silas. Ican ra cacuví ra ra cananyisó tyiño vehe ñuhu ñuu Jerusalén cuan. ²³ Ta chihin ra tachí ñu noo carta. Ta catyí carta cuan tyehé caa:

“Nyuhu ra apóstol, ta ra yihí ndaha chí ñu nyicú vehe ñuhu ta yañi ndo cuenda Nyoo, tandihi ri ndi chahá ndi nocumi chí nyoho cha ñima ra Israel cuví ndo vatyi yañi ndi cuví chí ndo vasi ñima ñu Israel cuví ndo. Tandihí ri ndo cha iyó ndo Antioquía ta nyoho ñu Siria, ta ñu Cílicia ñandihí, sacuhún ndi carta ihya chí tandihí ri ndo. ²⁴ Chitó ndi vatyi quita suhva ra ityi nu nyicú ndi ihya. Ta cuahan ra nu nyicu ndo. Soco ña catyí nyuhu chí ra tyi cuhan ra cusayanga ra chí ndo chihin tuhun cahan ra. Satondo ra cuan xiñi ndo vatyi catyí ra chí ndo tyi cuñí chí cha sacuví ndo costumbre circuncisión ta naquehen vaha ndo ley ra Moisés. Soco ñima nyuhu catyí tyi cuhan ra cucatyí ra chí ndo tyicuan caa. ²⁵ Yucuan chaha ndu ñn ri ndi ta nacachí tahan tuhun cahan ndi ta vaha cuñi ndi cha tachí ndi chí ra hermano ihya chihin ra Pablo ta ra Bernabé nu nyicu ndo. ²⁶ Nduvi tahan ra ihya nyehé xaan ra tindoho cha cuenda Sutu Mañi yo. Ta vasi cuñi ñáyivi cahñi ñu chí ra soco ña sandihi ra tuhun cha sacoto ra tuhun Sutu Mañi yo Jesucristo. ²⁷ Ta yucuan chaha tachí ndi chí ra Judas ta chí ra Silas. Ta maa ra cucahan ra chihin yuhu ra chihin ndo, vatyi nacatyí ra tandihí cha tyaá ndi nu tutu ihya. ²⁸ Vatyi niri Tatyí Ii ta niri nyuhu ta ña cuñi ndi tyiso ca ndi carga siqui ndo, soco ihya ri cha niñi ca tahán chí cha naquehen vaha ndo. ²⁹ Ma cachí ndo coño cha chaha cuenda ñu chí xitohyo. Ta suri ma cachí ndo niñi, ni coño quiti cha chihí ta ña chati niñi ti. Ta ma coo ñusihí o rayii chí ndo tatu ñima ñasihí ndo o yii ndo cuví. Tatu ma sacuví ndo tyicuan caa, vaha xaan cuacoo ndo. Ta Nyoo na cocumi ra chí ndo”, catyí ra nu carta cuan.

³⁰ Ta cuahan coyo ra cha catachí ra chí cuan. Ta chaá coyo ra Antioquía. Ta sandu ñn ri ra chí tandihí ñu, ta nacuhva cuenda ra

carta cuan. ³¹ Cuhva cha sacuahā ñu carta cuan ndusiī xaan cuñi ñu vatyí vaha xaan cahán chi. ³² Ta ra Judas ta ra Silas cuví tucu ra cuan profeta cuenda Nyoo. Ta sanduniī ra iñi ra hermano chihin tuhun cahān ra. ³³ Ta cha yahā chinyicu ra cuan suhva quivi ta cuanuhu coyo ra nya nu nyicú ñu catachi chí ra. Ta tandihí ñu yihí cuenda ra Cristo catyí ñu vatyí na cahun vaha ra. ³⁴ Soco ra Silas natyaa ra cuhva vatyí cundoo ra. ³⁵ Ta ra Pablo ta ra Bernabé candoo tucu ra Antioquía yucuan. Ta maa ra chihin cuaha ca ra casañahā ca ra chí ñáyivi. Ta cacahān ca ra tuhun Sutu Mañi yo chihin ñu.

Nu cu uvi chaha cuahan ra Pablo tuhun Nyoo ta nu cusin ra chihin ra Bernabé

³⁶ Ta cha yahā suhva quivi ta catyí ra Pablo chí ra Bernabé:

—Coho inga chaha cunyehe yo nu nyicú ñu yihí cuenda ra Cristo tandihí ri ñuu nu cahān yo tuhun Sutu Mañi yo. Vatyí nyehe yo yoso caa canyicu ñu —catyí ra chí ra.

³⁷ Ta ra Bernabé cuñi ra cha cahun tucu ra Juan Marcos chihin ra. ³⁸ Soco ra Pablo ña tahán iñi ra cha cahun ra Juan chihin ra, vatyí sandoo ra chí ra nya Panfilia quivi cuan. Ta ña cahān ca ra chisaha tyiño ra chihin ra. ³⁹ Ta ña chitahān iñi ni noo ra, ta cacusin ra. Ra Bernabé cuahan ra chihin ra Juan Marcos. Ta quihvi ra chichi noo barcu ta cuahan coyo ra Chipre. ⁴⁰ Ta ra Pablo cachí ra chí ra Silas. Ta cha yahā chican tahvi ra hermano chí Nyoo na tyinyee ra chí ra, ta cuahan coyo ra. ⁴¹ Ta yahā ra ityí Siria, ta ityí Cilicia, ta sanduniī ca ra iñi ñu yihí cuenda Nyoo noo noo ñuu.

16

Nu cuahan ra Timoteo chihin ra Pablo ta ra Silas

¹ Ra Pablo ta ra Silas chaā coyo ra ñuu Derbe, ta ñuu Lистра. Ta yucuan nañihí ra chí noo ra yihí cuenda Cristo. Nañi ra Timoteo. Ta shi ra cuví ña noo ñaha Israel. Ta suri yihí tucu ña cuenda ra Cristo. Soco sutu ra ra Grecia cuví ra. ² Vaha xaan chicá ra Timoteo chihin Nyoo catyí ñu yihí cuenda Cristo ñuu Lистра ta ñuu Iconio. ³ Ta ra Pablo cuñi ra cha cahun ra Timoteo chihin ra. Ta saha ra circuncidar chí ra Timoteo. Vatyí coto ma cuiñi ñu Israel cha iyó ityí cuan tuhun ra Cristo cha cahān ra. Vatyí tandihí ñu chitó ñu vatyí sutu ra cuví ra ra ñuu Grecia. ⁴ Tyicuan ta cuahan coyo ra noo noo ñuu. Ta nacatyí ra chí ñu yihí cuenda ra Cristo tuhun cha chahā ra apóstol ta ra yihí ndaha chí ñu nyicu vehe ñuhu Jerusalén chí ra. ⁵ Ta tyicuan caa ta nduniī ca iñi ñu yihí cuenda ra Cristo ta chino ca iñi ñu chí Nyoo. Ta tahan quivi ta cuahan nducuaaha ca ñu.

Nu nyehé ra Pablo noo visión chi noo ra Macedonia

⁶ Ña chahā Tatyí li cha cahan ra tuhun Nyoo ityí Asia. Yucuan chaha yahā sava ra ityí Frigia nu iyó xahñi ñuhu chihin ityí Galacia. ⁷ Ta chaā coyo tucu ra ityí Misia. Ta cuñi tucu ra cahun coyo ra ityí Bitinia, soco Tatyí li ra Jesucristo ña chahā cahun coyo ra. ⁸ Tyicuan ta nya sava ri yahā ra ñuu Misia ta canoō coyo ra ñuu Troas cha nyaá yuhu tyañuhu. ⁹ Cañohó ra ñuu Troas cuan, ta noo cha cuaa nyehe ra Pablo noo visión. Nanyeá ra ta chacú ndahvi ra nuu ra, ta catyí ra chí ra: “Ñaha, vatyí tyinyeun chí ndi”, catyí ra. ¹⁰ Ta cha nyehe ra Pablo visión cuan, yuhu ra Lucas chihin ra Pablo ta inga ra sanduvahā ndi chí ndi ta cuahan ndi nya Macedonia cuan. Vatyí chitó vaha ndi vatyí Nyoo canā chí ndi, vatyí cahan ndi tuhun ra yoso caa sacacú ra añima yo chihin ñáyivi ityí cuan.

Nu ñohó ra Pablo ta ra Silas ñuu Filipos

¹¹ Quihvi ndi noo barcu ñuu Troas. Ta cahān ndoo ityí ri ndi nya Samotracia noo ñuhú luhlu iyó mahñu tyañuhu. Ta cha inga quivi chaā ndi ñuu Neápolis. ¹² Ta yucuan quita ri ndi ta cuahan ndi ñuu Filipos cha cuví noo ñuu cuenda ñu Roma. Ta cuví chí noo ñuu cahnú ca cha nuu tandihí ñuu ityí Macedonia cuan. Ta yucuan chinyicu ndi suhva quivi. ¹³ Noo quivi cha nyítatu ñáyivi ta quita ndi ityí chata ñuu, yatyin noo yutya nu tuhvá ñu chican tahvi ñu chí Nyoo. Chicunyaā ndi yucuan ta cahān ndi tuhun Nyoo chihin ñusihi cha candu in ri yucuan. ¹⁴ Noo ñaha nañi ña Lidia. Ta ñuu ña cuví Tiatira. Ta tuhvá ña xico ña sahma finu, tyacu nyaa. Yucuan cuví tyiño sahá ña. Ta sacahnú ña chí Nyoo tari ñu Israel. Ta chihí ña cha cahān ra Pablo. Ta Nyoo nuña ra añima ña na quichaha ña cha cahan ra. ¹⁵ Ta condutyā ña chihin ñáyivi chí ña. Ta yahā cuan ta chacú ndahvi ña nuu ndi, ta catyí ña: —Tatu nyehé ndo vatyí ndicha cha chinó iñi chí Sutu Mañi yo, ñaha ndo, coo ndo vehi —catyí ña chí ndi.

Ta saniñi ña chí ndi cha ndoo ndi vehe ña.

¹⁶ Ta cuví noo chaha cha cuahan ndi nu chicán tahvi ndi. Ta cha niri ca cha cuahan ndi, tahan ndi chí noo ñaha tyivaa. Yihí noo tatyí ña vaha chí ña. Yucuan chaha cuví nacoto ña ñaá ndihi cha cucuvi ityí nuu. Ta cuví ña noo ñaha iyó chitoho. Ta cuaha xaan xuhun sahá ganaa ña cuenda chitoho ña, vatyí cuví nacotó ña. ¹⁷ Ta ñaha tyivaa cuan quichaha nyicon ña chí ndi, ta chí ra Pablo ñandihí. Ta canā chaa ña ta catyí ña:

—Rayiñi ihya ra casacuví tyiño nuu Nyoo cahnú cuví ra. Ta cahān ra tuhun yoso caa cuví cacu añima yo —catyí ña.

¹⁸ Cuaha quiví sacuví ñaha tyivaa cuan tyicuan caa. Tyicuan ta ra Pablo ña cunyeec ca iñi ra, ta nanyocavá ra ta catyí ra chi tatyí ña vaha cha yihí chi ña:

—Chihin sivi ra Jesucristo catyí chuun vatyí quítun chi ñaha tyivaa ihya —catyí ra.

Ta tatyí ña vaha cuan quitaꝓ chi chi ña caa cuhva ri cuan.

¹⁹ Soco cuhva cha canyehé chitoho ña vatyí ma cuví ca saha ganaa ra xuhun chihin ña, catiꝓn ra chi ra Pablo ta ra Silas chinyacá ra chi ra nya vehe tyiño. ²⁰ Ta cachican ra cuatyí chaha ra nuu ra cacuví tyiño. Ta catyí ra:

—Ra Israel ihya sanaquiquí ra chi ñáyivi ñuu yo. ²¹ Ta sañahá ra costumbre cha ña cuví naquehen yo, niri ña cuví sacuví yo vatyí ñu cuenda ñuu Roma cuví yo —catyí ra.

²² Tyicuan ta nduxaan ñáyivi chi ra Pablo ta ra Silas. Ta ra cacuví tyiño cuan chahnya ra sahna ra Pablo ta ra Silas ta tachí ra tyiño nacañi ra chi ra chihin yutun. ²³ Cha yaha cha cañi vavaha ra chi ra, ta catyihí ra chi ra vehe caa. Ta tachí ra chi ra sahá cumi chi ra na saha vaha ra cuenda chi ra. ²⁴ Cuhva cha quehen ra sahá cumi cuan tuhun, tyihí ra chi ra nya chichi cuii vehe caa. Ta tyihí vaha ra chaha ra ticu vitu. ²⁵ Soco ñáá cuhva hora ñuu cuan cachitá vavaha ra Pablo ta ra Silas. Ta cachicán tahvi ra chi Nyoo. Ta ra cañohó vehe caa cuan catyasohó ra. ²⁶ Ta saná iñi ra ta quichí noo cha taan ñihi vavaha. Ta naquisí chi cimientu vehe caa cuan, ta caa cuhva ri cuan nuña tandihí yuvehe, ta ndachi cadena tandihí ra ñohó vehe caa cuan. ²⁷ Ta cha ndoyo ra sahá cumi cuan, nyehe ra vatyí tacohó yuvehe. Tyicuan ta tavá ra mityí ra vatyí cahñi maa ra chi ra. Vatyí chicá xiñi ra vatyí ndihí ra ñohó vehe caa cuan cachino. ²⁸ Soco ra Pablo caná chaa ra chi ra, ta catyí ra:

—Ma cahñun chuun, vatyí tandihí ndi nyicú ndi ihya —catyí ra chi ra.

²⁹ Tyicuan ta ra sahá cumi cuan chican ra noo ñuhu. Ta quicono ra quihvi ra nu cañohó ra. Ta ñihí ra chihin cha yuhví ra. Ta chicuñi chiti ra nuu ra Pablo ta ra Silas. ³⁰ Numi ri tavá ra chi ra nu ñoho ra yucuan. Ta ndacá tuhun ra chi ra ta catyí ra:

—¿Nyoho Tata, yoso caa sacuví ta cacu añime? —catyí ra chi ra.

³¹ Ta ra cuan canacahan ra ta cacatyí ra: —Chino iñi chi Sutu Mañi yo Jesucristo ta cacun, maun ta ñáyivi chuun ñandihí —catyí ra.

³² Ta cacahan ra tuhun Sutu Mañi yo chihin ra ta chihin tandihí ñu nyicu vehe ra.

³³ Ta suri maa cha cuaa cuan ra sahá cumi vehe caa cuan nacatyá ra nu cahvi chi nduvi tahan ra nu cañi ra chi ra. Yaha cuan ta maa

ra ta tandihí ñáyivi chi ra condutyá ñu suri cha cuaa cuan. ³⁴ Tyicuan ta chinyacá ra chi ra nya vehe ra. Ta chahá ra cha cachi ra. Ta maa ra chihin ñáyivi chi ra sii xaan cuñí ñu vatyí chinó iñi ñu chi Nyoo. [Tyicuan ta cuanuhu coyo ra nya vehe caa cuan coto cuxaan ra cuví tyiño chihin ra saha cumi chi ra.]

³⁵ Tuví inga quiví ta catachí ra cacuví tyiño chi policia nu nyaá ra sahá cumi cuan, ta catyí ra vatyí na saña ra chi ra Pablo. ³⁶ Tyicuan ta ra sahá cumi vehe caa cuan catyí ra chi ra Pablo:

—Chaa tyiño chii saha ra cuví tyiño, vatyí sañe chi ndo. Ican tuhun cha cuví quita ndo vityin —catyí ra chi ra.

³⁷ Soco ra Pablo catyí ra:

—Chi nyuhu cha cuví ndi ra cuenda ñuu Roma ican cañi ra nu tuvi. Ta ni ña cutufí chi ndi tari cuhva tahán chi. Ta tyihí ra chi ndi vehe caa. Ta vityin cuñí ra saña xehe ra chi ndi. Soco ma cuví. Naquichi tava maa ra chi ndi —catyí ra Pablo chi ra sahá cumi cuan.

³⁸ Ta ra policia nacatyí ra chi ra cacuví tyiño. Ta ra cuan cayuhvi ra cuví cha cachitó ra vatyí ra cuenda ñuu Roma cuví ra Pablo. ³⁹ Ta chahan coyo ra chinandacan ra tcahnu iñi chi ra Pablo ta chi ra Silas. Tyicuan ta catavá ra chi ra ta cachacu ndahvi ra nuu ra na quita ra ñuu cuan. ⁴⁰ Ta cha quita coyo ra vehe caa, chahan coyo ra vehe cu Lidia. Ta yaha cuan ta chinyehé ra chi ra hermano ta sanduniꝓ ra iñi ra ta cuahan coyo ra.

17

Nu naquiquí ñáyivi ñuu Tesalónica

¹ Nu cuahan coyo ra Pablo ta ra Silas, cayahá coyo ra ñuu Anfipolis, ta ñuu Apolonia. Yaha cuan ta chaꝓ coyo ra ñuu Tesalónica nu nyaá noo vehe ñuhu ñu Israel.

² Ta chahan ra Pablo vehe ñuhu cuan tari cuhva tuhva maa ra chahan noo noo ñuu. Ta cahan ra tuhun Nyoo chihin ñáyivi chichi vehe ñuhu cuan uñi tahan quiví nyitatú ñu.

³ Quehen ra libru tuhun Nyoo ta sañahá ra tuhun ra Cristo chi ñu yoso caa catyí chi vatyí cunyehe ra tindoho ta cucúvi ra. Yaha cuan cunandoto ra. Ta catyí ra chi ñu vatyí suri maa ra Jesús cha cahán ra tuhun chihin ñu cuví ra Cristo.

⁴ Ta suhva ñáyivi Israel cuan nachino iñi ñu. Ta candu iin ri ñu chihin ra Pablo ta ra Silas. Ta cachino tucu iñi cuaha ñu Grecia cha sacahnú chi Nyoo. Ta cuaha ñusihí tyayí ñuu cuan ñandihí. ⁵ Soco ra Israel cha ña chinó iñi, quiñi cacuñí ra cha nyehé ra vatyí nyicón ñáyivi chi ra Pablo. Ta sandu iin ri ra chi noo ityí ra quiñi iyó cha cachicá noo yanga ri maa. Ta sanaquiquí ra ñuu cuan.

quihvi ra vehe ra Jasón, nanducú ra chi ra Pablo ta chi ra Silas, vatyi tava ra chi ra, ta nacuhva cuenda ra chi ra chi ñáyivi. ⁶ Soco cha cuenda cha ña nañihí ra chi ra Pablo ta ra Silas yucuan, ta quehen ra chi ra Jasón. Ta xitá quiño ra chi ra ta chi suhva ca ra hermano ta cuahan coyo ra nuu ra cuví tyiño ñuu cuan. Ta caná chaa ra ta catyí ra:

—Ra ihya cuví ra cachicá noo satondó chi tandihi ñáyivi nicahnu ñuhu ñáyivi. Ta vityin chaq coyo tucu ra ihya. ⁷ Ta ra Jasón chiña chahá ra vehe ra cunyicu ra. Ta tandihi maa ra ña sahá ra ñáyivi chi ra cuví rey cahnua nya Roma. Vatyi catyí ra vatyi iyó nonga rey ta nañí ra Jesús.

⁸ Cha cachiñí ñu tuhun cuan, ñáyivi ta ra cacuví tyiño canaquiquí ñu. ⁹ Soco ra Jasón ta inga ra cachahá ra xuhun ta caquita yica ra.

Nu cuahan coyo ra Pablo ta ra Silas ñuu Berea

¹⁰ Ta suri cha cuaa cuan quiyi cuii ri casacuhun ra hermano chi ra Pablo ta ra Silas ityi ñuu Berea. Ta cha chaq coyo ra yucuan ta chahan coyo ra vehe ñuhu ñu Israel. ¹¹ Ta ra Israel cha iyó ñuu Berea cuan vaha ca ñáyivi cacuví ra ta ñima ca ra Tesalónica. Vatyi chihin cha ñi ñi ra naquehen ra tuhun Nyoo. Ta ndiquivi nanducú ra nuu tutu Nyoo, nyehé ra tatu ndicha cha cacatyí ra Pablo ta ra Silas ta ra Timoteo chi ra. ¹² Yucuan chaha cuaha vavaha ñu nachino ñi ñi chi ra Cristo. Ta ñu Grecia nachino tucu ñi ñi cuan, tari ñusihí tyayí ta rayí ñandihí. ¹³ Soco cha cachitá ra Israel cha ca iyó ñuu Tesalónica vatyi ra Pablo ñohó ra Berea cahán ra tuhun Nyoo, ta chahan coyo ra ta sanaquiquí ra chi ñáyivi yucuan. ¹⁴ Soco ra hermano numi cuii ri tachí ra chi ra Pablo nya ityi yuhu tyañuhu. Soco ra Silas ta ra Timoteo candoq ra Berea. ¹⁵ Ta ra cha cuahan coyo chihin ra Pablo chinyaca ra chi ra nya ñuu Atenas. Tyicuan ta cuanuhú coyo ra nya Berea cuanacuhva ra tyiño cha tachí ra Pablo chi ra Silas ta chi ra Timoteo, na sanumi ra ta cuhun ra nu nyaá ra.

Nu ñohó ra Pablo ñuu Atenas

¹⁶ Cha niri ca cha nyatú ra Pablo chi ra Silas ta ra Timoteo ñuu Atenas cuan quiñi cuñi añima ra cha nyehé ra vatyi cuaha xaan xitohyo iyó ñuu cuan. ¹⁷ Yucuan chaha chahan ra chihin ra Israel, ta chihin inga ra cha tuhvá sacahnú chi Nyoo chichi vehe ñuhu cuan. Ta ndi quivi cahán ra chihin ñu cha nyicu nuyahví ñandihí. ¹⁸ Ta ñihí tahan ra chihin ñu cha sacuaaha tuhun sañahá noo ityi ñáyivi cha nañí ñu epicúreo. Ta ñihí tahan tucu ra chihin ñu cha sacuaaha tuhun sañahá ñáyivi estoico. Ta cacahan ñu chihin ra. Ta yihí ra catyí ra:

—¿Ñáá tuhun cahan xaan ra ihya? —catyí ra.

Ta inga ra catyí ra:

—Tuhun inga nyoo cahán ra ihya —catyí ra.

Tyehe caa catyí ra vatyi ra Pablo cahán ra tuhun ra Jesús, ta cahán tucu ra tuhun cha nandotq ñáyivi chihí. ¹⁹ Tyicuan ta chinyaca ra chi ra Pablo noo nu nañí Areópago, nu tuhva ra cacuvi tyiño ndu ñin ri ra. Ta cacatyí ra chi ra:

—Cuñí ndi coto ndi tuhun chaa cha vachi sañahún. ²⁰ Vatyi sacotón tuhun cha ña chitó ndi. Ta cuñí ndi coto ndi ñáá cha cuñí chi catyí tandihi tuhun ihya —cacatyí ra chi ra.

²¹ Vatyi tandihi ñu Atenas ta ñu inga ñuu cha iyó yucuan tahan xaan ñi ñi tyuasoho ñu ta nacatyí ñu ñáá ndihí tuhun chaa.

²² Tyicuan ta ra Pablo nicuinyaaq ra mahñu nu nyicu ñu yucu Areópago, ta catyí ra:

—Nyoho Tata ñuu Atenas, yuhu nyehí vatyi chinó xaan ñi ñi ndo chi cuaha nyoo.

²³ Vatyi chahín chinyehí nu tuhvá ndo savaha ndo culto. Ta nañihí noo arta nu nyaá letra cha catyí: “Cuenda Nyoo cha ña ñohó nuu yo”, catyí letra cuan. Nyoho sacahnú ndo chi Nyoo cuan vasi ña ñohó nuu ndo chi ra. Ican Nyoo cuan cuví cha cahín tuhun chihin ndo. ²⁴ Nyoo cha savaha ñuhu ñáyivi ta tandihi cha iyó siqui ñuhu ñáyivi. Chi maa ra cuví andivi ta ñuhu ñáyivi. Ta ña iyó ra chichi vehe ñuhu cha savahá ñáyivi. ²⁵ Ta ña itá ñi ra cha tyinyee ñáyivi chi ra. Vatyi suri maa ra chahá ra ñáyivi coo tandihi yo. Ta chahá ra tatyi cha xitá yo. Maa ra chahá tandihi chi yo. ²⁶ Cha xihna ri savahá Nyoo chi noo tuhun ri rayí. Ta maa ra cuví sutu tandihi yo. Yucuan chaha noo ri ñi ñi nyisó tandihi yo. Ta chahá Nyoo cha coo yo nicahnu ñuhu ñáyivi. Cha ni cumañi ca savahá ra chi yo ta catyí ra ñáá cuiya coo noo yo siqui ñuhu ñáyivi ihya. Ta catyí tucu ra nya cucco noo noo yo. ²⁷ Tyicuan caa sacuví ra vatyi tacuhva quichaha nanducú yo chi ra. Tari nanducú minoo ra cuaa noo cha nanducú ra chihin ndaha ra, vasi tyicuan caa ta cuví nañihí yo chi ra. Soco cha ndicha, Nyoo ña cañi nyaá ra chihin noo noo yo. ²⁸ Vatyi cha cuenda Nyoo iyó yo ta candá yo. Tari catyí tucu noo ra ñuu ndo, vatyi catyí ra: “Ñáyivi chi Nyoo cuví chi yo”, catyí ra. ²⁹ Tatu ñáyivi chi Nyoo cuví yo, ña tahan chi caca xiñi yo vatyi Nyoo cuví ra noo xitohyo cha ching chihin xuhun cuan, o xuhun cuichin, o chihin yuu vaha cha savahá ñáyivi cuhva chicá xiñi maa ñu. ³⁰ Nyoo sahá ra ticahnu ñi ñi ñu chiyó ta cha naha, vatyi ña chitó ñu. Soco vityin catyí ra chi tandihi ñáyivi tandihi ri ityi vatyi na ndu uvi ñi ñu cuatyí ñu. ³¹ Vatyi Nyoo tyaq ra cuhva vatyi coo noo quivi cha cucutuñi

chi ñáyivi iyó siqui ñuhu ñáyivi nuu noo ra cha nacachj vaha maa ra chi. Ta sañahā ra chi tandihi yo vaty tyicuan caa cuvj vaty sanandoto ra chi ra cuan cha yahā chihj ra —catyí ra Pablo.

³² Cuhva cha chiñí ñu tuhun cha nandotó ñu chihj, yihí ñu chacu nyaá ñu, ta inga ñu catyí:

—Qujchun inga quivi ta cahun tuhun ihya chihin ndi —catyí ñu.

³³ Tyicuan ta cuahan ra Pablo. ³⁴ Soco yihí ñu chinyicon ñu chi ra, ta nachino iñi ñu chi Nyoo. Ta noo ra nañi ra Dionisio, ta cuví ra noo ra cuví tyiño ñuu cha tuhvā ndu iin nya Areópago cuan. Ta noo ñaha sihi cha nañi Dámaris chino tucu iñi ña, ta inga tucu ñu ñāndihi.

18

Nu ñohó ra Pablo ñuu Corinto

¹ Yahā cuan ta quita ra Pablo ñuu Atenas ta cuahan ra ñuu Corinto. ² Ta yucuan nañihj ra chi noo ra Israel tari maa ra. Nañi ra Aquila. Ta ñuu Ponto cacuj ra. Ta maa ra chihin ñasihí ra, cu Priscila quita ñu Italia. vatyí ra Claudio, ra cuví rey cahnu yucuan, tava ra tandihi ra Israel. Catyí ra na quita ra ñuu Roma. Ta ra Pablo cuahan ra nu nyaá ñu ñuu Corinto cuan. ³ Ta iin ri tyiño sacuvi ra chihin ñu. Savahā ñu vehe sahma. Ta ndoo ra chihin ñu vatyí sahá tyiño ñu iin ri. ⁴ Ta quivi nyitatu ñu Israel tahan vitya, ra Pablo chahān ra vehe ñuhu ñu. Ta ndatuhun tahan ra chihin ñu Israel ta chihin ñu cha ñima ñu Israel cuví. Vatyí nducú ra kuhva cha chino iñi ñu chi ra Jesucristo.

⁵ Ta quivi chaq coyo ra Silas ta ra Timoteo cha quita ra Macedonia, ra Pablo sandoo ra tyiño sahá ra ta iin ri ca tyiño cha cahān ra tuhun Nyoo nicunyaā ra. Ta catyí cachi ra chi ñu Israel vatyí ra Jesús cuví Cristo ra cha nyatú xaan ñu. ⁶ Soco ñu cuan xaan cuñi ñu. Ta quichahā cahān ña vaha ñu siqui Sutu Mañi yo. Tyicuan ta ra Pablo naquisi ra sahma ra tari noo seña vatyí cuandoo cuatyí ñu siqui ñu. Ta catyí ra chi ñu:

—Cuatyí maa ndo cuví tatu cuhun ndo anyaya. Ñahri ca nyaá siqui. Vityin ta ityí nuu ca cuhin cucahin chihin ñu cha ñima ñu Israel cuví —catyí ra chi ñu.

⁷ Ta quita ra vehe ñuhu cuan. Ta cuahan ra vehe noo ra cha nañi justo. Noo ra cha sacahnú chi Nyoo. Ta nyaá vehe ra ityí xiin vehe ñuhu cuan. ⁸ Ta noo ra cha nañi Crispo, ra cuví nuu vehe ñuhu cuan nachingo iñi ra chi Sutu Mañi yo, ta ñáyivi chi ra ñāndihi. Ta cuaha ca ñáyivi iyó Corinto cuan, cha yahā cha chiñj ñu tuhun cahān ra Pablo, nachingo tucu iñi ñu chi ra Jesús, ta condutyā ñu. ⁹ Tyicuan ta noo cha cuaa nyehē ra Pablo

noo visión. Ta cahān Sutu Mañi yo chihin ra, ta catyí ra:

—Ma yuhvun. Cahān ca tuhin ta ma sandihun cha cahun. ¹⁰ Vatyí yuhu nyaí chuhun. Ta yori cuví sata si iñi chuun. Vatyí cuaha xaan ñáyivi nyaá sacaqui ñuu ihya —catyí Sutu Mañi yo chi ra Pablo.

¹¹ Yucuan chaha ra Pablo ndoo ra noo cuiya sisava ñuu Corinto cuan. Sañahā ra tuhun Nyoo chi ñáyivi.

¹² Soco quivi cha cuví ra Galión gobernador nicahnu ityí Acaya cuan, candu iin ri ra Israel siqui ra Pablo. Ta cachican ra cuatyí chaha ra nuu ra gobernador. ¹³ Ta cacatyí ra chi gobernador cuan:

—Ra ihya tyiyuhú ra chi ñáyivi na sacahnu ñu chi Nyoo noo kuhva cha ñahri nyaá nu ley ndi —cacatyí ra.

¹⁴ Tyicuan ta kuhva cha cuanacahan ra Pablo, nacahan ri ra Galión, ta catyí ra chi ra Israel cuan:

—Nyoho ra Israel, tatu cuenda noo cuatyí cahnu o cuatyí ndiyi cuví sandai yoso kuhva tahān chi. ¹⁵ Soco maa maa ri tuhun cahān ri cuví ihya. Ta yuhu ña cuñi sandai tyiño ihya, ta siin ri cuenda ley maa ndo cuví. Nyehē maa ndo. Sandaa ndo tyiño vatyí yuhu ña cuñi cuví juez cuenda ihya —catyí gobernador cuan.

¹⁶ Ta tava ra chi ra nu cuví vehe tyiño ra.

¹⁷ Tyicuan ta tandihi ra Grecia catijn ra chi ra Sóstenes, ra cuví nuu vehe ñuhu ñu Israel. Ta cacañj ra chi ra suri maa nuu ra Galión, ra cuví gobernador cuan. Soco ra Galión cuan ña cahān ri ra.

Nu cuanuhu ra Pablo ñuu Antioquia. Yahā cuan ta cuahān tucu ra tuhun Nyoo, cha cu uñi chaha

¹⁸ Ta ra Pablo ndoo ca ra ñuu Corinto cuaha quivi. Yahā cuan ta catyí ra chi ra hermano vatyí cuhun ra. Ta cuahan ra Aquila chihin cu Priscila chihin ra Pablo. Tyicuan ta chaq coyo ñu Cencrea. Ta ra Pablo satya ndi ra xiñi ra vatyí sacuvi ra noo cha tyaá ra kuhva tyi sacuvi ra nuu Nyoo. Tyicuan ta caquihvi ñu chichi noo barcu cha cuahan ityí Siria. ¹⁹ Ta cha chaq barcu cuan nya ñuu Éfeso, ta caquita ñu. Ta ra Aquila chihin cu Priscila ndoo ñu yucuan. Ta ra Pablo cuahan ra vehe ñuhu ñu Israel. Ta cahān ra chihin ñu Israel cha ndu iin ri yucuan. ²⁰ Ta chacuj ndahvi ñu nuu ra na ndoo ra cuaha ca quivi. Soco ña cuñi ra. ²¹ Ta catyí ra chi ñu vatyí cha cuahan ra, ta catyí tucu ra tyehē caa:

—Cuñi chi cha cuhin ñuu Jerusalén vatyí sanducahni vico cha vachi cutahan. Soco cuquichi inga chaha nu nyicu ndo tatu Nyoo ta cuñi ra —catyí ra chi ñu.

Tyicuan ta cuahan ra quihvi ra chichi noo barcu cha cuahan ityí Siria. ²² Quivi nachaa

ra ñuu Cesarea ityi Siria cuan, chahañ ra chichuha ra nocumi chi ñu yihí cuenda Nyoo Jerusalén. Yahañ cuan ta cuahan ra Antioquía. ²³ Ta cha yahañ chinyañ ra suhva quivi yucuan, quitañ ra ta cuahan ra tahañ tahañ ñuu ityi Galacia ta Frigia. Ta sanduniñ ra iñi tandihi ñu yihí cuenda Nyoo.

Nu cahán ra Apolos tuhun Nyoo ñuu Éfeso

²⁴ Quivi cuan chañ noo ra Israel ñuu Éfeso. Nañi ra Apolos. Ta ñuu ra cuvi Alejandria. Ta cuvi ra minoo ra vaha cahán tuhun Nyoo. Ta chitó xaan ra tuhun Nyoo tuhun chahnu cha nyaá nu libro. ²⁵ Ta vaha xaan cutuhva ra tuhun Sutu Mañi yo. Ta cahán ra chihin cha ñi iñi ra. Ta vaha xaan nyicón ra chi Nyoo. Ta cachi xaan sañahá ra tuhun ra Jesús. Vasi cuhva cha sacondutyá ra Juan ri chitó ra. ²⁶ Ta quichahañ cahan ra chichi vehe ñuhu chihin cha ñi iñi ra. Ta cuhva cha chiñi ra Aquila ta cu Priscila, tavañ sijn ñu chi ra ta nacatyñ cachi ca ñu tuhun ityi Nyoo chi ra. ²⁷ Tyicuan ta quichahañ cuñi ra Apolos cahun ra ityi Acaya. Ta ra hermano catyineñ ra chi ra. Ta catyañ ra noo carta chi ñu yihí cuenda Nyoo ityi cuan, ta catyí ra chi ñu vatyí na vaha cahan ñu chihin ra tatu chañ ra. Tyicuan ta cuahan ra. Ta cuhva cha chañ ra Acaya cuan tyinyeñ xaan ra chi ñu chinó iñi chi Nyoo cha cuenda tumañi iñi cha chahañ ra chi ñu. ²⁸ Vatyí nu tuvi sañahañ cachi xaan ra yoso caa cuhva ña vaha cha sacuvi ñu Israel. Ta sañahañ ra cha catyí nu tutu Nyoo vatyí ra Jesús cuvi Cristo, ra cha nyatú xaan ñu chi.

19

Nu cuahan tucu ra Pablo ñuu Éfeso

¹ Cha ñi ri ca cha ñohó ra Apolos ñuu Corinto, ra Pablo yahañ ra ityi yucu ta chañ ra nya ñuu Éfeso. Ta yucuan nañihí ra chi cuaha ri ra yihí cuenda Nyoo. ² Ta ndacáñ tuhun ra chi ra:

—¿Atu naqueheñ ndo Tatyí Ii quivi naching iñi ndo? —catyí ra Pablo chi ra.

Ta canacahañ ra cuan ta catyí ra:

—Ni chiin ña chitó ndi cha iyó Tatyí Ii.

³ Tyicuan ta ra Pablo ndacáñ tuhun ra chi ra:

—¿Ñáá chihin condutyá nyoho? —catyí ra.

Ta nacahañ ra ta catyí ra:

—Chihin cuhva sacondutyá ra Juan yucuan cuhva condutyá ndi —catyí ra.

⁴ Tyicuan ta catyí ra Pablo chi ra:

—Ra Juan sacondutyá ra chi ñáyivi cha ndu uvi iñi cuatyí. Soco catyí tucu ra chi ñu vatyí cuñi chi cha chino iñi ñu chi ra cha quichi ta ican ra cuan cuvi ra Cristo Jesús —catyí ra Pablo chi ra.

⁵ Cuhva cha cachiñi ra cha catyí ra Pablo tuhun ihya, tyicuan ta nacondutyá ra inga chaha chihin sivi Sutu Mañi yo Jesús. ⁶ Ta cuhva cha tyisoñ ra Pablo ndaha ra siqui ra, quichiñ Tatyí Ii siqui ra. Ta quichahañ cahan ra inga sahan. Ta sahañ ra profetizar, o chahañ cuenda ra tuhun chahañ Tatyí Ii Nyoo chi ra cuvi cuan. ⁷ Ta uchi uvi tahañ ra cha tandihi ra.

⁸ Tyicuan ri chigañ ra Pablo vehe ñuhu ñuu cuan chichi cha uñi yoo. Ta cahan ra tuhun Nyoo chihin cha ñi iñi ra. Ta ñiñi cahán ra chihin ñu yoso caa nyacá ñaha Nyoo añima yo. ⁹ Soco yihí ñu sandavañ ñu añima ñu. Ta ña cuñi ñu chino iñi ñu. Ta cahán ña vaha ñu siqui tuhun ra Cristo nuu ñáyivi, ta catyí ñu vatyí ña vaha ityi Sutu Mañi yo. Tyicuan ta ra Pablo canyahañ ra nu nyicú ñu. Ta chinyañ ra chi ñu chinó iñi chi ra Cristo noo sicuela ra cha nañi Tiranno. Ta yucuan cahán ra tuhun ra Cristo chihin ñáyivi ndiquivi ri. ¹⁰ Ta tyicuan caa chinyacuví ra chichi cha uvi cuiya. Ta tandihi ñáyivi nicahnu ityi Asia cuan chiñi ñu tuhun Sutu Mañi yo Jesús, tari ñu Israel ta ñu cha ñima ñu Israel cuvi ñandihí. ¹¹ Ta nahnu milagru sacuví Nyoo chihin ndaha ra Pablo. ¹² Vatyí nyacua nya pañitu ta sahma cha tiñ ra Pablo, ta chinyañ ñu chi ñu cuhví ta nduvahañ ñu. Ta ñu yihí tatyí ña vaha chi, quitañ chi chi ñu.

¹³ Ta iyó suhva ra Israel cha cachicá noo tahañ tahañ ñuu. Catavañ ra tatyí ña vaha chi ñáyivi. Ta cacuñi ra cotyíño ra sivi Sutu Mañi yo Jesús vatyí tavañ ra chi tatyí ña vaha. Ta catyí ra chi tatyí ña vaha cuan:

—Chihin sivi ra Jesús cha cahán ra Pablo tuhun catyí chi ndo vatyí quitañ ndo —catyí ra.

¹⁴ Tyehe caa chinyacuví ndi ucha tahañ sehe noo ra Israel cha nañi Eseva. Ta ra Eseva cuan cuvi ra noo ra cuvi nuu chi tata sutu. ¹⁵ Ta cha cacahañ ra cuan chihin tatyí ña vaha cuan, nacahañ tatyí ña vaha cuan chihin ra ta catyí chi tyehe caa:

—Ñohó nui chi ra Jesús. Ta chité yóo ra cuvi ra Pablo. Soco nyoho zyóo ra cuvi nyoho? —catyí tatyí ña vaha cuan chi ra.

¹⁶ Tyicuan ta ra cha yihí tatyí ña vaha cuan chii, ndavañ ra siqui ra cuan. Ta chihin cha cuaha fuerza ra cuvi chasaha ra chi tandihi ra. Ta chahnyañ cuatyí ra sahma ra. Ta sanduvityañ ra chi ra. Ta sañicueheñ ra chi ra. Yucuan ta chihin cha cayuhvi ra ta cachinoñ ra ta cuahañ coyo ra. ¹⁷ Tyicuan ta tandihi ñu Éfeso, ñu Israel, ta ñu cha ñima ñu Israel cuvi ñandihí, chitó ñu tuhun cuan. Ta yuhví xaan ñu cuvi. Ta sacahnú ñu sivi Sutu Mañi yo Jesús.

¹⁸ Ta cuaha xaan ñu chinó iñi ñu chi ra. Ta chañ coyo ñu ta nahmañ ñu cuatyí ñu,

tandihí cha ña vaha cha chinyacuví ñu ta ityi chata ca. ¹⁹ Ta cuaha ñu cha sacuahá tuhun tasi, quichí nyaca ñu libru ñu. Ta chahmí ñu libru cuan nuu tandihí ñáyivi. Ta natavá ñu cuenda yoso yahvi libru cuan. Cha tandihí quita ta cha uvi xico uchi mil xuhun cuichin. ²⁰ Ta tyicuan ri ta cuahan chitya ca tuhun Sutu Mañi yo. Ta nducuahá ca ñu yihí cuenda ra. Ta tyicuan caa nyehé ñáyivi yoso cha cahnu tunyee iñi iyó chí ra. ²¹ Ta cha yahá tuhun ihya, ra Pablo natyaa ra cuhva cha cuhun ra ityi Macedonia, ta ityi Acaya. Yahá cuan ta cunuhu ra nya Jerusalén tyaá ra cuan. Ta catyí ra vatyí yahá cuan ta cuñi chí cha cuhun ra nya ñuu Roma. ²² Tyicuan ta tachí ra chí uvi tahan ra tyinyeé chí ra nya Macedonia, ra Timoteo ta ra Erasto. Soco ndoo maa ra suhva ca quivi ityi Asia cuan.

Nu naquiquí ñáyivi Éfeso siqui tuhun Nyoo

²³ Ta suri quivi cuan naquiquí ñáyivi ñuu Éfeso siqui tuhun Nyoo, ²⁴ vatyí noo ra cha nañi Demetrio sanaquiquí. Vatyí maa ra tuhvá ra saha tyiño chihin xuhun cuichin. Savahá ra vehe ñuhu nyihi nyoo Diana chihin xuhun cuichin cuan. Ta cuaha sahá ganaa ra chihin ra casahá tyiño chihin ra. ²⁵ Ta caná ra Demetrio cuan chí ra cha sahá tyiño chihin ra. Ta caná tucu ra chí ra cha casahá tyiño ñn ri tyiño cuan. Ta catyí ra chí ra:

—Nyoho ra tahan yo, chitó ndo vatyí chihin tyiño ihya iyó cha tyayí yo. ²⁶ Soco nyoho nyehé ndo ta chiñi ndo yoso caa sacuví ra Pablo ñuu yo Éfeso ihya, ta nicahnu ityi Asia. Vatyí catyí ra tyi nyoo cha savahá ñáyivi ñima Nyoo cuví. Ta cuaha xaan ñáyivi nachino iñi sahá ra. ²⁷ Ta ña vaha cha sacuví ra vatyí ma quiyahvi ca xitohyo cha savahá yo. Ta ñn ri ma sacahnu ca ñáyivi chí nyoo Diana ta ma saha ca ñu ñáyivi vehe ñuhu ña, ta ña vaha tyicuan caa, vatyí ñaha cuan cahnu xaan cuví ña. Ta tandihí ñáyivi ityi Asia chihin ñu nicahnu ñáyivi sacahnú ñu chí ña. Ta nu cuahan ca chí quivi ma sacahnu ca ñáyivi chí ña tatu chíno iñi ñu cha cahán ra Pablo —catyí ra Demetrio.

²⁸ Ta cuhva cha cachiñi ra cha catyí ra, Xaan xaan cacuñi ra. Ta quichaha cacana chaa ra ta cacatyí ra:

—Cahnu xaan cuví cu Diana, nyoo cuenda ñáyivi Éfeso ihya —catyí ra.

²⁹ Ta cutondó xiñi tandihí ñu ñuu cuan. Ta catin ñu chí ra Gayo, ta chí ra Aristarco, uvi ra Macedonia cha chicá noo chihin ra Pablo. Ta caxita quiñoho ra chí ra nyacua nya nu tuhva ñu candu ñn ri ñu. ³⁰ Ta ra Pablo cuñi ra quihvi ra nu nataca ñáyivi vatyí cahan ra chihin ñu. Soco ra hermano, ña chahá ra. ³¹ Ta tyicuan caa tucu suhva ra

cuví tyiño ityi Asia, ra cuví amigo ra Pablo, tachí ra tyiño vatyí ña tahán chí tyihi ra chí ra yucuan. ³² Ta nu ndu ñn ri ñu yucuan, suhva ñu caná chaa noo tuhun. Ta inga ñu caná chaa ñu inga tuhun. Vatyí naquiquí ñu. Ta cuaha xaan ñu cha ni ña chitó ñu ñáa tuhun cha nataká ñu. ³³ Tyicuan ta ñu Israel, tyatyíño ñu chí noo ra cha nañi Alejandro na quita ra ityi nuu. Ta suhva ñu tayucú yucuan nacatyí ñu chí ra yoso caa cucahan ra. Tyicuan ta sacuví ra seña chihin ndaha ra vatyí na taxi ri cuví ñu vatyí cuñi ra catyí ra vatyí ñahri cuatyí ñu Israel. ³⁴ Soco cuhva cha chitó ñu vatyí ra Israel cuví ra, tandihí maa ñu caná chaa ñu. Ta chichi cha uvi hora caná chaa ñu, ta catyí ñu:

—Cahnu xaan cuví cu Diana nyoo cuenda ñu Éfeso —catyí ñu, caná chaa ñu.

³⁵ Tyicuan ta secretario ñuu cuan cuhva cha cuví sacutaxin ra ñáyivi, ta catyí ra:

—Nyoho tata ñuu Éfeso ihya. Tandihí ñáyivi chitó ñu vatyí nyaá siqui yo ñu Éfeso cha saha cumí yo vehe ñuhu cu Diana tyi cahnu xaan cuví ña. Ta cumí yo xitohyo ña cha caná cava ityi andivi. ³⁶ Ta yori cuví catyí tyi ña ndicha. Taxi ri ndo, ta ma cunyacuví ri maa ndo tatu ña chitó ndo ñáa cha cuacunyacuví ndo. ³⁷ Vatyí ra cha quichí nyaca ndo ihya ñahri cha suhva ra vehe ñuhu ndo. Ta ni ña cahán ña vaha ra siqui nyoo cuenda ndo. ³⁸ Tatu ra Demetrio ta ra cha sahá tyiño chihin ra chicán ra cuatyí chaha noo ra, na cuhun ra nu nyaá juez. Cuví cacán ra cuatyí nuu ra cuan, ta maa ra cusandaa ra cuatyí cuan. ³⁹ Ta tatu inga tuhun chicán ndo, cuñi chí sacuví ndo nu nyicu ra cuví tyiño, tari cuhva catyí ley. ⁴⁰ Vatyí tatu coto gobiernu ta cana ra chí yo cha cuenda cha cuví ihya, ta ma ñihi yo tuhun cahan yo tatu ndacá tuhun ra chí yo ñáa cuenda naquiquí yo —catyí ra cuví secretario cuan.

⁴¹ Ta cha yahá catyí ra tuhun cuan catyí ra vatyí na cunuhu ñu nya vehe ñu.

20

Nu yahá ra Pablo ityi Macedonia ta cuahan ra Grecia

¹ Cha yahá tuhun cha naquiquí ñáyivi ñuu Éfeso cuan, caná ra Pablo chí tandihí ñu yihí cuenda Nyoo, vatyí cahan ra suhva nuu ñu ta cuhva ca ra tunyee iñi chí ñu. Vatyí maa ra chaá chí quivi cha cuhun ra inga ityi. Ta cahan ra chihin ñu. Tyicuan ta cuahan ra Macedonia. ² Ta chahan ra tandihí ityi cuan ta sanduniá ca ra iñi tandihí ñu yihí cuenda ra Cristo cha iyó ityi cuan chihin tuhun cahán ra. Tyicuan ta chaá ra ityi Grecia. ³ Ta yucuan ndoo ra uñi yoo. Ta cha nyaá ra cha cuaquehen ra barcu ta cuhun ra Siria, ta

chitō ra vatyi nducú ñáyivi Israel chi ra vatyi cahñi ñu chi ra. Yucuan chaha natyaq̄ ra iñi ra cha cuhun ra chihin chaha ra ityi nu ñuhu ri. Ta nayahq̄ ra inga chaha ityi Macedonia. ⁴ Ta cuahān ra Sópater, ra ñuu Berea chihin ra. Ta cuahān ra Aristerco ta ra Segundo, ta uvi tahan ra ihya, Tesalónica cuví ñuu ra. Ta cuahān ra Gayo, noo ra ñuu Derbe, ta ra Timoteo, ta uvi tahan ra ityi Asia, ra Tíquico ta ra Trófilo. ⁵ Ra hermano ihya cayahq̄ ra ityi nuu ta canyatú ra chí ndi ñuu Troas. ⁶ Ta nyuhu nyatú ndi na yaha vico pascua nu tuhvá ñu Israel chachí ñu pan cha ñahri yuchan iya yihí. Tyicuan ta quitā ndi ñuu Filipino chihin barcu. Ta nu cu ohon quívi ta natahān ndi chí ra cha cuahān ityi nuu nya ñuu Troas. Ta yucuan ndoq̄ ndi ucha quívi.

Nu cahán ra Pablo tuhun Nyoo ñuu Troas

⁷ Ta cha timingu cuan ndu ñin ri ndi chihin ñu yihí cuenda Nyoo ñuu Troas cuan. Ta quívi cuan cuacachi ndi pan ta coho ndi vinu vatyi nicohon iñi ndi tyi chihj̄ ra Cristo cha cuenda cuatyí yo. Ta ra Pablo cahán ra nuu ñu ta cuví ora ñuu, vatyi cha nyaá cha cuhun ndi inga quívi cuan. ⁸ Canyicú ndi noo cuarto nu cu uñi piso. Ta ndichin xaan nu canyicú ndi chichí vehe cuan vatyi cuaha xaan ñuhu candil cayú. ⁹ Ta noo ra tyivaa cha nañi Eutico nyaá ra ventana tyasohó ra, soco ña cunyeq̄ ra ñumahna vatyi ra Pablo, cha vehe xaan cahan ra. Quixí ra Eutico, ta ña chitō ra canacavá ra nya nu ñuhu. Ta nacoñehé ra chí ra soco cha chihj̄ ra. ¹⁰ Tyicuan ta ra Pablo noq̄ ra ta chaq̄ ra nu catuví ra tyivaa cuan. Ta natyihí nundaha ra chí ra tyivaa cuan, ta catyí ra chí ndi hermano:

—Ma yuhvi ndo. Nyitó ra —catyí ra.

¹¹ Tyicuan ta nandaq̄ tucu ra Pablo ta chachí ndi pan ta chihj̄ ndi vinu cha cuenda Sutu Mañi yo. Tyicuan ta cahan ca ra Pablo tuhun Nyoo nyacua nya cundichin. Tyicuan ta cuahān ra. ¹² Ta ra tyivaa cuan nandotō ra ta cuanuhj̄ ra nya vehe ra. Ta sii xaan nanduvj̄ cuñi ñu.

Nu quitā ra Pablo ñuu Troas ta cuahan ra nya ñuu Mileto

¹³ Nyuhu yahq̄ ndi ityi nuu ta cuahan ndi chihin barcu nya ñuu Asón. Vatyi yucuan cuñihi tahan ndi chihin ra Pablo, vatyi tyicuan caa sandaq̄ maa ndi tyiño chihin ra. Vatyi maa ra cuñi ra cuhun ra ityi nu ñuhú ri chihin chaha ra. ¹⁴ Ta cuhva cha nañihj̄ tahan ndi chihin ra nya ñuu Asón cuan, quihvj̄ ra chichi barcu chihin ndi ta cuahan ndi nya ñuu Mitilene. ¹⁵ Quitā ndi yucuan ta yahq̄ ndi ityi nuu noo ñuhú luhlu cha nañi Quío nyaá mahñu tyañuhu. Ta cha inga quívi cuan chaq̄ ndi inga ñuhú luhlu cha nañi Samos. Yahq̄ ndi yucuan ta nyitatú ndi ñuu

Trogilio. Ta cha inga quívi chaq̄ ndi nya ñuu Mileto. ¹⁶ Tyicuan caa cuví vatyi ra Pablo ña cuñi ra cunyaq̄ ca ra cuaha quívi ityi Asia. Ña cuñi ra cuhun ra Éfeso vatyi numi ri cuñi ra chaa ra ñuu Jerusalén, vatyi tatu cuhva chí cuhva cunyaa ra quívi vico Pentecostés cha sanducahnú ñu Israel.

Nu cahán ra Pablo chihin ra ñuu Éfeso vatyi cuhun ra ta ma quichi ca ra

¹⁷ Ta cuhva cha nyicu ndi ñuu Mileto, cana ra Pablo chí ra yihí ndaha chí ñu yihí cuenda Nyoo Éfeso. ¹⁸ Ta cuhva cha chaq̄ coyo ra, catyí ra teyehe caa chí ra:

—Maa ndo chitō ndo yoso caa cuhva chiq̄ noi nyata quívi xihna ri cha chaj̄ Asia ihya. ¹⁹ Tandihí quívi cha chinyaj̄ chihin ndo ta sacuvj̄ tyiño nuu Sutu Mañi yo chihin cha nduquí cuhva cha ma cahnu sahi chii, vasi cuaha tindoho chihin cha cuaha tucuihya iñi. Ta cuaha tindoho quichi siqui sacuvj̄ ñáyivi Israel. ²⁰ Soco ña sandihí cha cahán noi tuhun Nyoo nuu ndo. Vatyi ihya cuví tandihí cha chihuhú chí ndo tacuhva coo vaha ndo. Ta sañahj̄ tuhun Nyoo chí ndo nu ndu ñin ri ndo ta nya vehe ndo ñandihí. ²¹ Ta sañahj̄ tuhun ihya chí ñu Israel ta chí ñu cha ñima ñu Israel cuví. Sañahj̄ chí ñu na nasama ñu cuhva iyó ñu nuu Nyoo ta nachino iñi ñu chí Sutu Mañi yo Jesucristo. ²² Ta vityin cuhin nya ñuu Jerusalén vatyi maa Tatyi Ii catyí. Ta ña chité ñaá cha cucuvi chí yucuan. ²³ Soco noo ri cha chité vatyi tandihí ri nu cuahin Tatyi Ii catyí chí vatyi nyatú vehe caa chí, ta cuaha tindoho ñandihí. ²⁴ Soco ni noo ihya ta ña chicá xiñi. Ta ni ñayivj̄ ta ña vale cha cuenda mai, tacuhva vatyi chihin tusii iñi ta cuví sañahi sahatyine tyiño cha chahq̄ Sutu Mañi yo Jesús chí, cha sañahi tuhun vaha yoso cuhva cuñi Nyoo chí yo.

²⁵ Ta vityin chitō vahí vatyi tandihí nyoho cha cahñ tuhun Nyoo chihin ndo, ma nyehe ca maa ndo chí. ²⁶ Yucuan chaha cuñi catyí chí ndo vityin vatyi ñahri ca cuatyí yuhu cha cuenda ni noo nyoho. ²⁷ Vatyi chihin cha ñiñi cuñi ta cahin tuhun Nyoo chihin ndo ta ñahri cha tixehj̄. ²⁸ Yucuan chaha saha ndo cuenda chí ndo. Ta saha tucu ndo cuenda chí tandihí ñu yihí cuenda Nyoo. Vatyi maa Tatyi Ii tyatyinō chí ndo vatyi saha cuenda ndo chí ñáyivi iyó vehe ñuhu Sutu Mañi yo. Maa ra satq̄ ra chí ñu chihin ñiñi ra. ²⁹ Vatyi chité vatyi quívi cuhin, cuquichí inga ra. Ta cuñi ra sativi ra chí ñu yihí cuenda Sutu Mañi yo. Tari lobo xaan cha chahñi chí mbee, tyicuan caa cuquichi ra cuan sativi ra añima ndo. ³⁰ Ta suri nu nyicu ndo, cundicuita suhva ra. Ta cusañaha ra cha ña ndicha tacuhva cunyicon ndo chí ra. ³¹ Yucuan chaha saha vaha ndo cuenda. Njochon iñi ndo vatyi chichi cha uñi cuiya ña sandihj̄ cha cahñ tuhun Nyoo nuu ndo. Cha ñicahñu

ta cha cuaa cahin chihin noo noo nyoho, ta chihin cha cuihya iñi coto sandihí ndo tuhun Nyoo.

³² Ta vityin nyoho yañi, natyaí chi ndo ndaha Nyoo. Saha ndo cuenda ndi tuhun cahan ra chihin yo. Sacotó ra chi yo tyi cuñi xaan ra chi yo. Ta yucuan sandunyeé xaan chi iñi yo tacuhva cuvi yo ñáyivi yihí vaha cuenda ra chihin tandihí inga ñu cha nacuhva cuenda ñu chi ñu chi ra. ³³ Yuhu ña nyiyó iñi ni minoo cha iyó chi ndo. Ni ri xuhun ndo, ni ri sahna ndo. ³⁴ Nyoho chitó vaha ndo vatyi sahá tyiño xain chihin ndahi tacuhva ñihi cha chiñuhu chíi chihin ra chicá noo chihin. ³⁵ Tyicuan ri sañahí chí ndo vatyi cuñi chi cha saha tyiño ndo ta tyinyee ndo chi ñu iyó cha chiñuhu chí. Ta ñicohon iñi ndo tuhun cahán Sutu Mañi yo Jesús nu catyí ra tyehe caa: “Sii ca cuñi noo ñáyivi ñu chahá, ta ñima ca ñu ita iñi”, catyí Sutu Mañi yo.

³⁶ Cha yaha cha catyí ra Pablo tuhun ihya, chicuiñi chiti ra. Ta chican tahvi ra chihin tandihí ñu. ³⁷ Ta tandihí ñu cuihya xaan nduvi iñi ñu ta chacu xaan ñu. Ta nanumi ñu chi ra. ³⁸ Vatyi ra Pablo catyí ra tyi cuhun ra inga ñuu ta ma cuhun ca ra nu nyicu ñu. Tyicuan ta chinyaca ñu chi ra nyacua nya nu quihvi ra chichi barcu.

21

Nu cuahan ra Pablo ñuu Jerusalén

¹ Tyicuan ta sandoq ndi chi ra hermano ta quihvi ndi chichi barcu. Ta cuahan ndi in ndoo ityi ri nya Cos noo ñuhú luhlu mahñu tyañuhu. Ta cha inga quivi chaq ndi nya Rodas inga ñuhú luhlu ri. Yucuan ta cuahan ndi nya Pátara. ² Ta ñuu Pátara cuan nañihí ndi nonga barcu cha cuahan nya Fenicia. Ta quihvi ndi chichi inga barcu cuan ta cuahan ndi. ³ Ta cha cuahan ndi nyehe ndi ñuhú Chipre chiyo satyin ndi. Ta yaha ri ndi cuahan ndi ityi nu ca, ityi Siria. Ta chaq ndi nya ñuu Tiro vatyi yucuan cuatava ra carga cha nyisó barcu cuan. ⁴ Ta cha nañihí ndi chí ñu yihí cuenda Nyoo ñuu cuan, ndoo ndi chihin ñu ucha quivi. Ta catyí ñu chí ra Pablo vatyi ña tahán chí cha cuhun ra Jerusalén vatyi tyicuan caa sañaha Tatyí Ii chí ñu. ⁵ Soco cha ndihí ucha quivi cuan quita ndi ñuu cuan. Ta nu caquita ndi tandihí ra hermano chihin ñasihí ra ta sehe ra chinyaca ñu chí ndi nyacua nya ityi chata ñuu. Ta nu ñiti yuhu tyañuhu cuan nicuiñi chiti ndi, ta chican tahvi ndi chí Nyoo. ⁶ Tyicuan ta nanumi ndi chí tahan ndi. Tyicuan ta quihvi ndi chichi barcu. Ta maa ñu cuanuhu coyo ñu vehe ñu.

⁷ Ta quita ndi ñuu Tiro cuan ta cuahan ndi nya ñuu Tolemaida. Ta yucuan chaha ndi nocumi chí ñu hermano. Ta ndoo ndi chihin ñu noo quivi. ⁸ Ta cha inga quivi quita

ndi ta cuahan ndi ñuu Cesarea. Ta yucuan chahan ndi vehe ra Felipe ra cha sacotó xaan chí ñáyivi yoso caa sacacu Nyoo añima ñu. Cuví ra noo ra chichi cha ucha tahan ra nyisó tyiño vehe ñuhu. Ta yucuan ndoo ndi chihin ra. ⁹ Ra Felipe, iyó cumi tahan ñu tyivaa sehe ra cha ta tandaha ca. Ta tuhvá ñu chahá cuenda ñu tuhun cahan Nyoo. O cuvi chí cuan sahá ñu profetizar. ¹⁰ Ta cha cuaha ri quivi cha chaq ndi yucuan, tyicuan ta chaq noo profeta Nyoo cha nañi Agabo. Quichi ra ityi Judea. ¹¹ Quichi nyehe ra nu nyicu ndi. Ta quehen ra sincho ra Pablo, ta cháhñi ra chaha ra ta ndaha ra, ta catyí ra:

—Tatyí Ii Nyoo catyí chíi vatyi tyehe caa cunuhñi chitoho sincho ihya nya Jerusalén. Ta cucuhva cuenda ñáyivi Israel chí ra chí ra inga ñuu —catyí ra Agabo.

¹² Cha chíñi ndi tuhun ihya, nyuhu ta ra ñuu Cesarea chacú ndahvi ndi nuu ra Pablo vatyi ma cuhun ra Jerusalén. ¹³ Soco ra Pablo catyí ra:

—¿Ñáá tuhun chacú ndo ta sanducuihyá ndo iñi? Yuhu ñahri cuende. Ñima cha cunuhñi ri, vasí cahñi ra chíi soco cha cuenda Sutu Mañi yo Jesús —catyí ra chí ndi.

¹⁴ Ta cha nyehe ndi tyi ña cuvi chasaha ndi chí ra, saña ndi. Ta catyí ndi:

—Na cuvi maa cuhva cuñi maa Sutu Mañi yo.

¹⁵ Cha yaha tuhun ihya sanduvaha ndi chí ndi ta cuahan ndi nya Jerusalén. ¹⁶ Ta cuahan suhva ra Cesarea ra yihí cuenda ra Cristo chihin ndi. Ta cuahan tucu noo ra ñuhú Chipre. Mnasón nañi ra. Cuaha xaan cuiya chinó iñi ra chí ra Cristo. Maa ra chinyaca ra chí ndi nya vehe ra cha nyaá Jerusalén vatyi yucuan cunyata ndi.

Nu cuanyehe ra Pablo nu nyaá ra Jacobo

¹⁷ Cuhva cha chaq ndi Jerusalén, ñu yihí cuenda ra Cristo chihin cha sii cuñi ñu cahan ñu chihin ndi. ¹⁸ Ta inga quivi cuan cuahan ndi chihin ra Pablo cuanyehe ndi nu nyaá ra Jacobo. Ta yucuan nyicu tucu tandihí ra yihí ndaha vehe ñuhu. ¹⁹ Chaha ra Pablo nocumi chí ra. Yaha cuan ta nacatyí ra tahan tahan ri tuhun yoso caa chotyíño Nyoo chí ra nu cahan ra tuhun Nyoo chihin ñu cha ñima ñu Israel cuvi. ²⁰ Cuhva cha cachihí ñu tuhun ihya, casacahnu ñu chí Nyoo, ta catyí ñu chí ra Pablo:

—Vaha yañi yo, soco cha nyehun vatyi cuaha xaan mil ñu Israel chinó iñi ñu chí ra Cristo. Ta tandihí ñu catyí ñu vatyi niñi cha cunyicon yo ley ra Moisés. ²¹ Ta ñihí ñu tuhun vatyi yoho sañahún chí tandihí ñu Israel cha iyó inga ñuu vatyi ma quichaha ca ñu ley cha sañaha ra Moisés, ta catyún chí ñu vatyi ña tahán chí sacuvi ñu costumbre circuncisión chihin cha lee sehe ñu, ta ni ma

sacuvi ca ñu costumbre chahnu yo. ²² ¿Yoso caa sacuvi yo vityin? Vatyí ñáyivi cuañihi ñu tuhun tyi chaun ihya. ²³ Vaha taxin ca cha sacuvun tyehe caa. Ihya iyó cumi tahan rayi cha nyaá sacuvi ra noo cha tyaá ra cuhva tyi sacuvi ra nuu Nyoo. ²⁴ Cuañan chihin ra na ndundun nuu Nyoo chihin ra. Ta yoho tyiyahvun cha tahán chi tyiyahvi ra. Tyicuan ta maa ra cuví satya ndi xiñi ra cuhva catyí ley. Ta cha sacuvun tyicuan caa ta coto tandihi ñáyivi vatyí ña ndicha cha cahán ñu sicun, soco cunyehe ñu vatyí quichahá tucu yoho ley ra Moisés. ²⁵ Ta cha cuenda ñu cha ñima ñu Israel cuví, ta nachinó iñi ñu tuhun Nyoo, cha sacuhun ndi tutu chi ñu, ta catyí ndi chi ñu vatyí ña tahán chi caca xiñi ñu tuhun ihya. Soco noo cha ma cachi ñu coño cha chahá ñáyivi chi xitohyo. Ni ma cachi ñu niñi ni coño quiñi cha cava ñu sucun ta ña chati niñi. Ta ni noo ñu ta ma coo ñusihí o rayi chi ñu tatu ñima ñasihí o yí ñu cuví —catyí ra chahnu vehe ñuhu chi ra Pablo.

Nu nacandá ñu Israel siqui ra Pablo

²⁶ Tyicuan ta tuvj inga quivi ta cuahan ra Pablo chihin ndi cumi tahan ra cuan. Ta sandundi ra chi ra nuu Nyoo in ri chihin ra cuan. Tyicuan ta quihvi ra chichi vehe ñuhu cahnu vatyí sacoto ra chi tata sutu ama cundihi cha ucha quivi cha ndundun di cumi tahan ra cuan, ta cuacuhva ra ofrenda cha cuenda noo noo ra. ²⁷ Soco cha cuñi cuvi ri ndihi ucha quivi cuan, ta suhva ra Israel cha quichí nya Asia canyehe ra chi ra Pablo chichi vehe ñuhu. Ta casanaquiqui ra chi tandihi ñáyivi, ta catiñ ra chi ra Pablo. ²⁸ Ta cacanachaá ra ta cacatyí ra:

—Nyoho ñáyivi Israel, tyinyee ndo chi ndi. Ican ra ihya cuví ra cha chicá noo tandihi ri ityí. Ta sañahá ra chi tandihi ñáyivi. Catyí ra vatyí cha ñima ri tuhun cuví yo ñu Israel. Ta catyí ra tyi ña vaha ley cha tyaá ra Moisés, ta ña vaha vehe ñuhu ihya. Ta siñ ri vityin tyihí ra chi suhva ra Grecia chichi vehe ñuhu sativí ra nu ii ihya —catyí ra canachaá ra.

²⁹ Tyehe caa cacatyí ra vatyí ta ityí chata ca canyehe ra chi ra Pablo chichi ñuu, chicá noo ra chihin ra Tróximo, noo ra ñuu Éfeso. Ta cacuñi maa ra vatyí ra Pablo chinyaca chi ra chichi vehe ñuhu. ³⁰ Ta tandihi ri ñáyivi ñuu naquiqui ñu. Ta ñáyivi chinó vavaha ñu vachi coyo ñu. Tyicuan ta catiñ ñu chi ra Pablo. Ta caxita quiñoho ñu chi ra nya ityí chata vehe ñuhu, ta numí ri nacasi ñu yuvehe. ³¹ Cha cuñi ñu cahñi ñu chi ra, ta chaá tyiño chi comandante cuenda sindaro vatyí tandihi ñu Jerusalén iyó xaan naquiqui. ³² Tyicuan ta comandante cuan sandu in ri ra capitán ta sindaro. Ta cachino ra cuahan coyo ra nu nycú ñáyivi. Cuhva

cha nanyehe ñu chi comandante chihin sindaro, sandihí ñu cha cañi ñu chi ra Pablo. ³³ Tyicuan ta tuhva comandante nu nyaá ra Pablo. Ta tachí ra tyiño natin sindaro chi ra, ta cháhñi ra chi ra chihin uvi tahan cadena. Yahá cuan ta ndaca tuhun ra chi ra yóo ra cuví ra, ta ñáá cha sacuví ra. ³⁴ Soco ñáyivi siñ siñ tuhun canachaá ñu. Ta comandante cuan ña cutuñi maa iñi ra cha cuenda cha quiñi cuvaa ñu. Ta tachí ra cha cunyaca sindaro chi ra Pablo nya cuartel. ³⁵ Cuhva cha cachaá ra nu cuayí yuvehe cuartel cuan, quiñi xaan nanduví ñáyivi ta ña chahá ca ñu caca ra Pablo. Yucuan chaha catyaa soco sindaro cuan chi ra. ³⁶ Vatyí tandihi ñu nycion ñu chi ra, ta canachaá ñu ta catyí ñu: —¡Cahñi ndo chi ra! —cacatyí ñu.

Nu sacacú ra Pablo chi ra nuu ñáyivi

³⁷ Cuhva cha cuatyihí ra chi ra Pablo chichi cuartel, ta quichaha catyí ra chi comandante:

—¿Atu cuhvon cha catyí noo tuhun chuun? —catyí ra chi ra.

Ta comandante cuan catyí ra:

—¿Atu cuví cahún griego? ³⁸ Tu tyicuan caa, ñima yoho cuví ra ñuu Egipto cha quichí quivi cuan ta sacañi tahan ra chi ñáyivi siqui gobiernu ta chinyaca ra chi cumi mil tahan ñáyivi ityí ñuhu ityí —catyí comandante cuan chi ra Pablo.

³⁹ Tyicuan ta ra Pablo catyí ra chi ra:

—Yuhu noo ra Israel cuví ta caqui noo ñuu cha nañi Tarso cha cuví minoo ñuu cahnu ityí Cilicia. Soco saha noo tumañi iñi chii vatyí cuhvon nacahin chiin chihin ñáyivi —catyí ra Pablo chi comandante cuan.

⁴⁰ Tyicuan ta chaha comandante cuan permiso chi ra. Tyicuan ta nicuinanyaa ra nu cuayí ta chaha ra noo seña chi ñu na cutaxin ñu. Ta cahán ra chihin sahan hebreo, ta catyí ra:

22

1 —Nyoho tata, ta nyoho yañi, cuñi ndo cha catyí chi ndo tyi coto ndo vatyí yuhu ñahri cuatyí —catyí ra Pablo chi ñáyivi cuan.

2 Cha cachiñi ñu vatyí cahán ra chihin ñu chihin sahan hebreo, taxi ri cacuví ñu. Ta ra Pablo catyí ra:

3 —Yuhu ra Israel cuví tari maa ndo. Ta caqui ñuu Tarso ityí Cilicia. Soco Jerusalén ihya chahní. Ta ra Gamaliel sañaha chi tandihi maa cuhva yoso caa quichahi ley sutu chahnu yo. Ta tyicuan ri nduqui cuhva sacuví tyiño nuu Nyoo chihin cha tandihi añime, tari maa cuhva nyacuví nyoho quivi vityin. 4 Yuhu, nu quichi chi chicá nyiquen ta satasi iñi chi ñu yihí cuenda ra Cristo. Ta nacuhva cuende chi ñu na cacahñi ra chi ñu. Ta tyihí chi ñu chichi vehe caa, rayi ta ñusihí. 5 Ra cuví nuu chi tata sutu chihin ra

cacuví mandoñi, cacuví ra cha ndaa vatyi ican ra chaha tutu vatyi cuvi tiin chi yañi yo, ra yihí cuenda ra Cristo ñuu Damasco. Chahin nyicuan chinanduquj chi ñu chinó iñi chi ra Cristo, vatyi tacuhva cunuhñi ñu chihin cadena, ta quichi nyaque chi ñu nya Jerusalén iha vatyi cutachi tuñi ra chahnu chi ñu.

Nu nacatyí ra Pablo yoso caa nanduvj ra cuenda ra Cristo

(Hch. 9.1-19; 26.12-18)

⁶Soco cuhva cha cuahin ityi cha cuachaa ndi Damasco, ñáá cuhva ora cuví cuan. Ta sana iñi ta ndundichin nicachico nu cuahin chihin noo nduva ñuhu cha quichi ityi andivi. ⁷Tyicuan ta nduve nu ñuhú. Yahá cuan ta chiñi noo ndusu cha catyí chii: “Saulo, Saulo, ¿ñáá tuhun cha chicá nyicon chii tyehe caa?” catyí ndusu cuan chii. ⁸Tyicuan ta ndacá tuhun chi ra ta catyí: “¿Yóó yoho tata?” Ta catyí ra chii: “Yuhu cuví ra Jesús, ra ñuu Nazaret, ra chicá nyicon chi”, catyí ra. ⁹Ndi ra cha cuahan coyo chihin canyehé ra ñuhú cuan, ta nayuhvj ra. Soco ña cachiñj ra ndusu ra cha cahán chihin. ¹⁰Tyicuan ta quichahá catyí yuhu chi ra: “Sutu Mañi yuhu, ¿ñáá cha tahán chi sacuví?” Ta catyí ra chii: “Ndicuita ta cuahán nya Damasco. Ta yucuan cucatyí noo ra chuun tandihí cha tahán chi sacuvun”, catyí Sutu Mañi yo chii. ¹¹Ta vatyi nducuj saha ñuhú cuan, ra tahin cayindahá ndahi ta cachinyacá ra chii nya Damasco.

¹²Ta yucuan iyó noo ra cha nañi Ananías. Ta sacahnú xaan ra chi Nyoo cuhva catyí ley cha tyaá ra Moisés. Ta tandihí ñu Israel cha iyó Damasco catyí ñu vatyi vaha xaan ñáyivi cuví ra Ananías. ¹³Quichj nyehé ra cuan chii. Ta cuhva cha chaá ra, catyí ra chii: “Yañi Saulo, nanyehé inga chaha”, catyí ra chii. Ta caa cuhva ri cuan nanyehj. Ta cuví nyehi chi ra Ananías cuan. ¹⁴Ta catyí ra chii: “Nyoo cuenda sutu yo nacachj ra chuun nyata ityi chata ca, vatyi coton cuhva cuñi ra, ta nyehun chi ra Jesucristo vatyi vaha ra, ta cuiñun ndusu ra. ¹⁵Vatyi yoho cuacahun tuhun ra nuu tandihí ñáyivi. Cuanacatyun cha nyehun ta cha chiñun. ¹⁶Ta vityin, ma cuatu con. Ndicuita ta condutyon. Ta çacan tahvun chi Sutu Mañi yo tyi cuasandachi ra cuatyun”, catyí ra Ananías chii.

Nu nacatyí ra Pablo yoso caa chaha Nyoo tyiño chi ra vatyi cuhun ra inga ñuu cucahan ra tuhun ra Cristo

¹⁷Yahá cuan ta cuanuhin Jerusalén ta cuhva cha nachaj, chahin vehe ñuhu cahnu chicaoçan tahvi. Ta nyehj noo visión. ¹⁸Nyehj chi Sutu Mañi yo. Ta catyí ra chii: “Şanumi. Qujta cha numi ri Jerusalén vatyi ma chino iñi ñu tuhun cha cucahun”, catyí ra chii. ¹⁹Tyicuan ta quichaha catyí yuhu

chi ra: “Sutu Mañi yuhu, maa ñu chitó ñu vatyi yuhu chahin tandihí vehe ñuhu. Ta tñin chi ñu chinó iñi chuun, ta tyihj chi ñu vehe caa ta cañi chi ñu. ²⁰Ta quivi chañi niñi ra Esteban ra cha cahán cuendon, yuhu ñandihí nyaí yucuan. Ta ndoj vaha cha chahñi ñu chi ra. Ta sahaacumj sahna ra cha cachahñj chi ra”, catyí yuhu chi Sutu Mañi yo. ²¹Tyicuan ta catyí ra chii: “Cuahán, vatyi tachí chuun nu cañi, nu nyicu ñu cha ñima ñu Israel cuví”, catyí Sutu Mañi yo chii.

Nu nyaá ra Pablo ndaha ra comandante cuenda ñuu Roma

²²Iha ri tyasohó ñu tuhun cahán ra Pablo. Tyicuan ta quichahá canachaá ñu ta catyí ñu:

—¿Cahñi ndo chi ra chiña! Ña tahán chi coo ra ñayivi —catyí ñu.

²³Ta canachaá ca ñu. Ta sacaá ñu sahna ñu. Ta sacaá ñu ñiyaca nu tatyi cha cuenda cha xaan xaan cuñi ñu. ²⁴Yucuan chaha comandante cuan catyí ra na cutyihí sindaro chi ra chichi cuartel. Ta tachj ra tyiño na cañi ra chi ra, vatyi cuñi ra cha quita cha ndaa ñáá tuhun cha canachaá ñáyivi siqui ra cha tyicuan caa. ²⁵Soco cha yahá cachahñj ra chi ra ta cuacañi ra chi ra, tyicuan ta ra Pablo nacatyí ra chi capitán cha nanyaá yucuan:

—¿Atuyó ityi chi nyoho cha cañi ndo chii? Vatyi yuhu ra cuenda ñuu Roma cuví ta siin ri ta cutuñi ca chii nu juez —catyí ra Pablo chi ra.

²⁶Cuhva cha chiñj capitán cha cahán ra Pablo, chahán ra chisacotó ra chi comandante. Ta catyí ra chi ra:

—Saha cuenda chuun chihin cha nyacuvún. Vatyi ra cuan, ra cuenda ñuu Roma cuví ra —catyí ra chi ra.

²⁷Tyicuan ta comandante cuan cuahán ra nu nyaá ra Pablo. Ta ndacá tuhun ra chi ra tatu ndicha vatyi ra cuenda ñuu Roma cuví ra. Ta ra Pablo catyí ra vatyi ican. ²⁸Tyicuan ta catyí comandante cuan chi ra:

—Yuhu cuaha xaan xuhun tyiyahvj ta nanduvj noo ra cuenda Roma.

Ta ra Pablo catyí ra:

—Soco yuhu ra cuenda Roma cuví nyata caquj —catyí ra.

²⁹Ta tyicuan caa ta sindaro cha cuacañi chi ra canyahá ra ta cuahán coyo ra. Ta nyacua nya comandante ta nayuhvj ra cha cuenda cha chahñj ra chi ra chihin cadena. [Vatyi cuatyí cuví cha sacuví ra cha tyicuan caa chihin noo ra cuenda ñuu Roma.]

Nu nanyaá ra Pablo nu candu in ri ra Israel

³⁰Tuvj inga quivi ta comandante cuan cuñi ra coto ra ñáá cuatyí tyaá ñu Israel chaha ra Pablo. Ta ndachí ra cadena cha nuhñi ra. Ta tachj ra tyiño na ndu in ri ra

cuví nuu chi tata sutu, ta tandihi ra cuenda junta. Tyicuan ta tava ra chi ra Pablo vehe caa ta chinyaca ra chi ra nu iyó junta cuan.

23

¹Ta ra Pablo nyehe ra chi tandihi ra chihin cha ña cahan nuu ra, ta catyí ra chi ra:

—Nyoho ra yañi yo, nyacua nya quivi ihya iyó vahi nuu Nyoo ta ñahri cha ña vaha sacuvi nuu ra —catyí ra Pablo.

²Tyicuan ta ra Ananías ra cuví nuu chi tata sutu tachí ra chi ra nyicú yatyin ri nu nyaá ra Pablo, na nacañi ra ndaha yuhu ra. ³Soco ra Pablo nacahan ra nu cahan ra ta catyí ra:

—¡Xihna ca chi maun cucañi Nyoo, vatyi sahá xaun tyi ra vaha cuvún nyaún chiña! ¿atu cutuñi chii nuun tari cuhva catyí ley? ¿Ñáá tuhun cha tachun nacañi ra chii? ta ñima tyicuan caa catyí ley —catyí ra Pablo.

⁴Tyicuan ta ra canyicu yucuan catyí ra chi ra:

—Ña vaha cha cahún chi ra cuví nuu chi tata sutu cuenda Nyoo —catyí ra chi ra Pablo.

⁵Tyicuan ta ra Pablo catyí ra:

—Yañi yuhu, ña chite tatu ra cuví nuu chi tata sutu cuví ra. Vatyi catyí tuhun Nyoo tyi ma cahan ña vaha yo siqui ra cuví tyiño ñuu yo —catyí ra.

⁶Tyicuan ta tuví iñi ra Pablo vatyi suhva ra cuenda junta cuan, yihí ra cuenda ityi ra cuví saduceo. Ta inga ra yihí ra cuenda ra cuví fariseo. Tyicuan ta cahan ra chihin cha ñihi ndusu ra ta catyí ra:

—Nyoho yañi, yuhu ra fariseo cuví tari suti. Ta cutuñi chi nuu ndo vatyi chinó iñi tyi nandotó ñu chihí —catyí ra Pablo.

⁷Cuhva cha catyí ra tuhun ihya, ra fariseo ta ra saduceo, quichaha candatuhun tahan ra suri chihin tahan maa ra, ta cacusiin ra. ⁸Vatyi ra saduceo catyí ra vatyi ña nandotó ndiyi. Ta ni yori ángel ta ni yori tatyí ña vaha iyó catyí ra. Soco ra fariseo chinó iñi ra tandihi ihya. ⁹Tandihí ra vaa ri ca cananduví ra. Ta ndicuita ra fariseo, ra sacuahá cuenda ley ra Moisés, ta catyí ra:

—Nyehe xihna ndo, ñahri cha ña vaha sacuvi ra ihya. Soco tatu noo ángel cahan chihin ra, saha yo cuenda coto vaha siqui Nyoo cahan ña vaha yo —catyí ra.

¹⁰Cha chiñi ra tuhun ihya, vaa ri ca cananduví ra. Nyacua nayuhví comandante cuan coto cahnya cuatyí ra chi ra Pablo. Yucuan chaha tachí ra tyiño na tava sindaro chi ra Pablo nu nyicú ra, ta cunanyaca ra chi ra nya cuartel. ¹¹Ta cha cuaa cuan tuví Sutu Mañi yo nuu ra Pablo ta catyí ra chi ra:

—Sanduní iñun, Pablo. Vatyi tari cahún tuhun Jerusalén ihya, tyicuan caa tucu cucahan tucun nya ñuu Roma —catyí Sutu Mañi yo chi ra Pablo.

Nu tyaá ra Israel cuhva cahñi ra chi ra Pablo

¹²Cha inga quivi, suhva ra Israel catyihí tahan ra tuhun. Catyí ra vatyi ni ma cacachi ra, ni ma coho ra nyacua nya cahñi ra chi ra Pablo. Ta nya noo ra ma sacuvi tyicuan caa na sanaa Nyoo chi ra siqui ñuhu ñáyivi, cacatyí ra. ¹³Yaha ca uvi xico ra catyihí tahan tuhun ihya nuu Nyoo. ¹⁴Chahan coyo ra nu nyicu ra cuví nuu chi tata sutu ta ra cacuvi mandoñi cuenda ñu Israel. Ta catyí ra chi ra:

—Nyuhu ñin ri tuhun cahan ndi nuu Nyoo vatyi ma cachi ndi ta ni ma coho ndi cha ni ri ca cha ma cahñi ndi chi ra Pablo. Ta na sanaa Nyoo chi ndi tatu ma sacuvi ndi tari cuhva catyí ndi. ¹⁵Ta vityin nyoho sacuhun ndo tuhun chi comandante. Catyí ndo chi ra na quichi nyaca ra chi ra Pablo nuu ndo ityaan. Saha ndo tuhun vatyi cuasandaa vaha ndo tyiño, ta nyuhu cuatu tuhva ri ndi nu yahá ra ta cucañi ndi chi ra —catyí ra chi ra.

¹⁶Soco sehe cuhva ra Pablo chiñi cue cha cahan ra. Ta chahan cue chisacoto cue chi ra Pablo nya cuartel. ¹⁷Tyicuan ta ra Pablo cana ra chi minoo capitán. Ta catyí ra chi ra:

—Cuanyaca chi ra cuehe luhlu ihya nuu comandante vatyi iyó noo tuhun cuñi cue sacoto cue chi ra —catyí ra Pablo chi ra.

¹⁸Tyicuan ta chinyaca capitán cuan chi cue nuu comandante. Ta catyí ra chi ra:

—Ra Pablo cha ñohó vehe caa cana ra chii ta catyí ra chii vatyi quichi nyaque chi ra cuehe luhlu ihya vatyi cuñi cue cahan cue chuhun —catyí ra chi ra.

¹⁹Tyicuan ta tñin comandante ndaha ra cuehe luhlu cuan ta tava siin ra chi cue ta catyí ra chi cue:

—¿Ñáá túhun cuñún catyun chii?

²⁰Ta ra cuehe luhlu cuan catyí cue chi ra:

—Ra Israel catyihí tahan vaha ra tuhun vatyi catyí ra chuun na sacuhun chi ra Pablo nu iyó junta tyaan. Vatyi casaha ri maa ra cha cuñi ra cha cutuñi vaha ca chi ra. ²¹Soco ma chino iñun chi ra vatyi yaha ca uvi xico tahan ra nyatú xehe chi ra ityi. Ta tyanaha ra chihin nuu Nyoo vatyi ma cachi ra ta ma coho ra nyacua nya cahñi ra chi ra Pablo. Ta tatu ña cuví cahñi ra chi ra, vaha taxín ca nacúvi noo noo maa ra na. Ta vityin nyatú tuhva ra coto ra ñáá cucatyí maun —catyí cue.

²²Tyicuan ta catyí comandante chi ra cuehe luhlu cuan vatyi yori chihin cahan cue tuhun cha catyí cue chi ra. Yaha cuan ta natachí ra chi cue.

Nu cacu ra Pablo ndaha ra Israel ta cuahan ra nuu ra gobernador cha nañi Félix

²³ Tyicuan ta comandante cana ra chi uvi capitán, ta catyí ra chi ra:

—Sanduvaha ndo chi ndo vatyí cuhun ndo Cesarea cuhva caa ñin cha cha cuaa. Cuacuhun uvi ciento sindaro chihin chaha ra, ta uñi xico uchi ra chihin caballo, ta uvi ciento ra cuiso ra lanza. ²⁴ Sanduvaha ndo caballo coso ra Pablo. Ta saha cuenda vaha ndo chi ra ityi cuahan ndo na chaa vaha ra nu nyaa ra Félix gobernador—catyí comandante chi capitán cuan.

²⁵ Tyicuan ta tyaá ra noo tutu quindaha ra cuhun ra. Ta tuhun cha tyaá ra nu carta, ican cuví ihya:

²⁶ “Yuhu ra Claudio Lisias sacuhin noo carta ihya chi yoho, tata gobernador Félix, vatyí vaha ñáyivi cuvun. Ihya vachi nocumi chuun.

²⁷ Ra Pablo ihya, catiñ ra Israel chi ra. Ta cacuñi ra cacahñi ra chi ra. Soco cuhva cha chite vatyí ra cuenda ñuu Roma cuví ra, chahin chihin sindaro ta sacaquí chi ra. ²⁸ Ta vatyí cuñi cote ñáá cuatyí tyaá ñu siquí ra, chinyaque chi ra nu iyó junta ra cacuví mandoñi ñu Israel. ²⁹ Soco cuenda ley ri maa ñu cuví. Ta cha cuenda ley yoó, ñahri cuatyí ra ta cahñi yo chi ra. Ta ni ri ña tahán chi cohon ra vehe caa. ³⁰ Soco vatyí ñihí tuhun vatyí ra Israel canducu cahñi ra chi ra, yucuan chaha tachí chi ra nuu yoho. Ta catyí tiqui chi ra cha tyaá cuatyí siquí ra, na cuhun ra nu nyaun na cacan ra cuatyí ra nuu maun”, catyí ra Claudio chi ra Félix nu tutu cha tyaá ra.

³¹ Tyicuan ta quehen sindaro chi ra Pablo tari cuhva catyí ra Claudio chi ra, ta chinyaacá ra chi ra nya Antipatris suri maa cha cuaa cuan. ³² Cha inga quivi sindaro cha cuahan chihin chaha, canandichí coyo ra nya cuartel. Ta ra cha cayosó caballo cuahan coyo ca ra chihin ra Pablo. ³³ Ta cuhva cha chaá coyo ra ñuu Cesarea, cachaha ra carta cuan chi ra Félix, gobernador, ta cachaha cuenda ra chi ra Pablo chi ra ñandihí. ³⁴ Cha yahá cha sacuahá ra Félix carta cuan, quichaha ndacá tuhun ra chi ra Pablo nya ñuu ra. Ta cha chito ra vatyí ra Cilicia cuví ra ³⁵ ta catyí ra chi ra:

—Na quichi xihna ra tyaá cuatyí chahun. Tyicuan ta cusandai tyiñon—catyí ra chi ra.

Tyicuan ta tachí ra tyiño na casaha cumi sindaro chi ra nya vehe tyiño cha savahá ra Herodes ta cha naha.

24

Nu cutuñi chi ra Pablo nuu ra Félix

¹ Yahá ohon quivi ta ra Ananías, ra cuví nuu chi tata sutu, chaá ra ñuu Cesarea cuan chihin suhva ra cacuví mandoñi, ta chihin noo ra cahan chaha ñáyivi cha nañi Tértulo.

Chaá coyo ra nuu ra gobernador Félix vatyí cacan ra cuatyí chaha ra Pablo. ² Tyicuan ta tachí ra Félix na quichi nyaca sindaro chi ra Pablo. Tyicuan ta quichaha chican ra Tértulo cuatyí chaha ra Pablo. Ta catyí ra chi ra Félix:

—Tyahvi nyoo chuun, tata gobernador. Vatyí taxi ri iyó ñuu ndi, ta vaha iyó ndi vatyí yindaha vahun ñuu ndi. ³ Nacuhvá xaan ndi tyahvi nyoo chi yoho tata Félix, vatyí yoho, vaha ñáyivi cuvún. ⁴ Soco ña cuñi sayangue chuun chihin cha cuaha tuhun cahin, yucuan chaha chiquén noo tumañi ñi chuun na cuñun suhva tuhun cuacahan ndi. ⁵ Vatyí chitó ndi tyi rayi ihya ñima ra vaha cuví ra, noo cuehe cuví ra. Ta tandihí ri ityi sanaquiquí ra chi ñu Israel. Ta ican ra cuví xiñi noo ityi ñáyivi nycón chi ra Jesús ra ñuu Nazaret. ⁶ Nyacua cuñi ra sacuví ra noo cha ña tahán chi vatyí ña sahá ra ñáyivi vehe ñuhu cahnu. Ta nyuhu tiñi ndi chi ra, tacuhva tachi tuñi ndi chi ra tari cuhva ley maa ndi. ⁷ Soco comandante Licias chasi ri ra ta chihin cuaha fuerza ta tinyaa ra chi ra chi ndi. ⁸ Ta catyí ra vatyí tatu cuñi ndi cacan ndi cuatyí chaha ra, cuñi chi cha cacan ndi nuu maun. Nyehe maun. Sannahmon chi ra ta coton tyi ndicha cha catyí ndi—catyí ra Tértulo.

⁹ Tyicuan caa tucu ra Israel cha canyicu yucuan, catyí ra vatyí ndicha tandihí tuhun cahan ra Tértulo. ¹⁰ Tyicuan ta ra Félix savahá ra seña chi ra Pablo vatyí nacahan ra. Ta ra Pablo quichaha catyí ra:

—Chité tyi cha cuaha xaan cuiya nyacá ñahun ñuu ihya. Ta yucuan chaha si vavaha cuñi vatyí nuu maun cuacutuñi chi yuhu vityin. ¹¹ Tatu ndaca tuhun cuacoton tyi cha iyó ri noo uchi uvi quivi cha chahin Jerusalén. Chahin yucuan vatyí sacahni chi Nyoo. ¹² Ta yori chihin cuví yuhi. Ni ña sanaquiquí chi ñáyivi chichi vehe ñuhu cahnu. Ñahri maa sacuví, ni ri chichi vehe ñuhu, ni ri chichi ñuu. ¹³ Ta cuatyí cha tyaá ra ihya siquí, ña ndicha maa. ¹⁴ Soco noo cha catyí chi ndo vityin vatyí yuhu sacahni chi Nyoo cha sacahnú sutu chahni. Sacahni chi ra cuhva sañahá ra Jesucristo. Ta catyí maa ra ihya tyi ña vaha. Soco yuhu chinó ñi ndi maa tuhun cha nyaá nu libru ley cha tyaá ra Moisés. Ta chinó ñi tandihí tuhun catyaa ra profeta cuenda Nyoo ñandihí. ¹⁵ Ta suri chinó ñi vatyí Nyoo cusandoto ra ñáyivi chihí, ñu vaha ta ñu quini iyó, tari chinó ñi tucu maa ra ihya. ¹⁶ Ta yucuan chaha tyicuan ri nduquí cuhva cha cachí cói nuu Nyoo, ta nuu ñáyivi ñandihí.

¹⁷ Cuaha cuiya chica noj inga ityi. Yahá cuan ta cuanuhí nya Jerusalén ñui vatyí nacuhva cuende xuhun chi ñu ndahvi ñu yihí cuenda Nyoo, ta vatyí cuhve noo cha cuhve chi Nyoo. ¹⁸ Yuhu tyicuan caa sacuví

chichi vehe ñuhu cahnu, ta suhva ra Israel ityi Asia, nyeha ra chii yucuan cha yahā cha sandundi chii nuu Nyoo cuhva catyí maa nu ley ndí. Soco ña cuaha ñáyivi nyicu, ta ni ña naquiquí ñu. ¹⁹Ican ra cha nyehē chii cuhan, cuñi chí cha quichi ra ta cuhva ra cuenda tatu iyó cha sacuví. ²⁰O ñacatyí maa ra cha canyicu ihya tatu nañihí ra cuatyí yuhu quiví cutuñí chii nuu ra nu chiyo junta ra cacuví nuu chí ñu Israel. ²¹O vasi cuví chí cha cuenda noo ri tuhun cahñ chihin nuu ra nyicú junta cuan tyehe caa: “Nyoho nducú ndo cuatyí चाहि cha cuenda tyi chinó iñi cha nandotó ñáyivi chihí” —catyí ra Pablo.

²²Ta ra Félix chitó vaha ra yoso caa cuahan tuhun ñu nyicón chí ra Cristo. Ta catyí ra chí ra canyicu cuan:

—Vaha ri vityin. Na quichi xihna comandante Lisias. Tyicuan ta cusandai tuhun ndo —catyí ra.

²³Tyicuan ta tachi ra Félix chí capitán na cunatyihí ra chí ra Pablo vehe caa. Soco ma ñihi xaan saha cumi ra chí ra. Ta na cuhva ra cuhan ra tahan ra nu ñohó ra, ta cahan ra chihin ra.

²⁴Yahā suhva quiví ta nachaā ra Félix inga chaha chihin cu Drusila ñasihi ra. Ta cuví ña ñaha Israel. Ta tachi ra na quichi ra Pablo vatyí cuñí ñu tyasoho ñu yoso caa tuhun cha chinó iñi ra chí ra Jesucristo. ²⁵Ta ra Pablo cahan ra tuhun yoso caa tahán chí sacuví yo cha vaha, yoso caa cunyaca ñaha maa yo chí yo ta ma sacuví yo cha quíñi caa. Ta cahan tucu ra yoso caa cucutuñi chí yo nuu Nyoo quiví tahan chí. Ta ra Félix yuhví xaan ra cuví, ta catyí ra chí ra:

—Cuahan vityin. Ta na nanuña xihne, ta cana mai chuun inga chaha —catyí ra chí ra.

²⁶Ta ra Félix cuñí maa ra tyi ra Pablo cucuhva ra xuhun chí ra, tacuhva vatyí numi ri saña ra chí ra. Yucuan chaha vatyí tyito tyito ri canā ra chí ra, vatyí ndatuhun ra chihin ra. ²⁷Uví cuiya yahā, tyicuan ta nicunyaa ra Porcio Festo cuví ra gobernador tyiño nuu ra Felix. Ta ra Felix cuñí ra cuvaha ra nuu ra Israel ta sandoo ra chí ra Pablo vehe caa.

25

Nu cutuñí chí ra Pablo nuu ra Festo

¹Tyicuan ta cha cu uñi quiví cha cuví ra Festo tyiño, quitā ra ñuu Cesarea cuan ta cuahan ra nya ñuu Jerusalén. ²Chaa ra Jerusalén, tyicuan ta chaā coyo ra cuví nuu chí tata sutu ta ra cuví tyiño ñu Israel ta chahican ra cuatyí chaha ra Pablo. ³Ta chican ra noo tumañi iñi cahnu chí ra Festo. Cuñí ra vatyí tachi ra Festo tyiño na quichi nyaca sindaro chí ra Pablo nya Jerusalén. Vatyí maa ra cuñí ra cahñi ra chí ra ityi vachi ri ra. ⁴Soco ra Festo nacahan ra, ta catyí ra:

—Ra Pablo ñohó ra vehe caa nya Cesarea. Ta yuhu tyái cuhva cha cunuhi yucuan cha numi ri. ⁵Yucuan chaha, nyoho cha cuví ndo tyiño ñuu ihya, cuhan maa ndo chihin. Tyicuan ta cuví cacan ndo cuatyí chaha ra tatu iyó cha sacuví ra —catyí ra Festo chí ra.

⁶Uña o uchi ri quiví chí nyaa ra Festo Jerusalén, ta cuanuhū ra Cesarea. Ta cha inga quiví chaā ra chichi vehe tyiño ra vatyí cutuñi chí ra ca iyó cuatyí nuu ra. Tyicuan ta canā ra chí ra Pablo. ⁷Cuhva cha quihví ra Pablo, catuhvā ra Israel cha quichi coyo nya Jerusalén, ta quichahā catyaa ra cuatyí cahnu siqui ra. Soco ñahri maa cha ndaa catavā ra. ⁸Tyicuan ta cahan ra Pablo ta catyí ra:

—Yuhu ni noo cuatyí ta sacuví que, ni siqui ley ñu Israel, ni siqui vehe ñuhu cahnu Jerusalén, ni siqui rey cahnu Roma —catyí ra.

⁹Soco vatyí cuñí ra Festo ndoo vaha ra chihin ra Israel, ndacá tuhun ra chí ra Pablo:

—¿Atu cuñún cuhan Jerusalén vatyí sandaí tyiñon nyicuan? —catyí ra chí ra.

¹⁰Ta ra Pablo catyí ra:

—Cha nyai nu maun. Ta maun cuví ra cuví tyiño cuenda rey cahnu Roma. Ihya cuví nu tahán chí cutuñi chí, vatyí ra cuenda ñuu Roma cuví. Ta chitó vahun tyi ñahri maa sacuví chí ñu Israel. ¹¹Tatu sacuví noo cuatyí cahnu cha tahán chí cahñi ndo chí, ma nduquí cuhva caqui. Soco tatu ña ndicha tuhun cha cahan ra Israel ihya, yori cha iyó ityi chí cha cuhva cuenda chí chí ra cuñi cahñi chí. Chiquén vatyí cuhin nuu rey cahnu vatyí cutuñi chí nuu maa ra —catyí ra Pablo chí ra Festo.

¹²Tyicuan ta ra Festo cha yahā cha cahan tahan ra chihin ra tyinyeé chí ra chihin tyiño, ta catyí ra chí ra Pablo:

—Chicón cha cutuñi chuun nuu rey cahnu. Vaha. Cua cuhan nuu maa ra —catyí ra chí ra.

Nu nacatyí ra Festo tuhun ra Pablo chí ra Agripa

¹³Yahā suhva quiví, tyicuan ta chaā rey Agripa chihin cu Berenice nya Cesarea, vatyí cuacuhva ñu nocumi chí ra Festo. ¹⁴Quita suhva quiví chinyicu ñu yucuan, ta nacatyí ra Festo tuhun ra Pablo chí rey. Ta catyí ra:

—Iyó noo rayií ihya cha sandoo ra Félix vehe caa. ¹⁵Ta cha chahñ Jerusalén, ra cuví nuu chí tata sutu, ta ra cacuví mandofñi ñu Israel chahā cuenda ra noo tutu cuatyí ra, ta chican ñu na cuví ra. ¹⁶Ta catyí yuhu chí tandihí ra vatyí ña tuhvá ra cuví tyiño cuenda Roma chahñi chí noo ñáyivi tatu ta cahan tahan ca ñu ta nducu ñu cuhva sacacu ñu chí ñu. ¹⁷Yucuan chaha, quiví

quichi coyo ra cacuví nuu chi ñu Israel cuan, ña sacunaj cuhva. Ta cha inga quívi chahin vehe tyiño vatyí cutuñi chi ra cha cacahán ra tuhun. Ta tachí tyiño na quichi ra cuan. ¹⁸ Soco ra catyaá cuatyí síqui ra, ña cuaha maa tuhun cacahán ra. Ta cuñi maa yuhu vatyí cahnu cuatyí cuatyaa ra síqui ra. ¹⁹ Cuñi ra cuan cuatyí chihin ra cha cuenda tuhun costumbre, cuhva chinó ñi ñu Israel. Cahán ra tuhun noo ra cha nañi Jesús cha chihí. Ta ra Pablo catyí ra vatyí iyó ra. ²⁰ Ta ña chité yoso caa sacuví chihin tuhun cha tyicuan caa, ta ndaca tuhín chi ra Pablo tatu cuñi ra cuhun ra Jerusalén, vatyí cutuñi chi ra cuenda tuhun ihya. ²¹ Soco maa ra chicán ra cha cutuñi chi ra nuu rey cahnu Augusto nya Roma. Yucuan chaha ñohó ca ra vehe caa nyacua nya cuví tachi chi ra nuu ra Augusto —catyí ra Festo chi rey Agripa.

²² Tyicuan ta ra Agripa catyí ra chi ra Festo:

—Cuñi tucu yuhu cuiñi cha cahán ra cuan —catyí ra.

Ta ra Festo catyí ra chi ra:

—Tyaan cuiñun cha cahán ra —catyí ra chi ra.

²³ Tuví inga quívi ta chaá ra Agripa chihin cu Berenice. Iyo xaan caa ñu quíhví coyo ñu chichi vehe vatyí rey cuví ñu. Quíhví tucu comandante ta ra cacuví tyiño ñuu cuan. Tyicuan ta ra Festo catyí ra na quichi ra Pablo. ²⁴ Tyicuan ta quichaha catyí ra Festo:

—Yoho Rey Agripa, ta nyoho tata, cha nyicu ndo ihya. Nyehe ndo chi ra ihya. Tandihí ñu Israel ñuu Jerusalén ta ñu Cesarea cahan ñu síqui ra. Ta ña sandihí ñu cha catyí ñu chii vatyí tahán chi cuví ra. ²⁵ Soco cha cuenda yuhu ñahri cuatyí ra cha tahán chi cuví ra. Ta suri maa ra chicán cha cutuñi chi ra nuu ra Augusto. Yucuan chaha cutachi chi ra. ²⁶ Soco vatyí ñahri cuatyí ra ñihí, yucuan chaha ña ñihí tuhun tyai nu tutu cha cusacuhín chi ra nyacá ñaha chí yo. Yucuan chaha canę chí ra Pablo nuu ndo, ta nuu yoho Rey Agripa, tacuhva tyi ndaca tuhun chí ra ta cote ñáá cha tahán chi sacote chí rey cahnu. ²⁷ Vatyí ña vaha cha sacuhín chí ra tatu ñahri tuhun cahín ñáá cuatyí ra.

26

Nu quichaha cahán ra Pablo nuu rey Agripa

¹ Tyicuan ta ra Agripa catyí ra chi ra Pablo:

—Cuví cahun vityin —catyí ra chi ra.

Ta ra Pablo sandaa ra ndaha ra ta catyí ra tyeh caa:

² —Sií xaan cuñi vatyí cuví cahin nuu yoho, rey Agripa, ta cuví catyí mai chuun yoso caa tandihí cuatyí cha tyaá ra Israel síqui. ³ Vatyí, yoho chitón tandihí costumbre

cha iyó chí yo ñu Israel. Ta chitón tuhun tuhva yo cuví yuhu. Yucuan chaha chiquén chuun nacuíñi vahun cha cahín.

Nu catyí ra Pablo chi ra Agripa yoso caa ñáyiví ra cha ni cumañi ca quíhví ra cuenda ra Cristo

⁴ Tandihí ñu Israel chitó ñu yoso caa chiye nyata ni luhlí nya ñui. Ta chitó ñu cuhva chiye nya Jerusalén. ⁵ Ta suri chitó ñu vatyí nyata luhlí cuví noo fariseo. Ta ra fariseo vaha xaan caquichahá ra costumbre yo. Ta na catyí maa ñu tatu ña ndicha cha cahín. ⁶ Ta vityin nanyaí ihya ta cutuñi chii cha cuenda vatyí chinó ñi cha sanandotó Nyoo chí ñáyiví chihí, tari cuhva catyí ra chí sutu chahnu yo ta cha naha. ⁷ Ndi uchi uvi tahan ityí ñáyiví Israel ñu vachi tata sutu chahnu yo nyatú tucu ñu nyehe ñu tyi ndicha cusanandoto Nyoo chí ñáyiví chihí. Ta yucuan chaha nyita ri sacuví ñi tyiño nuu Nyoo sacahnu ñu chí ra ñicahñu ta cha cuaa. Vatyí suri cha cuenda tuhun ihya tyaá ra Israel cuatyí síqui vityin, yoho rey Agripa. ⁸ ¿O ña chinó ñi nyoho vatyí Nyoo sanandotó ra chí ñu chihí?

⁹ Ta quívi cuan suri mai chica xiñi vatyí vaha cha tachi tuñi chí ñáyiví chinó ñi chí ra Jesús ra ñuu Nazaret. ¹⁰ Ta tyicuan caa chínyacuví nya Jerusalén chihin ndusu yuhu ra cacuví nuu chí tata sutu. Ta cuaha ñu cha chinó ñi chí ra Cristo tyihí vehe caa. Ta tatu cachahñi ra chí ñu, vaha xaan cuñi. ¹¹ Cuaha chaha sanyehí tindoho chí ñu ta sahí fuerza chí ñu nacahan ña vaha ñu síqui ra Jesús. Tyeh caa chínyacuví tandihí ri vehe ñuhu ñu Israel. Ta xaan xaan cuñi nyehi chí ñu. Ta chica nyiquen chí ñu nyacua nya inga ñuu.

Nu nacatyí tucu ra Pablo yoso caa nanduví ra, ra cuenda ra Cristo

(Hch. 9.1-19; 22.6-16)

¹² Ta yucuan chaha cuahin quívi cuan nya ñuu Damasco chihin ndusu yuhu ra cuví nuu chí tata sutu. ¹³ Soco yoho Rey, ityí cuahin ñáá cuhva ora, nyehí noo nduva ñuhu quichí andívi, ñihi ca ican saha ñuhu ñanyii. Sandundichin chí nicachico nu cuahin ta ra cuahan covyo chihin. ¹⁴ Tyicuan ta tandihí ndi nduva ndi nu ñuhú. Ta chihí noo ndusu cha cahán chihin, chihin sahan yo hebreo, ta catyí chí chii: “Saulo, Saulo, ¿ñáá tuhun cha chicá nyicon chii? Tari noo quiti chañi nyaa ti chata cha xaan cha saquehén ityí ra chí ti, tyicuan caa cuñún sañicuehun suri chí maun”, catyí ndusu cuan chii. ¹⁵ Tyicuan ta catyí yuhu: “¿Yóo yoho tata?” Ta Sutu Mañi yo catyí ra chí: “Yuhu cuví ra Jesús, ra cha chicá nyicon chí. ¹⁶ Ndicuita ta cuñanyaun, vatyí yuhu tuví nuun tacuhva vatyí cuasacuvun tyiño nuí, vatyí cuacuvun cha ndaa cha nyehun

vityin. Ta cucuvun cha ndaa cha nyehun chii nu cuahan ca chi. ¹⁷ Cusacaqui chuun ndaha ra Israel, ta ndaha ra cha ñima ra Israel cuví. Nu nyicu ñu tachí chuun vityin. ¹⁸ Vatyí na ñuñon nuu ñu, ta sañahun chí ñu cha ndicha, ta ma sacuvi ca ñu cha ña vaha. Soco sacuvi ñu cha vaha nu ndichin Nyoo vatyí quita ñu chichi ndaha ra ña vaha ta ndihvi ñu ndaha Nyoo tacuhva vatyí tyicuan caa cusahi tichahu iñi cuatyí ñu ta cunaquehen ñu cha vaha cha chahá Nyoo chí ñáyivi yihí cuenda ra”, catyí Sutu Mañi yo chí.

¹⁹ Yucuan chaha rey Agripa, sacuví cha catyí Sutu Mañi yo ra Jesucristo chí nu sañahá ra chí ra chí. ²⁰ Ta cahín tuhun ra xihna ca chíhin ñu nyicu ñuu Damasco. Yahá cuan ta cahín chíhin ñu ñuu Jerusalén ta tandihí ityi Judea. Ta cahín chíhin ñu cha ñima ñu Israel cuví ñandihí. Sacote chí ñu nandu uvi iñi ñu cuatyí ñu, ta nandihvi ñu chichi ndaha Nyoo cha ndicha cuii. Na nasama ñu cuhva iyó ñu chíhin cha sacuvi ñu cha vaha. ²¹ Cha cuenda ihya catyín ra Israel chí chichi vehe ñuhu cahnu. Ta cacuñi ra cahni ra chí. ²² Soco maa Nyoo tyinyeé chí. Ta iyó que nya vityin. Ta cahín tuhun Nyoo chíhin tandihí ñáyivi, ñu ndahvi ta ñu tyayí. Ta ña cahín inga tuhun cha ña catyí ra Moisés ta ra profeta, vatyí cucuvi nu cuahan ca chí. ²³ Vatyí catyí ra vatyí tahán chí cha cunyehe ra Cristo tindoho. Ta cha yahá cha cúvi ra, cunandoto ra. Ta ican ra cuví ra cunandoto xihna ca. Ta cusacata ra tari noo ñuhv ityi cuahan ñáyivi vatyí sacotó ra yoso caa cacu añima ñu, ñu Israel ta ñu cha ñima ñu Israel cuví —catyí ra Pablo.

Ra Pablo cuñí ra cha nachino iñi rey Agripa ta cunyicon ra chí ra Cristo

²⁴ Cuhva cha catyí ra Pablo tuhun ihya, ra Festo canachaa ra, ta catyí ra:

—¡Loco yoho Pablo! cha cuenda cha cuaha xaan sacuahún ta ndulocon —catyí ra Festo chí ra.

²⁵ Soco ra Pablo catyí ra chí ra:

—Ña loco yuhu, yoho tata Festo. Soco cha cahín, maa maa ri tuhun ndicha cuví. ²⁶ Ihya nyaá rey Agripa. Ta chitó vaha ra tuhun ihya. Yucuan chaha cahín chíhin cha ña cahán nui. Vatyí chité tyi chító tucu maa ra tuhun ihya, vatyí ñima tuhun xehe cuví. ²⁷ Yoho rey Agripa, ¿atu chinó iñun tuhun cha catyaa ra profeta cuenda Nyoo ta cha naha? Yuhu chité vatyí chinó iñun —catyí ra Pablo chí ra Agripa.

²⁸ Tyicuan ta ra Agripa catyí ra chí ra:

—Suhva cuii ri ca ta nachino iñi tuhun cahun ta quihvi cuenda ra Jesús —catyí rey Agripa chí ra Pablo.

²⁹ Tyicuan ta ra Pablo catyí ra:

—Cuví ri suhva, o cuví ri cuaha soco chí Nyoo chiquén vatyí na nduvi ndihun ñáyivi cuenda ra Jesús tari mai. Ta ñima yoho ri, soco tandihí ri ñáyivi, ñu chíhi tuhun cahín. Noo ri cha ña cuñí, cha quihí cadena ndahan do tari mai vityin —catyí ra Pablo.

³⁰ Cha yahá cha catyí ra Pablo tuhun ihya, ndicuitá rey ta gobernador ta cu Berenice, ta tandihí ra canyicu yucuan. ³¹ Ta cha yahá quita coyo ñu, ta cacatyí ñu chí tahan ñu:

—Ñahri cuatyí ra ihya cha ñihi xaan. Ña tahán chí cúvi ra. Ta ni ña tahán chí cohon ra vehe caa —catyí ñu.

³² Ta ra Agripa catyí ra chí ra Festo:

—Cuví saña yo chí ra, tyehe ta ñima maa ra chicán cha cutuñi chí ra nuu ra cuví rey cahnu —catyí ra.

27

Nu tachí ra Festo chí ra Pablo nya ñuu Roma

¹ Quiví cha catyaa ra Festo ta ra Agripa cuhva tyi tachí ra chí ndi nya ñuu Roma ityi Italia, nacuhva cuenda ra chí ra Pablo ta suhva ca ra chí noo capitán cha nañi Julio. Yihí ra noo batallón sindaro, cha nañi Cuenda Ra Augusto. ² Ta cuahan tucu ra Aristarco chíhin ndi ñandihí. Ra ñuu Tesalónica cha nyaá ityi Macedonia cuví ra. Tyicuan ta quihvi ndi chichi noo barcu cha quichi ityi ñuu Adramitio ta cahun chí ñuu cha nyicu yuhu tyañuhu ityi Asia. ³ Cha inga quivi chaq ndi puerto Sidón. Ta ra Julio vaha ñáyivi cuví ra chíhin ra Pablo. Ta chahá ra cha cunyehe ra chí ra tahan ra ñuu cuan. ⁴ Yahá cuan ta quita ndi Sidón ta casandaa ra sahna barcu cuan ta chíhin fuerza tatyí ri cuahan ndi. Ta vatyí caa tatyí siqui ndi yahá ndi chiyo xehe ca ñuhú Chipre. Vatyí ña ñihi xaan caa tatyí chiyo cuan. ⁵ Yahá sava ndi tyañuhu ityi nuu Cilicia ta Panfilia, ta chaq ndi noo ñuu cha nañi Mira ityi Licia. Ta noq ndi barcu cuan.

⁶ Yucuan nañihí capitán cuenda sindaro nonga barcu cha quichi nya ñuu Alejandría ta cuahan chí Italia. Ta catyí capitán na quihvi ndi barcu cuan vatyí cahun ca ndi nu cuahan ndi. ⁷ Cuaha quivi chica ndi cuee ri. Ta chíhin cha cuaha tindoho ta chaq ndi yatyin ri ñuu Gnido. Ta cha cuenda cha ñihi xaan caá tatyí, ña chahá chí cha cahun ndi ityi nuu, ta yahá ndi yatyin ri ñuu Salmón. Ta nacuco ndi ityi yuhu ñuhú Creta. ⁸ Nducu ndi cuhva cha cahun ndi yuhu tyañuhu cuan ta chaq ndi nu nañi Buenos Puertos yatyin ri ñuu Lasea.

⁹ Cha cuaha xaan quivi yahá ta cha yica xaan nanduví cha caca noo ndi ityi nu tyañuhu. Vatyí cha yahá quivi vico ayuno nu ña chachi ñu Israel. Ta cha cuyatyin yoo vichin. Yucuan chaha ra Pablo chahá ra

tuhun chi ra sacaca barcu cuan, ¹⁰ ta catyi ra:

—Nyoho ra canyicú ihya, cuiñi ndo tuhun cahín. Nyehí vatyi yica xaan cuhva cuahan yo. Ta tuví iñi vatyi cuaha xaan cusacunaa yo. Cunaá barcu ta cha nyisó chi ta nyacua nya maa yo ñandíhi. Vaha taxin ca nandoo yo ihya —catyi ra chi ra.

¹¹ Soco capitán cuenda sindaro cuan quichahá ca ra chi ra sacacá barcu chihin chitoho barcu ta ñima ca chi ra Pablo. ¹² Ña cuví yaha ndi yoo vichin yucuan tyi ñihi xaan tuhvá caa tatyí, ta yica xaan cuenda barcu. Yucuan chaha tandíhi ra ta catyi ra:

—Vaha ca cha quíta yo ihya ta nducua yo cuhva chaa yo nya ñuu Fenice suri ñuhú Creta ihya. Yucuan cuví noo nu vaha cun-yaá barcu vatyi nyaa ñuu cuan chiyo caña ñanyii —catyi ra.

Nu ñihi xaan caá tatyí nu tyañuhu

¹³ Tyicuan ta quichahá caa chiin tatyí cha quichi ityi sur. Ta cuiñi maa ra vatyi vaha xaan vatyi ñima tatyí ñihi cuví, ta cuví chuhun ra chihin barcu ra nicañi ri yuhu tyañuhu ñuhú Creta cuan. ¹⁴ Ña cuaha ri chicá ra ta quichahá caa noo tatyí xaan cha quichí ityi norte. Ta tyandahá chi barcu inga ityi. ¹⁵ Ta ña cuví ca chuhun ndi ityi nuu ca cha cuenda tatyí cuan. Ta saña ndaha ndi nacuhun maa barcu chihin tatyí nya ityi cuiñi maa chi. ¹⁶ Ta tyandahá tatyí chi ndi ityi chiyo satyin noo ñuhú luhlu cha nañi Clauda. Ta chihin cha yii xaan naquehen ndi lancha luhlu cha xitá quiñoho barcu, ta natyihí ndi ityi chichi barcu coto nyee chi. ¹⁷ Ta cha yahá natyihí ra lancha cuan, yucuan ta chahñi vaha ra yoho nicachico barcu vatyi coo fuerza chi. Ta yuhví ra coto tahan ra nu yaxin ndutya ta quihvi barcu cuan chichi ñiti vita iyó yuhu tyañuhu nu nañi chi Sirte, yucuan chaha sanoó ra sahma barcu ta chahá ra cha chuhun barcu yoso cuhva tyandahá tatyí. ¹⁸ Ta cha inga quivi suri ñihi xaan caá tatyí. Yucuan chaha quichahá catuchi ra carga nu tyañuhu. ¹⁹ Ta cha cu uñi quivi quehen ndi ndaha tyiño barcu ta tyihí ndi nu tyañuhu. ²⁰ Ta cuaha quivi ña nyehe ndi ni ñanyii ta ni tiño. Ta ñihi tatyí nañi chi ndi. Yucuan chaha ña tyaá ca ndi cuhva cha cacu ndi.

²¹ Cuaha quivi yahá ta ña chachí ndi. Tyicuan ta catyi ra Pablo chi tandíhi ra:

—Nyehe ndo, vaha ca tyehe ta quichahá ndo chii quivi cuan, ta ndoo taxin yo Creta cuan. Ta vityin nyehé xaan yo tindoho ihya ta cuaha ndaha tyiño sacunaá yo. ²² Soco vityin ma caca xaan iñi ndo vatyi ni noo yo ta ma cuví yo. Barcu ihya cuví cha cunaa. ²³ Vatyi Nyoo nyacá ñaha ra chii, ta sacuví tyiño nuu ra, sanyehe ra noo visión chii cuiñi. Ta tuví noo ángel nuí. ²⁴ Ta catyi ángel cuan

chii: “Ma yuhvun, Pablo. Vatyi cuiñi chi cha cahun tuhun Nyoo nuu rey cahnú Augusto nya Roma. Ta cha cuendon cusacacu Nyoo tandíhi ra canyicu chuhun chichi barcu”, catyi ángel cuan chii. ²⁵ Yucuan chaha nyoho cha ñohó ndo chichi barcu, sañi ndo iñi ndo. Vatyi yuhu chinó iñi chi Nyoo. Ta chitó vahi vatyi cuví tari cuhva catyi ángel cuan chii. ²⁶ Vasi cuanyee barcu soco cuachaa yo noo ñuhú luhlu —catyi ra Pablo chi tandíhi ndi.

²⁷ Noo cha cuaa quivi ndíhi chahun quivi chica ityi ndi nu tyañuhu, ñohó ndi nu tyañuhu Adria. Ta chata cuan chata ihya tyandahá tatyí chi barcu ndi nu tyañuhu. Ta vasi ora ñuu cuví cuhva cuan ta tuví iñi ra sacacá barcu cuan tyi cuachaa ndi noo ñuhú. ²⁸ Tyicuan ta tyicuhvá ra cha cono ndutya. Ta nyehe ra tyi oco chahun iñi tahan metro iyó. Cuahan ndi chiin ca ityi nuu ca. Ta tyicuhvá tucu ra inga chaha. Ta iyó oco ucha metro. ²⁹ Ta cayuhví ra coto nañi barcu cuan chata yuu. Yucuan chaha casanoó ra cumi tahan caa vee cha nyaa gancho nuu, ityi chata barcu. Ta ña iñi ca ra cha cundichin. ³⁰ Ta ra sacacá barcu cuan catyaa ra cuhva cacono xehe ra. Ta yucuan chaha quichaha casanoó ra lancha cuan nu ndutya ityi nuu barcu cuan. Ta sahá ri maa ra tyi inga caa casanoó ra. ³¹ Soco ra Pablo sacoto ra chi capitán ta chi sindaro ta catyi ra:

—Tatu ma ndoo ra cuan chichi barcu. Nyoho ma cuví cacu ndo —catyi ra chi ra.

³² Tyicuan ta sindaro cachahnya ra yoho lancha. Ta casanacava ra nu ndutya. ³³ Ta cha ñaa ca cuan ra Pablo catyi ra chi tandíhi ra:

—Cha iyó uchi cumi quivi cha ta cachi ca yo. ³⁴ Catyi chi ndo, na cachi yo vityin. Niñi xaan cuiñi chi cha cachi yo ta ndunye coño ñuhu yo. Vatyi cucacu yo ta ni noo ixí xiñi yo ta ma cunaa.

³⁵ Ta cha catyi ra tuhun ihya, ra Pablo quehen ra noo pan ta nacuhvá ra tyahví nyoo chi Nyoo nuu tandíhi ra. Tyicuan ta tahví ra ta quichahá chachi ra. ³⁶ Tyicuan ta tandíhi ca ra canduni ca iñi ra ta cachachí ra ñandíhi. ³⁷ Ta cha tandíhi ndi cha ñohó ndi chichi barcu cuan, quita ubi ciento uñi xico chahun iñi tahan ñáyivi. ³⁸ Cuhva cha ndíhi ca chachí ra ta tuchí ra yitin cha yihí trigu nu tyañuhu na nduñahma ca barcu.

Nu nyeé barcu

³⁹ Yahá cuan ta cundichin. Ta canyehe ra cha sacacá barcu noo ñuhú, soco ña canicohon nuu ra nya cuví cuan. Nyehe ra noo nu iyó ñiti. Ta catyaa ra cuhva nyehe ra tatu cuví sacuhun ra barcu yucuan. ⁴⁰ Cachahnya ra yoho cha nuñi caa vee cuan. Ta sandoó ra chichi tyañuhu. Ta

casandutaya ra vitu cha sanacuico barcu. Tyicuan ta casandaq ra sahma cha tuhvá chitacaá ityi nuu barcu. Ta quichaha quehen tatyí sahma cuan, ta sacuhún chí barcu nya nu iyó ñiti cuan. ⁴¹ Ta chaq barcu cuan noo nu nañi tahan ndutya. Ta nyee xiñi chí chichi ñiti. Ta ña cuví ca natava ra. Ta suhva ca cha ña quihvi chí chichi ñiti, ñihi xaan cañi tyañuhu chí chí, nyacua tahví cuatyí chí. ⁴² Tyicuan ta sindaro cacuñi ra cahñi ra chí ndi cuii maa ra cuahan cuacutuñi chí nuu ra cuví rey cahnu, coto cacono ra. ⁴³ Soco capitán sindaro cuñi ra sacacu ra chí ra Pablo. Yucuan chaha ña chaha ra cahñi ra chí ra, soco catyí ra vatyi nya ra cachitó sutya, na cuhun cuee ra nu ndutya ta quita ra nya ñuhú ityi. ⁴⁴ Ta tandihí ca ra cha ña cacuvi sutya, na quehen ra vitu cha nyisó barcu, ta suhva ra chihin yiquín vitu barcu cha tahví tyañuhu. Ta tyicuan caa cacacu tandihí ndi ta quitá ndi ñuhú ityi.

28

Nu ñohó ra Pablo ñuhú Malta

¹ Cuhva cha cha yaha cacu ndi ta catyí ñáyivi iyó ñuhú cuan vatyi nu nyaá ndi nañi chí Malta, o Melita. ² Ta vaha xaan tyiñuhu ñu chí ndi. Ta sanatahan ñu ñuhú vatyi coón sañi ta vichin xaan. Ta catyí ñu chí tandihí ndi, natuhva ndi yuhu ñuhú cuan natava ndi cha vichin ndi. ³ Tyicuan ta ra Pablo naquehen ra suhva nducu tyihí ra nu ñuhu. Ta noo coo quitá chí chichi nducu cuan, cha cuenda cha ihñi. Ta chachí yihí ti ndaha ra Pablo ta ndoo ti tacaá ti ndaha ra. ⁴ Cuhva cha canyehe ñáyivi ñuhú cuan tyi tacaá coo cuan ndaha ra, quichaha catyí ñu chí tahan ñu:

—Ra ihya vasi noo ra chahñi ñáyivi cuví ra, vatyi vasi cacu ra nu tyañuhu soco ña chahá Nyoo cha coo ca ra cha cuenda cuatyí ra —catyí ñu.

⁵ Soco ra Pablo naquisi ra chí coo cuan, ta canacava ti nu ñuhú, ta ñahri cuví chí ra. ⁶ Tandihí ñu nyatú ñu ñáá cuhva ndaa nu tyaa ti, o ñáá cuhva cúvi ra. Soco cha yaha nyatu xaan ñu, ta nyehé ñu vatyi ñahri maa cuví chí ra. Tyicuan ta nasama ñu cuhva chicá xiñi ñu, ta quichaha catyí ñu:

—Minoo nyoo cuví ra —catyí ñu.

⁷ Yatyín ri cuan nyaá ñuhú ra cha cuví nuu ñuhú cuan. Publio nañi ra. Ta vaha xaan cahán ra chihin ndi. Ta tyiñuhu xaan ra chí ndi, ndoo ndi vehe ra uñi quivi. ⁸ Ta cuhví xaan sutu ra chihin cahñi ta cha chiyó ra. Ta ra Pablo chahan ra chinyehé ra nu catuvi ra. Ta chican tahvi ra chaha ra. Ta tyiso ra ndaha ra siqui ra ta nduvaha ra. ⁹ Yaha cuan ta quichaha caquichí tucu inga ñu cuhví cha iyó ñuu cuan. Ta nduvaha tucu ñu. ¹⁰ Ta tandihí ñu tyiñuhu xaan ñu chí ndi. Ta quivi

quihvi ndi chí chichi barcu cha cuacuhun ndi, chaha ñu tandihí cha cuchíñuhu chí ndi ityi cuhun ndi.

Nu chaq ra Pablo ñuu Roma

¹¹ Uñi yoo ñohó ndi Malta cuan. Tyicuan ta ñihí ndi noo barcu cha quichi nya ñuu Alejandría ityi Egipto. Ta ndoo chí Malta nya yaha yoo vichin. Ta nyaa noo cha natava ñu, noo xiñahñu nyoo Cástor ta nyoo Pólux, xiñi chí. Quihvi ndi barcu cuan ta cuahan ndi. ¹² Ta chaq ndi ñuu Siracusa. Ta yucuan ndoo ndi uñi quivi. ¹³ Ta yucuan ta quitá ndi ta cuahan ndi ityi yuhu tyañuhu nyacua nya chaq ndi ñuu Regio. Ta cha inga quivi cuan caa xaan tatyí cha quichi ityi sur ta chicá ndi uvi quivi ta chaq ndi ñuu Puteoli. ¹⁴ Yucuan ñihí tahan ndi chihin suhva ra hermano. Ta catyí ra chí ndi cha ndoo ndi noo vitya chihin ra. Yaha cuan ta quitá ndi ta cuahan ndi nya ñuu Roma. ¹⁵ Ta ñu yihí cuenda Nyoo ñuu Roma cuan ñihí ñu tuhun tyi cua chaa ndi. Ta chahan coyo ñu chisatahan ñu chí ndi ityi. Suhva ñu nyatú ñu chí ndi Nuyahví Apio. Ta inga ñu ñihí tahan ñu chihin ndi nya nu nañi Tres Tabernas. Ta cha nanyehé ra Pablo chí ñu, nacuhva ra tyahvi nyoo chí Nyoo. Ta nduní ca ihí ra. ¹⁶ Cuhva cha chaq ndi Roma cuan, capitán cuan nacuhva cuenda ra chí ra ca iyó cuatyí cuan chí noo ra cuví nuu chí ra sahá cumi vehe caa. Ta chaha ra cuan cha coo sañ ra Pablo. Ta noo ri sindaro sahá cumi chí ra.

Nu cahán ra Pablo tuhun Nyoo ñuu Roma

¹⁷ Uñi quivi cha yaha chaq ndi yucuan. Tyicuan ta tachí ra Pablo tyiño naquichí coyo ra cacuvi nuu cuenda ñáyivi Israel cha iyó ñuu Roma cuan. Ta cuhva cha ndu in ri ra, quichaha catyí ra chí ra:

—Nyoho yañi, vasi ñahri sacuvi chí ñu Israel tahan yo, ta ni ñahri sacuvi siqui costumbre sutu chahnu yo, soco chahq cuenda ra Israel chí chí ra ñuu Roma. Ta ñohí vehe caa Jerusalén ndaha ra ñuu Roma. ¹⁸ Ta cha cutuñi chí, ta cuñi ra nyacá ñaha casaña ra chí. Vatyi ñahri cuatyí cha cahnu cha tahán chí cúvi. ¹⁹ Soco cha cuenda cha nduxaán xaan ra Israel siqui, chican taxin cha cutuñi chí nuu maa rey cahnu. Vasi ñahri cuatyí cuacaquen siqui ñu ñui nuu ra. ²⁰ Yucuan chaha cané chí nyoho vatyi cohon nui chí ndo, ta sacoté chí ndo vatyi nuñi yuhu chihin cadena vityin cha cuenda cha yihí ihí yo, ñu Israel, chí Nyoo —catyí ra Pablo.

²¹ Tyicuan ta catyí ra Israel chí ra Pablo:

—Ña chitó maa ndi tuhun yoho. Ta yori casacoto chí ndi, ni chihin carta, ta ni ta yori ca quichí ityi Judea sacoto cha caun, o cahán ña vaha ñu sicun. ²² Soco cuñi ndi cuiñi ndi tuhun chicá xiñi yoho. Vatyi chitó ndi vatyi tandihí ri ityi cahán ña vaha ñáyivi

siqui tuhun chaa ihya —catyí ra Israel chi ra Pablo.

²³ Tyicuan ta catyihí tahan ra tuhun nya quivi quichi coyo ra inga chaha. Ta cha chaa quivi cuan, chaa coyo cuaha ñáyivi nu iyó ra Pablo. Ta nya ñaha ri ta nya cha cuaa cahán ra Pablo tuhun yoso caa nyacá ñaha Nyoo ańima yo. Ta chihin ley ra Moisés ta tuhun cha catyaa ra profeta Nyoo ta cha naha, sañahá ra chi ñu vatyí ra Jesús cuví ra cha sacacú chi yo, vatyí cuñi ra tyi nachino iñi ñu chi ra. ²⁴ Yihí ñu chinó iñi ñu cha catyí ra Pablo. Ta inga ñu ña chinó iñi ñu. ²⁵ Ta vatyí ña ñin ri chino iñi ñu ta sñin sñin tuhun cahán ñu, ta quichahá cuahan coyo ñu. Ta ra Pablo catyí ra chi ñu:

—Ndicha xaan cha catyí Tatyí li chi sutu chahnu yo chihin yuhu ra profeta Isaías ta cha naha. Vatyí catyí ra tyehe caa:

²⁶ Cuahan ta catyí chi ñáyivi ihya tyehe caa:

Nyoho cucuñi ndo tuhun Nyoo.

Soco ma cutuñi iñi ndo.

Ta cunyehe ndo chihin chiti nuu ndo cha sacuví Nyoo.

Ta ma tuvi iñi ndo.

Tyicuan caa catyí chi ñu.

²⁷ Vatyí ańima ñu cha ndundava xaan.

Ta chiñi ri maa ñu tuhun Nyoo.

Ta natahán chiti nuu ñu, tacuhva cha ma cuvi nyehe ñu.

Ta nicunyasí soho ñu.

Yucuan chaha ña chiñi ñu, ta ndundava ańima ñu.

Yucuan chaha ña cuñi ñu quihvi ñu chichi ndahi na sanduvahi chi ñu, catyí Tatyí li chihin yuhu ra Isaías ta cha naha.

²⁸ Coto vaha nyoho vatyí vityin ta ityi nuu ca cuhin cusacote chi ñu cha ñima ñu Israel cuví vatyí sacacú Nyoo chi ñu. Ta maa ñu cuatyasoho ñu, —catyí ra Pablo chi ñu.

²⁹ Cuhva cha catyí ra Pablo tyehe caa, ra Israel cuahan coyo ra suri cuví yuhu ra chihin ra tahan ra tuhun cha cahan ra Pablo chihin ra.

³⁰ Uvi cuiya nanii ndoo ra Pablo vehe nu nyaá ra cuenda yoo ñuu Roma cuan. Ta vaha cahán ra chihin tandihí ñu chahan vehe ra. ³¹ Ta chihin cha ñi iñi ra ta cahan ra tuhun yoso caa nyacá ñaha Nyoo ańima yo. Ta sañahá ra tuhun Sutu Mañi yo ra Jesucristo. Ta yori chasí cha cahán ra.

Carta Cha Sacuhun Ra Apóstol Pablo Chi Ñáyivi Ñuu Roma Cha Yihí Cuenda Nyoo

Nu sacuhun ra Pablo tutu chi ñu cuenda Nyoo ñu Roma

¹ Yuhu ra Pablo cuví noo ra sacuví tyiño nuu ra Jesucristo. Nacana ra chíi, ta nacachí ra chíi vatyi cuví apóstol chí ra, tacuhva vatyi sacote chí ñáyivi yoso caa sacacü Nyoo añima yo.

² Ihya cuví tuhun cha catyi Nyoo chí yo tyi cusacuví ra, ta chicunyaá nu tutu tuhun ra tandihí cha tyaá ra profeta ta cha naha. ³ Ican ihya cuví tuhun Sutu Mañi yo Jesucristo Sehe Nyoo cha cahán chí tuhun, vatyi quichí ra síqui ñuhu ñáyivi chíhin coño ñuhu ra tari coño ñuhu maa yo. Tata rey David cuví chí ra. ⁴ Ta Nyoo chíhin Tatyí lí ra sacotó cachi ra chí yo vatyi Sehe ra cuví chí ra, vatyi sanandotó ra chí ra chíhin cha ndicha ñuhu ra. ⁵ Ta cha cuenda maa ra Jesucristo chahá Nyoo tumañi iñi chí nyuhu cha cahun ndi yucaca ndi tyiño ra, tacuhva nachino iñi ñáyivi chí ra nicahnu ñuhu ñáyivi, ta quichaha ñu chí ra. ⁶ Ta mahñu ñu cuan, ñohó tucu nyoho vatyi suri nacana tucu ra Jesucristo chí nyoho.

⁷ Sacuhín tutu ihya chí tandihí nyoho cha iyó ndo ñuu Roma. Cuñi Nyoo chí ndo ta nacana ra chí ndo vatyi coo ndo noo ñáyivi cachi cha sacahnu ndo chí ra. Na naquehen ndo cha vaha ta cha taxi ri cuñi añima ndo cha chahá Sutu yo Nyoo ta Sutu Mañi yo Jesucristo chí yo.

Nu catyi ra Pablo vatyi cuñi ra cahun ra ñuu Roma

⁸ Cha xihna ri chahí tyahvi nyoo chí Nyoi chíhin sívi ra Jesucristo, cha cuenda tandihí nyoho. Vatyi tandihí ri ityi cahán ñu tuhun vatyi chinó xaan iñi ndo chí ra Jesucristo. ⁹ Ta tyiño nuu Nyoo sacuví yuhu chíhin cha tandihí añime. Ta cahín tuhun yoso caa sacacü ra chí yo cha cuenda Sehe ra. Ta Nyoo cuví ra testigu vatyi chitó ra tyi tyicuan ri nicohón iñi chí ndo cuhva cha chicán tahvi chí ra. Ta chicán tahvi cha cuenda ndo. ¹⁰ Chiquén chí Nyoo na cuví cuhva cuñi ra, ta cahun nu nyicú ndo, vatyi cha naha xaan cuñi cuhin. ¹¹ Vatyi cuñi tyinyei chí ndo, ta naquehen ndo cha vaha cha chahá Nyoo ta cuní ca iñi ndo. ¹² O cuñi chí catyi vatyi saní yo iñi tahan yo chíhin cha chinó iñi yo, tari chinó iñi nyoho ta yuhu ñandihí.

¹³ Yañi, cuñi tyi coto ndo vatyi cuaha xaan chaha cuñi cunyehi nu nyicú ndo, soco nya

vityin ta ña chahá chí cuhva chíi. Cuñi vatyi cuní ca iñi ndo tari nduní ca iñi ñu vehe ñuhu inga ñuu nu chahín. Vatyi tatu nduní iñi ndo, nduní tucu iñi yuhu. ¹⁴ Vatyi nyaá síqui cha cahin tuhun Nyoo chíhin tandihí ñáyivi, an cuví ri ñu ñuu Grecia, an cuví ri ñu inga ñuu, an cuví ri ñu chíiñi tuñi, an cuví ri ñu ña cutuñi iñi. Tahan chí cha cahín chíhin tandihí ri ñu. ¹⁵ Yucuan chaha, cha cuenda yuhu, cuñi xain cahan tiqui tuhun Nyoo chíhin nyoho cha iyó ndo ñuu Roma chíña.

Tuhun Nyoo iyó xaan cha ndicha ñuhu chí

¹⁶ Yuhu ña cahán nui cahín tuhun Nyoo, vatyi ihya cuví fuerza Nyoo cha sacacü chí tandihí ñáyivi cha chinó iñi chí ra. Ta cha xihna ri chí ñu Israel. Ta cha cu uvi, ñu inga ñuu. ¹⁷ Vatyi tuhun Nyoo ihya, sañahá chí chí yo yoso caa sacuvahá Nyoo chí yo nuu ra chíhin cha chinó iñi yo chí ra. Ta suri cha cuenda cha chinó iñi yo, coo yo ñáyivi chaa chíhin ra. Tyehe caa nyaá nu tutu tuhun Nyoo: “Ñu cha nduvahá añima saha Nyoo, coo ñu noo ñáyivi chaa chíhin cha chinó iñi ñu chí ra.”

Tandihí ñáyivi ta iyó cuatyi ñu

¹⁸ Ta nyehé yo vatyi nya nu nyaá Nyoo nya andivi ta tachí tuñi ra chí ñáyivi quiñi iyó, ñáyivi ña vaha. Ta cha quiñi iyó ñu, ña chahá chí coto ñu cha ndicha. ¹⁹ Chitó vaha ñu tyi tuhun vaha cuví tuhun Nyoo vatyi suri maa Nyoo sañahá ra chí ñu. ²⁰ Vatyi vasi ña nyehé yo chí ra, cuví coto yo vatyi iyó ra vatyi nyehé yo tandihí cha savahá ra. Nyata chinó ñuhu ñáyivi ta tandihí cha savahá ra ta sañahá chí chí yo vatyi maa ra cuví Nyoo, ta tunyee iñi cha iyó chí ra ma ndihí maa. Yucuan chaha ma cuví catyi ñáyivi tyi yori Nyoo iyó. ²¹ Ta vasi cha chitó ñu tyi iyó noo Nyoo cahnú, soco ña sacahnú ñu chí ra tari cuhva tahan chí cha sacahnú yo chí ra. Ni ña nacuhva ñu tyahvi nyoo chí ra. Soco maa maa ri tuhun cha ñima ri tuhun chicá xiñi ñu. Ta cha cuenda cha ndava añima ñu, cutondó cha chíiñi tuñi xiñi ñu ta ndoq ñu nu ñaa iñi. ²² Vasi catyi ñu tyi chitó xaan ñu soco ñu tondo cuví ñu. ²³ Vatyi cha nuu cha sacahnú ñu chí Nyoo ra cahnú ca cuví, ra ña tuhva chíhi; sacahnú ñu chí xitohyo cha caá tari caá ñáyivi tuhva chíhi. Ta nyacua nya xitohyo cha tari caá saa, ta coo, ta quiñi cha cumi tahan chaha, ta sacahnú ñu.

²⁴ Yucuan chaha saña ndaha ndihí Nyoo chí ñu na sacuví ñu tandihí cha quiñi caa cha quichí cuví iñi ñu. Yucuan chaha maa maa ri tuhun cha cahán nuu yo nyacuví ñu chíhin tahan ñu. ²⁵ Vatyi ña chinó iñi ñu cha ndicha vaha Nyoo. Vatyi noo cha ña ndicha, yucuan chinó iñi ñu. Ta sacuvahá ca ñu, ta casacahnú ca ñu cha savahá Nyoo ta ña cuñi ñu sacahnú ñu chí maa maa ra. Vatyi chí

maa ra tahán chi sacahnú yo tyicuan ri maa. Ta na cuvi chi tyicuan caa.

²⁶ Yucuan chaha saña ndaha Nyoo chi ñu na sacuví ca ñu cha chahá ticahan nuu chi ñu. Vatyí nyacua nya ñusihí nasamañ ñu cuhva nyacuví ñu, vatyí ca iyó ñu chihin tahan sihi ñu, ta ña tahán chi tyicuan caa. ²⁷ Ta tyicuan caa tucu rayíi, casandihí ra cha ca iyó ra chihin ñasihí ra, ta quichí cuvi íñi ra cacoo ra chihin tahan yíi ra. Ta canyacuví ra chihin ra tahan ra, tuhun cha chahá ticahan nuu chi ra. Ta cha cuenda cuan tachí tuñi Nyoo chi ra ta tiví ra cha cuenda cha quiñi caa cha canyacuví ra. ²⁸ Ta chaha cha ña cuñí ca ñáyiví nacoto nuu ñu chi Nyoo, yucuan chaha saña ndaha ra chi ñu na caca maa xiñi ñu cha quiñi caa, ta sacuví ñu cha ña tahán chi sacuví ñu. ²⁹ Vatyí tandihí nuu cha ña vaha sacuví ñu. Iyó ñu chihin inga rayíi ta ñima yíi ñu cuví. Ta iyó ra chihin inga ñusihí ta ñima ñasihí ra cuví. Quiñi xaan iyó ñu. Quichí cuvi xaan íñi ñu coo ca chi ñu. Nyacuví ñu cha quiñi caa. Nyiyó xaan íñi ñu cha chi inga ñáyiví. Chahíi ñu. Iyó ñu tisihi chihin tahan ñu. Sandaví ñaha ñu chi tahan ñu. Ta quiñi xaan ca iyó ñu. Ta ñi ñu cuendu. ³⁰ Cahán ña vaha ñu siqui inga ñáyiví. Ta tasi cuñí ñu nyehe ñu chi Nyoo. Tyityi íñi ñu. Ta cahnu sahá ñu chi ñu. Casanducuahá ca ñu cha quiñi caa. Ta ña quichahá ñu chi sutu ñu, ta chi sihi ñu. ³¹ Ña cuñí ñu tyasoho ñu tuhun vaha. Ña sacuví ñu tuhun cahán ñu. Yori maa chi cuñí ñu. Ta ña casahá ñu ticahnu íñi chi tahan ñu. Ña ndahví cuñí ñu nyehe ñu chi tahan ñu. ³² Maa ñu chitó vaha ñu ñáa cha catyí Nyoo tyi sacuví ñu, chitó ñu vatyí ñu casacuví cha ña vaha, tahán chi tuhun chihí chi ñu ta chuhun ñu anyaya. Soco maa ñu sañihí ca ñu sacuví ñu. Ta nyacua sií cuñí ñu tatu sacuví inga ñáyiví cha quiñi caa.

2

Tachí tuñi Nyoo chi ñáyiví soco chihin cha ndicha

¹ Yucuan chaha ñahri siqui tyaá ndo, nyoho ñu cha nyehé cha caá inga ñu ta cahán ndo. Ñahri saha, savahri ñu, yóo ri ñu cuví ndo. Vatyí tatu nyehún cha caá inga ñu ta cahún, suri maun sacouñ cuatyun. Vatyí suri ñn ri cha sacuvún chihin ñu nyehún ta cahún. ² Vatyí chitó yo vatyí Nyoo tachí tuñi ra chi ñu nyacuví tyehe caa, soco chihin cha ndicha ta chihin cha ndaa, tachí tuñi ra. ³ Ta yoho cha cahán nyaun chi inga ñu, suri ñn ri cha sacuvún chihin ñu. Cutachi tuñi Nyoo chuun cha cahún tyehe caa. ⁴ Ñáa tuhun ña quichahún cha cundahví cuñí Nyoo nyehé ra chi yo ta cunyeé xaan ra cha sacuví yo? Vaha xaan ñáyiví cuví ra chihin yo. ¿Atu ña tuví íñun vatyí cha cuenda cha cundahví

cuñi ra nyehé ra chuun, ta nyatú ra cha nasamon cuhva iyón? ⁵ Soco yoho ndava xaan añimon. Ta ña cuñún nasamon cuhva iyón. Ican cuan cuví cuatyun cha sacayá xaan, ta cuxaan ca cuñí Nyoo nyehé ra chuun ta ñihi ca cutachi tuñi ra chuun quiví cutachi tuñi ra chi ñáyiví. Ta cunyehe yo tyi chihin cha ndaa ta chihin cha ndicha tachí tuñi ra chi yo. ⁶ Tatu sacuví yo cha ña vaha, cutahan chi cha ña vaha chi yo. Tatu sacuví yo cha vaha cutahan chi cha vaha chi yo quiví cutachi tuñi ra chi yo. ⁷ Ta cuhva ra ñáyiví cha ma naa ca maa coo ñu cha nanducú cha vaha ta cha cahnu cuví Nyoo, ñu nanducú cuvaha nuu ra, ñu cha cuñí coo tyicuan ri maa. Cuhva ra tandihí cuan chi ñu cha cuenda vatyí sacuví ñu maa maa ri cha vaha chihin cha cama íñi ñu. ⁸ Soco ñihi xaan cutachi tuñi ra chi ñáyiví sacuví cuhva cuñí maa, ta ña cuñí ñu quichaha ñu tuhun ndicha Nyoo, ta sacuví ñu cha ña vaha. ⁹ Cuaha xaan tindoho ta tucuihya íñi cunyehe tandihí ñu casacuví cha ña vaha. Ta cha xihna ri cutachi tuñi ra chi ñu ñuu Israel, ñáyiví cuenda ra. Ta tyicuan caa tucu cutachi tuñi ra chi ñu cha ñima ñu Israel cuví. ¹⁰ Soco chi tandihí ñu cha sacuví cha vaha, Nyoo cucuhva ra cha cucahnu ñu chihin ra, cha xihna ri chi ñu Israel, tyicuan ta chi ñu cha ñima ñu Israel cuví. Ta cucatyí ra tyi sií cuñi ra chihin ñu. Ta cucuhva ra cha taxi ri coo añima ñu.

¹¹ Vatyí Nyoo ña cachí ra chi yo. Cuví ri yo ñu chitó, o cuví ri yo ñu ña chitó, ñn ri cuhva cuñí maa ra chi yo. ¹² Vatyí tandihí ñu casacuví cuatyí ta ña chitó ñu ley cha chahá Nyoo chi ra Moisés, cunañ ñu nuu Nyoo soco ñima cha cuenda tuhun cha catyí ley cuan. Ta ñu casacuví cuatyí ta chitó vaha ñu ley cha chahá Nyoo chi ra Moisés, cutachi tuñi Nyoo chi ñu yoso cuhva catyí suri maa nuu ley cuan. ¹³ Vatyí ñu cha chihí ley, ta ña nyacuví ñu cuhva catyí Nyoo, ñima ñáyiví vaha cuví ñu nuu ra. Soco tyehe ta iyó noo ñu sacuví cuhva catyí ley, ican ñu cuan, vaha ñu nuu Nyoo. ¹⁴ Tatu ñima ñu Israel cuví ñu ta ña chitó ñu ley cuan, soco tuví íñi ñu yoso caa coo ñu; cha tuví íñi ñu chichi añima ñu, ican cuví ley ñu. ¹⁵ Vatyí chihin cuhva iyó ñu, sañahá ñu vatyí añima ñu ñohó ley Nyoo. Cha chihí tuñi ñu cuví cha ndaa cuenda ñu, vatyí suri maa ñu tuví íñi ñu tatu vaha o ña vaha cha nyacuví ñu. ¹⁶ Cha tyaa Nyoo tyiño chi ra Jesucristo vatyí coo quiví cusandaa ra cuatyí tandihí ñáyiví iyó siqui ñuhu ñáyiví cha cuenda tandihí tuhun xehe cha sacuví ñu. Tari cuhva catyí tuhun Nyoo cha cahún chihin ndo, tyicuan caa cusandaa ra cuatyí yo.

Ñu Israel nyicón ñu ley cha chahá Nyoo chi ra Moisés

¹⁷ Soco yoho catyún tyi ra Israel cuvún. Ta catyún tyi sacuvún cuhva catyí ley cha chahā Nyoo chí ra Moisés, ra cuví nuu chí ñu Israel quívi cuan. Ta chahnu sahún chuun tyi catyún tyi caá tuhun Nyoo añimon. ¹⁸ Ta chitón cuhva cuñi Nyoo ta ley cuan sañahá chí chuun cha nacachún cha vaha, catyún. ¹⁹ Ta vaha xaan sañahún ityi chí ñu cuaa, cuñi maun. Vaha xaan sacatón ñuhú chí ñu cuahan nu ñaa iñi, cuñi maun. ²⁰ Ta cuñi maun vatyi chitón saquehen ityun chí ñu cha ña chitó. Ta vatyi chitón tandihi cuíi ley ta cha ndicha, chitón yoso caa sañahun chí ñu ña chitó, cuñi maun. ²¹ Tatu tyicuan caa yoho sañahún chí inga ñáyivi, ¿ñáá tuhun ña sañahún chí maun? Tatu suri maun catyún vatyi ña tahán chí suhu yo, ¿ñáá tuhun cha tyi maun suhún? ²² Tatu suri maun catyún vatyi ña tahán chí coo inga ñusihí chí noo rayi, o inga rayi chí noo ñaha síhi, ¿ñáá tuhun cha vatyi maun tyicuan caa sacuvún? Tatu tasi cuñún chí xitohyo, ¿ñáá tuhun cha suhún cha tyayí chí iyó nu nyicú chí chichi vehe ñuhu? ²³ Cahnu sahún chuun vatyi chitón ley Nyoo, soco ticahan nuu chahún chí Nyoo cha cuenda cha ña sacuvún ley cuan. ²⁴ Yucuan chaha vatyi nu tutu tuhun Nyoo catyí chí tyehe caa: “Ñu cha ñima ñu Israel cuví, cahán ña vaha ñu siqui Nyoo cha catyi nyoho”, catyí chí.

²⁵ Ndicha vatyi cha sacuví ñu tuhun cha tahnyá chiin ñi xiñi ndivun ta leun, cha saha ñu circuncidar chuun cuví cuan, tari noo seña cha sañahá vatyi ñáyivi chí Nyoo cuvún. Tuhun cuan tyinyeé chí chuun soco tatu quichahún tandihi ley cha chahā Nyoo chí ra Moisés ñandihí. Soco tatu ña sacuvún cha catyí ley cuan, tari quívi cha ña sacuvún costumbre circuncisión cuví cuan. ²⁶ Soco tatu ñu cha ña sacuví tuhun cuan, ta sacuví ñu cuhva catyí ley Nyoo, cusaha Nyoo tari cha sacuví ñu costumbre circuncisión cuan, vasi ña sacuví ñu. ²⁷ Ra cha ña sacuví costumbre cuan, soco quichahá ra cuhva catyí ley, cusanatuyi ra chí yoho cha ña quichahún, ta yoho, ra chitó ley ta ra sacuví costumbre circuncisión cuvún. ²⁸ Vatyi ñima cha cuenda vatyi ñu Israel cuví ndo ta chihín cuan ta cuví ndo ñáyivi chí Nyoo. Ta ní ñima cha cuenda cha sacuví ndo tuhun circuncisión. ²⁹ Vatyi ñáyivi nyaá ley Nyoo añima, ican ñu cuví ñu ñu Israel cha ndicha vaha. Tari quívi tyaa Tatyí Ii seña cuan añima ñu, ta ñima ñi ri ñu. Tatyí Ii Nyoo sacuví cuan, ñima ley cha nyaá nuu tutu. Ta ñáyivi ihya cucuvi ñu ñu vaha nuu Nyoo, ta ñima nuu ñáyivi ri.

3

¹ Tatu tyicuan caa, ¿ñáá cha tyinyeé chí yo cha cuví yo ñu Israel? ¿o atu tyinyeé chí chí yo cha sacuví yo tuhun circuncisión?

² Cuaha cuhva tyinyeé chí. Cha xihna ri, Nyoo chahā ra ley maa ra chí yo ñu Israel.

³ Soco yoso caa tatu yihí ñu Israel ta ña chinó iñi ñu cuhva catyí Nyoo, ¿atu cha catyí ñu cuan ta ma sacuví ca Nyoo cuhva catyí ra?

⁴ ¡Ñima! Soco na saha yo cuenda vatyi Nyoo ndicha ra. Sacuví ra tandihí cuhva cha catyí ra. Vasi tandihí ñáyivi cahán ñu cuendu. Vatyi nu tutu Nyoo catyí chí tuhun ra tyehe caa:

Sutu Mañi yuhu, cunyehe ñáyivi vatyi ñahri cuendu cahún.

Ta cunyehe vaha ñu chuun vatyi ndicha cha cahún.

⁵ Chitó yo vatyi vaha ca quetuyi noo cha ndi tatu nyaá noo cha mecu xiin. Ndi xaan ca nyehe cuan. Cha ndicha cuví cuan. Soco catyí ñáyivi vatyi tyicuan caa tucu maa Nyoo chihin yo, ndi xaan ca natuyi ra tatu yoó ta cunyacuví ca yo cha quiñi caa. Sacahnú yo chí ra cuví cuan, catyí ñu. Tyicuan ta ña tahán chí tachi tuñi ra chí yo, catyí ñu. Soco tatu tachi tuñi ra chí yo, ña vaha ra vatyi yoó sacahnú yo chí ra, catyí ñu. ⁶ Ña vaha cuhva cahán ñu, vatyi tyehe ta ña vaha Nyoo ma cuví tachi tuñi ra chí yo. Soco chitó yo tyi tahán chí tachi tuñi ra chí yo cha cuenda cuatyí yo. ⁷ Tatu nyehé yo tyi vaha Nyoo chihin cuatyí sacuví ñáyivi, ¿atu tahán chí tachi tuñi ra chí ñu? Catyí ñu tyi ña tahán chí, soco ña ndicha. ⁸ Tyehe ta ndicha cha cahán ñu cuan, vaha taxin ca sacuví yo maa maa ri cha quiñi caa tacuhva nyehe ñáyivi tyi Nyoo vaha ra. Yihí ñu catyí ñu tyi tyicuan caa sañahá ndi. Ta cutachi tuñi Nyoo chí ñu chaha cha catyí tyi cahán ñu cuendu siqui ndi.

Tandihí yo ta iyó cuatyí yo

⁹ Ta yoso caa ¿atu vaha ca yoó ñu Israel ta ñima ca inga ñáyivi? ¡Ñima! Vatyi cha yaha sañahi chí ndo vatyi iyó cuatyí tandihí yo. An cuví ri yo ñu Israel, an cuví ri yo ñu cha ñima ñu Israel cuví, soco iyó maa cuatyí yo. ¹⁰ Tyicuan caa catyí nu tutu Nyoo, nu catyí chí tyehe caa:

Yori maa ñáyivi vaha iyó, cha ní ña noo maa.

¹¹ Yori ñu cutuñi iñi tuhun Nyoo.

Yori maa nanducó chí Nyoo.

¹² Tandihí ñu sandoo ñu chí Nyoo, ta tandihí ñu ta sacunaq ñu chí ñu.

Yori maa ñu sacuví cha vaha.

Cha ní ña noo maa.

¹³ Tari noo ñaña ndiyi cha tacohó yuhu cuví sucun ñu.

Vatyi quiñi xaan cahán ñu.

Ta cahán ñu cuendu. Tari cha venenu coo yihí yuhu ñu vatyi cahán uhvi ñu chí tahan ñu.

¹⁴ Maa maa ri ca maa cha quiñi caa cahán ñu.

¹⁵ Yatyi xaan ñu cha cacahñi ñu chí tahan ñu.

¹⁶ Chahá xaan ñu tundoho ta tucuihya iñi chi ñáyivi chihin cuhva iyó ñu.

¹⁷ Ta ña chító ñu yoso caa cuhva coo taxi ri ñu chihin Nyoo, ni chihin tahan ñu.

¹⁸ Ni ña chicá iñi ñu tatu tachi tuñi Nyoo chi ñu noo quívi, catyí chi nu tutu Nyoo.

¹⁹ Chító yo vatyí tandihí cha catyí ley chahnu cha quehen cuenda ra Moisés, catyí chí cha cuenda ñu nyicón ley cuan, tacuhva vatyí ma cuví catyí ñu tyí ñahri cuatyí ñu. Soco coto ñu vatyí cutahan chí cutachí tuñi Nyoo chí ñu vatyí iyó cuatyí ñu. Ta tyicuan caa tucu tandihí ñáyivi iyó síqui ñuhu ñáyivi.²⁰ Ni minoo ñáyivi ma cuví cuvaha ñu nuu Nyoo cha cuenda tyí sacuví ñu cuhva catyí ley. Soco ley cuan nyaá chí cha cuenda vatyí sacotó chí chí yo tyí iyó cuatyí yo.

Cha cuenda cha chinó iñi yo chí Nyoo ta cuvaha yo nuu ra

²¹ Soco vityin sandoó yo inchiyo xiin ley cuan ta cua nyehe yo vatyí iyó noo cuhva cuvaha yo nuu Nyoo. Suri maa Nyoo sañahá ra chí yo nu tutu tuhun ra cha tyaá profeta ta cha naha. Tatu sacuahá yo yucuan, coto yo noo cha ndicha.²² Vatyí cha cuenda cha chinó iñi yo chí ra Jesucristo ta cuvaha yo nuu ra, ta sahá ra tuhun tyí ñahri cuatyí yo. Ta ña cachí ra chí yo tatu ñu Israel cuví yo o ñima.

²³ Tandihí ri ñáyivi sacuví ñu cuatyí, ta cañi xaan nyaá ñu chihin cuhva cuñi Nyoo, ta cha tyaqui Nyoo ma cuví cunyah chihin ñu.²⁴ Soco cha cuenda cha vaha ñáyivi cuví Nyoo chihin yo, chahá maa ra cha cuvaha yo nuu ra, ta ña tiñ cuenda ca ra cuatyí yo. Vatyí chahnyá ra Cristo Jesús cuatyí yo.²⁵ Nyoo saquichí ra chí ra Cristo vatyí cati niñi ra ta cúvi ra nu cruzi cha catyí cuatyí yo. Ta vityin cuví saha Nyoo tucahnu iñi chí yo tatu chinó iñi yo chí ra Cristo. Ta cuví chí tyehe caa, tacuhva nyehe ñáyivi tyí Nyoo vaha ra. Ta tyembu chahnu, Nyoo ña tiñ cuenda ra cuatyí ñáyivi cha cuenda vatyí cuchaa chí noo quívi cha cuquichí ra Cristo ta sanaa ra cuatyí ñu.²⁶ Ta tyicuan caa cuví tacuhva vatyí nyehé ñáyivi vatyí Nyoo tyicuan ri vaha ra, ta sahá ra tuhun tyí vaha tandihí ñu chinó iñi chí ra Jesús.

²⁷ ¿Atu cuví sacahnu yo chí yo vityin? Ma cuví. ¿Ñáá tuhun? Cha cuenda vatyí ma cuví catyí yo vatyí sacuví yo cha catyí ley, ta yucuan chaha vaha yo nuu Nyoo. Vatyí cha cuenda cha chinó ri iñi yo chí ra ta cuvaha yo nuu ra.²⁸ Cha chító vaha yo vityin vatyí Nyoo sacuvahá ra chí yo nuu ra chihin cha chinó iñi yo chí ra, ta ñima chihin cha sacuví yo cha catyí ley ta cuvaha yo nuu ra.

²⁹ ¿Atu Nyoo cuenda ñu Israel ri cuví ra? ¿Atu ñima suri ra cuví Nyoo ñu cha ñima ñu Israel cuví? Suri Nyoo tucu ñu cuan cuví chí ra.³⁰ Vatyí noo tuhun ri maa ra iyó.

Ta ican ra sacuvahá ra chí yo nuu ra cha cuenda cha chinó iñi yo chí ra. Cuví ri yo ñu sacuví tuhun circuncisión cuan, o cuví ri yo ñu ña sacuví.³¹ Tatu tyicuan caa, ¿atu ña vaha ca ley chahnu cuan? ¿Ñima cha ña vaha ca! Vaha. Soco vityin chihin fuerza maa ra Cristo sañahá yo vatyí ndii maa cha catyí ley cuan ta ndicha.

4

Cuhva chiyo ra Abraham sañahá chí chí yo yoso caa cuvaha yo nuu Nyoo

¹ ¿Ñáá cha catyí yo cha cuenda ra Abraham sutu chahnu yo? ¿Ñáá cuenda catyí Nyoo vatyí vaha ra? ² Tyehe ta cuvahá ra nuu Nyoo cha cuenda cha sacuví ra cha vaha, yucuan ndicha, cuví sacahnu ra chí ra, soco ñima nuu Nyoo.³ Vatyí ¿ñáá catyí nu tutu tuhun Nyoo? Catyí chí vatyí ra Abraham chinó iñi ra chí Nyoo, ta cha cuenda cha chinó iñi ra chí Nyoo, Nyoo sahá ra tuhun tyí vaha ra.⁴ Vaha, vityin cacuhve noo cuhva chí ndo: Tatu minoo ra sacuví ra noo tyiño, yahvi cha quehén ra ñima cha ñihi caha ra cuví, soco yahvi tyiño sahá ra, ican cuví.⁵ Soco tatu noo ra cha ña saha tyiño ta ñihi ra chí ñihi ra, noo cha ñihi caha ra cuví. Ta tyicuan caa cuví chihin noo ra cha ña nducu cuhva cacu cha cuenda cha sacuví ra ley, soco chinó iñi ra vatyí Nyoo sahá ra tucahnu iñi chí ñu iyó cuatyí, Nyoo cusaha ra tuhun tyí vaha ra cha cuenda cha chinó iñi ra chí ra.⁶ Ra David cahan ra tuhun tusii iñi cha iyó chí ñáyivi cha sahá Nyoo tuhun vatyí vaha ta ña tiñ cuenda ra cuatyí cha sacuví ñu.⁷ Tyehe caa catyí ra David:

Ñáyivi cha sahá Nyoo tucahnu iñi cuatyí, sii xaan cuñi ñu, vatyí Nyoo ña tiñ cuenda ra cuatyí ñu.

⁸ Sii xaan cuñi ñu ña tiñ cuenda Nyoo cuatyí.

⁹ ¿Atu cha cuenda ri ñu sacuví tuhun cha tahnya ñii cuví tusii iñi ihya, o cuví tucu chí cha cuenda ñu ña sacuví cuan? Cha yahá sañahi chí ndo vatyí Nyoo sahá ra tuhun tyí vaha ra Abraham cha cuenda cha chinó iñi ra chí ra.¹⁰ Soco ¿ama sahá ra tuhun tyí vaha ra? ¿Atu cha ni cumañi ca sacuví ra Abraham tuhun circuncisión cuan, o cha yahá? Ñima nya cha yahá, soco cha ni cumañi ca.

¹¹ Yahá cuan ta sacuví ra Abraham tuhun cuan, tari noo seña ri o sellu vatyí Nyoo cha yahá sahá ra tuhun tyí vaha ra cha cuenda cha chinó iñi ra chí ra. Ta cha cuenda ihya cuví ra Abraham tari noo sutu tandihí yo ñu chinó iñi Nyoo vasi ña sacuví yo tuhun circuncisión. Ta tyicuan caa, Nyoo sahá ra tuhun vatyí vaha yo.¹² Ndicha vatyí ra Abraham cuví tucu ra sutu ñu casacuví tuhun cuan, soco tatu chinó tucu iñi ñu chí Nyoo tari chinó iñi tucu maa ra Abraham

sutu chahnu yo, quivi cha ta sacuvi ca ra tuhun cuan.

Chihin cha chinó iñi yo ta ñihi yo cha chahá Nyoo chiyo

¹³ Vatyí Nyoo catyí ra chi ra Abraham ta chí sehe ra vatyí cuhva ra cha cunyaca ñaha ñu ñuhu ñayiví chihin ra. Soco savaha Nyoo promesa cuan, ñima cha cuenda vatyí ra Abraham sacuví ra cha catyí ley, soco cha cuenda vatyí chinó iñi ra chí Nyoo, ta Nyoo saha ra tuhun vatyí vaha ra. ¹⁴ Tyehe ta maa maa ri ñu cha sacuvi cuhva catyí ley, cuñihi ñu noo cha cucuhva Nyoo, ñahri yahvi nyaá cha chinó iñi yo chí Nyoo, ta ni ñahri yahvi nyaá cha catyí ra tyi cuhva ra chiyo. ¹⁵ Vatyí ley cuan sañahá chí vatyí tahán chí tachi tuñi Nyoo chí yo tatu ña sacuví yo cuhva catyí chí. Soco tyehe ta ñahri ley iyó, ñahri cuatyí yo coo.

¹⁶ Yucuan chaha cuñihi yo promesa Nyoo cha cuenda cha chinó iñi yo chí ra, tacuhva vatyí cuví chí noo tumañi iñi cha chahá ra chí tandihi yo cha cuví yo ñayiví chí ra Abraham. Ñima ñu chinó ri iñi chí Nyoo ta quichahá ley cuan cuñihi, soco cuñihi tucu ñu cha ña ita iñi ley, soco chí Nyoo ri chinó iñi ñu tari chinó iñi ra Abraham. Ican ra cuví sutu tandihi ñayiví cha chinó iñi chí Nyoo. ¹⁷ Vatyí tari catyí Nyoo nu tutu ra tyehe caa: “¿Yoho cucuvun tari noo sutu cuaha xaan ñayiví?”, coo siqui ñuhu ñayiví”, catyí ra chí ra Abraham. Ta cha catyí ra tyicuan caa, cuñí chí catyí vatyí cuví yo sehe ra Abraham nuu Nyoo. Chinó iñi ra Abraham chí Nyoo, vatyí Nyoo sanandotó ra ndiyi, ta chihin tuhun cahán ra sacotó ra cha cumañi ca coo.

¹⁸ Ra Abraham chinó iñi ra chí Nyoo vasi ma cuví ñihi ra promesa cuan tyaá maa ra cuhva, vatyí cha chahnu xaan ra. Soco yihí iñi ra cha cuñihi ra. Ta tyicuan caa, ñihí ra promesa Nyoo ta cuví ra sutu cuaha ñayiví, tari cuhva catyí Nyoo chí ra: “Tyehe caa cucucuaha ñayiví chuun”, catyí ra chí ra. ¹⁹ Ra Abraham ña sandihí ra cha chinó iñi ra, vasi cha noo cientu cuiya ra ta tuví iñi ra vatyí cha cuñí cuví ra. Tari maa ra ta tari cu Sara ñasihí ra, ma cuví ca coo sehe ñu, tyi cha chahnu xaan ñu. ²⁰ Soco ña ndú uví iñi ra cha cuñihi ra cha catyí Nyoo tyi cuhva ra chí ra. Soco chinó iñi ra chihin cha ñi iñi ra. Ta yihí ca iñi ra chí Nyoo. Ta sacahnú ra chí ra, ²¹ cha cuenda vatyí chitó vaha ra vatyí Nyoo iyó tunyee iñi chí ra cha cusacuví ra cha catyí ra chí ra. ²² Yucuan chaha Nyoo saha ra tuhun tyi vaha ra cha cuenda cha chinó iñi ra chí ra.

²³ Saha Nyoo tuhun vatyí vaha ra Abraham chaha cha chinó iñi ra chí ra. Ña chicunyaá nuu tutu vatyí noo ri ra Abraham cuvaha ra, ²⁴ soco chicunyaá tucu nuu tutu cha cuenda yoó. Vatyí sahá Nyoo tuhun tyi

vaha tucu yo vatyí chinó iñi yo chí ra, vatyí ican ra sanandotó chí ra Jesús, Sutu Mañi yo. ²⁵ Ta maa ra chahá cuenda chí ra Jesús tyi cúvi ra cha cuenda cuatyí yo, ta nandotó ra tacuhva vatyí cuví cuvaha yo nuu ra.

5

Vityin cha nicoo vaha yo chihin Nyoo, cuaha cha vaha cucuhva ra chiyo

¹ Ta cha yaha nduvaha ñima yo nuu Nyoo cha cuenda cha chinó iñi yo chí ra, nicoo vaha yo chihin ra cha cuenda Sutu Mañi yo Jesucristo. ² Vatyí cha cuenda ra Cristo ñihí yo cha vaha Nyoo cha cuenda cha chinó iñi yo chí ra. Yucuan chaha ñi iñi yo ta si cuñí yo, ta yihí vaha iñi yo vatyí cucuhva ra cha cucahnu cuví yo chihin ra. ³ Ta ñima yucuan ri cusii cuñí yo, tahán tucu chí cusii cuñí yo quivi nyehé yo tindoho. Vatyí chitó yo vatyí cha nyehé yo tindoho cuan cutuhva ca yo coo cha cama iñi yo. ⁴ Ta tatu chihin cha cama iñi yo, yaha yo tindoho, quita vaha yo nuu Nyoo. Ta yucuan ta chitó vaha yo tyi cuñihi yo ndii maa cha cucuhva ra chí yo. ⁵ Tatu yihí iñi yo chí maa ra, ma cucahan nuu yo nyehé yo chí ra, vatyí cuñí xaan ra chí yo cha cuenda Tatyí Ii ra cha chahá ra cunyaa ñima yo.

⁶ Vatyí quivi cha ña ñihí ca yo yoso caa sacuvi yo chihin cha cuaha cuatyí yo, quivi cuan quichi ra Cristo, quichi cuví ra cha cuenda yo ñu iyó cuatyí. ⁷ Chitó yo vatyí yori caña iñi cuví tyiño nuu noo ñayiví. Vasi xityi ri caña iñi ñu cuhva ñu ñayiví ñu cha cuenda noo ñu vaha xaan. ⁸ Soco yucuan cuví nu sañahá Nyoo vatyí cuñí ra chí yo, vatyí quichi cuví ra Cristo cha cuenda yo vasi iyó xaan cuatyí yo. ⁹ Ta vityin cha cha yaha cuvaha yo nuu Nyoo cuenda cha chihí ra Cristo, yucuan chaha chitó vaha yo tyi ma cuhan ca yo anyaya nu cutachi tuñi Nyoo chí ñayiví ña chinó iñi chí ra. ¹⁰ Quivi cuan xaan cuví iñi yo chí Nyoo, soco sanicoo vaha ra chí yo chihin ra cha cuenda cha chihí Sehe ra. Yucuan chaha chitó vaha yo tyi cusacacu ndihi ra chí yo vatyí iyó ñayiví ra Cristo ñima yo vityin cha iyó vaha yo chihin ra. ¹¹ Ta ñima ihya ri, soco cusii tucu cuñí yo chihin Nyoo cha cuenda Sutu Mañi yo Jesucristo, vatyí cha cuenda ra nicoo vaha yo chihin Nyoo.

Ra Adán ta ra Cristo

¹² Cha cuenda noo rasi quihí cuatyí siqui ñuhu ñayiví ta chicoo tuhun chihi. Ta tuhun chihi cuan chicoo chí siqui tandihi ñayiví vatyí tandihi ñu sacuví ñu cuatyí cha cuenda ra Adán. ¹³ Nyata ni cumañi ca cuhva Nyoo ley chí ra Moisés ta cha iyó cuatyí siqui ñuhu ñayiví, soco ña tñi Nyoo cuenda cuatyí ñayiví ta ni cumañi ca cuhva ra ley cuan. ¹⁴ Soco nyacua nya quivi ra Adán ta nyacua

nya quiví ra Moisés, chinyaca ñaha tuhun chihí chi ñu cha sacuví cuatyí, vasi ñima tahan cuatyí ra Adán cuví, cha ña quichaha ra chi Nyoo. Ta ra Adán cuví ra tari noo xiñahñu noo ra cha cua quichi.

¹⁵ Soco cuatyí ra Adán ña ndiquí tahan chi chihin tumañi ñi cha chaha Nyoo chi yo. Vatyí cha cuenda cuatyí noo rayíi cuan, cuaha xaan ñáyivi chihí. Soco sacacú Nyoo chí yo cha caha ri, cha cuenda noo ri rayíi ta ícan ra ihya cuví ra Jesucristo. Ta cahnú xaan ca cuví cuan. Ta cha cuenda cha vaha chí cuaha ñáyivi cuví. ¹⁶ Cuatyí noo ri rayíi ra Adán cuan, ma cuví ndiquí tahan chí chihin cha sacacú Nyoo chí yo. Vatyí cha cuenda cuatyí noo ri ra cuan, Nyoo tachí tuñi ra chí ñáyivi. Soco vityín chihin cha ñahri tyiyahví yo, Nyoo sacacú ra chí yo ta sahá ra tuhun tyi vaha yo nuu ra, vasi cuaha xaan cuatyí sacuví yo. ¹⁷ Ndicha vatyí quichaha nyaca ñaha tuhun chihí siqui ñuhu ñáyivi cha cuenda cuatyí noo ri rayíi. Ta cha tyicuan caa chitó yo vatyí cahnú ca cuví cha vaha cha sacuví nonga ra, ra Jesucristo. Vatyí tandihí ñu cha ñihí cha vaha cha chahá Nyoo, cha cuvaha ñu nuu ra, ta iyó ñu ñáyivi chaa chihin tunyee ñi ra Jesucristo. ¹⁸ Tari cha catyí cuatyí ra Adán ta tachí tuñi Nyoo chí tandihí ñáyivi iyó siqui ñuhu ñáyivi, tyicuan caa tucu cha cuenda cha vaha cha sacuví ra Jesucristo, Nyoo sahá ra tuhun tyi vaha ñáyivi nuu ra ta chahá ra noo ñáyivi vaha coo tandihí ñu. ¹⁹ O cuñi chí catyí tyehe caa: Cha cuenda cha ña quichaha ra Adán cuan nu cahán Nyoo, cuaha xaan ñu chicoq cuatyí ñu. Ta suri tyicuan caa tucu cha catyí cha quichaha ra Cristo nu cahán Nyoo, cuaha xaan ñu cucuvaha ñu nuu Nyoo.

²⁰ Vatyí Nyoo chaha cuenda ra ley cuan chí ra Moisés tacuhva nacoto ñáyivi tyi iyó cuatyí ñu. Ta vasi quetuví xaan cuatyí yo cha cuenda ley cuan, soco Nyoo cahnú ca tucahnú ñi iyó chí ra chihin yo vatyí cuñi xaan ca ra chí yo. ²¹ Tari chinyaca ñaha cuatyí chí yo ta chaha chí tuhun chihí chí yo, tyicuan caa tucu nyacá ñaha tumañi ñi Nyoo chí yo vityín ta sacuvaha ra chí yo nuu ra vatyí coo yo noo ñáyivi cha ma naa ca maa cha cuenda Sutu Mañi yo Jesucristo.

6

Ma sacuví ca yo cuatyí soco sacuví yo cuhva catyí ra Cristo

¹ ¿Yoso caa catyí yo vityín? ¿Atu cusacuví ca yo cuatyí tacuhva vatyí sañaha Nyoo vatyí cuaha xaan tucahnú ñi iyó chí ra? ² Ma sacuví ca yo. Yoó cha yaha ndú uvi ñi yo cuatyí yo. Tari quiví chihí cuatyí yo cuví cuan. Ta ¿yoso caa cuví sacuví ca yo vityín? Ma cuví ca. ³ ¿Atu ña chitó nyoho vatyí cha ndú ñi ri yo chihin ra Cristo Jesús cha

cuenda cha condutyá yo? Tari quiví chihí yo chihin ra cuví cuan. ⁴ Vatyí cha cuenda cha condutyá yo, tari quiví cha quihví yo chichi ñuhú ñi ri chihin ra Cristo quiví chihí ra cuví cuan. Ta tari nandoto ra Cristo chihin cha ndicha ñuhu Sutu yo Nyoo, tyicuan caa tucu maa yo, tacuhva vatyí coo yo noo ñáyivi chaa chihin ra.

⁵ Ta ñi ri coño ñuhu nanduví yo chihin ra, tari quiví chihí yo ñi ri chihin ra cuví cuan, ta cha tyicuan caa, cunandoto tucu yo tari nandoto ra. ⁶ Ta chitó yo vatyí tandihí cuhva chiyo yo ta ityí chata ca, cha yaha chihí chí nu cruzi chihin ra Cristo, tacuhva vatyí coño ñuhu cuatyí yo ma cuví ca cunyaca ñaha chí chí yo. ⁷ Vatyí ñu cha yaha chihí, ma cuví ca sacuví ñu cuatyí. ⁸ Ta tatu cha yaha chihí yo chihin ra Cristo, chinó ñi yo vatyí cucoo tucu yo chihin ra. ⁹ Ta chitó yo vatyí cha yaha chihí ra Cristo, noo ri chaha nandoto ra, ta ma cuví ca ra. Ñahri ca tunyee ñi iyó chí tuhun chihí cha cunyaca ñaha ca chí chí ra. ¹⁰ Yaha cha chihí ra Cristo cha catyí cuatyí ñáyivi, nandoto ra cha ma cuví ca maa ra. Ta vityín iyó ra cha cuenda maa Nyoo. ¹¹ Ta tyicuan caa tucu maa yo, ma sacuví ca yo cuatyí. Saha yo tuhun tyi cha yaha chihí yo cha cuenda cuatyí cuan. Soco cgo yo cuhva cuñi Nyoo cha cuenda cha ñi ri cuví yo chihin ra Cristo Jesús Sutu Mañi yo.

¹² Yucuan chaha yoó ma cuhva yo ityí cha cunyaca ñaha ca cuatyí chí coño ñuhu yo. Ma cuhva yo ityí chí coño ñuhu yo cha saniñi chí chí yo cha sacuví yo noo cha ña vaha cha cuñi chí. ¹³ Ma cuhva yo ityí chí coño ñuhu yo cha sacuví chí cha quiñi caa. Soco cuhva cuenda yo chí yo chí Nyoo, tari noo ñáyivi cha chihí ta nandoto. Cuhva cuenda yo coño ñuhu yo chí Nyoo tacuhva vatyí sacuví yo cha vaha. ¹⁴ Vatyí cuatyí yo ma cuví ca chasaha chí chí yo. Vatyí ley cha tyaa ra Moisés, ña nyacá ñaha ca chí chí yo, soco cha cacú añima yo ta iyó yo cha cuenda tumañi ñi cha chahá Nyoo chí yo.

Cuví yo tari noo musu cha sacuví cha vaha

¹⁵ Iyó yo cha cuenda tumañi ñi cuan, ta vityín ña nyacá ñaha ca ley chí yo. ¿Ta tatu ña nyaca ñaha ca ley chí yo, atu tahán chí sacuví ca yo cuatyí? Ña tahán chí. ¹⁶ Nyoho chitó vaha ndo vatyí tatu cuví ndo musu noo ra, tahán chí sacuví ndo cha catyí ra cuan. Ta tyicuan caa cuví yo musu ra cha tuhvá yo quichahá chí. Yucuan chaha tatu quichahá yo cha cuñi cuatyí cha sacuví yo, tari noo chitoho yo cuví cuatyí cuan, vatyí quichahá yo chí cuan. Ta cunaa yo chihin cuan. Soco tatu quichahá yo chí Nyoo, cusaha ra tuhun tyi vaha yo. ¹⁷ Soco tyahví nyoo chí Nyoo, tyi nyoho nu quichi chí cuví ndo noo musu chí

cuatyi vatyi quichahā ndo chi cuan. Soco vityin chihin cha nū iñi ndo quichahā ndo tuhun Nyoo cha sañahá ñu chi ndo. ¹⁸ Cha yahā cundaq cuatyi ndo, ta vityin ña nyacá ñaha ca chi chi ndo. Ta vityin cuví ndo noo musu cha cua sacuvi cha vaha. ¹⁹ Cahín noo cuhva cha ña yí ri chihin ndo vatyi ta cutuñi vaha ca iñi ndo tuhun Nyoo. Quiví cuan chahā cuenda ndo coño ñuhu ndo chi cha quiñi caa ta cha ña vaha vatyi sacuví ndo cha ña vaha. Vityin ñacuhva cuenda ndo coño ñuhu ndo chi Nyoo tacuhva vatyi coo ndo noo ñayiví cachi, ta maa maa ri cha vaha sacuvi ndo nuu ra.

²⁰ Quiví cuví ndo musu cha quiñi caa, ña cuví sacuvi ndo cha vaha. ²¹ Soco ¿ñáá cha ñihí ndo chihin cuan? Maa ri ticahan nuu chahā cuan chi ndo. Ta ña tuví iñi ndo. Maa ri tuhun chihi ta anyaya nyisó cuan. ²² Soco vityin ña nyacá ñaha ca cuatyi chi ndo. Ta vityin cha sacuvi ndo tyiño nuu Nyoo. Ta ihya ndicha tyinyeé chi chi ndo vatyi chihin ihya cuví coo ndo noo ñáyiví cachi. Ta nu ndihi tuhun tyicuan ri maa cucoo ndo chihin Nyoo. ²³ Cha sacuví yo cuatyi, ican cuan chahā tuhun chihi chi yo. Soco tumañi iñi cha chahá Nyoo chi yo, ican cuan cuví ñayiví cha ma naa ca maa. Ta ican cuan chahá ra ta ñahri tyiyahvi yo, cha cuenda cha ñin ri cuví yo chihin ra Cristo Jesús, Sutu Mañi yo.

7

Ña nyacá ñaha ca ley chahnu chi ñu yihí cuenda ra Cristo

¹ Yañi, nyoho ñu chitó ley cuví ndo, chitó ndo vatyi ley nyacá ñaha chi chi noo ñáyiví cha ni ri ca cha iyó ñu. ²⁻³ Ta cuñun, noo ñaha tandaha, catyí ley vatyi coo ña chihin yí ña nyacua nya cuví ra. Ta tatu iyó ña chihin inga rayíi cha ni ri cha iyó yí ña, chicoq cuatyi ña nuu Nyoo. Soco tatu cha yahā chihi yí ña, ña nyacá ñaha ca ley cuenda ñu tandaha chi ña, ta cuví tandaha ña chihin inga ra, ta ma coo cuatyi ña nuu Nyoo.

⁴ Ta tyicuan caa tucu nyoho yañi. Cha chihí ndo cha cuenda ley chahnu ta cuví ndo ñu cuenda ra Cristo vatyi ican ra cuví yí ndo vityin. Ta ican ra cuví ra cha nandotoq, tacuhva vatyi cuví cotyíño Nyoo chi yo ta sacuví yo cha vaha. ⁵ Quiví chiyó yo cuhva cuñí coño ñuhu yo, ley chahnu cha tyaq ra Moisés, tacuhva sanaquiqui ri chi chi yo cha sacuví yo cha quiñi caa, vatyi catyí chi tyi ma sacuví yo. Soco sacuví yo, ta yucuan cuví cha chahā tuhun chihí chi añima yo. ⁶ Soco vityin ña nyacá ñaha ca ley chahnu cuan chi yo, vatyi cha yahā chihi cha quiñi caa yo chihin ra Cristo. Ta vityin cuví sacuví yo tyiño nuu Nyoo vatyi iyó yo ñayiví chaa cha chahá Tatyí Ii Nyoo chi yo, ta ña sacuví

ca yo tari sacuví yo quiví nyicoñ xaan yo ley chahnu cuan.

Ley Nyoo, ican sañahá vatyi iyó cuatyi yo

⁷ Ta vityin yoso caa, ¿atu ña vaha ley cuan?

Ñima cha ña vaha. Vaha. Soco tyehe ta ña tuví ley cuan, ma cote ñáá cha cuví cuatyi. Ni ma cote tyi ña vaha cha quichi cuví iñi cha chii inga ñáyiví, tyehe ta ña catyí ley cuan vatyi ña vaha. ⁸ Tyehe ta ñahri ley cuan, ma cote ñáá cha cuví cuatyi, ta ma cuñi xain sacuvi, soco quiví cha chité ñáá cha cuví cuatyi, yucuan quiví quichí cuvi xaan iñi sacuvi, vatyi naquiquí cha quiñi caa cha iyó chi. Soco tyehe ta ñahri ley, ma coto yo tyi iyó cuatyi. ⁹ Ta quiví cha ña chité ñáá tuhun cahán ley cha chahā Nyoo chi ra Moisés, chicā iñi vatyi ñahri cuatyi iyó nuu Nyoo. Soco quiví chité ley cuan, ta chité vatyi tahán chi cunai nuu Nyoo vatyi iyó cuatyi. ¹⁰ Catyí ley cuan tyi tatu quichahí chi chí, cucoi tyicuan ri maa. Soco cha nuu cha ñihí tahvi añime chihin ley cuan, cunaa ndihi nuu Nyoo. ¹¹ Ta cuatyi cha iyó chii, sandaví ñaha chi chí vatyi chotyíño chi ley chahnu cuan tacuhva vatyi tahán chi cunai nuu Nyoo, vatyi ña quichahí nu cahán ley cuan.

¹² Ley cha chahā Nyoo chi ra Moisés, vaha xaan, vatyi tuhun cha chahā maa Nyoo cuví, ta tandihí cha catyí ra vatyi sacuvi yo, vaha xaan ta cuiti xaan. ¹³ Ta ley vaha cuan, ¿atu ican cuan sativí chii? Ñima. Cuatyi cha sacuví, ican sativí chii, yucuan chaha tahán chi cunai nuu Nyoo. Vatyi ley vaha cuan, ican cuví cha sañahá chii vatyi cuatyi cuví cha sacuví. Ta cha tyicuan caa, sañahá ley vatyi quiñi xaan caa cha sacuví yo cuatyi.

¹⁴ Ta chitó yo vatyi ley cuan, Nyoo chaha. Ta ñahri cuatyi ley cuan. Soco mai iyó cuatyi vatyi sacuví cha quiñi caa ta nyacá ñaha cuatyi cuan chii. ¹⁵ Ña cutuñi iñi ñáá cha tahin. Vatyi cuñí sacuvi cha vaha, ta ña cuví sacuvi. Ta cha ña vaha cha ña cuñí sacuvi, ican cuan sacuví. ¹⁶ Cuñí xain sacuvi cha vaha, soco ña cuví sacuvi, ta cha tyicuan caa tiin cuenda vatyi ley chahnu Nyoo, vaha chí. ¹⁷ Ñima ca mai sacuví cha ña vaha, soco cuatyi cha iyó chí, ican cuan sacuví cha ña vaha. ¹⁸ Vatyi chité vatyi iyó cuatyi cha cuenda coño ñuhi. Yucuan chaha ñahri cha vaha sacuvi, vatyi quichí cuví iñi sacuvi cha vaha, soco ña cuví. ¹⁹ Cuñí sacuvi cha vaha, soco ña sacuví ta sañihí que sacuvi cha ña vaha. ²⁰ Ta tatu sacuví cha ña cuñí sacuvi, ñima ca mai sacuví, soco cuatyi cha iyó chii, ican cuan sacuví.

²¹ Ta tyehe caa iyó noo cha tahin, tatu cuñí sacuvi cha vaha, maa ri cha ña vaha sacuví. ²² Vatyi chichí añime tahán xaan iñi ley Nyoo. ²³ Soco iyó inga ley chichí coño ñuhi, ta ña tahán iñi chí cuhva cha tahán iñi

añime. Ta chahá chi cha cunyaca ñaha cuatyí cha iyó chichí coño ñuhu chíi. ²⁴ Ndahvi yuhu ra ndahvi! ¿Yóo ra cusacacu chíi tacuhva ma cunai nuu Nyoo chihin cuhva ña vaha cha nyacuví coño ñuhi? ²⁵ Noo tuhun ri maa Nyoo sacacú ra chíi cha cuenda ra Jesucristo. ¡Tyahví nyoo chí Nyoo cha cuenda cuan! Ta vityin nyehí vatyi chihin añime cuñí sacuví ley Nyoo, soco coño ñuhi cuñí chí sacuví chí ley cuatyí.

8

Tatyí Ii Nyoo tyinyeé chi chí yo ta cuví coo yo noo ñayiví chaa

¹ Soco vityin, Nyoo ma tachi tuñi ca ra chí ñu ndú ñin ri chihin ra Cristo Jesús, ta ña iyó ca ñu cuhva cuñí coño ñuhu ñu, soco iyó ñu cuhva cuñí Tatyí Ii ra. ² Ta tyicuan caa tucu yuhu, Tatyí Ii Nyoo nyacá ñaha chíi vityin vatyi ndachí chí chíi, ta chahá chí noo ñayiví chaa coi cha cuenda cha ñin ri cuví chihin ra Cristo Jesús. Ta vityin ña nyacá ñaha ca ley cuatyí ta tuhun chíi chíi. ³ Nyoo sacuví ra noo cha ña cuví sacuví ley cha quehen cuenda ra Moisés, vatyi ña cuví chasaha chí coño ñuhu cuatyí yo cha nyacá ñaha chí yo. Yucuan chaha Nyoo saquichí ra chí Sehe ra. Quichí ra chihin noo coño ñuhu tari maa yo, ta chíi ra cha cuenda cuatyí yo, ta sandihí ra tuhun cha nyacá ñaha cuatyí chí yo. ⁴ Sacuví Nyoo tyehe caa tacuhva cuví sacuví yo cuhva catyí ley ra, vatyi ñima ca cuhva cuñí coño ñuhu yo iyó yo, soco iyó yo cuhva cuñí Tatyí Ii Nyoo.

⁵ Vatyi ñu iyó cuhva cuñí coño ñuhu, cuhva cuñí chí chícá xiñi ñu, soco ñu iyó cuhva cuñí Tatyí Ii Nyoo, cuhva cuñí Tatyí Ii Nyoo chícá xiñi ñu. ⁶ Ta ñu chícá xaan xiñi maa maa ri tuhun cha cuñí coño ñuhu ñu, cunaa ñi nuu Nyoo. Soco ñu chícá xiñi cuhva cuñí Tatyí Ii. Iyó cha taxi ri añima ñu ta cucoo ñu ñayiví tyicuan ri maa chihin Nyoo. ⁷ Ñu cha maa maa ri cuhva cuñí coño ñuhu chícá xiñi, ñu xaan ñi chí Nyoo cuví ñu, vatyi ñi ña cuñí ñu ta ñi ña cuví sacuví ñu cha catyí ley ra. ⁸ Yucuan chaha ñu iyó cuhva cuñí coño ñuhu, ña cuví sacuví ñu cuhva tahán ñi Nyoo. ⁹ Soco nyoho ña iyó ca ndo cuhva cuñí coño ñuhu, vatyi tatu ndicha cha iyó Tatyí Ii Nyoo añima ndo, iyó ndo chihin cha ñin ri cuví ndo chihin Tatyí Ii Nyoo. Ñu cha yori Tatyí Ii ra Cristo ñohó añima, ñima ñu cuenda ra Cristo cuví chí ñu. ¹⁰ Soco ñu iyó ra Cristo añima, nyitó añima ñu vatyi sanduvahá Nyoo. Soco coño ñuhu ñu chíi chí cha catyí cuatyí. ¹¹ Nyoo sanandoto ra chí ra Jesús cha yahá cha chíi ra. Ta tyicuan caa tucu nyoho, tatu iyó Tatyí Ii Nyoo añima ndo, cusandoto tucu Nyoo chí coño ñuhu ndo chihin Tatyí Ii ra.

¹² Ta tyicuan caa yañi, nyaá noo cha nyaá siqui yo cha sacuví yo, soco ñima cha sacuví yo cuhva cuñí coño ñuhu yo. ¹³ Vatyi tatu iyó ndo maa maa ri cuhva cuñí coño ñuhu ndo, cunaa ndo nuu Nyoo. Soco tatu iyó ndo cuhva cuñí Tatyí Ii Nyoo chihin tunyee ñi ra, cuví chasaha ndo chí cha quiñi caa cha cuñí coño ñuhu ndo ta cuconyito ndo cha ndicha cuíi.

¹⁴ Vatyi tandihí ñu sacuví cuhva saquehén ityi Tatyí Ii Nyoo, sehe Nyoo cuví chí ñu. ¹⁵ Nya quiví cha tñin cuenda yo Tatyí Ii Nyoo ta ña yuhví ca yo chí ra, vatyi ñima tari noo ra nyacá ñaha chihin cha xaan cuví ra, ta vityin nanduví yo sehe ra. Tatyí Ii sacahán chí yo na cahan yo chihin Nyoo tyehe caa: “Sutu Mañi yuhu”, catyí yo chí ra.

¹⁶ Ta suri maa Tatyí Ii cuan ndú ñin ri chí chihin cha chíi tuñi yo ta sacoto chí chí yo vatyi cha cuví yo sehe Nyoo. ¹⁷ Ta cha cuenda cha cuví yo sehe ra, iyó ityi chí yo cha ñihi yo cha vaha cha catyí Nyoo tyi cuhva ra chí yo, ñin ri chihin ra Cristo. Vatyi tatu ñin ri nyehé yo tindoho chihin ra Cristo, suri ñin ri cucahnu yo chihin ra.

¹⁸ Chité vatyi tindoho cha nyehé yo vityin, noo cha luhlu ri cuví cha nuu cha tyaqui cha cunyehe yo nachaa yo nuu nyaá Nyoo. ¹⁹ Tandihí cha savahá Nyoo cuñí xaan chí nyehé chí, ta nyatú chí quiví cha cusañaha ra yóo cha cuví tandihí sehe ra. ²⁰ Vatyi tandihí cha savahá Nyoo tiví chí. Vasi ña cuñí chí tiví chí soco Nyoo chahá ra cha tiví chí cha cuenda cuatyí cha sacuví ñayiví. Soco catyí Nyoo tyi coo quiví ta cunduchaa tucu chí inga chaha. ²¹ Tandihí cha savahá Nyoo ta cunduchaa tucu chí inga chaha, ta ma cutiví ca, quiví cha cunasama Nyoo cuhva iyó chí vityin. Ta cucusi cuñí chí ñin ri chíi tandihí sehe Nyoo vatyi ma tiví ca chí. ²² Chitó yo vatyi tandihí cha savahá Nyoo ta nyehé xaan chí tindoho. Cahnu xaan tindoho nyehé chí tari cha uhvi cha nyehé noo ñaha síhi cha cacú sehe ña. ²³ Ta ñima maa ri maa chí nyehé tindoho, soco nyehé tucu yoó. Vasi cha natñin cuenda yo Tatyí Ii cha chahá quiyi Nyoo chí yo, soco cahnu xaan tindoho nyehé yo, vatyi cuñí xaan yo cha tahán ri chí quiví cha cunanduví yo sehe ra. Vatyi cunasama ra cuhva iyó coño ñuhu yo. ²⁴ Vasi ta ñihi ca yo tandihí cuan soco chitó yo tyi cuñihi yo vatyi chino ñi yo ta chihin cuan cacu yo. Tatu nyatú yo cha cutahan chí chí yo, cuñí chí catyí vatyi ta ñihi ca yo. Tatu cha yahá ñihi yo chí chí, ma cuatu ca yo. ²⁵ Soco tatu yihí ñi yo cha ñihi yo noo cha ta nyehé ca yo, cuñí chí cha cuatu yo chihin cha cama ñi yo. ²⁶ Ta suri tyicuan caa tyinyeé tucu Tatyí Ii chí yo chihin cha vita cuñí yo vatyi ña chitó yo yoso caa cacan tahvi yo chí Nyoo cuhva tahán chí. Ta Tatyí

Ii cuan chicán tahvi chi chi Nyoo cha cuenda yo chihin noo tuhun cha ña cuví nacatyi yo. ²⁷ Chitó maa Nyoo ñáá cha caá añima yo, ta chitó ra ñáá cha cuñí Tatyí Ii ra cacan chi, vatyi chicán chi cuhva cuñí maa ra cha cuenda ñáyivi cuenda ra.

²⁸ Chító yo vatyi ñáyivi, ñu cuñí vavaha chi Nyoo, tandihi cha cuví chi ñu ta tyinyeé chi chi ñu, vatyi maa ñu cuví ñu nacachi ra, tari cuhva tyaá ra cuhva chi ñu. ²⁹ Vatyi nya quívi xihna ri, ta cha ñohó nuu Nyoo yóó cuví ñu cucunicon chi ra. Ta tyaá ra cuhva chi ñu vatyi cucuvi ñu tari Sehe ra, ra Jesucristo, tacuhva vatyi cucuvi ra ra cha ñihi ca cha nuu tandihi ca yañi ra, ñu yihí tuhun Nyoo. ³⁰ Ta ñu cha tyaá Nyoo cuhva tyi cuví ñu sehe ra, nacana tucu ra chi ñu. Ta ñu cha nacana ra, suri sacuvaha ra chi ñu nuu ra. Ta ñu cha sacuvaha ra chi, chaha ra cha cucahnu cuví ñu chihin ra.

³¹ ¿Ñáá cha catyi yo cha tyicuan caa? Tatu Nyoo ta nyaá ra tumañi iñi chi yo, ¿yóó cha cuví tyaá cuatyi siqui yo? Yori. ³² Nyoo ña catyí ra cha ma cuhva cuenda ra sehe ra, soco chaha cuenda ra chi ra vatyi cúvi ra cha cuenda tandihi yo. Ta tatu tyicuan caa, ¿atu ma cuhva tucu ra tandihi ca cha chihuhú chi yo ñin ri chihin Sehe ra? Cuhva ra. ³³ ¿Yóó cha cuví tyaá cuatyi siqui ñu cha nacachi Nyoo? Yori. Vatyi Nyoo ícan ra cuví ra saha ra tuhun tyi vaha ñu nuu ra. ³⁴ ¿Yóó cha cuví catyi tyi cuhun yo anyaya? Yori. Vatyi ra Cristo cuví ra chihí cha cuenda cuatyi yo, ta nandoto ra ta vityin nyaá ra chiyo vaha ndaha Nyoo, ta chicán tahvi ra nuu Nyoo cha cuenda yo. ³⁵ Ñahri cha cuví sacuachiyo chi yo chihin cuhva cuñí xaan ra Cristo chi yo. Vatyi vasi nyehé xaan yo tindoho, vasi iyó tisihi, vasi cahán ñáyivi chi yo cuenda tuhun Nyoo, vasi iyó tama, o ñahri sahma yo, vasi yuhví yo, vasi chihí yo, soco ma cuví sacuachiyo tandihi tindoho cuan chi yo chihin cuhva cuñí ra chi yo. ³⁶ Vatyi tyehe caa cahán chi nu tutu Nyoo tuhun tindoho cha cunyehe yo:

Cha cuendon, Sutu Mañi yuhu, ta cuñí cahñi ñáyivi chi ndi tandihi quívi.

Ta tari noo mbee cha cua cahñi ñu, tyicuan caa sacuví ñu chi ndi, catyí chi.

³⁷ Soco vasi yahá yo tandihi tindoho cuan, soco cucuvi vaha ca chasaha yo cha cuenda ra cha cuñí xaan chi yo. ³⁸ Yucuan chaha chitó vahi vatyi ñahri maa cha cuví sacuachiyo chi yo chihin cuhva cuñí xaan Nyoo chi yo. Ni tuhun chihí, ni ñáyivi iyó yo, ni ángel, ni tatyí ña vaha, ni cha cuví vityin, ni cha cucuvi ityi nuu ca, ni noo cuan, ta ma cuví sacusin chi chi yo chihin Nyoo. ³⁹ Ni cha iyó nu sucun, ni cha iyó nu cono xaan, ni nonga cha savaha Nyoo, ma cuví sacusin

chi chi yo chihin Nyoo, ra cuñí xaan chi yo cha cuenda ra Cristo Jesús Sutu Mañi yo.

9

Nyoo nacachi ra chi ñu ñuu Israel

¹ Cahán cha ndicha, tari tuhvá cahán noo ra chinó iñi chi ra Cristo. Ña sandaví ñahi, vatyi Tatyí Ii Nyoo ícan saquehén ityi cha chihí tuñi xiñi. Yucuan chaha chitó vahi vatyi cha ndicha cahán nu catyí tyi ² cuihya xaan cuñí ta tyicuan ri uhvi cuñí añime ³ cha cuenda ñu ñui ñu Israel. Cuñí xain chi ñu. Ta nyacua cuhve añime na cuhun maa nu uhvi, tyehe ta cuví cacu añima ñu cha tyicuan caa. ⁴ Ta maa ñu, tata ra Israel vachi ñu. Ta Nyoo naquehen cuenda ra chi ñu tari cha sehe ra. Ta sañaha ra cuhva caá ra chi ñu, tyi cahnu xaan ra cuví ra, vatyi chinyaá ra chihin ñu. Ta natyihí tahan ra tuhun chihin ñu, ta chaha ra ley ra chi ra Moisés vatyi cuhva ra chi ñu. Ta sañaha ra cuhva cuñí ra cha sacahnú ñu chi ra. Ta catyí ra chi ñu yoso caa cusacuvi ca ra cha vaha chihin ñu nu cuahan ca chi. ⁵ Tata ñu sutu chahnu yo cuví chi ñu, ta tata ñu, ícan cuví chi ra Cristo cuenda coño ñuhu ra. Ícan ra cuví Nyoo. Ta ícan ra cuví ra nyacá ñaha tandihi cha iyó. ¡Na sacahnu yo chi ra tyicuan ri maa! ¡Ta na cuví chi tyicuan caa!

⁶ ¿Atu catyí vatyi ña sacuví Nyoo tari cuhva catyí ra chi ñu Israel ta cha naha? Ñima. Soco cuñí chi coto yo tyi ña tandihi ñáyivi Israel cuví ñu ñu Israel cha ndicha. ⁷ Ña tandihi ñu tata ra Abraham ta cuví ñu sehe ra cha ndicha. Vatyi tuhun cha cahán maa Nyoo chihin ra, cahán chi cha cuenda noo ri sehe ra. Vatyi catyí Nyoo chi ra tyehe caa: “Cha cuenda ra Isaac sehun cucoo ñáyivi chuun.” ⁸ Ihya sañahá chi yo vatyi ñima cha cuenda tata cha vachi ñáyivi ta cuví ñu ñáyivi cuenda Nyoo. Soco tandihi ñáyivi chinó iñi tuhun catyí Nyoo tyi cusacuvi ra, ícan ñu cuví ñu sehe ra cha ndicha. ⁹ Vatyi cha catyí Nyoo tyi cuhva ra chi ra Abraham, ícan cuví ihya: “Quívi cha tahán chi, cuquichi nu nyicú ndo ta cu Sara cucoo noo sehe ña”, catyí Nyoo chi ra.

¹⁰ Ta ñima yucuan ri. Vatyi ni nduvi sehe cu Rebeca, ñin ri sutu ra, sutu chahnu yo, ra Isaac. ¹¹⁻¹² Soco cha ni cumañi ca cacu ndotyin, ta sacuvi ca ndotyin ni cha vaha, ni cha ña vaha, ta catyí Nyoo chi cu Rebeca: “Sehun cha ñihi ca cucuvi ra musu ra cha luhlu ca.” Sacuví Nyoo tyicuan caa vatyi cachi ra chi ñáyivi cha cuñí maa ra, ta ñima cha cuenda cha sacuvi ñu. ¹³ Tari catyí ra nu tutu ra tyehe caa: “Cuñí que chi ra Jacob, ta chi ra Esaú ña cuñí.”

¹⁴ ¿Tu tyicuan caa ñáá cha cucatyi yo? ¿Atu cuví catyí yo tyi ña vaha cha sacuví Nyoo? ¡Ma cuví! ¹⁵ Vatyi catyí ra chi ra Moisés tyehe

caa: “Cu cundahvi cuñi yóo ñáyivi cuñi mai cundahvi cuñi.”¹⁶ Ta tyicuan caa chitó yo vatyi ma cundahvi cuñi Nyoo nyehe ra chi ñáyivi cha cuenda cuhva cuñi maa ñu, o cha cuenda cha sacuví ñu. Soco cuhva cuñi maa Nyoo cucuvi. Vatyi maa ra cuví ra cundahvi iñi yóo chi cuñi maa ra.¹⁷ Vatyi nu tutu ra, catyi ra chi rey Egipto tyehe caa: “Sacuví rey chuun tacuhva sañahí tunyee iñi cha iyó chii chí ndo, ta tandihí ñáyivi cucoto ñu yóo ra cuví yuhu”, catyi Nyoo.¹⁸ Ta tyicuan caa Nyoo cundahvi cuñi ra yóo ñáyivi cuñi maa ra. Ta suri sandundavá tucu ra añima ñu cuñi maa ra sandundava ra.

¹⁹ Ta cu catyün chii: “Tatu tyicuan caa, ¿ñáá tuhun cha tyaa Nyoo cuatyí siqui ñáyivi? Vatyi ¿yóo cha cuví nacahnu cuhva cuñi ra? ¡Yorí!”²⁰ Soco ña vaha cuhva chicá iñun cha tyicuan caa. Vatyi yori cuví catyi tyi ña vaha cha sacuví Nyoo. ¿Yóo ra cuví yoho vatyi nacahun nu cahán Nyoo? ¿Atu cuví catyi quisi ñuhú cuan chí ñu cha savahá chi chí vatyi ña tahán iñi chí cuhva cha savahá ñu chí chí? Ma cuví.²¹ Vatyi ñu cha savahá ndaha tyiño iyó ityi chí ñu savahá maa ñu ñáá cha cuñi ñu chihin nyahyu cuan. Chihin nyahyu cuan cuví savaha ñu noo quisi finu xaan. Ta cuví savaha tucu ñu noo cha ndahvi ri.

²² Tyicuan caa tucu Nyoo, iyó ityi chí ra cha tachí tuñi ra chí ñáyivi quiñi iyó cha cuenda cha sacuví ñu cha ña vaha. Ta cuví sañaha ra chí ñu tyi iyó xaan tunyee iñi chí ra. Soco sanyee xaan ra iñi ra chihin ñáyivi cuan. Ta chí maa ñu tahán chí tachí tuñi ra. Ta tahán chí sanaa ra chí ñu.²³ Ta iyó tucu ityi chí ra cha saha ra tucahnu iñi chí ñu savahá maa ra vatyi sañahá ra tyi cahnu ra cuví ra. Maa ñu cuví ñu ñu cachí ra vatyi cuñi ñu tandihí cha vaha, ta cucoo ñu gloria chihin ra.²⁴ Ta suri maa yo cuví ñu cuan. Vatyi Nyoo caná ra chí yo. Yihí yo cuví yo ñu Israel, ta yihí yo cha ñima ñu Israel cuví yo.²⁵ Tari catyi Nyoo nu tutu cha tyaa ra Oseas tyehe caa:

Ñu cha ñima ñu ñui cucatyí yuhu tyi ñáyivi chii cuví chí ñu.

Ñu cha ña cuñi, cunacuñi chí ñu, catyi Nyoo.

²⁶ Ta suri nu catyi Nyoo chí ñu tyehe caa: “Nyoho ñima ñáyivi chii cuví ndo.” Ta suri yucuan cunacatyí tucu ra chí ñu: “Sehe yuhu, ra cuví Nyoo nyito, cuacuví ndo.”²⁷ Soco cha cuenda ñu Israel catyi ra Isaías tyehe caa: “Vasí cuaha xaan ñáyivi ñu Israel tari cha cuaha niyiti iyó yuhu tyañuhu, soco suhva ri ñu cucacu.”²⁸ Vatyi Sutu Mañi yo numi ri cusacuví ra tandihí cha catyi ra tyi cusacuví ra siqui ñuhu ñáyivi chihin cha cachi.”²⁹ Tari catyi tucu ra Isaías ta ityi chata ca tyehe caa:

Tyehe ta Sutu Mañi yo ra nyacá ñaha tandihí cha iyó andívi, ta ma sacacu ra chí suhva yo, cunaa tandihí yo,
Tari naq ñáyivi Sodoma ta ñu Gomorra ta cha naha.

Ñu Israel nducú ñu cuhva cuvaha ñu nuu Nyoo soco ña ñihí ñu cuhva

³⁰ ¿Tatu tyicuan caa, ñáá cha catyi yo? Ñáyivi cha ñima ñu Israel cuví, ña nanducu ñu cuhva cuvaha ñu nuu Nyoo, ta ícan ñu cuví ñu cuvahá nuu ra cha cuenda cha chinó iñi ñu chí ra.³¹ Ta ñu Israel nyicón xaan ñu ley, tyi cuñi maa ñu tyi cuvaha ñu nuu Nyoo chihin cuan, soco ña cuví.³² ¿Ñáá tuhun? Vatyi cuñi ñu cuvaha ñu nuu Nyoo chihin cha sacuví ñu ley cuan, ta ña cuñi ñu cuvaha ñu nuu ra chihin cha chinó iñi ñu chí ra. Yucuan chaha vatyi tari cha catyihí chaha ñu chihin noo yuu cuví chí cuan.³³ Yuu cuan cahán Nyoo tuhun nu tutu ra tyehe caa:

Ñuu Sión, yucuan tyaj chí noo rayí cha cuví tari noo yuu.

Noo yuu cha sanduvá chí ñáyivi cuví ra.

Soco ñu chinó iñi chí ra ma cucahan nuu ñu, catyi Nyoo nu tutu ra.

10

¹ Yañi, cuñi xain chihin cha tandihí añime cha cacu ñu Israel. Ta cha chican tahvi xain cha cuenda ñu.² Cha ndicha cuví vatyi cuñi xaan ñu sacahnú ñu chí Nyoo, soco ña ñihí ñu cuhva yoso caa tahán chí sacuví ñu.³ Vatyi ña chító ñu yoso caa sacuvahá Nyoo chí ñáyivi nuu ra. Ta nducú ñu cuhva sacuvaha maa ñu chí ñu, ta ña nacuhvá cuenda ñu chí ñu chí ra tacuhva sacuvaha maa ra chí ñu.⁴ Vatyi ra Cristo cha quichí ra ta sacuví ra tandihí cha catyi ley, ta sacuví ra vatyi tandihí ñu chinó iñi chí ra, cuvaha ñu nuu Nyoo.

⁵ Catyi ra Moisés vatyi cuví cuvaha ñáyivi, soco tatu quichahá ñu cha catyi ley, vatyi catyi ra tyehe caa: “Ñu cha quichahá tandihí cha catyi ley, coo ñu noo ñáyivi cha ma naa ca maa.”⁶ Soco cha cuvaha yo nuu Nyoo cha cuenda cha chinó iñi yo chí ra Cristo, catyi nuu tutu Nyoo tyehe caa: “Ma caca xiñun vatyi cuñi chí cha cundaa noo ra andívi ta cusanoo ra chí ra Cristo tacuhva sacacu ra chí yo.” Ma caca xiñun tyicuan caa vatyi cha yahá quichi ra Cristo.⁷ Ni ma caca xiñun vatyi cuñi chí cha cunoo noo ra chichi ñuhú vatyi sanandoto ra chí ra Cristo, vatyi cha yahá nandoto ra.⁸ Ma caca xiñun tyicuan caa vatyi tyehe caa catyi nu tutu Nyoo: “Tuhun Nyoo yatyin nyaá chí chihin ndo, yuhu ndo ta añima ndo nyaá chí.” Ta suri tuhun cuan sacoto ndi chí ndo, tuhun cha quichí ra Cristo ta nandoto ra. Ican cuví tuhun cha tahán chí chinó iñi yo.⁹ Tatu

chihin yuhun catyún vatyi ra Jesús cuví Sutu Mañi yo, ta chihin añimon chinó ifiun tyi Nyoo sanandotó ra chí ra cha yahá chihí ra, cucacu añimon. ¹⁰ Vatyí chihin añima yo cuñí chi chino ifi yo chí ra Cristo tacuhva cuví cuvaha yo nuu Nyoo, ta chihin yuhu yo tahán chí catyí yo tyi chinó ifi yo, tyicuan ta cacu añima yo. ¹¹ Tuhun Nyoo catyí chí: “Ni noo ñu cha chinó ifi chí ra ta ma tahan ñu ticahan nuu.” ¹² Vatyí Nyoo ñin ri cuhva nyehé ra chí ñu Israel ta chí ñu inga ñuu. Vatyí suri maa ra cuví ra ra nyacá ñaha chí tandihí yo. Ta nasocó xaan ra chí tandihí yo cha chicán tahvi yo chí ra. ¹³ Vatyí tyehe caa catyí tuhun Nyoo: “Tandihí ñu cha chicán tahvi chí ra Jesús cucacu añima ñu.” ¹⁴ Soco ¿yoso caa cucacan tahvi ñu chí ra tatu ta chino ca ifi ñu chí ra? Ta ¿yoso caa cuchino ifi ñu chí ra tatu ta cuñí ca ñu tuhun ra? Ta ¿yoso caa cuiñi ñu tuhun ra tatu ta yori ca cahán tuhun ra chihin ñu? ¹⁵ Ta ¿yoso caa cucahan ñu yihí tuhun Nyoo chihin ñu, tatu yori tachi chí ñu? Tari catyí nu tutu Nyoo: “Ñana cha tyaquí nu chaa ñu cahán tuhun vaha nuu ñáyivi.” ¹⁶ Soco ña tandihí ñu ta quichahá ñu tuhun cha sacacú Nyoo añima yo. Vatyí tyehe caa catyí ra Isaiás: “Sutu Mañi yuhu, yori cuñí chino ifi tuhun cahán ndí”, catyí ra. ¹⁷ Yucuan chaha cha chiñi xihna yo tuhun ra Cristo, tyicuan ta chino ifi yo chí ra.

¹⁸ Soco ndacá tuhín ihya: ¿Atu ña chiñi ñu Israel tuhun Nyoo? ¡chiñi ñu! Vatyí nu tutu Nyoo catyí chí tyehe caa:

Sutu Mañi yuhu, cha sacotó ñáyivi tuhun maun nicahnu siqui ñuhu ñáyivi, catyí chí nu tutu Nyoo.

¹⁹ Soco ndacá tuhín inga chaha tyehe caa: ¿Atu ña chinó ifi ñu Israel cha cuenda tyi ta nacoto ca ñu tuhun Nyoo? ¡Chitó ñu! Vatyí cha xihna ri ra Moisés tyaq ra tuhun cahán Nyoo chihin ñu Israel tyehe caa:

Nyoho, cucuquiñi cuñi ndo vatyi cucuhve cha vaha chí noo ityi ñáyivi cha ñima ri tuhun, ñáyivi cha ña cutuñi ifi.

Ta cunaquiqui tisihi ndo nyehé ndo chí ñu, catyí Nyoo.

²⁰ Ta ra Isaiás cañá ifi ra catyí ra tyi ñu cha ña nanducú chí Nyoo, ñañihí ñu chí ra. Ta sañahá ra chí ra chí ñu cha ña ndacá tuhun tuhun ra. ²¹ Ta tyaq tucu ra Isaiás tuhun cahán Nyoo chihin ñu Israel tyehe caa: “Ndiyaca cané chí ñáyivi chí, nacuhva cuenda ñu chí ñu chí, soco ña quichahá ñu. Ndava xaan ifi ñu”, catyí Nyoo.

11

Yihí ñu Israel cha ñihí ñu cuhva cacu añima ñu

¹ ¿Atu ña cuñí ca Nyoo chí ñu Israel? Ñima cha ña cuñí ca ra chí ñu, vatyi suri ra Israel

cuví tucu yuhu. Vatyí tata ra Abraham ta tata ra Benjamín cuví. ² Nyata cha naha cachí Nyoo chí ñu Israel tacuhva cuví ñu ñáyivi chí ra. Ta vityin ñima cha sacuachiyó ndihí ra chí ñu, vatyi chitó ndo cha catyí nu tutu Nyoo nu chicán tahvi ra Elías, profeta Nyoo, ta catyí ra tyi ña vaha sacuví ñu Israel, ta catyí ra tyehe caa: ³ “Sutu Mañi yuhu, chahñi ñu chí ra cuví profeta maun, ta satañi ñu arta vehe ñuhu maun. Noo tuhun ri ca mai ndoo, ta cuñí ñu cahñi ndihí ñu chí”, catyí ra. ⁴ Soco nacahan Nyoo ta catyí ra chí ra Elías: “Ñima maa ri maun ndoo. Ucha ca mil ñáyivi naquehen vahi cha ña chicutiñi chíti ñu nuu xitohyo nyoo Baal”, catyí Nyoo chí ra. ⁵ Ta suri tyicuan caa vityin, ndoo suhva ñu sacahnú chí Nyoo. Ican ñu nacachí Nyoo chí tyi cusaha ra tucahnu ifi chí ñu. ⁶ Vatyí cha cuenda cha vaha ñáyivi cuví Nyoo ta sahá ra ticahnu ifi chí yo. Tyehe ta chihin cha vaha ñáyivi cuví maa yo ta sahá Nyoo tucahnu ifi chí yo, cuñí chí catyí tyi ñima ca chihin cha vaha maa ra ta sacacú ra chí yo.

⁷ Ta ¿yoso caa? Ñu Israel nanducú xaan ñu cuhva cuvaha ñu nuu Nyoo soco ña ñihí ñu cuhva. Soco ñu cha nacachí maa Nyoo chí, ñihí ñu cuan cuhva. Ta inga ñu Israel cuan ndundava xaan añima ñu. ⁸ Tari catyí nu tutu Nyoo tyehe caa: “Nyoo chahá ra noo cuhva chí ñu cha ma cutuñi ifi ñu. Ta chahá ra chíti nuu cha ña cutuñi ifi ñu cha nyehe ñu. Ta chahá ra soho ñu soco ña cutuñi ifi ñu cha chíñi ñu, ta nyacua nya vityin ta tyicuan caa ñu.” ⁹ Ta suri catyí tucu ra David tyehe caa:

Sii xaan cuñi ñu chihin vico cha iyó ñu, soco yucuan cuví trampa cha sanacava chí ñu. Ta cha cuenda cuan ta cutachi tuñi Nyoo chí ñu.

¹⁰ Ta tari cha cunducuaa ñu vatyi ma ndichin ca nyehe ñu cha ndicha.

Ta tyicuan ri cucoso cha vee chata ñu, catyí ra David tuhun ñu Israel cha ña chinó ifi chí Nyoo.

Yoso caa cuvaha ñu cha ñima ñu Israel cuví nuu Nyoo

¹¹ Ta vityin ndaca tuhín ihya: ¿Atu cha cuenda cha ña quichahá ñu Israel cuan nu cahán Nyoo, ta ndoo ri maa ñu cha ma cacu ca añima ñu? Ñima. Vatyí cha cuenda cha ña quichahá ñu chí ra cha saquichí Nyoo, yucuan chaha sacacú Nyoo chí inga ñu cha ñima ñu Israel cuví. Ta tyicuan caa ta cuquiñi cuñi ñu Israel vatyi nachino ifi inga ñáyivi. Ta cha tyicuan caa ta cuquichi cuví tucu ifi ñu cha cacu añima ñu. ¹² Tatu cha cuenda cha ña quichahá ñáyivi Israel cuhva cha chahá Nyoo chí ñu, cuví chí cha vaha cha cuenda tandihí ca ñáyivi, vatyi chahá chí cuhva, ta cuaha xaan ñu nachino ifi ñu

chi ra Cristo, nyaca cuví quiví cundihvi tucu ñu Israel cuenda Nyoo inga chaha. Yucuan quiví, vaha xaan ta tyaquí xaan cucuvi.

¹³ Ta iyó suhva cha cuñí catyi chi nyoho cha ñima ñu Israel cuví ndo, vatyí ra Jesús tyatyíño ra chii cha cuhin nu iyó ñáyiví cha ñima ñu Israel cuví. Ta chité vatyí ñiñi xaan cuví tyíño cha chaha maa Nyoo chii. ¹⁴ Ta cuñí tiquí vatyí cunyehe ñáyiví Israel ñu ñui cuhva chinó iñi ndo chi Nyoo, ta cuquichi cuví iñi tucu suhva maa ñu sacuvi ñu tyicuan caa. Ta tyicuan caa ta cacu añima ñu. ¹⁵ Vatyí cha cuenda cha ña natíjn cuenda Nyoo chi ñu Israel cuví cuvaha inga ñáyiví nuu ra. Vaha xaan cha tyicuan caa ta nyaca cuví quiví cunatiñ cuenda tucu ra inga chaha chi ñu Israel, cucuvi tari cha cunandoto ñu nu chihí ñu. ¹⁶ Tatu vaha noo pan cha savaha yo cha xihna ri chihin yuchan pan cuan, vaha tandihí ca yuchan cuan. Ta tatu vaha yoho noo yutun, tandihí ca soco tun, ta vaha. Ta tyicuan caa tucu ñu Israel, cuñí Nyoo chi ñu cha cuenda cha vaha ra cha vachí ñu tata.

¹⁷ Ta ñu Israel cuví ñu tari noo soco noo tu olivo vaha cha cumí Nyoo. Ta chahnyá Nyoo chi suhva ñu vatyí ña chinó iñi ñu chí ra. Ta chaha tu olivo cuan natyaá tahan ra soco noo tu olivo cuhu. Ta maa ndo cuví tari tu olivo cuhu cuan. Ta tari cha natyaá tahan ra chi ndo chaha tu olivo cha xihna ri cuan. Ta tyicuan caa ndú in ri ndo chihin tu olivo Nyoo ta naquehén ndo tandihí cha vaha cha iyó chí ra. ¹⁸ Soco ma saha ndo tyi vaha ca ndo ican saha inga ñu cha cuví soco tu olivo cha chahnyá Nyoo. Vatyí tatu cuñí maa ndo tyi vaha ca ndo, cuñí chí nicohon iñi ndo vatyí ñima maa ndo nyisó ndo chí yoho yutun cuan, soco maa yoho yutun cuan nyisó chí ndo.

¹⁹ O catyí ndo: “Ican, soco chahnyá Nyoo soco yutun cuan tacuhva nicunyya maa ndi chaha tun.” ²⁰ Vaha. Soco chahnyá Nyoo soco cuan cha cuenda tyi ña chinó iñi ñu chí ra. Ta nyoho nicunyya ndo yucuan, soco cha cuenda cha chinó ri iñi ndo chí ra. Yucuan chaha ma sacahnú ndo chí ndo, soco saha ndo cuenda chí ndo. ²¹ Vatyí tatu ña sahá Nyoo ticahnú iñi chí ñu cha cuví soco vaha cuan, ni chí nyoho ta ma saha ra ticahnú iñi tatu ña chinó vaha iñi ndo chí ra. ²² Nyehé yoso cha vaha Nyoo, soco tyicuan tucu xaan ra chihin ñu cha ña natíjn cuenda tumañi iñi chahá ra. Soco chihin nyoho, vaha xaan ñáyiví cuví ra. Soco cuñí chí cha naquehén vaha ndo tumañi iñi cha chahá ra vatyí tatu ña naquehén vaha ndo, cucahnú tucu ra chí nyoho. ²³ Soco tatu nachino tucu iñi ñu Israel inga chaha, cu nicunyya tucu ñu nu coyó ñu. Vatyí Nyoo iyó tunyee iñi chí ra cha natyatahan tucu ra chí ñu cuan

inga chaha. ²⁴ Vatyí tatu nyoho cha ñima ñu Israel cuví ndo, ta quehén Nyoo chí ndo cha cuví ndo tari soco noo yutun olivo cuhu, ta natyaá tahan ra chí ndo chihin tu olivo vaha cha cumí ra, jta nyaca cuví ñu Israel cha cuví ñu soco tu olivo vaha! ¡Cunatyaa tahan chaa ra chí ñu inga chaha chaha tu olivo nu coyó ñu!

Nu ndihí ta cucacu tucu ñu Israel

²⁵ Vatyí yañi, cuñí cha coto ndo noo tuhun xehe cha sacuvi Nyoo, tacuhva vatyí ma caca xiñi ndo vatyí chitó xaan ndo. Vatyí ñu Israel ndundava añima ñu suhva quiví, nyacua nya cha cuví nachino iñi inga ñáyiví chí Nyoo. ²⁶ Ta cha yaha quihvi inga ñu cuenda Nyoo, tyicuan ta tandihí ñu Israel cucacu añima ñu, vatyí nu tutu Nyoo catyí chí tyehe caa:

Ra cha cusacacu chí ñáyiví, ityí Sión cuquichi ra.

Ta cusacanyaha ra cuatyí cha iyó chí ñáyiví chí ra Jacob.

²⁷ Ta ihya cuví tuhun cha cunatyihí tahin chihin ñu, quiví na sacuahye cuatyí ñu, catyí Nyoo nu tutu ra.

²⁸ Cuxaán xaan ñu Israel chihin Nyoo cha cuenda tuhun vaha ra Cristo cha cacu añima yo. Ta tyicuan ta cuví chino iñi maa ndo. Soco Nyoo tacuhva cuñí ri maa ra chí ñu Israel tata ra Abraham, ta ra Isaac, ta ra Jacob vatyí cachino iñi ra chí ra quiví cachiyó ra, ta yucuan chaha cachí ra chí ra. ²⁹ Vatyí noo cha cha yaha chaha Nyoo ña natinyaá ra. Ni ña ndu uví iñi ra cha yaha nacana ra chí yo. ³⁰ Nyoho, ta ityí chata ca, nacahnú ndo nu cahán Nyoo. Soco vityin, Nyoo cundahví cuñí ra nyehé ra chí ndo cha cuenda vatyí ñu Israel nacahnú ñu nu cahán ra. ³¹ Nacahnú ñu nu cahán Nyoo vityin tari nacahnú maa ndo quiví cuan. Ta tari cundahví cuñí Nyoo nyehé ra chí ndo vityin, tyicuan caa tucu cundahví cuñi ra nyehé ra chí ñu Israel ñandihí. ³² Vatyí Nyoo chaha ra ityí chí tandihí ñáyiví cha nacahnú ñu nu cahán ra, tacuhva vatyí cundahví cuñi ra nyehé ra inuu ri chí tandihí yo.

³³ ¡Ñana cha cahnu cuví cha tyayí Nyoo! ¡Ñana cha vaha cha chitó xaan ra, ta cha chíñi tuñi ra! Ma cuví nacatyí yo cuhva chicá iñi ra, ni ma chaa yo cutuño iñi yo cuhva sacuvi ra. ³⁴ Vatyí ¿yóo cha cutuñi iñi cuhva chicá xiñi Sutu Mañi yo? ¿O yóo cha sañahá chí ra? Yori. ³⁵ Vatyí yori cha cuví cuhva xihna ca noo cha vaha chí Nyoo ta cha cuenda cuan ta quihí iñi ñu vatyí na cuhva tucu Nyoo chí ñu. ³⁶ Vatyí tandihí maa cha iyó, maa Nyoo savaha, ta chinó chí ta iyó chí cha cuenda ra. ¡Cahnú xaan ca cuví Nyoo tyicuan ri maa! Ta na cuví chí tyicuan caa.

12

Na coo yo noo ñáyiví cha sacuví yo cuhva cuñí Nyoo

¹ Yucuan chaha yañi, chacú ndahvi nuu ndo cha cuenda cha ndahvi cuñí Nyoo nyehé ra chi yo, na nacuhva cuenda yo coño ñuhu yo chi ra, tari noo ofrenda cha nyitó, ta cachi coo yo nuu ra, vatyi yucuan cuví cuhva tiin cuenda ra cha sacahnú yo chi ra. ² Ta ma coo ca yo cuhva iyó ñáyiví iyó siqui ñuhu ñáyiví ihya. Soco na nasama yo cuhva iyó yo chihin cha nduchaa cuhva chicá xiñi yo. Ta tyicuan caa ta coto yo yoso cuhva cuñí Nyoo chihin yo vatyi coto yo nya cha vaha, ta nya cha tahán iñi ra. Ta coto yo ñáá ndihi cha tahán chi sacuví yo.

³ Nyoo, cha catyi cha vaha ñáyiví cuví ra, ta tyatyíño ra chi vatyi cuví apóstol chi ra, yucuan chaha catyi chí tandihí nyoho vatyi ní noo ndo ta ma caca xiñi ndo tyi vaha ca ndo. Soco caca vaha xiñi ndo yoso cuhva iyó ndo chihin yoso cuhva cha vaha chahá Nyoo chi ndo iin ri chihin cha chinó iñi ndo chí ra. ⁴ Vatyi cha noo coño ñuhu, cuaha xaan cuhva iyó chí, ta ña iin ri maa tyiño saha chí. Chiti nuu yo, noo tyiño sahá chí, ta soho yo inga tyiño sahá chí. ⁵ Ta tyicuan caa tucu yoó vasi cuaha yo, soco noo ri coño ñuhu ra Cristo cuví yo, cha cuenda cha iin ri cuví yo chihin ra, ta iin ri cuví yo chihin tahan yo. Tari cha noo ri coño ñuhu cuví tandihí ri yo.

⁶ Siin siin tyiño chahá Nyoo chí yo, yoso cuhva cha cuñí maa ra cuhva ra chí noo noo yo. Ta cuñí chí cotyíño vaha yo cha vaha cuan. Tatu chahá Nyoo cha vaha cha sahá yo profetizar, na chino iñi yo tyi ican cuan chahá ra chí yo, ta na naquehen yo tuhun sacoto ra chí yo ta ñacatyí yo chí ñáyiví. ⁷ Tatu chahá ra cha vaha cha sacuví yo tyiño nuu inga ñu, cuñí chí sacuví vaha yo. Tatu chahá ra cha cuví sañaha yo chí inga ñu, cuñí chí cunyaa yo tyiño cuan. ⁸ Tatu chahá ra cha cuví cuhva yo tuhun chí ñáyiví na ndu ní iñi ñu, cuñí chí cunyaa yo tyiño cuan. Ta ñu cha chahá Nyoo xuhun chí, cuñí chí cuhva ñu chihin cha ní iñi ñu. Tatu chahá Nyoo cha saquehen ityun chí ñu yihí cuenda ra, chihin cha ní iñun sacuvun. Tatu chahá Nyoo cha tyinyeé yo chí ñu chiñuhú cha chiñuhú chí, cuñí chí sacuví yo chihin cha síi cuñí yo.

Nu catyi ra Pablo yoso caa sacuví yo cha yihí yo cuenda ra Cristo

⁹ Cuñi ndo chihin cha ndicha chí tahan ndo. Ta cutasi cuñi ndo chí cha ña vaha. Ta cunyicon ndo cha vaha. ¹⁰ Cuñi chí cha cuñi ndo chí tahan ndo cuenda Nyoo tari cha tahan ndo cha iin ri síhi iin ri sutu ndo. Ta quichaha ndo chí ñu ta saha ndo ñáyiví chí ñu.

¹¹ Sañihi ndo iñi ndo. Ma cusuchan ndo. Ta sacuvi ndo tyiño nuu Sutú Mañi yo chihin cha níi añima ndo.

¹² Sií cuñi ndo coo ndo ñáyiví, vatyi chitó ndo vatyi cucoo ndo chihin Nyoo nu cuahan ca chí. Sanyee ndo iñi ndo tatu nyehé ndo tindoho. Ta ma sandihi maa ndo cha cacan tahvi ndo chí Nyoo nyita ri.

¹³ Tyinyee ndo chí ñu yihí cuenda Nyoo chihin ñáa cha chiñuhú chí ñu. Vaha tyiñuhu ndo chí ñu chaa vehe ndo.

¹⁴ Vaha cahan ndo siqui ñu cha cahán chí ndo. Ta ma soco ndo chí ñu. Caçan tahvi ndo cha cuenda ñu nuu Nyoo tacuhva na nasoco ra chí ñu.

¹⁵ Cusií cuñi ndo chihin ñu síi cuñí, ta cuçcu ndo chihin ñu chacú chaa cha cuihya cuñí ñu.

¹⁶ Iin ri cuví ndo chihin tahan ndo. Ta ma cahnu saha ndo chí ndo. Inuu ri saha ndo chí ndo chihin ñu ndahvi. Ma saha ndo cha chitó xaan ndo.

¹⁷ Ma sacuvi ndo cha ña vaha chihin ñu sacuví cha ña vaha chihin ndo. Soco sañihi ndo sacuvi ndo cha vaha nuu tandihí ñáyiví. ¹⁸ Sañihi ndo cha coo taxi ri ndo chihin tandihí ñáyiví. ¹⁹ Yañi luhli, tatu yoó cha sataší iñi chí ndo, ma tachi tuñi ri maa ndo chí ñu, soco saña ndo ta natyaa ndo ndaha Nyoo na tachi tuñi maa ra chí ñu. Vatyi nu tutu Nyoo catyi chí tyehe caa: “Yuhu tahan chí tachi tuñi, yuhu cutiyahvi chí ñu”, catyi Sutú Mañi yo. ²⁰ Ta suri catyi tucu ra: “Tatu ra xaan iñi chuun ta chisocó ra, cuhva cha cachi ra, ta tatu ityi ra ndutya, cuhva coho ra. Vatyi cha sacuvún tyehe caa, sacuvún cha nyacua nducuaha soho ra chihin ticahan nuu.” ²¹ Ma cuhvan cha cunyaca ñaha cha ña vaha chuun, soco sañiñun ta cuví chasahun chí cha ña vaha chihin cha sacuvún cha vaha.

13

¹ Tandihí ñáyiví cuñi chí cha quichaha ñu chí ra cacuví tyiño cuenda gobiernu. Vatyi yori ra cuví tyiño cha ñima Nyoo tyaa tyiño chí ra. Ta ra cuví tyiño cha iyó, maa Nyoo tyiso chí ra. ² Yucuan chaha, ñu cha ña quichahá chí ra cacuví tyiño, cuñi chí catyi vatyi ña quichahá ñu cuhva catyi Nyoo. Ta ñu cha sacuví tyicuan caa, chicoo cuatyí ñu cha cuenda cuan, ta cucutuñi chí ñu. ³ Vatyi ra cacuví gobiernu, ña nyaá ra cha cuenda cha sayuhvi ra chí ñu cha sacuví cha vaha, soco nyaá ra vatyi tachi tuñi ra chí ñu sacuví cha ña vaha. ¿Atu cuñun coun chihin cha ña yuhvun chí ra cacuví tyiño? Caçhi coun, ta cunyehé ra tyi vaha ñáyiví cuvún. ⁴ Vatyi nyaá ra tyiño vatyi sacuví ra tyiño nuu Nyoo cha cuenda cha vaha chuun. Soco tatu ña cachi iyón, yucuan ndicha cuñi chí cuyuhvun chí ra. Vatyi ña nyaá ri maa ra,

soco nyaá ra vatyi tachí tuñi ra chi ñáyivi cha sacuví cha ña vaha, vatyi tyiño cuan tyaa Nyoo chi ra. ⁵ Yucuan chaha niñi cuñi chi cha quichaha ndo chi ra cacuví tyiño, ñima cha cuenda cha yuhvi ndo coto tachi tuñi ra chi ndo, soco cha cuenda vatyi chitó ndo tyi tyicuan caa tahán chi sacuví ndo. ⁶ Ta sin ri cha cuenda cuan tyiyahví ndo xuhun cha tava ra cuví tyiño cha cuenda cha sanduvahá ra ñuu ndo. Vatyi yucuan cuví tyiño tahán chi cunyaa ra, ta cha tyicuan caa tyiño nuu Nyoo sacuví ra.

⁷ Cuhva ndo cha tahán chi chi minoo minoo ñáyivi. Tyiyahvi ndo cha cuenda ñáá cha tahán chi tyiyahví ndo cha cuenda cha vaha chi ñuu ndo. Ta quichaha ndo chi ñu cha tahán chi quichaha ndo. Ta sáha ndo ñáyivi chi ñu cha tahán chi saha ndo ñáyivi. ⁸ Ma coso yíca ndo chi ni noo ñáyivi. Soco cuñi ndo chi tahan ndo, vatyi tatu cuñi ndo chi tahan ndo sacuví ndo tandihí cha catyí ley Nyoo cha tyaa ra Moisés vatyi sacuví yo. ⁹ Catyí ley Nyoo tyehe caa: “Ma coo inga ñusihi o rayii chuun tatu ñima ñasihun o yiu cuví. Ma cahñun chi ñáyivi. Ma suhun. Ma cahun cuendu siqui ni noo ñáyivi. Ma quichi cuví iñun cha chii ñáyivi.” Tatu ndicha cha cuñún chi tahan, tari cha cuñún chi maun, sacuví tucun tandihí ihya ta tandihí ca inga ca ley. ¹⁰ Tatu cuñún chi tahan, ñahri cha ña vaha cua sacuvun chi ñu. Chihin cha cuñi yo chi tahan yo, sacuví yo tandihí cha catyí ley Nyoo cha tyaa ra Moisés.

¹¹ Chihin tuhun ihya sáha yo cuenda quivi iyó yo. Vatyi cha chaá chi cuhva cha ndoyo yo ta ma cundihñi yo. Vatyi quivi nachino iñi yo chi ra Cristo, naha xaan ca nyaá quichi quivi cucacu ndihí añima yo, soco vityin cha cuyatyin. ¹² Cha cua yaha cha cha cuaa. Ta cha cua cundichin. Yucuan chaha cuñi chi sandihí yo cha sacuví yo cha sacuví ñu iyó nu ñaa iñi. Ta tahán chi sacuví yo cuhva sacuví ñáyivi iyó nu ndichin. ¹³ Cachi cuñi chi coo yo. Vatyi nu ndichin Nyoo iyó yo. Ta ma coho yo ndixi, ta ma coo yo vico nu chihí xaan ñu ndixi. Ta ni ma coo yo chihin savaha ri ñusihi o rayii. Ni ma coo viciu chi yo. Ta ma cutasí cuñi yo nyehe yo chi tahan yo. Ta ma nyiyo iñi yo nyehe yo chi ñu. ¹⁴ Soco cogo yo chihin tunyee iñi Sutu Mañi yo Jesucristo, tari noo sahna cuví tunyee iñi ra tyi ndihvi noo yo. Ta ma quihí iñi ndo cha sacuví ndo cuhva cuñi coño ñuhu ndo.

14

Ma cahan nyaun chi tahan

¹ Tatu noo ñáyivi yihí cuenda Nyoo ta chiin ri chinó iñi ñu chi ra, ña vaha cha ma tiin cuenda ndo chi ñu. Vaha ñatiin cuenda ndo chi ñu soco ma cuví yuhu ndo chihin

ñu siqui tuhun cha chicá uvi iñi ñu. ² Vatyi yihí ñáyivi cuñi maa ñu vatyi cuví cachi ñu tandihí. Ta yihí tucu ñu cha ña chinó vaha iñi ñu, ta maa maa ri yucu chachí ñu. ³ Soco ñu chachí tandihí cuan, tahán chi cha tiin cuenda ñu chi ñu cha chachí yucu ri. Ta ñu chachí yucu ri, ma cahan nyaun ñu chi inga ñu cuan. Vatyi Nyoo tiin cuenda ra chi ñu cuan. ⁴ Vatyi zyóo ñu cuví yoho vatyi cahan nyaun chi ñu cha sacuví tyiño nuu inga ra? Vatyi tatu vaha o ña vaha sacuví ñu soco nyehe maa ra cuví nuu chi ñu chihin ñu. Ta vaha cuquita ñu vatyi Sutu Mañi yo iyó tunyee iñi chi ra ta cutyinyee ra chi ñu tacuhva quita vaha ñu.

⁵ Inga tucu cuhva: Yihí ñu cha sacahnú ca ñu chi noo quivi ta ñima ca inga quivi. Ta yihí tucu ñu cha cuñi maa ñu vatyi inuu ri tandihí quivi. Tahan tahan yo cuñi chi coto vaha yo yoso cuhva chicá xiñi yo. ⁶ Ñu cha naquehén vaha noo quivi, naquehén vaha ñu cha cuenda cha sacahnú ñu chi Sutu Mañi yo. Ta ñu cha ña naquehén vaha cuan, suri cha cuenda cha sacahnú ñu chi Nyoo cuví. Ta ñu cha chachí tandihí cuan, suri chachí tucu ñu cha cuenda cha sacahnú ñu chi Sutu Mañi yo, ta nacuhva ñu tyahvi nyoo chi Nyoo tyi chaha ra cha cachi ñu. Ta ñu cha ña chachí tandihí, ña chachí ñu cha cuenda cha sacahnú ñu chi Sutu Mañi yo ta suri nacuhva tucu ñu cuan tyahvi nyoo chi ra.

⁷ Vatyi ni noo yo ña iyó yo chihin fuerza maa yo. Ni ñima maa yo catyí ama cuví yo. ⁸ Vatyi tatu iyó yo, iyó yo tacuhva sacuví yo tyiño nuu Nyoo, ta tatu chihí yo, chihí yo tyi Sutu Mañi yo naquehén cuenda ra añima yo. Yucuan chaha tatu iyó yo, o chihí yo soco chi Sutu Mañi yo cuví chi yo. ⁹ Vatyi ra Cristo chihí ra ta nandoto tucu ra vatyi tacuhva cunyaca ñaha ra chi ñu nyitó ta chi ñu chihí.

¹⁰ Soco yoho, ¿ñáá tuhun cha ña natiin cuendon chi ra? Vatyi tandihí yo cutahan chi cucuhva cuenda yo chi yo nuu Nyoo vatyi cutuñi chi yo nuu ra. ¹¹ Vatyi nu tutu Nyoo catyí chi tyehe caa:

Cha ndicha ndicha cuii vatyi yuhu nyité, catyí Sutu Mañi yo.

Ta tandihí cuii ñáyivi cunacuñi chiti ñu nui. Ta tandihí ñu cunacoto nuu ñu chii cha cuví Nyoo.

Ta cusacahnu ñu chii chihin nuu tandihí ñáyivi, catyí Nyoo.

¹² Yucuan chaha noo noo maa yo ta cunacuhva yo cuenda cha sacuví yo chi Nyoo.

Ma sanacavon nu cuatyí chi yañun

¹³ Yucuan chaha, ña tahán ca chi cahan nyaun yo chi tahan yo. Soco nducu yo cuhva cha ma sanacava yo chi ñu nu cuatyí coto sandihí ñu tuhun cha chino iñi ñu. ¹⁴ Yuhu

chité vatyi ñahri cha ma cuví cachi, vatyi chinó vaha iñi chi Sutu Mañi yo Jesucristo, ta maa ra sañahá chii. Soco tatu yihí ñu chicá xiñi ñu tyi yihí cha ña vaha cachi ñu, cha cuenda maa ñu, ña vaha. ¹⁵ Soco tatu cha cuenda cha chachún ta quiñi cuñi yañun, ña ndicha cha cuñun chi ra, ñima ca cuhva cuñi Nyoo sacuvún. Ma cuhvon cha tiví noo ñu chihin cha chachún vatyi ra Cristo chihí ra cha cuenda ñu. ¹⁶ Ma cuhva ndo cha cahan ña vaha ñu siqui noo cha chahá Nyoo ityi chuun tyi cachun. ¹⁷ Vatyi cha nyacá ñaha Nyoo chi yo cuví chi noo cha cachi coo yo nuu ra. Cusií cuñi yo ta taxi ri cuñi añima yo cha cuenda Tatyí lí Nyoo cha nyaá añima yo. Ta ña niñi tuhun cha chachi yo o cha chihí yo. ¹⁸ Ñu sacuví tyiño nuu ra Cristo tyehe caa, sií cuñi Nyoo nyehé ra chi ñu, ta catyi tucu ñáyivi tyi vaha ñáyivi cuví ñu.

¹⁹ Yucuan chaha cuñi chi cha sañihi ca yo cha coo taxi ri yo chihin ñáyivi. Ta tyicuan caa ta cuví tyinyee yo chi noo noo tahan yo na cuahnu yo chihin tuhun Nyoo. ²⁰ Ma sativun tyiño sahá Nyoo añima inga ñáyivi cha cuenda noo cha chachí run. Ndicha vatyi tandihi cha chachí yo ta vaha. Soco ña vaha cha cachi yo tatu chihin cuan sanacavá yo nuu cuatyí chi inga ñu. ²¹ Yucuan chaha, vaha ca cha ma cachi yo coño, ni cha ma coho yo vinu, tatu quiñi cuñi yañi yo chihin cuan. Ma sanacava yo chi ñu nu cuatyí. Ma casi yo chihin noo cha sacuví yo nu chinó iñi ñu chi Nyoo. ²² Tatu chinó iñun vatyi cuví cachun tandihi, vaha. Soco ma cahun tuhun cuan chihin inga ñu. Noo tuhun ri maun chihin Nyoo coto tuhun cuan. Sií xaan cuñi yo tatu ña chicá uvi iñi yo noo cha chaha Nyoo ityi chi yo cha sacuví yo. ²³ Soco ñu cha chachí ñáa cha chachí ñu, ta chicá uvi iñi ñu, chicoo cuatyí ñu, vatyi ña chinó vaha iñi ñu tyi cuví cachi ñu. Ta tandihi cha sacuví yo chihin cha ña chiño iñi yo tyi chaha Nyoo ityi chi yo tyi sacuví yo, cuatyí cuví.

15

Na sacuví yo cha tahán iñi tahan yo, ta ñima cha tahán iñi ri maa yo

¹ Yoó cha ñihi nyaá yo chihin Nyoo, cuñi chi cha tyinyee yo chi ñu cha ña ñihi nyaá chihin Nyoo. Ta ma nducu yo cha tahán iñi ri maa yo. ² Tahan tahan yo cuñi chi cha sacuví yo cuhva tahán iñi inga ñu cha cuenda cha vaha chi ñu, tacuhva cuví cuahnu ca ñu chihin tuhun Nyoo. ³ Vatyi ni ri ra Cristo ña sacuví ra cuhva tahán iñi maa ra, soco cuví chi ra tari catyi nu tutu Nyoo tyehe caa: “Tandihí cha cahán ñáyivi chí Nyoo, chí ra Cristo cahán ñu”, catyi chí. ⁴ Vatyi tandihí cha chicunyaá nu tutu Nyoo ta ityi chata ca, chicunyaá chí cha cuenda

cha cutuhva yo, tacuhva cuví cuatu yo cha cuñihi yo chihin cha cama iñi yo. Ta vaha cuñi añima yo cha cuenda cha sacuahá yo nu tutu Nyoo. ⁵ Ta Nyoo ican ra chahá cha cama iñi yo, ta chahá ra cha vaha cuñi añima yo. Na tyinyee ca ra chí yo cha coo yo chihin cha iñi ri cuví yo chihin tahan yo tari cuhva iyó ra Cristo Jesús. ⁶ Vatyi tacuhva tandihí yo iñi ri noo cuhva sacahnu yo chí Nyoo Sutu ra Jesucristo ra nyacá ñaha chí yo.

Ñáyivi ñima ñu Israel cuví, cucuñi ñu tuhun Nyoo

⁷ Yucuan chaha tñin cuenda vaha yo chí tahan yo tacuhva vatyi sacahnu yo chí Nyoo tari tñin cuenda vaha ra Cristo chí maa yo cha cuenda vatyi sacahnú ra chí Nyoo. ⁸ Vatyi catyi yuhu chí ndo vatyi ra Cristo quichí tyinyee ra chí yo cha cuví yo ñu Israel, tacuhva sacuvi ra cha catyi Nyoo chí sutu chahnu yo tyi cusacuyi ra. Ta tyicuan caa ta sañahá ra Cristo vatyi Nyoo sacuví ra cha catyi ra tyi sacuvi ra. ⁹ Ta quichí tucu ra Cristo tacuhva vatyi ñu cha ñima ñu Israel cuví sacahnu tucu ñu cuan chí Nyoo, vatyi Nyoo ndahvi cuñi ra nyehe ra chí ñu, tari catyi nu tutu Nyoo tyehe caa:

Yucuan chaha cusacahni chuun chihin nuu ñu cha ñima ñu Israel cuví, tandihí ityi ñu iyó siqui ñuhu ñayivi.
Ta cucate yaa cha cuenda cha sacahní chuun nuu ñu, catyi chí.

¹⁰ Ta inga tucu nu catyi chí nu tutu Nyoo tyehe caa:

Cusií cuñi nyoho ñu cha ñima ñu Israel cuví. Cusií cuñi ndo chihin ñu Israel cha cuví ñu ñáyivi cuenda Nyoo.

¹¹ Ta inga tucu nu catyi chí nu tutu Nyoo tyehe caa:

Sacahnú ndo chí Sutu Mañi yo, nyoho ñu cha ñima ñu Israel cuví.

Tandihí ñáyivi sacahnú ñu chí ra cha cuenda cha cahnu xaan cuví maa ra.

¹² Tyaa tucu ra Isaías nu tutu Nyoo tyehe caa:

Cucacu minoo ra vachi tata ra Isai.
Cuquichi ra vatyi cunyaca ñaha ra chí ñu cha ñima ñu Israel cuví.

Ta maa ñu cuquihí iñi ñu chí ra vatyi cusacacu ra chí ñu.

¹³ Nyoo ican ra chahá tunyee iñi chí yo ta chitó yo tyi cuhva ra cha cuhva ra chí yo. ¡Na sacutu ra chí ndo chihin tusi iñi! Ta coo cha taxi ri cuñi añima ndo cha cuenda cha chinó iñi ndo chí ra, tacuhva vatyi chihin tunyee iñi Tatyí lí ra ta quihí vaha iñi ndo cha cucuhva ra chí ndo.

¹⁴ Yañi luhli, chitó vahi vatyi nyoho vaha xaan ñáyivi cuví ndo ta chitó ndo tandihí, ta chitó vaha ndo cuhva ndo tuhun chí tahan ndo. ¹⁵ Soco nu carta ihya ñihi xaan cahín siqui tandihí tuhun cha tyaj, tacuhva cha ma

naa iñi ndo. Tyehe caa sacuvj cha cuenda tyi Nyoo chaha ra tumañi iñi chii ¹⁶ cha sacuvi tyiño nuu ra Jesucristo nu nyicu ñu cha ñima ñu Israel cuví. Ta tyiño cha sacuví, ican cuví cha cahín tuhun Nyoo yoso caa sacacú ra añima ñáyivi. Tyehe caa sacuvi tacuhva vatyi ñu cha ñima ñu Israel cuví, cuví nacuhva cuende chi ñu chi Nyoo tari noo ofrenda cha tahan iñi ra, vatyi cha ndundi ñu nuu ra cha cuenda Tatyí li ra.

¹⁷ Cha cuenda cha nacuhva cuende chii chi ra Cristo Jesús, yucuan cuenda cuví cusii cuñi ta chité tyi vaha quitá tyiño sacuvi nuu Nyoo. ¹⁸ Vatyi ña cañá iñi cahin cha ña nyehj. Soco nacatyí cha sacuvj ra Cristo nu chicá noi cahín tuhun Nyoo tacuhva vatyi ñu cha ñima ñu Israel cuví quichaha ñu chi Nyoo. Ta ihya ndicha cha cahín. ¹⁹ Vatyi chihin seña ta milagru ta chihin tunyee iñi Tatyí li ra sacuvj ra. Ta tyicuan caa cahín tuhun cha cacu añima ñu sahá ra. Quichahj nya Jerusalén ta tandihí ityi ta nyacua nya Ilírico. ²⁰ Ta tyicuan caa saniñi cahin tuhun cha cacu añima yo maa maa ri nu ta cuñi ca maa ñáyivi tuhun ra Cristo, tacuhva vatyi ma saha tyiñe nu quichahj saha tyiño inga ra. ²¹ Tari catyí nu tutu Nyoo tyehe caa:

Cucoto ñáyivi cha ta coto ca maa tuhun ra. Ta cucutuñi iñi ñu cha ta ñaha ca maa cuñi tuhun ra, catyí chi.

Nu tyaá ra Pablo cuhva cha cuhun ra ñuu Roma

²² Yucuan chaha ña cuvj maa tuhun cha cuhin cunyehe nu nyicú ndo, vasi cuaha xaan chaha cuñi cuhin. ²³ Soco vityin cha ndihí tyiño sahj ityi ñuu ihya. Ta cha cuaha xaan cuiya cuñi cuhin cunyehe nu nyicú ndo ta cunyai suhva quivi chihin ndo. ²⁴ Nyehí tatu cuhin cunyehe nu nyicú ndo quivi cuhin España. Ta cha yaha cha cunyehe chi ndo, nyehí tatu cuví tyinyee ndo chii ta cuhaa ndihí nu cuahin. ²⁵ Soco vityin cuahin ñuu Jerusalén ta nyisé suhva cha cutyinyee chi ñu cuenda Nyoo yucuan. ²⁶ Vatyi ñu vehe ñuhu ityi Macedonia ta ityi Acaya nacuaan iñi ñu cha tava ñu suhva xuhun vatyi sacuhun ñu chi ñu ndahvi ñu cuenda Nyoo cha iyó Jerusalén. ²⁷ Tyehe caa quichj cuví iñi ñu sacuví ñu. Ta ndicha vatyi tahán chi sacuví ñu. Vatyi tari maa ñu Israel, ñu chinó iñi chi ra Cristo, chaha ñu tuhun Nyoo chi ñu cha ñima ñu Israel cuví, tyicuan caa tahán chi chi ñu cuan tyinyee tucu ñu chi ñu Israel chihin cha iyó chi ñu. ²⁸ Yucuan chaha, tatu cha yaha sandai tyiño ihya, ta cha yaha nacuhva cuende xuhun ihya chi ñu Jerusalén, tyicuan ta cuhin nya España ta yahi nu nyicú ndo. ²⁹ Chitó vahi vatyi na cuhin nu nyicú ndo, cuhai chihin cha tyitu añime chihin cha vaha Nyoo cha chahá ra Cristo chii.

³⁰ Yañi, chacú ndahvi nuu ndo na cu ñin ri ndo chihin, chihin tindoho cha nyehí, ta caçan tahvi ndo chi Nyoo cha cuende vatyi cuñi ndo chi Sutu Mañi yo Jesucristo, ta vatyi chahá Tatyí li Nyoo cha cuñi ndo chii.

³¹ Caçan ndo cha cuende, na sacacu Nyoo chii ndaha ñu ña chinó iñi chi ra Cristo ityi Judea cuan. Ta caçan ndo cha cuenda cha nyisé ihya cha cuenda ñu cuenda Nyoo ñu Jerusalén cuan, na natíin cuenda vaha ñu.

³² Vatyi tatu Nyoo ta cuñi ra, chihin cha sii cuñi quichi nyehi chi ndo ta cuví nyitati ñin ri chihin ndo. ³³ Ta Nyoo ra chahá cha taxi ri coo añima yo, na cunyaa ra chihin tandihí ndo. Ta ñacuvi tyicuan caa.

16

Nu sacuhún ra Pablo nocumi chi ñu amigo ra

¹ Sacoté chi ndo cha cuenda hermana Febe vatyi tyinyee xaan ña chi ñu yihí cuenda Nyoo ñuu Cencrea. ² Tíin cuenda vaha ndo chi ña tari tíin cuenda Sutu Mañi yo, tari tahán chi sacuvi ñu yihí cuenda Nyoo. Ta tyinyee ndo chi ña chihin tandihí cha chihuhu chi ña, vatyi cuaha xaan ñu tyinyee ña chi, ta chi yuhu ñandihí.

³ Cuhva ndo nocumi chi cu Priscila ta chi ra Aquila ñu cha cutahan chihin ndi nu tyiño cha sacuví ndi cuenda ra Cristo Jesús.

⁴ Chahnya iñi ñu ñáyivi ñu quivi cuan cha cuenda cha sacacú ñu chii, yucuan chaha vatyi nacuhvé tyahvi nyoo chi ñu. Ta ñima yuhu ri, soco tandihí tucu ñu cha ñima ñu Israel cuví, ta yihí tucu ñu cuenda Nyoo.

⁵ Cuhva tucu ndo nocumi chi ñu yihí cuenda Nyoo cha candú ñin ri vehe cu Priscila ta ra Aquila. Vachi tucu nocumi chi ra tahin, ra Epeneto. Ican ra cuví ra cha xihna ca chino iñi chi ra Cristo ityi Acaya. ⁶ Cuhva ndo nocumi chi cu María. Sahá tyiño xaan ña nu nyicú ndo. ⁷ Cuhva ndo nocumi chi ñu ñui, ra Andrónico ta ra Junias, ra tahin cha ñoho chihin vehe caa. Cahnu tyiño casahá ra cuenda Sutu Mañi yo chihin tandihí ca ra sahá tyiño cuenda Nyoo. Ta xihna ca ra cachino iñi chi ra Cristo ican saha yuhu.

⁸ Cuhva ndo nocumi chi ra Amplias ra tahin cuenda Sutu Mañi yo. ⁹ Cuhva ndo nocumi chi ra Urbano, ra tahan yo cuenda tyiño ra Cristo Jesús, ta chi ra Estaquis ra tahin ñandihí. ¹⁰ Cuhva ndo nocumi chi ra Apeles. Nyehé yo tyi ndicha cha chinó iñi ra chi ra Cristo. Ta nocumi chi ñáyivi chi ra Aristóbulo ñandihí. ¹¹ Cuhva ndo nocumi chi ra ñui, ra Herodión, ta chi ñáyivi chi ra Narciso ñu cha chinó iñi chi Sutu Mañi yo. ¹² Vachi nocumi chi cu Trifena ta chi cu Trifosa, ñu casahá tyiño chihin Sutu Mañi yo. Ta chi hermana yo cu Pérsida, ñaha cha sahá tyiño xaan nu tyiño Sutu Mañi yo.

¹³ Cuhva ndo nocumi chi ra Rufo, noo ra cahnu cuví ra nuu Nyoo vatyí chinó vaha iñi ra chi Sutu Mañi yo. Ta vachí tucu noo cumi chí sihi ra Rufo. Cuví ña tari sihi. ¹⁴ Cuhva ndo nocumi chi ra Asíncrito, chi ra Flegonte ta chi ra Hermas, ta chi ra Patrobas, chi ra Hermes ta chi ra hermano cha canyicú chihin ra. ¹⁵ Cuhva tucu ndo nocumi chí ra Filólogo ta chi cu Julia ta chi ra Nereo chihin cuhva ra, ta chi ra Olimpás ta chi tandihí ñu cuenda Nyoo cha nyicú chihin ñu.

¹⁶ Nacuhva ndo noo cumi chí noo noo tahan ndo cuenda Nyoo. Tandihí ñu yihí cuenda ra Cristo saquichí ñu nocumi chí ndo.

¹⁷ Yañi, chacú ndahvi nuu ndo, na saha ndo cuenda chí ñu cuñí sasiin chí ndo, ta nducú ñu cuhva cha nduva ndo chihin tuhun Nyoo, vatyí ñima tyicuan caa cutuhva ndo tuhun ra Cristo. Ma cutahan ndo chí hin ñu cuan. ¹⁸ Vatyí ñu cuan ñima tyiño nuu Sutu Mañi yo Jesucristo sacuví ñu, soco cuhva cuñí maa ñu sacuví ñu. Ta sandahví ñaha ñu añima ñáyivi ndahvi chihin tuhun vita cahán ñu. ¹⁹ Tandihí ñáyivi chitó yoso caa quichahá vaha ndo chí Nyoo. Yucuan chaha cusí xaan cuñí chihin ndo, ta cuñí vatyí natyihí tuñi vaha iñi ndo sacuví ndo cha vaha. Ta ñaha cutuhva ndo sacuví ndo cha ña vaha. ²⁰ Nyoo ra iyó tandihí cha taxi ri añima, numí ri cuhva ra cha saha ganaa ndo chí ra ña vaha, ta cuhva ra cha cuañi ndo siquí ra. Na nasoco Sutu Mañi yo Jesucristo chí ndo.

²¹ Ra Timoteo ra cuví ra tahin nuu tyiño sacuví ndí nuu Nyoo, saquichí ra nocumi chí ndo. Ta tyicuan caa tucu ra Lucio, ta ra Jasón, ta ra Sosípater, tandihí ra ñui cuan casaquichí ra nocumi chí ndo.

²² Yuhu ra Tercio savahi tutu ihya cha cuenda ra Pablo, suri saquichí tiquí nocumi chí ndo tyi in ri yihí yo cuenda Sutu Mañi yo.

²³ Saquichí ra Gayo nocumi chí ndo ñandihí. Vehe ra nyaí suri ihya ndú in ri ndí tandihí ñu yihí cuenda Nyoo. Ra Erasto ra cuví tesoreru ñuu ihya, saquichí ra nocumi chí ndo, ta yañi yo ra Cuarto ñandihí.

²⁴ Na cocumi Sutu Mañi yo Jesucristo chí tandihí ndo. Ta na cuví chí tyicuan caa.

Nu ndihí cahán ra Pablo ta sacahnú ra chí Nyoo

²⁵ Ta vityin na sacahnu yo chí Nyoo, vatyí maa ra cuví ra cucuhva cha cuní iñi ndo, ta ma sandihí ndo cha chinó iñi ndo tuhun ra cha sacacú ra añima yo. Ican cuví tuhun cahín ta tuhun cha sañahí cha cuenda ra Jesucristo. In ri cuví chí chihin tuhun cha ñohó xehe ta cha naha nyata ní cumañi chinqo ñuhu ñáyivi. ²⁶ Soco vityin sañahá Nyoo chí yo cha cuenda tutu cha casandoq

ra profeta, ra cachahá cuenda tuhun ra ta cha naha. Catyí Nyoo, ra iyó tyicuan ri maa, tyi vityin tahán chí coto tandihí ñáyivi tacuhva chino iñi ñu chí ra ta quichaha ñu tuhun cahán ra. ²⁷ Nyoo noo tuhun maa ra, ta chiñi tuñi xaan ra. Na sacahnu yo chí ra cha cuenda ra Jesucristo tyicuan ri maa. Ta na cuví chí tyicuan caa.

Carta Cha Xihna Ri Sacuhun Ra Apóstol Pablo Chi ñáyivi Ñuu Corinto Cha Yihí Cuenda Nyoo

Nu tyaá ra Pablo noo tutu chi ñáyivi ñuu Corinto cha yihí cuenda Nyoo

¹ Yuhu ra Pablo, nacana Nyoo chii vatyí cuñí ra cha cuví noo apóstol ra Jesucristo, o cuñí chi catyí vatyí tachi ra chii nacaque tyiño ra. Yuhu chihin ra Sóstenes yañi yo ² saquichi ndi noo carta ihya chi ndo cha nyicu ndo vehe ñuhu cuenda Nyoo cha nyaá ñuu Corinto. Ñáyivi chi Nyoo cuví ndo vityin, cha cuenda cha ndu ñin ri ndo chihin ra Cristo Jesús. Nyoo nacana ra chi ndo vatyí nanduvi ndo noo ñáyivi vaha cuenda ra, chihin tandihí ñáyivi cha sacahnú chi Sutu Mañi yo Jesucristo tandihí ri ityi. Vatyí cuví ra Nyoo cuenda ñu ta cuenda maa yo ñandihí. ³ Nyoo Sutu yo ta Sutu Mañi yo Jesucristo na nasoco ra chi ndo, ta nacuhva ra cha taxi ri coo aña nua ndo.

Yoso caa nasoco Nyoo chi ñu yihí cuenda ra

⁴ Tyicuan ri nacuhvé tyahvi nyoo chi Nyoo cha catyí maa ndo, vatyí chahá ra cha vaha chi ndo cuenda ra Cristo Jesús. ⁵ Ta cha ñin ri cuví ndo chihin ra Cristo, Nyoo chahá ra tunyee ñi ri cha chi ndo tacuhva cuví cahán ndo tuhun ra. Ta chahá ra cha chiñi tuñi vaha chi ndo. ⁶ Ta tandihí cha catyí chi ndo, tuhun ra Cristo, cuahán chino cava ñáyivi ndo vityin. ⁷ Yucuan chaha ñahri cha cumañi chi ndo. Chahá Nyoo tandihí cha vaha chi ndo cha ñi ri ca cha nyatú ndo quívi quichi Sutu Mañi yo Jesucristo. ⁸ Nyoo cusaha cuenda ra chi ndo nyacua nya naa ñáyivi tacuhva yori cuví catyí ñáá cha catyí chi ndo quívi quichi Sutu Mañi yo Jesucristo. ⁹ Nyoo tyicuan ri sacuví ra tari cuhva catyí ra. Ta maa ra cuví ra nacana chi ndo tyi cu ñin ri ndo chihin Sehe ra, ra Jesucristo, Sutu Mañi yo.

Tatuyihíyo cuenda Sutu Mañiyo, ña vaha cha cusin yo

¹⁰ Yañi, chiquén chi ndo chihin sivi Sutu Mañi yo Jesucristo, na ñin ri cuví ndo ta ma cusin ndo. Ta ñin ri cuhva caça xiñi ndo. Ta ñin ri tuhun quívi ñi ndo. ¹¹ Catyí chi ndo tyehé caa, yañi, tyi catyí ñáyivi chi ra Cloé chii, vatyí iyó tisihi nu nyicu ndo. ¹² Vatyí nyoho siin siin cuhva cahán ndo. Noo ndo catyí ndo: “Yuhu, cuenda ra Pablo yihí.” Inga ndo catyí ndo: “Yuhu, cuenda ra Apolos yihí.” Inga ndo catyí ndo: “Yuhu, cuenda ra Pedro yihí.” Inga ndo catyí ndo:

“Yuhu cuenda ra Cristo yihí.” ¹³ ¿Atu tahvi sava ra Cristo? ¿Atu chihí yuhu ra Pablo nu cruzi cha catyí ndo? ¿Atu condutyá ndo chihin sivi yuhu? Ñima. ¹⁴ Tyahvi nyoo chi Nyoo vatyí yuhu ña sacondutyé chi ni noo nyoho. Soco noo ri sacondutyé chi ra Crispo ri chihin ra Gayo ri. ¹⁵ Tyicuan caa ta ni noo ndo ta ma cuví catyí ndo vatyí condutyá ndo chihin sivi. ¹⁶ Aan, ta suri sacondutyá tiquí chi ñáyivi chi ra Estéfanos. Soco ña nichohón ñi cha sacondutyé chi inga ndo. ¹⁷ Vatyí ra Cristo ña tachí ra chii tyi sacondutyé. Soco tachí ra tyiño chii vatyí cahin tuhun ra yo soso caa sacacú ra chi yo. Soco ña cahín chihin cha chiñi tuñi ñáyivi ihya, coto catyí ñáyivi chii tyi ñahri yahvi nyaá cha chihí ra Cristo cuenda cuatyí yo.

Vaha ca cha chiñi tuñi Nyoo ta ñima ca cha chiñi tuñi ñáyivi ihya

¹⁸ Tuhun cha chihí ra Cristo nu cruzi cha catyí cuatyí yo, ñima ri tuhun cuví cuan cha cuenda chi ñáyivi cha cunaa nu cuví anyaya. Soco cha cuenda chi maa yo cha cuví yo ñáyivi cacú ñima, tunyee ñi cha chahá Nyoo chi yo cuví cuan. ¹⁹ Vatyí tyicuan caa tucu catyí maa tuhun Nyoo: Cusanai cha chiñi tuñi ra cuñí maa tyi chitó xaan.

Ta cha chitó xaan ra chiñi tuñi cutave ñin chiyo xiin, catyí Nyoo.

²⁰ Ñahri tuhun cha chitó xaan ra chiñi tuñi, ta ra sacuaaha, ta ra chitó xaan nacahan ñáá ndihí tuhun iyó siquí ñuhu ñáyivi ihya. Vatyí cha chiñi tuñi cha iyó siquí ñuhu ñáyivi ihya, cha ñima ri tuhun nasaha Nyoo chi cuan. ²¹ Nyoo chihin cha chiñi tuñi ra tyaá ra cuhva vatyí ma cuví cohon nu ñáyivi chi ra chihin cha chiñi tuñi cha iyó siquí ñuhu ñáyivi ihya, soco tyaá ra cuhva vatyí sacacú ra chi ñu chinó ñi tuhun cha cahán noo ñáyivi nuu ñu. Vasi ñima ri tuhun cuví tuhun cuan cha cuenda ñu cha ña ñohó nuu chi Nyoo.

²² Vatyí ñáyivi Israel cuñí ñu nyehe ñu milagru. Ta ñu Grecia maa maa ri maa cha chiñi tuñi ñáyivi ihya nanducú ñu. ²³ Soco yoó sacotó yo tuhun ra Cristo, ra chihí nu cruzi. Ta ñáyivi Israel cahán nuu ñu chiñí ñu tuhun ihya. Ta ñu cha ñima ñu Israel cuví, cuñí maa ñu tyi tuhun cha ñima ri tuhun cuví ihya. ²⁴ Soco cha cuenda chi ñu nacana Nyoo, an cuví ri ñu ñu Israel, o ñu Grecia, ra Cristo cuví tunyee ñi ta cha chiñi tuñi Nyoo. ²⁵ Vatyí cuñí maa ñáyivi vatyí noo cha ñima ri tuhun cuví cha sacuví Nyoo. Soco chiñi tuñi xaan ca Nyoo ta ñima ca ñáyivi iyó siquí ñuhu ñáyivi ihya. Ta cuñí maa ñáyivi tyi ña ñihí fuerza Nyoo. Soco ican cuan cuví fuerza cha ñihí ca cha nuu fuerza tandihí ñáyivi. ²⁶ Yañi, cuñí chi coto ndo vatyí Nyoo nacana ra chi ndo vasi maa ri

ñáyivi soho cuví ndo, ta mañi ndo cuví ndo ñáyivi tyayí o ñáyivi chító xaan cha chiñi tuñi ñáyivi ihya. ²⁷ Soco Nyoo nacachj vaha ra chi ñáyivi soho. Vatyí cuhvá ñu ticahan nuu chi ñu cuñi maa tyi chiñi tuñi xaan. Ta nacachj vaha ra chi ñáyivi ñahri fuerza vatyí cuhva ñu ticahan nuu chi ñu cuñi maa tyi iyó xaan fuerza. ²⁸ Nyoo nacachj vaha ra chi ñáyivi ndahvi cha cuñi maa ñáyivi tyi ña chiñuhú ñu. Nacachj ra chi ñáyivi cha ña cuñi nyehe ñáyivi chii, vatyí sanocuee ra chi ra cuví tyiño nahnu. ²⁹ Tyicuan caa sacuvj Nyoo tacuhva tyi yori sacahnú chii nuu ra. ³⁰ Soco maa maa Nyoo sacu ñin ri ra chi yo chihin ra Cristo Jesús. Ta sacuvj ra tyi ra Cristo cuhva ra cha chiñi tuñi chi yo, ta sacuvahá ra chi yo ta sandundj ra chi yo nuu Nyoo vatyí tyiyahvj ra chihin niñi ra cha catyí cuatyí yo, tacuhva cuví cacu yo. ³¹ Yucuan chaha sacuví yo tari cuhva catyí nu tutu Nyoo tyehe caa: “Tatu yóó cha cuñi cuyaa, vaha na cuyaa maa soco chihin Nyoo.”

2

Tuhun ra Cristo, ra chihj nu cruzi

¹ Soco yañi, quívi चाहin chicahin tuhun Nyoo chihin ndo, ña चाहin tuhun cha chiñi tuñi ñuhu ñáyivi ihya. ² Soco maa ri maa tuhun ra Jesucristo, yoso caa chihj ra nu cruzi cha catyí cuatyí yo tyaj xiñi ta nacatyí chi ndo. ³ Ta चाहj nu nyicu ndo tari cha ñahri fuerze. Ta nihj chihin cha yuhvi. ⁴ Ta cuhva cha चाहin nuu ndo, ña चाहin chihin tuhun tyaquí tuhun cha chiñi tuñi tari cahán noo ra chító xaan. Ñima. Soco chihin fuerza maa Tatyí Ii Nyoo चाहin chihin ndo. ⁵ Tacuhva vatyí nachino iñi ndo chi Nyoo soco cha cuenda fuerza maa Nyoo. Ta ñima cha cuenda cha chiñi tuñi ñáyivi ihya.

Nyoo चाहá ra cha cohon nuu yo chi ra chihin Tatyí Ii ra

⁶ Soco svuuta ri tyi चाहán ndi tuhun cha chiñi tuñi chihin ñu cha ñihi ca nyaá chihin tuhun Nyoo. Soco cha chiñi tuñi Nyoo, ta ñima cha chiñi tuñi ñuhu ñáyivi ihya, ni ri cha chiñi tuñi ra nyacá ñaha síqui ñuhu ñáyivi. Vatyí maa ra cucunaa ra. ⁷ Soco tuhun xehe cha chiñi tuñi maa Nyoo चाहán ndi. Vatyí Nyoo chicumj xehe ra minoo tuhun vaha nya ta ni cumañi chino ñuhu ñáyivi ihya. Vatyí tyaa ra cuhva tyi cucacu añima yo ta cunyaa yo noo nu vaha chihin ra tyicuan ri maa. ⁸ Ta tuhun ihya ta cutuñi ca iñi ni noo ra nyacá ñaha ñuhu ñáyivi ihya. Vatyí tyehe ta cutuñi iñi ra, ma catyaa ra chi Sutu Mañi yo, ra nyacá ñaha gloria, nu cruzi. ⁹ Soco tari cuhva catyí maa tuhun Nyoo:

Nyoo sanduvahá ra noo cha vaha xaan tyi cuhva ra chi ñáyivi cha cuñi chi ra.

Ta ni noo ñáyivi ta nyehe ca ñu, ta ta cuiñi ca ñu, ta ta ndichi ca xiñi ñu yoso cuhva cha vaha cha चाहá Nyoo chi yo, catyí tuhun Nyoo.

¹⁰ Soco Nyoo चाहá ra Tatyí Ii ra vatyí cutuñi iñi yo tuhun ihya. Vatyí Tatyí Ii ra sañahá chi tandihí chi yo nyacua nya tuhun cha xehe ca cha cumj maa Nyoo.

¹¹ Ma cuví coto noo ra cha chicá xiñi inga ra. Soco suri maa ra chító ra cha chicá xiñi maa ra. Ta tyicuan caa tucu noo ri Tatyí Ii Nyoo chító cha yihí iñi maa Nyoo. ¹² Yoó ñima cha chiñi tuñi ñuhu ñáyivi naquehen yo, soco maa Nyoo चाहá ra Tatyí Ii ra chi yo vatyí sacoto chi chi yo yoso caa cha tyaquí cha चाहá Nyoo chi yo. ¹³ Tuhun cha चाहán ndi chihin ndo ihya, tuhun cha sañahá maa Tatyí Ii Nyoo chi ndi cuví. Ñima tuhun cha cutuhva ri maa ndi chihin cha chiñi tuñi xiñi ndi. Nacatyí ndi tuhun cha sañahá Tatyí Ii Nyoo chi ndi chi ñu cha yihí Tatyí Ii Nyoo chi.

¹⁴ Soco ñu cha ña yihí Tatyí Ii Nyoo chi, ña cutuñi iñi ñu ta ña cuñi ñu cuiñi ñu cha sañaha Tatyí Ii Nyoo chi ñu, vatyí cuñi maa ñu tyi tuhun cha ñima ri tuhun cuví cuan. Vatyí ñin ri maa ñu cha yihí Tatyí Ii Nyoo cuví cutuñi iñi ñu tuhun cuan. ¹⁵ Soco ñu yihí Tatyí Ii Nyoo cuví cutuñi iñi ñu. Ta chító ñu tatu vaha o ña vaha ñáá noo tuhun. Soco maa cuví catyí inga ñáyivi tatu vaha o ña vaha cha caá añima maa ñu. ¹⁶ Vatyí tuhun Nyoo catyí chi: “Yori chító tuhun cha chicá xiñi Sutu Mañi yo. Yori cuví sañahá chi Nyoo”, catyí tuhun Nyoo. Soco yoó cha yihí yo Tatyí Ii Nyoo, chító yo cha chicá xiñi ra Cristo.

3

Ña tahán chi cunyicon yo chi noo ra yañi yo, chi Nyoo na cunyicon yo

¹ Soco yañi, quívi cuan ña cuvj cahin chihin ndo tari चाहin chihin ñu saquehen ityí Tatyí Ii Nyoo chi, soco चाहin chihin ndo tari चाहin chihin ñu ni nachino iñi chi Nyoo, tari cha vatyí ni nyihí ndo chihin tuhun ra Cristo cuví cuan. ² Cahin chihin ndo chihin tuhun cha ña yí ri cutuñi iñi ndo. Tari चाहá yo sícui coho cha lee cha ta cuví ca cachi nyayu, tyicuan caa sacuví chihin ndo. Vatyí nyoho, quívi cuan ta cuví ca chi ndo. ¡Ta ni vityin ta ta cuví ca chi ndo! ³ Vatyí ni chicá ca xiñi ndo cuhva chicá xiñi ñáyivi iyó síqui ñuhu ñáyivi ihya. Nyiyó iñi ndo. Iyó tisiñi nu nyicu ndo. Cacusin ndo. Ni chicá ca xiñi ndo tuhun ñuhu ñáyivi ihya. Na nyacuví ndo tari nyacuví ñáyivi cha ña ñohó nuu Nyoo.

⁴ Vatyí yihí ndo catyí ndo: “Yuhu cuenda ra Pablo yihí.” Ta inga ndo catyí ndo: “Yuhu cuenda ra Apolos yihí.” Cuñi chi catyí tyi

nyacuví ndo tari nyacuví ñáyivi ña ñohó nuu chi Nyoo.

⁵ Vatyí ¿yóó ra cuví yuhu, ra Pablo? Ta ¿yóó ra cuví ra Apolos? vatyí cañi tahan ndo cha catyí ndi. Vatyí noo ra casacotó tuhun Nyoo chi ndo cuví ndi. Ta yucuan chaha nachino iñi ndo chi Sutu Mañi yo. Ta noo noo ndi sacuví ndi tyiño cha catyí maa Nyoo tyi sacuví ndi. ⁶ Yuhu tachí chiti tuhun Nyoo añima ndo. Ta ra Apolos chosó ra. Soco Nyoo sacuahnu ra tuhun ra añima ndo. ⁷ Ta yucuan chaha ni ri ra cha tachí ta ni ri ra cha chosó, ñahri ra cuví ra. Soco Nyoo cuví ra tandihí. Vatyí maa ra sacuahnu ra tuhun ra añima ndo. ⁸ Ra cha tachí ta ra cha chosó, iñi ri ra cuví ra. Ta cuñihí ra nu vaha sahá Nyoo yoso cuhva tyiño sahá noo noo ra. ⁹ Ta tyicuan caa nyuhu, sahatyiño ndi soco tyiño nuu Nyoo. Ta nyoho cuví ndo tari noo ñuhú nu sahá tyiño Nyoo.

Cuví tucu ndo tari noo vehe cha cuahán savaha Nyoo. ¹⁰ Catyí Nyoo tyi yuhu cuví tari noo ra cuví nuu cha sama vehe. Vatyí chaquín cuhva vehe cuan ta tyihí chaha chi ñuhú. Ta inga ra samá ityi siqui. Soco cuñí chi sahá ra cuenda yoso cuhva samá ra siqui cuan. ¹¹ Ta yori cuví cacun inga cuhva vatyí cha caá cuhva cuan. Vatyí suri maa ra Jesucristo cuví cuhva cuan. ¹² Ta siqui cuhva cuan cuví sama yo chihin xuhun cuaan, chihin xuhun cuichin, chihin yuu tyaqui, o chihin vitu, o chihin tuñama o chihin ndaha numa. ¹³ Soco quivi cutuñi chi ñáyivi, cunyehe ra Cristo tyiño sahá noo noo yo. Vatyí cuquichi ra chihin ñuhú. Ta ñuhú cuan cucahmi chi nya cha ña vaha. ¹⁴ Ta tatu yihí ñu sacuví ñu tyiño vaha, ma cayu chi. Cuñihí ñu cha cuhva Nyoo chi ñu. ¹⁵ Soco tatu tyiño sahá ñu ta ndi cayu, cunaa tandihí tyiño sahá ñu. Cacu maa ñu soco tari noo ra cha cuyatyí ca quita nu ñuhú. Vatyí chiin cuii ri ca ta cayu ra.

¹⁶ ¿Atu ña chitó ndo vatyí vehe ñuhu Nyoo cuví chi ndo, ta Tatyí li Nyoo iyó ra añima ndo? ¹⁷ Tatu nya noo ñu sativí vehe ñuhu Nyoo, Nyoo cusanaa ra chi ñu, vatyí vehe ñuhu Nyoo, cha ii cuví. Ta vehe ñuhu cuan ican cuví maa yo.

¹⁸ Ni noo ndo ta ma sandavi ñaha ndo chi ndo. Tatu nya nyoho cuñí maa ndo tyi chitó xaan ndo cha chiñi tuñi ñáyivi ihya, ndahvi saha ndo chi ndo tari noo ra cha ña chitó maa. Tyicuan ta Nyoo cuhva ca ra cha chiñi tuñi vaha chi ndo. ¹⁹ Vatyí cha chiñi tuñi ñáyivi ihya cuví chi noo cha ñima ri tuhun nuu Nyoo. Vatyí tuhun Nyoo catyí chi: “Nyoo sanacavá ra chi ra chitó, suri maa nu trampa cha savahá ra.” ²⁰ Ta catyí tucu chi: “Sutu Mañi yo chitó ra vatyí cha chicá xiñi noo ra chitó, cha ñima ri tuhun cuví.” ²¹ Yucuan chaha ni noo ndo ña tahán

chi sacahnú ndo chi ndo tatu nyicón ndo chi noo rayi. Vatyí tandihí cha iyó ta chi maa ndo cuví, tyi maa Nyoo chahá ra chi ndo. ²² Yuhu ra Pablo, ra Apolos, ra Pedro, maa Nyoo chahá ra chi ndi chi ndo tyi nacatyí ndi tuhun ra chi ndo. Ta ñuhu ñáyivi ihya, ñáyivi iyó yo, tuhun chihí, cha cuví vityin, cha cuví nu cuahan ca chi, tandihí ta chi maa ndo cuví. ²³ Ta siin ri, maa ndo, chi ra Cristo cuví chi ndo, ta ra Cristo, chi Nyoo cuví chi ra.

4

Ma sacahnu yo chi yo ta ni chi noo yañi yo

¹ Cuñí chi vatyí nyehé ndo chi ndi tari noo ra sahá tyiño chihin ra Cristo. Vatyí tyaq Nyoo tyiño chi ndi vatyí sañaha ndi tuhun xehe ra cha ña chitó ñáyivi nu quichí chi. ² Ta cuñí chi vatyí nyuhu cha cuví ndi musu Nyoo nyita ri quichahá ndi tandihí cha catyí ra chi ndi. ³ Soco cha cuenda yuhu, ña quichahí tatu cahán ndo chii. O tatu cutuñí chii nuu noo ra cuví tyiño, ñahri cuende. Ta ni ri mai ta ña catyí tyi vahi. ⁴ Vasi tuví iñi mai tyi ñahri ca cuatyí, soco ña cuñí chi catyí vatyí ñahri cuatyí nuu Nyoo. Vatyí nuu maa Sutu Mañi yo cucutuñí chi yo. ⁵ Ican tuhun, nyoho ma cahan ndo chi ndi. Cuatu ndo quivi quichi ra Cristo. Ta maa ra cutava nu ndichin cha ñohó xehe nu ñaa iñi. Vatyí cusanatuví ra cha caá añima noo noo yo. Tyicuan ta Nyoo cutyiyahvi ra yoso cuhva sacuví noo noo yo.

⁶ Yañi, cahín tuhun ihya chihin ndo cuenda cha vaha chi maa ndo. Vatyí nyehé ndo cuhva iyé, ta cuhva iyó ra Apolos. Vatyí ña cahnu sahá ndi chi ndi. Ta tyicuan caa tucu maa ndo, cutuhva ndo sacuví ndo tari catyí nu tutu Nyoo: Ma cahnu saha ndo chi ndo. Ta ñima chi noo ri ra cuñi ndo. Soco inuu ri cuhva cuñi ndo chi tandihí ñáyivi. ⁷ Ni noo ndo ta ña cahnu ca ra cuví ndo ican saha inga ndo. Vatyí cha iyó chi ndo maa ri maa cha chahá Nyoo cuví. Yucuan chaha ña tahán chi cha sacahnú ndo chi ndo, vatyí ñima maa ndo ñihí.

⁸ Cha cuhva cha cuñí maa ndo vatyí tandihí tuhun Nyoo chitó ndo, ta ñahri ca cha cumañi chi ndo. Ta cuñí maa ndo tyi Rey cuví ndo. Ta ña chiñuhú ca nyuhu chi ndo, cuñí maa ndo. Vaha tyehe ta tyicuan caa, tacuhva vatyí cuví tucu nyuhu rey chihin ndo. ⁹ Nyuhu cha cuví ndi apóstol, tari maa cha sandoq Nyoo chi ndi nya chata ca, cahvi iñi. Vatyí nyehé xaan ndi tindoho. Cuví ndi tari noo ra iyó cuatyí, ta tari quivi cha yahá policía chihin ndi ityi cahnu vatyí tacuhva tyi nyehe ñáyivi ta ángel chi ndi. ¹⁰ Sahá ñáyivi tyi ra tondo cuví ndi cha cuenda ra Cristo. Ta nyoho cuñí maa ndo tyi chitó xaan ndo tuhun ra Cristo. Nyuhu

cuví ndi tari noo ra cha ñahri fuerza, cha ni ri ca cha nyoho cuñí maa ndo tyi cuaha xaan fuerza ndo iyó. Tasi cuñí nyehe ñáyivi chí ndi, ta chi nyoho sahá ñu ñáyivi. ¹¹ Nya vityin, nyehé ndi tindocho. Chisocó ndi. Ityi ndi ndutyá. Cumañi sahma ndi. Ñahri vehe ndi iyó. Ta ñáyivi, tasi iñi ñu chí ndi. ¹² Ta chítatú ndi cha sahá tyiño ndi chihin ndaha ndi. Cahán ñáyivi chí ndi. Soco nacahán ndi chihin cha vaha nu cahan ñu. Chicá nyicon ñu chí ndi soco cunyeé ndi. ¹³ Cahán ña vaha ñu síqui ndi. Soco ña yatyín iñi ndi, vita ri chaha ndi tuhun chí ñu. Sahá ñu tari noo mihin chí ndi. Sahá ñu tari noo cha ña chiñuhú ca chí ñáyivi chí ndi. Tyicuan caa sacuví ñu nyacua nya vityin.

¹⁴ Sacuhín tuhun ihya chí ndo, soco ñima ticahan nuu chahí chí ndo. Soco chahí tuhun chí ndo tari chahí tuhun chí sehi tyi cuñí chí ndo. ¹⁵ Soco vasi uchi mil ra sacuahá sañahá tuhun ra Cristo chí ndo, soco ña cuaha sutu ndo iyó. Yuhu cuví sutu ndo cha cuenda tuhun ra Cristo Jesús. Vatyí sañahí chí ndo yoso caa cacú añima ndo. ¹⁶ Ta tyicuan caa catyi chí ndo na cunyicon ndo cuhva iyé.

¹⁷ Yucuan chaha tachí chí ra Timoteo, sehi cuenda Sutu Mañi yo, nu nyicu ndo. Nii xaan iñi ra nyicón ra chí Nyoo. Ta cuñí xain chí ra. Maa ra cuasanicohon ra iñi ndo yoso cuhva iyé, vatyí chinó iñi chí ra Cristo. Cusañaha ra chí ndo yoso cuhva sañahí tandihí ri vehe ñuhu. ¹⁸ Yihí nyoho cahnu sahá ndo chí ndo. Cuñí maa ndo vatyí ma cuhun que nu nyicú ndo. ¹⁹ Soco tyái cuhva tyi cunyehi nu nyicu ndo cha numi ri, tatu Sutu Mañi yo ta cuñí ra. Tyicuan ta cunyehi tatu ndicha cha iyó fuerza Nyoo chí ra cahnu sahá chí chña, o tatu cacahán ri maa ra. ²⁰ Vatyí tatu ndicha cha chahá ra cha cunyacá ñaha Nyoo chí ra, ma cahan ri ra. Soco cuatuví iñi yo vatyí nyaá fuerza Nyoo chihin ra. ²¹ ¿Ñáa cha cuñí nyoho vii? ¿Atu cha quichi tachí tuñi chí ndo, o cha quichi nyehí chí ndo chihin cha vita iñi?

5

Nu cutuñi chí noo ra chiyo chihin sihi queen

¹ Catyi ñu chí vatyí iyó noo nyoho cha iyó ndo chihin sihi queen ndo. Ihya cuví noo cuatyí cha cahnu xaan, vatyí ni ñu ña ñohó nuu chí Nyoo ta ña nyacuví ñu tari nyoho. ² Ta tyicuan caa ta cahnu sahá ndo chí ndo cha nuu cha cucuihyá iñi ndo! Cuñí chí vatyí catyi ndo chí ra cha nyacuví cha quiñi caa cuan vatyí ma cutahan ca ra chihin ndo. ³⁻⁴ Vasi ña nyaí chihin ndo chihin coño ñuhi, soco cõhon iñi ndo vatyí ñohó iñi tuhun ndo, tari cha nyaá mai chihin ndo cuví cuan. Ta

cha sandaj tyiño ra cha sacuví cuatyí cuan chihin sivi maa Sutu Mañi yo Jesucristo. Cuñí chí tyi ndu iin ri ndo. Ta saha ndo tuhun tyi nyaí chihin ndo. Ta cunyaa fuerza maa Sutu Mañi yo Jesús chihin ndo ñandihí. ⁵ Tyicuan ta cuñí chí vatyí nacuhva cuenda ndo chí ra cuan chí cuihna, tacuhva nativi ndihí coño ñuhu ra. Ta cuhva cuví cacu añima ra quivi quichi Sutu Mañi yo Jesucristo.

⁶ Ña tahán chí sacahnu ndo chí ndo chihin cha sacuví ndo. Vatyí nyehé ndi ndo nyacuví ra cuan cha quiñi caa. ¿Atu ña chító ndo noo tuhun cha catyi chí vatyí chihin chíin ri yuchan iya ta nandaa nani yuchan pan? ⁷ Tava ñehe ndo yuchan iya chahnu cha cuví cha ña vaha cha sativí chí ndo. Tyicuan ta cuví ndo tari pan cha ñahri yuchan iya yihí chihin, cha tuhva yo chachí cha vico pascua. Ta pan cuan, ican cuví ndo vatyí ra Cristo cuví mbee cha chíhi cha catyi cuatyí yo. ⁸ Yucuan chaha tahán chí cachí coo yo cuenda cha chíhí maa ra Cristo cha catyi yo. Ta sandoó yo cha quiñi caa cha sacuví yo ityi chata cha cuví tari yuchan iya chahnu. Ta cahán yo maa maa ri cha ndicha chihin cha ni iñi yo. Vatyí cuví chí tari pan cha ñahri yuchan iya yihí.

⁹ Nuu inga carta cha yaha saquichi chí ndo, catyi chí ndo vatyí nyoho ma cohon naha ndo tuhun chihin ñu cha sacuví cha iyó ri maa chihin ñusihí o rayii. ¹⁰ Ta cha catyi chí ndo tyehe caa, ñima cha cuachiyo ndo ingaña ri nu nyicú ñu cha iyó chihin rayii o ñusihí, ta ñima yii ñu o ñasihí ra cuví, o ñu nyiyó iñi, o ñu suhú, o ñu sacahnú xitohyo. Vatyí tatu tyicuan caa, cuñí chí cha quita ndo ingaña ri ñuhu ñayivi. ¹¹ Soco cha cuñí catyi chí ndo vatyí ma cohon naha ndo tuhun chihin noo ñu cha catyi vatyí hermano cuví ñu, ta iyó ri maa ñu chihin rayii o chihin ñusihí ta ñima yii ñu o ñasihí ra cuví, o nyiyó iñi ñu, o sacahnú ñu xitohyo, o cuendu ñu, o chíhí ñu ndixi, o suhú ñu. Ñu cha caá tyehe caa, ni cha ma cunyaa ndo cachí ndo chihin ñu. ¹²⁻¹³ Vatyí yoó ña tahán chí sahá yo cuenda chí ra ña ñohó nuu chí Nyoo. Nyoo cuví ra sahá cuenda chí ñu cuan. Soco nyoho cuñí chí sahá ndo cuenda chí ñu yihí cuenda Nyoo. Yucuan chaha tavá ñehe ndo chí ra iyó cuatyí chíña nu nyicu ndo.

6

Ma cacan yo cuatyí chaha noo yañi yo cuenda Nyoo nuu ra cuví tyiño

¹ ¿Yoso caa quichi cuví iñi nyoho chicán ndo cuatyí chaha tahan ndo nuu ra cuví tyiño cha ña yihí cuenda Nyoo chihin ndo, cha nuu cha sacotó ndo chí ra yihí cuenda

Nyoo, tacuhva canyehé ra nya ra iyó cuatyí? ² ¿Atu ña chitó ndo vatyi suri maa ndo cusandaa ndo cuatyí ñáyiví iyó siqui ñuhu ñáyiví ihya nu cuahan ca chí? Ta tatu maa ndo cusandaa ndo cuatyí cuan, ¿atu ma cuví sandaa ndo noo tyiño cha ñima ri tuhun ihya? ³ ¿Atu ña chitó ndo vatyi nyacua nya ángel ta cutuñi chí ra nuu yo? ¿Ta nyaca cuví noo tuhun luhlu ñáyiví ihya? ⁴ Yucuan chaha tatu iyó tisihi nu nyicú ndo, ¿ñáá tuhun cuahan ndo nuu ra cuví tyiño cha ña chitó tuhun Nyoo?, ta ñahri tyiño cuví ra cuan vehe ñuhu nu nyicú ndo. ⁵ Ihya ndicha tuhun catyí chí ndo, na coo chiin ticahan nuu nuu ndo. ¿Atu yori ndicha cuii noo ra cuví sandaa noo tyiño yañi yo nu canyicú nyoho chiña? ⁶ Vatyi cuahan ndo cua cacan ndo cuatyí chaha yañi yo cuenda Nyoo nuu noo ra cuví tyiño cha ña chiño iñi chí Nyoo.

⁷ Cha iyó tisihi nu nyicú ndo, ña vaha. Vaha taxin ca cunyeerí ndo tatu sacuví ñu cha ña vaha chihin ndo. Saña ndo, na suhu maa ñu cha chí ndo. ⁸ ¿Soco nyoho suri maa ndo sataśi ndihi ca iñi ndo chí ñáyiví, ta nyacua nya cha chí yañi ndo ta suhú ndo!

⁹⁻¹⁰ ¿Atu ña chitó ndo vatyi ñu quiñi iyó ma quihví ñu nu nyacá ñaha Nyoo? Ma sandavi ñaha ndo chí ndo. Ma quihví tandihi ñu iyó ri maa chihin ñusihi o chihin rayii cha tyicuan ri caa. Ta ni ri ñu cha sacahnú xitohyo, ni ri ñáyiví cha iyó ñasihi o yii, ta cavá noo ñu chihin inga ñaha o chihin inga rayii, ni ra iyó chihin tahan yii, ni ra suhú, ni ra nyiyó iñi cha tyayii, ni ra chiñi, ni ri ñu cuendu, ni ri ñu chitó yoso caa sacuví cha quiñi caa, ma ñihi ñu cha vaha nu nyacá ñaha Nyoo. ¹¹ Vatyi tyicuan caa cuví suhva nyoho. Soco Nyoo cha sandundi ra añima ndo chihin Tatyí Ii ra. Cha sacuvaha Sutu Mañi yo Jesucristo chí ndo nuu Nyoo.

Coño ñuhu yo cuví vehe ñuhu Nyoo

¹² Catyí chí tuhun vatyi libre iyó yo cha sacuví yo tandihi cha cuñi yo. Cha ndicha cuví. Soco ña tandihi ta cuví chí cha vaha chí yo. Ndicha libre iyó yo cha sacuví yo tandihi, soco saha yo cuenda tatu cha vaha cuví o cha ña vaha. Ta ma cuhva yo cha cunyaca ñaha chí chí yo. ¹³ Catyí ñáyiví vatyi chahá Nyoo nyayu cha cuenda chichi yo. Ta chahá ra chichi yo cha cuenda cha cachí yo nyayu. Cha ndicha cuví. Soco ninduvi cuan cusanaa Nyoo quiví naa ñáyiví. Ta ña ndicha cha coño ñuhu yo cuví cha cuenda cha sacuví yo cha ña vaha chihin ñusihi o chihin rayii. Vatyi coño ñuhu yo cuenda Sutu Mañi yo cuví. Ta maa Sutu Mañi yo cuví ra cuenda coño ñuhu yo. ¹⁴ Tari sanandoto Nyoo chí ra Cristo Jesús, tyicuan caa cusanandoto ra chí yo chihin tunyee iñi ra.

¹⁵ ¿Atu ña chitó ndo vatyi tandihi yo cha yihí yo cuenda ra Cristo nanduví yo noo

coño ñuhu chihin ra? Ta noo noo yo cuví tari suhva ri coño ñuhu ra. ¿Atu quehen yuhu chihin coño ñuhu ra Cristo ta sativí chihin noo ñaha cata iñi? Ña tahán chí cunyacuví yuhu tyicuan caa. ¹⁶ ¿Atu ña chitó ndo vatyi tatu noo rayii ndu iin ri ra chihin noo ñaha cata iñi, noo ri coño ñuhu nanduví ra chihin ña? Vatyi nu tutu Nyoo catyí chí tyehe caa: “Cha ninduvi ñu, noo ri nanduvi ñu.” Ta ña tahán chí cu iin ri ra yihí cuenda Nyoo chihin ñaha cata iñi. ¹⁷ Soco tatu noo ñáyiví nacuhvá cuenda ñu añima ñu chí ra Cristo, yucuan cuví nu quihví Tatyí Ii ra añima ñu ta noo ri nanduví ñu chihin ra.

¹⁸ Saanaa ndo iñi ndo tatu quichi cuví iñi ndo chí ñusihi o rayii tatu ñima ñasihi ndo o ñima yii ndo cuví. Vatyi tandihi inga nu cuatyí cha nyacuví ñáyiví ña sativí chí coño ñuhu ñu. Soco ñu nyacuví cuatyí chihin cha iyó ñu chihin ñusihi o rayii cha tyicuan ri caa, sativí ñu coño ñuhu ñu. ¹⁹ ¿Atu ña chitó ndo vatyi coño ñuhu yo cuví vehe Tatyí Ii cha chahá Nyoo chí yo, vatyi cunyaa ra chihin yo? Yoó ñima maa yo nyacá ñaha yo chí yo, Nyoo cuví ra nyacá ñaha chí yo. ²⁰ Vatyi Nyoo satá ra chí yo ta yahví xaan chahá ra chí yo. Yucuan chaha cuñi chí vatyi sacahnú yo chí Nyoo chihin coño ñuhu yo, ta chihin cha chiñi tuñi yo vatyi ninduvi cuan, chí maa Nyoo cuví.

7

Chahá ra Pablo tuhun yoso caa coo ñu tandahá noo ñáyiví vaha

¹ Ta vityin cuacatyí tuhun cha ndaca tuhun ndo chí nu tutu cha sacuhun ndo chí. Ndicha vatyi vaha cha ma tandaha yo. ² Soco vatyi iyó xaan tuhun cha quichí cuví iñi ñáyiví cha coo ñu chihin ñáyiví cha tyicuan ri caa. Yucuan chaha cuñi chí vatyi tahan tahan rayii coo noo ñasihi ra, ta tahan tahan ñusihi coo noo yii ñu. ³ Na sacuví rayii cuhva tahán chí chihin ñasihi ra. Ta tyicuan caa tucu maa ñusihi, na sacuví ñu cuhva tahán chí chihin yii ñu. ⁴ Ñaha sihi cuan ma cuví cunyaca ñaha ri maa ña coño ñuhu ña. Vatyi chí yii ña cuví coño ñuhu ña. Tyicuan caa tucu maa yii ña, ma cuví cunyaca ñaha ri maa ra coño ñuhu ra vatyi chí ñasihi ra cuví coño ñuhu ra. ⁵ Coto ñaha ma cuhva ndo chí ndo chí tahan ndo. Tatu cuñi ndo nanducu ndo chí Nyoo chihin oración, iin ri cuhva çaça xiñi ninduvi ndo. Ta ma cuhva ndo chí ndo chí tahan ndo suhva quiví. Yaha cuan tyicuan ta cuhva tucu ndo chí ndo chí tahan ndo coto ma cunyeerí ndo. Ta coto nducu nyehe ra ña vaha chí ndo ta cuhun ndo cunducu ndo inga ñusihi o inga rayii. Ta ña vaha cha tyicuan caa.

⁶ Cha catyí chí ndo tyehe caa ñima cha catyí tyi tandaha ndo. Ña saniñi chí ndo cha

tandaha ndo. Soco cuví tandaha ndo tatu cuñí ndo. ⁷ Cha cuenda chí yuhu, vaha ca coo maa ri maa ndo tari mai. Soco Nyoo siin siin fuerza chahá ra chí noo noo yo. Yihí yo chahá ra fuerza chí yo vatyi cuví coo maa ri maa yo. Ta yihí yo ña chaha ra fuerza cha coo maa ri maa yo.

⁸ Chí ñu tyivaa ta chí ñu chihí yíi, chahí tuhun chí ñu. Vaha ca cha ma coo yíi ñu tari mai. ⁹ Soco tatu ma cunyeé ñu cha ma coo yíi ñu, vaha ca cha tandaha ñu ta ñima ca cha quichi ri cuví iñi ñu tandaha ñu, ta ña tandaha ñu.

¹⁰ Soco ñu cha yaha tandaha, catyí chí ñu vatyi ma sanandoo ñu chí yíi ñu. Cha ndicha cuví vatyi mandamiento ihya ñima cha ndichí xiñi ri cuví soco maa Sutu Mañi yo catyí. ¹¹ Soco tatu noo ñaha sihi ta sanandoo ña yíi ña, cuñí chí vatyi ndoo ña cunyaa ña cha ma tandaha ca ña. O naquehen ña chí yíi ña. Ta suri tyicuan caa, ña tahán chí sanandoo rayíi chí ñasihi ra.

¹² Ta cha cuenda chí yuhu catyí chí inga ndo tuhun ihya. Vatyi tatu ñasihi noo hermano ta ña chinó iñi ña chí Nyoo, soco ndoo ña vaha cha cunyaa ña chihin ra, ñahri ityi iyó chí ra cha sanandoo ra chí ña. ¹³ O tatu yíi noo hermana, ta ña chinó iñi ra chí Nyoo, soco ndoo ra vaha cha cunyaa ra chihin ña, ñahri ityi iyó chí ña cha sanandoo ña chí ra. ¹⁴ Vatyi cha yahá nasoco Nyoo chí rayíi cha ña chinó iñi cuan cha cuenda cha in ri cuví ra chihin ñaha cha chinó iñi cuan. Ta cha yaha nasoco tucu Nyoo chí ñaha cha ña chinó iñi chí Nyoo cha cuenda cha in ri cuví ña chihin ra chinó iñi. Tatu ña nyacuví ndo tyicuan caa, sehe ndo cucuvi ndotyin tari sehe ñu cha ña chinó iñi chí Nyoo. Soco cha cuenda cha sacuví ndo tyicuan caa, nasoco Nyoo chí sehe ndo. ¹⁵ O ña rayíi o ñasihi cha ña chinó iñi chí Nyoo, ta cuñí ñu sanandoo ñu chí tahan ñu cha chinó iñi chí Nyoo, na sanandoo maa ñu. Tyicuan ta ra hermano o ñaha hermana ndoo ñu libre. Vatyi maa Nyoo cuñí ra vatyi coo vaha yo chihin cha ñahri tisihi. ¹⁶ Vatyi ña chitó minoo ñaha sihi tatu cacu añima yíi ña saha ña. Ta ni ri noo rayíi ña chitó ra tatu cacu añima ñasihi ra saha ra.

¹⁷ Ta tyicuan caa catyí chí ndo vatyi coo ndo yoso cuhva catyi Sutu Mañi yo chí ndo. Ta yoso cuhva iyó ndo quiví nacana Nyoo chí ndo. Ta tyicuan caa catyí chí tandihi ñu yihí cuenda Nyoo noo noo vehe ñuhu. ¹⁸ Tatu Nyoo ta nacana ra chí noo nyoho ta cha yahá sacuví ñu costumbre circuncisión chí ndo, ma caca iñi ndo. Soco tatu nacana ra chí noo ndo cha ña sacuví ñu costumbre cuan chihin ndo, ña tahán ca chí sacuví ndo vityin. ¹⁹ Ña niñi xaan cha sacuví yo, o cha ma sacuví yo costumbre circuncisión

cuan. Soco cha niñi ca cha quichahá yo tuhun cahán Nyoo. ²⁰ Tahan tahan ndo cuñí chí ndoo ndo yoso cuhva cha iyó ndo quiví cha nacana Nyoo chí ndo. ²¹ Vatyi tatu iyó chitoho ndo cha nyacá ñaha chí ndo quiví cha nacana Nyoo chí ndo, ma caca iñi ndo, soco tatu chahá chí cuhva cha ndoo ndo libre, cuñí chí nducu ndo cuhva ta ndoo ndo libre. ²² Vatyi quiví nacana Nyoo chí noo ra cha iyó chitoho, nduvi ra tari noo ra cha libre iyó, vatyi sacuví ra tyiño nuu Sutu Mañi yo. Ta suri tyicuan caa tucu ra cha iyó libre quiví cha nacana Nyoo chí ra. Vityin ra Cristo nyacá ñaha chí ra. ²³ Sata Nyoo chí nyoho. Ta yahvi xaan chahá ra chí ndo. Yucuan chaha ma cuhva ndo cha cunyaca ñaha rayíi chí ndo. Ta ma sacuví ndo tyiño nuu ra. ²⁴ Ta tyicuan caa catyí chí ndo yañi, coo ndo tari cuhva chiyo ndo quiví nacana Nyoo chí ndo.

²⁵ Ta tyicuan tucu ñu cha ta tandaha ca. Ñahri tuhun chahá Sutu Mañi yo chíi cha cuenda ndo. Soco catyí chí ndo yoso cuhva ndichí xiñi. Ta cuví naquehen ndo tuhun cahín tyi cha chitó ndo vatyi cha ndahvi cuñí Nyoo nyehé ra chíi ta chahá ra tyiño ihya chíi. ²⁶ Cha cuenda chí yuhu, vaha taxin ca ma tandaha ndo. Vatyi cuaha xaan tindoho ñayivíi cha iyó yo vityin. ²⁷ Soco tatu cha iyó ñasihi noo hermano, ma nducu ra cuhva cha sanandoo ra chí ña. O tatu ta coo ca ñasihi ra, ma nducu ra chí ña. ²⁸ Soco tatu tandaha ra, ñima cuatyí cuví. O tatu noo ñaha tyivaa tandaha ña, suri ñima cuatyí cuví. Soco ñu tandaha cuaha xaan tindoho cunyehe ñu ñayivíi ihya. Ta yucuan chaha catyí chí ndo vatyi vaha ca cha ma tandaha ndo. Vatyi ña cuñí cha nyehé ndo tindoho ta tisihi cuan.

²⁹ Yañi, cha vityin ta ityi nuu ña cuaha ca quiví nyaá. Cuñí chí vatyi ra cha iyó ñasihi cuví ra tari noo ra cha yori ñasihi. Vatyi nyita ri tahán chí caca xiñi ra tuhun Nyoo. ³⁰ Ta tatu nyaá ndo tucuihya iñi, ma quichaha ndo tucuihya iñi cuan, o tatu nyaá ndo tusíi iñi, soco ma quichaha xaan ndo tusíi iñi cuan. Ta tyicuan caa tucu tatu iyó xuhun ndo, ma quichaha xaan ndo xuhun cuan. Naquhva ndo tandihi cuan chí Nyoo. ³¹ Ta ra iyó xaan cha chíi ñayivíi ihya, ma quichaha xaan ra chí cuan, soco cotyíño ra tyiño Nyoo. Vatyi ñayivíi cha nyehé yo ihya cha cuahán sandihi xaan chí.

³² Cuñí vatyi nyoho ma caca xaan xiñi ndo tuhun cha iyó ñayivíi ihya. In ri maa tuhun Nyoo caca xiñi ndo. Noo ra tyivaa cha ta tandaha ca chicá xiñi ra yoso caa sacuví ra cuhva cuñí maa Sutu Mañi yo. ³³ Soco tatu cha tandaha ra, chicá xiñi ra yoso caa coo vaha ra ñayivíi cuhva tahan iñi ñasihi ra. ³⁴ Ta siin cuhva iyó noo ñasihi cha cha yaha tandaha, ta siin cuhva iyó tucu noo ñasihi

cha cumañi ca tandaha. Ñaha cha cumañi ca tandaha chicá xiñi ña ñin ri maa tuhun Sutu Mañi yo. Ta chicá xiñi ña yoso caa sacahnú ña chi Nyoo chihin coño ñuhu ña ta chihin cha ñi añima ña. Soco ñaha cha cha yahã tandaha chicá xiñi ña yoso caa coo vaha ña ñayivi ihya cuhva tahán iñi yii ña.

³⁵ Catyí tuhun ihya chi ndo cuenda cha vaha chi maa ndo. Ñima cha saniñi chi ndo. Soco vatyi coo vaha ndo noo ñayivi chihin cha ñahri sayangá chi ndo. Ta ñin ri tyiño Nyoo sacuvi ndo.

³⁶ Soco nya nyoho chicá xiñi ndo vatyi vaha cha tandaha ndo vatyi cha cuayaha quivi ndo; vaha, tandaha ndo tatu cuñi ndo. Ñima cuatyí cuví cuan. ³⁷ Soco tatu inga ndo cha nacuañ vaha iñi ndo vatyi cuandoo ndo cha ma tandaha ndo, vaha tucu. ³⁸ Tu tandaha ndo, vaha. Tu ma tandaha ndo, vaha ca.

³⁹ Soco catyí nu ley Nyoo chi yo vatyi tahán chi cunycá ñaha rayi chi ñasihí ra cha ni ri ca cha iyó ra. Soco tatu chihí ra, iyó ityi chi ña cha tandaha ña yóo chihin cuñi maa ña. Soco tatu ra yihí cuenda Nyoo cuví ra. ⁴⁰ Soco vaha ca coo ña ñayivi tatu ma tandaha ña inga chaha. Ihya cuví cha chicá xiñi yuhu. Ta chahí tuhun ihya chi ndo chihin Tatyí li maa Nyoo, cahvi iñi.

8

Nu sañahá ra Pablo vatyi ma sacoo yo cuatyí inga ñáyivi

¹ Ta vityin cuanacatyí chi ndo cuenda nyayu cha chahá ñu chi xitohyo. Tandihí yo cha ñohó nuu ca yo chi Nyoo, chitó yo tatu vaha o ña vaha cachi yo nyayu cuan. Ta cha cuenda cha chitó yo, yucuan chaha cahnu xaan sahá yo chi yo ta sativí cuan chi yo. Soco cha cuñi yo chi tahan yo sandunyeé cuan chi yo. ² Tatu yihí ndo cha cuñi maa ndo tyi chitó ndo, cha cuenda vatyi ta coto ca ndo yoso cuhva cuñi chi cuví cuan. ³ Soco Nyoo ñohó nuu ra chi ñu ñi vaha iñi cuñi chi ra.

⁴ Ta vityin cha cuenda cha cachi yo nyayu cha iyó vico xitohyo: cha chitó vaha yo vatyi noo xitohyo ñahri maa vale chi, vatyi noo ri maa Nyoo iyó. ⁵ Vasi cuñi maa ñáyivi vatyi cuaha xaan Nyoo iyó nu ñuhu ñayivi ihya ta andivi, ⁶ soco cha cuenda chi maa yo noo ri Nyoo Sutu yo iyó. Ta maa ra savahã ra tandihí cuñi maa cha iyó. Ta yóo iyó yo cha cuenda maa ra. Ta iyó tucu noo ri Sutu Mañi yo Jesucristo. Ta maa ra savahã tandihí maa cha iyó, nyacua nya chi maa yo.

⁷ Soco ña tandihí yo chitó yo tuhun ihya. Vatyi suhva ñu tahan yo cuenda Nyoo, ta ñi cumañi ca quihvi ñu cuenda Nyoo, sacahnú ñu xitohyo. Ta cha cañ ñu sacahnú ñu chi cuan ta cuñi maa ñu tyi nyitó xitohyo

cuan. Vatyi ña ñi vaha iñi ñu nyicón ñu chi Nyoo. Ta tatu chachí ñu nyayu cha chahá ñáyivi chi xitohyo cuan, cuñi maa ñu vatyi chicoó cuatyí ñu cuenda xitohyo cuan nuu Nyoo. ⁸ Soco Nyoo ñahri cuenda ra tatu chachí yo, o ña chachí yo. Ñima vatyi chachí yo ta ña vaha ca yo nuu Nyoo, ta ñima cha cuenda cha ña chachí yo ta vaha ca yo. ⁹ Soco saha ndo cuenda nya ndo chachí nyayu cuan ta chitó ndo vatyi ñahri cuatyí ndo chicoo. Cuví sanacava ndo nuu cuatyí chi ñu ni quihvi ri cuenda Nyoo, vatyi ñu cuan cuñi maa ñu tyi chicoo cuatyí ñu tatu chachí ñu nyayu cuan. ¹⁰ Vatyi tatu yoho cha chiton tuhun ihya, ta cunyaun ta cachun noo cha iyó vehe xitohyo, ta noo ra yañi yo cha ña ñihi vaha cuahán ra chihin Nyoo nyehé ra chuun yucuan, ra yañi yo cuan cucachi ndihí ra chuhun. ¹¹ Ta ra yañi yo cutivi añima ra vatyi cuñi maa ra tyi chicoo cuatyí ra. Ta ra cuan chihí ra Cristo cha cuenda ra. Ta vityin chicoo cuatyí ra cuñi maa ra. Ta yoho cha chitón, sicun cuhun cuatyí cuan. ¹² Yucuan chaha tatu sanacavá yo chi noo yañi yo cha ña ñihí vaha cuahán chihin Nyoo, chicoó cuatyí yo nuu ra Cristo. ¹³ Yucuan chaha tatu sanacavé chi noo yañi yo nuu cuatyí cha cuenda cha chachí, vaha taxin ca ma cachi ca mai coño, tacuhva cha ma sanacave chi ra nuu cuatyí.

9

Cha tahán chi sacuvi ra apóstol Nyoo

¹ Yuhu cuví noo ra apóstol Nyoo. Ta yori ñáyivi nyacá ñaha chii. Vatyi nyehí chi ra Jesús Sutu Mañi yo. Ta suri maa ndo cuví cha ndaa tyi ndicha cuví yuhu noo apóstol Nyoo, vatyi chinó iñi ndo tuhun Nyoo cha sacoté chi ndo. ² Vasi ña cuñi ñáyivi chinó iñi ñu cha apóstol Nyoo cuví, soco cha cuenda nyoho ican cuví. Vatyi cha cuenda cha chinó iñi ndo chi Sutu Mañi yo, cuví ndo cha ndaa vatyi ndicha cha apóstol cuví.

³ Ihya cuví tuhun cuacahin cuenda ñu cha cahán nyaa chii. ⁴ Iyó chi ityi chii cha quehin tandihí cha chahá ñu cachi ta cha chahá ñu cohi. ⁵ Ta ñin ri cha coo noo ñasihí cha chinó iñi chi Nyoo, tari yañi ra Jesús, ta ra Pedro ta tandihí ca ra apóstol. ⁶ O chicá xiñi ndo vatyi yuhu ri ta ra Bernabé tahán chi saha tyiño ndi chihin ndaha ndi ta sata ndi cha chiñuhú chi ndi. ¿Atu ña tahán chi chi nyuhu sandoo ndi tyiño cuan ta cahan ndi tuhun Nyoo? ⁷ Ra cha cuví sindaro tyiyahví gobiernu chi ra ta chotyíño ra xuhun cuan. Ta ra cha tachí yoho tichaha ndivi, chachí ra tichaha ndivi cha quita nu iyó tyiño saha ra. Ta ra cha sahá cumi mbee chihí ra sicui ti. ⁸ Ta ma cuñi ndo vatyi tuhun ihya cha ndichi xiñi ri mai cuví. Vatyi nu ley cha tyaa ra Moisés catyí chi tyehé caa: ⁹ “Ma tyihí

ndo yoho yuhu quiti cha sandundí trigo, vatyi tahán maa chi cachi ti suhva trigu nu sahá tyiño ti.” Ndicha vatyi Nyoo catyí ra tyehe caa soco ñima vatyi cuniñi xaan cuñi ra chihin quiti. ¹⁰ Soco na cutuñi ca iñi yo vatyi tari ra tahví ñuhu ta ra cha tachí, tahán chi vatyi cuita iñi ra vatyi cunaquehen ra cha quita nu saha tyiño ra. ¹¹ Ta tyicuan caa, tatu nyuhu quichi cahan ndi tuhun Nyoo chihin ndo, tari quivi cha quichi tachí ndi chiti cuvi cuan. Ta tahán chi tyi tyinyeeé ndo chi ndi cha cuenda cha sacotó ndi tuhun Nyoo chi ndo. ¹² Tatu tyinyeeé ndo chi inga ra cha ña quichí tyihí tuhun Nyoo nu nyicú ndo, tahán ca chi cha tyinyeeé ndo chi nyuhu, vatyi nyuhu tyihí ndi tuhun Nyoo nu canyicú ndo.

Soco ña cahán ri ndi, ta cunyeé ndi tandihi. Ta ña sayangá ndi chi ndo chihin cha chiñuhú chi ndi. Tacuhva cha ma sandihi ndo tuhun ra Cristo. ¹³ Chitó ndo tyi ra sahá tyiño vehe ñuhu ñáyivi Israel, iyó ra chihin cha iyó vehe ñuhu cuan. Vatyi tahán chi tavá sin ra suhva coño quiti vatyi cachi ra. Ta tandihi ca coño cuan cucahmi ra tari cuhva catyí maa Nyoo chi ra. ¹⁴ Ta suri tyicuan caa catyí Sutu Mañi yo, vatyi tahán chi tyinyeeé ñu yihí cuenda Nyoo chi ra cahán tuhun Nyoo chihin ñu. ¹⁵ Soco yuhu ni noo chaha ña chiquen cha tahán chi chii. Ta ni ña tyai tuhun ihya vatyi cuñi cha cuhva ndo cha cuhva ndo chii. Vatyi tatu chiquén cha tahán chi chii, ña si cuñi cahín tuhun Nyoo. Vaha taxin ca cuñi cha cúvi ta ñima ca cha caquen xuhun chi ndo.

¹⁶ Cha cuenda chi yuhu ñima cha cahnú sahí chii cha cahín tuhun Nyoo. Soco vatyi nyaá siqui cha sacuvi. Soco ndahvi cuvi yuhu ra ndahvi tatu ma cahín tuhun Nyoo ihya. ¹⁷ Yucuan chaha tatu sacuvi chihin cha iyó iñi, cuñihi yahvi. Soco tatu sacuvi chihin fuerza, suri cuvi chi, vatyi noo tyiño cha tachí maa Nyoo chii tyi sacuvi, tahán chi cha sacuvi. ¹⁸ Ta tyicuan caa, yahvi cha ñihi, ícan cuvi cha si cuñi cahín tuhun ra Cristo. Ta ña chiquén cha tahán chi chii cha cuenda cha cahín tuhun ra.

¹⁹ Vasi ñima musu cuvi yuhu. Soco nanduví musu tandihi ñáyivi. Vatyi tyicuan caa saha ganaí cuaha ca ñáyivi cuenda ra Cristo. ²⁰ Tatu ñohí nu nyicú ra Israel, nanduví tari maa ra tacuhva vatyi tyasoho ra tuhun cahin. Vatyi cuñi saha ganaí chi ra cuenda ra Cristo. Vatyi ra cuan iyó ra cuhva catyí ley ra Moisés. Ta yuhu sacuvi tari cuhva catyí ley cuan. Soco ñima ley cuan nyacá ñaha chii. ²¹ Soco tatu cuñi saha ganaí chi ñu ña quichahá ley ra Moisés, sacuvi tari cuhva sacuvi ñu. Vatyi tacuhva saha ganaí chi ñu. Soco ley maa Nyoo nyacá ñaha chii vatyi chihin ley ra Cristo chicá noi ta ña

cuví cunyacuvi cha quiti caa tari nyacuvi maa ñu. ²² Tatu nyaí chihin noo ra cha ta coo vaha ca fuerza Nyoo chii, nanduví tari maa ra, vatyi tacuhva cahan que tuhun Nyoo chihin ra. Ta ndunyeé ca iñi ra chihin tunyee iñi Nyoo. Nanduví yuhu tari cuhva caa noo noo ñáyivi, vatyi tacuhva tyasoho ñu tuhun Nyoo cha cahín ta cacú añima ñu. ²³ Tyicuan caa sacuvi tacuhva cuvi sacoté tuhun Nyoo chi ñáyivi. Vatyi tacuhva ñihi tumañi iñi cha chahá maa Nyoo chi yo.

²⁴ Chitó ndo vatyi noo sihva cha chinó ñu, tandihi ñu chinó, soco noo ri ñu sahá ganaa. Tyicuan caa tucu maa yo, cuñi chi cha ñihi cunyicon yo chi Nyoo tacuhva sahá ganaa yo nu vaha cha chahá ra chi yo. ²⁵ Tandihí ñu cuahan sihva, sandoo ñu tandihí cha satyoño chi ñu vatyi cuñi ñu sahá ganaa ñu. Ta ñu cuan, cusaha ganaa ñu, soco noo corona numa cha tañi tyehe ri na ityi. Ta yoó nducú yo cuhva soco cha sahá ganaa yo noo cha ma tiví ca maa. ²⁶ Cha cuenda yuhu ña chinó tondo ri mai, ni ña cañi tahan tondo ri mai. ²⁷ Soco ñihi nyacá ñahi chi coño ñuhi. Ta saniñi quichahí chi Nyoo. Coto suri mai cha yaha sañahí chi inga ra ta ndoi.

10

Nu sañahá ra Pablo vatyi ma tyaa xiin yo Nyoo

¹⁻² Yañi, ña cuñi cha naa iñi ndo cha cuvi chi sutu chahnu yo ta cha nahá. Nyoo tyinyeeé ra chi ñu, ta tachí ra noo vico vatyi cuhun ityi nuu ñu coto cunaa ñu. ñin ri nanduví ñu chihin ra Moisés, ra cuvi nuu chi ñu, ta yahá sava ñu tyañuhu. Ta cha tyicuan caa, tari cha condutya ñu chihin vico cuan ta chihin tyañuhu cuvi cuan. ³ Ta tandihí ñu chachí ñu ñin ri nyayu cha chahá maa Nyoo. ⁴ Ta tandihí ñu chihí ñu ñin ri ndutya cha chahá maa Nyoo. Vatyi ndutya cuan tavá ra chata noo yuu cha cuahan chihin ñu. Ta yuu cuan ra Cristo cuvi. ⁵ Soco vasi nyehe ñu cuaha milagru cha sacuvi Nyoo, cuaha ñu ña quichahá ñu tuhun cahan ra chihin ñu. Ta chihí ñu chiqui ndi cuan, ta yucuan ndoo ñu.

⁶ Tandihí tuhun ihya chahá chi noo cuhva chi yo. Vatyi tacuhva ma cuñi yo sacuvi yo cha ña vaha tari sacuvi ñu cuan. ⁷ Yucuan chaha ma sacahnú nyoho chi xitohyo, tari chinyacuví suhva ñu cuan ta cha naha, tari catyí nu tutu Nyoo tyehe caa: “Ta cachiyo ñu vico, ta cachachí ñu, ta cachihí ñu.” ⁸ Ta ma coo ri maa yo chihin inga ñusihi o chihin inga rayí tatu ñima ñasihi yo cuvi, o yí ñu cuvi, tari chinyacuví suhva ñu cuan. Ta noo ri quivi chihí oco uñi mil ñu cha cuenda cha chinyacuví ñu cha quiti caa cuan. ⁹ Ta Sutu Mañi yo cama iñi ra, soco ña tahán chi nducú nyehe yo chi ra. Tari chinyacuví suhva ñu

cuan. Ta cachihj ñu cha tyaq coo chi ñu, cha cuenda cha cuñi ñu nducu nyehé ñu chi ra. ¹⁰ Ta ni ma cahan ña vaha ndo siqui Nyoo, tari cahan ña vaha suhva ñu cuan siqui ra. Ta saquichj ra ángel cuenda ra ta chahñi ra chi ñu.

¹¹ Tandihí ihya cuvj chi sutu chahnu yo cha chiyo ta cha naha. Ta chicunyaa chi nu libru Nyoo tari noo cuhva vatyí sacotó ra chi yo cha iyó yo ñayivi ihya vityín, nu cuahán sandihí chí. ¹² Ta tyicuan caa tatu tuví iñi maa ndo tyi vaha cuahán ndo chihin Nyoo, ñasaha ndo cuenda coto canacava ndo saha ra ña vaha. ¹³ Tindoho cha nyehé ndo, cuñi maa ndo tyi noo ri maa ndo nyehé tindoho cuan. Soco inuu ri nyehé tandihí ca ñu. Soco cuví cunyeé iñi ndo chí Nyoo, ta maa ra ma cuhva ra nyehé ndo tindoho cha ma cunyeé ca ndo. Soco tatu chaa tindoho chí ndo, tyicuan ta Nyoo cunducu ra cuhva cha quita ndo chichí tindoho cuan ta cuví cunyeé ndo.

¹⁴ Yucuan chaha yañi, ma sacahnu ndo chí xitohyo. ¹⁵ Cahín chihin ndo tari cahín chihin noo ra tyihí tuñi iñi. Yucuan chaha sgha ndo cuenda cha catyí chí ndo. Ta nyehé ndo tatu ndicha o ña ndicha tuhun cahín chihin ndo. ¹⁶ Quivi cha nicohón iñi yo tyi chihj ra Cristo nu cruzi, chihí yo vinu ta chachí yo pan. Ta vinu cuan cuñi chí catyí vatyí ñn ri cuví yo chihin ra Cristo cuenda ññi ra. Ta chachí yo pan ta cuñi chí catyí vatyí ñn ri cuví yo chihin ra cuenda coño ñuhu ra. ¹⁷ Vatyí vasi cuaaha yo, soco tandihí yo chachí yo noo ri pan. Ta yucuan chaha tandihí yo nduvi yo noo ri coño ñuhu ra.

¹⁸ ¿Atu nicohón iñi ndo yoso caa iyó ñu Israel? Chachí tucu maa ñu quiti cha chahá ñu chí Nyoo, ta cha cuenda cha nyacuví ñu cha tyicuan caa, ñn ri cuví ñu chihin cuan. ¹⁹ Ñima cha catyí chí ndo tyi vale xitohyo cha sacahnú ñu ña ñohó nuu chí Nyoo. Ña vale, ni ri coño cha chahá ñu chí xitohyo cuan ta ña vale. ²⁰ Soco catyí chí ndo vatyí ñu ña ñohó nuu chí Nyoo chahá ñu cha chahá ñu, soco chí ra ña vaha. Ta ñima chí Nyoo. Ta ña tahán chí cha ndu ñn ri ndo chihin ra ña vaha. ²¹ Vatyí ma cuví coho yo copa Nyoo ta suri cuhva cuan ta coho tucu yo copa ra ña vaha. Ta ma cuví cachi yo nu mesa Nyoo. Ta suri cuhva cuan cachi yo nu mesa ra ña vaha. ²² Ma cuhva yo tisihi chí Nyoo vatyí maa ra iyó ca fuerza chí ra ta ñima ca maa yo.

Sacuvi yo ñáa cha sacuvi yo, soco cha cuenda cha vaha chí tahan yo

²³ Catyí chí tuhun: “Cuví sacuvi yo ñáa cha cuñi yo. Soco ña tandihí ta cuví chí cha vaha chí yo.” Ta ndicha cuví sacuvi yo cha cuñi yo. Soco ña tandihí ta tyinyeé chí chí yo cha cuahnu yo chihin tuhun Nyoo. ²⁴ Ma

nanducu yo cha vaha chí maa ri maa yo, soco na nducu tucu yo cha vaha chí inga ñu.

²⁵ Cachi ndo ñáa coño cha xicó ñu nuyahví. Ta ma ndaca tuhun ndo ta ma ndichi xiñi ndo yóo chí cuenda cuví. ²⁶ Vatyí ñuhu ñayivi ta tandihí cha iyó nuu chí, chí maa Nyoo cuví.

²⁷ O tatu noo ñu ña chinó iñi chí Nyoo, catyí ñu chí ndo cha cucachi ndo vehe ñu, ta tatu cuñi ndo cuhun ndo, cuhun ndo ta cachi ndo tandihí cha chahá ñu cachi ndo. Ta ma ndaca tuhun ndo ñáa cuenda cuví. ²⁸ Soco tatu nya noo ñu catyí ñu chí ndo: “Nyayu ihya nyayu cha chahá cuenda ñu chí xitohyo cuví”, catyí ñu. Ma cachi ca ndo tacuhva cha ma nducuihya cuñi añima ñu cha catyí chí ndo tyicuan caa. ²⁹ Cahín tuhun ihya cuenda inga ñu ta ñima cuenda maa ndo.

Soco yihí ndo catyí ndo: “¿Ñáa tuhun cha sahá xaan ra ihya cuenda chí yuhu cha catyí inga ñayivi? ³⁰ Tatu nacuhvé tyahvi nyoo chí Nyoo cuhva cha cuacachi, ñáa tuhun catyí inga ra cuan tyi ña vaha cachi”, catyí ndo. ³¹ Cuacatyí chí ndo tyehe caa, tatu chachí ndo, o chíhi ndo, o sacuví ndo ñáa ca cha sacuví ndo, sacuví ndo soco chí maa Nyoo sacahnu ndo chihin cha sacuví ndo. ³² Ta ma cuhva ndo cuhva cha canacavá noo tahan ndo, ni ra Israel, ni ñayivi cha ñima ñu Israel cuví, ni ñu yihí cuenda Nyoo. ³³ Tari yuhu, nanduquí cha vaha cuví chí ñayivi. Ña nanduquí cha vaha chí mai, soco cha vaha chí inga ñayivi nanduquí. Vatyí tacuhva cacu añima ñu.

11

¹ Cuñi vatyí cunyicun ndo cuhva nyacuví. Tari mai nyiquén cuhva nyacuví ra Cristo.

Yoso caa coo ñusihí nu ndu ñn ri yo

² Yañi, sñ xaan cuñi vatyí tyicuan ri nicohón iñi ndo chí. Ta quichahá ndo cha sañahí chí ndo. ³ Soco cuñi tyi coto ndo vatyí ra Cristo cuví xiñi noo noo rayi, ta rayi cuví xiñi ñasihí ra, tari Nyoo cuví ra xiñi ra Cristo.

⁴ Tatu noo rayi, nyasí xiñi ra ta chicán tahví ra o cahán ra tuhun cha chahá Nyoo chí ra, ticahan nuu chahá ra chí ra cuví xiñi ra. ⁵ Soco tatu noo ñaha síhi ña chasí ña xiñi ña cuhva cha chicán tahví ña, o cuhva cha cahán ña tuhun cha chahá Nyoo chí ña, tari cha satya ndi xiñi ña cuví cuan. Ta ticahan nuu chahá ña chí ra cuví xiñi ña. ⁶ Tatu noo ñaha síhi ña chasí ña xiñi ña, vaha taxin ca nacahnya ña tandihí ixi xiñi ña. O tatu cahán nuu ña cha satya ndi ixi xiñi ña, nacasí ña xiñi ña. ⁷ Ña tahán chí casi rayi xiñi ra. Vatyí cuhva caá Nyoo caa ra, vatyí nyacá ñaha ra chí ñasihí ra, tari nyacá ñaha Nyoo chí ra. Soco noo ñaha síhi chahá ña cha cunyaca ñaha yíi ña chí ña. ⁸ Vatyí quivi savaha Nyoo

chi rayii, ña savaha ra chi ra chihin yiqui naha ñaha sihi. Soco chihin yiqui naha rayii savaha Nyoo chi ñaha sihi. ⁹ Ta cha catyi rayii, ta chinq ñaha sihi. ¹⁰ Yucuan chaha ñusihi cuñi chi cunyasi xiñi ñu. Vatyí ican cuan cuví noo seña vatyí nyacá ñaha yii ñu chi ñu. Ta cha cuenda cha vaha chi ángel cuví. ¹¹ Soco tyaá maa Nyoo cuhva vatyí chifñuhú rayii chi ñusihi. Ta chifñuhú ñusihi chi rayii. ¹² Vatyí ndicha ñaha sihi chinq ña chihin yiqui naha rayii, tari quivi cha sacacu ra chi ña cuví cuan. Soco nya cua nya quivi cuan ta maa ña quichaha sacacu ña chi rayii. Ta nya cua nya vityin ñusihi ta rayii maa Nyoo chaha cha coo ni nduvi tahan ñu.

¹³ Nyehé maa ndo. ¿Atu vaha quetuví cha ña nyasí xiñi ñusihi ta chicán tahvi ñu chichi vehe ñuhu? ¹⁴ Vatyí cha chitó ndo vatyí ticahan nuu cuví chi rayii tatu nañi xiñi ra. ¹⁵ Soco ñusihi, vaha cha cunañi xiñi ñu vatyí Nyoo chahá ra ixi nañi chi ñu vatyí casi chi xiñi ñu. ¹⁶ Soco tatu yóó cha cuñi cuví yuhu cha catyi tuhun ihya, cuñi chi coto ndo vatyí ni nyuhu ta ni vehe ñuhu Nyoo, ñahri inga costumbre iyó chi ndi.

Nu sañahá ra Pablo chi ñu vatyí ña vaha cuhva chachí ñu Santa Cena

¹⁷ Yañi, nonga tuhun cuacatyí chi ndo. Vatyí ña sii cuñi chihin ndo, vatyí ndu ñin ri ndo, soco ña chahá chi cha vaha chi ndo. Ta sativí chi chi ndo. ¹⁸ Ta cuaha xaan ñáyivi nacatyí chii vatyí cuhva cha ndu ñin ri ndo cha cuacoo culto, iyó ndo cha tavá siin ndo chi ndo. Ta suhva ri chinó iñi, ta suhva ña chinó tucu iñi. Soco vasí ndicha. ¹⁹ Vasí cuñi chi coo tisihi nu nyicú ndo tacuhva coto yo nya ndo ndicha cha yihí cuenda Nyoo. ²⁰ Soco tatu tyicuan caa iyó tisihi nu nyicú ndo, ñima Santa Cena chachí ndo cuví cuan. ²¹ Vatyí cuhva cha cuacachi ndo, chachí ri ndo cha nyisó ndo. Ta ña nyatú ndo nya ndu ñin ri tahan ndo. Ta yihí ndo cuaha chachí ndo. Ta chifñi ndo chihin vinu. Ta yihí ndo ña ñihí ndihi ndo cha cachi ndo. ²² ¿Atu ñahri vehe ndo cachi ndo ta coho ndo? Vatyí cha nyacuví ndo tyehe caa, ña cuñi nyehé ndo vehe ñuhu Nyoo cuví cuan. Ta chahá ndo ticahán nuu chi ñu ñahri maa iyó chi. ¿Atu tahán chi catyi chi ndo vatyí vaha cuhva nyacuví ndo, cuñi maa ndo? Ña tahán chi tyi ñahri noo cha cachi caa nyacuví ndo.

Ra Pablo chahá ra tuhun chi ñu, ñáá tuhun quehén ñu Santa Cena

(Mt. 26.26-29; Mr. 14.22-25; Lc. 22.14-20)

²³ Vatyí yuhu suri maa Sutu Mañi yo sañaha tuhun ihya chii. Ta suri maa tuhun ihya sañahi chi ndo. Cha cuaa cha ni cumañi ca cuhva cuenda ra Judas chi Sutu Mañi yo chi ra xaan iñi chi ra, ra Jesús quehen ra

noo pan. ²⁴ Ta cha yaha nacuhva ra tyahvi nyoo chi Nyoo ta tahvi sava ra. Ta catyi ra: “Çachi ndo. Vatyí tari coño ñuhu cuví pan ihya. Ta cha catyi ndo ta cucúvi yuhu. Sacuvi ndo tyehe caa vatyí nichon iñi ndo chii”, catyi ra Jesús. ²⁵ Ta cha yaha ca cacuxiñi ra ta quehen ra Jesús copa ta catyi ra: “Chihin copa vinu ihya natyihí tahan Nyoo tuhun chaa chihin ndo vityin. Vatyí vinu cha yihí chichi copa ihya, niñi cuví. Tahan ri cuacoho ndo, cõho ndo cha cuenda cha nichón iñi ndo chii”, catyi ra Jesús cha cuaa cuan. ²⁶ Ta tahan ri cha ndu ñin ri yo ta chachí yo pan ta chihí yo vinu sacotó yo chi ñáyivi vatyí cha catyi cuatyí yo chihí Sutu Mañi yo. Ta tyicuan caa sacotó yo chi ñáyivi nyacua nya quivi quichi tucu ra.

Ra Pablo chahá ra tuhun chi yo yoso caa sacotó yo Santa Cena

²⁷ Tatu chachí yo pan ta chihí yo vinu noo cuhvá cha ña chitahán iñi Nyoo, chicoó cuatyí yo. Vatyí ña sahá yo ñáyivi coño ñuhu ta niñi ra Cristo. ²⁸ Yucuan chaha cuñi chi sahá yo cuenda tatu vaha cuahán yo chihin Nyoo cha ni ri ca cha cumañi cachi yo pan ta coho yo vinu. ²⁹ Vatyí tatu chachí yo ta chihí yo chihin cha ña sahá yo cuenda ñáá tuhun chihí ra Cristo, Nyoo cutachi tuñi ra chi yo. ³⁰ Yucuan chaha cuaha xaan nyoho cuhví ndo, ta ñahri vaha fuerza ndo. Ta yihí ndo cha chihí ndo. ³¹ Soco tatu sahá vaha yo cuenda chi yo, Sutu Mañi yo ma tachi tuñi ra chi yo. ³² Soco tatu Sutu Mañi yo ta tachi tuñi ra chi yo tyicuan caa, vatyí tacuhva ma cunaa yo chihin ñáyivi iyó siqui ñuhu ñáyivi ihya.

³³ Ta tyicuan caa nyoho yañi, tatu cuando ñin ri ndo cha cuacoo Santa Cena, cuatu ndo chi noo noo tahan ndo ta çachi ndo ta cõho ndo ñin ri. ³⁴ Soco tatu nya noo nyoho chisocó ndo, cachi ndo nya vehe ndo tacuhva cha ma tachi tuñi Nyoo chi ndo.

Ta inga tuhun cusandaa mai quivi cha quichi nyehi nu nyicu ndo.

12

Cha vaha cha chahá Tatyí Ii Nyoo chi yo

¹ Yañi, cuñi vatyí coto ndo ñáá ndihi cha vaha cha chahá Tatyí Ii Nyoo chi noo noo yo.

² Chitó ndo vatyí quivi cha ña ñõho nuu ndo chi Nyoo, chaha ndo chi ndo cha cunyaca ñaha xitohyo cha ña cuví cahan.

³ Yucuan chaha cuñi tyi coto ndo vatyí tatu noo ra catyi tyi ña vaha ra Jesús, ñima Tatyí Ii Nyoo yihí chi ra. Soco tatu noo ra cha catyi tyi ra Cristo cuví Sutu Mañi yo, Tatyí Ii Nyoo yihí chi ra.

⁴ Siin siin cha vaha naquehén noo noo yo, soco maa Tatyí Ii Nyoo ican chahá. ⁵ Siin siin cuhva sahá tyiño yo soco tyiño nuu noo

ri maa Sutu Mañi yo sacuví yo. ⁶ Siin siin tunyee iñi chaha ra chi noo noo yo. Soco noo ri maa Nyoo cuví ra chotyíñó chí tandíhi yo. ⁷ Chi noo noo yo chaha ra tunyee iñi Tatyí li ra, tacuhva tyi tyinye yo chí tandíhi ñu yihí cuenda ra. ⁸ Chi suhva ñu chaha Tatyí li Nyoo vatyí cahán ñu chihin cha chíñi tuñi maa ra. Ta chí inga ñu chaha ra cha nacoto ñu ta cahan ñu tuhun cha sacotó Nyoo chí ñu. ⁹ Ta chí inga ñu chaha ra cha chinó vavaha iñi ñu chí ra. Ta suri maa Tatyí li ra chaha ra tunyee iñi chí inga ñu vatyí cuví sanduvaha ñu chí ñu cuhvi. ¹⁰ Ta chí inga ñu chaha ra tunyee iñi vatyí cuví sacuví ñu milagru. Ta inga ñu chaha cuenda ñu tuhun cahán Nyoo. Ta chí inga ñu chaha ra vatyí cuví cohon nuu ñu Tatyí li Nyoo ta tatyí ña vaha. Ta chí inga ñu chaha ra tunyee iñi ra vatyí cuví cahan ñu inga sahan cha ña chitó ñu. Ta chí inga ñu chaha ra tunyee iñi vatyí cuví nacoto ñu ta nacatyí ñu inga sahan cha cahán tahan ñu. ¹¹ Soco tandíhi tuhun ihya, noo ri maa Tatyí li Nyoo chaha. Soco siin siin cuhva chaha ra chí noo noo yo, yoso cuhva cuñí maa ra.

Chichi cha tandíhi yo ta nduví yo noo ri coño ñuhu ra Cristo

¹² Ra Cristo cuví ra tari noo coño ñuhu. Vatyí cuaha cha nyaá chí coño ñuhu. Nyaá xiñi. Nyaá ndaha. Nyaá chaha. Ta chí chichi cha tandíhi cuan nanduví chí noo ri coño ñuhu. ¹³ Ta tyicuan caa tucu tandíhi yo, an cuví yo ñu Israel, o ñu Grecia, o ñu iyó chitoho, o ñu yori chitoho, condutyá yo vatyí cuví yo noo ri coño ñuhu cuenda ra Cristo. Vatyí noo ri maa Tatyí li ra chaha ra tyi quíhi chí tandíhi yo.

¹⁴ Noo coño ñuhu cuaha xaan cuenda yihí tahan. Ñima minoo ri cuenda. ¹⁵ Tyehe ta cuví cahan chaha yo ta catyí chí: “Yuhu ñima coño ñuhu cuví vatyí ñima ndaha cuví.” Ñima vatyí catyí chí tyicuan caa ta ñima coño ñuhu cuví chí. ¹⁶ O tyehe ta cuví cahan soho yo ta catyí chí: “Yuhu ñima coño ñuhu cuví vatyí ñima chíti nuu cuví.” Ñima tyi catyí chí tyicuan caa ta cusandíhi chí cha cuví chí coño ñuhu. ¹⁷ Tyehe ta tandíhi coño ñuhu yo cuví chíti nuu yo, yoso caa cuví cuñi yo. O tyehe ta tandíhi coño ñuhu yo cuví soho yo, yoso caa cuví tahñi yo. ¹⁸ Soco Nyoo tyaa ra noo noo cuan nu cuñi maa ra. ¹⁹ Tatu iin cahnu ri caa coño ñuhu yo, ñima coño ñuhu cuví. Ta ña vaha quetuví. ²⁰ Soco vasi cuaha cha nyaá chí yo, vaha quetuví vatyí nyaá tandíhi cha cuví coño ñuhu chí yo.

²¹ Tyehe ta cuví cahan chíti nuu yo, ñahri ityi iyó chí chí cha catyí chí chí ndaha yo: “Ña chíñuhú yoho chíi.” Ta ni xiñi yo ta ñahri ityi iyó chí chí cha catyí chí chí chaha yo: “Ña chíñuhú yoho chíi.” ²² Ña vaha cha catyí

chi tyicuan caa. Vatyí vasi luhlu ri noo coño ñuhu yo cha cuñi maa yo tyi ña chíñuhú chí yo, ican cuan cuví cha chíñuhú ca chí yo. ²³ Ta nu cuñi vaha yo, ican cuan sacuihnó vaha ca yo. Ta nu cuñi maa yo tyi ña tyaqui, ican cuan sacuví ca yo. ²⁴ Ta nu tyaqui ca, ña cuñi chí sacuví yo. Soco maa Nyoo sandu iin ri ra coño ñuhu yo, tacuhva vatyí nu cuñi maa yo tyi ña tyaqui, sacahnú ca yo. ²⁵ Tacuhva cha ma cusíin coño ñuhu, tahan tahan chí cuñi chí quíhi iñi chí cha catyí inga tahan chí. ²⁶ Tatu suhva coño ñuhu yo nyehé chí tindoho, tandíhi ri chí nyehé, ñima noo ri chí. Ta tatu suhva chí cusíi cuñi chí, tandíhi ri chí ta cusíi cuñi chí, ñima noo ri chí.

²⁷ Ta maa yo cuví yo coño ñuhu ra Cristo. Ta suhva suhva coño ñuhu ra cuví noo noo yo. ²⁸ Ta Nyoo cuatyaa ra chí noo noo yo vehe ñuhu tacuhva tyinye yo chí tahan yo. Cha xihna ca cuatyaa ra chí ra apóstol. Cha cu uvi, chí ra profeta, o ra cachahá cuenda tuhun cahán Nyoo cuví cuan. Ta cha cu uñi, chí ra casañahá. Ta yaha cuan, ra cha casacuví milagru, ta ra cha casanduvahá chí ñu cuhvi, ta ra cha catyinye chí ñayivi, ta ra casahacuendá vehe ñuhu, ta ra cha cacahán inga sahan cha ña chitó ra. ²⁹ Ña tandíhi yo cuví yo apóstol. Ña tandíhi yo cuví yo noo profeta. Ña tandíhi yo cuví yo ra sañaha. Ña tandíhi yo sacuví yo milagru. ³⁰ Ña tandíhi yo chaha Nyoo vatyí sanduvahá yo ñu cuhvi. Ña tandíhi yo cahan yo inga sahan cha ña chitó yo. Ña tandíhi yo cuví nacoto yo ta nacatyí yo ñáá cha cuñi chí catyí noo cha cahán yo chihin inga sahan. ³¹ Ta ndücu ndo cuhva naquehen ndo cha vaha ca cha chaha Nyoo. Soco cuasañahi noo ityi cha vaha ca chí ndo.

13

Chahá ra Pablo tuhun chí yo yoso caa tahán chí cha cuñi yo chí ñayivi

¹ Tatu yuhu ta cuví cahan cuaha ri nuu sahan iyó siqui ñuhu ñayivi ihya, ta cuví cahan tíqui sahan ángel ñandíhi, soco tatu ñahri cha cuñi chí Nyoo ta chí ñayivi, cuví tari noo tambu cha nañi ri maa o noo caa cha chacú ndaxin ri maa. ² Tatu cuví cuhva cuende tuhun cahan Nyoo, o tatu cutuñi iñi tandíhi tuhun xehe ca, ta chíté tandíhi, ta ña cuñi chí Nyoo ta chí ñayivi, ñahri maa tuhun. Tatu chinó vavaha iñi chí Nyoo nyacua cuví catyí chí ra na tohon ra noo yucu cuan ta natyaa ra inga ityi, ta sacuví ra cha chíquén, soco tatu ña cuñi chí Nyoo ta chí ñayivi, ñahri ra cuví. ³ O tatu cuhve tandíhi cha iyó chí chí ñu ndahvi, ta nyacua cuhva cuende ñayivi tyi cayu coño ñuhi, soco tatu ña cuñi chí Nyoo ta chí ñayivi, ñahri maa tuhun.

⁴ Tatu cuñi yo chi Nyoo ta chi ñáyivi, ña ihñi tisihi yo. Vaha ñáyivi cuví yo. Ña nyiyó iñi yo cha chahá Nyoo chi inga ñu, ña cahnu sahá yo chi yo, ta ña yaá yo. ⁵ Tatu cuñi yo chi Nyoo ta chi ñáyivi, ña quiñi iyó yo. Ña nanducú yo maa ri cha vaha chi maa yo. Ña cuxaán yo. Ña ndoó tisihi añima yo. ⁶ Tatu cuñi yo chi Nyoo ta chi ñáyivi, ña cusii cuñi yo ñáá ndihi cha ña vaha sacuví ñáyivi. Soco cusii cuñi yo cuenda cha vaha ta cha ndicha. ⁷ Tatu cuñi yo chi Nyoo ta chi ñáyivi, cunyeé yo nyehé yo tindoho sahá ñáyivi. Chinó iñi yo tyi cusacuví ñu cha vaha. Nyatú yo cha nasama ñu cuhva iyó ñu. Chihin cha cama iñi yo ta cunyeé yo tandihi.

⁸ Cha cuñi yo chi Nyoo ta chi ñáyivi ma ndihi maa, soco coo quivi cha ma coo ca tuhun cha sahá yo profetizar. Ta ma cahán ca yo inga sahan cha ña chitó yo, ta tandihi tuhun cha chitó xaan yo cundihi. ⁹ Vityin chiin ri chitó yo ta chiin ri sahá yo profetizar. ¹⁰ Soco quivi quichi ra Cristo, cunduvaha tandihi ta cucoto yo tandihi, ta cundihi tuhun cha chitó yo chiin ri.

¹¹ Quivi cu luhlí cahin ta chica xiñi tari ra cuatyaa. Soco quivi chahnj sandoj cha nyacuvj tari ra cuatyaa. ¹² Ta tyicuan caa tucu, cuví yo tari ra cuatyaa vityin. Tari cha nyehé yo nu ino cha ña ndichin vaha. Soco quivi quichi ra Cristo ta cunyehe vaha yo chihin nuu yo chi ra. Chiin ri chitó yo cha vityin. Soco quivi cuan tandihi cuii ta cucoto yo, tari ñohó nuu Nyoo chi yo. ¹³ Iyó uñi tahan cha ma ndihi maa: cha chinó iñi yo chi Nyoo, cha cuatu yo cha ñihí yo cha cuenda ra Cristo, ta cha cuñi yo chi Nyoo ta chi ñáyivi. Soco chichi cha ninduñi tahan cuan, cha chiñuhú ca chi yo, cha cuñi yo chi Nyoo ta chi ñáyivi.

14

Nu sañahá ra Pablo yoso caa cahán yo inga sahan cha ña chitó yo

¹ Na sañihi yo cuñi yo chi Nyoo ta chi ñáyivi. Ta na nducu yo cuhva naquehen yo tunyee iñi cha chahá Tatyí Ii Nyoo chi yo. Na nducu xihna yo cha cuhva cuenda yo tuhun cahán Nyoo, o sahá yo profetizar cuví cuan. ² Vatyí tatu cahán yo inga sahan cha ña chitó yo, cahán yo soco chihin Nyoo. Ñima chihin ñáyivi. Vatyí ni noo ñu ta ña cutuñi iñi ñu. Vatyí tuhun xehe cuví tuhun cha cahán yo cha cuenda Tatyí Ii Nyoo. ³ Soco tatu sahá yo profetizar, cutuñi iñi ñu. Ta chahnu ca ñu chihin tuhun Nyoo. Ta tyicuan caa sanduní yo ta sandunyeé ca yo iñi ñáyivi. ⁴ Tatu cahán yo inga sahan cha ña chitó yo, maa ri maa yo ndunyeé yo. Soco tatu sahá yo profetizar, ndunyeé cuñi tandihi ñu yihí cuenda Nyoo.

⁵ Yuhu cuñi vatyí tandihi ndo cahán ndo inga sahan cha ña chitó ndo. Soco vaha ca cha saha ndo profetizar. Vatyí tyinyee ca chi chi ñu nyicú vehe ñuhu ta ñima ca cha cahán yo inga sahan. Soco tatu noo ndo cuví nacoto ndo ñáá tuhun cahán noo tahan ndo chihin inga sahan, ñacatyí ndo. Tyicuan ta cuví tyinyee chi chi tandihi ndo. ⁶ Yucuan chaha yañi, tatu yuhu ta chai nu nyicu ndo, ta cahín inga sahan, ña tyinyee chi chi ndo. Soco tatu cahín noo cha sanyehé Nyoo chii, o noo cha sacoto ra chii, o noo profesia, o noo cha sañahi chi ndo, tyinyee chi chi tandihi cuii maa ndo.

⁷ Tatu tiví yo noo cutu, o sacua cu yo noo guitarra ta ña quita vaha ndusu cuan sahá yo, ma coto yo ñáá yaa cuví. ⁸ Ta tatu nu iyó cuatyí ta ña tyacú vaha trompeta, yori coto ñáá cuhva tahán chi cañi tahan ra. ⁹ Ta tyicuan caa yoó, tatu cahán yo inga sahan cha ña cutuñi iñi ñáyivi, ma coto ñu ñáá tuhun cahán yo. Tari cha cuví yuhu ri maa yo cuví cuan. ¹⁰ Cuaha xaan nuu sahan iyó ñáyivi ihya. Ta noo noo nuu sahan ta iyó iyó ri cha cuñi chi catyí. ¹¹ Soco tatu ña cutuñi iñi sahan cha cahán inga ñáyivi chihin, ma cuví ndatuhin chihin ñu. Ta ni ri maa ñu ma cuví ndatuhun ñu chihin yuhu. Cuví ñu tari ñu inga ñuu cha cuende. ¹² Yucuan chaha nyoho cha cuñi xaan ndo naquehén ndo tunyee iñi cha chahá Tatyí Ii Nyoo, nducu ndo noo tunyee iñi cha vaha ca cutyinyee chi ñáyivi vehe ñuhu.

¹³ Yucuan chaha nyoho cha cahán ndo inga sahan, çacan ndo chi Nyoo vatyí cuví nacoto ndo ta nacatyí ndo chi tahan ndo. ¹⁴ Vatyí tatu nacuatí chi Nyoo chihin noo sahan cha ña cutuñi iñi, espíritu mai cha yihí chichi coño ñuhi ican nacua tu soco cha chiñi tuñi xiñi ña cutuñi iñi chi. ¹⁵ Yucuan chaha cuñi chi çacan tahvi chi Nyoo chihin inga sahan. Soco cuñi tucu chi cha çacan tahvi chi ra chihin sahan cha cutuñi iñi. Ta cuñi tucu chi cha cate chihin sahan cha ña cutuñi iñi, Soco cuñi tucu chi cha cate chihin sahan cha cutuñi iñi yo ñandihí. ¹⁶ Vatyí tatu maa maa ri chihin sahan cha chahá Tatyí Ii Nyoo chuun, sacahnún chi ra, ma cutuñi iñi ñáyivi cha ña chitó ñáá cha cuví cuan. Ta ma cuví sacahnu ñu Nyoo chuun. ¹⁷ Vasi vaha tuhun cahún, cuhva cha nacuhvón tyahvi nyoo chi Nyoo tyicuan caa, soco ña tyinyee chi chi inga ñáyivi vatyí ña cutuñi iñi ñu tuhun cahún. ¹⁸ Soco yuhu nacuhvé tyahvi nyoo chi Nyoo vatyí cuaha ca chaha cahin inga sahan ta ñima ca tandihi nyoho. ¹⁹ Soco chichi vehe ñuhu tahan ca iñi cahín vasi ohon tahan tuhun cha cutuñi iñi ndo vatyí sañahi chi inga ndo, ta ñima ca cha cahín uchi mil tuhun cha ña cutuñi iñi ndo.

²⁰ Chahnu cuhva çaca xiñi ndo, yañi. Ta

ma lee xaan cuhva caca xiñi ndo. Soco lee cuhva cunyacuvi ndo. Vatyi cha lee ña nyacuví chi cha quíñi caa. ²¹ Catyí Nyoo nu libru ley ra tyehe caa: “Cucahin chihin ñáyivi ihya chihin yuhu ñáyivi inga ñuu ta chihin inga sahan. Cha ña cutuñi iñi ñu. Soco ni ri tyicuan caa ta ma quichaha ñu chii”, catyí Sutu Mañi yo. ²² Yucuan chaha tuhun cha cahán yo inga sahan cuví chi tari noo seña chi ñu cha ña chino iñi tuhun ra Cristo. Soco tuhun cha sahá yo profetizar, cuví chi cuenda ñu cha chinó iñi chi ra. ²³ Vatyi tatu ndu iñi ri ndo, ta tandihí ndo cahán ndo inga sahan ta quihví noo ñu cha ña yihí cuenda Nyoo, cucatyí ñu tyi ña vaha cuñi xiñi ndo. ²⁴ Soco tatu tandihí ndo sahá ndo profetizar, ta quihví noo ñu cha ña yihí cuenda Nyoo, o noo ñu ña cutuñi vaha iñi tuhun Nyoo, coto ñu tyi iyó cuatyí ñu cha cuenda tyi cutuñi iñi ñu cha cahán ndo. ²⁵ Ta tandihí cha caa chichi añima ñu cunacoto ñu. Ta nicuñi chiti ñu ta sacahnu ñu chi Nyoo. Ta catyi ñu vatyi ndicha ndicha cuii cha nyaá Nyoo chihin ndo.

Yoso caa saccoó yo culto minoo cha cachi minoo cha ndaa

²⁶ Yucuan chaha yañi, tatu cuandu iñi ri yo, cuiso noo noo yo yaa cha cata yo, o cha sañaha yo, o ñáa cha sanyehe o sacoto Nyoo chi yo, o cahan yo inga sahan, o cha nacoto yo ta nacatyí yo yoso caa cuahán tuhun inga sahan cuan. Soco tandihí ihya nacuvi chi noo cha chahá tunyee iñi maa Nyoo chi tandihí yo cha yihí yo cuenda ra. ²⁷ Tatu cuacahan yo inga sahan nu ndu iñi ri yo, cuñi chi cahan uvi yo o uñi ri yo, soco noo noo ri yo cahan. Ma cahan yo iñi ri. Ta siin ri cuñi chi cha nacatyí noo yo tuhun cahán tahan yo. ²⁸ Soco tatu yori cuví nacatyí ñáa tuhun cahán yo, vaha taxin ca ma cahan ca yo chihin inga sahan nu ndu iñi ri yo. Cahán yo inga sahan soco xehe ri chihin Nyoo tacuhva cuiñi ri maa yo. ²⁹ Tyicuan caa tucu tatu sahá yo profetizar, cahan uvi yo, o uñi ri yo. Ta tandihí ca yo sáha yo cuenda tatu vaha cha cahán tahan yo. ³⁰ Soco tatu sacoto Nyoo ñáa noo ca tuhun chi inga ñu cha canyicú chiñi tuhun cuan. Tyicuan ta ñu cha xihna ri, cuñi chi sandihí ñu cha cahán ñu tacuhva cuví cahan inga ñu cuan. ³¹ Ta tyicuan caa tandihí ndo cha naquehén ndo tuhun cha chahá Nyoo chi ndo cuví nacatyí noo noo ndo. Vatyi tacuhva cutuhva tandihí ca ndo ta cumi ca iñi ndo. ³² Ñu cha sahá profetizar cuví cuatu noo ñu nya ndihí cahán inga ñu. Vatyi noo ri Nyoo cuví ra cha nyacá ñaha chi noo noo yo. ³³ Vatyi Nyoo cachi iyó ra ta ña iñi ndaa iñi noo nyacuví ra.

Quehen ndo cuhva vaha nyacuví inga hermano nu ca ndu iñi ri ra. ³⁴ Ñusihí taxi ri na coo ñu. Cuñi chi quichaha ñu chi yii ñu tari catyí ley Nyoo. ³⁵ Tatu ñáa cha cuñi ñu coto ñu, na ndaca tuhun ñu chi yii ñu nya vehe ñu. Vatyi ña vaha quetuví cha cahán ñusihí nu ndu iñi ri yo.

³⁶ Tatu siin cuhva chicá xiñi ndo, cuñi chi nicohón iñi ndo vatyi ñima chihin ndo quichaha tuhun Nyoo. Ta ñima nyoho ri naquehén tuhun Nyoo. ³⁷ Tatu nya noo ndo cuñi maa ndo vatyi profeta cuví ndo, o tatu cuñi maa ndo tyi Tatyi li saquehén ityi ra chi ndo, cunacoto ndo vatyi cha catyí chi ndo ihya, mandamiento Sutu Mañi yo cuví. ³⁸ Soco tatu ña cuñi ndo naquehén ndo tuhun ihya, ni nyuhu ta ma naquehen ndi tuhun cahán ndo.

³⁹ Ta tyicuan caa yañi, na nducu ndo cuhva saha ndo profetizar. Ta ma casi ndo cha cahán ñu inga sahan. ⁴⁰ Soco saccoó yo tandihí chihin cha ndaa ta chihin cha cachi.

15

Yoso caa nandoto ra Cristo

¹ Vityin yañi, cuñi vatyi nicohon iñi ndo tuhun ra Cristo, cha sacacú chi yo, cha cahin nuu ndo quivi cuan. Ta ican naquehen ndo ta nii iñi ndo chinó iñi ndo. ² Ta suri cha cuenda tuhun ra Cristo cacú añima ndo tatu cuahán ndo tari cuhva sañahí chi ndo. Soco tatu natyihí caxiin ndo cuahan ndo, ñahri maa tuhun cha chingó iñi ndo chi Nyoo.

³ Cha xihna ri sacoté tuhun cha cutuhve chi ndo. Ta sañahí chi ndo vatyi ra Cristo chihí ra cha catyí cuatyí yo, tari catyí nu libru Nyoo vatyi cucuvi. ⁴ Tyicuan ta chicuchí ñu chi ra. Soco nu ndu uñi quivi nandoto ra tari catyí tucu nu libru Nyoo. ⁵ Tyicuan ta tuví ra Cristo nuu ra Pedro ta yaha cuan ta nuu ndi uchi uvi tahan ra chicá tyiño ra. ⁶ Yaha cuan ta noo chaha tuví ra nuu yaha ca ohon cientu yañi yo. Ta cuaha ca ñu cuan iyó ca ñu vityin. Soco suhva ñu cha yaha chihí ñu. ⁷ Yaha cuan ta tuví ra nuu ra Jacobo. Yaha cuan ta nuu tandihí ra apóstol.

⁸ Ta nu ndihí tuví tucu ra nuu yuhu, cha cuví tari noo ra cuatyaa cha cacu ta ta chaa ca yoo cacu. (Vatyi ta cutuñi ca iñi tuhun Nyoo cuví cuan.) ⁹ Vatyi cha nuu tandihí ca ra apóstol cuví yuhu noo cha ñima ri tuhun. Ta ni ña ñañé cha cuví apóstol vatyi chica nyicon xain chi ñu ñohó cuenda Nyoo. ¹⁰ Soco Nyoo vaha xaan ñáyivi cuví ra chihin. Ta ñima cha caha ri saha ra tumañi iñi chii cha cuví noo ra chicá tyiño ra. Ta ñihi ca sahá tyiñe ican saha inga ra. Soco ñima mai sahá tyiñe vatyi maa Nyoo nyaá chihin. Ta ican ra saccoó tandihí cuan. ¹¹ Soco ñahri saha, an yuhu, an inga ra cuan. Soco tuhun cahán

ndi chihin ndo, ican ihya cuvi tuhun cha chinó ifi ndo.

Nu sañahá ra Pablo vatyi cha ndicha cuvi vatyi cunandoto ñu ndiyi:

¹² Tatu cahán ndi tuhun cha nandoto ra Cristo mahñu ñu ndiyi chihin ndo, ¿ñáá tuhun cha yihí ndo catyí ndo vatyi ma nandoto ñu ndiyi? ¹³ Vatyi tatu ma nandoto ñu ndiyi, ni ri ra Cristo ta ña nandoto ra cuví cuan. ¹⁴ Tyehe ta ña nandoto ra Cristo, tuhun cha cahán ndi chihin ndo ñahri maa vale. Ta ni ri cha chinó ifi ndo, ñahri maa tuhun. ¹⁵ Tatu tyehe ta ña ndicha cha sanandoto Nyoo chi ra Cristo, cuví ndi noo ra cuendu tyi catyí ndi vatyi sanandoto Nyoo chi ra. Ta tatu ña ndicha cha nandoto ñu ndiyi, ña ndicha cha sanandoto Nyoo chi ra Cristo. ¹⁶ Vatyi tyehe ta ma nandoto ñu ndiyi, ni ri ra Cristo ta ña nandoto ra. ¹⁷ Ta tatu ña nandoto ra Cristo, ñahri maa tuhun cha chinó ifi ndo cha sandachi ra cuatyí ndo. Ta tacuhva iyó ri maa cuatyí ndo. ¹⁸ Ta ñu yihí cuenda ra ta cachihí ñu, cuanaa ri maa ñu cuví cuan. ¹⁹ O tyehe ta ihya ri ñayiví tyinyeé ra Cristo chí yo, ta ma nandoto yo quiví quichi ra, cuví yo noo ñu tondo cha nuu tandihí ca ñayiví.

²⁰ Soco chitó vaha yo vatyi cha ndicha cuví cha nandoto ra Cristo. Ta ican ra cuví cha nandoto xihna ca mahñu ñu ndiyi. ²¹ Vatyi cha catyí cuatyí ra Adán ta chicoó tuhun chihí. Yucuan chaha tahán chí cúvi yo. Soco cha catyí cha nandoto ra Cristo tahán chí nandoto tucu ñu yihí cuenda ra. ²² Ta tari tandihí ñayiví chihí cha cuenda ra Adán, tyicuan caa tucu cunandoto tandihí ñu cuenda ra Cristo. ²³ Soco noo noo yo cunandoto yo quiví tahan chí chí yo. Xihna chí ra Cristo nandoto. Yaha cuan ta quiví quichi tucu ra inga chaha cunandoto tucu ñu yihí cuenda ra. ²⁴ Yaha cuan ta cundihí tuhun ñuhu ñayiví ihya ta ma cunyaca ñaha ca ra cuví tyiño nahnú, ta tatyí ña vaha. Vatyi ra Cristo cuatinyaa ra fuerza chí ra cuan. Ta cunacuhva cuenda ra chí Nyoo Sutu ra. ²⁵ Vatyi ra Cristo cunyaca ñaha ra nyacua nya quiví cuhva Nyoo cha cuví chasaha ra chí tandihí ra xaan ifi chí ra. ²⁶ Ta nya nu ndihí, cusanaa ra tuhun chihí. ²⁷ Vatyi cha yaha nacuhvá cuenda Nyoo tandihí chí ra Cristo vatyi cunyaca ñaha ra. Soco nu catyí chí vatyi tandihí natyaa Nyoo ndaha ra, cuví chí catyí vatyi ma cunyaca ñaha ra chí maa Nyoo vatyi ican maa Nyoo natyaa tandihí cuan ndaha ra. ²⁸ Soco quiví saha ganaa ra Cristo tandihí, tyicuan ta maa ra cha cuví ra Sehe Nyoo, cunacuhva cuenda ra tandihí chí Nyoo Sutu ra. Vatyi Nyoo cucuvi ra Nyoo cuenda tandihí maa cha iyó.

²⁹ Tatu tyehe ta ña nandoto ñu chihí, ¿ñáá tuhun yihí ñu condutyá ñu tyiño nuu ñu chihí?

³⁰ Ta tyicuan caa tucu mai, tatu ma nandote, ¿ñáá tuhun ndoí vaha cha ndi quiví nyati tuhun chihí? ³¹ Tandihí quiví nyati tuhun chihí. Soco ñahri caa vatyi síí cuví chihin ndo. Vatyi chinó ifi ndo chí Sutu Mañi yo Jesucristo. ³² Ñáá ri tuhun nyehí tindoho ñuu Éfeso tatu tyehe ta ma nandoto ca yo. Vaha taxin ca sacuvi yo tari catyí ñayiví: “Na cachi yo, na coho yo vatyi tyaan isa cúvi yo”, catyí maa ñayiví cha ña chitó.

³³ Ma cuhva ndo cha sandavi ñaha ñu chí ndo. Vatyi iyó tucu tuhun cha catyí: “Tatu ñu tahan yo quiñi iyó ñu, cuví sativí ñu cuhva vaha cuahan yo.” ³⁴ Saha ndo cuenda cuhva iyó ndo. Ta ma sacuvi ca ndo cha quiñi caa. Vatyi chihin cuhva iyó suhva ndo chité tyi ña ñohó nuu ndo chí Nyoo. Catyí chí ndo tyehe caa vatyi nacoo ticahan nuu nuu ndo.

Nu sañahá ra Pablo yoso caa cusanan-doto Nyoo chí yo quiví quichi ra Cristo

³⁵ Soco yihí ndo ndacá tuhun ndo: “¿Yoso caa cunandoto ñu chihí? ¿Ñáá coño ñuhu cucuiso ñu?” ³⁶ ¡Tondo xaan xiñi ndo! ¡Atu ña chitó ndo vatyi tatu tachí yo noo chíti yutun, cuví chí cha tyahyu soo chíti cuan? Tyicuan ta cañá noo yutun. (Chihí chíti cuan tacuhva na coo yutun cuan ñayiví.) ³⁷ Vatyi cha tachí yo ñima maa tun tachí yo. Soco chíti tun, an cuví ri nuñi, o trigo, o ñáá ndihí ca chíti. ³⁸ Ta cha cañá cuan Nyoo sacuvi ra yoso cuhva cuví maa ra chí noo noo cha cañá cuan. Vatyi siñ siñ cuhva caa noo noo nuu chíti. ³⁹ Ta tyicuan caa tucu tandihí coño ñuhu, ña ñn ri caá chí. Siñ caa coño ñuhu ñayiví. Siñ caa coño ñuhu cuiñi. Siñ caa coño ñuhu saa. Siñ caa coño ñuhu tiyaca. ⁴⁰ Ta tyicuan caa tucu cha iyó andiví. Siñ caa cha iyó yucuan. Ta siñ caa tucu cha iyó ñuhu ñayiví ihya. Ta cha iyó nya andiví tyaquí xaan, ta cha iyó siquí ñuhu ñayiví tyaquí tucu cuan soco siñ caa. ⁴¹ Cha ndichin ñanyii, ña inuu ri chihin cha ndichin yoo. Ta ña inuu ri chihin cha ndichin tiño. Ta tiño ña inuu ri chihin inga tucu tiño. ⁴² Ta tyicuan caa tucu tuhun cha nandoto yo. Vatyi chicuchi yo noo coño ñuhu yo cha tuhva tyahyu. Ta cunandoto yo soco chihin noo cha ma cúvi ca maa. ⁴³ Chicuchi yo noo cha numi ri tyahyu. Soco cunandoto noo cha tyaquí. Tyihí yo noo coño ñuhu pehe chihí ñuhú. Ta cunandoto noo cha nyee. ⁴⁴ Vatyi chicuchi yo coño ñuhu yo cuenda ñayiví ihya chíti ñuhu. Ta cunandoto noo cha ñima ca cuenda ñayiví ihya cuví, soco cuenda Nyoo andiví. Tatu iyó coño ñuhu yo ñayiví ihya. Suri coo

tucu noo cha ñima ca cuenda ñuhu ñayiví, soco cuenda andívi.

⁴⁵ Catyí tuhun Nyoo vatyi ra Adán ra cha chiyó cha xihna ri, chahá Nyoo ñayiví coo ra. Soco ra Adán cu uvi, ra cuví Cristo, cuví ra Tatyí li ta chahá ra noo ñayiví cha ma naa ca maa chi yo. ⁴⁶ Yucuan chaha, cha xihna ri tahán chí coo yo chihin coño ñuhu cuatyí yo. Ta yaha cuan ta coo yo cuenda Tatyí li Nyoo. ⁴⁷ Rayíi cha chingó cha xihna ri, chihin ñuhú chingó ra. Ra cuenda ñuhu ñayiví cuví ra. Ta rayíi cu uvi cha cuví Sutu Mañi yo, ra cuenda andívi cuví ra. ⁴⁸ Tandihí yo nyisó yo coño ñuhu cha chingó chihin ñuhú, tari coño ñuhu ra Adán. Ta cha cucuiso yo andívi cuví chí tari nyisó ra Cristo ra quichí nya andívi. ⁴⁹ Tari ndacú yo chí rayíi, ra cha chingó chihin ñuhú, tyicuan caa tucu cundacu yo chí ra Cristo ra quichi nya andívi.

⁵⁰ Ta cuñí catyí chí ndo yañi, vatyi coño ñuhu yo ma cuví quihví chí andívi nu nyacá ñaha Nyoo. Noo cha tañi tyehé ri tiví ma cuví quihví noo nu ña tiví. ⁵¹ Soco cuñí tyi coto ndo noo tuhun xehe cha yori maa chitó. Vatyi ña tandihí yo cucúvi yo. Soco tandihí yo ta cunasama cuhva caa yo. ⁵² Ta ñin yaha cuí ri, tari noo cha ndahvá nuu ri yo, nu ndihí tiví ángel trompeta. Vatyi cutiví ángel trompeta ta ñu ndiyí cunandoto ñu cha ma cuví ca maa ñu. Ta Nyoo cunasama cuhva caa ñu. ⁵³ Vatyi cuñí chí tyi nasama Nyoo coño ñuhu yo chihin noo cha ma naa ca maa. ⁵⁴ Ta quiví cuan nasama coño ñuhu yo ta quehen yo cha ma tiví maa. Cua cuví tari catyí nu libru Nyoo tyehé caa:

“Nyoo cuví chasaha ra chí tuhun chihí.”

⁵⁵ Yoho, Tuhun Chihí, ¿Nya nyaa tunyee iñi chuun vityin vatyi cahñun chí ndi?

¿Nya nyaa cha cua saha ganaun vityin, yoho Tuhun Chihí?

⁵⁶ Vatyi cuatyí yo ican chahá cha cahñi tuhun chihí chí yo. Ta ley chahnu, ican cuví cha chahá fuerza chí chí. ⁵⁷ Soco tyahví nyoo chí Nyoo, yañi. Vatyi sahá ganaa yo siqui cuan cha catyí Sutu Mañi yo Jesucristo.

⁵⁸ Yucuan chaha yañi, na cuninyaa yo chihin Nyoo chihin cha ñi iñi yo. Tyicuan ri na saha tyiño yo nu tyiño Sutu Mañi yo. Vatyi tyiño sahá yo chihin Sutu Mañi yo, ñima cha sahá tyiño caha ri maa yo cuví.

16

Chahá ra Pablo tuhun chí ñu Corinto yoso caa tyinyee ñu chí tahan ñu cuenda Nyoo

¹ Ta tuhun cha tyinyee ndo xuhun chí ñu ndahvi, ñu yihí cuenda Nyoo. Cunyacuví ndo tari catyí chí ñu nyicú tandihí vehe ñuhu ityi Galacia. ² Ma cuatu ndo nya quichi ta cuhva ndo xuhun. Soco tahan tahan nu ndihí vitya ri ta tyihí ñin ndo cha tahán chí cuhva ndo chí ñu, yoso cuhva cha chahá

Nyoo chí ndo. ³ Ta quiví cha quichi, cutachi nya ra cha cuñí maa ndo vatyi cunyaca ra xuhun cuan chihin carta chí tahan yo cha canyicú nya Jerusalén. ⁴ Ta tatu tahan tucu chí cuhin, cuhun coyo ra chihin.

Yihí iñi ra Pablo nya ndihí nu cucahan ra tuhun ra Cristo

⁵ Cuhin nu nyicu ndo Corinto chiña, soco cuhun xihne ityi Macedonia. Vatyi ityi cuan cuyahí. ⁶ Ta tatu chahá chí cuhva cundoi chihin ndo nyacua nya yahá yoo vichin. Tyicuan ta cuví tyinyee ndo chiin chíi ta cuhin inga ñuu. ⁷ Ña cuñí cha ñin yaha ri yahi nu nyicu ndo. Vatyi cuñí ndoi suhva quiví chihin ndo tatu Sutu Mañi yo ta cuñí ra. ⁸ Soco cunyai ñuu Éfeso ihya, nyacua nya yaha quiví cha sanducahnú ñu Israel vico Pentecostés. Tyicuan ta quichi nu nyicu ndo. ⁹ Cundoi suhva ihya vatyi vasí cuaha xaan ñayiví ña cuñí nyehe ñu tuhun Nyoo, soco chahá xaan chí cuhva cahín tuhun Nyoo chihin ñayiví ñuu ihya.

¹⁰ Tatu chaa ra Timoteo, na cunyaa ra chihin ndo. Ta vaha tyiñuhu ndo chí ra. Vatyi sahá tyiño tucu maa ra cuenda Sutu Mañi yo tari mai. ¹¹ Ta vaha cgo iñi ndo nyehé ndo chí ra. Ta tyinyee ndo chiin chí ra tyi quichi ra nu nyai. Vatyi nyatí chí ra chihin inga yañi yo.

¹² Ta yañi yo, ra Apolos, chacu ndahvi xain nuu ra nacuhun ra chihin inga yañi yo nu nyicu ndo. Soco ña cuñí ra. Soco cuhun maa ra nacuhva chí cuhva chí ra, na.

Chahá ra Pablo nocumi chí tandihí ñu yihí cuenda Nyoo ñuu Corinto

¹³ Sañihí ndo chinó ca iñi ndo chí Nyoo. Ta cuníi iñi ndo ta nacoo vaha fuerza Nyoo chí ndo. ¹⁴ Tandihí cha sacuví ndo, sacuví ndo cha cuenda cha cuñí ndo chí Nyoo ta chí tahan ndo.

¹⁵ Chitó ndo yañi vatyi ñayiví chí ra Estéfanos xihna ca ñu chinó iñi tuhun ra Cristo ityi Acaya chiña. Ta vityin sacuví ñu tyiño nuu ra hermano. ¹⁶ Ta catyí chí ndo vatyi saha ndo ñayiví chí ñu cha iyó tari iyó ñu chiña, ta chí tandihí ñu cha tyinyee ta sahá tyiño cuenda Nyoo. ¹⁷ Ta cusii xaan cuñi cha quichí coyo ra Estéfanos ta ra Fortunato ta ra Acaico. Vatyi maa ra catyinyee ra chí ndi. Vatyi tandihí ndo ña cuví quichi ndo vatyi cañi xaan ñuu ndo. ¹⁸ Soco maa ra quichí coyo ra. Ta sandunyeé ca ra iñi chihin tuhun Nyoo. Tari sanduní ra iñi nyoho ñandihí. Ta vaha cgo iñi ndo nyehé ndo tyiño casacuví ra. Vatyi maa ra ñin ri chí Nyoo canyicón ra.

¹⁹ Ta vachí nocumi chí ndo sahá tandihí yañi yo ta tahan yo cha ndu ñin ri ityi Asia ihya. Ta vachi tucu nocumi chí ndo sahá ra Aquila ta cu Priscila, ta ñu yihí cuenda Nyoo

cha ndu #n ri vehe ñuhu nu cuví vehe ñu.
²⁰ Vachi nocumi chi ndo sahá tandihí yañi
yo, ta ñacuhva maa ndo nocumi chi noo noo
ndo nu nyicú ndo chiña.

²¹ Nocumi cha vachí chi ndo ihya, yuhu ra
Pablo tyaj chihin ndahi.

²² Tatu nya ñáyivi ña cuñí chi Sutu Mañi yo
Jesucristo, nacuhun ñu anyaya. Soco yuhu
catyí: ¡Sutu Mañi yuhu, ñaha!

²³ Ta nasoco Sutu Mañi yo Jesucristo chi
tandihí ndo. ²⁴ Ta catyí chi ndo vatyi yuhu
cuñí chi tandihí ndo cha cuenda ra Cristo
Jesús. Ta nacuví chi tyicuan caa.

Carta Cha Cu Uvi Sacuhun Ra Apóstol Pablo Chi Ñáyivi Ñuu Corinto Cha Yihí Cuenda Nyoo

Nu sacuhun ra Pablo noo tutu chi ñu ñuu Corinto cha yihí cuenda Nyoo

¹ Yuhu ra Pablo, cuví noo ra apóstol ra Jesucristo vatyi Nyoo nacachí vaha ra chii. Ta yuhu ta ra Timoteo yañi yo tyaá ndi noo tutu ihya chí ndo cha cuví ndo ñáyivi ñuu Corinto cha yihí cuenda Nyoo, ta chí tandihí ñu yihí cuenda Nyoo nicacahnu ityi Acaya chiña. ² Nyoo Sutu yo ta Sutu Mañi yo Jesucristo na nasoco ra chí ndo ta nacuhva ra cha taxi ri coo añima ndo.

Nu chicá noo ra Pablo sacotó ra tuhun ra Cristo nyehé xaan ra tindoho

³ Na sacahnu yo chí Nyoo Sutu Sutu Mañi yo Jesucristo. Vatyi ican ra cuví Nyoo Sutu yo. Ta cundahvi xaan cuñi ra nyehé ra chí yo. Ta maa ra tyicuan ri naquehén ndahvi ra chí yo. ⁴ Ta cuhva cha nyehé yo tindoho maa ra naquehén ndahvi ra chí yo. Vatyi tyicuan caa ta cuví naquehen ndahvi tucu maa yo chí ñu nyehé tindoho tari naquehén ndahvi tucu maa ra chí yo. ⁵ Vatyi cha cuenda ra Cristo, nyehé xaan ndi tindoho ta suri cha cuenda ra Cristo naquehén ndahvi xaan Nyoo chí ndi. ⁶ Tatu nyehé ndi tindoho cha cuenda cha sacotó ndi tuhun ra Cristo chí ndo, soco cha cuenda cha vaha chí ndo cuví vatyi tyicuan ta Nyoo naquehen ndahvi tucu ra chí ndo, ta sacacu ra chí ndo. Ta tatu Nyoo ta sandunyeé ra iñi ndi, cuví tucu chí cha cuenda cha sandunyeé tucu ra iñi maa ndo ta cacu ndo, ta sñn ri tacuhva cha cunyeé ndo tindoho cha nyehé ndo. Vatyi iin ri tindoho nyehé yo. ⁷ Vatyi chitó vaha ndi tatu nyehé ndo tindoho cha cuenda ra Cristo tari cha nyehé nyuhu, maa ra cunaquehen ndahvi ra chí ndo, tari naquehén ndahvi tucu ra chí nyuhu.

⁸ Yañi, cuñi ndi tyi coto ndo vatyi cuaha xaan tindoho nyehé ndi ta chinyaa ndi ityi Asia. Ñihi xaan chiyo tindoho nyacua cha ñahri ca fuerza ndi cahví iñi ndi. Ta tyaá ndi cuhva vatyi cha yahá chihí ndi ta quita ndi yucuan. ⁹ Cuñi maa ndi vatyi cha cha cuacúvi ndi. Ta ña cuví sacacu ndi chí ndi. Soco yucuan sañaha chí chí ndi na nachinó ca iñi ndi chí Nyoo ra sanandotó ndiyi. ¹⁰ Nyoo sacacú ra chí ndi ndaha tuhun chihi quivi cuan, ta sacacú ca ra chí ndi nya vityin. Ta chitó ndi vatyi tyicuan ri cusacacu maa ra chí ndi. ¹¹ Tatu tyinyeé ndo chí ndi chihin cha chicán tahvi ndo chaha

ndi, ta tatu cuaha ñáyivi chicán tahvi chaha ndi, cunacuhva ñu tyahvi nyoo chí Nyoo cha cuenda tyi ñihí ñu tuhun tyi Nyoo chahá ra cha vaha chí ndi, vatyi chicán tahvi ñu chaha ndi.

Nu nacatyi ra Pablo ñáá tuhun ña chaa ñaha ra ñuu Corinto

¹² Iyó noo tuhun cha cusii xaan cuñi ndi, vatyi yoso ri sandaví ñaha ndi. Vatyi cachi cuhva iyó ndi. Ta ndaa cuhva iyó ndi xihna ca chihin tandihí ri ndo, ta chihin inga ñáyivi ñandihí. Ta ñima chihin cha chiñi tuñi maa ndi iyó ndi tyehe caa, soco cha cuenda tyi tyinyeé xaan maa Nyoo chí ndi. ¹³⁻¹⁴ Ta nu tutu cha sacuhun ndi chí ndo, maa maa ri tuhun cha cuví sacuahá ndo, ta cha cuví cutuñi iñi ndo, tyaá ndi. Vityin cuahán cutuñi iñi ndo suhva. Ta ntyatí ndi na cutuñi vaha ca iñi ndo tandihí tuhun cuan. Tacuhva cusii cuñi ndo chihin ndi quivi quichi Sutu Mañi yo. Ta cusii cuñi tucu maa ndi chihin ndo.

¹⁵⁻¹⁶ Ta cha cuenda cha cusii iñi yo tyehe caa, tyaí cuhva quivi cuan cha cuhun xihne nu nyicú ndo. Yihí iñi cha cuhin nu nyicú ndo, quivi cha yahí cha cuahñ nya Macedonia ihya. Ta quivi cha nayaha tíqui cha chahñ Macedonia, cuhin inga chaha nu nyicú ndo. Tyicuan caa ta cuví cusii iñi ndo chihin yuhu uvi chaha, tyaí cuhva. Ta tyicuan caa ta cuví tyinyeé ca ndo chíi ta cuhin ityi Judea. ¹⁷ O cuñi maa ndo vatyi ña tyaí cuhva cha cuhin nu nyicu ndo. Ta vasi cuñi maa ndo vatyi sacuví tari ñáyivi iyó siqui ñuhu ñáyivi ihya. Vatyi catyi ñu tyi cuhun ñu, ta ña sacuví ñu. ¹⁸ Maa Nyoo chitó ra vatyi ndicha cha cahñ. Ta ña tuhvé sandaví ñahi. ¹⁹ Vatyi yuhu ta ra Silvano ta ra Timoteo cahán ndi chihin ndo. Vatyi tuhun maa ra Cristo maa maa ri tuhun ndicha cuví. ²⁰ Tyi cha cuenda maa ra ñihí yo tandihí cha vaha cha catyi Nyoo tyi cucuhva ra chí yo. Yucuan chaha cuhva cha sacahnú yo chí Nyoo, o chicán tahvi yo chí ra, catyi yo: “Amén”. Vatyi chitó yo tyi cuacuhva ra cha vaha chí yo cha cuenda ra Cristo. ²¹ Ta Nyoo sanduní ca ra iñi yo nu sandu iin ri ra chí yo chihin ra Cristo. Ta nacachí ra chí yo. ²² Ta tari cha tyaá ra tuñi ra chí yo cuví cuan. Vatyi chahá ra Tatyí li ra quihí añima yo cha cuenda cha cuñihi ca yo ñáá ca cha cucuhva ra chí yo.

²³ Na naquehen Nyoo chii vityin ri tatu ña ndicha tuhun cua catyi chí ndo. Ta cuhun que nu nyicú ndo Corinto chiña vatyi tatu cuhin tyaí cuhva cha cahin chiin chí ndo. Yucuan chaha ña cuñi ñahi cuhin vatyi nacuaan iñi nyehí chí ndo. Ta Nyoo chiñi ra vatyi ndicha cha cahñ. ²⁴ Ñima cha cuñi ndi cunyaca ñaha ndi chí ndo yoso cuhva chinó iñi ndo chí Nyoo. Vatyi chinó vaha iñi ndo.

Soco cha cuñí ndi tyinyeé ca ndi chi ndo na coo ca tusii ñi maa Nyoo añima ndo.

2

¹ Yucuan chaha ña cuñí quichi tiqui nu nyicu ndo coto cuhva que tucuihya ñi chi ndo. ² Vatyí tatu yuhu ta sanducuihyé ñi ndo, yori ca cuví sandusii ñi mai. Vatyí ma cuví ca sandusii ndo ñi tatu cha yahá sanducuihyé ñi ndo. ³ Yucuan chaha sacuhñin tuhun cuan chi ndo. Vatyí tatu cuhin socio ma sanducuihya ndo ñi chihin cuhva iyó ndo. Vatyí tahán chi sandusii ndo ñi. Ta tatu sii cuñí yuhu, chité tyi tandihí yo ta cusii ñi yo. ⁴ Quiví cha tyaá carta cuan chi ndo, chica xaan xiñi. Ta nducuihya xaan ñi nyacua chaquí. Soco ñima cha sacuhñin carta cuan chi ndo vatyí cuñí cha nducuihya ñi ndo. Soco vatyí coto ndo vatyí yaha xaan cuñí chi ndo.

Nu chahá ra Pablo tuhun chi ñu yoso caa saha ñu ticahnu ñi

⁵ Tucuihya ñi cha chahá ra chiña, ñima ñin ri chi yuhu chahá ra. Chahá tucu ra chihin chi tandihí nyoho ñandihí. Catyí tyehe caa tacuhva cha ma yaha xaan cahín. ⁶ Vahari, cha iyó vaha. Ma cahan ca ndo chi ra. Ma tachi tuñi ca ndo chi ra. ⁷ Ta vityin tahán chi vatyí saha ndo ticahnu ñi chi ra. Ta naquehén ndahví ndo chi ra, coto yaha xaan nducuihyá ñi ra. ⁸ Yucuan chaha catyí chi ndo sañaha ndo cha cuñí ndo chi ra. ⁹ Sacuhñin carta cuan chi ndo quiví cuan vatyí cuñí cote tatu sacuví ndo cuhva chahí chi ndo. ¹⁰ Ta vityin tatu sahá ndo ticahnu ñi, sahá tucu yuhu ticahnu ñi iyó cha chahá tisihi chi yo. Tatu ndicha cha chahá ra tisihi chii. Soco sahí ticahnu ñi chi ra cha cuenda cha vaha chi nyoho. Vatyí yucuan cuhva cuñí maa ra Cristo. ¹¹ Vatyí chitó yo vatyí tatu ma saha yo ticahnu ñi chi tahan yo, cuhna cutyihí ra cha quíñi caa añima yo. Vatyí maña xaan ra. Ta cuví sacañi tahan ra chi yo.

Ña ndoq ra Pablo ñuu Troas vatyí ña nañihí ra chi ra Tito

¹² Quiví chaj ñuu Troas cha cuacahin tuhun ra Cristo, chahá chi cuhva cha sahá tyiñe tyiño nuu Sutu Mañi yo yucuan. ¹³ Soco ña sii maa cuñí añime. Vatyí ña nañihí chi yañi yo, ra Tito. Yucuan chaha ña ndoq que ñuu cuan cahín chihin ñu. Ta vachi ityí Macedonia ihya.

Cahán ra Pablo tuhun ra Cristo chihin cha ñi ñi ra

¹⁴ Soco tyahví nyoo chi Nyoo vatyí tyicuan ri sahá ganaa yo chihin fuerza ra Cristo Jesús. Vatyí sacotó yo tuhun ra chi ñayiví. Ta tuhun ra cha cahán yo, cuví chi tari noo xico vixi chahan cha caña tandihí ri ityí nu

cuahán yo. ¹⁵ Ta yoó cuví yo tari noo xico vixi cha chahá cuenda ra Cristo chi Nyoo. Ta caña xico cuan mahñu ñu cha cucacu añima, ta mahñu ñu cha ma cacu añima ñandihí. ¹⁶ Soco cha cuenda ñu cha ma cacu añima cuan, quíñi chahán, tari noo xico ndiyí cuví tuhun cha sacotó yo chi ñu, cuñí maa ñu. Vatyí sacotó yo yoso caa cucuvi ñu vatyí ña chinó ñi ñu chi ra Cristo. Soco cha cuenda ñu cha cacú añima, vixi xaan chahán, Vatyí sacotó yo yoso caa coo ñu ñayiví cha ma naa ca maa. Soco iyóó cha cuví sacuvi tyiño ihya? ¹⁷ Nyuhu ña sacuví ndi tari sacuví cuaha ra cachicá noo. Ra cuan cuñí ra xuhun. Tuhun ra Cristo ñima noo cha xicó yo cuví. Soco cahán ndi chihin cha ñi ñi ndi tuhun ra vatyí ñin ri cuví ndi chihin ra, ta Nyoo ta ra Cristo tachj ra chi ndi.

3

Tuhun chaa cha quichi cacun ra Cristo

¹ Ta cha cahán ndi tuhun ihya, ¿atu cha cuñí ndi sayaa ndi chi ndi, cuñí maa ndo? Ñima tyicuan caa. Ta yoó ¿atu chiñuhú cha cuiso yo tutu cha catyí chi vatyí vaha ñayiví cuví yo, tari tuhva inga ra canyiso? Ñima. ² Vatyí nyoho cuví ndo carta ndi cha tyaá Nyoo añima ndi. Vatyí cuví nyehé ñayiví yoso caa nasama Nyoo cuhva iyó ndo. Ta coto ñu tyi maa maa ri cha vaha sañahá ndi chi ndo. ³ Ta cachi nyehé ñu tyi cuví ndo carta cha tyaá ra Cristo vatyí nyehé ñu, ta nyuhu nacuhvā cuenda ndi carta cuan chi ñu. Ta ñima chihin tinta tyaá Tatyí Ii Nyoo nyitó añima ndo. Ta ñi ñima nu yuu chicunya.

⁴ Cahán ndi tyehe caa vatyí chitó ndi vatyí Nyoo cuacuhva ra cha quita vaha tyiño sahá ndi. Vatyí tyinyeé ra Cristo chi ndi. ⁵ Ma caña ñi ndi caca xiñi ndi tyi iyó tunyee ñi maa ndi cha sacuví ndi ñáa cha sacuví ndi. Soco tandihí cha sacuví ndi maa Nyoo sacuví. ⁶ Maa Nyoo chahá ra tunyee ñi ra chi ndi, ta sacotó ndi tuhun chaa cha natyihj tahan ra tuhun chihin yo. Vatyí Tatyí Ii ra chahá ñayiví chaa coo yo. Ta ley chahnu cuan cha chahá Nyoo chi ra Moisés, sacuhún chi chi yo anyaya vatyí ña cuví quichaha yo tandihí ley cuan.

⁷ Ley chahnu cuan, chicunya chihin letra chata yuu ta cha naha. Ta cuhva cha chaq ra Moisés chihin cuan, tyaquí xaan xiño nuu ra nyacua nayuhví ñu Israel nanyehé ñu nuu ra. Soco suvita ri tyi cha tyaquí cuan numi ri ndihí. Soco tatu tyaquí cuví cuan, ⁸ tyaquí ca cuví tuhun chaa cha quichj nyaca Tatyí Ii Nyoo chi yo. Tyaquí xaan ca cuan. ⁹ Tatu ley chahnu cha sacuhún chi yo anyaya, tyaquí xaan cuví, nyaca cuví tuhun cha saváha chi yo nuu Nyoo. Tyaquí xaan ca cuví cuan. ¹⁰ Vatyí

ley chahnu tyaqui xaan cuví quívi cuan, cuñí maa ñáyivi. Soco vityin chító yo tyi ña tyaqui xaan cuví. Vatyí tyaqui xaan ca maa tuhun ra Cristo cha sacacú chi yo nuu Nyoo. ¹¹ Vatyí tatu tyaqui xaan cuví cha ñin yaha ri chiyo, nyaca cuví noo cha ma ndíhi ca maa. ¹² Chító ndi tyi ma naa cuan. Yucuan chaha cahán ndi chihin cha ñi ñi ndi. Ña cahán nuu ndi ta ña yuhvi ndi. ¹³ Ña sacuví ndi tari sacuví ra Moisés. Vatyí chasí ra nuu ra chihin noo sahna, tacuhva cha ma nyehe ñu Israel nu cunaa cha xiño cuan. ¹⁴ Soco quívi cuan ña cutuñí ñi ñu. Ta nyacua nya vityin ta ña cutuñí ñi ñu. Vatyí tatu sacuahá ñu ley cuan tari quívi cha nyasí nuu ñu. Vatyí ña cutuñí ñi ñu. Soco noo tuhun ri maa ra Cristo nuñá ra nuu yo. ¹⁵ Ta nyacua nya vityin tatu sacuahá ñu Israel ley ra Moisés, ña cuví cutuñí ñi ñu. Vatyí tari noo cha nyasí nuu ñu. ¹⁶ Soco tatu nacuhvá ñu añima ñu chí Sutu Mañi yo, maa ra cunuña ra nuu ñu. ¹⁷ Vatyí Sutu Mañi yo, Tatyí li cuví ra. Ta tatu nyaá Tatyí li Sutu Mañi yo añima yo, sacotó ra chí yo tyi ña nyacá ñaha ca ley chahnu chí yo. ¹⁸ Yucuan chaha tandíhi yo ña nyasí ca nuu yo. Ta vityin cuví yo tari noo ño, tacuhva cuví nyehe ñáyivi cha vaha Sutu Mañi yo. Ta cuahán nduvaha ca yo yoso cuhva sacuví Tatyí li Sutu Mañi yo chí yo.

4

¹ Yucuan chaha ma ndu uvi maa ñi ndi, vatyí Nyoo nyehé ndahvi ra chí ndi. Ta tyaá tyaño ra chí ndi tyi cahán ndi tuhun ra chihin ñáyivi. ² Ña sacuví ndi cha xehe vatyí ticahan nuu cuví cuan. Ña chicá noo ndi sandaví ñaha ndi chí ñáyivi. Maa maa ri tuhun Nyoo sañahá ndi. Ña nasacá noo ndi tuhun Nyoo chihin inga tuhun. Soco chihin nuu Nyoo chacú ndahvi ndi nuu tandíhi ñáyivi, na saha vaha ñu cuenda vatyí maa maa ri cha ndicha sañahá ndi. ³ Nyuhu ña tyihí xehe ndi tuhun Nyoo. Soco cha cuenda chí ñu cha cua cunaa ñohó xehe. ⁴ Cuihna, ra nyacá ñaha cha quiñi caa ñuhu ñáyivi ihya, ican ra chasí cha chíhi tuñi xiñi ñu cha ña chinó ñi chí Nyoo. Vatyí coto nyehe ñu cha ndichin Nyoo. Ta coto cutuñí ñi ñu yoso caa sacacú ra Cristo chí yo. Vatyí ra Cristo nyitó ra ta cuví ra xiñahñu Nyoo. ⁵ Cuhva cha cahán ndi chihin ñáyivi, ña cahán ndi tuhun maa ndi. Soco sacotó ndi tyi ra Jesucristo cuví ra Sutu Mañi yo. Ta nyuhu cuví ndi noo musu ndo cha catyi cha cuñí ndi chí ra. ⁶ Vatyí suri maa Nyoo catyi vatyí na ndundichin nu ñaa ñi quívi chingo ñuhu ñáyivi. Ican ra chahá ra cha ndichin coo añima yo, tacuhva vatyí chihin cha ndichin cha chahá ra Cristo chí yo, cuví cutuñí ca ñi ñi yo tyi cahnu xaan ca cuví maa Nyoo.

Chihin cha chinó ri ñi yo chí Nyoo coo yo noo ñáyivi chaa

⁷ Coño ñuhu yo cuví tari noo quisi ñuhú, vatyí noo cha ñima ri tuhun cuví. Vatyí tyicuan caa ta cuví nyehe ñáyivi tunyee ñi cha cahnu xaan cha iyó chí yo, maa Nyoo chahá, ta ñima tunyee ñi maa yo cuví. ⁸ Yucuan chaha vasi iyó tisihi tandíhi ri itiyi nu cuahán ndi, soco ña ndu uvi ñi ndi. Vasi ña cutuñí ñi ndi tandíhi cha cuví chí ndi, soco chító ndi tyi quitá vaha ndi. ⁹ Vasi chicá nyicon ñu chí ndi soco ñima maa ri maa ndi nyicu. Vatyí Nyoo nyaá ra chihin ndi. Vasi cha chacun taxin ñu chí ndi soco ña chíhi ndi. ¹⁰ Tandíhi ri itiyi nu cuahán ndi ta nyatú ndi tuhun chíhi cha catyi tuhun ra Jesús. Vatyí yucuan cuhva nyehé ñu tyi iyó ndi ñáyivi chaa cha chahá ra chí yo. ¹¹ Vatyí nyuhu tandíhi quívi, cha yatyin cúvi ndi cha cuenda ra Cristo tacuhva cuví nyehe ñáyivi vatyí yihí ñáyivi ra Cristo añima ndi. ¹² Nyatú ndi tuhun chíhi cha cuenda cha cahán ndi tuhun Nyoo. Soco cha tyehe caa, nañihí ndo ñáyivi chaa.

¹³ Chinó ñi ndi chí Nyoo tari chingo ñi ra David. Ta tyaá ra nu líbru Salmos: “Chinó ñi chí Nyoo, yucuan chaha cahin tuhun ra”, catyi ra David. Ta tyicuan caa tucu nyuhu. Chinó ñi ndi chí Nyoo. Ta yucuan chaha cahán ndi tuhun ra. ¹⁴ Vatyí chító ndi vatyí Nyoo ra sanandoto chí Sutu Mañi yo Jesucristo, cusanandoto tucu ra chí yo. Ta ñin ri chihin nyoho, cunyaca ra chí yo nya gloria nu nyaá ra. ¹⁵ Tandíhi ihya cuví cha vaha chí maa ndo ta chí inga ñáyivi. Vatyí cuaha cha vaha Nyoo cuñihí ndo. Ta cuaha ndo nacuhvá ndo tyahvi nyoo chí ra, ta sacahnú ndo chí ra.

¹⁶ Yucuan chaha ña ndu uvi maa ñi ndi. Vasi coño ñuhu ndi cha cuahán sandíhi xaan chí. Soco ñáyivi chaa cha iyó ndi cuahán nduchaa chí tahan tahan quívi. ¹⁷ Tindoho cha nyehé ndi ñáyivi ihya, tindoho ñin yaha ri cuví. Vatyí chahá chí cha cunañihí ndi noo nu vaha ca cha ma ndíhi maa nu nyaá Nyoo. ¹⁸ Vatyí ñima cha cuví nyehe yo sahá ndi cuenda. Sahá ndi cuenda soco cha ña nyehé yo. Vatyí cha cuví nyehé yo ñáyivi ihya, ña naha maa chíyo. Soco cha ña cuví nyehé yo, yucuan cuví cha ma ndíhi ca maa.

5

¹ Ta chító ndi vatyí quívi cúvi yo, coño ñuhu yo cunaa chí. Vatyí cuví chí tari noo vehe cha ña naha maa chíyo. Soco Nyoo cumí ra noo nu cunyaa añima yo, noo cha ma naa ca maa nya andívi. Ta ñima cha cacú chihin ndaha rayí ñáyivi ihya cuví. ² Ndicha, cha ñi ri ca cha iyó yo chíhi coño ñuhu yo, nducuihyá xaan cuñi yo, vatyí nyatú tuhva yo nicoo yo chíhi cha chahá Nyoo chí yo nya andívi. ³ Vatyí cohon añima

yo chichi cha chahá Nyoo tacuhva cha ma cuvityiyaá yo. ⁴ Cha ni ri ca cha iyó yo chichi coño ñuhu yo cha cuví tari noo vehe ri, nducuihyá iñi yo vatyi ña cuñí yo quita ri maa añima yo chichi coño ñuhu cuan ta cuvityiyaá chí. Soco cuñí yo cha coo añima yo chichi cha ma naa ca maa nya andiví ta tyicuan ri maa cuacoo yo. ⁵ Ta Nyoo tyaa ra cuhva vatyi tyehe caa cucuvi chí yo. Ta chahá quíyi ri ra Tatyí Ii ra chí yo. Vatyi tacuhva coto yo tyi cuví naquehen ca yo tandihí ca cha cuacuhva ra chí yo.

⁶ Ta yucuan chaha ma yuhví yo cha cúvi yo. Vatyi chító yo tyi cha ni ri ca cha iyó yo chichi coño ñuhu ihya ñayiví, ña yatyin nyaá yo chihin Sutu Mañi yo andiví. ⁷ Vityin ña cuví nyehe yo chí ra, soco chihin cha chiñó ri iñi yo chí ra, iyó yo ñayiví ihya. ⁸ Soco yihí vaha iñi yo chí ra ta cha cuñí yo quita yo chichi coño ñuhu ihya vatyi cahun yo cucunyaá yo chihin Sutu Mañi yo. ⁹ Yucuan chaha sañihí ca ndi nducú ndi cuhva yoso caa cha tahan iñi Sutu Mañi yo sacuví ndi. Cuví ri cha iyó ca ndi chihin coño ñuhu ñayiví ihya. O cuví ri cha yori ca ndi, vatyi cha nyaá ndi chihin Sutu Mañi yo nya andiví. ¹⁰ Vatyi tahan tahan yo ta cahun yo nuu ra Cristo cucuhva yo cuenda nu nyaá cutuñi chí yo nuu ra. Ta cuñihí yo cha tahan chí chí yo, yoso cuhva cha vaha o cha ña vaha cha sacuví noo noo yo quívi chiyó yo chihin coño ñuhu yo ñayiví ihya.

Nu sacotó ra Pablo yoso caa nicoo vaha yo chihin Nyoo

¹¹ Vatyi chító ndi vatyi Sutu Mañi yo cutachi tuñi ra chí ndi tatu ma sacuvi ndi tuhun cahán ra. Yucuan chaha nducú ndi cuhva cahán ndi chihin ñayiví na nacuhva cuenda ñu chí ñu chí Nyoo. Ta Nyoo chító ra vatyi tyicuan ri sacuví ndi. Ta chító tucu maa ndo ñandihí. ¹² Ñima cha cuñí ndi cuyaa ndi chihin cha cahán ndi tyehe caa, soco cha cuñí ndi vatyi nicohón iñi ndo vatyi tuhun ndicha sacotó ndi, ta cuví cusí iñi ndo chihin ndi. Ta cuñihí ndo cuhva cahán ndo chihin inga ra cha sacahnú chii. Catyí ra tyi vaha iyó ra, soco ñima cha ndicha caa añima ra. ¹³ Tatu ña vaha cuñí xiñi ndi, cuñí maa ñayiví tyi cahún tuhín tyehe caa, soco cha cuenda maa Nyoo. Soco tatu vaha cuñí xiñi ndi, ta cachi tuhun cahán ndi, soco cha cuenda tyi cuñí ndi tyinyeé ndi chí ndo. ¹⁴ Soco saniñi ndi chí ndi cha sacotó ndi tuhun ra Cristo chí ñayiví. Vatyi chító ndi tyi cuñí xaan ra chí ñu. Ta chító ndi tyi chihí ra cha catyí cuatyí tandihí cuii maa ñayiví. Ta yucuan chaha chihí tucu yo cha ma sacuvi ca yo cha ña vaha cha chinyacuví yo nu quichí chí. ¹⁵ Ra Cristo chihí ra cha catyí tandihí yo vatyi tacuhva cha ma coo ca yo cuhva cuñí maa yo. Cqo yo soco cuhva

cuñí maa ra. Vatyi chihí ra ta nandotó ra cha cuenda yo. ¹⁶ Cha cuhva cha vityin, tatu nyehé yo chí noo ñayiví, ma caca xiñi yo nyehe yo chí ñu tari chicá xiñi ñayiví cha ña ñohó nuu chí Nyoo. Noo quívi tyicuan caa chicá xiñi vatyi ra Cristo cuví ra noo ra ñuhu ñayiví ri. Vityin ña chicá ca xiñi tyicuan caa. ¹⁷ Vatyi quívi nacuhvá cuenda yo chí yo chí ra Cristo, maa ra sanduchaá ra añima yo. Ta tandihí tuhun cha chicá xiñi yo nu quichí chí, ña chicá ca xiñi yo vityin. Vatyi maa ra nacuhvá ra nonga cha chihí tuñi chaa chí yo.

¹⁸ Ta tandihí ihya maa Nyoo sacuví, vatyi sanícoo vaha ra chí yo chihin ra cha cuenda maa ra Cristo Jesús. Ta catyí ra chí yo vatyi na sacoto yo chí ñayiví vatyi Nyoo cuñí ra cha nicoo vaha ñu chihin ra. ¹⁹ Vatyi chihin cha chihí ra Cristo cha catyí cuatyí yo, ñayiví nicoo vaha ñu chihin Nyoo. Ta Nyoo sahá ra tuhun tyi ñahri ca cuatyí ñu. Ta chí nyuhu, catyí ra vatyi sacotó ndi tuhun ihya chí ñu. ²⁰ Ta vityin cuví ndi ra chicá tyiño ra Cristo. Ta tari cha maa Nyoo chacú ndahví nuu ndo, vatyi tyiño maa ra chicá ndi. Ta yucuan chaha chacú ndahví ndi nuu ndo chihin sivi ra Cristo, na nicoo vaha ndo chihin ra. ²¹ Ra Cristo ña sacuví ra ni minoo cuatyí. Soco Nyoo tachí ra chí ra síqui ñuhu ñayiví ihya, quichí cúvi ra tari noo ra iyó cuatyí cahnu. Tacuhva vatyi cuví sacacu ra chí yo. Ta cha cuenda maa ra Cristo sahá Nyoo tuhun tyi vaha yo nuu ra.

6

¹ Yañi, iin ri tyiño Nyoo sacuví yo. Yucuan chaha chacú ndahví xaan ndi nuu ndo vatyi ma coo ndo tari cha ña ñohó nuu ndo Nyoo. Cqotyíño ndo tandihí cha vaha cha chahá ra chí noo noo ndo. ² Vatyi catyí Nyoo nu tutu tyehe caa:

Quívi tahan chí tyi sacaqui chuun, yuhu chihí nu cahun ta tyinyeé chuun, catyí Nyoo.

Saha ndo cuenda tyi vityin cuví quívi tahan chí. Vityin cuví quívi sacacú Nyoo chí yo.

³ Nducú xaan ndi cuhva cha ma nyehe nyaá ñayiví tyiño Nyoo cha sacuví ndi, coto ma chino iñi ñu chí Nyoo. ⁴ Soco cuñí ndi vatyi nyehé ñu vatyi ndicha cha cuví ndi musu Nyoo vatyi cunyeé ndi ñáá ndihí cha cuví chí ndi, tandihí tindoho, tandihí tsihi. ⁵ Vasi cañi ñayiví chí ndi, vasi tyihí ñu chí ndi vehe caa, vasi canachaá ityi ñu sacotó ndi, soco cunyeé xaan ndi. Ta ñihí xaan sahá tyiño ndi nyacua ña quixí ndi. Ta yahá ndi soco. ⁶ Ta tandihí maa ihya cunyeé ndi vatyi ndicha ndicha cuii cha cuví ndi musu Nyoo. Yucuan chaha cachi iyó ndi. Ta chító ndi cha ndicha. Ta cunyeé ndi chihin cha ña chihí ndi tsihi tandihí cha cuví chí ndi. Ta vaha ñayiví cuví ndi. Ta cuñí ndi chí

ñáyivi. Ta nyaá maa Tatyí li Nyoo chihin ndi. ⁷ Cahán ndi maa ri tuhun ndicha maa Nyoo. Ta nyaá fuerza ra chihin ndi. Ta chotyíño ndi tandíhi cha vaha cha chahá maa ra chi ndi, tacuhva cuví chasaha ndi chi ra ña vaha. ⁸ Iyó quívi cuñí nyehe ñáyivi chi ndi. Ta iyó quívi ña cuñí nyehe ñu chi ndi. Iyó quívi vaha cahán ñu síqui ndi. Ta iyó quívi quiñi cahán ñu síqui ndi. Iyó chaha catyí ñu vatyí ra cuendu cuví ndi. Soco maa maa ri cha ndicha cahán ndi. ⁹ Sahá ñu chi ndi tari noo ra ña ñohó nuu ñu. Soco ñu yihí vaha cuenda Nyoo ñohó nuu vaha ñu chi ndi. Iyó quívi cha yatyn ri cúvi ndi, soco iyó ca ndi. Ta iyó quívi tachí tuñi ñu chi ndi, soco ña chihí ndi. ¹⁰ Vasi iyó quívi cha nducuihyá iñi ndi, soco tyicuan ri sí cuñí ndi. Vatyí tyiño Nyoo sacuvi ndi. Vasi ndahvi ndi, soco cuaha ñáyivi ñihí ñu cha vaha chihin tuhun cha chahá Nyoo chi ndi. Vasi ñahri maa iyó chi ndi, soco iyó tandíhi cha vaha Nyoo chi ndi.

¹¹ Cahán ndi chihin ndo yañi, cha cuví ndo ñáyivi ñuu Corinto chiña. Catyí cachi ndi chi ndo chihin cha ñi añima ndi vatyí ndicha cha cuñí ndi chi ndo. ¹² Nyuhu, ña quiñi cuñí ndi nyehe ndi chi ndo. Maa ndo cuví ñu ña vaha cuñí nyehe chi ndi. ¹³ Chacú ndahvi ndi nuu ndo tari chacú ndahvi noo rayí nuu sehe ra, nuña ndo añima ndo, ta ma quiñi cuñí ndo nyehe ndo chi ndi, vatyí maa ndi ña quiñi cuñí ndi nyehé ndi chi ndo.

Cuví yo vehe Nyoo vatyí ñohó ra añima yo

¹⁴ Ma ndu ñin ri ndo chihin ñu ña chinó iñi chi Nyoo. Vatyí ña nacachí tahan añima ndo chihin ñu cuan. Vatyí cha vaha ma cuví ndu ñin ri chihin cha ña vaha. Ta cha ndichin ma cuví ndu ñin ri chihin cha ñaa iñi. ¹⁵ Vatyí ra Cristo ña ndu ñin ri ra chihin ra cuví cuíhna. Ta tyicuan caa tucu ñu chinó iñi chi ra Cristo, ña nacachí tahan chi tatu ndu ñin ri ñu chihin ñu ña chinó iñi chi ra. ¹⁶ Ña chahá chi cha sacahnú yo Nyoo ta sacahnú tucu yo chí cha cuví xitohyo. Vatyí maa yo cuví yo vehe Nyoo nyitó. Tari catyí maa ra tuhun ihya ta cha naha:

Coi ta caca noi chihin ñu.

Ta yuhu cucuvi Nyoo ñu,

ta maa ñu cucuvi ñu ñáyivi chii, catyí Nyoo.

¹⁷ Yucuan chaha catyí tucu ra quívi cuan:

Quíta ndo mahñu ñu ña chinó iñi chii.

Ta ma cutahan ndo chihin ñu.

Ta ma sacuvi ndo cha ña vaha.

Tyicuan ta cunaquehin chi ndo.

¹⁸ Ta sutu ndo cucuvi chii.

Ta maa ndo cucuvi ndo sehi, catyí Sutu Mañi yo, ra iyó tandíhi tunyee iñi chii.

7

¹ Ican ihya cuví cha chahá Nyoo chi yo. Yucuan chaha yañi, cuñí chi nducu yo

cuhva cuvaha yo nuu Nyoo. Ma sacuvi yo cha quiñi caa ni ri ma caca xiñi yo cha ña vaha. Na ndu cuítí coo yo vatyí sahá yo ñáyivi chi Nyoo.

Nu nacatyí ra Pablo yoso caa nasamañ ñu cuhva iyó ñu

² Yañi, chacú ndahvi ndi nuu ndo, na cuvaha coo iñi ndo nyehé ndo chi ndi vatyí ñahri cha sacuvi ndi chi ni noo ndo. Ta ni ña satívi ndi chi ndo. Ni noo ndo ta ña sandaví ñaha ndi chi ndo. ³ Cha catyí chi ndo tyehe caa ñima cha cahín chi ndo. Vatyí cha yaha catyí tiqui chi ndo ta ityi chata ca, vatyí ndicha cha cuñí chi ndo. Vatyí ñin ri ñu cuví yo chihin Nyoo. Tatu iyó yo soco ñin ri cuví yo. O tatu cúvi yo soco ñin ri cuví tucu yo. ⁴ Ñahri maa cha chica iñi chihin nyoho. Síi xaan cuñí nyehi chi ndo. Ta yucuan chaha vasi nyehé ndi tindoho ihya, cuní ca iñi ndi. Ta cusí xaan ca cuñí ndi.

⁵ Nya quívi chaq ndi Macedonia ihya, ta ta nyitatu ca maa ndi. Vatyí cuaha xaan tisiñi ta tindoho nyehe ndi tandíhi ri ityi chahan ndi. Ta cañi tahan ñu chihin ndi. Ta yuhví ndi. ⁶ Soco Nyoo, tyicuan ri sanduní ca ra iñi yo tatu cuihyá cuñi yo. Ta sanduní ra iñi ndi cuhva cha chaq ra Tito. ⁷ Ta ñima cha cuenda cha chaq ri ra. Soco cha cuenda cha nduní iñi ra saha nyoho. Nacatyí ra chi ndi vatyí cuñi xaan ndo nyehe ndo chi ndi. Ta chacu xaan ndo cha cuihya iñi ndo. Ta cuñí ca ndo chii, na. Ta cha cuenda cuan ndusí xaan ca cuñí vityin.

⁸ Soco quívi cuan chica xaan xiñi vatyí चाहí tucuihya iñi chi ndo chihin tutu cha sacuhín chi ndo. Ta ndu uví iñi cha sacuhín tutu cuan chi ndo. Soco suhva ri quívi, nducuihyá iñi ndo. Ta vityin ña chicá ca xiñi cha cuenda tucuihya iñi cha चाहí chi ndo. ⁹ Ta vityin cusí xaan cuñí, ñima cha cuenda tucuihya iñi cha chiyo ndo, soco cha cuenda vatyí tucuihya iñi cuan sanandichí chi ndo ndaha Nyoo. Nyoho cunyeé ndo tucuihya iñi cuan yoso cuhva tahán iñi Nyoo, yucuan chaha cha vaha sacuvi ndi chihin ndo chihin tucuihya iñi cuan. ¹⁰ Iyó tucuihya iñi cha maa Nyoo चाहá, tacuhva ndu uvi iñi yo cuatyí yo ta nañihi yo ityi vaha cuhun yo nu nyaa ra. Ta ña tahán chí cha cuxaán yo chi Nyoo cha cuenda cuan. Soco tucuihya iñi cha iyó chí ñu cha ña ñohó nuu chí Nyoo, ñima tucuihya iñi chí Nyoo cuví cuan. Vatyí ña tyinyee chí chí ñu tacuhva cha ma cuhun ñu anyaya. ¹¹ Nyoho cunyeé ndo tucuihya iñi yoso cuhva tahán iñi Nyoo. Soco vityin nyehé ndo vatyí cuaha xaan cha vaha nañihí ndo cuenda cha cucuihya iñi ndo. Ta sandaq vaha ndo tyiño ra cuan. Cuxaán ndo chí ra. Ta nyacua cuñí ndo tachí tuñi ndo chí ra. Tandíhi cuan, ta nayuhví ndo chí Nyoo. Ta nacatyí vaha ndo yoso

caa cuahan. Yaha cuan ta nyacua quichí cuví ñi ndo nyehe ndo chii. Ta cha cuenda cha sacuví ndo tari cuhva cuñí Nyoo, cuñí chí catyí vatyi ñahri cuatyí ndo cha cuenda cuan. ¹² Yucuan chaha quivi sacuhin carta cuan chí ndo ñima cha cuenda cha chicá xaan xiñi cuenda ra cha sacuví cuatyí cuan. Ta ni ñima cuenda ra cha nyehe tisihi cuan. Soco cha cuenda maa ndo, vatyi cuñí tyi coto ndo yoso cuhva chicá xiñi ndo tuhun ndi nuu Nyoo vatyi cuñí ndo tyinyeé ndo chi ndi. ¹³ Yucuan chaha nduvaha cuñí añima ndi. Ta si xaan cuñí ndi vatyi chitó ndi tyi cuñí ndo chi ndi.

Ta si ca cuñí ndi cha nyehé ndi vatyi chahá xaan ndo tunyee ñi añima ra Tito. Vatyi vaha xaan tyiñuhú ndo chi ra. ¹⁴ Catyí chí ra Tito cha cumañi ca cuhun ra nu nyicú ndo vatyi vaha cutyasoho ndo tuhun cha sacuhin chihin ra. Ta vityin si cuñí vatyi chinó cava tuhun cahín chihin ra. Maa maa ri cha ndicha cahín chihin ndo. Ta tyicuan caa ndicha tucu tuhun cha catyí chí ra Tito. ¹⁵ Ta cuñí xaan ra chí ndo vatyi nicohón ñi ra vatyi nyoho sacuví ndo tandihí cuíi cha catyí ra chí ndo. Ta cuhva cha chaá ra, ndahvi sahá ndo chí ndo nuu ra. Ta vaha xaan cahán ndo chihin ra. Ta vaha xaan quichahá ndo chí ra. ¹⁶ Ta si xaan cuñí vatyi chité tyi tyicuan ri sacuví ndo cha vaha.

8

Tahán chi tyinyeé yo chí ñu yihí cuenda Nyoo chihin cha iyó vaha ñi yo

¹ Ta vityin yañi, cuñí ndi nacatyí ndi chí ndo vatyi cuaha xaan tyinyee Nyoo chí ñu yihí cuenda ra, ityi Macedonia ihya. ² Vasi cuaha xaan tindoho nyehé ñu, soco si xaan ca cuñí ñu chihin Nyoo. Ta vasi ndahvi ñu soco cuaha cha iyó chí ñu chahá ñu, tari maa cha tyayí ñu. ³ Ta yuhu cuví noo cha ndaa vatyi nyehí tyi chihin cha iyó vaha ñi ñu chahá ñu yoso cuhva cha iyó chí ñu. Ta nyacua yaha ca chahá ñu. ⁴ Chacú ndahvi xaan ñu nuu ndi tyi nacuhvá ndi cha tyinyeé tucu maa ñu chí ñu tahan yo nya Jerusalén. ⁵ Cuaha ca sacuví ñu cha nuu cha yihí ñi ndi. Vatyi cha xihna ca cha sacuví ñu, nacuhvá cuenda ñu chí ñu chí Nyoo chihin cha ni vaha ñi ñu. Ta quichahá vaha ñu tuhun Nyoo cha sacoté chí ñu, vatyi yucuan cuhva cuñí maa Nyoo. ⁶ Ta cha nyehí tyi tyehé caa chinyacuví ñu Macedonia ihya, yucuan chaha catyí chí ra Tito vatyi na sandihí ndihí ra tyiño vaha cha quichahá ra cha nacaya ra xuhun nu nyicú ndo. ⁷ Nyoho vaha xaan sacuví ndo tandihí ri. Chinó xaan ñi ndo chí Nyoo. Vaha xaan sañahá ndo tuhun ra. Ta vaha cutuñí ñi ndo. Ta ni xaan ñi ndo sacuví ndo tyiño nuu ra. Ta vaha xaan ñáyivi cuví ndo chihin ndi. Ta tyicuan

caa tucu tahán chí cha tyinyeé ndo chí ñu ndahvi ñu yihí cuenda Nyoo noo cuhva vaha xaan.

⁸ Ñima tyi catyí chí ndo tyehé caa ta cuñí ndo tyi cha saniñí chí ndo. Soco cha cuñí vatyi nyehé ndo cha vaha cha nyacuví ñu yihí cuenda Nyoo inga ityi. Ta tyicuan caa tucu maa ndo sañahá ndo chí inga ñáyivi tyi ndicha vaha ñáyivi cuví ndo chihin tahan ndo. ⁹ Vatyi cha chitó maa ndo yoso cha cuñí Sutu Mañi yo Jesucristo chí yo. Vatyi maa ra tyayí xaan ra. Soco sandundahví ra chí ra cha catyí yo tacuhva vatyi cuví sandutyayí ra chí yo.

¹⁰ Chahí tuhun ihya chí ndo cha cuenda cha vaha chí maa ndo. Na sañihí ndo chihin tuhun cha quichahá ndo quiyava. Ñima tacuhva sacuví ri ndo, soco sacuví ndo chihin cha iyó vaha ñi ndo. ¹¹ Ta tari chahá ndo chihin cha iyó vaha ñi ndo, tyicuan caa sacuví tucu ndo vityin. Ta cuhva ndo yoso ri cuhva cha iyó chí ndo. ¹² Vatyi tatu noo ñáyivi ni vaha ñi ñu, cuñí ñu cuhva ñu yoso ri cuhva cha iyó chí ñu, Nyoo naquehén ra cha chahá ñu. Vatyi Nyoo ña chicán ra cha ñahri iyó chí yo.

¹³ Ñima cha cuñí vatyi nyehé ndo tindoho cha cuenda cha tyinyeé ndo chí inga ñu tacuhva ma nyehé ca ñu cuan tindoho. ¹⁴ Soco vityin cha iyó chihin chí ndo, tahan chí cha tyinyee ndo chí ñu ndahvi cuan. Ta inga chaha maa ñu cucuhva cha chíñuhú chí maa ndo. Tyehé caa tahán chí tyinyeé chí tahan ri yo tacuhva tyi ninoo yo ta ni inga yo ma nyehé yo tindoho. ¹⁵ Vatyi tyehé caa catyí chí tuhun Nyoo: “Ra cha cuaha xaan cumí, ña ndoó ca chí ra. Ta ra cha chiin ri cumí, ña cumañí chí ra”, catyí tuhun Nyoo.

Ra Tito chihin ra tahan ra tyaá ra cuhva cuhun ra ñuu Corinto

¹⁶ Soco tyahvi nyoo chí Nyoo vatyi chahá ra cha vaha coo añima ra Tito tyi chicá xiñi ra tuhun ndo tari chicá xiñi yuhu. ¹⁷ Ta quehén ra tuhun cha catyí chí ra cha cuhun ra nu nyicú ndo. Tyi cha yihí xaan ñi tucu maa ra tuhun ndo. Ta yucuan chaha vityin vachí ra nu nyicú ndo chihin cha iyó vaha ñi maa ra.

¹⁸ In ri chihin ra Tito tachí ndi chí noo ra yañi yo. Ta vaha xaan hermano cuví ra, ta tyicuan caa catyí tandihí ñáyivi yihí cuenda Nyoo. ¹⁹ Ta siin ri nacachí vaha maa ñu yihí cuenda Nyoo chí ra yañi yo ihya vatyi cuhun ra chihin ndi cunyaca ndi xuhun chí ñu ndahvi nya Jerusalén. Ta cuñí ndi sacahnú ndi chí Sutu Mañi yo cha sacuví ndi tyiño ihya. Ta suri sañahá ndi vatyi cuñí xaan ndi tyinyee ndi chí tandihí ñu yihí cuenda Nyoo. ²⁰ Ta cuñí ndi sacuví ndi tyehé caa tacuhva cha ma quihí yuhu ñáyivi tuhun

ndi cha cuenda cha nacayá ndi xuhun cha cuacuhva ndi chi ñu ndahvi. ²¹ Ta nducú xaan ndi cuhva sacuví ndi noo cuhva cachi. Tatu ñáá noo cha cuasacuví ndi soco chihin cha cachi iyó ndi chihin nuu Sutu Mañi yo ta chihin nuu ñáyivi ñandihí.

²² Ta chihin ra Tito ta inga yañi yo cuan, vachí inga tucu ra yañi yo, vatyi nyehé ndi vatyi ñi xaan iñi ra. Ta vityin yaha ca cuhva, vatyi vaha cuñi ra nyehé ra chi ndo cha cuenda cha chinó xaan iñi ra tyi cuñi ndo sacuví ndo cha vaha nuu Nyoo. ²³ Tatu yóo cha ndaca tuhun tuhun ra Tito, catyi ndo chi ñu tyi ra tahin cuví chi ra. Ta sahá tyiño ra chihin, ta tyinyeé ra chi ndo chihin tuhun Nyoo. Ta tatu ndaca tuhun ñu tuhun inga uvi ca ra yañi yo ihya, catyi ndo chi ñu vatyi maa ñu yihí cuenda Nyoo saquichí chi ra. Ta vaha xaan sacuví ra tyiño nuu ra Cristo. ²⁴ Yucuan chaha sañaha ndo chi ra ihya vatyi ndicha ndo cha cuñi ndo chi ra. Tyicuan ta coto tandihí ñu yihí cuenda Nyoo vatyi tahán chi cha cahín tuhun ndo tyicuan caa.

9

Nu chahá ra Pablo tuhun yoso caa cuatyinyee ñu chi ñu ndahvi ñu yihí cuenda Nyoo nya Jerusalén

¹ Ta cuenda xuhun cha nacayá ndo cuenda ñu ndahvi ñu yihí cuenda Nyoo, ña cuñi chi cha sacuhin tuhun chi ndo. ² Vatyi cha chité cha vaha caá añima ndo. Yucuan chaha chihin cha si cuñi nacatyi chi ñu ityi Macedonia ihya, vatyi nyoho ñu ityi Acaya, nya ta quiyava quichaha cuñi ndo tyinyeé ndo. Ta cuaha xaan ñu Macedonia cuní ca iñi ñu cha tyinyeé tucu maa ñu. ³ Soco suvita ri yuhu cutachi chi yañi yo ihya nu nyicú ndo. Vatyi sanumi ndo ta saçaya ndo xuhun, tari cuhva catyi vatyi yihí iñi ndo sacuví ndo. Vatyi tacuhva cha ma catyi ñu Macedonia ihya vatyi ña ndicha cha cahín siqui ndo cha cuenda cuan. ⁴ Vatyi coto cuhun nya noo ra Macedonia chihin, ta nyehe ra vatyi ñahri maa nacayá ndo. Ta cuquehin ticahan nuu cha cuenda cha ñahri cumi ndo. Ta vihi ca maa ndo. Vatyi cha yaha catyi vatyi cuatyinyee ndo. ⁵ Yucuan chaha cuñi mai vatyi vaha cha cuhun xihna ca ra yañi yo ihya nu nyicú ndo tacuhva tyinyeé ra chi ndo cha sacañá tahanan ndo xuhun cha yihí iñi ndo tyi cuhva ndo. Tacuhva tyi quivi quichí soco tandihí ta cha iyó vaha. Vatyi cha iyó vaha iñi maa ndo cuví, ta ñima noo cha saniñi ndi chi ndo.

⁶ Ta ñicohon iñi ndo tuhun ihya: Ra cha chiin ri tachí, chiin ri tyiño sahá ra chicoó. Ta ra cuaha tachí, cuaha tyiño sahá ra chicoó. ⁷ Ta tahanan tahanan yo cuñi chi cuhva yo yoso cuhva quichí cuví añima yo. Ñima

chihin cha ña ñi iñi yo o chihin fuerza. Vatyi Nyoo cuñi ra chi ñu cha chahá chihin cha si cuñi. ⁸ Nyoo cuví cuhva ra cuaha, ndihí ndoo ndihí cuñi nuu cha vaha chi ndo. Vatyi tyicuan ta coo tandihí ri cha chiñuhú chi ndo. Ta ndoo ca ta cuví tyinyee ndo chi ñáyivi chihin tandihí ri nuu chiñuhú chi ñu.

⁹ Tuhun Nyoo catyi chi tyehé caa: Minoos ra vaha, chahá ra cha iyó chi ra chi ñu ndahvi.

Ta tumañi iñi cha sacuví ra cuan, yucuan cuví cha ña chinaá nuu Nyoo, catyi chi.

¹⁰ Nyoo chahá ra chiti tachí yo. Ta chahá tucu ra cha cachi yo. Cuhva tucu ra cuaha ca chiti tachí ndo ta cuhva ra cuvaha chi. Ta chihin cha chahá ndo, cusacuví ra tyi cuaha cha vaha cucunyaa añima ñáyivi. ¹¹ Tyicuan caa ta coo tandihí ri nuu cha tyayí chi ndo, tacuhva cuví tyinyee ndo chi tahanan ndo. Ta maa ñu cuan, cuanacuhva ñu tyahvi nyoo chi Nyoo cha cuenda cha tyinyeé yo chi ñu. ¹² Vatyi cha tyinyeé yo tyehé caa chi ñu yihí cuenda Nyoo, uvi tahanan cha vaha sacuví yo. Noo cha chahá yo cha chiñuhú chi ñu. Ta inga cha nacuhvá xaan ñu tyahvi nyoo chi Nyoo. ¹³ Maa ñu cusacahnú ñu chi Nyoo. Vatyi chihin cha tyinyeé ndo chi ñu, nyehé ñu vatyi ndicha cha quichahá ndo tuhun ra Cristo. Ta cuhva ñu gloria chi Nyoo cha tyinyeé xaan ndo chi ñu ta chi tandihí ñáyivi. ¹⁴ Ta cucacan tahvi ñu chaha ndo. Ta cucuñi ca ñu chi ndo cha cuenda cha vaha cha chahá Nyoo chi ñu cha cuenda ndo. ¹⁵ Tyahvi nyoo chi Nyoo vatyi chahá ra noo cha vaha xaan chi yo. Nyacua ña ñihí yo cuhva nacatyi yo.

10

Ijó ityi chi ra Pablo tyi sahara cuenda chi ñu cha sacoto ra tuhun Nyoo chii

¹ Yuhu ra Pablo chiquén noo tumañi iñi chi ndo chihin cha vita iñi. Tari cha vita iñi ra Cristo. Vatyi yihí ndo catyi ndo vatyi tatu ñáá tuhun sacoté chi ndo chihin tutu, ñihi xaan cahín chihin ndo. Soco tatu nyaí chihin ndo, vita xaan cahín, catyi ndo. ² Vaha. Soco quivi cuhín nu nyicú ndo, ma saniñi ndo chii cha cahín chi ndo. Soco chité tyi cuñi chi cha sañahí chi suhva ndo yoso cuhva cha ñihi cahín. Vatyi yihí ndo catyi ndo vatyi sacuví tari sacuví noo ra ña yihí cuenda Nyoo. ³ Ndicha vatyi ñáyivi cuví ndi. Soco ña cañi tahanan ndi tari cañi tahanan ra ñáyivi ihya. ⁴ Vatyi cha xaan cha cañi tahanan ndi chihin, ñima cha xaan ñáyivi ihya cuví. Soco maa tanyee iñi Nyoo cuví, vatyi cuví chasaha ndi tandihí maa fuerza nyacua nya fuerza tatyí ña vaha. ⁵ Ta tyicuan caa cuví chasaha ndi chi tandihí tuhun cha cahán ñáyivi siqui tuhun Nyoo, ta tandihí

cha cahnu sahá chii cha chasi nu quichahá yo tuhun Nyoo. Tandihí cuhva chicá xiñi yo siqui ñuhu ñayivi ihya, chahá yo na cunyaca ñaha ra Cristo vatyi quichahá yo chí maa ra. ⁶ Ta quivi cuquichaha vaha tandihí ndo chí ra Cristo, tatu nya nonga ndo ña cuñi ndo quichahá ndo, tyaá ndi cuhva cha tachi tuñi ndi chí ndo.

⁷ Soco nyoho sahá ndo cuenda cuhva caá ri noo ñáyivi. Ta ña sahá ndo cuenda cuhva caá ña ña ñu. Ta tatu nya noo nyoho chitó vaha ndo vatyi cuenda ra Cristo yihí ndo, coto tucu ndo vatyi yihí tucu nyuhu cuenda ra. ⁸ Vatyi vasi yaha cuhva cahín, ña tahán chí cha cucahan nui. Vatyi maa Sutu Mañi yo chahá ra ityi chii cha cunyaca ñahi cha cuenda cha vaha chí maa ndo, tacuhva ñihi ca ndo tunyee iñi Nyoo. Ta ñima cha sativi chí ndo. ⁹ Ña cuñi vatyi catyi ndo vatyi sayuhvi chí ndo chihin cha cahín nu tutu cha sacuhín chí ndo. ¹⁰ Vatyi yihí ndo catyi ndo vatyi nu tutu cha saquichí chí ndo ñihi xaan cahín chihin ndo. Soco tatu mai chaa nu nyicú ndo cuví noo ra ña ñihí tuhun cahan, catyi ndo. Ta tuhun cha cahín, maa maa ri tuhun cha ña chíñuhú cuví, catyi ndo. ¹¹ Soco ñu cha catyi tyehe caa cuñi chí cha coto ñu vatyi tari cuhva cahín nu tutu, tyicuan caa cusacuvi tiqui nachai nu nyicú ndo.

¹² Ndicha ña cañá iñi ndi sandu inuu ri ndi chí ndi chihin ra casayaá chí tyi cahán ra tuhun maa ra. Vatyi casacuvi ra cha ña tahán chí. Vatyi nyehé ra cuhva chicá xiñi maa ra ta cuhva cuahan inga ra, ta cuñi maa ra tyi vaha cuahan ra. Ta ña cutuñi iñi ra tyi tahán chí nanducú ra cuhva cuñi Nyoo. ¹³ Nyuhu ma sacahnu ndi chí ndi chihin cha ña tahán chí chí ndi. Nyoo cuví ra sañahá ñáá cuví tyiño cha tahán chí cha sacuvi ndi. Ta maa ra chahá cha quichi ndi nya nu nyicú ndo Corinto chíña. ¹⁴ Tyehe ta ñima xihna ca ndi sacotó tuhun Nyoo chí ndo, ña tahán chí sahá ndi cuenda chí ndo. Soco tahán maa chí vatyi xihna ca maa ndi chaá ndi nu nyicú ndo chihin tuhun ra Cristo. ¹⁵ Soco nyuhu ña sayaá ndi chí ndi chihin tyiño sahá inga ra. Ña catyi ndi tyi tyiño maa ndi cuví. Soco yihí iñi ndi vatyi cunachino vaha ca iñi ndo chí Nyoo. Tyicuan ta cuví sañaha ca ndi tuhun ra Cristo chí ndo, soco yoso cuhva tahán chí chí ndi. ¹⁶ Ta yihí iñi ndi cha cahan ndi tuhun ra Cristo chihin ñáyivi nya ndihí ñuu nu cañi ca cha nuu nu nyicú ndo chíña, nu ta coto ca ñu tuhun ra. Tacuhva cha ma catyi ñáyivi vatyi cuyaa ndi chihin tyiño sahá inga ra.

¹⁷ Soco tatu nya noo yoó cuñi yo cuyaa yo, na cuyaa yo soco chihin Sutu Mañi yo. ¹⁸ Vatyi nuu Nyoo ña quitá vaha ra catyi tyi vaha maa. Soco tatu cahán Nyoo tuhun noo

ra ta catyi ra tyi vaha sacuvi ra, ican ra cuan cuví ra quitá vaha nuu Nyoo.

11

Nu chahá ra Pablo tuhun chí ñu Corinto na saha ñu cuenda coto sandavi ñaha ra cuendu chí ñu

¹ Vaha tyehe ta cunyeé ndo chiin cha ñima ri tuhun cha cuacatyí chí ndo. (Vasi ña tahán chí cha sacoté tuhun mai, soco cuñi chí cha nacotó ndo yoso caa cuñi ra cuan sandavi ñaha ra chí ndo.) Ta yucuan chaha vasi yoso ca caa soco cunyeé ndo cha cuacatyí chí ndo. ² Vatyi cuiñó xain chí ndo. Ta maa Nyoo chahá cha cuiñe chí ndo, vatyi mai ican tyihí chí ndo ityi ra Cristo. Ta cuñi tyi cuiñi ndo chí ra tari noo ñaha tyivaa cha cuiñi xaan ña chí noo ri maa ra cha cuatandaha ña chihin. ³ Soco chicá xiñi cha cuenda ndo, coto cuví chí ndo tari cuví chí cu Eva. Vatyi sandavi ñaha coo chihin maña ti chí ña. Ta coto casandavi ñaha ra cuan chí ndo. Ta coto ndusiin caa cuhva nacacá xiñi ndo tuhun ra Cristo. Ta sandihí ndo tuhun cha sacahnú ndo chí noo tuhun ri maa ra. ⁴ Ta nyoho tañi tyehe xaan ri tyasohó ndo nu cacahán ra tuhun ra Jesús soco ña ndicha ra. Vatyi ñima tuhun ra Jesús cha sacotó ndi chí ndo cuví. Ta vaha xaan cuñi ndo nacacá xiñi ndo siin ca tuhun cha ña chachí tahan chihin tuhun Tatyí Ii Nyoo cha naquehen ndo quivi xihna ri. Ñima tuhun ra Cristo cha sacacú chí yo cacahán ra cuan. Ta nyoho tañi tyehe xaan ri tyasohó ndo chí ra. ⁵ Soco tuví iñi tyi ra cha cacatyí tyi apóstol Nyoo cacuvi ra, ñima ra vaha xaan cuví ra cuan cha nuu yuhu. Soco nyoho, nyicón ndo chí ra. ⁶ Vasi ña ñihí vahí cuhva cahín, cuñi maa ndo. Soco cutuñi vaha iñi tuhun Nyoo. Ta yucuan sañahá ndi chí ndo chihin tandihí cuhva sacuvi ndi.

⁷ O cuñi maa ndo vatyi ña vaha cuhva sacuvi quivi cha cahín tuhun ra Cristo chihin ndo. Vatyi ña quehín yahvi chí ndo. Ta sandundahvi chí cha cuenda cha cuñi cha cacu ndo. ⁸ Ñáyivi inga vehe ñuhu tyinyee ñu chí. Vatyi maa ñu chahá xuhun chí. Ta yuhu quehín xuhun cuan ta sacuvi tyiño nuu ndo. ⁹ Ta quivi cha chinyaí chihin ndo ña chahí tindoho chí ni noo ndo vasi iyó cha chíñuhú chí. Vatyi ra hermano cha quichi coyo nya ityi Macedonia, ican ra chahá tandihí cha chíñuhú chí. Ta saha vavahi cuenda chí vatyi ña cuñi cuhve tindoho chí ndo. Ta tyicuan ri sacuvi que. ¹⁰ Vatyi chitó vahí tyi maa maa ri tuhun ndicha ra Cristo cahín, ta chité tyi ma cuhve cha tinyaa ni noo ndo, cha cuví ndo ñu ityi Acaya chíña, cha vaha cuñi cha ña chíquén cha coo yahvi chí ndo. ¹¹ ¿Ñáá tuhun cha cahín tyehe caa?

¿Atu cha cuenda cha ña cuñi chi ndo? Ñima. Nyoo chitó ra yoso cha cuñi chi ndo.

¹² Ta cuasacuvi que tari cuhva sacuvi mai. Vatyí ña cuñi cuhve ityi chi ra cachicá noo yanga vatyí cacatyí ra tyí sacuvi ra tari cuhva sacuvi ndi soco ña ndicha. ¹³ Vatyí cacatyí ra cuan vatyí apóstol cuví ra. Soco ña ndicha ra. Vatyí cuví ra noo ra sandaví ñaha ta nasahá ra chi ra tari noo ra apóstol ra Cristo. ¹⁴ Ta ihya ñima cha iyo cuñi yo cuví. Vatyí cuihna cuví nasaha ra chi ra tari noo ángel cha xiño tuví chihin cha ndichin Nyoo. ¹⁵ Yucuan chaha ra cha nyicón chi ra ña vaha, nasahá tucu maa ra chi ra tari noo ra cha sacuvi cha vaha. Soco coo quivi cutachi tuñi Nyoo chi ra cha cuenda cha ña vaha cha sacuvi ra.

Tindoho cha nyehé ra Pablo nu chicá noo ra tyiño Nyoo

¹⁶ Inga chaha catyí tiqui chi ndo vatyí ni noo ndo ta ma caca xiñi ndo vatyí loque cha cahín tyehé caa. Soco tatu tyicuan caa chicá xiñi ndo, saña ndo chii na cahin chihin ndo tari noo ra loco. Vatyí tyicuan caa ta cuví sacahnu tucu yuhu chihin chii. ¹⁷ Ñima Sutu Mañi yo catyí chii vatyí sacahni chii tyehé caa. Soco cahín tari cahán noo ra loco. ¹⁸ Vatyí cuaha ra cha cacatyí vatyí tyiño Nyoo cachicá ra, ta ñima, vatyí cahnu xaan casahá ra chi ra. Yucuan chaha cusacahnu tucu yuhu chii ñandihí. ¹⁹ Nyoho, chitó xaan ndo, cuñi maa ndo. Ta quiyi ri tyasohó ndo nu cahán ra cuan. Ta tondo xaan cacuvi ra. ²⁰ Soco nyoho ñahri cuenda ndo cha saniñi ra chi ndo cha sacuvi ndo tyiño nuu ra. Suhú ra chi ndo ta ña tuví iñi ndo. Sandaví ñaha ra chi ndo. Ta ña cuñi nyehe ra chi ndo. Ta nyacua cañi chihin ndaha ra chi ndo. Ta maa ndo cunyeé xaan ndo cha sacuvi ra chi ndo. ²¹ Vasí cahán nuu ndi soco cua catyí ndi, nyuhu vita xaan cuví ndi yucuan chaha ña cañá iñi ndi sacuvi ndi chi ndo tyicuan caa.

Soco inga ra cuan cañá ndicha cuii iñi ra sacotó ra tuhun maa ra. Ta yuhu tucu cañá iñi vasí cahín tari noo ra loco. ²² Tatu ñáyivi hebreo cuví ra, suri cuví tucu yuhu. Ta tatu ñáyivi Israel cuví ra, ican cuví tucu yuhu. Ta tatu vachí ra tata ra Abraham, suri vachí tucu yuhu. ²³ Ta tatu ra sacuvi tyiño nuu ra Cristo cuví ra, vihi ca yuhu. Vatyí yaha ca cuhva sacuvi tyiño nuu ra Cristo. Vasí cahín tari noo ra loco vatyí catyí tyicuan caa. Soco ndicha. Vatyí ñihi ca sahá tyiñe ican saha ra cuan. Ta cha cuaha ca chaha ndohj chihin ñi ican saha ra cuan. Ta cuaha ca chaha ñohj vehe caa ican saha ra cuan. Ta cuaha chaha cha cha yatyin cúvi, soco ña chihj. ²⁴ Ta ohon tahan chaha cacañi ra Israel chii chihin ñi. Cha noo chaha cañi ra chii, oco chahun cumi tahan chaha salvj ra

ñi chate. ²⁵ Ta uñi chaha cañi ra chii chihin yutun. Ta noo chaha cacañi ra chii chihin yuu. Ta uñi tahan chaha nyee barcu cha yihí. Ta chichi cha uñi tahan chaha cuan, noo chaha ndoj nu tyañuhu noo ñuu ta noo quivi. ²⁶ Cha cuaha xaan cha cuví chii nu chica noi. Ta cha cuaha chaha cuñi tyañi chihin yuvi ndutya. Ta cuaha cha cuví chii. Quitá ra suhu nu cuahin. Nyacua nya ra ñui, ra Israel, ta sataśi iñi ra chii. Ta ra inga ñuu ñandihí. Ta cuaha cha cuví chii ityi chichi ñuu, ityi nu chiqui, ityi nu tyañuhu. Ta cuaha cha cuví chii mahñu ra cha catyí vatyí hermano cuví ta ñima hermano cuví ra. ²⁷ Ta ñihi sahá tyiñe ta chitati. Ta cuaha xaan chaha ña quixi. Yahí soco: soco xita ta soco ndutya. Cuaha chaha sahí ayunar, o ña chachí ta nanduqui chi Nyoo cuví cuan. Cuaha chaha yahí cha vichin. Ta ni sahme ta ñahri.

²⁸ Ta siin ri nyaá siqui vatyí sanií que iñi tandihí ndo: nyoho ta ñu inga ñuu cha yihí cuenda Nyoo. ²⁹ Vatyí tatu noo ndo vita cuñi ndo, yuhu tari cha vita cuñi cha cuenda ndo. O tatu sacoo ñu cuatyí nya noo ndo, yuhu quehin tisihi ta ticahan nuu. ³⁰ Tatu cuñi chí cha sacote tuhín tacuhva nacoto ndo tyi ndicha cuví yuhu noo musu Nyoo, cusacote soco cha cuví chii. Vatyí sañahá chí tyi ñahri maa fuerza mai iyó chii. ³¹ Nyoo sutu Sutu Mañi yo Jesucristo, tahán chí cha sacahnú yo chí ra tyicuan ri maa. Ta chitó maa ra vatyí ndicha cha cahín, ñima cuendu cahín. ³² Quivi chinyají Damasco (ñuu nu nicachico yihí barda) ra cha cuví gobernador cha sacuvi tyiño nuu rey Aretas ñuu Damasco cuan, cuatyaq ra chí sindaro yuvehe cahnu ñuu cuan, tyí casahá cuenda ra. Vatyí tatu quite yuvehe ñuu cuan catiín ra chii ta cunyaca ra chii vehe caa. ³³ Soco ñáyivi iyó chaha barda cuan iyó ventana ñu. Ta ityi ventana sanoq ñu chii. Yihí chichi noo tica cahnu. Ta tyicuan caa sacacú Nyoo chii ndaha gobernador cuan.

12

Noo cha chahq Nyoo vatyí nyehé ra Pablo

¹ Ñahri maa ñihí chihin cha cahín tuhun mai, soco cuanacatyí cha sañahq Sutu Mañi yo chii. ² Ñohó nui chí noo ra cha yihí cuenda ra Cristo. Ta cha iyó uchi cumi cuiya quehen Nyoo chí ra ta chahan ra nya nu cu uñi toto andivi. Soco ña chité tatu chahan ra chihin coño ñuhu ra o chihin cha chiñi tuñi xiñi ra. Ña chité. Nya ri ca maa Nyoo chitó ra. ³⁻⁴ Soco chité vatyí ra cuan chinyaca Nyoo chí ra nya nu iyó ñáyivi vaha, ñu cha chihj. Ña chité tatu chahan ra cuan chihin coño ñuhu ra o chihin cha chiñi tuñi xiñi ra. Noo tuhun ri ca maa Nyoo chitó. Ta

nu chahan ra cuan chiñi ra tuhun xehe. Ta ñahri ityi iyó chi ñáyivi cha nacatyí ñu tuhun xehe cuan. ⁵ Tahán chi sacahní chii chihin cha sañahá Nyoo chii quivi cuan. Soco ña sacahní chii cha cuenda cuan. Sacahní chii, soco chihin cha ñahri fuerza mai iyó chii. ⁶ Tatu cuñi tiqui cahín tuhun mai, ñima noo tuhun tondo ri cuví. Vatyí maa maa ri cha ndicha cuacatyí. Soco ma catyí vatyí coto cahnu xaan sahá ñáyivi chii. Vaha ca nyehe ñu cuhva vaha iyé ta cuhva vaha sañahí, tyicuan ta coto ñu tatu ra vaha o ra ña vaha cuví.

⁷ Ña cuñi Nyoo cha sacahnú xain chii chihin cha sañahá ra chii. Yucuan chaha chahá ra cha sanyehé xaan cuihna tindoho chii. Tari uhvi nu quiñi noo iñu cahnu, tyicuan caa uhvi chii. Vatyí tyicuan caa ta ma cuví cuyai chihin cha sañahá Nyoo chii. ⁸ Ta cha uñi chaha chiquen chi Sutu Mañi yo na tinyaa ra tindoho cuan siqui. ⁹ Soco maa Sutu Mañi yo catyí ra chii tyehé caa: “Chahí tandihí cha vaha cha iyó chii chuun. Vatyí yucuan cuví cha chiñuhú chuun. Vatyí tatu ñáyivi ta ñahri maa tunyee iñi maa ñu iyó chí ñu, yucuan ta cuví cunyaa maa maa ri tunyee iñi mai chihin ñu”, catyí ra. Yucuan chaha sii xaan cuñi cha ñahri fuerza mai iyó chii. Vatyí tyicuan caa ta cuví cunyaa tunyee iñi ra Cristo chihin. ¹⁰ Yucuan chaha sii xaan cuñi cha ñahri tunyee iñi mai iyó chii. Vasi cahán ñáyivi chii, vasi chicá nyicon ñu chii, vasi ñahri cha iyó chii, vasi cuaha cha cuví chii, soco sii xaan cuñi cha nyehí tindoho cha cuenda maa ra Cristo. Vatyí tatu ñahri fuerza mai iyo chii, soco ñuhi ca cuñi chihin fuerza maa Nyoo.

Chicá xiñi ra Pablo tuhun ñu yihí cuenda Nyoo ñuu Corinto cuan

¹¹ Cahín tari noo ra loco. Soco maa ndo cuñi ta cahín tyicuan caa vatyí ña sahá ca ndo ñáyivi chii. Vatyí maa ndo tahán chi cuyaa ndo chihin. Vasi noo ra cha ñima ri tuhun cuví yuhu, soco nyaca cuví ra cha catyí tyi apóstol cuví ra, ta ña ndicha ra. Cuñi maa ra tyi vaha xaan ca ra cha nuu inga ra chicá tyiño Nyoo. ¹² Nyehe ndo yoso caa tyiño Nyoo cha sacuvi mahñu ndo. Ta chihin cha cama iñi ta cunyey tandihí tindoho cha nyehí. Ta cuaha xaan milagru sañahá Nyoo chí ndo tacuhva coto ndo vatyí ndicha cha cuví yuhu noo ra chicá tyiño maa ra. ¹³ ¿Atu vaha ca cuhva tyiñuhí chi yañi yo inga ñuu cha nuu nyoho? Ñima. Inuu ri cuhva tyiñuhí chi tandihí ndo. Noo ri cha ña sacuvi chihin nyoho cha ña cuñi cuhve tindoho chí ndo. Saha ndo ticahnu iñi chii tatu ña vaha cuhva sacuvi.

¹⁴ Ta vityin cha iyó vahi cha quichi nyehi nu nyicu ndo. Cha cu uñi chaha vityin. Ta ñahri tindoho tyaf siqui ndo. Vatyí ñima cha

iyó chi ndo vachí nanduquí. Chi maa ndo cuví cha cuñi yuhu. Vatyí sutu, ican tahan chí cuhva cha chiñuhú chí sehe. Ta ñima sehe nducú cha chiñuhú chí sutu. ¹⁵ Yucuan chaha yuhu nyacua sii cuñi cusanaí ta iyó chii cha cuenda cha vaha chí ndo. Ta nyacua sii cuñi cuhve ñáyivi cha cuenda ndo. Soco ta caa ri vatyí tatu cuñi que chí ndo, maa ndo ña cuñi vaha ndo chii.

¹⁶ Ta vasi chitó cachi ndo vatyí ña chahí tindoho chí ndo, soco yihí ndo catyí ndo vatyí sandaví ñahi chí ndo ta ña tuví iñi ndo.

¹⁷ ¿Atu sandaví ñahi chí ndo chihin nya noo ra cha tachí nu nyicu ndo quivi cuan? ¹⁸ ¿Atu sandaví ñaha ra Tito chí ndo quivi tachí chí ra chihin inga yañi yo cuan nu nyicu ndo? Ña sandaví ñaha ra chí ndo. Vatyí nyuhu ña tuhvá ndi sandaví ñaha. Vatyí iñ ri cuhva iyó ndi. Ta iñ ri cuhva sacuvi ndi.

¹⁹ Vasi chicá xiñi ndo vatyí cuahan ndi tumañi iñi chí ndi cha cuenda tuhun cha cahán ndi ihya, soco ñima tyicuan caa. Vatyí tandihí tuhun ihya cahán ndi cha cuenda cha vaha chí maa ndo tacuhva cohon nuu ca ndo chí Nyoo. Vatyí ndicha cha cuñi ndi chí ndo. Ta cahán ndi soco chihin nuu Nyoo ta cha cuenda maa ra Cristo. ²⁰ Chicá xiñi coto iñi ndaa iñi noo nyicú ndo ta chaí. Ta ma cutahan iñi cuhva nyicú ndo. Ta maa ndo ma cutahan iñi ndo cuhva cucahin chí ndo. Yuhví coto coo tisihi, coto nya ndo quichí cuví iñi ndo cha chii noo tahan ndo, coto nya ndo cuxaán ndo chí tahan ndo, coto nducú ndo maa maa ri cha vaha chí maa ndo, coto nya ndo ñii ca ndo cuendu, coto cahán cuehe ndo chí tahan ndo, coto nya ndo cahnu sahá ndo chí ndo. Yuhví coto nyehi tyi ña cachi ña ndaa nyicú ndo. ²¹ Ta yuhví coto cha cuhin inga chaha nu nyicú ndo, Nyoi cuhva ra cha cucahan nui cha cuenda nyoho. Ta chicá xiñi coto quita ndutya nui cha cuenda cha nyacuvi ndo. Vatyí yihí ndo sacuvi ndo cuatyí nu quichí quivi. Ta nya vityin ta ña ndu uví iñi ndo cha ca iyó ndo chihin ñusihí ta ñima ñasihí ndo cuví, ta iyó ndo chihin rayii ta ñima yí ndo cuví. Ta ña sandihí ndo tuhun cha sacuvi ndo ñáa ndihí cha ña vaha.

13

Chahá ra Pablo tuhun chí ñu Corinto, na saha vaha ñu cuenda chí ñu tatu vaha cuahan ñu chihin Nyoo

¹ Quivi cha cuquichi inga chaha nu nyicu ndo cuví chí chaha cu uñi. Yucuan ta cuví cundaa tyiño ñu cha sacuvi cuatyí. Soco cuñi chí uvi o uñi cha ndaa. ² Vatyí quivi chahín nu nyicú ndo cha cu uvi chaha, catyí chí ra sacuvi cuatyí cuan, na sandihí ra tuhun. Ta vityin catyí tiqui inga chaha chí ra, ta chí tandihí ndo. Vatyí tatu cha quichi inga chaha, ta sacuvi ca ndo cuatyí cuan, ma

cundahvi cuñi nyehi chi ndo. ³ Tyicuan ta coto ndo cha cuñi xaan ndo coto ndo. Vatyí ndicha ndicha cha chihin fuerza maa ra Cristo cahín. Vatyí ra Cristo ñima noo ra ñima ri tuhun cuví ra. Yucuan chaha sañahá ra tunyee iñi ra chi ndo. ⁴ Ndicha vatyí chihí ra nu cruzi tari noo ra cha ñahri tunyee iñi iyó chii. Soco nandotó ra ta iyó ra chihin tunyee iñi Nyoo. Ta tyicuan caa tucu maa ndi vasi ñahri fuerza maa ndi iyó chi ndi. Soco ñin ri cuví ndi chihin ra Cristo. Ta iyó ndi chihin tunyee iñi maa Nyoo vatyí tyicuan caa ta cuví tyinyee tucu nyuhu chi nyoho.

⁵ Saha ndo cuahán ndo chihin Nyoo. Saha ndo cuenda vatyí ra Cristo ñohó ra añima ndo tatu chinó vaha iñi ndo chi ra. Soco tatu ñima chihin cha ñi iñi ndo cuahán ndo chata Nyoo, ra Cristo ña nyaá ra chihin ndo. ⁶ Soco chitó vahi tyi coo quivi cunacoto ndo tyi vaha cuhva tyinyeeé ndi chi ndo tacuhva cuví cahun vaha ndo chihin ra Cristo. ⁷ Ta chicán tahvi xaan ndi chi Nyoo chaha ndo, tacuhva vatyí ma sacuví ndo cha ña vaha. Ñima cha cuñi ndi tyi catyí ñáyivi tyi vaha ndi. Soco cha cuñi ndi vatyí nyoho sacuví ndo maa maa ri cha vaha. Ñahri saha vasi catyí ñáyivi, an vaha, an ña vaha cuhva cha sacuví ndi. ⁸ Vatyí nyaá siqui ndi cha sacuví ndi cha vaha. Ma cuví tixehe ndi tuhun ndicha. Noo ri cha cuví sacuví ndi, cha sañahá ndi tuhun ndicha. ⁹ Yucuan chaha cusii xaan cuñi ndi cha ñahri fuerza maa ndi iyó chi ndi, ta cuhva tyi nyee cuñi ndo chihin fuerza maa Nyoo. Ta tyicuan ri chicán tahvi ndi chaha ndo na vaha ca cahun ndo chihin Nyoo nyacua nya cha ñahri ca cumañi chi ndo. ¹⁰ Sacuhín carta ihya chi ndo cha ñi ri ca cha cumañi quichi nu nyicú ndo. Vatyí sanduvaha ndo chi ndo. Tyicuan ta ma cuñi ca chi cha cahín chi ndo quivi chai nu nyicu ndo. Vatyí ndicha cha chahá Nyoo ityi chíi cha sahí cuenda chí ndo. Soco chahá ra tyiño ihya chíi vatyí sandunyeé que iñi ndo. Ta ñima cha sandu-cuihyá ndihi que iñi ndo.

¹¹ Ta nu ndihi cahín, yañi, catyí chi ndo, na nducu ndo cuhva nicoo vaha ndo ta sii cuñi ndo. Nanducu ndo cuhva coo cuñi ndo nuu Nyoo cha ñahri cumañi chi ndo. Na cunii iñi ndo, na coo vaha ndo chihin tahan ndo. Ta Nyoo ra cuñi xaan chí ndo, ta ra chahá cha taxi coo añima ndo na cunyaa ra chihin ndo. ¹² Ta nacuhva maa ndo nocumi chi noo noo tahan ndo chihin cha sii cuñi ndo nyehé ndo chí ñu. ¹³ Ta vachí nocumi chí ndo sahá tandihí ñu yihí cuenda Nyoo ñuu ihya.

¹⁴ Naçuhva Sutu Mañi yo Jesucristo cha vaha coo añima ndo. Ta načoto ndo tyi Nyoo cuñi xaan ra chí ndo. Ta na cunyaa Tatyí Ii ra chihin ndo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Itiy Galacia Cha Yihí Cuenda Nyoo

Ra Pablo tyaá ra noo carta chi ñu itiy Galacia cha yihí cuenda Nyoo

¹ Yuhu ra Pablo cuví noo apóstol. Soco ñima ñáyivi tachí chii. Ta ñima rayi catyí vatyi ñihí yuhu tyiño ihya. Soco maa ra Jesucristo ta maa Nyoo Sutu yo chahá ra tyiño ihya chii. Vatyi ican Nyoo sanandotq chí ra Cristo mahñu ñu chihí. ² Yuhu ta tandihi yañi yo cha nyicú chihin, tyaá ndi carta ihya chí nyoho ñu yihí cuenda Nyoo tandihi vehe ñuhu Galacia. ³ Nyoo Sutu yo ta Sutu Mañi yo Jesucristo nasoco ra chí ndo ta nacuhva ra cha taxi ri coo añima ndo. ⁴ Vatyi maa ra Jesucristo chahá ra ñáyivi ra tyiño nuu yo cha catyí cuatyí yo. Vatyi tacuhva sacacú ra chí yo mahñu ñu quíñi iyo cha iyó síqui ñuhu ñáyivi ihya vityin. Vatyi tyicuan caa tyaá maa Nyoo Sutu yo cuhva tyi sacuvi ra Cristo. ⁵ Yucuan chaha na sacahnu yo chí maa Nyoo tyicuan ri maa. Ta na cuví chí tyicuan caa.

Ñahri ca inga cuhva cuví cacu añima yo

⁶ Iyo xaan cuñí vatyi nyoho numi xaan cuahan sandoó ndo chí Nyoo, ra nacana chí ndo tyi nicoo vaha ndo chihin ra cha cuenda tumañi iñi cha sahá ra Cristo chí yo. Ta vityin siin caa ityi natyihí ndo cuahan ndo. Ta cuñi maa ndo tyi cucacu ndo chihin cuan. ⁷ Soco ñahri ca inga cuhva cuví cacu añima yo. Soco iyó ra cuñí satondo xiñi ndo. Ta cuñí ra sativi ra tuhun cha sacacu ra Cristo chí yo. ⁸ Ñahri saha, an cuví ri nyuhu, an cuví ri noo ángel cha quichi nya andivi, soco tatu tyehe ta cahán noo ndi tuhun ra Cristo nuu ndo, ta siin caa, ta ñima tari cuhva sañahá ndi chí ndo quivi cuan, Nyoo cutachí tuñi ra chí ndi. ⁹ Cha catyí tuhun ihya chí ndo quivi cuan soco cuacatyí tiqui inga chaha chí ndo vityin. Tatu yóó cha cahán tuhun cha cacú añima yo chihin ndo ta siin caa, ta ñima cuhva cha chíñi ndo quivi xihna ri, Nyoo cutachí tuñi ra chí ra cahán tyicuan caa.

¹⁰ Cha catyí tuhun ihya chí ndo, ñima cha nduquí cuhva savahi chí nuu ñáyivi. Soco nduquí cuhva savahi chí nuu Nyoo. Tyehe ta nduquí cuhva savahi chí nuu ñáyivi, ñima noo ra sacuvi tyiño nuu ra Cristo cuví.

Yoso caa cha nanduví ra Pablo noo ra chicá tyiño Nyoo

¹¹ Soco coto ndo tuhun ihya yañi, vatyi tuhun ra Cristo cha cahán yuhu, ñima tuhun

cha ndichí xiñi ñáyivi cuví. ¹² Ñima ñáyivi sañahá chii. Yori sañahá chii. Soco suri maa ra Cristo sacotó chii.

¹³ Vatyi nyoho chíñi ndo yoso caa chinyacuvi quivi cuan, quivi ñohí cuenda ñu Israel. Ta chíto ndo yoso caa cha xaan chica nyiquen chí ñu yihí cuenda Nyoo. Ta nduquí cuhva sativi cuhva chinó iñi ñu. ¹⁴ Ta ñohí cuenda ñu Israel, yuhu cuví ra cuahan itiyí nuu ca ta ñima ca suhva ca ra tahin cha in ri cuiya ndi. Vatyi cuñí xaan que sacuvi yoso cuhva chinyacuvi maa sutu chahni ta itiyí chata ca. ¹⁵ Soco nya ta ni cumañi caqui ta tyaá Nyoo cuhva tyi cusaha ra tumañi iñi chí. Ta nya cha chaa maa chí quivi cha tyaá ra cuhva, yucuan ta nacana ra chí. Vatyi cuñí xaan ra chí. ¹⁶ Ta tyicuan caa sacuví ra vatyi cohon nui chí Sehe ra. Tacuhva vatyi cahin tuhun Sehe ra, ra Cristo, chihin ñáyivi cha ñima ñu Israel cuví, tacuhva cacu añima ñu. Ta quivi cha cuví tyehe caa, ña nduquí cuhva cha catyí ñáyivi chí ñáa cha tahán chí sacuvi. ¹⁷ Ta ni ña chahín nya Jerusalén nu canyicu ra apóstol, vasi cha chicha ca ra chihin tuhun Nyoo, vatyi maa ra cha naha caná Nyoo chí ra ta ñima ca yuhu. Soco chahín nya Arabia. Tyicuan ta cuanuhu tiqui inga chaha nya Damasco.

¹⁸ Cha yaha uñi cuiya tyicuan ta chahín nya Jerusalén, ta chicohon nui chí ra Pedro. Ta ndoj chihin ra chahun quivi. ¹⁹ Soco ña nyehí chí inga apóstol. Noo ri ra Jacobo yañi Sutu Mañi yo nyehí. ²⁰ Ta chihin nuu Nyoo ta catyí chí ndo vatyi tuhun cha catyí chí ndo nu tutu ihya, cha ndicha cuví.

²¹ Cha yaha cha chahín Jerusalén ta chahín itiyí Siria ta itiyí Cilicia. ²² Soco ra yañi yo cha canyicu vehe ñuhu ra Cristo cha nyaa nicacahnu Judea, ña ñohó nuu maa ra chí. ²³ Tacuhva cha cachiñi ri ra cahán ñu tuhun, vatyi catyí ñu: “Ra cha chica nyicon chí yo quivi cuan, vityin cahán noo ra nuu ñáyivi na nachino iñi ñu chí ra Cristo. Ta quivi cuan cuñí ra sativi ra tuhun ra Cristo”, catyí ñu. ²⁴ Ta ra canyicu vehe ñuhu ra Cristo casacahnu ra chí Nyoo cha cuenda cha sacuví Nyoo chihin tyicuan caa.

2

Ra nyisó tyiño vehe ñuhu Jerusalén, ndoó ra vaha cuhva sahá tyiño ra Pablo

¹ Cha yaha cha uchi cumi cuiya, chahín Jerusalén inga chaha chihin ra Bernabé. Ta chahan ra Tito chihin ndi. ² Chahín nyicuan vatyi maa Nyoo sañahá chí vatyi tahán chí cuhin Jerusalén. Ta nacatyí chí ñu yoso caa sañahí tuhun ra Cristo chí ñu cha ñima ñu Israel cuví. Quita siin chihin ra cha canyiso tyiño vehe ñuhu, ta chahí cuenda chí ra yoso caa tuhvé cahin chihin ñu. Coto ma candoo ra vaha ta cacatyí ra vatyi yuhu sahá tyiño

caha ri mai. ³ Soco candoq ra vaha. Vatyí ni ri chi ra Tito ta ña saniñi ra cha sacuvi ra costumbre circuncisión. Ta ra Tito ñima ra Israel cuví ra. ⁴ Ndicha vatyí quihvi xehe suhva ra cha catyí vatyí yañi yo cuví chi ra, soco ñima. Vatyí cuñi ra nyehe nyaa ra cuhva iyó yo. Vatyí libre iyó yo cha cuenda ra Cristo Jesús. Soco cuñi ra cuan tyi cunyaca ñaha tucu ley chahnu chi yo. ⁵ Soco ni noo cuhva ta ña chahq ndi cha cunyaca ñaha ra cuan chi ndi. Vatyí cuñi ndi vatyí nyoho ma saña ndo cha ndicha tuhun ra Cristo cha cacu añima yo.

⁶ Soco maa ra canyisó tyiño vehe ñuhu, ñahri tuhun chaa chahq ra chii. Ta vasi cahnu tyiño canyisó ra cuan, soco cha cuenda chi yuhu, ñahri saha. Vatyí Nyoo ña sahá ra cuenda cuhva tyiño nyisó yo. Soco añima yo sahá ra cuenda. ⁷ Cha nuu cha catyí ra canyiso tyiño vehe ñuhu cuan chii ñáá ndihí tuhun, maa ra canacoto ra vatyí maa Nyoo tachí chii vatyí cahín tuhun ra Cristo chihin ñu cha ñima ñu Israel cuví. Tari tachí ra chí ra Pedro vatyí cucahan ra suri tuhun ra Cristo cuan chihin ñu Israel. ⁸ Vatyí suri maa Nyoo tachí chí ra Pedro tyi cuví ra apóstol cuenda ñu Israel. Ta tachí tucu ra chí yuhu tyi cuví apóstol ra Cristo cuenda ñu cha ñima ñu Israel cuví.

⁹ Yucuan chaha ra Jacobo, ra Pedro ta ra Juan ra cacuvi nuu yucuan, nicohón nuu ra vatyí Nyoo chahá ra tunyee iñi chii cha cahín tuhun ra Cristo chihin ñayivi. Ta chahq ra ndaha ra chii, ta chí ra Bernabé vatyí candoq ra vaha cha sahatyiño ndi mahñu ñu cha ñima ñu Israel cuví. Ta maa ra casahatyíño ra mahñu ñu Israel. ¹⁰ Noo ri vatyí catyí ra chí ndi vatyí na nichon iñi ndi ta natyinyee ndi chí ñu ndahvi. Ta ican cuví cha nanducú xain cuhva sacuvi tandihí quivi.

Ra Pablo cahán ra chí ra Pedro vatyí ña vaha cha nyacuvi ra

¹¹ Soco quivi chahan ra Pedro ñuu Antioquía, cahán vavahi chí ra chihin nuu ra vatyí ña vaha cha nyacuvi ra. ¹² Vatyí cha xihna ri vaha sacuvi ra vatyí chachí ra chihin ñu cha ñima ñu Israel cuví, nyacua nya cha chaq suhva ñayivi Israel cha tachí ra Jacobo. Tyicuan ta quichaha ña chachí ca ra chihin ñu. Tyicuan caa sacuvi ra vatyí yuhví ra coto cahán ra itá iñi costumbre circuncisión cha chaq coyo cuan chí ra. ¹³ Tyicuan ta inga ra Israel cha yihí cuenda ra Cristo ndu ñin ri ra chihin ra Pedro. Ta sacuvi ra cha ña vaha cuan. Vatyí ndu uví yuhu ra tari ndu uví yuhu ra Pedro. Ta nyacua nya ra Bernabé ta ndutahan ra chihin ra. ¹⁴ Soco nyehí vatyí ña vaha cuahán nyacuvi ra. Ñima tari cuhva catyí tuhun ra Cristo. Yucuan chaha catyí chí ra Pedro chihin nuu tandihí ñu canyicu

cuan: “Yoho cuvún noo ra Israel. Ta iyón tari iyó ñayivi cha ñima ñu Israel cuví. ¿Yoso caa cha cuñún saniñun chí ñu tyi sacuvi ñu costumbre cha sacuvi ñu Israel? Ta ni maun ta ña sacuvi con”, catyí yuhu chí ra.

¹⁵ Maa yo cha cuví yo ra Israel nya ta cacu yo, ña sacuvi yo cuatyí tari sacuvi ñu cha ñima ñu Israel cuví. ¹⁶ Soco chitó yo vatyí ma cuví saváha yo chí yo nuu Nyoo chihin cha nanducú yo cuhva sacuvi yo ley chahnu cha tyaq ra Moisés. Soco nduvahá yo nuu Nyoo cha cuenda cha chinó ri iñi yo chí ra Jesucristo. Yucuan chaha chinó tucu iñi maa yo chí ra. Vatyí tyicuan caa ta nicoo vaha yo chihin Nyoo. Ta ñima cha cuenda cha nducú yo cuhva sacuvi yo cha catyí ley. Vatyí ni noo yo ta ña nduvahá yo nuu Nyoo chihin cha nanducú yo cuhva sacuvi yo cuhva catyí ley chahnu.

¹⁷ Soco vityin tatu nducú yo cuhva nduvaha yo nuu Nyoo cha cuenda ra Cristo, cuñi chí catyí vatyí nacoto yo tyi iyó tucu cuatyí yo tari iyó cuatyí ñu cha ñima ñu Israel cuví. Tatu tyicuan caa, ¿atu cuñi chí catyí vatyí ra Cristo sacuvi ra tyi iyó cuatyí yo vatyí sandoq yo ley ta nachino iñi yo chí ra? Ñima. ¹⁸ Soco tyehe ta naquehen tucu yo ley cha cha yaha sandoq yo, yucuan ndicha coo cuatyí yo. ¹⁹ Vatyí ley cuan sañahá chí chii vatyí tahán chí cuví, ta yucuan chaha sandihí tuhun cha nduqui cuhva caqui chihin ley cuan, ta chihí cha cuenda chí cuví cuan, tacuhva cuví coi cha cuenda Nyoo. ²⁰ Yuhu, tari cha chihí nuu cruzi ñin ri chihin ra Cristo. Ta ñima ca ñayivi mai iyé soco ra Cristo iyó ra añime. Ta ñayivi ra cha iyé vityin, iyé soco chihin cha chinó iñi chí ra cha cuví ra Sehe Nyoo. Ican ra cuñi ra chii, ta chihí ra cha catyí cuatyí yuhu. ²¹ Ña cuñi yuhu sacuachiye cha vaha Nyoo. Vatyí tatu tyehe ta cuví cacu añima yo cha cuenda ley, ñahri tuhun chihí ra Cristo cuví chí cuan.

3

Naquehén yo Tatyí Ii Nyoo cha cuenda cha chinó iñi yo chí ra Cristo

¹ ¡Ñana cha tondo iyó nyoho ñu canyicu Galacia chiña! ¿Yóo cha sativi chí ndo vatyí ña cuñi ca ndo quichaha ndi tuhun cha ndicha? Cachi xaan chahq ndi cuenda tuhun ra Jesucristo chí ndo. Ta cutuñi vaha iñi ndo ñáa cuenda chihí ra nu cruzi. ² Noo ri cuñi ndaca tuhín chí ndo. ¿Atu naquehen ndo Tatyí Ii Nyoo cha cuenda cha sacuvi ndo cha catyí ley ra Moisés, o cha cuenda cha chinó iñi ndo tuhun ra Cristo cha chiñi ndo? ³ ¿Yoso caa cha tondo xaan iyó ndo vityin? Ta quivi xihna ri vaha xaan quichahq ndo chí Nyoo chihin tunyee iñi Tatyí Ii ra. Soco vityin, ¿yoso caa cuñi ndo coo ndo ñayivi chaa chihin fuerza maa ndo? ⁴ ¿Atu cha

caha ri nyehe ndo cha sacuví Tatyí Ii Nyoo chíhin ndo? Ñima cha caha ri cuví, cahví íñi. ⁵ ¿Ñáá tuhun चाहá Nyoo Tatyí Ii ra chí ndo, ta sacuví ra milagru mahñu ndo? Ñima cha cuenda vatyi nducú ndo cuhva sacuvi ndo cha catyí ley, soco cha cuenda vatyi chinó íñi ndo tuhun ra Cristo cha chíñi ndo.

⁶ Ra Abraham, chinó íñi ra tuhun चाहण Nyoo chíhin ra, yucuan chaha cuví ra noo ra vaha nuu Nyoo. ⁷ Yucuan chaha tahán chí coto ndo vatyi ñu cha ndicha cuví ñáyivi chí ra Abraham, ican ñu cuan chinó íñi ñu chí Nyoo. ⁸ Ta cha naha ndoq tuhun Nyoo nu tutu. Ta catyí chí vatyi nu cuahán ca chí quívi, cusacuví Nyoo tyi nduvaha ñáyivi cha ñima ñu Israel cuví nuu ra cha cuenda cha chinó íñi ñu chí ra. Yucuan chaha catyí Nyoo chí ra Abraham ta cha naha: “Tandíhi ri maa ñu cunasoque cha cuenda maun”, catyí Nyoo chí ra. ⁹ Yucuan chaha ñu cha chinó íñi chí ra Cristo, Nyoo nasocó ra chí ñu ñin ri chíhin ra Abraham, vatyi chinó íñi tutu maa ra.

¹⁰ Ñu cha itá íñi ley cha tyaa ra Moisés, cutachi tuñi Nyoo chí ñu. Vatyi tuhun Nyoo catyí. “Tandíhi ñu cha ña sacuví tandíhi cuii maa tuhun cha nyaá nu libru ley cuan, cutachi tuñi Nyoo chí ñu.” ¹¹ Ta ndicha vatyi yorí yo nduvaha yo nuu Nyoo cha cuenda cha itá íñi yo ley cuan. Vatyi tuhun Nyoo catyí chí: “Ra nduvahá nuu Nyoo cha cuenda cha chinó íñi ra, coo ra ñáyivi”, catyí tuhun Nyoo. ¹² Ta ley ra Moisés ña cu ñin ri chí chíhin cha chinó íñi yo chí ra Cristo. Vatyi catyí ley cuan: “Yóo ñu cha sacuvi tandíhi cuii ley ihya, coo ñu ñáyivi cha cuenda cuan”, catyí chí.

¹³ Ra Cristo natavá ra chí yo ndaha ley cha catyí tyi tahán chí cutuñi chí yo cha cuenda cuatyí yo. Vatyi maa ra nanduví ra noo ra iyó cuatyí tyiño nuu yo. Vatyi catyí tuhun Nyoo: “Ñima ra vaha cuví ra cha chíñi ta tacaá nu yutun.” ¹⁴ Tyicuan caa cuví tacuhva vatyi cha cuenda ra Cristo Jesús ta nasocó Nyoo chí ñáyivi cha ñima ñu Israel cuví, tari catyí ra chí ra Abraham tyi cunasoco ra chí ra. Ta chíhin cha chinó íñi yo chí Nyoo, naquehén tandíhi yo Tatyí Ii cha catyí Nyoo tyi cuhva ra chí yo.

Ley चाहनु साहारा चि चि यो वतयि इयó वतयि यो, soco ña sacacú chí chí yo

¹⁵ Yañi, cuacuhve noo cuhva chí ndo, cuhva iyó yo síqui ñuhu ñáyivi ihya. Tatu noo ra catyí ra vatyi cucuhva ra cha cucuhva ra chí inga ra. Ta tatu cha yaha tyihí ra firma, yorí cuví satani. Ta yorí cuví natyiso suhva ca síqui. ¹⁶ Ta vityin, Nyoo catyí ra tyi cucuhva ra cha cucuhva ra chí ra Abraham ta chí nonga ra cha vachí tata ra. Ña catyí nu tutu Nyoo vatyi cuhva ra chí cuaha ra vachí tata ra, soco chí nonga ri ra. Ta ican

ra cuan cuví ra Cristo. ¹⁷ Cha catyí yuhu, ican cuví ihya: Nyoo natyihí tahan ra tuhun chíhin ra Abraham. Ta ñin ri tuhun चाहन ra. Tyicuan ta yaha cumi ciento oco uchi cuiya ta चाह ley cha tyaa ra Moisés. Soco ma cuví casi ley cuan nu natyihí tahan Nyoo tuhun chíhin ra Abraham. Ta ma cuví casi chí nu naquehen yo cha catyí Nyoo tyi cuhva ra chí yo. ¹⁸ Tyehe ta naquehén yo cha tahán chí chí yo cha cuenda ley ra Moisés, cha caha ri cuví tuhun natyihí tahan Nyoo chíhin yo. Soco vatyi Nyoo catyí ra chí maa ra Abraham vatyi cuhva maa ra chí ra.

¹⁹ Tatu tyicuan caa, ¿ñáá cuenda vaha ley ra Moisés? Chaha Nyoo ley cuan soco cha yaha catyí ra tyi cuhva ra cha cucuhva ra chí yo. Vatyi ley cuan sanatuvi chí cuatyí yo. Ta ndoq chí nyacua nya quívi quichí ra Cristo ra cuví tata ra Abraham. Ta chí maa ra Cristo catyí Nyoo tyi cuhva ra cha cucuhva ra. Ta ángel Nyoo चाहण cuenda ley cuan chí ra Moisés. Ta ra Moisés चाहण ra chí ñáyivi. ²⁰ Soco Nyoo noo tuhun ri maa ra चाहण ra chíhin ra Abraham quívi cuan. Ta ña chíñuhú cha nducu ra noo ra nacatyí tuhun cuan chí ra Abraham.

²¹ ¿Atu cuñí chí catyí vatyi ley cha tyaa ra Moisés ña chachí tahan chíhin cha catyí Nyoo tyi cuhva ra chí yo? Ñima. Soco tyehe ta cuví coo yo ñáyivi chaa cha cuenda ley cuan, yucuan ndicha nduvaha yo nuu Nyoo cha cuenda chí. Soco ma cuví. ²² Vatyi catyí nu tutu Nyoo tyi iyó cuatyí tandíhi cuii ñáyivi. Vatyi tyicuan caa ta ñu chinó íñi chí ra Jesucristo cuví ñiñi ñu ñáyivi chaa cha catyí Nyoo tyi cuhva ra chí yo.

²³ Ta ni cumañi ca quichi tuhun cha chinó íñi yo chí ra Cristo, ley cuan chicumí chí chí yo tari cha ñohó yo vehe caa. Vatyi nyatu yo nyacua nya sañaha Nyoo chí yo yoso caa chino íñi yo chí ra. ²⁴ Ta ley cuan cuví tari noo ñu cha sahá cumi chí ra cuatyaa. Vatyi ley saha cumi chí yo tari ra cuatyaa nyacua nya quívi quichí ra Cristo. Ta cuví chinó íñi yo chí ra ta nduvaha yo nuu Nyoo. ²⁵ Ta vityin cha chaa quívi cha chinó íñi yo chí ra Cristo, ña sahá cumi ca ley cuan chí yo tari noo ra cuatyaa.

²⁶ Vatyi tandíhi yo cuví yo sehe Nyoo vatyi chinó íñi yo chí ra Cristo Jesús. ²⁷ Ta tandíhi yo condutyá yo ta ndu ñin yo chíhin ra Cristo. Vatyi nyaá ra añima yo. ²⁸ Ña ñiñi xaan ca cha cuví yo, an ñu Israel, an ñu Grecia, an cuví ri yo ñu libre iyó, an cuví yo ñu iyó chítoho. An cuví yo rayí, an cuví yo ñusihi, soco ña chíñuhu ca cuan. Vatyi cha ñin ri cuví yo chíhin ra Cristo, noo ri cuví yo chíhin ra. ²⁹ Ta tatu cuenda ra Cristo yihí ndo, ndicha cha ñáyivi vachí tata ra Abraham cuví ndo. Ta ñihí ndo cha catyí Nyoo chí ra Abraham tyi cuhva ra chí ra.

4

¹ Cuacuhve minoo cuhva chi ndo. Noo ra cuehe tatu chihí sutu cue, ta sandoq sutu cue tandihí cha tyayii ra chi cue, ra cuehe ihya ma cuví cotyiño ñaha cue cha tyayii sutu cue. Nyacua nya quivi cuahnu cue ta cuví cotyiño cue. Ta cha ní ri ca cha ta cuahnu ca cue, cuví cue tari noo musu ri. Vasi chí maa cue cuví tandihí cha tyayii sutu cue. ² Iyó ra cumí chi cue nyacua nya chaa cuiya cue cha catyí sutu cue, tyi naquehen cue cha tyayii cuan. ³ Ta tyicuan caa cuví maa yo. Cha ní ri ca cha ta quichí ca ra Cristo, cuví yo tari noo musu ri chí cha nyacá ñaha siqui ñuhu ñayivi. ⁴ Soco quivi tahan chí, Nyoo tachí ra chí Sehe ra, sacacú noo ñaha sihi chí ra. Ta chinyacá ñaha ley chahnu chí ra. ⁵ Tachí Nyoo chí ra tacuhva sacacú ra chí yo ndaha ley cuan. Vatyí tyicuan caa ta Nyoo naquehén cuenda ra chí yo tari sehe ra.

⁶ Ta vatyí sehe ra nanduví yo, Nyoo tachí ra Tatyí Ii ra Cristo cunyaa ñaíma yo. Ta cha cuenda Tatyí Ii ra caná chaa yo chí Nyoo ta catyí yo: “Sutu Mañi yuhu.” ⁷ Yucuan chaha sehe Nyoo cuvun ta ñaíma ca noo musu ri. Ta cha cuenda cha cuvún sehe Nyoo, chahá ra cha vaha cha tahán chí chuun cha cuenda ra Cristo.

Chicá xiñi ra Pablo cha cuenda ñu yihí cuenda Nyoo

⁸ Quivi ta cohon nuu ca ndo chí Nyoo, cuví ndo musu noo cha ñaíma Nyoo cuví. ⁹ Soco vityin ñohó nuu ndo Nyoo, o maa Nyoo ñohó nuu ra chí ndo. ¿Yoso caa cha cuñí ndo natin tucu ndo noo tuhun ndahví cha ñaíma ri tuhun, ta nanduví tucu ndo musu inga chaha? ¹⁰ Nyoho sanducahnú ndo quivi vico, quivi natyácá yoo, ta vico cuiya. ¹¹ Yuhví xain coto vaha ñahri maa tuhun sahá tyiñe chihin ndo.

¹² Yañi, chacú ndahví nuu ndo na nanduví ndo tari mai (cha ña nyacá ñaha ca ley chí). Vatyí yuhu cha nanduví tari maa ndo, soco ñaíma cha sativi ndo chí. ¹³ Vatyí cha chitó ndo quivi chahan nui ñuu ndo yihí noo cuehe chí. Ta chahá chí cuhva chahin tuhun ra Cristo chihin ndo. ¹⁴ Ta cuehe cuan cuví tari noo prueba cha cuenda vatyí ña tyaa xiin ndo chí. Soco vaha naquehen cuenda ndo chí, tari noo ángel Nyoo, ta tari cha vatyí suri maa ra Cristo cuví. ¹⁵ ¿Nya nyaa cha sii xaan cuví chí ndo chihin vityin? Vatyí yuhu cuví cha ndaa vatyí quivi cuan, nyacua caña iñi ndo catava ndo chíti nuu ndo ta cuhva ndo chí, tyehe ta cuví nduvahi chihin cuan. ¹⁶ Ta vityin, ¿atu cuñí maa ndo tyi nanduví yuhu noo ra cha xaan chahu iñi ndo cha cuenda vatyí catyí cha ndicha chí ndo?

¹⁷ Ñáyivi cuan, cuñí xaan ñu chí ndo, catyí ñu. Soco ñaíma chihin cha vaha. Vatyí cha cuñí ñu cuan, cha sacanyaha ñu chí ndo chí ndi. Ta cunyicon ndo chí maa ñu. ¹⁸ Soco vaha cha cuñí yo chí ñáyivi, soco chihin cha vaha, ta tyicuan ri maa. Ta ñaíma in yaha ri cuhva cha nyaa ri yuhu chihin ndo. ¹⁹ Sehe luhlí, inga chaha nyehí tindoho ta cha uhví cha catyí ndo. Tari noo sihi cha yihí cha uhví chí ña tatu nyacacu sehe ña. Ta cunyehe que tindoho cuacua nya ndunyehe vaha ndo chihin fuerza maa ra Cristo. ²⁰ Vaha tyehe ta nyaí chihin ndo vityin vityin. Tacuhva cuví cahan vii chihin ndo inga cuhva. Vatyí ña chité yoso caa caca xiñi cha cuenda ndo.

Nacoo yo cha cuenda Nyoo ta ñaíma ca cha cuenda ley chahnu

²¹ Nyoho cha cuñí ndo cha cunyaca ñaha ley ra Moisés chí ndo, catyí ndo chí. ¿Atu ta cuñí ca ndo cha catyí ley cuan? ²² Catyí chí vatyí ra Abraham chiyó uvi tahan sehe ra. Noo sehe ra chiyó chihin ñaha cha cuví musu ñasihi ra. (Chinañi ña Agar.) Ta nonga sehe ra chiyó chihin cu Sara cha cuví ñasihi vaha ra. ²³ Cacú sehe ñaha cha cuví musu cuan tari cacú tandihí ra cuatyaa. Soco sehe ñasihi vaha ra Abraham cacú cue tacuhva chino cava cha catyí Nyoo chí ra Abraham vatyí cuhva ra noo sehe chí ñasihi ra. ²⁴ Ta chihin ihya iyó noo cha cuñi chí catyí chí chí yo. Ninduvi ñusihi cuan cuví ñu tari uvi tahan tuhun cha natyihí tahan Nyoo chihin yo. Noo tuhun cuan cuenda yucu Sinaí. Ta ñáyivi yihí cuenda ley cuan cuví ñu tari cu Agar, vatyí noo musu ri cuví tucu maa ña chihin sehe ña. ²⁵ Tari cu Agar, ta tari yucu Sinaí cha nyaá Arabia, tyicuan caa tucu ñuu Jerusalén quivi vityin. Vatyí ñáyivi ñuu cuan nyaá ñu ndaha ley chahnu. Tari noo musu ley cuan cuví ñu. ²⁶ Soco nya andivi iyó inga Jerusalén, cha cuví ñuu yo. Ta yori nyacá naha chí chí. Ta cuví chí tari sihi yo. ²⁷ Ta catyí tuhun Nyoo:

Cusi iñi yoho, ñaha sihi cha ña cuví coo sehe. Yoho yori sehun.

Caña chaa chihin cha sii cuñun, yoho cha ña ñohó nuu cha uhví cha cacu sehe.

Vatyí ñaha sihi cha sanandoq yí chí, coo ca sehe ña ta ñaíma ca ñusihi cha iyó yí, catyí tuhun Nyoo.

²⁸ Yañi, yoó cuví yo tari ra Isaac, ra cuví sehe cu Sara. Cuví yo sehe ra Abraham cuenda tuhun cha natyihí tahan Nyoo chihin ra. ²⁹ Ta ra cha cuví sehe ñaha cha cuví musu cuan xaan iñi ra chí ra Isaac cha cuví sehe ñasihi vaha ra Abraham. Tyicuan caa cuví tucu vityin. Ra cha cuñi vatyí sacuví yo cha catyí ley, xaan iñi ra ta chicán nyicon ra chí yo cha cuví yo ñáyivi nacacú chaa chihin Tatyí Ii Nyoo. ³⁰ Soco ¿ñáá cha catyí tuhun Nyoo? Catyí chí: “Tava ñehe chí ñaha cha

cuví musu cuan chihin sehe ña. Vatyí sehe ña ma cuvi naquehen cue cha tahán chi chí sehe ñasihi vaha ra Abraham”, catyí tuhun Nyoo. ³¹ Yucuan chaha, yañi, ñima tari sehe ñaha cha cuví musu cuan cuví yo. Soco cuví yo tari sehe ñasihi vaha ra Abraham.

5

Ñhi cuinanyaa yo chihin cha ña nyacá ñaha ca ley chí yo

¹ Ra Cristo sacacü ra chí yo ndaha ley chahnu cuan. Yucuan chaha saha ndo cuenda coto nanduvi ndo musu inga chaha cuenda ley.

² Tyasoho ndo, yuhu ra Pablo catyí chí ndo. Tatu cuhva ndo cha saha ñu circuncidar chí ndo, ta cuñi maa ndo tyi cucacu ndo chihin cuan, ma cuvi tyinyee ra Cristo chí ndo. ³ Cuñi catyí inga chaha chí ndo vatyí tandihi ra cha cuñi cacu chihin cha saha ñu circuncidar chí ra, cuñi chí vatyí sacuvi ra tandihi cuíi cha catyí ley ra Moisés ñandhi. ⁴ Tandihí nyoho cha nducú ndo nduvahá ndo nuu Nyoo cha cuenda ley cuan, cha sañá tahan ndo chihin ra Cristo cuví cuan. Ta sañá ndaha ndo tumañi iñi cha chahá Nyoo chí ndo. ⁵ Soco yoó chihin cha tyinyee Tatyí Ii Nyoo chí yo ta chinó iñi yo chí ra Cristo. Ta itá iñi yo nduvahá yo nuu Nyoo. ⁶ Vatyí tatu iñi ri cuví yo chihin ra Cristo Jesús, ñahri tuhun cha sacuví yo costumbre circuncisión, o cha ña sacuví yo. Cha vale ca tatu chinó iñi yo chí ra Cristo. Ta chihin cha chinó iñi yo coo yo, chihin cha cuñi yo chí noo noo tahan yo.

⁷ Nyoho vaha cuahán ndo quívi cuan. ¿Yóó cha satívi chí ndo? Ta ña tyasohó ca ndo cha ndicha. ⁸ Tuhun cha sañahá ñu cuan, ñima tuhun Nyoo ra nacanā chí yo cuví. ⁹ Vatyí tari nandaá yuchan pan chihin chíin ri yuchan iya, tyicuan caa tucu noo ri ñáyivi quiñi caa cuví satívi ñu chí cuaha ñáyivi. ¹⁰ Nyoo cutachi tuñi ra chí ñáyivi cha satívi chí ndo. Ñahri cuenda ra yoó ñu cuví ñu. Soco yuhu chitó vahí tyi Sutu Mañi yo cutyinyee ra chí ndo tacuhva vatyí nyoho ma caca xiñi ndo inga cuhva cha ña sañahi chí ndo.

¹¹ Ta cha cuenda chí yuhu, yañi, tyehe ta catyí vatyí ñu chinó ini chí ra Cristo cuñi chí cha sacuvi ñu costumbre circuncisión, ra Israel ma caca nyicon ra chí. Ta ma cuquiñi ca cuñi ra chihin tuhun ra Cristo cha chíhí nu cruzi cha catyí cuatyí yo. ¹² Soco ra sayangá chí ndo chíña, vaha cha quita ra nu nyicu ndo, tacuhva cha ma sayanga ca ra chí ndo.

¹³ Vatyí nyoho, yañi, nacanā Nyoo chí ndo vatyí coo ndo libre. Soco ñima cha cuenda cha iyó ndo libre ta cuví sacuvi ndo ñáá ndihí cha cuñi coño ñuhu ndo. Soco sacuvi

ndo tyiño nuu tahan ndo chihin cha cuñi ndo chí ñu. ¹⁴ Vatyí iyó noo tuhun Nyoo cha catyí chí: “Cuñi ndo chí tahan ndo tari cuñi ndo chí maa ndo”, catyí chí. Ta tatu ndicha ndicha cha cuñi yo chí tahan yo, ña yíi sacuvi yo tandihí cha catyí ley chahnu. ¹⁵ Saha ndo cuenda vatyí tatu cahán ndo ta sataśi iñi ndo chí tahan ndo, cutivi nu nyicu ndo.

Cuhva cuñi coño ñuhu yo ta cuhva iyó yo chihin Tatyí Ii Nyoo

¹⁶ Cha cuñi catyí chí ndo ican cuvi ihya: Cqo ndo chihin tunyee iñi Tatyí Ii Nyoo. Tyicuan caa ta ma cuvi ca sacuvi ndo cuhva ña vaha cuñi ndo. ¹⁷ Vatyí cha sacuvi yo cha ña vaha cha cuñi yo, ñima cuhva cuñi Tatyí Ii Nyoo cuví. Vatyí Tatyí Ii Nyoo ña cuñi chí cha sacuvi yo cha ña vaha. Ta coño ñuhu yo ña cuñi chí sacuvi chí cuhva cuñi Tatyí Ii Nyoo. Ña nacachí tahan cha cuñi Tatyí Ii Nyoo chihin cha cuñi coño ñuhu yo. Ta yucuan chaha ma cuvi sacuvi yo cha cuñi yo. ¹⁸ Soco tatu sacuvi yo cha catyí Tatyí Ii Nyoo chí yo, ma cuvi ca cunyaca ñaha ley chí yo.

¹⁹ Ña xehe caa ñu sacuvi cuhva ña vaha cha cuñi coño ñuhu. Yihí ra, iyó ñasihi ra ta iyó inga ñu chí ra. Ta yihí ñu iyó yíi ñu ta iyó inga ra chí ñu. Ta yihí ñu sacuvi ñu cha ña vaha chihin coño ñuhu ñu ta iyó vicu chí ñu. ²⁰ Yihí ñu sacahnú ñu xitohyo. Yihí ñu sataśi ñu. Yihí ñu tasi cuñi nyehe ñu chí tahan ñu. Yihí ñu cañi tahan ñu. Yihí ñu cuiño ñu. Ta yihí ñu yatyin iñi ñu. Yihí ñu chicá xiñi ñu maa maa ri cha vaha chí maa ñu. Ta yihí ñu iyó división nu nyicu ñu. Vatyí cacañi tahan ñu. Ta tyicuan caa ta cusín ñu. ²¹ Ta yihí ñu nyiyó iñi ñu cha tyayíi. Ta yihí ñu cachahñi chí tahan ñu. Ta yihí ñu tuhva ñu chíñi. Ta yihí ñu chachí cuahyi ñu. Ta sacuvi ñu cuaha ca cha sacuvi ñu. Ta catyí chí ndo tari catyí chí ndo quívi cuan. Vatyí tandihí ñu cha sacuvi tyehe caa ma cuvi naquehen cuenda ñu nu nyacá ñaha Nyoo.

²² Soco cha chahá Tatyí Ii Nyoo, ican cuví ihya: cha cuñi yo chí Nyoo ta chí tahan yo, cha sii cuñi yo, cha taxi cuñi añima yo, cha cama iyó yo chihin ñáyivi, cha masu iñi yo, cha vaha ñáyivi cuví yo, cha ña cundiñi yo sacuvi yo cha vaha chihin ñáyivi, cha chinó iñi yo chí ra Cristo. ²³ Ta inga cha chahá Tatyí Ii Nyoo chí yo, ican cuví ihya: cha ndahví sahá yo chí yo, cha ña sacuvi yo cuhva cuñi coño ñuhu yo. Tatu sacuvi yo tandihí cha vaha ihya, ni noo ley ta ma cuvi catyí chí tyi iyó cuatyí yo. ²⁴ Ta yoó cha yihí yo cuenda ra Cristo Jesús, cha sandihí yo tuhun cha sacuví yo cuhva ña vaha cha cuñi coño ñuhu yo. ²⁵ Ta tari cha iyó yo ñáyivi

chaa cha cuenda Tatyí Ii Nyoo, tyicuan caa cuñí tucu chi cha quichahá yo cha saquehen ityi ra chi yo.

²⁶ Ma cahnu saha yo chi yo. Ta ma sacañi tahan yo chi tahan yo. Ma quichi cuvi iñi yo cha chii inga tahan yo.

6

Tahán chi tyinyee yo chi tahan yo

¹ Yañi, tatu nanyehé yo sacuví noo tahan yo cuatyí. Nya yo cha ñihi nyaá yo chihin Tatyí Ii Nyoo tyinyee yo chi ñu na ndunyeen ñu inga chaha. Soco cuñí chi cahán vii yo chihin ñu chihin cha vita iñi yo. Ta cuñí chi sahá yo cuenda chi yo coto nducu nyehe tucu cuihna chi maa yo. ² Na tyinyee yo chi tahan yo ñáá cha cuví chi ñu. Tatu tyicuan caa sacuví yo, quichahá vaha yo chi ra Cristo cuví cuan.

³ Tatu nya noo yo cuñí maa yo vatyi cahnu ñu cuví yo, ta ñahri ñu cuví yo, suri chi maa yo sandaví ñaha yo. ⁴ Ma saha yo tuhun tyi vaha yo tari vaha noo hermano cha vaha chicá chihin Nyoo. Nasaha xihna yo cuenda tatu vaha cha nyacuví yo. Tyicuan ta coto yo tatu vaha sacuví yo ta cusii cuñi yo. ⁵ Vatyi tahán chi cunyeen noo noo yo ñáá ndihi cha tyisó Nyoo siqui yo.

⁶ Ta cuñí chi tyinyeeé ndo chihin cha chiñuhú chi ra cha sañahá tuhun Nyoo chi ndo.

⁷ Ta ma sandaví ñaha ndo chi ndo. Nyoo yori cuví cuacu nyaá chi ra. Vatyi tandihí cha tachí ñáyivi, ican cuan cunaquehén ñu. Vatyi tatu sacuví ñu cha vaha, cha vaha naquehén ñu. Soco tatu sacuví ñu cha ña vaha, cha ña vaha cuñihi ñu. ⁸ Tatu noo ñáyivi nyacuví ñu cuhva ña vaha cha cuñí coño ñuhu ñu, suri maa cha sacuví ñu cusativí chi chi ñu. Soco tatu nyacuví ñu cuhva cuñí Tatyí Ii Nyoo, Tatyí Ii Nyoo cucuhva noo ñáyivi chaa cha ma naa ca maa tyi coo ñu. ⁹ Yucuan chaha ma cutatu yo cha sacuví yo cha vaha. Vatyi tatu ma ndu uvi iñi yo, coo quivi ta naquehen yo cha vaha. ¹⁰ Yucuan chaha tahan ri chaha cha chahá chi cuhva, na sacuví yo cha vaha chihin tandihí ri ñáyivi. Ta cha xihna cuii ri sacuví yo cha vaha chihin ñu yihí cuenda Nyoo.

Cusii xaan cuñí ra Pablo vatyi nyehé ra tindoho cha cuenda ra Cristo

¹¹ Nyehe ndo ñana cha nahnu letra tyai chihin ndahi nu tutu ihya vityin. ¹² Ñu cha cuñí saniñí chi ndo vatyi sacuví ndo costumbre circuncisión, saniñí ra chi ndo vatyi cuñí ra cuvaha ra nuu ñáyivi. Ña cuñí ra nyehe ra tindoho cha cuenda ra Cristo, ra chihí nu cruzi. ¹³ Vatyi ni maa ra cha sacuví ra costumbre circuncisión cuan ta ña quichahá ra tandihí cha catyí ley. Soco

cuñí ra cha sacuví nyoho costumbre cuan. Vatyi tyicuan caa ta cuví sacahnu ra chi ra vatyi sacuví ndo cuhva catyí ra. ¹⁴ Soco yuhu ña cuñí sacahni chii cha cuenda ñáá ndihi tuhun. Soco sii xaan cuñí cha chihí Sutu Mañi yo Jesucristo nu cruzi cha cuenda yuhu. Vatyi cha cuenda cha chihí ra nu cruzi, tari quivi cha yahá chihí cha quíñi caa cha iyó ñáyivi ihya. Ta cha yahá chihí tucu mai cha cuenda cuan. ¹⁵ Vatyi tatu nyicón yo chi ra Cristo Jesús, ña niñi xaan cha sacuví yo costumbre circuncisión o cha ña sacuví yo. Noo cha niñi ca, cha nanduví yo noo ñáyivi chaa. ¹⁶ Tandihí ndo cha iyó ndo tyehe caa, naquehen ndo cha taxi ri coo añima ndo. Ta na cundahvi cuñi ra nyehe ra chi tandihí ndo, ñu cha ndicha cuví ndo ñáyivi cuenda ra.

¹⁷ Cha vityin ta nu cuahán chi ityi nuu ca, ni nonga ndo ta ma cuhva ca ndo tisihi chii. Vatyi tandihí pehla cha nyaá coño ñuhi, cuñí chi catyi vatyi ndicha cha cuví yuhu noo ra chicá tyiño Sutu Mañi yo Jesús.

¹⁸ Yañi, Sutu Mañi yo Jesucristo na nasoco chi tandihí ndo. Ta tyicuan caa na cuví chi.

Carta Cha Sacahun Ra Apóstol Pablo Chi Ñáyivi Ñuu Éfeso Cha Yihí Cuenda Nyoo

*Nu sacahun ra Pablo noo tutu chi ñu ñuu
Éfeso cha yihí cuenda Nyoo*

¹ Yuhu ra Pablo cuví noo apóstol ra Jesucristo. Vatyí yucuan cuhva cuñí maa Nyoo. Tyaí noo carta ihya chi tandihí ndo cha yihí ndo cuenda Nyoo ñuu Éfeso chiña, ta ñí ñí ndo chinó ñí ndo chi ra Cristo Jesús. Ta ñn ri cuví ndo chihin ra. ² Na nasoco Nyoo ta Sutu Mañi yo Jesucristo chi ndo. Ta nacuhva ra cha taxi ri coo añima ndo.

*Cha ñn ri cuví yo chihin ra Cristo, Nyoo
nasocó xaan ra chi yo*

³ Na sacahnu yo chí Nyoo, ra cuví Sutu Sutu Mañi yo Jesucristo. Vatyí nasocó xaan ra chí yo chihin tandihí nuu cha vaha cha iyó andívi cha cuenda cha ñn ri cuví yo chihin ra Cristo. ⁴ Vatyí nyata ni cumañi ca savaha ra ñuhu ñáyivi ta nacachí vaha ra chí yo tyi cu ñn ri yo chihin ra Cristo. Vatyí tyicuan caa cundundí yo nuu ra chihin cha ñahri ca cuatyí yo. ⁴ Cha cuenda cha cuñí ra chí yo, ⁵ ta nyata cha naha ta tyaq ra cuhva chí yo vatyí nanduví sehe ra chí yo cha cuenda ra Jesucristo. Tyicuan caa sacuví ra vatyí yucuan cuhva cuñí maa ra. ⁶ Yucuan chaha tyicuan ri sacahnú yo chí ra. Vatyí vaha xaan ñáyivi cuví ra. Ta cahnu xaan tumañi ñí chahá ra chí yo. Vatyí sacú ñn ri ra chí yo chihin Sehe ra, ra cha cuñí xaan ra chí. ⁷ Ta cha cuenda cha cuñí xaan Nyoo chí yo, natava ra chí yo ndaha ra ña vaha, tacuhva cha ma cutuñi chí yo. Vatyí chihin cha chatí ñí Sehe ra, sandachí ra cuatyí yo. Ta tyicuan caa sahá Nyoo ticahnu ñí chí yo. ⁸ Ta vatyí cahnu xaan tumañi ñí sahá ra chí yo, chahá xaan ra cha chiñi tuñi ra chí yo. ⁹ Ta chahá ra cha cutuñi ñí yo tuhun ra cha ña chito ñáyivi. Vatyí sacotó ra chí yo yoso cuhva tyaq ra chuhva tyi sacuví ra chihin tandihí cha iyó cha cuenda ra Cristo. ¹⁰ Vatyí coo quívi cuchino cava cha tyaq ra cuhva tyi sacuví ra. Vatyí cusandu ñn ri ra tandihí cha iyó ihya ñáyivi ta cha iyó andívi, ta tandihí cucunyaa ndaha ra Cristo. Vatyí maa ra cucunyaca ñaha ra tandihí.

¹¹ Cha cuenda ra Cristo ñihí tucu maa yo cha tahán chí chí yo. Vatyí Nyoo nyata cha naha nacachí ra chí yo tyi cu ñn ri yo chihin ra Cristo. Tyicuan caa tyaq Nyoo cuhva tyi cusacuví ra. Ta maa ra sacuví tandihí yoso cuhva nyehé maa ra tyi vaha. ¹² Ta tyehe caa sacuví ra tacuhva vatyí nyuhu cha nachino ñí ndi chí ra Cristo cha xihna

ri, coo ndi soco cha sacahnu ndi chí Nyoo cha cuenda cha cahnu cuví maa ra. ¹³ Ta tyicuan caa tucu nyoho. Vatyí quívi chiñí ndo tuhun Nyoo cha ndicha vaha, catyí ñu chí ndo tuhun ra Cristo yoso caa sacacú ra chí yo. Ta chingo ñí ndo chí ra. Ta ndu ñn ri ndo chihin ra. Ta tari cha tyaq Nyoo tuñi ra chí ndo cuví cuan, vatyí chahá ra Tatyí li ra cohon añima ndo, tari cuhva catyí ra tyi sacuví ra. ¹⁴ Ta ican maa Tatyí li cuví cha chahá quívi ri Nyoo chí yo tacuhva cuví naquehen ca yo cha cucuhva ra chí yo. Vatyí tyinyeé Tatyí li ra chí yo nyacua nya quívi ndihí sacacu ra chí yo, cha cuví yo ñáyivi chí ra. Ta tandihí ihya sacuví ra chihin yo tacuhva sacahnu yo chí ra. Vatyí maa ra cahnu ca ra cuví ra.

¹⁵⁻¹⁶ Yucuan chaha, cuhva cha chicán tahvi chí Nyoo, ña sandihí tuhun cha nacuhvé tyahvi nyoo chí ra cha cuenda ndo. Vatyí ñihí tuhun tyi chinó vaha ñí ndo chí Sutu Mañi yo Jesucristo. Ta cuñí xaan ndo chí tandihí ñu tahan yo ñu yihí cuenda Nyoo. ¹⁷ Chiquén chí Nyoo Sutu Sutu Mañi yo Jesucristo. Vatyí ican ra cuví ra cahnu ca. Ta chiquén chí ra nacuhva ra cha chiñi tuñi Tatyí li ra chí ndo, tacuhva cutuñi ñí ndo cha sañahá ra chí ndo. Vatyí cohon nuu vaha ca ndo chí ra. ¹⁸ Ta chiquén chí ra, na nuña ra cha chiñi tuñi xiñi ndo, na coto ndo ñáá cha cuñi ra cha naquehen ndo cha cuenda cha caná ra chí ndo. Ta na coto ndo ñana cha tyaquí ta tyayí cha chahá Nyoo chí yo ñu yihí cuenda ra. ¹⁹ Ta chiquén chí Nyoo tyi cuhva ra cha coto ndo ñana cha cahnu tunyee ñí iyó chí ra, nyacua ña cuví tyicuhva yo. Ta ican cuan tyinyeé chí yo cha chino ñí yo chí ra. Ta suri maa chihin tunyee ñí ihya ²⁰ Nyoo sanandotó ra chí ra Cristo. Ta cuatyaa ra chí ra chiyo vaha ra nya andívi. ²¹ Ta yucuan cuví nu sacahnú xaan ca Nyoo chí ra Cristo cha nuu tandihí ca cha nyacá ñaha siquí ñuhu ñáyivi ihya ta andívi ñandihí. Cuví ri tandihí rey, o cuví ri ra cuví tyiño nahnu, o cuví ri ángel andívi. Soco yori yóo ca ra cahnu ñáyivi ihya ta ñí ñáyivi cha caa coo. Vatyí noo tuhun ri maa ra Cristo cuví ra cahnu cuví. ²² Ta tandihí cuí maa chahá Nyoo tyi cunyaca ñaha ra Cristo. Ta suri chí maa ra chahá Nyoo vatyí cuví ra xiñi o nuu chí ñu yihí cuenda ra. ²³ Vatyí yóo, cha yihí yo cuenda ra, cuví yo coño ñuhu ra. Ta maa yo ta maa ra cuví chí noo coño ñuhu nani ra. Ta maa ra cuví ra sandunaní tandihí.

2

*Sacacú Nyoo chí yo cha cuenda cha cuñí
ra chí yo*

¹ Nyoo chahá ra noo ñáyivi chaa chí ndo tyi coo ndo quívi ndu ñn ri ndo chihin ra

Cristo, vasi nicaa ni iñi ndo cuatyí quiví cuan. Ta tari maa cha chihí añima ndo tyi ñahri maa ñayiví Nyoo chinyaá añima ndo. ² Ta chinyacuví ndo cuhva nyacuví ñáyiví ña ñohó nuu Nyoo. Ta chinyicón ndo chi cuihna ra cuví nuu. Ta ican ra cuví tatyí ña vaha cha tyiyuhú chi ñu ña quichahá nu cahán Nyoo. ³ Ta suri tyicuan caa chiyo tucu yoó quiví cuan. Vatyí chinyacuví yo cha ña vaha cha quichi cuví iñi yo cha cuñí coño ñuhu yo. Ta sacuví yo yoso cuhva chicá xiñi yo. Ta cha cuenda tuhun cha chinyacuví yo tahán chi tachi tuñi Nyoo chi yo inuu ri chihin tandihí ca ñu sacuví cha ña vaha. ⁴ Soco Nyoo cundahví xaan cuñi ra nyehe ra chi yo. Vatyí cuñi xaan ra chi yo. ⁵ Ta vasi cuaha xaan cuatyí yo quiví cuan, tari quiví cha chihí añima yo chihin cuatyí cuan, socio Nyoo chahá ra cha conyito añima yo noo ñayiví chaa, vatyí sacú ñin ri ra chi yo chihin ra Cristo. Ta cha cuenda tumañi iñi cha saha Nyoo chi ndo ta cacú ndo. ⁶ Ta tari quiví cha sanandotó Nyoo añima yo quiví nandotó ra Cristo Jesús. Vatyí iyó yo noo ñayiví chaa cha chahá maa Nyoo tyi coo yo. Ta tari quiví cha cuatyaá ra chi yo andiví. ⁷ Ta sacuví Nyoo tyehe caa tacuhva vatyí nu cuahán ca chi quiví cusañaha ra chi tandihí ñáyiví yoso cuhva cha cahnu tumañi iñi chahá ra chi yo cha cuenda ra Cristo Jesús. Vatyí vaha xaan ñáyiví cuví ra chihin yo tyi sacú ñin ri ra chi yo chihin ra Cristo. ⁸ Vatyí cha sacacú Nyoo chi yo cuví chi noo cha chahá ra chi yo. Ta naquehén yo tumañi iñi cuan chihin cha chinó iñi yo chi ra. Ta cha sacacú Nyoo chi yo ñima noo cha cuví sacuví maa yo cuví. Vatyí yucuan cuví noo tumañi iñi cha sacuví ra chihin yo. ⁹ Ñima cha cuenda cha sacuví yo cha vaha ta cuita iñi yo cha sacacú cuan chi yo. Tyehe ta cuví chi tyicuan caa, cahnu cusaha yo chi yo. ¹⁰ Nyoo sacuví ra vatyí nduvahá añima yo chihin cha ndu ñin ri yo chihin ra Cristo Jesús. Ta sacuví ra tyehe caa tacuhva vatyí cuví sacuví yo cha vaha. Vatyí maa ra tyaa ra cuhva nu quichi quiví vatyí tyicuan ri sacuví yo cha vaha.

Cuví ri yo ñu Israel, o cuví ri yo ñu inga ñuu, socio cha cuenda ra Cristo ñin ri ñáyiví chi Nyoo cuví tandihí yo

¹¹ Yucuan chaha ñicohon iñi ndo cuhva chiyo ndo nu quichí quiví, tyi cuví ndo ñáyiví cha ñima ñu Israel cuví. Ta catyí ñáyiví Israel tyi ñu cha ñima ri tuhun cuví ndo cha ña sacuví ndo costumbre circuncisión tari sacuví maa ra. Ta cha cuenda cuan cuñí maa ra Israel tyi vaha ra nuu Nyoo ta nyoho ña vaha ndo. ¹² Ñicohon iñi ndo vatyí nu quichi chi, yori ra Cristo chinyaá añima ndo. Ta ña ñin ri cuví ndo chihin ñu Israel. Ta ña chito ndo tuhun cha tyihí tahan Nyoo chihin ra Abraham: tuhun

cha catyí Nyoo tyi cuhva ra cha nicoo vaha yo chihin ra. Chiyo maa ndo ñuhu ñayiví ihya chihin cha yori Nyoo nyaá chihin ndo, ta ña yihí iñi ndo cha cuñihi ndo. ¹³ Ta quiví cuan cañi xaan chinyaá ndo chihin Nyoo. Soco vityin ñin ri cuví ndo chihin ra Cristo Jesús. Maa ra Cristo chihí ra. Ta chati ñiñi ra cha catyí ndo. Ta yucuan chaha cuví cuyatyin ndo nuu Nyoo. ¹⁴ Vatyí ra Cristo sanicoo vaha ra chi yo chihin Nyoo. Ta sandu ñin ri ra chi ninduvi yo. Sandu ñin ri ra chi nyuhu cha cuví ndi ñu Israel chihin nyoho cha cuví ndo ñu inga ñuu. Ta sanduvahá ra cuhva iyó yo. Vatyí tari noo cha sanduva ra noo nama vehe cha nanyaá mahñu, cha chasí nu cu ñin ri yo. ¹⁵ Maa ra Cristo sandihí ra tuhun ley chahnu chihin cha chahá cuenda ra coño ñuhu ra tyi cuví ra nu cruzi. Vatyí tandihí ley cuan sasíñ chi chi yo. Tyi nyuhu sacuví ndi costumbre cha catyí ley cuan. Ta nyoho ña sacuví ndo. Soco ra Cristo sandu ñin ri ra chi yo quiví chahá ra noo cuhva chaa tyi coo yo. Ta tyicuan caa sanicoo vaha ra chi yo. ¹⁶ Vatyí chihí ra nu cruzi cha catyí cuatyí yo. Ta sacuví ra vatyí nanduvaha coo yo chihin Nyoo. Ta tyicuan caa sanaá ra cha ña cuñí nyehe yo chi tahan yo.

¹⁷ Ra Cristo quichí ra ta cahan ra tuhun vaha Nyoo chihin yo: chihin nyoho cha cañi ca chinyicu ndo chihin Nyoo ta chihin nyuhu ñu Israel, ñu chitó tuhun Nyoo. Catyí ra chi yo vatyí na nicoo vaha yo chihin Nyoo. ¹⁸ Vatyí chaha cha catyí cha chihí ra Cristo cha cuenda yo cuví natuhva ninduvi yo chi Nyoo Sutu yo. Vatyí noo ri Tatyí Ii ra nyaá añima yo: an cuví ri yo ñu Israel, an cuví ri yo ñu cha ñima ñu Israel cuví. ¹⁹ Yucuan chaha nyoho ña cuví ca ndo ñu inga ñuu. Soco nanduví ndo ñáyiví ñuu Nyoo ñin ri chihin tandihí ñu yihí cuenda ra. Nanduví ndo ñáyiví chi ra. ²⁰ Ta cuví tucu ndo tari noo vehe. Ta ra apóstol, ta ra profeta, ra cachahá cuenda tuhun Nyoo cacuví ra tari ra catyihí yuu chaha vehe. Vatyí suri maa ra Cristo cuví yuu cha ñiñi ca cha yihí chaha vehe cuan. ²¹ Ta cha cuenda maa ra Cristo cuahan ndaa vehe cuan ta vehe cuan ican cuví maa yo ñin ri chihin ra. Ta cuahán sandu ñin ri ra chi tandihí yo ta nanduví yo tari noo vehe ii nu nyaá maa Sutu Mañi yo. ²² Ta tyicuan caa tucu nyoho chihin tandihí ñu yihí cuenda Nyoo, nanduví ndo tari noo nu iyó Nyoo. Vatyí nyaá Tatyí Ii ra añima tandihí yo.

3

Nyoo tachí ra tyiño chi ra Pablo vatyí cahan ra tuhun ra chihin ñu cha ñima ñu Israel cuví

¹ Yucuan chaha yuhu ra Pablo ñohí vehe caa ihya vatyi sacoté tuhun ra Cristo Jesús chí nyoho cha ñima ñu Israel cuví ndo. ² Tahán chí natyihí tuñi ñi ndo tyi cahnú xaan tumañi ñi chahá ra chíi cha cuenda cha vaha chí ndo, tyi sacoté chí ndo. ³ Vatyi cha yaha catyí suhva chí ndo yoso caa sañahá Nyoo chíi noo tuhun xehe. ⁴ Ta cuhva cha sacuaaha ndo tuhun cha yahá catyí chí ndo, cuví coto ndo yoso caa chahá Nyoo tyi cutuñi ñi tuhun ra Cristo cha ña chító ñáyivi. ⁵ Vatyi nu quichí chí, ña sañahá Nyoo chí ñáyivi, tari sañahá ra chí apóstol ta ra cacuví profeta cha vityin. Vatyi Nyoo chíihin Tatyí lí ra sañahá ra chí yo cha vityin. ⁶ Ta tuhun xehe cuan, ican cuví ihya: vatyi nyoho cha ña cuví ndo ñu Israel, ñin ri cha cutahan chí chí ndo chíihin nyuhu cha cuví ndi ñu Israel. Vatyi noo ri coño ñuhu ra Cristo cuví yo. Ta cuñihi yo cha catyí Nyoo tyi cuhva ra chí yo cha cuenda maa ra Cristo Jesús.

⁷ Sahá Nyoo tumañi ñi chí yuhu vatyi chahá ra tunyee ñi ra chíi tyi sacoté tuhun vaha ihya chí ñáyivi. ⁸ Soco cha cuenda chí yuhu cuví noo ra luhlu, noo ra ndahví ca cha nuu tandihí ca ñu yihí cuenda Nyoo. Soco sahá Nyoo tumañi ñi ihya chíi. Vatyi tacuhva cahin tuhun ra Cristo chíihin ñu cha ñima ñu Israel cuví. Ta sacoté chí ñu ñana cha tyayíi cha cuñihi ñu cha cuenda ra Cristo. ⁹ Tyatyíño Nyoo chíi tyi sacote chí tandihí ñáyivi yoso caa tyaa ra cuhva nyata ni cumañi ca savaha ra tandihí cha iyó. Ta cha naha ña chahá Nyoo cha coto ñáyivi tuhun ihya. ¹⁰ Tyicuan caa cuví tacuhva vatyi vityin tandihí ra nyacá ñaha andiví cunyehe yoso caa cha vaha cha sacuví Nyoo chíihin yo cha cuví yo ñu yihí cuenda ra. Ta cucoto ra tyi chíiñi tuñi xaan Nyoo. ¹¹ Tandihí ihya chachí tahan chíihin cha tyaa Nyoo cuhva tyi sacuví ra chíihin Sutu Mañi yo Jesucristo cha cuenda cha vaha chí yo. ¹² Ta cha cuenda maa ra Cristo iyó chí ityi chí yo cha chaá yo nuu Nyoo chíihin cha ña yuhví yo. Vatyi chinó ñi chí ra Cristo. ¹³ Yucuan chaha chacú ndahví nuu ndo tyi ma ndu uvi ñi ndo chí Nyoo cha nyehi tindoho cha cuenda ndo. Vatyi cuví chí cha cuenda cha vaha chí maa ndo. Ta cusíi cuñi ndo cha cuenda ihya.

Chicán tahvi ra Pablo chaha ñu, na cohon nuu ca ñu chí ra Cristo

¹⁴ Yihí ñi yoso cuhva cha vaha cha tyaa Nyoo Sutu yo cuhva tyi cuhva ra chí yo. Ta yucuan chaha chicuñi chíi nuu ra. ¹⁵ Maa ra cuví ra Sutu tandihí ñáyivi cuenda ra: ñu cha cuahan coyo andiví, ta ñu cha iyó ca siquí ñuhu ñáyivi. Tandihí yo cuví yo ñáyivi chí ra. ¹⁶ Ta chíquén chí ra na sandunyeey ra ñi ndo chíihin Tatyí lí ra cha nyaá aña

ndo. Vatyi maa ra cahnú xaan ca cha tyayíi ra chahá ra chí yo. ¹⁷ Ta na coo ra Cristo aña ndo vatyi chinó ñi ndo chí ra. Ta coo ndo chíihin cha cuñi Nyoo chí ndo. Vatyi tari yihí vaha yoho noo yutun chichi ñuhú, tyicuan caa cunyaa vaha aña ndo chíihin Nyoo. ¹⁸ Tyicuan ta cuacoo tunyee ñi ra chí ndo tacuhva cuví cutuñi vaha ñi ndo chíihin tandihí ñu yihí cuenda ra vatyi cuñi xaan ra Cristo chí yo. Nyacua ña ñihí ca yo cuhva catyí yo yoso cuhva cha cuñi ra chí yo. ¹⁹ Vatyi yaha xaan cahnú cuan. Nyacua ma cuví cohon nuu yo yoso cha cuñi ra chí yo. Soco cuñi cha nacoto ndo yoso cha cuñi ra chí yo. Tyicuan ta ñabri ca cumañi chí ndo. Vatyi Nyoo nyaá maa ra chíihin ndo.

²⁰ Ta vityin na sacahnú yo chí Nyoo, ra cha iyó xaan ca tunyee ñi chíi. Vatyi cuaha vavaha ca cha cuví sacuví ra cha nuu cuhva cha chicán maa yo chí ra o cha nuu cuhva cha chicá xihí yo. Vatyi suri chíihin tunyee ñi ra cha iyó chí yo, sacuví ra tandihí. ²¹ Yoó ñu chino ñi chí Nyoo, na sacahnú yo chí ra tyicuan ri maa, ta tandihí tyembu cha cuenda cha sacuví ra Cristo Jesús. Ta na cuví chí tyicuan caa.

4

Cha cuenda Tatyí lí Nyoo ñin ri cuví tandihí yo cha yihí yo cuenda ra Cristo

¹ Yucuan chaha yuhu cha ñohí vehe caa cha cuenda Sutu Mañi yo chacú ndahví nuu ndo na cachi coo ndo tari cuhva tahán chí coo ñu cha nacana Nyoo chíi. Vatyi chí nyoho nacana Nyoo tyi cuví ndo ñáyivi chí ra. ² Ndahví saha ndo chí ndo. Ta vaha cahan ndo chíihin ñáyivi. Cama cuví ñi ndo. Ta cunyeey ndo ñáá cha sahá noo noo tahan ndo chí ndo chíihin cha cuñi ndo chí ñu. ³ Nduyú ndo cuhva cha tyicuan ri cu ñin ri ndo chíihin tahan yo. Vatyi maa Tatyí lí Nyoo tyinyeé chí yo, na coo vaha yo chíihin tahan yo. ⁴ Vatyi iyó noo ri coño ñuhu ra Cristo. Ta ican cuan cuví tandihí yo. Ta tari cha noo ri Tatyí lí Nyoo iyó, tyicuan caa tucu iyó noo cha chító cachi yo tyi cunaquehen yo tyi nacaná ra chí yo. ⁵ Ta iyó noo ri Sutu Mañi yo nyacá ñaha chí yo. Ta noo ri chí maa ra chinó ñi tandihí yo. Ta noo ri cha cuenda maa ra condutya yo. ⁶ Ta noo ri Nyoo iyó ta maa ra cuví ra Sutu tandihí yo. Ta maa ra nyacá ñaha chí tandihí yo. Ta chotyíño ra chí tandihí yo yoso cuhva cuñi maa ra. Ta nyaá ra aña tandihí yo.

⁷ Chahá ra Cristo noo cuhva chí noo noo yo, vatyi sacuví yo tyiño nuu ra yoso cuhva cuñi maa ra cuhva ra. ⁸ Yucuan chaha cahan Nyoo tuhun ra Cristo nu catyí chí: Cuví chasaha ra chí ra xaan ñi chí ra, ta nandaá xica ra andiví chíihin ñu tava ra ndaha ra ña vaha.

Ta chahaḡ ra cuhva yoso cuhva cusaha tyiño ñu tyiño nuu ra, catyi chi.

⁹ ¿Ta ñáá cha cuñi chi catyi cha nandaḡ xica ra cuan? Cuñi chi catyi vatyi noo xihna ra nya yuvi ca nu ñuhu ñayivi. ¹⁰ Ra cha noḡ cuan, nandaḡ tucu ra nya nu sucun ca andivi. Vatyi tyicuan caa ta cuvı sacutu ra tandiḡi maa ta cunyaa ra chihin yo tandiḡi ityi. ¹¹ Ta suri maa ra Cristo chahaḡ ra cha vaha chi yo. Chi suhva yo chahaḡ ra tyi cuvı yo apóstol ra. Ta chi inga yo chahaḡ ra cha cuhva cuenda yo tuhun cha chahaḡ ra chi yo, o saha yo profetizar cuvı cuan. Ta chi inga yo chahaḡ ra tyi sacoto yo chi ñayivi yoso caa sacacú ra ańima yo. Ta chi inga yo chahaḡ ra cha quihı ndaha yo chi ñu yihı cuenda ra, ta chi inga yo chahaḡ ra cha cuvı sańaha yo tuhun ra chi ñu. ¹² Tyicuan caa chahaḡ Nyoo tyiño chi yo vatyi cunyaa yo tyiño cha sandunyeé yo ińi tahan yo vatyi cuvı yo cońo ñuhu ra. ¹³ Nyacua nya cu iń vaha tandiḡi yo cha cuenda cha chinó vaha ińi yo chi Sehe Nyoo. Ta cohon nuu vaha yo chi ra. Tyicuan caa ta cutu yo chihin tandiḡi cha vaha cha chahaḡ ra Cristo chi yo. ¹⁴ Yucuan ta ma cuvı ca yo tari ra cuatyaa. Vatyi totyeḡe ri chino ińi ndotyın ñáá noo tuhun cha ñima ri tuhun sandavi ñaha ñu chi ndotyın. Ta coto cutondo xińi yo tyicuan caa chihin tuhun cha ña ndicha cha sańaha ñu sandavi ñaha. ¹⁵ Soco cha nuu cha cuvı yo tari ra cuatyaa, cuñi chi cha cahán yo cha ndicha chihin cha cuñi yo chi Nyoo ta chi ñayivi. Ta ndunyea ca ańima yo chihin ndi cha vaha cha iyó chi Nyoo. Ta cuahnu yo chihin ra Cristo, cha cuvı ra nuu chi yo. ¹⁶ Ta cha cuenda ra Cristo tandiḡi yo cha cuvı yo cońo ñuhu ra, iń ri cuvı yo. Tari yihı tahan noo cońo ñuhu, ta sahá tyiño tahan tahan nu yihı tahan chi, yoso cuhva tyiño cha tahán chi chi, ta tyicuan caa tyinyeé chi chi cońo ñuhu, na coo vaha chi ta cuahnu chi, ta tyicuan caa yoó, cuñi yo chi tahan yo ta tyinyeé yo chi ñu.

Ñayivi chaa cha tahán chi coo yo cha cuenda ra Cristo

¹⁷ Ican ihya cuvı cha chahi cuenda chi ndo, catyi Sutu Mańi yo. Ta cuñi chi cha quichaha ndo. Ma coo ca yo tari iyó ñu ña ñohó nuu chi Nyoo. Vatyi maa ri maa cha chińi tuńi tondo chicá xińi ñu. ¹⁸ Ta ña cutuńi ińi ñu, tyi ñima ñayivi Nyoo iyó ñu. Vatyi ña chitó ñu, cha cuenda cha ndava ańima ñu. ¹⁹ Ña cahán ca nuu ñu cha sacuvı ñu cha ña vaha. Ta nacuhva cuenda ñu chi ñu chi cha quińi caa. Cuaha xaan cha ña vaha quichı cuvı ińi ñu. ²⁰ Soco ñima tyicuan caa cutuhva yo. Vatyi ñima tyicuan caa cuhva iyó ra Cristo. ²¹ Tatu ndicha tyi chińi yo cha caḡan ra chihin yo, ta cutuhva yo cha ndicha cha sańaha ra chi yo, ²² ma

coo ca yo cuhva chiyo yo quivi cuan. Vatyi chiyo yo ñayivi chahnu quińi caa. Vatyi cha quichı cuvı ińi yo sandavi ñaha chi chi yo. ²³ Naḡuhva cuenda yo chi yo chi Nyoo na nasama ra cuhva chicá xińi yo. ²⁴ Ta naḡoo yo noo ñayivi chaa chihin noo ańima chaa cha savahá Nyoo. Ta cuvı yo noo ñu vaha cha ndicha ndicha, noo ñu cachi iyó nuu Nyoo tari maa ra.

²⁵ Yucuan chaha ma cahan ca yo cuendu. Caḡan yo maa maa ri cha ndicha chihin tahan yo. Vatyi iń ri ñayivi cuvı yo.

²⁶ Tatu cuxaan yo, saha yo cuenda coto sacuvı yo cha ña vaha. Ta suhva ri cuhva cuxaan yo. Ma cuxaan yo ndiyaca. ²⁷ Ta ma cuhva yo cuhva chi ra ña vaha.

²⁸ Ra cha tuhva suhu quivi cuan, ma suhu ca ra vityin. Soco saha tyiño vaha ra chihin ndaha ra. Tyicuan caa ta coo cha chińi, tacuhva cuvı tyinyee ra chi ñu cha chińuhú chii.

²⁹ Ma cahan yo cha quińi caa. Caḡan yo, soco maa ri cha vaha cha tyinyee ta sacuahnu chi ñu chińi tuhun cahán yo. ³⁰ Ta ma cuhva yo tucuihya ińi chi Tatyı İ Nyoo. Vatyi chahaḡ Nyoo Tatyı İ ra chi yo tari noo tuńi ra tyaaḡ ra ańima yo nyacua nya quivi ndiḡi sacacú ra chi yo.

³¹ Ta ma xaan cuñi yo. Ta ma cuxaan yo. Ta ma quihı tisiḡi ińi yo. Ma cana chaa yo siqui tahan yo. Ma cahan uhvi yo chi tahan yo. Ta ninoo cha ña vaha ma caca xińi yo. ³² Soco vaha ñayivi cuvı yo chihin tahan yo. Ta cundahvi cuñi yo nyeḡe yo chi ñu. Ta saha yo ticahnu ińi chi ñu, tari Nyoo sahá ra ticahnu ińi chi maa yo cha cuenda ra Cristo.

5

Yoso caa tahán chi coo ñayivi yihı cuenda Nyoo

¹ Yucuan chaha naḡandu yo cuhva coo yo tari cuhva iyó maa Nyoo. Vatyi seḡe ra cuvı chi yo. Ta cuñi xaan ra chi yo. ² Vita cuvı ińi yo. Cuñi yo chi tahan yo, tari ra Cristo cuñi ra chi yo. Ta tari noo mbee luhlu cha tuhva tata sutu cachahaḡ ra chi Nyoo ta cha naha, tyicuan caa chahaḡ cuenda ra Cristo chi ra cha cuenda yo. Ta si xaan cuñi Nyoo cha cuenda cha chahaḡ cuenda ra chi ra.

³ Soco vityin cha cuvı yo ñayivi yihı cuenda Nyoo, ña tahán chi sacuvı yo cha quińi caa chihin cońo ñuhu yo. Ni ña tahán chi cha cahán yo cha quińi caa. Ta ni ma nyiyo ińi yo. ⁴ Ma cahan yo tuhun cha chahaḡ ticahan nuu. Ni ri ma cahan yo noo tuhun cha ñima ri tuhun. Vatyi ña tahán chi cahan yo cha tyicuan caa. Soco cha nuu cha cahán yo cha ña tahán chi, na nacuhva yo tyahvi nyoo chi Nyoo. ⁵ Vatyi cha chitó yo vatyi tandiḡi ñu cha sacuvı cha quińi caa, ma quihvi ñu nu nyacá ñaha ra Cristo

chihin Nyoo. Ra iyó chihin ñusihí ta ñima ñasihí ra cuví, o ñu iyó chihin rayíi ta ñima yíi ñu cuví, ñu nyiyó ñi, ma quíhvi ñu nu nyacá ñaha Nyoo. Vatyí cha nyiyó ñi yo tari cha sacahnú yo xitohyo cuví cuan. Vatyí tavá xiin yo chí Nyoo. ⁶ Ma cuhva yo cha sandaví ñaha ñáyiví chí yo chihin tuhun cha ña ndicha, tuhun cha ñima ri tuhun. Vatyí tachí tuñi Nyoo chí ñu cha ña quichahá chí ra. ⁷ Ta ní ma cutahan yo chihin ñu cuan.

⁸ Vatyí chíyo yo nu ñaa ñi quívi cuan. Soco vityin iyó yo nu ndichin chihin Nyoo. Cachi cgo yo tari tahán chí coo ñu chító tuhun Nyoo. ⁹ Vatyí Nyoo sacundichín ra añima yo tacuhva cuvaha añima yo ta sacuví yo cha vaha ta cha ndicha. ¹⁰ Saniñi yo cutuhva yo cuhva tahán ñi Sutu Mañi yo. ¹¹ Ma sacuví yo cha nyacuví ñu nyicú nu ñaa ñi. Vatyí ñahri cha vaha ñihí ñu chihin cuan. Soco sacoto yo chí ñáyiví tyi ña vaha cuan. ¹² Vatyí cahán nuu yo cha cahán yo tuhun cha nyacuví ñu cuan cha xehe ri. ¹³ Soco quívi quita cha ñohó xehe nu ndichin, tyicuan ta cucoto yo cha ndicha. Vatyí cha ndichin Nyoo sanatuví tandihí cha ñohó xehe. ¹⁴ Yucuan chaha iyó nu catyí chí: Yoho cha quixun, ndícuita mahñu nu nyicú ñu chihí chíña.

Ta ra Cristo cusacata ra ñuhu nu cuahún, catyí chí.

¹⁵ Yucuan chaha saha yo cuenda cuhva iyó yo. Ta ma coo yo tari noo ra soho. Cgo yo tari noo ra chító. ¹⁶ Ma sacunaa yo quívi yo. Na cahán yo tuhun Nyoo chihin ñáyiví. Vatyí vityin quiñi xaan caa ñáyiví iyó yo, ta ña naha ca iyó yo. ¹⁷ Yucuan chaha ma tondo xaan cohon ñi yo. Soco nandichí xiñi yo cuhva cuñi maa Sutu Mañi yo tyi sacuví yo. ¹⁸ Ma coho yo ndixi. Vatyí ican cuan sativí chí yo. Soco cuhva yo na cunyaca ñaha vaha Tatyí Ii Nyoo añima yo. ¹⁹ Cahán yo chihin tahan yo soco chihin cha sacahnú yo chí Nyoo. Çata yo salmo cuenda ra. Çata yo yaa cha chahá Tatyí Ii chí yo. Sacahnu yo chí Sutu Mañi yo chihin cha tandihí añima yo. ²⁰ Tyicuan ri ñacuhva yo tyahvi nyoo chí Nyoo Sutu yo cha cuenda tandihí maa, vasi sií cuñi yo, vasi nyehé yo tindoho. Ñacuhva yo tyahvi nyoo chí ra chihin sivi Sutu Mañi yo Jesucristo.

Na coo vaha yo chihin tahan yo cuenda ra Cristo, catyí ra Pablo

²¹ Quichaha yo nu cahán inga tahan yo cuenda ra Cristo. Vatyí sahá yo ñáyiví chí ra Cristo.

²² Nyoho ñu iyó yíi quichaha ndo cha cahán Sutu Mañi yo. Ta tyicuan caa tucu quichaha ndo nu cahán yíi ndo. ²³ Vatyí rayíi ican ra cuví nuu chí ñasihí ra, tari cuhva cuví ra Cristo nuu chí ñu yihí cuenda ra. Ta suri maa ra sacacú ra chí yo cha cuví yo coño

ñuhu ra. ²⁴ Soco tari tahán chí cha quichahá ñu yihí cuenda ra Cristo chí ra, tyicuan caa cuñi tucu chí cha quichahá ñusihí tandihí cha catyí yíi ñu.

²⁵ Ta rayíi cuñi chí cha cuñi ra chí ñasihí ra, tari cuñi ra Cristo chí yo cha yihí yo cuenda ra. Ta chahá ra ñáyiví ra cha catyí yo. ²⁶ Tacuhva vatyí sandundíi ra añima yo. Ndíi añima yo vatyí nacatyá ra quívi cha nachino ñi yo tuhun cahán ra ta condutyá yo. ²⁷ Ndoq añima yo tari ndoq noo sahama, ña yacua ca chí, ña tiyí ca chí. Vatyí ra Cristo sandundíi ra chí yo cha cuví yo ñu yihí cuenda ra. Tacuhva cuví nacuhva cuenda ra chí yo chí Nyoo, soco vaha yo, ñahri ca cuatyí yo. ²⁸ Ta tyicuan caa tucu cuñi chí cha cuñi rayíi chí ñasihí ra, tari cha cuñi ra chí coño ñuhu ra. Vatyí tatu cuñi ra chí ñasihí ra, tari cha cuñi ra chí maa ra cuví cuan. ²⁹ Vatyí yori noo yo cha ña cuñi nyehe yo chí coño ñuhu yo. Soco sacachí yo ta sacuihnó yo chí coño ñuhu yo. Ta ra Cristo suri tyicuan caa sacuví ra chihin ñu yihí cuenda ra. ³⁰ Vatyí coño ñuhu ra cuví yo. Ta noo noo yo cuví yo suhva coño ñuhu ra ta yiquí ra. ³¹ Catyí tuhun Nyoo: “Rayíi sandoó ra chí sutu ra ta chí sihi ra. Ta ndu ín ri ra chihin ñasihí ra. Ta noo ri nanduví ñu.” ³² Ta yuhu catyí vatyí ihya cuví noo tuhun xehe cha cahnu xaan. Ta cuñi chí catyí tyi ra Cristo ndu ín ri ra chihin ñu yihí cuenda ra. ³³ Ta siñ ri cuñi tucu chí catyí vatyí tahan tahan ndo cuñi ndo chí ñasihí ndo, tari cuñi ndo chí maa ndo. Ta nyoho cha cuví ndo ñusihí, saha ndo ñáyiví chí yíi ndo.

6

¹ Nyoho cha cuví ndo sehe, tahán chí cha tyasoho ndo nu cahán sutu ndo ta sihi ndo. Vatyí cuñi ndo chí Nyoo. ²⁻³ Nu tutu Nyoo nyaá cha xihna ri sacuví yo ta nañiñi yo cha cucuhva Nyoo chí yo. Catyí chí: “Saha ndo ñáyiví chí sutu ndo, chí sihi ndo. Tyicuan caa ta sií xaan cuacoo ndo. Ta naha xaan cuacoo ndo ñáyiví ihya”, catyí Nyoo.

⁴ Ta nyoho cha iyó sehe ndo, ma nanducu ndo cha cuxaan sehe ndo. Soco sañaha ndo tuhun Nyoo chí ñu, ta yoso caa quichaha ñu chí ndo ta chí Nyoo.

⁵ Ta nyoho cha cuví ndo musu, quichaha ndo chí chitoho ndo siqui ñuhu ñáyiví ihya. Saha ndo ñáyiví chí ñu. Quichaha ndo chí chitoho ndo chihin cha níi ñi ndo. Tatu sacuví ndo tyicuan caa, chí ra Cristo quichahá ndo cuví cuan.

⁶ Ma saha tyiño ndo cuhva cha nyehe ri chitoho ndo tacuhva vatyí catyí ñu tyi vaha ndo. Soco saha tyiño vaha ndo tari cha vatyí sacuví ndo tyiño nuu ra Cristo. Ta tyicuan caa sacuví ndo cuhva cuñi Nyoo chihin cha níi añima ndo. ⁷ Chihin cha iyó vaha ñi ndo

sacuvi ndo. Tari cha sahá tyiño ndo nuu Sutu Mañi yo ta ñima nuu ñáyivi. ⁸ Vatyí cha chitó yo tyi tahan tahan yo, an cuví ri yo musu, an ñima, soco cutiyiahví Sutu Mañi yo chi yo yoso cuhva cha vaha cha chinyacuví yo.

⁹ Ta nyoho cha iyó musu ndo, suri vaha coo ndo chihin musu ndo. Ta ma sayuhví ndo chí ñu. Vatyí chitó ndo tyi ña cahnu ca maa ndo cha nuu musu ndo. Inuu ri cuví ndo nuu Nyoo ra cuví chitoho yo nya andívi. Vatyí maa ra ña cachi ra chí yo.

Tunyee iñi cha chahá Nyoo chi yo cha yihí yo cuenda ra

¹⁰ Ta vityin sandunyeey yo iñi yo chihin cha iin ri cuví yo chihin Sutu Mañi yo. Vatyí iyó xaan tunyee iñi chí ra. ¹¹ Ta tari noo sindaro sahá cuenda ra chí ra, tyicuan caa tucu yoó, ñasaha cuenda vaha yo chí yo chihin tandihí cha cuví tyinyee Nyoo chí yo. Tyicuan caa ta cuví chasaha yo chí cuihna. Vatyí nducú xaan ra cuhva sandavi ñaha ra chí yo. ¹² Tyicuan caa coo yo chihin tunyee iñi Nyoo. Vatyí ñima chihin ñáyivi cañi tahan yo. Soco cañi tahan yo chihin tatyí ña vaha cha ña nyehé yo. Vatyí ican cuan cuví cha nyacá ñaha chí ñáyivi cha nyacuví cha quiñi caa. ¹³ Yucuan chaha saha cuenda vaha yo chí yo chihin tandihí cha cuví tyinyee Nyoo chí yo, tacuhva cuví chasaha yo chí ra ña vaha ñáá quiví nducu tñin ra chí yo. Coto cana cava yo saha ra. ¹⁴ Tari noo sindaro ñihi nanyaá ra chihin noo sincho yihí chichi ra, tyicuan caa ñihi cuñnanyaa yo chihin tuhun cha ndicha vaha. Tari cacú noo sindaro vatyí tyaá ra noo caa pecho ra, tyicuan caa Nyoo cusacacu ra chí yo ndaha ra ña vaha, tatu maa ri cha vaha sacuví yo. ¹⁵ Ta tari natyihí sindaro bota chaha ra ta nyatú tuhva ra cha cuhnu ra cuatyí, tyicuan caa cuatu tuhva yo chihin tuhun Nyoo. Na sacoto yo chí ñáyivi yoso caa nicoo vaha ñu chihin ra. ¹⁶ Ta tari sindaro chasí ra chí ra chihin noo caa tacuhva ma nañi nduva chí ra, tyicuan caa cuñi chí nachino vaha iñi yo chí Nyoo tacuhva cha cuví chasaha yo tandihí cha sacuví ra ña vaha chí yo. ¹⁷ Ta tari sahá cuenda sindaro xiñi ra chihin noo caa, tyicuan caa nacuhva cuenda yo chí yo chí Nyoo, na sacacu ra chí yo. Ta naquehen yo tuhun cha chahá ra chí yo. Vatyí tari noo mityí Tatyí Ii ra cuví tuhun cuan. Vatyí chihin tuhun ra sahá ganaa yo chí cuihna. ¹⁸ Ta nyita ri cahan yo chihin Nyoo. Ta Tatyí Ii ra cuatyinyee chí yo tacuhva cacan tahví yo chí ra. Ta cuacu ndahví yo nuu ra. Ta tyicuan caa cuatu tuhva ri yo. Ta ma ndu uvi iñi yo. Tyicuan ri cacan tahví yo cha cuenda tandihí ñu yihí cuenda Nyoo. ¹⁹ Ta ñacuatú tucu ndo chahi, tacuhva vatyí ñihi que tuhun cahin. Ta ma yuhví sacote tuhun

ra Cristo chí ñáyivi. Vatyí ta cha naha ña chito ñáyivi tuhun ra. ²⁰ Ta cha cuenda cha sacoté tuhun ra Cristo ñohí vehe caa ihya vityin. Soco Nyoo tachí chii vatyí cahin tuhun ra chihin ra nyicú vehe caa ihya. Caçan tahví ndo cha cuende, tacuhva cuví cahin chihin cha ña yuhví, tari cuhva tahán chí cahin.

Tachí ra Pablo chí ra Tíquico tyi cuhun ra nu nyicu ñu

²¹ Ta ra Tíquico yañi yo, cunacatyí ra tandihí tuhín chí ndo. Maa ra nñi iñi ra sahá tyiño ra cuenda Sutu Mañi yo. Ta cuñi xaan yo chí ra. ²² Tachí chí ra nu nyicú ndo tacuhva sacoto ra chí ndo yoso caa iyó ndi ihya, tacuhva ndunñi ca iñi ndo chino iñi ndo chí Nyoo. ²³ Ta Nyoo Sutu yo ta Sutu Mañi yo Jesucristo nacuhva ra cha taxi ri coo añima tandihí ra yañi yo. Ta na cuhva Nyoo cha chinó vaha iñi ra chí ra. Ta vityin suri Nyoo ñacuhva ra cha cuñi ca ra chí ra ta chí ñáyivi. ²⁴ Ta na nasoco ra chí tandihí yo cha nyita ri cuñi yo chí Sutu Mañi yo Jesucristo chihin cha nñi iñi yo. Ta ñacuví chí tyicuan caa.

Carta Cha Sacuhun Ra Apóstol Pablo Chi Ñáyivi Ñuu Filipos Cha Yihí Cuenda Nyoo

Ñohó ra Pablo vehe caa, ta tyaá ra noo carta chi ñu yihí cuenda Nyoo ñuu Filipos

¹ Yuhu ra Pablo ta ra Timoteo sacuví ndi tyiño nuu ra Jesucristo. Ta tyaá ndi carta ihya chí tandihí ndo cha cuví ndo ñu ñuu Filipos cha yihí cuenda Nyoo. Ta chí ra cayihí ndaha vehe ñuhu, ta chí ra canyehe tyiño vehe ñuhu, ta chí tandihí ndo. ² Na nasoco Nyoo Sutu yo ta Sutu Mañi yo Jesucristo chí ndo. Ta nacuhva ra cha taxi ri coo añima ndo.

Nu chicán tahvi ra Pablo chaha ñu yihí cuenda Nyoo ñuu Filipos

³ Tahan ri cha nichón iní chí ndo, nacuhvá xain tyahvi nyoo chí Nyoo cha cuenda ndo. ⁴ Ta chicán tahvi chí Nyoo cha cuenda ndo chihin cha sîi cuñí añime. ⁵ Vatyí nyata quívi xihna ri cha chíñi ndo tuhun ra Cristo ta nya vityin ta ña sandihí ndo tuhun cha tyinyeé ndo chíi. Vatyí ñin ri tuhun ra Jesucristo sacotó yo chí ñáyivi. ⁶ Quívi naquehen cuenda Nyoo añima ndo, maa ra chaha tunyee iní chí ndo, na sacuví ndo tyiño nuu ra. Ta chité tyi tyicuan ri cuacuhva ra chí ndo nyacua nya quívi quichi ra Cristo inga chaha. ⁷ Tahán chí cha caca xiñi tyehé caa cha cuenda ndo, vatyí cuñí xain chí ndo. Vatyí ñin ri nasocó Nyoo chí yo. Vasi ñohí vehe caa, o vasi nanyai nuu ra cuví tyiño, soco sacoté tuhun Nyoo chí ra canyicú vehe caa ihya, ta chí ra cuví tyiño, na cacoto ra tyi ndicha tuhun ra Cristo. ⁸ Nyoo chitó ra vatyí cuñí xain chí tandihí nyoho tari cuñí ra Jesucristo chí ndo. ⁹ Ta chicán tahvi xain chí Nyoo na cuvita ca iní ndo, ta cuñí ca ndo chí ñáyivi. Ta suri coo ca cha chíñi tuñi Nyoo chí ndo, ¹⁰ tacuhva vatyí tyicuan ri coto ndo nacachi ndo cha vaha ca. Ta tyicuan caa ta cachi coo ndo ta ma coo ca cuatyí ndo quívi quichi ra Cristo. ¹¹ Maa ra cutyinyee ra chí ndo. Ta tyicuan ri cusacuví ndo maa maa ri cha vaha, ta cha ndaa. Tyicuan caa ta cusacahnu ñáyivi chí Nyoo tyi cahnú caa ca cuví maa ra ta sacuví ra tyicuan ri chihin ndo.

Maa maa ri tyiño Nyoo sacuví ra Pablo vatyí ñohó ra Cristo añima ra

¹² Ta cuñí tyi coto ndo yañi vatyí tandihí cha cuví chíi tyinyeé xaan chí chíi nu cahnú tuhun Nyoo chihin ñáyivi. ¹³ Vatyí chitó tandihí sindaro vehe rey ta tandihí inga

ñáyivi ihya vatyí ñohí vehe caa cha cuenda cha nyiquén chí ra Cristo. ¹⁴ Ta cuaha xaan ra yañi yo cuenda Sutu Mañi yo cuní ca iní ra cha cuenda cha ñohí vehe caa. Ta naá cha yuhvi ra vatyí cachitó ra vatyí tyinyeé Nyoo chí yo. Ta ñihi ca cacahán ra tuhun Nyoo chihin ñáyivi.

¹⁵ Ta ndicha vatyí yihí ra, cahán ra tuhun ra Cristo soco cha cuenda cha tasi cuñí ra nyehé ra chíi, o cuñí ra na cunyicon ñáyivi chí ra. Soco yihí ra cahán ra tuhun ra Cristo chihin ñáyivi, soco chihin cha vaha chicá xiñi ra. ¹⁶ Yihí ra cacahán ra tuhun ra Cristo cha cuenda cha cuñí ra chí ra. Vatyí chitó ra vatyí maa Sutu Mañi yo quichi nyaca ra chíi ihya. Vatyí cotyiño ra chíi, ta sacoté chí ñáyivi tyi ndicha cha sacacú ra añima yo. ¹⁷ Socó inga ra cuan ñima cha ñi iní ra cahán ra tuhun ra Cristo, soco cuñí ra cuhva ra tisihi chíi nu ñohí vehe caa ihya. ¹⁸ Soco cha cuenda chí yuhu ñahri saha, vasi sacuví ra chihin cha vaha chicá xiñi ra o chihin cha ña vaha. Soco tuhun ra Cristo ican casacotó ra. Ta sîi xaan cuñí cha cuenda xaan.

¹⁹ Ta cusîi ca iní vatyí chité vatyí chichi cha tandihí cha cuví chíi, Nyoo cuasacacu ra chíi. Tyahvi nyoo chí Nyoo vatyí chicán tahvi xaan nyoho cha cuende nuu Nyoo. Ta tyinyeé xaan Tatyí Ii ra Cristo chíi. ²⁰ Chitó vahi vatyí Nyoo cutyinyee ra chíi cha ma cucahan nui, ta ma yuhvi cahín chihin cha ñi iní tuhun ra Cristo. Ñahri cuende, an coo que ñáyivi, an cuví, soco cuñí vatyí vityin ta ityi nuu ca saha ñáyivi cuenda cuhva iyé ta coto ñu tyi ra Cristo cahnú ca cuví ra. ²¹ Vatyí cha cuenda yuhu tatu iyé, sacuví tyiño nuu ra Cristo ihya siqui ñuhu ñáyivi. Soco tatu cuví, cuñihi cha tyaqui cha iyó andivi. ²² Soco tatu iyó que, vaha xaan. Vatyí sahá tyiño que cha cuenda cha vaha maa Sutu Mañi yo. Yucuan chaha ña chité nya ityi cuhin, an cuhin ityi andivi, an cuhin cucahan que tuhun Nyoo chihin ñáyivi, ña chité. ²³ Yîi xaan cote nya cha cuñí, vatyí iyó quívi cuñí cha coo que. Soco iyó quívi ña cuñí. Vatyí cha cuñí cunuhi cucunyai chihin ra Cristo. Vatyí vaha ca cuan. ²⁴ Soco cha cuenda cha vaha chí nyoho, vaha ca cha ndoí chihin ndo. ²⁵ Yucuan chaha chité vatyí cundoí suhva ca ñáyivi ihya. Vatyí cuñí chí cha tyinyeé que chí ndo tacuhva cuví cuhan ca ndo ityi nuu ca ta cu sîi cuñí ndo chihin cha chinó iní ndo chí Nyoo. ²⁶ Ta quívi cunyehi nu nyicu ndo, tyicuan caa ta cuví cusîi ca iní yo cha ñin ri cuví yo chihin ra Cristo.

²⁷ Cuñí chí cha coo yo yoso cuhva tahán chí coo noo ñu yihí cuenda Nyoo. Vasi nyaí chihin ndo, o cañi nyaí, soco cuñí cote tuhun ndo vatyí nyoho vaha cuahan ndo chihin Nyoo. Ta ñin ri sahá tyiño ndo tacuhva

nachino iñi ñáyivi tuhun ra Cristo. ²⁸ Ta ma yuhvi ndo ñáá cha sacuvi ñu xaan iñi chi ndo cuenda tuhun Nyoo. Vatyí cha tyicuan caa, cachi xaan sañahá chi chi yo vatyí cunaa ñu. Ta sañahá tucu chi chi yo vatyí cha cacú añima yo sahá maa Nyoo. ²⁹ Vatyí tari chahá ra Cristo ityi chi yo cha chinó iñi yo chi ra, tyicuan caa tucu chahá ra cha nyehé yo tindoho cha cuenda ra. ³⁰ In ri cuhva nyehé yo tindoho ta sacotó yo tuhun ra Cristo, ta cha chitó ndo yoso caa nyehi tindoho, ta vityin suri chitó ndo vatyí ña sañé cha sahá tyiñe tuhun Nyoo.

2

Tyayii xaan ra Cristo, soco quichi cúvi ra tari noo ra ndahvi

¹ Ndicha vatyí ra Cristo saní xaan ra iñi yo cha in ri cúvi yo chihin ra. Ta vaha cuñi yo cha cuenda cha cuñi ra chi yo. Ta ndicha tucu vatyí nyaá Tatyí li Nyoo chihin yo. Ta ndicha tucu cha ndahvi cuñi yo nyehé yo chi tahan yo. ² Tatu ndicha tandihí ihya, cuhva ndo cha cusii cuñi chihin cha in ri cúvi ndo. Ta cuñi ndo chi tahan ndo tari cuñi ra Cristo chi ndo. Ta in ri cuhva caca xiñi ndo. Ta in ri cuhva sacuvi ndo. ³ Ma sacuvi ndo cha vaha chi maa ri maa ndo, soco sacuvi ndo cha vaha chi ñáyivi ñandihí. Ta ma cahnu saha ndo chi ndo. Ndahvi saha yo chi yo. Ta tahan tahan yo saha yo tuhun vatyí vaha ca inga ñáyivi ta ñima ca maa yo. ⁴ Ta tahan tahan yo caca xiñi yo cha cuenda cha vaha chi inga ñáyivi, ta ñima cha vaha chi maa ri maa yo.

⁵ Caca xiñi ndo tari chicá xiñi ra Jesucristo.

⁶ Vasi cúvi ra Nyoo, soco ña cahnu saha ra chi ra ta ña quichi cúvi iñi ra cha sacahnú ñáyivi chi ra, tari sacahnú ñu chi Nyoo Sutu ra.

⁷ Soco sandoo ra tandihí tunyee iñi ra ta tandihí cha tyayii ra in chiyo xiin.

Ta quichi nanduví ra noo ñáyivi ndahvi quívi cacú ra siqui ñuhu ñáyivi.

⁸ Ta ndahvi saha ra chi ra, vatyí nanduví ra noo rayii ri.

Ta chihin cha iyó vaha iñi ra ta quichaha vaha ra chi Nyoo nyacua chaha ra cha cahñi ñáyivi chi ra.

Tari noo ra quiñi iyó saha ñu chi ra, vatyí nu cruzi chihí ra.

⁹ Yucuan chaha Nyoo sacahnú xaan ra chi ra.

Ta chahá Nyoo noo sivi chi ra, noo sivi cha cahnu xaan ca cúvi nuu tandihí maa sivi.

¹⁰ Vatyí tacuhva tatu cuiñi yo sivi ra Jesucristo, tandihí yo ta cuiñi chiti yo. tandihí cha iyó andivi.

Ta tandihí cha iyó siqui ñuhu ñáyivi, ta chichi ñuhu, cucuiñi chiti ta sacahnú chi ra.

¹¹ Vatyí tandihí cha iyó ta nacoto nuu vatyí ra Jesucristo cúvi ra nyacá ñaha chi tandihí maa cha iyó.

Tyicuan caa cunyehe chi tyi cahnu xaan ca cúvi maa Nyoo Sutu yo.

Ñu yihí cuenda Nyoo cúvi ñu tari noo cha ndichin siqui ñuhu ñáyivi ihya

¹² Yañi, cuñi xain chi ndo. Ta tari cha quichaha ndo chii quívi chinyai chihin ndo, quichaha tucu ndo chii vityin cha cañi nyaí. Ndücu xaan ndo cuhva na nyehé ñáyivi tyi ndicha cha sacacú Nyoo chi ndo. Ta saha ndo cuenda cuhva coo ndo chihin ra.

¹³ Vatyí maa Nyoo sacacú cha vaha añima ndo. Ta tyinyeé ra chi ndo tacuhva vatyí quichi cúvi iñi ndo quichaha ndo nu cahán ra, ta sacuvi ndo cuhva cuñi ra.

¹⁴ Tatu cuasacuvi ndo ñáa cha cuasacuvi ndo, ndücu ndo cuhva cha ma coo tisihi, ta ma cañi tahan ndo. ¹⁵ Tyicuan ta ma coo ni noo catyati ndo. Cúvi ndo noo ñáyivi cachi iyó, cúvi ndo ñáyivi ñahri cuatyí, tari tahan chi coo ñáyivi cuenda Nyoo mahñu ñáyivi quiñi iyó ihya. Cuñi chi cha cúvi ndo tari noo ñuhu cha sandichín nu ñaa iñi siqui ñuhu ñáyivi ihya. ¹⁶ Cahan yo tuhun Nyoo chihin ñáyivi vatyí ican cuan chahá ñáyivi chaa cha iyó yo. Sacuvi ndo tyicuan caa, tyicuan ta quívi cuquichi ra Cristo, yuhu vaha coo iñi cha cuenda nyoho, vatyí ña sacotó cahi tuhun Nyoo chi ndo. ¹⁷ Ta vasi cahñi ñáyivi chi yuhu, cha catyi tuhun Nyoo, soco sii xaan cuñi ta cuñi cusii cuñi ndo chihin vatyí tyicuan caa sacañá tahin cha cucuhva cuenda yo chi Nyoo, cha cuenda cha chinó iñi ndo chi ra. ¹⁸ Ta tahan chi cha cusii iñi tucu nyoho chihin yuhu ñandihí.

Nu tachí ra Pablo chí ra Timoteo ta ra Epafrodito nu nyicu ñu yihí cuenda Nyoo ñuu Filipos cuan

¹⁹ Tatu Sutu Mañi yo ta cuñi ra cutachi chí ra Timoteo quichi nyehé ra nu nyicú ndo. Ta quívi ndichí ra nu nyaí cucusii xaan cuñi. Vatyí cunacatyí ra chii yoso caa nyicú ndo. ²⁰ Vatyí noo tuhun ri maa ra chicá xiñi ra cha cuenda cha vaha chi maa ndo tari chicá xiñi yuhu. Ta yori yóo ca ra chicá xiñi tyicuan caa. ²¹ Vatyí tandihí ca ra, maa maa ri cha cuenda chi maa ra nanducú ra. Ta ña nanducú ra yoso caa cuhva cuñi ra Jesucristo. ²² Chitó ndo vatyí ra Timoteo, vaha cuahan ra chihin Nyoo, ta cha cuenda chí yuhu cúvi ra tari noo sehi. Ta tyinyeé xaan ra chii cha cahán ndi tuhun ra Cristo chihin ñáyivi. ²³ Ta nyaá sacuhin chí ra nu nyicú ndo. Soco nya coto xihne ñáa catyi ra cúvi tyiño, tatu ña naha ca ñohí. ²⁴ Vatyí chitó vahi tyi Sutu Mañi yo numi ri cuhva ra cha cuhin cunyehe nu nyicú ndo.

²⁵ Ta vaha cha cunuhu ra Epafrodito yañi yo nu nyicu ndo. Tachj ndo chi ra vatyi quichi tyinyee ra chii nu tyiño sahí. Ta tñn tahan xaan ndi chihin ra ña vaha cha cuví ndi sindaro ra Cristo. ²⁶ Ta cuñi xaan ra Epafrodito cunuhu ra nu nyicu ndo, vatyi chicá xaan xiñi ra cha chitó ndo tyi cuhvj ra. ²⁷ Vatyi ndicha cuhvj xaan ra ta cha yatyin maa cha cuví ra. Soco Nyoo cundahvi cuñj ra nyehe chi ra, ta chi yuhu ñandihí. Ta ña chahá ra cha cuví ra. Ña cuñi ra cha coo ca tucuihya iñi chii. ²⁸ Yucuan chaha yuhu cuñi xain cha ndichi ra nu nyicu ndo. Vatyi chité tyi nyoho cundusii xaan cuñi ndo cha nanyehé ndo chi ra. Tyicuan ta ma caca ca xiñi tuhun ndo. Vatyi cha nanyehé ndo chi ra tyi iyó vaha ra. ²⁹ Yucuan chaha vaha ñaquehen ndo chi ra chihin cha sii cuñi ndo, vatyi yañi yo cha cuenda maa Sutu Mañi yo cuví chi ra. Ta tyicuan ri saha ndo ñáyivi chi yañi yo cha iyó tari caa cuhva iyó ra. ³⁰ Vatyi cha yatyin maa cha cuví ra cha cuenda cha sacuví ra tyiño ra Cristo. Soco ña yuhví ra vasi cuví ra cha cuenda cha tyinyee ra chii. Vatyi maa ndo ña cuví quichi tyinyee ndo chii vatyi cañi xaan nyicu ndo.

3

Nu sañahá ra Pablo yoso caa ndu ndii yo nuu Nyoo

¹ Ta vityin yañi, çusii iñi ndo chihin Sutu Mañi yo. Cha cuenda chi yuhu ñahri sahá cha cha yaha tyaj tuhun ihya chi ndo, cutyaa tiqúi inga chaha. Vatyi cha vaha chi maa ndo cuví. ² Saha ndo cuenda chi ndo chihin ra cha quiñi iyó chiña. Nyacuví ra cuhva cuñi ra ña vaha. Vatyi catyí ra tyi cuñi chi sacuví yo costumbre circuncisión ta cacu yo. ³ Soco yoó noo circuncisión cha ndicha savahá Nyoo chi yo. Vatyi maa yo sacahnú yo chi ra chihin Tatyí li ra cha ñohó añima yo. Ta cusii cuñi yo vatyi cuenda maa ra Cristo Jesús yihí yo. Ta ña itá iñi yo tyi cacu yo chihin cha sacuví yo costumbre. ⁴ Tyehe ta cuví cacu yo chihin cha sacuví yo, yuhu vihi ca caquí cha nuu tandihí ñu sacuví tyicuan caa. ⁵ Vatyi uña quivi ta saha ñu circuncidar chii. Vatyi tata ra Israel vachí. Ta tata ra Benjamin sehe ra Israel cuví. Ta tata ñu cahán sahan hebreo cuví. Yucuan chaha yuhu hebreo cuví. Ta siin ri quichahá xain ley chahnu quivi cuan, vatyi fariseo cuví. ⁶ Ta cha cuenda cha cuñj quichahj ley, ta chican nyicon xain chi ñu yihí cuenda ra Cristo. Ta ña cuñj nyehi chi ñu. Ta quichahj tandihí maa ley chahnu, vatyi nducu xain cuhva quichahí nu cahán ley cuan. ⁷ Soco tandihí cha cuñj mai vatyi vale xaan quivi cuan, vityin ña vale ca cuan. Vatyi maa ra Cristo cuví ra itá iñi. ⁸ Ta siin ri tandihí cha sacuví, chitó mai vatyi ña vale

cha cuenda cha chicohón nui chi ra Cristo Jesús, Sutu Mañi yuhu. Vatyi yucuan cuví cha tyayii xaan ca. Ta cha cuenda ra Cristo tandihí cha sacuví ta ityi chata ca cuví chi noo cha ñima ri tuhun vityin. Yucuan chaha sandoj iin chiyu xiin tandihí cuan. Vatyi cuñi cohon nuu que chi ra Cristo. ⁹ Ta cha cuñi yuhu nacu iin ri que chihin ra. Vaha iyé cha cuenda tyi chinó iñi tyi sacacú ra chi yo. Ñima cha cuenda cha quichahí ley Nyoo ta vaha iyé, soco cha cuenda vatyi chinó iñi tuhun cahán ra, vatyi sacacú ra chi yo. Ta cha cuenda cha chinó ri iñi yo, ra Cristo ñaquehén cuenda ra chi yo. ¹⁰ Cha cohon nuu que chi ra Cristo yucuan cuví cha cuñi. Nyoo sanandotó ra chi ra Cristo chihin tunyee iñi ra. Ta cuñi tyi coo ca tunyee iñi cuan chii. Ta cuñi cunyei tindoho cha tahán chi nyehí. Ta cuñi cha cuví tandihí cha ña vaha cha cuñi coño ñuhu, tari chihj ra Cristo cha catyi cuatyí yo. ¹¹ Vatyi nanducú xain cuhva cha cunandote noo ñayivi chaa chihin Nyoo nya andivi.

Cuhun ca yo ityi nuu ca chihin Nyoo

¹² Ñima tyi catyí chi ndo tyi ñahri ca cha cumañi chii, ta vaha xain. Soco cuahin ityi nuu ca. Vatyi cuñi ñaquehin cha chahá ra Cristo chii. Vatyi xihna ca maa ra naxita ra chii ityi ra. ¹³ Yañi, ña catyí chi ndo tyi cha ñihj tandihí cha vaha cuan. Soco sanaí iñi cha quichi ityi chata. Ta sañihí cuhin ityi nuu ca. ¹⁴ Tacuhva tyi chaí nu nyaá cha tahán chi chii. Vatyi caná Nyoo chi yo nya andivi. Vatyi cunaquehen yo cha catyí ra chi yo vatyi cuhva ra cha cuenda cha iin ri cuví yo chihin ra Cristo Jesús.

¹⁵ Tyehe caa tahán chi caca xiñi tandihí yo cha ñihi nyaá yo chihin Nyoo. Soco tatu ñima tyehe caa chicá xiñi nya noo nyoho, Nyoo cucuhva ra cha cutuñi iñi ndo. ¹⁶ Soco noo ri tyi cuñi chi cha quichahá vaha yo tuhun cha cha yaha sacotó Nyoo chi yo.

¹⁷ Yañi, quehen ndo cuhva iyé ta cuhva cahán. Ta saha ndo cuenda chi ñu iyó tari cuhva sañahá ndi chi ndo. ¹⁸ Vatyi ticuui chaha catyí chi ndo, saha ndo cuenda chi ra cuendu. Ta vityin catyí tiqúi chi ndo inga chaha chihin cha chaquí cha cuihya iñi, vatyi cuaha xaan ra xaan iñi chi ra Cristo. Vatyi catyí ra tyi noo cha ña ñiñi xaan cuví cha chihj ra Cristo nu cruzi. ¹⁹ Soco quivi quichi tucu ra Cristo, cuhun coyo ra cuan anyaya. Vatyi sacuví ra cuhva cuñi coño ñuhu ra. Ta cahnu sahá ra chi ra chihin cha tahán chi coo ticahan nuu nuu ra. Ta itá iñi ra maa maa ri cha iyó ihya ñayivi ri. ²⁰ Soco yoó nya andivi nyaá ñuu yo. Ta suri ityi cuan nyatú yo chi Sutu Mañi yo Jesucristo, ra sacacú chi yo. ²¹ Ta cuquehen ra coño ñuhu pehe yo. Ta cusananduví ra chi yo tari coño ñuhu maa ra. Ta chihin tunyee

iñi cha iyó chi ra cha nyacá ñaha ra tandihi, cusacuvi ra tyicuan caa.

4

Tyicuan ri na cusii cuñi yo chihin Sutu Mañi yo

¹ Yañi, cuñi chi ndo. Ta cuñi xain nyehi chi ndo. Ta sii xaan cuñi chihin ndo. Ta chité tyi ña cahán cahi tuhun Nyoo chihin ndo. Vatyí nñi xaan iñi ndo nyicón ndo chi ra. Na cuinyaña ca ndo chi Nyoo chihin cha nñi iñi ndo.

² Ta vityin chiquén chi cu Evodia, ta chi cu Síntique, nanduvaha coo ñu chihin tahan ñu. Ta na coo ñu tari cha cuhu ñu cuenda Sutu Mañi yo. ³ Yoho, yañi, nñi iñun sahá tyiñon chihin, ta chiquén chuun na tyinyeun chi ñu tahan yo ihya. Vatyí tyinyeë xaan ñu chii chihin cha sacotó ñu tuhun Nyoo cha cacu añima yo chihin ra Clemente ta suhva ca ñu ñandihí. Ta nyaá sivi ñu nuu tutu Nyoo nya andívi.

⁴ Ta tyicuan ri maa cusii iñi ndo chihin Sutu Mañi yo. Ta catyí tiqui chi ndo inga chaha, na cusii iñi ndo chihin ra. ⁵ Ta tandihí ñáyivi na nyehe ñu chi nyoho vatyí ndicha noo ñáyivi vaha cuví ndo. Ta nyichon iñi ndo vatyí cha nyaña yatyin quivi quichi Sutu Mañi yo.

⁶ Ta ma ndahvi xaan cuñi ndo ñáá ndihí cha cuví chi ndo. Nyita ri nacatyí ndo chi Nyoo ñáá ndihí cha cuví chi ndo. Ta çacan tahvi ndo chi ra ñáá ndihí cha chiñuhú chi ndo. Ta yaha cuan ta nacuhva ndo tyahvi nyoo chi ra. ⁷ Ta cha sacuvi ndo tyehe caa, Nyoo cuhva ra cha taxi ri coo añima ndo. Ta cahnun xaan ca cha vaha cuví cuan. Ta ni noo ñáyivi ta ña cuví cutuñi iñi ñu yoso cuhva cha cahnun cuan. Ta cha taxi maa Nyoo cusaha cumi añima ndo ta cha chiñi tuñi xiñi ndo. Vatyí iñin ri cuví ndo chihin ra Cristo Jesús.

Na caca xiñi yo maa maa ri cha vaha

⁸ Yañi, nu ndihí tuhun çaca xiñi ndo maa ri cha ndicha vaha, cha cachi iyó, cha ndoo iyó, cha ndii, cha ñahri cha quiñi caa, cha tyaqui, cha vaha. Çaca xiñi ndo maa maa ri maa cha vaha tacuhva cuví sacahnun yo chi Nyoo.

⁹ Sacuvi ndo cha sañahí chi ndo. Tuhun cha chiñi ndo cahin, cha nyehe ndo chinyacuví, sacuvi ndo. Ta Nyoo ra chahá cha taxi coo añima yo, cucunyya ra chihin ndo.

Tyinyeë ñu Filipos chi ra Pablo chihin cha iyó chí ñu

¹⁰ Sii xaan cuñi. Ta sacahní chi Sutu Mañi yo cha cuenda cha tyinyeë ndo chii inga chaha. Ta chité vatyí tyicuan ri cuñi ndo tyinyeë ndo chii. Soco ña chahá chi cuhva chi ndo. ¹¹ Ñima tyi catyí chi ndo tyehe caa

ta cuñi ndo tyi iyó cha chiñuhú chii, vatyí yuhu cha cutuhve cha cusii cuñi chihin ñáá ri cha iyó chí. ¹² Vatyí yuhu chité yoso caa coo ndahvi ta chité yoso caa coo tyayí. Vatyí cha cutuhve coi chihin cha iyó o chihin cha ñahri cha cachi, o tatu nyacua ndoo ca, o tatu ñahri tucu, ndoi vaha. ¹³ Tandihí ta cuví chasahí vatyí maa ra Cristo cuví ra tyineé chii. ¹⁴ Soco nyoho yañi vaha xaan cha tyinyeë ndo chii chihin tindocho cha nyehé xain.

¹⁵ Cha chitó nyoho ñu Filipos yoso caa cuví quivi quichaha cahin tuhun Nyoo chihin ndo. Ta quite Macedonia chiña tyi cuasacote tuhun Nyoo inga ñuu. Ta noo tuhun ri nyoho tyinyeë ndo chii chihin xuhun, vatyí vaha xaan cuñi ndo cha cahin tuhun Nyoo chihin ndo. ¹⁶ Ta siin ri cha ni ri ca cha chinyai Tesalónica, cuaha ri chaha tyinyeë ndo chii. ¹⁷ Ñima cha chicá xiñi cha cuenda cha cuhva ca ndo chii, soco cha cuñi vatyí nyoho coo ca cha vaha chi ndo nuu Nyoo. ¹⁸ Ta vityin cuhva, ñahri cha cumañi chii. Nyacua ndoo ca cha sacahnun ndo chii chihin ra Epafrodito. Ta cha chahá ndo cuan cuacuví chi tari noo xico vixi, xico vaha cha chaá nuu Nyoo. Yucuan cuví cha tahán iñi ra. ¹⁹ Ta Nyoo cuhva ra tandihí cha chiñuhú chi ndo. Cha cuenda ra Cristo cucuhva ra tandihí cha vaha cha tyayí cha cumí ra nya andívi. ²⁰ Chi Nyoo Sutu yo na sacahnun yo tyicuan ri maa. Ta na cuví chi tyicuan caa.

Sacuhún ra Pablo nocumi chi ñu Filipos

²¹ Chahí nocumi chi tandihí ndo cha yihí ndo cuenda ra Cristo chiña. Ta vachi tucu nocumi chi ndo sahá yañi yo cuenda Nyoo cha nyicú chihin ihya. ²² Ta ñáyivi cha nyicú vehe ra nyacá ñaha ñuu Roma ihya, ta tandihí ca ñu yihí cuenda Nyoo ñuu ihya chahá ñu nocumi chi ndo.

²³ Ta na nasoco maa Sutu Mañi yo Jesucristo chi tandihí ndo. Ta na cuví chi tyicuan caa.

Carta Cha Sacuhún Ra Apóstol Pablo Chi Ñáyiví Ñuu Colosas Cha Yihí Cuenda Nyoo

*Nu sacuhún ra Pablo noo tutu chi ñáyiví
ñuu Colosas cha yihí cuenda Nyoo*

¹⁻² Yuhu ra Pablo cuví noo apóstol ra Jesucristo. Vatyí tyicuan caa cuhva cuñí maa Nyoo. Yuhu chihin ra Timoteo yañi yo, tyaá ndi noo carta ihya chi ndo ñu ñuu Colosas cha yihí vaha cuenda Nyoo ta cuenda ra Cristo. Nyoo Sutu yo nasoco ra chi ndo ta nacuhva ra cha taxi ri coo añima ndo.

*Nu chicán tahvi ra Pablo chaha ñu yihí
cuenda Nyoo ñuu Colosas*

³ Tyicuan ri cha chicán tahvi ndi chaha ndo. Ta nacuhvá ndi tyahvi nyoo chi Nyoo Sutu Sutu Mañi yo Jesucristo cha cuenda ndo. ⁴ Vatyí ñihí ndi tuhun vatyí chinó xaan iñi ndo chi ra Cristo Jesús. Ta cuñí xaan ndo chi tandihí ñu cha yihí cuenda ra. ⁵ Tyicuan caa sacuví ndo vatyí chitó vaha ndo vatyí cuoco ndo chihin Nyoo nya andiví. Nya quiví chiñi ndo tuhun Nyoo cha ndicha vaha, quihí iñi ndo vatyí sacacú ra Cristo añima ndo. ⁶ Ta suri maa tuhun ra Cristo cha cahán ra Epafras chihin ndo, ican cuan chityá tandihí ri ityi tari chityá tucu nu canyicú ndo. Ta cuaha ñáyiví nacuhvá cuenda ñu chi ñu chi Nyoo, tari nacuhvá cuenda nyoho chi ndo ñandihí. Ta cuhva cha chiñi ndo tuhun ra Cristo, ta chitó ndo vatyí ndicha vaha cha cuñí Nyoo chí yo. ⁷ Ican ihya sañaha yañi yo ra Epafras chi ndo. Vatyí ñn ri tuhun Nyoo sahá tyiño ndi chihin ra. Ta ican ra cuví ra sacuví tyiño nuu ra Cristo cha cuenda ndo. ⁸ Maa ra sacotó tuhun ndo chí ndi, vatyí cuñí xaan ndo chí tahan ndo. Vatyí maa Tatyí Ii Nyoo chahá cha vaha coo añima ndo.

⁹ Yucuan chaha nyacua nya quiví chito ndi tuhun ndo ta ña sandihí ndi tuhun cha nacuatú ndi chaha ndo. Ta chicán ndi chí Nyoo nacuhva ra cha chiñi tuñi ra chí ndo cha cuenda Tatyí Ii ra. Ta cuacutuñi iñi ndo tacuhva coto vaha ndo ñaá ndihí cha cuñí Nyoo tyi sacuví ndo. ¹⁰ Tyicuan caa ta cuví coo ndo tari cuhva tahán chí coo ñu yihí cuenda Nyoo. Ta na sacuví ndo tari cuhva cuñí maa ra. Tacuhva sacuví ndo tandihí nuu cha vaha ta cohon nuu vaha ca ndo chí ra. ¹¹ Ta chicán tucu ndi vatyí na sandunye ca ra chí ndo chihin tunyee iñi cahnu ra vatyí cuví cunye ndo tandihí cuñi chihin cha cama iñi ndo. ¹² Ta chihin cha si cuñí ndo, ta nacuhvá ndo tyahvi nyoo chí

Nyoo Sutu yo, vatyí chahá ra cha coo ndo noo ñáyiví chaa. Vatyí natavá ra chí ndo nu quihí caa, ta nanyitá ndo nu ndichin nu nyacá ñaha ra chí tandihí ñu yihí cuenda ra. Ta cuhva ra tandihí cha vaha cha tahán chí chí ñu yihí cuenda ra. ¹³ Nyoo tavá ra chí yo nu ñaa iñi ta nacuhvá cuenda ra chí yo chí ra Cristo vatyí cunyaca ñaha ra chí yo. Vatyí ican ra Cristo cuví Sehe Nyoo. Ta cuñí xaan Nyoo chí ra. ¹⁴ Nasatá Nyoo chí yo chihin ñiñi ra Cristo ta sahá ra tucahnu iñi cuatyí yo.

*Nduvaha iyó yo chihin Nyoo cha cuenda
cha chihí ra Cristo cha catyí cuatyí yo*

¹⁵ Nyoo, ña nyehé yo chí ra. Soco nanduví ra ñáyiví tacuhva cuví cohon nuu yo chí ra. Ta ican ra cuví Cristo Sehe Nyoo. Nya ta ni cumañi ca chingó ñáyiví ta cha iyó maa ra Cristo. ¹⁶ Ta Nyoo chahá ra tyi savahá maa ra Cristo tandihí cha iyo andiví ta siqui ñuhu ñáyiví. Ta savahá ra cha cuví nyehe yo ta cha ña cuví nyehe yo. Savahá ra ángel. Ta savahá ra chí ra ña vaha ta chí tatyí ña vaha ñandihí. Ta tandihí cha nyacá ñaha siqui ñuhu ñáyiví ihya, maa ra savahá. Ta tandihí ihya chingó chí tacuhva cotyíño ra yoso cuhva cuñí maa ra. ¹⁷ Ra Cristo cha iyó maa ra nya ta ni cumañi coo tandihí maa cha iyó. Ta tyicuan ri chahá ra cha conyito tandihí maa cha savahá ra. ¹⁸ Ta maa yo cha yihí yo cuenda ra Cristo, ñn ri cuví yo chihin ra. Cuví yo coño ñuhu ra. Ta maa ra Cristo, cuví xiñi yo, vatyí maa ra cuví nuu chí yo. Ta ican ra cuví cha nandotó cha xihna ca. Yucuan chaha cuví ra nuu chí tandihí cha iyó. ¹⁹ Vatyí maa Nyoo cuñí ra tyi coo tandihí tunyee iñi ra chí ra Cristo. ²⁰ Ta cuñí tucu ra vatyí cha cuenda ra Cristo ta nicoó vaha tandihí cha iyó chihin ra. Yucuan chaha chahá Nyoo cha chihí ra Cristo. Ta chati ñiñi ra nu cruzi. Vatyí cuñí ra cha nicoó vaha tandihí cha iyó siqui ñuhu ñáyiví ta andiví chihin ra.

²¹ Ta nu quichí chí, xaan cuví iñi ndo chí Nyoo cuhva cha chicá xiñi ndo cha cuenda cha ña vaha cha chinyacuví ndo. ²² Soco Nyoo sanicoo vaha ra chí ndo chihin ra vatyí tachí ra chí Sehe ra, ra Cristo vatyí quichí cuví ra nu cruzi. Ta nyehe ra tindoho chí hin coño ñuhu ra ta chíhí ra, tacuhva vatyí cuhva cuenda ra chí ndo chí Nyoo, soco ñahri ca cuatyí ndo. ²³ Yucuan chaha cuñí chí vatyí sañihí ca ndo chinó iñi ndo. Ta ma sandihí ndo cha yihí iñi ndo tuhun ra Cristo cha chiñi ndo tyi cusacacu ra añima ndo. Ican tuhun ihya, cuví cha cacahán ra nicacahnu ñáyiví. Ta sacuví Nyoo vatyí yuhu ra Pablo tyinyeí cahín tuhun ihya chí hin ñáyiví.

*Nu catyí ra Pablo vatyí nyaá siqui ra cha
sañahá ra tuhun ra Cristo tandihí ri vehe ñuhu*

²⁴ Vityin cusii cuñi cha cuenda cha nyehi tindoho chihin coño ñuhi cha catyi ndo. Vatyí cha tyicuan caa sacañá tahin tindoho cha nyehe ca ra Cristo cha cuenda yo cha cuví yo coño ñuhu ra. ²⁵ Yuhu cuví noo ra cahán tuhun ra Cristo vatyi tyicuan caa tyineyí chi tandihí ñu yihí cuenda ra. Vatyí maa Nyoo catyí ra vatyi cahin tandihí tuhun ra cha cuenda cha vaha chí ndo. ²⁶ Sañahí tuhun cha ñoho xehe nya ta tyembu chahnu, nya ta ni cumañi ca chino ñayiví. Nyoo chicumi xehe ra. Soco vityin cuñi ra cha coto tandihí cuii maa ñu yihí cuenda ra. ²⁷ Ta chí ñu cha ñima ñu Israel cuví tari nyoho, cuñi Nyoo sacotó ra noo tuhun vaha xaan, noo tuhun xehe chí ndo. Ta tuhun xehe cuan ican cuví ihya, vatyi ra Cristo ñohó ra añima ndo cha yihí ndo cuenda ra. Ta cha cuenda maa ra cuñihi ndo gloria nu cunyaa yo chihin Nyoo.

²⁸ Tuhun maa ra Cristo cahán ndi. Ta chahá ndi tuhun chí tandihí ñáyiví. Ta sañahá ndi chí ñu tandihí cha chíni tuñi, tacuhva cuahnu ñu ta nyacua nya cha ñahri ca cumañi chí ñu cha ñin ri cuví ñu chihin ra Cristo. ²⁹ Yucuan chaha tyi ñi ñi sahá tyiñe chihin tunyee ñi ra Cristo ta ñihi xaan chotyíño tunyee ñi cuan chii.

2

¹ Vatyí cuñi cha coto ndo vatyi chicá xiñi cha cuenda ndo. Ta chicán tahvi xain cha cuenda tandihí ndo ta cha cuenda ñu Laodicea, ta tandihí inga ñu cha ta nyehe ca chii. ² Chiquén chí Nyoo na cunii ca ñi ndo, ta cu ñin ri ndo chihin cha cuñi ndo chí tahan ndo. Ta cutuñi vaha ca ñi ndo yoso caa cohon nuu ca ndo chí ra Cristo. Vatyí ican ra cuví tuhun cumí xehe Nyoo ta cha naha. Soco vityin sacotó ra chí yo tuhun ihya. ³ Maa ra Cristo chahá ra tandihí cha vaha ta cha chíni tuñi chí yo. Tatu ñohó nuu yo chí ra Cristo, ñohó nuu yo chí Nyoo. ⁴ Catyí chí ndo tyehe caa tacuhva cha ma sandavi ñaha ñáyiví chí ndo chihin tuhun tyaquí. ⁵ Vasi ña nyaí chihin ndo, soco cohon ñi ndo vatyi ñohó ñi tuhun ndo. Ta sii cuñi nyehi chí ndo. Vatyí vaha xaan cuhva cuahán iyó ndo. Ta ñi xaan ñi ndo cuahan ndo chata ra Cristo.

⁶ Yucuan chaha tari chinó ñi ndo chí noo tuhun ri maa ra Cristo quiví nañihí ndo chí ra, tyicuan caa cuñi tucu chí coo ndo ta ñin ri cuví ndo chihin ra. ⁷ Ta cuinyaña ca ndo chí ra. Ta quihí vaha yoho ndo chihin ra. Ta sanii ca ndo ñi ndo chihin cha chino ñi ndo, tari cuhva sañaha ñu chí ndo. Ta nyita ri nacuhvá ndo tyahvi nyoo chí Nyoo.

Ñáyiví chaa cha chahá ra Cristo chí yo

⁸ Sañaha ndo cuenda vatyi iyó ñáyiví cuñi ñu sandavi ñaha ñu chí ndo chihin tuhun

cha ndichí ri maa xiñi ñáyiví, tuhun cha ña ndicha. Vatyí ñima chí ra Cristo chinó ñi ñu cuan. Noo costumbre ri nyicón ñu cuan. Ta nyicón ñu chí cha nyacá ñaha siquí ñuhu ñáyiví ihya.

⁹ Soco cha sañahá ñu cuan, ñima cha ndicha cuví. Vatyí Nyoo ta tandihí cha cahnu cuví ra, tandihí cuan ta nyaá chihin ra Cristo. Vatyí maa ra Cristo cuví Nyoo. ¹⁰ Ta cha nyaá ra Cristo chihin ndo, tyitú añima ndo chihin Nyoo. Ta ra Cristo ican ra cuví ra nuu chí tandihí ángel ta tatyí cuihna cha nyacá ñaha. ¹¹ Quiví nañihí ndo chí ra Cristo, quihví ra añima ndo. Ña nduvahá ndo nuu Nyoo chihin costumbre circuncisión cha itá xaan ñi ra Israel. Maa ra Cristo sacuachiyó tandihí cha ña vaha cha tuhva ndo sacuví. Sañá ra circuncidar añima ndo cuví cuan soco ñima chihin ndaha ra. ¹² Quiví condutya ndo chichi ndutya, tari quiví chihí ndo chihin ra Cristo cuví cuan. Tyicuan ta quita ndo chichi ndutya, tari quiví nandotó ndo chihin ra Cristo, vatyi chinó ñi ndo tyi Nyoo chihin tunyee ñi ra sanandotó ra chí ra Jesús. ¹³ Nu quichí chí ña ñoho nuu ndo chí Nyoo. Vatyí sacuví xaan ndo cuatyí. Ta cuví ndo tari noo ñáyiví chihí chihin cuatyí cuan. Ta ña sañá ñu circuncidar chí ndo. Soco vityin Nyoo sañá ra ticahnu ñi tandihí cuatyí ndo. Ta chahá ra cha coo ndo noo ñáyiví chaa chihin cha ñin ri cuví ndo chihin ra Cristo. ¹⁴ Sanatuví ley chahnu cuan cuatyí yo. Ta catyí chí tyi tahán chí cuhun yo anyaya vatyi ña quichahá yo chí chí. Soco ley cuan Nyoo sacuachiyó ra quiví chihí ra Cristo nuv chazui. ¹⁵ Quiví cha chihí ra nu cruzi cuví chasaha ra chí cuihna ta chí tandihí tatyí ña vaha cha nyacá ñaha. Chihin nuu tandihí maa ángel Nyoo sacotó ra vatyi cahnu ca cuví maa ra ta ñima ca cuihna.

Nu chahá ra Pablo tuhun tyi nanducú yo cha vaha cha chahá Nyoo

¹⁶ Yucuan chaha ña tahán chí quihí yuhu ñáyiví chí yo cha cuenda cha chachí yo o cha chihí yo, o cha cuenda cha ña naquehén vaha yo noo quiví vico. Cuví ri quiví cha natyacu yoo, o cuví ri quiví nyitatu yo. ¹⁷ Tandihí cuan cuví chí tari noo xiñahñu ri cha cuquichi ityi nuu. Ta vityin cha quichí ra Cristo ta ican ra cuví ra cha ndicha vaha sacacu chí yo. ¹⁸ Ma cuhva ndo cha casi ñáyiví nu naquehen ndo noo cha cuacuhva Nyoo chí ndo. Maa ñu ndahvi sahá ñu chí ñu soco ña ndicha ñu, ta sacahnú ñu chí ángel. Ta sahá ñu tyi ñyehé ñu cha sañaha Nyoo chí ñu. Ta cahnu sahá ñu chí ñu chihin cha chicá xiñi ñu tuhun ñáyiví ihya. ¹⁹ Ñu cuan ñima chí ra Cristo ra cuví xiñi nyicón ñu. Yucuan chaha nyacuví ñu tandihí cuan. Soco yoó cha nyicón yo chí ra, maa ra cuví nuu chí

yo. Ta sandu ñin ri ra chi yo chihin ra. Ta sacuahnú ca ra chi yo chihin tunyee ñini ra tari cuhva cuñí maa Nyoo.

²⁰ Tari quivi chihí coño ñuhu cuatyí ndo chihin ra Cristo cuví cuan. Ta ña nyacá ñaha ca tuhun ñuhu ñayivi ihya chi ndo. ¿Ñáá tuhun cha iyó ca ndo tari caa iyó ñayivi cha ña ñohó nuu Nyoo? Ta quichahá ca ndo cha cahán ñu cha sacuví costumbre cuan. ²¹ Vatyí catyí ñu chi ndo tyehe caa: “Ma tiun ihya chihin ndahun, ma cacun ihya. Coto ma cacun”, catyí ñu. ²² ¿Ñáá tuhun cha quichahá ca ndo tuhun cahán ñu cuan? Vatyí maa maa ri cha ndichí xiñi ñayivi cuví. Vatyí nyayu noo cha ñin yaha ri cuví. Ma tiví ndo nuu Nyoo cha cuenda cha cachi ndo. ²³ Ndicha vatyí costumbre ihya tari maa cha vaha cuví, cuñí maa ñayivi. Vatyí sanyehé ñu tindoho coño ñuhu ñu. Ta cuñí ñu tyi vaha sacahnú ñu chi Nyoo tatu sacuví ñu tyicuan caa. Soco ña chaá cuan nuu Nyoo. Vatyí ma cuví tinyaa cuan cha quiñi caa cha cuñí coño ñuhu ñu.

3

¹ Chahá Nyoo noo ñayivi chaa chi yo vatyí nandotó ra Cristo. Ta vityin nyaá ra chiyo vaha Nyoo andivi. Yucuan chaha na nducu yo cha vaha cha chahá Nyoo chi yo nya andivi. ² Caca xiñi ndo cha vaha cha chahá Nyoo chi yo nya andivi. Ta ma caca xaan xiñi ndo tuhun cha iyó siqui ñuhu ñayivi ihya. ³ Vatyí nyoho cha yaha chihí ndo in caa ri chihin ra Cristo. Ta vityin iyó ndo ñin ri chihin ra chihin Nyoo. ⁴ Ta quivi quichi tucu ra Cristo, ra chahá ñayivi chaa cha iyó ndo, tyicuan ta cunyehe ñayivi tyi cahnú xaan ca ra cuví maa ra. Ta cunanyehe tucu ñu chi nyoho in caa ri chihin ra. Ta cutahan tucu maa ndo quichi ndo nu tyaqui cuan chihin ra.

Yoso caa chiyo yo costumbre nu quichi chi ta yoso caa cuñí chi coo yo chihin Nyoo vityin

⁵ Yucuan chaha cuñí chi cha nanducú yo cuhva na cúvi tandihí cha quiñi caa cha quichí cuví ñini coño ñuhu yo. Ta ni noo yo ta ma coo ri maa yo chihin ñusihi o chihin rayii. Ta ma sacuvi yo cha ña vaha cha cuñí coño ñuhu yo, o inga cha ña vaha. Ta ma nyiyo ñini yo cha tyayii. Vatyí tari cha sacahnú yo xitohyo, o tavá xiin yo chi Nyoo cuví cuan. ⁶ Cha cuenda tandihí cha ña vaha cuan cuxaán xaan Nyoo chihin ñu cha ña quichahá nu cahán ra. Ta cutachi tuñi ra chi ñu vatyí sacuví ñu cha ña vaha cuan. ⁷ Ta suri tyehe caa chinyacuví tucu maa ndo quivi ña ñohó nuu ndo chi Nyoo. ⁸ Soco vityin ma sacuvi ca yo tandihí cha ña vaha cuan. Ma cuxaan ca yo. Ma cahan uhvi ca yo chi tahan yo. Ta ma cahan cuehe yo chi

tahan yo. Ta ma cahan ca yo cha quiñi caa. Ma quita tuhun quiñi caa yuhu yo. ⁹ Ma ñii ca yo cuendu. Vatyí quivi ta ityi chata ca, quivi ña ñohó nuu yo chi Nyoo, tyicuan caa chinyacuví yo. Soco vityin ña nyacá ñaha ca tandihí cuan chi yo. ¹⁰ Vatyí ñayivi cha iyó yo vityin, ñayivi chaa cuví. Noo ñayivi chaa nanduví yo. Ta nduchaá ca yo tari cuhva caá Nyoo, ra savahá chi yo, nyacua nya cohon nuu vaha yo chi ra. ¹¹ Ña ñini cha cuví yo ñu Israel, an ñu Grecia, an ñu inga ñuu. Ta ña ñini cha sacuvi yo costumbre circuncisión, an cha ma sacuvi yo. Cuví ri yo noo ra chiñi tuñi o cuví ri yo noo ra soho. Cuví ri yo ra iyó chitoho, o cuví ri yo ra yori nyacá ñaha chi yo, ña ñini xaan ca tuhun cuan. Ñini ca cha ñin ri cuví tandihí yo chihin ra Cristo, vatyí maa ra cuví tandihí.

¹² Nyoo cuñi ra chi yo ta nacachí vaha ra chi yo vatyí cuví yo ñayivi chi ra. Yucuan chaha na coo yo ñayivi chaa tari tahán chi coo ñu yihí cuenda ra. Na cundahvi cuñi yo nyehé yo chi tahan yo. Na cuví yo ñayivi vaha. Ndahvi saha yo chi yo. Na cumasu ñini yo. Cunya yo tandihí tisihi tindoho chihin cha sií cuñi yo. ¹³ Na cucama ñini yo chihin noo noo tahan yo. Ta saha yo ticahnú ñini chi tahan yo tatu ñáá cha sacuví ñu chi yo. Tari sahá ra Cristo ticahnú ñini chi yo, tyicuan caa cuñí chi cha sacuvi tucu maa yo. ¹⁴ Ta siin ri cuñi yo chi tahan yo. Ta nducu yo cuhva coo vaha yo chihin ñu. Vatyí ican cuan cuví cha sacu ñin ri chi yo. Ta ican cuan cuví cha ñini ca. ¹⁵ Ta cha taxi maa Nyoo na coo añima yo. Vatyí ra Cristo nyacá ñaha chi yo. Nyoo nacana ra chi yo vatyí tacuhva ñin ri cuví yo cuenda ra Cristo. Ta tyicuan ri ñacuhva yo tyahvi nyoo chi ra cha cuenda ihya.

¹⁶ Ta tuhun ra Cristo na sacutu añima yo. Sañaha ca yo tuhun ra chi tahan yo. Ta sañii ca yo ñini tahan yo chihin cha chiñi tuñi Nyoo. Sacahnú yo chi Nyoo chihin cha cata yo yaa, o salmo. Ta çata yo yaa cha chahá maa Tatyí Ii Nyoo chi yo chihin cha ñii añima yo. Ta tyicuan ri ñacuhva yo tyahvi nyoo chi Nyoo. ¹⁷ Tatu ñáá tyiño sahá yo, o ñáá tuhun cahán yo, sacuvi yo soco tari cha tyi tyiño maa Sutu Mañi yo Jesús sacuví yo. Ta ñacuhva yo tyahvi nyoo chi Nyoo cha cuenda maa ra Cristo.

Chahá ra Pablo tuhun yoso caa nducú yo cuhva coo vaha yo chihin ñayivi

¹⁸ Nyoho cha iyó yii ndo, cuhva ndo cha cunyaca ñaha yii ndo chi ndo. Vatyí yucuan cuhva tahán chi coo ndo, vatyí yihí ndo cuenda Sutu Mañi yo. ¹⁹ Ta nyoho rayii, cuñi ndo chi ñasihi ndo. Ta ma nduxaan ndo chi ña. ²⁰ Nyoho cha cuví ndo sehe quichaha ndo chi sutu ndo ta chi sihi ndo. Vatyí yucuan cuhva cuñi maa Sutu Mañi yo. ²¹ Nyoho cha cuví ndo sutu ta sihi, ma cahan

xaan ndo chi sehe ndo, vatyi coto nducui-hya iñi chi. ²² Ta nyoho cha cuví ndo musu, quíchaha ndo chi chitoho ndo. Ñima cuhva cha nyehé ri ra chi ndo quíchaha ndo chi ra, tacuhva vatyi vaha cuñi ra nyehé ra chi ndo. Soco sacuvi ndo chihin cha tandihi añima ndo. Vasi ña nyehé ra. Vatyi Nyoo nyehé ra chi ndo. ²³ Tandihí ri tyiño sacuví yo, sacuvi yo chihin cha ñi iñi yo. Saha yo tuhun tyi tyiño nuu maa Sutu Mañi yo sacuví yo. Ta ñima maa ri maa tyiño nuu ñáyivi. ²⁴ Vatyi chitó yo vatyi maa Sutu Mañi yo cucuhva ra noo cha tahán chi chi yo vatyi sacuví yo tyiño nuu ra Cristo. Vatyi ican maa ra cuví chitoho yo cha ndicha vaha. ²⁵ Soco tatu sacuví yo cha ña vaha, Nyoo cutachi tuñi ra chí yo cha cuenda cha ña vaha cha sacuví yo. Ta tandihí yo in ri ñáyivi cuví yo nuu ra. Vatyi Nyoo ña cachi ra ñáyivi cuñi ra.

4

¹ Nyoho cha iyó musu ndo, cuñi chi tyi vaha ñáyivi cuví ndo chihin musu ndo. Ñicohon iñi ndo vatyi iyó tucu noo chitoho maa ndo nya andivi. Ta maa ra nyehé ra chi ndo.

² Ta tyicuan ri çacan tahvi ndo chihin cha ñi iñi ndo. Ta nacuhva yo tyahvi nyoo chi Nyoo cha cuenda tandihí maa. ³ Çacan tahvi ndo chaha ndi, vatyi nanuña ca Sutu Mañi yo xiñi ñáyivi ta tyasoho ñu tuhun ra Cristo cha cahán ndi nuu ñu. Vatyi tari noo tuhun xehe cuví tuhun ra Cristo chi ñu, vatyi ña chitó ñu tyi ican ra cuví ra sacacú chi yo. Ta cha catyi tuhun ihya ñohí vehe caa. ⁴ Çacan tahvi ndo chahi tacuhva cuví sañahí chi ñu yoso cuhva cuví cutuñi vaha iñi ñu tuhun ra Cristo, tari cuhva tahán chi tyi sacuví.

⁵ Cachi çoo ndo chihin ñu ña ñohó nuu chi Nyoo. Vatyi tyicuan caa ta cuví çahan ndo tuhun Nyoo chihin ñu. ⁶ Cuñi chi vatyi ndatuhún yo maa maa ri cha vaha, ta cha cachi, (ta cha tahán iñi ñáyivi) tari tahán chi cunyacuví yo cha yihí yo cuenda ra Cristo. Tyicuan ta cuví coto yo yoso caa cunacahan yo tatu ñáá noo tuhun ndacá tuhun ñu chi yo.

Nu sacuhún ra Pablo nocumi chi ñu ñuu Colosas cha yihí cuenda Nyoo

⁷ Ra Tíquico, yañi yo, ra sahá tyiño tyiño Sutu Mañi yo chihin, maa ra cunacatyí ra chí ndo yoso caa cuahán nyai. ⁸ Yucuan chaha tachí chí ra nu nyicu ndo vatyi nacatyí ra chí ndo yoso caa nyicú ndi. Ta sanduní ca ra iñi ndo. ⁹ Ta chihin ra Tíquico vachi tucu ra Onésimo, yañi yo. Ta ñi iñi ra. Ta cuñi yo chí ra. Cuví ra noo ra ñuu ndo. Maa ra cunacatyí ra chí ndo tandihí cha cuví nu nyai.

¹⁰ Ra Aristarco, ra tahin cha ñohó ndi vehe caa, saquichí ra nocumi chí ndo. Ta

saquichí tucu ra Marcos, yañi cunducuatyi ra Bernabé, nocumi chí ndo. Ta cha sacote chí ndo tuhun ra Marcos. Tatu chaa ra nu nyicu ndo, vaha çahan ndo chihin ra. ¹¹ Vachi tucu nocumi chí ndo sahá ra Jesús, ra cha ñañi tucu Justo. Ta chichi cha tandihí ñu Israel cha yihí cuenda Nyoo, uñi tahan ri ra ihya sahá tyiño ra tuhun Nyoo chihin. Ta nduní xaan ca iñi sahá ra. ¹² Vachi tucu nocumi chí ndo sahá ra Epafras, ra ñuu ndo. Ta maa ra sacuví ra tyiño nuu ra Cristo. Tyicuan ri chicán tahvi ra chaha ndo chí Nyoo tyi nacaca vaha ndo chihin Nyoo. Nacuhva cuenda vaha ndo chí ndo chí Nyoo tacuhva cuví sacuví ndo cuhva cuñi ra. ¹³ Ta yuhu cuví cha ndaa vatyi ra Epafras chicán tahvi xaan ra cuenda ndo, ta cuenda ñu cha nyicu nya ñuu Laodicea ta ñuu Hierápolis. ¹⁴ Vachi tucu nocumi chí ndo sahá ra Lucas, ra cha cuví doctor cha cuñi xaan yo chí. Ta vachi tucu nocumi chí ndo sahá ra Demas ñandihí.

¹⁵ Cuhva ndo nocumi chí yañi yo ta tahan yo cha nyicu ñuu Laodicea. Ta cuhva ndo nocumi chí cu Ninfas ta chí tandihí ñu yihí cuenda Nyoo cha ndu in ri vehe ña. ¹⁶ Tatu yaha sacuaaha ndo carta ihya, ta sacuhun ndo nu canyicu ñu yihí cuenda Nyoo nya Laodicea na sacuaaha tucu maa ñu. Ta sacuaaha tucu maa ndo carta cha sacuhún chí ñu Laodicea. ¹⁷ Catyi ndo chí ra Arquipo vatyi na sacuví vaha ra tyiño cha chahá Sutu Mañi yo chí ra tyi sacuví ra.

¹⁸ Yuhu ra Pablo saquichí nocumi ihya chí ndo. Ta ma naa iñi ndo cha ñohí vehe caa. Ta Nyoo na nasoco ra chí ndo. Ta na cuví chí tyicuan caa.

Carta Cha Xihna Ri Sacuhun Ra Apóstol Pablo Chi Ñáyivi Ñuu Tesalónica Cha Yihí Cuenda Nyoo

*Nu tyaq ra Pablo ta ra tahan ra noo tutu
chi ñu yihí cuenda Nyoo*

¹ Yuhu ra Pablo chihin ra Silvano ta ra Timoteo, tyaá ndi tutu ihya chi ndo cha cuví ndo ñu yihí cuenda Nyoo ñuu Tesalónica chiña. Vatyí ñn ri cuví ndo chihin Nyoo Sutu yo ta chihin Sutu Mañi yo Jesucristo. Ta Nyoo Sutu yo ta Sutu Mañi yo Jesucristo na nasoco ra chi ndo. Ta na cuhva ra cha coo cha taxi ri añima ndo.

*Vaha xaan chinó iñi ñu Tesalónica cuan
chi Nyoo*

² Tyicuan ri nacuhvá ndi tyahvi nyoo chi Nyoo cha cuenda tandihí ndo. Ta nyita ri chicán tahvi ndi cha cuenda ndo. ³ Tyicuan ri yihí iñi ndi tuhun ndo nuu Nyoo Sutu yo ta nichohón iñi ndi vatyí ñi iñi ndo chinó iñi ndo chi Nyoo ta sacuví ndo tyiño nuu ra. Ta ñihi sahá tyiño ndo cha cuenda cha cuñí ndo chi ra. Ta chihin cha ñi iñi ndo yihí iñi ndo cha cuañihi ndo cha cuenda ra Jesucristo. ⁴ Vatyí chitó ndi tyi Nyoo nacachí vaha ra chi nyoho yañi. Ta cuñí xaan ra chi ndo. ⁵ Vatyí quivi cahán ndi tuhun Nyoo yoso caa sacacú ra añima yo chihin ndo, ñima chihin tuhun yuhu ri cahán ndi, soco tyinyee xaan Tatyí li chi ndi, ta cuaha xaan sacuvi ra chihin tunyee iñi ra. Ta cahán ndi chihin cha chitó vaha ndi tyi tuhun ndicha Nyoo cuví. Ta nyehe vaha ndo yoso caa chiyo ndi quivi chinyaa ndi chihin ndo. Tyicuan caa chiyo ndi cha cuenda cha vaha chi maa ndo.

⁶ Ta quichahá iyó ndo cuhva iyó ndi, ta cuhva iyó Sutu Mañi yo. Vatyí natiñ cuenda ndo tuhun Nyoo, vasi cuaha xaan sacuvi nyehé ndo cha cuenda cuan. Soco sii xaan cuñí ndo vatyí maa Tatyí li chahá tusii iñi cuan chi ndo. ⁷ Ta cha tyicuan caa, tyinyee xaan ndo chi tandihí ñu yihí cuenda Nyoo nicañu ityi Macedonia chiña ta nicañu ityi Acaya ihya ñandihi, vatyí nyehé ñu cuhva iyó ndo chihin Nyoo. ⁸ Ñima ityi Macedonia ta Acaya ri, soco tandihí ri ityi nu chiñí ñu tuhun ndo chitó ñu tuhun Sutu Mañi yo ta chitó ñu vatyí chinó xaan iñi ndo chi Nyoo. Ta yucuan chaha nyacua ña ñiñi ca cha cahán ndi tuhun Nyoo chihin ñu.

⁹ Vatyí suri maa ñu nacatyí ñu chi ndi yoso caa cha vaha xaan tñn cuenda ndo chi ndi quivi cuan. Nacatyí ñu yoso caa sandihí ndo tuhun cha sacahnu ndo xitohyo ta quichaha sacuvi ndo tyiño nuu Nyoo nyitó, Nyoo cha

ndicha. ¹⁰ Ta nacatyí tucu ñu yoso caa nyatú ndo naquichi tucu ra Jesús Sehe Nyoo inga chaha ityi andivi. Ican ra cuví ra cha sanandotó Nyoo chii. Ta maa ra cuví ra ra sacacú chi yo tacuhva cha ma tachi tuñi Nyoo chi yo quivi sacutuñi ra chi ñáyivi.

2

Tyiño sahá ra Pablo ñuu Tesalónica

¹ Nyoho yañi, chitó ndo vatyí ñima cha caha ri chahán ndi chicahan ndi tuhun Nyoo ñuu ndo. ² Vatyí chitó ndo yoso caa nyehe ndi tindoho saha ñáyivi ñuu Filipo cha ni cumañi ca chaq ndi ñuu ndo. Ta vasi nyehe xaan ndi tindoho ñuu cuan soco quivi chaq ndi ñuu ndo cahán tucu ndi tuhun Nyoo chihin ndo chihin cha ña yuhví ndi. Ta vasi xaan xaan nanduví ñáyivi ñuu ndo, soco tyinyee xaan Nyoo chi ndi ta sacotó ndi chi ndo yoso caa sacacú ra añima yo. ³ Vatyí tuhun cha chahá ndi chi ndo maa ma ri cha ndicha cuví. Ta ñahri cha quiñi caa chicá xiñi ndi. Ta ni ñima cha cuñí ndi sandavi ñaha ndi chi ndo. ⁴ Ñahri cha ña vaha cahán ndi, vatyí Nyoo nyehé ra chi ndi, ta maa ra tyatyíño ra chi ndi vatyí sacoto ndi chi ndo yoso caa sacacú ra añima yo. Ta yucuan cuví cha cahán ndi tari cuhva tyatyíño ra chi ndi. Vatyí ña cuñí ndi cuvaha ndi nuu ñáyivi, soco nuu Nyoo cuñí ndi cuvaha ndi, vatyí maa ra nyehé ra ñáa cha caa añima yo. ⁵ Ta nyoho chitó ndo vatyí ni noo chaha ña cahán ndi chihin tuhun tyaquí cha cuñí ndi sandavi ñaha ndi chi ndo. Ta ni ñima cha cuñí ndi saha ganaa ndi xuhun ta cahán ndi tuhun ihya chihin ndo. Nyoo cuví ra cha ndaa tyi ndicha cha cahán ihya. ⁶ Ta ni noo chaha ña nanducú ndi cuhva cha sacahnu ñáyivi chi ndi, ni nyoho, ni inga ñu. Ndicha, iyó ityi chi ndi cha cunyacá ñaha ndi chi ndo tyi maa ra Cristo tachí ra chi ndi, soco ña cuñí ndi coso ndi siqui ndo cha tyicuan caa. ⁷ Soco cuñí ndi tyinyee ndi chi ndo. Tari noo sihi sacuahnú ña chi sehe ña, sahá cuenda ña chi cue, tyicuan caa cuñí ndi tyinyee ndi chi ndo. ⁸ Cuñí xaan ndi chi nyoho, ta cahvi iñi ndi vatyí ñima tuhun Nyoo ri cuhva ndi chi ndo, soco nyacua nya ñáyivi ndi ñandihi, cha cuenda cha cuñí ndi chi ndo. ⁹ Nyoho yañi, nichohón iñi ndo yoso caa saha tyiño ndi quivi chinyicu ndi chihin ndo. Sahá tyiño ndi ñicahñu ta cha cuaa vatyí ña cuñí ndi coso ndi siqui ni noo ndo cha ni ri ca cha cahán ndi tuhun Nyoo chihin ndo.

¹⁰ Ta nyoho cuví ndo cha ndaa, ta Nyoo ñandihi, vatyí maa ri cha vaha ta cha ndaa chinyacuví ndi quivi chinyaa ndi chihin ndo cha cuví ndo ñu chinó iñi chi ra Cristo. Maa maa ri cuhva cuñí Nyoo chinyacuví ndi, ta ña chahá ndi cuhva vatyí cahán ña vaha ndo siqui ndi. ¹¹ Ta chitó tucu ndo yoso caa

sanduní ndi íñi noo noo ndo chihin tuhun chahá ndi chí ndo. Sandunyeé ndi íñi ndo tari noo ra chihin sehe ra. ¹² Ta catyí ndi chí ndo nacachi cgo ndo tari tahán chí coo ñu yihí cuenda Nyoo. Vatyí maa ra nacana chí ndo vatyí coo ndo nu nyacá ñaha ra, ta nyehe ndo cha tyaquí gloria ra.

¹³ Yucuan chaha tyicuan ri nacuhvá ndi tyahví nyoo chí Nyoo, vatyí quiví chihí ndo tuhun ra cha cahan ndi chihin ndo, natíjn cuenda ndo vatyí nacoto ndo tyi tuhun Nyoo cuví ta ñima tuhun ñáyiví ri. Ta ndicha cha tuhun Nyoo cuví, vatyí sacuví chí vatyí chino íñi ndo chí Nyoo ta nasama ndo cuhva iyó ndo. ¹⁴ Yahá cuan ta nyehe tucu maa ndo tindocho sahá ñáyiví ñuu ndo, tari nyehe tucu ñu yihí cuenda ra Cristo Jesús nicahnu ityí Judea. Tyicuan caa sanyehe tucu ñu Israel ityí Judea cuan tindocho chí ñáyiví tahan yo cuenda ra Cristo cuan. ¹⁵ Ta ican ñu Israel cuan cachahí chí Sutu Mañi yo Jesús tari cachahí tucu ñu chí ra profeta, ra cachahá cuenda tuhun cahan Nyoo ta ityí chata ca. Ñu Israel cuan tavá ñehe ñu chí ndi. Ñima cuhva cuñí Nyoo iyó ñu. Ta tasí cuñí ñu nyehe ñu chí tandihí ñáyiví. ¹⁶ Tatu cuñí ndi cahan ndi tuhun Nyoo chihin ñu cha ñima ñu Israel cuví tacuhva cacu ñu, ña chahá ñu Israel cuan cahan ndi. Ta cha cuenda cha chasí ñu nu cahan ndi, cucuaha ca cuatyí ñu. Ta vityin nu ndihí tuhun cutachí tuñi xaan Nyoo chí ñu.

Nu catyí ra Pablo vatyí cuñí ra cunyehe ra nu nyicú ñu Tesalónica inga chaha

¹⁷ Yañi, cha yahá cha quitá ndi ñuu ndo vasi ña naha nyehe ndi chí ndo soco ñohó xaan íñi ndi chí ndo. Ta chihin cha ñi íñi ndi cuñí ndi cunyehe ndi nu nyicú ndo inga chaha. ¹⁸ Ta nducú ndi cuhva cuhun ndi soco ña cuví. Ta yuhu ra Pablo ñandihí, cuaha xaan chaha nduquí cuhva cuhun ndi, soco tahan ri chaha cha cuñí ndi cuhun ndi ta ña chahá ra ña vaha. ¹⁹ Soco ¿yóó chí ita íñi ndi? Ta ¿yóó chí cuenda cusí cuñí ndi, ta vaha cuñí ndi? ¿Atu ñima cha cuenda maa ndo cusí xaan cuñí ndi nuu Sutu Mañi yo Jesucristo quiví quichi ra inga chaha? ²⁰ Vatyí cha cuenda cha vaha cuahan ndo chihin Nyoo ta nyehé yo tyi ña caha ri sahá tyiño ndi. Ta sá xaan cuñí ndi cha cuenda cuan.

3

¹ Ta yucuan chaha ña cunyeé que cha ma cote yoso caa cuahan ndo chihin Nyoo. Ta natyáí íñi tyi ndoí ñuu Atenas. ² Ta tachí chí yañi yo ra Timoteo na cuhun ra cunyehe ra chí ndo. Maa ra sacuví ra tyiño nuu Nyoo vatyí in ri chihin ndi cahan ra tuhun yoso caa cacú añima yo sahá ra Cristo. Tachí ndi chí ra nu nyicú ndo na sanduní ca ra

íñi ndo ta sandunyeé ca ra íñi ndo tacuhva vatyí chinó ca íñi ndo chí Nyoo. ³ Tyicuan caa ta ni noo ndo ta ma ndu uvi íñi ndo cha cuenda cha nyehé ndo tindocho. Vatyí nyoho chitó ndo vatyí nyaá yo cha nyehe yo tindocho tyehe caa. ⁴ Vatyí ta ninyaa ca ndi chihin ndo, catyí ndi chí ndo vatyí cha cuñí quichi quiví cha nyehé yo tindocho. Ta chitó vaha maa ndo tyi tyicuan caa cuví. ⁵ Yucuan chaha ña cunyeé que cha cuñí cote tuhun ndo. Ta tachí tyiño chihin ra Timoteo na nyehe ra yoso caa cuhva cuahan chinó íñi ndo chí Nyoo. Vatyí yuhví coto sandavi ñaha cuhna chí ndo ta nandihí tucu ndo nu quiñi caa inga chaha. Vatyí tu tyicuan caa, cucunaa tandihí tyiño sahá ndi nu nyicú ndo.

⁶ Soco vityin cha nachaa ra Timoteo cha chahan ra nu nyicú ndo ñuu Tesalónica chíña. Ta nacatyí ra chí ndi vatyí ñá íñi ndo chinó íñi ndo chí Nyoo. Ta cuñí xaan ndo chí tahan ndo. Ta catyí ra tyi tyicuan ri nicohón íñi ndo chí ndi ta cuñí xaan ndo nyehe ndo chí ndi, tari nyuhu, cuñí tucu maa ndi nyehe ndi chí ndo. ⁷ Yucuan chaha, yañi, vasi cuaha cha cuví chí ndi ta nyehé ndi tindocho, soco vaha xaan cuñí ndi cha chitó ndi vatyí nyoho vaha chinó íñi ndo chí Nyoo ta ña sahá ndo chí ra. ⁸ Tari quiví cha nduchaa ñáyiví ndi, cuñí maa ndi cuhva cha nacoto ndi vatyí nyoho ñihi cuahan ndo chihin Nyoo. ⁹ Nyacua ña ñihí ndi cuhva nacuhva ndi tyahví nyoo chí Nyoo cha cuenda ndo. Vatyí sá xaan cuñí ndi nuu Nyoo cha cuenda vatyí vaha cuahan ndo chihin ra. ¹⁰ Chicán tahví xaan ndi chí Nyoo ñicahñu ta cha cuaa, vatyí cuñí ndi cuhun ndi cunyehe maa ndi chí ndo. Tyicuan ta cuví sandunaní ndi cha chinó íñi ndo.

¹¹ Ta vityin nyatú ndi na tyinyee maa Nyoo Sutu yo ta Sutu Mañi yo Jesucristo tacuhva cuví cuhun ndi nu nyicú ndo. ¹² Ta na tyinyee ca Sutu Mañi yo Jesucristo chí ndo tacuhva cuñí ca ndo chí noo noo tahan ndo ta chí tandihí ñáyiví tari cuñí nyuhu chí nyoho. ¹³ Tacuhva vatyí cuní ca íñi ndo ta cunduví ndihí añima ndo. Ta ma coo ca cuatyí ndo nuu Nyoo Sutu yo quiví quichi tucu Sutu Mañi yo Jesucristo chihin tandihí ca ñu yihí cuenda ra.

4

Cuhva cha tahán íñi Nyoo cha coo yo

¹ Vityin yañi, chacú ndahví ndi nuu ndo ta chahá ndi tuhun chí ndo chihin ndusu yuhu Sutu Mañi yo Jesucristo, na coo ca ndo tari cuhva sañaha ndi chí ndo, cuhva tahán íñi Nyoo. Ta sañihí ca ndo coo ndo tyicuan caa noo noo quiví.

² Nyoho cha chitó ndo yoso caa chahá ndi cuhva chí ndo tari chahá tucu maa Sutu

Mañi yo Jesús cuhva chi ndi. ³ Cha cuñi Nyoo, ican cuví ihya: Cha načuhva ndihi ndo chi ndo chi ra tacuhva sanduvii ndihi ra añima ndo. Ta ni noo ndo ta ma coo ndo chihin noo ñaha sihi o rayii tatu ñima ñasihi o yii ndo cuví. ⁴ Ta tahan tahan ndo cuñi chi coto ndo yoso caa coo ndo chihin ñasihi ndo. Ço vii ndo chihin ña chihin cha cuñi ndo chi ña. ⁵ Ñima chihin cha quichi cuví iñi ndo cha quiñi caa tari nyacuví ñáyivi cha ña ñohó nuu chi Nyoo. ⁶ Ta ni noo ndo ta ma sandavi ñaha ndo chi yañi ndo ta coo ndo chihin ñasihi ra. Vatyí Sutu Mañi yo, ñihi xaan tachí tuñi ra chi ñu sacuví tyicuan caa, tari cuhva catyí ndi chi ndo. ⁷ Vatyí Nyoo nacana ra chi yo vatyí tacuhva sacuví yo cuhva cuñi maa ra, ta ñima noo cuhva quiñi caa. ⁸ Ta yucuan chaha yóo ñu cha ña cuñi tyasoho tuhun ihya, ñima tuhun ñáyivi ri ña tyasohó ñu, soco tuhun Nyoo ña tyasohó ñu. Vatyí suri maa Nyoo chaha ra Tatyí Ii ra chi ndo. ⁹ Soco tuhun cha cuñi yo chi tahan yo, ña chiñuhú cha tyai nu tutu ihya tuhun cuan. Vatyí suri maa Nyoo cha sañaha ra chi ndo vatyí cuñi yo chi tahan yo cuenda Nyoo. ¹⁰ Ta tyicuan caa cuñi ndo chi tandihi tahan yo nicahnu Macedonia chiña. Soco chacú ndahví nuu ndo yañi, vatyí na cuñi ca ndo chi ñu noo noo quívi. ¹¹ Nducu ndo cuhva coo vii ndo. Ta ma tyihi ndo chi ndo nu ña tahán chí, soco ñin ri tyiño maa ndo çaça xiñi ndo. Ta saha tyiño ndo chihin ndaha ndo tari cuhva catyí ndi chi ndo quívi cuan. ¹² Tyicuan caa sacuví ndo tacuhva vatyí ñáyivi ña ñohó nuu Nyoo cuasaha ñu ñáyivi chí ndo. Ta ñahri cuacumañi chí ndo.

Yoso caa cucuvi quívi quichi Sutu Mañi yo Jesús inga chaha

¹³ Yañi, ña cuñi ndi cha ma coto ndo ñáa cha cuví chí ñáyivi chíhí, vatyí coto nducuihya iñi ndo tari nducuihyá iñi ñáyivi cha ma tahan chí nyehe chí Nyoo. ¹⁴ Ta tari cha chinó iñi yo vatyí chíhí ra Jesús ta nandoto ra, tyicuan caa chinó tucu iñi yo vatyí Nyoo cusanandoto ra chí ñu ndiyi cha chinó iñi ra.

¹⁵ Yucuan chaha catyí ndi chí ndo tari sañaha Sutu Mañi yo chí ndi. Vatyí yoó cha nyitó yo nyacua nya quívi quichi ra, ñima xihna ca yo cuhun ican saha ñu cha yahá chíhí. ¹⁶ Vatyí suri maa Sutu Mañi yo cunoo xica ra andívi, ta cucana chaa ra vatyí maa ra cuví ra nyacá ñaha. Ta cucana chaa noo ra cuví nuu chí ángel. Ta cunativí trompeta Nyoo. Tyicuan ta ñáyivi cha yihí cuenda ra Cristo ta chíhí ñu, xihna ca ñu cunandoto. ¹⁷ Yahá cuan ta yoó cha nyitó ca yo cundaa xica yo ñin ri chíhín ñu nu vico, nu cunañihi tahan yo chíhín Sutu Mañi yo ityi andívi. Ta yucuan ta cucunyya yo chíhín ra tyicuan

ri maa. ¹⁸ Yucuan chaha sandunii ndo iñi tahan ndo chíhín tuhun ihya.

5

¹ Soco ama o ñáa quívi cucuvi tuhun ihya, ña ñihi cha cahin tuhun cuan chíhín ndo yañi. ² Vatyí cha chító vaha maa ndo vatyí ma tuví ri iñi yo ta cuchaa quívi quichi tucu Sutu Mañi yo. Vatyí tari cuhva quíhvi noo ra suhu vehe ñáyivi cha cha cuaa, tyicuan caa cucuvi. ³ Vatyí quívi cha catyí ñáyivi vatyí vaha xaan iyó ñu, ta ñahri maa cha yuhvi ñu, tyicuan ta sana iñi ñu ta quichi tindoho cuan siqui ñu. Tari noo ñaha sihi cha cuacuan sehe, sana iñi ña ta quíhvi cha uhvi chí ña. Ta tyicuan caa cucuvi chí ñáyivi quívi quichi Sutu Mañi yo, vatyí ma cuví cono ñu. ⁴ Soco nyoho yañi, ñima ca nu ñaa iñi nyicú ndo ta catyí ndo vatyí sana iñi ndo ta cuchaa chí quívi Sutu Mañi yo, tari sana iñi ñáyivi tatu quíhvi ra suhu vehe ñu. ⁵ Vatyí tandihi yo chító yo yoso caa tahan chí coo yo vatyí Nyoo sandundichín ra añima yo, ta ña iyó ca yo nu ñaa iñi tari ñu ña ñohó nuu Nyoo. ⁶ Yucuan chaha ma cuví yo tari inga ñu cuan. Tari quívi cha quixí ñu vatyí ña quichahá ñu cha ndichi Sutu Mañi yo. Soco yoó cuqtu tuhva yo ta cachi ço yo. ⁷ Vatyí ñu quixí, quixí ñu cha cha cuaa, ta ñu chíhí xaan ndixi, chíñi ñu cha cha cuaa. ⁸ Soco yoó cha cuví yo ñu cuenda cha ñicahñu, nacachi ço yo. Ta tari noo sindaro sahá ra cuenda chí ra chíhín noo cha tyaá ra pechu ra, tyicuan caa saha yo cuenda chí yo chíhín cha ñi iñi yo chinó iñi yo chí Nyoo, ta chíhín cha cuñi yo chí tandihi ñáyivi. Ta tari sindaro sahá cuenda ra xiñi ra chíhín noo caa, tyicuan caa cuñi chí cha sahá yo cuenda chí yo chíhín cha yihí iñi yo tyi cacú yo. ⁹ Vatyí Nyoo ña tyaá ra cuhva chí yo vatyí tachí tuñi ra chí yo, soco nacachí ra chí yo vatyí cacu yo cha cuenda Sutu Mañi yo Jesucristo. ¹⁰ Vatyí ra Jesucristo chíhí ra cha cuenda yo vatyí tacuhva coo yo ñin ri chíhín ra. Ñahri saha vasi cha chíhí yo o iyó ca yo, soco tandihi yo coo yo ñin ri chíhín ra. ¹¹ Yucuan chaha sandunii ca ndo iñi tahan ndo ta sandunyye ca ndo iñi ñu, tari cuhva cuahan nyacuví ndo vityin.

Nu chahá ra Pablo tuhun chí ñu

¹² Soco yañi, chacú ndahví ndi nuu ndo, na saha ndo ñáyivi chí ra sahá tyiño nu nyicú ndo. Vatyí nyisó ra tyiño cuenda Sutu Mañi yo ta chahá ra tuhun chí ndo. ¹³ Cuñi chí cha saha xaan ndo ñáyivi chí ra chíhín cha cuñi ndo chí ra. Vatyí sacuví ra tyiño Sutu Mañi yo. Ta vaha ço ndo chíhín tahan ndo cuenda Nyoo.

¹⁴ Ta tyatyíñó ndi chí ndo yañi, vatyí cuhva ndo tuhun chí ñu cha ña cuñi saha tyiño. Ta sandunii ndo iñi ñu cha ña ñi ca iñi.

Ta tyinyee ndo chi ñu vita cuñi vaty ta chino vaha ca ñi ñu. Ta cucama ñi ndo chihin tandihi ñáyivi.

¹⁵ Saha ndo cuenda coto sacuvi ndo cha ña vaha chihin ñu nyacuví cha ña vaha chihin ndo. Nducu ndo cuhva sacuvi ndo cha vaha chihin tahan ndo cuenda Nyoo ta chihin tandihi ñáyivi.

¹⁶ Tyicuan ri cusi cuñi ndo. ¹⁷ Ta çacan tahvi ndo tyicuan ri maa. ¹⁸ Naçuhva ndo tyahvi nyoo chi Nyoo cha cuenda tandihi cha cuví. Vaty ican ihya cuví cha cuñi Nyoo cha sacuvi yo cha cuví yo ñu chinó ñi chi ra Cristo Jesús.

¹⁹ Ma ndahva ndo ñuhu Taty Ii cha nyaá aña ndo. ²⁰ Ma cuacu nya ndo tuhun Nyoo cha cahán noo ra cahán tuhun चाहá Nyoo. ²¹ Tin cuenda ndo tandihi cha cahán ra. Ta naquehen ndo cha vaha. ²² Cuachiyo ndo nuu tandihi cha quiñi caa.

²³ Ta maa Nyoo ra iyó cha taxi ri chii, na sanduvii ca ra aña ndo tacuhva vaty in ri chi maa ra nacuhva cuenda ndo chi ndo. Ta na cocumi ra aña ndo ta cha chiñi tuñi ndo ta coño ñuhu ndo tacuhva vaty ma coo ca cuaty ndo quivi quichi tucu Sutu Mañi yo Jesucristo. ²⁴ Ra cha nacachí chi ndo, cuví cunye ñi yo chi ra, vaty maa ra cusacuvi ra tandihi maa ihya.

Nu ndihi cahán ra Pablo ta चाहá ra nocumi chi ñu

²⁵ Yañi, çacan tahvi ndo cha cuenda ndi.

²⁶ Ta načuhva ndo nocumi chi tandihi yañi yo cuenda Nyoo.

²⁷ Tyatyiné chí ndo chihin ndusu yuhu Sutu Mañi yo vaty sacuahá ndo carta ihya nuu tandihi tahan yo cuenda Nyoo.

²⁸ Ta na nasoco Sutu Mañi yo Jesucristo chi ndo. Ta na cuví chi tyicuan caa.

Carta Cha Cu Uvi Cha Sacuhun Ra Apóstol Pablo Chi ñáyivi Ñuu Tesalónica Cha Yihí Cuenda Nyoo

*Nu tyaq ra Pablo ta ra tahan ra noo tutu
chi ñu ñuu Tesalónica cha yihí cuenda Nyoo*

¹ Yuhu ra Pablo chihin ra Silvano ta ra Timoteo, tyaá ndi noo tutu ihya tyi sacuhun ndi chi ndo cha cuví ndo ñu yihí cuenda Nyoo ñuu Tesalónica chiña. Vatyí ñin ri cuví ndo chihin Nyoo Sutu yo ta chihin Sutu Mañi yo Jesucristo. ² Ta na nasoco Nyoo Sutu yo ta Sutu Mañi yo Jesucristo chi ndo. Ta na cuhva ra cha taxi ri coo añima ndo.

*Nu catyi ra Pablo yoso caa cusacutuñi
Nyoo chi ñu iyó cuatyí quivi quichi ra Cristo*

³ Nyoho yañi, tyicuan ri cuñí chi cha nacuhva ndi tyahvi nyoo chi Nyoo cha cuenda ndo, vatyí tyicuan caa tahán chi cha sacuví ndi cha cuenda cha ñihi ca cuahan chinó ñi ndo chi Nyoo noo noo quivi, ta sün ri cuñí xaan ca ndo chi tahan ndo. ⁴ Yucuan chaha sii cuñí ndi cahán ndi tuhun ndo chihin nuu ñu yihí cuenda Nyoo inga ca vehe ñuhu. Vatyí nyoho cama xaan ñi ndo ta vaha xaan chinó ñi ndo chi Nyoo cha ni ri ca yahá ndo tandihí tindoho sanyehé ñáyivi chi ndo. ⁵ Ihya sañahá chi yo vatyí vaha cuhva sacutuñi Nyoo chi yo, vatyí nu ndihí tuhun cusaha Nyoo tuhun vatyí naña tucu nyoho quihvi ndo nu nyacá ñaha ra. Vatyí cha cuenda tuhun ra, nyehe xaan ndo tindoho vityin.

⁶ Ta cha cuenda chi Nyoo, vaha cha cutyiyahvi ra chihin tindoho chi ñu sanyehé tindoho chi ndo. ⁷⁻⁸ Ta chi nyoho cha nyehe ndo tindoho sahá ñu, cuhva ra cha nyitatu ndo tari cuhva tucu ra chi nyuhu, quivi cuquichi tucu Sutu Mañi yo Jesucristo nya andivi chihin ángel cha iyó xaan tunyee ñi ra chi, quichi ra chihin ñuhu cha cayú. Vatyí cutachí tuñi ra chi ñáyivi ña ñohó nuu Nyoo, ñu ña quichahá tuhun ra, tyi cuví ra Sutu Mañi yo Jesucristo, ra quichí sacacu chi yo. ⁹ Ñu cuan, cundoho ñu ta ma ndihí maa cha ndoho ñu, ta cunaa ñu nuu Sutu Mañi yo Jesucristo vatyí ma nyehe ñu chi ra. Ni ma nyehe ñu ñana cha cahnú cuví ra chihin tunyee ñi ra ¹⁰ quivi cuquichi ra. Vatyí quivi cuan ñu yihí cuenda ra cusacahnú ñu chi ra, tandihí ri ñu chinó ñi chi ra. Ta mahñu ñu, ñohó tucu nyoho vatyí chinó ñi ndo cha ndaa cha chahá ndi chi ndo.

¹¹ Yucuan chaha tyicuan ri chicán tahvi ndi chaha ndo, na tyinyee Nyoo yo chi ndo tacuhva na saha ra tuhun vatyí naña ndo

cha cuví ndo ñáyivi nacachí ra. Ta chicán tahvi tucu ndi chaha ndo na tyinyee ra chi ndo tacuhva cuví sacuvi ndo cha vaha chihin tunyee ñi ra. Ta tandihí tyiño sahá ndo nuu ra cuacacu vaha, suri cha cuenda tunyee ñi chahá ra chi ndo vatyí chinó ñi ndo chi ra. ¹² Tacuhva sacahnú ñáyivi sivi Sutu Mañi yo Jesucristo, vatyí nyehé ñu cuhva iyó ndo. Ta maa ra cusacahnú ra chi ndo nuu ñáyivi cha cuenda tumañi ñi cha chahá Nyoo chi ndo cha cuenda ra.

2

Ra cha ñahri maa ley Nyoo iyó chi

¹ Ta cha cuenda quivi cuquichi Sutu Mañi yo Jesucristo nu cusandu ñin ri ra chi yo, cuñí cahin vityin, nyoho yañi. Vatyí chacú ndahvi nuu ndo, ² ma vatyí xaan cutondo xiñi ndo. Ni ma nayuhvi ndo vatyí nyacua nya tatyí ñavaha ta cucatyí chi chi ndo vatyí cha chaa quivi Sutu Mañi yo, ta nyacua nya ra cahán tuhun Nyoo ta cucatyí ra vatyí cha chaa quivi cuan, ta cutyaa ra nu carta ta cucatyí ra tyi yuhu sacuhin carta cuan chi ndo. ³ Ni noo cuhva ma cuhva ndo cha sandavi ñaha ñu chi ndo. Vatyí cha ni cumañi ca chaa quivi cuan cuaha xaan ñu cusandihí ñu cha chino ñi ñu chi Nyoo ta cundicuita rayi cha ñahri ley Nyoo iyó chi, ra cacu vatyí cunaa cuví ra cuan. ⁴ Ican ra cuví ra xaan ñi chi Nyoo. Cundicuita ra siqui tandihí cha nyisó sivi Nyoo. Tandihí cuhva sacahnú ñáyivi chi Nyoo cunducuita ra siqui. Ta nyacua nya chichi vehe ñuhu cahnú Nyoo ta cucunyaa ra ta cunyaca ñaha ra, cusaha ra tyi Nyoo cuví ra.

⁵ ¿Atu ña nichohón ñi ndo vatyí ta ni nyaa que chihin ndo cahin tuhun ihya chihin ndo? ⁶ Soco vityin nyoho chitó ndo ñáá tuhun cha ña ndicuita ñaha ra tacuhva vatyí ndicuita ra soco nya quivi tahán maa chi. ⁷ Cha iyó tuhun cha ña quichahá ñáyivi chi Nyoo siqui ñuhu ñáyivi, soco iyó xehe chi, vatyí iyó noo cha chasí, ta ña chahá cuan cha nducuaaha chi. Soco quivi canyaha cuan, cunduñihi cha quiñi caa cuan. ⁸ Tyicuan ta cundicuita ra quiñi caa cuan ta Sutu Mañi yo cucahñi ra chi ra chihin tatyí yuhu ra ta cusanaa ra chi ra chihin cha xiño ra quivi cuquichi ra. ⁹ Ra quiñi caa cuan, cuenda cuihna cuquichi ra. Ta tandihí tunyee ñi cuihna cucoo chi ra, ta cusandavi ñaha ra chi ñáyivi chihin seña ta milagru ta cha iyo. ¹⁰ Tandihí ri nuu cha ña vaha cucotyíño ra tacuhva cuví sandavi ñaha ra chi ñáyivi cha cucunaa. Vatyí ñu cuan ña cuñí ñu quichaha ñu cha ndicha tacuhva cuví cacu ñu. ¹¹ Ta yucuan chaha cucuhva Nyoo vatyí cusandavi ñaha cha ña vaha cuan chi ñu. Ta cuchino ñi ñu cha ña ndicha. ¹² Tacuhva vatyí cutachí tuñi ra chi tandihí ñu vatyí ña

cuñí ñu chino iñi ñu cha ndicha. Ta tahán ca iñi ñu sacuví ñu cha ña vaha.

Nu cañan ra Pablo tuhun ñu cha nacachí Nyoo vatyi cacu ñu

¹³ Soco tyicuan ri cuñí chi cha nacuhva ndi tyahví nyoo chi Nyoo cha cuenda nyoho yañi. Vatyí cuñí xaan Sutu Mañi yo chi ndo. Vatyí Nyoo nacachí ra chi ndo nyata quivi xihna ri vatyi cuacacu ndo cha cuenda cha sanduvaha Tatyí li ra añima ndo ta cha cuenda cha chinó iñi ndo cha ndicha. ¹⁴ Yucuan cuenda nacana Nyoo chi ndo quivi cañan ndi tuhun ra chihin ndo tacuhva vatyi cuñihi ndo chiin cha cahnu cuví Sutu Mañi yo Jesucristo.

¹⁵ Yucuan chaha sñiñi ndo iñi ndo, nyoho yañi. Ta ma naa iñi ndo tuhun cha sañaha ndi chi ndo ta ni nyaa ca ndi chihin ndo. Ni ma naa iñi ndo tuhun cha tyañi ndi nu tutu cha sacuhun ndi chi ndo. ¹⁶⁻¹⁷ Sutu Mañi yo Jesucristo ta Nyoo Sutu yo cuví ra cha cuñí chi yo. Ta cha cuenda tumañi iñi cha chahá ra chi yo sanduní ra iñi yo tyicuan ri maa. Ta chahá ra cha cuita iñi yo coo yo chihin ra. Ta na nacuhva maa ra cha sñi cuñi añima ndo. Ta na sandunani ra iñi ndo, tacuhva cuví cañan ndo ta sacuví ndo tandihi nuu cha vaha.

3

Nu chicán ra Pablo na cacan tahvi ñu chahara

¹ Nu ndihi tuhun, nyoho yañi, cacan tahvi ndo chaha ndi tacuhva vatyi numi ri chaa tuhun Sutu Mañi yo tandihi ri ityi. Ta na quichaha ñáyivi ta natiin cuenda ñu tari natiin cuenda nyoho. ² Cacán tahví tucu ndo tacuhva vatyi na cacu ndi ndaha ñáyivi ña vaha, ñu quiñi iyó. Vatyí ña tandihi ñáyivi chinó iñi ñu chi Sutu Mañi yo. ³ Soco Sutu Mañi yo ndicha ra. Ta maa ra cuasaquehen ityi ra chi ndo, ta cuasaha cuenda ra chi ndo coto tiin ra ña vaha chi ndo. ⁴ Ta cunyeé xaan iñi ndi chi Sutu Mañi yo vatyi nyoho sacuví ndo tari cuhva catyí ndi chi ndo, ta cusacuví ca ndo. ⁵ Ta vityin na tyinyee ca Sutu Mañi yo chi ndo tacuhva cuñi ca ndo chi ñáyivi tari maa ra cuñí ra chi ñu. Na tyinyee ra chi ndo na cucama iñi ndo cuhva nyehe ndo tindoho, tari ra Cristo cunyeé xaan iñi ra nu nyehe ra tindoho.

Tahán chi cha saha tyiño yo

⁶ Ta vityin chihin ndusu yuhu Sutu Mañi yo Jesucristo, catyí ndi chi ndo, nyoho yañi, ma cutahan ndo chihin yañi yo ra ña cuñí saha tyiño, ta ña iyó ra cuhva sañaha ndi chi ndo. ⁷ Vatyí nyoho chitó ndo yoso caa tahán chi coo ndo tari cuhva sañaha ndi chi ndo. Vatyí nyuhu ña chinyicu ndi chihin ndo cha ña sahá tyiño ndi. ⁸ Ta ni ña chachí ndi cha chii ndo cha ña tyiyahví ndi. Soco sahá tyiño

ndi ñicahñu ta cha cuaa vatyi ña cuñí ndi coso ndi siqui ni noo ndo. ⁹ Vasi iyó chi ityi chi ndi cha cacan ndi cha tyinyee ndo chi ndi, soco nyuhu sahá tyiño ndi vatyi cuñí ndi sañaha ndi noo cuhva vaha cunyicon ndo. ¹⁰ Vatyí quivi chinyaa ndi chihin ndo, catyí ndi chi ndo vatyi ñu cha ña cuñí saha tyiño, ma cachi ñu. ¹¹ Cahán ndi siqui ihya vatyi ñihi ndi tuhun vatyi yihí ndo chicá noo yanga ri ndo ta ñahri maa tyiño sahá ndo. ¹² Chi nyoho cha iyó ndo tyicuan caa, catyí ndi chi ndo chihin ndusu yuhu maa Sutu Mañi yo Jesucristo, na casaha tyiño vaha ndo, ta yaha ndo noo noo quivi.

¹³ Yañi, ma cutatu ndo sacuví ndo cha vaha. ¹⁴ Tatu iyó noo ra ña cuñí quichaha tuhun cañan ndi nu tutu ihya, saha ndo cuenda chi ra ta ma cutahan ndo chihin ra tacuhva na cucahan nuu ra. ¹⁵ Soco ma cuxaan iñi ndo chi ra, soco cuhva ndo tuhun chi ra vatyi yañi yo cuví ra.

Nu ndihi cañan ra Pablo

¹⁶ Sutu Mañi yo taxi ri iyó añima ra, ta suri maa ra na cuhva ra cha taxi ri coo añima ndo tandihi ri cuhva tandihi ri quivi. Ta nacuhva ndo cha cunyaa vaha ra chihin tandihi ndo. ¹⁷ Yuhu ra Pablo tyaí nocumi ihya chi ndo chihin ndahi, ta chihin letre. Ta tyehe caa tyihí firme nu tandihi carte. Ta tyehe caa tuhvé tyaí. ¹⁸ Ta Sutu Mañi yo Jesucristo na nasoco ra chi tandihi ri ndo. Ta na cuví chi tyicuan caa.

Carta Cha Xihna Ri Sacuhun Ra Apóstol Pablo Chi Ra Timoteo

Nu tyaq ra Pablo noo tutu chi ra Timoteo

¹ Yuhu ra Pablo cuví noo apóstol chi ra Jesucristo vatyí tachí ra chíi na caque tyiño ra. Maa Nyoo cuví ra sacacú chi yo. Ta ican ra catyí tyí sacuví tyiño ihya, ta Sutu Mañi yo Jesucristo ñandihí. Vatyí maa ra cuví ra cha yihí iñi yo. ² Tyaí tutu ihya chí yoho Timoteo vatyí sehe vahi cuví chuun cha cuenda cha chinó iñun tuhun ra Cristo cha sacote chuun. Ta cuñí vatyí nasoco Nyoo Sutu yo ta Sutu Mañi yo Jesucristo chuun. Ta na nyehe ndahví ra chuun. Ta na coo ca cha taxi ri añimon saha ra.

Nu sañahá ra Pablo chí yo yoso caa saha yo cuenda tuhun cha ña ndicha

³ Quiví quite ñuu Éfeso chiña cha cuaquichi ityí Macedonia ihya, catyí chuun na ndoñun Éfeso chiña ta çatyun chí suhva ñu vatyí ma sañaha ñu tuhun cha ña ndicha. Ta vityin catyí tiqui chuun na sacuví con tari cuhva catyí chuun quiví cuan. ⁴ Çatyun chí ñu cuan vatyí ma tyaá ñu xiñi ñu tuhun tyisu, ni tuhun cha cuví chí noo noo sutu chahnu ñu. Vatyí cha nuu cha tyinyeé chí chí yo, satondó chí xiñi yo. Maa maa ri cha ñima ri tuhun cuví yuhu yo. Ña tyinyeé chí chí yo cha chinó iñi yo cha sacuví ca yo cha catyí Nyoo.

⁵ Soco tuhun cha catyí maa yo chí ñáyiví, cha cuñi yo chí tahan yo chíhin cha cacú añima yo cha sanduvahá Nyoo. Cuñi yo chí ñu chíhin cha vaha chícá xiñi yo ta chíhin cha ndicha chinó iñi yo chí Nyoo. ⁶ Soco yihí ñu sañá ñu tuhun ihya ta quita caxiin ñu chíhin tuhun cha ñima ri tuhun. ⁷ Cuñí ñu cuví ñu ñu sacuahá cuenda ley chahnu Nyoo soco ni maa ñu ta ña cutuñí iñi ñu tuhun cahán ñu.

⁸ Chitó yo tyí ley cuan, vaha chí, soco cotyíño yo tari cuhva tahán chí. ⁹ Cuñí chí coto yo vatyí ni noo ley ña chicunyaá chí cha cuenda ñu vaha. Soco nyaá chí cha cuenda ñu nacahnú nu cahán Nyoo, ñu iyó cuatyí, ñu quiñi iyó, ñu ña saha ñáyiví chí Nyoo. Nyaá tucu chí cha cuenda ñu chahñí chí sutu, chí síhi, ta cha cuenda tandihí ñu chahñí. ¹⁰ Nyaá ley cuan cha cuenda ñu iyó chíhin rayí o ñusihi ta ñima yí ña o ñasihi ra cuví. Nyaá chí cha cuenda ra ca iyó chíhin tahan yí, ta cha cuenda ñu suhu cha chí ñáyiví, ta ñu cuendu, ta ñu cha catyí: “Chito vaha Nyoo”, ta ña ndicha cha cahán ñu. Ta suri nyaá tucu ley cuan cha cuenda yóo ñu cha ña nyicon cuhva cahan tuhún Nyoo.

¹¹ Ta tuhun tyaqui xaan cha sacoto Nyoo chí yo cha cuenda ra Cristo, ican cuví tuhun cha nacuhvá cuenda Nyoo chí vatyí sacote chí ñáyiví. Maa ra cuví ra cha sacahnú yo.

Chahá ra Pablo tyahví nyoo chí Nyoo vatyí nyehé ndahví ra chí ra

¹² Nacuhvé tyahví nyoo chí Sutu Mañi yo Jesucristo cha cuenda tunyee iñi cha chaha ra chíi ta nyehe ra chí tari noo ra chinó vaha iñi, ta natyaa tyiño ra chíi vatyí sacuví tyiño nuu ra. ¹³ Tyehe caa sacuví ra chíhin vasi ta ityí chata ca yuhu cahan ña vahi siqui ra. Chica nyiquen chí ra ta cahan cuehi chí ra. Soco Nyoo cundahví cuñi ra nyehe ra chíi, vatyí yuhu ta chino ca iñi chí ra, ta ña chite cha chinyacuví. ¹⁴ Ta tyinyeé xaan Sutu Mañi yo chíi. Ta chahá ra cha chino xaan iñi yo chí ra, ta cha cuñi xaan yo chí ñáyiví vatyí in ri cuví yo chíhin ra.

¹⁵ Ta ndicha, cha ndicha vaha cuví tuhun ihya. Ta tahán chí cha chino iñi yo, vatyí ra Cristo Jesús quichí ra siqui ñuhu ñáyiví ihya vatyí sacacú ra chí ñu iyó cuatyí. Ta yuhu cuví noo ra quiñi caa ca cha nuu tandihí ñu cuan. ¹⁶ Yucuan chaha xihna que tava Nyoo chí nu quiñi caa vatyí tacuhva sañaha ra Jesucristo chí ñáyiví tyí cuñi xaan ra chí ñu. Tacuhva vatyí nachino iñi ñu ta cucoo ñu noo ñáyiví chaa cha ma naa ca maa. ¹⁷ Yucuan chaha na sacahnú yo chí ra cha tyicuan ri nyacá ñaha, ra cha ñahri tuhun chíhi iyó chí, ra cha ña cuví nyehe yo chí, ra cha noo ri maa ra cuví Nyoo ta chitó ra tandihí cha chíhi tuñi. Na sacahnú yo chí ra ta na cunyaca ñaha ra tyicuan ri maa. Ta na cuví chí tyicuan caa.

¹⁸ Ihya tuhun chahí chuun, yoho Timoteo sehí, vatyí cañi tahan vahun chíhin vatyí ña vaha chíhin cha chinó iñun, ta chíhin cha vaha cuñi añimon tyí chitón tyí vaha sacuvun noo cha sacuvún vatyí suri tuhun ihya cachahá ra hermano chuun chíhin ndusu Nyoo. ¹⁹ Ta ma sandihun cha chinó iñun chí Nyoo ta sacuvun cha vaha na vaha cuñi añimon. Vatyí sava ra sandihí ra tuhun ihya, yucuan chaha caquita xiin ra. ²⁰ Tyicuan caa sacuví tucu ra Himeneo ta ra Alejandro. Ta yucuan chaha nacuhvá cuende chí ra chí cuñi, na cacutuhva ra yoso caa tahán chí sacuví ra ta ma cahan ña vaha ca ra chí Nyoo.

2

Nu sañahá ra Pablo yoso caa cacan tahví yo

¹ Catyí chí ndo vatyí cha nuu tandihí ca, tahán chí cha cacan tahví ndo chí Nyoo cha cuenda tandihí ñáyiví. Ta nacuhva ndo tyahví nyoo chí Nyoo cha cuenda ñu. ² Çacan tahví ndo cha cuenda ra cacuví rey ta cha cuenda tandihí ra cacuví tyiño. Çacan

tahvi ndo cha cuenda ra tacuhva cuvi coo vaha yo, coo taxi yo, coo yo noo ñáyiví cachi nuu Nyoo ta nuu ñáyiví. Ta cusaha ñu ñáyiví chí yo. ³ Vatyí ihya cuví cuhva tahán íñi Nyoo ra cha sacacú chí yo. ⁴ Ta maa ra cuñí ra vatyí cacu tandíhi ñáyiví. Ta cuñí ra cha nacoto ñu cha ndicha. ⁵ Vatyí iyó noo ri Nyoo. Ta iyó noo ri ra cuví chaa nuu Nyoo tyiño nuu yo. Ican ra cuví ra Cristo Jesús. Ta cuví ra ñáyiví tari maa yo. ⁶ Ta maa ra Jesucristo chaha ra ñáyiví ra tyiño nuu tandíhi ñáyiví. Tiyahví ra cuatyí yo tacuhva cuví cacu tandíhi yo. Ta chingo cava cuan quiví tyaa maa Nyoo cuhva. ⁷ Cha cuenda ihya, tyatyíño Nyoo chíi, vatyí cahin tuhun ra, ta cuví apóstol ra, tachí ra chíi vatyí sañahi chí ñu cha ñima ñu Israel cuví, yoso caa nachino íñi ñu cha ndicha. Ta nyoho chitó ndo tyí ña tuhvé cahín cuendu vatyí cuenda ra Cristo yíhi.

⁸ Yucuan chaha cuñí vatyí çacan tahvi rayíi tandíhi ri ityí. Ta na coo ra noo ñáyiví ndíi. Ta na sacahnu ra chí Nyoo chíhin cha nacoñehe ra ndaha ra nuu Nyoo. Ta vaha çaca xiñi ra. Ta ma coo ra tisíhi chíhin ñáyiví. Ta ni ma xaan ra. ⁹ Tyicuan caa tucu ñusíhi. Cachi cuhva cuíhno ñu, tari cuhva tahán chí cuíhno ñu yíhi cuenda Nyoo. Ta ma iyo xaan cuíhno ñu. Ma iyo xaan sanduvíi ñu xiñi ñu. Ñima chíhin xuhun cuaan o yuu tyaquí, o chíhin sahma yahvi xaan sanduvíi ñu chí ñu. ¹⁰ Soco chíhin cha cachi coo ñu ta chíhin cha sacuví ñu cha vaha na sanduvíi ñu chí ñu, tari tahán chí sacuví ñu nacuhva cuenda chí chí Nyoo. ¹¹ Ta taxi ri çunyaa ñusíhi ta tyasoho ñu tuhun Nyoo. Ta saha ñu ñáyiví chí ra chahá tuhun chí ñu. ¹² Vatyí ña chahí cha sañaha ñusíhi. Ni ña chahí cha cunyaca ñaha ñu chí rayíi. Soco taxi ri na cunyaa ñu. ¹³ Vatyí xihna ca chí ra Adán savaha Nyoo ta yaha cuan ta chí cu Eva. ¹⁴ Ta ñima chí maa ra Adán sandavj ñaha ra ña vaha, socio chí ñasíhi ra cuví sandavj ñaha ra ta chicoç cuatyí ña. ¹⁵ Soco ñusíhi cucacu aña ñu cha cuenda cha sacacú ñu sehe ñu, ta sacuahnú vaha ñu chí chí. Soco tatu chinó vaha íñi ñu chí Nyoo ta cuñí ñu chí ra ta chí ñáyiví, ta cachi coo ñu nuu Nyoo ta nuu ñáyiví ñandíhi.

3

Yoso caa tahán chí coo ra yíhi ndaha chí ñu yíhi cuenda ra Cristo

¹ Ndicha tuhun ihya: Tatu minoo ndo cuñí ndo quindaha ndo chí ñáyiví yíhi cuenda ra Cristo, vaha xaan tyiño quichí cuví íñi ndo sacuví ndo. ² Soco niñi cuñí chí vatyí ra yíhi ndaha vehe ñuhu cuví ra noo ra ñahri cuatyí iyó. Ta cuñí chí cha coo noo ri ñasíhi ra. Ta cuñí chí cha cuví ra noo ra tyíhi tuñi vaha íñi yoso caa cunyacuví, noo ra vaha nuu ñáyiví. Ta cuñí chí vatyí vaha cuví ra chíhin ñáyiví

chaa vehe ra. Ta coto ra yoso caa sañahá ra. ³ Ma cuví ra noo ra tuhvá chíhi ndíxi, ni ma cuví ra noo ra nanducú tisíhi. Ta ma cuví ra noo ra nducu xuhun noo cuhva ña vaha. Soco cuñí chí cha vaha ñáyiví cuví ra, ta cuví ra noo ra ña tuhvá cañi tahan. Ta ma cuví ra noo ra cuñí xaan xuhun. ⁴ Ta cuví ra noo ra yíhi ndaha vaha ñasíhi ta sehe: Noo ra nyacá ñaha chí sehe tacuhva vatyí quichaha ñu chí ra, ta saha ñu ñáyiví chí ra. ⁵ Vatyí tatu ña chitó ra cunyaca ñaha ra vehe ra, ¿yoso caa cusaha cumi ra vehe ñuhu Nyoo? ⁶ Ta noo ra nichaa chíhin tuhun Nyoo ña tahán chí quindaha ra vehe ñuhu vatyí coto sacahnu ra chí ra ta tachí tuñi Nyoo chí ra, tari tachí tuñi ra chí cuíhna vatyí cahnu sahá ra chí ra. ⁷ Ta siin ri cuñí chí vatyí cuví ra noo ñáyiví vaha nuu ñu ityí chata, coto tahan ra ticahan nuu ta cana cava ra chíhi ndaha cuíhna.

Yoso caa tahán chí coo noo ra tyinyee chíhin tyiño vehe ñuhu

⁸ Ta tyicuan caa tucu ra tyinyee chíhin tyiño vehe ñuhu. Na cachi çoo ra. Ma cuví ra noo ra cuendu, ta ma cuví ra noo ra tuhva chíhi ndíxi ñandíhi. Ta ni ma nyiyo íñi ra saha canaa ra xuhun chíhin noo cuhva ña vaha. ⁹ Cuñí chí vatyí cutuñí vaha íñi ra yoso caa tahán chí chino íñi yo chí Nyoo ta coto vaha ra tyí vaha cuahan ra chíhin Nyoo. ¹⁰ Ta cuñí tucu chí cha nyehe xihna yo tatu vaha iyó ra chíhin Nyoo tyicuan ta cuví sacuví ra tyiño vehe ñuhu. ¹¹ Ta tyicuan caa tucu ñusíhi, cuñí chí vatyí cuví ñu ñáyiví vaha. Ma ñi ñu cuendu. Ta cachi coo ñu. Ta niñi cuñí ñu chíhin tandíhi ri tyiño. ¹² Noo ra tyinyee chíhin tyiño vehe ñuhu na coo noo ri ñasíhi ra. Ta cuñí chí vatyí coto vaha ra cunyaca ñaha ra chí sehe ra ta ñáyiví nyicú vehe ra. ¹³ Vatyí ra tyinyee, tatu vaha sacuví ra tyiño cha tahán chí sacuví ra, cuahan ca ra ityí nuu chíhin Nyoo. Ta cuní ca íñi ra cahan ra tuhun cha chinó íñi ra chí ra Cristo.

Noo tuhun xehe cuenda cuhva chino íñi yo

¹⁴⁻¹⁵ Yíhi íñi cha cuhin cha numi ri cunyehe nu nyaún. Soco tatu cucuei, yucuan chaha tyái ihya chuun tacuhva coton yoso caa tahán chí coo ñáyiví cuenda Nyoo. Vatyí maa yo cuví yo vehe ñuhu Nyoo nyitó. Ta cuñí chí vatyí sañíhi ca yo sañaha yo cha ndicha cha cumí yo chí inga ñáyiví. ¹⁶ Cha ndicha cuví vatyí yaha xaan cuhva cahnu tuhun xehe cha sanatuvj Nyoo, vatyí coo yo tari iyó maa ra:

Nyoo nanduvj ra rayíi ta chicoç ra chíhi noo coño ñuhu tari maa yo.

Ta catyí Tatyí lí vatyí vaha ra.

Ta nyehe ángel chí ra.

Nicahnu ñuhu ñáyiví cahán ñu tuhun ra.

Ta chinó iñi ñáyivi chi ra nicacahnu ñuhu ñayivi.

Ta cuanuhu ra nya gloria.

4

Nu catyi ra Pablo vatyí yihí ñu ma chino ca iñi ñu nu cuahan chí tyembu

¹ Soco cahán cachi Tatyí Ii ta catyi chí vatyí nu cuandihí tyembu yihí ñu ma chino ca iñi ñu chi ra Cristo vatyí cutyasoho ñu tuhun cahán tatyí ña vaha cha sandavi ñaha chí ñu. Ta cunyicon ñu ndusu ñuhu cuihna. ² Cutyasoho ñu tuhun cahán ñu cuendu. Ta ñu cuendu cuan ña tuví ca iñi ñu cuhva nyacuví ñu vatyí cha ndundava xaan añima ñu. Tari cha cayu añima ñu chihin noo caa ihñi ta ndundava chí cuví cuan. ³ Cucasi ñu cuan nu tandaha ñáyivi. Ta cucatyí ñu vatyí ña vaha cha cachi yo suhva nuu nyayu. Vasi chitó yo tyí tandihí nuu cha cachi yo, Nyoo savaha. Ta tandihí yo cha chinó iñi yo chí Nyoo ta chitó yo cha ndicha, cuví cachi yo ta nacuhva yo tyahví nyoo chí ra. ⁴ Vatyí tandihí cha savaha Nyoo ta vaha. Ta ña tahán chí catyi yo tyí ña vaha. Cuví cachi yo tatu nacuhva yo tyahví nyoo chí Nyoo. ⁵ Vatyí ndundi chí cha cuenda tuhun Nyoo ta cha cuenda cha chicán tahví yo chí Nyoo.

Yoso caa noo ra vaha sacuví tyiño nuu ra Jesucristo

⁶ Tatu sañahún tuhun ihya chí tandihí yañi yo, cua cuvun noo ra vaha cahán tuhun ra Cristo Jesús. Ta tuhun cha chinó iñi yo ta tandihí tuhun ra Cristo cha nyicón, cua tyinyee chí chuun. ⁷ Soco ma quichahun tuhun cuendu, tuhun tondo cha iyó ñayivi ihya. Vaha ca sñañun chuun sacuvun maa maa ri cuhva cuñi Nyoo. ⁸ Cha sñañi yo ndunye coño ñuhu yo tyinyee chí suhva chí yo. Soco cha sñañi yo sacuví yo cuhva cuñi Nyoo, tyinyee chí chí yo tandihí ri cuhva, vatyí tyinyee chí chí yo ñayivi ihya. Ta tyinyee tucu chí chí yo cha coo vaha yo nu cuchaa yo andivi. ⁹ Ta ndicha, cha ndicha vaha cuví tuhun ihya ta tandihí yo tahán chí cha chinó iñi yo. ¹⁰ Ta suri cha cuenda ihya sahá tyiño yo ta nyehé yo tindoho vatyí nyatú yo naquehen yo cha vaha cha chaha Nyoo nyito chí yo. Vatyí maa ra cuví ra sacacú chí tandihí ñáyivi, ta xihna ca chí yoó cha chinó iñi yo chí ra.

¹¹ Ihya tuhun cha sañahun chí ñáyivi, ta cusaniñun chí ñu na cutuhva ñu. ¹² Cachi sañun chuun coto ma saha ñu ñáyivi chuun cha cuenda cha cuvún noo ra tyivaa. Soco sañahun noo cuhva vaha chí ñu chihin cuhva iyón, chihin cuhva cahun. Sañahun chí ñu, chihin cuhva cha cuñún chí Nyoo ta chí ñáyivi, chihin cuhva chicá xiñun, chihin cuhva chinó iñun, ta chihin cuhva sacuvún

maa maa ri cha vaha. ¹³ Cha ñi ri ca cha cumañi chai nu nyicú ndo, sacuaaha con tuhun Nyoo nuu ñu yihí cuenda Nyoo. Cuhva tuhun chí ñu ta sañahun chí ñu yoso caa caca vaha ñu ityi Nyoo. ¹⁴ Sañun cuenda nyatu cha chahá Nyoo chuun quivi cha tyiso ra yindaha vehe ñuhu ndaha ra sicun ta cahan ra yoso cuhva chahá Tatyí Ii Nyoo chí ra. ¹⁵ Tyaa vaha xiñun tuhun ihya ta sacuvun. Tacuhva vatyí nyehé ñáyivi yoso caa cuahun ityi nuu ca chihin Nyoo. ¹⁶ Saha cuenda chuun chihin cuhva iyón. Ta saha cuenda cuhva sañahún chí ñáyivi ta ñaha saña ndahun cha vaha. Tatu tyicuan caa sacuvún cuacacun, ta cucacu ñu chiñi tuhun sañahun ñandihí.

5

Nu chahá ra Pablo tuhun chí ra Timoteo yoso caa cuhva ra tuhun chí ñu yihí cuenda ra Cristo

¹ Ma cahun chí noo ra chahnu, soco cuhva tuhun chí ra tari cha sutun cuví chí ra. Ta chí ra tyivaa cuhva tuhun chí ra tari cha yañun cuví chí ra. ² Ta chí ñu chahnu tari cha sihun cuví chí ñu. Ta chí ñu tyivaa, tari cha cuhvon cuví chí ñu. Ta sacuvun chihin cha vaha chicá xiñun.

³ Tyinyee chí ñu ndahvi ñu chihí yíi tatu yori ñáyivi chí ñu cha tyinyee chí ñu. ⁴ Soco tatu iyó noo ñaha chihí yíi ta iyó sehe ña, o sehe ñañi ña, cuñi chí cha cutuhva xihna maa ñu cha tyinyee ñu chí ña. Na nichon iñi ñu yoso caa saha cuenda sihi ñu chí ñu ta luhlu ñu. Ta tyicuan caa tahán chí cha saha cuenda tucu ñu chí ña vityin. Vatyí cha tyehe caa vaha xaan, ta cha tahán iñi Nyoo cuví. ⁵ Soco ñu chihí yíi cha ndoo noo tuhun ri maa, chí Nyoo tyihí ñu iñi ñu ta tyicuan ri chicán tahvi ñu chí ra ñicahñu ta cha cuaa. ⁶ Soco noo ñaha chihí yíi cha nducú tusi iñi cha iyó ñayivi ihya, tari quivi cha chihí ña cha cuenda tuhun Nyoo cuví cuan, vasi iyó ña. ⁷ Sacoto tuhun ihya chí tahan yo tacuhva cha ma ñihi ñáyivi cuhva cahan ñu chí ñu. ⁸ Soco tatu yihí yo cha iyó ñáyivi chí yo cha chihí yíi ta ña chicá xiñi yo cha cuenda ñu, ta cha xihna ri cha cuenda ñu vehe yo, tari quivi cha ña chinó iñi yo chí Nyoo cuví cuan. Ta cahnu ca cuatyí yo ta ñima ca ñu cha ña chinó iñi chí Nyoo.

⁹ Nu tutu cha nyaá sivi ñu chihí yíi, na cunyaa sivi ñu, soco ñu cha yahá ca uñi xico cuiya. Ta cuví cunyaa sivi ñu tatu noo ri yíi ñu chiyo. ¹⁰ Ta cuñi chí tatu ñohó nuu vaha ñáyivi chí ñu cha cuenda cha vaha cha sacuví ñu: tatu sacuahñu vaha ñu sehe ñu, tatu chahá ñu cha cachi ñu chaá vehe ñu, tatu sacuví ñu tyiño nuu yañi yo chihin cha tandihí añima ñu chihin cha ndahvi sahá ñu chí ñu, tatu tyinyee ñu chí ñu nyehé tindoho,

tatu tyehe caa sacuví ñu tandihí nuu cha vaha, cuví cunyaa siví ñu.

¹¹ Soco ma tyihí ndo siví ñu cha ta chaa ca uñi xico cuiya coto coo quiví ta quichi cuví iñi ñu tandaha ñu inga chaha ta sandihí ñu tuhun sacuví ñu tyiño nuu ra Cristo. ¹² Ta tyicuan caa cucoo cuatyí ñu vatyi ña sacuví ca ñu cuhva catyi ñu. ¹³ Ta sñin ri tatu chicá noo suchan ri maa ñu tahan tahan vehe ñáyiví. Ta ñima yucuan ri soco chicá noo ndihí ñu chihin cuendu ñu. Ta tyihí ñu chi ñu noo nu ñahri cuenda ñu. Ta cahán ñu cha ña tahán chi. ¹⁴ Yucuan chaha vaha taxin ca na tandaha ñu inga chaha. Na coo sehe ñu. Na saha cuenda ñu vehe ñu. Ta ma cuhva ñu ityi chí ñu xaan iñi chí yo vatyi cahan nyaa ñu chí yo. ¹⁵ Tyehe caa catyi chuun vatyi yihí ñu cha saña ñu chí Nyoo ta na nyicon ñu chí ra ña vaha. ¹⁶ Tatu noo ñu yihí cuenda Nyoo ta iyó noo ñáyiví chí ñu cha chihí yíi, cuñí chí cha tyinyee ñu chí ñu, tacuhva cha ma cuví ñu noo carga chí vehe ñuhu. Ta tyicuan caa ta cuví tyinyee ñu vehe ñuhu chí ñu chihí yíi cha ndicha ndicha chihí ñuhú chí.

¹⁷ Ra chahnu ra nyisó tyiño vehe ñuhu, cuñí chí vatyi saha xaan ñu ñáyiví chí ra. Ta cha xihna ca chí ra cahán tuhun Nyoo ta ra sañahá chí ñu. ¹⁸ Vatyi tuhun Nyoo catyi chí: “Ma tyihun yoho yuhu sindiqui nu saha tyiño tí tacuhva vatyi cuví cachi tí chiin.” Ta catyi tucu chí: “Iyó ityi chí ra cha sahá tyiño cha ñihí ra yahví ra.”

¹⁹ Tatu tyaá ñu cuatyí siqui noo ra chahnu ra nyisó tyiño vehe ñuhu, ta tatu ña quita uví o uñi tahan cha ndaa, ma quichahun chí ñu tyaá cuatyí cuan. ²⁰ Soco ñu sañihí ca sacuví cuatyí cuñí chí cha catyi ndo chí ñu chihin nuu tandihí ñu nyicú vehe ñuhu tacuhva vatyi tandihí ca ñu na cuyuhví ñu sacuví ñu cha ña vaha. ²¹ Tyatyíne chuun chihin nuu Nyoo ta chihin nuu Sutu Mañi yo Jesucristo, ta chihin nuu ángel cha nacachí ra. Ta catyi chuun vatyi quichahun cha catyi ihya ta ma cuhun tumañi iñi chí noo ra ta ní chí inga ra. ²² Ma numi xaan ri tyaá tyiño chí noo ra cha cuví ra tyiño vehe ñuhu. Coto ndoo cuatyí sacuví ra sícun. Saha vahun cuenda chuun chihin tandihí cha sacuvún ta ma cuhvun ityi chí cha ña vaha.

²³ Ta vatyi iyó noo cuehe chichun, ma cohun maa ri maa ndutya, soco cohun chiin vinu ñandihí.

²⁴ Yihí ñáyiví quetuví ri cuatyí ñu cha cumañi ca cutuñi chí ñu. Ta yihí ñu nya cha yaha cutuñi chí ñu ta cuquetuvi cuatyí ñu. ²⁵ Ta tyicuan caa tucu cha vaha cha sacuví yo, ña xehe caá. Soco vasi ña tuví cha numi ri, ñima tyicuan ri cucohon xehe chí.

6

¹ Ñu cha cuví musu cuñí chí cha saha vaha

ñu ñáyiví chí chitoho ñu. Tyicuan ta ma ñihí ñáyiví cuhva cahan ña vaha ñu siqui Nyoo ní siqui tuhun ra, cha sañahá yo. ² Ta tatu noo musu iyó chitoho ra cha yihí cuenda Nyoo, ña tahán chí cha ma saha ra ñáyiví chí ra vatyi yañi ra cuenda Nyoo cuví chí ra. Soco ñihí ca cuñí chí cha sacuví ra tyiño nuu ra, vatyi chinó tucu iñi maa ra chí ra Cristo, ta Nyoo cuñi ra chí ra. Sañaha tuhun ihya chí ñu hermano ta cuhva tuhun chí ñu na sacuví ñu.

Cuhva iyó yo ta cusii cuñi yo

³ Tatu iyó noo ra cha sañahá inga tuhun cha ña chachí tahan chí chihin tuhun vaha cha sañahá Sutu Mañi yo Jesucristo, ta ní ri chihin tuhun vaha cha cuahan sacuaaha yo, ⁴ cuví ra noo ra cahnú sahá chí. Ta tahán xaan iñi ra cuví yuhu ra siqui noo cha ñima ri tuhun. Tari noo cuehe cuví cuan. Ta cha cuenda tuhun ihya cacú tisihi ta tuhun nyiyo iñi, tuhun cha cahán ña vaha chí tahan, ta tuhun cha ña vaha cuñí nyehe chí tahan. ⁵ Ta tyicuan ri cañi tahan ñu vatyi quiñi chica xiñi ñu, vatyi ña chitó ñu cha ndicha. Nyacua cuñi maa ñu tyi cusaha ganaa ñu xuhun chihin tuhun Nyoo. Ma cutahan ndo chihin ñu cuan. ⁶ Ndicha vatyi cha sacuví yo cuhva catyi Nyoo ta ndoo yo vaha chihin cha cha chaha ra chí yo cuví chí tari noo cha tyayii iyó chí yo. ⁷ Vatyi ñahri nyisó yo vachi yo ihya ñáyiví. Ta ñahri cuiso yo cunuhu yo quiví cuví yo. ⁸ Soco tatu iyó cha cachi yo ta sahna ñihno yo, na cusii iñi yo, ta na ndoo yo vaha chihin yucuan ri. ⁹ Soco ñu cuñi cutyayii, nducú nyehe ra ña vaha chí ñu. Caná cava ñu nichí xayu ra. Cutondó xiñi ñu chihin cha cuaha xaan cha quichi cuví iñi ñu. Ta sativí chí chí ñu ta nu ndihí tuhun cutiví ndihí ñu ta cunaa ñu. ¹⁰ Vatyi cha cuñi xaan yo xuhun, yucuan cuví nu caña tandihí ca nuu cha ña vaha. Ta yihí ñu cha tyehe caa cuñi xaan ñu xuhun, ta cha cuenda cuan sandihí ñu tuhun cha chinó iñi ñu tuhun Nyoo. Ta yucuan cuví nu suri chí maa ñu sanyehé ñu tindoho.

Lucha cha iyó chí yo cha chino iñi yo chí Nyoo

¹¹ Soco yoho cuvún noo rayii cuenda Nyoo. Caca cono chí tandihí cha quiñi caa cuan. Ta cuhun chata cha cuiti. Vaha cohun nuu Nyoo. Cuhñi iñun chihin ra. Cuhñun chí ñáyiví. Coo cha cama iñun chihin tandihí cha cuví chuun. Ta masu cuví iñun. ¹² Ñihí sacuvun tyiño nuu Nyoo vatyi tyicuan caa tahán chí tyi chinó iñi yo chí ra. Ta ma saña ndahun ñáyiví chaa cha ma naa ca maa cha chaha Nyoo chí yo. Vatyi ican cuenda cuan nacana Nyoo chuun, quiví catyi cachun tyi chinó iñun nuu cuaha xaan ra cuví cha ndaa. ¹³ Ta chihin nuu Nyoo,

ra cha chahá ñayiví coo tandihí cha iyó, ta chihin nuu ra Cristo Jesús ra cha chahá vaha cuenda nuu ra Poncio Pilato, catyí chuun vi-tyin, ¹⁴ na sacuvun tandihí cha catyí chuun tacuhva ma cuhvon cuhva cha cahan ñáyiví chuun nyacua nya quiví quichi Sutu Mañi yo Jesucristo. ¹⁵ Na chaa maa quiví, Nyoo cusaquichi ra chi ra Cristo inga chaha. Ican ra cuví ra cha sacahnu yo, ta noo tuhun ri maa ra cuví Nyoo ra iyó xaan tunyee ifi chii. Rey cuví ra cuenda tandihí ca ra cuví rey. Ta nyacá ñaha ra chi tandihí ca ra cha nyacá ñaha. ¹⁶ Noo ri maa ra cuví ra ra ñahri tuhun chihí iyó chii. Ta iyó ra nu ndichin nu yori maa tuhva. Ta ni noo ñáyiví ta nyehe ca ñu chí ra. Ta ni ña cuví nyehe ñu chí ra. Chi maa ra na sacahnu yo. Ta na cunyaca ñaha ra tyicuan ri maa. Ta na cuví chi tyicuan caa.

¹⁷ Ta ñu cha iyó cha tyay# chí ñayiví ihya, catyí chí ñu vatyi ma cahnu xaan saha ñu chí ñu. Ta ma cuita ifi ñu chí cha tyay# cha iyó chí ñu. Vatyí coto coo quiví ta ndihí cha tyay# cuan. Soco na cuita ifi ñu chí Nyoo nyitó, vatyi maa ra cuví ra chahá tandihí. Ta cuaha chaha ra chí yo tacuhva cus# cuñi yo.

¹⁸ Çatyun chí ñu tyay# na sacuvi ñu cha vaha ta n# ifi ñu cuhva ñu cha iyó chí ñu chihin cha ma uhvi cuñi ñu. ¹⁹ Tyicuan ta coo cha tyay# ñu andiví ta cutyinyee chí chí ñu nu cuahan ca chí quiví. Ta tyehe caa cuví coo ñu ñayiví cha ma naa ca maa.

Nu ndihí chahá ra Pablo tuhun chí ra Timoteo

²⁰ Yoho Timoteo saha cumi vahun tyiño cha chahá Nyoo chuun. Ma tyasohun tuhun cha siin caa, tuhun cha ñiima ri tuhun. Ma quichahun tuhun cha catyí ñu vatyi cha chiñi tuñi cuví, vatyi ña ndicha. ²¹ Vatyí cha cuenda cuan yihí ñu cha quita caxiin ñu ityi Nyoo. Ta ña chinó vaha ca ifi ñu cha ndicha.

Ta Nyoo na nasoco ra chí ndo.

Ta na cuví chí tyicuan caa.

Carta Cha Cu Uvi Cha Sacuhun Ra Apóstol Pablo Chi Ra Timoteo

Nu tyaq ra Pablo noo tutu chi ra Timoteo

¹ Yuhu ra Pablo cuví noo apóstol ra Jesucristo vatyí tachí ra chíi na caque tyiño ra. Vatyí tyicuan caa cuñí maa Nyoo, tyi cuñí ra cha sacote chí ñáyivi vatyí chahá ra noo ñáyivi chaa chí tandihí ñu cha ndu ñin ri chihin ra Cristo Jesús vatyí nacuhva cuenda ñu chí ñu chí ra. ² Tyaí tutu ihya chí yoho Timoteo. Ta cuñí xain chuun tyi tari cha sehi cuví chuun. Ta cuñí vatyí Nyoo Sutu yo ta Sutu Mañi yo Jesucristo na nasoco ra chuun. Ta na nyehe ndahví ra chuun. Ta na coo ca cha taxi ri cuñí añimon saha ra.

Nu natyí ra Pablo chí ra Timoteo tyi nacatyí ra chí ñáyivi tyi cuenda ra Cristo yihí ra

³ Tyicuan ri nicohón ñiñi tuhun yoho cuhva cha chicán tahví chí Nyoo ñicahñu ta cha cuaa. Ta nacuhvé tyahví nyoo chí ra cha cuendon. Nu maa ra sacuví yuhu tyiño chihin cha vaha chicá xiñi, tari sacuví tucu ñáyivi chíi ta cha naha. ⁴ Tyicuan ri nicohón xaan ñiñi chuun ta nicohón xaan ñiñi tuhun yoso caa chacun quivi cuachiye chiña. Ta cuñí xain nyehi chuun inga chaha ta cusii ñiñi chuhun. ⁵ Vatyí nicohón ñiñi yoso caa chinq xaan ñiñi cu Loida chiton chí Nyoo, ta cu Eunice sihun ñandihí. Tyicuan caa tucu yoho chinó xaan ñiñun vityin.

⁶ Yucuan chaha chahí tuhun chuun vatyí na sanñun ñiñun ta cotyíño nyatu cha cahun tuhun Nyoo cha chahá ra chuun quivi tyisé ndahi sicun. ⁷ Nyoo ña chahá ra cha yuhví yo. Soco chahá ra noo tunyee ñiñi cahnu chí yo. Ta chahá ra vatyí cuñí yo chí tahan yo. Ta chahá ra cha cunyaca ñaha vaha yo chí yo. ⁸ Yucuan chaha ma cahan nuun cahun tuhun Sutu Mañi yo. Ta ni ri cha ma cahan nuu cha cuenda cha ñohí vehe caa cha cuenda ra. Soco chihin tunyee ñiñi chahá Nyoo chuun ta chihin cha iyó vaha ñiñun cunyeun tindoho cha vachí siqui yo cha cuenda tuhun Nyoo. ⁹ Vatyí ican ra sacacu chí yo. Ta nacana ra chí yo vatyí coo yo noo ñáyivi ii. Ñima cha cuenda cha vaha cha sacuví yo ta nacana ra chí yo, soco vatyí tyicuan caa tyaq ra cuhva nyata ni cumañi ca chinq ñuhu ñáyivi. Vatyí nya quivi cuan cuñí ra chí yo cha ñin ri cuví yo chihin, ra Cristo Jesús. ¹⁰ Ta vityin cha quichí ra Jesucristo sacacu ra chí yo, nacotó yo vatyí tyicuan caa cuñí ra chí yo. Ta nu quichí ra, satani ra tandihí tunyee ñiñi cha iyó chí tuhun chihí. Ta chihin tuhun vaha cahan

ra, tavá ra nu ndichin tuhun cha coo yo noo ñáyivi chaa cha yori cuví satívi.

¹¹ Nyoo tyaq ra tyiño chíi vatyí cahin tuhun ihya chihin ñáyivi. Tachí ra chíi vatyí cuví noo apóstol chí ra, ta sañahí chí ñu cha ñima ñu Israel cuví. ¹² Yucuan chaha nyehí tandihí tindoho ihya. Soco ña cucahán nui vatyí chitó mai yóo chí chinó ñiñi. Vatyí nacuhvá cuende chíi chí ra, ta chitó vahí vatyí cuví saha cuenda ra chíi nyacua nya quivi quichi tucu ra.

¹³ Cunyicon tuhun vaha cha chahí chuun. Ta cun chihin cha chinó vaha ñiñun chí Nyoo. Tyicuan ri cuñun chí ñáyivi tahan yo. Vatyí yucuan cuví cha chahá Nyoo chí yo tyi ñin ri cuví yo chihin ra Cristo Jesús. ¹⁴ Ta maa Tatyí Ii cha iyó añima yo na tyinyee chuun ta saha cumun tuhun vaha cha chahá Nyoo chuun.

¹⁵ Cha chitón vatyí tandihí ra ityí Asia chiña casandoq ra chíi, tari ra Fígeló ta ra Hermógenes. ¹⁶ Soco ra Onesíforo na nyehe ndahví Sutu Mañi yo chí ñáyivi chí ra vatyí cuaha xaan chaha quichí sandunyeer ra ñiñi. Ta ña cucahan nuu ra cha cuenda cha ñohí vehe caa. ¹⁷ Soco quivi chinyaa ra ñiñu Roma ihya, ña sandihí ra tuhun cha nanducu ra chíi nyacua nya cha nañihí ra chíi. ¹⁸ Sutu Mañi yo nacuhva ra cha ñiñi ra tumañi ñiñi quivi cha cutuñi chí yo nuu ra. Chitó vahun yoso cuhva tyinyee ra Onesíforo chí yo nya ñiñu Éfeso chiña.

2

Noo sindaro vaha ra Jesucristo

¹ Ta yoho sehe luhlí, sandunyeer ñiñun chihin tunyee ñiñi cha chahá ra Cristo Jesús chuun cha cuenda cha ñin ri cuví yo chihin ra. ² Tuhun cha chihun cha cahin nuu cuaha ñáyivi, nacatyí chí ra cha ñiñi chinó ñiñi chí Nyoo, ra cha cacuví sañaha chí inga ñu.

³ Ta cunyeun tindoho tari noo sindaro vaha ra Jesucristo. ⁴ Ni noo ra cuví sindaro ta ma cuví tyihí ra chí ra chihin inga tyiño. Vatyí cuñí chí sacuví ra maa maa ri cha catyí ra cuví nuu chí ra. ⁵ Ta tyicuan caa tucu ra canyasiquí, ma saha canaa ra cha tahán chí saha canaa ra tatu ma cunyasiquí ra tari cuhva tahán chí. ⁶ Noo ra sahá tyiño chichi cuhu, tahán chí cha saha tyiño xihna ra, yucuan ta cachi ra cha quitá nu iyó tyiño sahá ra. ⁷ Caca xiñun tuhun cha catyí chuun ihya, ta maa Sutu Mañi yo cucuhva ra cha cutuñi ñiñun tandihí.

⁸ Nicohon ñiñi tuhun ra Jesucristo, ra cha nandotó cha yahá nyehe ra tindoho ta chihí ra. Cuví ra tata rey David. Ta ican ihya cuví tuhun Nyoo cha cacu añima yo cha chahá ra vatyí cahin tuhun. ⁹ Ta cha cuenda tuhun ihya cunyeí tandihí tindoho nyacua nuñí chihin cadena tari noo ra quíñi iyó. Soco

tuhun Nyoo ña nuhñí chi. ¹⁰ Yucuan chaha cunyei tandihí tindoho cha cuenda cha vaha chí tandihí ca ñu nacachí Nyoo chí, tacuhva vatyi cuví cacu tucu tandihí ñu. Chihin cha ndu ñin ri yo chihin ra Cristo cuacacu yo ta cuñihí yo noo nu tyaquí xaan cha ma ndihí ca maa. ¹¹ Ihya cuví cha ndicha xaan:

Tatu cuví yo cha cuenda ra, coo tucu yo chihin ra.

¹² Tatu cunyeé yo tindoho, cucunyaca ñaha yo chihin ra.

Tatu catyi yo tyi ña yihí yo cuenda ra, maa ra cucatyi ra tyi ñima ñáyivi cuenda ra cuví chí yo.

¹³ Tatu sandog yo chí ra, soco maa ra tyicuan ri sacuví ra cuhva catyi ra.

Vatyi maa ra ña tuhvá ra nasama ra tuhun cahán ra.

Tatu sahá tyiño vaha yo, cuaquita vaha yo

¹⁴ Sanicohun iñi ñu tuhun ihya, ta catyun chí ñu chihin nuu Sutu Mañi yo na sandihí ñu cha cuví yuhu ñu cha ñima ri tuhun. Vatyi cha cuví yuhu ñu tyehe caa, ñahri maa tuhun. Tyi sativí ñu chí ñu tyasohó tuhun cahán ñu. ¹⁵ Saniñun ta cuhva cuendon chuun nuu Nyoo tari noo ra sahá tyiño vaha. Vatyi ñahri cha cucahan nuun tatu chotyíño vahun tuhun ndicha yoso cuhva tahán chí. ¹⁶ Ñaha tyasohun tuhun cha ñima ri tuhun ñayivi ihya. Vatyi ñahri maa tyinyeé chí chí yo. Soco sativí ca chí chí yo nuu Nyoo ¹⁷ vatyi tari quihvi xico ndiyi noo nu cahvi, tyicuan caa cuví tuhun cuan vatyi sativí chí chí yo. Ta cuaha ñu cuativi cha cuenda cuan. Ican cuví cha cuví chí ra Himeneo ta ra Fileto. ¹⁸ Vatyi caquita caxiñ ra ityi vaha ta catyi ra vatyi tari quivi cha yaha nandoto yo ta ma nandoto ca coño ñuhu yo. Ta tyicuan caa satondó ra cuhva chinó iñi suhva ñu. ¹⁹ Ta vasi yihí ñu nducaxiñ ñu, soco Nyoo chacun ra cha ndicha, ta yucuan cuví cha ma nasama maa. Ta nyisó chí noo seña cha catyi: “Sutu Mañi yo ñohó nuu ra chí ñu cuenda ra.” Ta catyi tucu chí: “Tandihí ñu nyisó sivi ra Cristo na quita ñu nu quiñi caa.” ²⁰ Chichi noo vehe cahnu, ñima maa maa ri ndaha tyiño chingó chihin xuhun cuaan ta xuhun cuichin iyó. Iyó tucu cha chino chihin vitu ta chihin nyahu. Yihí cuan chotyíño ñu chí nu vaha, ta yihí cuan cha chotyíño ñu nu ñima ri tuhun. ²¹ Tyicuan caa tucu maa yo tatu ña tiñ cuenda yo tuhun cha ñima ri tuhun ñayivi ihya, cuví yo noo ñáyivi cha chotyíño Nyoo chí, tari noo vaso xuhun cuaan. Ta cuñi chí vatyi cundi vasu cuan, tyicuan ta cuví cotyiño ra chí yo cha cuenda tandihí nuu vaha.

²² Ma caca xiñun tari chicá xiñi ra tyivaa ñayivi ihya. Vatyi maa maa ri cha quiñi caa

chicá xiñi ra. Coo noo ñayivi cuiti. Chino vaha iñun chí Nyoo. Cuñun chí Nyoo ta chí ñáyivi. Coo taxi run chihin tandihí ñu yihí cuenda Nyoo, ñu cha chihin cha vaha añaima chicán tahvi chí Sutu Mañi yo. ²³ Ta ma quichahun tuhun cha ñima ri tuhun cha cuví yuhu ñáyivi. Vatyi chitón tyi chihin cuan cacú tisihi. ²⁴ Ta noo ra sacuví tyiño nuu Sutu Mañi yo, ña tahán chí cañi tuhun ra. Soco tahán chí cha vaha ñáyivi cuví ra chihin tandihí ñáyivi. Ta cuñi chí cha ñihi vaha ra cuhva sañaha ra tuhun Nyoo. Ta cuñi tucu chí cha cama cuví iñi ra chihin ñáyivi. ²⁵ Ta chihin cha masu iñi ra cuñi chí cha sgndundo ra chí ñáyivi ndava iñi. Ta cuatu ra nasama Nyoo cuhva iyó ñu ta nacoto ñu cha ndicha. ²⁶ Ta tyicuan caa ta cunducachi iñi ñu ta cuaquita ñu chichi ndaha ra cuví cuhna vatyi cha vityin nyacuví maa ra yoso cuhva cuñi ra chihin ñu.

3

Yoso caa cucoo ñáyivi nu cuandihí ca quivi

¹ Ta cuñi tucu chí coton vatyi nu cuandihí tyembu cuquichi quivi cha yñi xaan coo yo. ² Vatyi cucoo ñáyivi ñu cuñi xaan suri chí maa. Ta cucuñi xaan ñu xuhun. Ta yaa xaan cucuvi ñu. Ta cahnu cusaha ñu chí ñu. Cucahan ña vaha ñu siqui Nyoo. Ta ma quichaha ñu nu cahán sutu ñu ta sihi ñu. Ma nacuhva ñu tyahvi nyoo chí Nyoo, ni chí tahan ñu. Ma quichaha ñu chí Nyoo. ³ Ma cuñi ñu chí tahan ñu. Ma coo ticahnu iñi chí ñu chihin ñáyivi. Cuñi ñu cuendu. Ma cuví cunyaca ñaha ñu coño ñuhu ñu. Xaan xaan cucuvi ñu. Ta ma cuñi nyehe maa ñu cha vaha. ⁴ Cunaxico tuhun ñu chí tahan ñu. Ta ndava xaan cucuvi iñi ñu. Ta cucañi iñi ñu sacuvi ñu ñáá ndihí cha cuñi ñu. Ta maa maa ri cha quichi cuví iñi ñu cunanducu ñu, ta ma nanducu ñu chí Nyoo. ⁵ Cunyicon ñu noo cuhva tari cha chinó iñi ñu chí Nyoo, soco ña ndicha ñu. Vatyi chasí ñu cha sañahá Nyoo tunyee iñi ra. Ma cutahun chihin ñu caa tyicuan caa. ⁶ Vatyi mahñu ñu ihya iyó ra cha quihvi ra chichi vehe ta sandavi ñaha ra chí ñusihi cha ñahri cha chiñi tuñi xiñi. Ta nyisó ñusihi cuan cuatyí, vatyi nyicón ñu tandihí cha quichi cuví iñi ñu. ⁷ Tyicuan ri cuñi ñu coto ñu tandihí tuhun chaa soco ña cuví cutuñi iñi ñu ñáá cha cuví cha ndicha. ⁸ Ta ñu cucoo cha cahin tuhun ihya, cucuvi ñu tari maa ra Janes ta ra Jambres, ra tasi cha cachiyó ta cha naha. Ta cuñi ra saha canaa ra chí ra Moisés. Ta tyicuan caa tucu ñu cucoo nu cuahan ca chí. Ma tahan iñi ñu sacuvi ñu cha vaha. Quiñi cucaca xiñi ñu. Ta ma chino iñi ñu cha vaha. ⁹ Soco cuhva cunyacuvi ñu ma cuví cutya chí vatyi ña xehe caa tyi cha ñima ri tuhun cuví cha

cusacuvi ñu, tari cha chinyacuvj ra Janes ta ra Jambres.

Nu ndihi tyatyifio ra Pablo chi ra Timoteo

¹⁰ Soco yoho chitó vahun tyi yuhu ñima tyicuan caa iyé. Vaty chitón tuhun cha sañahí, ta cuhva iyé. Ta chitón ñáá cha nanduquí ta yoso cuhva chinó ifi chi Nyoo. Ta chitó tucun yoso caa cunyeé ifi cha cahán ñáyivi chii. Ta chitón yoso cha cuñi chi ñu. ¹¹ Ta chitón yoso caa cunyeé tindoho nu chicán nyicon ñáyivi chii. Chitón cha cuvj chii, tandihi tindoho cha nyehj cha catyi tuhun Nyoo ñuu Antioquia, ta ñuu Iconio, ta ñuu Listra. Soco Sutu Mañi yo sacacj ra chii chichi tandihi cuan. ¹² Cha ndicha cuvj vaty tandihi yo cha cuñi yo coo yo cuhva cuñi ra Cristo Jesús cunyehe yo tindoho saha ñáyivi. ¹³ Soco ñu quiñi iyó ta ñu sandavi ñaha, quiñi xaan ca cunanduvi ñu. Vaty cusandavi ñaha ñu chi ñáyivi ta cusandavi ñaha ñáyivi chi ñu.

¹⁴ Soco yoho sañihun coun chihin cha cuthvon. Vaty chitón yóo cha sañaha chuun ta chitó vahun tyi cha ndicha cuví. ¹⁵ Nya ta ni luhun ta chitón cha nyaá nu tutu tuhun Nyoo. Ta yucuan cuví cha chahá cha cuthvi ca ifiun tacuhva cacun cha cuenda cha chinó ifiun chi ra Cristo Jesús. ¹⁶ Tandihí tuhun cha nyaá nuu tutu Nyoo, ta maa Nyoo chahá. Ta tyinyee xaan chi chi yo nacoto yo yoso caa tahán chi chinó ifi yo. Sañahá chi chi yo cuhva caa yo. Sandundoó chi chi yo. Ta sañahá chi chi yo yoso caa coo yo noo ñáyivi vaha nuu Nyoo. ¹⁷ Tyee caa tyinyee tuhun Nyoo chi yo tacuhva vaty cuví yo noo ra cuiti cuenda Nyoo. Ta cuatu tuhva yo sacuvi yo tandihí cha vaha.

4

¹ Tyatyife chuun nuu Nyoo ta nuu Sutu Mañi yo Jesucristo, vaty maa ra cusandaa ra cuatyí ñu nyitó ta ñu chihj quivi quichi ra cunyaca ñaha ra chihin tunyee ifi ra. ² Çahan tuhun Nyoo chihin ñáyivi. Tyicuan ri sañihun sacuvun. Çahan tuhun Nyoo nuu ñu tatu chahá chi cuhva o vasi ña chahá chi cuhva. Cuhva tuhun chi ñu, çatyí cuhva caa ñu tacuhva cunyicon vaha ñu chi ra Cristo. Ta cuatun nasama ñu cuhva iyó ñu chihin cha cama ifiun. Ta sañahun chi ñu yoso caa tahán chi coo ñu. ³ Vaty coo quivi ma cunye ca ifi ñáyivi tyasoho ñu tuhun vaha. Soco cunducu ñu cuaha xaan ra sacuhva cha sañahá maa maa ri cha tahán ifi maa ñu cuiñi ñu. ⁴ Ta cusacuachiyi xiin ñu cha ndicha. Ta cucuñi ñu cuiñi ñu noo tuhun cha ña ndicha. ⁵ Soco yoho saha cuenda chuun chihin cha vaha chica xiñun. Çunyeun tindoho. Çahan tuhun Nyoo chihin ñáyivi. Sacuvi vahun tyiño chahá Nyoo chuun.

⁶ Yuhu cha cuñi cui ri nacuhva cuende ñáyivi cha cuenda tuhun Nyoo, vaty cha nyaña yatyin tuhun chihí chii. ⁷ Cha cañi tahin tari cuhva tahán maa chi ta cha sandihj tyiño cha chahá Nyoo chii. Ta ña sandihj tuhun cha chinó ifi chi ra. ⁸ Ta vityin nu cuahan ca chi quivi, nyatú tuhva noo cha tahán chi chii cha cuacuhva Sutu Mañi yo chii. Ta ñima chi maa ri mai cuhva ra, soco cuhva tucu ra chi tandihí ca ñu cha nyatú chi ra. Vaty noo ri maa ra cuví ra vaha sacutuñi.

Nonga tyiño tyaa ra Pablo chi ra Timoteo

⁹ Sañiñi ta qujchun cha numi ri, quichi nyehun nu nyaí. ¹⁰ Vaty ra Demas sandivo ra chii vaty cuñi ca ra cha iyó ñáyivi ihya. Ta cuahan ra nya ñuu Tesalónica. Ta ra Crescente cuahan ra nya ityi Galacia. Ta ra Tito cuahan ra ityi Dalmacia. ¹¹ Noo ri maa ra Lucas nyaá chihin. Nanducu chi ra Marcos ta na quichi ra chuhun quivi quichun. Vaty chiñuhú xaan ra chii nu tyiño Nyoo. ¹² Tachj chi ra Tíquico ñuu Éfeso. ¹³ Quivi quichun cujson sahva coon cha sandoj ñuu Troas vehe ra Carpo. Tyicuan caa tucu libri, quihj ndahun quichi. Ta cha niñi ca tuti.

¹⁴ Ra Alejandro ra cañi mityi cuan, cuaha xaan cha ña vaha chinyacuvj ra chihin. Ta maa Sutu Mañi yo cutyiyahvi chi ra cha cuenda cha chinyacuvj ra chihin. ¹⁵ Saha cuenda chuun chihin ra. Vaty xaan xaan cuñi ra sigui tuhun Nyoo cha cahán yo.

¹⁶ Cha xihna ri quivi sacaquj chii nuu ra cuví tyiño, yori maa tyinyee chii. Casandoo noo tuhun maa ra chii. Na saha Nyoo ticahnu ifi chi ra cha cuenda cuan. ¹⁷ Soco Sutu Mañi yo tyinyee xaan ra chii. Ta chahá ra tunyee ifi chii tacuhva cuvj cahan cachi tuhun ra nuu ñu, ta chiñi tandihí ñu cha ñima ñu Israel cuví. Ta sacacj Nyoo chii cha cachi ndicaha chii. ¹⁸ Ta cuasacacu ca ra chii ndaha tandihí cha ña vaha. Ta cuasaha cuenda ra chii nyacua nya nachaa quivi cunyai chihin ra nu nyaca ñaha ra. Chi maa ra na sacahnu yo tyicuan ri maa. Ta na cuví chi tyicuan caa.

Nu ndihi cahán ra Pablo ta chahá ra nocumi chi ñu

¹⁹ Ihya vachi nocumi chi cu Prisca ta chi ra Aquila ta chi ñáyivi chi ra Onesiforo. ²⁰ Ndoq ra Erasto ñuu Corinto. Ta ndoo ra Trófimo ñuu Mileto vaty cuhvi ra. ²¹ Sañihun ta qujchun cha ni cumañi ca chaa yoo vichin.

Vachi nocumi chuun sahá ra Eubulo ta ra Pudente ta ra Lino ta cu Claudia ta tandihí ca ñáyivi tahan yo cuenda Nyoo ihya.

²² Na cunyaa Sutu Mañi yo chuhun. Ta Nyoo na nasoco ra chi tandihí ndo.

Carta Cha Sacuhun Ra Apóstol Pablo Chi Ra Tito

Nu tyaq ra Pablo noo tutu chi ra Tito

¹ Yuhu ra Pablo sacuví tyiño nuu Nyoo. Ta cuví noo apóstol ra Jesucristo, o cuñí chi catyi vatyi tyatyíño maa ra chíi vatyi tyinyei chí ñu nacachí maa Nyoo, na nachino íñi ñu chí ra, ta cohon nuu ñu cha ndicha, ta coo ñu cuhva cuñí Nyoo. ² Ta cuatu tuhva ñu coo ñu ñáyivi chaa cha ma naa ca maa andivi. Vatyi ta ni cumañi ca chino ñuhu ñáyivi ta catyi Nyoo vatyi cucuhva ra noo ñáyivi chaa chí yo. Ta maa ra ña cuendu ra. ³ Ta vityin chaq quivi cha tyaq Nyoo cuhva tyi nacoto yo tuhun ra. Maa ra cuví ra sacacú chí yo, ta chahq ra tyiño chí yuhu cha cahin tuhun ra chihin ñáyivi. ⁴ Sacuhín tutu ihya chuun, Tito, vatyi tari noo sehe vahí cuví chuun cha cuenda tuhun Nyoo, vatyi ñn ri chinó íñi yo chí ra Jesucristo. Cuñí vatyi Nyoo Sutu yo ta Sutu Mañi yo Jesucristo, ra sacacú chí yo, na nasoco ra chuun, ta na nyehe ndahvi ra chuun, ta na coo ca cha taxi ri añimon sahá ra.

Tyiño chahq ra Pablo chi ra Tito tyi sacuvi ra ñuhu Creta

⁵ Sandoj chuun ñuhu Creta vatyi sandaun tyiño Nyoo cha nyaá cundaa. Ta tyjson ra chahnu ra quindaha vehe ñuhu tahan tahan ñuu tari cuhva catyi chuun. ⁶ Vatyi ra nyisó tyiño ihya cuñí chí coo ra noo cuhva cha ma cahan ñáyivi chí ra. Noo ri ñashi ra coo. Ta tandihí sehe ra cuñí chí cha chinó íñi ñu chí Nyoo, ta cachi coo ñu ta ma ndava íñi ñu tacuhva cha ma tyaq ñáyivi cuatyí síqui ñu. ⁷ Vatyi ra yindahá chí ñu yihí cuenda Nyoo, Nyoo tyatyíño cuan chí ra. Yucuan chaha niñi cuñí chí vatyi cuví ra noo ra vaha. Ñima noo ra cahnu sahá chíi, ni ñima noo ra tyityi íñi, ni ñima noo ra tuhvá chíi. Ñima noo ra quixin cuatyí, ni ñima noo ra cuñí xuhun cha ña saha ganaa vaha ra. ⁸ Soco tyicuan ri síi cuví chí ra tatu chaa ñáyivi vehe ra. Ta tahan chí cuhva ra nu coo ñu. Cuñí chí cuví ra noo ra cha sacuví cha vaha. Noo ra chitó yoso caa nyaca ñaha ra chí maa ra. Na cuví ra noo ra ndaa iyó, noo ra sacahnú vaha chí Nyoo. Ta chitó vaha ra cuhva tahán chí sacuví ra ta sñiñi ra sacuví ra. ⁹ Ta cunyicon vaha ra tuhun ndicha cha sañahá yo chí ra. Tyicuan ta coto ra sanduní ra íñi inga ñu chihin tuhun vaha ihya. Ta chí ñu catyi tyi ña ndicha tuhun cahan yo, coto ra yoso caa sañaha ra chí ñu tyi ña vaha cahán ñu síqui tuhun Nyoo. ¹⁰ Vatyi cuaha xaan ra ndava íñi iyó. Cuaha ra cahán cha ñima ri tuhun, cuaha ra sandaví ñaha. Ta cuaha

xaan ca ñáyivi Israel sacuví tyicuan caa. ¹¹ Cuñí chí cha casi yo yuhu ra cuan, vatyi cuaha xaan ñáyivi satondó ra xiñi. Vatyi cha cuenda cha cacuñí ra xuhun ta sañahá ra noo tuhun cha ña tahán chí.

¹² Ta suri maa noo ra Creta, noo ra chíiñi tuñi, ra cahán nuu ñu catyi ra tyehe caa: “Ñu Creta, cuendu xaan ñu. Tari quiti cuví ñu. Cuahyi ñu ta suchan ñu”, catyi ra cuan. ¹³ Ta cha ndicha catyi ra cuan. Yucuan chaha cuñí chí cha cahan ñihun chihin ñu na saña ñu tuhun cuan, tacuhva vatyi vaha na chino íñi ñu chí ra Cristo. ¹⁴ Tacuhva cha ma tyasoho ca ñu tyisu cha ñima ri tuhun cha canasavahq ri maa ñu Israel. Ta ni ma tyasoho ca ñu tuhun cahán ñáyivi cha ña cuñí coto cha ndicha.

¹⁵ Cha cuenda ñáyivi cha vaha chicá xiñi, tandihí ta vaha chí ñu. Soco cha cuenda ñu cha ña chinó íñi ta ña vaha chica xiñi, ñahri maa cha vaha chí ñu vatyi nyacua nya cuhva chicá xiñi ñu ta cuhva tuví íñi ñu ta ña vaha ta quiñi caa. ¹⁶ Catyi ñu vatyi ñohó nuu ñu chí Nyoo, soco chihin cha ña vaha nyacuví ñu nyehé yo tyi ña ndicha ñu. Vatyi quiñi yihí íñi ñu ta ndava íñi ñu. Ta ma cuví sacuví ñu noo cha vaha.

2

Tuhun vaha cha chahq Nyoo tyi sañaha yo

¹ Soco yoho, sañaha tuhun vaha tari cuhva sañahá tuhun Nyoo chí yo. ² Sañahun vatyi ra chahnu, cachi coo ra, tacuhva vatyi na saha ñáyivi ñáyivi chí ra. Ta tyicuan ri cachi caca xiñi ra. Vii cahun ra chihin cha chino íñi ra. Cuñí chí cha cuñí ra chí Nyoo ta chí ñáyivi. Ta cunyeé íñi ra tandihí. ³ Ta tyicuan caa tucu ñu chahnu. Catyi chí ñu na coo ñu noo cuhva cha tahán íñi Nyoo. Ta ma ñi ñu cuendu. Ma coho ñu ndixi. Ta na sañaha ñu cha vaha iyó ñu, ⁴ na nyehe ñu nicaa tandaha. Tacuhva vatyi cuñi ñu chí yíi ñu ta chí sehe ñu. ⁵ Na caca vaha xiñi ñu. Ta sgha vaha ñu cuenda cuhva iyó ñu. Na saha cuenda vaha ñu vehe ñu. Ta vaha ñáyivi cuví ñu. Na cuhva ñu cha cunyaca ñaha yíi ñu chí ñu tacuhva vatyi yori cuví cahan ña vaha síqui tuhun Nyoo.

⁶ Ta tyicuan caa tucu ra tyivaa. Cuhva tuhun chí ra na cacachi coo ra. ⁷ Ta maun cuñí chí cha sañahun maa ri cha vaha chihin cuhva iyón chí ra. Sañahun chí ra chihin cha cachi ta cha ndaa. ⁸ Maa ri tuhun vaha cahun tacuhva vatyi yori cuví tyaq cuatyí sícun. Tyicuan ta ra xaan íñi chí ndo cucahan nuu ra vatyi ma ñihi ra cuhva cahan ña vaha ra síqui ndo.

⁹ Cuhva tuhun chí ra yañi yo ra iyó chítoho, na caquichaha ra chí chítoho ra. Na sacuví vaha ra tandihí cha catyi ra. Ta ma

na cahan ra nu cahan ra. ¹⁰ Ta ma tñin ri maa ra cha chí chitoho ra. Soco na saha vaha ra ñáyiví chí ra, tacuhva vatyi cunyehe ñáyiví vatyi vaha xaan tuhun Nyoo ra sacacú chí yo.

¹¹ Vatyi Nyoo sañahá ra vatyi vaha xaan ñáyiví cuví ra. Ta cuñí ra sacacu ra chí tandihí ñáyiví. ¹² Chihin cuan sañahá Nyoo chí yo vatyi na saña yo cha quiñí caa cha nyacuví ñáyiví ña ñohó nuu chí ra ta cha quichi cuví iñi ñu. Ta cachi coo yo siqui ñuhu ñáyiví ihya, tari cuhva cuñí Nyoo. ¹³ Ta sañahá tucu ra chí yo yoso caa cuatu tuhva yo cha vaha cha cuñihí yo quiví quichi tucu ra Jesucristo. Vatyi cucusií xaan cuñí yo cuhva cha cunyehe yo cha tyaqui quiví quichi ra cuví Nyoo yo ra cahnú ca, ra cha sacacú chí yo. ¹⁴ Chahá ra ñáyiví ra tyiño nuu yo tacuhva sacacu ra chí yo ndaha tandihí cha quiñí caa. Ta sandundií ra chí yo tacuhva na cuví yo ñáyiví cuenda ra, ta cha yaha tuhun cuan cuñí ra vatyi sacuvi yo maa maa ri cha vaha. ¹⁵ Ican ihya cuñí chí sañahun chí ñáyiví. Sanduniun iñi ñu. Ta çahun nuu ñu chihin ndusu yuhu Nyoo tatu ña vaha sacuvi ñu. Ta ma sacuvun ni noo cha ña vaha. Tyicuan ta ma cuví ñihí ñu cuhva cahan nyaa ñu chuun.

3

Cuhva cha tahán chí sacuvi ñu yihí cuenda Nyoo

¹ Sañicohun iñi ñu tahan yo cuenda Nyoo na quichaha ñu chí gobiernu ta chí ra cacuví tyiño. Ta chihin cha ñi iñi ñu na sacuvi ñu ñáá tyiño vaha cha catyí ra cuví tyiño tyi sacuvi ñu. ² Ta ma cahan ña vaha ñu siqui ni noo ñáyiví. Na taxi ri coo ñu. Vaha ñáyiví na cuví ñu. Na masu cuví aña ñu chihin tandihí ñáyiví.

³ Vatyi nyacua nya maa yo ta tyicuan caa cuví yo ta ityi chata ca. Tondo xaan chiyo yo. Ta ndava xaan cuví iñi yo. Ñahri noo ityi vaha chicá noo yo vatyi ra cuví cuihna sandahví ñaha ra chí yo. Chinyacá ñaha cuhva ña vaha cha cuñí coño ñuhu yo chí yo. Ta chinyacuví yo tandihí maa cuhva cuñí chí. Tandihí cha iyó chí inga ñáyiví ta cuñí yo coo chí yo. Tasi cuñí yo nyehe yo chí tahan yo. Ta ñáyiví ña cuñí nyehe ñu chí yo. ⁴ Soco Nyoo vaha ñáyiví cuví ra ta sacacú ra chí yo. Yucuan cuví nu sañahá ra vatyi cuñí ra chí tandihí ñáyiví. ⁵ Ñima cha cuenda cha cachi iyó yo ta sacacú ra chí yo, soco cha cuenda cha ndahví cuñí ra nyehe ra chí yo. Ta chihin ñihí ra Jesús nacatya yo cuatyí yo ta nacacú chaa yo, ta chahá Tatyí lí ra noo ñáyiví chaa coo yo. ⁶ Ta chahá xaan Nyoo cha coo Tatyí lí ra aña yo cha cuenda maa ra Jesucristo ra sacacú chí yo. ⁷ Chihin tumañi iñi cha chahá ra chí yo ta

sacuvaha ra chí yo nuu ra. Ta vityin nyatú yo cunanyehe yo noo cha cha yaha chahá ra chí yo, noo ñáyiví cha ma naa ca maa. ⁸ Tandihí tuhun ihya ndicha xaan. Ta cuñí vatyi cahun tuhun ihya nuu ñu chinó iñi chí Nyoo chihin cha ñi iñun, tacuhva na saha cuenda ñu chí ñu, ta sacuvi ñu cha vaha. Vaha xaan tuhun ihya, ta cuatyinyee chí chí tandihí ñáyiví tatu quichahá ñu. ⁹ Soco ma tyasohun nu cuví yuhu ñu tuhun cha ñima ri tuhun. Ma tyasohun tuhun cahan ñu vatyi ñu cuan ñañí xaan cuñí ñu coto ñu yoso caa vachi tata yo. Ma quichahun chí ñu cañí tahan cha cuenda ley cha tyaá ra Moisés ta cha naha. Ñahri maa tyinyee cuan. Cha ñima ri tuhun cuví.

¹⁰ Tatu iyó ñu cuñí ñu sacusií ñu chí ñu nyicu vehe ñuhu, çana chí ñu noo chaha o uvi chaha ta çatyí chí ñu tyi ña vaha sacuví ñu. Ta tatu ña quichahá ñu, çasi nu quichi ñu. ¹¹ Vatyi ma chihin yucuan ri chitón vatyi ña vaha aña ñu tatu tyicuan caa nyacuví ñu. Chicoo cuatyí ñu. Ta suri maa ñu sacunaá ñu chí ñu.

Tyiño tyaá ra Pablo chí ra Tito

¹² Cutachi chí ra Artemas, o chí ra Tíquico nu nyaún. Quiví chaa ra, nducu cuhva ta çahun ñuu Nicópolis vatyi cuñihí tahan yo yucuan. Vatyi tyaá cuhva cuyahi yoo vichin yucuan. ¹³ Nducu cuhva tyinyeun chí ra Zenas ra chitó xaan ley, ta chí ra Apolos ta çuhva cha chíñuhú chí ra nu cachicá noo ra tuhun Nyoo. ¹⁴ Na cutuhva ñu yihí cuenda Nyoo sacuvi ñu cha vaha ta tyinyee ñu tatu iyó cha cumañi chí inga ñu. Tyicuan ta ña caha ri nyicón ñu chí Nyoo.

Nu ndihí cahan ra Pablo

¹⁵ Tandihí ra nyicu chihin, chahá ra nocumí chuun, Tito. Ta na cuhva nocumí chí tandihí ñu cuñí chí ndi cha cuenda cha ñin ri cuví yo cuenda Nyoo. Na nasoco Nyoo chí tandihí ndo.

Carta Cha Sacuhun Ra Apóstol Pablo Chî Ra Filemón

Nu tyaq ra Pablo noo tutu chi ra Filemón

¹⁻² Yuhu ra Pablo ta ra Timoteo yañi yo, tyaá ndi tutu ihya chi yoho, Filemón, tyi ra tahan ndi nu tyiño Sutu Mañi yo cuvún. Ñohí vehe caa ihya cha cuenda ra Jesucristo ta sacuhún ndi tutu ihya chuun ta chi ra Arquipo, ra cuví sindaro ra Jesucristo chihin yo, ta chi cu Apia, ta chi tandihi ñu ndu ñin ri vehun. ³ Na nasoco Nyoo Sutu yo ta Sutu Mañi yo Jesucristo chi ndo. Ta na coo cha taxi ri cuñi añima ndo sahá ra.

Nu catyi ra Pablo vatyí ra Filemón vita xaan iñi ra ta chino vaha iñi ra chi Nyoo

⁴ Tyicuan ri nacuhvé tyahvi nyoo chi Nyoi cha cuendon nu nichón iñi tuhun, nu chícán tahvi chi ra. ⁵ Vatyí ñihí tuhun tyi chinó vaha iñun chi Sutu Mañi yo Jesucristo, ta cuñi xaan chi ra ta chi ñu yihí cuenda ra. ⁶ Ñáyivi cha sacotón yoso caa cuhva chinó iñun chi Nyoo, nachinó iñi tucu maa ñu chi ra ta vityin chícán tahvi cha cuenda ñu, na coto vaha ñu tandihi cha vaha cha chahá Nyoo chi yo cha cuenda ra Cristo Jesús. ⁷ Sii xaan cuñi, ta vaha xaan cuñi añime vatyí cuñi xaan chi ñu tahan yo, ta sandunyeún iñi ñu.

Nu chícán ra Pablo noo tumañi iñi chi ra Filemón cha cuenda ra Onésimo

⁸ Vasí iyó chi ityi chii cha catyi chuun ñáá cha tahán chi sacuvun vatyí apóstol cuví, soco ña cuñi saniñi chuun. ⁹ Vaha ca cha caquen noo tumañi iñi chuun cha cuenda cha cuñi yo chi Nyoo vatyí yuhu ra chahnu cuví ta ñohí vehe caa cha cuenda ra Cristo Jesús. ¹⁰ Chiquén noo tumañi iñi chuun cha cuenda ra Onésimo vatyí nanduví ra sehi cha cuenda Sutu Mañi yo nu ñohí vehe caa ihya.

¹¹ Quívi cuan musu cuví ra chuun, ta chaha xaan ra tisihi, soco vityin musu vaha cuví ra, tyi vaha sacuví ra tyiño nui ta tyicuan caa tucu cusacuví vaha ra tyiño nuu maun. ¹² Ta vityin sacunuhí chi ra chuun. Ta cuñi vatyí ñaquehen cuenda vahun chi ra tari cha mai cuví. ¹³ Vasí cuñi cha ndoo ra ihya chihin, ta tyinyee ra chii tyiño nuu maun cha niri ca cha ñohí vehe caa cha cuenda tuhun Nyoo, ¹⁴ soco ña cuñi cha ndoo ra tyiño nuun tatu ña ndoun vaha, vatyí tacuhva sacuvun tumañi iñi chii soco chihin cha iyó vaha iñun ta ñima ca chihin cha saniñi chuun. ¹⁵ Ra Onésimo chahá xaan ra tisihi chuun quívi cuan, soco vaha

xaan nanduví ra vityin, vasí yucuan cuenda canyahá ra chuun ta vityin nachaa ra nu nyaún vatyí cuacunyaa ra chuhun tyicuan ri maa ¹⁶ soco ñima tari noo musu ri, soco tari noo ra vaha ca. Vatyí yañi yo cuví chi ra. Ta cuñi xain chi ra, ta vihi ca yoho, tahán chi cha cuñi con chi ra. Vatyí ñima noo yañun cuenda coño ñuhu ri cuví chi ra. Soco yañun cha cuenda Sutu Mañi yo cuví chi ra ñandihi.

¹⁷ Tatu ndicha cha ra tahun cuví chii, cuñi vatyí ñaquehun chi ra Onésimo tari cha chi yuhu ñaquehún. ¹⁸ Tatu iyó cha sacuví ra chuun, o tatu yosoyicá ra chuun, tyiyahvi mai. ¹⁹ Yuhu ra Pablo tyai tuhun ihya vatyí cutiyahvi cha yosoyicá ra chuun, cha nuu cha tahán chi catyi chuun vatyí yosoyicón nyacua nya ñayivun chii. ²⁰ Chiquén chuun, yañi, na sandusiun iñi ta ñaquehun chi ra Onésimo chihin cha vaha. Sanduchaa añime chihin cha ñin ri cuví yo cha cuenda ra Cristo.

²¹ Tyaí tutu ihya chuun vatyí chité tyi cuaquichahun tuhun cahín. Ta chité vatyí ñima yucuan ri, soco cuaha ca cuasacuvun. ²² Ta nonga cha chiquén chuun tatu ma sanduvahun chii noo nu cuví cunyai chihin ndo. Ta cuñi vatyí çacan tahvun cha cuende, na cuhva Nyoo cha cuhin nu nyaá ndo.

Nu ndihi cahán ra Pablo ta chahá ra nocumi chi ñu

²³ Vachi nocumi chuun sahá ra Epafras, ra ñoho chihin vehe caa cha cuenda ra Cristo Jesús. ²⁴ Ta vachi tucu nocumi chuun sahá ra Marcos, ta ra Aristarco ta ra Demas, ta ra Lucas, ra catyinyeé chii chihin tyiño Nyoo.

²⁵ Na nasoco Sutu Mañi yo Jesucristo chuun. Ta na cuví chi tyicuan caa.

Carta Cha Chino Cha Cuenda Ñáyivi Israel, Ñu Cahán Sahan Hebreo

Nyoo cahán ra chihin yo chihin yuhu Sehera

¹ Ta tyembu chahnu cahán Nyoo cuaha xaan chaha, ta cuaha xaan cuhva, chihin sutu chahnu yo, ñu chiyo ta cha naha. Cahán ra chihin yuhu ra cacuvi profeta, ra cha cachahá cuenda tuhun cahán ra. ² Ta vityin nu cua ndihi tyembu ihya, cahán ra chihin yo chihin yuhu Sehe ra. Ta tandihi maa ta natyaá ra ndaha Sehe ra. ñin ri cuví ra chihin Sehe ra ta savahá ra ñuhu ñáyivi. ³ Cha cahnu ta cha tyaqui cuví Nyoo iyó chi Sehe ra, vatyí suri ican ra cuví maa maa xiñahñu Nyoo. Ta chihin tunyee ñiñi tuhun cahán ra, nyisó cuenda ra tandihi cha iyó. Ta cha yaha sandachí ra cuatyí yo, ta chicunyaá ra chiyo vaha Nyoo, ra cha cahnu ca cuví. Ta vityin nyacá ñaha ra chihin ra nya andivi.

Cahnu ca cuví Sehe Nyoo ta ñima ca ángel

⁴ Ta tyicuan caa cahnu xaan ca nanduví Sehe Nyoo ta ñima ca tandihi ángel. Ta cahnu ca sivi chahá Nyoo chí ra ta ñima ca ángel cuenda ra. ⁵ Vatyí Nyoo ña catyí ra ni noo chaha chí ni noo ángel tyehe caa: Yoho cuvún Sehi.

Ta yuhu chahí ñáyivi coun vityín. Ta ni ña cahán ra tuhun ni noo ángel tyehe caa:

Yuhu cucuvi Sutu ra.

Ta maa ra cucuvi Sehi.

⁶ Soco quivi saquichí Nyoo chi Sehe nuu ra siqui ñuhu ñáyivi, catyí ra:

Na sacahnu tandihi ángel cuende chi ra.

⁷ Ta cahán tucu ra tuhun ángel cuenda ra ta catyí ra:

Sacuví vatyí tatyí cuví ángel cuende, ta tari yaa ñuhu cuví ra sacuví tyiño nui, catyí Nyoo.

⁸ Soco tuhun Sehe ra catyí ra tyehe caa:

Nyoo cuvún, ta cua cunyaca ñahun tyicuan ri maa chihin cha ndaa ta chihin cha ndicha.

⁹ Vatyí cuñún cha vaha ta cutasi cuñún cha ña vaha.

Yucuan chaha vatyí yuhu, ra cha cuví Nyoo cuendon, cuaha ca tusi ñiñi chahí chuun, ta ñima ca chí ra tahun.

¹⁰ Ta catyí tucu Nyoo chí Sehe ra tyehe caa: Yoho, ra nyacá ñaha cuvún. Ta quivi xi-hna ri savahun ñuhu ñáyivi ta chihin ndahun savahun andivi.

¹¹ Maa ñuhu ñáyivi ta andivi cundihí chí, soco yoho, cundoun tyicuan ri maa.

Tandihí maa cuan cu cuchahnu tari sahna.

¹² Ta cunicava tahnu chí tari noo vestido.

Ta cunasama chí tari nasamá ñáyivi sahna ñu.

Soco yoho suri maa ra cuvún tyicuan ri maa. Ta ma ndihí maa ñáyivun, catyí Nyoo chí Sehe ra.

¹³ Nyoo ni noo chaha ña catyí ra chí ni noo ángel tari catyí ra chí Sehe ra tyehe caa:

Cunyaun chiyo vahí nyacua nya cha caquin chí ra xaan ñiñi chuun chahun.

¹⁴ Soco tandihí ángel, tatyí cacuví ra ta tyaa Nyoo tyiño chí ra cha caca ra ta tyinyee ra chí ñu cucacu añima.

2

Cahnu xaan cuví tuhun cha sacacú Nyoo añima chí yo

¹ Yucuan chaha vatyí cuñí chí cha quichahá xaan ca yo tuhun ndicha cha chiñi yo, coto cunuho yo ityi quiñi caa. ² Ta cha naha catyí Nyoo chí ángel, na cuhva ra ley ra chí ra Moisés. Nyoo catyí ra tyi tahán chí quichaha ñáyivi. Ta ñu casacuví cuatyí ta ña quichahá ñu ley ra, tachí tuñi ra chí ñu tari cuhva catyí maa ley cuan. ³ Cahnu xaan cuhva sacacú Nyoo añima yo. ¿Yoso caa cucacu añima yo tatu sacunaa yo cuhva cuan? Cha xihna ri suri maa Sutu Mañi yo Jesucristo cahán ra tuhun yoso caa cuví cacu añima yo. Ta yaha cuan ta ñu cha cachihíñi tuhun cahán ra, chitó ñu tyi ndicha ta canacatyí tucu ñu chí maa yo. ⁴ Ta siin ri, Nyoo sañaha cachi ra chí yo chihin cuaha milagru ta cha iyo, vatyí ndicha cha sacacú ra chí yo. Ta chahá ra Tatyí li ra chí yo siin siin cuhva, yoso cuhva cha cuñi maa ra. Ta chihin tandihí cuan sañaha ra chí yo vatyí ndicha cha sacacu ra añima yo.

Ra Jesucristo cuví ra cha cua sacacu añima yo

⁵ Nyoo, ña chahá ra cha cunyaca ñaha ángel chí ñuhu ñáyivi chaa cha cahán yo tuhun vityin. ⁶ Vatyí iyó noo nuu cahán chí nu tutu Nyoo tyehe caa:

Nyoo Suti ¿yóó ra cuví rayi vatyí nichon iñun tuhun ra?

¿Yóó ra cuví Sehe ra vatyí tñin cuendon chí ra?

⁷ Vatyí suhva quivi, ndahvi ca sacuvun chí ra, ican saha ángel.

Soco yaha cuan sacahñu xaun chí ra. Ta sahá xaan ñáyivi chí ra.

Ta chahun cha cunyaca ñaha ra siqui tandihí cha savahun.

⁸ Tandihí cuan natyaun ndaha ra.

Tandihí maa, Nyoo chahá cha cunyaca ñaha ra, cuví chí cuan. Soco nyehé yo vatyí cumañi ca quichaha tandihí cuan chí ra.

⁹ Soco nyehé yo chí ra Jesús vatyí suhva ri quivi, sanocueñ Nyoo chí ra ican saha chí

ángel. Soco cha cuenda cha cuñi xaan Nyoo chi yo, chaha cuenda ra chi ra Jesús cha cúvi ra cha cuenda tandihi yo. Ta vityin sahá xaan Nyoo ñáyivi chi ra ta sacahnú xaan ra chi ra cha cuenda tindoho cha nyehe ra quívi chihj ra.

¹⁰ Tandihí maa cha iyó, cha cuenda maa Nyoo cuví. Ta maa ra savaha. Ta cuñi ra vatyí tandihí sehe ra ta chi maa ñu cucuvi tandihí cha tyaqui cha iyó gloria. Ta chihin tindoho cha sanyehe ra chi ra Jesucristo Sehe ra, sacuvaha ra chi ra. Vaha xaan quita ra. ¹¹ Sehe Nyoo cuví chi ra Cristo, ra sacacú añima ñáyivi. Ta suri sehe Nyoo nanduví chi ñáyivi ñu chinó iñi chi ra. Yucuan chaha vatyí ña cucahan nuu ra Cristo catyí ra yañi ra chi ñu, vatyí ñn ri sutu ra chihin ñu. ¹² Vatyí catyí ra Cristo nu tutu Nyoo tyehe caa:

Cucahin tuhun maun chihin yañi.
Ta cucate yaa cuendon nu ndú ñn ri ñu.

¹³ Catyí tucu ra tyehe caa:
Yuhu cuíta iñi chi Nyoo.

Ta catyí tucu ra:
Ihya nyai chihin sehi, cha chaha Nyoo chi, catyí ra.

¹⁴ Ta tandihí yo cha cuví yo sehe ra, coño ñuhu cuví yo ta yihí niñi yo, yucuan chaha ra Jesús ñandihí, suri coño ñuhu ta niñi ñáyivi nyiso ra suhva quívi, tacuhva cuví chaa tuhun chihí chi ra, ta tyicuan caa ta sataní ra chi cuihna, ra cha chiyó tunyee iñi chi cha cahñi chi ñáyivi. ¹⁵ Ta tyicuan caa sacacú ra chi ñu cha yuhví chi tuhun chihí. Chiyó ñu tari noo musu ra ña vaha vatyí yuhví ñu cha cúvi ñu. ¹⁶ Cha ndicha vatyí ña quichí tyinyee ra chi ángel, soco chi ñáyivi tata ra Abraham quichí tyinyee ra. ¹⁷ Yucuan chaha cuñi chi cha nduví ra tari ñáyivi, tacuhva cuví ra noo ra ndicha cundahvi cuñi chi yo. Ta tyicuan caa cuví ra tata sutu cahnú cha cuenda yo nuu Nyoo. Ta tyicuan caa ta sacuahiyó ra cuatyí ñáyivi cha cuenda tindoho cha nyehe ra. ¹⁸ Vatyí maa maa ra nyehe tindoho quívi nducú nyehe ra ña vaha chi ra, yucuan chaha, vityin cuví tyinyee tucu ra chi maa yo tatu nducú nyehe ra ña vaha chi yo.

3

Cahnú ca cuví ra Jesús ta ñima ca ra Moisés

¹ Yañi, nyoho chaha cuenda ndo chi ndo chi Nyoo. Ta cuví tucu ndo ñu cha nacana Nyoo chi vatyí coo ndo chihin ra andivi. Ta cha cuenda cha nyehe ra Cristo Jesús tindoho tyiño nuu ndo, yucuan chaha, nyehe vaha ndo cuhva vaha iyó ra. Vatyí ican ra cuví ra cha saquichí Nyoo chi vatyí cuví ra tata sutu cahnú cuenda yo cha chinó iñi yo tuhun Nyoo. ² Ta maa ra quichaha

ra tandihí cha catyí Nyoo cha sacuvi ra, tari quichaha tucu ra Moisés ta cha naha, ta sacuvi ra tyiño cha tahañ chi sacuvi ra nuu ñáyivi sehe Nyoo. ³ Ta ra Jesucristo cahnú ca ra cuví ra, ta ñima ca ra Moisés. Vatyí noo ra cha savahá vehe, cahnú ca cuví ra ta ñima ca maa vehe cuan. ⁴ Tahan tahan vehe, iyó ra savaha chi chi, soco Nyoo cuví ra cha savaha tandihí maa cha iyó. ⁵ Ra Moisés, quichaha vaha ra chi Nyoo ta sacuvi ra tyiño nuu ra cha cuenda ñáyivi Israel ta cahañ ra tuhun cha cusacoto Nyoo nu cuahan ca chi ityí nuu. ⁶ Soco ra Cristo ra cuví Sehe Nyoo, suri quichaha vaha ra chi Nyoo ta ican ra nyacá ñaha vehe Nyoo. Ta vehe cuan ican cuví maa yo, tatu saní ca yo iñi yo cuhun yo ityí nuu chihin Nyoo ta itá iñi yo chi ra nyacua nya nu ndihí, ta tyicuan ri cusí cuñi yo nyatú yo cha cuñihí yo.

Ñu chinó iñi chi Nyoo, nyitatu ñu chihin Nyoo

⁷ Yucuan chaha cuñi chi saha cuenda yo chi yo, tari catyí Tatyí Ii Nyoo nuu tutu Nyoo tyehe caa:

Tatu chiñi ndo tuhun cahañ Nyoo chihin ndo vityin,

⁸ ma sandava ndo añima ndo, tari sacuvi ñu ña quichaha chi Nyoo quívi canducú nyehe ñu chi ra nu chica noo ñu chiqui ndi cuan.

⁹ Tyehe caa catyí Nyoo: Ñáyivi cuan nducú nyehe ñu chií,

vasi chichi cha uvi xico cuiya nyehe ñu cha sacuvi.

¹⁰ Yucuan chaha cuxajin chi ñu, ta catyí tyehe caa: “Tyicuan ri chicá uvi iñi ñu,

ta ña cuñi ñu coto ñu ityí mai.”

¹¹ Yucuan chaha cuxajin chi ñu, ta catyí cachi chi ñu,

vatyí ma quihvi ñu nyitatu ñu chihin, catyí Nyoo.

¹² Yañi, saha ndo cuenda chi ndo coto cu ña vaha añima ndo ta coto yoso ri caa ta sandoo ndo chi ra cuví Nyoo nyitó cha cuenda cha ña chinó ca iñi ndo chi ra. ¹³ Soco saní ndo iñi tahan ndo tahan tahan quívi, cha ni ri ca cha chahá ca chi cuhva vityin, tacuhva vatyí ni noo ndo ta ma sandavi ñaha cha quiñi caa chi ndo, ta ndundava añima ndo. ¹⁴ Vatyí tatu saní yo iñi yo chihin Nyoo nyacua nya nu ndihí ñáyivi, yucuan ta ñn ri cuñihí yo cha vaha chihin ra Cristo.

¹⁵ Catyí chi nu tutu Nyoo vatyí saha yo cuenda chi yo tyehe caa:

Vityin tatu nyoho ta chiñi ndo cha catyí Nyoo.

Ma sandava xaan ndo añima ndo, tari sacuvi ñu ña quichaha chií, catyí Nyoo.

¹⁶ ¿Yóo ñu cha cachiñi tuhun cahañ Nyoo ta ña tyasohó ñu? Tandihí ñu Israel cha tava

ra Moisés Egipto ta cha naha, ican ñu cuan. ¹⁷ Ta *zyóo* chí cuxaḡan Nyoo chichi cha uvi xico cuiya? Suri chí ñu cuan, ñu cha chicoḡ cuatyí. Ta cachihí ñu nu chiqui ndiḡ nu chica noo ñu. ¹⁸ *z*Ta *yóo* chí catyí cachi Nyoo tyi ma quihví ñu, cunyitatu ñu chihin ra? Chí ñu cha ña tyasohḡ nu cahán ra. ¹⁹ Nyehe yo vatyi ña cuví quihví ñu cuan vatyi ña chingḡ iñi ñu chí ra.

4

¹ Yucuan chaha, cha ni ri ca cha iyó ca quivi cuví quihví yo cunyitatu yo chihin Nyoo, cuñí chí saha yo cuenda coto ma cuví quihví nya noo nyoho nu cunyitatu yo chihin Nyoo. ² Vatyi chíñi tucu yoó tuhun Nyoo cha sacacú ra añima yo, tari chíñi maa ñu Israel cuan. Soco ñahri maa tuhun cha chíñi ñu, vatyi chíñi ndiḡ ri maa ñu, ta ña chingḡ iñi ñu. ³ Soco yoó cha chinó iñi yo, ican yo cuví ñu quihví nyitatu chihin Nyoo. Ta cha cuenda ñu ña chinó iñi cuví chí tari catyí Nyoo tyehe caa:

Yucuan chaha cuxajḡn chí ñu ta catyí cachi chí ñu vatyi ma quihví ñu nyitatu ñu chihin, catyí Nyoo.

Soco cha nyaá nu nyitatu yo chihin Nyoo vatyi nyitatu Nyoo cha sandihí ra tyiño sahá ra nyata savahḡ ra ñuhu ñayivi. ⁴ Vatyi yihí nu catyí chí nu tutu Nyoo cha cuenda quivi cu ucha nu ndihí vitya. Tyehe caa catyí chí: Nyoo nyitatu ra nu cu ucha quivi, vatyi ndihí tyiño sahá ra.

⁵ Ta inga tucu chaha catyí chí nu tutu Nyoo tyehe caa:

Ni noo quivi ma quihví ñu nu cunyitatu ñu chihin, catyí Nyoo.

⁶ Ñu cuan, ñu cha xihna ri cachihí tuhun cha sacacú Nyoo añima yo, ña quihví ñu cha cuenda vatyi nacahnḡ ñu nu cahán Nyoo. Soco nyaá cha quihví inga ñu. ⁷ Vatyi cha yahḡ nacahnḡ ñu Israel cuan nu cahán Nyoo, natyaḡ tucu ra kuhva vatyi nya inga quivi cuví quihví yo cunyitatu yo chihin ra, ta ican cuví quivi vityin. Ta cahán Nyoo tuhun quivi vityin chihin cha catyí ra David. Nyaá chí nu tutu Nyoo tyehe caa:

Vityin tatu nyoho ta chíñi ndo cha catyí, Ma sandava xaan ndo añima ndo, catyí Nyoo.

⁸ Tyehe ta chinyacḡ ra Josué chí ñu Israel cuan nu cunyitatu ñu chihin Nyoo, ma cahan ca Nyoo inga chaha tuhun cha cuenda inga quivi. ⁹ Soco nyaá ca nu cuví nyitatu ñu yihí cuenda Nyoo chihin ra. ¹⁰ Vatyi ñu quihví nyitatu chihin Nyoo, ña chicá ca iñi ñu soco nyitatu añima ñu tari nyitatu Nyoo quivi ndihí tyiño saha ra. ¹¹ Cuñí chí saniñi yo chinó iñi yo chí Nyoo tacuhva cuví nyitatu yo chihin ra, coto yoso ri caa nya

noo nyoho sacuvi ndo tari sacuví ñu Israel cuan vatyi ña cuñí ñu chino iñi ñu chí ra.

¹² Vatyi tuhun Nyoo, nyitó chí, ta iyó tunyee iñi chí chí. Ta xaan ca chí ta ñima ca mityi cha xaan ninduvi chiyo yuhu, ta nyee chí nyacua nya chichi añima yo ta nyacua nya chichi cha chíñi tuñi xiñi yo, nyacua nya chichi tuhun xehe cha caá añima yo. Ta sañahá cachi Nyoo ñáá cha chicá iñi yo ta ñáá cha caá añima yo tatu vaha o ña vaha.

¹³ Ñahri maa cha savahḡ Nyoo ta cuví tixehe nuu chí chí ra. Tandihí maa ta nyehe ra. Ta chí ra nyaá nacuhva cuenda yo cha sacuví yo.

Ra Jesús cuví ra tata sutu cahnu cha cahán chaha yo nuu Nyoo

¹⁴ Ra Jesús Sehe Nyoo, cuví ra tata sutu cahnu cha cuenda yo, vatyi quihví ra nuu Nyoo ta cahán ra chaha yo. Yucuan chaha cuñí chí cha ma sandihí yo cha chinó iñi yo chí ra. ¹⁵ Vatyi ra cuví tata sutu cha cuenda yo cuví naquehen ndahví ra chí yo tatu cuihya cuñi yo chihin Nyoo, vatyi chitó tucu maa ra cha cuví tindoho cha nyehe yo vatyi nyehe tucu maa ra tandihí nuu tindoho, sahá ra ña vaha cha nducú nyehe ra chí ra, soco maa ra Jesús, ñahri cuatyí ra chicoḡ. ¹⁶ Yucuan chaha cuví tuhva yo nuu nyaá Nyoo ta cahan yo chihin ra chihin cha ña yuhví yo vatyi cuñí xaan ra chí yo, ta ndahví cuñi ra nyehe ra chí yo. Ta cha cuenda cha vaha ñayivi cuví ra, tyinyee ra chí yo nu nyehe yo tindoho.

5

¹ Tandihí ra cuví tata sutu cahnu ca cuenda ñu Israel, ñayivi cuví ra. Ta na cachí Nyoo chí ra vatyi cahan ra chaha tandihí ñu nuu Nyoo, ta kuhva cuenda ra cha chahá ñu chí Nyoo, ta cahni ra quiti cha cuenda cuatyí ñu. ² Ta suri vachi quivi ndahví cuñi ra cacuví sutu cha nducú nyehe ra ña vaha chí ra, yucuan chaha cuví cundahví cuñi ra nyehe ra chí ñayivi ña chitó maa, ta tyinyee ra chí ñu quita caxiin ityi vaha Nyoo, na ndu uvi iñi ñu cuatyí ñu. ³ Ta cha cuenda cuatyí maa ra ta cha cuenda cuatyí ñayivi, cachahni ra quiti ta chahá cuenda ra chí Nyoo na cahnya ra cuatyí ñu.

⁴ Yori sacuvi ri maa sutu chí. Maa Nyoo cuví ra canḡ chí ra, ta chahḡ ra cha cuví ra tata sutu, tari sacuví ra chihin ra Aarón ta cha naha. ⁵ Ta tyicuan caa tucu ra Cristo, ñima maa ra sacuví ra sutu chí ra, soco maa Nyoo chahḡ cha cuví ra, tari catyí maa ra tyehe caa:

Yoho cuví Sehi.

Yuhu chahí ñayivi coun vityin, catyí Nyoo chí ra Cristo.

⁶ Tari catyí tucu ra chí ra nu inga nu cahán chí tyehe caa:

Yoho cuvún tata sutu tyicuan ri maa.

Cuvún tari ra Melquisedec.

⁷ Ta qiví chiyó ra Cristo ihya síqui ñuhu ñáyiví, chican tahvi ra chi Nyoo, ta chacu chaa ra ta cahán ra chihin Nyoo vatyi ican ra cuví ra iyó tunyee ifi chii cha sacacú chi ra ndaha tuhun chihí. Ta Nyoo chiñí ra tuhun cahán ra vatyi sacuví ra tandihí cha catyí Nyoo. ⁸ Yucuan chaha vasi Sehe Nyoo cuví chi ra Cristo, soco cutuhva ra cha quichaha ra chi Nyoo chihin cha nyehe ra tindoho. ⁹ Ta cha yaha cha sacuvaha Nyoo chi ra, tyicuan ta cuví ra ra sacacú añima ñáyiví tacuhva coo ñu chihin Nyoo tyicuan ri maa, tandihí ñu cha quichahá tuhun cahán ra. ¹⁰ Vatyi Nyoo tyaq tyiño chi ra cha cuví ra tata sutu cahnu, tari ra Melquisedec.

Yica xaan cha sandihí yo cha chinó ifi yo tuhun Nyoo

¹¹ Cuaha xaan nyaá cahan yo síqui tuhun ihya, soco yí xaan nacatyí yoso caa cuahan, vatyi nyoho ña cuñí ndo cutuñí ifi ndo. ¹² Cha naha xaan chinó ifi ndo chi Nyoo, cuñí chi cha cuví ndo ra sacuahá ta sañaha ndo chi inga ñu. Soco nyoho ni cuñí chi cha nacatyí tucu ndi inga chaha chi ndo tuhun cha xihna ri chiñí ndo tuhun Nyoo. Tari cha lee cuví ndo chihin tuhun Nyoo, vatyi tari cha chaxin ca ndo cha nuu cha cachi ndo nyayu. ¹³ Ta ñu cuví tari cha lee cha chaxin, ta chaa ca ñu cutuñí ifi ñu yoso caa coo vaha ñu nuu Nyoo. ¹⁴ Soco nyayu vaha cuví chi cha cuenda ñu chahnu chihin tuhun Nyoo: ñu cha cutuñí vaha ifi tuhun ra, nacotó ñu nya cha vaha ta nya cha ña vaha.

6

¹ Yucuan chaha ma ndoo ri yo chihin cha xihna ri cutuhva yo tuhun ra Cristo, cahun yo ityi nuu ca tacuhva cuví yo ñáyiví chahnu chihin tuhun Nyoo. Ma ndoo ri yo chihin tuhun cha yaha cutuhva yo, ta cuñun tuhun cha ma nducu yo cuhva cha cuvaha yo nuu Nyoo chihin cha sacuví yo cha vaha, ta tuhun nachino ifi yo vatyi sacacú Nyoo chi yo. ² Ma ndoo yo chihin tuhun cha yaha sacuví yo, tari cha condutya yo, tari cha tyisó yo ndaha yo síqui ñu chinó ifi chi Nyoo na nasoco ra chi ñu, tari tuhun cha cunandoto tandihí ñáyiví cha yaha chihí, ta tari tuhun cha cucutuñí chi tandihí ñáyiví nuu Nyoo ta yihí ñu cahun ñu anyaya tyicuan ri maa. Ma ndoo ri yo chihin tandihí cuan. ³ Soco tatu Nyoo ta chaha ra, sacuví yo ihya: cahun yo ityi nuu ca.

⁴⁻⁶ Vatyi ñu cha yaha naquehen cuenda cha ndichin Nyoo noo chaha, chitó ñu cha chahá Nyoo, ta nyaá Tatyí Ii Nyoo chihin ñu. Ta cha chitó ñu yoso caa cha vaha tuhun Nyoo, ta cha ñihí ñu tunyee ifi Nyoo.

Ta chihin tunyee ifi cuan cunyaca ñaha Nyoo ñuhú ñáyiví chaa. Tatu cha yaha naquehen cuenda ñu tandihí cha vaha cuan noo chaha, ta yaha cuan ta sandihí ñu cha chinó ifi ñu chi Nyoo, ma cuví ca cha ndu uvi ifi ñu inga chaha. Vatyi suri maa ñu tari cha tyaá ñu chi ra Cristo nu cruzi inga chaha, vatyi chahá ñu cha cuacu nyaa ñáyiví chi ra. ⁷ Añima ñáyiví cuví tari noo ñuhú nu sahá tyiño ñu, vatyi noo ñuhú tahan ri chaha cha coon savi, chihí ñuhú cuan ndutya savi cuan. Tatu vaha ñuhú cuan ta vaha cuvaha cha tachí ñu nuu chi, cunasoco Nyoo chi ñuhú cuan. ⁸ Soco tatu cañá ifi ta cañá nyava nuu chi, ñahri maa tuhun. Ta cusoco Nyoo chi ñuhú ña vaha cuan ta cucayu chi. Ta tyicuan caa tucu cucuví chi ñu cha sandihí cha chinó ifi chi Nyoo.

⁹ Yañi, vasi cahán ndi tyicuan caa, soco chitó vaha ndi vatyi nyoho sacuví ndo cha vaha, maa maa ri cha sacuví ñu cha cacú añima sacuví ndo, ta ña sacuví ndo tari ñu cuví tari ñuhú ña vaha cuan. ¹⁰ Vatyi Nyoo, ra vaha cuví ra, ta ma naa ifi ra cha sacuví ndo. Ta nyehé ra vatyi cuñí xaan ndo chi ñu yihí cuenda Nyoo, vatyi tyinyeé ndo chi ñu, ta tyinyeé ca ndo chi ñu nya vityin. ¹¹ Cuñí ndi vatyi na cuní ca ifi ndo nyacua nya quichi Sutu Mañi yo, tyicuan caa ta cuñihí ndo tandihí cha nyatú ndo. ¹² Na cuñí ndi cha cusuchan ndo, soco sáha ndo cuenda chi ñu cha chinó vaha ifi chi Nyoo ta sacuví ndo tari sacuví ñu. Vatyi ñu chinó vaha ifi chi Nyoo chihin cha cama ifi ñu, ican ñu ñihí cha catyí Nyoo tyi cuhva ra chi yo.

¹³ Vatyi ta cha naha catyí Nyoo chi ra Abraham, vatyi cuhva ra noo cha cuhva ra chi ra. Ta Nyoo tyaq ra cuhva cha cuhva ra, ta noo ri tuhun cahán ra vatyi maa ra, Nyoo cuví ra. ¹⁴ Ta tyehe caa catyí ra: “Cha ndicha vatyi cunasoco xain chuan ta cuaha xaan sehun cucuhve”, catyí ra chi ra Abraham. ¹⁵ Ta ra Abraham chihin cha cama ifi ra, nyatu ra tuhun cahán Nyoo chihin ra, ta tyicuan caa naquehen cuenda ra cha catyí Nyoo tyi cuhva ra chi ra. ¹⁶ Tatu noo ñáyiví cuacuhva ñu noo cha cuacuhva ñu chi tahan ñu ta tyanaha ñu sivi noo ra cahnu ca. Ma chihin yucuan ri. ¹⁷ Ta yucuan chaha vatyi Nyoo minoo ri tuhun cahán ra, vatyi cuñí ra cha coto ñáyiví vatyi ndicha tuhun cahán ra, ta ña nasamá ra tuhun cahán ra. ¹⁸ Yucuan chaha iyó uvi tahan cha ma cuví nasama chi. Noo cuví cha catyí Nyoo tyi cuhva ra nyatu chi ra Abraham, ta cha cu uvi, noo ri tuhun cahán ra vatyi maa ra, Nyoo cuví ra. Ta Nyoo ña cahán ra cuendu. Yucuan chaha tandihí yo cha nyañaá yo chi ra, ni ifi yo cunyeé ifi yo chi ra, ta nyatú yo cha tyaá ra cuhva cha cuhva ra chi yo. ¹⁹ Tari noo barcu cha nuhí noo caa vee, coto cahun

chi chihin tatyí, ta tyicuan caa quihí iñi yo cha sacacú ra Cristo añima yo. Ta cha quihí iñi yo chi ra, nuhñi yo chihin Nyoo ra nyaá inga chiyo cortina, o nya gloria cuví Cuan. ²⁰ Vatyí ra Jesús cha quihví ra yucuan ta nuñá ra ityi nu cuhun yo nu nyaá Nyoo. Ta ican ra Jesús cuví ra minoo tata sutu tyicuan ri maa, tari ra Melquisedec.

7

Ra Jesús cuví tata sutu tari ra Melquisedec

¹ Ra Melquisedec cha cahín tuhun, cuví ra rey ñuu Salém, ta cuví ra tata sutu cuenda Nyoo, ra cuví ra cahnu ca. Quiví cha cuandichi ra Abraham cha chahán ra chicañi tahan ra chihin suhva ra cacuví rey, ta cuví chasaha ra chí ra, tyicuan ta quita ra Melquisedec ityi nuu ra ta nasoco ra chí ra. ² Ta ra Abraham uchi uchi tinyaa ra siqui cha saha ganaa ra nu chicañi tahan ra, ta chaha ra chí ra Melquisedec. Ta sivi ra Melquisedec cuan cuñí chi catyí: “Rey, ra cuví ra vaha.” Ta rey ñuu Salem cuan cuví ra, yucuan chaha cuví ra: “Rey vaha cha chahá cha taxi coo añima ñáyivi.” ³ Ña catyí tuhun Nyoo yóo cha cuví sutu ra ta sihi ra, ni ña cahán chi tuhun yóo ñáyivi chí ra. Ni ri ña cahán chi tuhun ama cacú ra, ni ama chihí ra. Yucuan chaha cuví ra tari caá Sehe Nyoo, noo tata sutu tyicuan ri maa.

⁴ Soco, vityin nyehé ndo yoso cha cahnu cuví ra Melquisedec, vatyí ra Abraham tinyaa ra uchi uchi siqui cha saha ganaa ra chí ra cacuví rey cuan nu chicañi tahan ra, ta chaha ra chí ra Melquisedec. ⁵ Tyehe ta tata ra Abraham cuví ra Melquisedec, ta cuví ra sutu, ma catyí yo tyi ra cahnu ca cuví ra. Vatyí nu cuahan ca chi ityi nuu ta suri maa ley Nyoo saniñi chí ñáyivi tata ra Abraham nacuhva ñu uchi uchi cha saha ganaa ñu chi ra cacuví sutu tata ra Leví, vasi tata ra Abraham cacuví chí ra tari maa ñu. ⁶ Ta ra Melquisedec, ñima tata ra Leví cuví chí ra, ta ni ñima tata ra Abraham, soco vita ri tyi quehen ra uchi uchi siqui tandihí cha ñihí ra Abraham. Ta nasoco ra Melquisedec chí ra Abraham, ra cha chaha Nyoo promesa chii. ⁷ Ta chitó cachi yo vatyí cahnu ca cuví ra cha nasoco cuan, ta ñima ca ra cha nasoco ra chí. ⁸ Nyehé yo vatyí cahnu ca ra cuví ra Melquisedec cha nuu inga ra caquehén cuenda uchi uchi siqui cha iyó chí ñáyivi, vatyí rayi ri cacuví ra cuan, ta tuhva chaa tuhun chihí chí ra. Soco tuhun ra Melquisedec cahán chi nu tutu Nyoo ta catyí chí tyi ñahri tuhun chihí iyó chí ra. ⁹ Ta ra Leví, chihin sehe ra, ra cacuví tata ra Abraham, ican ra cacuví tata sutu cha tahán chi caquehén cha uchi uchi siqui cha iyó chí ñáyivi. Soco tari quivi tyiyahví

tucu ra Leví cuan uchi uchi cha saha ganaa ra chí ra Melquisedec cuví cuan, vatyí ra Abraham tyiyahví ra. ¹⁰ Vatyí ra Leví, tata ra Abraham cacuví chí ra, vasi ta cacú ca ra quivi chisatahan ra Melquisedec chí ra Abraham.

¹¹ Ta ra cacuví tata ra Leví suri tata ra Aarón cacuví chí ra, ican ra cacuví sutu cuenda yo ñu Israel, ta cha cuenda ra cuan quichí ley chahnu Nyoo. Ta vityin tyehe ta cuví nduvaha coo yo chihin Nyoo cha cuenda cha sacuví yo cha catyí ley cuan, yucuan ndicha ña ñini ca cha quichí ra Cristo ra cuví tata sutu tari ra Melquisedec, ta ñima tari ra Aarón. ¹² Vatyí tatu Nyoo ta nasama ra chí ra cuví sutu, cuñi tucu chí cha nasama ley ñandihí. ¹³ Ta Sutú Mañi yo cha cahán tutu Nyoo tuhun, ñima tata ra Leví ta ra Aarón cuví ra, soco tata inga sehe ra Israel cuví chí ra. Ta ni noo ra vachi tata cuan ta ña tuhvá ra cuví sutu. ¹⁴ Vatyí chitó vaha yo vatyí Sutú Mañi yo tata ra Judá, sehe ra Israel vachi ra, ta ra Moisés ñahri maa tuhun tata ra Judá cahán ra quivi cahán ra tuhun ra cacuví sutu.

¹⁵ Ta yucuan nyehé vaha yo, vatyí Nyoo natyaa ra inga sutu tari ra Melquisedec. ¹⁶ Ñima tari catyí ley quichí ra, vatyí ley catyí chí yóo chí tata cua quichí noo ra cuví sutu, ta ña quichí ra tata cuan, soco quichí ra vatyí iyó cha ndicha ñuhu Nyoo chihin ra ta ñahri tuhun chihí nyisó ra. ¹⁷ Vatyí ican ihya cuví cha cahán Nyoo tuhun ra:

Yoho cuvún tata sutu tyicuan ri maa,
Tari ra Melquisedec.

¹⁸ Yucuan chaha sacuachiyó Nyoo ley chahnu cuan vatyí ña cuví maa tyinyee chí chí ñáyivi, ta ña chihuhú. ¹⁹ Vatyí ley cha chaha Nyoo chí ra Moisés, ña sanduvaha maa chí añima yo. Ta vityin, tyiño nuu ley chahnu cuan, iyó inga tuhun vaha ca cha yihí iñi yo. Ta chihin ihya tuhvá yo chí Nyoo vatyí sanduvaha ra Cristo cuhva coo yo chihin Nyoo.

²⁰⁻²¹ Nyoo tyaa ra cuhva ta tyanaha ra vatyí cuhva ra noo sutu cha cahnu ca chí yo. Soco sutu cha iyó vityin ña tyanaha Nyoo quivi tyiso ra chí ra. Vatyí nu tutu Nyoo catyí chí tyehe caa:

Sutu Mañi yo, ñn ri tuhun cahan ra, ta maa nasama ra cuhva catyí ra tyehe caa:

“Yoho cuvún Sutú tyicuan ri maa,
tari cuví ra Melquisedec”, catyí Nyoo.

²² Yucuan chaha ra Jesús chaha ra noo tuhun vaha ca chí yo, ta ñima ca tuhun cha xihna ri cuan. ²³ Vatyí cha cuaha xaan ra cacuví sutu, soco chaa chaa ri tuhun chihí chí ra. ²⁴ Soco ra Jesús ñahri tuhun chihí iyó chí ra, ta ña ndihí tuhun cha cuví ra sutu. ²⁵ Yucuan chaha tyicuan ri maa cuví sacacu ra añima ñu natuhvá chí Nyoo cha cuenda

ra, vatyí iyó maa ra tyicuan ri maa, vatyí cacan tahví ra chí Nyoo cha cuenda ñu.

²⁶ Yucuan chaha ra Jesús cuví sutu cha chíñuhú chí yo. Ta maa ra, ii ra, ñahri cha quiñi caa sacuví ra, ta ni ñahri cuatyí ra. Ta ña cutahán ra chihin ñu iyó cuatyí. Ta sucun ca nyaá ra, ican saha andivi. ²⁷ Ñima tari inga ra cacuví tata sutu cuan, vatyí cuñi chí cha cacahñi ra chí quiti ta cuhva cuenda ra chí Nyoo ndi quívi. Ta cha xihna ri, na naa cuatyí maa ra, ta yaha cuan ta naa cuatyí ñáyivi. Soco ra Jesús noo ri chaha, chahá cuenda ra chí ra chí Nyoo na naa cuatyí tandihí yo. ²⁸ Ley Nyoo cha quehen cuenda ra Moisés, tyisó chí chí ra cacuví nuu chí tata sutu, soco ra iyó cuatyí cacuví ra. Soco yahá cuan ta chahá Nyoo noo tuhun chaa, ta iin ri tuhun cahan ra. Ta tyisó ra chí Sehe ra cha cuví ra Sutu cahnu ca, ta maa ra cuví ra noo ra vaha tyicuan ri maa.

8

Natyihí tahan Nyoo tuhun chaa chihin yo quívi chíhí ra Jesús cha cuenda yo

¹ Ta chichi cha tandihí cha cahán nu tutu ihya, ican ihya cuví cha ñiñi ca tuhun: Ra cuví tata sutu cahnu chí yo cuví ra noo ra vaha tyicuan ri maa, ta chicunyaá ra nu tyayu chichi gloria chiyo vaha Nyoo.

² Ta cuví ra Sutu noo nu cuví vehe ñuhu cha ndicha vaha nu nyaá Nyoo. Maa Sutu yo Nyoo savahá vehe cuan, ta ñima rayii.

³ Tandihí ra cacuví tata sutu tyisó Nyoo chí ra, vatyí cuhva cuenda ra ofrenda chí Nyoo ta cahñi ra quiti na naa cuatyí ñáyivi chihin ñiñi ti. Ta yucuan chahá ñiñi cuñi chí cuhva cuenda tucu ra Jesucristo ñiñi ra chí Nyoo.

⁴ Tyehe ta síqui ñuhu ñáyivi nyaá ra cuví ra sutu, ni ñima sutu cuví ra tatu tyicuan caa. Vatyí síqui ñuhu ñáyivi, iyó ca ra cacuví sutu cha cachahá cuenda ofrenda chí Nyoo tari cuhva catyí ley cha tyaa ra Moisés. ⁵ Soco ra cacuví sutu síqui ñuhu ñáyivi, sacuví ra tyiño nuu Nyoo soco tari cuhva cuví andivi. Cuví chí noo xiñahñu tyiño sahá ra Cristo. Ta chító yo vatyí tyicuan caa, vatyí quívi cha cua savahá ra Moisés vehe ñuhu cuan ta cha naha, Nyoo catyí ra chí ra tyehe caa: “Saha vaha cuenda, ta savahun tari cuhva caá cha sañahí chuun quívi chinyaun nu yucu cuan”, catyí Nyoo chí ra. ⁶ Soco ra Cristo ra cuví sutu cahnu chí yo, vaha ca cuhva sacuví ra, vatyí cha cuenda maa ra, natyihí tahan Nyoo noo tuhun vaha xaan ca chihin yo, vatyí vaha ca cha cucuhva ra chí yo.

⁷ Vatyí tyehe ta cuví cacu añima yo chihin tuhun xihna ri cha natyihí tahan Nyoo chihin yo, ña chíñuhú ca cha natyihí tahan chaa ra tuhun chihin yo cha cu uvi chaha. ⁸ Soco Nyoo nyehé ra vatyí ña vaha maa sacuví

ñáyivi cuan, ta cahán ra tuhun ñu nu tutu ra tyehe caa:

Cuchaa chí quívi vatyí cunatyihí tahin tuhun chaa chihin ñáyivi Israel ta ñu Judá, catyí Sutu Mañi yo.

⁹ Ñima tari natyihí tahin tuhun chihin ñáyivi chahnu ñu, quívi tijn ndaha ñu ta tave chí ñu ñuu Egipto.

Vatyí ña sacuví ñu tuhun cha natyihí tahin chihin ñu,

ta yucuan chaha sañe chí ñu, catyí Sutu yo Nyoo.

¹⁰ Tuhun cha cunatyihí tahin chihin ñu ñuu Israel nu cuahan ca chí, tyehe caa cucuví, catyí Sutu Mañi yo:

Chichi cha chíñi tuñi xiñi ñu, cutyai ley mai, ta chichi añima ñu cutyai.

Tyicuan ta mai cucuví Nyoo ñu, ta maa ñu cucuví ñu ñáyivi chíi.

¹¹ Tyicuan ta ña ñiñi ca cha sañahá ñu chí tahan ñu, ni chí yañi ñu, tacuhva vatyí cohon nuu ñu chí yuhu cha cuví Nyoo ñu.

Vatyí tandihí ñu, cucohon nuu ñu chíi, nyacua nya ñu luhlu ca ta nyacua nya ñu chahnu ca.

¹² Ta cusahí ticahnu iñi cha quiñi caa cha sacuví ñu.

Ta ma nicohon ca maa iñi cuatyí ñu, catyí Sutu Mañi yo.

¹³ Quívi cha cahán Nyoo tuhun cha natyihí chaa ra tuhun chihin yo, cuñi chí catyí vatyí cha sacuchahnu ra cha xihna ri cuan. Ta numi ri cundihi tuhun cha cuví cha chahnu cuan.

9

Nu sañahá chí yoso caa vehe ñuhu cha iyó síqui ñuhu ñáyivi ta vehe ñuhu nu cuví andivi

¹ Quívi natyihí tahan Nyoo tuhun cha xihna ri chihin ñáyivi, chahá ra cuhva chí ñu yoso caa sacahnu ñu chí ra, soco chichi noo vehe ñuhu cha nyaá síqui ñuhu ñáyivi ihya. ² Tyehe caa chingó vehe ñuhu cuan: Chata noo cortina nyaá cuarto cha xihna ri nu tayucú cañileru, ta nanyaá mesa nu catuví pan ii. Ta chicunañi cuarto cuan Nu Ii. ³ Chata cortina cu uvi, yucuan cuví nu chicunañi Nu Ii Xaan Ca. ⁴ Ta yucuan nanyaá noo arta xuhun cuaan nu chahmí ra cutu. Ta nanyaá caja, cha natyihí tahan Nyoo tuhun chihin yo, ta iñi xuhun cuaan nicacahnu. Ta chichi cuan ñohó casitu xuhun cuaan cha ñohó maná. Ta ñohó yutun cha natyacu cha chindahá ra Aarón. Ta ñohó tucu yuu cha nyaá ndi uchi mandamientu.

⁵ Ta síqui caja cuan nyicú cha tari caa ángel, ta cuñi chí catyí vatyí nyaá Nyoo yucuan. Ta chihin ndichin ángel cuan cachasí ra nu cuví nu tuhvá Nyoo sahá ra ticahnu iñi cuatyí

ñáyivi. Cha vityin ña cuví nacatyí ca ndi síqui tuhun ihya.

⁶ Ta tyicuan caa cuví vehe ñuhu cuan. Ta ndiquivi ri caquihví ra cacuví sutu chichi cuarta cha xihna ri nu nañí Nu Ii, tacuhva sacahnu ra chi Nyoo. ⁷ Soco cuarta cu uvi Nu Ii Xaan Ca cuan iyó maa minoo ra cuví nuu chi sutu, ta yucuan ra cuví quihví yucuan, noo chaha cha noo cuiya. Ta cuhva cha quihví ra, cuñí chi cuiiso ra ñíñi quiti vatyi cuhva cuenda ra chi Nyoo cha cuenda cuatyí maa ra ta cuatyí ñáyivi. ⁸ Ta cha tyicuan caa sañahá Tatyí Ii Nyoo chi yo vatyi, ta cuví ca chaa yo nuu Nyoo vatyi ni nyaá ca cuarta cha xihna ri cuan. ⁹ Tandihí maa ihya cuví chi tari noo xiñahñu ri cha cuenda tuhun chaa cha chacun Nyoo vityin: vatyi noo cha chahá cuenda ñu chi Nyoo ña tyiñyee chi chi ñu na caca vaha iñi ñu. ¹⁰ Vatyi tandihí cuhva sacuví ra cacuví sutu cuan cahán chi maa ri cuenda ñáá cha cuví cachi ñáyivi, ta ñáá cha cuví coho ñu, ta yoso caa cundundí coño ñuhu ri ñu. Ta catuví cuhva cuan, nyatú chi nya quivi cacun Nyoo inga cuhva vaha ca.

¹¹ Soco vityin cha yaha quichí ra Cristo ta maa ra cuví tata sutu cahnu cha cuenda tuhun vaha ca cha chacun Nyoo. Quihví ra chichi vehe ñuhu vaha ca, ta ndí ca, vatyi maa ra cuví sutu. Ta ñima rayí savaha vehe ñuhu cuan o cuñí chi catyí, ñima vehe ñuhu ñuhu ñáyivi ihya cuví. ¹² Ra Cristo quihví ra vehe ñuhu nu cuví gloria Nu Ii Xaan Ca. Soco ñima ca cha cuhva cuenda ra ñíñi mbee luhlu, o becerro, soco ñíñi maa ra chahá cuenda ra. Ta tyicuan caa quihví ra noo ri chaha nu ndihí tuhun, ta tyicuan caa ta cuví sacacu ra chi yo tyicuan ri maa. ¹³ Niñi toro, ta ñíñi ndixihyu, ta ñiyaa becerro cha cachahmí ra nu arta, tuhva ra catyicu ra chata ñu ca iyó cuatyí, ta coño ñuhu ri ñu sandundí chi cuan nuu Nyoo. ¹⁴ Ta tatu tyicuan caa, ¡Nana cha cahnu ca tunyee iñi iyó chi ñíñi ra Cristo! Vatyi tyiñyee Tatyí Ii chi ra ta chahá cuenda ra chi ra chi Nyoo chihin cha ñahri cuatyí ra. Ta ñíñi ra sandachí chi cha ña vaha cha caá ñima yo tacuhva ma cuita ca iñi yo ley cha chahá tuhun chihí chi yo, ta tyicuan caa ta cuví sacuvi yo tyiño nuu ra cuví Nyoo nyitó.

¹⁵ Yucuan chaha ra Jesucristo cuví ra cha cahán chaha yo cha cuenda tuhun chaa cha natyihí tahanan Nyoo chihin yo. Ta cha cuenda cha chihí ra, iyó ticahnu iñi cuatyí cha sacuví yo quivi chinyaca ñaha tuhun cha xihna ri cuan chi yo. Ta yoó, ñu nacana Nyoo chi cuví yo, cuví naquehen cuenda yo noo cha ma ndihí ca maa, cha catyí maa ra tyi cuhva ra chi yo. ¹⁶ Vatyi tatu iyó noo tutu cha sandoq noo ra chihí, ta catyí tutu cuan ñáá ndihí cha cuñihí ñáyivi chi ra tatu chihí ra; cuñí chi cha coto vaha

ra cuví tyiño tatu ndicha cha chihí ra cha sandoq tutu cuan; tyicuan ta cuví sacaca ra tyiño cuan ta nasacha ra cha tahán chi chi ñu cuan. ¹⁷ Vatyi cha niri ca cha iyó ra cha sandoq tutu cuan, ma cuví cundaa tyiño cha quehen cuenda ñu cha tahán chi chi ñu, soco nya cúvi ra, tyicuan ta cuví quehen cuenda ñu. ¹⁸ Yucuan chaha chihí quiti ta chati ñíñi ti quivi natyihí tahanan Nyoo tuhun cha xihna ri cuan chihin yo. ¹⁹ Quivi cuan, ra Moisés sacoto ra tandihí ley Nyoo chi tandihí ñáyivi. Yaha cuan ta quehen ra noo sahna cuaha cha chingo chihin ixi mbee ta chihin noo soco yutun cha nañí hisopo, satyijí ra nu ñíñi becerro ta nu ñíñi ndixihyu luhlu, nasaca ra chihin nduya, ta tyicu ra chata libru ley Nyoo ta chata tandihí ñáyivi ñandihí. ²⁰ Tyicuan ta quichaha catyí ra chi ñu: “Ican ihya cuví ñíñi cha cuví cha ndaa vatyi natyihí tahanan Nyoo tuhun chihin ndo”, catyí ra. ²¹ Ta suri tyicu tucu ra Moisés ñíñi nu cuví vehe ñuhu cuan, ta síqui tandihí cha cachotyíño ra yucuan nu casacahnú ra chi Nyoo. ²² Tyicuan caa sacuví ra vatyi catyí ley Nyoo tyi tandihí ta chihin ñíñi, cuñí chi ndundí nuu Nyoo. Ta catyí tucu chi vatyi ma saha Nyoo ticahnu iñi cuatyí tatu ma cati ñíñi.

Niñi ra Cristo, ícan cuan tinyaa cuatyí yo

²³ Ta yucuan chaha cuñí chi cha sacuví tata sutu tyicuan caa, vatyi ndundí tandihí cuan, vatyi cuví chi noo xiñahñu cha iyó ityi andivi. Soco tandihí cha cuenda ityi andivi, cuñí chi noo ñíñi vaha ca cha cuhva cuenda yo, ta ñima ca tari ñíñi quiti cuan. Cuñí chi ñíñi ra Cristo. ²⁴ Vatyi ra Cristo ña quihví ra chichi noo vehe ñuhu cha savaha ñáyivi cha cuví xiñahñu ri. Soco quihví ra chichi vehe ñuhu cha ndicha vaha cha cuví gloria. Ta vityin cahán ra chaha yo nuu Nyoo. ²⁵ Ra cuví nuu chi sutu cuenda ñu Israel quihví ra Nu Ii Xaan Ca cuan tahanan cuiya vatyi cuhva cuenda ra ñíñi cha ñima ñíñi ra cuví. Soco ra Cristo, ña cuaha chaha cuñí chi cuhva cuenda ra chi ra. ²⁶ Vatyi tyehe ta tyicuan caa, cuaha chaha cuñí chi cha nyehe ra tindoho ta cúvi ra nyata chingo ñuhu ñáyivi ta nya vityin. Soco vityin cha cua cuyatyin cundihí tuhun ñáyivi, noo ri chaha quichí ra Cristo, ta chahá cuenda ra chi maa ra tacuhva vatyi cuví tinyaa ra cuatyí yo. ²⁷ Noo ri chaha, cúvi yo ta yaha cuan ta cucutuñi chi yo. ²⁸ Ta tyicuan caa tucu ra Cristo, noo ri chaha, chahá cuenda ra chi ra tacuhva tinyaa ra cuatyí cuaha xaan ñáyivi. Yaha cuan ta cuquichi ra cha cu uvi chaha, ñima ca cha quichi tinyaa ra cuatyí, soco cha quichi sacacu ra chi ñu cha nyatú chi ra.

10

¹ Vatyí ley Nyoo cha tyaá ra Moisés, cuví chí tari noo xiñahñu ri, cha cuenda cha vaha ca cha cuquichi. Soco ñima maa cha ndicha vaha cuví. Vatyí ley cuan, ma cuví maa sanduvaha chí chí ñu nanducú chí Nyoo. Vatyí tahan cuiya ri chahá cuenda ra cuví nuu chí tata sutu cuenda ley chahnu ñiñi quiti. Soco ma cuví cacu añima yo chihin cuan. ² Vatyí tyehe ta cuví sanduvaha ley cuan chí ñu, cundihi tuhun cha chahá cuenda ra ñiñi ndicuiya ri. Vatyí tatu cha ndundi ñu noo chaha cha cuenda tandihi maa, ma caca ca xiñi ñu vatyí iyó cuatyí ñu ta ña chiñuhú ca cha kuhva cuenda ra inga chaha. ³ Soco tahan cuiya ri chahá cuenda ra ñiñi, ta ican cuan sanicohón chí iñi ñu vatyí iyó cuatyí ñu. ⁴ Vatyí ñiñi toro ta ñiñi ndixihyu, ma cuví maa tinyaa chí cuatyí yo.

⁵ Yucuan chaha ra Cristo, quivi cuaquichi ra siqui ñuhu ñayivi ihya, catyí ra chí Nyoo tyehe caa:
Ña cuñún cha cahñi ñáyivi quiti ta kuhva cuenda ñu chuun,
yucuan chaha savahun noo coño ñuhu chii.
(Vatyí tyicuan caa ta cuví kuhva cuende chí chuun.)

⁶ Ta vatyí ña tahán iñun cha cahmi ñu quiti ta kuhva cuenda ñu chuun cha cuenda cha tinyaa cuatyí ñu.

⁷ Catyí yuhu: “Ma yuhu, vachi ihya vatyí sacuvi kuhva cuñún, Nyoo Suti, tari kuhva cahán chí tuhún nu libro ley maun”, catyí ra Jesucristo.

⁸ Cha xihna ri, catyí ra Jesucristo vatyí Nyoo, ña cuñí ra cha kuhva cuenda ñu chí quiti chí ra. Ni cha cahmi ñu quiti cha cuenda cha tinyaa cuatyí ñu, ña cuñí Nyoo, catyí ra. Vasi maa ri tuhun cha catyí ley chahnu vatyí sacuvi yo cuví, soco ña tahán iñi Nyoo, catyí ra. ⁹ Ta yaha cuan ta catyí tucu ra: “Ma yuhu vachi ihya, vatyí sacuvi kuhva cuñún, Nyoo Suti.” O cuñí chí catyí, sacuachiyo Nyoo kuhva chahnu cuan, ta nacuvi chí inga kuhva chaa ihya. ¹⁰ Nyoo sandundi ra chí yo vatyí ra Jesucristo sacuvi ra kuhva cuñí Sutu ra, ta chahá cuenda ra coño ñuhu ra. Noo ri chaha chíhí ra ta ndihí tyiño saha ra.

¹¹ Tandihí ra cacuvi tata sutu ñuu Israel, ndi quivi sacuvi ra tyiño nuu Nyoo, ta tyicuan ri chahá cuenda ra suri maa cha tuhvá maa ra chahá cuenda chí Nyoo, vasi ña cuví tinyaa chí cuatyí yo. ¹² Soco ra Jesucristo, noo ri chaha chahá cuenda ra chí ra chí Nyoo cha cuenda cuatyí yo. Tyicuan ta chicunyaá ra tyayu gloria chiyo ndaha vaha Nyoo. ¹³ Ta yucuan nyatú ra nyacua nya cacun Nyoo chí ra xaan iñi chí ra chaha ra. ¹⁴ Vatyí chihin noo ri chaha cha chíhí ra Cristo ta cuví sanduvaha ra añima ñáyivi cuenda Nyoo, tyicuan ri maa. ¹⁵ Ta suri tyicuan caa catyí tucu Tatyí Ii Nyoo chí yo.

Vatyí cha xihna ri catyí ra chí yo nu tutu tuhun Nyoo tyehe caa:

¹⁶ Tuhun cha cunatyihí tahin chihin ñu quivi cuan, tyehe caa cucuvi, catyí Sutu Mañi yo:

Cutyai ley mai chíhí añima ñu, ta cutyai chíhí cha chíhí tuñi xiñi ñu, catyí Nyoo.

¹⁷ Ta yaha cuan ta catyí tucu ra:

Ma nicohon ca maa iñi cuatyí ñu, niri cha quíñi caa cha chinyacuví ñu, catyí Sutu Mañi yo.

¹⁸ Ta cha yaha saha Nyoo ticahnu iñi cuatyí, ña cuñí ca chí cha cahñi ñáyivi chí quiti, ta kuhva cuenda ñu chí Nyoo cha cuenda cuatyí ñu.

Cuñí chí nanducu yo chí Nyoo

¹⁹ Yucuan chaha yañi, cuví quihvi maa yo Nu Ii Xaan Ca cuan nu nyaá Nyoo, cha cuenda vatyí cha chati ñiñi ra Jesucristo ta tinyaa ra cuatyí yo. ²⁰ Cha nuña ra Cristo noo ityi chaa, ityi kuhun yo nu conyito añima yo. Vatyí maa maa kuhva cha chíhí ra ta ndatá cortina cha chasí nu chinyaá Nyoo. Cha tahnyaá cortina, ican cuví cha chíhí ra, tacuhva nuña ityi quihvi yo ta chaa yo nu nyaá Nyoo. ²¹ Ra Jesús cuví sutu cha nyacá ñaha nu cuví vehe Nyoo andivi. ²² Yucuan chaha cuñí chí nanducu yo chí Nyoo chihin noo cha ndicha ta chihin cha ñi iñi yo chíhí iñi yo chí ra, vatyí maa ra sandundi ra añima yo, tacuhva ma quihí ca iñi yo vatyí iyó cuatyí yo, vatyí tari cha nacatyá ra coño ñuhu yo chíhín ndutya cuii, na ndu ndi yo nu Nyoo. ²³ Na cunú ca iñi yo chíhí iñi yo chí Nyoo ta ma ndu uvi iñi yo vatyí Nyoo kuhva ra cha catyí ra vatyí kuhva ra chí yo. ²⁴ Ta cuñí chí nanducu yo kuhva tyinyee yo chí tahan yo, na cuñí ca ñu chí tahan ñu ta sacuvi ca ñu cha vaha. ²⁵ Ña tahan chí quehen yo kuhva caá ñu cha sandihí cha quichi nu ndu ñn ri yo, soco cuñí chí cha sandunú yo iñi noo noo tahan yo. Ta yaha ca kuhva cuñí chí tyinyee yo chí tahan yo vityin cha nyehé yo vatyí Sutu Mañi yo cha cuñí chaa quivi quichi ra ta cucutuñi chí tandihí ñáyivi.

²⁶ Vatyí tatu cha yaha chicohon nuu yo cha ndicha, ta ña quichahá yo ta tyicuan ri sacuvi ca yo cuatyí, ñahri ca kuhva coo ticahnu iñi cuatyí yo. ²⁷ Ta cutachi tuñi Nyoo chí yo. Ta cutyihí ra chí yo nu cucayun ñáyivi cha xaan iñi chí ra, ta cundihi tuhun ñu. ²⁸ Tatu noo ñáyivi Israel ña quichahá ñu kuhva catyí ley ra Moisés, ta chiyo uvi o uñi testigu, cuví ñu cuan cha cuenda cuatyí ñu, ta yori cundahvi cuñí nyehe chí ñu. ²⁹ Ta nyaca cuví ñu cha ña quichaha ca chí Sehe Nyoo ta sahá ñu tyi ñiñi ra cha sanduvaha añima ñu cha ñima ri tuhun cuví. Ta chíhín ñiñi cuan natyihí tahan Nyoo tuhun chíhín

yo. Soco cahán ña vaha ñu siqui Tatyí Ii Nyoo cha chahá tumañi iñi chi yo. Yaha ca cuhva cutachi tuñi Nyoo chi ñu cuan. ³⁰ Vatyí chitó yo vatyí Sutu Mañi yo, ican ra catyí ra tyehe caa: “Yuhu tahán chi tachi tuñi chi ñáyivi, yuhu catyí cha cuví chi ñu.” Ta catyí tucu ra vatyí cutuñi chi ñu nuu ra. ³¹ Ndicha cha iyó Nyoo, ta yucuan chaha tahán chi cuyuhvi yo chi ra, coto tachi tuñi ra chi yo cha cuenda cuatyí yo.

³² Soco ma naa iñi ndo quivi natiñ cuenda ndo cha ndichin Nyoo chichi añima ndo, vatyí quivi cuan cunyeë xaan iñi ndo cha nyehe ndo tindoho cha cuenda ra. ³³ Yihí nyoho cahán ñáyivi chi ndo, ta sanyehé ñu tindoho chi ndo nu tuvi. Ta yihí nyoho uhvi xaan cuví chi ndo cha nyehe ndo cha cuví chi tahan ndo cha tyicuan caa, ta cunyeë xaan ndo. ³⁴ Ta cundahvj iñi ndo chi ñu ñohó vehe caa, ta chihin cha sii cuñí ndo cunyeë ndo quivi tinyaa ñu cha iyó chi ndo, vatyí chitó ndo vatyí andivi iyó ca cha vaha ca cha cuenda ndo, ta ña ndihí maa cuan. ³⁵ Yucuan chaha ma sandihí ndo cha quihí iñi ndo chi ra Cristo, vatyí nu cuahan ca chi ta cuñihi ndo cha vaha ca vatyí chinó iñi ndo. ³⁶ Cuñí chi cha coo cha cama iñi ndo tacuhva cuví sacuví ndo cuhva cuñí Nyoo, ta tyicuan caa ta naquehen ndo cha catyí ra tyí cuhva ra. ³⁷ Vatyí nu tutu Nyoo catyí chi tyehe caa:

Ña naha ca ta cuquichi ra cha tahán chi quichi, ta ma cucuee ca ra.

³⁸ Ta catyí Sutu Mañi yo tyehe caa: “Ñu cha sanduvahí añima, chihin cha chinó ri iñi ñu chi yuhu, ta conyito añima ñu.

Soco tatu cunuhu chata ñu, ma cusii cuñi yuhu chihin ñu”, catyí Nyoo.

³⁹ Soco maa yo ña sacuví yo tari sacuví ñu cuanaá añima, vatyí ñu chinó iñi chi Nyoo cuví yo, ta tyicuan caa cucacu añima yo.

11

Cuhva cuñí chi cha chinó iñi yo chi Nyoo

¹ Cha chinó iñi yo chi Nyoo ican cuví cha chitó vaha yo tyi cuñihi yo cha nyatú yo, ta chitó vaha yo vatyí noo cha ndicha vaha cha ña nyehé yo vityin, cuñihi yo vatyí chinó iñi yo chi Nyoo. ² Ñáyivi chiyó ta cha naha, chinqó iñi ñu chi Nyoo, ta yucuan chaha quitá vaha ñu nuu ra.

³ Cha cuenda cha chinó iñi yo chi Nyoo, ta chitó yo vatyí savahá ra ñuhu ñáyivi chihin tuhan cahán ra. Ta chitó yo vatyí tandihí cha nyehé yo vityin, chinqó chi ta cha naha chihin cha ña tuhva yo nyehé.

⁴ Cha cuenda cha chinqó iñi ra Abel chi Nyoo, ta chahá cuenda ra noo cha chahá ra chi Nyoo. Ta vaha ca cha chahá ra ta ñima ca

cha chahá ra Caín, yañi ra. Ta yucuan chaha natiñ cuenda Nyoo chi ra tari noo ra vaha, ta natiñ cuenda ra cha chahá ra. Yucuan chaha vasi cha chihí ra Abel, soco tari quivi cahán ca ra tuhan chihin yo vityin, yoso caa tahán chi chino iñi yo chi Nyoo.

⁵ Cha cuenda cha chinqó xaan iñi ra Enoc chi Nyoo, ta cuanuhu ra chihin Nyoo chihin cha ña chihí ra. Ta ña nañihí ca ñu chi ra, vatyí naquehen Nyoo chi ra. Ta nu tutu Nyoo, catyí chi vatyí cha ni cumañi ca naquehen Nyoo chi ra Enoc, sacuví ra maa ri maa cuhva tahán iñi Nyoo, yucuan chaha naquehen ra chi ra. ⁶ Soco ma cuví sacuví yo cha tahán iñi Nyoo tatu ña chinó iñi yo chi ra. Vatyí tatu cuñí yo nanducu yo chi ra, cuñí chi cha chinó iñi yo tyi iyó ra. Ta cuñí tucu chi chinó iñi yo vatyí cucuhva ra cha vaha chi ñu nanducú chi ra.

⁷ Cha cuenda cha chinqó iñi ra Noé chi Nyoo, ta quichahá ra tuhan cahán Nyoo, cha catyí Nyoo chi ra noo cha cucuví ityi nuu ca. Ta vasi tañaha ca nyehe ra soco cha cuenda cha chinó iñi ra chi Nyoo, ta savahá ra barcu cuan ta sacacu ra chi ñáyivi chi ra. Ta cha cuenda cha chinqó iñi ra chi Nyoo, sandoq ra cuatyí ñu siqui ñu cha ña quichahá chi Nyoo, na tachi tuñi ra chi ñu. Ta cha cuenda cha chinqó iñi ra Noé chi Nyoo cuvahá ra nuu ra.

⁸ Ta cha cuenda cha chinqó iñi ra Abraham chi Nyoo, ta quichahá ra chi ra quivi caná ra chi ra. Yucuan chaha quitá ra ñuu ra ta cuahan ra nu cucuhva Nyoo ñuhú cha cundoo chi ra. Quitá ra ñuu ra chihin cha ña chitó ra nya cuahan ra. ⁹ Cha cuenda cha chinó iñi ra Abraham, yucuan chaha chiyó ra nu ñuhú cha ta cuhva ca Nyoo chi ra. Chiyó ra noo vehe sahma ri, ta suri tyicuan caa tucu ra Isaac, sehe ra, ta ra Jacob, sehe ñañi ra. Vatyí suri catyí tucu Nyoo chi ninduvi ra vatyí tyi cucuhva ra ñuhú cuan chi ra. ¹⁰ Vatyí ra Abraham nyatú maa ra noo ñuu vaha ca cha cucuhva Nyoo chi ra, ta maa Nyoo chacun cuhva ñuu cuan ta maa ra savahá ra, ta chicha cimientu tyihí ra chaha.

¹¹ Ta suri chinqó iñi tucu cu Sara cha catyí Nyoo chi ña cha cucoo sehe ña. Ta vasi cha chahnu xaan ña, soco chahá Nyoo fuerza ra chi ña, ta chicoq sehe ña. Tyicuan caa cuví vatyí chinqó iñi cu Sara cha catyí Nyoo chi ña. ¹² Yucuan chaha vasi cha nyaña quivi cha cúvi ra Abraham, soco chicoq sehe ra. Ta yahá cuan cuaha xaan ñáyivi cacú cha cuví ñu tata ra. Tari cha cuaha tiño andivi, ta tari cha cuaha niyiti yuhu tyañuhu, vatyí ña cuví nacahvi yo.

¹³ Tandihí ñu cuan cachihí ñu cha ni cumañi ca naquehen cuenda ñu cha catyí Nyoo tyi cuhva ra chi ñu. Soco vasi ta naquehen cuenda ca ñu ta chihí ñu soco nyehe

cachi vaha ñu chihin cha chinó iñi ñu. Ta sii xaan cuñi ñu. Ta chihin cuan cutuñi iñi ñu ta cahán ñu tuhun vatyí noo ñu yahá ri siqui ñuhu ñáyivi ihyá cuví ñu. ¹⁴ Vatyí ñu cacahán tyehe caa, cuñi chi catyí vatyí ni nanducú ñu noo nu coo ñu. ¹⁵ Tyehe ta chicá ca xiñi ñu ñuu nu quitá ñu, totypehe cuví cunuhu ñu nyicuan. ¹⁶ Soco vatyí cuñi ñu noo ñuu vaha ca, o cuñi chi catyí nya gloria, yucuan chaha Nyoo ña cucahan nuu ra cha cuví ra Nyoo ñu. Vatyí cumí ra noo ñuu nu cuví coo ñu.

¹⁷ Ta cha cuenda cha chinqo iñi ra Abraham chi Nyoo, yucuan cuenda quichahá ra nu chahan Nyoo ta tyaá ra cuhva cha cahñi ra chi sehe mañi ra ra Isaac, quívi nducu nyehe Nyoo chi ra tu ndicha cha chinó iñi ra, vasi suri maa Nyoo catyí ra ¹⁸ vatyí cuaha xaan ñáyivi cucuvi tata ra chihin ra Isaac cuan. ¹⁹ Soco ña yuhví ra Abraham cuacuhva cuenda ra sehe ra chi Nyoo, vatyí chitó ra vatyí Nyoo, iyó tunyee iñi chi ra nyacua nya cha sanandotó ra ndiyi. Ta tari quívi sanandotó Nyoo chi sehe ra, vatyí cha nyaá cha cua cahñi ra chi ra, ta nacuhvá Nyoo chi sehe ra chi ra inga chaha.

²⁰ Ta ra Isaac chinqo tucu iñi ra chi Nyoo. Ta yucuan chaha catyí ra vatyí sehe ra, ra Jacob ta ra Esaú, cuñihi ra cha vaha nu cuahan ca chi. ²¹ Ta ra Jacob chinqo iñi ra chi Nyoo, cuhva cha cua cuví ra. Ta catyí ra vatyí tahan tahan sehe ñañi ra, sehe ra José, cuñihi ra cha vaha. Ta sacahnú ra chi Nyoo nu nanyaá ra chihin yutun cha tuví ra. ²² Ta ra José ñandihí, chinqo iñi ra chi Nyoo, ta catyí ra, cuhva cha cua cuví ra, vatyí ñu Israel, ñáyivi chi ra, cu quita coyo ñu ñuu Egipto cuan nu cuahan ca chi. Ta sandoq ra tyiño chi ñu, vatyí na naquehen ñu yiqui ra quívi quita ñu ñuu cuan.

²³ Cha cuenda cha chinqo iñi sutu ra Moisés ta sihi ra chi Nyoo, yucuan chaha quívi cacú ra, nyehe ñu tyi noo cha lee tyaqui xaan cuví ra. Ta yihí iñi ñu cha cusacacu Nyoo chi ra ta ma cuví ra, vasi catyí rey cuan vatyí cuví ndii ra cuatya. Ta ña yuhví ñu ta tixehé ñu chi cue uñi yoo. ²⁴ Ta ra Moisés tucu, chinqo iñi ra chi Nyoo. Ta quívi cha chahnú ra, ña cuñi ca ra cha cuví sihi ra chi ñaha sehe rey ñuu Egipto cuan. ²⁵ Ta ni ña cuñi ra ndoo ra ñuu Egipto cuan vatyí cusii iñi ra o cunyacuvi ra cha quívi caa. Vatyí chitó ra tyi tuhun ñn yaha ri cuví cuan. Soco vaha taxin ca cuñi ra nyehe ra tindoho chihin ñáyivi cuenda Nyoo. ²⁶ Ra Moisés, vaha ca cuñi ra cha nyehe ra ticahan nuu cuenda ra Cristo vatyí cahnu ca cha tyayii cuví cuan chi maa ra ta ñima ca tandihí cha tyayii cha iyó ñuu Egipto. Vatyí chitó ra tyi cua cuhva Nyoo cha vaha chi ra. ²⁷ Ta cha cuenda cha chinqo iñi ra Moisés chi Nyoo, ta quitá ra ñuu Egipto, ta ña yuhví ra cha cuxaán rey cuan. Ta sanyee

xaan ra iñi ra. Tari cha vatyí nyehe ra chi Nyoo cha ña nyehe yoo.

²⁸ Cha cuenda cha chinqo iñi ra Moisés chi Nyoo ta sanducahnú ra vico cha cahñi ñu noo mbee luhlu, ta tachí ra nacahyu ñu niñi ti yuvehe ñu, tacuhva vatyí ma cahñi ángel Nyoo chi ni noo sehe nuu ñi Israel. ²⁹ Ta cha cuenda cha chinqo iñi ñu Israel chi Nyoo ta yahá sava ñu Tyañuhu Cuaha, tari cha yahá ñu noo ñuhú ityi. Ta cuhva cha cacuñi tucu ra Egipto cayaha ra, ña cuví yaha ra vatyí nacasi Nyoo tyañuhu cuan siqui ra ta cachihí ra chichi ndutya cuan.

³⁰ Ta cha cuenda cha chinqo iñi ñu Israel chi Nyoo, ta chiqo ñu ucha tahan chaha chata ñuu Jericó, ta tandihí cuíi maa nu sama chata ñuu cuan canacoyo. ³¹ Ta cha cuenda cha chinqo iñi cu Rahab, ñaha cata iñi cuan, chi Nyoo, ta ña chihí ña ñn ri chihin ñu ñuu ña, ñu ña quichahá chi Nyoo, vatyí maa ña, tyinyee vaha ña chi ra Israel, ra chahan coyo chinyehé tatu cuví chasaha ra tinyaa ra ñuu ña chi ra nyacá ñaha ñuu cuan.

³² ¿Ñáa ca cha cuví catyí vityin? Cuaha xaan cuhva cucuñi chi chii tatu cahín tuhun ra Gedeón, ra Barac, tuhun ra Sansón, ra Jefe, ta tuhun ra David, ta ra Samuel ta tuhun ra cacuvi profeta Nyoo ta cha naha. ³³ Cha cuenda cha chinqo iñi ra chi Nyoo, ta yihí ra sahá ganaa ra chi inga ñuu nahnu. Ta yihí ra vaha xaan chinyacá ñaha ra ñáyivi cuenda Nyoo. Yihí ra ñihí ra cha catyí Nyoo tyi cuhva ra chi ra. Yihí ra chasí ra yuhu ndicaha. ³⁴ Yihí ra ña cayu ra chihin ñuhú chichi horno nu catyihí ra chi ra. Yihí ra cacú ra cha cahñi ñáyivi chi ra chihin mityi. Yihí ra cha ñahri fuerza chi ra, soco candun-yeé ra, ta chiyó xaan fuerza chi ra chichi cuatyí cuan, ta cuví chasaha ra chi sindaro cuenda ñu xaan iñi chi ra. ³⁵ Ta chicoq suhva ñusihí, nandotó ñáyivi chi ñu.

Ta inga ñáyivi chihí ñu chihin cha cuaha xaan tindoho sanyehé ñáyivi chi ñu, soco ña sandoq ñu chi Nyoo vasi chihí ñu cha catyí ra, vatyí chitó ñu, vatyí tatu ma sandihí ñu cha chinó iñi ñu chi Nyoo, cunandoto ñu ta cucoo ñu noo ñáyivi vaha xaan ca. ³⁶ Ta inga ñu nyehe ñu tindoho cha cahán nyaa ñáyivi chi ñu ta cañi ñu chi ñu. Ta inga ñu chinuhñi ñu chihin cadena ta cuahan ñu vehe caa. ³⁷ Yihí ñu chihin yuu chahñi ñáyivi chi ñu. Yihí ñu chahnú ra chihin cierra chi ñu. Yihí ñu nducú nyehe ñáyivi chi ñu. Yihí ñu chihí ñu cha chahñi ñáyivi chi ñu chihin mityi. Yihí ñu chiqá noo ñu ta ñahri sahma ñu. Chihin ñii mbee ri ta ñii ndixihyu ñihno ñu. Ndahvi xaan ñu. Ta cuihya xaan cuñi ñu. Ta sanyehé ñáyivi cha ña ñohó nuu Nyoo tindoho chi ñu. ³⁸ Ta ñáyivi ña ñohó nuu Nyoo ña nañá ñu cha cu ñn ri ñu chihin

ñáyiví ndahví cuan vatyi vaha ñu nuu Nyoo. Chica noo ndahví ñu ityi chiqui ndii, ityi yucu. Chiyo ñu chichi yavi yuu ta yavi ñuhú. ³⁹ Tandihí maa ñu vasi cahan vaha Nyoo siqui ñu cha cuenda cha chinó iñi ñu chí ra, soco ña ñihí ñu cha catyí Nyoo cha cuhva ra chí ñu. ⁴⁰ Vatyi natyaá ra cuhva, cha cuhva ra nonga cha vaha ca chí ñu vatyi natyihí ra cuenda chí yo ta ñin ri cutahan chí chí yo chihin ñu cuan.

12

ñin ri chí ra Jesús tahán chí cuita iñi yo

¹ Tandihí ñáyiví cuan quita vaha ñu vatyi chingó iñi ñu chí Nyoo. Ta vityin chihin cuan sanduni ñu iñi yo ta nyatú ñu nyehe ñu tatu quita vaha yo. Yucuan chaha cuñi chí cha sacuachiyo xiin yo tandihí cha sayangá chí yo, tandihí cuatyí cha nyicón chí yo. Ta chihin cha cama iñi yo ta cuhun yo ityi nuu ca chihin Nyoo. ² ñin ri chí ra Jesús quihí nuu yo, vatyi maa ra chahá ra cha chinó xaan iñi yo chí Nyoo, ta chahá ra tandihí cuhva tahán chí chino iñi yo. Ta cha ni cumañi ca cúvi ra, chító ra vatyi si xaan cucuvi chí ra cha yaha cúvi ra. Yucuan chaha, chahá ra cha cahñi ñáyiví chí ra. Ña quichahá ra ticahan nuu cha cúvi ra tari chihí noo ra iyó cuatyí, ta vityin nyaá ra chiyo vaha Nyoo gloria.

³ Saha ndo cuenda cuhva chiyo ra Jesús, vatyi nyehe xaan ra tindoho sahá ñu iyó cuatyí. Yucuan chaha ma cutatu ndo, ta ma ndu uvi iñi ndo cha nyicón ndo chí ra. ⁴ Vatyi nyoho ta chaa ca ndo nyehe ndo tindoho cha cuenda cha cañi tahan ndo chihin cha quñi caa, tari nyehe ra Cristo tindoho ta chihí ra. ⁵ ¿Atu cha naq iñi ndo tuhun chahá Nyoo chí ndo tari cha sehe ra chí ndo? Catyí ra tyehe caa nu tutu ra: Sehe luhli, ma cuxaun tatu saquehen ityi chuun.

Ma nducuihya iñun tatu cahín chuun.

⁶ Vatyi ra saquehén ityi yuhu chí, chaha cha cuñi chí ra, vatyi sehi cuví chí ra, catyí Nyoo.

⁷ Cunyee ndo ta cutuhva ndo tatu saquehen ityi ra chí ndo, vatyi Nyoo, sehe vaha ra sahá ra chí ndo. Vatyi tandihí ra iyó sehe, saquehén ityi ra chí sehe ra. ⁸ Vatyi tatu ña saquehén ityi Nyoo chí ndo, ñima sehe vaha ra cuví chí ndo, soco tatu saquehén ityi ra chí ndo, sehe vaha ra cuví chí ndo.

⁹ Ta siin ri, ta nyihí yo, sutu yo ihya ñáyiví saquehen ityi ra chí yo, ta sahá yo ñáyiví chí ra. Ta nyaca cuví Nyoo, tahán tucu chí saha yo ñáyiví chí Sutu yo Nyoo, tyicuan ta coo añima yo tyicuan ri maa. ¹⁰ Sutu yo cuenda coño ñuhu yo, saquehen ityi ra chí yo suhva ri quiví, yoso cuhva cha cuñi chí. Soco Nyoo saquehén ityi ra chí yo cha cuenda noo cha vaha ca chí yo, vatyi sa ii ra chí yo tari maa

ra, cha ii ra. ¹¹ Ndicha vatyi ña tahán iñi yo cha ndohó yo vatyi uhvi chí yo. Soco chihin cha ndoho yo, cutuhva yo coo yo noo ñáyiví vaha.

Yica xaan tatu ma quichaha yo cha catyí Nyoo chí yo

¹² Yucuan chaha sandunye ndo iñi ndo, ta ma quihí iñi ndo cha ma cuví cunyicon ndo chí ra Cristo. ¹³ Ta nanducu ndo cuhva coo vaha ndo chihin Nyoo, nanducu ndo cuhva caca ndoo ndo chihin ra. Tyicuan ta maa ra cuhva ra fuerza chí ndo ta nduvaha ndo nuu Nyoo ta ma cucuihya ca cuñi ndo.

¹⁴ Saniñi ndo coo vaha ndo chihin tandihí ñáyiví. Ta coo ndo noo ñáyiví cachi. Vatyi tatu ña cachi iyó yo, chihin Sutu Mañi yo Nyoo, ma nyehe yo chí ra. ¹⁵ Saha ndo cuenda chí ndo coto yihí ndo, ma ñihí ndo tumañi iñi cha iyó chí ra. Ta saha ndo cuenda chí ndo, coto cuví ndo tari noo yutun cha chahá chíti uva, ta coto quehen ñáyiví cha caá ndo ta tiví ñu nuu Nyoo. ¹⁶ Ta ni noo ndo ta maa coo ndo chihin ñáyiví tatu ñima ñasihí ndo o yí ndo cuví. Ni ma cuñi ndo vatyi tuhun Nyoo noo cha ñima ri tuhun cuví, vatyi tyicuan caa sacuvi ra Esaú, vatyi chihin noo nyayu ri, xico ra tandihí cha tahán chí chí ra cha cuví ra sehe nuu sutu ra. ¹⁷ Ta chító ndo vatyi cha yaha cuan ta cuñi ra Esaú cha nasoco sutu ra chí ra, soco ña cuví ca. Ta vasi chacu vavaha ra, soco ña ñihí ca ra cuhva nasamá ra cuhva cha chinyacuvi ra.

¹⁸ Ta maa ndo chaq ndo nuu nyaá Nyoo soco ñima tari chaq ñu Israel cuan quiví chahan ñu noo yucu nu cuví yucu Sinaí. Ta yucuan nyehe ñu cayu ñuhu, ta nduñaa iñi, ta ñihí xaan tatyí. ¹⁹ Ta chihí ñu nativí cutu cuihya ta cahan Nyoo chihin ñu. Ta ñu cha chihí tuhun cahan ra, chacu ndahví ñu tacuhva ma cahan ca ra chihin ñu, vatyi yuhvi xaan ñu ²⁰ cha cuenda vatyi ña cunyeé iñi ñu tuhun cha chahá ra chí ñu. Vatyi catyí ra tyehe caa: “Tatu quihí noo ñáyiví, cahñi ndo chí ñu chihin yuu o chihin lanza, cuví ri ñu ñáyiví o quiti”, catyí Nyoo chí ñu. ²¹ Yuhvi xaan ñu cha nyehé ñu yucuan, vatyi nyacua nya ra Moisés ta catyí ra: “Ñihí xain chihin cha yuhví”, catyí ra.

²² Soco yoó ña nyehe yo cha yuhvi cuan vatyi noo yucu cha nañi Sión nu cuví ñuu Nyoo nyitó chaq yo. O cuñi chí catyí ñuu Jerusalén cha nyaá andivi, nu nyicú cuaha mil ángel. ²³ Candú ñin ri yo vatyi sacahnu yo chí Nyoo vatyi ndú ñin ri tandihí ñu cha cuví sehe Nyoo cha nyicú siví nu tutu nya andivi. Ta chaa yo nuu Nyoo cha cuví juee chí tandihí ñáyiví. ñin ri nyicú yo chihin añima ñu vaha cha sanduvahá maa Nyoo. ²⁴ Ta natuhvá ndo chí ra Jesús ra cuví ra cahán chaha yo vityin cha natyihí tahan

Nyoo tuhun chaa chihin yo. Ta chati niñi ra. Ta ican chi chahá noo cha vaha ca ta ñima ca cha chahá niñi ra Abel. (Vatyí ra Abel chihí ra ta tachí tuñi Nyoo chi yañi ra. Soco chihí ra Jesús, ta iyó tucahnu iñi cuatyí yo.)

²⁵ Yucuan chaha sgha yo cuenda coto ma quichaha yo chi ra cha cahán chihin yo. Vatyí ñu Israel cuan, ña cacú ñu cha ña cuñí quichaha nu cahan Nyoo quivi cahan ra nu cuví yucu Sinaí ihya siqui ñuhu ñayivi. Ta nyaca cuví yoó, ma cuví maa cacu yo tatu nacuhva yo chata yo chi ra cha cahán chihin yo nya andiví vityin. ²⁶ Quivi cuan ndusu Nyoo sacanda chi ñuhu ñayivi. Soco vityin catyí chi tyehe caa: “Noo ri ca chaha cusacande ta ñima ñuhu ñayivi ri, soco andivi ñandihi.” ²⁷ Ta cha catyí ra vatyí cusacanda ra nonga chaha, cutuñi iñi yo vatyí cucuachiyo tandihí cha nyaá ii ri cha savaha Nyoo. Ta cundoo cha ma cuví nacanda. ²⁸ Nu chahá Nyoo cunyaa yo chihin ra nu nyaca ñaha ra, ma nacanda cuan. Yucuan chaha na nacuhva yo tyahvi nyoo chi ra, ta sacahnu yo chi ra chihin cha niñi yo, ta chihin cha saha yo ñayivi chi ra, vatyí tyicuan caa tahán iñi ra. ²⁹ Vatyí Nyoo cuan, cuví ra tari noo ñuhú cha chahmí tandihí, ta tyicuan caa cusanaa ra tandihí cha ña vaha.

13

Na coo yo cuhva tahán iñi Nyoo

¹ Ma sandihí ndo cha cuñí ndo chi tandihí ñu yihí cuenda Nyoo tari cha tahan ndo chi ñu. ² Ta ma naa iñi ndo cha cuvaha ñayivi cuví ndo chihin ñayivi cha chaá vehe ndo. Vatyí iyó chaha cha cuenda cha vaha ñayivi cuví ndo, ta chahá ndo nu coo ñayivi; chi ángel, chahá ndo nu coo, ta ña tuvj iñi ndo.

³ Ma naa iñi ndo chi ra ñohó vehe caa tari cha ñohó tucu maa ndo vehe caa chihin ra. Ta tyicuan caa tucu ñu nyehé tindoho sahá ñayivi. Sgha ndo tyi nyehé tucu maa ndo tindoho tari nyehé ñu, tyicuan ta cundahvi cuñi ndo chi ñu ta tyinyee ndo chi ñu. Vatyí chitó ndo yoso caa uhvi chi ñu cuan tyi ñayivi cuví ñu tari maa ndo.

⁴ Cha tandaha ndo, noo cha vaha cuví. Ta nyoho cha tandaha ndo tahán chi saha ndo ñayivi chi yá ndo o chi ñasihí ndo. Vii coo ndo chihin tahan ndo, vatyí Nyoo cutachí tuñi ra chi ñu iyó yá ta iyó inga ra chi ñu, o ra iyó ñasihí ta iyó inga ñasihí chi ra.

⁵ Ma cuñi xaan ndo xuhun. Ndoo ndo vaha chihin cha iyó chi ndo, vatyí Nyoo catyí ra: “Ma sañe chuun ta ni ma sandoo ñihne chuun”, catyí ra. ⁶ Yucuan chaha cuví catyí yo chihin cha niñi iñi yo; Sutu Mañi yo cuví ra tyinyee chíi, Ma yuhví ñáá cha sacuvi ñayivi chíi.

⁷ Nícohon iñi ndo chi ra cayihí ndaha vehe ñuhu, ra cacahán tuhun Nyoo chihin ndo.

Nacaca xiñi ndo vatyí maa ra cachi iyó ra nuu Nyoo, ta cunyicon ndo cuhva cha vaha xaan chinó iñi maa ra chi Nyoo.

⁸ Ra Jesucristo ña nasamá ra. Ican ra cuví ra ta tyembu chahnu, ta ican ra cuví ra vityin. Ta ican ra cuví ra nuu cuahan ca chi tyicuan ri maa. ⁹ Ma cuhva ndo cha sandavi ñaha ñayivi chi ndo chihin tuhun siñ caa cha sañahá ñu. Vaha ca cha cu niñi iñi ndo chihin cha cuñí Nyoo chi yo, ta ñima ca tuhun cha sañahá ñu cuan: cha yíca cha cachi yo. Ña tyinyee maa cuan chi ñu nyacuví tyicuan caa.

¹⁰ Iyó noo arta cha cuenda yo. Nu chati niñi ra Cristo nu cruzi, ican cuan cuví. Ta ñu cuñí cacu chihin cha quichahá ñu ley chahnu cha quichahá ra cacuví sutu ta cha naha, ma cuví tyinyee ra Cristo chi ñu. ¹¹ Ra cuví sutu cahnú cuenda ñu Israel chinyaca ra niñi quiti Nu Ii Xaan Ca cuan cha cuenda cuatyí ñayivi, soco coño ti chinyaca ra ityi chata ñuu vatyí cayu chi. ¹² Ta tyicuan caa tucu ra Jesús, tyaa Nyoo tyiño chi ra cha nyehé ra tindoho ta cuví ra ityi chata ñuu Jerusalén, tacuhva vatyí sandundi ra chí yo chihin niñi ra. ¹³ Ma cahan nuu yo nyehé yo tindoho ticahan nuu cha cuenda ra Cristo, tari nyehé tucu maa ra cha cuenda yo quivi cahan ra chicúvi ra ityi chata ñuu Jerusalén. Tari quivi cha cuahan tucu yoó ityi chata ñuu cuví chi cuan tatu ña cahán nuu yo nyehé yo tindoho cha cuenda tuhun ra. ¹⁴ Vatyí ihya siqui ñuhu ñayivi, ñahri noo ñuu cha tyicuan ri maa cucco iyó. Soco nanducú yo noo ñuu cha cuquichi, cha yaha ndihí tuhun ñuhu ñayivi ihya. ¹⁵ Yucuan chaha vityin cha ñohó ra Cristo añima yo, tahán chí cha saniñi yo ta sacahnu yo chí Nyoo chihin yaa, ta chihin cha cahan yo tuhun cha cahnú cuví ra. ¹⁶ Ta ma naa iñi ndo cha sacuví ndo cha vaha. Ta tyinyee ndo chí tahan ndo chihin cha iyó chí ndo, vatyí ican ihya cuví cha tahán iñi Nyoo.

¹⁷ Quichaha ndo tuhun cahán ra casaquehén ityi chí ndo, ta cughva ndo chí ndo cunyaca ñaha ra vatyí nyicú ra tyiño casahá cumi ra añima ndo. Ta coo quivi cutahan chí cunacuhva ra cuenda tyiño casahá ra chí Nyoo. Nducu ndo cuhva sacuvi ndo cha vaha, tacuhva vatyí chihin cha siñi cuñi ra cuhva ra cuenda ndo nuu Nyoo, vatyí tatu ña sacuvi ndo cha vaha, chihin cha cuihya iñi ra cuhva ra cuenda ndo, ta nyoho, ma quita vaha ndo nuu Nyoo.

¹⁸ Vaha cuñi añima ndi chihin Nyoo, ta cuñi ndi cha cacan tahvi ndo chaha ndi vatyí cuñi ndi sacuvi ca ndi cha vaha. ¹⁹ Ta chiquén noo tumañi iñi chí ndo cha cacan tahvi ndo chíin chahí tacuhva vatyí nacuhva Nyoo cuhin cucunyai cha numi ri chihin ndo inga chaha.

*Nu ndihĩ cahan ra ta nacuhva ra nocumi
chi ñu*

²⁰ Nyoo ican ra iyó cha taxi chi ra, ican ra sanandoto ra chi Sutu Mañi yo Jesucristo, ra cuví ra sahá vaha cuenda chi yo tari cha cuví yo mbee sana ra. Ra Cristo chatĩ ñiñi ra, ta chihin cuan natyihĩ tahan Nyoo tuhun chaa cha ma ndihĩ ca maa chihin yo. ²¹ Na cuhva Nyoo cha vaha chi ndo tacuhva cuvi sacuvi ndo cuhva cuñí ra. Ta na sacuvi maa ra cha cuñí maa ra cha cuenda ra Jesucristo chihin tandihĩ maa yo. ¡Na sacahnu yo chi ra Cristo tyicuan ri maa! ¡Na cuvi chi tyicuan caa!

²² Yañi, chacú ndahvi nuu ndo, na cunyeexaan iñi ndo chihin tuhun cha chahí ihya chi ndo, vatyi ña cuaha xaan tyaj nu tutu ihya chi ndo. ²³ Coto ndo vatyi ra yañi yo, ra Timoteo, cha quitã ra vehe caa. Ta tatu nachaa ra cha numi ri, cuhun ra chihin, na cuhin cunyehe nu nyicú ndo.

²⁴ Cuhva ndo nocumi chi tandihĩ ra sañahá chi ndo, ta chi tandihĩ ra yañi yo cuenda ra Cristo. Ñu Italia ihya, tachi ñu nocumi chi ndo.

²⁵ Ta Nyoo na nasoco ra chi tandihĩ maa ndo. Ta na cuvi chi tyicuan caa.

Carta Cha Sacuhun Ra Santiago Chi Ñu Yihí Cuenda Ra Cristo

Nu chahá ra Santiago nocumi chi ñu

¹ Yuhu ra Santiago cuví noo ra sacuví tyiño nuu Nyoo ta nuu Sutu Mañi yo Jesucristo. Sacuhín nocumi chi ndo cha cuví ndo cha uchi uvi ityi ñáyivi Israel ñu yihí cuenda ra Cristo. Ta quití cuatyí ndo siin siin ñuu.

Cha chiñi tuñi cha chahá maa Nyoo

² Yañi, cuñí chí vatyi sñi cuví chí ndo tatu cuaha nuu tindocho nyehé ndo. ³ Vatyi chitó ndo tatu nyehé ndo tindocho tari cha vatyi Nyoo nducu nyehé ra tatu ndicha cha chinó iñi ndo chí ra cuví cuan. Ta tyicuan caa ta cua cutuhva ca ndo cha cucama iñi ndo. ⁴ Saña ndo na quichi maa tindocho siqui ndo, vatyi ican cuví cha sacoo cha cama iñi ndo. Ta tatu cha chicoo cha cama iñi ndo ta cucuví ndo noo ñáyivi chicha chihin tuhun Nyoo, ta cuacunee ndo tandihí cuii maa tindocho cha vachi ca siqui ndo.

⁵ Tatu nya noo nyoho cumañí cha chiñi tuñi chí ndo, çacan ndo chí Nyoo. Ta Nyoo cuhva ra. Ta ñima chiin ri chahá ra chí ñu chicán chí ra. Ta ña tyicuhvá ra cuhva chahá ra. Ta ña natyihí ra nuu yo cha cuenda cha chahá ra chí yo. ⁶ Soco cuñí chí çacan yo chí ra chihin cha chinó vaha iñi yo. Ta ma quihí iñi yo vatyi ma cuhva ra chí yo. Vatyi ñu cha ña chinó vaha iñi, cuví ñu tari ndutya yuhu tyañuhu cha tyandahá tatyí chí siin siin ityi. ⁷⁻⁸ Ta tyicuan caa maa ñu cuan, siin siin cuhva chicá xiñi ñu, vatyi siin cha chicán ñu vityin ta siin cha chicán ñu tyaan, ta ña niñi iñi ñu sacuví ñu noo cha sacuví ñu. Ña tahán chí quihí iñi ñu vatyi cuñihí ñu cha cuacuhva Sutu Mañi yo chí ñu. ⁹ Tatu iyó noo ra yañi yo, ndahví ra, cuñí chí cusñi cuñí ra vatyi Nyoo nacoñehé ra chí ra. ¹⁰ Soco tatu noo ra yañi yo, tyayii ra, cuñí tucu chí cha cusñi cuñí ra tatu ndundahví ra, vatyi ra tyayii cuñí ra tari noo ita cha nyaá nu cuhu, vatyi ña naha maa chiyó chí. ¹¹ Vatyi tatu caña ñanyii ta ihñi vavaha cuhu cuan, na ityi chí. Ta ita cuan canacavá ri ta ndihí cha tyagui chí. Ta tyicuan caa tucu ra tyayii, cuquichi tuhun chíhi chí ra ta ndoo maa tyiño sahá ra.

Yoso caa cunyeé yo tindocho

¹² Ñana cha sñi cuví chí ndo cha cunyeé ndo chihin cha cama iñi ndo ñáá tindocho cha vachí chí ndo. Vatyi tatu cunyeé ndo, cuñihí ndo tari noo corona. Vatyi Nyoo cucuhva ra chí ñu cuñí chí ra, cha coo ñu ñáyivi chaa chihin ra. ¹³ Tatu nya noo nyoho quichí cuví iñi ndo cha sacuví ndo cha ña vaha, ma cuñi

ndo vatyi Nyoo sacuví cha caca xiñi ndo tyicuan caa. Vatyi Nyoo ña quichí cuví iñi ra sacuví ra cha ña vaha. Ta ni ña tyiyuhú ra chí yo cha sacuví yo cha ña vaha. ¹⁴ Soco tatu nya noo ndo quichí cuví iñi ndo sacuví ndo cha ña vaha, suri cha cuenda cha chicá xiñi maa ndo cha ña vaha, yucuan chaha canacava ndo nu cuatyí. ¹⁵ Tatu cuhva xaan yo cuhva cha quihí tuhun ña vaha iñi yo, cuacoo noo quivi ta cuasacuvi yo cuhva ña vaha cuan, ta tyicuan caa cacu cuatyí yo nuu Nyoo. Ta Nyoo tachi tuñi ra cuatyí cuan ta cuchaa tuhun chíhi chí yo. ¹⁶ Yañi yuhu, cuñí xain chí ndo. Ma sandavi ñaha ndo chí ndo. ¹⁷ Tandihí cha vaha ta cha vii cha ñihí yo, quichí chí nya ityi siqui vatyi maa Nyoo chahá ra. Ta maa ra savahá ra ñuhú cha iyó andivi: tiño, ta yoo, ta ñanyii. Ta Nyoo tyicuan ri cuví ra Nyoo, ta ni chiin ña tuhvá ra nasama ra cuhva cuví ra. ¹⁸ Ta chahá ra ñáyivi chaa cha iyó yo cha cuenda tuhun ndicha cha cahán ra. Vatyi xihna ca yo cuví cha nduchaá cha nuu tandihí ca cha savahá ra. Vatyi tyicuan caa cuñi maa ra.

Noo ityi cha ndicha cha tahán chí cuhun yo

¹⁹ Yucuan chaha yañi, noo noo yo ta cuñí chí cha vatyi çohon iñi yo cha tyasoho yo, soco cuñí chí cha ma vatyi xaan nacahán yo ta ma vatyi xaan cuxaan yo. ²⁰ Vatyi ñáyivi cha cuxaán, ña nyacuví ñu cha tahán iñi Nyoo. ²¹ Yucuan chaha saña ndo cha ña vaha ta cha quihí caa cha cuaha xaan iyó siqui ñuhu ñáyivi. Ta natíin cuenda vaha ndo chihin cha masu iñi ndo tuhun Nyoo cha tachí ra añima ndo. Vatyi tuhun Nyoo cuan iyó tunyee iñi chí chí vatyi sacacú chí añima yo. ²² Soco sacuví yo yoso cuhva sañahá tuhun Nyoo. Ta ma cuñi ri maa yo vatyi tatu tacuhva chiñí ri maa yo, suri chí maa yo sandavi ñahá yo. ²³ Vatyi ñu cha chíñi ri maa tuhun Nyoo ta ña sacuví ñu, cuví ñu tari noo ñu cha nyehé chí nu ino. ²⁴ Ta nyehé ñu yoso caa nuu ñu, ta yaha cuan ta cuahan ñu ta naá ri iñi ñu yoso cuhva caá nuu ñu. ²⁵ Soco inga ñu cha nyita ri tyasohó tuhun Nyoo, vatyi sacuví vaha ñu cha chíñi ñu. Ta tyicuan ri sahá vaha ñu cuenda cha catyí ley Nyoo, cha cuví ley vaha ca, ley cha chahá libertad chí yo tyi tava chí chí yo ndaha ra ña vaha. Ta ñu nyacuví tyicuan caa sñi xaan cucuví chí ñu. ²⁶ Tatu nya noo ñáyivi cuñí maa ñu vatyi ityi Nyoo cuahan ñu, soco ña nyatú yuhu ñu cahan ñu, suri chí maa ñu sandahví ñahá ñu. Ta cha catyí ñu tyi ityi Nyoo cuahan ñu, cha ñima ri tuhun cuví. ²⁷ Vatyi ityi ndicha, ityi vaha nuu Nyoo Sutu yo ican cuví ihya: Cha tyinyee yo chí ñu nyehe tindocho, ñu yori sutu ta sihi, ta ñu chíhí yí. Ta inga, cha sahá vaha yo cuenda chí yo coto sacuví yo cha quihí caa cha sacuví ñu ña ñohó nuu Nyoo.

2

Ña tahán chí cuñi yo chí noo ñáyivi ta chí inga ñu ma cuñi yo. Inuu ri tahan chí cuñi yo chí ñu

¹ Yañi yuhu, nyoho chinó iñi ndo chí Sutu Mañi yo Jesucristo ra cha cahnu ca cuví, ta ña tahán chí cha vaha ca cahán ndo chíhin noo ri ñáyivi, ta chíhin inga ñu ma cahan ndo. ² Vatyí tatu quihví noo ra tyayí nu nyicu ndo, yihí xehe xuhun cuaan ndaha ra, ta finu sahma ra, ta quihví tucu nonga ra cha ñihno sahma chahnu ri. ³ Ta nyoho tatu vaha ca tyiñuhu ndo chí ra cha vaha ñihno cuan, ta catyí ndo chí ra: “Cunya ihya noo nu vaha.” Ta chí ra ndahví cuan catyí ndo chí ra: “Yoho cunanyaa yucuan o cunya ihya nu ñuhú”, catyí ndo chí ra. ⁴ Ña vaha tatu sacuví ndo tyicuan caa, vatyí ña inuu ri sahá ndo ñáyivi chí ñu, ta cha tyicuan caa, ña vaha cha chicá xiñi ndo.

⁵ Yañi, tyasoho ndo tuhun ihya. Nyoo nacachí vaha ra chí ñu ndahví ihya ñáyivi, vatyí ta cuhva cuví ñu ñu tyayí chíhin cha chinó xaan iñi ñu chí Nyoo, ta cuñi ñu nu vaha nu nyacá ñaha ra. Vatyí ican ihya cuví cha catyí ra tyi cuhva ra chí ñu cuñi chí ra. ⁶ Soco nyoho chahá ndo ticahan nuu chí ñu ndahví. Ta çatu ña chitó ndo vatyí ñu tyayí, ican ñu cuví ñu cha chahñi ndahví chí ndo? Ta chinyacá ñu chí ndo nuu ra cuví tyiño. ⁷ Ta çatu ña chitó ndo vatyí ican ñu cuví ñu cahán ña vaha siqui ra Cristo? Ta cuenda ra Cristo yihí ndo.

⁸ Tatu ndicha cha sacuví ndo tandihí cha catyí ley Nyoo ra cuví rey cuenda yo, vaha nyacuví ndo. Tari catyí tuhun Nyoo: “Cuñi ndo chí tahan ndo tari cuñi ndo chí maa ndo.” ⁹ Soco tatu chí noo ri ñu cuñi ndo. Ta chí inga ñu ña cuñi ndo, chicoó cuatyí ndo. Ta iyó cuatyí ndo nu ley Nyoo. ¹⁰ Vatyí tatu noo ñáyivi sacuví ñu tandihí cha catyí ley, ta cumañi ñu noo ri cha catyí chí, cuví chí tari cha tandihí ley ña sacuví ñu. ¹¹ Vatyí Nyoo catyí ra vatyí ma coo inga ñusihí o inga rayí chí ñu, tatu iyó yí ñu o iyó ñasihí ra. Ta suri maa ra catyí vatyí ma cahñi yo. Yucuan chaha tatu noo ñu ña sacuví ñu cuatyí cha ña iyó inga rayí o inga ñusihí chí ñu soco chahñi ñu, suri ña quichahá ñu cha catyí ley. ¹² Soco yoó cucutuñi chí yo nu ley ra Cristo cha sacacú chí yo. Yucuan cuenda tahan chí nducu yo cuhva cahan yo ta nducu yo cuhva coo yo. ¹³ Vatyí ñu cha ña cundahví cuñi nyehe chí inga ñu, Nyoo cusacutuñi ra chí ñu, soco ma cundahví cuñi ra nyehé ra chí ñu. Soco ñu cha ndahví cuñi nyehé chí inga ñu, qucutita vaha ñu cuhva cha cutuñi chí ñu.

çÑáa cha sacacú chí yo, cha chinó iñi yo o cha sacuví yo cha vaha?

¹⁴ Yañi, ñáa ri tuhun tatu catyí ndo vatyí chinó iñi ndo, soco ñahri cha vaha nyacuví ndo. çAtu cuví cacu ndo chíhin cha chino iñi ri ndo chí Nyoo? ¹⁵ Vatyí tatu noo ñu tahan yo cumañi sahma ñu, cumañi cha cachi ñu, ¹⁶ ta minoo nyoho catyí ndo chí ñu: “Cuñhan ta Nyoo na cocumi ra chuun. Na coo ca sahmon ta cha cachun”, catyí ndo. Soco ña chahá ndo cha chiñuhú chí ñu. çÑáa ri tuhun cuan? ¹⁷ Ñahri yahví nyaa cha catyí yo vatyí chinó iñi yo chí Nyoo, ta ña tyinyeé yo chí tahan yo.

¹⁸ Vasi yihí ndo cua catyí ndo: “Yoho chíhin cha chinó iñun chí Nyoo ta cuñun cacun, ta yuhu caqui soco chíhin cha vaha ñáyivi cuví ta chíhin cha tyinyeé chí tahan yo.” Vaha. Soco yuhu catyí chuun, çatu cuví sañahun chí tyi ndicha chinó iñun chí Nyoo tatu ña vaha ñáyivi cuvún ta ña tyinyeún chí tahan? Ma cuví. Soco yuhu chíhin cha tyinyeé chí tahan yo sañahí chuun vatyí chinó vaha iñi chí Nyoo. ¹⁹ Ta yoho chinó vavaha iñun tyi iyó noo ri Nyoo. Vaha cha chinó iñun. Soco cuihna chinó tucu iñi ra cuan tyi iyó noo ri Nyoo. Ta ñihí ra chíhin cha yuhví ra vatyí ma cacu ra. ²⁰ Ma tondo xaan caca xiñun. Ma cutuñi iñun vatyí tatu chinó iñi yo ta ña sacuví yo cha vaha, ñahri yahví nyaa cha chinó iñi yo. ²¹ Ra Abraham sutu chahnu yo, cuví ra noo ra vaha nuu Nyoo cha cuenda cha sacuví ra cha catyí Nyoo. Vatyí chahá ra chí sehe ra, ra Isaac chí Nyoo tari cuhva catyí Nyoo chí ra. ²² Nyehún vatyí chinó iñi ra Abraham chí Nyoo ta chaha cha chinó iñi ra ta sacuví ra tuhun cha catyí Nyoo chí ra tyi sacuví ra. Ta nu sacuví ra cuhva catyí Nyoo chí ra, yucuan cuví nu natuvi vaha cha chinó iñi ra chí Nyoo. ²³ Ta tyicuan caa chinó cava tari cuhva catyí nu tutu Nyoo tyehe caa: “Ra Abraham chinó iñi ra chí Nyoo ta yucuan chaha Nyoo sahá ra tuhun tyi vaha ra nuu ra.” Ta iyó inga nu catyí chí: “Ra Abraham, nanduví ra amigo Nyoo.”

²⁴ Ta tyicuan caa nyehe yo vatyí vaha yo nuu Nyoo cha cuenda cha nyacuví yo cha vaha, ta ñima cha cuenda cha chinó ri iñi yo chí ra. ²⁵ Ta tyicuan caa tucu cu Rahab ñaha cata iñi cha chiyo ta cha naha. Yahá cha sacuví ña cuatyí, sacuví ña cha vaha quiví chahá ña nu cacohon xehe ra cha tachí ra Josué. Ta tyinyeé ña chí ra cha cuhun ra inga ityi. Ta cha cuenda cuan Nyoo sahá ra tuhun tyi vaha ña. ²⁶ Ta tyicuan caa tucu cuví noo coño ñuhu ñáyivi. Tatu ñahri ca cha nyitó ñu yihí chichi coño ñuhu cuan, ñahri ca vale chí. Ta tyicuan caa yoó, tatu ña sacuví yo cha vaha, ña vale cha chinó iñi yo.

3

Yoso caa saha cuenda yo cuhva cahan yo

¹ Nyoho yañi, ma yatyi xaan quichi cuvi ñiñi ndo cuvi ndo noo ra sañahá tuhun Nyoo. Vaty nyuhu cha sañahá ndi tuhun Nyoo, tatu ña vaha sañahá ndi, cahnu ca cuatyí cuvi, ta cuaha ca cutachi tuñi Nyoo chi ndi. ² Vatyí ni noo yo ta ña sacuví yo maa maa ri maa cha vaha. Soco tandihí yo cuaha ri cuhva sacuví yo cuatyí. Soco tatu noo yo cuví cunyaca ñaha vaha yo cuhva cahan yo tacuhva ma coo cuatyí yo cha cuenda cha cahán yo, cuñí chí catyí vatyí ñahri cuatyí yo vatyí cuví tucu cunyaca ñaha yo tandihí coño ñuhu yo. ³ Vatyí tatu tyihí yo yoho yuhu caballo cuví cunyaca ñaha yo chí ti, vasi cahnu ti. ⁴ Ta tyicuan caa tucu noo barcu cahnu, vasi cahnu chí soco chihin noo vitu luhlu ri cha nyaá chata chí, cuví sacuhun ra chí chí nya ityí nu cuñí maa ra, vasi ñihí tatyí. ⁵ Ta tyicuan caa tucu yaa yo. Cuví chí noo cha luhlu ri. Soco cahnu xaan cahnu xaan nanduví noo tuhun luhlu ri cahan yaa yo. Tari nahnu cuví cayu chihin ñuhu lee cha tyaa yo chichi cuhu ta ndi maa yutun cayu. ⁶ Vatyí tyicuan caa yaa yo tari noo ñuhu luhlu cuví chí. Ta cuví chí tari noo cha quíñi caa cahnu cha ñohó chichi coño ñuhu yo, ta sativí chí chí coño ñuhu yo ta tandihí cuhva iyó yo ñayiví, vatyí suri maa cuihna, ican tyiyuhú chí chí. ⁷ Ñayiví cuví samasu ñu tandihí ri nuu quiti: saa, coo, ta quiti cha iyó chichi tyañuhu, ta samasú ñu chí ti. ⁸ Soco yori cuví samasu yaa yo. Vatyí cuví chí noo cha ña vaha cha ña chahá chí cha cunyaca ñaha yo chí chí. Tari noo coo, tyaá ti chí ñayiví, tyihí ti venenu ti ta chíhi ñayiví. Ta tyicuan caa yaa yo. ⁹ Vatyí suri chihin yaa yo sacahnú yo chí Nyoo Sutu yo. Ta suri chihin cuan cahán ña vaha yo chí ñayiví cha savahá Nyoo tari cuhva caá maa ra. ¹⁰ Suri maa chihin yuhu yo sacahnú yo chí Nyoo. Ta suri chihin cuan cahán yo cha quíñi caa. Soco yañi, ña tahán chí cha sacuví yo tyicuan caa. ¹¹ Vatyí, ¿atu cuví quita ndutya vixi ta ndutya uva noo ndohyo? Ma cuví. ¹² Yañi, ¿atu cuví quita papaya nuu noo tumangu, o cuví cuhva tupapaya noo mangu? Ma cuví. Ta tyicuan caa ma cuví quita ndutya uhva ta ndutya vixi noo ndohyo.

Cha chíñi tuñi cha vaha ca

¹³ Tatu yihí ndo cha chitó ndo ta iyó cha chíñi tuñi chí ndo, sañaha ndo chihin cha cachi iyó ndo. Ta sacuví ndo cha vaha chihin cha ma cahnu saha ndo chí ndo, vatyí iyó cha chíñi tuñi Nyoo chí ndo. ¹⁴ Soco tatu iyó tuhun nyiyo ñiñi ña vaha chíhi añima ndo, sacuví ndo cha sacuví ndo soco cha cuenda cha cuñí ndo cuvaha ndo nuu ñayiví, ta cha tyicuan caa nyacuví ndo, ña tahán chí cuyaa ndo tyí iyó cha chíñi tuñi chí ndo, vatyí cha cuyaa ndo, sandaví ñaha ndo cuví cuan, ta tixehé ndo cha ndicha. ¹⁵ Vatyí

tatu chíca xiñi ndo tyicuan caa ñima cha chíñi tuñi Nyoo cuví cuan, soco cuvaha chíca xiñi ñu ña ñohó nuu Nyoo cuví. Cuenda cuihna cuví. ¹⁶ Vatyí tatu nyiyo ñiñi ndo ta cuñí ndo cuvaha ndo nuu ñayiví, yucuan cuví nu ican ñima nyicú ndo. Ta iyó tucu tandihí inga nuu cha ña vaha nu nyicú ndo. ¹⁷ Soco tatu iyó cha chíñi tuñi Nyoo chí ndo, ndaa iyó ndo, cachi iyó ndo. Ta nanducú ndo cuhva coo vaha ndo chihin ñayiví chihin cha vita ñiñi ndo. Ta vaha ñayiví cuví ndo. Ta cachi vaha chíca xiñi ndo. Ta cundahví cuñí ndo chí ñayiví. Ta nducú ndo cha vaha chí tandihí ñayiví chihin cha ñiñi ndo. ¹⁸ Tatu nanducú yo cha coo vaha yo chihin ñayiví, ta sañihí yo coo taxi ri yo chihin ñu, cuacoo yo noo ñayiví cha cuiñi.

4

Ma sacuví yo cuhva cuñí coño ñuhu yo

¹ ¿Ñáá tuhun iyó tisihi nu nyicu ndo? ¿Ñáá tuhun iyó cuatyí? Cha cuenda cha ña vaha cha cuñí coño ñuhu ndo. Vatyí tyicuan ri iyó cha cuñí ndo ta yucuan sacaání tahan chí ndo. ² Nyoho cuñí ndo coo ñáá ndihí cha coo chí ndo. Ta ñahri iyó chí ndo. Tyicuan ta sataí ñiñi ndo ta chahñi ndo tacuhva ñihí ndo. Iyo tahan ndo chihin cha nyiyo ñiñi ndo ñáá cha nyehé ndo soco ña cuví ñihí ndo. Tyicuan ta cañí tahan ndo. Iyó cuatyí nu nyicú ndo soco ña ñihí ndo cha cuñí ndo. Vatyí ña chicán tahvi ndo chí Nyoo. ³ Ta tatu chicán tahvi ndo chí Nyoo, ni ri ña ñihí ndo cha cuenda vatyí ña vaha chicán ndo. Vatyí cuñí ndo soco cha sanaa ndo cha caca noo ri maa ndo cuhva cuñí ñayiví. ⁴ Ña ndicha cha chinó ñiñi ndo chí Nyoo. ¿Atu ña chitó ndo vatyí tatu nyacuví ndo cuhva cuñí ñayiví, ñu xaan ñiñi chí Nyoo cuví ndo vatyí ña nyacuví ndo cuhva cuñí Nyoo? Yucuan chaha tatu yihí ndo nyacuví ndo cuhva cuñí ñayiví, ñu xaan ñiñi chí Nyoo cuví ndo. ⁵ ¿Atu cha caha ri catyí nu tutu Nyoo vatyí Tatyí li cha chahá Nyoo coo añima yo, cuñí xaan chí chí yo, ta cuñí xaan chí chí yo? Cuñí Nyoo cha ñin ri chí maa ra cua cuñí xaan yo. ⁶ Soco tyinyeé ca ra chí yo tacuhva vatyí cuví nacuhva ndihí yo chí yo chí ra. Yucuan chaha catyí tucu tuhun Nyoo vatyí Nyoo ña tahán ñiñi ra chí ñu cahnu saha chíhi. Soco tyinyeé ca ra chí ñu nacoó tyi chíñuhu ra chí ñu. ⁷ Ican tuhun nacuhva vaha ndo chí ndo chí Nyoo. Ma quichaha ndo nu cahán cuihna chihin ndo. Ta maa ra cucacacono ra nyehe ra chí ndo. ⁸ Tuhva yatyin ndo chí Nyoo ta maa ra tuhva yatyin ra chí ndo. Nyoho ñu iyó cuatyí, sandundí ndo chí ndo. Ta nyoho cha uvi nyaá xiñi ndo sandundí ndo ñiñi ndo ta cuhva ndo na sacutu Nyoo añima ndo chihin cha vaha, tyicuan ta cundundí ndo nuu ra. ⁹ Cucuihya cuñí ndo. Cuacu ndo. Na ndichí

xiñi ndo vatyi ña vaha cuhva iyó ndo. Cha nuu cha cuacu ndo chihin cha sii cuñi ndo cuacu ndo chihin cha cuihya iñi ndo. Ta cha sii cuñi ndo na nanduvi chi tucuihya iñi. ¹⁰ Ndahvi saha ndo chi ndo nuu Sutu Mañi yo, ta maa ra cusanducahnu ca ra chi ndo.

Ma nyehe nyaa yo chi tahan yo

¹¹ Yañi, ma cahan ña vaha ndo siqui noo tahan ndo. Vatyi ñu cha cahán ña vaha siqui noo tahan, o nyehé nyaa ñu chi ñu, siqui ley Nyoo cahán ña vaha ñu ta nyehé nyaa ñu. Vatyi tatu nyehe nyaun, juez nasahún chuun cha nuu cha quichahún nu cahán ley cuan. ¹² Vatyi noo ri ra cuví ra cha chahá ley cuan. Ta suri ra cuví ra juez. Ta suri maa ra cuví ra ra sacacu chi yo, o sacunaa ra chi yo. Soco *zyóó* ñu cuví yoho vatyi nyehe nyaun chi inga ñu, ta sacutuñun chi ñu tari cha juez cuvún?

Ña chitó yo ñáá cha cucuvi chi yo tyaan, ta yucuan chaha ña tahán chi cahnu saha yo chí yo

¹³ Vityin cuiñi ndo tuhun ihya, nyoho cha catyí ndo: “Vityin o tyaan cuhun yo ñuu cuan, o inga ñuu cuan. Ta yucuan cunyya yo noo cuiya vatyi sahatyiño yo ta saha ganaa yo xuhun”, catyí ndo. ¹⁴ Ta ni ña chitó ndo cha cucuvi tyaan. Vatyi ñayivi cha iyó yo cuví chi tari noo vico nuhu vatyi noo ri cuhva yihí chi, ta tañi ri ta cha naa tucu chi. ¹⁵ Soco tahán chi catyí ndo tyehe caa: “Tatu Sutu Mañi yo ta cuñi ra, coo yo ta sacuvi yo ihya o yucuan.” ¹⁶ Soco nyoho nyee xaan ndo cuñi maa ndo ta cahnu sahá ndo chi ndo. Ta ña vaha tyicuan caa. ¹⁷ Vatyi tandihí yo cha chitó yo sacuví yo cha vaha ta ña sacuví yo, chicoó cuatyí yo cha tyicuan caa.

5

Nu catyí ra Santiago ñáá cha cucuvi chi ñu tyayí

¹ ¡Cuiñi ndo tuhun ihya, nyoho ñu tyayí! Cuacu ndo chihin cha cuihya cuñi ndo, cañachaa ndo cha cuenda tindoho cha cunyehe ndo. ² Vatyi cha tyayí cha sacayá ndo, cha cuñi tiví. Ta sahna finu ndo, ndii maa cha cuñi cachi tiquixin. ³ Xuhun cuaan ndo ta xuhun cuichin ndo cuxi vavaha chi. Ta yucuan chahá chi noo seña cha chinyacuví ndo. Ta tari quivi cha cucahmi chi chi ndo tari cayu ñuhu vatyi cucunaa ndo. Tyi sacayá xaan ndo cha tyayí ndo tyi cotyiño ndo tyaan. ⁴ Ta ña tyiyahví ndo yahví cha tahán chi chi ñu ndahví cha sahatyiño nu tyiño sahá ndo. Ta vityin chicán ñu cuatyí chaha ndo nuu Sutu Mañi yo ra nyacá ñaha ángel cha cuví sindaro cuenda ra. Ta maa Sutu Mañi yo chiñi ra tuhun cahán ñu ndahvi cuan. ⁵ Ihya siqui ñuhu ñayivi tyaquí iyó ndo, tyayí iyó ndo. Ta sacuvi ndo

yoso cuhva cuñi maa ndo. Tari nduxahan quini cha cucuvi, tyicuan caa nyoho, vatyi cucunaa ndo. ⁶ Ta nyoho tyaá ndo cuatyí chaha ñayivi vaha. Ta chahñi ndo chi ñu. Ta ñu ndahvi cuan ña cuví sacacu ñu chi ñu.

Cuatyú yo chi ra Cristo chihin cha cama iñi yo

⁷ Yucuan chaha, yañi, nyatú yo chihin cha cama iñi yo nyacua nya quivi quichi Sutu Mañi yo. Tari noo ra cha sahá tyiño chi cuhu nyatú ra nyacua nya cha coon savi cha xihna ri ta cha yaha savi nu ndihí, tyicuan ta naquehen ra ñáá cha tachí ra. ⁸ Ican tuhun cuatu ndo chi Nyoo chihin cha cama iñi ndo. Ta cunii ca iñi ndo vatyi cha cuyatyin cha quichi Sutu Mañi yo.

⁹ Yañi, ma tyaan ndo cuatyí chaha tahan ndo, coto tachi tuñi Nyoo chi ndo. Vatyi Nyoo, juez cuví ra. Ta cha cuñi quichi ra. ¹⁰ Yañi, saha ndo cuenda cuhva chiyo ra profeta cha chaha cuenda tuhun Sutu Mañi yo ta cha naha, vatyi cuhva cha canyehé ra tindoho, cacunye xaan ra. ¹¹ Chitó yo vatyi sii xaan cuñi ra cha cunyeé tandihí nuu tindoho. Tari ra Job. Chifí ndo tuhun yoso caa cunyeé ra tindoho cha nyehe ra. Ta chitó ndo vatyi nu ndihí tuhun, cuaha xaan cha vaha chahá Sutu Mañi yo chi ra. Vatyi Sutu Mañi yo iyó xaan ticahnu iñi chi ra. Ta cundahvi cuñi ra nyehe ra chi yo. ¹² Soco yañi, ma tyanaha ndo tacuhva chino iñi ñayivi vatyi ndicha cha sacuví ndo. Ma tyanaha ndo ni tuhun andivi, ni tuhun ñuhu ñayivi, ni ma catyí ndo: “Chitó vaha maa Nyoo.” Tatu ndicha tuhun cahán ndo, ndicha catyí ndo. Soco tatu chitó ndo tyi ña ndicha, catyí ndo tyi ña ndicha, vatyi coto tachi tuñi Nyoo chi ndo.

¹³ Tatu nya noo nyoho nyehé ndo tindoho, caçan tahvi ndo chi Nyoo. Ta tatu nya noo ndo sii cuñi ndo, çata ndo yaa Nyoo. ¹⁴ Tatu nya noo ndo cuhvi ndo, cuñi chi cana ndo chi ra nyisó tyiño vehe ñuhu vatyi cacan tahvi ra chaha ñu cuhvi cuan ta tyihí ra aceteye chi ñu chihin sivi ra Cristo. ¹⁵ Ta tatu chinó vavaha iñi ra chi Nyoo cuhva cha chicán tahvi ra, ñu cuhvi cuan cuacu ñu. Ta Sutu Mañi yo cusanducuita ra chi ñu. Ta tatu sacuví ñu cuatyí, Nyoo cusaha ra ticahnu iñi cuatyí ñu. ¹⁶ Yucuan chaha ñahma ndo cuatyí ndo nuu tahan ndo. Ta caçan tahvi ndo chaha tahan ndo vatyi na nduvaha ndo. Vatyi nu chicán tahvi noo ra vaha chicá chihin Nyoo iyó xaan tunyee iñi Nyoo. ¹⁷ Tari ra Elías ra profeta Nyoo ta cha naha. Cuví ra noo rayí tari maa yo. Ta chicán tahvi ra chi Nyoo vatyi ma coon savi. Ta ña coon savi uñi cuiya sisava. ¹⁸ Yahá cuan ta nacoçon tahvi tucu ra chi Nyoo inga chaha. Ta nacoçon savi inga chaha. Ta cuvahá chiti cha tachí ñayivi nu ñuhu.

¹⁹ Yañi, tatu noo tahan ndo sandoḡ ñu
tuhun ndicha Sutu Mañi yo, ta cuanuhu
ñu ñayiv_i inga chaha, ta tatu tyinyeé ndo
chi ñu na ndichi ñu ityi Nyoo inga chaha,
²⁰ cḡto ndo vatyí cha tyinyeé ndo chi ñu
sacuv_i cuatyí cuan na ndihvi ñu ityi Nyoo
inga chaha, sacacú ndo añima ñu ndahvi
cuan coto cuhun ñu anyaya. Ta sacuv_i ndo
vatyi saha Nyoo tıcahnu iñi tandih_i cuatyí
ñu.

Carta Cha Xihna Ri Cha Sacuhun Ra Apóstol Pedro Chi ñáyivi Yihí Cuenda Nyoo

Nu tyaq ra Pedro noo carta chi ñáyivi yihí cuenda Nyoo

¹ Yuhu ra Pedro cuví noo apóstol cuenda ra Jesucristo, ta cuñí chi catyí, vatyí maa ra tachí chii vatyí caque tyiño ra. Tyaí noo tutu ihya chi nyoho cha ña iyó ndo ñuu ndo, vatyí iyó ndo noo noo ñuu ityí Ponto, ta Galacia, ta Capadocia, ta Asia ta Bitinia. ² Chi nyoho nacachí vaha maa Nyoo Sutu yo vatyí nyata cha naha chitó ra vatyí tyicuan caa cuquichaha ndo chi ra. Maa Tatyí Ii tyinyee chi ndo vatyí cuví nacuhva ndo chi ndo chi Nyoo, ta tyicuan caa cuví quichaha ndo chi ra Jesucristo, ta ndundí ndo chihin niñi ra. Na naquehen ndo cuaha ca cha vaha ta cha taxi ri coo añima ndo sahá maa Nyoo.

Noo cha yihí vaha iñi yo vatyí cuñihi yo

³ Sacahnu yo chi Nyoo Sutu Sutu Mañi yo Jesucristo vatyí ndahvi cuñi ra nyehé ra chi yo ta chahá ra cha nacacu chaa yo inga chaha tacuhva coo yo ñáyivi chaa cha ma naa ca maa. Ta yucuan cuví cha chahá cha cuíta iñi yo cha cuñihi yo vatyí cha nandotó ra Jesucristo. ⁴ Ta Nyoo cuacuhva ra tandihí cha tahán chi chi yo cha cumí vaha ra nya andívi. Ta cuví chi noo cha ma naa ta ni ma tiví, ta ni ma ndahva chi tari ndahva ita. ⁵ Ta vatyí chinó iñi yo chi Nyoo maa ra sahá cumi chi yo chihin tunyee iñi ra nyacua nya cacu ndihí añima yo. Ta cusañaha ra chi yo ñáá cha cuñi chi catyí cha cacú yo nu cuandihí tyembu. Vatyí cha nyatú tuhva cuan chi yo.

⁶ Ta yucuan chaha sii xaan cuñi ndo, vasi tahán chi cha nyehé ndo ndihí nuu tindoho suhva quívi. ⁷ Vatyí cha chinó iñi yo chi Nyoo, vaha ca ican saha xuhun cuaan. Vatyí xuhun cuaan cuví chi noo cha cuandihí. Soco cuví nyehé yo chihin ñuhu tatu vaha chí, vatyí chihin cha ihñi cundutya chi ta cucayu cha ña vaha yihí chihin chi. Soco ndoó xuhun cuaan vaha cuan. Tyicuan caa tucu nyehé Nyoo chi ndo tatu vaha chinó iñi ndo chi ra. Yucuan chaha nyehé ndo tindoho vityin. Soco tatu ña ndu uví iñi ndo cha chinó iñi ndo chi ra, cutuvi ndo nuu ra ta cusacahnu ñáyivi chi maa ra ta chi maa ndo quívi quichi Sutu Mañi yo Jesucristo inga chaha.

⁸ Nyoho cuñi ndo chi ra Jesucristo vasi ta nyehé ca ndo chi ra. Ta vasi ña nyehé ndo chi ra vityin, soco chinó iñi ndo chi ra, ta sii

xaan sii xaan cuñi ndo nyacua ña ñihí ca ndo cuhva catyí ndo yoso cuhva cha sii cuñi ndo. ⁹ Vatyí cucacu ndihí añima ndo ta yucuan cuví cha cuñihi ndo vatyí chinó iñi ndo chi Nyoo.

¹⁰ Siquí cuan canducú tuhun ra profeta Nyoo ta cha naha. Ta canducú xaan ra cuhva coto ra ñáá cha cuví cuan. Ta catyaa ra nu tutu cuenda tumañi iñi cha cucuhva Nyoo chi yo. ¹¹ Ta Tatyí Ii ra Cristo sacotó chi chí ra ñáá ndihí tindoho cunyehe ra Cristo, ta yaha cuan yoso caa cusanducahnu Nyoo chí ra. Ta profeta cuan canducú xaan ra cuhva cacoto ra yóo ra cucuvi ra Cristo cha cucuvi chi tyicuan caa, ta ama cucuvi tuhun cha catyí Tatyí Ii chí ra. ¹² Soco sacotó Nyoo chí ra vatyí tyiño cha casacuví ra, ñima cha vaha chí maa ra cuví, soco cha vaha chí maa yo cuví. Ta ican cuví cha sacotó ndi chí ndo vityin. Vatyí chihin tunyee iñi maa Tatyí Ii cha saquichí Nyoo, cahán ndi tuhun ra Cristo nuu ndo yoso caa sacacú ra chí yo. Ta ángel cacuñi xaan ra cacoto ra tuhun ihya.

Nacanaq Nyoo chi yo vatyí coo yo noo ñáyivi cachi

¹³ Yucuan chaha saha vaha ndo cuenda cha cua sacuvi ndo, ta cachi cgo ndo. Quíhi vaha iñi ndo cha cuacuhva Nyoo chí yo cha cuenda cha cuñi ra chí yo. Cuaha cuacuhva ra chí yo quívi quichi ra Jesucristo inga chaha. ¹⁴ Ta cgo ndo tari noo sehe cha quichahá chí nu cahán sutu chí. Ma coo ndo tari chiyo ndo quívi ta ni cumañi ca cohon nuu ndo chí Nyoo. Vatyí cha ña vaha cha cuñi coño ñuhu ndo chinyacá ñaha chí chí ndo. ¹⁵ Soco cgo ndo noo ñáyivi ndii, vatyí maa Nyoo, ra cha nacanaq chí ndo, ndii ra. ¹⁶ Vatyí tyicuan caa catyí Nyoo nu tutu ra. “Cundi ndo vatyí mai ndii”, catyí Nyoo.

¹⁷ Tatu tuhvá ndo chicán tahvi ndo chí Nyoo ta catyí ndo “Sutu Mañi yuhu” chí ra, saha ndo cuenda chí ndo ta saha ndo ñáyivi chí ra cha ni ri ca cha iyó ndo siquí ñuhu ñáyivi. Vatyí Nyoo ña sahá ra cuenda cuhva cahán yo. Soco sahá ra cuenda cuhva iyó noo noo yo, an cuví ri yo ñu tyayii, an cuví ri yo ñu ndahvi. ¹⁸ Nyoo nasama ra cuhva chiyo ndo, vatyí cuhva cuan ña vaha, Cuhva cha sanandog Sutu chahnu ndo chí ndo cuví. Ta chitó ndo tyi Nyoo tyiyahvi ra tacuhva cuví cacu añima yo. Soco ñima chihin xuhun cuaan o xuhun cuichin. Noo cha cuandihí noo quívi cuví cuan. ¹⁹ Soco cha tyiyahvi maa Nyoo chihin niñi ra Cristo. Ta yucuan cuví noo cha vaha xaan ca. Ta ra Cristo cuví ra tari noo mbee luhlu quíti vaha, ñahri nu pehe ti, tyicuan caa ra Cristo, ñahri cuatyí ra soco chíhi ra. ²⁰ Ta nyata ni cumañi ca chino ñuhu ñáyivi chicunyaa cuhva cha cucuvi chí ra Cristo tyehé caa. Soco ña cuví cha numi ri. Nyacua nya vityin

nu cuandihi quivi, chinq cava tandihi cuan cha cuenda cha vaha chi maa yo. ²¹ Cha cuenda ra Cristo ta chinó iñi ndo chi Nyoo. Vatyí ican ra sanandoto chi ra Cristo cha yaha chihí ra. Ta sacahnú Nyoo chi ra. Ta yucuan chaha chinó vaha iñi ndo chi Nyoo tyi cunaquehen ra chi ndo.

²² Maa Tatyí li Nyoo tyinyee chi ndo ta cuví quichahá ndo tuhun cha ndicha. Yucuan ta cuví cuñi ndo chi tahan ndo cuenda Nyoo chihin cha ñi iñi ndo. Tyicuan caa cuñi chi cha cuñi ndo chi tahan ndo chihin cha vaha yihí añima ndo ta chihin tandihi fuerza ndo. ²³ Vatyí tari quivi cha nacacú chaa ndo, ñima tari cacu ndo chihin sutu ndo ihya ñuhu ñayivi, vatyí ra cuan numi ri chihi ra, soco nacacú chaa ndo chihin tuhun Nyoo cha ña tuhvá chihí vatyí tuhun Nyoo tyicuan ri maa iyó. ²⁴ Vatyí tyehe caa catyí tuhun Nyoo:

Tandihi ñayivi iyó siqui ñuhu ñayivi ihya cuví ñu tari cuhu.

Ta cha cahnu cha sacuví ñu cuví chi tari ita. Vatyí cuhu cuan na ityi, ta coyo ita cuan. (Ta tyicuan caa ñayivi, chihí ri ñu.)

²⁵ Soco tuhun Sutu Mañi yo tyicuan ri maa iyó.

Ican cuví tuhun cha cahán ndi chihin ndo: tuhun vaha cha sacacú Nyoo añima yo.

2

¹ Yucuan chaha na sandoo yo tandihi nuu cha quíni caa. Ma sandavi ñaha yo chi ñayivi. Ma saha ri maa yo tyi vaha yo ta ña ndicha. Ma nyiyo iñi yo nyehe yo cha iyó chi inga ñayivi. Ñahri cuendu cahan yo.

² Soco tari cha lee cha ni cacu, nanducú vavaha chi cha caxin chi, tyicuan caa nducu ndo tuhun Nyoo tacuhva vatyí chihin cuan cuahnu ndo ta cohon nuu ca ndo chi Nyoo, nyacua nya cacu ndihi añima ndo, ³ tatu ndicha cha nacotó ndo vatyí Sutu Mañi yo, vaha xaan ñayivi cuví ra chihin yo.

Tari yuu nyitó, tyicuan caa cuví ra Cristo

⁴ Sayatyin ca ndo chi ndo chi Sutu Mañi yo. Vatyí cuví ra tari noo yuu nyitó. Ñayivi ña cuñi ñu cotyíño ñu yuu cuan. Soco Sutu Mañi yo cuví ra tari noo yuu tyaqui cha nacachí Nyoo. ⁵ Ta nyoho tucu cuví ndo tari yuu nyitó. Ta maa Nyoo tari noo ra savahá vehe cuví ra. Ta yucuan chaha cuhva ndo na sandu ñin ri ra chi ndo tacuhva cuví ndo tari noo vehe nu coo ra. Na cu ñin ri ndo ta cuhva ndo cha sandu ii Nyoo chi ndo tacuhva cuví sacuví ndo tyiño nuu ra. Ta maa maa ri tyiño cha sacahnú ndo chi Nyoo cucunyaa ndo. Vatyí yucuan cuví cha tahán iñi Nyoo sacuví yo chihin tunyee iñi maa ra Jesucristo. ⁶ Vatyí catyí tucu nuu tutu Nyoo tyehe caa:

Nyehe xihna, yuhu nacachí noo yuu cha chiñuhú ca ta tyaquí xaan ca, ta chaquíñ yuu cuan nu cuasavahi vehi nya Sión.

Ta ñu chinó iñi chi ra cha cuví yuu cuan, ma quehen ñu ticahan nuu. Tyicuan caa catyí Nyoo tuhun ra Cristo nuu tutu ra.

⁷ Yucuan chaha, cha cuenda yoó cha chinó iñi yo chi ra Cristo ra cuví yuu cuan, chiñuhú xaan ra chi yo. Soco cha cuenda ñu cha ña chinó iñi chi ra, cuví ra tari noo yuu cha cahán Nyoo tuhun nu tutu ra ta catyí chi tyehe caa:

Yuu cha ña cacuñi ra casavahá vehe cotyíño ra, ican cuví yuu cha chiñuhú ca, catyí chi.

⁸ Ta catyí tucu chi:

Ican ra cuví yuu cha cuaha xaan ñu cunañi chaha ta nduva ñu.

Cuví ra noo cava cha sanduvá chi ñu, catyí chi nuu tutu Nyoo.

Tari cha nduvá ñu cuví cuan vatyí chiñi ñu tuhun Nyoo, ta ña quichahá ñu. Vatyí tyicuan caa nyaá vatyí cusacuví ñu cuan.

Ñayivi cha yihí cuenda Nyoo

⁹ Soco nyoho cuví ndo ñayivi nacachí vaha Nyoo. Ta tari tata sutu cuví ndo tyi sacuví ndo tyiño nuu Nyoo, ra nyacá ñaha. Ta cuví tucu ndo noo ñayivi ii nuu Nyoo. Vatyí cuví ndo ñayivi chi maa ra, tacuhva vatyí cahan ndo tuhun cha vaha cha sacuví ra. Vatyí maa ra natavá ra chi ndo nu ñaa iñi ta vityin cuahan ndo nu ndichin nu tyaquí. ¹⁰ Ta quivi ca cuan, cuví ndo ñayivi cha ñima ri tuhun. Soco vityin ñayivi chi Nyoo cuví ndo. Ta quivi cuan yori cundahví cuñi nyehe chi ndo, soco vityin Nyoo cundahví cuñi ra nyehé ra chi ndo.

Nu catyí ra Pedro vatyí coo yo, soco sacuví yo tyiño nuu Nyoo

¹¹ Yañi, cuñi xain chi ndo. Chicá noo ndo siqui ñuhu ñayivi ihya, soco ñima ca ra ñuhu ñayivi ihya cuví ndo. Soco andívi cuví ñuu ndo. Yucuan chaha catyí chi ndo ma cuhva ndo ityi chi coño ñuhu ndo vatyí sacuví ndo cha ña vaha cha cuñi chi. Vatyí tari quivi cañi tahan cuan chihin añima yo cuví cuan. ¹² Saha ndo cuenda cuhva iyó ndo mahñu ñu cha ña ñohó nuu Nyoo. Vatyí vasi cahán ña vaha ñu siqui ndo, ta catyí ñu vatyí ña vaha ndo, soco nyehé ñu cha vaha cha sacuví ndo ta cusacahnú ñu chi Nyoo nachaa chi quivi cha cuquichi nyehe ra cha sacuví yo.

¹³ Ta cha cuenda cha cuñi ndo chi Nyoo, quichaha ndo chi ra cuví tyiño ñuu nu iyó ndo. Quichaha ndo chi ra cuví tyiño, cuví ri ra rey cahnu ca, ¹⁴ o cuví ri noo ra tachí rey chi vatyí tachí tuñi ra chi ra iyó cuatyí o tatu ñahri cuatyí yo ma tachí tuñi ra chi yo, soco cucatyí ra tyi vaha yo. ¹⁵ Vatyí Nyoo

cuñi ra vatyi chihin cha vaha nyacuví ndo ta sandihi ñu tondo cha cuví yuhu ñu, ñu cahán cha ña ndicha vatyi ña chító ñu tuhun cahán ñu.

¹⁶ Cgo ndo tari cha yori nyacá ñaha chi ndo, soco ñima cha cuenda cuan ta cusacuvi tucu ndo cha ña vaha. Soco sacuvi ndo tyiño nuu Nyoo. ¹⁷ Saha ndo ñáyivi chi tandihi ñáyivi. Cuñi ndo chi ñu yihí cuenda Nyoo. Saha ndo cuenda vatyi Nyoo nyehé ra tandihi cha sacuví ndo. Saha ndo ñáyivi chi ra nyacá ñaha.

Uvi tahan cuhva nyehé yo tindoho

¹⁸ Nyoho cha cuví ndo musu, cuhva ndo cha cunyaca ñaha chitoho ndo chi ndo, ta quichaha ndo chi ra, vasi xaan ra o vasi vaha ra. ¹⁹ Vatyi tatu cunyeé yo tindoho cha sanyehé ñáyivi chi yo cha cuenda cha sacuví yo cha vaha nuu Nyoo, yucuan cuví cha chaá nuu Nyoo. ²⁰ Soco tatu sacuví ndo noo cha ña vaha ta tachí tuñi ñu chi ndo, ñahri maa tuhun cha cunyeé ndo tindoho cha nyehé ndo cha cuenda cuan. Soco tatu nyehé ndo tindoho cha cuenda cha sacuví ndo cha vaha, ta cunyeé ndo chihin cha cama iñi ndo, ican ihya cuví cha vaha nuu Nyoo. ²¹ Vatyi nacana Nyoo chi yo vatyi coo yo tyehe caa. Vatyi tyicuan caa tucu nyehé ra Cristo tindoho cha cuenda maa yo, na cutuhva yo ta quehen yo cha caá ra. ²² Maa ra ni noo cuatyí ña sacuví ra. Ni noo chaha ña sandaví ñaha ra chi ninoo ñáyivi. ²³ Cuhva cha cahán ñu chi ra, ña nacahán xaan ra. Cuhva cha nyehé ra tindoho, ña tyanahá ra chi ñu. Soco natyaa ra chi ra ndaha Nyoo, vatyi Nyoo tuhvá ra sacutuñi ra chi ñáyivi chihin cha ndaa ta chihin cha ndicha. ²⁴ Vatyi chata maa ra Cristo nicoso ndi maa cuatyí tandihi yo cuhva cha tacaá ra nu cruzi cuan. Tyicuan caa cuví tacuhva vatyi ma sacuví ca yo cuatyí, ta coo yo noo ñáyivi vaha. Vatyi cha cuenda cha ñicuehe maa ra, yoó nduvaha yo. ²⁵ Vatyi quivi cuan chicá noo ndo tari mbee cha cuanaá. Soco vityin nacuhva cuenda ndo chi ndo chi ra Cristo, ra cuví pastor cha sahá cuenda añima yo.

3

Yoso caa tahan chi coo ñu tandaha

¹ Tyicuan caa tucu nyoho, ñu iyó yii. Quichaha ndo chi yii ndo. Vatyi tatu ña quichaha ra tuhun Nyoo soco cunachino iñi ra cha cuenda cha nyehé ra cuhva iyó ndo. Ta ña chiñuhú ri cha cuví yuhu xaan ndo chihin ra. ² Vatyi nyehé ra tyi cachi iyó ndo ta sahá ndo ñáyivi chi ra. ³ Ta ma caca iñi ndo tuhun cha sandutyaqui ndo chi ndo cuhva nyehé ndo, cuví ri chihin cha iyo xaan sanduví ndo xiñi ndo, o cuví ri cha sandutyaqui ndo chi ndo chihin cha

tyaa ndo xuhun cuaan chi ndo, o cuví ri cha cuihno ndo sahma vaha xaan. Ma nducu ndo tandihi cuan. ⁴ Soco nducu ndo cuhva ndutyaqui ndo chihin cuhva vaha iyó ndo. Vatyi cha vita iñi yo ta cha taxi ri iyó yo, yucuan cuví cha quitá chichi añima yo. Ta yucuan ña tuhvá cuan tiví. Vatyi ñahri nonga cha tyaqui ca nuu Nyoo tari cuan. ⁵ Vatyi tyicuan caa cuhva chiyo ñusihí cha yihí iñi chi Nyoo ta cha naha. Tyicuan caa sandutyaqui ñu chi ñu, ta quichaha ñu chi yii ñu. ⁶ Tari cu Sara, quichaha ña chi ra Abraham yii ña. Ta catyí ña: “Tata”, chi ra. Ta nyoho tari sehe ña cuví chi ndo tatu sacuví ndo cha vaha tari maa ña. Ta ñahri cha yuhví ndo.

⁷ Ta tyicuan caa tucu nyoho ra iyó ñasihí. Cutuñi iñi ndo cuhva coo ndo chihin ñasihí ndo. Ta saha ndo ñáyivi chi ña, ñima vatyi yica ca ña cha nuu nyoho. Soco vatyi iñ ri naquehen ndo tumañi iñi cha chahá Nyoo chi ndo. Ta yucuan cuví ñáyivi iyó ndo. Vaha cgo ndo tyehe caa, tacuhva vatyi tñin cuenda Nyoo tuhun chicán tahvi ndo chi ra.

Nu catyí ra Pedro yoso caa tahan chi coo yo

⁸ Nu ndihi tuhun, cuñi chi cha iñ ri cuhva caca xiñi tandihi ndo. Ta cundahvi cuñi ndo nyehé ndo chi tahan ndo. Cuñi ndo chi tahan ndo cuenda Nyoo tari cha yañi ndo cuví. Vita cahan ndo chihin ñu. Ta ma cahnu saha ndo chi ndo. Vaha ñáyivi cuví ndo. ⁹ Ma sacuví ndo cha ña vaha chihin ñu sacuví cha ña vaha chihin ndo. Ni ma cahan ndo chi ñu tatu cahán ñu chi ndo. Soco cha vaha sacuví ndo chihin ñu. Vatyi Nyoo nacana ra chi ndo vatyi cunaquehen ndo cha vaha cha iyó chi ra. ¹⁰ Vatyi catyí tuhun Nyoo tyehe caa:

Ñu cha cuñi coo noo ñáyivi chihin tusii iñi, cuñi chi saha ñu cuenda cuhva cahán ñu.

Ta ma cahan ñu cha ña vaha, ta ni ma cahan ñu cuendu.

¹¹ Ta cuñi chi cha sandoo ñu cha ña vaha ta sacuví ñu cha vaha.

Nanducu ñu cuhva coo taxi ri ñu.

Ta ma saña ñu.

¹² Vatyi Sutu Mañi yo sahá cuenda ra chi ñu vaha.

Ta tyasohó ra nu chicán tahvi ñu chi ra.

Soco ñu sacuví cha ña vaha, xaan cuñi ra nyehé ra chi ñu.

¹³ ¿Yóo cha cuví sacuví cha ña vaha chihin ndo tatu nyoho tyicuan ri nducú ndo cuhva sacuví ndo cha vaha? ¹⁴ Soco vasi nyehé ndo tindoho cha cuenda cha sacuví ndo cha vaha, soco cucusi cuñi ndo. Ta ni ma nayuhvi ndo tatu tyanaha ñáyivi chi ndo. ¹⁵ Soco chichi añima ndo sacahnu ndo chi ra Cristo ta cuhva ndo na cunyaca ñaha ra chi ndo. Tyicuan ri caca iñi ndo tuhun

Nyoo tacuhva vatyí tatu ndaca tuhun noo ñu chi ndo ñáá tuhun chinó iñi ndo chi ra, soco cuví nacuhva ndo cuenda chí ñu chihin cha ña cahnu saha ndo chí ndo ta chihin cha ndicha sahá ndo ñáyivi chí ra. ¹⁶ Cachi cgo ndo tacuhva cha ma yuhví añima ndo nuu Nyoo, vatyí tatu cahán ña vaha ñáyivi síqui ndo cha cuenda cuhva vaha iyó ndo chihin tuhun ra Cristo, soco suri maa ñu cucahan nuu ñu cha cuenda tuhun cahán ñu síqui ndo. ¹⁷ Tatu maa Nyoo cuñí ra cha nyehé yo tindoho, vaha ca cha nyehé yo cha cuenda cha sacuví yo cha vaha ta ñima ca cha cuenda cha sacuví yo cha ña vaha. ¹⁸ Vatyí suri ra Cristo nyehé ra tindoho ta chihí ra ñin chaha cuiri cha cuenda cuatyí yo. Ra vaha cuví ra ta chihí ra cha cuenda yo ñu iyó cuatyí. Vatyí tyicuan caa nuñá ra ityi nachaa yo ityi nuu Nyoo. Chihí coño ñuhu ra, soco nandotó tucu ra chihin Tatyí Ii ra. ¹⁹ Tyicuan ta chihin Tatyí Ii ra chahan ra chicahan ra chihin añima cha ñohó vehe caa. ²⁰ Ta ican ñu cuan cuví ñu ña quichahá chí Nyoo quívi chiyó ra Noé ta tyembu chahnu. Ta nyatú Nyoo chí ñu nandu uvi iñi ñu cuatyí ñu cha ní ri ca cha cuahan chino barcu cha savahá ra Noé. Soco ña cuaha ñu cacú quívi sahví ndutya ñuhu ñáyivi. Uña tahan ri ñu cacú chihin ndutya vatyí nandaá barcu nu ñohó ñu nu ndutya cuan. ²¹ Ta tyicuan caa tucu maa yo tari quívi cacú yo chihin ndutya nu condutya yo. Cacú yo soco ñima cha cuenda cha nacatya yo coño ñuhu mecu yo. Soco cha cuenda cha chicán tahví yo chí Nyoo na sanduvii ra añima yo ta sacacu ra chí yo cha cuenda cha nandotó ra Cristo. ²² Ta nandaá xica ra andívi, ta nyaá ra chíyo vaha Nyoo. Nyacá ñaha ra chí ángel ta tandihí cha nyacá ñaha chí ñáyivi.

4

Na sacuvi yo tyiño nuu tahan yo yoso cuhva chaha Nyoo chí yo

¹ Yucuan chaha tari nyehé ra Cristo tindoho chihin coño ñuhu ra, sandunyeé ndo iñi ndo tacuhva cuví cunyeé ndo nyehé tucu nyoho tindoho. Vatyí ñu nyehé tindoho chihin coño ñuhu, ña sacuví ca ñu cha quiñi caa cha cuñí coño ñuhu ñu. ² Tacuhva vatyí cuví coo ñu cuhva cuñí Nyoo. Ta ma sacuví ca ñu cuhva cuñí coño ñuhu ñu. ³ Vityin cha yaha chinyacuví xaan ndo cha quiñi caa nu quichi chí. Sacuví ndo cuhva tahán iñi ñu ña ñohó nuu Nyoo. Ta chíyo ndo yoso cuhva cuñí ndo, cuaha vícui sacuví ndo, cuaha cha quichi cuví iñi coño ñuhu ndo cha quiñi caa chinyacuví ndo. Chihí ndo chihin ndixi. Maa maa ri víco chíyo ndo. Ta quiñi xaan sacahnú ndo xitohyo cha ña tahán chí sacahnú ndo. ⁴ Ta vityin iyo cuñí ñu ña ñohó nuu Nyoo vatyí ña cutahán ca ndo chihin ñu

ta ña sacuví ca ndo cha quiñi caa cuan. Ta yucuan chaha cahán ña vaha ñu síqui ndo. ⁵ Soco nyaá nacuhva ñu cuenda chí ra cha nyatú tuhva quívi sacutuñi ra chí ñu nyitó ta chí ñu chihí. ⁶ Yucuan chaha sacotó ra Cristo tuhun vaha chí ñu ndiyi ñandihí. Vatyí tacuhva cuví coo añima ñu tari iyó Nyoo, vasi cha cutuñí chí ñu tari cutuñí chí tandihí ñáyivi iyó síqui ñuhu ñáyivi quívi chíhi coño ñuhu ñu.

⁷ Soco cha cuyatyin cha cundihí tandihí maa. Yucuan chaha cachi cgo ndo ta cun- yaa vaha ndo tyiño cha chicán tahví ndo. ⁸ Ta cha xihna ri tahán chí cha cuñi xaan ndo chí tahan ndo. Vatyí tatu cuñí yo chí tahan yo, cuaha xaan chaha cusaha yo ticahnu iñi chí ñu, tyi maa Nyoo cuñí ra chí yo ta cuaha xaan chaha sahá ra ticahnu iñi chí yo. ⁹ Tatu chaá noo ñáyivi vehe ndo, vaha tyiñuhu ndo chí ñu ta ma cuñi ndo tyi sayangá ñu chí ndo. ¹⁰ Ta tahan tahan yo na sacuví yo tyiño nuu inga yo, yoso cuhva cha chahá Nyoo chí yo. Vatyí cuñi chí cha cotiyiño yo siin siin cha vaha cha chahá ra chí noo noo yo cha cuenda cha vaha chí inga tahan yo. ¹¹ Tatu chahá Nyoo vatyí ñihi vahun tuhun cahun chihin ñáyivi, cahán soco maa maa ri tuhun cha chahá Nyoo. Tatu chahá ra tyi sacuvun tyiño nuu ñáyivi, na sacuvun chihin fuerza cha chahá ra. Tandihí cha sacuví ndo, sacuví ndo tacuhva vatyí chihin tandihí cha nyacuví ndo sacahnú ndo chí Nyoo cha cuenda ra Jesucristo. Chí maa Nyoo tahán chí sacahnu yo. Ta na cunyaca ñaha ra chihin tunyee iñi ra tyicuan ri maa. Ta na cuví chí tyicuan caa.

Cuví cusii cuñi yo tatu nyehé yo tindoho cha cuenda ra Cristo

¹² Yañi, cuñi xain chí ndo. Ma iyó xaan cuñi ndo tatu vachí tindoho ñihi síqui ndo. Ma cuñi ndo vatyí ña tahán chí nyehé ndo tindoho. ¹³ Soco cusii cuñi ndo vatyí cuví nyehé ndo tindoho tari nyehé ra Cristo tindoho. Vatyí tyicuan caa ta cuví cusii tucu cuñi ndo na nyehé ndo cha cahnu cuví ra quívi cuquichi ra. ¹⁴ Tatu cahán ña vaha ñu síqui ndo vatyí nyicón ndo chí ra Cristo, cusii cuñi ndo, vatyí tyaquí xaan nyaá Tatyí Ii chihin ndo. Maa ñu cuan cahán ña vaha ñu síqui ra Cristo, soco nyoho sacahnú ndo chí ra. ¹⁵ Soco tatu nyehé ndo tindoho cha tyicuan caa, vaha, ta ñima ca cha nyehé ndo tindoho cha cuenda cha chahñi ndo, o cha suhú ndo, o cha sacuví ndo cha ña vaha, o cha tyihí ndo chí ndo nu ña tahán chí. ¹⁶ Soco tatu nyehé ndo tindoho cha cuenda cha yihí ndo cuenda ra Cristo, ma cucahan nuu ndo. Soco sacahnú ndo chí Nyoo, vatyí chahá chí cuhva nyehé ndo chiin tindoho cha cuenda maa ra Cristo.

¹⁷ Vatyí cha chaá quiví cha quichahá sacutuñi Nyoo chi tandihí ñáyivi. Ta xihna ca chi yoo cha cuví yo ñu yihí cuenda ra. Soco tatu tyehe caa tachí tuñi Nyoo chihin ri chi maa yo, ¿yoso caa cucuvi chi ñu cha ña quichahá tuhun Nyoo? ¹⁸ Tatu yí cacú añima ñu vaha, ¿yoso caa cucuvi chi ñu quiñi iyó, ñu iyó cuatyí? ¹⁹ Yucuan chaha tatu nyehé ndo tindocho cuhva cuñi Nyoo, cuñi chi cha sañihi ca ndo sacuvi ndo cha vaha. Ta tyaa ndo añima ndo ndaha Nyoo. Maa ra savahá chi yo, ta maa ra ndicha tuhun cahán ra ta cusacuví ra tari cuhva catyí ra.

5

Nu chahá ra Pedro tuhun chi yo

¹ Yucuan chaha chahí tuhun chi ra chahnu nu nyicú ndo. Vatyí ra chahnu cuví tucu yuhu. Ta cuví cha ndaa vatyí nyehí tandihí tindocho cha cuví chi ra Cristo. Ta cucutahin chihin tandihí ca ra quiví cunyicu yo chihin ra Cristo na quichi ra inga chaha chihin cha cahnu cuví ra. ² Tari noo ra sahá cumi mbee, tyicuan caa saha cumi ndo chi ñu yihí cuenda Nyoo ñu yihí ndaha ndo. Ta sacuvi ndo chihin cha iyo vaha iñi ndo tari cuhva cuñi Nyoo, ta ñima chihin fuerza. Ta ni ñima cha cuenda cha cuñi ndo xuhun. Soco sacuvi ndo tyiño chihin cha ñi iñi ndo. ³ Ta ñima tari cha maa ndo nyacá ñaha ndo chí ñu sahá cumi ndo. Soco chihin cuhva vaha iyó ndo chihin Nyoo, sañaha ndo chi ñu cuví mbee sana Nyoo yoso caa tahán chi coo ñu. ⁴ Ta quiví quichi ra cuví nuu chi ra sahá cumi mbee, cunaquehen ndo noo cha vaha, noo cha tyaqui cha cucuhva Nyoo chi ndo. Noo cha ma tiví ca maa.

⁵ Tyicuan caa tucu nyoho ñu tyivaa, quichaha ndo chi ñu chahnu. Ta ñima ñin ri maa ñu tyivaa soco tandihí ri ndo quichaha ndo chi tahan ndo. Ta ndahví saha ndo añima ndo. Vatyí:

Nyoo ña cuñi nyehe ra chi ñu cahnu sahá chi.

Soco tyinyeé ra chi ñu ndahvi sahá chii.

⁶ Ndahvi saha ndo añima ndo nuu Nyoo. Ta cuhva ndo chi ndo na cunyaca ñaha ra chi ndo tacuhva cuví sacahnu ra chi ndo quiví cha tahán chi. Tyí maa ra iyó xaan fuerza chi ra. ⁷ Cuhva ndo tandihí tindocho cha chicá xiñi ndo chi Nyoo. Vatyí maa ra ñiñi cuñi ra chihin ndo.

⁸ Cachi cohon iñi ndo ta saha vaha ndo cuenda nya cha vaha ta nya cha ña vaha, vatyí cuihna, ra xaan iñi chí ndo, chicá noo ra tari noo ndicaha xaan nanducú ti yóo chi cachi ti, tyicuan caa chicá noo ra ña vaha, nducú xaan ra cuhva saha ganaa ra chi ndo. ⁹ Soco ñihi cunanyaa ndo chihin cha ñi iñi ndo chinó iñi ndo chi Nyoo tacuhva cuví chasaha ndo chi ra ña vaha. Ta ñacoto

ndo vatyí tandihí ñu ñohó cuenda ra Cristo nicahnu ñuhu ñayivi, nyehé tucu ñu cuan tindocho tari maa ndo. ¹⁰ Soco Nyoo tyinyeé ra chi yo, ta cha yahá nyehe ndo tindocho suhva ri quiví, Nyoo cusanducuiti ca ra chi ndo, ñihi ca cunicunyah ndo chihin ra ta cunacuhva ca ra fuerza chi ndo. Ta ican Nyoo cuví ra chahá tandihí cha vaha chi yo ta maa ra caná chi yo tyi cu ñin ri yo chihin ra Cristo tacuhva coo yo nu tyaqui chihin ra tyicuan ri maa. ¹¹ Na sacahnu yo chi ra ta na cunyaca ñaha maa ra tyicuan ri maa. Ta na cuví chi tyicuan caa.

Nu ndihi chahá ra Pedro nocumi chi ñu

¹² Sacuhín carta ihya chi ndo chihin ra Silvano, yañi yo. Ta cha cuenda chi yuhu, maa ra cuví noo ra ñi xaan iñi nyicón chí ra Cristo. Tyají suhva nu tutu ihya chi ndo vatyí chahí tuhun chi ndo ta catyí chí ndo vatyí cha vaha cha ñihí ndo cuví cha ndicha vaha cha chahá Nyoo chi yo cha cuenda cha cuñi ra chi yo. Ma saña ndo ihya.

¹³ Vachi nocumi chí ndo sahá ñu yihí cuenda Nyoo nya nu cuví ityi Babilonia. Tari nacachí Nyoo chí maa ndo, tyicuan caa nacachí tucu ra chí ñu cuan. Ta vachi nonga nocumí sahá ra Marcos sehi cha cuenda Sutu Mañi yo.

¹⁴ Cuhva ndo nocumi chí noo noo tahan yo chihin cha cuñi ndo chí ñu.

Na coo cha taxi ri cuñi añima tandihí ri ndo cha ñin ri cuví ndo chihin ra Jesucristo.

Ta na cuví chí tyicuan caa.

Carta Cha Cu Uvi Cha Sacuhun Ra Apóstol Pedro Chi ñáyivi Yihí Cuenda Nyoo

Nu tyaá ra Pedro noo tutu chi ñu yihí cuenda Nyoo

¹Yuhu ra Simón Pedro sacuví tyiño nuu ra Jesucristo. Ta cuví noo apóstol chi ra. Cuñí chi catyí tyi tachj ra chii vatyí caque tyiño ra. Tyaí tutu ihya chí nyoho cha chinó iñi ndo chí Nyoo tari cuhva cha tyaqui chinó iñi nyuhu. Vatyí yucuan cuví cha chino iñi yo vatyí vaha ra Jesucristo, ra cuví Nyoo, ra sacacú chí yo. ²Na naquehen ca ndo cha vaha cha chahá Nyoo chí yo. Ta na coo ca cha taxi ri ñaíma ndo cha cuenda cha ñohó nuu ndo chí Nyoo ta chí Sutu Mañi yo Jesús.

Yoso caa coo ñu yihí cuenda Nyoo

³Nyoo chihin tunyee iñi ra, chaha ra tandihí cha chíñuhú chí yo tacuhva cuví coo cachi yo nuu ra ta saha yo ñáyivi chí ra. Tandihí ihya ñihí yo cha cuenda cha chicohon nuu yo chí ra cha cana chí yo. Vatyí chicohon nuu yo tyi cahnu cuví ra ta tyaqui xaan cha sacuví ra. ⁴Ta chihin tandihí ihya, chaha ra cha catyí ra tyi cucuhva ra chí yo. Ta cahnu xaan ta yahví xaan nyaá cuan. Vatyí cha cuenda ihya nanduvi yo tari maa ra. Vatyí sacanyaha ra cha quiñi caa cha quichj cuví iñi yo, ta ma tiví yo tari tiví ñáyivi iyó siqui ñuhu ñáyivi ihya. ⁵Ta yucuan chaha cuñí chí cha chinó ca iñi yo chí Nyoo ta nducu yo cuhva cha coo cachi yo. Yaha cuan cuñí chí cha nducu yo cuhva ta cutuñi vaha iñi yo cuhva cuñí Nyoo chihin yo. ⁶Ta yaha cuan cuñí chí cha saníni yo cha cunyaca ñaha yo coño ñuhu yo ta cuhva chicá xiñi yo. Yaha cuan ta nducu yo cuhva cha cucama iñi yo. Yaha cuan ta nducu yo cuhva cha cuñi ca coo yo nuu Nyoo. ⁷Yaha cuan ta nducu yo cuhva cha cuñi yo chí tahan yo. Yaha cuan nducu yo cuhva cha cuvita xaan ñaíma yo chihin tandihí ñáyivi.

⁸Tatu tyehe caa iyó ndo ta tyicuan ri nducú ndo cuhva cha coo tandihí ihya chí ndo, Nyoo cucotyíño xaan ra chí ndo. Ta tatu sacuví ndo tyehe caa, ña naha xaan ri chicohon nuu ndo chí Sutu Mañi yo Jesucristo. ⁹Soco ñu cha ñahri ihya iyó chí, cuví ñu tari noo ra cuaa. Ña cutuñi iñi ñu cha tahan chí coto ñu. Ta naa iñi ñu tyi sandachj Nyoo cuatyí ñu ta ityi chata ca. ¹⁰Yucuan chaha yañi, saníni ndo coo ndo tyehe caa. Tyicuan ta cundicha vaha tyi cana Nyoo chí ndo ta nacachj ra chí ndo. Vatyí tatu sacuví ndo tyehe caa, ma canacava maa

ndo. ¹¹Tyicuan caa ta totyehe ri cuhva Nyoo cha quihvi ndo nu nyacá ñaha Sutu Mañi yo Jesucristo tyicuan ri maa. Maa ra cuví ra sacacú chí yo.

¹²Yucuan chaha cuasanicohon que iñi ndo tuhun ihya, vasi cha chitó ndo, ta ñi iñi ndo sacuví ndo tuhun ndicha cha cutuhva ndo. ¹³Ta cuhva cha cuñi mai, vatyí cha ni ri ca cha iyé, vaha sanicohin iñi ndo coto naa iñi ndo tuhun ihya. ¹⁴Vatyí chité tyi ña naha ca ta cusandoi ñáyivi ihya. Vatyí tyicuan caa sacoto Sutu Mañi yo Jesucristo chí. ¹⁵Soco cuasaníni tacuhva vatyí tatu yaha chihj soco nichóhñ iñi ndo tuhun ihya.

Nu nacatyí ra Pedro yoso caa nyehe ra cha cahnu cuví ra Cristo

¹⁶Ñima tyisu ri canatava ndi quivi sacoto ndi tuhun ra Jesucristo chí ndo. Vatyí cha nyehe vaha ndi chihin chíti nuu ndi cuví. Vatyí nyehe ndi cha cahnu xaan cuví Sutu Mañi yo Jesucristo. Ta sacoto ndi chí ndo tyi iyó xaan tunyee iñi chí ra ta cuquichi ra inga chaha. ¹⁷Vatyí nyehe ndi nu sacahnu xaan Nyoo Sutu yo chí ra. Ta tyaqui xaan tyaqui xaan cuví nu cahan Nyoo ta catyí ra: “Ican ihya Sehí. Ta cuñi xain chí ra. Ta sií cuñi chihin ra”, catyí Nyoo tuhun ra Jesús quivi cuan. ¹⁸Ta nyuhu chíñi ndi ndusu Nyoo cha quichj ityi andivi quivi cha nyicú ndi chihin Sutu Mañi yo nu yucu ii cuan.

¹⁹Ta siñ ri cumí yo nonga tuhun cha ndicha vaha cha catyaa ra profeta. Nyaá vaha nu tutu nu cahan chí tuhun ra Cristo. Ta vaha sacuví ndo tatu quichahá vaha ndo tuhun ihya. Vatyí cuví chí tari noo ñuhu ndichin cha cayú nu ñaa iñi nyacua nya cundichin ta caña ra Cristo tari caña tiño cahnú cha ñaa ca, vatyí sandichin ra ñaíma yo. ²⁰Soco coto vaha ndo vatyí cha minoo tuhun ri yo, ma cuví catyí yo ñaa cha cuñi chí catyí noo tuhun cha nyaá nu tutu Nyoo. ²¹Vatyí ra cacuví profeta ta cha naha, ña cahan ra cuhva cuñi ri maa ra. Soco cuhva cuñi Nyoo cahan ra. Ta Tatyí li saquehen ityi chí ra.

2

*Ra casañahá cha ña ndicha
(Judas 4-13)*

¹Soco cachiyo tucu ra profeta cuendu nu nyicu ñu Israel ta cha naha, cacatyí ra tyi cuví ra profeta Nyoo. Ta tyicuan caa cuacoo tucu ra sacuahá ra sañahá cuendu nu nyicu ndo. Xehe ri cuasañaha ra tuhun cha ña ndicha cha cuví sativi chí ndo. Ta cuacatyí ra tyi ña ndicha Sutu Mañi yo ra sacacú chí ra. Yucuan chaha numi ri cucunaa ra cuan. ²Ta cuaha xaan ñu cucunyicon ñu chí ra chihin cha quiñi caa cha sacuví ra. Ta cuaha xaan ñu cucahan ña vaha ñu siqui tuhun cha ndicha vaha ra Cristo. ³Ta chaha cha

iyó cuñi ra xuhun, ta cusandavi ñaha ra chi ndo chihin cha casañahá ra maa ri cha ña ndicha. Soco nyatú Sutu Mañi yo tachi tuñi ra chi ra vatyi cha naha iyó maa tuhun cha cunaa ra.

⁴ Vatyi ni ri chi ángel cha chicoo cuatyí quivi cuan ta ña saha Nyoo ticahnu iñi. Soco tuchj ra chi ra anyaya. Ta sandoq ra chi ra nu ñaa iñi, nuññi ra chihin cadena nyacua nya quivi cutuñi chi ra nuu Nyoo. ⁵ Ta ni ña saha Nyoo ticahnu iñi chi ñu chiyó ta cha naha. Yucuan chaha tachi ra savi xaan siqui ñáyivi quiñi iyó cuan. Ta sacacú ra chi noo tuhun ri maa ra Noé, ra cha cahan tuhun vatyi coo yo noo ñayivi cachi. Ta cacú tucu ucha ca ñáyivi ñandihí. ⁶ Ta tyicuan caa tucu sacunaq Nyoo ñuu Sodoma ta ñuu Gomorra. Vatyi chahmj ra nyacua nya cha ndihí maa nduvj ñiyaa. Tacuhva vatyi cunyehe ñáyivi quiñi iyó cha cucoo nu cuahan ca chí. ⁷ Soco sacacú ra chi ra Lot vatyi cuví ra noo ra vaha nuu ra. Ta cuihya cuñi ra Lot nyehé ra cuhva iyó ñu quiñi iyó cuan. ⁸ Ta ndi quivi cuihya cuñi añima ra Lot quivi chiyó ra ñuu cuan, cha cuenda cha nyehe ra ta chiñj ra cha quiñi caa nyacuví ñu cuan. Vatyi maa ra, ra vaha cuví ra. Ta maa ñu maa maa ri cha ña vaha nyacuví ñu. ⁹ Ta tyicuan caa cuví sacacú Nyoo chi yo tatu iyó yo cuhva cuñi ra. Ta ñu quiñi iyó naquehén vaha Nyoo chi ñu vatyi cutachi tuñi ra chi ñu quivi cutuñi chi ñu nuu ra.

¹⁰ Ta yaha ca cutachi tuñi Nyoo chí ñu nyicón cha ña vaha cha cuñi coño ñuhu, ñu ña cuñi cha cunyaca ñaha Sutu Mañi yo chí. Ta cahnu sahá ñu chí ñu ta sacuví ñu maa ri cuhva cuñi maa ñu. Ta ñu cuan ña yuhví ñu cahan ña vaha ñu siqui ra nahnu ca ican saha maa ñu cuví ri siqui ángel, cuví ri siqui tatyí ña vaha, cuví ri siqui Nyoo. ¹¹ Soco ángel, cahnu ca cuví ra cha nuu ñáyivi, soco ña cacañá iñi ra cahan ña vaha ra siqui ra nahnu ca cuan chihin nuu Sutu Mañi yo.

¹² Soco ra cahán cuendu nu nyicú ndo cuví ra tari quiti cha ña cutuñi iñi ta sacuví ti cuhva cuñi maa ti. Vatyi quiti, ¿ñáa cuenda iyó ti? Iyó ti vatyi tán rayñi chí ti, ta cahñi ra chí ti. Tyicuan caa maa ra cuan. Cacañá ña vaha ra siqui cha ña cutuñi iñi ra. Ta cucúvi ra tari chihí quiti. ¹³ Cunyehe ra tindoho tari sanyehé maa ra tindoho chí inga ñáyivi. Ta sii xaan cacuñi ra chihin cha quiñi caá nyacuví ra nu tui. Ticahan nu chahá ra, tatu cha cutahan ra chihin ndo nu iyó ndo vico. Nyaá vavaha ra tusii iñi. Soco ña ndicha cuhva sañahá ra.

¹⁴ Ta tandihí ri ñusihí cha nyehe ra ta quichi cuví iñi ra. Ña chitatu ra cha casacuví ra cha quiñi caa. Casandaví ñaha ra chí ñu ña ñihí nyaá chihin Nyoo. Yatyí xaan ra cha nducu ra cuhva maa maa ri cha cuenda maa ra. Nyaá cha cunaa ndihí ra minoo

quivi. ¹⁵ Casandoq ra cuan ityi vaha ta naquehen ra ityi nu cucunaa ra. Casacuví ra tari sacuví ra Balaam sehe ra Beor. Vatyi cuñi ra Balaam saha ganaa ra xuhun chihin cha ña vaha cha nyacuví ra. ¹⁶ Tyicuan ta noo burra nacahñ ti chihin ra, tari cahán ñáyivi, ta ña chahá ti cha cuhun ca ra Balaam chihin cuhva loco chicá xiñi ra.

¹⁷ Ta tyicuan caa tucu maa ra cha nyicú chihin ndo. Cacuví ra tari noo yavi ityi cha ñahri ndutya ñohó. Ta cuví ra tari noo vico cha tyandaha tatyí ñihí chí. Soco cha nyaá cha cohon ra nu ñaa iñi cahnu tyicuan ri maa cha cuenda cha nyacuví ra tyicuan caa. ¹⁸ Yaa vavaha cahán ra soco tandihí tuhun cahán ra cha ñima ri tuhun cuví. Ta chihin vicio ta chihin cha quichi cuví iñi coño ñuhu yo casandaví ñaha ra chí ñu cha yahá quita mahñu cha quiñi caa. ¹⁹ Ta tyiyuhú ndihí ra chí ñu na cunyacuví ca ñu cha quiñi caa vatyi yori nyacá ñaha chí ñu, catyi ra. Soco suri maa ra chahá ra chí ñu cha cunyaca ñaha cha quiñi caa chí ra. Vatyi tatu chahá yo cha cunyaca ñaha noo cha cunyaca ñaha chí yo, musu cuan cuví chí yo. ²⁰ Vatyi ñu cha chicohon nuu chí Sutu Mañi yo Jesucristo, ra sacacú chí yo, cha yahá sandoq ñu cha quiñi caa ñáyivi ihya. Soco tatu natin tucu ñu tuhun ñáyivi ihya inga chaha, quiñi ca nanduví ñu ta ñima ca ta cuví maa. ²¹ Vaha taxin ca tyehe ta ña chicohon nuu ñu ityi vaha cuan, ta ñima ca cha yahá chicohon nuu ñu ta nacuhva ñu chata ñu tuhun cha chahá Nyoo chí ñu. ²² Soco cuví chí ñu tari cuhva catyi noo tuhun cha iyó ñáyivi: “Ina nduchan ti, ta nacachj tucu ti cha nduchan ti. Ta quini chityí ti, ta ndihvi tucu ti nu nyahyu inga chaha.”

3

Quivi cuquichi tucu Sutu Mañi yo

¹ Yañi, cuñi xain chí ndo. Ta ihya cuví carta cha cu uvi sacuhín chí ndo. Ta nu ñinduvi tahan carta chahí tuhun chí ndo tacuhva vatyi caca vaha xiñi ndo. ² Ta ñicohon iñi ndo tuhun cha cahan ra cacuví profeta Nyoo, ta cha naha. Ta ñicohon tucu iñi ndo tuhun cha sañahá nyuhu chí ndo. Vatyi cuví ndi apóstol cuenda Sutu Mañi yo Jesucristo ra sacacú chí yo.

³ Coto xihna ndo vatyi nu cundihí ca chí quivi cuquichi ñáyivi cucuacu nyaá ñu tuhun Sutu Mañi yo. Cucoo ñu yoso cuhva cha quiñi caa cha cuñi coño ñuhu ñu. ⁴ Ta cucatyí ñu: “Ra Jesucristo catyi ra vatyi cuquichi ra inga chaha. ¿Ta nya nyaá ra vityin? Vatyi nyata cachihj sutu chahnu yo ta nyata chinqo ñuhu ñáyivi ta nya vityin ta cuhva caa ri maa”, cucatyí ñu chí ndo. ⁵ Vatyi maa ñu ña cuñi ñu coto ñu vatyi ta tyembu chahnu cahan Nyoo ta savaha

ra andiví ta ñuhu ñayiví. Quita ñuhu ñayiví chichi ndutya ta chihin ndutya ching chi. ⁶Soco cha yaha savaha Nyoo ñuhu ñayiví ta suri chihin ndutya cuanaa ñayiví cuan quivi coñ savi xaan. ⁷Soco andiví ta ñuhu ñayiví cha iyó vityin sahá cumi vaha Nyoo vatyi suri chihin ñuhú cucayu chi quivi cutuñi chi ñáyivi nuu ra. Tyicuan ta ñuhú cha cayu cuan cusanaa chi chi ñu ña quichahá chi Nyoo.

⁸Soco yañi, cuñí xain chi ndo. Ta cuñí vatyi ma naa iñi ndo vatyi cha cuenda Sutu Mañi yo noo quivi tari cha noo mil cuiya cuví cuan, ta cha noo mil cuiya tari cha noo quivi cuví cuan chi ra. ⁹Ñima cha ña cuñí ñaha Sutu Mañi yo quichi ra. Vasi yihí ñu chícá xiñi ñu cha tyicuan caa. Soco Sutu Mañi yo nyatú ra chi yo vatyi ña cuñí ra cha cunaa ni noo yo. Cuñí ra vatyi tandihí yo ndu uvi iñi yo cuatyi yo ta nasama yo cuhva iyó yo.

¹⁰Soco quivi cuquichi Sutu Mañi yo, tari cuaquichi noo ra suhu cha cha cuaa, tyicuan caa cucuvi. Vatyi sana iñi yo ta cuquichi ra. Tyicuan ta cucunaa andiví. Iyo xaan cucachan cuhva cuan. Ta cucayu tandihí cha iyó andiví. Cundutya ndi cuii chihin cha ihñi xaan. Ta tyicuan caa cucayu tucu ñuhu ñayiví ta tandihí cha iyó nuu chi.

¹¹Ta tyicuan caa cutani tandihí. Yucuan chaha cuñí chi vatyi cachi coo yo tari cuhva cuñí Nyoo. ¹²Cuatu tuhva yo na chaa quivi quichi Nyoo. Ndücu yo cuhva cha sanumi ra quichi ra. Quivi cuan cunaa andiví chihin ñuhú. Tandihí cha iyó cundutya chihin cha ihñi. ¹³Soco yoó nyatú yo noo andiví chaa ta noo ñuhu ñayiví chaa cha catyi Nyoo tyi cucuhva ra. Ta maa maa ri cha vaha chi Nyoo cucoo yucuan.

¹⁴Yucuan chaha yañi, cha ni ri ca cha nyatú ndo na quichi Sutu Mañi yo, sanñi ndo tacuhva vatyi quivi quichi ra, vii iyó ndo chihin ra ta ñahri cha iñi ndo ta ñahri cuatyi ndo. ¹⁵Ta tñin vaha ndo cuenda, vatyi Sutu Mañi yo nyatú ra chi yo vatyi cuñí ra vatyi cuaha ca ñáyivi cacu. Ta tyicuan caa tucu catyi ra Pablo yañi yo nu tutu cha sacuhun ra chi ndo. Vatyi chihin cha chiñi tuñi cha chaha Nyoo chi ra tyaq ra. ¹⁶Ta tandihí ri nu carta ra ta cahán ra tuhun ihya chihin ndo. Vasi yihí tuhun cha yii vavaha cutuñi iñi yo. Ta ñu cha ña cutuñi iñi, ñu cha ña ñihi nyaá chihin Nyoo, siin caa cuhva natyihí tuñi iñi ñu tuhun cuan. Ta suri tyicuan caa sacuvi tucu ñu chihin tuhun cha tyaq inga ra nu tutu tuhun Nyoo. Siin caa cuhva natyihí tuñi iñi ñu. Ta cha tyicuan caa, sacunaa ñu suri chi maa ñu.

¹⁷Yucuan chaha yañi, vityin cha chitó ndo tuhun ihya cha ni cumañi ca cuví, saha ndo cuenda chi ndo, coto cunyicon ndo cuhva

sandaví ñaha ra quiñi caa cuan, ta coto sandoo ndo cuhva vaha cha cuahan ndo. ¹⁸Soco coñon nuu vaha ca ndo chi Sutu Mañi yo ra Jesucristo ra sacacú chi yo. Ta cuahnu ca ndo chihin tumañi iñi cha chahá ra chi ndo. Na sacahnu yo chi ra vityin ta tyicuan ri maa. Ta na cuví chi tyicuan caa.

Carta Cha Xihna Ri Cha Tyaa Ra Apóstol Juan

Ñayivi chaa coo yo

¹ Ihya tyaá ndi tuhun cha cha iyó maa quivi cha quichahá tandihi. Ta cuví chi tuhun cha chiñi ndi ta cha nyehe ndi chihin nuu ndi; vatyi nyehe ndi ta tññ ndi chihin ndaha ndi. Ta ican tuhun ihya cuví tuhun cha chahá ñayivi chaa coo yo. ² Ñayivi chaa ihya quetuví quivi quichi ra Cristo. Maa ndi nyehe ndi ta chahá ndi cuenda tuhun chi; ta sacotó ndi tuhun ñayivi chaa cha ma naa ca maa ihya chi ndo. Vatyi ñayivi ihya, nyaá chi chihin Sutu yo Nyoo, ta vityin tuví chi nu nyicú yo. ³ Nacatyí ndi chi ndo cha nyehe ndi ta cha chiñi ndi tacuhva na cu ññ ri ndo chihin ndi, tari maa ndi, ndicha cuií vatyi ññ ri cuví ndi chihin Sutu yo Nyoo ta chihin Sehe ra, ra Jesucristo. ⁴ Ta tyaá ndi tuhun ihya chi ndo tacuhva na coo tandihi tusi ññ cha chahá Nyoo chi ndo.

Nyoo, ñuhú ndichin cuví ra

⁵ Ican ihya cuví tuhun cahán ra Cristo chihin ndi. Ta chiñi ndi ta sacotó ndi chi ndo: Nyoo maa ri ñuhú ndichin iyó nu nyaá ra. Ta ñahri cha ñaa ññ, (ñahri cha ña vaha yihí ññ ra cuví cuan). ⁶ Tatu catyí yo vatyi ññ ri cuví yo chihin ra, soco sacuví yo cha ña vaha, nu ñaa ññ chícá noo yo cuví cuan. Sandaví ñaha yo. Ta ñahri tuhun ndicha cahán yo. ⁷ Soco tatu nu ndichin iyó yo, tari maa Nyoo iyó ra nu ndichin, tyicuan ta ññ ri cuví yo chihin tahan yo, ta ññi ra Jesucristo Sehe Nyoo, nacatyá chi ndi cuií maa cuatyí yo.

⁸ Tatu catyí yo vatyi ñahri cuatyí yo, suri chi maa yo sandaví ñaha yo, ta ñahri cha ndicha nyaá ññ yo. ⁹ Soco tatu nahmá yo cuatyí yo nuu Nyoo, yihí ññ yo chi ra vatyi vaha ra ta ña sandaví ñaha ra, soco sacuví ra cuhva catyí ra, ta cusaha ra ticahnu ññ cuatyí yo ta cusandachi ra ndi cuií maa cha quini caa yo. ¹⁰ (Nyoo catyí ra tyi iyó cuatyí yo), ta tatu catyí yo vatyi ñahri cuatyí yo, sahá yo tuhun tyi Nyoo, cuendu ra. Ta tuhun cahán ra, ñahri maa nyaá ññ yo.

2

Ra Cristo cuví ra cahán chaha yo

¹ Sehe nyihí, sacoté tuhun ihya chi ndo, tacuhva ma sacuví ndo cuatyí. Soco tatu chicoq cuatyí minoo ndo, ma yuhví ndo, vatyi iyó ra cahán chaha yo nuu Nyoo. Ta ican ra cuví ra Jesucristo, ra vaha. ² Ta maa ra cuví ra chahnyá cuatyí yo, vatyi chihí ra tyiño nuu yo cha cuenda cuatyí yo. Ta ñima

cha cuenda maa ri maa yo, soco cha cuenda tandihi ñayivi.

³ Tatu quichahá yo tuhun cahán Nyoo, ñohó nuu yo chi ra. ⁴ Soco tatu noo ra catyí ra: “Yuhu, ñohó nui chi Nyoo”, soco tatu ña quichahá ra tuhun cahán ra, cuví ra noo ra cuendu. Ta ñahri tuhun ndicha caá ññima ra. ⁵ Soco ñu naquehén vaha tuhun cahán Nyoo, ican ñu cuan cuví ñu cuñí chi ra chihin cha ññ ññima ñu. Ta cha tyicuan caa chitó yo tyi ññ ri cuví yo chihin ra. ⁶ Yóo cha catyí vatyi ññ ri cuví chihin Nyoo, tahán chi coo ra tari cuhva chiyó maa ra Jesucristo quivi chícá noo ra siqui ñuhu ñayivi.

Tuhun chaa cha cuñi yo chi tahan yo

⁷ Yañi yo, ñima noo tuhun chaa sacoté chi ndo, soco cuví chi noo tuhun chahnu cha chitó ndo nyata quivi xihna ri. Ta ican tuhun chahnu ihya cuví tuhun chiñi ndo. ⁸ Soco tari noo tuhun chaa cuví chi. Ta sacuví ra Cristo, ta chahá ra cha sacuví tucu maa ndo ñandihí. Ta cha tyicuan caa, cha ñaa ññ cuahan nocuee chi. Ta cha ndichin Nyoo cha sandundichín chi.

⁹ Ñu cha catyí vatyi nyaá ñu nu ndichin, ta ña cuñi nyehe ñu chi tahan ñu, ni nyaá ca ñu nu ñaa ññ. ¹⁰ Ta ñu cuñi chi tahan, nu ndichin nyaá ñu. Ta ñahri maa cha cuví sanacava chi ñu nu cuatyí. ¹¹ Soco ñu cha ña cuñi nyehe chi tahan, nu ñaa ññ nyaá ñu. Ta ña chitó ñu nya ityi cuahan ñu vatyi ña cuví nyehe ñu vatyi tari cha cuaa ñu.

¹² Sacuhín tuhun ihya chi nyoho, ra cuatyaa sehi. Vatyi cha yahá saha Nyoo ticahnu ññ cuatyí ndo cha cuenda cha chihí ra Jesucristo tyiño nuu ndo. ¹³ Ta chi nyoho, cha cuví ndo sutu, sacuhín tuhun ihya chi ndo, vatyi ñohó nuu ndo chi ra iyó nyata cumañi cacu ñuhu ñayivi. Ta chi nyoho, ra tyivaa, sacuhín tuhun ihya vatyi cuví chasaha ndo chi ra ña vaha.

Ta chi nyoho, cha cuví ndo ra cuatyaa sehi, sacuhín tuhun ihya vatyi ñohó nuu ndo chi Sutu yo Nyoo. ¹⁴ Sacuhín tuhun ihya chi nyoho cha cuví ndo sutu, vatyi ñohó nuu ndo chi ra cha iyó nyata cacu ñuhu ñayivi. Ta sacuhín tuhun ihya chi nyoho ra tyivaa vatyi nyaá xaan fuerza chi ndo. Ta tuhun Nyoo caá ññima ndo. Ta cuví chasaha ndo chi ra ña vaha.

¹⁵ Ma cuñi ndo cha quini caa cha iyó ñayivi ihya. Ni ma cuñi ndo cha iyó siqui ñuhu ñayivi. Vatyi ñu cuñi tandihi ihya, ña cuñi ñu chi Nyoo. ¹⁶ Vatyi tandihi cha iyó ñayivi ihya, cha ña vaha cha quichi cuví ññi coño ñuhu yo, ta cha nyehe yo ta quichi cuví ññi yo coo chi yo, ta cha cuñi yo cuyaa yo chihin cha iyó chi yo, tandihi ihya ñima cuhva chahá Sutu yo Nyoo chi yo cuví, soco maa maa ri cha chahá ñayivi ihya cuví. ¹⁷ Ta ñayivi ihya cuahan sandihi chi, chihin tandihi cha quini caa cha

quichi cuvi iñi ñáyivi. Soco ñu cha sacuvi cuhva cuñi Nyoo, tyicuan ri maa cuaco ñu chihin ra.

Ra xaan iñi chi ra Cristo

¹⁸ Sehe nyihi, cha nyaá yo nu cuandihí quivi. Ta nyoho chiñi soho ndo vatyí vachí noo ra cha ña cuñi nyehe chí ra Cristo, ta vityin cha cuaha xaan ra ña cuñi nyehe chí ra Cristo iyó vityin. Yucuan chaha nacoto yo vatyí cha nyaá yo nu cuandihí quivi. ¹⁹ Maa ra nu nyicú yo quita coyo ra, vatyí ñima ra cuenda yo cuví chí ra. Vatyí tyehe ta ra cuenda yo cacuvi chí ra, candoó ra chihin yo. Soco cuahan coyo ra tacuhva quetuví vatyí ña tandihí ñáyivi ta cuenda yo cuví ñu.

²⁰ Soco chí nyoho chahá ra Cristo Tatyí Ii Nyoo cunyyaa añima ndo. Ta chító ndo tandihí. ²¹ Sacuhín tuhun ihya chí ndo ñima cha cuenda vatyí ña chító ndo cha ndicha, soco vatyí chító ndo. Ta ni noo cuendu ma quita cahan ñu sacuvi cha ndicha.

²² Yóó cha cuví ñu cuendu? Ñu catyí vatyí ra Jesús ñima ra Cristo cuví ra. Ta ñu cha catyí tyehe caa, ñu xaan iñi chí ra Cristo cuví ñu. Vatyí ña chinó iñi ñu chí Sutu yo Nyoo, ta ni ri chí ra Jesucristo Sehe Nyoo. ²³ Tandihí cuii ñu ña chinó iñi chí Sehe Nyoo, yori Sutu yo Nyoo nyaá chihin ñu. Soco ñu catyí vaha chí ñáyivi vatyí ra Jesucristo cuví Sehe Nyoo, ñn ri cuví ñu chihin Nyoo ñandihí.

²⁴ Yucuan chaha nyoho, tuhun cha chiñi ndo nya quivi xihna ri, naquehen vaha ndo chichí añima ndo. Tatu ndoó chí chichi añima ndo, ñn ri cuví ndo chihin Sehe Nyoo ta chihin Sutu yo Nyoo ñandihí. ²⁵ Ta ra Jesucristo catyí ra vatyí cuhva ra noo ñáyivi chaa cha ma naa ca maa coo yo.

²⁶ Sacuhín tuhun ihya chí ndo cha cuenda vatyí cuaha xaan ra sandaví ñaha chí ndo iyó. ²⁷ Soco ra Jesucristo chahá ra Tatyí Ii Nyoo cha cunyyaa añima ndo, ta ña chíñuhú ca cha sañaha ni noo ñáyivi chí ndo. Vatyí suri maa Tatyí Ii Nyoo sañahá chí ndo ndí cuii maa tuhun. Ta cha ndicha cuví, ñima cuendu cuví. Yucuan chaha sañihí ca ndo cu ñn ri ndo chihin ra Cristo tari cuhva sañahá Tatyí Ii Nyoo chí ndo.

²⁸ Ta vityin nyoho, ra cuatyaa sehi, cunyyañaa yo chí ra Cristo tacuhva vatyí nachaa chí quivi quichi ra, ma cutucu cuñi yo chihin ra. Ta tyicuan caa tucu maa ra chihin yo. Ta ñn ri tacuhva cha ma tahan yo ticahan nuu nuu ra quivi quichi ra. ²⁹ Cha chító ndo vatyí ra Cristo vaha ra. Chító tucu ndo vatyí tandihí ñu cha nyacuví cha vaha, sehe Nyoo cuví chí ñu.

3

Ñu cha cuví sehe Nyoo

¹ Nyehe ndo, yoso cha cuñi Sutu yo Nyoo chí yo, vatyí nasaha ra sehe ra chí yo. Ta catyí ra: “Nyoho, sehi cuví chí ndo.” Yucuan chaha ñáyivi, ña cuñi nyehe ñu chí yo vatyí tyicuan caa tucu, ña cuñi nyehe ñu chí maa ra. ² Yañi, vityin cha cuví yo sehe ra. Soco ta coto ca yo yoso caa cucuvi yo. Soco chító yo vatyí nachaa chí quivi quichi ra Jesucristo, cucuvi yo tari maa ra, vatyí cunyehe vaha yo chí ra tari cuhva caá ra. ³ Ta tandihí yo cha nyatú yo cha cucuvi tyehe caa, nducú yo cuhva ta sandundí ca yo añima yo, tari ndí maa Sutu Mañi yo Jesucristo.

⁴ Tandihí ñu sacuvi cuatyí, ña quichahá ñu ley Nyoo. Vatyí cha sacuvi yo cuatyí, ña quichahá yo ley Nyoo cuví chí cuan. ⁵ Cha chító ndo vatyí ra Cristo quichí ra ñáyivi tacuhva tinyaá ra cuatyí yo, ta maa ra ñahri cuatyí ra. ⁶ Tandihí yo cha ñn ri cuví yo chihin ra, ña sacuvi yo cuatyí. Soco ñáyivi cha sacuvi cuatyí, ta quehen cuenda ca ñu chí ra, ni ta cohon ca ra añima ñu. ⁷ Sehe luhli, ñaha sandaví ñaha ñáyivi chí ndo, vatyí ñu cha sacuvi cha vaha, vaha ñu, tari maa ra Cristo vaha ra. ⁸ Soco ñu cha sacuvi cuatyí, cuenda ra ña vaha yihí ñu. Vatyí ra ña vaha sacuvi ra cuatyí nyata quivi xihna ri. Soco yucuan chaha quichí ra Jesucristo, ra cha cuví Sehe Nyoo, tacuhva vatyí satani ra ndí cuii cha sacuvi ra ña vaha.

⁹ Tandihí yo cha cha yahá nacacu chaa yo, nanduví yo sehe Nyoo, ta ña sacuvi ca yo cuatyí, vatyí ñáyivi Nyoo iyó yo. Yucuan chaha ña sacuvi ca yo cuatyí, vatyí cha yaha nacacu chaa yo ta sehe Nyoo cuví chí yo. ¹⁰ Ta tyehe caa cuví nichon nuu yo chí ñu cha cacuvi sehe Nyoo, ta ñu cuví sehe cuhna. Vatyí yóó ñu sacuvi cha ña vaha o ña cuñi nyehe ñu chí tahan ñu, ñima ñáyivi cuenda Nyoo cuví ñu.

Na cuñi yo chí noo noo tahan yo

¹¹ Vatyí ican ihya cuví tuhun cha chiñi ndo quivi xihna ri: Cha cuñi yo chí noo noo tahan yo. ¹² Ña tahan chí sacuvi yo tari cuhva sacuvi ra Caín. Cuví ra noo ra cuenda ra ña vaha. Ta chahñi ra chí yañi ra. ¿Ñáá tuhun chahñi ra chí ra? Cha cuenda vatyí vaha cuhva sacuvi yañi ra, ta maa ra Caín chinyacuví ra cha ña vaha.

¹³ Yañi yo, ma iyo cuñi ndo tatu ña cuñi nyehe ñáyivi chí ndo. ¹⁴ Yóó chító yo vatyí tari minoo ra chihí ta nandoto cuví yo vatyí iyó yo noo ñáyivi chaa vatyí cuñi yo chí tahan yo. Ñu cha ña cuñi chí tahan, tari quivi ni cuví ca ñu tari noo ra chihí, ta ta nandoto ca ñu. ¹⁵ Yóó ñu cha xaan iñi chí tahan, tari noo ñu chahñi ñáyivi cuví ñu. Ta chító ndo vatyí ni noo ñu chahñi, ma cuhva Nyoo ñáyivi chaa cha ma naa ca maa coo añima ñu. ¹⁶ Nichón nuu yo ñáá cha cuví cha cuñi yo chí tahan yo vatyí ra Jesucristo

sañahá ra chi yo. Vatyí maa ra cuñí ra chi yo, ta chahá ra ñáyiví ra cha catyí yo. Ta tyicuan caa tucu maa yo, cuñí yo chí tahan yo ta cuhva yo ñáyiví yo cha cuenda ñu. ¹⁷ Ta tatu yihí yo iyó chíin chí yo síqui ñuhu ñáyiví ihya, ta nyehé yo cumañí cha cumañí chí tahan yo, ta sahá ri yo cha ña nyehé yo, ¿atu cuñí yo chí Nyoo cha sacuví yo cha tyicuan caa? Ña cuñí yo chí ra cuví chí cuan. ¹⁸ Ra cuatyaa sehi, ñima chíhin tuhun yuhu ri yo, cuñí yo chí tahan yo, soco na cuñí yo chí ñu chíhin cha sacuví yo tumañí iñi, ta chíhin cha ñi iñi yo.

Yoso caa sacuví yo ta coo vaha yo chíhin Nyoo

¹⁹ Tatu sacuví yo tyicuan caa, chító yo tyi yihí yo tuhun ndicha. Ta vaha iyó yo chíhin Nyoo. ²⁰ Tatu chichí añaíma yo ta tuví iñi yo tyi iyó cuatyí yo, vihi ca cuví Nyoo, chító ra cha caá añaíma yo. ²¹ Yañi, tatu tuví iñi yo tyi ñahri cuatyí yo, ma yuhví cuñí yo nyehé yo chí Nyoo. ²² Ta ñáá ri cha cacán tahví yo cuacuhva ra chí yo, vatyí quichahá yo tuhun cahán ra, ta sacuví yo cuhva tahán iñi ra. ²³ Ta ícan ihya cuví tuhun chahá ra chí yo: Cha chíno iñi yo vatyí ra Jesucristo cuví Sehe ra. Ta cha cuñí yo chí noo noo tahan yo vatyí tyicuan caa tuhun cha chahá ra chí yo. ²⁴ Ta ñu cha quichahá tuhun chahá ra chí yo, iyó ñu cha íin ri cuví ñu chíhin ra, ta maa ra iyó ra chichí añaíma ñu. Ta cha cuenda Tatyí lí ra cha chahá ra chí yo, chító yo vatyí nyaá ra chíhin yo.

4

Tatyí lí Nyoo ta tatyí ña vaha

¹ Cuñí xaín chí ndo, yañi. Ma chíno iñi ndo tandíhi ñáyiví cha catyí tyi cuenda Nyoo cahán ñu. Nyehé xihna ndo tatu nacachí tahan cha cahán ñu chíhin tuhun Nyoo. Vatyí cuahá xaan ra cha catyí vatyí Nyoo sañahá chí ra. Soco ña ndicha. ² Soco tyehe caa cuví nicohon nuu ndo tatu Tatyí lí Nyoo sacahán chí ra o ñima. Tandíhi ra cha catyí vatyí quichí ra Jesucristo nya gloria ta cacú ra chíhin coño ñuhu ñáyiví ihya, ícan ra cuan, sacahán Tatyí lí Nyoo chí ra. ³ Soco ndí cuíi maa ñáyiví cha catyí vatyí ra Cristo ña chícá noo ra chíhin coño ñuhu ñáyiví ihya, ñima Nyoo sacahán chí ñu cuan, soco tatyí ña vaha, cha xaan iñi chí ra Cristo, ícan sacahán chí ñu. Cha chíñi ndo vatyí nyaá quichí cuan. Ta vityin cha chícá noo chí síqui ñuhu ñáyiví.

⁴ Ra cuatyaa sehi, ñáyiví chí Nyoo cuví ndo. Ta cuví chasaha ndo chí ra xaan iñi chí ra Cristo. Vatyí cahnu ca ra Cristo, ra nyaá añaíma ndo ta ñima ca ra ña vaha, ra cha chícá noo síqui ñuhu ñáyiví ihya. ⁵ Maa ñu cuan, ñu cuenda ñáyiví ri ihya cuví ñu. Yucuan chaha cahán ñu tuhun ñáyiví ihya. Ta ñu

cuenda ñáyiví ihya tyasohó ñu tuhun cahán ñu. ⁶ Soco yoó cuví yo ñu cuenda Nyoo. Ta ñu cuenda Nyoo tyasohó ñu tuhun cahán yo, soco ñu yihí tatyí ña vaha añaíma, ña cuñí ñu tyasoho ñu. Ta tyicuan caa cuví nicohon nuu yo chí ñu yihí Tatyí lí Nyoo ta ñu yihí tatyí ña vaha.

Nyoo cuñí xaan ra chí tandíhi ñáyiví

⁷ Yañi yo, na cuñí yo chí tahan yo, vatyí Nyoo sañahá ra chí yo yoso caa cha tahán chí cuñí yo chí ñu. Tandíhi yo cha cuñí yo chí tahan yo sehe Nyoo cuví chí yo, ta ñohó nuu yo chí Nyoo. ⁸ Soco ñu cha ña cuñí chí tahan, ta cohon nuu ca ñu chí Nyoo, vatyí Nyoo cuñí xaan ra chí yo ta chí tandíhi ñáyiví. ⁹ Ta sañahá Nyoo vatyí cuñí ra chí yo chíhin cha chahá ra noo Sehe mañi ra tyi quichí ra síqui ñuhu ñáyiví ihya, vatyí cuhva ra noo ñáyiví chaa coo yo. ¹⁰ Nyehé xihna, yoso cha cuñí Nyoo chí yo. Ñima vatyí xihna ca yo cuñí yo chí ra, soco xihna ca maa ra cuñí ra chí yo. Ta tachí ra chí Sehe ra vatyí tacuhva cuví ra tyiño nuu yo ta cahnya ra cuatyí yo.

¹¹ Nyoho yañi, tatu cuñí Nyoo chí yo cha tyicuan caa, tahán tucu chí cuñí maa yo chí tahan yo. ¹² Vasi ní nonga ñáyiví, ta nyehé ca ñu chí Nyoo, soco tatu cuñí yo chí noo noo tahan yo, Nyoo nyaá ra añaíma yo. Ta tyicuan caa ñi vaha iñi yo cuñí yo chí ra. ¹³ Ta chító yo vatyí nyaá yo chíhi ndaha ra, ta maa ra nyaá añaíma yo vatyí chahá ra Tatyí lí ra cunyaa añaíma yo. ¹⁴ Ta nyuhu nyehé vaha ndi ta cuví ndi cha ndaa vatyí Sutu yo Nyoo saquichí ra chí Sehe ra tacuhva vatyí sacacu ra chí yo cha cuví yo ñáyiví iyó síqui ñuhu ñáyiví. ¹⁵ Tandíhi ñu nachinó iñi chíhin cha ñi iñi ñu ta catyí ñu vatyí ra Jesús cuví ra Sehe Nyoo, Nyoo nyaá ra chíhi añaíma ñu. Ta maa ñu nyaá ñu chíhi ndaha ra.

¹⁶ Ta yoó cha nacoto yo ta nachino iñi yo tyi Nyoo cuñí ra chí yo, ta chí tandíhi ñáyiví. Ta ñu cha cuñí chí tahan, chíhi ndaha Nyoo nyaá ñu. Ta Nyoo nyaá ra chíhi añaíma ñu. ¹⁷ Vatyí tatu cuñí yo chí Nyoo chíhin cha ñi iñi yo ma yuhví cuñí yo nyehé yo chí ra, nachaa chí quiví cutuñí chí tandíhi ñáyiví nuu ra. Vatyí tari cuhva iyó maa ra Jesucristo, tyicuan caa iyó yo síqui ñuhu ñáyiví ihya. ¹⁸ Nyoo cuñí ra chí yo, ta tatu cuñí yo chí ra, ñahri maa cha yuhví yo. Tatu ñi iñi yo cuñí yo chí Nyoo ña nuña ca nu quihí tuhun yuhví añaíma yo, vatyí Nyoo tavá ñehe ra tandíhi maa cuan. Vatyí tatu yihí cha yuhví cuñí yo, yihí cha cuenda vatyí iyó cuatyí yo. Ta yuhví yo cha cutachi tuñi Nyoo chí yo. Vatyí tatu yuhví cuñí yo, yuhví yo vatyí ña cuñí vaha yo chí Nyoo.

¹⁹ Yoó cuñí yo chí Nyoo vatyí xihna ca maa ra cuñí ra chí yo. ²⁰ Tatu yoó cha catyí: “Yuhu cuñí chí Nyoo”, catyí ñu, soco ña cuñí

nyehe ñu chi tahan ñu, noo ñu cuendu cuví ñu. Vatyí tatu ña cuñí nyehé ñu chi tahan ñu cha nyehé ñu, ¿atu cuví cuñí ñu chi Nyoo cha ña nyehé ñu? Ma cuví. ²¹ Ta Nyoo chahá ra tuhun ihya chi yo: Ñu cha cuñí chi Nyoo, tahán chi cha cuñí tucu ñu chi noo noo tahan ñu ñandihí.

5

Cha ñi ñi yo chinó ñi yo chi Nyoo sahá ganaa yo chi cha ña vaha

¹ Tandihí ñu chinó ñi tyi ra Jesús cuví Cristo cha saquichí Nyoo, sehe Nyoo cuví chi ñu; ta tatu cuñí yo chi noo sutu, cuñí tucu yo chi tandihí sehe ra. ² Tatu cuñí yo chi Nyoo ta sacuví yo cha catyí ra, chító yo vatyí cuñí tucu yo chi ñu sehe Nyoo. ³ Vatyí cha cuñí yo chi Nyoo ican cuví cha quichahá yo tuhun chahá ra chi yo. Ta tandihí tuhun cha chahá ra chi yo ña yí sacuví yo. ⁴ Vatyí tandihí yo cha cuví yo sehe Nyoo, cuví chasaha yo chi cha ña vaha cha iyó ñayiví ihya chihin cha chinó ñi yo chi Nyoo. ⁵ Ñu cha chinó ñi vatyí ra Jesús cuví Sehe Nyoo, ican ñu cuan cuví chasaha chi cha ña vaha cha iyó ñayiví ihya.

Tatyí li Nyoo cuví cha ndaa cuenda ra Jesús ra cuví Sehe Nyoo

⁶ Ra Jesucristo quichí ra síqui ñuhu ñayiví ihya. Ta chító yo tyi ndicha cha Sehe Nyoo cuví chi ra nu condutyá ra, ta nu chatí ñiñi ra ñandihí. Ñima noo ri nu condutyá ra. Soco nu chatí ñiñi ra ñandihí. Ta Tatyí li Nyoo cuví cha ndaa tyi tyicuan caa cuví. Ta maa ri cha ndicha cahán Tatyí li Nyoo. ⁷ Iyó uñi tahan testigu cha nyaá andiví: Sutu yo Nyoo ta ra Cristo ra cuví Tuhun Cahán Nyoo, ta Tatyí li Nyoo. Ta nduñi tahan ihya cuví noo ri, ta ñiñi ri cuhva cahán nduñi tahan. ⁸ Ta iyó uñi tahan testigu síqui ñuhu ñayiví ihya: Tatyí li Nyoo cha nyaá añima yo catyí vatyí ican ra Jesús cuví Sehe Nyoo. Yucuan cuví noo. Ta nu condutyá ra Jesús, Nyoo catyí ra vatyí ican ra cuví Sehe ra. Yucuan cuví cha cu uvi. Ta nu chatí ñiñi ra Jesús, yucuan cuví cha cu uñi cha sañahá chi vatyí ra Jesucristo cuví ra Sehe Nyoo. Ta tyicuan caa nduñi tahan cuan ñiñi ri cuhva cahán. ⁹ Yoó tuhvá yo naquehen yo tuhun cahán ra cuví testigu síqui ñuhu ñayiví ihya. Soco Nyoo cahnu caa cuví ra ta ñima ca ra ñuhu ñayiví ihya. Ta ican ra catyí ra vatyí ra Jesús cuví Sehe ra. ¹⁰ Ñu cha chinó ñi tyi Sehe Nyoo cuví chi ra Jesús, chító ñu chichi añima ñu tyi ndicha. Ñu cha ña chinó ñi chi ra, tari quiví cha sahá ñu tuhun tyi Nyoo ra cuendu cuví ra, vatyí ña cuñí ñu chino ñi ñu cha cahán Nyoo tumañi ñi cuenda Sehe ra, ra Jesús. ¹¹ Ta ican ihya cuví tuhun cahán Nyoo chihin yo: Catyí ra tyi chahá ra noo ñayiví chaa coo yo tatu chinó ñi yo vatyí ra Jesucristo cuví

Sehe ra. ¹² Ñu cha nyaá Sehe Nyoo añima, iyó ñu ñayiví chaa ihya. Ta ñu cha yori Sehe Nyoo nyaá añima, ñahri ñayiví chaa cuan iyó ñu.

Nu ndihí cahan ra Juan ta chahá ra tuhun chi ñu

¹³ Sacuhín tuhun ihya chi nyoho cha chinó ñi chi ra Jesús Sehe Nyoo, tacuhva coto ndo tyi cha iyó ndo ñayiví chaa cha maa caa maa.

¹⁴ Cuneé xaan ñi yo chi Nyoo vatyí chító yo vatyí tatu chicán yo cha chicán yo chi ra ta cuhva cuñí ra cuví, maa ra chiñí ra tuhun cahán yo. ¹⁵ Ta tatu chító yo tyi chiñí ra tuhun cahán yo, chító tucu yo tyi cha ñihí yo cha chicán yo chi ra.

¹⁶ Tatu nyehé yo noo ñu tahan yo sacuví ñu noo cuatyí, soco noo cuatyí cha ña sacunaá chi chi ñu nuu Nyoo, cuví cacan tahvi yo chi ra cha cuenda ñu. Ta cusaha ra tacahnu ñi cuatyí ñu tacuhva coo ca ñu nuu ra. Soco iyó noo cuatyí cha sativí chi ñayiví nuu Nyoo. Ña tahán chi cacan tahvi yo cha cuenda ñu cha sacuví cuatyí cuan. ¹⁷ Tandihí cha ña vaha cha sacuví ñayiví, cuatyí cuví. Soco iyó cuatyí cha ña sativí ndihí chi chi yo nuu Nyoo.

¹⁸ Chító yo vatyí ñu cha nacacú chaa saha Nyoo, ña sañihí ñu sacuví ñu cuatyí. Vatyí Sehe Nyoo sahá cuenda chi ñu ta ña chahá ra cha ñiñi ra ña vaha chi ñu.

¹⁹ Ta yoó chító yo tyi cuenda Nyoo yihí yo. Tandihí cha ñayiví, cuenda ra ña vaha yihí ñu, vatyí nyacá ñaha ra chi ñu.

²⁰ Chító tucu yo vatyí cha quichí Sehe Nyoo. Ta chahá ra cha chiñi tuñi vatyí cohon nuu yo chi Nyoo, ra ndicha vaha. Ta nyaá yo chichi ndaha ra cuví cha ndicha, ra cuví Sehe Nyoo, ra Jesucristo. Ican ra cuví Nyoo cha ndicha, ican ra cuví ñayiví chaa cha maa caa maa. ²¹ Nyoho ra cuatyaa sehi, saha ndo cuenda chi ndo chihin cha sacahnú ñayiví, ta ni ñima Nyoo cuví.

Ta na cuví chi tyicuan caa.

Carta Cha Cu Uvi Cha Tyaa Ra Apóstol Juan

Nu catyí ra Juan vatyi cuñí xaan ra chi ñu yihí cuenda Nyoo

¹ Nyoo nacachí ra chuun, yoho Hermana. Ta yuhu cha cuví ra chahnu vehe ñuhu, sacuhín tutu ihya chuun ta chí tandihí sehun. Ta cuñí xain chí ndo chihin cha ñi iñi. Ta ñima yuhu ri cuñí chí ndo soco tandihí ca ñu cha nacotó cha ndicha ñandihí. ² Cuñí chí ndo cha cuenda cha ndicha cha ñohó chichi añima yo. Ta tyicuan ri maa cunyaa cha ndicha cuan chihin yo. ³ Sutu yo Nyoo ta Sutu Mañi yo Jesucristo Sehe Nyoo na nasoco ra chí ndo ta na nyehe ndahvi ra chí ndo. Ta na coo cha taxi ri añima ndo, chihin cha ndicha, vatyi cuñí xaan ra chí ndo.

⁴ Sii xaan cuñí cha chité tuhun suhva sehun ta nyehí vatyi iyó ñu tari cuhva catyí cha ndicha, tari cuhva catyí Sutu yo Nyoo tyi sacuvi yo. ⁵ Ta vityin, Hermana, chacú ndahvi nuun, na cuñí yo chí noo noo tahan yo. Ican ihya cuví cha tyai nu tutu ihya. Ta ñima noo tuhun chaa cha chahá Nyoo chí yo cha vityin ri cuví cha cuñí yo chí noo noo tahan yo. Soco ican ihya cuví tuhun cha catyí Nyoo chí yo nyata quivi xihna ri. ⁶ Ta cha cuñí yo chí ra, ican cuví cha sacuvi yo tandihí cha catyí ra chí yo. Ican ihya cuví cha catyí Nyoo tyi sacuvi yo. Ta nyoho, chiñí ndo tuhun ihya nya quivi xihna ri. Na coo ndo chihin cha cuñí ndo chí Nyoo ta chí ñáyivi.

Nu catyí ra Juan vatyi saha cuenda yo chí yo chihin ñu chicá noo sandavi ñaha

⁷ Catyí chuun tyehe caa vatyi cuaha xaan ra casandaví ñaha cachicá noo ra nicañnu siqui ñuhu ñáyivi. Cacatyí ra vatyi ña ndicha cha quichí cacu ra Jesucristo chihin coño ñuhu ñáyivi ihya. Ra cacatyí tyicuan caa, sandaví ñaha ra chí ñáyivi. Ta cuví ra noo ra xaan iñi chí ra Cristo. ⁸ Yucuan chaha, saha ndo cuenda chí ndo chihin tuhun cha sañahá ra coto sacunaa ndo cha vaha cha sacuvi ndo, ta coto ma ñihi ca ndo tandihí cha cuacuhva Nyoo chí ndo.

⁹ Yóó ñu cha ña ndoó vaha chihin cha sañahá ra Cristo chí yo ta sañahá ñu inga tuhun, yori Nyoo nyaá chihin ñu cuan. Soco ñu ndoó vaha ta quichahá tuhun cha sañahá ra Cristo, nyaá Sutu yo Nyoo ta ra Jesucristo Sehe ra chihin ñu cuan. ¹⁰ Tatu chaa noo ra vehe ndo, cua nyehe ra nu nyicú ndo ta cuñí ra sañaha ra tuhun cha ña sañahá ra Jesucristo, ma cuhva ndo vehe ndo cunyaa ra, ni ma tyinyee ndo chí ra. ¹¹ Vatyi tari quivi cha ñin ri cha ña vaha sacuvi yo chihin

ra tatu naquehén cuenda vaha yo chí ra cuan.

Nu ndihi cahan ra Juan

¹² Cuaha xaan ca tuhun tyai cuhva sacote chí ndo, soco ña cuñí sacote chí ndo chihin tutu. Soco nyatí cuhin nu nyicú ndo. Tyicuan ta ndatuhun vaha maa yo, tacuhva cusii ca cuñí yo.

¹³ Ihya vachi nocumi chuun sahá sehe cuhun. Nacachí tucu Nyoo chí maa ña ñandihí.

Carta Cha Cu Uñi Tyaa Ra Apóstol Juan

Nu catyí ra Juan vatyi ra Gayo vaha cuahan ra chihin Nyoo

¹ Yuhu cha cuví ra chahnu vehe ñuhu, sacuhín carta ihya chí yoho, Gayo, vatyi yoho cuvún noo ra tahin cha cuñi xain chihin cha ñi ñi.

² Yañi, chicán tahvi chí Nyoo cha cuendon vatyi na coo vahun. Ta tari cuhva cuahan vahun chihin Nyoo, ta tyicuan caa tucu, na nasoco Nyoo chuun tacuhva cha ma tñin cuehe chuun. ³ Vatyi cusii xaan cuñi quivi quichí coyo suhva ra yañi yo. Ta canacatyí ra vatyi cha ndicha vaha iyón cuhva cha sañahá ra Cristo. Ta ican cuví cha ndicha vaha. ⁴ Nahri ca cha sii cuñi tari cha chité vatyi sehi sacuví vaha ñu cuhva catyí tuhun ndicha.

⁵ Cuñi xain chuun, yañi. Vaha xaan sacuvún, vatyi tyiñuhún chí ra yañi yo, ta cha vaha xaan ca cha sacuvún vatyi tyiñuhún chí ra yañi yo inga ñuu cha chaa vehun. ⁶ Chihin nuu tandihi ñu vehe ñuhu canacatyí ra vatyi cuñi xaun chí ra. Ta saha tumañi ñi, yoho Gayo, tyinyee con chihin cha chiñuhú chí ra yañi yo vatyi sañihi ca ra cuhun coyo ra nu cuahan ra. Vatyi tyicuan caa tahán ñi Nyoo cha sacuvi yo. ⁷ Vatyi tyiño nuu Jesucristo cachicá noo ra. Ta ña cacuñi ra cha tyinyee ñáyivi cha ña ñohó nuu Nyoo chí ra. ⁸ Yucuan chaha vatyi maa yo tahán chí nyehe yo ñáá ndihi cha chiñuhú chí ra. Ta tyicuan caa ta cutahan yo chihin ra nu cahán ra tuhun ndicha.

Nu catyí ra Juan vatyi ra Diótfes, ña vaha sacuví ra

⁹ Yuhu sacuhin noo carta chí ñu nyicú vehe ñuhu, soco ra Diótfes sacuví ri maa ra nuu chí ra, ta ña tyasohó ra tuhun cahín. ¹⁰ Yucuan chaha tatu cuhin chiña, cusandai tyiño chihin ra cha cuenda tuhun cahán ra, vatyi cahán ña vaha ra siqui yo. Ta sñin ri tatu yóó hermano chaa, ña naquehén cuenda ra chí ra. Ta tatu ñu nyicú vehe ñuhu naquehén cuenda ñu chí ra, chasí ri ra, ta tavá ñehe ra chí ñu vehe ñuhu.

¹¹ Cuñi xain chuun, yoho yañi. Ma sacuvun cuhva ña vaha tari cha sacuví ra, soco sacuvun cha vaha. Vatyi ra sacuví cha vaha, ra cuenda Nyoo cuví ra, soco ra sacuví cha ña vaha, ña ñohó nuu ra chí Nyoo.

Nu catyí ra Juan vatyi vaha xaan cuhva chinó ñi ra Demetrio

¹² Tandihí ñu ta vaha cahán ñu siqui ra Demetrio. Ta vaha xaan quichahá ra tuhun Nyoo, ta suri ican cuan sañahá chí tyi ra

vaha cuví ra. Ta sñin ri nyuhu tucu cuví ndi cha ndaa cha cuenda ra, ta nyoho chitó ndo vatyi tuhun ndicha cahán ndi.

Nu ndihi cahan ra Juan

¹³ Cuaha xaan tuhun tyai cuhva sacote chuun, soco ña cuñi sacote chuun chihin tutu. ¹⁴ Soco nyatí cuhin nu nyaún cha numi ri, tyicuan ta ndatuhun vaha ca maa yo. ¹⁵ Na coo cha taxi ri añimon. Ra tahan yo cha iyó ityi tyehe saquichí xaan ra nocumi chuun. Ta sañun tumañi ñi cuhvon nocumi chí noo noo ra tahan yo cha iyó ityi chiña.

Carta Cha Sacuhun Ra Apóstol Judas Chi Ñáyivi Yihí Cuenda Nyoo

Nu tyaq ra Judas noo tutu chi ñu nacanaq Nyoo chi

¹ Yuhu ra Judas cuví noo ra sacuví tyiño nuu ra Jesucristo. Ta yañi ra Jacobo cuví chii. Tyaí noo carta ihya chi ndo cha cuví ndo ñáyivi cha nacanaq Nyoo Sutu yo. Ta naquehén vaha ra chí ndo vatyi cuví ndo ñáyivi cuenda ra. Ta vityin cumí vaha ra chí ndo cha cuenda cha ñin ri cuví ndo chihin ra Jesucristo. ² Nyoo na nyehe ndahvi ra chí ndo. Ta na cutuñi ca ñi ndo yoso caa cha cuñi ra chí yo. Ta na coo cuaha ca cha taxi ri cuñi añima ndo, saha ra.

Nu cahqn ra Judas siqui ñáyivi cha sañahá cha ña ndicha

(2 Pedro 2.1-17)

³ Cha naha xaan yihí ñi tyai noo carta chi nyoho yañi, vatyi cuñi cahin chiin siqui yoso caa sacacu Nyoo añima yo. Soco vityin cuñi chí cha tyaí tutu ihya chí ndo vatyi saniñi chí ndo cuní ñi ndo chihin tandihí fuerza ndo ta cuhun ndo ityi nuu ca chihin cha chinó ñi ndo tuhun vaha cha chahá Nyoo chí yo. Vatyi noo ri chaha chahá ra ta ñin caña ri chahá ra tandihí cha tahán chí chí yo vatyi chinó ñi yo cha cuví yo ñu yihí cuenda ra. ⁴ Vatyi yihí ra quihví xehe ra nu nyicu ndo. Ta cuñi ra sandavi ñaha ra chí ndo. Catyi ra vatyi cha yahá saha Nyoo ticahnu ñi chí yo ta yucuan chaha cuví sacuví yo yoso cuhva quichi cuví ñi coño ñuhu yo. Soco ra canyacuví tyicuan caa, cuví ra noo ra cucunaa. Vatyi tyicuan caa catyi Nyoo nya tyembu chahnu, vatyi canyacuví ra cha quiñi caa cha ña tahán chí sacuví ra. Vatyi ña caquichahá ra chí Nyoo ta ña chinó ñi ra cha Nyoo cuví noo ra cahnu ca, ra nyacá ñaha chí yo. Ta ni ri ra Jesucristo Sutu Mañi yo, ña cahnu xaan cuví ra, cacatyi ra.

⁵ Vasi cha chitó ndo cha sacuví Nyoo ta cha naha, socio cuñi sanicohín ñi ndo vatyi Sutu yo Nyoo tavá ra chí sutu chahnu yo ñu Israel ñuu Egipto, sacacu ra chí ñu ndaha ñáyivi ñuu Egipto cuan. Soco yahá cuan sanaa ra tandihí maa ñu cha ña chinó ñi chí ra. ⁶ Ta tyicuan caa tucu ángel. Ii ra. Ñahri cuatyí ra. Soco sulva ra caquita ra nu cuatyaq Nyoo chí ra cha cuenda cha ña quichahá ra chí ra. Yucuan chaha Nyoo cumí ra chí ángel cuan, nuñi ra chihin cadena nu ñaa ñi. Nyatú ra cha sacutuñi Nyoo chí ra na chaa chí quivi cahnu. ⁷ Tyicuan caa tucu ñáyivi ñuu Sodoma ta ñuu Gomorra,

ta ñu ñuu cuatyaq cha chiyó nicachico ñuu cuan. Sanaa Nyoo chí ñu cha cuenda cha quiñi caa cha chinyacuví ñu. Ca chiyó ri maa ra chihin ñusihi. Ta ñusihi ca chiyó ri maa ñu chihin noo ra ta chihin inga ra. Ta cuaha ca cha quiñi caa chinyacuví ñu vatyi rayi ca chiyó ra chihin tahan yí ra ñandihí. Soco cha cuenda cuan, nyehe ñu tindoho nu cayú ñu, quivi chahmí Nyoo ñuu ñu. Ta yucuan sañahá chí chí yo vatyi ñu sacuví cha quiñi caa, cucayu ñu chihin ñuhu cha ma ndahva ca maa.

⁸ Ta tyicuan caa tucu ra cacuñi sativi chí ndo. Vasi cha chitó vaha ra cha sacuví Nyoo ta ityi chata ca, socio maa ra chicá ñi ra vatyi tyaqui xaan cuacoo ra nu cuahan ca chí chihin cha nyacuví ra tyicuan caa. Soco ndahvi ra vatyi tari quivi cha tahán ra noo ñumahna tyaqui cuví cuan. Sativi ra coño ñuhu ra ta ña cuñi ra cha cunyaca ñaha Sutu Mañi yo chí ra. Ta cahán ña vaha ra siqui ra nahnu ca cha nuu maa ra, cuví ri siqui ángel, cuví ri siqui vatyi ña vaha, cuví ri siqui Nyoo. ⁹ Soco ángel Miguel cha cuví ra noo ra cahnu nuu Nyoo, ta ña caña ñi ra sacuví ra tyicuan caa. Vatyi quivi cañi tahan ra chihin ra ña vaha cha cuenda coño ñuhu ra Moisés, ña caña ñi ra cahqn ña vaha ra siqui ra ña vaha. Noo ri cha catyi ra chí ra: “Maa Sutu Mañi yo na tachi tuñi ra chuun cuenda cha ña vaha cha nyacuvín”, catyi ángel Miguel cuan chí ra. ¹⁰ Soco ra cha sayangá chí ndo cuan, cahán cuehe ra vatyi ña chitó ra. Ta sacuví ra tari sacuví quiti. Vatyi quiti ña cutuñi ñi ti. Nyacuví ri maa ti cha cuñi coño ñuhu ti. Ta tyicuan caa tucu ra cuan. Chihin cha quiñi caa nyacuví ra, sativi ra chí ra.

¹¹ ¡Ndahvi ra ndahvi cuan! Vatyi quehen ra cha caa ra Caín. Ta cha cuenda cha cuñi ra saha ganaa ra xuhun, quitá caxiin ra tari quita caxiin ra Balaam. Ta cucunaa ra tari cuanaa ra Coré, vatyi chihí ra cuan cha cuenda cha nacahnu ra nu cahán ra cuví nuu chí ra. ¹² Ra cha sayangá chí ndo chahá ra ticahan nuu chí ndo nu ndu ñin ri ndo. Vatyi chachí ra ta chihí ra, chihin cha si cuñi ra. Ta ña cahán nuu ra cha ña sahá ra ñáyivi chí Nyoo. Ta noo ri maa ra sacuvahá ra chí ra. Cuví ra tari noo vico cha tyandahá tatyi chí, ta cuñi maa yo tyi cua coon savi, ta ña coón ra. Cuví ra tari noo yutun cha ña chaha chiti. Vatyi noo yutun cha ña chahá chiti cuví tun tari noo yutun chihí vasi nyitó tun. Ta siin maa cha cucuvi vaha tun vatyi cucahnya ñáyivi chí tun. Tari cha uvi chaha chihí tun cuví cuan. Ta tyicuan caa maa ra, tari cha uvi chaha chihí ra vatyi chitó ra tuhun vaha ta ña cuñi ra sacuví. ¹³ Tari ndutya yuhu tyañuhu tatu cha nduxaan chí, iyo xaan nicuinanyaa chí. Soco ñin yaha ri tyicuan ta ndoo maa ri maa tiñi ta miñin nu

niyiti cuan. Tyicuan caa maa ra, sandoó ra cha quiñi caa añima ñáyivi. Ta cuví ra tari tiñoó andivi cha cuanaa. Soco cha nyaá maa cha cundoo ra nu ñaa iñi cahnu tyicuan ri maa.

¹⁴ Tuhun maa ra cuan cahan ra Enoc ta cha naha. Ra Enoc tata cu ucha ra Adán cuví ra. Ta cahan ra tuhun cha chaha maa Nyoo chi ra, ta catyí ra: “Nyeñi chi Sutu Mañi yo cha vachí ra chihin cuaha mil ángel cuenda ra ¹⁵ vatyi nyehe ra cha sacuvi tandihi ñáyivi. Ta tachi tuñi ra chi tandihi ñu quiñi iyó cha cuenda tandihi cha ña vaha cha chinyacuví ñu, ta cha cuenda tuhun quiñi caa cha cacahán ñu siqui ra”, catyí ra Enoc ta cha naha. ¹⁶ Ra cha sayangá chi ndo, ña ndoó ra vaha chihin cha chahá Nyoo chi ra. Cahán ra chi Nyoo ta chi ñáyivi ta iyó ra tari cuhva quichi cuví iñi coño ñuhu ra. Cahán ra chihin cha cahnu sahá ra chi ra. Tatu cahan vaha ra chihin noo ñáyivi soco cha cuenda cha cuñi ra cuvaha ra nuu ñu.

Nu chahá ra Judas tuhun chi ñu yihí cuenda Nyoo

¹⁷ Soco nyoho yañi, ma quichaha ndo chi ra cuan. Soco ñicohon iñi ndo tuhun cha cahan ra apóstol cuenda Sutu Mañi yo Jesucristo. ¹⁸ Cacatyí ra chi ndo vatyi nu cuasandihí ca chi quivi ta cuacoo ra cucuacu nyaa tuhun Nyoo. Ta coo ra yoso cuhva quichi cuví iñi maa ra chihin cha quiñi caa ra. ¹⁹ Ta ican ra ihya cacuví ra cuñi sacusiñ chi yo. Vatyi quichahá ra cuhva cuñi coño ñuhu ra ta ñahri Tatyí Ii Nyoo nyaá chihin ra.

²⁰ Soco nyoho yañi, cunñi ca iñi ndo chihin cha chinó iñi ndo chi ra Cristo. Ta caçan tahvi ndo chi ra chihin tunyee iñi Tatyí Ii maa ra. ²¹ Ta tyicuan ri ñihí cunnyañaa ndo chi Nyoo, ta coto ndo vatyi cuñi xaan ra chi ndo. Ta cuatu tuhva ndo quivi chaa yo nu coo yo ñayivi chaa cha ma naa ca maa. Vatyi ican cuví cha cuacuhva Sutu Mañi yo Jesucristo chi yo cha cuenda cha ndahvi cuñi ra nyehé ra chi yo.

²² Ta ndahvi cuñi nyehe ndo chi ñu cha ña ñi vaha iñi. ²³ Ta inga ñu, tyinyee ndo chi ñu tacuhva cacu ñu. Tari quivi cha tava ndo chi ñu nu cayú ñuhu. Ta chi inga ñu cundahvi cuñi ndo nyehe ndo chi ñu, soco saha ndo cuenda chi ndo chihin cha quiñi caa cha sacuví ñu, coto sacuvi ndo tari sacuví ñu. Nyacua nya sahma ñihno ñu ta ña vaha cha cuenda cha sacuví ñu cha quiñi caa.

Nu ndihí cahan ra Judas ta sacahnü ra chi Nyoo

²⁴⁻²⁵ Noo ri Nyoo iyó, ta chiñi tuñi xaan ra. Ta ican ra cuví ra cha sacacú chi yo. Ta iyó xaan tunyee iñi chi ra cha sahá cuenda ra chi yo ta sanduvií ra chi yo cha ñahri cuatyí yo coo quivi cunyaca ra chi yo nu nyaá ra

chihin cha cahnu cuví ra. Ta sii xaan cucuvi chi yo.

Na coto yo ñana cha cahnu xaan ca cuví ra. Chi maa ra na sacahnu yo vatyi cahnu xaan ca maa ra. Ta iyó xaan ca tunyee iñi chi ra. Noo tuhun ri maa ra nyacá ñaha tandihi. Nyacá ñaha ra ta itiy chata ca, vityin. Ta tyicuan ri maa cunyaca ñaha ra. Ta na cuví chi tyicuan caa.

Cha Sañaha Ra Jesucristo Chi Ra Apóstol Juan

Cha nyehę ra Juan

¹ Ican ihya cuvı noo cha catyı Nyoo chi ra Jesucristo vatyi na sacoto ra chi ra casacuvı tyiño nuu ra. Sañaha ra ñáá ndihi cha cucuvi cha numi ri. Noo ángel tachı ra Jesucristo vatyi sañaha ra chi yuhu ra Juan. ² Ta cahın cha ndaa ta cha ndicha cuenda tandihi cha nyehı. Ta cuvı cha ndaa cuenda tuhun Nyoo ta cuenda tandihi cha sacoto ra Jesucristo.

³ Sii xaan cuñı ñu sacuaha tuhun cha nyaá nu tutu tuhun Nyoo ihya. Ta sii xaan cuñı ñu chıñı tuhun cha cahán chi ta quichahá ñu, vatyi tandihi tuhun cha nyaá nuu tutu Nyoo, cha nyaña yatyin quıvi cha cunyehe yo.

Nu sacuhun ra Juan tutu chi ndi ucha tathan vehe ñuhu

⁴ Yuhu ra Juan sacuhın tutu ihya chi ndi ucha vehe ñuhu ñuu cha nyicú ityi Asia. Nyoo ta ndi ucha tathan Tatyı Ii ra cha nyicú nuu ra nu nyaá ra nyacá ñaha ra nu tyayu chichi gloria, na nasoco ra chi ndo. Ta na coo cha taxi ri ańima ndo sahá ra. Nyoo ican ra cuvı ra iyó vityin, ta iyó maa ra quıvi quichahá tandihi, ta ican ra cuquichi. ⁵ Ta naquehen tucu ndo cha vaha cuan sahá ra Jesucristo ñandihı. Vatyi ican ra cuvı ra cha ndaa vaha ta ra ndicha. Ta cuvı tucu ra noo ra cha nandoto cha xihna ri ta tyicuan ri maa cuoco ra. Ta iyó ityi chi ra ta nyacá ñaha ra chi ra cacuvı rey cha iyó siqui ñuhu ñayıvi ihya. Ican ra cuvı ra cha cuñı xaan chi yo. Ta sandachı ra cuatyı yo chihin niñı ra. ⁶ Ta sacuvı ra rey chi yo. Ta sacuvı ra tata sutu chi yo tacuhva vatyi sacuvı yo tyiño nuu Nyoo Sutu ra. ¡Na sacahnu yo chi ra. Ta na cunyaca ñaha ra tyicuan ri maa! Ta tyicuan caa na cuvı.

⁷ ¡Nyehe ndo! ¡Cha vachi ra Cristo nu vico andıvi! Tandihı ñayıvi cunyehe ñu chi ra. Nyacua nya ñu cha sańcuehe chi ra ta cunyehe ñu chi ra. Ta tandihı ñu cucuacu chaa ñu chihin cha yuhvı ñu na nanyehe ñu chi ra inga chaha vatyi suri maa ra cuvı. Cha ndicha, tyicuan caa cucuvi.

⁸ Catyı Nyoo:

—Yuhu cuvı ra xihna cuiri, ta yuhu cuvı ra cundoo nu ndihı tuhun —catyı Sutu yo Nyoo, ra iyó tandihı tunyee iñı chi. Ican ra cuvı ra iyó vityin. Ta iyó maa ra nu quichahá tandihı, ta ican ra cuquichi.

Noo cuhva tyaquı cha sañaha Nyoo chi ra Juan cuenda ra Cristo

⁹ Yuhu ra Juan cuvı yañı nyoho. Ta ın ri nyehé yo tindoho. Ta ın ri nyacá ñaha Nyoo chi yo. Ta ın ri cunyee xaan yo ñáá

ndihı cha cuvı chi yo vatyi tyinyee ra Jesucristo chi yo. Ñoho yuhu vehe caa noo ñuhú cha nañı Patmos cha nyaá mahıu tyañuhu. Ñohı vehe caa cha cuenda vatyi cahın tuhun Nyoo cha quichı sañaha ra Jesucristo. ¹⁰ Ta cuvı chi noo quıvi cha sacahnú yo chi Sutu mañı yo. Ta ñihı xaan chinyaa Tatyı Ii Nyoo chihin. Ta chıñı noo ndusu ñihı xaan ityi chate, tari noo ndusu cha ñihı xaan tari ndusu trompeta. ¹¹ Ta catyı chi chii tyehę caa:

—Yuhu cuvı ra xihna cuiri, ta yuhu cundoo nu ndihı tuhun. Tyaa nuu noo libro tuhun cha nyehun, yoho Juan. Ta sacuhun chi ndi ucha vehe ñuhu cha nyicú ityi Asia. Sacuhun chi ñu nyicú vehe ñuhu ñuu Efesoo, chi ñu vehe ñuhu ñuu Esmirna, chi ñu vehe ñuhu ñuu Pérgamo, ta chi ñu vehe ñuhu ñuu Tiatira, ta chi ñu vehe ñuhu ñuu Sardis, ta chi ñu vehe ñuhu ñuu Filadelfia, ta chi ñu vehe ñuhu ñuu Laodicea —catyı ndusu cuan.

¹² Tyicuan ta nanyocave vatyi cuñı nyehı yóo chi ndusu cha cahán chihin cuan. Ta nanyehı ucha tathan cańileru xuhun cuaan. ¹³ Ta mahıu ucha tathan cańileru cuan, nyehı chi noo ra cha caá tari caá noo rayıi ñuhu ñayıvi ihya. Ñihnó ra noo sahna cañı nya nu chaha ra. Ta yihı ra noo sinchu xuhun cuaan, ta nya nu nyaá pechu ra chitahan sinchu cuan. ¹⁴ Ta cuichin ixi xiñı ra, tari ixi mbee cuichin, tari cha cuichin catyı. Ta tari cha cayú ñuhı chıti nuu ra. ¹⁵ Ta xiño chaha ra tari xiño noo caa cha nañı bronze cha tuhva nducuaaha nu cayú ñuhı chichi noo horno. Ta ñihı xaan ndusu ra tari ndusu cha cuaha vavaha yuvi nahnu. ¹⁶ Ta yihı ndaha ra ucha tathan tiñoo andıvi chiyo vaha ra. Ta tari caa noo mityi cha xaan nduvıvi chiyo yuhu, (tyicuan caa tuhun cahán ra cha quitá yuhu ra). Ta tari caá cha ñihı xaan nyehé ñanyıi cha xiño vavaha, tyicuan caá nuu ra.

¹⁷ Cuhva cha nanyehı chi ra, nduve chaha ra tari maa cha chıñı. Soco maa ra tyiso ra ndaha chiyo vaha ra siqui, ta catyı ra chii:

—Ma yuhvun. Yuhu cuvı ra xihna cuiri, ta yuhu cundoo nu ndihı tuhun. ¹⁸ Iquen cuvı ra cha nyıtó. Ta vası chihı soco vityin cuacoı tyicuan ri maa. Ta iyó ityi chii cha catyı ama tathan chi tuhun chihı chi noo noo ñayıvi, ta iyó ityi chii cha catyı tatu cuhun ñu anyaya. ¹⁹ Tyaa nu libro tandihı cha nyehın, cha iyó vityin, ta cha cuoco nu cuahan ca chi. ²⁰ Ican ihya cuvı tuhun xehe cuenda ndi ucha tiñoo andıvi cha nyehın yihı ndaha chiyo vahi, ta cha cuenda ndi ucha cańileru xuhun cuaan cuan: Ndi ucha tiñoo andıvi cuan cuñı chi catyı: ra cha cahán tuhın ucha tathan vehe ñuhu cuan. Ta ndi ucha cańileru cuan cuñı chi catyı ndi ucha vehe ñuhu cuan.

2

Tuhun cha sacuhun ra chi ñu nyicú vehe ñuhu ñuu Éfeso

¹ Sacuhun tutu chi ra cahán tuhin chihin ñu nyicú vehe ñuhu cha nyaá ñuu Éfeso. Ta catyun chi ra tyehe caa: “Tyehe caa catyí ra cha yihí ndaha ucha tiño chihin ndaha chiyo vaha ra. Ta chicá noo ra mahñu ndi ucha cañileru xuhun cuaan: ² Yuhu chité tandihí cha sacuví ndo. Chité vatyi ñihi xaan tyiño sacuví ndo. Ta cunyeé xaan iñi ndo. Ta chité vatyi ña cunyeé iñi ndo nyehé ndo chi ñu quiñi iyó. Ta chité vatyi tuhva ndo nducu nyehé ndo chi ra cha catyí vatyi tyiño Nyoo chica noo ra soco ña ndicha ra. ³ Cunyeé xaan iñi ndo. Ta nyehé xaan ndo tindocho ta cha sahá tyiño xaan ndo cha cuende chihin cha ña ndu uvi iñi ndo. ⁴ Soco iyó noo cha caá ndo nui. Vatyi ña cuñi vaha ca ndo chii tari quivi xihna ri. ⁵ Yucuan chaha ñichon iñi ndo nya maa maa cuví nu ña vaha sacuví ndo. Ta ñasama ndo cuhva iyó ndo. Ta sacuvi ndo tari cuhva chiyo ndo quivi natiin cuenda ndo notuhun Nyoo. Tatu ma nasama ndo cuhva iyó ndo, numi ri cuhin nu nyaá ndo, ta tinyai cañileru ndo nu nyaá chi. Soco tatu ndu uvi iñi ndo cuatyí ndo, ma tinyai. ⁶ Soco iyó tucu cha vaha nyacuví ndo. Vatyi ña cuñi nyehé ndo cha quiñi caa cha sacuví ñu yihí cuenda ra Nicolás. Tyicuan tucu yuhu ña cuñi nyehí yucuan. ⁷ Ta nyoho cha cutuñi iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: Tatu cuví chasaha ndo chi ra ña vaha, cuhve cha cachi ndo chiti yutun cha chahá cha conyito añima ndo. Ta yutun cuan nanyaá tun nya nu iyó Nyoo andivi, ta cuñihi ndo tandihí cha vaha cha iyó yucuan.”

Tuhun cha sacuhun ra Jesucristo chi ñáyivi nyicú vehe ñuhu ñuu Esmirna

⁸ Sacuhun tucu tutu chi ra cahán tuhin chihin ñu nyicú vehe ñuhu cha nyaá ñuu Esmirna, ta catyun chi ra tyehe caa: “Tyehe caa catyí ra cuví cha xihna cuiri, ra cundoo nu ndihí tuhin, ra cha chihí ta nandoto; ⁹ Yuhu chité tandihí cha sacuví ndo. Ta chité tindocho cha nyehé xaan ndo. Ta chité cha ndahvi ndo. Soco chihin tuhin Nyoo, tyayí ndo. Ta chité yoso caa ñu cha catyí vatyi ñu Israel cuví ñu, ta cahán ña vaha ñu siqui ndo. Ta ni ñima ñu Israel cuví ñu vatyi noo ityi ñu yihí cuenda ra ña vaha, ra nañi Satanás, cuví ñu. ¹⁰ Soco ma yuhvi ndo cha cunyehe ndo tindocho. Vatyi ra ña vaha cutyihí ra vehe caa chi suhva nyoho, vatyi cunducu nyehé ra chi ndo tatu cusaña ndo chi Nyoo. Ta uchi quivi cunyehe ndo tindocho. Soco cunyicon vaha ndo chi Nyoo nyacua nya quivi cúvi ndo. Ta yuhu cuhve ñáyivi coo

ndo chihin Nyoo. ¹¹ Ta nyoho cha cutuñi iñi ndo tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: tatu cuví chasaha ndo chi ra ña vaha, ña tahán chi cuhun ndo anyaya, nu cutachi tuñi Nyoo chi añima ña vaha.”

Tuhun cha sacuhun ra Jesucristo chi ñu nyicú vehe ñuhu ñuu Pérgamo

¹² Sacuhun tucu tutu chi ra cahán tuhin chihin ñu nyicú vehe ñuhu ñuu Pérgamo. Ta catyun chi ra tyehe caa: “Tyehe caa catyí ra cha nyisó mityi cha xaan ndinduvi chiyo yuhu: ¹³ Yuhu chité tandihí cha sacuví ndo. Ta chité vatyi iyó ndo nu nyacá ñaha cuhna, ra nañi Satanás. Soco tyicuan ri chinó iñi ndo chii. Ta vasi nu canyicú ndo chiña chahñí ñu chi ra Antipas, ra cha cuví noo cha ndoo cuende, vatyi chiña chicá noo ra cha nañi Satanás cuan. Soco ni ri maa chahñí ñu chi ra, nyoho ña sandihí maa ndo tuhin cha chinó iñi ndo chii. ¹⁴ Soco catuvi suhva cha caá ndo nui: Vatyi nu nyicú ndo nya Pérgamo chiña, yihí ra cha ña cacuñi ra saña ra cuhva cha sacuví ra Balaam. Ta maa ra Balaam tyiyuhú ra chi ra Balac, na sacachi ra chi ñu Israel nyayu cha chiyo nu sacahnú ñu chi xitohyo. Tyiyuhú ra chi ra nacatyí ra chi ñu vatyi ñahri caa cha coo ñu chihin tahan ñu vasi ñima yí ñu cuví, o vasi ñima ñasihí ra cuví. ¹⁵ Ta suri iyó suhva ñáyivi mahñu ndo cha ña cacuñi ñu saña ñu cuhva sañahá ra cuenda ra Nicolás. Ta yuhu ña cuñi nyehi cuhva sañahá ra cuan. ¹⁶ Yucuan chaha numi ri ñasama ndo cuhva iyó ndo. Vatyi tatu ma nasama ndo cuhva iyó ndo, cuquichi siqui ndo cha numi ri ta cucañi tahin chihin ñu cuan chihin cha tari mityi cha quitá yuhi. ¹⁷ Ta nyoho cha cutuñi iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu: tatu cuví chasaha ndo chi ra ña vaha, cucuhve cha cachi ndo noo pan maná cha ñohó xehe. Ta nu yuu cuan cucunyaa noo sivi chaa cha yori chitó. Ta noo tuhin ri ñu cuquehen cuenda cuan cucoto.”

Tuhun cha sacuhun ra Jesucristo chi ñu nyicú vehe ñuhu ñuu Tiatira

¹⁸ Sacuhun tucu tutu chi ra cahán tuhin chihin ñu nyicú vehe ñuhu cha nyaá Tiatira. Ta catyun chi ra tyehe caa: “Tyehe caa catyí Sehe Nyoo, ra cha caá chiti noo tari noo cha cayú ñuhu. Ta tari caá noo caa ñinu cha nañi bronce cha xiño xaan, tyicuan caa chaha ra: ¹⁹ Yuhu chité tandihí cha sacuví ndo. Ta chité yoso cuhva cha cuñi ndo chi ñáyivi. Ta chité cuhva cha chinó xaan iñi ndo chii. Ta tyinyeé ndo chi tahan ndo. Ta cunyeé xaan iñi ndo. Ta chité vatyi cuaha ca cha vaha sacuví ndo vityin ta ñima ca ta nu quichaha. ²⁰ Soco iyó noo cha caá

ndo: Vatyí chahá ndo ityi chí ñaha cha nañí Jezabel na sañaha ña chí ndo. Catyí ña vatyí cuenda Nyoo cahán ña. Soco chihin tuhun cha sañahá ña, sandaví ñaha ña chí ñu sacuví tyiño nui. Vatyí sañahá ña cha coo ñu chihin inga rayíi o ñusihí ta ñima yíi ñu o ñasihí ra cuví. Ta sañahá ña cha cachí ñu nyayu cha chiyó nu sacahñu ñu chí xitohyo. ²¹ Yuhu cha nyatu xain cha nasama ña cuhva iyó ña, soco ña cuñí ña nasama ña. Vatyí ta sandoo ca ña cha iyó ña chihin rayíi ta ñima yíi ña cuví. ²² Ta vityin cua quehen noo cuehe chí ña. Ta cua cuhvi ña. Ta ma cuví nducuita ña. Ta ñu sacuví cha quiñi caa chihin ña, tatu ma ndu uvi iñi ñu, cucuhve noo tindoho nyehe ñu. ²³ Ta cucahñi chí sehe ña. Ta tyicuan caa, coto tandihí ñu nyicú vehe ñuhu, vatyí yuhu chité tandihí cha chicá xiñi ñu, ta tandihí cha caá ña ñima ñu. Ta chí tahan tahan nyoho cucuhve cha tahán chí chí ndo yoso cuhva cha sacuví ndo. ²⁴ Soco chí tandihí ca nyoho ñuu Tiatira, cha ña quehen ndo cuhva cha sañahá ña, ni ña sacuví ndo cha catyí maa ñu tuhun nahnu cuenda ra ña vaha, ña tyai inga tuhun cha yíi siqui ndo. ²⁵ Soco ma saña ndo cuhva cha vaha nyacuví ndo nyacua nya quichi. ²⁶ Ta nyoho tatu cuví chasaha ndo chí ra ña vaha, ta sacuví ndo cuhva cuñí nyacua nya nu ndihí tuhun, cucuhve ityi chí ndo cha cunyaca ñaha ndo chí ñu ñuhu ñayívi. ²⁷ Tari chahá Suti ityi chíi cha cunyaca ñahi, tyicuan caa cucunyaca ñaha ndo. Tari cha chihin noo yutun caa cutachi tuñi ndo chí ñu. Tari tahvi cuatyí minoo quisi ñuhú, tyicuan caa cusacuví ndo chihin ñu. ²⁸ Ta cuhve tiño cahnu andívi cunyaa chihin ndo. Ta ícan yuhu cuví cuan. ²⁹ Ta nyoho cha cutuñi iñi ndo tyasoho ndo ñáá cha catyí Tatyí Ii Nyoo chí nyoho, ñu nyicú vehe ñuhu.”

3

Tuhun cha sacuhun ra Jesucristo chí ñu nyicú vehe ñuhu ñuu Sardis

¹ Sacuhun tucu tutu chí ra cahán tuhun chihin ñu nyicú vehe ñuhu ñuu Sardis. Ta catyun chí ra tyehe caa: “Tyehe caa catyí ra cha yihí ndaha ndí ucha Tatyí Ii Nyoo ta ndí ucha tiño andívi: Yuhu chité tandihí cha sacuví ndo. Ta vasi catyí ñayívi tyi nyitó ndo soco cha cuenda chí yuhu, chíhí ndo. ² Saha cumi vaha ndo chíin ri ca cha vaha cha iyó chí ndo. Vatyí cha cuñí ndihí tuhun nu nyicú ndo. Vatyí nyehí vatyí cha sacuví ndo, ña vaha maa nuu Nyoo. ³ Njochon iñi ndo tuhun vaha cha cutuhva ndo. Cunyicon ndo cuhva cuan, ta ñasama ndo cuhva iyó ndo. Vatyí tatu ma naquehen vaha ndo cha vaha, sana iñi ndo ta cuquichi siqui ndo, tari tuhva ra suhu quichi. ⁴ Soco iyó suhva nyoho ñu Sardis chíña cha ña sacuví ndo cha

quiñi caá. Ña sacanyahyu ndo sahna ndo cuví cuan. Ta maa ndo cucuihno ndo sahna cuichin chihin. Ta cucaca noo ndo chihin, vatyí tyicuan caa tahán chí chí ndo. ⁵ Ta nyoho tatu cuví chasaha ndo chí ra ña vaha, cucuihno ndo sahna cuichin chihin. Ta ma sanai sivi ndo nu libru ñu cuaconyito chihin Nyoo. Ta cunacoto nui chí ndo, chihin nuu Suti, ta chihin nuu ángel. ⁶ Ta nyoho cha cutuñi iñi ndo, tyasoho ndo ñáá cha catyí Tatyí Ii Nyoo chí nyoho ñu nyicú vehe ñuhu.”

Tuhun cha sacuhun ra Jesucristo chí ñu nyicú vehe ñuhu Filadelfia

⁷ Sacuhun tucu tutu chí ra cahán tuhun chihin ñu nyicú vehe ñuhu ñuu Filadelfia. Ta catyun chí ra tyehe caa: “Tyehe caa catyí ra ii, ra ñahri cuatyí, ra cha ndicha vaha, ra cha ndaha ndaha ticu rey David, ra cha nuñá yuvehe ta ni noo ñu ta ma cuví nacasi ñu. Ta tatu nacasi ra, ni noo ñu ta ma cuví nuña ñu. Tyehe caa catyí ra: ⁸ Yuhu chité tandihí cha sacuví ndo. Ta nuu ndo nuñe noo yuvehe. Ta yori cuví nacasi, (vatyí chahí cha cahán ndo tuhun Nyoo chihin ñayívi, ta yori cuví casi). Ta vasi chíin ri fuerza ndo, soco quichahá ndo tuhun cahán, ta ña catyí ndo vatyí ña ñohó nuu ndo chíi. ⁹ Ta ñu cuenda ra ña vaha, ñu cuendu, ñu catyí vatyí ñu Israel cuví ñu, ta ñima, cusacuñi chíi chí ñu nuu ndo, tacuhva coto ñu tyi yuhu cuñí chí ndo. ¹⁰ Ta sacuví ndo cha catyí, vatyí cunyehe iñi ndo. Ta yucuan cuenda cusaha cuende chí ndo chihin tindoho cahnu cha cusaquichi siqui tandihí ñayívi, vatyí cunducu cote chihin tandihí ñu iyó siqui ñuhu ñayívi tatu cuñí ñu chíi. ¹¹ Numi ri cuquichi. Saha vaha ndo cuenda cuhva iyó ndo, coto yóó cha tinyaa premio cha cuñihi ndo. ¹² Nyoho tatu cuví chasaha ndo chí ra ña vaha, cahnu ca tyiño cucuvi ndo nuu Nyoí. Ta ma canyaha ca ndo nu nyaá Nyoo. Ta cutyai sivi Nyoí chí ndo, ta sivi ñuu Nyoí, ñuu Jerusalén chaa cha cusaquichi Nyoí nya andívi, ta suri cutyaa tiqui sivi chaí chí ndo ñandihí. ¹³ Ta nyoho cha cutuñi iñi ndo, tyasoho ndo ñáá cha catyí Tatyí Ii Nyoo chí nyoho ñu nyicú vehe ñuhu.”

Tuhun cha sacuhun ra Jesucristo chí ñu nyicú vehe ñuhu ñuu Laodicea

¹⁴ Sacuhun tucu tutu chí ra cahán tuhun chihin ñu nyicú vehe ñuhu ñuu Laodicea. Ta catyun chí ra tyehe caa: “Tyehe caa catyí ra cha ndicha vaha, ra cuví cha ndaa vaha cha cahán cha ndicha, ra cha savaha tandihí cha iyó chihin Nyoo. ¹⁵ Yuhu chité tandihí cha sacuví ndo. Ta chité vatyí ni ña cuñí vaha ndo chíi. Ta ni ña cuñí tucu ndo saña ndihí ndo chíi. Vaha tyehe ta saña ndihí ndo chíi, o sañihi ndo quichaha ndo tuhun cahin, vaha. ¹⁶ Soco vatyí chíin ri cuñí ndo

chii, ta ni ña sañá ndihi ndo chii, ta ni ña cuñí ndo sacuvi ndo tuhun cahin, yucuan chaha cusanaa ndihi iñi tuhun ndo. ¹⁷ Vatyí nyoho catyí ndo tyehe caa: Yuhu tyayí, vaha iyé, ta ñahri ca maa cha chiñuhú chii, catyí ndo. Ta ña chitó ndo vatyí cuví ndo noo ra ña sii cuñí, noo ra ñahri iyó chí, noo ra ndahvi, noo ra cuaa, noo ra vityiyaa cuví ndo. ¹⁸ Yucuan chaha chahí tuhun chí ndo vatyí chí mai sata ndo xuhun cuaan vaha cha yahá nu ñuhú ta ña cayú, tacuhva na cutyayíi ndo. Ta chí mai sata ndo sahma cuichin vatyí cuihno ndo, tacuhva cha ma cucahan nuu ndo vatyí vityiyaa ndo. Ta tyjihi ndo colirio chití nuu ndo tacuhva na nanyehe ndo. ¹⁹ Yuhu chahí tuhun chí ñu cha cuñí xain chí. Ta tachí tuñi chí ñu ñandihí. Yucuan chaha catyí chí ndo, ñasama ndo kuhva iyó ndo ta sacuvi ndo cha vaha. ²⁰ Yuhu nanyaí yuvehe añima ñáyivi ta sacachén. Tatu nya noo ñu chiñí ñu ndusi, ta nuña ñu yuvehe, yuhu quihvi ta cuxiñi chihin ñu. Ta maa ñu cuxiñi ñu chihin mai. ²¹ Cucuhve cha cunyaa ndo chihin nu nyacá ñahi tatu cuví chasaha ndo chí ra ña vaha. Tari yuhu cuví chasahí chí ra, ta vityin nyaí chihin Suti nu nyacá ñaha ra. ²² Ta nyoho cha cuví cutuñi iñi ndo, tyasoho ndo cha catyí Tatyí Ii Nyoo chí nyoho ñu nyicú vehe ñuhu” —catyí ra Jesucristo.

4

Noo kuhva cha sacahnú ñu chí Nyoo nya gloria

¹ Cha yahá tuhun cuan, ta nyehj noo yuvehe tacoho nya andivi. Ta noo ndusu cha tari caa ndusu trompeta chiñí cha cahán chihin cha xihna ri ta catyí chí chii:

—Ndáa ihya ta cusañahi chuun cha cuacuví nu cuahan ca chí —catyí ndusu cuan chii.

² Ta caa kuhva ri cuan ta tuvj iñi vatyí ñihi vavaha nyaá Tatyí Ii Nyoo chihin. Ta nanyehj noo tyayu nanyaá nya andivi. Ta nyaá noo ra nuu tyayu cuan. ³ Ta ra nyaá cuan, xiño nuu ra tari xiño noo yuu vaha cha nañi jaspe ta cornalina. Ta nicachico yuhu tyayu cuan nyaá noo coo yahnvi, ta xiño ti tari yuu cha nañi esmeralda. ⁴ Ta nicachico tyayu cuan nyehj oco cumi ca tahan tyayu. Ta nyicú oco cumi tahan ra cha vaha chahnu. Cañihno ra sahma cuichin. Ta yihí corona xuhun cuaan xiñi ra. ⁵ Ta nu nanyaá tyayu cha nyaá mahñu cuan, yucuan quitá minoo tacha. Ta vaa ri ca maa cuví. Ta ñihi xaan cahán savi. Ityi nuu tyayu cuan cayú ucha tahan ñuhú. Ta ucha tahan Tatyí Ii Nyoo cuví cuan. ⁶ Ta ityi nuu tyayu cuan iyó tucu noo cha tari caa tyañuhu, xiño xaan tari ino.

Nicachico yuhu tyayu cuan ta mahñu tyayu cuan, tayucú cumi tahan cha nyitó cha tari caa quitá ta tari caa ñáyivi caa. Ta cuaha xaan chití nuu cuan nyicú, tari ityi nuu ta tari ityi chata. ⁷ Cha xihna ri cha nyitó ihya, tari caá noo ndicaha caá. Ta cha cu uvi tari caá noo sindiqui caá. Ta cha cu uñi, tari caá nuu rayíi caá nuu. Ta cha cucumi tari caá noo tasu cha cuahan ndava, tyicuan caá. ⁸ Ta ndi cumi tahan cha nyitó ihya, tahan tahan chí ta nyaá iñu tahan ndichin chí. Ta nicahnu maa chí nyaá chití nuu chí, tari ityi chata chí ta tari ityi chichi ndichin chí. Ta ndiyaca ta ñiyaca ta ña chicuita chí catyí chí tyehe caa:

Ra ii xaan cuvún, ra ndi xaan cuvún, ra ñahri cuatyí cuvún,

Sutu Mañi yuhu, Nyoo, iyó tandihí tunyee iñi chuun.

Ra cha iyó nu quichaha tandihí cuvún, Ta ra iyó vityin. Ta ra cha nyaá cha cuquichi.

⁹ Ta cacahá ndi cumi tahan cha nyitó cuan gloria chí Nyoo. Ta sacahnú chí chí ra, ta canacuhvá chí tyahvi nyoo chí ra nyaá nu tyayu cahnu cuan, ra cha iyó tandihí tyembu. Ta tahan ri chaha cha casacuví chí tyicuan caa, ¹⁰ ta ndi oco cumi ra cha vaha chahnu cuan chicuiñi chití ra ta casacahnu ra chí ra iyó tandihí tyembu. Ta catyihj ra corona ra nu tyayu cahnu cuan. Ta cacatyí ra tyehe caa:

¹¹ Sutu Mañi nyuhu, Nyoo cuvún chí ndi.

Chi yoho tahán chí cha kuhva ndi gloria, ta sacahnú ndi chuun.

Ta tahán chí cha cunyaca ñahnu.

Vatyí maun savahá tandihí cha iyó.

Ta cha cuenda cha iyó iñi maun ta chicoo tandihí, cacatyí ra.

5

Nu nyehj ra Juan noo libru ta noo Mbee Luhlu cha cuví ra Jesucristo

¹ Tyicuan ta chiyo vaha ra cha nyaá nu tyayu cahnu cuan, nyehj yihí ndaha ra noo libru tari caá noo tutu cha natuví yo. Ta nyaá letra ityi nuu ta ityi chata. Ta nyasí chí chihin ucha tahan sellu. ² Ta nyehj noo ángel cha nyee xaan. Ta chaa xaan cahán ra ta ndacá tuhun ra:

—¿Yóo ra tahán chí nuña libru ihya ta sacanyaha ra sellu ihya? —catyí ra.

³ Soco ni ityi andivi ta ni ityi nu ñuhu ñáyivi, ta ni ityi chichi ñuhú, ta yori maa cha cuví nuña libru cuan. Ta ni cha nyehj ñu nuu, ta ma cuví. ⁴ Ta yuhu chacu chaa xain, vatyí yori maa quitá cha cuví nuña libru cuan. Yori maa cuví sacuaaha, ta yori cuví nyehj nuu chí. ⁵ Tyicuan ta noo ra cha vaha chahnu cuan catyí ra chii:

—Ma cuacu con. Vatyí ra cuví ndicaha o cuñí chî catyí, ra nyacá ñaha, ra vachi tata ra Judá, ra vachi tata rey David, ican ra cuví chasaha ra tacuhva cuví nuña ra nu libru cuan ta cahnya ra ndi ucha sellu cuan —catyí ra.

⁶ Tyicuan ta mahñu tyayu cuan ta mahñu ndi cumi cha nyitó cuan, ta mahñu ra cha vaha chahnu cuan, nyehí chî noo Mbee Luhlu. Nanyaá ti ta caa ti cha chahñi ñáyivi chî ti. Ucha tahan ndiquí ti ta ucha tahan chítî nuu ti nyaá. Ta chítî nuu cuan ican cuví ndi ucha tahan Vatyí li Nyoo cha tachí ra nicacahnu síqui ñuhu ñáyivi. ⁷ Ta ra cuví Mbee Luhlu cuan chahñan ra ta quehen ra libru cuan cha yihí ndaha chiyo vaha ra nyaá nu tyayu cuan. ⁸ Cuhva cha quehen ra libru cuan, ndi cumi cha nyitó cuan ta ndi oco cumi ra cha vaha chahnu cuan cachicuñi chítî ra nuu ra cuví Mbee Luhlu cuan. Ta tahan tahan ra cha vaha chahnu cuan nyisó ra arpa, noo cha tari caá guitarra caá. Ta canyisó tucu ra copa xuhun cuan tyitu yihí cutu. Ta cutu cuan cuví chî tandihî cha chican tahví ñu cuenda Nyoo. ⁹ Ta cachitá ra noo yaa chaa, ta catyí ra tyehé caa: Yoho cuví ra tahán chî cha quehun libru ihya, ta cahnyon ndi ucha sellu cha nyaá nu chî.

Vatyí chihun saha ñáyivi. Ta chihin niñun saton chî ndi vatyí coo vaha ndi chihin Nyoo.

Ta cuví ndi ñáyivi ñuu nyihî ta ñuu nahnu nicacahnu ñuhu ñáyivi, ñáyivi siin siin sahan cahán, ñáyivi siin siin tata.

¹⁰ Chahñun ityí chî ndi vatyí cuví ndi rey ta cuví ndi sutu cha cuenda Sutu yo Nyoo.

Ta cucunyaca ñaha ndi chî ñáyivi iyó síqui ñuhu ñáyivi, cacatyí ra, chítá ra.

¹¹ Yahá cuan ta nanyehí, ta chihí ndusu cha cahán cuaha xaan ángel, tayucú ra nicachico yuhu tyayu cahnu cuan, ta nu nyicú cumi tahan cha nyitó cuan, ta nu nyicú ra cha vaha chahnu cuan. Ta cuenda millón ángel nyicú cuan, nyehí. ¹² Ta chihin cha ñihî cahán ángel cuan, ta cacatyí ra:

Ra cuví Mbee Luhlu cha chahñi ñáyivi, tahán chî cha cunyaca ñaha ra, ta naquehen cuenda ra cha tyayii.

Tahán chî naquehen cuenda ra cha chihí tuñi.

Tahán chî cha naquehen cuenda ra tandihî tunyee iñi.

Tahán tucu chî cha cuhva yo gloria chî ra, ta sacahnu yo chî ra.

Ta cahnu xaan ca ra cuví maa ra, cacatyí ángel cuan.

¹³ Ta chihí tiquí cha cahán tandihî cha savaha Nyoo, tandihî cha iyó andivi, ta síqui ñuhu ñáyivi, tandihî cha iyó chichî ñuhú, ta

chichî tyañuhu, tandihî cha savaha Nyoo catyí chî tyehé caa:

Cahnu xaan ca cuví ra cha nyaá nu tyayu.

Cahnu xaan ca cuví ra cuví Mbee Luhlu.

Ta nacuhva yo gloria chî ra.

Ta na cunyaca ñaha ra tandihî maa tyembu, catyí tandihî cha savaha Nyoo.

¹⁴ Ta ndi cumi cha nyitó cuan catyí chî:

—iTyicuan caa na cuví! —catyí chî.

Ta ndi oco cumi ra cha vaha chahnu cuan, cachicuñi chî ra ta casacahnu ra chî ra iyó tandihî tyembu.

6

Nu chahnya ra Jesucristo ndi ucha tahan sellu

¹ Tyicuan ta nyehí nu chahnya ra cuví Mbee Luhlu cuan sellu cha xihna ri chichî cha ndi ucha tahan cuan. Ta chihí cahán noo cha nyitó cha cumi tahan cuan, chihin noo ndusu cha tari caá cha cahán savi ta catyí chî:

—iÑaha, ta nyehun! —catyí chî chii.

² Tyicuan ta nanyehí ta nyehí noo caballu cuichin, ta ra yosó chî ti cuan ndaha ra noo arco. Ta ñihí ra noo corona quihî xiñi ra vatyí saha ganaa ra, ta cuasaha ganaa ca ra.

³ Ta cuhva cha chahnya ra cuví Mbee Luhlu cuan sellu cu uvi, chihí chî catyí cha nyitó cu uvi cuan tyehé caa:

—iÑaha ta nyehun! —catyí cuan chii.

⁴ Ta quitá inga caballu, tyacu cuaha. Ta ra cha yosó chî ti chicoo ityí chî ra vatyí tinyaa ra cha taxi ri iyó ñáyivi, tacuhva cahñi ñu chî tahan ñu. Ta ñihí ra noo mityí cahnu quindaha ra. ⁵ Ta cuhva cha chahnya ra cuví Mbee Luhlu cuan sellu cu uñi, ta chihí chî catyí cha nyitó cu uñi cuan tyehé caa:

—iÑaha ta nyehun! —catyí cuan chii.

Ta nanyehí, ta nyehí noo caballu toon.

Ta ra yosó chî ti, yihí ndaha ra noo ticatya. ⁶ Ta chihí noo ndusu mahñu cumi tahan cha nyitó cuan, ta catyí cuan:

—Tari cuhva xuhun yahví ñu cha noo quivi, yucuan cuhva yahví noo litru nuñi. Tyicuan caa tucu uñi litru cebada. Ta ma sativun acetye ta vinu —catyí ndusu cuan.

⁷ Ta cuhva cha chahnya ra cuví Mbee Luhlu cuan sellu cu cumi, chihí chî cahán cha nyitó cucumi cuan, ta catyí chî, tyehé caa:

—iÑaha ta nyehun! —catyí chî.

⁸ Ta nanyehí ta nyehí noo caballu cuaan.

Ta ra yosó chî ti nañi ra Tuhun Chihî. Ta chata ra vachí inga ra cha nañi Ra Nyacá Ñaha Nu Nyicú Ndiyî. Ta cañihî ra tunyee iñi cha cahñi ra chî cuaha xaan ñáyivi iyó síqui ñuhu ñáyivi. Vatyí chichî cha sava ñáyivi iyó síqui ñuhu ñáyivi, cucahñi ra sava ñu. Ta cucahñi ra chî ñu chihin cha sanacanda ra

cuatyi, ta chihin tama, ta chihin cuehe, ta chihin quití xaan iyó siqui ñuhu ñayiví.

⁹ Cuhva cha chahnya ra cuví Mbee Luhlu cuan sellu cu ohon, nyehí xiu arta. Yucuan ñohó aña ñu cha chíhí cha cuenda tuhun Nyoo tyi sacoto ñu tuhun ra chí ñayiví. ¹⁰ Ta tyehe caa catyí ñu chihin noo ndusu chaa xaan:

—Sutu Mañi yuhu, ra ii cuvún. Ta sacuvún cha catyún. ¿Ama cutachi tuñun chí ñayiví cha chahñi chí ndi cha catyí tuhun maun? —catyí ñu.

¹¹ Tyicuan ta cañihí noo noo ñu cuan sahma cuichin cuihno ñu. Ta catyí ra chí ñu na canyítatu ñu suhva ca quiví, nyacua nya cha caña tahan tandihí ca tahan ñu, ñu sacuví tyiño nuu ra Cristo, ñu cha tahán chí cucúvi tari cuhva chíhí maa ñu.

¹² Cuhva cha chahnya ra cuví Mbee Luhlu cuan sellu cu iñu, nanyehí ta quichi noo cha taán cahnu. Ta nduñaa ñayiví, tari sahma ñu nyaá tucuihya iñi, toon xaan nduví. Ta yoo andiví cuan nanduví tari ñiñi. ¹³ Ta tiño andiví canacoyo ti nya nu ñuhu ñayiví. Tari sanacoyo tu higo chíti yutya tun tatu yahá noo tatyí ñihi. ¹⁴ Tari natuví yo noo tutu tyicuan caa cuanaa ri andiví. Ta tandihí yucu ta tandihí ñuhú cha nyicú mahñu tyañuhu nacandá chí ta nasama chí nu nyaá chí. ¹⁵ Ta tandihí rey cha iyó siqui ñuhu ñayiví iin ri chíhín ra nahnu, ta ra tyayí, ta ra cacuví nuu chí sindaro, ta ra iyó xaan fuerza chí, ta tandihí ñu cacuví musu, ta ñu cha ña cuví musu, tandihí ri ñu cuan caquihví xehe ñu chíhí yaví yuu cha iyó yacu nahnu, ta chíhí yaví ñuhú. ¹⁶ Ta catyí ñu chí yucu cuan ta chí yuu cuan tyehe caa:

—Canacoyo ndo siqui ndí, ta tíxehe ndo chí ndí nuu ra nyaá nu tyayu andiví, coto tachi tuñi ra cuví Mbee Luhlu cuan chí ndí.

¹⁷ Vatyí cha chaa quiví cahnu cha cutachi tuñi ra chí ndí. ¿Ta yóo cuví cha cuví cunyeé cuan? —catyí ñu.

7

Nu ñihí ñu Israel sellu cunyaq tyaan ñu

¹ Cha yaha tuhun ihya ta nyehí cumi tahan ángel catayucú ra ndí cumi chíyo nu quichi tatyí siqui ñuhu ñayiví. Ta ña chaha ra yaha tatyí cuan vatyí cava chí siqui ñuhu ñayiví. Ni ña chaha ra cha cava chí nuu tyañuhu, ni siqui yutun catayucú nuu ñuhú. ² Ta nyehé tíqui inga ángel, vachi ra ityi nu cañá ñanyii, ta nyisó ra sellu Nyoo nyitó. Ta ángel cuan canachaa ra chíhín cha ñihi ndusu ra chí inga cumi ca ángel cuan, ra cha ca iyó ityi chí vatyí casativi ra nuu ñuhu ñayiví ta nuu tyañuhu. Ta catyí ra chí ra:

³ —Ma sativi ñaha ndo nuu ñuhu ñayiví, ni nuu tyañuhu, ta ni nuu yutun cha ñiri ca cha ta sañaha ca ndí yóo ñu cuví musu Nyoo,

vatyí cutyaa ndi noo sellu tyaan ñu —catyí ángel cuan.

⁴ Ta chíhí nacatyi ra yoso tahan ñayiví tyaq ra sellu cuan: cientu uvi xico cumi mil tahan ñu Israel. ⁵ Uchi uvi mil ñu tata ra Judá chicunyaq sellu, ta uchi uvi mil ñu tata ra Rubén, inga uchi uvi mil ca ñu cuenda tata ra Gad, ⁶ uchi uvi ca mil cuenda tata ra Aser, uchi uvi mil ca cuenda tata ra Neftalí, uchi uvi mil ñu tata cuenda ra Manasés, ⁷ ta uchi uvi mil cuenda tata ra Simeón, uchi uvi mil cuenda tata ra Levi, ta uchi uvi mil cuenda tata ra Isacar, ⁸ uchi uvi mil ñu cuenda tata ra Zabulón, ta uchi uvi ca mil ñu cuenda tata ra José, ta uchi uvi mil ca ñu cuenda tata ra Benjamín. Tandihí ñu cuan ta chicunyaq sellu Nyoo chí ñu.

Nu nyehé ra Juan chí ñu ñihnó sahma cuichin

⁹ Cha yaha tuhun cuan ta nanyehí ta nyehí cuaha xaan ñayiví nyicú. Ta yori cuví nacahví chí ñu, vatyí nyicú ñayiví tandihí ri ñuu nyihi ta ñuu nahnu iyó siqui ñuhu ñayiví. Ta nyicú ñayiví siin siin sahan sahan. Ta nyicú ñayiví tandihí ri tata. Ta catayucú ñu nuu ra nyaá nu tyayu, ta nuu ra cuví Mbee Luhlu. Ta cañihnó ñu sahma cuichin. Ta cayihí ndaha ñu ndaha ñoo. ¹⁰ Ta tandihí ñu chíhín cha ñihi ndusu ñu, ta canachaa ñu ta catyí ñu:

—Sutu yo Nyoo, ra nyaá nu tyayu gloria, ta ra cuví Mbee Luhlu, ican ra sacacú chí yo —catyí ñu canachaa ñu.

¹¹ Ta tandihí ángel catayucú ra nicachico yuhu tyayu cuan, ta nicachico chata ra cha vaha chahnu cuan, ta nicachico chata ndí cumi tahan cha nyitó cuan. Ta cachicuiñi chíti ra chíhín nuu ra nya nu ñuhú nuu ra nyaá tyayu cuan. Ta casacahnú ra chí ra. Vatyí Nyoo cuví ra. ¹² Ta cacatyi ra:

Tahán chí tyehe caa chuun: Sacahnú ndi chuun ta chahá ndi gloria chuun vatyí chíhí tuñi xaun.

Nacuhvá xaan ndi tyahví nyoo chuun. Ta sacuvahá ndi chuun vatyí iyó xaan tunyee iñi chuun, ta cuaha xaan fuerza iyó chuun, Nyoo Sutu ndí cuví chuun. Ta tyicuan ri na cuví chí tandihí tyembu, catyí ra.

¹³ Tyicuan ta noo ra cuví ra cha vaha chahnu cuan ndaca tuhun ra chíti ta catyí ra: —¿Yóo ñu cañihnó sahma cuichin ihya? ¿Ta nya ityi quichí coyo ñu? —catyí ra.

¹⁴ Ta yuhu catyí chí ra:

—Tata, yoho chitón.

Ta catyí ra chí:

—Ican ñu ihya cuví ñu cayaha nu tindoho cahnu. Ta canacatyá ñu cuatyi ñu, ta nducuchin sahma ñu chíhín ñiñi ra cuví Mbee Luhlu. ¹⁵ Yucuan chaha nyicú ñu ityi nuu tyayu nu nyaá Nyoo. Ta sacuví ñu tyiño

nuu ra ndiyaca ta ñiyaca chichi vehe ñuhu ra. Ta ican ra cuví ra nyaá nu tyayu gloria ta cusaha cumi ra chi ñu vatyi cua cunyaa ra chihin ñu. ¹⁶ Ta ma nyehe ca ñu tindoho chihin soco, ni chihin cha ityi ñu ndutya. Ta ni ma cahmi ca ñanyii chi ñu. Ni ma sayanga ca cha ihñi chi ñu. ¹⁷ Vatyi ra cuví Mbee Luhlu cha nyaá mahñu tyayu cuan cusaha cumi ra chi ñu, tari sahá cumi yo mbee. Ta cunyaca ra chi ñu nu coho ñu ndutya cha chahá cha cuconyito ñu tandihi tyembu. Ta Nyoo cunacuhva ra tandihi ndutya nuu ñu —catyí ra chii.

8

Nu chahnyá ra Jesucristo sellu cu ucha ta quitá noo ángel chihin noo cuu xuhun cuan

¹ Cuhva cha chahnyá ra cuví Mbee Luhlu sellu cu ucha nu libru cuan, ndutaxin ri nya andivi tari noo cha sava hora.

² Yahá cuan ta nyehi chi ndi ucha ángel catayucú ra nuu Nyoo. Ta caquehen cuenda ra ucha tahan trompeta. ³ Yahá cuan ta quichí inga ángel chihin noo cuu xuhun cuan cha tuhvá yihí cutu. Ta chicuinanyaa ra ityi nuu arta cuan. Ta quehen cuenda ra cuaha xaan cutu, vatyi cuhva cuenda ra ñin ri chihin cha chicán tahvi ñáyivi chi Nyoo. Nu arta xuhun cuan cha nyaá ityi nuu tyayu Nyoo, yucuan chahá cuenda ra. ⁴ Ta quitá ñuhma cutu cuan, nandaá chi nu nyaá Nyoo ñin ri chihin cha chicán tahvi ñu cuenda ra. ⁵ Tyicuan ta ángel cuan quehen ra cuu cuan. Tyicuan ta sacutu ra chihin titi ñuhu cha quitá arta cuan. Ta tuchi ra siqui ñuhu ñáyivi. Ta quichahá cahan savi, ta iyo cuví. Ta quihvi tacha, ta quichahá taan.

Nu tiví ángel trompeta

⁶ Tyicuan ta ndi ucha ángel cha canyisó ndi ucha trompeta cuan, cha nyatú tuhva ri ra vatyi cativi ra.

⁷ Ángel cha xihna ri cuan quichahá tiví ra trompeta ra. Ta quichahá coon savi yuu ta saca niñi chihin chi, ta saca ñuhu cha cayú chihin. Ta cayú cha yatyin cha sava ñuhu ñáyivi. Ta cha yatyin cha sava yutun cayú chihin tandihi cuhu cuii.

⁸ Ta ángel cu uvi cuan tiví tucu ra trompeta ra. Ta canacava tari noo yucu cha cayú ñuhu mahñu tyañuhu. Ta cha yatyin sava tyañuhu cuan nduvj chi niñi. ⁹ Ta cha yatyin sava quití cha iyó chichi tyañuhu cuan chihí ti. Ta cha yatyin sava barcu cha iyó cuan, catahvi cuatyí.

¹⁰ Ta ángel cu uñi tiví ra trompeta ra. Ta canacava noo tiñoó cahnú andivi, suri cayú ñuhu chi ti tari ñuhu ñiti. Canacava ti siqui cha yatyin ri sava yuvi nahnu ta siqui cha yatyin ri sava ndohyo. ¹¹ Ta tiñoó cahnú cuan nañi ti Ajenjo. Ta cha yatyin ri sava ndutya cha iyó, nanduvj chi Ajenjo cha cuví

noo veneno cha uva xaan. Ta cuaha xaan ñáyivi chihí cha cuenda ndutya cuan, vatyi ndu uva chi. ¹² Ta ángel cu cumi cuan nativi ra trompeta ra ta cha yatyin sava ñanyii nduñaa, ta cha yatyin sava yoo, ta cha yatyin cha sava tiñoó andivi cuanaa ti. Ta cha cuenda cha nduñaa suhva ñanyii cuhva cuan, nduñaa cumi tahan hora cha noo noo quivi. Ta cha cuenda cha tiví yoo ta tiñoó, yucuan chaha ña cacuvi sandichin chi cumi tahan hora cha noo noo ñuu.

¹³ Yahá cuan ta nanyehi ta chihí vatyi noo ángel ndavá ra mahñu andivi. Ta chihin cha ñihi ndusu ra ta catyí ra ta tyehe caa:

—jNdahvi cuví ñu iyó siqui ñuhu ñáyivi vatyi nyaá tiví uñi ca tahan ángel trompeta ra! —catyí ángel cuan.

9

¹ Ta ángel cu ohon cuan nativi ra trompeta ra. Ta nyehi chi noo ra cuan, tari tiñoó andivi caá ra. Ta canacava ra siqui ñuhu ñáyivi. Ta quehen cuenda ra cuan ndaha ticu cha cuenda yavi cono cha ñahri maa nu chitahan chi. ² Tyicuan ta nuñá ra yavi cuan. Ta cuaha ñuhma nandaá tari maa ñuhma cha quitá chichi noo horno cahnú. Ta ñuhma cuan chasi chi nuu ñanyii ta nasaca noo chihin tatyí. Ta nduñaa ñáyivi. ³ Ta mahñu ñuhma cuan caquita coyo pinchi. Ta candava coyo ti siqui ñuhu ñáyivi. Ta chicoo ityi chi ti vatyi tyaa ti chi ñáyivi tari tisuhma cha iyó siqui ñuhu ñáyivi. ⁴ Quehen ti tuhun vatyi ma satasi iñi ti, ni chi cuhu cha iyó nu ñuhu ñáyivi, ta ni noo cuhu cuii, ta ni noo yutun, soco chi ñáyivi cha ñahri sellu Nyoo nyaá tyaan ñu. Chi ñu cuan cutyaa ti. ⁵ Soco ñahri ityi iyó chi ti cha cahñi ti chi ñáyivi, soco tacuhva tyaa ri ti chi ñu. Ta coo xico uhvi chi ñu chichi cha ohon yoo. Ta cha uhvi cuan, tari caá xico tisuhma cha tyaa chi ñáyivi tyicuan caá. ⁶ Ta quivi cuan ñáyivi cunanducu ñu tuhun chihí. Soco ma nañihi ca ñu. Ta vasi cuñi ñu cúvi ñu, soco tuhun chihí cucono ri chi chi ñu vatyi ma cúvi ñu.

⁷ Tari caá caballu nahnu cha cachicá cuatyí, tyicuan caá pinchi cuan. Ta xiñi ti yihí tari caá noo corona xuhun cuan. Ta tari caá nuu rayii, caá nuu ti. ⁸ Ta ixí xiñi ti tari caá ixí xiñi ñushi caá. Ta tari caá noho ndicaha caá noho ti. ⁹ Ta soo ti tari caa, tyicuan caa. Ta ñihi xaan cahan ndichin ti. Tari cahan cha cuaha xaan carreta caballu cuhva cha cachinó ti nu iyó cuatyí. ¹⁰ Ta tari caá suhma tisuhma caá suhma ti, vatyi yihí iñu. Ta chihin cuan cuví tyaa ti chi ñáyivi chichi cha ohon yoo. ¹¹ Ta pinchi cuan iyó noo ra cuví nuu chi ti. Ta ican cuví noo ángel cha nyacá ñaha yavi cahnú ta cono cha ñahri nu chitahan. Ta cha chihin sahan hebreo nañi ra Abadón. Ta chihin sahan griego nañi ra Apolión, ta cuñi chi catyí: Ra Sanaa.

¹² Yahaḡ noo tindoho cuan, soco cumañi uvi ca.

¹³ Ta ángel cu iñu cuan nativi ra trompeta ra. Ta chiñi noo ndusu cha quitā chichi ndi cumi ndiqui tutun arta xuhun cuaan cha nyaá nuu Nyoo. ¹⁴ Ta ndusu cuan catyí chi ángel cu iñu cha nyisó trompeta cuan, tyehe caa:

—Ndāchi chi ndi cumi ángel cha canuhñi yatyn yuhu yuvi cahnu Eufrates —catyí ndusu cuan.

¹⁵ Tyicuan ta ndachí ndi cumi ángel cuan, vatyí cha nyatú tuhva xaan ra maa maa cuhva cuan maa maa quivi cuan, maa maa yoo cuan, maa maa cuiya cuan, vatyí cahñi ra chí cha yatyn cha sava ñáyivi iyó siqui ñuhu ñayivi. ¹⁶ Ta chiñi yoso tahan sindaro chihin caballu ra, ta quitā uvi cientu millón tahan ra.

¹⁷ Ta tyicuan caa nyehi caballu cuan chihin visión, cha sanyehé Nyoo chii. Ta pechu ra cayosó chí ti cuan, yihí noo caa tyacu cuaha, tyacu azu ta tyacu cuaan. Ta tari caá xiñi ndicaha caá xiñi caballu ra. Ta chichi yuhu ti quitā ñuhu ta ñuhma ta azufre. ¹⁸ Ta cha yatyn sava ñáyivi iyó siqui ñuhu ñayivi cachihí chihin uñi tahan cha caquitā yuhu caballu cuan; ñuhu ta ñuhma ta azufre. ¹⁹ Vatyí tunyee iñi cha iyó chí ti, chichi yuhu ti ta suhma ti nyaá. Vatyí tari caá coo, caá suhma ti. Tari noo xiñi coo tyicuan caa nuu suhma ti. Ta chihin cuan sañicuehé ti chí ñáyivi.

²⁰ Soco tandihí ca ñu cha candoq, cha ña cachihí chihin cuehe cuan, ña sacucuitā ñu cha sacuví ñu cha ña vaha. Ta ni ña sacucuitā ñu cha sacahnú ñu chí tatyí ña vaha ta chí xitohyo. Vatyí cuví cuan noo xuhun cuaan, xuhun cuichin, bronce, yuu, yutun. Cha ña cuví nyehe, ni ña chiñi ta ni ña cuví caca cuví cuan. ²¹ Ni ña casandihí ñu cha chahñi ñu, ta cha satasí ñu. Ta ña sandihí ñu cha iyó ñu chihin rayi ta chihin ñusihi ta ñima yí ñu cuví, ta ñima ñasihi ra cuví. Ta ña sandihí ñu cha suhú ñu.

10

Ángel cha nyisó libru luhlu

¹ Tyicuan ta nyehi inga ángel cha iyó xaan tunyee iñi chii, cha vachi noó ityi andivi mahñu noo vico. Ta noo coo yahnyi nyaá xiñi ra. Ta xiño xaan nuu ra tari ñanyii. Ta tari cha cayú ñuhu chaha ra, tyicuan caá. ² Ta yihí ndaha ra noo libru luhlu cha tanuña nuu. Ta chinanyaq ra chaha chiyo vaha ra nu tyañuhu. Ta chaha chiyo satyin ra chinanyaq ra siqui ñuhu ñayivi. ³ Tyicuan ta ñihi xaan cana chaa ra, tari ndusu ndicaha cha nduxaan ti. Ta cuhva cha canachaq ra, chiñi ucha tahan ndusu cha siñ siñ caa tari cha cahán savi, tyicuan caa ndusu ra.

⁴ Ta cha yahaḡ cha chiñi cha cahán ndi ucha ndusu cuan, tyicuan ta cuatyai nuu tutu. Soco chiñi noo ndusu ityi andivi, ta catyí chí chii tyehe caa:

—Qocumi xehun tuhun cha chiñun cahán ndi ucha ndusu cuan. Ta maa tyaun nuu tutu —catyí ndusu cuan chii.

⁵ Tyicuan ta ángel cha nyehi cha chañi nu tyañuhu ta siqui ñuhu ñayivi, nacoñehé ra ndaha chiyo vaha ra ityi andivi. ⁶ Ta ángel cuan tyanahaḡ ra vatyí cahán ra noo cha ndicha cuenda Nyoo, ra nyitó tyicuan ri maa, ra cha savahaḡ andivi ta ñuhu ñayivi ta tyañuhu ta tandihí cha iyó nuu chí. Ta catyí ra:

—Ñahri ca cha cucuee. ⁷ Vatyí cuhva cha cuquichaha tiví ángel cu ucha cuan trompeta ra, yucuan cuhva cuchino cava tuhun xehe cha yihí iñi Nyoo tyi sacuvi ra, tari cuhva sacotó ra chí ra casacuví tyiño nuu ra, ra cacuví profeta cuenda ra —catyí ángel cuan.

⁸ Ta ndusu cha chiñi yuhu, cha quitā ityi andivi, cahán tucu chí chihin inga chaha, ta catyí chí chii tyehe caa:

—Cuahan, ta quehun libru luhlu cha tanuña nuu, cha yihí ndaha ángel cha chañi nu tyañuhu ta nu ñuhu ñayivi —catyí chí.

⁹ Tyicuan ta chahin nu nyaá ángel cuan ta chiquen libru luhlu cuan nacuhva ra chí, ta catyí ra chí:

—Quehen, ta cahun, vixi xaan tari tyañuhu. Soco chichun cundu uva chí —catyí ra chí.

¹⁰ Tyicuan ta quehin libru luhlu cha yihí ndaha ángel cuan, ta chachí. Vixi xaan tari tyañuhu. Soco cha yahaḡ cha chachí, uva xaan nduvi chí chichi. ¹¹ Tyicuan ta catyí ra chí:

—Cuñi chí cha cunacatyun inga chaha tuhun cha cahán Nyoo siqui ñáyivi cuaha xaan ñuu nyihí ta ñuu nahnu, ta siqui ñáyivi siñ siñ sahan cahán, ta siqui ra cacuví rey —catyí ra chí.

11

Uvi tahan ra cacuví cha ndaa

¹ Tyicuan ta cachahaḡ ra noo ndoo cha tari caá noo yutun cha tyicuhvá chí. Ta cacatyí ra chí tyehe caa:

—Ndūcuita ta tyicuhvon vehe ñuhu Nyoo ta arta ra, ta ñacahvun yoso tahan ñu tuhvá sacahnú chí Nyoo yucuan. ² Soco maa tyicuhvon nuquehe cha nyaá ityi chata vehe ñuhu cuan. Vatyí cha cuenda ñu inga ñuu cuví. Ta ican ñu cuan cucuaca chaha ñu ñuu ii cuan chichi cha uñi cuiya sisava. ³ Ta yuhu cutachi uvi testigu cucahan ra cha cuende cha ni ri ca cha chichi noo mil uvi cientu uñi xico quivi. Ta cacuihno ra sahma tucuihya iñi.

4 Ta ican ninduvi testigu cuan cuví uvi tahan yutun olivo ta uvi tahan cañileru cha tayucú nuu Sutu Mañi yo, ra nyacá ñaha siqui ñuhu ñayivi. 5 Tatu yóo ñu cuñi sataasi iñi chi ninduvi testigu cuan, cuquita ñuhu yuhu ninduvi ra, ta cahmi chi tandihi ñu xaan iñi chi ra. Ta tyicuan caa cucúvi ñu cuñi sataasi iñi chi ra. 6 Testigu cuan iyó ityi chi ra cha cacasi ra nu ma coon savi cha niri ca cha cachahá cuenda ra tuhun cahán Nyoo chi ñayivi. Ta iyó tucu ityi chi ra cha casananduvi ra ñiñi chi ndutya. Ta iyó tucu ityi chi ra cha casanyehe ra tindoho chi ñu iyó siqui ñuhu ñayivi chihin tandihi ri nuu cuehe, yoso tahan chaha cha cacuñi maa ra. 7 Soco cuhva cha cua ndihí cuhva cuenda ra tuhun Nyoo chi ñayivi, cuquita noo quiti xaan yavi cono cuan, ta cacañi tahan ti chihin ninduvi testigu cuan. Ta cucuvi chasaha ti chi ra. Ta cucañi ti chi ra. 8 Ta coño ñuhu ra cundo maa cava calle ñuu nu chihí Sutu Mañi yo nu cruzi. Ta tari Sodoma ta Egipto nanduví ñuu cuan, (cha cuenda cha ña vaha cha sacuví ñayivi ñuu cuan). 9 Ta chichi cha uñi quivi sisava, cunyehe tandihi ñayivi coño ñuhu ra, ñayivi tandihi ñuu nyihí, ñayivi tandihi ri tata, ta ñayivi siñ siñ sahan cahán, ta ñayivi ndihi ri ñuu nahnu, cunyehe ñu coño ñuhu ra. Ta ma cuhva ñu cha quihí coño ñuhu ra chichi ñuhú. 10 Ta ñu cha iyó siqui ñuhu ñayivi cu cusii xaan cuñi ñu cha cuenda cha cachihí ra cuan. Ta nyacua cutachi ñu regalo chi tahan ñu cha sií cuñi ñu, vatyi cachihí ninduvi rayii cha cachahá cuenda tuhun cahán Nyoo chi ñu. Vatyi chahá xaan ra tindoho chi ñu cha cuhva cha cuñi maa ñu. 11 Soco cha yahá cha uñi quivi sisava, Nyoo sanandoto ra chi ra, ta candicuitá tucu ra inga chaha. Ta tandihi ñu nyehé canandoto ra, canayuhvi xaan ñu. 12 Tyicuan ta ninduvi testigu cuan cachihí ra noo ndusu ñiñi xaan ityi andivi. Ta catyi chi chi ra tyehe caa:

—Ndáq ndo ityi siqui ihya —catyi ndusu cuan chi ra.

Ta candaá ra ityi andivi chichi noo vico. Ta canyehe ñu xaan iñi chi ra nu canandaá ra. 13 Ta cuhva cuan quichí noo cha tañ cahnu. Ta chichi ñuu cuan canacoyo cuaha xaan vehe. Ta chichi cha uchi uchi tahan vehe, canacoyo noo noo. Ta cha tandihi chichi ñuu cuan chihí ucha mil ñayivi cha cuenda cha tañ cuan. Ta ñayivi ña chihí, casacahnú ñu chi Nyoo, ra nyaá andivi, cha cuenda cha yuhvi ñu.

14 Yahá tindoho cu uvi cuan, soco numi ri cuquichí tindoho cu uñi.

Nu tiví ángel trompeta cu ucha

15 Ta ángel cu ucha nativi ra trompeta ra. Ta canatyacu ndusu ñiñi xaan ityi andivi, ta catyi chi tyehe caa:

Tandihi nu nyacá ñaha rey siqui ñuhu ñayivi ihya, cha yahá nanduvi chi Sutu yo Nyoo ta chi ra Cristo.

Ta maa ra cucunyaca ñaha tyicuan ri maa, catyi ndusu cuan.

16 Tyicuan ta ndi oco cumi ra cha vaha chahnu, ra canyicú nuu tyayu nu nyaá Nyoo, cachicuiñi chiti ra chihin nuu ra nya nu ñuhu. Ta casacahnú ra chi Nyoo. 17 Ta cacatyí ra:

Nacuhvá ndi tyahvi nyoo chuun, Sutu Mañi nyuhu.

Nyoo ra iyó tandihi tunyee iñi chii cuvún.

Yoho iyón vityin, ta iyón nu quichaha tandihi ta nyaá cha cuquichun.

Vatyi cha naquehen cuendon tunyee iñun.

Ta cha quichahun nyaca ñahun vityin.

18 Ta ñayivi tandihi ñuu nahnu cuxaáñ ñu.

Soco cha chaá quivi cha tachi tuñun chi ñu.

Ta cha chaá quivi cha cucutuñi chi ñu ndiyi.

Ta cucuhvon cha vaha cha tahán chi chi ñu sacuvi tyiño nuun, ñu chahá cuenda tuhun cahún,

ñu cha nacuhvá cuenda añima chi maun, ta sacahnú ñu sivun.

Vasi cahnú ñu cuví ñu ta vasi ndahvi ñu.

Ta chaá cuhva cha sanaun chi ñu sativi chi ñayivi siqui ñuhu ñayivi, cacatyí ra.

19 Tyicuan ta nuña yuvehe ñuhu Nyoo cha nyaá andivi, ta chihí vehe ñuhu natuvi caja cuenda cha natyihí tahan ra tuhun chihin yo. Ta quihvi tacha. Ta vaa ri maa cuví, ta cahán savi. Ta chiyó noo cha taan. Ta ñiñi xaan coñ savi yuu.

12

Nu chicán nyicon noo coo cahnú chi noo ñaha sihi

1 Tyicuan ta tuví noo seña cahnú andivi. Vatyi quita noo ñaha sihi ta siquí noo ña ñanyii tari cha ñiñno ña vestido. Ta chañi ña siqui yoo. Ta yihí noo corona cha uchi uvi tiño andivi xiñi ña. 2 Ta ñaha sihi ihya ñohó sehe ña. Ta chacú chaa vavaha ña chihin cha uhvi cha cacú sehe ña, vatyi nyehé xaan ña tindoho cha cua cacú sehe ña. 3 Tyicuan ta quita nonga seña ityi andivi. Ta nyehí noo coo cuaha cahnú. Ta nyaá ucha xiñi ti, ta uchi ndiqui ti. Ta tahan tahan xiñi ti yihí noo corona. 4 Ta chihin suhma ti sanacoyo ti cha yatyin cha sava tiño andivi siqui ñuhu ñayivi. Ican coo ihya chicuiñi ti nuu ñaha cha cua cacú sehe cuan, vatyi ta cha cacú ri cue ta cachi ti chi cue. 5 Ta ñaha cuan sacacú ña noo rayii. Ta ican ra cuacunyaca ñaha tandihi ñayivi iyó siqui ñuhu ñayivi. Ñiñi xaan cua cunyaca ñaha ra tari cha chihin noo yutun caa vee. Ta cha yahá cacú ra, naxita Nyoo chi ra nu nyaá ra nu tyayu ra. 6 Ta ñaha cuan chingó ña cuahan ña noo ñuhú ityi, nu sanduvahá Nyoo noo nu coo

ña, vatyi yucuan cucuhva ra cha cachi ña cha ni ri ca cha noo mil uvi cientu uñi xico quivi.

⁷ Yahā cuan ta chiyo noo cuatyí nya andiví, nu cañi tahan ángel cahnú Miguel ta tandihí ángel cuenda ra chihin coo cahnú cuan. Ta coo cuan ta tandihí tatyí ña vaha cuenda tí, cacañi tahan chihin ra Miguel. ⁸ Soco ña saha ganaa tí cha cañi tahan tí. Ta ña ñihí ca tí nu ndoo tí nya andiví chihin tatyí ña vaha cha candihí chihin tí. ⁹ Tyicuan ta tava ñehe Nyoo chí tí, cuví tí Coo Chahnu, cha nañi cuihna ra cuví nuu, ra cha sandaví ñaha chí tandihí ñáyiví iyó síqui ñuhu ñáyiví. Maa ra ta tatyí ña vaha cuenda ra cacana-coyo ra nya nu ñuhu ñáyiví.

¹⁰ Tyicuan ta chíñi noo ndusu ñihi nya andiví. Catyí chí tyehe caa:

—Cha chaā nu cacū añima yo vityin. Cha saha ganaa tunyee ñhi Nyoo. Cha nyacá ñaha Nyoo yo vityin chihin ra Cristo Sehe ra. Vatyi cha tava ñehe ra chí ra cha tyaā xaan cuatyí síqui ra yañi yo ndiyaca ta ñiyaca nuu Nyoo. ¹¹ Ta ra yañi yo cacuví chasaha ra chí ra chihin ñhi ra cuví Mbee Luhlu, ta chihin tuhun Nyoo cha cacahan ra tuhun chihin ñáyiví. Vatyi ña yuhví ca ra cha cucúvi ra. ¹² Yucuan chaha cusí cuñi nyoho cha iyó ndo andiví. Soco jndahvi nyoho ñu iyó síqui ñuhu ñáyiví ta nu tyañuhu! Vatyi cuihna canacava ra nya andiví ta nyacua nya síqui ñuhu ñáyiví nu nyicú ndo. Ta xaan xaan ra vatyi chitó ra vatyi suhva ri ca quivi ra nyaá.

¹³ Ta cha nyehe coo cahnú cuan vatyi nacava tí nu ñuhu ñáyiví, chica nyicón tí chí ñaha cha sacacū sehe cuan. ¹⁴ Soco ñaha cuan ñihí ña uvi tahan ndichin nahnu tasu, tacuhva cuví ndava ña ta cono ña chí coo cuan nyacua nya ñuhu ityí cuan. Ta yucuan cuví nu cuñihí ña cha cachi ña chichi cha uñi cuiya sisava. ¹⁵ Ta coo cuan tuchí tí ndutya chihin yuhu tí, vatyi cono noo yuvi cahnú, vatyi satayañi chí ñaha cuan. ¹⁶ Soco ñuhu ñáyiví tyinyee chí ña, vatyi ndata chí ta quíhví yuvi cahnú cha tuchí coo cahnú cuan chihin yuhu tí. ¹⁷ Ta cha cuenda cha ña cuví chasaha tí chí ña, cuahan tí cua cañi tahan tí chihin ñáyiví vachi tata ña, ñu cha quichahá tuhun cahán Nyoo, ñu nyicón cha ndicha cha cahán ra Jesucristo chihin cha ñhi ñhi ñu.

13

Nu nyehe ra Juan uvi quiti quiñi caa

¹ Chicuinanyañi nu ñiti yuhu tyañuhu cuan. Ta nyehe quita noo quiti quiñi xaan caa nuu tyañuhu. Ta nyaá ucha xiñi tí, ta uchi ndiquí tí. Ta tahan tahan ndiquí tí yihí noo corona. Ta xiñi tí nyaá noo tuhun cha cahán ña vaha síqui Nyoo. ² Quiti quiñi caa ihya caá tí tari caá noo cuiñi. Ta tari caá chaha yihí caá

chaha tí. Ta yuhu tí tari caá yuhu ndicaha caá. Ta coo cahnú cuan chaha tí ityi chí quiti quiñi caa cha cunyaa tí nu tyayu tí. Ta chaha tí ityi chí tí cha cunyaca ñaha tí chí ñáyiví. ³ Ta noo xiñi quiti quiñi caa cuan tari maa cha nyaá noo nu cahví cahnú. Soco nu cahví cuan nduvahā. Ta iyo xaan cuñi tandihí ñáyiví iyó síqui ñuhu ñáyiví. Ta nanyicón ñu chí quiti quiñi caa cuan. ⁴ Ta sacahnú tucu ñu chí coo cahnú cuan, vatyi chaha tí ityi chí quiti quiñi caa cuan. Ta sacahnú tucu ñu chí quiti quiñi caa cuan, ta catyí ñu:

—¿Yóó cha cuví chí tari cuví chí quiti quiñi caa ihya? ¿Ta yóó cha cuví cañi tahan chihin tí? —catyí ñu.

⁵ Ta ñihí tucu quiti quiñi caa cuan ityi vatyi cahan ña vaha tí ta cahan quiñi caa tí síqui Nyoo. Ta cua cunyaca ñaha tí chichi cha uvi xico uvi yoo. ⁶ Ta tyicuan caa sacuví tí. Cahán tí síqui Nyoo. Ta cahán ña vaha tí síqui nu nyaá Nyoo. Ta cahán tí chí ñu nyicú andiví. ⁷ Ta chicoo tucu ityi chí tí cha sacoo tí cuatyí síqui ñu cuenda Nyoo nyacua nya cuví chasaha tí chí ñu. Ta chicoo ityi chí tí síqui ñáyiví ndihí ri tata, ñáyiví siñ siñ sahan cahan, ñáyiví tandihí ri ñuu nyihí, tandihí ri ñuu nahnu, ⁸ tandihí ñu cha ma ñhi ñáyiví chaa coo chihin ra cuví Mbee Luhlu, ra cha chíhí. Ma ñhi ñu vatyi nyata ni cumañi chingo ñuhu ñáyiví ta ñahri sívi ñu nyaá nu libru ra. Tandihí ñu cuan cusacahnú ñu chí quiti quiñi caa cuan. ⁹ Ta ñu cutuñi ñhi, na quichaha ñu tuhun ihya: ¹⁰ Ñu cunyaca vehe caa chí inga ñu, suri cuhnú tucu maa ñu. Ta ñu cha cachahñi chihin cha xaan, suri chihin cuan cucúvi tucu maa ñu. Yucuan chaha cuñi xaan chí cha cunye xaan ñhi ñu cuenda Nyoo. Ta cuñi chí cha chino ñhi ñu chí ra.

¹¹ Yahā cuan ta nyehe inga quiti quiñi caa. Quita tí chichi ñuhú. Quiti ihya nyaá uvi ndiquí tí cha tari caá ndiquí mbee luhlu. Soco tari cahán noo coo xaan vavaha cahán tí. ¹² Ta nyacá ñaha tí tari nyacá ñaha quiti quiñi caa cha xihna ri cuan. Suri chihin nuu quiti cha xihna ri cuan nyacá ñaha tí. Ta tyiyuhu tí chí ñuhu ñáyiví ta ñu iyó síqui na sacahnú ñu chí quiti quiñi caa cha xihna ri cuan, quiti cha nduvahā nu cahvi cahnú cha chinyaā chí tí. ¹³ Ta cuaha xaan milagru sacuví tí. Nyacua cuví sanacoyo tí ñuhú cayú ityi andiví chihin nuu ñáyiví. ¹⁴ Ta sandaví ñaha tí chí ñáyiví iyó síqui ñuhu ñáyiví chíhín seña cha cuví sacuví tí chihin nuu quiti quiñi caa cha xihna ri cuan. Ta tachí tí nachino noo xiñahñu quiti quiñi caa cha tahná cahvi chihin mityi, soco ña chíhí tí. ¹⁵ Ta quiti quiñi caa cu uvi cuan chicoo ityi chí tí cha cuhva tí cha conyito xiñahñu quiti quiñi caa cha xihna ri cuan, vatyi xiñahñu cuan cuví cahan. Ta tachí xiñahñu cuan nacúvi tandihí ñáyiví ña cuñi sacahnú chí chí. ¹⁶ Ta

siin ri catyí ti vatyi na cunyaa noo tuñi chi tandihi ñáyivi, tandihi ñu nyihí, ñu chahnu, ñu tyayii, ñu ndahvi, ñu yori chitoho, ta ñu iyó chitoho. Ta cucunyaa tuñi cuan ndaha chiyo vaha ñu o tyaan ñu. ¹⁷ Ta yori maa cuví sata ta xico tatu ñahri tuñi cuan nyaá chi ñu. O tatu ñahri sivi ti, o número sivi ti nyaá chi ñu. ¹⁸ Tuhun ihya cuñi xaan chi cha chiñi tuñi. Ñu cutuñi iñi, na saha ñu cuenda número quiti quíñi caa cuan. Vatyi número noo rayii cuví. Ta número ra cuan ican cuví iñu cientu uñi xico iñu.

14

Nu sacahnú cientu uvi xico cumi mil ñáyivi chi Nyoo chihin cha chitá ñu

¹ Yahá cuan ta nyehi chi ra cuví Mbee Luhlu, nanyaá ra nu yucu Sión. Ta chihin ra tayucú cientu uvi xico cumi mil ñáyivi cha nyaá sivi ra tyaan ta sivi Sutu ra. ² Tyicuan ta chiñi noo cha cayu cha quichi ityi andivi, tari cayu cuaha yuvi nahnu. Ta tari cahán savi cha ñihi xaan, o tari noo ndusu cha cuaha xaan ra casacuacú arpa. ³ Ta cachitá ñu noo yaa chaa nuu tyayu Nyoo, ta nuu ndi cumi cha nyitó cuan, ta nuu tandihi ra cha vaha chahnu cuan. Ta yori cuví cutuhva yaa cuan, iin ri maa cientu uvi xico cumi mil ñu cha cacú añima siqui ñuhu ñáyivi. ⁴ Ican ñu ihya cuví ñu cha ña chicoq cuatyí ñu chihin inga rayii ta ni ri rayii chihin inga ñusihi, vatyi ii ndoo ñu, ta nyicón ñu chi ra cuví Mbee Luhlu tandihi ri ityi nu cuahan ra. Cacú añima ñu ta cuví ñu ñu xihna ca chahá cuenda ñu chi ñu chi Nyoo ta chi ra cuví Mbee Luhlu. ⁵ Yori cuví catyí vatyi cuendu ñu, vatyi ni noo cuendu ña tuhvá ñu cahan. Yucuan chaha ñahri cuatyí ñu nuu Nyoo.

Tuhun cha sacotq uñi tahan ángel

⁶ Tyicuan ta nyehi inga ángel cuahan ndava ra andivi. Ta nyisó ra tuhun Nyoo cha ma ndihi ca maa, ta ican tuhun ihya cuví cha sacacú ra Cristo añima yo, Vatyi cusacoto ra tuhun ihya chi ñáyivi iyó siqui ñuhu ñáyivi, ñáyivi ndihi ri ñuu nahnu, ta ndihi ri ñuu nyihí, ta ñáyivi ndihi ri tata, ta ñáyivi siin siin sahan cahan. ⁷ Ta ñihi xaan cahan ra ta catyí ra:

—Na yuhvi ndo chi Nyoo, ta saçahnu ndo chi ra. Vatyi cha chaq cuhva cha cua cutuñi chi ñáyivi. Saçahnu ndo chi ra savahá andivi ta ñuhu ñáyivi, ta tyañuhu ta ndohyo ndutya.

⁸ Tyicuan ta cuahan inga ángel cuan chata ra, ta catyí ra:

—Cha canacavá ñuu Babilonia cahnú vityin, cha taní chí. Vatyi ñu iyó ñuu cuan sañahá ñu chí inga ñáyivi iyó siqui ñuhu ñáyivi cha quíñi caa tari sacuví maa ñu. Tari

quivi cha sacuíñi ñu chí ñu chihin vinu ña vaha cuví cuan.

⁹ Ta nacahan ángel cu uñi chihin cha ñihi ndusu ra ta catyí ra:

—Tatu nya noo ñu sacahnú ñu chí quiti quíñi caa cuan ta chí xiñahñu ti, o chahá ñu chí ñu cha cunyaa tuñi ti tyaan ñu, o ndaha ñu, ¹⁰ cunyehe xaan ñu tindoho vatyi cutyihí Nyoo chí ñu nu ñuhu, ta nu azufre tari cha cusacoho Nyoo noo vinu xaan chí ñu. Ta chihin nuu ángel ta chihin nuu ra cuví Mbee Luhlu cucuvi cuan. ¹¹ Ta ñuhma cha quitá nu nyehé ñu tindoho cuan tyicuan ri maa cuquita chí. Ta ma nyitatu maa ñu ndiyaca ta ñiyaca nu cohon ñu yucuan, vatyi sacahnú ñu chí quiti quíñi caa cuan ta chí xiñahñu ti, o chahá ñu cha cunyaa tuñi sivi ti chí ñu. ¹² Yucuan chaha ñu yihí cuenda Nyoo, ñu quichahá tuhun cahan ra, nñi iñi ñu chinó iñi ñu chí ra Jesús ta cuñi chí cha cunyehe xaan iñi ñu cha nyehé ñu tindoho sacuvi inga ñáyivi.

¹³ Tyicuan ta chiñi noo ndusu cha quichi ityi andivi, ta catyí chí chí tyehe caa:

—Tyaa tuhun ihya: “Vityin ta ityi nuu ca, siñ xaan cucuvi chí ñu chíhí ta chinó iñi ñu chí Sutu Mañi yo.” Ndicha, catyí Tatyí li Nyoo vatyi cunyitatu ñu chihin tyiño sahá ñu. Ta iin ri cuhun cha vaha cha sacuvi ñu chihin ñu.

Nu cutachi tuñi Nyoo chí ñáyivi

¹⁴ Tyicuan ta nyehi ta nyehi noo vico cuichin. Ta siqui vico cuan nyaá noo rayii cha ndicha cuñi maa cha quichi nya gloria. Ta yihí noo corona xuhun cuaan xiñi ra. Ta yihí ndaha ra noo mityi cutya ta xaan. ¹⁵ Ta quitá nonga ángel chíhí vehe ñuhu ta chaa canachaa ra chí ra nyaá siqui vico cuan. Ta catyí ra:

—Vityin saha tyiñon chihin mityun, ta na satacon cosecha cha iyó siqui ñuhu ñáyivi. Vatyi cha chaq cuhva, ta cha iyó siqui ñuhu ñáyivi cha chítyi chí —catyí ra.

¹⁶ Tyicuan ta ra cha nyaá siqui vico cuan sayahá ra mityi ra siqui ñuhu ñáyivi, ta nasataca ra cha iyó nuu chí.

¹⁷ Tyicuan ta inga tucu ángel quitá chíhí vehe ñuhu cha nyaá andivi. Ta nyisó tucu maa ra noo mityi cutya cha xaan vavaha. ¹⁸ Ta nu nyaá arta quitá tucu nonga ángel cha iyó ityi chí cha cunyaca ñaha chí ñuhu cha cayú. Ta canachaa ra ta cana ra chí ra cha nyisó mityi cutya cha xaan cuan. Ta catyí ra chí ra:

—Saha tyiñon chihin mityi xaan cha nyisón chiña, ta na satacon vatu tichaha ndivi cha iyó siqui ñuhu ñáyivi, vatyi cha chítyi —catyí ra.

¹⁹ Ta ángel cuan sayahá ra mityi ra siqui ñuhu ñáyivi ta chahnya ra tichaha ndivi cha iyó siqui ñuhu ñáyivi. Ta tyihí ra noo nu

tyihí ra vatyi cucuhñi ra ta quita ndutya chi. Ta cha tyehe caa cuñi chi catyí cha cutachi tuñi Nyoo chi ñáyivi. ²⁰ Ityi chata ñuu cachahñi ra tichaha ndívi cuan, ta cuñi chi catyí vatyi cachihi cuaha xaan ñáyivi, ta nu cuví cuan, cama xaan cama xaan niñi ñu chati. Ta chaa chi nya nu sucun nu nyaá frenu yuhu caballu ta tari cuhva noo uñi cientu kilómetro chinó niñi cuan.

15

Nu quitá ángel chihin ucha ca tahan tindoho cha cunyehe ñáyivi nu ndíhi tuhun

¹ Nyehe nonga seña cahnú andívi, ta yuhvi xain cuví, vatyi nyehe ucha tahan ángel chihin ndí ucha tindoho. Chihin ihya cuví nu ndíhi tindoho vatyi cundihi cha cuxaan Nyoo chihin ñáyivi cha ña quichahá ñu tuhun cahán ra.

² Ta nyehe tiqui noo cha tari caa tyañuhu, xiño tari caá ino, nasacá chi chihin ñuhu cha cayú. Ta ñu cha yahá cuví chasaha chí quiti quiñi caa cuan ta chí xiñahñu ti, ñu cuví chasaha cha ma cunyaa número sivi ti cuan chí ñu, tandíhi ñu tayucú ñu yuhu tyañuhu cha xiño cuan. Ta ndahá ñu arpa, cha chahá Nyoo chí ñu. ³ Ta chítá ñu yaa ra Moisés, ra sacuví tyiño nuu Nyoo, ta yaa ra cuví Mbee Luhlu. Ta tyehe caa catyí ñu:

Cahnú ta iyo xaan caá tandíhi maa cha sacuvún.

Nyoo, Sutu ndí, iyó tandíhi tunyee iñi chuun.

Ndoo xaan ta ndicha xaan ityun.

Yoho Rey cuvún cuenda tandíhi ñáyivi iyó siqui ñuhu ñáyivi.

⁴ ¿Yóó cha ma yuhvi chuun, yoho Sutu Mañi nyuhu?

¿Yóó cha ma sacahnú chuun?

Vatyi noo tuhun ri maun cuví ra ii.

Ta cuquichi coyo ñáyivi tandíhi ñuu, ta cusacahnú ñu chuun.

Vatyi cha nyehe ñu cha vaha cha sacuvún, catyí ñu chítá cuan.

⁵ Cha yahá tuhun ihya ta nanyehi nuñá yuvehe ñuhu nya andívi nu cumi vaha ñu tabla cha nyaá ley. ⁶ Ta chichi vehe ñuhu cuan quitá coyo ndí ucha ángel cha canyisó ndí ucha tindoho cuan. Ta cañihno ra sahma finu, cuichin ta xiño. Ta cayihí ra sincho xuhun cuaan ta nya pechu ra chítahan.

⁷ Tyicuan ta noo cha nyitó cuan, chahá cuan noo noo copa xuhun cuaan chí ndí ucha tahan ángel cuan. Ta chichi copa cuan tyitu maa yihí cha xaan Nyoo cha cutachi tuñi ra chí ñáyivi. Ta ican ra iyó ra tyicuan ri maa. ⁸ Ta chichi vehe ñuhu cuan chítu maa chihin ñuhma cha cuenda cha cahnú xaan cuví Nyoo ta cha cuenda tunyee iñi iyó chí ra. Ta yori maa cuví quihvi chichi vehe ñuhu cuan cha niri ca cha cumañi ndíhi ndí

ucha tindoho cha nyisó ndí ucha tahan ángel cuan.

16

Copa cha yihí tindoho cha cua saquichi ndí ucha tahan ángel cuan

¹ Tyicuan ta chíñi noo ndusu ñihi cha quitá vehe ñuhu nu nyaá Nyoo. Ta catyí chí chí ndí ucha ángel cuan:

—Cuañan ndo cua coyo ndo cha ñohó chichi copa chíña siqui ñáyivi iyó siqui ñuhu ñáyivi, vatyi Nyoo cutachi tuñi ra chí ñu —catyí ndusu cuan.

² Ángel cha xihna ri cuan chahán ra ta coyo ra cha ñohó chichi copa cuan siqui ñáyivi cha nyaá tuñi quiti quiñi caa cuan chí, ñu cha sacahnú xiñahñu ti. Ta quitá noo nu cahvi xaan chí ñu, ta uhvi xaan.

³ Ta ángel cu uvi cuan coyo ra cha yihí chichi copa ra nu tyañuhu. Ta ndutya tyañuhu cuan nanduví niñi tari niñi noo ndívi, ta tandíhi cha nyitó chichi tyañuhu cuan cachihi.

⁴ Ta ángel cu uñi cuan coyo ra cha yihí chichi copa ra siqui yuvi nahnu ta siqui ndo-hyo ndutya ta cananduví chí niñi. ⁵ Tyicuan ta chíñi cha cahán ángel cuenda ndutya tyehe caa:

—Sutu Mañi yuhu, yoho cuvún noo ra vaha vatyi tachi tuñun chí ñáyivi tyehe caa, Sutu Mañi yuhu, Nyoo ii cuvún ta iyón vityin ta nu quichaha tandíhi. ⁶ Vatyi maa ñu cachati ñu niñi ñáyivi cuendon ta niñi ra cacuví profeta cuendon. Ta vityin yoho tari cha cunasacohun niñi chí ñu vatyi tyicuan caa tahán chí chí ñu —catyí ángel cuan.

⁷ Ta chíñi tiqui vatyi cahán noo cha cahán ityi nu nyaá arta Nyoo tyehe caa:

—Ndicha, Sutu Mañi yuhu Nyoo, iyó tandíhi tunyee iñi chuun. Vityin cha yahá tachi tuñun chí ñáyivi chihin cha ndicha ta chihin cha ndaa —catyí cuan.

⁸ Ta ángel cu cumi cuan coyo ra cha yihí chichi copa ra nu ñanyii. Ta chicoq ityi chí ñanyii cuan vatyi cahmi chí chí ñáyivi chihin ñuhu chí. ⁹ Ta tandíhi ñu, quiñi xaan chahmí ñanyii chí ñu. Soco ña canasama ñu cuhva iyó ñu, ni ña casacahnú ñu chí Nyoo. Ta cahán ña vaha ñu siqui Nyoo ra cuví sanyehé tindoho chí ñu tyehe caa.

¹⁰ Ta ángel cu ohon cuan coyo ra cha yihí chichi copa ra siqui tyayu quiti quiñi caa cuan. Ta nduñaa ri nu nyacá ñaha ti. Ta ñáyivi cuenda ti, nyacua nacachi yihí ñu yaa ñu cha cuenda cha nyehe xaan ñu cha uhvi.

¹¹ Soco ni tyicuan caa ta ña sandíhi ñu cha sacuví ñu cha ña vaha. Ta cahán ña vaha ñu siqui Nyoo ra nyaá andívi cha cuenda cha uhvi chí ñu ta cha cuenda nu cahvi chí ñu.

¹² Ta ángel cu iñu cuan coyo ra cha yihí chichi copa ra siqui yuvi cahnú Eufrates. Ta

yuvi cuan na ityi chi tacuhva vatyi nuña noo ityi cha yaha ra cacuví rey cha vachí coyo ityi nu caña ñanyii. ¹³ Tyicuan ta nyehí cha quitá yuhu quiñi quiñi caa cuan ta yuhu coo cahnu cuan ta yuhu ra cuví profeta cuendu. Vatyi caquitá coyo uñi tahan tatyí ña vaha yuhu ra cuan. Tari caá sahva caá tatyí ña vaha cuan. ¹⁴ Ican ihya cuví tatyí cuihna cha casacuví milagru nahnu. Ta quitá coyo chi vatyi sandu ñn ri chi tandihí rey cha iyó siqui ñuhu ñayiví, vatyi cacañi tahan ra quiví cusañaha Nyoo tyi iyó tandihí tunyee iñi chi ra. ¹⁵ Ta catyí Nyoo:

—Nyehe ndo vatyi yuhu cha vachí tari noo ra suhu. Vatyi sana ri iñi ndo ta quihví ra suhu vehe ndo. Sii xaan cucuvi chi ñáyivi nyatú tuhva ri quiví quichi. Ta vii cumi ñu sahna ñu (o cuñi chi catyí añima ñu) tacuhva cha ma cuvityiyaa ñu nu cua quichi, ta ma cucahan nuu ñu, catyí Nyoo.

¹⁶ Ta cundu ñn ri ra cacuví rey nu nañi chi chihin sahan hebreo Armagedón.

¹⁷ Tyicuan ta ángel cu ucha cuan coyo ra cha yihí chichi copa ra nu tatyí, ta nya vehe ñuhu andiví nu nyaá Nyoo nu tyayu ra, quitá noo ndusu chaa xaan ta catyí chi:

—Cha cuví vityin —catyí ra.

¹⁸ Tyicuan ta vaa ri maa cuví ta cahán savi ta quihví tacha. Ta ñihi xaan tañ siqui ñuhu ñayiví. Ta ndaha chicoq ñáyivi siqui ñuhu ñayiví, ta ña tuhva taan cha ñihi xaan tyicuan caa. ¹⁹ Ta nu tañ cuan ndata ñuu cahnu cuan, uñi nu ndata. Ta tandihí ca ñuu siqui ñuhu ñayiví canacoyo. Ta Nyoo nichohñ iñi ra chi ñuu cahnu Babilonia cuan vatyí quiñi xaan sacuví ñu. Ta sanyehe xaan ra tindoho chi ñu vatyi cuxaan xaan ra chi ñu. ²⁰ Tandihí ñuhú cha iyó chichi tyañuhu ta tandihí yucu, ndihí cuanaa. ²¹ Ta nahnu xaan tucu savi yuu coon ityi andiví siqui ñáyivi. Ta vee xaan. Tari noo cha uvi xico kilu vee noo noo savi yuu cuan. Ta ñáyivi cahán ña vaha ñu siqui Nyoo cha cuenda tindoho savi yuu cuan, vatyi cuví chi noo tindoho cahnu xaan cha cuenda ñu.

17

Nu cua tachi tuñi Nyoo chi noo ñaha cata iñi

¹ Tyicuan ta chichi cha ucha tahan ángel cha cayihí ndaha ucha copa cuan, quichí noo ra nu nyaí, ta catyí ra chíi:

—Ñaha tyi cusañahi chuun yoso caa cucutuñi chi ñaha cata iñi cahnu cha nyaá siqui tyañuhu. ² Vatyi ra cacuví rey siqui ñuhu ñayiví casacuví ra cha quiñi caa chihin ña, ta ñáyivi cha iyó siqui ñuhu ñáyivi, tiví xaan ñu chihin cha quiñi caa cha sacuví ña —catyí ra chíi.

³ Tyicuan ta nyehí noo cha sañahá Tatyí Ii Nyoo chíi, ta chinyacá ángel cuan chíi chiqui

ndí nu yori maa ñáyivi iyó, ta yucuan nyehí chi noo ñaha, yosó ña siqui noo quiñi cuaha quiñi caa. Ta nyicú sivi cha cahán ña vaha siqui Nyoo chi ti. Ta ucha tahan xiñi ti nyaá ta uchi ndiqui ti. ⁴ Ta ñaha cuan ñihno ña noo sahna tyacu nyaá ta tyacu cuaha. Ta cuaha xaan xuhun cuan iñi chi ña, yuu tyaqui ta perla ñandihí. Ta yihí ndaha ña noo copa xuhun cuan tyitú yihí chihin cha ña vaha ta cha quiñi caa cha sacuví ña. ⁵ Ta tyaan ña nyaá noo sivi cha cuví noo tuhun xehe cha ña cutuñi iñi ñáyivi. Vatyi catyí chi: “Ican ñaha sihi ihya cuví ñuu Babilonia cahnu, sihi tandihí ñu cha cata iñi ta tandihí cha ña vaha cha iyó siqui ñuhu ñayiví.” ⁶ Tyicuan ta tuví iñi vatyi ñaha cuan chíi ña chihin cha chíi ña niñi ñu cuenda Nyoo, ta ñu cha cachihí cha cuenda cha cahán ñu tuhun ra Jesús. Ta cha nyehí cuan, iyo xaan cuñi. ⁷ Tyicuan ta catyí ángel cuan chíi:

—¿Ñáa tuhun cha iyo xaan cuñún? Cua sacote chuun ñáa cha cuñi chí catyí tuhun xehe ñaha sihi ihya ta quiñi quiñi caa cha yosó ña, quiñi cha nyicú ucha xiñi ta uchi ndiqui. ⁸ Quiñi quiñi caa cha nyehun cuan, cuví ti noo quiñi cha chiyó ta vityin yori ca ti iyó. Soco cuquita ti chichi yavi cono xaan cha ñahri nu chitahan. Yucuan ñohó ti cha ni cumañi ca ndihí tuhun ti. Ta ñáyivi iyó siqui ñuhu ñayiví iyo xaan cucuñi ñu na nanyehe ñu chi quiñi quiñi caa cha chiyó tyicuan, soco vityin yori ca ti iyó, soco cuquichi ti inga chaha. Ñu cua nyehe chi ti cuan, cuví ñu ñu cha ñahri sivi nyaá nu libru Nyoo nyata quiví chingó ñuhu ñayiví. Ican libru cuan cucatyi yó ñáyivi cuconyito tyicuan ri maa. ⁹ Ihya cuví noo cha cuñi chi nacoto ndo: Ndí ucha xiñi ti cuan cuñi chí catyí ucha tahan yucu cha nyaá ñaha cuan siqui. ¹⁰ Ta xiñi ti cuñi tucu chí catyí ucha tahan rey. Ta ohon tahan rey cuan cha yahá chinyaca ñaha ra. Ta rey cu iñu nyacá ñaha ra vityin. Ta ra cu ucha, cumañi ca cucunyaca ñaha ra. Ta quiví quichi ra nu ndihí, ña naha cucunyaca ñaha ra. ¹¹ Ta chichi cha ucha tahan rey cuan, cunanyita noo ra inga chaha, ta ican ra cucuvi ra rey cu uña. Ta ican tucu ra cuví quiñi quiñi caa cha chiyó quiví cuan, ta vityin yori ca ti soco cunanyita ti inga chaha. Ta cha yaha cunyaca ñaha tucu ti, yucuan cuví nu cua ndihí tuhun ti.

¹² Ta ndí uchi tahan ndiqui cha nyehun cuan, cuñi chí catyí ndí uchi tahan rey cha cumañi ca cucunyaca ñaha. Soco cucoo ityi chí ra cha cunyaca ñaha ra noo ora, ñn ri chihin quiñi quiñi caa cuan. ¹³ Ndí uchi tahan rey cuan ñn xaan ri cuhva cucaca xiñi ra. Ta cunacuhva ra tunyee iñi ra chí quiñi quiñi caa cuan. Ta tandihí ityi cha iyó chí ra cunacuhva ra chí ti. ¹⁴ Ta cucacañi tahan ra chihin ra cuví Mbee Luhlu. Soco

ra cuví Mbee Luhlu cuan, cucuvi chasaha ra chí ra. Vatyí ícan ra cuví nuu chí tandíhi ra nyacá ñaha. Ta cuví tucu ra nuu chí tandíhi ra cacuví rey. Ta ñu nyicú chíhin ra, Nyoo nacana chí ñu ta nacachí ra chí ñu. Ta ñií xaan íñi ñu nyicón ñu chí ra.

¹⁵ Ta catyí tucu ángel cuan chíi ñandíhi:

—Tandíhi tyañuhu cha nyehun cuan, cha nyaá ñaha cata íñi cuan síqui, ícan cuví ñáyivi tandíhi ñuu nyíhi ta tandíhi ñuu nahnu, ñu sín sín sahan cahan. ¹⁶ Ta ndí uchi ndíqui cha nyehun xíñi quítí quíñi caa cuan cha cuví uchi tahan rey cuan, ícan ra cuan cuasatási íñi chí ñaha cata íñi cuan. Ta cusandoo ra chí ña cha notuhun ri maa ña. Ta cusanduvityiyaa ra chí ña. Ta cucachi ra coño ñuhu ña. Ta cutyíhi ra chí ña nu cayú ñuhu. ¹⁷ Vatyí Nyoo sana ndaha ra añima rey cuan vatyí casacuví ra cuhva cuñí maa ra. Vatyí ín ri cuhva cucaca xíñi ra, ta cucuhva ra ityí chí quítí quíñi caa cuan cha cunyaca ñaha tí tari rey nyacua nya chino cava tuhun cahán maa Nyoo. ¹⁸ Ñaha síhi cha nyehun cuan, ícan cuví ñuu cahnu cha nyacá ñaha chí tandíhi ra cuví rey síqui ñuhu ñáyivi.

18

Nu cua tiví ñuu Babilonia

¹ Cha yahá tuhun íhya ta nyehí inga ángel cha vachi noó ityí andiví ta iyó xaan ityí chí ra. Ta ñuhu ñáyivi ndichin xaan nduví chíhin cha ndichin ra. ² Ta ñíhi xaan ndusu ra ta canachaá ra, ta catyí ra:

—Cha yahá tuhun ñuu Babilonia cahnu cuan. Ta cha nanduví chí nu iyó ra ña vaha. Vehe tandíhi nuu tatyí ña vaha cha nanduví. Ta taca saa ña vaha nanduví ñandíhi. ³ Vatyí tandíhi ñáyivi tiví ñu cha cuenda cuatyí sacuví ñuu Babilonia cuan. Ta ra cacuví rey, ra nyacá ñaha síqui ñuhu ñáyivi tari cha cachiyo ra chíhin ñaha cuan cha cuví ñuu Babilonia. Casacuví ra cuatyí chíhin ña. Ta ra cha cuahan cuanaxico ñuu Babilonia cuan candutyayíi ra chíhin cha xicó ra chí ñu ñuu cuan vatyí tandíhi cuhva ta sanaa ñu xuhun ñu chíhin cha cata íñi ñu.

⁴ Tyicuan ta chíñi nonga ndusu ityí andiví. Ta catyí chí:

—Quíta ndo ñuu chíña, nyoho cha cuví ndo ñáyivi chíi, tacuhva cha ma cutahan ndo sacuví ndo cuatyí chíhin ñu chíña, tacuhva ma cutahan ndo ndoho ndo tari maa ñu. ⁵ Vatyí cha caá ticuítí cuatyí ñu ñuu cuan, nyacua cha chaá chí nu nyaá Nyoo. Ta Nyoo cha nicohon íñi ra cha ña vaha sacuví ñu. ⁶ Cuhva ndo chí ñu suri maa cha chahá ñu chí inga ñáyivi. Ta uvi ca chaha sananyehe ndo tindoho síqui cha sacuví ñu. Cuhva ndo noo tindoho cunyehe ñu cha ñíhi uvi ca chaha ícan saha cha chahá maa ñu chí inga ñáyivi. ⁷ Yucuan chaha

cuhva ndo cha iyo xaan tahan ñu chíhin ta sanyehe xaan ndo tindoho chí ñu tari cuhva cha sacahnú xaan ñu chí ñu ta cusíi xaan íñi ñu. Vatyí catyí ñuu cuan chíhí añima chí: “Íhya nyaí tari noo reina. Ñíma ñaha chíhí yíi cuví, ta ni ma cunyehe tindoho”, chícá íñi chí. ⁸ Yucuan chaha chíhí cha noo ri quívi cuquichi tindoho síqui ñuu cuan, cuquichi tuhun chíhí, cuquichi tucuihya íñi ta coo tama ñuu cuan, ta cacuyá chí chíhin ñuhu. Vatyí iyó xaan tunyee íñi chí Nyoo Sutu yo ta cutachi tuñi ra chí ñu ñuu cuan.

⁹ Ra cacuví rey síqui ñuhu ñáyivi íhya tari cha cachiyo ra chíhin ñaha cha cuví ñuu cuan, cuacu chaa ra, cunducuihya xaan íñi ra na cananyehe ra ñuhma cha cayú ñuu cuan. ¹⁰ Ta nya sava ri cucuitayucu ra cha cuenda cha cayuhvi ra tindoho cuan. Ta cucatyí ra:

—íNdahví yoho, ñuu cahnu Babilonia, ñuu cha chíyo xaan tunyee íñi chíi! Vatyí noo tuhun cuhva ta chaá tindoho nyehún —cucacatyí ra.

¹¹ Ta ra cha canaxicó ñáá ndíhi cha canaxicó, suri cucuacu chaa ra ta cucanducuihya íñi ra cha cuenda ñuu cuan. Vatyí yorí ca sata cha canaxicó ra. ¹² Vatyí xicó ra xuhun cuaan, xuhun cuichin, yuu tyaquí, perla, sahma lino finu, sahma seda, ta sahma tyacu nyaa, ta tyacu cuaha. Ta nyisó tucu ra tandíhi nuu vitu cha víxi chahán ta ñáá ndíhi cha chíño chíhin noho landa, vitu tyaquí, ta caa cha cuví bronce, ta caa cha cuví hierro, ta yuu cha cuví mármol. ¹³ Ta nyisó tucu ra canela, ñáá ndíhi ca cha víxi chahán, tari cutu, mirra, perfume, vinu, acetye, yutyí paan finu, ta trigo. Ta suri nyisó tucu ra quítí cuenda carga, ta mbee, caballu, carru. Ta nyacua nya añima ndahví cha cuví musu ra ta caxico ra. ¹⁴ Ta catyí ra chí ñáyivi ñuu cuan tyehe caa:

—Ñahri ca cha tyaquí cha chíyo chuun, cha tahán xaan íñun. Ta cha cuachiyo tandíhi cha tyayíun. Ta ma cunañíhi ca maun tandíhi cuan —catyí ra.

¹⁵ Ra cha caxicó tandíhi íhya, candutyayíi ra cha cuenda cha satá ñu ñuu cuan cha xicó ra. Cañi cucuitayucu ra chíhin cha cayuhvi ra cha cunyehe ñu cuan tindoho. Ta cucuacu chaa ra ta cunducuihya íñi ra. ¹⁶ Ta cucatyí ra:

—íNdahví ñuu cahnu cuan! Cuví chí tari noo ñaha síhi cha ñíhnó sahma lino finu, sahma tyacu nyaa ta tyacu cuaha. Ta iyo yíhi ña xuhun cuaan, ta yuu tyaquí ta perla. ¹⁷ íVatyí noo tuhun ri cuhva ta ndíhi cha tyayíi xaan cuan! —cucatyí ra caxico cuan.

Ta tandíhi ra cuví capitán cuenda barcu, chíhin ñu cañoho chíhí, tandíhi ñu casahá tyíño nu tyañuhu, nya sava candoó ñu. ¹⁸ Ta

cha cananyehé ñu ñuhma cha cayú ñuu cuan, canachaa ñu, ta catyí ñu:

—¿Ñáá nonga ñuu chiyo tari ñuu cahnu ihya? Ñahri ca —cucatyí ñu.

¹⁹ Ta tyicu ñu niyaca xiñi ñu, ta chacu chaa ñu. Ta cuihya iñi ñu, ta canachaa ñu ta catyí ñu:

—¡Ndahvi nduvi yo cha cuanaa ñuu cuan! Vatyí chihin cha tyayí ñuu cahnu cuan ndutyayí tandihi yo, ñu chicá noo nu tyañuhu chihin barcu. ¡Ta vityin noo tuhun cuhva luhlu ri ta cuanaa chi! —catyí ñu.

²⁰ Soco cusíi cuñi nyoho cha cuenda ñuu cuan, nyoho cha iyó andivi, nyoho ñu yihí cuenda Nyoo ta nyoho ra cachicá tyiño ra Cristo ta nyoho ra cacuví profeta Nyoo. Cusíi cuñi ndo vatyí cha cuenda ndo ta tachí tuña Nyoo chi ñu cuan, ta cha cuenda cha ña vaha cha sacuví ñu chihin ndo.

²¹ Tyicuan ta noo ángel cha iyó xaan tunyee iñi chi, nacoñehé ra noo yuu molino cahnu xaan ta tuchi ra cuahan nu tyañuhu, ta catyí ra:

—Suri tyehe caa cundihi tuhun ñuu Babilonia cahnu, Ta ni inga ca chaha ta ma nyehé ca ndo chí ñu. ²² Ta ma cuiñi con yaa ityi chichi ñuu cuan, vatyí yori ca cusacuacu arpa, ta ni flauta, ta ni trompeta, ta ma tiví ca ñu. Ta ni ma coo ca ra casahá tyiño ñáá ndihi tyiño. Ta ni ma tyacu ca cha cayu molino. ²³ Ta ni nonga ñuhu tima, ta ma cayu ca chichi ñuu cuan. Ta ni nonga chaha ta ma cuiñi yo ndusu ñu cha iyó ñu vico tandaha. Vasi ra canaxico cha chiyo ñuu cuan, ican ra cuví ra cahnu ca cuví nuu ñáyivi iyó siqui ñuhu ñáyivi. Nyoho ñu Babilonia, sandaví ñaha xaan ndo chí tandihi ñáyivi iyó siqui ñuhu ñáyivi chihin cha sata si ndo.

²⁴ Vatyí cuaha xaan niñi ra cacuví profeta Nyoo iñi chichi ñuu cuan vatyí chahñi ñu chí ra. Ta iñi tucu niñi ñu cuenda Nyoo, ta niñi tandihi ñu cha cachahñi ñáyivi nicahnu ñuhu ñáyivi.

19

¹ Cha yahá cuan, ta chiñi noo ndusu cha cuaha vavaha ñáyivi nya andivi. Ta catyí ñu: ¡Cahnu xaan cuví Nyoo! Sutu Mañi yo, Nyoo cuví ra ra sacacu chi yo. Ta chí maa ra tahán chí cha sacahnu yo, tyi iyó xaan tunyee iñi chi ra.

² Vatyí vaha sacutuñi ra chihin cha ndaa ta chihin cha ndicha.

Tachí tuñi ra chí ñaha cata iñi cuan.

Vatyí sativí xaan ña chí ñáyivi iyó siqui ñuhu ñáyivi chihin cha quiñi caa cha sacuví ña chihin ñu.

Ta yucuan chaha tachí tuñi ra chí ña, ta cha cuenda cha chahñi ña chí ñu sacuví tyiño nuu ra.

³ Ta quichaha catyí ñu inga chaha:

—¡Cahnu xaan cuví Nyoo! Ñuhma cha cayú ña, ma cucuita ca maa cha ndaa chí ityi siqui —catyí ñu.

⁴ Ta ndi oco cumi ra cha vaha chahnu ta ndi cumi tahan cha nyitó cha nyicú nu nyaá tyayu Nyoo, cachicuiñi chiti ra nya nu ñuhú. Ta casacahnú ra chí Nyoo nu nyaá ra nu tyayu ra. Ta catyí ra:

—¡Na cuví chí tyicuan caa! ¡Cahnu xaan cuví Nyoo! —catyí ra.

⁵ Ta nu nyaá tyayu Nyoo, tyacu noo ndusu, ta catyí chí:

Sacahnu ndo chí Sutu yo Nyoo
Tandihí nyoho cha sacuví ndo tyiño nuu ra,
ta quichahá ndo chí ra, vasi nyihi ndo, o
chahnu ndo.

Nu cua tandaha ra cuví Mbee Luhlu chihin ñáyivi chinó iñi chí ra

⁶ Ta chiñi tiqui noo ndusu tari cha cuaha vavaha ñáyivi cahán, tari ndusu nu cuaha xaan yuvi ndutya, ta tari cha ñihi xaan cahán savi. Ta catyí chí:

¡Cahnu xaan cuví Sutu yo Nyoo! Vatyí cha quichahá nyaca ñaha ra ta iyó tandihi tunyee iñi chí ra.

⁷ Na cusíi cuñi yo ta na cutu yo chí chihin tusíi iñi. Na sacahnu yo chí ra.

Vatyí cha chaq cuhva cha cua coo yo vico tandaha ra cuví Mbee Luhlu.

Ta yoó cuacuví yo tari noo ñasihi ra, cha nyatú tuhva ri yo quivi tandaha yo chihin ra.

⁸ Ta maa yo cucuihno yo sahma linu finu, ndii ta cuichin.

Vatyí sahma linu finu cuan cuñi chí catyí cha vaha cha sacuví ñáyivi cuenda ra.

⁹ Tyicuan ta quichaha catyí ángel cuan chí: —Tyaa tuhun ihya nu tutu: “¡Sii xaan cuví chí ñu cha nyaá cuhun vico tandaha ra cuví Mbee Luhlu!”

Ta catyí tucu ra chii tyehe caa:

—Ican ihya cuví tuhun ndicha Nyoo —catyí ra chíi.

¹⁰ Tyicuan ta chicuiñi chiti chaha ángel Nyoo cuan vatyí sacahni chí ra, soco catyí ra chíi:

—Ma sacahnun chíi, vatyí musu Nyoo cuví tucu yuhu tari yoho, ta tari tandihi ra yañi yo cha nyicón tuhun ndicha ra Jesucristo. Chí Nyoo tahán chí sacahnu yo —catyí ra chíi.

Vatyí tuhun ndicha ra Jesús, ican cuví cha chahá cuhva chí ra cacuví profeta, ra cha cachahá cuenda tuhun cahán Nyoo chihin yo.

Nu sañahá chí cuenda ra chayosó caballu cuichin

¹¹ Tyicuan ta nyehi tanuña andivi. Tyicuan ta tuví noo caballu cuichin. Ta ra yosó chí ti nañi ra Ra Ndicha Cha Nii Iñi Sacuví Tyiño Nuú Nyoo. Vatyí chihin cha

ndaa sacutuñi ra chi ñáyiví, ta cañi tahan ra chihin cha ña vaha chihin cha ndaa. ¹² Xiño xaan chiti nuu ra tari cha cayú ñuhu. Ta cuaha xaan corona yihí xiñi ra. Ta nyaá noo sivi chi ra cha noo tuhun ri maa ra chitó ra ñáa sivi nyaá chi ra. ¹³ Ta ñihno ra noo sahma iñi ñiñi. Ta maa ra nañi ra Tuhun Cahán Nyoo. ¹⁴ Ta canyicón sindaro andiví chi ra, cañihno ra sahma linu finu, sahma cuichin ta ndii. Ta cayosó ra caballu cuichin. ¹⁵ Ta chichi yuhu ra nañi Tuhun Cahán Nyoo cuan, quitá noo mityi cha xaan ni nduvi chiyó yuhu, vatyí chihin tuhun cahán ra cusañicuehe ra ñáyiví iyó siqui ñuhu ñáyiví. Ta ñihi cunyaca ñaha ra chi ñu tari chihin noo yutun caa. Maa ra cutachi tuñi ra chi ñu tari noo ra cha sacunyihí tichaha ndiví chihin chaha ra. Ta cusacoho ra vinu uva chi ñu, ta ihya cuñí chi catyí tyi cuxaan Nyoo chihin ñu ta cutachi tuñi ra chi ñu vatyí chaha xaan ñu tisihi chi Nyoo ra iyó tandihí tunyee iñi chii. ¹⁶ Ta nu sahma ra ta nu sihin ra cuan nyaá letra cha catyí tyehé caa: “Ihya cuví Ra cuví nuu chi tandihí rey. Ta ican ra cuví nuu chi tandihí ra nyacá ñaha.”

¹⁷ Tyicuan ta nyehí chi nonga ángel nanyaá ra nu ñanyii. Ta chihin tandihí fuerza ra canachaá ra chi tandihí saa cha candavá ityi andiví, ta catyí ra chi ti:

—Ñaha ndo ta candu ñin ri ndo vatyí cuxiñi ndo cha chahá Nyoo cachi ndo. ¹⁸ Vatyí cachi ndo coño ra cacuví rey ta ra cuví nuu chi sindaro ta chi ra ndachan xaan saha chii. Ta cachi ndo coño caballu ta coño ñuhu ra cha cayosó chi ti. Cachi ndo coño tandihí ra, vasi ra yori chitoho o ra iyó chitoho, vasi ra nyihí o ra chahnu —catyí ra chi saa.

¹⁹ Tyicuan ta nyehí chi quití quiñi caa cuan ta chi ra cacuví rey cha iyó siqui ñuhu ñáyiví chihin sindaro cuenda ra, vatyí candu ñin ri ra vatyí cacañi tahan ra chihin ra yosó caballu cuichin cuan ta chihin sindaro cuenda ra. ²⁰ Ta tiñn ra chi quití quiñi caa cuan ñin ri chihin ra cuví profeta cuendu cuan, vatyí chihin nuu quití quiñi caa cuan ta sacuví ra cuendu cuan milagru, ta sandaví ñaha ra chi ñáyiví cha chahá chi cunyaa tuñi quití quiñi caa cuan, ta chi ñu sacahnú chi xiñahñu ti. Ta nyitó nyitó ra ta tuchi ra yosó caballu cuichin chi ñinduvi ra nu ñuhú cha cayú chihin azufre. ²¹ Ta tandihí ca ñu cachihí ñu chihin mityi xaan cha quitá yuhu ra cha yosó caballu cuichin cuan. Ta tandihí maa saa, cachachí xaan ti coño ñu.

20

Nu sañahá chi cuenda noo mil cuiya

¹ Cha yahá tuhun cuan ta nyehí chi noo ángel vachí noó ityi andiví ta yihí ndaha ra

ndaha ticu yuvehe yavi cono cuan. Ta yihí tucu ndaha ra noo cadena cahnu. ² Ángel ihya tiñn ra chi coo cahnu cuan, quití cha cuví Coo Chahnu cuan, cha cuví cuihna. Ta chahñí ra chi ti chihin cadena noo mil cuiya. ³ Ta tuchi ra chi ti yavi cono cuan. Ta yucuan nacasá ra chi ti. Ta tyaa ra noo sellu yuvehe cuan tacuhva cha ma sandaví ñaha ca ti chi ñáyiví iyó siqui ñuhu ñáyiví, nyacua nya cha yaha noo mil cuiya. Ta cha yaha noo mil cuiya cuan ta cundachi tucu ti suhva ca quiví.

⁴ Yahá cuan ta nanyehí cuaha xaan tyayu tayucú. Ta nuu chi nyicú ñu cha chicoo ityi chi vatyí tachi tuñi ñu chi ñáyiví. Ta nyehé tíqui añima ñu chahnyá ñáyiví xiñi cha cuenda cha cahñn ñu tuhun Nyoo cha chahá cuenda ra Jesús chi ñu. Ta maa ñu, ña sacahnú ñu chi quití quiñi caa cuan, ni chi xiñahñu ti, ni ña chahá ñu chi ñu cha cunyaa tuñi ti tyaan ñu, ni ndaha ñu. Nyehí vatyí ican ñu ihya, canandotó ñu ta chicunyaca ñaha ñu chihin ra Cristo noo mil cuiya. ⁵ Ican ñu ihya cuví cha nandotó cha xihna ca. Soco inga ityi ndiyi ña nandotó ñu nyacua nya cha yahá mil cuiya cuan. ⁶ ¡Sii xaan cuñí ñu ii cuenda Nyoo, ñu cha tahán chi nandotó cha xihna ri! Ta ma cahun ñu tuhun chihí cu uvi nu cuví anyaya nu tachí tuñi Nyoo chi añima ña vaha. Vatyí cucuví ñu sutu cha cuenda Nyoo ta cuenda ra Cristo. Ta cucunyaca ñaha ñu mil cuiya chihin ra. ⁷ Ta cha yaha mil cuiya cuan, tyicuan ta cundachi cuihna nu ñohó ra vehe caa. ⁸ Ta cuquita ra, ta cusandaví ñaha ra chi ñáyiví nicahnu siqui ñuhu ñáyiví. Cuquitá ra vatyí cusandaví ñaha ra chi ñáyiví Gog ta Magog, ñu xaan iñi chi Nyoo. Ta cusandu ñin ri ra chi sindaro ñuu cuan vatyí cahun ra cuatyí. Cuaha xaan ra, tari maa ñiti yuhu tyañuhu. ⁹ Tyicuan ta cuahan coyo ra nicacahnú siqui ñuhu ñáyiví. Ta chachasi cutya ra nu iyó ñu cuenda Nyoo ñuu Jerusalén nu cuñi xaan Nyoo. Soco Nyoo cusaquichi ra ñuhú ityi andiví ta cucahmi chi chi tandihí sindaro cuan. ¹⁰ Ta cuihna cha sandaví ñaha chi ñu, cutuchi Nyoo chi ra chichi anyaya cahnu nu cayú ñuhú chihin azufre, nu tuchi tucu ra chi quití quiñi caa cuan ta chi ra cha cuví profeta cuendu. Ta yucuan cunyehe ra tindoho tyicuan ri maa ndiyaca ta ñiyaca.

Nu cua cutuñi chi ñáyiví nu tyayu cuichin nu nyaá Nyoo

¹¹ Tyicuan ta nyehí noo tyayu cuichin cahnu. Ta nyehí chi ra nyaá nuu tyayu cuan. Ta chihin nuu ra ta cuanaa ñuhu ñáyiví ta andiví. Ta ñahri ca maa nu cunyaa chi. ¹² Ta nyehí chi tandihí ñu ndiyi, ñu chahnu ta ñu nyihí, tayucú ñu nuu Nyoo. Tyicuan ta canuñá libru cha nyaá tandihí cha sacuví ñu quiví chiyó ñu ñáyiví. Ta nuña tucu inga

libru cha nyaá sivi ñu cha cuconyito tyicuan ri maa chihin Nyoo. Ñu ndiyi cuan cuacutuñi chi ñu ñáa ndihi cha chinyacuvi ñu cha nyaá nu tandihi libru cuan. ¹³ Ta tyañuhu nacuhva cuenda chi chi ndiyi cha cumí chi. Ta tandihi nu nyicú ñu chihí nu nyacá ñaha Tuhun Chihí, nacuhva cuenda chi ndiyi cha cumí chi. Ta tandihi ñu cuatahan chi chi ñu yoso cuhva cha casacuví ñu. ¹⁴ Tyicuan ta cundihi Tuhun Chihí cuan ta ñahri ca nu cuacunyicu ñu chihí, vatyí cutuchi Nyoo chi ninduvi tahan cuan chichí anyaya cahnu nu cayú ñuhu. Ta ican ihya cuví Tuhun Chihí Cu Uvi. ¹⁵ Ta yucuan tuchi ra chí ñu cha ñahri sivi nyaá nu libru cha cuenda ñáyivi cha cua conyito chihin Nyoo tyicuan ri maa.

21

Nu nyehe ra Juan andivi chaa ta ñuhu ñáyivi chaa

¹ Yahá cuan ta nyehe noo andivi chaa ta noo ñuhu ñáyivi chaa, vatyí andivi ta ñuhu ñáyivi cha xihna ri cuanaa chí. Ta tyicuan caa tucu tyañuhu, cuanaa tucu cuan. ² Yuhu ra Juan nyehe ñuu ii Jerusalén chaa cha vachí noó ityi andivi nu nyaá Nyoo. Ta tyaquí xaan nduvijí chí tari noó ñaha cha cua tandaha chihin noo ra, tyicuan caa nduvijí chí. ³ Ta chíñi noo ndusu ñihi cha quitá ityi andivi, ta catyí chí:

—iNyehe ihya! Nyoo, iyó ra mahñu ñáyivi. Ta cua coo ra chihin ñu. Ta maa ñu cua cuví ñu ñuu ra. Ta cua cunyata ra chihin ñu. Ta cua cuví ra Nyoo cuenda ñu. ⁴ Ta Nyoo cunacuhva ra ndutya nuu ñu. Ta ma cuví ca ñu. Ta ma cucuihya ca iñi ñu. Ma cuacu ca ñu vatyí ma nyehe ca ñu tindoho. Ta ma nyehe ca ñu cha uhvi. Vatyí tandihi cha chiyo, cha yahá tuhun —catyí chí.

⁵ Tyicuan ta Nyoo, ra cha nyaá nu tyayu cahnu, catyí ra:

—Nyehe. Sanduchají tandihi maa cha iyó. Ta catyí tucu ra:

—Tyaa tuhun ihya, vatyí tuhun cahín ihya, ndicha. Ta cuví cunñi iñun vatyí tuhun cahín cuchino cava —catyí Nyoo chii.

⁶ Yahá cuan ta catyí tucu ra chí:

—Cha tandihi chingo cava vityin. Yuhu cuví ra xihna cui, ta yuhu cundoí nu ndihi tuhun. Ñáyivi cha ityi ndutya cha cuñi ñu tuhun yuhu, cucuhve ndutya cha chahá ñáyivi cha ma naa ca maa coho ñu, ta ñahri cutiyahvi ñu. ⁷ Ñu cha cuví chasaha chí ra ña vaha, cuñihi ñu tandihi ihya, tari noo cha cundoó chí ñu. Ta yuhu cucuvi Nyoo cuenda ñu ta maa ñu cucuvi ñu sehi. ⁸ Soco ñáyivi cha yuhví xaan, ñu cha ña chinó iñi, ñu cha quiñi iyó, ñu cha chahñi ñáyivi, ñu iyó chihin rayí, ta ñima yí ñu cuví, o ra iyó chihin ñusihi ta ñima ñasihi ra cuví, ñu tasi, ñu casacahnú xitohyo, ta tandihi ñu cuendu,

tandihí ñu cuan, tahán chí cuhun ñu chichí anyaya cahnu nu cayú ñuhu chihin azufre, nu cuví Tuhun Chihí Cu Uvi, nu tachi tuñi Nyoo chí añima ña vaha.

Nu nyehe ra Juan yoso caa cucuvi ñuu Jerusalén chaa

⁹ Tyicuan ta quichí noo ángel cha ucha tahan cuan, ra cha canyisó ndi ucha copa tyitú chihin ndi ucha tahan tindoho cuan. Ta cahán ra chihin ta catyí ra:

—Ñaha, ta cusañahi chuun yóó ñu cuví ñu yihí cuenda ra Cristo, ñu cha cuví tari ñasihi ra, tyi ra cuví Mbee Luhlu cuví ra —catyí ra chí.

¹⁰ Ta Tatyí Ii Nyoo chinyacá chí noo yucu cahnu ta sucun. Ta sañahá ra ñuu ii, ñuu Jerusalén cahnu cuan chí. Maa maa cuhva cha vachí noó ñuu cuan ityi andivi nu nyaá Nyoo, sañahá ra chí. ¹¹ Xiño xaan ñuu cuan chihin cha tyaquí Nyoo. Xiño xaan tari caá noo yuu tyaquí, tari caá yuu jaspe, ta xiño tari ino. ¹² Nicachico ñuu cuan sucun xaan sama. Ta iyó uchi uvi tahan yuvehe. Ta noo ángel nanyaá tahan tahan yuvehe. Ta ndi uchi uvi tahan sivi tata ñáyivi Israel nyaá yuvehe cuan. ¹³ Uñi tahan yuvehe cuan nyaá ityi nu caña ñanyii. Ta uñi tahan ityi norte. Ta uñi tahan ityi tyañuhu. Ta uñi tahan ityi nu quee ñanyii. ¹⁴ Uchi uvi tahan yuu yihí nu sama ra nu cacú chaha chí. Ta nuu yuu cuan nyaá sivi ndi uchi uvi apóstol cuenda ra cuví Mbee Luhlu.

¹⁵ Ta ángel cha cahán chihin cuan, yihí ndaha ra noo yutun xuhun cuan, vatyí chihin cuan cutycuhva ra ñuhú ñuu cuan, ta yuvehe ta nu sama nicachico ñuu cuan. ¹⁶ Cumi tahan tutun ñuu cuan nyaá. Ta inuu ri cuhva cha quehen ta cha cañi. Ta ángel cuan tyicuhva ra ñuu cuan chihin yutun xuhun cuan cuan. Ta tyicuhva ra, ta quitá uvi mil uvi cientu kilómetro. Ta inuu ri cha cañi ta cha sucun ta cha quehen. ¹⁷ Tyicuan ta tyicuhva ra nu sama nicachico ñuu cuan. Ta quitá uñi xico cumi metru cha cocon, tari tyicuhvá ñáyivi, tyicuan caa tyicuhvá ángel cuan.

¹⁸ Chihin yuu jaspe samá yuhu ñuu cuan. Ta maa maa ri xuhun cuan cuví ñuu cuan. Tari caá noo ino cha ndi vavaha, tyicuan caa. ¹⁹ Ta yuu cha cuví cimientu cuan tandihí ri maa nuu yuu tyaquí cuví: yuu cha xihna ri cuví jaspe; yuu cha cu uvi cuví yuu zafiro; yuu cha cu uñi cuví yuu ágata; yuu cha cu cumi cuví yuu esmeralda; ²⁰ ta yuu cu ohon cuví yuu ónice; ta cha cu iñu cornalina; ta cha cu ucha crisólito; ta cha cu uña berilo; ta cha cu ñin topacio; ta cha cu uchi crisoprasa; ta cha cu uchi ñin jacinto; ta yuu cu uchi uvi cuví amatista. ²¹ Ndi uchi uvi yuvehe cuan cuví chí uchi uvi tahan perla. Tahan tahan yuvehe cuan, ta chingo

chi chihin noo ri perla. Ta nu cuví ityi cahnu ñuu cuan, maa ri maa xuhun cuan cuví, tari ino cha xiño.

²² Ni noo vehe ñuhu ña nyehí chichi ñuu cuan, vatyi Sutu yo Nyoo, ra iyó tandihí tun-yeé iñi chii, ican cuví vehe ñuhu ñu cuan, ta tyicuan caa tucu ra cuví Mbee Luhlu. ²³ Ñuu cuan ña chiñuhú cha sacundichín ñanyii. Ta ni cha ndichin yoo ta ña chiñuhú. Vatyi suri maa cha ndichin Nyoo chihin ra cuví Mbee Luhlu cuví cha sacundichin chichi ñuu cuan. ²⁴ Tandihí ñu cha cacú añima, cucaca noo ñu nu ndichin ñuu cuan. Ta ra cacuví rey siqui ñuhu ñáyiví cunyaca ra cha tyayii ra ta cuhva cuenda ra tandihí cha cahnu cacuví ra chi ñuu cuan. ²⁵ Ta ma nacunyasi yuvehe cha ñicahñu, ta yucuan ma coo cha cha cuaa. ²⁶ Ta tandihí cha tyayii, ta cha cahnu, cha iyó siqui ñuhu ñáyiví cuchaa chi nya ñuu cuan. ²⁷ Soco ma cuví quihví cha quíni caa. Ni noo ñu sacuví cha quíni caa, ni ñu cuendu ma cuví quihví ñu. Noo ri maa ñu nyaá sivi nu libru ra cuví Mbee Luhlu cuquihví ñu, vatyi cuconyito ñu chihin ra tyicuan ri maa.

22

¹ Tyicuan ta sañaha ángel cuan noo yuvi cuii vavaha chii. Nduya cha chahá cha conyito yo cuví. Cuii vavaha tari noo yutyí ñu. Ta quitá yuvi cuan nuu nyaá tyayu Nyoo ta nu nyaá ra cuví Mbee Luhlu. ² Mahñu ityi cahnu ñuu cuan ta ninduvi chiyo yuvi cuan, nanyaá yutun cha chahá cha conyito yo. Ta uchi yui chaha cha noo cuiya chahá tun chiti. Tahan tahan ri yoo chahá tun chiti. Ta ndaha tun, vaha cha cuví tatan chi ñáyiví iyó siqui ñuhu ñáyiví. ³ Ñuu cuan, ñahri maa cha ña vaha cucoo vatyi yucuan nyaá Nyoo nu tyayu ra ta cucunyaca ñaha ra chihin ra cuví Mbee Luhlu. Ta cusacahnu ñu cuenda ra chi ra. ⁴ Ta cunyehe ñu chi ra chihin nuu ñu. Ta cua cunyaa sivi ra tyaan ñu. ⁵ Ta ma coo ca cha cha cuaa yucuan. Ta ñu coo yucuan ma cuchíñuhu ñuhu lámpara chi ñu, ni ñuhu ñanyii. Vatyi Nyoo Sutu yo cusacundichin ra nu nyicú ñu. Ta maa ñu cucunyaca ñaha ñu chihin ra tyicuan ri maa.

Nu sañahá chi vatyi cha cuyatyn quichi ra Cristo

⁶ Tyicuan ta catyí ángel cuan chii:
—Ihya tuhun ndicha cuví, ta cuví cunii iñun vatyi cuchino cava tuhun ihya. Ta suri maa Sutu yo Nyoo ra cahán chihin yuhu ra cacuví profeta cuenda ra ta cha naha, ican ra tachí ra chi ángel ra, vatyi sañaha ra chi ñu sacuví tyiño nuu ra yoso caa cucuvi cha nuni ri —catyí ra.

Ta catyí Sutu Mañi yo:

⁷—¡Cha cuñi quichi! —catyí ra.

¡Sii xaan cuñi ñu cha sacuví cuhva cahán tuhun Nyoo cha nyaá nu libru ihya!

⁸ Yuhu ra Juan, chiñi tuhun ihya. Ta nyehí tandihí ihya. Ta cha yaha nyehí ta chiñi, chicuñi chiti chaha ángel cha sañaha cuan chii, vatyi sacahni chi ra. ⁹ Soco maa ra catyí ra chii:

—Ma sacahnnun chii, vatyi yuhu, musu Nyoo cuví, tari yoho. Ta yañun cuví, tari ra yañi yo cha cacuví profeta cuenda Nyoo, ta tari tandihí ñu quichahá tuhun cha nyaá nu libru ihya. Chi Nyoo tahán chi sacahnu yo —catyí ra chii.

¹⁰ Ta catyí tucu ra chii:

—Ma tixehun tuhun Nyoo cha nyaá nu libru ihya, vatyi cha cuyatyn quivi cha cuchino cava chi. ¹¹ Soco saña chi ñu quiñi iyó, na sacuvi ca maa ñu cuhva cuñi maa ñu. Ta ñu sacuví cuatyi na sacuvi ca maa ñu. Soco ñu sacuví cha vaha, na sacuvi ca ñu cha vaha. Ta ñu ii, ñu nacuhva cuenda añima chi Nyoo, na cu ñi ca iñi ñu chihin ra —catyí ra chii.

¹² Ta Sutu Mañi yo catyí ra:

—Nyehe ndo. Cha cuyatyn quivi quichi. Ta cutiyahvi chi tahan tahan ñáyiví yoso cuhva cha sacuví ñu, tatu cha vaha o cha ña vaha. ¹³ Yuhu cuví ra xihna cuiiri ta yuhu cundoio nu ndihí tuhun, yuhu iyé nu quichaha tandihí ta cucco que nu cundihí tuhun —catyí Sutu Mañi yo.

¹⁴ Sii xaan cucuvi chi ñu sanduvii sahma o añima cuví cuan, vatyi coo ityi chi ñu cachi ñu chiti yutun cha chahá cha conyito añima yo tyicuan ri maa. Ta cuví quihví ñu yuvehe ñuu cuan. ¹⁵ Soco ñu cha sacuví cha quíni caa, ñu tasi, ñu cha iyó chihin tahan, ta ñima ñashi ra o yii ñu cuví, ñu chahñi ñáyiví, ñu sacahnú xitohyo, ta tandihí ñu ñi cuendu ta sandavi ñaha ñu, tandihí ñu cuan, cundoo ñu ityi chata ñuu cuan.

¹⁶ Ta catyí tucu Sutu Mañi yo:

—Yuhu ra Jesús, sacuhin chi ángel cuende vatyi sacoto ra tandihí tuhun ihya chi ñu nyicú vehe ñuhu. Yuhu cuví ñáyiví chahnu chi rey David. Ta vachi tiqui tata ra ñandihí. Ta cuví tiqui tiño cahnu cha xiño, cha caña cha ñaa ca —catyí ra.

¹⁷ Tatyí Ii Nyoo ta ñashi ra cuví Mbee Luhlu cha cuví ñu cuenda ra, catyí ñu tyehe caa:

—Ñaha, Sutu Mañi yuhu —catyí ñu.

Ta ñu chiñi tuhun ihya, ta catyí ñu chi ra:

—Ñaha —catyí ñu.

Ta ñu ityi ndutya cha conyito yo chihin, ta tandihí ñu cuñi quichi, na quichi ñu ta coho ñu ndutya cha chahá cha conyito añima yo, ta ñahri cutiyahvi ñu.

¹⁸ Ta yuhu catyí chi tandihí ndo cha chiñi ndo tuhun Nyoo cha nyaá nu libru ihya, yuhu sacoté chi ndo noo tuhun ihya: Tatu nya noo ñáyiví sanducuaha ca ñu tuhun

ihya, Nyoo cunatyiso ca ra tindocho cha nyaá nu libru ihya siqui ñu. ¹⁹ Ta tatu nya noo ñáyiví tinyaa ñu suhva tuhun Nyoo cha nyaá nu libru ihya, Nyoo cu tinyaa ra cha tahán chi chi ñu cha nyaá nu libru cha cahán chi tuhun cha cuconyito ñu tyicuan ri maa ta cucoo ñu ñuu ii cuan. Ta ma tahan ca chi chi ñu cha vaha cha cahán nu libru ihya. ²⁰ Ta Sutu Mañi yo ra cha chahá cuenda ihya

catyí ra tyehe caa:

—Cha ndicha vatyí cha cuñí quichi —catyí ra.

Ta yuhu catyí:

—Na cuvi chi tyicuan caa. Ñaha, Sutu Mañi yuhu, Jesús —catyí yuhu.

²¹ Na naquehen tandihí ndo cha vaha chahá Sutu Mañi yo Jesucristo chi yo. Ta na cuvi chi tyicuan caa.